



# Tuhun saá ña najándacoo Jesucristo nu yo: El Nuevo Testamento en el mixteco de Silacayoapan

Silacayoapan Mixtec New Testament

## Contents

San Mateo . . . . .	1
San Marcos . . . . .	53
San Lucas . . . . .	84
San Juan . . . . .	141
Hechos . . . . .	182
Romanos . . . . .	233
1 Corintios . . . . .	254
2 Corintios . . . . .	275
Gálatas . . . . .	288
Efesios . . . . .	296
Filipenses . . . . .	303
Colosenses . . . . .	308
1 Tesalonicenses . . . . .	313
2 Tesalonicenses . . . . .	317
1 Timoteo . . . . .	320
2 Timoteo . . . . .	326
Tito . . . . .	330
Filemón . . . . .	333
Hebreos . . . . .	334
Santiago . . . . .	349
1 Pedro . . . . .	355
2 Pedro . . . . .	361
1 Juan . . . . .	365
2 Juan . . . . .	370
3 Juan . . . . .	371
San Judas . . . . .	372
Apocalipsis . . . . .	374

# Tuhun saá ña najándacoo Jesucristo nu yo: El Nuevo Testamento en el mixteco de Silacayoapan

New Testament in Mixtec, Silacayoapan (MX:mks:Mixtec, Silacayoapan)  
copyright © 2009 Wycliffe Bible Translators, Inc.

© 2009, Wycliffe Bible Translators, Inc. All rights reserved.

Language: Mixtec, Silacayoapan

Translation by: Wycliffe Bible Translators, Inc.

Mixtec, Silacayoapan

mks

Mexico

## Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Silacayoapan

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright information.

You do not sell this work for a profit.

You do not change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

ISBN 978-1-5313-0427-0

---

PDF generated on 21 Sep 2016 from source files dated 21 Sep 2016

7f2d3ecf-6d15-55a5-9081-6e970474df2f

This print-on-demand edition of Scripture is designed, produced, and provided at cost by the Digital Bible Society. This is made possible through partnerships with the Bible League of Canada, Open Doors International and other missions and translation agencies. We are deeply grateful for the sacrifices made in translating this edition of Scripture and the generosity of others in making this Bible available to you.

To order additional copies of this Bible or hundreds of translations like it or to learn more about our ministries and the mission of Scripture distribution in every language, we invite you to visit [www.DBS.org](http://www.DBS.org) (USA), [www.BibleLeague.ca](http://www.BibleLeague.ca) (Canada), and [www.OpenDoors.org](http://www.OpenDoors.org) (Europe). May God bless your work in sharing and teaching these Scriptures, until, as it is written, the earth is “*filled with the knowledge of the glory of the LORD, as the waters cover the sea.*” (Habakkuk 2:14)

---

## Tuhun vaha nacahyí Mateo sahá ña nacaja Jesucristo

*Chichi naquixi Jesucristo  
(Lc. 3:23-38)*

<sup>1</sup>Ña yóho cíú quivi na nasaçuu tásáhnu jíco Jesucristo, mé a naquixi chichi David xihín chichi Abraham:

<sup>2</sup> Abraham nasaçuu tátá Isaac ta Isaac nasaçuu tátá Jacob ta Jacob nasaçuu tátá Judá xihín java ga ñani da. <sup>3</sup>Judá nasaçuu tátá Fares xihín Zara ta náná ndíví da yóho nasañaní ña Tamar. Ta Fares nasaçuu tátá Esrom ta Esrom nasaçuu tátá Aram. <sup>4</sup>Ta Aram nasaçuu tátá Aminadab ta Aminadab nasaçuu tátá Naasón ta Naasón nasaçuu tátá Salmón. <sup>5</sup>Ta Salmón nasaçuu tátá Booz, da cíú jahyi ña naní Rahab. Booz nasaçuu tátá Obed ta Obed yóho nasaçuu da jahyi ña naní Rut cán. Ta mé Obed yóho nasaçuu tátá Isaí. <sup>6</sup>Ta Isaí nasaçuu tátá rey David ta rey David yóho nasaçuu tátá Salomón, da cíú jahyi ña nasaçuu nájílhí Urías nu cuítí cán.

<sup>7</sup> Ta Salomón nasaçuu tátá Roboam ta Roboam nasaçuu tátá Abías ta Abías yóho nasaçuu tátá Asa. <sup>8</sup>Ta Asa nasaçuu tátá Josafat ta Josafat nasaçuu tátá Joram ta Joram nasaçuu tátá Úzias. <sup>9</sup>Ta Uzías nasaçuu tátá Jotam ta Jotam nasaçuu tátá Acaz ta Acaz nasaçuu tátá Ezequías. <sup>10</sup>Ta Ezequías nasaçuu tátá Manasés ta Manasés nasaçuu tátá Amón ta Amón nasaçuu tátá Josías.

<sup>11</sup>Ta Josías nasaçuu tátá Jeconías xihín java ga ñani da. Ta nasaçuu da tiempo tá natiin soldado na Israel já nasañdaca ñahá da na cán ñuu Babilonia.

<sup>12</sup>Ta tá nasaçuu na Israel ñuu Babilonia cán já nacacu Salatiel ta tátá Salatiel nasaçuu Jeconías. Ta Salatiel nasaçuu tátá Zorobabel. <sup>13</sup>Ta Zorobabel nasaçuu tátá Abiud ta Abiud nasaçuu tátá Eliaquim ta Eliaquim nasaçuu tátá Azor. <sup>14</sup>Ta Azor nasaçuu tátá Sadoc ta Sadoc nasaçuu tátá Aquim ta Aquim nasaçuu tátá Eliud.

<sup>15</sup>Ta Eliud nasaçuu tátá Eleazar ta Eleazar nasaçuu tátá Matán ta Matán nasaçuu tátá Jacob. <sup>16</sup>Ta Jacob nasaçuu tátá José, da nasaçuu yíí María. Ta María cíú ña nasaçuu náná Jesucristo, mé a nachindahá Ndióxi cacomí a cuéntá sahá ñayivi.

<sup>17</sup>Ña cán quéá jandá tá nacasáhá cácu jahyi Abraham jandá quiahva naxínu coo a quivi nacasáhá cácu jahyi David já nayaha uxu comí generación. Ta tá quiahva nacasáhá cácu jahyi David jandá quiahva natiin na Babilonia na Israel já ñéhe ñahá na cuahán na nayaha inga uxu comí generación nani nasanduu na Israel ñuu Babilonia jandá quiahva naxínu coo quivi nacacu Jesús, mé a nachindahá Ndióxi cacomí a cuéntá sahá ñayivi.

*Tá nacacu Jesús  
(Lc. 2:1-7)*

<sup>18</sup>Joho nasañin tá nacacu Jesucristo: Mé María, ña cacuu náná Jesús cán sa nasañan ña tuhun ña ña tandahá ña xihín José. Joo tá cámání coo da xihín ña já nacandaa ini da ña ñuhu jahyi ña. Ta ña yóho nasaçuu a ña nacaja ínima yíí Ndióxi. <sup>19</sup>Ta José, da cacuu yíí María cán cíú dá da cája ndinuñu ña ndaa. Ta nacahán da ña nasañin ña xihín inga dataa joo coó naxeen de cahan nuu da sahá ña nuú ñayivi. Sahá ña cán quéá nasaçuu ini da jándacoo jehé dā ña. <sup>20</sup>Ta nani cáhvi ini da sahá ña caja da anda jáví naquixi in sani nu dá ta nandaca náhá in tátó Ndióxi nu dá. Ta tañu mé sani cán nacahán xihín dá. Já nacachi a já:

—José, da naquixi chichi David, a cayíjhí tohún tandahún xihín María jan jáchi nacaja ínima yíí Ndióxi ña ñuhu jahyi ña. <sup>21</sup>Ta tá sa nacacu jahyi María já chicaan ndó quivi á ná cananí a Jesús jáchí jácacu a ñayivi nuú cuachi tá ná candee ini na mé á —nacachi a.

<sup>22</sup>Tóco ndihí ña yóho nayaha ña ná xinu coo nuú tuhun Ndióxi ña nacahyí in profeta sanahá ndivaha cán ta já nacachi dā cán já:

<sup>23</sup>Vaxí quivi cañuhu jahyi in ñá tacú, ñá a ñahá coo taa xihín.

Ta tá sa nacacu jahyi ña cán já cacu na quivi á cananí a Emanuel.

Ta tuhun yóho cíúñi cachí a: fin Ndióxi xoho.

<sup>24</sup>Ta tá nandicáxi ini José já nacaja da tá fin nacachi tátó Ndióxi cán xihín dá. Ta já natañdaha dā xihín María. <sup>25</sup>Joo coó nasañin da xihín ña tá quiahva fin in dataa xihín nájílhí dā jandá quiahva cacu jahyi María. Ta tá nacacu a cán já nasaçu José quivi á cananí a Jesús.

## 2

Tá naxito nihni na ndichí Jesú

<sup>1</sup> Ta nacacu Jesú in ñuu naní Belén ña ndácaan estado Judea. Ta mé tiempo cán násacomí rey Herodes cuéntá sahá nación Israel. Ta mé tañu já naxinu coo java na ndichí ñuu Jerusalén. Mé ná ndichí yóho cíuú ná na jácua ha xihín quími ta naquixi na chí nu cána cándii. <sup>2</sup> Ta tá naxinu coo na ñuu Jerusalén já nandaca tuhún na ñayivi já nacachi na já:

—Ndájá íin da loho nacacu viti jan, da cacuu rey nuú na Israel. Jáchí naxini nde naqueta quími nuú nde ta xihín rí yóho sa nacanda ini nde ña sa nacacu da. Ta viti vaxi nde yóho caja cahnu nde dá —nacachi na ndichí cán ndáca tuhún na.

<sup>3</sup> Ta tá naxini joho rey Herodes ñá yóho já nacasáhá dá ndíhi ndiváha ini da ta quiqhva já nacasáhá ndíhi ini tóco ndíhi ñayivi ñuu Jerusalén cán. <sup>4</sup> Sahá ña cán quéa nacana rey Herodes cán tóco ndíhi na sacuahá nuú jutu xihín na jánhá ley Moisés cán. Ta já nandaca tuhún da na sahá ndá ñuu cíuú nu cáchí tuhun Ndióxi cacu da nasahan Ndióxi tuhun a chindahá a cacomí a cuéntá sahá ñayivi. <sup>5</sup> Já nacachi na cán já xihín dá:

—Ñuu Belén, ña ndácaan estado Judea cán cíuú nuú cáchí tuhun Ndióxi cacu da jáchí quiqhva já nacahyí in profeta sanahá tá nacachi da já:

<sup>6</sup> Vatí ñuu Belén, ña ndácaan estado Judea, cíuú á in ñuu loho ndiváha tañu ñuu náhnu cán joo fín sahá a,

jáchí tañu ñayivi ñuu cán ndindita in dá cacomí cuéntá sahá na Israel, na cíuú cuéntá Ndióxi, já nacahyí in profeta sanahá.

<sup>7</sup> Tá nandihí já nacana xóo rey Herodes na ndichí cán ta já nandaca tuhún da na cán saha ndá quími nanaha quími cán mé rí nu ná. <sup>8</sup> Andá já nacahindahá dá na ñuu Belén. Já nacachi da já xihín ná:

—Cuáhán ndo ñuu Belén cán ta ndaca tuhún vaha ndó ndaja cása sahá tga loho nacacu jan. Ta tá sa nandiñehe ndó a já quixi ndó caxi tuhun ndó xihín i já ná cuhun ri yehé va caja cahnu i ña —nacachi Herodes xihín na.

<sup>9</sup> Ta xihín ña yóho naquee na ndichí cuahan tucu na. Ta quími, rí naxini na nu cuítí cán já ndáca tucu rí na cuahán na. Ta tá naxinu rí chí nuú fín mé a loho cán anda já nasacandichi rí. <sup>10</sup> Ta cajíi ndiváha ini na

tá xíni na mé quími cán. <sup>11</sup> Tá nandihí já naquihvi na ini vehe já naxini na mé a loho cán xihín María, náná a. Ta já nacaxítí na nu á ta já nacaja cahnu na ña. Ta tá nandihí já naxuná na yuhú sato ñehe na ta já nacoco na jiuuhun cuáan nuú a xihín jusa vaha xihín in ña támi sahan naní mirra nu mé a loho cán. <sup>12</sup> Tá nandihí já naquixi in sani nu ná ta xihín mé sani cán nacachi Ndióxi xihín ná ña ná a ndicó coo na chí nu fín rey Herodes. Sahá ña cán quéa nandijama na íchi cuánuhu ná ñuu na.

Tá ñehe na Jesú cuahán na Egípto

<sup>13</sup> Ta tá sa naquee na ndichí cán cuahán na já naquixi in sani nuú José ta nandaca náhá in tátó Ndióxi nu dá. Já cachí a já xihín dá:

—Cuándacoún ndiquehe ña loho jan xihín María, náná a ta cunún cuhun xihín ná chí nundahyí nación Egípto. Ta cán coún xihín ná janda quiahva ná caxi tuhun i xuhun. Jáchí caca nuu Herodes ndinducú dá ña loho jan ña cahni ñahá dá —nacachi tátó Ndióxi cán xihín José.

<sup>14</sup> Andá já nandacoo José já naquehe da Jesú xihín María, náná a já naqueta ñuu na cuahán na chí Egípto. <sup>15</sup> Ta cán nasaanduu na janda quiahva naxihí Herodes. Tóco ndíhi ñá yóho nayahá já ná xínu coo nuú tuhun nacachi Ndióxi sanahá tá nacahyí in profeta já: “Nasahiin jahyi i nación Egípto ta nacana i dá ná ndicó coo da”, cachí tuhun Ndióxi.

Tá nasaahnda Herodes chuun ña ná cahni na na valí

<sup>16</sup> Ta ndaja coo naxini Herodes cán ña najándahvi na ndichí cán dá sahá ña coó naxinu ga na nu dá. Ña cán quéa a juú quiahva naxojo ini da. Ta chí nasaahnda da chuun ña ná cahni ndíhi na taa valí, na iví cuia chí ninu, mé na ndúu ñuu Belén xihín ñuu valí cátáhan xihín á. Jáchí sa nacaxi tuhun na ndichí cán xihín dá ña naxini na mé quími andá tátuhun iví cuia. <sup>17</sup> Ta tá nandihí naxihí na valí yóho já naxinu coo nuú tuhun nacahyí profeta Jeremías sanahá ndiváha tá nacahyí da já:

<sup>18</sup> Ñuu Ramá jandá joho ndáhví tacú cayuhú cohó ñáñáhá sácu ñá.

Ta ñá sácu yóho cíuú ñá Raquel. Sácu ñá sahá jahyi ñá.

Ta co cúní ñá ndicó ini ñá jáchí naxihí jahyi ñá, cachí tuhun Ndióxi.

<sup>19</sup>Joo tá sa naxihí Herodes já náquixi tucu sani nuý José nu íin da nación Egipto cán. Ta nandaca náha in táto Ndióxi nu dá já cachí a já xihín dá:

<sup>20</sup>—Cuándacoún ta ndiquehe Jesús xihín María, náná a ta cuahán ndicó coo xihín na chí ñundáhyi Israel. Jáchí sa naxihí va na ndúcú cahní ña loho jan —cachí táto Ndióxi.

<sup>21</sup>Anda já nandicoo José ta ñéhe da Jesús xihín María, náná a cuahan ná ndicó coo na chí ñundáhyi Israel. <sup>22</sup>Joo tá nañehe da tuhun ña nandicojo Arquelao chuun cacuu da rey nu Herodes, tátá dà já nayilví José cuhún dà chí estado Judea. Ta sahá ña sa nacaxi tuhun táto Ndióxi tañu sani nu dá sahá ña cán quéa nandijama da íchí ta cuahan dà chí estado Galilea. <sup>23</sup>Ta naxiñu coo na in ñuu naní Nazaret nuý nañanduu na. Ta xihín ña yóho naxiñu coo nuý tuhun naçahyí na profeta sañahá ña cacuu Jesús dà ñuu Nazaret.

### 3

Tá naçasáhá Juan, da jácandúta ñayivi cahán ndojó dà yucú íchí cán

(Mr. 1:1-8; Lc. 3:1-9, 15-17; Jn. 1:19-28)

<sup>1</sup>Mé tiempo cán Juan, dà jácandúta ñayivi naxiñu dà yucú íchí cuénta estado Judea cán. Ta naçasáhá jánaha dà ñayivi. <sup>2</sup>Já cachí dà já xihín ná:

—Xíní ñúhu jándacoo ndó ña núu cája ndó ta ndicó coo ini ndó nu Ndióxi jáchí sa naçayati quívi cacomí Ndióxi cuénta sahá ñayivi —cachí dà xihín ná.

<sup>3</sup>Mé Juan yóho cútú dà dà naçahan profeta Isaías sahá tá naçahyí dà já:

Vaxi quívi tá cahán cóhó in da tañu yucú íchí ta cachi da já xihín ñayivi:  
“Caja tiähva ndó íchi nuý quixi xitoho í, ta cuná ndó in íchí ndacú nu mé á ña ná ndihvi a íníma ndó”, cachí tuhun Ndióxi.

<sup>4</sup>Tajáhma nañandixi Juan yóho nañacuu a ña naçaváha na xihín íji camello ta nañandico in nií jáhdá tóco dà. Ta nañixi da tica xihín ñuñu yúcú. <sup>5</sup>Ta naqueta ñayivi ndúu ñuu Jerusalén xihín na ndúu estado Judea xihín na ndúu ñundáhyi yati yuta Jordán cán nañaq ná nu Juan taa joho na nu cahán dà. Ta tá nañahma na cuahí na nu Ndióxi já na jácandúta Juan ná ini yuta Jordán.

<sup>7</sup>Joo tá naxini Juan ña jända joho xínu coo cuahá na fariseo xihín na saduceo nu dá ña ná jácandúta dà na já naçasáhá xójo ndiváha ini da ta já naçachi da já xihín ná:

—Mé ndó cútú ndó tátuhun coo jáchí cútú ndó na quini. Cáhán ndó ña a jándoho ga Ndióxi ini ndó sahá cuahí ndó tá ná candúta ndó vatí caja tá caja ndó cuahí.

<sup>8</sup>Xíní ñúhu caja ndó ña vaha já ná cuni ñayivi ña mé a ndaa táhyí na jándicoo ndó ña núu naçacaja ndó jihna. <sup>9</sup>Ta a cahán ndó ña jácacu Ndióxi ndohó sahá ña cútú ndó na naquixi chichi Abraham. Jáchí coó sahá toho ña jan nu Ndióxi tá co jándacoo ndó cuahí ndó. Jáchí mé a ndaa ná cahan i xihín ndó ña janda yuu ndúu nu ñúhu jan cuu caja Ndióxi ña ná nduu a ñayivi quixi chichi Abraham. <sup>10</sup>Mé ndó cútú ndó tátuhun in yíto, dó sa natiin na hacha cuahán na cahnda na. Ta tóco ndihí yíto, dó co sahan cuihi vaha nuý, tähnda dò ta quee dò nu ñúhu cayí do. Quiahva já caja ri Ndióxi xihín ndó ta co cúní ndó ndicó coo ini ndó nu mé á. <sup>11</sup>Mé a ndaa caja ndútá i ndóho xihín ticuñi ta xihín ña yóho náha ña nandicó coo ini ndó nu Ndióxi. Joo vaxi inga da ta dà cán cútú dà jándicutú íníma ndó xihín íníma yii Ndióxi ta ña cán cacuu a tátuhun ñúhu cayí. Ta dà cán íin cuahá chágá ndée dà a juú ga yehe. Ta chí coó sahá i ndica xítí i nu dá ña ndaxí i correá ndusa dà. <sup>12</sup>Mé dà vaxi cán caxi da ñayivi vaha tañu ñayivi quini. Cútú á tátuhun in dàtaa tá jáxi xi da trigo xihín pala já ná quee xehe á já cacu vaha da ña. Ta xehe naçana cán cuhún a cayí a xihín ñúhu itá ña a ndáhva toho —cachí Juan xihín ná cán.

Tá naçandúta Jesús

(Mr. 1:9-11; Lc. 3:21-22)

<sup>13</sup>Naquee Jesús chí estado Galilea cuahán yuta Jordán nu ndácaan Juan jácandúta dà ñayivi ña ná jácandúta dà mé á. <sup>14</sup>Joo nu cuítí coó nañexen toho Juan jácandúta dà Jesús. Ña cán quéa naçachi da já xihín Jesús:

—Yóho cútú dà ndítahan jácandúta yehe. Ta cåa joho vásún yóho ña ná jácandúta i yóho —naçachi Juan cán xihín Jesús.

<sup>15</sup>Já nañducú nehe Jesús tuhun nu dá já naçachi a já xihín dà:

—Candehé. Quiahva já ndítahan coo ña yóho viti jáchí ndítahan nu yo jáxiñu coo i tóco ndihí ña ndaa ña nañacuu ini Ndióxi coo —naçachi a.

Xihín ña yóho nacandúsa Juan ta chí najácandúta dá Jesús. <sup>16</sup> Ta tá nandihi nacandúta Jesús já naqueta ini ticuij cán. Anda já nanuná indívita naxini Jesús nanuu íníma yii Ndióxi jatá ta nasacaa tá quiáhva cáaa in ndíjata. <sup>17</sup> Tá nandihi já naxini joho a cähán in a indívita já cachí a cán já:

—Yóho cíúna jahyi maní i ta cáii ndiváha ini i xuhun —nacachi a.

## 4

Xito ndojó tiñáhá sacuahá Jesús  
(Mr. 1:12-13; Lc. 4:1-13)

<sup>1</sup> Tá nandihi já ndáca íníma yii Ndióxi Jesús cuáhan chí yucú íchí nyú co ndúu ñayivi já ná coto ndojó tiñáhá sacuahá mé á.

<sup>2</sup> Ta cán nasahii a tixi ivi jíco quiwi. Ñuu ta ndiví coó naxixa a ta tá nandihi já naxinu joco nu á. <sup>3</sup> Já naçayati tiñáhá sacuahá nyú Jesús ña coto ndojó ñahá ri já nacachi rí já xihín á:

—Tá ta jivi ndusa jahyi Ndióxi cíúna cahnda chuun ña ná nduu yuu yóho pan —nacachi rí cán xihín Jesús.

“Anda já nacachi Jesús já xihín rí:

—Já cachí tuhun Ndióxi: “A juú pan cuití cuxu ñayivi já catacu na, vaha. Xíní ñuhúri a caja na ña sáhndá tuhun Ndióxi nu ná já quéa cuu catacu na nu Ndióxi” —nacachi Jesús xihín rí.

<sup>5</sup> Tá nandihi já ndáca tiñáhá sacuahá cán Jesús cuáhan xihín rí ñuu Jerusalén, ña yii cán ta já najándaa rí a nu jíco jiní veñihu cähnu ndácaan cán. <sup>6</sup> Ta já nacachi rí já xihín á:

—Tá ta jivi ndusa jahyi Ndióxi cíúna jácana mún chí njunu jáchi já cachí tuhun Ndióxi: Cahndá Ndióxi chuun nu tátó mé á ña ná canda na yghó.

Ta ndinehe ndáha na yohó,  
já quéa ná a ndícuhe sahun tá ná cachi-  
hin sahun xihín yuu, já cachí tuhun  
Ndióxi —nacachi rí xihín Jesús.

<sup>7</sup> Ta já nanducú nehe Jesús tuhun nu rí já nacachi a já xihín rí:

—Cachí tucu tuhun Ndióxi já: “A cóto ndojó tohún Ndióxi, xitohún” —nacachi Jesús xihín rí.

<sup>8</sup> Ta tá nandihi já ndáca tucu tiñáhá sacuahá cán Jesús nasahán xihín rí in jini yúcu jíco ndiváha. Ta já nanahá rí ndaja

táhan ñuu ndúu ñuyíví nu á ta najánaha rí tóco ndhi ña náhnu ndúu cán nu á. <sup>9</sup> Ta já nacachi tucu rí já xihín Jesús:

—Tóco ndhi ña yóho quiáhva i nyúnta ná caxítún nyú i caja cähnuñ yehé —nacachi rí quini cán xihín Jesús.

<sup>10</sup> Anda já nacachi Jesús já xihín rí:

—Satanás, cuáhán caxoo jáchi já cachí tuhun Ndióxi: “In túhún Ndióxi, xitohún ndítahan caja cähnuñ ta in túhún mé á ndítahan caja ndívún nyúnta” —nacachi Jesús xihín rí cán.

<sup>11</sup> Tá nandihi já naçaxoo tiñáhá sacuahá cán cuáhan ri. Ta já naxinu java tátó Ndióxi chindeé na Jesús.

Tá naçasáhá caxí tuhun Jesús tuhun Ndióxi nyú na estado Galilea  
(Mr. 1:14-15; Lc. 4:14-15)

<sup>12</sup> Tá naçehé Jesús tuhun ña nachicaan na Juan, da jácandúta ñayivi vecaa já naquee a cán cuáhan chí estado Galilea. <sup>13</sup> Joo coó naçando a ñuu Nazaret chí naquee a cuáhan coo a chí ñuu Capernaum ña ndácaan yuhú tañuhú, dó ndácaan ñundáhyi cuénta na naquixi chichi Zabulón xihín na naquixi chichi Neftalí. <sup>14</sup> Tóco ndhi ña yóho ñayahá ña ná xihín coó nyú tuhun naçahyí profeta Isaías sanahá ta naçahyí da já:

<sup>15</sup> Ñayivi ndúu ñundáhyi Zabulón xihín na  
ndúu ñundáhyi Neftalí,  
ña ñuhú inga xoo yuta Jordán yati yuhú tañuhú,

ta jári na ndúu Galilea, mé estado nu ndúu  
ñayivi, na co cíú chichi Israel,

<sup>16</sup> mé na cán naçanduu na nyú naá ndiváha  
ta viti naxini na in ñaha yéhe ndi-  
vaha.

Jándiyehé á nu ná ña ná a quívi na,  
joo catacu na anda ama cása quívi nu íin  
Ndióxi, naçahyí Isaías sanahá.

<sup>17</sup> Ta chí mé tiempo já naçasáhá Jesús  
cáhan ndojó a nyú ñayivi ta já cachí a já  
xihín ná:

—Xíní ñuhú jándacoo ndó cuachi caja  
ndó ta ndicó coo ini ndó nu Ndióxi jáchi sa  
naçayati quívi cacomí a cuénta sáhá ñayivi  
—nacachi Jesús.

Tá cása Jesús comí da tává tijacá ña ná  
caca tuun da xihín á

(Mr. 1:16-20; Lc. 5:1-11)

<sup>18</sup> Tá xica Jesús cuáhan yuhú tañuhú Galilea, naçinehá a ivi taa, da cíú ñani.  
In da naní Simón ta cähán na Pedro xihín

dá. Ta dā inga cán naní dā Andrés. Ndíví dā yóho cūú dā dā tává tiyacá ta ñúhu na jácana na ñúnú ná ini tañuhú cán. <sup>19</sup> Já nacachi a já xihín ndíví dā:

—Naha quíí ndó candíco ndó yéhe caca tuun ndó xihín i. Tává ndó tiyacá viti joo caja i ña ná cuu tavá ndó ñayivi tañu cuachi —cáchí a.

<sup>20</sup> Ta chí ivi láá najándacoo da ñúnú dā ta nandíco dā Jesús.

<sup>21</sup> Ta nani xíca Jesús cuahán chágá chí nuú já naxini a inga ivi tucu taa, da cūú ñani. In dā naní Jacobo ta inga dā naní Juan, dā cíu jahyi Zebedeo. Ta ndíví mé dā yóho ñúhu da ini barco dā xihín tátá dā ndája vaha da ñúnú dā. Ta nacana Jesús ndíví dā yóho.

<sup>22</sup> Ta chí ivi láá najándacoo da barco dā xihín tátá dā ta nacásáhá xíca tuun da xihín Jesús.

*Jánahá Jesús nuú cuaghá ndivaha ñayivi  
(Lc. 6:17-19)*

<sup>23</sup> Níi cíu estado Galilea naxica nuu Jesús cáhan tūhun vaha nuú ñayivi ini veñuhu in in ñuu cán. Cáxi tūhun a nu ná ña sa nandíndaas quíí cacomí Ndióxi cuénta sahá ñayivi ñuyíví. Ta nandaja vaha Jesús na quíí tá nuú cuehe ndóho na. <sup>24</sup> Ta níi cíu ñundáhyi cuénta Siria nandicuita nuu tūhun sahá ña cája Jesús. Sahá ña cán quéa néhe na na quíívi, na ndóho tá nuú cuehe vaxi na nu á ña ná ndaja vaha mé á na ta néhe na na ñúhu íníma quini ini xínu na nu á ta ndijáá na xíhi yíhí xihín na quíívi sahá néhe na vaxi na nuú Jesús. Ta nandaja vaha mé á na.

<sup>25</sup> Ta cuahá ndivaha ñayivi ndíco na Jesús. Cíu ná na naquixi estado Galilea xihín na ndíví uxu ñuu cuénta Decápolis xihín na ñuu Jerusalén xihín na estado Judea xihín na naquixi ñundáhyi chí xoo oriente nu ndácaan yuta Jordán cán.

## 5

*Tá cähán ndojó Jesús jiní yúcu  
(Lc. 6:20-23)*

<sup>1</sup> Tá naxini Jesús ña ndíco cuahá ndivaha ñayivi mé á já nandaa jiní yúcu ta já nasa-coo a cán. Ta nacayati na xíca tuun xihín á nu á. <sup>2</sup> Ta já nacásáhá jánahá nu tóco ndihí na ndíví cán já nacachi a já xihín ná:

<sup>3</sup> —Tahví nacuu ñayivi tá ndícoo na xíni ñúhu na ña chindeé Ndióxi na jáchi na cán cíu na cacomí Ndióxi cuénta sahá.

<sup>4</sup> Tahví nacuu na ndíví cuéhá jáchi na cán cíu na quiáhva Ndióxi tūhun ndéé ini.

<sup>5</sup> Tahví nacuu na co ndínehe jíco mé jáchi na cán cíu na ñehé tähví ndiquehe na ña nasa-han Ndióxi tūhun a quiáhva nu ná.

<sup>6</sup> Tahví nacuu na xíca ini caja ña cíu Ndióxi. Na cán cíu na caja Ndióxi ña ná xinu nuú ña cíu ini na.

<sup>7</sup> Tahví nacuu na cándáhví ini sahá ñayivi jáchi na cán cacuu na cándáhví ri ini Ndióxi saha.

<sup>8</sup> Tahví nacuu na co ndácaan quini íníma jáchi na cán cíu na cuni Ndióxi.

<sup>9</sup> Tahví nacuu na ndíhi ini ña ná coo vaha na xihín ñayivi jáchi na cán cíu na cachi Ndióxi cíu na jahyi mé á.

<sup>10</sup> Tahví nacuu na ndóho ini sahá ña cája na ña sáhindá Ndióxi nu ná caja na jáchi na cán cíu na cacomí Ndióxi cuénta saha.

<sup>11</sup> Tahví nacuu ndó tá cähán ñayivi xihín ndó ta cája xíxi na xihín ndó sahá ña candeé ini ndó yéhe. Ta tahví nacuu ndó tá jácojo na cuachi jíqui játa ndó sahá ña candeé ini ndó yéhe.

<sup>12</sup> Xíni ñúhu cajii ndivaha ini ndó ta coo vaha ini ndó jáchi ndiquehe ndó in ña vaha ndivaha caja Ndióxi indívi. Xíni ñúhu ndicuhun ini ndó ña quiáhva já nacaja xíxi na xihín na profeta, na nasa-han sahá.

Cíu yó tátuhun ñúhu jándiyehé nuú ñayivi ñuyíví

*(Mr. 9:50; Lc. 14:34-35)*

<sup>13</sup> Mé ndó cíu ndó tátuhun ñui yívi na. Sa xíni ndó ña cája ñui ña ná ndihají ñaha xíxi ndó. Ta quiáhva já cája ndó xihín ñayivi ñuyíví. Joo tá ná ndihí ña ghvá ñui cán a cíu ga ndicó coo a cahohvá tucu a sahá ña cán quéa jandá cuita va íchi cuaní nihni ñayivi ña jáchi coó chuun toho a.

<sup>14</sup> Jári mé ndó cíu ndó tátuhun ñúhu jándiyehé nuú ñayivi ndíví ñuyíví. Ta mé ñúhu cán cíu a tátuhun in ñuu cánúu játa in yucú jíco ta a cíu toho ndácaan jehé a. <sup>15</sup> Jáchi co chínúhu ná in lámpara ta tá nu ndihí já chíjehé na ña tixi in sató. Ña cája na xihín á quéa chínúu jíco na ña já ná jándiyehé a nu tóco ndihí na ndíví vehe.

<sup>16</sup> Quiáhva já xíni ñúhu ndihí ini ndó caja vaha ndó ña ná cacuu ndó tátuhun in ñúhu cají nuú ñayivi. Jáchi tá ná cuni na ña vaha caja ndó já quéa cuu caja cähnu na Ndióxi, tátá yo, ña fin indívi.

*Jánahqasahá ley Moisés*

<sup>17</sup> A juú cahán ndó ña naquixi i ñuyíví yóho ña cacu xóo i ña nasañhnda ley Moisés xihín ña najáñahá na profeta, vaha. Co váxi toho i cacu xóo i ña. Vaxi i nu ndó jáxinu coo i tóco ndihí ña cachí mé ley já ná naha i nu ndó ndífa cíuu ndusa ña. <sup>18</sup> Mé a ndaa ná cahan i xihín ndó ña e ndíhi sahá mé ley nani íin indívixihín ñuyíví yóho. Ni in túhún toho tihún, a ndíhi saha janda quiahva ná yaha tóco ndihí ña ndítahan yaha. <sup>19</sup> Sahá ña cán quéa ndá na co cúní caja ña sáhndá ley Moisés vatí cíuu á ña loho ndivaha ta ni co cúní na jánahá na ñayivi ña ná caja na ña cachí e já quéa cacuu na in na coó cuahá sahá tañu na cacomí Ndióxi cuéntá saha. Joo na cája ña cachí mé ley ta jánahá na ñayivi ña ná caja na ña, mé na cán cacuu na na cahnu ndivaha tañu na cacomí Ndióxi cuéntá saha. <sup>20</sup> Mé a ndaa ná cahan i xihín ndó ña tá ná caja cuití va ndó tá quiahva cája na jánahá ley Moisés xihín na fariseo já quéa e cuú ndíhvi ndó nuú cacomí Ndióxi cuéntá sahá ñayivi.

*Jánahqasahá ña co ndítahan cojo ini ñayivi (Lc. 12:57-59)*

<sup>21</sup> Mé ndó sa xíni ndó ña nacachi Moisés xihín tásáhnu jícó ndó sáhahá tá nacachi da já: “A cahní ndó ndii jáchí ndá na ná cahní ndíi tandaa quíví caja víjutixia sahá ná.” <sup>22</sup> Joo yehé cachí i xihín ndó viti ña ndá na ná caja cuehé xihín ñani táhan na tandaa quíví caja víjutixia sahá ná. Ta jári na cánahá xihín ñani táhan na, a cachí na cíuu ná ñayivi tachí já vaxi quíví tá candichi na nu juéxe cahnu ta cuu cuhun na indayá sahá.

<sup>23</sup> Sahá ña cán quéa tá ta ñéhe ndó in ñaha cuahan ndó jocó ndó nu ná Ndióxi ta nani cuahan ndó cán ndicuhun ini ndó ña íin in ñani táhan ndó ta co cúní táhan vaha na xihín ndó <sup>24</sup> já quéa mé jan yati nu ná ndítahan jándacoo tóo ndó ña ñéhe ndó jocó ndó jan. Ta ndítahan quee ndó cuhun ndó ndique táhan máni ndó xihín ñani táhan ndó cán. Ta tá ná ndihí já cuu ndicó coo tucu ndó nu ná Ndióxi jocó ndó ña najáñadacoo ndó jan.

<sup>25</sup> Tá sácú in na sahá ndó cuhun ndó vecaa ta cúní na candaca na ndohó cuhun ndó nu juéxe, xíni níuhú nducú ndó ndá quiahva ndique táhan máni ndó xihín na nani núná nu ndó caja ndó ña. Já quéa ná a

ndíquiahva na cán ndohó ndáha juéxe jáchi cuu ndiquiahva juéxe cán ndohó ndáha na policia ta chicaan na ndohó vecaa. <sup>26</sup> Mé a ndaa cachí i xihín ndó ña cañuhu ndó cán janda quiahva na chahvi ndó tóco ndihí jiuhún yícá ndo.

*Jánahqasahá cuachi cája in dataa tá cúní dä coo da xihín in ñá co cíuu ñajíhlí dä*

<sup>27</sup> Mé ndó sa xíni ndó ña nasañhnda ley Moisés chuun sáhahá ta já nacachi a já: “Coto a cóo ndó xihín ñajíhlí á yíi ñani táhan ndó.” <sup>28</sup> Joo yehé cachí i xihín ndó viti ña ndá da sándezeh in ñáñahá ta cahvi níu ini da xihín ñá já quéa cómi tá cómi dä cuachi nu Ndióxi jáchí cíuu á tátuhun sa íin da xihín ñá.

<sup>29</sup> Ña cán quéa cachí i xihín ndó ña tá nduchú níu cuáha ndó quéa jándacava ndohó nuú cuachi, tavá ndó ña jácana xícá ndó ña ná cuhun a jáchí vaha chágá ña ná ndihí sahá in nduchú níu ndó a juú ga ña ná cuhun in níi yíquí cuñu ndó ini indayá.

<sup>30</sup> Ta tá ndahá cuáha ndó quéa caja ña ná ndacava ndó nuú cuachi, chitúhun ndó ña ta jácana xícá ndó ña ná cuhun a jáchí vaha chágá ná ndihí sahá ndáha ndo a juú ga ña ná cuhun níi yíquí cuñu ndó ini indayá.

*Jánahqasahá ña co ndítahan nuú dataa jándacoo da ñajíhlí dä*

(Mt. 19:9; Mr. 10:11-12; Lc. 16:18)

<sup>31</sup> Ta mé ndó sa xíni ndó ña nasañhnda ley Moisés chuun sáhahá já cachí a já: “Ndá dä cúní jándacoo ñajíhlí dä ndítahan cavaha da in tutu quiahva da nu ña ta sa íin vaha va cuu jándacoo da ña.” <sup>32</sup> Joo yehé cachí i xihín ndó viti ña ni in túhún toho taa co ndítahan jándacoo da ñajíhlí dä. Jáchí ndá da jándacoo ñajíhlí dä cája da ña ná caja ña cuachi tá ná tandahá tucu ña. Jári da tándahá xihín ñá cómi ri dä cuachi nu Ndióxi. Joo tá ná candaq ini da ña íin ñajíhlí dä xihín inga dataajá quéa cuu ndusa jándacoo da ña.

*Jánahqasahá ña ndítahan caja na tá sáhan na tihún na nuú ñayivi*

<sup>33</sup> Mé ndó sa xíni ndó ña nasañhnda ley Moisés chuun sáhahá já cachí a já: “Xíni ñúhú jáxinu coo ndó tóco ndihí ña nasañhndó tihún ndó caja ndó tá tavá ndo quívi Ndióxi.” <sup>34</sup> Joo yehé cachí i xihín ndó viti ña ná quiahva ndó tihún ndó nuú ñayivi joo a tavá ndó quívi ni in ñaha. A tavá

ndó quiví indiví jáchí indiví cúú nu íín coo Ndióxi.<sup>35</sup> Ta ni a tává ndó quiví ñundáhyi jáchí ñundáhyi cúú nu sání mé á ta ni a tává ndó quiví ñuu Jerusalén jáchí cúú á ñuu nacaxi Ndióxi, mé á cúú á rey cahnu ndivaha.<sup>36</sup> Ta ni a tává ndó quiví yiquí jímí ndó tá sahan ndó tuhun ndó nuú ñayivi jáchí co ndéé ndó ndaja yaa ndó á ndaja tuún ndó ni in túhún ijí jini ndo.<sup>37</sup> Tá sahan ndó tuhun ndó nuú ñayivi xímí ñúhú cachi ndó: “Ajan, caja i ña.” Á tá coó xímí ñúhú cachi ndó: “Uhun, a cuú caja i ña.” Jáchí tá cachi ndó inga tuhun já caja ndó ña cúní ña quini.

*Jánahq Jesús ñaq ndítahan caja cahnu int sahá táchan ñayivi*

(Lc. 6:29-30)

<sup>38</sup> ‘Mé ndó sa xímí ndó ña nasahnda ley Moisés chuun sanahá já cachí a já: “Tá quiahva caja ñayivi xuhún quiähva já caja ri yóhó va xihín ná. Ta tá ná cani in da nduchú núnú já quéa ndítahan cani mún nduchú núnú da. Tá ná tavá ri yóhó va nuhú da”, cachí ley Moisés.<sup>39</sup> Joo yehé cachí i xihín ndó viti: A caja iñví ndó xihín ñayivi, na caja núu xihín ndó. Ta ndá ña ná cani in xoo sajóho ndó, cata ñee ndó inga xoo sajóho ndó nu ná ña ná cani na a.<sup>40</sup> Ta tá cúní in na candaca na ndohó cuhun ndó nu juéxe sahá ña cúní na candaan cotó ndó já quéa quiahva ndó ña nu ná ta jända cotó ndéé ndó quiahva ndó nu ná.<sup>41</sup> Ta tá vaxi in soldado nu ndó ta tá cahnda da chuun ña ná cojo ndó ñaha da in kilometro, xímí ñúhú cojo ndó ña anda iyi kilometro cuhun ndó.<sup>42</sup> Ta ndá ña ná caca in ñaha nu ndó quiähva ndó ña nu ná. Ta ndá ña xícá téo ñaha nu ndó, quiähva téo ndó ña nu ná.

*Xímí ñúhú quihví iní na co cúní mí*

(Lc. 6:27-28, 32-36)

<sup>43</sup> ‘Mé ndó sa xímí ndó ña nasahnda ley Moisés chuun sanahá já cachí a já: “Quihví ini ndó na xímí táchan vaha xihín ndó ta candají ndó na co cúní táchan xihín ndó”, cachí ley Moisés.<sup>44</sup> Joo yehé cachí i xihín ndó viti: Ndítahan quihví ini ndó na co cúní táchan xihín ndó. Ta cahnan vaha ndó xihín na cánahá xihín ndó. Ta caca tähví ndó nu Ndióxi sahá na caja xixí xihín ndó.<sup>45</sup> Jáchí xihín ña yóhó náha ña cúú ndó jáhyi

Ndióxi, tátá yo, mé á íín indiví. Ta mé á caja ña ná cana candii jatá ñayivi quini xihín jatá ñayivi vaha. Ta mé á jácuun javí jatá ñayivi ndaa xihín jatá na co caja vaha.

<sup>46</sup> A cahán ndó ña caja Ndióxi cuahá ñamaní xihín ndó tá quihví ini cuití ndó na quihví ini ndohó va jáchí janda ñayivi quini, na játaca jiuhún cuénta impuesto caja na já.

<sup>47</sup> Ta a cahán ndó ña nacaja ndó cuahá ña vaha ta ná cahán Ndióxi cuití ndó xihín ñani táhan ndó jáchí janda ñayivi co xímí Ndióxi caja na já.<sup>48</sup> Xímí ñúhú caja ndaa ndó xihín tóco ndihí ñayivi tá quiähva caja ndaa Ndióxi, tátá yo, mé á íín indiví —nacachi Jesús.

## 6

*Jánahq Jesús ñaq ndítahan chindeé yo na ndahví*

<sup>1</sup> Já nacachi tucu Jesús já:

—A ndúcú ndó caja vaha ndó nuú ñayivi sahá ña ná cuni táhyí na ña caja ndó já candoo vaha ndó nu ná. Jáchí tá ná caja ndó já coó toho ñaha ñehé táhyí ndó nu Ndióxi, tátá ndo íín indiví.<sup>2</sup> Sahá ña cán quéa tá chíndeé ndó ñayivi, na ndímaní ñaha nuú, a cáca nuu ndó cahán lánda ndó ña nuú ñayivi tá quiähva caja na co cúú ná tá quiähva ndáa na. Jáchí na cán sahan na ñaha nuú na ndahví ini veñhu xihín nu tacá ñayivi iñchi já ná cuu cuni táhyí tóco ndihí ñayivi ña vaha caja na. Jáchí na cán cúní na ña ná caja cahnu ñayivi na. Mé a ndaa cachí i xihín ndó ña sa yahvi na cùú mé ña caja cahnu ñayivi na.<sup>3</sup> Ña ndítahan caja ndó tá chíndeé ndó na ndímaní ñaha nuú quéa caja ndó ña ná a cándaa ini ni in ñayivi ña caja ndó<sup>4</sup> ta xímí ñúhú caja jehé ndó ña. Ta Ndióxi, tátá ndo sándezhé a ña vaha caja ndó xihín ñayivi ta mé á quéa chähvi a sahá ña caja ndó jan.

*Jánahq Jesús ñayivi ndaja caca tähví na nu Ndióxi*

(Lc. 11:2-4)

<sup>5</sup> ‘Tá xícá tähví ndo nu Ndióxi a caja ndó tá quiahva caja na co cúú ná tá quiähva ndáa na jáchí cátóó na candita na veñhu xihín cayé ña caca tähví na nu Ndióxi ña ná cuni táhyí ñayivi na. Mé a ndaa ná cahnan i xihín ndó sa yahvi na cùú mé ña xímí ñayivi na.<sup>6</sup> Joo ndohó, tá xícá tähví ndó nu Ndióxi, tátá ndo íín indiví ndítahan quihví ndó ini vehe ndó ta chicaji tuun ndó yéhé a ta jan

cuu caca tähví jehé ndó nu Ndióxi. Jáchí jan íin Ndióxi, tátá ndo xihín ndo taa joho a nu cähán ndo ta caja mé á ñamani xihín ndó.

<sup>7</sup> Ta tá xícä tähví ndó nu Ndióxi, a cähán tucu tucu ndó mé tuhun ña coó sahá jáchí ñayivi, na co xíni Ndióxi cán caja na já. Ta cähán na taa joho Ndióxi na sahá ña cuhá cähán na joo a juú ña ndaa. <sup>8</sup> Joo a caja ndó tá quiáhva caja na cán jáchí Ndióxi, tátá ndo sa xíni va mé á ndá quéa xíni ñuhú ndo janda tá cámäni caca ndó ña nu á. <sup>9</sup> Ña yóho quéa ndítahan cachi ndó tá xícä tähví ndó nu Ndióxi:

Tátá Ndióxi, ña íin indíví,  
cähnu ná cacuu quiví ndó.

<sup>10</sup> Ná tandaa quií quiví cacomí ndó cuéntá sahá nde.

Ta ná coo tá íin cúní mé ndó coo ñuyíví yóho tá quiáhva íin indíví caja ndó.

<sup>11</sup> Quiáhva ndó nuú nde ña ndímäni nuú nde cuxu nde in in quiví.

<sup>12</sup> Caja cähnu ini ndó sahá cuachi nde tá quiáhva caja cähnu ini mé nde sahá ña nuú caja ñayivi xihín nde.

<sup>13</sup> Ta a quiáhva ndó ñamani ña ná coto ndojó tiñähá sacuhá ndehe já ná a caja nde cuachi nu ndó.

Jáchí cómí ndó cuéntá sahá tócó ndihí ñayivi,

ta cíuú caja ndó tócó ndihí ñaha,  
ta cähnu cíuú mé ndó andá ama cása quiví.

Já ná coo, quiáhva já cachi ndó tá xícä tähví ndó nu Ndióxi.

<sup>14</sup> Jáchí tá caja cähnu ini ndó sahá ña nuú caja inga na xihín ndo já quéa caja cähnu ri ini Ndióxi, tátá ndo, mé a íin indíví sahá ndo. <sup>15</sup> Ta tá co cúní ndo caja cähnu ini ndó sahá ña nuú nacaja inga na xihín ndó já quéa a caja cähnu ini Ndióxi sahá cuachi caja ndó.

Jánahä Jesús ndaja ndítahan caja na tá cajuhun na

<sup>16</sup> Tá cajuhun ndó a caja ndó tá quiáhva caja na co cíuú ná tá quiáhva ndáa na. Na cán cúní na ña ná cuni tähví tócó ndihí ñayivi ña xíjuhun na sahá ña cán quéa caja cueha nuú na já ná ndiñehé jíco ñahá na. Mé a ndaa cähchi i xihín ndo ña sa yahvi na cíuú ña xíni ñayivi na. <sup>17</sup> Joo ndóhó, tá ná cajuhun ndó ndítahan cuchú nuú ndo ta ndaja víi ndó mé ndó. <sup>18</sup> Já quéa ná a cúní ñayivi ña xíjuhun ndó ta in tühun Ndióxi, tátá ndo, mé a íin tuun xihín ndó cándaa

ini ña mé a ndaa xíjuhun ndó ta mé á quéa chahvi a sahá ña caja ndó jan.

*Indiví cíuú nu ndítahan ndaja tútu ñayivi ña vaha*  
(Lc. 12:33-34)

<sup>19</sup> A ndúcú ndó játaca cuahá ndiváha ndó ña cuicá canduu nu ndo ñuyíví yóho jáchí yóho cíuú nu quihvi tiquijí ñaha ndó jándihi ri sahá ta já tíví ndihí ñaha ndó. Ta jári cuu quihvi taa cuíhná caja cuíhná dà ña. <sup>20</sup> Vaha chágá ná játaca ndó ña vaha indíví jáchí cán coó quihvi toho tiquijí jándihi ri sahá ñaha ndó. Ta mé cán ni in ñaha co tíví ta ni taa cuíhná a cíuú ndihvi caja cuíhná. <sup>21</sup> Jáchí nuú ñandaja tútu ndó ña ndáyahvi nu ndó, cán coo ri íníma ndó.

*Nduchú nuú yo cíuú á tähuhun lámpara ña jándiyehé nu xíca í*

(Lc. 11:34-36)

<sup>22</sup> Nduchú nuú yo cíuú á tähuhun in lámpara jándiyehé nu yó já xíni yo nu xíca í. Ta tá tíví vaha nduchú nuú yo já cuu candehé vaha í nu xíca í. <sup>23</sup> Joo tá co tíví nduchú nuú yó já quéa xíca yó nu naá ndiváha. Ta tá cähán yo ña cíuú yó ná xíca nu yéhe ndiváha ta cása ví yó caja í cuachi já quéa cíuú yó tähuhun ná xíca nu naá ndiváha.

*In ñaha cíuú Ndióxi ta inga ñaha cíuú jíuhún*  
(Lc. 16:13)

<sup>24</sup> Ni in tühun ñayivi a cíuú caja chüun nuú ivi xitoho na jáchí candají na in xitoho na ta inga xitoho na quihvi ini chágá na. Á tá coó ta caja ndíví vaha na chuun nuú in xitoho na ta inga ná cán a caja chüun vaha na nuú. Ta quiáhva já íin ri xihín ndóhó va jáchí a cuya caja cähnu ndó Ndióxi tá chíñiu ndó íníma ndó jatá jíuhún ndó.

*Ndáá Ndióxi na cíuú cuéntá mé á*  
(Lc. 12:22-31)

<sup>25</sup> Candehé ndo ña cähán i xihín ndó yóho: A ndícani ini ndó sahá ña cuxu ndó ta ni sahá ña coho ndó ña catacu ndó in in quiví. Ta ni a ndícani ini ndó sahá jáhma candixi ndó. Jáchí tá tacú ndo, ña jan cíuú ña cähnu chágá a juú ga ña cuxu ndó. Ta íin chágá saha yíquí cuñu ndó a juú ga jáhma ndíxi ndó jan. <sup>26</sup> Candehé ndó laa ndáchí nu táchi jan: rí jan ni co xútú rí ta ni a vája sahan rí jáquee rí ta ni co yáca rí nu táán vaha rí nuñi rí. Ta Ndióxi, tátá ndo, mé a íin indíví sahan ña xíxi rí jan nu rí. Á co xíni ndó ña íin chágá sahá mé ndó a juú ga laa

cán. Sahá ña cán quéa quiāhva mé á ña xíní ñúhú ndó catacu ndó. <sup>27</sup> Ta coó sahá toho ña ndicani nähá ini ndó jáchí a cuú ndaja jícó ndó mé ndó java metro chágá sahá ña ndicani ini ndó.

<sup>28</sup> Ta ni co ndítahan ndicani ini ndó sahá jáhmá candixi ndó. Candehé ndó ndá quiāhva ndatō sáhnu itá yúcu. Mé ita jan ni co caja chúun a ta ni co cávaha jáhmá á. <sup>29</sup> Joo mé a ndaa ná caħan i xihin ndó ña núcích chágá ita yóho načaja Ndióxi a juú ga jáhmá vahá ndivaha násandixi rey Salomón sanahá, dà nasaħiin cuahá ñaha cuicá. <sup>30</sup> Candehé ndó ndaja ndáa vahá Ndióxi yucu ita vatí ín tóo a viti ta itaan cayi a jándihi sahá. Ndaja ga ví caja Ndióxi xihin ndóhó ña quiāhva mé á tóco ndihi ña xíní ñúhú ndó catacu ndó. Joo mé ndó co cándusa ndó ña candaas mé á ndohó. <sup>31</sup> Ña cán quéa a ndicani ini ndó sahá ndá ña cuhxu ndó a sahá ña coho ndó a sahá ña candixi ndó. <sup>32</sup> Jáchí na co xíní íchi cuénta Ndióxi, na cán cuú na ndicani cuahá ini sahá tóco ndihi ña yóho. Joo cuú ndó cuénta Ndióxi, tátá ndó ín indívü ta xíní vahá mé á ña ndímaní nu ndó catacu ndó. <sup>33</sup> Joo ndítahan nu ndó ndiquahva ndó mé ndó ndáhá Ndióxi ña ná cacomí mé á cuénta sahá ndó ta já quiāhva mé á ña ndímaní nu ndó catacu ndó. <sup>34</sup> A ndicani ini ndó sahá ña quixi nu ndó inga quívü itaan jáchí Ndióxi cuití va xíní a ndíva vaxi nu ndó quívü itaan ta coó sahá ndicani ini ndó sahá ña ndoho ndó itaaen.

## 7

Co ndítahan candehé ndaa yó ñayivi  
(Lc. 6:37-38, 41-42)

<sup>1</sup> A cándezhe ndaa ndó ñayivi já ná a cándezhe ndaa Ndióxi ndohó. <sup>2</sup> Jáchí tá quiāhva caja ndó xihin inga ñayivi quiāhva já caja ri Ndióxi xihin ndóhó va. Sahá ña cán quéa tá quiāhva sándezhe ndaa ndó ñayivi quiāhva já caja ri Ndióxi xihin mé ndó. <sup>3</sup> Jáchí ndá cuénta quéa sándezhe ndó ña núu caja ñani táhan ndó ta co sándezhe ndó ndá quiāhva náhnu chágá ña núu caja mé ndó. Cuú á tátuhun ndácaan in xehe loho nduchú núu ñani táhan ndó nani ndácaan in yító ndúhu cahnu imi nduchú núu ndó. <sup>4</sup> Ta tá a cuú cuni ndó yító cahnu ndácaan ini nduchú núu mé ndó ndaja caja ndó cachí ndó xihin ñani táhan ndó: “Ñani i, ná tavá loho i xehe ndácaan nduchú núu jan.” <sup>5</sup> Jándahvi ndó mé ndó xihin ña caja ndó. Xíní ñúhú tavá

ndó yító cahnu ndácaan nduchú núu mé ndó jan já ná nuná nu ndó cuni vahá ndó já ná cuu tavá ndó xehe loho ndácaan nduchú núu ñani táhan ndó.

<sup>6</sup> A quiāhva ndó ña yii cuénta Ndióxi nuú ñayivi quini. Jáchí tá caja ndó já cuú á tátuhun tá ná quiāhva ndó ñaha yii nuú tina ta tiāhva náá ndicó coo rí tiin rí ndohó. Ta jári cuú á tátuhun tá ná quiāhva ndó ñaha yahvi ndivaha tátuhun perla nu cóchí jáchí cuu cuaní nihni rí ña.

Ndaja caja í caca í ñamani nu Ndióxi  
(Lc. 11:9-13; 6:31)

<sup>7</sup> Ndá ñaha ndímani nu ndó xíní ñúhú caca ndó ña nu Ndióxi ta já quiāhva mé á ña nu ndó. Ndinducú ndó ña cuni ndó ta ñehe ndó ña caja Ndióxi. Cuú á tátuhun catí ndáhá ndó yéhé ta já nuná yéhé nu ndó. <sup>8</sup> Jáchí na xícä in ñaha, na cán cuú na ñehe va. Ta na ndúcu ñaha, na cán cuú na ndínehe ña. Ta na catí ndáhá yéhé, na cán cuú na ndínunu yéhé nuu.

<sup>9</sup> Ta ndá ndó, na ndúu jahyi ta tá xícä jahyi ndó pan cuhxu a nu ndó, ama cuéhé ri ndó quiāhva ndó yuu nu á ña ná caxí a. <sup>10</sup> Ta ama ná quiāhva ri ndó in coo nu á caxi tá xícä tiyacá nu ndó cuhxu a. Co caja ndó já.

<sup>11</sup> Candehé ndó. Vatí mé ndó cuú ndó ñayivi caja cuahchi joo xíní vahá ndó quiāhva ndó ña vahá nuú jahyi ndó. Ndaja ga ví caja Ndióxi, tátá ndó, mé a ín indívü xihin ndó. Quiāhva mé á ña vahá nu ndó tá ná caca ndó ña nu mé á.

<sup>12</sup> Candehé ndó. Tá quiāhva cuni ndó caja ñayivi xihin ndó quiāhva já ndítahan caja ri ndóhó va xihin ná jáchí ña yóho quéa sáhndá ley Moisés xihin ña načahiyá na profeta caja ndó.

Yéhé táhán cuú nuú quiāhvi na cuhun indívü  
(Lc. 13:24)

<sup>13</sup> Cuú á tátuhun ín iyi yéhé. In yéhé cuú á ña táhan ndivaha ta xíní ñúhú ndinducú ndó ndihvi ndó cán. Jáchí inga yéhé cuú á ña ndíca ndivaha nuú ndihvi na cuhun indayá. Ta cuahá ndivaha ñayivi cuú na xícä íchi ndíca cuahen ná indayá nuú ndihvi sahá ná. <sup>14</sup> Joo ña cuú íchi ña ndáca ñayivi yéhé táhán nu ndihvi na indívü cuú a ichí táhán ndivaha ta yáncá ndivaha caca nuu í nu á. Ta chá ndivaha cuú na ndihvi cán.

Xihin cuhi cíun nuú in yító cuu ndicuní ndá yító cuú dō  
(Lc. 6:43-44)

<sup>15</sup> 'Cuéntá coo ndó xihín ná tuhún, ná cachí cahán ná cuéntá Ndióxi jan. Jáchí uun ndiváha cásaa ná nu ndó. Joo cíú ná tátuhun ndiváhyí quini ndiváha vatlí náha ná tátuhun ndicachi loho. <sup>16</sup> Cíú ndicuni ndó ná xihín ná cája na. Jáchí ñayivi quini co cája vaha toho na. Cíú a tátuhun tá a cuú cuun uva nuú tohíñu ta ni a cuú jáquee ndó titó ñuhú nuú tohíñu. <sup>17</sup> Ná cán quéa tóco ndihi yító vaha ndinuhu cuihi vaha cuití cíun nu do. Joo yító quini ndinuhu cuihi quini cuití cíun nu do. <sup>18</sup> Dó cíú yító vaha cán a cíú toho cana cuihi quini nu do ta ni yító quini cán a cíú cuun cuihi vaha nu do.

<sup>19</sup> Ta tóco ndihi yító, dó co cána cuihi vaha nuu, tahndá do ta quee dó nu cándaha ñuhú ná cayí do. <sup>20</sup> Sáhá ná cán quéa xihín ná cája ñayivi já cuu ndicuni ndó a cíú ná ñayivi vaha a cíú ná ná quini.

A juú ndihi toho ñayivi ndíhvi na nuú cacomí Ndióxi cuéntá sáhá ná  
(Lc. 13:25-27)

<sup>21</sup> 'A juú ndihi toho ná cachí cíú yehé xitoho na cuhún ná nuú cacomí Ndióxi cuéntá sáhá ná. Na cája ná sáhndá Ndióxi, tátá i, mé a ín indíví na cán cuití cíun na cacomí mé a cuéntá sáhá. <sup>22</sup> Jáchí tá ná xínu coo quívi caja ví Ndióxi sáhá ñayivi já quéa casáhá cahán cuhá ndiváha ñayivi xihín i ta já catchi na já: "Jesús, mé ndó cíú xitoho nde ta xihín quívi mé ndó náxica nuu nde cahán nde tuhún Ndióxi xihín ñayivi ta xihín quívi mé ndó natavá nde rí quini násañuhu ínima ñayivi ta xihín quívi mé ndó nácaja cuhá ndiváha nde ná xituhún", catchi na xihín i. <sup>23</sup> Ta anda já nducú ñehe e tuhun nu ná já catchi i já xihín ná: "Co xíni toho i yo cíú ndóhó. Caxoo ndó nuú i jáchí ndinuhu ná quini cája ndó", catchi i xihín ná.

Sácu Jesús quiahva sáhá ivi da náca vaha vehe  
(Mr. 1:22; Lc. 6:47-49)

<sup>24</sup> 'Ndá ná xíni johó ná cahán i ta cája na ná, na cán cíú ná tátuhun in dataa, dá ín xíni túni ta nacavaha da vehe da jata in tóto. <sup>25</sup> Ta tá náxínu javí já nasahnu yuta ta náxínu tachí quíni jatá vehe cán joo coó nádicava vehe da jáchí tóyíi cándichi vehe da jata tóto cán. <sup>26</sup> Joo ná xíni johó nu cahán i ta co cája na ná, na cán cíú ná tátuhun in dataa, dá co xíni túni ta nacavaha da vehe da nuú ñutí. <sup>27</sup> Tá nándihi já náxínu

javi já nasahnu yuta ta náxínu tachí quíni jatá vehe cán. Anda já nándicava vehe da ta chí nándihi sáhá chí uun —nácachi Jesús jánañha ñayivi.

<sup>28</sup> Ta tá nándihi nácahan Jesús ná yóho já tóco ndihi ñayivi nácatóntó ná xíni johó na ndá quiahva jánañha mé á <sup>29</sup> jáchí tá jánañha mé á nu ná cahán tá quiahva cahán in da ín sáhá cahnda chuun ta co cahán toho a tá quiahva cája ná jánañha ley Moisés.

## 8

Tá nándaja vaha Jesús in da ndóho cuehé táchyi

(Mr. 1:40-45; Lc. 5:12-16)

<sup>1</sup> Tá nanuu Jesús jata yúcú nuú násanúu a cán já ndíco cuhá ndiváha ñayivi jatá cuhán. <sup>2</sup> Ta ndaja coo já nácatati in dataa, dá ndóho cuehé táchyi nu á. Ta já nácatixi dá nu á já nácachi da já xihín á:

—Cuu ndaja vaha ndó yehé, xitoho i tá cíni ndó —nácachi da xihín Jesús.

<sup>3</sup> Tá nándihi já nácani ndaa ndáhá Jesús dá já nácachi a já xihín dá:

—Cúní ná nándiha ná cán quéa nándivahún viti —cachí a xihín dá.

Tá nácachi Jesús já chí ivi láá nándindaa cuehé táchyi nándoho dá cán. <sup>4</sup> Anda já nácachi Jesús já xihín dá:

—Candehé. A cáxi tuhun tohún ná yóho xihín ni in túhún ñayivi. Cuáhán ndacún náhun mún nuú jutu. Ta ndítahan jocún ñaha nu Ndióxi tátuhun sáhndá ley Moisés sanahá caja na sa nándiváha. Já ná candaá ini tóco ndihi ñayivi ná sa nándindaa va cuehé násandohún —nácachi Jesús xihín dá cán.

Tá nándaja vaha Jesús in da cája chúun nuú in jefe soldado  
(Lc. 7:1-10)

<sup>5</sup> Tá nándíhvi Jesús náu Capernaum já nácatati in da sáhndá chuun nuú soldado naquixi náu Roma nu Jesús jáchí cúní da caca da in ñámaní nu á.

<sup>6</sup> Já nácachi da já xihín á:

—Á co cúní ndó caja ndó ñámaní ndaja vaha ndó mozo i, datacú jáchí cándíhu dá vehe quíhví dá náxíhi tuchu yíquí cuñu da ta a juú quiahva cahíhví yíquí cuñu da —nácachi dá cán xihín Jesús.

<sup>7</sup> Já nácachi Jesús já xihín dá:

—Vaha va, cuhún i ndaja vaha i dá —nácachi Jesús.

<sup>8</sup> Anda já nacachi tucu də sáhndá chuun nuú soldado cán já xihín Jesús:

—Candehé ndó. Coó saha toho yehé ña ná ndihvi ndó vehe e. Joo cahnda cuití ndó chuun jandá nu íin ndó yóho ta já ndivaha va mozo i. <sup>9</sup>Jáchi ndúu java na náhnu chágá sáhndá chuun nuú i. Ta ndúu ri soldado sáhndá ri yehé va chuun nuú. Ta tá chíndahá i in da ña ná cuhun da nu cumi mí i cuhun də ta cuhán də. Ta tá sáhndá i chuun nuú inga də ña ná quixi də nuú i ta vaxi da nuú i. Ta tá sáhndá i chuun nu mozo i ña ná caja da ña sáhndá i ta cája da ña —nacachi də cán.

<sup>10</sup> Tá naxini joho Jesús ña yóho já nacatontó a já nacachi a já xihín na ndíco cuhán cán:

—Mé a ndaa ná cahán i xihín ndo ña a ñáha cuni i tañu ná Israel in də cández cahnu náhá iní Ndióxi tá quiahva cández cahnu iní də yóho Ndióxi. <sup>11</sup>Candehé ndo ná cahán i xihín ndo ña quixi ñayivi ndijáa níi cúu saha ñuyíví ta cacoo na cuxu na xihín Abraham ta xihín Isaac ta xihín Jacob indíví nu íin Ndióxi cómí a cuénta sahá ñayivi. <sup>12</sup>Joo cuahá ná Israel, ná nanditahan nuu coo cán a cóo toho ná cán. Ña caja Ndióxi xihín ná cán quéa cuítá ná jata véhe cuhun ná nuú naá ndivaha. Ta cán cuacu ndivaha na jandá quiahva chícahná mé nuhu ná —cáchí Jesús.

<sup>13</sup> Tá nandihí já nacahán tucu Jesús xihín də sáhndá chuun nuú soldado cán já nacachi a já xihín dá:

—Cuanúhu vehún. Nandivaha mosún tá quiahva cúnun jáchi nacandúsún yehé —nacachi Jesús xihín dá.

Chí mé hora já nandivaha mozo də cán.

Tá nandaja vaha Jesús ñá cúu xojo Pedro  
(Mr. 1:29-31; Lc. 4:38-39)

<sup>14</sup> Nasahan Jesús vehe Pedro ta tá naxinu a cán cánduhu ná cúu xojo Pedro quíhvi ña jáchi chícaan cahni ndee ña. <sup>15</sup> Anda já natuín Jesús ndáha ná quíhvi cán ta chí nandindaa cahni ña. Ta já nandacoo ña cán cája ndívá ñá nu ná.

Tá nandaja vaha Jesús cuqhá ndivaha na quíhvi  
(Mr. 1:32-34; Lc. 4:40-41)

<sup>16</sup> Ta tá nacuáa já ñéhe cuahá ndivaha na ná quíhvi xihín na ñúhu ínimá quini ini nuú Jesús. Ta xihín in túhún tuhun nacahán mé á natavá ínimá quini ñúhu ínimá ñayivi ta

jári nandaja vaha mé á tóco ndihí na quíhvi.

<sup>17</sup> Ta tóco ndihí ña yóho nayaha já ná xinu coo nuú tuhun ña nacahyí profeta Isaías tá nacachi da já: “Mé á nandiquehe ndihí a ña cávitá iní ta naxojo ndihí a cuehé yo”, cachí tuhun Ndióxi.

Ná cúní candíco Jesús  
(Lc. 9:57-62)

<sup>18</sup> Tá naxini Jesús ña a juú quiahva cández táchan ñayivi ndúu na xihín a já nasaahna chuun ña ná cojo cava na inga xoo tañuhú cán. <sup>19</sup>Joo nacayati in də jánahá ley Moisés nu á já nacachi da já xihín á:

—Maestro, cúní candíco i ndohó ndá nacuu nuú cuhun ndo —nacachi da xihín á.

<sup>20</sup> Já nanducú ñehe Jesús tuhun nu dá já nacachi a já xihín dá:

—Ndicuii cúu rí ta vatí íin cáva ñúhu rí. Ta laa cúu rí ta vatí íin táchá ñúhu rí. Joo yehé, də nacahindahá Ndióxi nduu ñayivi, chí ni nuú cuju mí i coó va —nacachi Jesús xihín dá.

<sup>21</sup> Ta inga da sa xíca xihín a nacachi da já xihín á:

—Maestro, quiahva jihna ndó ñamani nuú i ña ná cuhun i jánduxu tátá i já quixi i candíco i ndohó —nacachi da xihín á.

<sup>22</sup> Já nacachi Jesús já xihín dá:

—Xíní ñúhu candicún yehé viti jáchi ná cuhun mé ñayivi, ná a ñáha cazu ndaa ínimá jánduxu ná ndii jan —nacachi Jesús xihín dá.

Tá nájácatáji Jesús táchí xihín tañuhú tá ndícojo do

(Mr. 4:35-41; Lc. 8:22-25)

<sup>23</sup> Ta ndaja coo naquíhvi Jesús ini in barco ta cátahan ná xíca tuun xihín a cán cuahán ná.

<sup>24</sup> Ta nani xíca na nuú tañuhú cán cuahán ná ta in náa cuití naxinu in táchí quíni ndivaha nuú tañuhú cán. Ta a juú quiahva ndee nacásáhá ndícojo ticuúi cán jandá quiahva nandichutú ticuúi ini barco cán. Joo cánduhu Jesús ini barco quíji va.

<sup>25</sup> Anda já ndáva ná xíca tuun xihín a cán nasahan ná ndínehe na ña. Já nacayuhú ná já cáchí ná xihín á:

—Chindeé ndó ndehe, xitoho nde. Jáchi cacoó barco cahá tañuhú cuahán do —nacachi na xihín á.

<sup>26</sup> Anda já nanducú ñehe Jesús tuhun nu ná já nacachi a já xihín ná:

—Ndá cuéntá quéa yíhví nahá ndó. Ndá cuéntá quéa co cándezini ndó yehe — nacachi a.

Já nandacoo a ta jánani a tachi quími cán xihín tañuhú cán ta já nacatáji uun tóco ndihí a cán.<sup>27</sup> Tá naxini ná xíca tuun xihín a cán ná yóho já nacatontó na ta nacasáhá ndáca tuhún táhan na já cachí xihín táhan na já:

—Ta ndá dà cúu dataa yóho ná janda tachi xihín tañuhú cándezusa nü cáhán dà — cachí xihín táhan ná cán.

Tá naqueta ivi dà ñúhu ínimá quini ini nuú Jesús

(Mr. 5:1-20; Lc. 8:26-39)

<sup>28</sup> Tá naxinu coo Jesús inga xoo tañuhú cán nu íín ñundáhyi cuéntá Gadara já naqueta ivi dà ñúhu ínimá quini ini tañu nu ndúxu ndii. Ta nacayati da nuú Jesús. Ndíví mé dà ñúhu ínimá quini ini yóho cúu dà tátuhún quítí, rí cuehe ndivaha. Sahá ná cán quéa ni in tuhún ñayivi a cuú yaha chí íchi cán.<sup>29</sup> Tá naxini da Jesús já nacasáhá da cayuhú dà nu á já cachí dà já xihín á:

—Ndá cuéntá quéa yasún quíhvi nuún xihín nde, Jesús, da cúu in tuhún jiní já jahyi Ndióxi. Á yasún jándoho yachún ini nde tá cámání yii ndindaa tiempo ndoho ini nde —nacachi rí quini cán xihín Jesús.

<sup>30</sup> Ta ndaja coo yati cán nasanduu cuahá ndivaha cóchí xíxáhan rí.<sup>31</sup> Ta mé rí quini ñúhu ini ndíví dataa cán naxica tähví rí nuú Jesús já cachí rí já xihín á:

—Tá ta ná tavún ndehé ini dà yóho, quiahva ñamani nuú nde ná ná cuhun nde ndihí nde iní cóchí ndúu cása —nacachi rí xihín Jesús.

<sup>32</sup> Anda já nacachi Jesús já xihín rí:

—Cuáhán ndó, dá já.

Chí naqueta rí quini cán ini ndíví dataa cán já nasahean rí nandihvi rí ini cóchí cán. Ta chí ivi lájá xínu tóco ndihí cóchí cán cuahán rí nuú rí ny ndáyi yuhú tañuhú cán. Ta najáqueta nuu rí mé rí ini tañuhú chí nacandaa rí ticuújá naxihí rí.

<sup>33</sup> Ta chí a juú quiahva ñayihví dà ndáá cóchí chí naxinu ndivaha da cuahán dà. Ta tá naxinu dà ñuu já nacasáhá dà ndícani da ndaja cása ná nayaha xihín ndíví dà nasañuhu ínimá quini ini cán.<sup>34</sup> Anda já naqueta tóco ndihí ñayivi ñuu cán cuahán na candehé ná Jesús. Ta tá naxini na mé á já naxica tähví ná nu á ná quee a cuhun a.

Tá nandaja vaha Jesús in dà naxihí tuchu saha

(Mr. 2:1-12; Lc. 5:17-26)

<sup>1</sup> Tá sa nayaha tóco ndihí ná yóho já nandaa Jesús jatá in barco ta já naxojo cava inga xoo tañuhú cán janda quiahva naxinu coo a ñuu mé á.<sup>2</sup> Ta cán náhe na in dà quíhvi, dà naxihí tuchu saha ta cánduhu dà ná yívì loho náhe na nacasaña ná nu á. Ta tá naxini Jesús ndá quiahva cándezini dà cán mé á já nacachi a já xihín dà quíhvi cán:

—Candehé, jahyi a. A ndícani toho inúñ jáchí cáhnu ini i sahá cuachún viti — nacachi Jesús xihín dà.

<sup>3</sup> Java táhan dà jánahá ley Moisés nacasáhá dà cáhán dà já: “Mé dà yóho ndája núu da Ndióxi xihín tuhun cáhan dà jáchí ni in tuhún toho ñayivi a cuú caja cáhnu ini sahá cuachi.”<sup>4</sup> Joo sa nacandaa ini Jesús ná cáhvi ini dà cán sahá ná cán quéa nandaca tuhún a dà já nacachi a já xihín dà:

—Ndá cuéntá quéa cáhvi núu ini ndó sahá yehe.<sup>5</sup> Á cáhán ndó ná ihví chágá cache i xihín dà yóho: “Nacaja cáhnu ini i sahá cuachún viti.” Á tá coó ta cache i xihín dà: “Cuándaco ta cuáhán.”<sup>6</sup> Candehé vaha ndo ná naha i nu ndó ná sahá i, dà nacindahá Ndióxi nduu ñayivi caja cáhnu ini i sahá cuachi cája ñayivi ñuyíví yóho — nacachi Jesús xihín dà.

Tá nandhi já nandicahan tucu a xihín dà naxihí tuchu saha cán:

—Ta viti cáhán i xuhun cuándaco ndiquehe xito lohún ta cuanúhu vehún — nacachi Jesús xihín dà.

<sup>7</sup> Chí ivi lajá nandacoo dà quíhvi cán ta já naquee da cuanúhu dà.<sup>8</sup> Tá naxini ñayivi ndúu cán ná nacaja Jesús yóho já ñayihví ná ta nacasáhá cája cáhnu na Ndióxi sahá ná nasahean ndéé mé á nuú ñayivi ná cuu caja na ná xituhún.

Tá nacana Jesús Mateo ná caca tuun da xihín á

(Mr. 2:13-17; Lc. 5:27-32)

<sup>9</sup> Tá nandhi já naquee Jesús cuahán na ná xíca cuahán já naxini a in dàtaa naní Mateo, dà íín coo nü sácoo dà játaca jiuhún cuéntá impuesto. Ta nacana Jesús dà já nacachi a já xihín dà:

—Naha quí candicún yehe.

Anda já nandaca ndichi Mateo ta nacasáhá ndíco dà Jesús.

<sup>10</sup>Tá nandihí já íín coo Jesús xíxi a vehe dā cán ta cán naxínu coo cuahá táhan na játaca jiuhún cuénta impuesto xíhín java ga ñayivi caja cuachi. Násacoo na xíxi na xíhín Jesús ta cán ndíu coo ri na xíca tuun xíhín a cán.

<sup>11</sup>Ta tá naxíni na fariseo ña ndíu na cán xíxi na xíhín Jesús já nacasáhá na ndáca tūhún na na xíca tuun xíhín Jesús cán já:

—Ndá cuénta quéa xíxi xitoho ndó xíhín na játaca jiuhún cuénta impuesto ta xíhín java ga na caja cuachi —nacachi na fariseo cán.

<sup>12</sup>Joo tá naxini joho Jesús ña yóho já nacachi a já xíhín na fariseo cán:

—Ñayivi íín vaha co xíni ñúhú toho na dā caja tátá ñahá joo na quíhví, na cán cúu na xíni ñúhú dā caja tátá ñahá. <sup>13</sup>Ta yehe coó vaxi toho i cana i na sa íín vaha. Vaxi i cana i ñayivi, na caja cuachi ña ná jándacoo na cuachi caja na. Xíni ñúhú cuhún ndo jácuaha vaha ndó ña cúní cachei tūhún Ndióxi tá cachí a já: “Ña cúní quéa ná candáhví ini ndó ñayivi jáchi vaha chágá ña yóho a juú ga ña ná joco ndó quítí nuú i”, cachí tūhún Ndióxi —cachí Jesús xíhín ná.

*Cáhgan Jesús ndá sahá quéa cajuhun na  
(Mr. 2:18-22; Lc. 5:33-39)*

<sup>14</sup>Tá nandihí na xíca xíhín Juan, da jácan-dúta ñayivi cán naxínu coo na nu Jesús. Já nacasáhá ndáca tūhún na mé á já nacachi na já xíhín á:

—Ndávaha co xíjuhun toho na xíca xíhín yóho nani cuahá ndivaha xíjuhun mé nde xíhín na fariseo —nacachi na cán xíhín Jesús.

<sup>15</sup>Anda já nanducu ñehe Jesús tūhun nu ná já nacachi a já xíhín ná:

—Á cahán ndo canduu cuéha na ndíu in vicó tándahá nani íín mé dā tándahá cán xíhín ná. Uñun. Jáchí cajíi ini na. Joo xínu coo quiyí candaan dā tándahá cán anda jáví casáhá cajuhun na. Ta cachí i xíhín ndó ña vaxi quiyí candaan na yehe nuú na yóho ta anda jáví casáhá na xíca tuun xíhín i cajuhun na —nacachi Jesús.

<sup>16</sup>Ta násacu Jesús inga quiahva nu ná já cachí a já:

—Ama ná jándaha ñayivi jahmá yatá xíhín in tūhún jáhmasaá jáchi tá nandihí ndíndíi a, sáhdá chágá ví a jahmá yatá cán ta jándacáhmu chágá ví a yáví ña nandic-ahmá na cán. <sup>17</sup>Ta ni co táán na vino saá ini voso nií yatá jáchi jáchahndí mé vino cán níí

ta cuíta mé vino cán ta tíví voso nií caja dó. Sähá ña cán quéa ndítahan taán yo vino saá ini voso nií saá ná a ndíhi sahá vino xíhín voso —cachí Jesús.

*Tá nandaja vaha Jesús jahyi jíhí Jairo xíhín in ná nacaní ndaa ndáha jáhmas a  
(Mr. 5:21-43; Lc. 8:40-56)*

<sup>18</sup>Ta nani cáhán Jesús cándichi a naxínu coo in dā sáhdá chuun nuú na Israel. Já nacaxtí dā nu á ta já nacachi dā já xíhín á:

—Jácá naxíhí uun ná loho cúu jahyi jíhí i joo tá ná caja ndó ñamani quixi ndó vehe e ta chinúu ndó ndáha ndó jata ña já nditacu tucu ñá —nacachi dā cán xíhín Jesús.

<sup>19</sup>Anda já naquee Jesús cuahán xíhín dā cán ta ndáca na xíca tuun xíhín a cán cuahán na. <sup>20</sup>Ta ndaja coo cán íín in náñáha, ná ndítahví nii ná tixi uxu ivi cuja. Ta nacayati ná chíjata Jesús já nacaní ndaa ndáha ná yuhú jáhmas a. <sup>21</sup>Jáchí nacahán ña: “Tá ná caní ndaa cuití ndáha í jáhmas a Jesús já ndivaha i”, nacahán ña. <sup>22</sup>Joo nandicoto nihni játá Jesús nu ñá ta tá naxini a ná já nacachi a já xíhín ña:

—A cayíhví tohún, jahyi a. Nandi-vahún jáchí nacandúsún yehe —nacachi Jesús xíhín ná.

Ta chí mé hora já nandivaha ná.

<sup>23</sup>Ta tá naxínu coo Jesús vehe dā sáhdá chuun nuú na Israel cán já naxini a ña sa ndíu música cán ña ná cuhún na járduxu na jahyi dā cán. Ta naxini a jánda joho sácu cóhó ñayivi ndíu na. <sup>24</sup>Ta chí já nacachi a já xíhín tócdi ndíhi na cán:

—Cuáhán queta ndó jata véhe. Jáchí coó naxíhí toho ná loho yóho. Quijí cuití va ñá —nacachi Jesús xíhín ñayivi ndíu cán.

Joo nacasáhá na cán sácu ndaa ñahá ná.

<sup>25</sup>Ta chí naqavá Jesús na jata véhe. Ta tá nacayati a nu ñá cán já natíin a ndáha ñá chí ivi láá nandacoo ñá. <sup>26</sup>Ta níí cúu ñundáhyi cán nanduítia nuu tūhun sahá ña nacaja Jesús cán.

*Tá nandaja vaha Jesús ivi dā cuáa*

<sup>27</sup>Tá naquee Jesús cuahán já ndíco ivi dā cuáa jata cuahán dā já nacasáhá cayuhú cóhó dā já cachí dā já xíhín á:

—Jesús, dā naquixi chichi David caja ndó ñamani candáhví loho ini ndó ndehe —cachí dā cayuhú dā jata Jesús.

<sup>28</sup>Ta ndaja coo naquihvi Jesús ini in vehe ta já nacayati ndív dā cuáa cán nu á. Já

nácasáhá ndáca tuhún a dā cán já nacachi a já xihín dá:

—Á cahán ndó ña cuu caja i jándiyehé nuu ndó —nacachi Jesús xihín dā cán.

—Ajan, xitoho nde. Cándusa nde ña cuu caja ndó ña —nacachi ndíví dā cuáa cán xihín Jesús.

<sup>29</sup> Tá nandihí já nacani ndaa ndáha Jesús nduchú nuú dā cán ta já nacachi a já xihín ndíví dā cán:

—Ná coo tā quiahva cúní ndó jáchí cán-deé ini ndó yehé —cáchí a.

<sup>30</sup> Tá nandihí já nacásáhá sándezé ndíví da cuáa cán. Ta nasañnda Jesús chuun nú dā ña ná a cáxi tuhun da nuú ñayivi sahá ña nacaja mé á xihín dá.

<sup>31</sup> Joo tá jácá naqueta uun dā cán já nacásáhá dā ndícani da nuú ndíjáá ñayivi ndúu ñundáhyi cán sahá ña nacaja Jesús xihín dá.

Tá nandaja vaha Jesús in dā níhi

<sup>32</sup> Nani naquee dā cuáa cán cuahan da já nasaa java ñayivi nu Jesús ñéhe na in dā níhi, dā ndácaan ínimá quini ini. <sup>33</sup> Ta tá natavá Jesús ínimá quini ini dā cán chí ivi laá nacásáhá cahán dā. Ta a juú quiahva nacatónító ñayivi ta já cáchí ná já:

—Ni in tühún tañu coó naxini nde in ñáhu tátuhun ña yóho ñundáhyi Israel —nacachi ná cán.

<sup>34</sup> Joo na fariseo cán nacásáhá cáchí ná já:

—Rí cútí tiñáhá sacuahá nu rí quini sahán rí ndée rí nuú Jesús yóho ña ná tavá a ínimá quini ini ñayivi —nacachi ná fariseo cán.

Táhndá ini Jesús sghá ñayivi

<sup>35</sup> Ndijáá nuu náhnu xihín nuu válí naxica nuu Jesús jánhá tuhun Ndióxi ini veñihu ná cán. Ta naçaxí tuhun a tuhun vaha xihín ñayivi ña sa nacayati quiví cacomí Ndióxi cuénta sahá ná. Ta nandaja vaha mé á tá nuú cuehé ndóho ñayivi. <sup>36</sup> Ta tá naxini Jesús ñayivi cuahá cán já natahví ini a sahá ná jáchí ndóho ini na ta cávitá ini na tátuhun ndicachi, rí coó dā candaas ñahá. <sup>37</sup> Anda já nacachi Jesús já xihín ná xícá tuu xihín a cán:

—Mé á ndaa ndúu cuahá ndivaha ñayivi, ná cúní cuni joho tuhun Ndióxi joo chá cuítí ná cúní cuhun ná cahán ná ña xihín ñayivi. Cútí á tátuhun íin cuahá ndivaha níi ña xíní ñúhu jáquee joo ndímaní ñayivi jáquee ná ña. <sup>38</sup> Sahá ña cán quéa xíní ñúhu caça tahví ndó nu Ndióxi ña ná chindahá mé á chágá

ná cája chúun cuéntá mé á —cáchí Jesús xihín ná.

## 10

Chíndahá Jesús ná xícá tuu xihín á ña ná cuhun ná cahán ná tuhun Ndióxi xihín ñayivi  
(Mr. 3:13-19; Lc. 6:12-16)

<sup>1</sup> Tá nandihí já nacana Jesús ndíhxu ivi ná xícá tuu xihín á cán. Ta já nasañhan ndée nu ná ña cuu tavá ná fríma quini ini ñayivi. Ta nasañhan ndée nu ná ña ná ndaja vaha na tá nuú cuehé ndóho ñayivi. <sup>2</sup> Ña yóho cútí quiví ndíhxu ivi ná cuú apóstol xícá tuu xihín á cán: Dá nu cuítí cán naní dā Simón ta cahán ri na Pedro xihín dá. Ta inga dā cán cuú Andrés ñani dā. Ta inga dā cuú Jacobo xihín ñani dā, Juan. Ndíví dā yóho cuú dā jáhyi Zebedeo. <sup>3</sup> Tañu ná cán ndácaan ri Felipe xihín Bartolomé xihín Tomás xihín Mateo, dā najátaca jiuhún cuénta impuesto. Ta cán ndácaan ri Jacobo, dā cuú jáhyi Alfeo xihín Lebeo, dā cahán ri na Tadeo xihín. <sup>4</sup> Ta cán ndácaan ri Simón, dā naxica cuénta ná cananista xihín Judas Iscariote, mé dā najicó tühún Jesús tá nu ndíhi cán.

<sup>5</sup> Tá nachindahá Jesús ndíhxu ivi ná cán já nacachi a já xihín ná:

—Coto a cíhyn ndó chí ñuu ñayivi tóho, ná co cuú ná Israel. Ta ni a quíhvi ndó ñuu ñúhu chí estado Samaria. <sup>6</sup> Vaha chágá ná cuhun ndó cahán ndó tuhun Ndióxi xihín ná Israel jáchí cuú ná tátuhun ndicachi, rí nandiñúhu. <sup>7</sup> Cuahán ndó caxí tuhun ndó xihín ná ña sa nacayati quiví cacomí Ndióxi cuénta sahá ñayivi. <sup>8</sup> Ta ndaja vaha ndó ná quíhvi ta jáditacu ndó ndíj ta ndaja vaha ndó ná ndóho cuehé táhyi. Ta tavá ndó rí quini ñúhu ínimá ñayivi. Ta a quéhe ndó yahvi sahá ña cája ndó jáchí coó naxeen ndó ndée ñéhe ndó jan. <sup>9</sup> A cáñehe toho ndó ni jiuhún cuáán ni jiuhún cútí ni jiuhún caa cuahá caca nuu ndó. <sup>10</sup> Ta ni a cáñehe ndó yáti cuhun ndó íchi. Ta ni a cáñehe ndó inga náhá jáhmá ndó cuhun xihín ndó. Ta ni a cáñehe ndó inga ndusa ndó cuhun ndó. Ta ni garróté a cáñehe ndó cuhun ndó. Jáchí nditahan nuú ñayivi quiahva na ña nu ndó.

<sup>11</sup> Tá ná xínú coo ndó in ñuu cahnu á ñuu loho, xini ñúhu ndinducú ndó in ñayivi, ná cuu candeé ini ndó ta vehe ná jan canduu ndó jándá quiahva ná xínú quiví quee ndó cuhun ndó. <sup>12</sup> Ta tá ná xínú coo ndó vehe jan cahán Ndióxi ndó xihín ná. <sup>13</sup> Ta tá ná

ndiquehe vaha ñayivi vehe jan ndohó já quéa cache ndó xihín ná ña ná coo vaha ini na. Joo tá co cúní ná ndíquehe vaha na ndohó ta ni co cúní na cúní johna nu cahán ndó já quéa cuahán queta ndó vehe jan á ñuu jan ta catí ndó ña yáca saha ndó já ná náha ña cuahán cuachí ná cán jata mé va na.<sup>14</sup> Jáchí mé a ndaa ná cahán i xihín ndó ña tá ná xinú coo quiví caja ví Ndióxi sahá ñayivi ndúu ñuyíví já quéa jándoho chágá Ndióxi ini ñayivi ñuu jan a juú ga tá quiáhva najándoho a ini na ñuu Sodoma xihín ñuu Gomorra sanahá sahá ña coó nandiquehe na ndohó.

*Vaxi quiví caja xíxi ñayivi xihín ná xica cahán tuhun Ndióxi*

<sup>16</sup> 'Candehé ndo. Yéhe chíndahá i ndohó cuhún ndó tañu ñayivi quini. Cúú ndó tátuhun ndicachi válí tañu ndivahyí ná cán quéa xíní ñúhú cuéntá vaha coo ndó tá quiáhva cája coo. Ta xíní ñúhú coo mánso ndo tá quiáhva cája ndijata. <sup>17</sup> Cuéntá coo ndó jáchí tiin na ndohó ta ndiquiahva na ndohó ndahá ná jutixia. Ta cani na ndohó ini veñuhu. <sup>18</sup> Ta sahá mí i cañehe na ndohó cuhún ndó nyú ná cuú gobernador á nyú ná cómí cuéntá sahá in nación. Ta já ná cuu ndicani ndó sahá i nyú ná cán ta xihín nuú ná tóho, na co cúú na Israel. <sup>19</sup> Joo a ndícani ini ndó sahá ndá tuhun cahán ndó tá ná ndiquiahva ñayivi ndohó ndahá ná cán. Jáchí tá ná ndindaa hora cahán ndó xihín ná já quéa quiáhva mé va Ndióxi tuhun nuú ndó ña ná cuu cahán ndó sahá i nyú ná cán. <sup>20</sup> Jáchí a juú jini mé ndó quiví ña cahán ndo. Ínima yii Ndióxi cacuu ña quiáhva tóco ndihi ña cahán ndo.

<sup>21</sup> 'Ta java taa jicó tuhún dä ñani da ta java da jicó tuhún dä jahyi da ña ná cahní ñahá ná. Ta java na ndicuita na cani táhan na xihín tátá na ña ná cahní ñahá ná. <sup>22</sup> Ta ndaja táhan ñayivi ndúu ñuyíví yóho candají na ndohó sahá yéhe. Joo ndá ná ná candico tuun íchí mí i janda ná xinú quiví na, ná cán cacuu ná cazu ndaa ínima. <sup>23</sup> Tá ná ndicuita na caja xíxi na xihín ndó in ñuu já cunu ndó cuhún ndó inga ñuu. Jáchí mé a ndaa ná cahán i xihín ndó ña tá sa xinú coo tucu yéhe, da nachindahá Ndióxi nduu ñayivi já a ñáha caca nuu ndó ndijáá ñuu ndácaan ñundáhyí Israel.

<sup>24</sup> 'Candehé ndo. Ni in túhún toho dä xíca jácuaha tiähva chágá dä nu mé dä jánahá ñahá cán. Ta ni in túhún mozo co cíú dä dä cahnu chágá nuú xitoho da. <sup>25</sup> In da jácuaha ndítahan cajii íní dä tá sa xíní ndihi da ña xíní maestro dä. Ta dä cíú mozo ndítahan cajii ini da tá ná xinú dä cacuu dä cahnu tátuhun xitoho da. Candehé ndo. Tá ná cachi ñayivi xihín dä cíú xitoho ndó ña cíú dä Beelzebú, rí cíú tiñáhá sacuahá ndaja ga ví cachi na xihín ndohó.

*Yo já ndítahan cayihví yo  
(Lc. 12:2-7)*

<sup>26</sup> 'Candehé ndo. A cayihví toho ndó ñayivi jáchí ni in túhún toho ñaha cája ñayivi a cíú coo jehé nahá jáchí vaxi quiví tá ndáca náha nu á. Ta vatí cahán jehé ñayivi tuhun joo vaxi quiví tá candaq ini ñayivi sahá. <sup>27</sup> Ña cahán yéhe xihín ndó nuú naá xíní ñúhú cahán ndó ña ndiví táchí nani yéhe candii. Ta ña cahán jehé e xihín ndo xíní ñúhú ndaa ndó jini véhe cayuhú ndó ña. <sup>28</sup> A cayihví toho ndó ñayivi, ná cuu caja cahní yiquí cuñu ndó jáchí ni in ñaha a cíú caja na xihín ínima ndo. Ndióxi quéa xíní ñúhú cayihví ndó jáchí mé a cuu jándahi a sahá yiquí cuñu ndó ta cuu jácana mé a ínima ndo ini indayá andá ama cáá quiví.

<sup>29</sup> 'Candehé ndo. Laa válí ndáchí ri nu táchí ta náu ndivahá jicó ná ri. Joo ni in rí cán co cíú nu ñúhú ña quiví rá ta co sáhan Ndióxi, tátá ndó ñamani. <sup>30</sup> Ta viti caja ndó cuénta xihín mé ndó. Janda ijí jini ndó jan ndáhvi tá in tá in a nu Ndióxi. <sup>31</sup> Ña cán quéa a cayihví toho ndó jáchí ndíyahvi chágá ndo nu Ndióxi a juú ga cuahá ndivah laa válí.

*Tá cahán caxí ñayivi ña cíú ná cuénta Jesús  
(Lc. 12:8-9)*

<sup>32</sup> 'Ndá ná caxí tuhun nuú ñayivi ña cuahán ná cuénta mí i já quéa cachi mí i sahá ná Ndióxi, tátá i, mé a fín indívi, ña mé a ndaa cíú ndusa ná cán cuénta mí i. <sup>33</sup> Joo ndá ná ná cachi xihín ñayivi ña co xíní toho na yéhe já quéa ni yéhe a ndíscuni toho i ná ña cíú ná cuénta mí i nu Ndióxi, tátá i, mé a fín indívi.

*Cája Jesús ña sáhdájava táhan ñayivi  
(Lc. 12:51-53; 14:26-27)*

<sup>34</sup> 'A cahán toho ndó ña naxinu i ñuyíví yóho caja i ña ná coo vaha ini ñayivi. Co

cája i já. Jáchí ña vaxi yehe caja i quéa ná cahnda java táhan na.<sup>35</sup> Vaxi i jácani táhan i dataa xihin tátá dä sahá yehe. Ta vaxi i jácani táhan i in ñáñahá xihin náná ña sahá yehe. Ta vaxi i jácani táhan i ñá cíu sahu xihin xojo ña sahá yehe.<sup>36</sup> Ta ndaja vehe mé ñayivi ndicuña na cani táhan na sahá yehe.

<sup>37</sup> Ta ndá na cúní chágá tátá ná á náná ná ajuú ga yehe já quéa coó sahá toho na cacuu na cuénta mí i. Ta ndá ná quíhvi ini chágá jahyi yií ná á jahyi jíhí ná a juú ga yehe já quéa coó sahá toho na cacuu na cuénta mí i.<sup>38</sup> Ndá ná co cúní ndoho ini sahá ña candico na yehe ta co fin tiahva na quiví na sahá ijá quéa coó sahá toho na cacuu na cuénta mí i.<sup>39</sup> Jáchí ndá ná cátóó coo chágá ná ñuyíví yóho, ná cán cíu na ndihí sahá. Joo ná sahan ndee ini quiví sahá i, ná cán cíu ná ñehé tähvi ná catacu na andá ama cása quiví.

*Ña quiahva Ndióxi nuú ñayivi  
(Mr. 9:41)*

<sup>40</sup> Ndá ná ndíquehe vaha ndohó, ndíquehe vaha ri na yehe va. Ta ndá ná ndíquehe vaha yehe, ndíquehe vaha ri na Ndióxi, mé a nachindahá yehe vaxi i ñuyíví yóho.<sup>41</sup> Ndá ná ndíquehe vaha in profeta vaxi cuénta Ndióxi já quéa tá quiahva coo yahvi ndiquehe profeta cán quiahva já coo ri yahvi ndiquehe ná cán. Ta ndá ná ndíquehe in taa vaha sahá ña cíu dä ñayivi vaha já quéa ndiquehe ná cán yahvi na tá quiahva cása yahvi ndiquehe taa vaha cán.

<sup>42</sup> Ta ndá ná ná quiahva ñaha vatí in yáxi ticuú nuú in ná cíu jahyi i yóho sahá ña ndíco ná íchí cuénta mí i, mé a ndaa ná cahan i xihin ndó ña chahvi Ndióxi sahá ñamani caja na xihin ná —cáchí Jesús.

## 11

*Juan, da jácandúta ñayivi nachindahá da java da xíca xihin dá nuú Jesús  
(Lc. 7:18-35)*

<sup>1</sup> Tá nandihí ñanahá Jesús nuú ná xíca tuun xihin á cán ña ndítahan caja na já naquee a cuahán jánahá nuú ñayivi ta cáxi tihun a tihun Ndióxi nuú ñayivi ndúu ñundahyí cán.

<sup>2</sup> Mé tiempo já nasandacaan Juan vecaa, mé dä cíu dä da jácandúta ñayivi. Ta cán nañehé dä tihun sahá ña náhnu caja Jesús. Andá já nachindahá dä java ná xíca xihin

dá nu á ña ná ndaca tihun ná Jesús á jivi ndusa cíu á Cristo, mé a chindahá Ndióxi cacomí a cuénta sahá ñayivi, á ndítahan candati na inga ga quixi.<sup>4</sup> Tá nandihí nandaca tihun da cán Jesús sahá ña yóho já nacachi Jesús já xihin ná:

—Cuáhán ndó ndicani ndó nu Juan tóco ndihí ña naxini ndó cája i xihin tóco ndihí ña naxini joho ndó cáhan i.<sup>5</sup> Ta ndicani ndó nu dä ña ndíñuna nuú ná cuáta da ndícaca ná réncó caja i. Ta ndaja vaha i ná ndóho cuéhe tähví. Ta jándinuña i joho na jöhö já ná cuni joho na. Ta jánditacu u ndii. Ta cáxi tihun i tihun Ndióxi nuú ná ndahví já ná cuu cíu ndaa íníma ná.<sup>6</sup> Tähví nácuu ná co jándacoo ña cández ini na yehe —nacachi Jesús.

<sup>7</sup> Tá naquee ná nachindahá Juan cán cuahán ná já nacásahá Jesús cáhan xihin ñayivi já cáchí a já xihin ná:

—Ndía nacahán ndó cuni ndó tá naqueta ndó nasañan ndó sánchéhé ndó Juan yucú íchí cán. A juú dä cán cíu taa láhá já quíji nuu da tátihun quíji nuu in tóyoó caja tachi.<sup>8</sup> Ndía naqueta ndó candchéhé ndó. A juú dä cán cíu taa ndíxi jahmá lända ndivaha. Sa xíni vaha ndó ña co ndúu toho dä ndíxi jahmá lända yucú íchí. Ndá dä ndíxi jahmá lända cíu dä ndúu vehe rey cuití va.<sup>9</sup> Ndía nasañan ndó candchéhé ndó cán. Á coó nasañan ndó cuni joho ndó nu cáhan in dä cíu profeta nu ndo. Mé a ndaa dä cán cíu dä in profeta ta fin chágá sahá dä a juú ga inga profeta nasañduu sanahá.<sup>10</sup> Jáchí mé Juan cíu dä dä cáhan tihun Ndióxi sahá tá cáchí a já:

Chindahá i in dä cámú cuhun nu mún, já ná caja tiahva da íchí nuú quisún, já nacahyí a sanahá.

<sup>11</sup> Candchéhé ndó ná cahan i xihin ndo. Tañu tóco ndihí ñayivi coó ga inga profeta cáhnu chágá ajuú ga Juan, mé dä jácandúta ñayivi. Joo ndá ná sa nandiquiahva mé ndáha Ndióxi ña ná cacomí a cuénta sahá ná, vatí cíu ná ná coó sahá, ná cán cíu ná cáhnu chágá a juú ga Juan.

<sup>12</sup> Janda quíjí naxinu Juan, da jácandúta ñayivi ta janda viti ñuhú ndíhi ndivaha ini ñayivi nandiquiahva na mé ná ndáha Ndióxi. Ta na sáhan tihun ndee ini, ná cán cíu ná ñehé tähví cacomí Ndióxi cuénta sahá.

<sup>13</sup> Janda tá cámáni xínu Juan tóco ndihí ña nacahyí ná profeta xihin ña nacahyí Moisés cáhan ña vaxi quíjí cacomí Ndióxi cuénta

sahá ñayivi. <sup>14</sup> Ta tá cúní ndó candúsa ndó ña nacahyí na cán sanahá já cuu candaá ini ndó ña Juan cútú dáká nacahan na cán sahá tá nacachi na ña ndítahan quixi tucu profeta Elías ñuyíví yóho. <sup>15</sup> Na íin joho, ná cuni joho na.

<sup>16</sup> 'Ná cahán i xihín ndó ndaja íin ñayivi ndúu tiempo viti. Cúú ná tátuhun na valí sácoo sájiquí na nuú yahvi ta cayuhú na nuú java ga na valí ndúu cán ta já cachí na já: <sup>17</sup> "Natiiví ndé totíví nu ndó joo coó naxeen ndó cata sahá ndó. Ta naxita cuéha ndivaha ndé nu ndo ta ni coó násacu ndó."

<sup>18</sup> Quiahva já íin ñayivi ndúu tiempo viti jáchí tá naquixi Juan, dákandúta ñayivi ta naxijuhun da ta ni coó naxihi da vino joo nacachi ndó sahá dá ña ndácaan ínima quini ini da. <sup>19</sup> Ta tá naxiñu yehe, dákachindahá Ndióxi nduu ñayivi ta xíxi i pan ta xíhi i vino já nacásahá cachí ndó sahá i ña cútú u in taa ndéhé ndivaha ta xíhi ndivaha i. Ta cachí ndó ña cátóó ndivaha i caceu amigo na cája cuachi xihín na játaca jihuún cuéntá impuesto. Joo na cúní cándaa ini ña ndaa, na cán cútú na cándaa ini ña cája Juan ta cája ri yehe ña ndaa —nacachi Jesús xihín ná.

*Ñayivi sáá ini co cúní na caja na ña cúní Ndióxi*  
(Lc. 10:13-15)

<sup>20</sup> Tá nandihí já nacásahá Jesús jánani a ñayivi ndúu ndíjáá ñuu nuú nacaja cuahá chágá mé á ña xituhún. Jáchí vatí nacaja cuahá mé á ña xituhún nu ná coó nandicó coo ini na nu Ndióxi. Na cán quéa nacachi Jesús já xihín ná:

<sup>21</sup> —Ndáhví nahá nacuu ndó, na ñuu Corazín. Ta ndáhví nahá nacuu ndó, na ñuu Betsaida. Cuahá ndivaha ña náhnu nacaja i nu ndó joo coó naxeen ndó ndicó coo ini ndó jándacoo ndó cuachi ndó. Sanahá najándihí Ndióxi sahá ñuu Tiro xihín sahá ñuu Sidón sahá cuachi na. Tá ná sahan i caja i ña náhnu nuú na cán tá quiahva nacaja i nu mé ndó, sa nájándacoo va na cán cuachi na, nduu. Ta chí iví laá ndaca ndixi na jahmá ndii ta jácuyu na yaa yiquí jíní na, nduu. Jáchí xihín ña yóho jánahá na ña nandicó coo ini na sahá cuachi na.

<sup>22</sup> Mé a ndaa ná cahán i xihín ndó tá ná xinu quiví caja vií Ndióxi sahá ñayivi já ndoho chágá ini mé ndó, na ñuu jan a juú ga tá quiahva nandoho ini ñayivi násanduu ñuu Tiro xihín ñuu Sidón sanahá. <sup>23</sup> Ta viti

cáhan i xihín ndó, na ndúu ñuu Capernaum. Jandá indíví cúní ndó cuhun ndó joo sahá ña saá ini ndó cuhun ndó jandá indayá, caja Ndióxi. Jáchí tá ná caja i ña xituhún nuú ñayivi ñuu Sodoma tá quiahva nacaja i nu ndohó ta ni a ndíhi sahá ñuu cán, nduu. <sup>24</sup> Mé a ndaa ná cahán i xihín ndó ña tá ná xinu quiví caja vií Ndióxi sahá ñayivi já ndoho chágá ini mé ndó, na ñuu jan a juú ga tá quiahva nandoho ini ñayivi násanduu ñuu Sodoma sanahá —nacachi Jesús.

Tá nacajii ndivaha ini Jesús  
(Lc. 10:21-22)

<sup>25</sup> Mé tiempo cán nacahan Jesús já nacachi a já:

—Cája cahnu i ndohó, tátá Ndióxi, na cútú xitohu tócoo ndíhi ñaha ndúu indíví xihín ñuyíví. Jáchí nájánahá ndó ña ndichí ndivaha nuú ñayivi, na coó cuahá sahá nuú java ga na. Ta nacaja ndó ña ná a cuú candaá ini na ndichí xihín na tacu ini ñaha mé ndó. <sup>26</sup> Já nacaja ndó jáchí já násacu ini ndó caja ndó —nacachi Jesús.

<sup>27</sup> Andá já nacachi a já xihín na ndúu cán:  
—Nandiquiahva tátá i tócoo ndíhi ñaha ndahá i ña ná cacomi i cuéntá sahá. Ta ni in tühún toho ñayivi co xíni vaha na yehe, da cútú in tühún jiní já jahyi Ndióxi. Mé Ndióxi, tátá i cuití va xíni vaha yehe. Ta ni in tühún toho na co xíni vaha na yo cútú tátá i. In tühún yehe, dákandúta xíni vaha yehe. Ta yehe cútú da caxi ndá ñayivi jánahá i nuú sahá Ndióxi, tátá i já ná candaá vaha ini na yo cútú mé á. <sup>28</sup> Naha ndíhi ndó nuú i, na sa nacanaá cája chiuún. Taxi ndó ña ndójó ndó jan nuú i ta já yehe caja i ña ná ndiquehe ndéé ndo. <sup>29</sup> Yehe cúní ña ná ndiquiahva ndó mé ndó ndahá i. Ta ña yóho cútú á tátuhun in yúcú chíñuu na sahá jíquí tñidquí. Ta xíni ñuhú catiaghva ndó caja ndó tá quiahva cája yehe. Jáchí coó cama jiní i xihín ñayivi ta cútú u taa manso ndivaha. Quiahva já caja ndó já ñehe íní ndo ndiquehe ndéé ndo. <sup>30</sup> Jáchí yúcú chíñuu i jata ndo xihín ñaha jácojo i jata ndo cútú á ña cama ñuhú laá —nacachi Jesús.

## 12

*Ña nacaja na xíca tuun xihín Jesús in quivi ndiquehe ndéé ñayivi*

(Mr. 2:23-28; Lc. 6:1-5)

<sup>1</sup> Ta ndaja coo in quivi ndiquehe ndéé ñayivi xíca Jesús cuahán tañu nuú naxutu

na trigo. Ta sahá ña cuíco na xíca tuun xihín Jesús sahá ña cán quéa nacásahá na túhún na java yucu jiní trigo cán ta tává na trigo sáxí na.<sup>2</sup> Tá naxini na fariseo ña yóho já nacásahá na cähán cuachí na nuú Jesús. Já cähí na já:

—Candehé. Na xica tuun xuhun jan cája na chuun ña co ndítahan caja ñayivi quiví ndíquehe ndée yó —nacachi na xihín Jesús.

<sup>3</sup> Já nanducú ñehe Jesús tūhun nuú ná já nacachi a já xihín ná:

—Á a náha toho cahvi ndó nuú tuhun Ndióxi nu cähán sahá ña nacaja David sa-nahá tá nacuico da xihín na xíca xihín dá.<sup>4</sup> Na nacaja da quéa naquíhvi da ini veñhu Ndióxi ta naxixi da pan ña yii. Ta ni nu mé dá ta ni nuú na xíca xihín dá cán co cání a nuú cuxu na pan cán. In túhún jutu cuití va cání a nuú cuxu na pan cán.<sup>5</sup> Ta á a náha toho cahvi ndó ña nacahyí Moisés nu ley tá nacahyí dä ña co cája toho jutu cuachí nu Ndióxi vatí cája chūun da veñhu quiví ndíquehe ndée ñayivi.<sup>6</sup> Mé a ndaa ná cähán i xihín ndo ña fin chágá sahá i, dä cändichi yóho a juú ga sahá veñhu nu cája cähnu na Ndióxi jan.<sup>7</sup> Mé ndó co cändaa toho ini ndó ña cúní cachi tuhun Ndióxi tá cähí a já: “Yehé cúní ña ná candáhví ini ndó ñayivi jáchi vaha chágá ña yóho a juú ga ña ná joco ndó quíti nuú i”, cähí tuhun Ndióxi. Jáchí tá ná cändaa ini ndó tuhun yóho, nduu ta a chícaan toho ndó cuachi jatá ñayivi, na coó cuachi.<sup>8</sup> Candehé ndó. Yehé, dä nacindahá Ndióxi nduu ñayivi, fin sahá i cahnda i chuu sahá quiví ndíquehe ndée ñayivi —nacachi Jesús.

Tá nandaja vaha Jesús in dä nähichí ndáha  
(Mr. 3:1-6; Lc. 6:6-11)

<sup>9</sup> Tá nandihí já naqee Jesús cuahan já nandihví a veñhu mé ñuu cán.<sup>10</sup> Ta cán nasañdacaan in dätaa, dä nähichí ndáha. Ta sahá ña ndúcu na fariseo ndúu cán ndá quiáhva caja na já ná cuu chícaan na cuachi jatá Jesús sahá ña cán quéa nandaca tuhún na mé á já nacachi na já:

—Á sáhan Ndióxi ñamani ndaja vahún na quihví quiví ndíquehe ndée yó —nacachi na cán xihín á.

<sup>11</sup> Anda já nacachi Jesús já xihín ná:

—Candehé ndó. Tá fin in ndicachi loho jana ndo ta tá ná ndicava rí ini in táhvi quiví ndíquehe ndée yó, ama ná a cuhún ndó tavá ndó rí.<sup>12</sup> Ta ndiyahvi chágá ñayivi

a juú ga ndicachi. Ña cán quéa sáhan Ndióxi ñamani cája í ña vaha quiví ndíquehe ndée yó —nacachi Jesús xihín ná.

<sup>13</sup> Tá nandihí nacachi a já xihín dataa, dä nähichí ndáha cán já:

—Jándacaa ndáhun —nacachi a xihín dá.

Tá najándacaa dä ndáha dä já nandiváha ndáha dä. Ta cáa tá quiáhva cáá inga ndáha dä cán.<sup>14</sup> Joo tá naqueta na fariseo cán já nacásahá na jándique táhan na tuhun na ña cahní na Jesús.

*Ña cähán Isaías sahá Jesús*

<sup>15</sup> Tá nañehe Jesús tuhun ña ndúcu na cán cahní ñahá na já naqee a cuahan va ta cuahá ndiváha ñayivi ndíco jatá cuahan. Ta ndaja táhan ná quíhvi nandaja vaha Jesús.<sup>16</sup> Ta nasañhanda Jesús chuun nuú na sa nandiváha cán ña ná a cáxi tuhun na nuú ñayivi yo cíu mé á.<sup>17</sup> Tóco ndihí ña yóho na yaha já ná xínu coo nuú tuhun nacahyí profeta Isaías tá nacahyí dä já:

<sup>18</sup> Yóho fin dä cája chūun cuéntá mí i, mé dä nacaxi i.

Quíhvi ndiváha ini i dä ta cájii íní i xihín ña cája da.

Ta jáchutu ndaa i ínimá dä xihín ínimá yii mí i,

ñá ná jánahá dä nuú ñayivi ndúu ñuyíví ndá quiáhva cája víi i sahá ná.

<sup>19</sup> Ta ni a cähán cuachi toho da ta ni a cayuhú cohó da,  
já quéa a cúní joho ñayivi xíca cálle nu cähán da.

<sup>20</sup> Tá quiáhva a jácuachi toho da ndoo, dö sa natahnú,  
quiáhva já a jácuachi toho da ñayivi, na cavítá ini.

Ta quiáhva já ni a ndáhvá toho da tití ñíhu loho, ña sa cúní ndahvá janda quiáhva ná quee vaha ña ndaa xihín ña ihví.

<sup>21</sup> Ta ndaja táhan ñayivi ndúu níi cíu ñuyíví tandaa candeé ini na mé dä, nacahyí Isaías sanahá.

*Jácojo na cuachi jatá Jesús ña cája chūun a xihín ndée tiñahá sacuahá*

(Mr. 3:20-30; Lc. 11:14-23; 12:10)

<sup>22</sup> Java ñayivi ñehe na in dä cuáa ta cíu dä dä níhi jáchi ndácaan rí quini ini da. Ta tá nandaja vaha Jesús dä já nasañdehé dä ta nandicahan da.<sup>23</sup> Tá naxini ñayivi ndúu cán ña yóho já nacatontó ndiváha na

já nacasáhá ndáca tūhún táhan na já cachí na já:

—Á a juú da yóho cúu da naquixi chīchi rey David —cáchí xīhín táhan na.

<sup>24</sup> Tá naxini joho na fariseo ña cahán ñayivi cán já nacasáhá cáchí mé na fariseo cán já:

—Taa yóho cúu tává da rí quini ñúhu ini ñayivi jáchí mé Beelzebú, rí cúu tiñáhá sacuahá nu rí quini cán sáhan rí ndée rí nu dá cája da ña —nacachi na.

<sup>25</sup> Ta sa xíní va Jesús ña cahvi ini na cán sahá ña cán quéa nacachi a já xīhín ná:

—Tá sáhndá java táhan ñayivi ndúu in nación ta ndúu na cuahá tálndá já cásáhá cání táhan ndaja táhan mé va na já cama chá ndihí sahá nu ndúu na cán. Ta quiahva já vaha ri xīhín in ñuu á in vehe tá sáhndá java táhan ndaja táhan mé já quéa jándhi na saha ná. <sup>26</sup> Ta quiahva já yáha xīhín Satanás, rí cúu tiñáhá sacuahá. Ta tá ná tavá rí inga rí quini ini ñayivi á tá ná caní táhan ndaja táhan mé rí já quéa ndihí sahá ndée ña cómí ri. <sup>27</sup> Mé ndó cáchí ndo ña tavá i rí quini ini ñayivi xīhín ndée Beelzebú, rí cúu tiñáhá sacuahá. Joo tá mé a ndaa cúu ndusa ña cáchí ndo sahá i jan, ndáchí quéhe na cúu cuénta mé ndó jan ndée tavá na rí quini ini ñayivi. Ama ná cachí ndó ña tavá ndo rí quini xīhín ndée tiñáhá sacuahá. Ña yóho náha ña co cahvi ndaa ini ndó.

<sup>28</sup> Candehé ndo. Yehe tává i íníma quini ini ñayivi xīhín ndée íníma yii Ndióxi. Ta xīhín ña yóho náha cáxí a ña sa naxinu co quiyi cacomí Ndióxi cuénta sahá ndó.

<sup>29</sup> Candehé ndo. Sácu u in quiahva nu ndo. Ni in datqaa a cíu ndihvi da caja cuishná da ñaha vehe in dà ndacú joo tá ná cató da dà ndacú cán já cuu quehe da ñaha da cán.

<sup>30</sup> Ndá na coó cuahán xoo i, cúu ná na co cúní yehé. Jáchí ndá na co chíndee yehé xīhín ña cája i, cúu ná na sají nuu nyú i.

<sup>31</sup> Ña cán quéa cáchí i xīhín ndo ña caja cáhu ini Ndióxi sahá tá nyú cuachi cája ñayivi xīhín sahá tá nyú tūhún quini cahán na. Joo tá ná cahán níuu na sahá íníma yii Ndióxi já quéa a cája cáhu toho ini Ndióxi sahá ña nacaja na. <sup>32</sup> Caja cáhu ini Ndióxi jandá sahá ndá na ná canahá xīhín yehé, da nachindahá Ndióxi nduu ñayivi joo tá ná canahá na xīhín íníma yii Ndióxi já quéa a cája cáhu toho ini Ndióxi sahá ná ni nani

tácú na ndúu na ñuyíví yóho ta ni tá cuhun na cavií sahá ná nu Ndióxi.

Xīhín cuihi cíun nyú in yító cuu ndicuní ndá yító cíun dó  
(Lc. 6:43-45)

<sup>33</sup> Xímí ñúhu jándee ndó yító vaha ña ná cuun cuihi vaha nu do. Jáchí tá ná jándee ndó yító níuu já quéa cuihi níuu cuun nu do. Jáchí xīhín cuihi cíun nyú in yító cuu ndicuní ndá yító cíun dó. <sup>34</sup> Mé ndó cíun ndó tátuhun coo jáchí cíun ndó na quini sahá ña cán quéa cahán ndó tūhún quini ta a cuú cana tuhun vaha yúhu ndo. Jáchí yúhu ñayivi cána tocó ndihí ña nandicutú ñúhu íníma ná. <sup>35</sup> In taa vaha cahán da ndinuhu ña vaha jáchí ndinuhu ña vaha ñúhu íníma dá. Ta in taa quini cahán da ndinuhu ña níuu jáchí ña níuu quéa ndácaan íníma dá. <sup>36</sup> Mé a ndaa ná cahán i xīhín ndo ña tá ná ndindaa quiví caja víi Ndióxi sahá ñayivi ndúu ñuyíví anda jáví ndiquiahva ñayivi cuénta nu Ndióxi sahá ndaja táhan tūhún níuu nacahán na ñuyíví yóho. <sup>37</sup> Jáchí sahá mé tūhún nacahán ndó jan caja víi Ndióxi sahá ndo. Ta xīhín ña jan cachí Ndióxi ña a fín cuachi ndó á coó cuachi ndó —cáchí Jesús.

Xíca ñayivi quini ña ná caja Jesús ña xitúhún nu ná  
(Mr. 8:12; Lc. 11:29-32)

<sup>38</sup> Java na fariseo xīhín na jánaha ley Moisés nacahán na xīhín Jesús já nacachi na já xīhín á:

—Maestro, cúní nde ña ná caja ndó in ñaha xitúhún nyú nde já ná cuni nde —nacachi na xīhín Jesús.

<sup>39</sup> Já nanducú ñehe Jesús tūhún nyú na cán já nacachi a já xīhín ná:

—Ñayivi quini, na co cúní cándusa Ndióxi, na yóho cúu na cúní cuni ña xitúhún. Joo a cúní toho na ña. Ña cumi ndusa na quéa ña ndoho i tá quiahva nandoho Jonás, da nasacuu profeta sanahá. <sup>40</sup> Jáchí tá quiahva nasandacaan Jonás uní quiví xīhín uní ñuu tixi tiyacá cahán tá nacocó rí da quiahva já ndacaan ri yehé, da nachindahá Ndióxi nduu ñayivi tixi ñundáhyí uní quiví xīhín uní ñuu.

<sup>41</sup> Ta ñayivi nasanduu Nínive sanahá cán ndacuña na chicáan na cuachi jata ndó tá ná xínu quiví caja víi Ndióxi sahá cuachi ñayivi ndúu viti. Jáchí mé na nasanduu ñuu Nínive cán najándacoo na cuachi cája

na tá nacahán Jonás xihín ná ña nacachi Ndióxi coo. Ta yehé íin chágá sahá i a juú gá Jonás joo co cándusa ndó yehé.<sup>42</sup> Jari tá ná xínu quívi caja vií Ndióxi sahá cuachi ñayivi ndúu tiempo viti anda já ndacuita in ñá násacomí cuénta sahá ñayivi ndúu chí xoo sur sanahá ta chicaan ñá cuachi jatá ñayivi ndúu tiempo viti. Jáchí mé ñá cán násahá násahá xícá ndivaha ñá nu rey Salomón sanahá násahan ñá cuni joho ñá tóhun ndichí cähán dä. Ta yehé íin chágá sahá i a juú gá Salomón joo co cándusa ndó yehé.

*Jánahá Jesús ña cughá tañu ndicó coo tucu íníma quini ini ñayivi vatí sa naquee rí*  
(Lc. 11:24-26)

<sup>43</sup> Tá quéta in íníma quini ini in dataa já quée rí cuahán rí xíca nuu rí ndijáá yucú íchí ndínducú rí nuú candoo rí. Ta tá co ndíñhe rí ña já cásáhá cähiví ini rí já:<sup>44</sup> "Coho ndicó coo tucú ini da nuú násandacaan i cán jáchí cùú á tátuhun vehé", cähán ri. Ta tá xínu coo rí ini dä cán já sándezhe ri ñá íin vií va ini dä cán tá quiáhva vií ini vehe tá natíhvi á ta nandaca ndójó vaha tóco ndihí ñaha ini a.<sup>45</sup> Anda já quée tucu mé rí quini cán cuahán rí quehe rí usá ga rí quini chágá a juú gá mé rí já xínu ndihí rí ndihvi ri ini dataa cán. Ta mé dä cán ndiquini chágá dä a juú gá tá násandacaan in táláa rí ini da. Quiáhva já ndoho ri ñayivi quini ndúu tiempo viti —cáchí Jesús.

*Náná Jesús xihín ñani a cúní na cuni na a*  
(Mr. 3:31-35; Lc. 8:19-21)

<sup>46</sup> Nani cähán yii va Jesús xihín ñayivi já xínu coo náná Jesús xihín ñani a ña ná cahan na xihín a cúní na. Joo nacando na ndítá na jata véhe. <sup>47</sup> Já násahan in na cáxi tuhun na nuú Jesús já cáchí na xihín á:

—Jata véhe cáá íin nánún xihín ñanún ta cahan na xuhun cúní na —nacachi na xihín Jesús.

<sup>48</sup> Joo nánducú ñehe Jesús tuhun nuú na cán já nacachi a já xihín ná:

—Cähán i xihín ndó ndá na cùú ndusa náná i xihín ñani i —nacachi Jesús xihín ná.

<sup>49</sup> Anda já nanahá ndáha mé á na xíca tuu xihín a cán já nacachi a já:

—Na yóho cùú ná tátuhun náná i xihín ñani i.<sup>50</sup> Jáchí ndá na cája ña cúní Ndióxi, tátá i, mé a íin indivi, na cán cùú ná tátuhun ñani i xihín quiáhva i xihín náná i —nacachi Jesús xihín na cán.

Sácú Jesús quiáhva sahá in dä sáta tata  
(Mr. 4:1-9; Lc. 8:4-8)

<sup>1</sup> Sa mé quívi já naqueta Jesús vehe cán já násahan násacoo a yati yuhú tañuhú cán.<sup>2</sup> Ta sahá ña náñata cuahá ndivaha ñayivi nu á sahá ña cán quéa nandaa mé á jatá in barco loho ta násacoo a jatá do cán nani ndúu ñayivi ñutí yuhú tañuhú cán.<sup>3</sup> Anda já násahá jánahá cuahá ñaha nu ná nacachi a já xihín ná:

—In dä sáta tata naquee da cuahan da cata da ña.<sup>4</sup> Ta tá sáta dä ña cuahan da já nacuyu java ña íchí ta cán naxínu laa ta násaxí rí ña.<sup>5</sup> Ta java ña nacuyu a tañu yuu nuú coó cuahá ñuhú. Ta cama chá nanduta mé tata jáchí co cúná ñuhú nuú nacuyu a.<sup>6</sup> Joo tá naqueta candii já najáhichí ñahá sahá ña coó cuahá yóho a chí nandihi sahá.

<sup>7</sup> Ta java tata nacuyu tañu tohíñú ta tá násahnu tohíñú cán já nanditáhá ndihí a nacaja tohíñú.<sup>8</sup> Ta java tata nacuyu a nu ñuhú vaha ta já násahen cuahá ñaha ña jáquee na nu á. Java ña násahen in ciento a nuú in in tata ta java ña násahen uní jíco úxu a ta java ña násahen oco úxu a nuú in in tata.<sup>9</sup> Ná íin joho, ná cuni joho na —nacachi Jesús.

*Ndícani Jesús ndá sahá quéa násacu a quiáhva nu ná*

(Mr. 4:10-12; Lc. 8:9-10)

<sup>10</sup> Na xíca tuu xihín Jesús cán nacayati na nu á já násahá ndáca tuhún na mé á ndá cuénta quéa jánahá mé á xihín quiáhva cuití va nuú ñayivi.<sup>11</sup> Anda já nacachi Jesús já xihín ná:

—Ña coó nacandaqá ini ndó jihna ña cán cándaqá ini ndó viti jáchí násuná Ndióxi xín túni ndó cándaqá ini ndó ndá quiáhva cacomí mé á cuénta sahá ñayivi. Joo na a ñáha cacomí Ndióxi cuénta sahá, na cán cùú na sácu u quiáhva nuú.<sup>12</sup> Jáchí ndá na sa íin ñáha nuú, ñehe tähví na coo chágá ñáha nu ná. Joo na co á ñáha nuú, janda ña chá íin nu ná ndindaa.<sup>13</sup> Sahá ña cán quéa cähán i xihín ndinuhu quiáhva xihín mé ndó jáchí vatí sándezhe na joo cùú ná tátuhun na co tíví nuú. Ta vatí xíni joho na joo cùú ná tátuhun na joho jáchi co cándaa ini na ña cähán i xihín ná.<sup>14</sup> Ta xihín ña yóho xínu coo nuú tuhun nacachi profeta Isaías sanahá ndivaha tá nacachi da já:

Vatí xím̄ joho na joo cūú ná tátuhun ná jóho  
jách̄i co cándaa ini na nā cáhan i  
xih̄in ná.

Ta vatí sánدهé ná joo cūú ná tátuhun ná co  
tívi nyu.

<sup>15</sup> Jách̄i nandají xím̄ túni tóco ndili nayivi  
ñuu yóho.

Ta ndájí tuun joho na ta ndájí tuun nduchú  
núú ná.

Nā cán quéa a cūú cuni joho na,  
ta ni a cūú candehé ná,

ta ni a cūú cándaa ini na nā xím̄ joho na.

Ta xih̄in nā yóho co ndfcó coo na nyu i nā  
ná ndaja vaha i nā, nacahyí Isaías  
sanhá.

<sup>16</sup> 'Joo tahií nacuu ndó jách̄i cándaa ini  
ndó nā sánدهé ndó xih̄in nā xím̄ joho ndó.

<sup>17</sup> Mé a ndaa ná cahan i xih̄in ndó nā cuahá  
ndivaha ná profeta xih̄in cuahá ndivaha  
ñayivi vaha naxica ini na cuni na nā xím̄  
ndó yóho viti joo coo naxini na nā ta naxica  
ini na cuni joho na nā xím̄ joho ndó yóho  
joo coo naxini joho na nā.

Ndícani Jesús nā cún̄i cache quiaghva násacu  
a nu ná

(Mr. 4:13-20; Lc. 8:11-15)

<sup>18</sup> 'Cuni joho ndó nā cún̄i cache quiaghva  
násacu u sahá dā sáta tata cán. <sup>19</sup> Ñayivi,  
na xím̄ joho tuhun vaha sahá nā sa nacayati  
quiví cacomí Ndióxi cuéntá sahá ñayivi joo  
co cándaa ini na nā, na cán cūú ná tátuhun  
tata nā nacyu íchi cán. Jách̄i xím̄ tiñáha  
sacuha ta tává rí tuhun Ndióxi cán ínimá  
ná. <sup>20</sup> Ta tata nā nacyu tañu yuú cán náha  
ndá quiahva fin ñayivi, na cájjí ndivaha  
ini ndíquehe tuhun Ndióxi. <sup>21</sup> Joo sahá nā  
co nēhe iní yóho a cuhun cún̄a a sahá nā  
cán quéa chá tiempo cuití va cándusa na  
tuhun Ndióxi. Jách̄i tá cásahá ndóho ini na  
sahá tuhun Ndióxi chí jándacoo va na nā.

<sup>22</sup> Ta tata nā nacyu tañu tohíñú cán náha  
ndá quiahva fin ñayivi, na xím̄ joho tuhun  
Ndióxi joo coo jándacoo na íchi naxica na  
jihna. Ta cásahá ndícani ini na sahá náha  
ñuyíví yóho ta cásahá ná cátóo ná canduu  
cuahá náha cuicá nu ná ta cásahá ndícají  
ini na caja na nā náu. Sahá nā cán quéa  
cúú á tátuhun tata nā co cána náha jáquee  
na nyu jách̄i coo nashanu na xih̄in tuhun

Ndióxi. <sup>23</sup> Joo tata nā nacyu nyu nūnu vaha  
cán náha ndá quiahva fin ñayivi, na xím̄  
joho tuhun Ndióxi ta cándaa ini na nā ta  
cája na nā cájjí ini Ndióxi xih̄in. Java na cūú

ná tátuhun yucu trigo nā nashan in ciento  
a nyu in in tata. Ta java na cūú ná tátuhun  
tata nā nashan unijico uxu a nyu in in tata.  
Ta java na cūú ná tátuhun tata nā nashan  
oco uxu a nyu in in a —nacachi Jesús xih̄in  
ná.

Sácú Jesús quiaghva sahá yucu quini nána  
tañu trigo

<sup>24</sup> Anda já násacu Jesús inga quiaghva nyu  
ñayivi ndúu cán já nacachi a já xih̄in ná:

—Tá ná casáhá cacomí Ndióxi cuéntá  
sahá ñayivi já cacuu a tátuhun tā naxutu  
in dñataa trigo nā vaha nu ñúhu dá. <sup>25</sup> Joo  
tá sa ndúu ndili na quíji ná já naxinu coo  
in da co cún̄i táhan xih̄in dā ta nachihin  
da tata yucu quini tañu trigo cán já naquee  
da cuahan da. <sup>26</sup> Ta tā nashanu trigo cán  
ta nacasañá cána yóco a já nandutá ri yucu  
quini cán. <sup>27</sup> Anda já nashan ná caja chúun  
cán cahan na xih̄in xitoho na já nacachi na  
já: “Candehé ndó. Tata vaha quéa nachihin  
ndó nu ñúhu ndó joo co cándaa ini nde  
ndáchí náquixi yucu quini náñana xih̄in  
á yóho”, nacachi ná cán xih̄in xitoho na.

<sup>28</sup> Anda já nanducú nēhe dā cán tuhun nu  
ná já nacachi da já xih̄in ná: “Ndá dā co  
cún̄i yehe, dā cán cūú dā nacaja nā yóho”,  
nacachi da. Anda já nacachi ná caja chúun  
nu dā cán já xih̄in dā: “Á co cún̄i ndó  
nā ná quihvi nde tuhun ndili nde yucu  
quini cāa tañu trigo”, nacachi na xih̄in dā.

<sup>29</sup> Anda já nacachi da já xih̄in ná: “Ná coo  
mé á jách̄i tiñáha ná nani túhun ndó yucu  
quini jan cuu tuhun ndó yucu trigo xih̄in  
á. <sup>30</sup> Vaha chá ná quiahva í ñamají cuahnu  
a xih̄in trigo janda quiahva ná ndindaa  
tiempo jáqueé trigo. Ta tā sa jáqueé já  
cahnda i chuun nyu ná jáquee nā ná tavá  
xóo na yucu quini jihna ñúhu ta ná cató ná  
nā tuhun ná nūnu nā ná chican ñúhu ná  
nā. Ta anda jáví ná játaca na trigo tañu vaha  
na ini yáca náha i”, nacachi da —cáchí Jesús  
sácu a quiahva nu ná.

Sácú Jesús inga quiaghva sahá ndíqui  
mostaza

(Mr. 4:30-32; Lc. 13:18-19)

<sup>31</sup> Ta násacu Jesús inga quiaghva nu ná já  
nacachi a já xih̄in ná:

—Tá ná xím̄ coo quiví cacomí Ndióxi  
cuéntá sahá ñayivi já cūú á tátuhun in  
ndíqui mostaza nā chishin in dñataa nu ñúhu  
da. <sup>32</sup> Cúú á ndíqui loho chágá nu tóco ndili

ndíquí válí íin ñuyíví. Joo sáhnu a janda quiqhva ndúu a in yíto, dó cahnu nū ndíhi yíto nū xínu coo laa cávaha rí chohó rí nu ndáhá do —cáchí Jesús.

Sácu Jesúsi quiahva sahá yusá naxqaa  
(Lc. 13:20-21)

<sup>33</sup> Ta násacu Jesús inga quiahva nū ná já nacachi a já xihín ná:

—Tá ná cacomí Ndióxi cuéntá sahá ñayivi já cacuu a tátuhun tá cává táhan in ñáñáha uní tálndá náhnu harina xihín loho yusá naxqaa nā ná jánañu a tóco ndíhi mé yúsá cán —nacachi Jesús.

Sácu Jesúsi quiahva cuití va nū ñayivi  
(Mr. 4:33-34)

<sup>34</sup> Xihín ndinuhu quiahva cuití nájánahá Jesús tóco ndíhi nā yóho nū ñayivi. <sup>35</sup> Já nacaja Jesús nā ná xínu coo nū nā nacachi in dā profeta sáñahá tá nacachi da já: Xihín ndinuhu quiahva cuití va cahán i xihín ñayivi,

ta cahan i sahá ñáha náshajin jehé nū ná janda mé sahá tá cámáni cava sahá sahá ñuyíví —cáchí tuhun Ndióxi.

Ndícani Jesúsi nā cúní cahí quiahva násacu a sahá yucu quini náñana tañu trigo cán

<sup>36</sup> Tá nándihi nándindayí Jesús ñayivi cuahá ndúu cán já naquihvi a ini vehe. Andá já nácativí ná xíca tuun xihín a cán nū á já nacachi na já xihín á:

—Ná ndicani ndó nū ndé ndíca cúní cahí quiahva násacu ndó sahá yucu quini náñana tañu trigo cán —nacachi na.

<sup>37</sup> Andá já nacachi Jesús já xihín ná:

—Dá xútú tata vahá cíu yéhe, dá náchindahá Ndióxi nduu ñayivi. <sup>38</sup> Ta nūhu nū xútú u tata cíu á ñayivi ñuyíví. Ta tata vahá cán cíu á yuhú nū ná cómí Ndióxi cuéntá sahá. Ta yucu quini cán cíu á yuhú nū ñayivi quini, ná cíu cuéntá rí quini.

<sup>39</sup> Ta dá qo cúní táhan xihín i náshajin da naxutu da yucu quini nū nūhu cán ta cíu dá yuhú nū tñiñáha sácuahá. Ta tiempo jáquee na cán cíu á tá ná xínu coo quíví caja víi Ndióxi sahá ñayivi ndúu ñuyíví. Ta na xíca jáquee cán cíu ná tátó Ndióxi. <sup>40</sup> Ta tá quiahva nácativa na cán xihín yucu quini tá nájátaca na nā ta náchicáqan nūhu nā nā quiahva já yahá ri xihín ñayivi ñuyíví yóho

tá ná tandaas quíví ndíhi sahá ñayivi. <sup>41</sup> Ta yéhe, dá náchindahá Ndióxi nduu ñayivi chindahá i tátó mí i nā ná cahnda java táhan

na nā cómí i cuéntá sahá xihín nā co cíu cuéntá mí i. Jáchí ná cán jácahan ná inga na caja na cuachi xihín java ga ná cája nā nū. <sup>42</sup> Ta jáqueta nuu i nā ini indayá ta cán cuacu na anda quiahva chicáhná nūhu nā jáchí ndóho ndivaha ini na. <sup>43</sup> Ta anda já na cája nā cúní Ndióxi ndiyihví ndaa na tá quiahva yéhe candii nū cacomí Ndióxi cuéntá sahá ná, mé a cíu á tátá nā. Ndá ná fín joho, nā cuni joho na.

Sácu Jesúsi quiahva sahá sató jiuhún ndácajan jehé

<sup>44</sup> Tá ná cacomí Ndióxi cuéntá sahá ñayivi cacuu a tátuhun nā yáha xihín in dātaa tá ndínehe dá in sató jiuhún nā ndácajan jehé in ñundáhyi. Ta tá nándihi já chíjáhvi tucu da nā xihín ñúhu. Ta já cávatá ndivaha da cuhun da jicó da tóco ndíhi nā cómí da nā ná cueen da ñundáhyi nū nanduxu mé sató jiuhún cán.

Sácu Jesúsi quiahva sahá in jíquí sándacu na nā yahvi ndivaha

<sup>45</sup> Tá ná cacomí Ndióxi cuéntá sahá ñayivi cacuu a tátuhun tá xíca nuu in dācaya ndahví ndúcú da jíquí sándacu na nā yahvi ndivaha. <sup>46</sup> Ta tá ndítahan da in jíquí yahvi ndivaha já cuahán da jicó da ndíhi nāha cómí da nā ná cueen da jíquí yahvi ndivaha cán.

Sácu Jesúsi quiahva sahá in ñúnu tává tiyacá

<sup>47</sup> Ta tá ná cacomí Ndióxi cuéntá sahá ñayivi cacuu a tátuhun in ñúnu jácana na nū náshajin ta já tún na tá nū týiacá. <sup>48</sup> Ta tá sa náchutú ñúnu cán já tává ná týiacá cán yuhú tañuhú ta cán sácoo na ndácahnada java na rí. Ta rí vahá cán táán vahá na ini toyicá nā joo rí nūu cán xítá rí cája na. <sup>49</sup> Quiahva já yahá ri xihín ñayivi tá ná ndíhi sahá ñuyíví. Jáchí queta tátó Ndióxi ndacahnada java nā vahá tañu nā quini. <sup>50</sup> Ta ñayivi quini cán chicáqan nā ini indayá ta cán cuacu na janda quiahva chicáhná nūhu nā jáchí ndóho ndivaha ini na —cáchí Jesús.

Tá jángha Jesúsi sahá nā sáqá xihín nā yatá

<sup>51</sup> Tá nándihi já nándacá tuhún Jesús nā já nacachi a já:

—Á cándaa ini ndó tóco ndíhi nā cahán i yóho —cáchí a.

—Ajan, cándaa ini nde nā —nacachi nā cán xihín á.

<sup>52</sup> Andá já nacachi Jesús já xihín ná:

—Tá jácuaха in dà jánahá ley Moisés sahá ndaja ndiquiahva da mé dá ndáhá Ndióxi cacomí a cuéntá sahá dá já cíú dá tátuhun in dàtaa, dà fin ñahá ini vehe. Ta xíní vaha da tavá dà ñahá da á cíú á ña saá á ña yatá —cáchí á.

*Tá cuahán Jesús ñuu Nazaret  
(Mr. 6:1-6; Lc. 4:16-30)*

<sup>53</sup> Tá nandihi nájánahá Jesús xihín quiahva yóho já naquee a cuanuhú a. <sup>54</sup> Tá naxinu a ñuu mé á já nácasahá jánahá ini veñuhu cán. Ta jandá joho cátontó ñayivi ñuu cán já cáchí na já:

—Ta ndájá nácatiahva nahá ri dà yóho ña xíní dà. Ta ndaja cája da ñaha xitúhún yóho. <sup>55</sup> Á a juú dà yóho cíú jahyi dà cája chúun xihín yító. Á a juú náná dà yóho cíú María. Ta ñani da cíú Jacobo xihín José xihín Simón xihín Judas viti. <sup>56</sup> Ta sá mé ñuu yóho ndúu ri quiahva da jan. Ndájá nácatiahva nahá dà ña jánahá da nu yo, dà já —nacachi xihín táhan na cán.

<sup>57</sup> Ta chí coó náxeen na candúsá ñahá na. Sáhá ña cán quéa nacachi a já xihín ná:

—Váti tóco ndili ñayivi cája cähnu na in profeta joo na vehe da xihín na ñuu da co cándusa na dà —cáchí Jesús.

<sup>58</sup> Ta coó nácaja cuahá Jesús ña xitúhún ñuu cán jáchí coó nacandúsá toho ñayivi cán mé á.

## 14

*Tá naxihí Juan, dà nácaja ndútä ñayivi  
(Mr. 6:14-29; Lc. 9:7-9)*

<sup>1</sup> Mé tiempo cán naxini joho Herodes, dà cíú gobernador cán ña ndítuhún na sahá Jesús. <sup>2</sup> Andá já nacachi da já xihín mozo dà:

—Á ajuú Jesús cíú á Juan, dà nájácdúta ñayivi ta viti nanditacu tucu da. Sáhá ña cán quéa fin ndée da cája da tóco ndili ña cája da yóho —cáchí Herodes.

<sup>3</sup> Jáchí jandá mé sahá natíin Herodes Juan nácató ñahá da ta náchicáan da dà vecaa. Ta nácaja da ña yóho sahá Herodías, ñá násacuu ñájíhlí Felipe, ñani da. <sup>4</sup> Jáchí mé Juan nájánani ñahá dà sahá ña fin Herodes xihín ña ta já nacachi da:

—Co ndítahan coún xihín ñájíhlí ñanún —nacachi Juan xihín dà.

<sup>5</sup> Ta jandá já nanduc Herodes cahní dà Juan joo a cuú caja da ña jáchí yílhí da ñayivi sahá ña cándusa na ña cíú Juan in profeta náchindahá Ndióxi. <sup>6</sup> Joo in

tañu nani ndácaan Juan vecaa já nácacaváha Herodes víco sahá quivi nácacu da. Ta nándaca ndichí ñá cíú jahyi Herodías cán náxitá sahá ña nu ndíhi na ndúu víco cán. Ta a juú quiahva nácajíi ini Herodes xihín ña yóho. <sup>7</sup> Sahá ña cán quéa quivi Ndióxi tává da ta sáhan da tuhun da nu ña cán ña quiahva da nu ña ndá ña cíú më ña caca ña nu dà. <sup>8</sup> Tá nandihi nándaca tuhun jihna ña náná ña já ndáva ña náshahen ña nu Herodes já cáchí ña já xihín dà:

—Viti ñuhú cíú ña ná quiahva ndó yiquí jíní Juan, dà jácandúta ñayivi nuú i ini in coho cähnu —nacachi ña xihín dà.

<sup>9</sup> Tá nacachi ña já xihín Herodes já nácacuéha ndivaha ini da. Joo sahá ña sa natává da quivi Ndióxi tá náshahen da tuhun dà nu ña cán ta sahá ña cíú dà candoo vaha da nuú ña ndúu víco xihín dà cán sahá ña cán quéa náshahnda da chuuñ ña ná quiahva na ña nu ña. <sup>10</sup> Chí náshahnda da chuuñ ña ná chítuhun ná yiquí jíní Juan ini vecaa cán.

<sup>11</sup> Ta já náchicáan na yiquí jíní da ini in coho cähnu já náshahen na ña nu ña cán. Anda já nándiquiahva ña cán ña ndáha náná ña.

<sup>12</sup> Anda jáví naxinu na náxica xihín Juan cán já náshahen na nándiquehe na yiquí cuñu da ta nájánduxu na dà. Ta já náshahen na nácaxi tuhun na ña yóho nuú Jesús.

*Tá náshahen Jesús ña cuxu uhun mil tga  
(Mr. 6:30-44; Lc. 9:10-17; Jn. 6:1-14)*

<sup>13</sup> Tá naxini joho Jesús sahá Juan já naquee xóo a ini in barco loho cuahán nuú co ndúu ñayivi. Joo tá naxini joho ñayivi ña cuahán Jesús já naquee na ñuu na ndíco na cuahán sahá na nu fin a. <sup>14</sup> Ta tá nánuu Jesús barco cán já naxini a cuahá ndivaha ñayivi ta náshahvi ini a sahá ná. Ta chí nándaja vaha mé á na quíhví naquixi tañu na cán. <sup>15</sup> Ta tá sá cähni cuahán já nácatati ná xíca tuun xihín a cán nu á. Já cáchí na já xihín á:

—Sa náhini va ta ajuú xoo nu ndúu ñayivi quéa yóho. Ndindayí ndó ñayivi na cuhún na ñuu valí yati jan já ná cueen na ña cuxu na —nacachi na cán xihín á.

<sup>16</sup> Anda já nacachi a já xihín ná:

—Co xímí ñuhú toho quee na cuhún na. Mé ndó quiahva ndó ná cuxu na —nacachi Jesús.

<sup>17</sup> Anda já nacachi tucu na cán já xihín á:

—Co mé ñahá va cuxu na yóho. Uhun víxi pan xihín iví laá tiyáca cuití va fin yóho —nacachi na xihín Jesús.

<sup>18</sup> —Taxi ndó a chóho —nacachi Jesús xihín ná.

<sup>19</sup> Anda já nasañnda Jesús chuun ñá ná ndaca nduu ndihu ná cán nyú yucu. Anda já natii a ndíuhun pan xihín ndíví tiyáca cán já nasañdehé a chí indíví já nandiquiahva ndíxavi nu Ndióxi. Tá nandihi já nasañnda java pan ta nasañan ñá nyú na xíca tuun xihín a cán ta ná cán nandicahnda na ñá nyú ñayivi cuahá cán. <sup>20</sup> Ta tóco ndihu na naxixi na janda quiqhva nacchutú ná. Ta tá nandihi naxixi na já najátaca na ñá nacandoo cán ta najachutú na uxu ivi toyicá xihín ñá nacandoo cán. <sup>21</sup> Ta tóco ndihu na naxixi cán nasañuu na tátuhun uhun mil taa. Cо cahán sahá najihí xihín na valí.

Tá naxixa sáhá Jesús nyú tañuhú  
(Mr. 6:45-52; Jn. 6:16-21)

<sup>22</sup> Ta tá nandihi já nacaja Jesús ñá ná ndihvi na xíca tuun xihín a cán ini in barco ñá ná cuhún cuéé ná inga xoo tañuhú cán nani candoó tóo mé á jándidayí a ñayivi cuahá cán. <sup>23</sup> Ta tá sa najándutá tóco ndihu ñayivi já nandaan mé á yúcu cuahán caqa tähví a nu Ndióxi. Tá nandihi já nacuaá ta in túhún mé á ndácaan xíca tähví a nu Ndióxi cán. <sup>24</sup> Ta ndaja coo barco loho, dó candojó a xíca tuun xihín a cán sa naxínu coo dó janda mahnú tañuhú cuahán do. Ta ndíoco ndivaha tañuhú jáchi xoo cuahán na vaxi tachí. <sup>25</sup> Joo tátuhun sa cuahán tíví já xíca sáhá Jesús cuahán nyú tañuhú naxínu a nu ná. <sup>26</sup> Ta tá naxini na xíca sáhá Jesús vaxi a nyú tañuhú cán já nacatontó ná. Ta nacásahá na cayuhú cóhó na sahá ñá yíhív na já cachí na já:

—Ínimá quéa vaxi yóho —cáchí ná.

<sup>27</sup> Joo ivi láá nandicahán Jesús xihín ná já cachí a já:

—Ndacú coo ini ndó jáchi yehé va cúú u. A yíhív toho ndó —nacachi a xihín ná.

<sup>28</sup> Anda já nacachi Pedro já xihín Jesús:

—Xitoho i, tá tā jivi cúú mé ndó cahnda ndó chuun ñá ná cuu sáq i nu ndó ta ná caca i nyú tañuhú —nacachi da xihín Jesús.

<sup>29</sup> Ta já cachí Jesús já:

—Naha quíi —cáchí a xihín dá.

Anda já nanuu Pedro barco cán ta nacásahá xíca sáhá da nyú tañuhú cuahán da nyú Jesús. <sup>30</sup> Joo tá naxini da tachí ndeé xíco nyú tañuhú cán já nayihív da. Chí ivi láá nacásahá quéta nuu da cuahán da ini

tañuhú. Já nacayuhú cóhó da já cáchí da já xihín Jesús:

—Chindeé ndó yehé, xitoho i —nacachi da xihín á.

<sup>31</sup> Ta cama chá natii Jesús ndáha da ta já nacachi a já xihín dá:

—Ndá cuénta quéa co candeé chágá inún yehé ta nacásahá cáhvi ivi joho inún —nacachi Jesús xihín dá.

<sup>32</sup> Ta tá nandaa ndíví na jata barco já nacatáji tachí cán. <sup>33</sup> Anda já nacaja cáhnu na ñíhu ini barco cán Jesús já cáchí ná já xihín á:

—Mé a ndaa tähví cúú jivi ndusa ndó in túhún jiní já jahyi Ndióxi —nacachi na xihín á.

Tá nandaja vaha Jesús na quíhíví ndíu nundáhyi Genesaret

(Mr. 6:53-56)

<sup>34</sup> Ta já naxica loho gá na nyú tañuhú cán já naxínu coo na nundáhyi Genesaret.

<sup>35</sup> Ta tá nandicuni ñayivi ndíu cán mé á já nacchindahá na chuun nasañan nyú ndaja tähán ñayivi ndíu ndijáá nundáhyi cán. Já ñéhe ndihu na ná quíhíví nacasaá na nu á.

<sup>36</sup> Ta na quíhíví cán naxica tähví na nu á ñá ná quiqhva ñamani cani ndaa ndáha ná yuhú jahmá níhnu a ta tóco ndihu na nacani ndaa ndáha jahmá a nandivaha na.

## 15

Ñá caja quini íníma ñayivi

(Mr. 7:1-23)

<sup>1</sup> Ndaja coo java na fariseo xihín java na jánahá ley Moisés ndíu ñuu Jerusalén cán nacayati na nyú Jesús já nacásahá cáchí ná já xihín á:

<sup>2</sup> —Ndávaha co caja ná xíca tuun xuhun ñá nacachi tásáhnu jíco yo caja na. Ndávaha xíxi na tá cámáni ndahá na tá quiyahva sáhndá ley caja na —nacachi ná cán xihín Jesús.

<sup>3</sup> Anda já nanducú ñehe Jesús tühun nu ná já nacachi a já:

—Ta jári ndohó va, ndá cuénta quéa jándacoo ndó ñá sáhndá Ndióxi nu ndó caja ndó. Ta ñá caja ndó quéa ndíco ndó costumbre mé va ndó. <sup>4</sup>Jáchi sáhndá Ndióxi chuun já cachí a já: “Caja cahmún tátún xihín nánún.” Ta jári cachí a: “Ndá ná chícqan cháhan jata tátá ná á náná ná, ndítahari quivi na”, cachí a. <sup>5</sup>Joo ndohó, jánahá ndó nyú ñayivi ñá cuu cahán ná já

xihín tátá ná á náná ná: “A cuú chindeé e ndohó jáchí sa násacu xoo i ñaha i quiáhva i ña nu Ndióxi”, cáchí ná. “Tá ná cachí na ña yóho já quéa co ndúsá ga chindeé ná tátá náná ná. Quiáhva joho cája ndó ta sácu xoo ndó ña nasañhanda Ndióxi chuun nu ndó ta ndája ndó a tátuhun in ñaha ña coó saha. Jáchí ndíco cáhnu ndó ña najándaco tásahnu jíco ndó nu ndó. ”Co cuú ndó tá quiáhva ndáa ndó. Mé a ndaa nacahan profeta Isaías sahá ndó sañahá tá nacahyí da ña nacachi Ndióxi:

<sup>8</sup>Yuhú njnu uun na cája cahnu na yehe.

Ta co cája cahnu na yehe xihín ndinuhu ímima ná.

<sup>9</sup>Ta mé a uun quéa cája cahnu na yehe, jáchí ña jánahá ña nuú ñayivi cuití va cuú á ña quíxi jíni mé va na, nacachi profeta Isaías sañahá ndiváha —nacachi Jesús xihín na cán.

<sup>10</sup>Tá nandihí já nacana Jesús tóco ndihi ñayivi ndúu cán já nacachi a já xihín ná:

—Cuni joho vaha ndó ña cahen i xihín ndó ta ná candaá ini ndó ña. <sup>11</sup>A juú ñaha xíxi ñayivi ndája quini ínimá ná. Tuhun quini quéta yúhu ná ña jan quéa cája quini ñahá —nacachi Jesús.

<sup>12</sup>Tá nandihí já nacayati ná xica tuun xihín Jesús cán nu á já nacachi na já xihín á:

—Chí a váha mé nacuu ini ná fariseo tá naxini joho na ña nacachi ndó jan —nacachi na cán.

<sup>13</sup>Anda já nacachi Jesús já xihín ná:

—Ñayivi, ná co ndíquehe vaha tuuhun Ndióxi cuú ná tátuhun in yíto, dó coó najándee Ndióxi, tátá i ña fin indív. Saha ña co cuú dó cuénta mé a já tandaa quiyi ña tuuhun mé a do anda yóho do. <sup>14</sup>Saha ña cán quéa co ndítahan ndicani ini ndó sahá ná jan jáchí ná cuáa va cuú ná. Ta a cuú toho caja in da cuáa candaca da inga da cuáa cuhyn da jáchí ndív já da ndacava da yávi —nacachi Jesús.

<sup>15</sup>Tá nandihí já nacachi Pedro já xihín Jesús:

—Ndicani loho ndó nuú nde ndaja cáa ña cáchí ndó ña co cája quini toho ña xíxi ñayivi mé ná jáchí co candaá ini nde ña —nacachi Pedro xihín Jesús.

<sup>16</sup>Já nacachi Jesús já xihín ná:

—Á coó toho xín túni ri ndohó va, vaha.

<sup>17</sup>Jáchí co candaá ini ndó ña tóco ndihi ñaha xíxi ñayivi a cuú caja quini a ná. Jáchí ña

xíxi ñayivi co xínu a ini ínimá ná joo xínu coo ña tixi va na já queta tucu a yíqu cuyu na. <sup>18</sup>Ña cuu ndaja quini ñayivi cuú ña quíxi ínimá ná tátuhun tuuhun cahen ná xihín ña cája na. <sup>19</sup>Jáchí chí ínimá ñayivi quíxi ña cahvi núu ini na tátuhun ña cahvi ini na cahni ná ndí. Ta sa mé cán quíxi ña cahvi ini in dätaa coo da xihín ñajíhi ñani táhan da á xihín in ña co cuú ñajíhi da. Ta sa mé cán quíxi ña ndiáva iní da caja cuíñha da. Ta sa mé cán quíxi ña cahvi jíqui da tuuhun sahá ñani táhan da ta jári quíxi ña cahváha da xihín Ndióxi. <sup>20</sup>Tóco ndihi ña cahvi núu ini ñayivi caja na, ña yóho quéa ndája quini a ná. Joo co cáquini toho ñayivi sahá ña co ndáhá ná tá cámáni cuxu na tá quiáhva fin costumbre na —nacachi Jesús xihín ná xica tuun xihín a cán.

Tá nacandee iní in ña tóho Jesús  
(Mr. 7:24-30)

<sup>21</sup>Tá nandihí já naquee Jesús cuahen chí ñundáhyi cuénta Tiro xihín cuénta Sidón cán. <sup>22</sup>Ta nu xica cuahen cán naqueta in ñañáha ñundáhyi Canaán nu á já cayuhú ña já cáchí ña já xihín á:

—Xitoho i, da naquixi chichí David caja ndó ñamáni cahdahví loho ini ndó yehe. Chindeé ndó jáhyi jíhi i jáchí rí quini ndácaan ini ña —nacachi ñañáha cán xihín Jesús.

<sup>23</sup>Joo ni in túhún tuuhun coó nanducú ñehe Jesús nu ña. Andá já nacativi ná xica tuun xihín a cán nu á já nacachi na já xihín á:

—Taxi ndó ña jan ná quee ña cuhun ña jáchí cayuhú ña ndácaa ña jata yó vaxi ña —nacachi ná cán xihín Jesús.

<sup>24</sup>Andá já nacachi Jesús xihín ñañáha cán já:

—Nächindahá Ndióxi yehe vaxi i nuú ñayivi Israel cuití va, mé ná cuú tátuhun ndicachi, rí nandíñuhú —nacachi Jesús.

<sup>25</sup>Andá já ndáva ña cán naxing coo ña nacaxtí ña nu Jesús já cáchí ña já xihín á:

—Caja ndó ñamáni chindeé loho ndó yehe, xitoho i.

<sup>26</sup>Andá já nacachi Jesús já xihín ña:

—A váha toho candaá i pan ndáha ná valí ta já cana i ña nuú tina —nacachi Jesús xihín ña cán.

<sup>27</sup>Andá já nacachi ña cán já xihín Jesús:

—Mé a ndaa cahen ndó joo andá tina, rí ndúu tixi mesa xíxi rí ña jácuyu jáhyi xitoho rí —nacachi ña cán xihín Jesús.

<sup>28</sup> Anda já nacachi Jesús já xihín ná:  
—Mé a ndaq cández cahnu inún Ndióxi.  
Ná coo a tá quiáhva cúní mún —nacachi  
Jesús xihín ná.

Chí mé hora já nandiváha jahyi jíhí ná.

Ndája vaha Jesú cughá ná quíhvi

<sup>29</sup> Tá nandihí já naquee Jesús cuahán já naxinu coo a yati yuhú tañyhú Galilea. Já nandaa in jiní yúcu ta cán nascaco a. <sup>30</sup> Ta já nacásahá náataca cuahá ndiváha ñayivi já ñéhe na ná quíhvi sahá xihín na cuaá xihín na níhi xihín na rénco ndáha. Ta cuahá ga nuú ná quíhvi ñéhe na nacasaá na nachinduu na ná nu Jesús. Ta nandaa vaha mé á ná. <sup>31</sup> Ta xihín ná yóho a juú quiáhva nacatontó na tá naxini na ná nacásahá ndícahán na níhi. Ta nacatontó na tá naxini na ná nandiváha ndahá na rénco ta ndícacá vaha ná quíhvi sahá ta quiáhva já nandiváha ri ná cuá. Ta nacásahá na cája cáhu na Ndióxi, mé a cómí cuénta sahá ná Israel.

Tá nascáhan Jesús ná cuxu comí mil natga  
(Mr. 8:1-10)

<sup>32</sup> Anda já nacana Jesús na xíca tuun xihín á já nacachi a já xihín ná:

—Táhndá ndiváha ini i sahá ñayivi yóho jáchí sa naxinu uní quiví ndúu na xihín i ta chí coó ga ná cuxu na. Ta co cúní chindahá i ná nuhu ná vehe na jáchí cámají cuxu na ta tiáhva náá cuitá ná ta cuyu na íchi — nacachi Jesús.

<sup>33</sup> Anda já nacachi ná xíca tuun xihín a cán já:

—Coó toho nuu yati va ta ni mí, a cuú quiáhva í ná cuxu na jáchí coó toho ñayivi ndúu yóho nuú cueén ná cuxu na —nacachi ná cán xihín Jesús.

<sup>34</sup> Já nacachi Jesús já:

—Ndaja pan cómí ndó.

Já nacachi ná cán já:

—Usa pan xihín java tiyacá válí.

<sup>35</sup> Anda já nasaahnda Jesús chuuñ ná ca-coo ndihí ñayivi nu riñúu cán. <sup>36</sup> Ta já natiin a ndíhusa pan cán xihín java tiyacá válí cán já nandiquáhva ndixahvi nu Ndióxi. Ta já nasaahnda java ná ta nasaahen ná nuú ná xíca tuun xihín á cán ná nacahnda na ná nuú ñayivi cuahá cán. <sup>37</sup> Ta naxixi tóco ndihí na jandá quiáhva nachutú tixi na. Ta tá najánditaca na ná nacandoo cán já nachutú usa toyicá xihín ná. <sup>38</sup> Ta ná naxixi cán cútú ná comí mil taa ta co cahán

sahá naijihí xihín ná valí. <sup>39</sup> Ta tá nandihí nandidayí Jesús ñayivi já nandihvi a ini barco já naxinu coo a ñundáhyi cuénta Magdala.

## 16

Cúní ná fariseo xihín ná saduceo cuni na in ná xítuhún caja Jesús  
(Mr. 8:11-13; Lc. 12:54-56)

<sup>1</sup> Ta ndaja coo naxinu coo na fariseo xihín ná saduceo nu Jesús. Ta sahá ná cúní ná coto ndojó cuítí ñahá ná sahá ná cán quéa naxicá ná nu á ná ná caja in ná xítuhún cuénta indíví já ná candaa ini na á mé a ndaq cútú á ná nachindahá Ndióxi. <sup>2</sup> Anda já nanducú ñehe Jesús tóhun nu ná já nacachi a já xihín ná:

—Tá nahiní já cachí ndo já: “Tiempo vaha ndiváha cacuu a jáchí ndiyéhé cuáhá indíví”, cachí ndo. <sup>3</sup> Ta naha cachí ndo já: “Viti ndusa quéa cuun ndee ndiváha javi jáchí ím víco ndiváha ta ín vico cuáhá indíví”, cachí ndo. Co cútú ndó tá quiáhva ndáa ndó. Ndá cuénta quéa tiáhva ndó ndicuni ndó ndá quéa coo tá sándehé ndó indíví joo co tiáhva ndó ndicuni ndó ndá ndítiempo cútú á viti. <sup>4</sup> Ñayivi quini, ná co cúní candúsa Ndióxi, ná cán cútú ná xíca ná ná caja i ná xítuhún nu ná. Joo mi en tóhun toho náha xítuhún a cája ga i nu ná. In tóhun ná candehé ná cacuu a ná tanda quíví ndohoo i tóquiáhva nandohoo profeta Jonás sánahá ndiváha —nacachi Jesús xihín ná.

Já naquee a cuahán.

Tá sáci Jesús quiáhva sghá ná fariseo  
(Mr. 8:14-21)

<sup>5</sup> Ta ndaja coo naxinu coo a inga xoo tañuhú xihín ná xíca tuun xihín á cán ta nandindójó na cán cañeha na pan cuxu na.

<sup>6</sup> Tá nandihí já nacachi Jesús já xihín ná:

—Candehé ndo. Cuénta coo ndó xihín ná fariseo ta xihín ná saduceo jan jáchí ná jánahá ná cútú a tóhun yúsá naxaa ná cábá táhan na xihín harina cábáha na pan — nacachi Jesús.

<sup>7</sup> Joo ná xíca tuun xihín á cán ndítuhún xihín táhan na ná nacachi Jesús já sahá ná coó pan ñehe na cuahán xihín ná.

<sup>8</sup> Ta tá nacandaa ini Jesús ná cahán ná já nacachi a já xihín ná:

—Ndá cuénta quéa co cández cahnu ini ndó yehé ta cahán ndó ná cachí i ná yóho xihín ndó sahá ná co ñehe ndó pan vaxi

ndó. <sup>9</sup>A ñáha cándaa ini ndó. Ndítahan ndicuhun ini ndó ñá nandaja cuahá i uhun víxí pan tá naxixi uhun mil taa. Ta sa xíni ndó ndaja toyicá najáchutú ndó xihín ñá nacandoo cán. <sup>10</sup>Ta ndítahan ndicuhun ini ndó ñá nacaja i xihín usa pan tá nandicahnda i ñá naxixi comí mil taa ta sa xíni ndó ndaja toyicá najáchutú ndó xihín ñá nacandoo cán. <sup>11</sup>Ndá cuéntá quéa co cándaa toho ini ndó ñá coó nacachi i ñá yóho xihin ndó sahá ñá coó pan ñéhe ndó vaxi ndó. Joo nacachi i ñá cuéntá coo ndó xihín na fariseo ta xihín na saduceo jáchi ñá jánahá na cùu á tátuhun yusá naxaa ñá cává táchan na xihín harina cávaha na pan —nacachi Jesús.

<sup>12</sup>Tá nacachi Jesús ñá yóho já nacandaa ini na xíca tuun xihín á cán ñá a juú toho sahá yusá naxaa cáhan Jesús saha. Ñá cùni Jesús cachí i xihín ná quéa cuéntá vaha ná coo na xihín ñá jánahá na fariseo xihín na saduceo.

Tá cáxi tühun ndaa Pedro ñá cùu Jesús mé á nachindahá Ndióxi cacomí q cuénta sahá ñayivi  
(Mr. 8:27-30; Lc. 9:18-21)

<sup>13</sup>Tá naxinu coo Jesús ñundáhyi Cesarea cuénta Filipo já nandaca tühun a na xíca tuun xihín á cán já nacachi a já xihín ná:

—Ndá dà cachí ñayivi cùu yehe, dà nachindahá Ndióxi nduu ñayivi —nacachi Jesús.

<sup>14</sup>Já nacachi na cán já:

—Java na cachí na ñá cùu ndó Juan, dà nacaja ndúta ñayivi. Ta java na cachí na ñá cùu ndó profeta Elías. Ta java na cachí na ñá cùu ndó profeta Jeremías. Ta java na cachí na ñá cùu ndó in táchan profeta nasaandu sanahá —nacachi na.

<sup>15</sup>Anda já nacachi Jesús já xihín ná:

—Ta ndohó ri, ndá dà cachí ndó cùu u —nacachi a.

<sup>16</sup>Anda já nanducú ñehe Simón Pedro tühun nu Jesús já nacachi da já xihín á:

—Mé ndó cùu Cristo, ñá nachindahá Ndióxi cacomí cuénta sahá ñayivi. Ta cùu ndó in tühun jiní já jahyi Ndióxi, mé a tácú íin indív —nacachi da.

<sup>17</sup>Anda já nanducú ñehe Jesús tühun nu dà já nacachi a já xihín dà:

—Tahví nahá cùun, Simón, jahyi Jonás jáchi ni in tühun ñayivi coó nacaxi tühun ñá yóho xuhun. In tühun tátá i, mé a íin indív nanaña ñá yóho nuun. <sup>18</sup>Ta quiahva joho cachí ri yehe saha yóho: Yohó cùun

Pedro ta quivun cùni cache a tótó. Ta cùun tátuhun yuu ndúhu sahá in vehe nuú cavaha i veñuhu mí i jáchi yóho caca nuún cahun sahá i nuú ñayivi já ná quee vaha na xihín tiñahá sacuahá já ná a cùhun na indayá. <sup>19</sup>Ta caja i xuhun ñá ná cuu ndicanún nuú ñayivi ndaja ndiquiahva na mé ná ndáhá i cacomí i cuénta saha ná. Cacu a tátuhun quiahva i yáví nuun ñá ná cùnún íchi nuú ndihvi ñayivi cacomí i cuénta saha ná. Tá co sáhun ñamani ná ndihvi ñayivi cán já quéa a quiáhva toho i ñamani nu ná. Joo tá sáhun ñamani nu ná ndihvi ná cán já quéa quiahva ri yehe ñamani nu ná —cachí a xihín Pedro.

<sup>20</sup>Anda já nasaahnda Jesús chuun nuú na xíca tuun xihín á cán ñá ná a cáxi tühun na xihín ní in tühun ñayivi ñá cùu mé á Cristo, mé a nachindahá Ndióxi cacomí cuénta sahá ñayivi.

Tá cáxi tühun Jesús ña quivi a  
(Mr. 8:31-9:1; Lc. 9:22-27)

<sup>21</sup>Ta janda mé quivi já nacasáhá Jesús cáxi tühun a xihín ñá xíca tuun xihín á ñá ndítahan nu á cuhun a nuu Jerusalén. Ta mé cán ndoho ndivahá ini a ndahá na sacuahá veñuhu xihín ndahá na sacuahá nuú jutu xihín ndahá na jánahá ley Moisés. Ta caja xíxi ri na cán va xihín á ta cahní ñahá na. Joo tá ná xinu uní quivi nditacu tucu a. <sup>22</sup>Anda já natavá xoo Pedro Jesús já nacasáhá dà jánani ñahá dà já nacachi da já xihín á:

—Ama ná yaha ñá yóho xihín ndó, xitoho i. Ná a quiáhva toho Ndióxi ñamani ndoho ndó já —nacachi Pedro xihín Jesús.

<sup>23</sup>Joo nacava nuu Jesús sández a nu Pedro ta já cachí a já xihín dà:

—Cuáhán quee Satanás, rí cùu tiñahá sacuahá. Tá quiahva íin na sájí nuu nu ná quiahva já íun nuú i. Jáchi co cahvi inún tá quiahva cahvi ini Ndióxi joo cahvi inún tá quiahva cahvi ini ñayivi cuénta ñuyív yóho —nacachi Jesús xihín dà.

<sup>24</sup>Anda já nacachi Jesús já xihín na xíca tuun xihín a cán:

—Ndá ná cùni candico yehe ndítahan nu ná ndihí chágá ini na sahá yehe a juú ga saha mé ná. Ta ndítahan coo tiahva na ndoho ini na sahá yehe. Ta coó caja toho a ná quivi na sahá i. <sup>25</sup>Jáchi ndá ná catóó coo chágá ñuyív yóho ndihí saha ná. Joo ndá ná sáhan ndee ini quivi sahá i xihín sahá tühun Ndióxi, ñehe tähví ná catacu na

anda ama cása quivi.<sup>26</sup> Vatí ná quee vaha in na ñuyíví yóho ta cómí ná tócó ndihí ñaha ñuyíví yóho joo ndá chuun quéa tá nu ndihí ndihí saha ná indaya. Jáchí ni in ñaha a cuú chahvi in na saha ínimá ná ña ná a cùhun ná indaya.<sup>27</sup> Jáchí yehé, da nachindahá Ndióxi nduu ñayivi quixi tucu u xihín ndée Ndióxi, tátá i ta xihín ndée tátó Ndióxi. Mé tiempo cán náha ndaja cahnu cùu yehé. Anda já chahvi i nuú in in ñayivi saha ñaha nacaja na nani ñasanduu na ñuyíví yóho.<sup>28</sup> Mé a ndaa ná cahán i xihín ndo ña java na ndíu yóho a quívi toho na janda quiahva ná xinu quivi cumi na quixi tucu yehé, da nachindahá Ndióxi nduu ñayivi cacomí i cuénta sahá ná cùu cuénta mí i —cáchí Jesús.

## 17

Tá nandijama nuú Jesús quiahva cása  
(Mr. 9:2-13; Lc. 9:28-36)

<sup>1</sup> Tá nayaha iñu quivi já nandaa Jesús in yucú jícó ta ndáca táchan Pedro xihín Jacobo xihín ñani da Juan cuahán ná xihín á.<sup>2</sup> Ta nu táchí mé ná cán nandijama quiahva cása. Ta a juú quiahva nandiyéhe nuú a tá quiahva ndiyéhe candii. Ta jáhmá ndíxi a nandiyaa cachi ña ta chí a juú quiahva yéhe ña.<sup>3</sup> Ta ndaja coo nandaca náha Moisés xihín Elías ta nacásahá ndítihún da xihín Jesús.<sup>4</sup> Anda já nandicahan Pedro xihín Jesús já nacachi da já xihín á:

—Vaha cíu ndíu nde yóho, xitoho nde. Tá cúní ndó cavaha nde uní vehe tiyahvá válí. In a coo mé ndó ta inga coo Moisés ta inga coo Elías —cáchí Pedro.

<sup>5</sup> Ta nani cahán Pedro ñanuu in vico jata ná ta nacava nuu a ná. Ta a juú quiahva ndató yéhe a. Ta tañu vico cán naxini joho na ña cahán in a ta já cachí a já:

—Da yóho cíu jáhyi maní i ta cájii ini i xihín dá. Cuni joho ndó nu cahán da —nacachi mé a cán.

<sup>6</sup> Tá naxini joho ná xica tuun xihín Jesús cán ña cahán yóho já nacaxtí na janda quiahva naxinu nuú ná núhu. Ta a juú quiahva ná yihví ná.<sup>7</sup> Anda já nacayati Jesús nu ná ta nacani ndaa ndáha ná já nacachi a já xihín ná:

—Cuándacaco ndó. A cayihví toho ndó —nacachi Jesús xihín ná.

<sup>8</sup> Ta tá nandiñehé ná cán nuú ná já naxini na ña íin in tühún jini mé va Jesús.

<sup>9</sup> Ta tá ñanuu na jini yúcú cán já ñasahnda Jesús chuun nu ná já nacachi a já xihín ná:

—A cáxi tuyuhndó ña naxini ndó yóho nuú ni in ñayivi janda quiahva ná nditacu tucu yehé, da nachindahá Ndióxi nduu ñayivi —nacachi Jesús.

<sup>10</sup> Já nacachi ná cán já xihín á:

—Ndávaha cachí na jánahá ley Moisés ña ndítahan quixi jihna ñúhú profeta Elías —nacachi na.

<sup>11</sup> Já nacachi Jesús já xihín ná:

—Mé a ndaa jihna ñúhú quixi Elías ta ndaja vaha ndihí da ñaha.<sup>12</sup> Joo mé a ndaa ná cahán i xihín ndo ña sa ñaquixi va Elías joo coó naxeen na ndicuni na da. Ta nacaja na ta quiahva cúní mé ná xihín dá. Ta quiahva já jándoho ri na ini yehé, da nachindahá Ndióxi nduu ñayivi —nacachi Jesús.

<sup>13</sup> Anda jáví nacandaa ini ná xica tuun xihín Jesús cán ña cahán Jesús saha Juan, da najácadúta ñayivi tá nacachi a ña sa ñaquixi va Elías.

Tá nandaja vaha Jesús in da loho ndácqan ínimá quini ini

(Mr. 9:14-29; Lc. 9:37-43)

<sup>14</sup> Ta tá sa ñanuu na ta naxinu coo na nu ndíu cuahá ñayivi cán já naxinu coo in dñataa ta já nacaxtí da nu Jesús. Já nacachi da já xihín á:

<sup>15</sup> —Candáhví loho ini ndó jáhyi i, xitoho i jáchí xíhi yíhí da ta ndóhó ndivaha ini da. Ta cuahá tañu ndícaava da nu ñúhu ita á in ticiúi.<sup>16</sup> Ta ñéhe e da nacasaá i nuú ná xica tuun xihín ndó yóho joo coó nacuu ndaja vaha na da —nacachi da xihín Jesús.

<sup>17</sup> Anda já nacachi Jesús já:

—Ndáhví náha nacuu ndó jáchi sa cuahá ndivaha quivi íin i xihín ndo ta a ñáha candee ini ndó yehé. Cíu ndó ñayivi quini ndivaha chí co ndee ga ini i xihín ña caja ndó. Taxi ndó taa loho jan chóho —nacachi Jesús.

<sup>18</sup> Anda já najánani Jesús rí quini ndácaqan ini da loho cán. Chí naqueta rí cuahán ri ta mé hora já nandivaha da loho cán.

<sup>19</sup> Tá nandihí já nacahán jehé ná xica tuun xihín Jesús cán xihín á já nacachi na já:

—Ndávaha coó nacuu caja nde tavá nde íimá quini nasandacaqan ini da loho jan —nacachi na xihín Jesús.

<sup>20</sup> Já nacachi Jesús já xihín ná:

—Coó nacuu caja ndó jáchi co cándezéé cahnu ini ndó yéhe. Mé a ndaaqáchi i xihín ndó, loho tífn ndiváha cáá in ndíqui mostaza joo ndúu dó in yító cahnu. Tá cándezéé loho ini ndó yéhe viti växi quivi cándezéé chágá ini ndó yéhe. Anda jáví cuu caja ndó in ñaha iñvándiváha tátuhun ña cuu cachi ndó xihín in yúcu ña ná caxoo a ta chí caxoo ndusa ña. Tóco ndihí ñaha cuu caja ndó tá ná cándezéé ini ndó yéhe.<sup>21</sup> Joo tá cúní ndó tavá ndó ínímá quini tátuhun rí yóho xíñi ñúhú cajuhun ndó ta caca tähví ndó nu Ndióxi —cáchí Jesús xihín ná.

Tá caxí tühun tucu Jesús ña quivi a  
(Mr. 9:30-32; Lc. 9:43-45)

<sup>22</sup> Ta ndaja coo xíca tútú ndihí na xíca tuun xihín Jesús cán cuahan na xihín á chí estido Galilea. Ta já nandicani Jesús nuú na cán ña tandaa quivi ndiquiahva ñayivi mé á ndáhá na cahní ñahá, mé a nähindahá Ndióxi nduu ñayivi.<sup>23</sup> Ta nacachi a xihín ná ña tá sa ná yaha uní quivi já nditacu tucu a. Tá nacachi Jesús ña yóho xihín na xíca tuun xihín á cán já nacacuéha ndiváha ini na.

Tá nachahvi Jesús jiuhún impuesto cuéntá veñuhu cahnu ñuu Jerusalén

<sup>24</sup> Tá naxinu coo Jesús ñuu Capernaum xihín na xíca tuun xihín á já naxinu coo na játaca jiuhún impuesto cuéntá veñuhu nu Pedro. Já nacachi na já xihín dá:

—Á co cháhvi toho Jesús, da jánahá ndohó jan jiuhún impuesto cuéntá veñuhu ñuu Jerusalén —nacachi na xihín Pedro.

<sup>25</sup> Anda já nacachi Pedro já:

—Cháhvi a ña —nacachi da.

Anda já nähindahí Pedro ini vehe nu ndacan Jesús joo jihna ñúhú nandicahán Jesús xihín dá já nacachi a já:

—Ndíahá cahvi inún, Simón. Yo já nditahán nuu chahvi jiuhún cuéntá impuesto nuú na sáhndá chuun ñuyíví yóho. Á ña ñuu mé ná á na ñuu tóho —nacachi Jesús.

<sup>26</sup> Já nacachi Pedro já:

—Na tóho va sá chahvi jiuhún cája na —nacachi Pedro.

Já nacachi tucu Jesús já:

—Sahá ña cán quéa mé na ñuu co chahvi toho na.<sup>27</sup> Joo mí co cúní yo ña ná ndicuítá na xoho sahá ña cán quéa cuhún tañuhú. Ta mé cán tavún tiyáca. Ta rí nu cuítí ná tavún jan candehún yúhu rí jáchi jan nditahún in jiuhún caa. Ta cañehe a cuhún chahvún

sahá mún ta sahá mí i jáchi queta va —nacachi Jesús xihín Pedro.

## 18

Ndícani Jesús ndá na cútú na íín chágá sahá (Mr. 9:33-37; Lc. 9:46-48)

<sup>1</sup> Mé tañu já nacayati na xíca tuun xihín Jesús nu á já nacásahá ndáca tuhún ñahá na já nacachi na já xihín á:

—Yo já caciú da cahnu chágá tá ná tan-daa quivi cacomí Ndióxi cuéntá sahá ñayivi —nacachi na xihín Jesús.

<sup>2</sup> Anda já nacana Jesús in da loho já nacacandichi a da mahñú java na cán. <sup>3</sup> Já nacachi a já:

—Mé a ndaaq ná cahan i xihín ndo ña ndítahán ndaja nuú ndó mé ndó ta nduu ndó tátuhun na valí já cuu cacomí Ndióxi cuéntá sahá ndo. <sup>4</sup> Na cúní caciú na cahnu chágá tá cacomí Ndióxi cuéntá sahá ñayivi ndítahán nduu na tátuhun in na coó sahá ta já nduu na tátuhun ta loho yóho. <sup>5</sup> Ta ndá na ná ndiquehe in aloho tátuhun da yóho sahá ña cúní na yéhe, na cán cútú na ndiquehe ri na yéhe viti.

Tá jándacava ñayivi inga na nuú cuachi (Mr. 9:42-48; Lc. 17:1-2)

<sup>6</sup> Ta ndá na ná jándacava in na ndahví, na cándezéé ini yéhe nuú cuachi jandá vaha chágá ná candico in yuú yojó jíco ná ta ná ndihí sahá na cahá tañuhú. <sup>7</sup> Ndáhví nahá nacuu ñayivi ñuyíví yóho jáchi mé a ndaaq íín cuahá ndiváha ña nuú ñuyíví yóho. Ña cán quéa ndáca cuahá ñayivi nuú cuachi joo ndahví nahá nacuu na jándacava inga na nuú cuachi.

<sup>8</sup> Sahá ña cán quéa tá ndahá ndo á sahá ndo jándacava ndohó nuú cuachi, chituhún ndó a ta jácana xíca ndó ña ná cuhun a. Jáchí vaha chágá ná cuhun réncó ndó á lundu ndó indiví a juú ga ña ná cuhun níi yiquí cuñu ndó indayá nu cayí ñúhu ita anda ama cáá quivi. <sup>9</sup> Ta tá nduchú nuú ndo jándacava ndohó nuú cuachi, tavá ndó ña ta jácana xíca ndó ña ná cuhun a. Jáchí vaha chágá ná cuhun ndó indiví xihín in tühun nduchú nuú ndo a juú ga ña ná cuhun ndó xihín ndiví nduchú nuú ndo indayá nu cayí ñúhu ita.

Tá sácu Jesús quiahva sahá in ndicachi, rí ngandiñuhú (Lc. 15:3-7)

<sup>10</sup> 'Coto a quéhe nūu ndó ni in na cūú cuéntá mí i jáchí cächí i xihín ndó ña táto Ndióxi, mé na ndáá na cán níi tiempo ndítá na nū Ndióxi, tátá i indíví. <sup>11</sup> Jáchí yehe, da nāchindahá Ndióxi nduu ñayivi nāquixi i jácacu u ñayivi, na caja cuachí.

<sup>12</sup> 'Cuni joho ndó nā cähán i xihín ndo: Tá cómi in dñataa in ciento ndicachi ta tá ndiñuhú in rí já quéa ña caja da quéa ján-dacoo da comí jíco sahun comí rí cán yúcu ta já quee da cuhún da ndinducu dámé rí nandiñuhú cán. <sup>13</sup> Ta tá ndiñehé dá rí cajii chágá ini da sahá rí nandiñuhú cán a juú ga sahá comí jíco sahun comí rí sa ndúu nu dámán. <sup>14</sup> Ta quiáhva já ndoho ri Ndióxi, tátá i jáchí co cúní mé a ña ná ndihí sahá ni in ná cández ini mé á.

*Ndítahan caja cáhnu iní sahá ñani táhan í (Lc. 17:3)*

<sup>15</sup> Tá caja quini ñani táhan ndó xihín ndo já quéa tavá xóo ndó da ta cähán ndó xihín dá ña ná ndicuni da ña a vahá toho caja da. Ta tá ná tähví ini da sahá cuachi caja da já quéa sa nandiquehe táhan maní tucu ndó xihín dá. <sup>16</sup> Joo tá co cúní da cuni joho da nū cähán ndo já quéa ndítahan nū ndó cana ndó in á ivi chágá ñani táhan ndó já ná cacuu na testigo sahá ña cähán ndo. <sup>17</sup> Ta tá co cúní da cuni joho da nū cähán na cán xihín dá já quéa ndítahan cuhún ndó nu tóco ndihí ná cùú cuéntá Jesús tacá veñhu. Ta tá co cúní da cuni joho da nū cähán ndihí na cán xihín dá já quéa ndítahan caja ndó xihín dá tá quiáhva caja ndó xihín in da tóho, da co cándusa Ndióxi á in da játaca jiuhún cuéntá impuesto.

<sup>18</sup> 'Mé a ndaa ná cähán i xihín ndo ña tóco ndihí ñaha ná cató ndo ñuyíví yóho candico a janda indíví. Ta tóco ndihí ña ná ndaxí ndo ñuyíví yóho janda indíví ndaxí ña.

<sup>19</sup> 'Ta jári cähán i ña yóho xihín ndo. Tá jándique táhan tñuhun ivi ndó ñuyíví yóho ta tá mé a ndaa in cùú ndó sahá ña xíca tähví ndó nu Ndióxi, mé a íin indíví já quéa quiáhva tátá i ña nu ndo. <sup>20</sup> Jáchí nu ndúu ivi a uní na ta tacá na cuéntá mí i já quéa tañu na cán ndacaan i —nacachi Jesús.

Tá sácu Jesús quiáhva sahá in da co cúní caja cáhnu iní da sahá inga da

<sup>21</sup> Ta ndaja coo nacayati Pedro ndáca tñuhun da Jesús já nacachi da já:

—Xitoho i, ndaja tañu xíní ñúhú caja cáhnu iní sahá ñani táhan i tá caja nūu da xihín i. Á ndítahan nūu i caja cáhnu iní sahá dá janda usa tañu —nacachi da xihín Jesús.

<sup>22</sup> Já nacachi Jesús já xihín dá:

—A juú janda usa tañu cuití ndítahan caja cáhnu inúu sahá ñani táhún. Vahá janda comí ciento comí jíco uxu tañu ndítahan nūu caja cáhnu inúu sahá ñani táhún.

<sup>23</sup> Cächí i ña yóho xihín ndó jáchí tá comí Ndióxi cuéntá sahá ñayivi cùú á tátuhun ña nayaha xihín in rey tá nacásáhá dá játaca da cuéntá nūu ná yícá nu dá. <sup>24</sup> Mé tañu já ñéhe na in da yícá cuahá millón nu dá nacasaña na.

<sup>25</sup> Ta sahá ña coó nacuu chahvi da ña yícá da sahá ña cán quéa nasahnda rey chuun ña ná jíco ná mé dá xihín ñajíhlí dá xihín jáhyi válí da ta janda ñaha da viti ña ná cuu ndiquehe rey cán cuéntá da. <sup>26</sup> Anda já nacaxítí da yícá cán nu mé rey já nacásáhá xíca tähví da já cachí da já: "Caja ndó ñamani, xitoho i candati tóo chágá ndó yehe, ndáhví i, já chahvi ndihí i ña yícá i nu ndo", nacachi da xíca tähví da nu rey cán. <sup>27</sup> Anda já nacandáhvi ini rey cán da ta nacaja cáhnu iní a sahá tóco ndihí ña yícá da já najaní a da cuahán da.

<sup>28</sup> Ta tá naqueta da yícá cán cuahán da já nandique táhan da xihín inga da cùú mozo. Ta mé mozo cán yícá da loho va nūu da cán. Ta já nacásáhá dá ndáca yihí da cuéntá nūu da cùú mozo jácuahnu ñahá da. Já cachí da já: "Chahvún ña yícún nūu i", cachí da cán.

<sup>29</sup> Anda já nandacava xítí mé da cùú mozo cán nu dá já nacásáhá xíca tähví da nu dá já cachí da já xihín dá: "Cajún ñamani candati tóo chágún yehe, ndáhví i, já chahvi ndihí i ña yícá i nūu", nacachi da cùú mozo cán.

<sup>30</sup> Joo coó naceen da ta ña nacaja da quéa nasahán da náchicaqan da da cùú mozo cán vecaa janda quiáhva ná cuu chahvi ndihí da ña yícá da nu dá. <sup>31</sup> Ta tá naxini java ga na cùú mozo cán ña yóho já nandihíhví ndiváha iní na ta chí ndáva na nasahán na nacaxí tñuhun na nūu mé rey cán ndaja caja ña nacuu. <sup>32</sup> Anda já xójo ndiváha iní mé rey cán chí nacana da da nacayicá cán já nacachi da já xihín dá: "Mozo quini ndiváha cùú yóhó. Cuahá ndiváha jiuhún nasayicún nūu i joo nacaja cáhnu iní sahá tóco ndihí a jáchí nacaxí tähvún nūu i.

<sup>33</sup> Quiáhva já

ndítahan ri nu yóhó va caja cáhnu inúñ sahá ña yícá ñani táhún nuun jáchí já nacaja i xihún”, nacachi rey cán.<sup>34</sup> Ta sahá ña xójó ndiváha ini mé rey cán xihín dá sahá ña cán quéa nandiquáhva da dà yícá cán ndáhá na jácaxáhan ñahá cán jandá quiáhva ná chahvi da sahá tóco ndihí ña yícá dà —cáchí Jesús.

<sup>35</sup>Já nacachi tucu Jesús já:

—Quiáhva já caja ri Ndióxi, tátá i, mé a fín indivi xihín ndóhó va tá co cája cáhnu ini ndó sahá ñani táhan ndó xihín ndinuhu ini ndó —cáchí Jesús.

## 19

Jánaha Jesús nuú na sa ngatandahá ña co ndítahan jándacoo táhan na

(Mr. 10:1-12; Lc. 16:18)

<sup>1</sup>Tá nandihí nacachi Jesús ña yóhó já naquee a estado Galilea já naxinu coo a estado Judea, ña fín inga xoo yuta Jordán cán. <sup>2</sup>Ta ajuú quiáhva cuahá ñayivi nandíco jatá ta nandaja vahá mé á na quíhvi.

<sup>3</sup>Joo ndaja coo java na fariseo nacayati na nu Jesús sahá ña coto ndojó ñahá na cúní na. Já nacachi na já xihín a:

—Á núná nuú in dàtaa jándacoo da jájíhí dà sahá ndá ña nacuu —nacachi na fariseo cán.

<sup>4</sup>Anda já nacachi Jesús já:

—Á a ñáha cahvi ndó tuhun Ndióxi nu cachí a ña jandá mé sahá tá nacavaha Ndióxi ñayivi nu cutí já nacavaha dàtaa ta nacavaha ñáñáha. <sup>5</sup>Ta nacachi tucu a ña ndítahan nuú dataa jándacoo da tátá dà xihín náná dà já ndique táhan dà xihín ñajíhí dà. Já xinu ndíví na cán cacuu na tátuhun in víxí yíquí cuñu na. <sup>6</sup>Sahá ña cán quéa co cútú ga na íví yíquí cuñu sahá ña nanduu na tátuhun in tühún yíquí cuñu na. Sahá ña cán quéa co ndítahan nuú da cán janí táhan da ña najácatáhan Ndióxi tá ngatandahá ná —nacachi Jesús.

<sup>7</sup>Anda já nandaca tuhún tucu na cán Jesús já nacachi na já:

—Joo já cachí ndó xihín nde: ndá cuéntá quéa nasahnda ri Moisés chuun ña cuu cavaha in dàtaa in tutu quiáhva da nu ñajíhí dà ta xihín ña cán cuu jándacoo da ña —nacachi na cán xihín Jesús.

<sup>8</sup>Já nacachi Jesús já:

—Sahá ña táhyí ndiváha íníma ndo sahá ña cán quéa sáhan Moisés ñamani nu ndó

ñá cuu cavaha ndó tutu quiáhva ndó nu ñajíhí ndo ña ná jándacoo ndó ña. Joo tá nacavaha Ndióxi ñayivi nu cutí coó nacacúni toho a coo ña yóhó. <sup>9</sup>Cuni joho ndó ná cahan i xihín ndo. Tá ná jándacoo in dàtaa ñajíhí dà ta co cútú á sahá ña nacaja ñá cuachi xihín inga taa ta tá tándahá dà xihín inga ña já quéa caja da cuachi nu Ndióxi. Ta quiáhva já fín ri cuachi dà ná tandaña xihín ña nacando cán —cáchí Jesús.

<sup>10</sup>Tá naxini joho na xíca tuun xihín Jesús cán ña yóhó já nacachi na já:

—Tá taa quiáhva já caja jandá vahá chágá ná a tándahá ñayivi, dà já —nacachi na cán.

<sup>11</sup>Já nacachi Jesús já:

—A juú ndihí ñayivi candaá ini ña cáhan i yóhó. Ndinuhu na ndínuná xímí túni caja Ndióxi, na cán cútú na candaá ini ña yóhó.

<sup>12</sup>Ndúu java dàtaa ta a cútú tandaña dà jáchí já nacacu da ta já taa cútú mé va da. Ta java da a cútú tandaña dà jáchí já nacaja ñayivi xihín ná ta já taa cútú mé va na. Ta java da a tandaña dà jáchí cúní dà ndiquáhva níí dà mé dà nu Ndióxi ña ná cacomí a cuéntá sahá dà. Ta ndá ndó, na ndínuná xímí túni, candaá ini ndó ña yóhó —nacachi Jesús.

Caja yíi Jesús na valí

(Mr. 10:13-16; Lc. 18:15-17)

<sup>13</sup>Tá nandihí já ñéhe na java na valí nacasaan na nu Jesús ña ná chinúu a ndahá a jiní ná ta já caca tähví a nu Ndióxi sahá ná. Joo ndaja coo na xíca tuun xihín á cán nacasaáh na caja cuehe na xihín na ndáca na valí cán. <sup>14</sup>Já nacachi Jesús xihín na xíca tuun xihín á cán já:

—Quiáhva ndó ñamani ná quixi na valí nuú i ta a cají nuu ndó nu ná jáchí cacomí Ndióxi cuénta sahá ñayivi tá ná caja na tá quiáhva caja na valí yóhó —nacachi Jesús.

<sup>15</sup>Tá nandihí já nacchinúu Jesús ndáhá a jiní na valí cán. Anda já naquee a cuahán.

Dítuhún in dà cuicá xihín Jesús

(Mr. 10:17-31; Lc. 18:18-30)

<sup>16</sup>Tá ndaja coo naxinu in dàtaa nu fín Jesús ta nandaca tuhún ñahá dà já nacachi da já:

—Maestro, mé ndó cútú ndó taa vahá ña cán quéa ndáca tuhún i ndohó ndía ndítahan caja i já ná ñéhe tähví i cuhún i indivi coo i anda ama caja quivi —nacachi da xihín Jesús.

<sup>17</sup>Já nacachi Jesús já xihín dà:

—Ndá cuéntá quéa cáchún xihín i ña cútú u da vaha. Ni in túhún toho ñayivi co cútú ná na vaha ñuyíví yóho. In túhún Ndióxi cuití va quéa vaha. Tá cúnun catacún nu fin mé á já quéa xíní ñuhú cajún ña sáhndá tuhun Ndióxi —nacachi Jesús xihín dá.

<sup>18</sup>Já nacachi dà cán já:

—Ndá cútú mé ña ndítahan caja i —nacachi da.

Já nacachi Jesús já xihín dá:

—Coto a cáhnún ndii. Coto a cóun xihín ñajíshí á yíl ñani táchún. Coto a cája cuíhnún. Coto a cahún ña tuhún sahá ñayivi. <sup>19</sup>Ndítahan caja cáhnún tátún xihín nánún. Ta ndítahan quíhvi inún ñani táchún tá quiahva quíhvi inún mún —nacachi Jesús.

<sup>20</sup>Já nacachi dà yúta cán já xihín á:

—Janda taa loho nasacuu u nacasahá i cája i tóco ndihí ña sáhndá Ndióxi caja i. Ndía cútú ga ndítahan caja i —nacachi da.

<sup>21</sup>Já nacachi Jesús já xihín dá:

—Tá cúnun cacuún in taa ndacú nu Ndióxi cuáhán jícún tóco ndihí ñahún jan ta ndacahndún jiuhún jan nuú ña ndahví já ñehe táchvn coo cuahá ñahún indíví. Ta tá nandihí já quisún candicún yehe —nacachi Jesús.

<sup>22</sup>Tá naxini joho dà yúta cán ña yóho já naquee cuéhá ndivaha da cuahán dà jáchí dà cuicá ndivaha cútú dá.

<sup>23</sup>Anda já nacachi Jesús xihín na xíca tuun xihín á cán já:

—Mé a ndaa ná cachí i xihín ndó ña ndaja yáncá ndivaha cáá já ndiquiahva na cuicá mé ná ndáha Ndióxi ña ná cacomí a cuéntá sahá ná. <sup>24</sup>Jáchí janda cama chágá cuu yaha in camello ini in yáví sahá yítucú a juú ga ña ná ndiquiahva in dà cuicá mé dà ndáha Ndióxi ña ná cacomí a cuéntá sahá dà —nacachi a.

<sup>25</sup>Tá naxini joho na xíca tuun xihín Jesús cán ña yóho já nacatontó ndivaha na ta nandaca tuhún táchán na já cachí ná já:

—Ndá ná cútú na cuu cazu ndaa ínimá, dà já —cachí ná.

<sup>26</sup>Nandicoti nihni Jesús nu ná já nacachi a já xihín ná:

—Ni in na a cútú caja ña yóho joo Ndióxi quéa cuu caja ña jáchí ni in ñaha co lñvi toho nu Ndióxi —nacachi Jesús.

<sup>27</sup>Anda já nacachi Pedro já:

—Joo ndehe, nájándacoo ndihí nde ñaha nasacomí nde ta ndíco nde ndohó. Ndía

ñehe táchví nde caja ndó —nacachi Pedro xihín Jesús.

<sup>28</sup>Anda já nacachi Jesús já xihín dá:

—Mé a ndaa ná cachí i xihín ndó. Tá ná tandaa quívi nduu saá tóco ndihí ñaha já cacoo yehé, dà nachindahá Ndióxi nduu ñayivi nuú ndicahnu ndivaha i. Ta cán cacoo ri ndohó, na naxica tuun xihín i nuú uxu iví táchvn vaha. Ta cán caja vií ndó sahá ndíluxu iví táchndá na naquixi chichi Israel. <sup>29</sup>Ta ndá na nájándacoo vehe na á ñani na á quiahva na á tátá ña á náná ña á ñajíshí ña á jáhyi na á ñundáhyi ña sahá yehe, na cán cútú na ñehe ná cuahá chágá ví ñaha. Ta jatá ña cán ñehe táchví ná catastu na nuú Ndióxi anda ama cáá quívi. <sup>30</sup>Ta ndúu cuahá ña fin sahá ñuyíví yóho viti joo växi quívi cacuu na ña fin sahá nuú Ndióxi —nacachi Jesús.

## 20

Sácú Jesús quíhva sahá java dà sáhndá uva

Já nacachi Jesús já sácú a quiahva:

—Nuú cacomí Ndióxi cuéntá sahá ñayivi cútú á tátuhun ña yóho: fin in dàtaa naha chá naquee da cuahán da nducú dà mozo caja chún da cahnda da uva nu ñúhu dà.

<sup>2</sup>Ta nacandoo da chahvi da in jiuhún caa naní denario in quívi. Ta já nachindahá dà mé mozo cán cuahán dà caja chún da nu ñúhu dà. <sup>3</sup>Tá nandihí já naquee tucu dà xihín ñaha ñúhu cán tátuhun caa in naha já nandítahan dà java dà ndúu núná uun nuú yahvi. <sup>4</sup>Já nacachi mé dà xihín ñaha ñúhu cán já: “Cuáhán ri ndohó va cahnda ndó uva nu ñúhu i ta já chahvi i ndohó tá quiahva ndítahan nu ndó quehe ndó”, nacachi da. Já naquee mozo cán cuahán da jáquee da nu ñúhu dà. <sup>5</sup>Ta tá nacuu caxívi já naqueta tucu dà xihín ñaha ñúhu cán cuahán da tátuhun caa uñun sahini naqueta tucu da ta nuú yahvi cán naxini chágá dà dà ndúu núná uun. Já nacachi da já xihín dà ndúu cán:

“Ndá cuéntá quéa sa nacuu ndiví yaa ndúu ndó yóho”, nacachi dà xihín dà ndúu cán. <sup>7</sup>Ta nanducú ñehe dà cán tuhun já cachí dà já: “Co cája chún nde jáchí coó na

quíxi ndúcú nde caja chúun nde”, nacachi da cán. Anda já nacachi da xihín ñaha ñúhu cán já: “Cuáhán ri ndóhó va cahnda ndó uva nu ñúhu i. Ta já chahvi i ndóhó tá quiáhva ndítahan nu ndó quehe ndó”, nacachi da.

<sup>8</sup>Ta tá sa nacuaá já nacachi da xihín ñaha ñúhu cán xihín da cómí chuun nu mozo cán ña ná cana da dà cùu mozo cán já ná quehe yahvi da sahá chuun nacaja da. Ta dà naquihvi nacaja chúun nu ndlhí cán, da cán cùu dà jilhna ñúhu ná quehe yahvi. Tá nandhi cán ná quehe yahvi dà naquihvi nu cuítí. <sup>9</sup>Anda já nacasaá dà naquihvi caja chúun caa uhun sahini já naquehe in in da cán in denario. <sup>10</sup>Ta ndaja coo tá nacani a nuú dà naquihvi caja chúun jandá nahá cán quehe yahvi da já quéa nacahán da ña cuáhá chágá jiuhún ndiquehe da nuú dà naquihvi caa uhun sahini cán, Joo quiahva já in denario naquehe ri in in da cán. <sup>11</sup>Sahá ña cán quéa nacasáhá dà cáhan cuachí da xihín da xihín ñaha ñúhu cán. <sup>12</sup>Já nacachi da já: “Dà nandai cuu caja chúun nu ndlhí cuíi yóho in hora cuití nacaja chúun da. Ta tá quiáhva nacahví ndó ndehe, dà nacaja chúun ndiví yaa nu ndítahyí quiáhva já nacahví ri ndó nuú dà caa va”, nacachi da cáhan cuachí da cán. <sup>13</sup>Anda já nacachi da xihín ñaha ñúhu cán xihín in táchan mozo cán já: “Candehé, amigo. Cо cája quini toho i xuhun. Á a juú in denario nacandoó i chahví i nuun. <sup>14</sup>Júhun ña ndítahan quehún ta cuanúhun. Jáchí cùni chahvi i nuú dà nacaja chúun in hora cuití va tá quiáhva nacandoó i chahví i nu yóhó. <sup>15</sup>Jáchí núná nuú i caja i ña cùni mí i xihín jiuhún i. Ta co ndítahan cahihví inún sahá ña vahá ini i”, nacachi da xihín ñaha ñúhu cán xihín da cáhan cuachí cán —nacachi Jesús sácú a quiáhva.

<sup>16</sup>Ta nacachi tucu a já:

—Sahá ña cán quéa ndúu cuahá na íin sahá ñuyíví yóho viti joo vaxi quiví cacuu na na coó sahá nu Ndióxi. Ta ndúu cuahá ña coó sahá ñuyíví yóho viti joo vaxi quiví cacuu na na íin sahá nu Ndióxi —nacachi a.

Cáxi týhun tucu Jesús ña quiví a  
(Mr. 10:32-34; Lc. 18:31-34)

<sup>17</sup>Ta tá sa naquehe tucu Jesús cuahán chí Jerusalén já íchi cán na tavá xóo a ndílhuxu ivi na xíca tuun xihín á cán já nacachi a já xihín ná:

<sup>18</sup>—Candehé ndo. Yóho ndáa í cuahán yó chí Jerusalén nuú ndiquihva na yehe, dà nachindahá Ndióxi nduu ñayivi ndahá na sacuahá nuú jutu xihín nuú na jánaha ley Moisés. Ta ná cán cùu ná cacu ini sahá ndaja quiví i. <sup>19</sup>Anda já ndiquihva na yehe ndahá ná tóho ña ná cuacu ndaa na yehe. Ta cani na yehe ta já cata caa na yehe ndica crúxu joo tá ná yahá uní quiví já nditacu tucu u —nacachi Jesús.

Tá naxica náná Jacobo xihín Juan ñamani nuú Jesús  
(Mr. 10:35-45)

<sup>20</sup>Anda já nacayati ñajíhí Zebedeo, ñá cùu náná Jacobo xihín Juan nuú Jesús. Ta ndáa ñá ndíví jahyi ñá nacasaá ñá nacaxítí ña nuá jáchí cùni ñá cacá ñá in ñamani nuú Jesús.

<sup>21</sup>Anda já nacachi Jesús já xihín ña:

—Ndá quéa cùni ndó —nacachi a.

Já nacachi ñá cán já:

—Ña cùni quéa ná caja ndó ñamani cahnda ndó chuun ña ná cacoo in in jahyi i xoo jíjin ndó. In da xoo cuáha ta in da xoo íti jíjin ndó indíví tá ná cacomí ndó cuénta sahá ñayivi —nacachi ñá cán.

<sup>22</sup>Anda já nacachi Jesús já xihín ñá:

—Co cándaa ini ndó ña xíca ndó nuú i —nacachi a.

Anda já nacachi a já xihín Jacobo xihín Juan cán:

—Á cuu ndoho ini ndó tá quiáhva ndítahan nuú i ndoho ini i. Jáchí ña vaxi nuú i ndoho ini i cùu á tátuhun coho i in yáxi ndutá ova. Á fin tiáhva ndó ndoho ini ndó tá quiáhva ndítahan nuú i ndoho ini i anda quiáhva ná quiví i —nacachi Jesús xihín ndíví da cán.

—Cuu caja nde ña —nacachi ndíví dà cán xihín Jesús.

<sup>23</sup>Anda já nacachi tucu a já xihín dá:

—Mé a ndaa tandaas quiví coho ndó ña ova ñúhu in yáxi, mé ña coho i. Ta tandaas quiví ndoho ndivaha ini ndó tá quiáhva ndoho ini i anda quiáhva ná quiví i. Joo sahá ña xíca ndó cacoo in ndó xoo cuáha i ta in ndó xoo íti i a juú yehe cùu dà cuu quiáhva i ña nu ndo. Jáchí sa nandicaxi Ndióxi na ñehé táchí cacoo cán —nacachi a.

<sup>24</sup>Joo ndaja coo tá naxini joho ndílhuxu chágá na xíca tuun xihín Jesús cán ña yóho já nacasaáhá ná xójo ini na xihín ndíví dà cùu ñani cán. <sup>25</sup>Anda já nacana Jesús tóco ndihi na xíca tuun xihín a cán já nacachi a já xihín ná:

—Sa xíni ndó ndaja cája na sáhndá chuun nuú ñayivi ndúu ñuyíví yóho. Ña cája na quéa jácandíhi na ñayivi ta cája na tá quiahva cúní mé ná.<sup>26</sup> Joo co ndítahan coo ña cán tañu mé ndó jáchi ndá da cúní cacuu da cáhu chágá tañu ndó xíni núhú cacuu da in dà cája chúun cuénta ndihí ndó.<sup>27</sup> Ta ndá da cúní cacuu da nu cuítí tañu ndóhó ndítahan cacuu da dà cája ndíví nuú ndihí ndó.<sup>28</sup> Jáchi ni yehe, dà náchindahá Ndíoxi nduu ñayivi coó naquixi i ñuyíví yóho ña ná caja ndíví ñayivi nuú i. Ña naquixi i caja i quéa caja ndíví i nu ná ta ndiquiaghva i mí i quiví i já ná cuu cazu ndaa ímima cuahá ñayivi ná a cùhun ná indayá —nacachi a.

Tá nandaja vaha Jesús ivi dà cuáá  
(Mr. 10:46-52; Lc. 18:35-43)

<sup>29</sup> Ta tá naqueta Jesús ñuu Jericó xihín na xíca tuun xihín a cán já ndíco cuahá ndiváha ñayivi jatá cásahen ná. <sup>30</sup> Ta ndaja coo yati jíin íchí cán našanduu coo ivi dà cuáá ta tá naxini joho da ña yáha Jesús cuahan já naçasáhá ndíví dà cayuhú da já cachí dà já:

—Jesús, dà naquixi chichi David, caja ndó ñamani candáhví loho ini ndó ndehe —cachí dà.

<sup>31</sup> Anda já naçasáhá cája cuéhe ñayivi xihín ndíví dà cuáá cán ña ná catájí yúhú dá. Joo ví ga ví cayuhú dà já cachí dà:

—Jesús, dà naquixi chichi David, caja ndó ñamani candáhví loho ini ndó ndehe —nacachi da.

<sup>32</sup> Anda já nandaca ndichi Jesús já naçana ndíví dà cuáá cán. Ta já nandaca tühún a dà já nacachi a já xihín dá:

—Ndíá cúní ndó ña ná caja i xihín ndó —nacachi a.

<sup>33</sup> Já nacachi ndíví dà cuáá cán já:

—Candehé nde cúní nde, xitoho.

<sup>34</sup> Anda já naçandáhví ini Jesús dà ta naçani ndaa ndáhá á nuú dá. Chí ivi láá nañunu nuú dà cuáá cán ta naçasáhá dà ndíco dà jatá Jesús cuahen dà.

## 21

Ndíhvi Jesús ñuu Jerusalén  
(Mr. 11:1-11; Lc. 19:28-40; Jn. 12:12-19)

<sup>1</sup> Ta tá sa ja chá xíng coo ná ñuu Jerusalén já naxinu ná in ñuu loho naní Betfagé yati jíin yúcu naní olivo. Ta cán našahnda Jesús chuun nuú ivi táhan dà xíca tuun xihín á cán. <sup>2</sup> Já nacachi a já xihín dá:

—Cuáhán ndó ñuu loho jan ta tá ná xínu coo ndó jan ndiñehé ndó in búrro jíhí ndíco ndaa rí ta xihín mé rí jan cándichi inga búrro loho. Ndaxí ndó rí ta cañehe ndó ndíví rí quixi ndó. <sup>3</sup> Ta ndá ná ná cahan xihín ndo já quéa cache ndó xihín ná ña xíni núhú xitoho ndó rí joo tá ná ndihí chuun rí já nducú ñehe tucu da rí, já cache ndó xihín ná —nacachi Jesús xihín ndíví dà cán.

<sup>4</sup> Tóco ndihí ña yóho nayaha já ná xínu coo nuú ña naçahyí in dà profeta já:

<sup>5</sup> Joho cache ndó xihín ná ñuu Jerusalén: “Candehé ndó. Ndáhví uun cása dà cómí cuénta sahá ndó.

Vaxi da nu ndo ta canúu da jata búrro jíhí, jahyi in rí ndiíojo, canúu da vaxi da nu ndo”, cachí tühun Ndíoxi.

<sup>6</sup> Ta ndíví dà xíca tuun xihín Jesús cán našahen dà naçaja da tá ín našahnda Jesús chuun nu dá. <sup>7</sup> Já ñehe da búrro jíhí cán xihín búrro loho, jahyi rí naxinu na nuú Jesús. Anda já náchojó ná cotó ndéé na jata rí ta nandaa Jesús jata rí. <sup>8</sup> Ta mé cuahá ñayivi ndúu cán naçasáhá na chínduu na cotó ndéé ná íchí mé nuú yáha Jesús cán. Ta java na naçasáhá na sáhndá na ndahá yíto ta chínduu na dö íchí mé nuú yáha Jesús cuuhun a. <sup>9</sup> Ta ñayivi cuahen chí nuú ta jári ná vaxi chí jata naçasáhá ná cayuhú ná já cachí ná já:

—Cája cáhu í dà naquixi chichi David yóho. Ndicáhnu nañá ná cacuu dà cómí cuénta sahá yo jáchi cúu dà dà vaxi yuhú nuú Ndíoxi. Cáhu ná cacuu Ndíoxi —cachí ñayivi cuahen cán cayuhú ná cásahen na xihín á.

<sup>10</sup> Ta tá nandihvi Jesús ñuu Jerusalén cán tóco ndihí ñayivi naçasáhá cátontó ndiváha na. Já cachí xihín táhan ná já:

—Ndá dà cúu dà yóho —cachí xihín táhan na.

<sup>11</sup> Java táhan ná cán cachí ná:

—Dá yóho cúu in profeta, dà ñuu Nazaret cuénta estado Galilea —cachí xihín táhan na.

Tá nataxí Jesús ná ndúu jíco ñáha yéhé veñühu

(Mr. 11:15-19; Lc. 19:45-48; Jn. 2:13-22)

<sup>12</sup> Anda já nandihvi Jesús veñühu cáhu cán já naçasáhá táxí ndihí a ná ndúu jíco xihín ná ndúu xéen cán. Ta naxicó ñehe a mesa ná ndúu ndíjama jiuhún cán ta naxicó

ñehe a t<sup>á</sup>yí sác<sup>a</sup>co ná ndúu jícó ndijata. <sup>13</sup>Já nacásahá cachí a já xihín ndihí ná cán já:

—Já cachí t<sup>u</sup>hun Ndióxi já: “Vehe mí i cacuu a vehe nuú quixi na caca t<sup>ah</sup>ví na n<sup>u</sup> Ndióxi”, cachí t<sup>u</sup>hun Ndióxi. Joo ndohó nandai cuu ndó yóho caja cuíhná ndó nuú ñayivi —nacachi Jesús xihín ná.

<sup>14</sup>Tá nandihi já nacayati java ná cuá xihín java ná réncó n<sup>u</sup> a ini mé veñuhu cáhnu cán ta nandaja vaha mé a ná. <sup>15</sup>Joo xójo ndivaha ini ná sacuahá nuú jutu xihín na jánahá ley Moisés tá naxini na ná xitúhún nacaja mé a ta tá naxini joho na ná caja cáhnu ná valí cán mé a tá cachí ná já: “Cája cáhnu í d<sup>a</sup> n<sup>u</sup>quixi chichí David.” Sáhá ná cán quéa xójo ini na <sup>16</sup>ta já nacachi na já xihín Jesús:

—Á xíni johún ná cahán ná valí yóho —nacachi na xihín Jesús.

Já nacachi Jesús já:

—Ajan, xíni joho i ná caja cáhnu na Ndióxi. Á coó nacahvi ndó t<sup>u</sup>hun Ndióxi n<sup>u</sup> cachí a já:

Janda ná valí ta janda ná chichí nacaja Ndióxi xihín ná,  
ná cuu caja cáhnu na mé a, cachí t<sup>u</sup>hun Ndióxi —nacachi Jesús xihín ná cán.

<sup>17</sup>Anda já nájandacoo a ná já náqueta jatá ñuu cán cuahán chí ñuu Betania ta cán nasañin a.

Tá náchicqan Jesús cháhan jata titó ñuhú  
(Mr. 11:12-14, 20-26)

<sup>18</sup>Ta inga quív itaan tá nandicó coo a cuahan chí Jerusalén já nacásahá cuíco a cuahan. <sup>19</sup>Ta yuhú íchi cán naxini a cándichi in titó ñuhú. Ta chí nasañan sándezhé a á fin cuíhí n<sup>u</sup> d<sup>a</sup> caxí a. Joo coó ñaha ná ndiñehe a. Ndáha uun d<sup>a</sup> cán cuití va íin. Anda já nacachi a já xihín do:

—Ni in t<sup>u</sup>hún ga tañu a cáma cuíhi nu yóho —nacachi a xihín do.

Chí ivi láá náhichi titó ñuhú cán. <sup>20</sup>Tá naxini ná xíca tuun xihín Jesús cán ná yóho já nacatónitó ná já cachí ná já:

—Ndá cuénta quéa náhichi titó ñuhú cán ivi t<sup>u</sup>hun —nacachi na xihín Jesús.

<sup>21</sup>Ta nanducú ñehe Jesús t<sup>u</sup>hun n<sup>u</sup> ná já nacachi a já:

—Mé a ndaa ná cahan i xihín ndó ná tá ná candee ini ndó yehé ta ni loho co cahvi ivi joho ini ndó já quéa cuu caja ndó ná náhu chágá nuú ná nacaja i yóho. Ta janda cuu cachi ndó xihín in yúc: “Caxoo ta cuahán

jáquetún mún ini tañuhú”, ta chí já ndusa coo. <sup>22</sup>Ta tá ná candee ini ndó yehé nani xíca t<sup>ah</sup>ví ndó n<sup>u</sup> Ndióxi ta co cahvi ivi joho ini ndó já quéa yehé ndó ná xíca ndó n<sup>u</sup> a —nacachi Jesús.

Tá ndáca t<sup>u</sup>hún ná Jesús yo sáhan ndéé n<sup>u</sup> a ná jánahá mé a nuú ñayivi  
(Mr. 11:27-33; Lc. 20:1-8)

<sup>23</sup>Tá nandihi já nandihvi Jesús ini veñuhu cáhnu cán ta nani jánahá t<sup>u</sup>hun Ndióxi nuú ná ndúu cán naxinu ná sacuahá nuú jutu xihín na sacuahá nuú ná Israel cán n<sup>u</sup> a. Já nacachi na já xihín á:

—Yo já sáhan ñamani n<sup>u</sup>un cajún ná cajún yóho —nacachi na.

<sup>24</sup>Anda já nanducú ñehe Jesús t<sup>u</sup>hun n<sup>u</sup> ná já nacachi a já:

—Ta ná ndáca t<sup>u</sup>hún ri yehé va ndohó ta tá ná nducú ñehe ndó t<sup>u</sup>hun nuú i anda já caxí t<sup>u</sup>hun i n<sup>u</sup> ndó yo já nasañan ñamani nuú i caja i ná caja i yóho. <sup>25</sup>Ta viti cachi ndó xihín i yo já náchindahá Juan ná ná quixi da caja ndútá d<sup>a</sup> ñayivi. Á Ndióxi náchindahá d<sup>a</sup> á ñayivi náchindahá ñahá —nacachi Jesús ndáca t<sup>u</sup>hun a na.

Já nacásahá ndítuhún xihín táhan na já cachí ná já:

—Tá ná cachí ná Ndióxi quéa náchindahá Juan ta já nducú ñehe Jesús t<sup>u</sup>hun n<sup>u</sup> yo já cachi da xohó: “Ndá cuénta quéa coó náxeen ndó candusa ndó d<sup>a</sup>, d<sup>a</sup> já”, cachi Jesús xohó. <sup>26</sup>Ta tá ná cachí ná ñayivi cuú ná náchindahá Juan já yihví yo ná ndicuítá ñayivi xihín yo. Jáchí tóccó ndihí na cándusa na ná náquixi Juan jáyaha da ná nacahán Ndióxi nuú ñayivi —cachí ná ndítuhún xihín táhan na.

<sup>27</sup>Sáhá ná cán quéa nacachi na já xihín Jesús:

—Co xíni toho ndé yo já náchindahá Juan.  
Anda já nacachi Jesús já xihín ná:

—Ta ni yehé a cáxi t<sup>u</sup>hun i n<sup>u</sup> ndó yo já nasañan ñamani n<sup>u</sup> i caja i ná yóho —nacachi Jesús xihín ná cán.

Sácu Jesús quighva sghá ivi d<sup>a</sup> cuú jahyi in datqa

<sup>28</sup>Anda já nacachi tucu Jesús xihín ná cán já:

—Cuni joho ndó ná nayaha in tañu. Ín in dataa ta nasañin ivi jahyi taa da. Ta nasañan d<sup>a</sup> nuú in táhan d<sup>a</sup> cán já nacachi da já xihín d<sup>a</sup>: “Jahyi a, cuahán caja chúun

lohún nu ñuhú i nu cáá tó uva”, nacachi da xihín jahyi da.<sup>29</sup> Já nacachi jahyi da já xihín dá: “A cíhun toho i jáchí co xíca ini i cuhun i”, nacachi da. Joo tá nandihi nacahvi ini da ña a váha ná cuu ini da chí já naquee da cuahán da caja chún da nu ñuhú tátá da.<sup>30</sup> Ta jári nasahan tátá da cahán da xihín inga jahyi da ta quiahva já nasañda ri da chuun nuú da cán. Ta dà cán nacachi da já xihín tátá da: “Ajan. Cuhun i”, cachí da. Joo tá nandihi coó nasañan toho da.<sup>31</sup> Ta viti cachí ndó xihín i ndá dà cíuú da nacaja ña cúní tátá da —nacachi Jesús.

Já nacachi na cán:

—Dá nu cuítí.

Anda já nacachi tucu Jesús já:

—Mé a ndaa ná cahan i xihín ndó ña íin chágá sahá na játaca jiuhún cuénta ímpuesto xihín najíhí xíca jii ña ná cacomí Ndióxi cuénta sahá ná a juú ga ndohó.<sup>32</sup> Jáchí náquixi Juan, da jácandúta ñayivi najánaha da ndghó ndaja ndítahan caja ndó ta coó naxeen ndó candúsa ndó da. Joo na játaca jiuhún cuénta ímpuesto xihín najíhí xíca jii nacandúsa na ña naquean da. Ta vatí naxini ndó ña yóho joo coó naxeen ndó ndijama ndó ña caja ndó jáchí coó naxeen ndó candúsa ndó mé Juan.

Sácú Jesús quiahva sahá java mozo, da nacaja quini xihín xitoho da

(Mr. 12:1-12; Lc. 20:9-19)

<sup>33</sup> Cuni joho ndó ná cacu u inga quiahva nu ndo. Nasahijn in dàtaa to nájándeé cuaha dá tó uva nu ñuhú dá. Ta nasañda in corra yíto nu do. Ta nacavaha da in nuú cuhni mé uva cán ña cavaha vino. Ta nacavaha da in nu jícó canúu da já cuu candaan da tóco nidihi dó cán.

’Anda já nasañan ndojó dà ñuhú dá nuú java na caja chún na ña. Ta já naquee da cuahán xícá da.<sup>34</sup> Ta tá naxinu tiempo jáquee na já náchindahá da java mozo da ña ná cuhun nuú na ndúu caja chún ñuhú da cán ña ná ndiquiahva na nu dá ña cání nu dá ndiquehe da sahá ñuhú dá ña nasañan ndojó da nuú na cán.<sup>35</sup> Joo ndaja coo na caja chún nu ñuhú cán natiin na in táhan da cíuú mozo da cán ta nacani na da. Ta inga táhan da cán nandicuita née na xihín yuu.<sup>36</sup> Joo mé dà xihín ñaha ñuhú cán náchindahá cuahá chágá da mozo dà nasañan da nu ñuhú dá. Ta tá quiahva nacaja na xihín mé java mozo

nasañan nu cuítí cán quiähva já nacaja ri na xihín tóco nidihi mozo cán.

<sup>37</sup> Tá nandihi já nasañu ini dà xihín ñaha ñuhú cán chindahá dà jahyi da jáchí nacahán da: “Cája i cuénta coo toní ñuhú na xihín jahyi i”, nacahán dà xihín ñaha ñuhú cán. <sup>38</sup> Joo tá naxini na cája chún ndojó ñuhú cán ña vaxi dà cíuú jahyi dà xihín ñaha ñuhú cán já nacachi xihín táhan na já: “Candehé ndo. Yóho vaxi dà cíuú jahyi xitoho í. Ta tá ná xinu quivi quivi xitoho í ta dà yóho cacuú da ndicojo chuun sahá ñuhú yóho. Cóho cahní yó dà já nandoo ñuhú yóho ndáha mí”, nacachi xihín táhan na cán. <sup>39</sup> Ña cán quéra natiin na dà ta natavá na dà jända yuhú cútú ta cán nasañí na dà —nacachi Jesús sácú a quiahva.

<sup>40</sup> Anda já nandacá tuhún Jesús na ndúu cán já nacachi a já:

—Ndíá cahán ndó caja dà xihín ñaha ñuhú yóho xihín na cája chún nu ñuhú dà —nacachi a.

<sup>41</sup> Anda já nacachi na cán já xihín Jesús:

—Ña caja dà quéra cahní dà na quini, mé na nacaja chún tóo nu ñuhú dà cán. Ta já ndiquiahva ndojó dà ñuhú dà nuú java gá na ña ná caja chún na nu á. Ta tá jáquee na ndiquiahva na nu dà ña cání nu dà ndiquehe da sahá ñuhú dà —nacachi na cán xihín Jesús.

<sup>42</sup> Já nacachi Jesús já xihín na cán:

—Á a ñaha cahvi ndó tuhun Ndióxi nu cachí a:

Mé yuu ña najácaná dà cávaha vehe,  
ñá cán cíuú ña nanduu yuu ndúu sahá vehe  
ñá íin chágá sahá.

Ña yóho quéra nacaja Ndióxi,  
ta cíuú á in ñaha cáhnu ndiváha nu yo, cachí  
tuhun Ndióxi.

<sup>43</sup> Ña cán quéra cahán i xihín ndó ña cacu xoo Ndióxi ndohó ña ná a cacomí gá mé á cuénta sahá ndó. Ta quiahva mé a ñamáni nuú java gá ñayivi ña ná ndihvi na nuú cacomí Ndióxi cuénta sahá ná, mé na ndiquiahva na nu á ña cání nu á ndiquehe a.

<sup>44</sup> Ta cachí i xihín ndó ña yehe cíuú u tátuhan mé yuu cahán i sahá. Ta ndá na ná ndicava játá yuu cán chí chachi xéhé na. Quiahva já nidihi sahá ñayivi tá cō cúní na candúsa na yehe. Ta tá mé yuu cán ná yahá ndicava játá in na já cají nidihi ñahá. Quiahva já nidihi sahá ñayivi ini indayá tá cō cúní na candúsa na yehe —nacachi Jesús.

<sup>45</sup>Tá naxini joho na cíu sacerdote nuú jutu xihín na fariseo cán ña yóho, nacandaa táhyí ini na ña sahá mé na cáhan Jesús.

<sup>46</sup>Sahá ña cán quéa nanducú na tiin na mé á joo coó nacuu caja na sahá ña nayivi na ñayivi jáchi cándusa ñayivi cán ña cáhan Jesús cuénta Ndióxi.

## 22

*Sácu Jesús quiáhva sahá vicó tándahá*  
(Lc. 14:15-24)

<sup>1</sup>Tá nandithi já nacásahá tucu Jesús já-nahá ñayivi xihín ndinuhu quiáhva. Já cachí a já xihín ná:

<sup>2</sup>—Nuú acacmí Ndióxi cuénta sahá ñayivi cíu á tátuhun ña nayaha xihín in rey tá nacavaha da in víco ña tandahá jahyi taa da.

<sup>3</sup>Nachindahá da mozo da ña ná cuhun da cana da na ndítahan quixi. Joo coó naceen na quixi na mé víco. <sup>4</sup>Anda já nachindahá chágá da mozo da ña ná caxí tuhun da nuú na ndítahan quixi cán ña sa nacaja ndíví da ña cuhxu na. Sa naxihí tindiquí xihín java ga quíti, rí nandaha. Sa nacandíví ndihi ñaha cuénta víco tándahá sahá ña cán quéa ná quixi na. Ña yóho cíu chuun nacahndá nu mozo cán cachí da xihín na ndítahan quixi cán.

<sup>5</sup>Joo co ndáa na cán cuhun na. In táchan da cán nacuee da cuahán da candhé da nu ñuhu dá. Ta inga da nacuee da cuahán da caja ndahví da. <sup>6</sup>Ta java ga na cán natiin na mozo mé rey cán ta nacaja xíxi na xihín dá janda quiáhva nacahndá ñahá na. <sup>7</sup>Anda já nacoxo ndivaha ini rey cán sahá ña cán quéa nachindahá da soldado da ña ná cuhun na cahndá na na nacahndá ndíjí cán ta ná chican ñuhu dá nuu na. <sup>8</sup>Anda já nacachi tucu rey cán já xihín java ga mozo da: “Sa nacandíví tocó ndihi ñaha ña coo víco joo na nacana i cán coó sahá toho na quixi na víco. <sup>9</sup>Ña cán quéa cuahán ndó ndijáá cayé náhnu ta ndá ñayivi nacuu cana ndó na ná quixi na víco tándahá yóho”, nacachi rey cán nacahndá da chuun nu mozo da. <sup>10</sup>Anda já nacuee mozo da nacahndá ña ndijáá cayé ta ndaja cúa mé ñayivi najáataca na. Ñayivi vaha xihín na quini viti nataca nacaja na. Ta já najácutú na vehe nuú coo víco tándahá cán xihín ñayivi.

<sup>11</sup>’Anda já nandihvi rey nu ñuhu na cán já naxini da ndácaan in dataa, da co ndíxi jáhma ña ndíxi na ndúu víco tándahá. <sup>12</sup>Ta nacayati mé rey nu dá já nacachi da já xihín

dá: “Amigo, ndaja nacajún naquihvún yóho tá co ndíxi tohún jáhma ña ndíxi na ndúu víco tándahá”, nacachi rey xihín da cán. Joo coó nanducú ñehe da tuhun nu rey.

<sup>13</sup>Anda já nacahndá rey chuun nu mozo da. Já nacachi da já xihín ná: “Cató ndó ndáha dá xihín sahá dá. Ta jácana ndó da chí jata nuú naá yávi. Cán cuacu ndivaha da anda quiahva cahndá nuhú da”, cachí da. <sup>14</sup>Jáchi cuahá ndivaha cíu ná nacana Ndióxi ña ná acacmí a cuénta sahá joo chá cíu ná ndíquiáhva na ndáha mé á ña ná cuu caxí a na —nacachi Jesús.

*Ndáca tuhún na Jesús á ndítahan nu ná chahvi na jiuhún cuénta impuesto*

(Mr. 12:13-17; Lc. 20:20-26)

<sup>15</sup>Tá nandithi já nacuee na fariseo nacahndá na jandique táchan na tuhun na ndaja caja na coto ndojó na Jesús xihín tuhun cáhan mé á já ná cuu jácojo na cuachi jatá. <sup>16</sup>Ña cán quéa nachindahá na java na cuénta mé ná xihín java na cuénta Herodes nuú Jesús já nacachi na já xihín á:

—Maestro, xíni nde ña ndinuhu ña ndaa cáhan mé ndó. Ta cándaa ini nde ña jánaha ndó ña ndaa sahá íchí cuénta Ndióxi. Ta co quéhe ndó cuénta tá cáhan núu ñayivi sahá ndó. Ta cándaa ini nde ña tá cáhan ndó sahá in ñaha caja ñayivi cíu á sahá ña sández ndó janda ínimá ná. <sup>17</sup>Sahá ña cán quéa cíni nde cándaa ini nde ndíá cachí ndó sahá ña yóho: Á ndítahan nuú nde chahvi nde jiuhún cuénta impuesto nuú da cómí cuénta sahá ñuu Roma. Á chahvi nde ña á a chahvi toho nde ña —nacachi na cán xihín Jesús.

<sup>18</sup>Joo sa nacandaa ini Jesús ña cáhvi núu ini na sahá ña cán quéa nacachi a já xihín ná:

—Co cíu ndó tá quiahva ndáa ndó jáchi cíni ndó coto ndojó cuití ndó yehé.

<sup>19</sup>Jánaha ndó in táchan jiuhún ña chahvi ndó impuesto jan nuú i —nacachi Jesús.

Anda já nacahndá na in jiuhún caja naní denario nu á. <sup>20</sup>Tá naxini Jesús ña yóho já nacachi a já xihín ná:

—Yo nahná ta yo quivi quéa ndáa nu á —nacachi a.

<sup>21</sup>Já nacachi na cán já xihín á:

—Ñehe a nahná xihín quivi da cómí cuénta sahá ñuu Roma —nacachi na.

Anda já nacachi tucu Jesús já:

—Ndiuiqhva ndó ña cùú ñaha dà cómí cuéntá sahá ñuu Roma jan nu dá. Ta ndiquiaghva ndó ña cùú ñaha Ndióxi nu á —nacachi a.

<sup>22</sup>Tá naxini joho na cán ña yóho já nacatontó na ta najándacoo na a naquee na cuahán na.

Tá ndáca tuhun na Saduceo Jesús á mé a ndaq nditacu ndii

(Mr. 12:18-27; Lc. 20:27-40)

<sup>23</sup>Ta sa mé quivi já nasahán java na saduceo cahán na xihín Jesús. Ta mé na saduceo yóho co cándusa na ña nditacu tucu na sa naxilhi. Sahá ña cán quéa nandaca tuhún na Jesús já cachí na já xihín á:

<sup>24</sup>—Maestro, nu ley nacahyí Moisés sa-nahá natähnda chuan ta cachí a já: “Tá tándaha in dñataa xihín ñajílhí da ta tá xihíl da ta coó jahyi da cácu já quéa ndítahan nuú ñani da tandaha dá xihín ña cuáan nacan-doo cán. Ta já ná coo jahyi da cán xihín yuhú nuú ñani da”, cachí ley Moisés. <sup>25</sup>Ta viti cuni joho ndó ná cacu nde in quiahva nu ndó. Tañu mé nde yóho násanduu usa ñani. Ta dñu cuítí cán natandaha dá xihín in ñáñáha. Tá nandihi já naxilhi da. Joo sahá ña coó jahyi da nacacu xihín ñajílhí da sahá ña cán quéa nandiquehe ñani da, da chí ivi jata dá ña cuáan cán. <sup>26</sup>Ta quiahva já nandoho ri dñ chí ivi cán jáchí naxilhi da ta coó jahyi da nacacu xihín ña. Ta janda ndíhusa ñani cán natandaha xihín ña ta ndíhusa da naxilhi ta ni in da coó nacacu jahyi xihín ña. <sup>27</sup>Ta tá nü ndíhlí naxilhi ri ñáñáha cán va. <sup>28</sup>Ta viti cachí ndó xihín nde tá ná xinu quivi nditacu tucu ndii, ndá dñ cacuu ndusa yíl ña cán jáchí ndíhusa ñani cán natandaha xihín ña ñuyíví yóho —nacachi na saduceo cán xihín Jesús.

<sup>29</sup>Anda já nacachi Jesús já:

—A váha toho cahán ndó jáchí co xíni ndó ndaja cahán tuhun Ndióxi ta ni co xíni ndó ndá quiahva cahnu cùú ndée Ndióxi. <sup>30</sup>Jáchí mé quivi tá ná nditacu tucu ndii a tándaha ga ná ta ni a quiahva na jahyi jihí na tandaha ná. Cacuu na tátuhun tátó Ndióxi ndúu indíví ta co tándaha na cán.

<sup>31</sup>Joo sa xíni yo ña nditacu tucu ndii. Á a ñáha cahvi ndó tuhun Ndióxi nu cachí a já:

<sup>32</sup>“Yehé cùú Ndióxi ña cája cahnu Abraham ta yehé cùú Ndióxi ña cája cahnu Isaac ta yehé cùú Ndióxi ña cája cahnu Jacob viti”, nacachi a. Ta ña yóho cúní cachí a ña tacú

yii va Abraham xihín Isaac xihín Jacob vatí sa naxihí yiquí cuñu na —nacachi Jesús.

<sup>33</sup>Tá naxini joho ñayivi ndúu cán ña yóho já nacatontó na xihín ña jánahá Jesús nu ná.

Tá cahán Jesús ndá ley quéa cahnu chágá (Mr. 12:28-34)

<sup>34</sup>Tá nañehé na fariseo tuhun ña naquee vaha Jesús násahnu a nuú na saduceo já nanditútú ndihi na. <sup>35</sup>Ta in táhan mé dñ cán, dñ jánahá ley Moisés nandaca tuhún da Jesús jáchí cúní dñ coto ndojó dñ mé á. Já nacachi da já:

<sup>36</sup>—Maestro, ndíl cùú ña cahnu chágá sáhndá ley Moisés caja í —nacachi dñ cán xihín Jesús.

<sup>37</sup>Já nacachi Jesús já xihín dá:

—Ña cahnu chágá nu ley Moisés cùú ña yóho: “Ndítahan quihví ini ndó Ndióxi, xitoho ndó xihín tóco ndihi íníma ndó ta xihín ndinuhi ini ndó ta xihín tóco ndihi xíní túni ndó.” <sup>38</sup>Ña yóho cùú ley nu cuítí ta cùú á ña cahnu chágá nu tóco ndihi ley.

<sup>39</sup>Ta tá quiahva fin ña nu cuítí yóho quiahva já fin ri ña chí ivi va ta cachí a já: “Xíní ñúhú quihví ini ndó ñani táhan ndó tá quiahva quihví ini ndó mé ndó.” <sup>40</sup>Ta jata ndíví ña yóho fin tóco ndihi ley Moisés xihín ña najáñahá na profeta sanahá —nacachi Jesús xihín na fariseo cán.

Ndáca tuhún na Jesús ndáchí naquixi a (Mr. 12:35-37; Lc. 20:41-44)

<sup>41</sup>Ta nani nanditútú ndihi na fariseo ndúu na nu Jesús cán já nandaca tuhún a na. <sup>42</sup>Já nacachi a já xihín ná:

—Ndíl cahvi ini ndó sahá Cristo. Ndá chichi cahán ndó vaxí a —nacachi Jesús xihín ná.

Já nacachi na cán já:

—Vaxí a chichi David, dñ násacuu rey sanahá —nacachi na cán xihín Jesús.

<sup>43</sup>Anda já nacachi tucú Jesús já xihín ná:

—Tá ta mé a ndaa vaxí Cristo chichi David ndá cuéntá quéa nacachi da ña cùú á xitoho da. Jáchí nacachí ndaa íníma David xihín íníma yii Ndióxi tá nacahyí dñ já:

<sup>44</sup>Já nacachi Ndióxi xihín xitoho i:

“Cacoo xoo cuáha i yóho  
janda quiahva ná caja i ña ná cacomún  
cuéntá sahá na co cúní yohó”, na-

cachi Ndióxi, nacachi David.

<sup>45</sup>Ndávaha cachí na ña vaxí Cristo chichi David tá ta sa mé David nacachi da ña cùú á xitoho da —nacachi Jesús.

<sup>46</sup> Ta chí ni in na coó nacuu caja nducú ñehe na tūhun nu á. Ta jāndā mé quivi já ni in ga ná coó nasahān ndeeé ini ndacā tūhún chágā ná mé á.

## 23

*Chícaqan Jesú斯 cuachi jatá ná fariseo xihín jatá ná jánahá ley Moisés*

(Mr. 12:38-40; Lc. 11:37-54; 20:45-47)

<sup>1</sup> Anda já nacachi Jesú斯 já xihín tóco ndihí ñayivi ta xihín ná xícá tuun xihín á cán já:

<sup>2</sup> —Na jánahá ley xihín ná fariseo cíú ná ná ndítahan nuú ndicani na ná cíni cacheley Moisés. <sup>3</sup> Ná cán quéa xímí ñúhú caja ndó tóco ndihí ná jánahá ná nu ndó. Joo a caja toho ndó tó quiahva caja mé ná jáchí co caja na ná jánahá mé va na. <sup>4</sup> Jáchí caja na ná ná coo ihyí ndivaha ley jāndā quiahva co ndeeé ini ñayivi caja na ná. Joo mé ná li loho tíin co chíndeé ñahá ná. <sup>5</sup> Ta caja na tóco ndihí ñaha ná cuni ñayivi na jáchí cátóó ná candicó listoni náhnu jini ná xihín jicó ndáhá ná nu ndáq tūhun Ndióxi. Ta cátóó ná coo lándā chágā yuhú jahmá ná a juú ga java ga ñayivi. <sup>6</sup> Ta tá cuahán ná víco cátóó ná coo na nuú vaha cuití va. Ta tá quíhvi na veñuhu cátóó ná cacoo na nuú sácoo ná íin chágā sahá. <sup>7</sup> Ta cátóó ná ná cahán toní ñúhú ndivaha ñayivi xihín ná tá xícá nuu na nuú yahví. Ta chí a juú quiahva cátóó ná ná cachí ñayivi 'maestro' xihín ná.

<sup>8</sup> Joo ndóhó co ndítahan nu ndó nducú ndó ná ná cahán ñayivi 'maestro' xihín ndó. Jáchí in ñani cíú ndihí ndó ta in tūhún cíú maestro ndó, mé á cíú Cristo. <sup>9</sup> Ta a cahán ndó tátá cahnu xihín ni in ñayivi ñuyíví yohó jáchí in tūhún Ndióxi cíú á tátá ndó ta mé á íin a indíví. <sup>10</sup> Ta a ndúcú ndó ná ná cahán ñayivi 'jefe' xihín ndó jáchí in tūhún laá va cíú jefe ndó, mé a cíú Cristo. <sup>11</sup> Ndá dä cíú dä cahnu chágā tañu ndó xímí ñúhú dä caja chúun da sahá ndihí ndó. <sup>12</sup> Jáchí ndá ná ndínehe jícó mé, jánuu ndáhá Ndióxi ná. Joo ndá ná jánauu ndáhá mé nu Ndióxi, jändiñehe jícó mé á ná.

<sup>13</sup> <sup>14</sup> Ndáhí nacuu ndó, na jánahá ley Moisés xihín ná fariseo jáchí co cíú ndó tó quiahva ndáhá ndó. Jáchí sají nuu ndó nuú ñayivi já ná a cíú cacomí Ndióxi cíentá sahá ná. Ta ni ndóhó co ndíquiahva ndó mé ndó ndáhá Ndióxi ná cacomí a cíentá sahá ndó. Ta caja ndó ná ná a cíú candaqá ini ñayivi ndaja caja na ndiquiahva na mé ná

ndáhá Ndióxi. <sup>14</sup> Ndáhí nacuu ndó, na jánahá ley Moisés xihín ná fariseo jáchí co cíú ndó tó quiahva ndáhá ndó. Jáchí candaqá ndó vehe najihí cuáan ta tá nandihi cuahá ndivaha xícá tähví ndó nu Ndióxi jáchí cíni ndó jájahvi ndó nuú ná nuú caja ndó. Sahá ná cán quéa cachí i xihín ndó ná ndóhó cacaúu ndó ná ndoho chágā ini, caja Ndióxi.

<sup>15</sup> <sup>16</sup> Ndáhí nacuu ndó, na jánahá ley Moisés xihín ná fariseo jáchí co cíú ndó tó quiahva ndáhá ndó. Jáchí a juú quiahva xícá nuu ndó ndúcú ndó in tálqá ñayivi ná ná candicó na ná jánahá ndó. Ta tá sa nandajá ndó ná cuénta mé ndó já caja chágā ná cuachi jāndā cán a nu ná ndoho chágā ini ná indáy a juú ga mé ndó.

<sup>16</sup> Ndáhí nacuu ndó jáchí cíú ndó tátuhun ná cuáa ndáca inga ná cuáa. Jáchí jánahá ndó ñayivi ná tá sahan na tūhun na nuú inga ñayivi nani tává ná quíhvi veñuhu cahnu já quéa co ndúsá jaxínu coo na tūhun na. Joo cachí ndó ná tá tává ná quíhvi jiuhun cuáán ndácaqan veñuhu cahnu já quéa ndúsá jaxínu coo na tūhun na, já cachí ndó.

<sup>17</sup> Joo tóntó ndivaha ndó ta cíú ndó tátuhun na cuaá viti. Jáchí co candaqá ini ndó ná íin chágā sahá veñuhu cahnu a juú ga sahá jiuhun cuáán jáchí mé jiuhun cuáán cíú á cuénta Ndióxi sahá ná ndácaqan ini veñuhu cahnu ná cíú cuénta mé á. <sup>18</sup> Ta inga tucu ná jánahá ndó nuú ñayivi cíú ná yohó: Tá sahan in na tūhun na nuú ñayivi nani tává ná quíhvi nu ná Ndióxi já quéa co ndúsá jaxínu coo na tūhun na. Joo cachí ndó ná tává ñayivi quíhvi ná sájoco ná cánúu nu náa cán já quéa ndúsá jaxínu coo na tūhun na, já cachí ndó. <sup>19</sup> Joo tóntó ndivaha ndó ta cíú ndó tátuhun ná cuáa. Jáchí íin chágā sahá nu náa cán a juú ga sahá ná sájoco ná cánúu nu náa jáchí ná sájoco ná cánúu á cuénta Ndióxi sahá ná cánúu a nu náa cuénta mé á. <sup>20</sup> Sahá ná cán quéa ndá ná tává quíhvi nu náa já quéa tává ndihí ri na quíhvi tóco ndihí ná sájoco ná cánúu nu náa cán. <sup>21</sup> Ta ndá ná tává quíhvi veñuhu cahnu já quéa tává ri na quíhvi Ndióxi xihín quíhvi nu sácoo a sahndá a chuuun.

<sup>22</sup> <sup>23</sup> Ndáhí nacuu ndó, na jánahá ley Moisés xihín ná fariseo jáchí co cíú ndó tó quiahva ndáhá ndó. Mé ndó cavaaha ndó uxu tähndá ná jáquee ndó ñundáhýi ndó ta

sáhan ndó in táhndá ña nu Ndióxi. Já cája ndó anda yucu válí ña támí sáhan tátuhun menta xihín anís xihín comino. Joo co cája ndó ña ín chágá sahá ña sáhndá ley Moisés. Jáchí co cája ndó ña ndaa ta co cándahví ini ndó ñayivi ta co cándeé ini ndó Ndióxi tá quiahva sáhndá ley caja ndó. Mé a ndaa xíní ñúhú cája ndó tóco ndihí ña yóho joo a jándaco ndó ña jóco ndó nu Ndióxi in táhndá nuú uxu táhndá ña ñehe ndó.<sup>24</sup> Mé ndó cíuú ndó tátuhun na cuáa ndáca inga na cuáa. Jáchí ndinuhu ini ndó cája ndó ña coó cuahá sahá cuéntá ley Moisés joo sácuú xoo ndó ña ín chágá sahá nu Ndióxi caja ndó. Cíuú ndó tátuhun in dà ndihí ini da tavá da in ndicama loho ndácaan tásá dà ná a cócó dà ri. Joo co lhvi toho nu dá cocó dà in camello.

<sup>25</sup> Ndáhví nahá nacuu ndó, na jánahá ley Moisés xihín na fariseo jáchi co cíuú ndó tá quiahva ndáa ndó. Jáchí ndihí ini ndó caja ndó costumbre ña ndícata ndó jata vaso xihín jatá coho joo ña ñúhú ini a cán najá-taca cuíhná ndo sahá ña ndiává ndivaha ini ndó ña nuú. <sup>26</sup> Ndáhví nahá nacuu ndó, na fariseo jáchi cíuú ndó tátuhun na cuáa. Ña ndítahan caja ndó nu cuítí quéa ndaja vií ndó ínímá ndó já cacuu ndó tátuhun in vaso á in coho sa nandicata vaha na jáchí nandivíi ini a xihín jatá viti.

<sup>27</sup> Ndáhví nahá nacuu ndó, na jánahá ley Moisés xihín na fariseo jáchi co cíuú ndó tá quiahva ndáa ndó. Cíuú ndó tátuhun vehe válí ndítá camasanto nu táan na ndii. Ndató jándicuchu na jatá joo chí ini a a juú quiahva quini sáhan jáchí ndinuhu lásá ndii ñúhú ini a. <sup>28</sup> Quiahva já cíuú mé ndó jáchí ndáa ndó tátuhun ñayivi vaha ndivaha. Joo mé a ndaa co cíuú ndó tó quiahva ndáa ndó jáchí ndinuhu ña nuú ndácaan ínímá ndó.

<sup>29</sup> Ndáhví nahá nacuu ndó, na jánahá ley Moisés xihín na fariseo jáchi co cíuú ndó tá quiahva ndáa ndó. Cávaha ndó vehe válí ndítá camasanto nuú cañuhu lásá na násacuu profeta sanahá ta jácacutú ndó nuú nanduxu na nacaja ndaa. <sup>30</sup> Ta cachi ndo já: “Ta tá násanduu nde tiempo násanduu tásáhnu jíco yo sanahá ta chí a chíndeé toho nde na násahní profeta, na násanduu sanahá”, cachi ndo. <sup>31</sup> Ta xihín ña yóho náha táhyí a ña naquixi ndó chichi na násahní profeta sanahá. <sup>32</sup> Cuáhán ndo jaxínu coó

ndó mé cuachi nácasáhá cája tásáhnu jíco ndo sanahá.

<sup>33</sup> Mé ndó cíuú ndó tátuhun coo jáchi cája ndó tá quiahva cája coo. A cíuú caci ndaa ínímá ndó ta chí tandaa quivi cuhun ndó indayá nu ndoho ndivaha ini ndó. <sup>34</sup> Sahá ña cán quéa yehe chindahá i java profeta nu ndo xihín java na ndichí xihín java na jánahá tuhun Ndióxi nu ndo. Joo java na cahni ndó na ta java na cata caa ndó na ndica crúxu ta java na cani ndó na ini veñuhu ta java na taxí ndó na tá ñuu tá ñuu. <sup>35</sup> Ña cán quéa caca Ndióxi cuéntá nu ndó sahá tóco ndihí ñayivi ndaa, na násahní ndo sanahá. Caca mé á cuéntá sahá Abel, da násacuu da ndaa janda quiahva naxínu coo a nuú caca mé á cuéntá sahá Zácarías, da násacuu jahyi Berequías. Mé dà yóho násahní ndó ini veñuhu tañu nu náa xihín nuú yii ndivaha. <sup>36</sup> Mé a ndaa ná cahán i xihín ndo ña caca Ndióxi cuéntá sahá tóco ndihí jan nuú ñayivi ndúu tiempo viti.

Tá sácu Jesúus sahá ñayivi ndúu ñuu Jerusalén

(Lc. 13:34-35)

<sup>37</sup> Ndáhví nahá nacuu ndó, na ndúu ñuu Jerusalén. Jáchí sáhní ndó na profeta. Ta ndicuita ndó cání ndó na xihín yuu na náchindahá Ndióxi nu ndó. Cuahá ndivaha tañu cíni jándataca ndihí i ndohó joo coó náxeen ndó cuni johno ndó. Cíuú á tá quiahva cája nduxú tá játaca rí jahyi válí rí tixí ndixi rí. <sup>38</sup> Ta viti cuni johno ndó ña cahán i xihín ndo. Vaxi quivi tá janí ndáha mé vehe ndó candoo a. <sup>39</sup> Ta mé a ndaa ná cahán i xihín ndó ña a cúní ga ndó yehe janda quiahva ná xínu coo quivi cachi ndó: “Cáhnu nahá ná cacuu da vaxi cuéntá Ndióxi, xitohó i”, cachi ndó —nacachi Jesúus xihín na cán.

## 24

Cáxi tuhun Jesúus ña vaxi quivi ndihí sahá veñuhu cáhnu ndácaan ñuu Jerusalén  
(Mr. 13:1-2; Lc. 21:5-6)

<sup>1</sup> Ta tá sa náquee Jesúus veñuhu cáhnu Jerusalén cán cuahán já nacativi na xíca tuun xihín á nu á ta nácasáhá na cahán na xihín á ndá quiahva caca veñuhu cán. <sup>2</sup> Joo nanducú ñehe Jesúus tuhun nu ná já nacachi a já:

—Mé a ndaa ná cahán i xihín ndo ña janda ni in yuu yóho a cándoo jatá inga yuu jáchí vaxi quivi tá nditani ndihí ña yóho

—nacachi Jesús xihín na xíca tuun xihín á cán.

*Nä coo tá sa nacayati quíví ndihi saha ñuyíví*

(Mr. 13:3-23; Lc. 21:7-24; 17:22-24)

<sup>3</sup> Anda já naquee Jesús cuahán chí yúcú nu cáá yitó olivo xihín na xíca tuun xihín á. Ta nani ndíu na cán nacativi na xíca tuun xihín á nu íin coo a cán já nacasáhá ndáca tuhún xóo na a já nacachi na já xihín á:

—Cúní ndé ñä ná caxi tuhun ndó xihín ndé ndá ama coo tóco ndihi ñä yóho. Ta ndaja coo tá ná xínu coo quíví quixi tucu ndó ñuyíví yóho. Ta ndaja coo tá ná ndihi saha ñuyíví —nacachi na xihín Jesús.

*Já nacachi Jesús já:*

—Cuéntá coo ndó ná a jándahvi ni in na ndohó. <sup>5</sup> Jáchí cuahá ndiváha na quixi na cuéntá mí i ta cahán na ñä tuhún tá cachi na já xihín ndo: “Yehé cíú Cristo, dä nachindahá Ndióxi cacomí cuéntá sahá ñayivi”, cachi na. Ta xihín ñä yóho cuahá ndiváha ñayivi jándahvi na. <sup>6</sup> Ta jandá joho ñehe ndó tuhun ñä ndicuítá ñayivi cani táhan na yóho á cáá. Joo a cayihví toho ndó jáchí já ndítahan coo. Joo ñä yóho co cúní cachi a ñä naxínu coo quíví nu ndíhí. <sup>7</sup> Jáchí ñayivi ndíu in nación ndicuita na cani táhan na xihín na ndíu inga nación. Ta quixi tamá ta quixi cuehe ta ndaja táhan quixi a táan. <sup>8</sup> Ta ñä yóho cacuu a tondohó ñä casáhá jihna ñúhu växi nuú ñayivi jáchí cámáni xínu coo nuú ndoho chágá ini na.

<sup>9</sup> Anda já tiin na ndohó ta ndiquiahva na ndohó ndahá na co cúní ndohó já ná caja xíxi na xihín ndo. Ta cahní na ndohó ta tóco ndihi ñayivi ndíu ñuyíví candají na ndohó sahá yehe. <sup>10</sup> Ta mé tañu já cuahá ná jándacoo na ñä candee ini na yehé ta ndaja táhan mé ná candají táhan na ta ndaja mé ná jicó tühún táhan na. <sup>11</sup> Ta quixi cuahá ndiváha na tuhún ta cachi na cíú ná profeta cuéntá Ndióxi joo jándahvi na cuahá ndiváha ñayivi. <sup>12</sup> Ta sahá ñä ndicuahá ndiváha ñä níu ñuyíví yóho sahá ñä cán quéa jándacoo cuahá ñayivi ñä quíhví ini táhan na. <sup>13</sup> Joo ndá na ná candicó tuun íchi mí i janda ná xínu quíví quíví na, na cán cacuu na cacu ndaa íníma. <sup>14</sup> Ta níi cíú ñuyíví ndicuítá nuu tuhún väha cahán sahá yehe já ná candaan ini ñayivi ndá quiahva cacomí Ndióxi cuéntá sahá ná. Anda jáví ndihi sahá ñuyíví.

<sup>15</sup> *Na cahvi tutu ná candaan ini na ñä cahán. Sañahá nacayí profeta Daniel sahá in ñä quini ñä játiví ñahá. Tá ná cuni ndó ñä xínu coo ñä yóho nuú yíi cuéntá Ndióxi* <sup>16</sup> *já quéa ndá na ndíu estado Judea xíní ñúhu cunu na cuhun na chí yúcú.* <sup>17</sup> *Ta ndá na cándojó jini véhe, co ndítahan nuu na tavá na ndá ñaha vehe na.* <sup>18</sup> *Ta ndá na ndíu yúcú, ná a ndicó coo na vehe na ndiquehe na jáhma ná.* <sup>19</sup> *Ndáhví nacuu najihí, na ñúhu jahyi mé quíví já.* Ta ndáhví nacuu najihí na néhe ndaa na valí táhan ñä chichí yíi. <sup>20</sup> *Caca tähví ndo nu Ndióxi ñä ná a cacute a tiempo vixi tá ná cunu ndó cuhun ndo.* Ta caca tähví ndo nu á ñä ná a cacute a quíví ndiquehe ndéen ná. <sup>21</sup> *Jáchí quíví ndoho ndiváha ini ñayivi cacuu a cán.* Jáchí janda tá nacaya sahá saha ñuyíví coo nandoho ini na tá quiahva ndoho ini na mé quíví já. Ta tá ná yaha ña jan, a ndicó coo ga ñä ndoho ini na quiahva já. <sup>22</sup> *Ta tá ná a ndája cuítí Ndióxi tiempo cán ni in ñayivi a cíú cacu ndaa.* Joo sahá na sa nacaxi mé a sahá na cán ndaja cuítí mé a tiempo cán.

<sup>23</sup> *Ta tá ná cachi in na xihín ndo: “Candehé ndo. Yóho íin Cristo, dä nachindahá Ndióxi cacomí a cuéntá sahá ñayivi.”* Á tá ná cachi na: “Candehé ndo. Cáá íin da”, cachi na, já quéa a cándusa toho ndó na.

<sup>24</sup> *Jáchí quixi cuahá na jándahvi ndohó ta ndaja na mé ná tátuhun Cristo.* Joo a juú Cristo cíú ná. Ta quixi cuahá ná ta cachi na cahán na cuéntá Ndióxi ta jári caja na cuahá ndiváha ñä náhu xihín ñä xítuhún ñä na jándahvi na ñayivi. Ta janda na sa nacaxi Ndióxi jándahvi na tá ná cuu caja na ñä. <sup>25</sup> *Candehé ndo jáchí sa nacaxi tuhun yachí ndihi i ñä yóho xihín ndo.* <sup>26</sup> *Ñä cán quéa tá ná cachi na xihín ndo:* “Candehé ndo. Yucú íchí cáá íin Cristo.” Já quéa a cíuhun ndó jan. Á tá ná cachi na xihín ndo: “Candehé ndo. Iní vehe yóho ndácaan da cíú Cristo.” A cándusa ndó na. <sup>27</sup> *Jáchí tá quiahva yéhe tásá quéta xoo nu cáná cándii ta xójo cava indíví quiahva já queta yehé, dä nachindahá Ndióxi nduu ñayivi.* <sup>28</sup> *Mé nu canduhú yíquí cíuhun ndíi cán cacuu nuú ndicutú tiyocó canduu rí.*

*Ndá quiahva coo tá ná quixi tucu Jesucristo*  
(Mr. 13:24-37; Lc. 21:25-33; 17:26-30, 34-36)

<sup>29</sup> *Ta ivi lajá tá jaçá nayahá quíví ndoho nahá ini na cán já canaá nuú candii ta ni a ndíyehé ga yoo ta janda indíví quee*

quiimi cuyu rí nu ñuhu ta janda indiví ña nacavaha Ndióxi ndiquiji nuu.<sup>30</sup> Anda já ndaca náhá ña xitúhún indiví já candaqá ini ñayivi ña vaxi yehe, dä nachindahá Ndióxi nduu ñayivi. Ta ndaja táhan ñayivi ndúu níi cùu sahá ñuyiví ndahyí cóhó na ta já cuni na yehe quixi i tañu víco indiví xihín tóco ndihí ndeé e ta cuni na ndá quiavha cahnu cùu yehe.<sup>31</sup> Ta já chindahá i tátó mí i ña ná tíví cóhó na trompeta já ná ndítaca tóco ndihí na nacaxi i tañu tóco ndihí ñuu janda níi cùu sahá ñuyiví ta janda níi cùu sahá indiví.

<sup>32</sup> Jácuaha ndó ña cùni catchi mé quiavha sácú u nu ndó sahá yito titó ñuhú. Jáchi tá yútä ndáhá dó cán ta já vaxi númá válí do já candaqá ini ndó ña sa nacayati tiempo ihní.<sup>33</sup> Quiavha já cuu candaqá ini ndó ña tá ná cuni ndó ña sa cùu tóco ndihí ña nacachi i xihín ndo yóho já cuu candaqá caxí ini ndó ña sa nacayati tiempo quixi tucu yehe ñuyiví yóho.<sup>34</sup> Mé a ndaqá ná cahán i xihín ndo ña yaha tóco ndihí ña yóho ta anda jáví quivi na ndúu tiempo viti.<sup>35</sup> Ta ndihí sahá indiví xihín ñuyiví joo a ndihí toho sahá tuhun nacahan i xihín ndo yóho jáchi coo tá coo tá quiavha nacachi i yóho.

<sup>36</sup> Joo ni en túhún toho ñayivi co xíni na ndá quivi á ndá hora yaha ña yóho. Ni mé tátó Ndióxi ndúu indiví co xíni na ndá quivi coo ña yóho. Ta ni yehe, da cùu in túhún jini já jahyi Ndióxi co xíni ndá quivi coo ña yóho. In túhún Ndióxi, tátá i quéa xíni a.<sup>37</sup> Tá quiavha nayaha tiempo tá nasahiin Noé sanahá quiavha já yaha ri tá ná tandaas quivi quixi tucu yehe, dä nachindahá Ndióxi nduu ñayivi.<sup>38</sup> Jáchi mé tiempo cán tá cámání cuun javí quíni cán já caxixi ñayivi ta caxíhi na ta tándahá ná ndúu na janda quiavha naquihvi Noé ini barco cahnu cán.<sup>39</sup> Ta coó naquehe na cuénta janda quiavha naxinu coo javí quíni cán ta najánaá dó sahá ndihí na. Quiavha já a quéne na cuénta sahá ndá quivi quixi yehe, dä nachindahá Ndióxi nduu ñayivi.<sup>40</sup> Mé tiempo já canduu ivi dàtaa xútu da ta in da ndindita cuyhun xihín i ta inga da cando va.<sup>41</sup> Ta canduu ivi najihí ndíco na ta in ña ndindita cuyhun xihín i ta inga ña cando va.

<sup>42</sup> Xíni ñuhu coo tiavha vaha ndó jáchi co xíni ndó ndá quivi quixi tucu xitoho ndó.<sup>43</sup> Xíni ñuhu candaqá vaha ini ndó ña tá xíni

in dàtaa ndá hora cùni quiavha taa cuighná vehe da já quéa a cíjü toho da jáchi candaava ha da vehe da já ná a quihvi da cuighná vehe da.<sup>44</sup> Sahá ña cán quéa ndítahan canduu tiavha ri ndóhó va. Jáchi xinu coo yehe, dä nachindahá Ndióxi nduu ñayivi mé hora tá co cahán ndo xinu coo i nu ndo.

Dä caja chíun vaha ta dä co caja chíun vaha

(Lc. 12:41-48)

<sup>45</sup> Mé ndó ndítahan nu ndó cacuu ndó tátuhun in dä ndíchí jini, dä caja chíun vaha nyú xitoho da. Ta najándacoo xitoho da chuun ndáhá dä ña ná quiavha da cuxu na java ga cùu mozo xihín dä cán. Anda já naquee xitoho da cuahan da.<sup>46</sup> Táhví nacuu mé mozo cán tá xinu coo xitoho da ta ndítahan dä caja chuun yií va da ña nacandoo nu dä caja da.<sup>47</sup> Mé a ndaqá ná cahán i xihín ndo ña quiavha xitoho da cán chuun nu dä ña ná cacomí da cuénta sahá tóco ndihí ñaha cómí xitoho da.<sup>48</sup> Joo tá cásahá dä caja núa da ta cahán dä ña cayáncá ndivaha xitoho da ndicó coo da.<sup>49</sup> Ta sahá ña cán quéa cásahá dä caja xíxi da xihín java ga na cùu mozo xihín dá. Ta já cása ga da cásahá xíxi da ta xíhi da ta já xíni da.<sup>50</sup> Ta ndaja coo xinu coo xitoho mozo cán mé quivi coo cahán dä ña xinu coo da.<sup>51</sup> Anda jáví jándoho quini xitoho dä cán ini da jáchi coo cùu dä tá quiavha cása da. Ta ndítahan ndoho da tá quiavha ndoho tóco ndihí na caja já mé nyú cuacu ndivaha na janda quiavha cahñá nuhú ná —nacachi Jesús.

## 25

Sácu Jesús quiavha sahá ña nacaja uxu najihí, na tacú

<sup>1</sup> Já cachi tucu Jesús já:

—Tá ná xinu coo quivi cacomí Ndióxi cuénta sahá ñayivi já cacuu a tá quiavha nayaha xihín uxu najihí, na tacú tá nasahe na víco tándahá. Tá naquehe na candil ña ñuhu sití ini já cuahan na ndique táhan na xihín dä tándahá cán.<sup>2</sup> Uhun táhan na tacú cán cùu ná na tacú ini ta uhun na cán cùu ná na co tacú toho ini.<sup>3</sup> Ndíhuun na co tacú ini cán natiin na candil ñahá na cuahan na jocó naquehe chágá na sití ña jácutú tucu na candil tá sa cùni ndahvá ña.<sup>4</sup> Joo na tacú ini cán ñehe na candil ñahá na ta ñehe ri na yuyú sití cuahan na ña jácutú na candil tá sa cùni ndahvá ña.<sup>5</sup> Ta ndaja coo

nacasáhá cayáncá mé da tándahá cán sahá ña cán quéa nanaá ini ndihi na ta naquiji va na. <sup>6</sup>Joo tá nacuu yati java ñuu já tacu cayuhú java na já cachí na já: “Candehé ndo. Sa vaxi da tándahá. Cuáhán queta ndó ndiquehe ndó dä”, cachí na cayuhú na cán. <sup>7</sup>Já nandacoo tóco ndihi na tacu cán ta nacasáhá na cája ndívì na candil ñaha na. <sup>8</sup>Anda já nacasáhá ndíhuhun na co tacu ini cán cáhan na xihín ndíhuhun na tacu ini cán já cachí na já xihín ná: “Caja ndó ñamani quiahva loho ndó sítí ndó nuú nde jáchí sa nandihi sítí nde ta jalóho cumi ndahvá candil ñaha nde”, cachí na co tacu ini cán. <sup>9</sup>Já nanducú ñehe ndíhuhun na tacu ini cán tuhun nu ná já cachí na já: “A cíu toho caja nde quiahva nde sítí nu ndó jáchí tiahva náá ndimani dó nu mé nde. Vaha chágá cuáhán mé ndó nu cayahvi dó cueen ndó do”, nacachi na tacu ini cán xihín ná. Já naquee na co tacu toho ini cán cuahan na. <sup>10</sup>Joo nami naquee ndíhuhun na co tacu ini cán cuahan na cueen na sítí na já naxinu da tándahá cán ta nandihvi ndíhuhun najihí tacu ini cán ini vehe nu íin vicó tándahá cán ta nandaji yéhé. <sup>11</sup>Tá nandihi já nandai cuu ndíhuhun na nasaħan naxeen sítí cán já catí ndáhá ná yéhé ta cayuhú na já cachí na já: “Cuná loho ndó yéhé nuú nde, xitoho”, cachí na cayuhú na ndítia na jata véhe. <sup>12</sup>Anda já nanducú ñehe da tándahá cán tuhun nu ná já cachí da já xihín ná: “Co xíni toho i yo cíu ndóhó”, nacachi da cán xihín ná —nacachi Jesús.

<sup>13</sup>Já nacachi tucu Jesús já:

—Sahá ña cán quéa xímí ñúhu cuénta vaha coo ri ndóhó va jáchí co xímí ndó ndá hora xínu coo quíví cacomí Ndióxi cuénta saha ndó —cachí Jesús.

Ña nacaja in taa xihín jíuhún da  
(Lc. 19:11-27)

<sup>14</sup>Ta já cachí tucu Jesús já:

—Tá ná xínu coo quíví cacomí Ndióxi cuénta sahá ñayivi já cacuu a tátuhun ña nayaħa xihín in dataa. Tá naxinu coo quíví quee da cuħħun xicá da já nacana da java da caja chūun xihín dä. Ta já nandiquiahva da jíuhún da ndahá da cán ña canda da ña.

<sup>15</sup>Ta tá quiahva tiahva in da cañehe da jíuhún quiahva já nasaħan xitoho da nu dä. In táhan da cán nasaħan xitoho da ûħun mil nu dä ña ná canda da ña. Ta inga da cán nañehé ivi mil. Ta inga da cán nañehé in

mil. Anda já naquee xitoho da cuahán xícá da. <sup>16</sup>Ta ndaja coo da nandiquiahva xitoho ûħun mil ndahá cán nacaja da ndahvì xihín jíuhún xitoho da ta já nañehé dá inga ûħun mil chágħa jatá. <sup>17</sup>Ta jári da nasaħan xitoho ivi mil nu cán nacaja da ndahvì xihín jíuhún cán ta nañehé dá inga ivi mil jatá. <sup>18</sup>Joo da nasaħan xitoho in mil nu cán natiin da jíuhún xitoho da ta já nasaħan da nacaan da in yáví ta já najánduxu da ña.

<sup>19</sup>Ta tá sa nayaħa cuahá tiempo já nandicó coo xitoho mozo cán. Ta já nacasáhá cája víi da cuénta xihín da cán.

<sup>20</sup>Ta já naxinu da nañehé ûħun mil cán nuú xitoho da ta já nandiquiahva da inga ûħun mil ña nañehé dá jatá jíuhún cán nuú xitoho da. Ta já cachí da já xihín xitoho da: “Candehé ndó ûħun mil nasaħan ndó nuú i. Joo yóho íin inga ûħun mil nañehé e jatá”, nacachi da xihín xitoho da. <sup>21</sup>Anda já nacachi xitoho da já xihín dä: “Vaha ndivaha nacajún. Mozo vaha ndivaha cúu yóħó jáchí chà va nasaħan i nuun ta vaha nacaja chūun ña. Sahá ña cán quéa caja i ña ná cacomún cuénta sahá chágħa ñaha. Ta viti cuu coún xihín i ta já ná cajii chágħa inún”, nacachi xitoho da. <sup>22</sup>Tá nandihi já naxinu coo ri da nandiquehe ivi mil cán nuú xitoho da. Já nacachi da já xihín xitoho da: “Ivi mil nasaħan ndó nuú i joo yóho íin inga ivi mil nañehé e jatá”, nacachi da xihín xitoho da. <sup>23</sup>Anda já nacachi xitoho da já xihín dä: “Vaha ndivaha nacajún. Mozo vaha cúu yóħó jáchí chà va nasaħan i nuun ta nacaja chūun vahún ña. Sahá ña cán quéa caja i ña ná cacomún cuénta sahá cuahá chágħa ñaha. Ta viti cuu coún xihín i ta já ná cajii chágħa inún”, nacachi xitoho da. <sup>24</sup>Joo tá naxinu coo ri da nañehé in mil ndahá xitoho cán já nacasáhá cachí da já xihín xitoho da: “Candehé ndó, xitoho i. Sa cándaa vaha ini i ña cúu ndó in taa ndacú ndivaha tuhun. Ta vatí co xútū ndó nuú in ñúhu joo jáquee tá jáquee ndó nu á. Ta játaca ndó ña nuú coo naxutu ndó ña.

<sup>25</sup>Sahá ña cán quéa nayihví vi ta nasaħan i najánduxu u jíuhún nasaħan ndó nuú i tixi ñúhu. Joo yóho íin jíuhún ndó ndiquehe ndó ña”, nacachi da cán xihín xitoho da.

<sup>26</sup>Anda já nacachi xitoho da já xihín dä: “Co cíu in mozo vaha nuú i. Cúun da júsá ndivaha. Sa cándaa vaha inún ña jáquee e nu ñúhu ña co xútū u, <sup>27</sup> ña cán quéa

ndá cuéntá quéa coó násahan tóún jíuhún i banco já ná ndiquehe e jíquí á nuú na cán tá ná ndicó coo i, nduu”, nacachi xitoho da cán xíhín dá. <sup>28</sup> Anda já nacachi da xíhín java na ndúu cán: “Candaa ndó in mil jan ndahá da jan ta quiahva ndó ña nuú da sa cómí uxu mil jan. <sup>29</sup> Jáchí da cája chúun vaha ñehe chágá ví da ñaha já quéa ná coo cuahá chágá nu dá. Joo da co cája chúun vaha janda ña chá cómí da ndindáa ndáha dá. <sup>30</sup> Ta mozo a váha toho jan tin ndó da jácana ndó da nuú naá jata véhe jan. Cán cíuú nu ndáhyí ndáá ñayivi janda quiahva cahñá nuú ná sahá ña ndóho ndivaha ini na”, nacachi xitoho da, —nacachi Jesús.

Tá ná cavií sahá ñayivi nu Ndióxi

<sup>31</sup> Já nacachi tucu Jesús já:

—Tá ná xinu quíví quixi yehe, da nachindahá Ndióxi nduu ñayivi ta quixi i xíhín tócó ndihí na cíuú tátó Ndióxi. Anda já cacoo i nu sácoo na sáhndá chuun ta já ndicáhnu ndivaha i. <sup>32</sup> Ta nditaca ñayivi ndúu ndíjáá ñuyíví nuú i. Ta já casahá i ndicahnda java táhan i ná tá quiahva cája in da ndáá ndicachi tá sáhndá java da ndicachi xíhín tijúhu ña ná a cáva táhan rí. <sup>33</sup> Ta já chinduu u ñayivi cuéntá mí i, na cíuú tátuhun ndicachi cán xoo cuáha i. Ta xoo íti i chinduu u na co cíuú cuéntá mí i, na cíuú tátuhun tijúhu cán. <sup>34</sup> Ta sahá ña cíuú u da cómí cuéntá sahá ñayivi sahá ña cán quéa cachi i já xíhín na ndúu xoo cuáha i cán já: “Cuáyaha ndó ná cacomí Ndióxi, tátá i cuéntá sahá ndo jáchí cíuú ndó na nacaja cuahá mé á ñamáni xíhín. Jáchí janda tá cámáni cava sahá sahá ñuyíví sa násacu tiahva mé á nuú canduu ndó ña cacomí a cuéntá sahá ndo. <sup>35</sup> Jáchí násahan ndó naxixi i tá nacuico i. Ta násahan ndó ticuú nuú i tá nähichi ini i. Ta nandíquehe vaha ndó yehe tá násacuu u da tóho naxixi i nu ndo. <sup>36</sup> Ta násasá ndo jähma nuú i tá co ñéhé e ña cándixi i. Ta tá nasaquíhvi já nachindéé ndó yehe. Ta tá násandacáan i vecaa já náxitó nihni ndó yehe.” <sup>37</sup> Anda já ndacá tuhún java na nacaja vaha ta já cachi na já xíhín i: “Ndá tañu quéa naxini nde ña cuíco ndó, xitoho nde ta já násahan nde ña xíxi ndó. Ta ndá tañu naxini nde ña íchi ndó ticuú i ta já násahan nde ticuú nu ndo. <sup>38</sup> Ta ndá tañu násacuu ndó da tóho ta nandíquehe vaha nde ndohó. Ta ndá tañu naxini nde ña cámáni jähma candixi ndó ta

najasá nde ña nu ndo. <sup>39</sup> Ta ndá tañu quéa naxini nde ña quíhvi ndó ta nachindéé nde ndohó. Ta ndá tañu násandacáan ndó vecaa ta náxitó nihni nde ndohó.” <sup>40</sup> Anda já cachi yehe, da cómí cuéntá sahá ñayivi já xíhín ná: “Mé a ndaa ná cahan i xíhín ndó ña tá nacaja ndó a xíhín na cíuú cuéntá mí i, na coó sahá nuú ñayivi ñuyíví já cíuú á tátuhun nacaja ndó a xíhín mí i”, cachi i xíhín na ndúu xoo cuáha i.

<sup>41</sup> Anda já casahá cachi i já xíhín na ndúu xoo íti i cán já: “Caxoo ndó nuú i jáchi cíuú ndó na nacataví cháhan ta cuhún ndó indayá cañuhu ndó anda ama cúa quivi. Jáchí ña jan cíuú ña násacu tiahva Ndióxi ndacáan tiñáhá sacuáha xíhín tátó mé rí.

<sup>42</sup> Jáchí coó násahan ndó ña xíxi i tá nacuico i ta ni coó násahan ndó ticuú nuú i coho i tá nähichi ini i. <sup>43</sup> Da tóho cíuú u naxixi coo i tañu ndó ta coó nandíquehe vaha ndó yehe. Ta nandímani i ña candixi i ta coó násahan ndó in jähma loho nuú i. Nasaquíhvi ta násandacáan i vecaa ta coó náxitó nihni ndó yehe”, cachi i xíhín na ndúu xoo íti i cán. <sup>44</sup> Anda já nducú ñehe ri na cán tuhún nuú i já cachi na já xíhín i: “Ndá tañu quéa naxini nde ña íchi ini ndó ticuú ta ndá tañu quéa naxini nde ña íchi ini ndó ticuú ta ndá tañu násacuu ndó da tóho ta ndá tañu nandímani jähma ndó ta ndá tañu násajíin quíhvi ndó ta ndá tañu násandacáan ndó vecaa ta coó nachindéé nde ndohó”, cachi na ndúu xoo íti i cán xíhín i. <sup>45</sup> Anda já cachi i já xíhín na co cíuú cuéntá mí i já: “Mé a ndaa ná cahan i xíhín ndó ña tá ta coó nacaja ndó xíhín ñani táhan ndó, na coó sahá nuú ñayivi ñuyíví já quéa coó nacaja ndó ña xíhín yehe”, cachi i xíhín na co cíuú cuéntá mí i. <sup>46</sup> Ta já yaha ndihí na cán cuhún na indayá anda ama cúa quivi. Ta na nacaja vaha cán yaha na nu Ndióxi catacu na anda ama cúa quivi —cáchí Jesús.

## 26

Ndítúhún jehé na tiin na Jesús

(Mr. 14:1-2; Lc. 22:1-2; Jn. 11:45-53)

<sup>1</sup> Tá nandíhi nacahán Jesús tóco ndihí ña yóho xíhín ñayivi cán já nacachi a xíhín na xíca tuun xíhín á cán já:

<sup>2</sup> —Sa cándaa ini ndó ña tixi iyí quíví coo vicó pascua ta já ndiquiahva na yehe, da nachindahá Ndióxi nduu ñayivi ndahá na cata caa yehe ndica crúxu —nacachi Jesús xíhín na xíca tuun xíhín á cán.

<sup>3</sup> Anda já na sacuahá nuú jutu xihín na jáñahá ley Moisés xihín na sacuahá veñuhu nandique táhan na yéhé Caifás, dä cúú sacuahá chágá nu ndíhi jutu cán. <sup>4</sup> Ta najándique táhan tühun na ndá quiáhva caja na tiin jehé na Jesús ña ná cahní ñahá na. <sup>5</sup> Já cachí xihín táhan na já:

—Joo a tíin toho í dä tañu mé víco jáchí tiahva náá ndivaa ñayivi —nacachi na.

Tá nachojo in ñáñahá perfume jini Jesús  
(Mr. 14:3-9; Jn. 12:1-8)

<sup>6</sup> Ta ndaja coo fin Jesús ñuu Betania vehe Simón, dä cähán na xihín: taa nandoho cuehe tâhyi. <sup>7</sup> Já naxinu in ñáñahá nu á ta cáñee in yúyú ña alabastro ndáhá ña. Ta ini mé yúyú cán ñúhu perfume, dô yahvi ndivaha. Ta já naxinu ña najácuyu ña do jini Jesús nani fin coo a nu mesa cán. <sup>8</sup> Tá naxini na xíca tuun xihín Jesús cán ña yóho já nácasáhá na xójo ini na já cachí na já:

—Ndá cuéntá quéa tíví uun perfume yahvi ndivaha yóho. <sup>9</sup> Jáchí cuu jicó yó do ta já quehé cuahá jiuhún sahá do, nduu ta já cuu jasá yo jiuhún cán nuú na ndahví —nacachi na cán.

<sup>10</sup> Ta nacandaqá ini Jesús ña cähvi ini na cán ña cán quéa nácasáhá cachí a já xihín na:

—Ndá cuéntá quéa cähya cuehe ndó xihín ñáñahá jan jáchí ña vaha quéa nacaja ña yóho xihín i. <sup>11</sup> Jáchí na ndahví níi tiempo canduu na tañu ndó joo yéhé a cóo tuun toho i xihín ndo. <sup>12</sup> Jáchí tá najácuyu ña perfume yiquí cuñu i já nacaja tiahva ña yéhe ná coo tiahva vi tá ná casaa quíyí nduxu. <sup>13</sup> Mé a ndaa ná cähán i xihín ndo ña níi cúú ñuyíví nuú caca nuu ñayivi cähyan na tühun vaha sahá i ndicani na ña nacaja ña yóho xihín i já ndicuhun ini na sahá ña —nacachi a.

Jicó tühún Judas Jesús  
(Mr. 14:10-11; Lc. 22:3-6)

<sup>14</sup> Ta ndaja coo in táhan dä uxu ivi xíca tuun xihín Jesús, dä naní Judas Iscariote nasahan da cähán da xihín na sacuahá nuú jutu. <sup>15</sup> Ta já cachí dä já xihín na:

—Ndaja quiáhva ndó nuú i tá ná ndiquiahva i Jesús nu ndo —nacachi Judas xihín na sacuahá nuú jutu cán.

Anda já náshahan na oco uxu jiuhun cíxú nu dä sahá Jesús. <sup>16</sup> Ta sa mé nani já nácasáhá Judas ndúcú dä ndaja cuu caja da ndiquiahva da Jesús ndahá ná.

Tá naxijíni ndayí Jesús xihín na xíca tuun xihín á

(Mr. 14:12-25; Lc. 22:7-23; Jn. 13:21-30; 1 Co. 11:23-26)

<sup>17</sup> Mé quíyí nuú víco xíxi na pan, ña co quée yusá naxaa xihín cán já naxinu na xíca tuun xihín Jesús cán nu á. Já nacachi na já xihín á:

—Ndáchí cúni ndó cuhun nde caja ndíví nde cajíni ndó vicó pascua —nacachi na xihín á.

<sup>18</sup> Anda já nacachi Jesús já xihín na:

—Cuáhán ndó ñuu jan ta jan cuni ndó in dätaa ta já cachí ndó já xihín dá: “Dä jáñahá ndehe cachí xuhun: Cuhun i vehe ndó cajíni i vicó pascua xihín na xíca tuun xihín i jáchí sa nandindaa tiempo cuhun i viti” —nacachi Jesús.

<sup>19</sup> Já naquee ná cán náshahan na nacaja na tá fin náshahnda Jesús nu ná ta cán nacaja ndíví na ña cajíni na vicó pascua.

<sup>20</sup> Ta ndaja coo tá nacuaá já náshaco Jesús nu mesa xihín ndíhuxu ivi na xíca tuun xihín a cán. <sup>21</sup> Ta nani xijíni na já nácasáhá cachí a já:

—Mé a ndaa ná cähán i xihín ndó ña in táhan ndó, ná xíca tuun xihín i cacuu da jicó tühun yéhé —nacachi Jesús xihín na.

<sup>22</sup> Anda já nácasáhá na cán cähya ndivaha ini na já nácasáhá tá in tá in na ndáca tühun na Jesús já cachí na já xihín á:

—Á yéhé cacuu da jicó tühun ndo, xitoho i —cachí na ndáca tühun ñahá na.

<sup>23</sup> Anda já nanducú ñehe Jesús tühun nu ná já nacachi a já xihín na:

—Dä naquihvi ndahá ini coho xíxi i, dä cán cúú dä jicó tühun yéhé. <sup>24</sup> Yéhé cúú dä náshindahá Ndióxi nduu ñayivi ta ndítahan nuú i quivi i tá fin cachí tühun Ndióxi. Joo ndahví ñahá nacuu da jicó tühun yéhé. Jända vaha chágá ná a cácu da, nduu —nacachi Jesús.

<sup>25</sup> Anda já nándicahán Judas, mé dä jicó tühun ñahá cán já nacachi da já xihín Jesús:

—Xitoho i, a yéhé cúú dä jicó tühun ndo —nacachi dä xihín á.

—Jivi mún cúú dä —nacachi Jesús xihín dá.

<sup>26</sup> Ta nani xíxi na ndíu na nátiin Jesús pan já nándiquiahva ndixahvi nu Ndióxi. Tá nandihí já náshahnda java ña ta nándicahnda ña nuú na xíca tuun xihín a cán. Ta já nacachi a já xihín na:

—Júhun ndó jáchi ña yóho cíuú tátuhun yíquí cuñu i —nacachi a.

<sup>27</sup> Tá nändihi já natiin a in vaso nu ñúhu tó uva já nändiquiahva ndixáhvi nu Ndióxi já nacachi a já xihín na xíca tuun xihín á cán já:

—Coho ndihi ndó dó ñúhu ini vaso yóho.  
<sup>28</sup> Jáchí dó yóho cíuú dó tátuhun nií i, dó cuíta sahá cuahá ñayivi já ná ndoo cuachi na. Tá ná cuíta nií i já candaqá ini ndó ña najáxínu coo Ndióxi tuhun a nasahan sanahá.  
<sup>29</sup> Mé a ndaaq ná cahan i xihín ndo ña a cohó ga i tó uva janda quiáhva ná xínu coo quíví coho tucu u inga dó vaha chágá xihín ndo tó ná xínu quíví cacomí Ndióxi, tátá i cuéntá sahá ñayivi —nacachi a.

Cáxi tuhun Jesús ña chijehé tuhun Pedro ña xíni dä me á  
 (Mr. 14:26-31; Lc. 22:31-34; Jn. 13:36-38)

<sup>30</sup> Ta tá nändihi naxita na in canto já naquee na cuahán na yúcu yító olivo.  
<sup>31</sup> Ta já nacachi Jesús já xihín ná:

—Mé ñuu viti jándacoo ndihi ndó yehe cuhun ndó sahá ña ndoho i. Já cachí tuhun Ndióxi já: “Cahní i da ndáá ndicachi ta xihín ña yóho ndicuita nuu ndicachi jana dá cuhun ri”, cachí tuhun Ndióxi.  
<sup>32</sup> Joo tá sa ná nditacu tucu u já cuhun jihna ñúhu yehe estado Galilea andá já cuhun mé ndó —nacachi Jesús.

<sup>33</sup> Andá já nanducú ñehe Pedro tuhun nu á já nacachi da já xihín á:

—Vatí ná jándacoo tóco ndihi na mé ndó sahá ña ndoho ndó joo a jándacoo toho i ndohó —nacachi da xihín á.

<sup>34</sup> Andá já nacachi Jesús já xihín dá:

—Mé a ndaa ná cahan i xuhun ña mé ñuu viti tá camáni cana chéle já chijehé tuhun ña xínu yehé uní tálndá —nacachi Jesús xihín dá.

<sup>35</sup> Andá já nacachi tucu da já:

—Vatí ná quivi i xihín ndo joo a chijehé tuhun toho i sahá ña xíni i mé ndó —nacachi da xihín Jesús.

Ta quiahva já nacachi tóco ndihi java ga na xíca tuun xihín á cán.

Tá xíca tahlví Jesús nu Ndióxi in nuú nani a Getsemaní

(Mr. 14:32-42; Lc. 22:39-46)

<sup>36</sup> Andá já naxínu coo Jesús xihín na xíca tuun xihín á cán in nuú nani a Getsemaní. Já nacachi a já xihín ná:

—Yóho cacoo ndó nani ná cuhun i cáca caca tahlví i nu Ndióxi —cachí a.

<sup>37</sup> Ta ndáca Pedro xihín ndívi da cíuú jahyi Zebedeo cuahán xihín á. Ta já nacásáhá cácuéha ndiváha ini a ta a juú quiáhva tahlví ini a.  
<sup>38</sup> Andá já nacachi a já:

—A juú quiáhva cácuéha ini i chí quivi i cíuú ini i. Yóho candati tóo ndó yehe ta coto a cíuú ndo —nacachi Jesús.

<sup>39</sup> Ta já naquee mé á nasahan loho chágá chí nuu já nacaxítí a janda quiáhva naxínu taan nu ñúhu. Ta já cachí a já:

—Tátá Ndióxi, tá tå ná cuu caja ndó ñamani ña ná a ndoho i ña ihví ndiváha vaxi nuú i ndoho i. Joo ná coo tá íin cúní mé ndó ta ná a coó toho ña cúní yehe —cachí Jesús.

<sup>40</sup> Tá nändihi já nändicó coo a nuú najándacoo a na xíca tuun xihín á cán ta já nändiñéhe á na quíji na ndúu na. Andá já nacachi a já xihín Pedro:

—Á coó nacuu candita ndó ni in hora.  
<sup>41</sup> Xíni ñúhu coo tiáhva ndó ta caca tahlví ndo nu Ndióxi já ná a coto ndojó rí quini ndohó. Jáchí inímá ñayivi cúní a ndinducú a Ndióxi joo yíquí cuñu na co íin tiáhva caja ña cúní Ndióxi —nacachi Jesús.

<sup>42</sup> Andá já naquee tucu Jesús tálndá ivi cuahán tucu a caca tahlví a nu Ndióxi já cachí a já:

—Tátá Ndióxi, tá tå a cíuú va caja ndó ñamani ná a ndoho ini i ña jan já ná coo tá íin cúní mé ndó coo —cachí a.

<sup>43</sup> Tá nändihi já nändicó coo tucu a nu ndúu na xíca tuun xihín á cán ta nändiñéhe á na quíji tucu na ndúu na jáchi naquehe a mahñu ña.  
<sup>44</sup> Já naquee tucu a nasahan xíca tahlví a nu Ndióxi tálndá uní ta sa mé tuhun cán nacahán tucu a.  
<sup>45</sup> Andá já naquixi tucu a nu ndúu na xíca tuun xihín á cán já nacachi a já xihín ná:

—Vatí cúní ndó cuju ndó ta vatí cúní ndó ndiquehe ndée ndó joo a cíuú caja ndó ña viti. Jáchí sa naxínu coo hora ndiquiahva na yehe, dä nacchindahá Ndióxi ndúu ñayivi ndahá ñayivi cája cuachi.  
<sup>46</sup> Cuáhán ndacoo ndó ná cohó. Jáchí sa vaxi dä jicó tálndá yehe —cachí a.

Tá ngtiin na Jesús

(Mr. 14:43-50; Lc. 22:47-53; Jn. 18:2-11)

<sup>47</sup> Ta nani cáhán yíi va Jesús já naxínu Judas, dä cuú in tálhan uxu ivi na xíca tuun xihín á cán. Ta ndáca da cuahán ñayivi, ñéhe na machítí xihín yító viti. Ta ná cán cíuú

ná na naquixi cuéntá na sacuahá nuú jutu xihín cuéntá na sacuahá veñihu.<sup>48</sup> Ta mé Judas, dä ndiquiahva ñahá cán sa nacandoo da xihín na cán ña tatí yúhu dá sajóho Jesús jáchí nacachi da já xihín ná:

—Ndá dä ná tatí yuhú u sajóho, dä cán cuú dái tiin ndó—nacachi da.

<sup>49</sup> Chí ivi laá nacativi da nu Jesús já nacahan Ndióxi dá xihín á ta já nacatí yúhu dá sajóho mé á.<sup>50</sup> Anda já nacachi Jesús já xihín dái:

—Cama chá cajún ña, amigo.

Anda já nacayati na nu Jesús ta natiin tuun na a.

<sup>51</sup> Joo in táhan da xica tuun xihín Jesús cán, natavá dä machítí da ta já nachitúhun dä in joho dä cíu mozo nuú dä sacuahá chágá nu ndíhi jutu cán.<sup>52</sup> Anda já nacachi Jesús já xihín dái:

—Chicáan vaha machítí jan jáchí ndá na sáhní xihín machítí, xihín machítí quivi ri na cán va.<sup>53</sup> Á co cándaa inúñ ña cuu caca tħví i nu Ndióxi, tħtā i ña ná chindahá mé á cuahá ndivahá tátó mé á ña ná chindeé na yehe.<sup>54</sup> Cuu caja i ña joo xíní ñúhú yaha tá yaha ña nacahyi nuú tħuhun Ndióxi ndoho i—cáchí Jesús.

<sup>55</sup> Ta já nacachi Jesús já xihín na naxinu tiin ñahá cán:

—Cája ndó xihín i tħuhun caja na xihín tħaq cujhána jáchí naqueta ndó vaxi ndó tiin ndó yehe xihín machítí ta xihín yító viti. Ta ndijáá níi quivi nasahijin i xihín ndo ini veñihu cähnu jánħaq i tħuhun Ndióxi nu ndó ta ni in taħu coó natiin ndó yehe.<sup>56</sup> Joo tóċó ndíhi ña yóho yáha ña já ná xinu coó ña nacahyi na profeta sahá i ini tħuhun Ndióxi sanahá—cáchí a.

Tá nandihi já naxinu ndíhi na xica tuun xihín Jesús cán cuahān na ta najándacoo na mé á.

Tá ñéhe na Jesús cuahān na nuú nataca ndíhi na sacuahá

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Tá natiin na cán Jesús já ñéhe na a cuahān na nuú Caifás, dä cíu sacuahá chágá nu ndíhi jutu. Ta cán sa nanditútú na jánħaq ley Moisés ndúu na xihín na sacuahá veñihu.<sup>58</sup> Joo ndaja coo nasañdico xicá Pedro Jesús anda quiahva naxinu da yéhé vehe dä cíu sacuahá chágá nu ndíhi jutu cán. Ta já nandihvi da nasaqoo da nu ndúu

soldado cán sández dä ndá quéa caja na xihín Jesús.

<sup>59</sup> Ta na sacuahá nuú jutu xihín tóċó ndíhi na cómí cuéntá sahá na Israel nataca na cán ndúcú na cuachi jácojo na jatá Jesús já ná cuu caħní ñahá na. <sup>60</sup> Joo coó ñañehé na cuachi jíquí ña cuu chiniu na jatá mé á vatí naxinu coo cuahá na nacahan ña tħuhun sahá. Anda jáví naxinu coo ivi ga dā cahán ña tħuhun sahá.<sup>61</sup> Já nacachi da já:

—Naxini joho nde nacachi dä jan já: “Janditani i veñihu cähnu cán ta jácandichi tucu u ña tħixi unu quivi”, cáchí dä—nacachi na cán chīcaq ná cuachi jatá Jesús.

<sup>62</sup> Anda já nandaca ndíchi dä cíu sacuahá chágá nu ndíhi jutu cán já cáchí dä já xihín Jesús:

—Á chí a ndúcú ñehún tħuhun nuú nde sahá cuachi jácojo na jatun—nacachi da.

<sup>63</sup> Joo ni in tħuhun coó nanducú ñehe Jesús nu dä. Anda já nacachi dä cíu sacuahá chágá nu ndíhi jutu cán já xihín á:

—Tavún quivi Ndióxi, ña tħcu īn indívita cachún xihín nde á jivi ndusa yóho cūn Cristo, dä cíu in tħuhun jini já jahyi Ndióxi, dä nachindahá mé á cacomí cuéntá sahá ñayivi—nacachi da xihín Jesús.

<sup>64</sup> Já nanducú ñehe Jesús tħuhun nu dä já nacachi a já:

—Ajjan, jivi yehe cíu u dä cáchí ndó jan. Ta viti ná caħan i xihín ndó ña vaxi quivi tħaq cuni ndó yehe, dä nachindahá Ndióxi nduu ñayivi cacoo i xoo cuahá Ndióxi, mé á īn cuahá ndée. Ta já cuni ndó yehe ndicó coo i ñuyiví yóho taħu vico tħaqi ña quixi i chí indívita—nacachi a.

<sup>65</sup> Tá naxini joho dä sacuahá chágá nu ndíhi jutu cán ña yóho já nandata dä jahma dä ña ná canda iní ñayivi ña xójó iní da. Ta já nacachi da já:

—Ndája núu dä yóho Ndióxi. Coó chicuuh chágá yó ñayivi ná caħan na xihín yó jáchí sa naxinu joho ndíhi ña nacahaná dä yóho xihín Ndióxi.<sup>66</sup> Ta ndaja xíní ndó caja i xihín dä viti—nacachi da.

Anda já nacachi ndíhi na cán já:

—Ín cuachi dä jan ta ndítahan cuħun da quivi da—nacachi na cán.

<sup>67</sup> Ta já nacashá na xihnu ndaa na tojíi na nu á. Ta nacashá tħuxu na yiquí a. Ta java na cán jahndá nuu á.<sup>68</sup> Ta já cáchí na já xihín á:

—Cáhan xihín nde yo nacani yohó tá ta mé a ndaa cuún Cristo, dä nachindahá Ndióxi cacomí cuéntá sahá ñayivi —cáchí na xihín á.

Tá nachijehé tuhun Pedro ña xíni da Jesús  
(Mr. 14:66-72; Lc. 22:56-62; Jn. 18:15-18, 25-  
27)

<sup>69</sup> Ta ndaja coo íin coo Pedro yuhú yéhé dä cúu sacuahá chágá nu ndíshi jutu cán. Já nacativi in ñáñáha, ñá cája chúun mé vehe cán. Já nacasáhá cáchí ña já xihín dá:

—Yohó cuún in táhan dä xíca tuun xihín Jesús, dä estado Galilea —nacachi ña cán xihín dá.

<sup>70</sup> Joo ndaja coo nachijehé tuhun Pedro nu ndíhi na cán ña xíni da Jesús. Já cáchí da já:

—Co xíni toho i ndá sahá cahún —nacachi da xihín ñá cán.

<sup>71</sup> Ta tá sa naqueta da yéhé cán já naxini inga ñáñáha da já nacasáhá cáchí ña já xihín tócó ndíhi na ndíu cán:

—Naxini i naxica tuun dä yóho xihín Jesús, dä nuu Nazaret cán —nacachi ña cán.

<sup>72</sup> Ta já nacasáhá tucu Pedro chíjehé tuhun da ña xíni da Jesús ta natavá dä quiví Ndióxi já cáchí da já:

—Co xíni toho i ndá dä cúu dä jan —nacachi Pedro xihín na cán.

<sup>73</sup> Chá va nayaha ña yóho ta nacayati java na ndíu cán nu Pedro. Já nacachi na já xihín dá:

—Mé a ndaa táhyí jivi táhan na xíca tuun xihín Jesús cúu ri yóho va jáchi cahún tátuhun cáhan na cán —nacachi na xihín dá.

<sup>74</sup> Anda já nacasáhá Pedro cánahá dä ta natavá dä quiví Ndióxi ña co xíni da Jesús. Já cáchí da já:

—Co xíni toho i ndá dä cúu dä jan —nacachi da.

Tá nacachi da já chí ivi laá nacana chéle.

<sup>75</sup> Anda já nandicuhun ini Pedro ña nacahan Jesús xihín dá tá nacachi a xihín dá: “Tá cámání cana chéle sa chíjehé tuhún ña xínyu yéhe uní tañu.” Anda já naqueta da jata véhe ta a juú quiáhva sácu da jáchi cácuéha ndivaha ini da.

## 27

Tá nandiquighva na Jesús ndáha Pilato  
(Mr. 15:1; Lc. 23:1-2; Jn. 18:28-32)

<sup>1</sup> Tá nativi inga quiví itan já nandique táhan ndíhi na sacuahá nuú jutu xihín

na sacuahá veñuhu ña ndituhún na ndá quiáhva jácojo na cuahí jatá Jesús já cuu cahní ñahá na. <sup>2</sup> Sahá ña cán quéa nacató na mé á ta ñéhe na a cuahán na ndiquáhva na mé á nu Pilato, dä cíu gobernador ñuu cán.

Tá naxihi Judas

<sup>3</sup> Ta ndaja coo naxini Judas, da najicó túhún Jesús ña nasacu ini na cán cahní na Jesús. Já nacahvi ini da sahá ña núu nacaja da chí ndáva da cuahán dä nducu ñehe da ndíshoco uxu jiuhún cíxú nuú na sacuahá nuú jutu xihín nuú na sacuahá veñuhu. <sup>4</sup> Já nacachi da já xihín na cán:

—Cuachí cahnu ndivaha quéa nacaja i jáchi najicó túhún i in dä coó cuachi.

Já nacachi na cán já xihín dá:

—Co sáhní toho nde mé nde sahá ña yóho. Mún xíni ndá quéa nacajún —nacachi na cán xihín dá.

<sup>5</sup> Anda já nacuihna Judas jiuhún cán ini veñuhu cahnu. Ta já naqueta da násahen da nacata caa da mé dä já násahní dä mé dä.

<sup>6</sup> Ta já najátaca na sacuahá nuú jutu jiuhún cán já nacachi xihín táhan na já:

—A vahua toho ña ná chicqan yó jiuhún yóho iní sató nu táan na jiuhún jóco na nu Ndióxi jáchi ndii naxihi sahá ña yóho —nacachi na.

<sup>7</sup> Ta tá sa nandituhún vaha xihín táhan na já naxeen na in ñúhu xihín jiuhún cán. Mé ñúhu cán naní a ñúhu dä cávaha ñaha xihín ñundáhyi. Ta ñúhu cán cacuu a nu jánduxu na ná töho. <sup>8</sup> Sahá ña cán quéa násacu na quiví ñúhu cán ña cananí a yójo nuú naxiha nii. Ta já naní a janda viti. <sup>9</sup> Ta xihín ña yóho naxiñu coo nuú ña nacahí profeta Jeremías sanahá tá nacachi da já sahá Jesús: “Natiin na ndíshoco uxu jiuhún cíxú jáchi ña jan nasacuu yahvi nasacu na Israel chahvi na sahá dä. <sup>10</sup> Ta xihín mé jiuhún cán naxeen na ñúhu naní a ñúhu dä cávaha ñaha xihín ñundáhyi jáchi quiáhva já nasahinda Ndióxi chuun nuú i caja i”, cáchí tuhun Ndióxi.

Tá cándichi Jesús nu Pilato

(Mr. 15:2-5; Lc. 23:3-5; Jn. 18:33-38)

<sup>11</sup> Ta ndaja coo cándichi Jesús nu Pilato, dä cíu gobernador. Ta já nacasáhá dä cán ndáca tuhún ñahá da já cáchí da já xihín á:

—Á mé a ndaa cúu in rey, dä cómí cuénta sahá na Israel.

—Ajan. Jivi indusa cúu u tá quiáhva cáchí ndó jan —nacachi Jesús xihín dá.

<sup>12</sup> Ta nā sacuahā nuú jutu xihín na sacuahā veñuhu nachicaan na cuachi jatá Jesús joo ni in tuhun coó nanducú ñehe a nu ná. <sup>13</sup> Anda já nacachi Pilato já xihín Jesús:

—Á co xíni joho tohún ndaja cuahá nuú cuachi jácojo na jatyn —nacachi da.

<sup>14</sup> Joo ni in tühun tuhun coó nanducú ñehe Jesús nu dá. Chí cátontó ndivaha da cíu gobernador sahá nā co cáhan Jesús.

Sácu ini na ndaja caja na nā quivi Jesús  
(Mr. 15:6-20; Lc. 23:13-25; Jn. 18:38-19:16)

<sup>15</sup> Tañu mé vícq pascua nasañiin costumbre da cíu gobernador cán sá janí da in táhan da ndácaan vecaa. Ndá da cúní ñayivi janí da, da cán cíu da jání da. <sup>16</sup> Mé tañu já nasañiacaan in da naní Barrabás vecaa. Níi cíu naxita nuu tuhun sahá da yóho. <sup>17</sup> Ta tá nataca ndihi ñayivi já nandaca tuhun Pilato na já nacachi da já xihín ná:

—Yo cúní ndo nā ná janí i. Á Barrabás janí i á Jesús, da cachí ná cíu Cristo, da nandinahá Ndióxi cacomí cuénta sahá ñayivi. Yo janí i cúní ndo —nacachi da.

<sup>18</sup> Nacachi Pilato nā yóho xihín ná jachí sa cándaa vaha ini da nā sahá nā cähívī ini na xihín Jesús sahá nā cán quéa nandiquiáhva na mé á nu dá. <sup>19</sup> Ta nani íin coo da nu sácoo da sáhndá da chuun vechúun cán já nandinahá ñajíhí da tuhun nu dá já nacachi ná já: “A quiñvi ndáhun Jesús jachí cíu dá in taa ndaa. Nuú anda véhe nasañi i nacaja Jesús ta ndicani ndivaha ini i sahá”, nacachi ná.

<sup>20</sup> Joo ndaja coo na sacuahá nuú jutu xihín na sacuahá veñuhu cán najácahan na ñayivi nā ná caca na nu Pilato nā ná janí da Barrabás ta ná cahní da Jesús. <sup>21</sup> Anda já nacachi da cíu gobernador cán já xihín ná:

—Yo cúní ndo nā ná janí i.

Anda já nacachi ná cán já:

—Barrabás janí va janí ndo —nacachi na xihín dá.

<sup>22</sup> Anda já nacachi tucu Pilato já xihín ná:

—Ndá cúní ndo caja i xihín Jesús, da cachí ndo cíu Cristo.

Anda já nacachi tóco ndihi na cán já:

—Cata caa ndó da ndica crúxu.

<sup>23</sup> Anda já nacachi tucu Pilato já xihín ná:

—Ndá cuachi nacaja da, vaha —nacachi da xihín ná.

Joo xihín nā yóho ví ga ví nacasañáhá cayuhú ná já cachí na já:

—Cata caa ndó da ndica crúxu.

<sup>24</sup> Ta tá naxini Pilato nā co yáa ná cán ta ví ga ví ndívaa na já natiiin da ticuif ta nandahá da nu ndíhi ñayivi cán ta já nacachi da já xihín ná:

—Xihín nā yóho jánahá i nu ndo nā coó cuachi toho ndójo i sahá ndá nā caja ndó xihín da yóho jachí coó cuachi toho da yóho. Jatá mé ndó ná cuhun ndihi va —nacachi da xihín ná.

<sup>25</sup> Anda já nacachi tóco ndihi na cán já:

—Vaha ná candojo nde cuachi ta janda jahyi nde viti ná candojo na cuachi sahá nā quivi da —nacachi ná cán xihín dá.

<sup>26</sup> Anda já najaní Pilato Barrabás. Ta tá nandihi najácaxáhan na Jesús já nandiquiáhva da a ndáhá ná ná cata caa na a ndica crúxu.

<sup>27</sup> Anda já ñéhe soldado cuénta gobernador cán Jesús yuyéhé vechúun. Já najátaca soldado cán java ga táhan da ta cán nacava toyiví da mé á ndíu da. <sup>28</sup> Tá nandihi já natavá na jahmá á. Anda já nacchinúu na in jahmá cuahá tūn jatá. <sup>29</sup> Ta já nacchinúu na in tiyivi ínu jiní á. Ta nacchiñee na in ndoqo ndáhá cuahá. Ta já nacasañáhá ná caxítí na nu á já sácu ndaa ichí ñahá ná já cachí na já xihín á:

—Cáhuñ náhá ná cacuu yóhó, da cíu rey nuu na Israel —nacachi na.

<sup>30</sup> Ta nacasañáhá xihín ndaa na tójíi na nūu á. Ta já cándaa na ndoqo cán ndáhá á ta cání na yíquí jiní a xihín do. <sup>31</sup> Ta tá sá nandihi nacacu ndaa ñahá ná já nacandaa na jahmá nacchinúu na jatá cán ta najácañdixi tucu na a xihín jahmá mé á. Anda já ñéhe na a cuahán ná cata caa na a ndica crúxu.

Tá nacata caa na Jesús ndica crúxu  
(Mr. 15:21-32; Lc. 23:26-43; Jn. 19:17-27)

<sup>32</sup> Ta tá ñéhe na Jesús cuahán ná cata caa na a já nanditahan na in dā naní Simón, da nuu Cirene. Ta nacaja ndusa ná xihín dá ná ná ndicojo da crúxu nuú cata caa na Jesús. <sup>33</sup> Ta naxinu coo na xíquí naní Gólgota. Tuhun yóho cúní cachí a: nu ndíu lásá yíquí jiní ndíi. <sup>34</sup> Mé cán nacasañáhá ná vino nu á, dó nacava táhan xihín nā ova nā ná coho a do. Joo tá naxito ndojó a do coó naxxeen toho a coho a do.

<sup>35</sup> Ta tá sá nandihi nacata caa na a ndica crúxu já naquehe na jahmá a nandichahnda nu táhan na. Joo jihna ñúhú nacasañáhá ná sahá ta dā naquee vaha cán, da cán nandiquehe jahmá á. Xihín nā yóho naxinu

coo nuú ña nacahyí profeta sanahá tá nacahyí da já: “Nandicahnda nu táhan mé ná cotó níhnu i ta já nasajíqu na sahá cotó maá i ta da naquee vaha cán nandiquehe da ña”, cachí tuhun Ndióxi. <sup>36</sup> Ta já násacgo soldado cán ndúu na ndáa ñahá na. <sup>37</sup> Ta jiní ndíca crúxu cán nacahyí na ndá sahá nacata caa na a já cachí a já: “Da yóho cúu Jesús, da cíu rey nuú na Israel.”

<sup>38</sup> Ta sa mé já nacata caa ri na iyí taa cuihná xihín Jesús: in da xoo cuáha ta inga da xoo íti. <sup>39</sup> Chí cává jini mé ñayivi yáha cán cánahá na xihín á. <sup>40</sup> Ta já cachí na já:

—Yóhó cachúñ jánditani veñihu cahnu cán ta tixi uní víxi quíyí cachúñ jácandichi tucún ña. Tá tā mé a ndaa cíuñ jahyi Ndióxi jácacu mún ta cuáhán nuu ndíca crúxu jan-nacachi na xihín Jesús.

<sup>41</sup> Ta quiahva já nacaja ri na sacuahá nuú jutu xihín na jánahá ley Moisés xihín na sacuahá veñihu. Sácu ndaa na a já cachí na já:

<sup>42</sup> —Najácacu da java ga ñayivi ta viti chí a cíu caja da jácacu da mé dá. Tá tā mé a ndíca crúxu viti níhú já ná candusa nde dá. <sup>43</sup> Cández ini da Ndióxi ta cachí da cíu dā jahyi Ndióxi já quéa ná quixi Ndióxi chindé a da tā tā mé a ndaa quíhvi ini a da-nacachi na cán cánahá na xihín Jesús.

<sup>44</sup> Quiahva já cánahá ri ndívi taa cuihná tácaa in in xoo jíiñ á cán xihín á.

Tá naxíhi Jesús  
(Mr. 15:33-41; Lc. 23:44-49; Jn. 19:28-30)

<sup>45</sup> Tá naxínu coo caxívi ndaa nacanaá níi cíu ñuyíví ta jánda caa uní sahini já nacasaáhá nandiyehu tucu. <sup>46</sup> Ta sa mé hora já nacayuhú cóhó Jesús já nacachi a já:

—Elí, Elí, lama sabactani —ña yóho cíumi catchi a: Ndióxi mí i, Ndióxi mí i, ndáváha najándacoo ndáha ndó yéhe.

<sup>47</sup> Ta java na ndítá cán tá naxini joho na tuhun cachí a já nacachi na já:

—Cána da profeta Elías —nacachi na cán.

<sup>48</sup> Ivi laá xínu in da násahan da nachindaxi da in ticto ino vino iyá. Ta nacató da ña nuú in yító ndoo já nacchiñee da do yati yúhu Jesús ña ná coho a do. <sup>49</sup> Joo na java ndítá cán nacachi na já xihín dá:

—Cóho candéhé yó a quixi Elías jácacu a da —nacachi na cán.

<sup>50</sup> Anda já nacayuhú cóhó tucu Jesús já naxíhi a. <sup>51</sup> Ta ndaja coo nandatá java ndaa

jahmá ndeé ña sájí nuu nuú yíi ndiváha veñihu cahnu ñuu Jerusalén cán. Janda jini á ta janda sahá nandata. Ta mé hora já nataan ta ndijáá yuu tóto ndúu cán nandata.

<sup>52</sup> Ta nanuna cává nu nasañuhu na naxihi ta cuahá ñayivi, na násacuu cuéntá Ndióxi nanditacu tucu na. <sup>53</sup> Ta tá sa nanditacu tucu Jesús já naxínu na naqueta cává cán ñuu Jerusalén ta cuahá ndiváha ñayivi nax-ini ñahá.

<sup>54</sup> Ta da cíu sacuahá nuú soldado cuéntá Roma xihín da ndáa Jesús xihín da cán tá naxini da ña nataan ta naxini da java ga ña nayaha cán já nacasaáhá yíhví ndiváha da. Já nacachi da já:

—Mé a ndaa táchí yóho in túhún jini já jahyi Ndióxi —nacachi da.

<sup>55</sup> Ta mé cán násandita cuahá najihí sán-dehé xícá na Jesús. Mé na cán cíu na nacaja ndíví ñahá nu Jesús tá nandico na mé á naquixi na janda estado Galilea. <sup>56</sup> Tañu najihí cán násandacaan María, ñá ñuu Magdala xihín María, ñá cíu náná Jacobo xihín José. Ta cán násandacaan ri ña cíu náná ndíví da cíu jahyi Zebedeo.

Tá nachicáqan na yíquí cíuñ Jesús ini cává  
(Mr. 15:42-47; Lc. 23:50-56; Jn. 19:38-42)

<sup>57</sup> Ta ndaja coo násahíin in da cuiçá naní José, da ñuu Arimatea. Mé da yóho násacuu da in táchan da násaxica tuun xihín Jesús. Ta tá sa nacuaá já naxínu da <sup>58</sup> násahan da cahan ndahví da xihín Pilato ña ná ndiquiahva da yíquí cíuñ Jesús nu dá. Anda já násahnda Pilato chuun ña ná ndiquiahva na ña nu dá. <sup>59</sup> Ta já nachitiví José cán yíquí cíuñ Jesús xihín in jáhmá vaha ña vií.

<sup>60</sup> Ta já nachicáqan da yíquí cíuñ Jesús ini in yáyí ña saá ndácaan ndíca cává ña jácá nacáán da cuénta mé dá. Ta tá nandihí já nachijahví da yuhú cává cán xihín in yuu jahndá cáhuña ta já naquee da cuahan da.

<sup>61</sup> Ta nu yéhé mé cává cán násanduu coo María, ñá ñuu Magdala xihín inga ña naní María cán.

Tá ndáa java soldado nu ndácaan Jesús

<sup>62</sup> Ta ndaja coo sa nandihí nacaja ndíví na ñaha cuénta quíyí ndíquehe ndée na. Ta inga quíyí itaqan nájátaca táchan na sacuahá nuú jutu xihín na fariseo já násahan na nu Pilato. <sup>63</sup> Já nacachi na já xihín dá:

—Vaxi nde nu ndo caca loho nde ñamani nu ndó. Jáchí ndícuahun ini nde ña tá násatacu Jesús, da naxíca jándahví ñayivi

cán nacachi da ña tá sa ná yaha uní quiví já nditacu tucu da. <sup>64</sup> Ña cúní nde quéa ná chindahá loho ndó na cuhun candaas nuú nachicáan na yíquí cuñu da cán janda quiáhva ná yaha uní quiví. Jáchí tiahva náá xínu coo na naxica tuun xihín díñuu ta caja cuíhná na yíquí cuñu da. Ta já casáhá cachí na xihín nayiví ñuu ña nanditacu tucu Jesús tañu na naxihí. Ta xihín ña yóho jándahvi chágá na nayiví a juú ga jihna —nacachi na.

<sup>65</sup> Anda já nacachi Pilato já:

—Cañehé ndó in táhndá soldado. Cuáhán ndó candaas ndó nu ndácaan da tá quiáhva xínu mé ndó caja ndó —cáchí Pilato xihín ná.

<sup>66</sup> Anda já naquee na cán nasahan na já nachicají vaha chágá na nu ndácaan yíquí cuñu Jesús cán. Ta nasacu na sello yuu jáhndá cán ta já nasacu na soldado ña ná candaas da ña.

## 28

Tá nanditacu tucu Jesús

(Mr. 16:1-8; Lc. 24:1-12; Jn. 20:1-10)

<sup>1</sup> Tá sa nayaha quiví ndíquehe ndée ná ta natívi inga quiví itaen já naxínu María, ñuu Magdala xihín inga María cán sándezhe na nuú nachicáan na yíquí cuñu Jesús cán. <sup>2</sup> In naá cuití nataan ndee ndivaha. Nayaha ña yóho jáchí nánuu in tátó Ndióxi indíví. Ta najátví a yuu jáhndá nasaahvai nuú násandacáan yíquí cuñu Jesús cán. Ta já nasacoo a jatá. <sup>3</sup> Ta yéhe mé tátó Ndióxi cán tá quiáhva yéhe tasa. Ta jahma ndíxi a cíú á jahmá yaa cachí. <sup>4</sup> Ta a juú quiáhva ná yílhí soldado ndúu cán nacaja tátó Ndióxi chí nacásáhá quiví ñinu da. Ta já nacuyu da nu ñihu tátuhun ndíj naxihí. <sup>5</sup> Joo ndajá coo tátó Ndióxi cán nandicáhan xihín najíhí cán já nacachi a já xihín ná:

—A cayílhí toho ndó. Sa xíni vaha i ña ndínducú ndo Jesús, ña nacata caa na ndíca crúxu. <sup>6</sup> Coó toho a cán íin yóho jáchí sa nanditacu tucu a tá quiáhva nacachi mé á xihín ndo. Naha ndó candehé ndó nuú násahiín a já cuni ndó ña coó ga íin nuú nasacu na ña. <sup>7</sup> Ta cama ndó cuhun ndó caxi tuhun ndó xihín da naxica tuun xihín á ña sa nanditacu tucu Jesús tañu na sa naxihí. Ta viti cánú mé á cuahan estado Galilea. Ta tá cuhun ndó cán já cuni ndó a. Ta ndicuhun ini ndó ña nacachi i xihín ndo —nacachi tátó Ndióxi cán.

<sup>8</sup> Anda já naquee mé najíhí cán mé nuú násandacáan yíquí cuñu Jesús. Ta vatí yílhí na joo cávatá ndivaha na ta sahá ña cán quéa xínu na cuahán na caxi tuhun na ña yóho nuú ña naxica tuun xihín Jesús cán. <sup>9</sup> Ta nani cuahán na ivi láá sa íin va Jesús xihín ná. Já nacachi a já xihín ná:

—Ndióxi ná coo xihín ndo.

Anda já nacayati na cán nu á já nánumi na sahá ta nacaja cahnu na a. <sup>10</sup> Anda já nacachi tucu Jesús já xihín ná:

—A cayílhí toho ndó. Cuáhán ndó caxi tuhun ndó xihín na cíú cuéntá mí i ña ná cuhun na estado Galilea jáchí cán cuni na yéhe —nacachi Jesús xihín najíhí cán.

<sup>11</sup> Ta nani xínu najíhí cán cuahán na já ndáva java soldado, da násandaa nuú násandacáan Jesús cán naxínu da ñuu Jerusalén já nacaxi tuhun da ña nacuu nuú na sacuahá nuú jytu. <sup>12</sup> Anda já najátvaca táhan na sacuahá cán xihín na sacuahá veñuhu já najándique táhan na tuhun na ta já násahan cuahá ndivaha na jiuhún nuú na soldado cán. <sup>13</sup> Já nacachi na já xihín soldado cán:

—Coto a cahán ndó ña nanditacu Jesús. ña cachí ndó cíú ña yóho: “Na naxica tuun xihín á cán, na cán cíú na naquixi ñuu ta nacaja cuíhná na yíquí cuñu a nani naquiji nde”, já cachí ndó xihín ndá na ná ndaca tuhún ndohó. <sup>14</sup> Ta a cayílhí toho ndó tá ná candaas ini da cíú gobernador sahá ña yóho jáchí cahán mé nde xihín díta chindee nde ndohó ña ná a caja da ni in ñaha xihín ndo —nacachi na sacuahá cán xihín soldado.

<sup>15</sup> Anda já naquehe da cíú soldado cán jiuhún ta nacaja da tá quiáhva nasaahnda na sacuahá cán chuun nu dí. Ta xihín ña yóho nandicuítia nuu tuhun sahá ña nayaha cán. Ta cahán na Israel cán sahá ña yóho janda quiví víti.

Tá sáhndá Jesús chuun nuú na naxica tuun xihín á

(Mr. 16:14-18; Lc. 24:36-49; Jn. 20:19-23)

<sup>16</sup> Joo ndíshuxi in na naxica tuun xihín Jesús cán násahan na chí Galilea. Já nandaa na in jini yúcu tá quiáhva nasaahnda mé Jesús chuun nu ná. <sup>17</sup> Ta tá naxini na mé á já nacaja cahnu na a. Joo java na cahvi ivi joho ini na jáchí co cándusa na ña nanditacu tucu a. <sup>18</sup> Anda já nacayati Jesús nu ná já nacachi a já xihín ná:

—Nasahán Ndióxi ndéé nuú i caja i ña náhnu ndiváha indiví xihín ñuyíví yóho.

<sup>19</sup> Sahá ña cán quéá cuáhán ndo jánahá ndo nuú ñayivi ndúu ndijáá ñuyíví ndaja caja na caca vaha na íchí cuéntá mí i. Ta caja ndútä ndó na xihín quivi Ndióxi, tátá i ta xihín quivi yehé, dä cuú in túhún jiní já jahyi mé á ta xihín quivi ínima yii Ndióxi. <sup>20</sup> Ta jánahá ndó na ña ná caja na tóccó ndihí ña nasahnda i nu ndó caja ndó. Ta mé a ndaa coo i xihín ndo ndijáá níi quivi jandá quiqhva ná xinu coo quivi ndihí sahá ñuyíví. Já ná coo — nacachi Jesús.

## Tuhun vaha nacahyí Marcos saha Jesucristo

Tá jácandúta Juan ñayivi yucú íchí  
(Mt. 3:1-12; Lc. 3:1-9, 15-17; Jn. 1:19-28)

<sup>1</sup> Quiahva joho nacavá sáhá tuhun vaha cähán saha Jesucristo, mé a cúu in tühún jini já jahyi Ndióxi.

<sup>2</sup> Sanahá nacahyí profeta Isaías ña nacahan Ndióxi xihín jahyi a. Já cachí a já: Chindahá i in da canú cuhun nu mún, ña ná caxi tuhun da nuú ñayivi saha yóhó ta já ndaja ndacú da íchí nuú yahún.

<sup>3</sup> Ta cähán cóhó da tañu yucú íchí ta cachí da já xihín ñayivi:

"Caja tiähva ndó íchí nuú quixi xitoho í ta cuná ndó in íchí ndacú nu mé á ña ná ndihvi a ínimá ndó", nacahyí Isaías.

<sup>4</sup> Ta ndaja coo fin Juan yucú íchí ta nacásahá caja ndútä dá ñayivi. Ta caxi tuhun da xihín ná ña tá cúní na caja cähnu ini Ndióxi sahá cuachi na já ndítahan nu ná ndicó coo ini na ta já candúta ná. <sup>5</sup> Chí naquixi cuahá ndivaha ñayivi estado Judea xihín ñuu Jerusalén taa joho na nu cähán dá ta tá náhma na cuachi na já nacaja ndútä dá na ini yuta Jordán.

<sup>6</sup> Ta naşandixi mé Juan yóho jáhmá ña nacavaha na xihín iji camello ta naşandico in níjáhdá tóco dá. Ta naxixi da tica xihín ñuñu yúcú. <sup>7</sup> Tá caxi tuhun da nuú ñayivi já cachí dá já:

—Jatá yehe vaxi in da fin cuahá chágá ndée dá a juú ga yehe chí coó sahá i ndicá xítí i nu dá ña ndaxí i correá ndusa dá.  
<sup>8</sup> Yehe najácadúta i ndohó xihín ticuú joo mé dá cán cúu da jándicutá ínimá ndó xihín ínimá yii Ndióxi —nacachi Juan xihín ná.

Tá naçandúta Jesús  
(Mt. 3:13-17; Lc. 3:21-22)

<sup>9</sup> Mé tiempo já naquee Jesús ñuu Nazaret ña ndácaan estado Galilea. Naxinu a nu fin Juan ta najácadúta Juan Jesús ini yuta Jordán cán. <sup>10</sup> Ta tá naquee Jesús ticuú cán já naxini a nandinuña indívita nañuu ínimá yii Ndióxi jata mé á. Ta cää ínimá yii Ndióxi yóho tá quiahva cää in ndijata. <sup>11</sup> Ta naxini joho na cähán in a indívita já cachí a já:

—Yóhó cúuñ jahyi máni i ta cájii ndivaha ini i xuhun.

Tá naxito ndojó tiñahá sacuahá Jesús  
(Mt. 4:1-11; Lc. 4:1-13)

<sup>12</sup> Ivi láá nasahan ínimá yii Ndióxi ndáca Jesús yucú íchí nu coó ñayivi. <sup>13</sup> Ta cán nasahjin a ivi jico quivi ta mé tiñahá sacuahá naxito ndojó rí a. Ta cán ndúu quití quini joo naxinu java tátó Ndióxi chindeé na mé á.

Cásahá Jesús cähän tuhun vaha xihín ñayivi  
(Mt. 4:12-17; Lc. 4:14-15)

<sup>14</sup> Tá nandihí naçichaan na Juan vecaa já nasahan Jesús estado Galilea caxi tuhun a nuú ñayivi tuhun vaha saha Ndióxi. <sup>15</sup> Já cachí a já xihín ná:

—Sa naxinu tiempo viti ta naçayati quivi cacomí Ndióxi cuéntá sahá ñayivi. Ña ndítahan nu ndó quéa jándacoo ndó cuachi caja ndó ta candusa ndó tuhun vaha ña cuu jácacu ndohó —nacachi Jesús.

Cána Jesús comí na caca tuun xihín á  
(Mt. 4:18-22; Lc.: 5:1-11)

<sup>16</sup> In tañu xíca Jesús cuahán yati yuhú tañuhú Galilea. Ta naxini a in da naní Simón xihín Andrés, dá cuú ñani. Ndíví mé dá yóho cúu dá da tává tiyacá ta ñúhu da jácana da ñúnu dá ini tañuhú. <sup>17</sup> Nacásahá cachí Jesús já xihín dá:

—Naha quíi ndó candico ndó yehe caca tuun ndó xihín i. Tává ndó tiyacá viti joo caja i ña ná cuu tavá ndó ñayivi tañu cuachi —nacachi Jesús.

<sup>18</sup> Ta chí ivi láá najándacoo da ñúnu dá ta nandico da Jesús.

<sup>19</sup> Andá já naxica loho ga Jesús chí nuu já naxini a Jacobo xihín ñani da Juan, dá cuú jahyi Zebedeo. Ndíví dá yóho ñúhu da ini barco ndája vaha da ñúnu dá. <sup>20</sup> Nacana Jesús ndíví da yóho ta chí najándacoo da tátá dá, Zebedeo cán ini barco xihín java ga dá caja chúun xihín dá ta já nacásahá xíca tuun da xihín Jesús.

Tá ndácaan ínimá quini ini in datqa  
(Lc. 4:31-37)

<sup>21</sup> Naxinu coo Jesús xihín na xíca tuun xihín á ñuu Capernaum. Ta tá nañanda quivi ndíquehe ndée ñayivi já naquihvi Jesús ini veñhu ta nacásahá jáñaha na cán. <sup>22</sup> Ta nacatontó tóco ndihí ñayivi sahá tuhun cähän mé á jáchí najánaha mé á

tátuhun in dà íin sahá cahnda chuun ta co cáhan tátuhun na jánahá ley Moisés.<sup>23</sup> Ini mé veñuhu cán násandacaan in dàtaa, da ndácaan ínimá quini ini. Nacasáhá cayuhú rí cán já cachí rí já:

<sup>24</sup> —Jesús, dà nuu Nazaret. Ndá cuéntáquéa quívhí nuún xihín nde. Á vasún jándihún sahá nde. Sá xíní vaha i yóho ta cándaa caxí ini i ña cúnin da yii nachindahá Ndíoxi —nacachi rí cán.

<sup>25</sup> Ta nacasáhá Jesús jánani a rí quini ndácaan ini dà cán. Já nacachi a já:

—Caji yúhun ta janí dà yóho.

<sup>26</sup> Ta tá quéta rí quini ndácaan ini dà cán nasañní ylhí rí dà ta cayuhú cóhó ri já naqueta rí ini dà cán. <sup>27</sup> Nacatontó tóco ndihí ñayivi chí nacasáhá ndáca tühun tahan na já cachí na já:

—Ndíá quéta yóho. Ta ndá naquixi tühun saá jánahá dà yóho jáchí cáhan dà xihín rí quini tátuhun in dà sáhdá chuun ta chí cándusa rí quee rí cuhun rí —nacachi na.

<sup>28</sup> Ta chí cama chá nandicuita nuu tühun saha Jesús níí cíú estado Galilea.

*Ta nandaja vaha Jesús ñá cíú xojo Simón (Mt. 8:14-15; Lc. 4:38-39)*

<sup>29</sup> Tá naquee na veñuhu já cuahán Jesús xihín Jacobo xihín Juan vehe Simón xihín ñani da, Andrés.<sup>30</sup> Ta ndaja coo cánduhu ñá cíú xojo Simón nuú xito náchicaan cahni ndee ña. Ta tá naxinu coo na cán já nacaxi tühun na nuú Jesús ñá quívhí ña.<sup>31</sup> Anda já nacayati Jesús nu ña ta natiin a ndáha ña já nandiñeha e ña chí ivi láá nandindaa cahni á ña. Anda já nacasáhá caja ndívi ña ña cuxu na.

*Ndája vaha Jesús cughá ñayivi (Mt. 8:16-17; Lc. 4:40-41)*

<sup>32</sup> Tá naqueta nuu cändii ta nacuaá já ñéhe ndihí ñayivi na quívhí xihín na ñíhu ínimá quini ini nacasaña na nuú Jesús.<sup>33</sup> Ta tóco ndihí na ñuu nandai cuu na yuyéhé nu fin Jesús.<sup>34</sup> Nandaja vaha Jesús cuahá ñayivi, na ndóho tá nuú cuéhe. Ta natavá a cuahá ínimá quini ini ñayivi. Joo coó nasañán Jesús ñamani nu rí quini ña ná cahan rí jáchí xíní rí yo cíú Jesús.

*Xíca nuu Jesús jánaha ñayivi estado Galilea (Lc. 4:42-44)*

<sup>35</sup> Ta naha inga quívhí itaqan tá cámání yíti tiví nandacoo Jesús ta naquee a ñuu cuahán nuú coó ñayivi ña caca tähví a nu Ndíoxi.

<sup>36</sup> Tá nandacoo Simón xihín java ga dà xíca

tuun xihín Jesús já naxini na ña coó a ím chí naquee na cuahán na ndinducú na mé á.<sup>37</sup> Ta tá nandiñeha ñahá na já cachí na já xihín á:

—Tóco ndihí ñayivi ndinducú na ndóho.

<sup>38</sup> Joo cachí Jesús já xihín ná:

—Cóho java ga ñuu yati yóho ña ná jánahá i tühun vaha nuú na cán viti jáchí sahá ña yóho vaxi i —cachí Jesús.

<sup>39</sup> Ta chí naxixa nuu Jesús níí cíú estado Galilea cáhan tühun vaha ini veñuhu in in ñuu cán ta tavá a ínimá quini ndácaan ini ñayivi.

*Tá nandaja vaha Jesús in dà ndóho cuéhe tähví*

(Mt. 8:1-4; Lc. 5:12-16)

<sup>40</sup> Ta ndaja coo nacayati in dàtaa ndóho cuéhe tähví nuú Jesús ta nacaxítí dà nu á já nacasáhá cachí dà já:

—Cuu ndaja vaha ndó yéhe tá cúní ndó —cachí dà.

<sup>41</sup> Ta natahví ini Jesús sahá dà. Anda já nacaní ndaa ndáha á dà. Já cachí a já:

—Cúní ña ná ndivahún ña cán quéta nandivahún viti —nacachi Jesús xihín dà.

<sup>42</sup> Tá nacachi a já chí ivi láá nandindaa cuéhe tähví ña nandoho dà cán. Já nandiví yiquí cuñu da.<sup>43</sup> Tá nandiñi najándidayí Jesús dà ta nasañánda chuun nu dà já cachí a já xihín dà:

<sup>44</sup> —Candehé. A cáhun xihín ni in tühun toho ñayivi ña nacaja i xuhun. Cuahán ndacún nähun mún nuú jutu. Ta ndítahan jocún ñahá nu Ndíoxi tátuhun nasañánda ley Moisés sanahá caja na sa nandivahá. Já ná candaña ini tóco ndihí ñayivi ña sa nandindaa va cuéhe nasañohún —nacachi Jesús xihín dà.

<sup>45</sup> Joo tá naquee da cuahán dà nacasáhá dà ndícani da nuú ndihí ñayivi ña nandaja vaha Jesús dà sahá ña cán quéta coó nacuu ga ndívhí tiví Jesús ni in ñuu. Jatá ñuu nuú co ndúu ñayivi nasañi a ta janda mé cán xínu coo ñayivi, na quíxi nuú ndijáá ñuu xíto nihni na mé á.

## 2

*Tá nandaja vaha Jesús in dà naxihí tühu saha*

(Mt. 9:1-8; Lc. 5:17-26)

<sup>1</sup> Tá nayaña chí quívhí já nandicó coo tucu Jesús ñuu Capernaum. Ta nacandaña ini ñayivi ña íin a vehe.<sup>2</sup> Ta chí cama chí nanditútú cuahá ñayivi chí co váti ga

yuyéhé cándita na. Já nacasáhá cáxi tuhun Jesús tuhun Ndióxi nu ná.<sup>3</sup> Anda já naxini coo comí taa ta ñéhe da in dä naxihí tuchu saha. Nasaa dä nu íin Jesús.<sup>4</sup> Joo naxini da ñä a cuú xíni da yati nu íin Jesús sahá cuahá ñayivi chútú ndaa nu íin a cán. Chí nandaa da jini véhe ta nacasáhá da súná da jini véhe mé xoo nu íin Jesús. Ta mé cán najánuu da xito loho ny cánduhu da quíhvi chí yávi jini véhe cán.<sup>5</sup> Tá naxini Jesús ñä cández ini da cán mé á já cachí a já xíhín mé dä quíhvi cán:

—Candehé, jahyi a. Sa nacaja cähnu ini i sahá cuachún viti —nacachi Jesús.

<sup>6</sup>Joo java na jánahá ley Moisés ndúu coo cán nacasáhá cähán na:<sup>7</sup> “Ndá cuéntá quéa ndája núu da Ndióxi xíhín tuhun cähán da. Jáchí ni in tühún toho ñayivi a cuú caja cähnu ini sahá cuachi. In tühún jini Ndióxi quéa cuu caja cähnu ini sahá cuachi”, nacahán na.<sup>8</sup> Joo sa nacandaé ini Jesús ñä cähvi ini na cán chí nacachi a já xíhín ná:

—Ndávaha cähán ndó já.<sup>9</sup> Á cähán ndó ñä ihví chágá cachi i xíhín da yóho: “Nacaja cähnu ini i sahá cuachún viti.” Á tá coó ta cachi i xíhín dá: “Cuándacoo, ndiquehe xitún ta caca nuún.”<sup>10</sup> Candehé vaha ndó ná nähä i nu ndo ñä íin sahá i, dä nachindahá Ndióxi nduu u ñayivi caja cähnu ini i sahá cuachi caja ñayivi ñuyíví yóho —nacachi Jesús xíhín ná.

Anda já nacachi a xíhín mé dä naxili tuchu saha cán:

<sup>11</sup> —Ta viti cähán i xíhín cuándacoo ndiquehe xito lohún ta cuanúhu —nacachi a.

<sup>12</sup> Chí ivi láj nandacoo mé dä quíhvi cán ta nandiquehe da xito loho da já naquee da cuahán dä nuú ndihí na ndúu cán. Anda já nacatontó tóco ndihí na ta nacasáhá cähnu na Ndióxi já cachí na já:

—Ni in tühún tañu coó naxini nde in nähä cähnu tátuhun ñä yóho —nacachi na.

Tá nacana Jesús Leví, dä cähán na Mateo xíhín  
(Mt. 9:9-13; Lc. 5:27-32)

<sup>13</sup> Tá nandihí já nasahan tucu Jesús yuhú tañuhú cán ta tá nacayati cuahá ñayivi nu á já nacasáhá jánahá nu ná.<sup>14</sup> Nani xíca Jesús cuahán nayaña nu íin in dä naní Leví, jahyi Alfeo. Ta íin coo da nu sácoo da játaca jíuhún cuéntá impuesto. Ta cachí a já xíhín dä:

—Naha quií candicún yehe.

Anda já nandaca ndichi Leví ta nändico da Jesús.

<sup>15</sup> Tá nandihi nasahan Jesús vehe Leví ta nasaçoo a xíxi a xíhín cuahá dä játaca jíuhún cuéntá impuesto xíhín java ga na cája cuachi. Ta sa mé cán nasaanduu ri java dä xíca tuun xíhín Jesús xíxi da tañu na cán jáchí cuahá ñayivi ndíco na Jesús.<sup>16</sup> Joo na jánahá ley Moisés xíhín na fariseo tá naxini na íin coo Jesús xíxi a xíhín na cán nacasáhá cachí na já xíhín dä xíca tuun xíhín Jesús:

—Ndá cuéntá quéa xíxi xitoho ndó xíhín na játaca jíuhún cuéntá impuesto ta xíhín java ga na cája cuachi —nacachi na cán.

<sup>17</sup> Tá naxini joho Jesús ñä yóho nacasáhá cachí a já:

—Ñayivi íin vaha co xíní ñúhú toho na dä cája tátá ñahá joo na quíhvi, na cán cuú na xíní ñúhú dä cája tátá ñahá. Ta yehe coó vaxi toho i cana i na sa íin vaha. Vaxi i cana i ñayivi, na cája cuachi ñä ná jándacoo na cuachi caja na —nacachi Jesús.

Cähán Jesús ndá sahá quéa cajuhun na  
(Mt. 9:14-17; Lc. 5:33-39)

<sup>18</sup> In tañu tá xíjuhun na xíca xíhín Juan xíhín na xíca xíhín na fariseo naxinu coo java ñayivi nu Jesús ta nacasáhá ndáca tühún na mé á já cachí na já:

—Ndávaha co xíjuhun toho na xíca tuun xíhín yóhó joo xíjuhun mé nde, na xíca xíhín Juan xíhín na xíca xíhín na fariseo —nacachi na.

<sup>19</sup> Ta nanducú ñehe Jesús tuhun nu ná já nacachi a já:

—Á cähán ndo xíjuhun na ndúu víco tándahá nani íin mé dä tándahá cán xíhín ná. Uhun. Jáchí cají i nani íin mé dä tándahá xíhín ná. Chí a cuú toho cajuhun na.<sup>20</sup> Joo xinu quií canda na mé dä tándahá ta anda jáví casáhá cajuhun na. Ta cachí i xíhín ndó ñä vaxi quií canda na yehe nuú na yóho ta anda jáví casáhá na xíca tuun xíhín i cajuhun na —nacachi Jesús.

<sup>21</sup> Ta násacu Jesús inga quiáhva nu ná já cachí a já:

—Ama ná jándaha ñayivi jahmá yatá xíhín in tühún jáhma saá jáchí tá nandihí ndíndii a, sáhndá chágá ví a jahmá yatá cán ta jándacähnu chágá ví a yávi ñä nandicahmá na cán.<sup>22</sup> Ta ni co táan na vino saá ini vósó nü yatá jáchí jácahní mé vino cán nü ta cuijtá mé vino cán ta tíví vósó nü caja

dó sahá ña cán quéa ndítahan taán na vino saá ini vósq nií saá —nacachi a.

*Ña nacaja na xíca tuun xihín Jesús in quiyi ndíquehe ndée ñayivi*

(Mt. 12:1-8; Lc. 6:1-5)

<sup>23</sup>In quiyi ndíquehe ndée ñayivi nani xíca Jesús cuahán tañu nyú naxutu na trigo xihín na xíca tuun xihín á já nacasáhá tóhun na yucu jini trigo. <sup>24</sup>Tá naxini na fariseo ña cája na já nacachi na já xihín Jesús:

—Candehé. Ndávaha cája na xíca tuun xuhún chuun ña co ndítahan caja na quiyi ndíquehe ndée yo —nacachi na fariseo.

<sup>25</sup>Anda já nacachi Jesús já xihín ná:

—Á a ñáha cahvi ndó nyú tóhun Ndióxi nu cahán sahá ña nacaja David saháhá tá nacuico mé dá xihín na xíca xihín dá. <sup>26</sup>Na nacaja David quéa naquihvi da veñuhu Ndióxi tá násacu Abiatar dà sacuahá nyú jutu. Já naxixi da pan yii ña in tóhun jutu cúu dà ndítahan nyú cuxu ña cán, nduu. Joo naxixi David ña ta násahán dà ña nyú java ga na xíca xihín dá.

<sup>27</sup>Ta nacachi tucu Jesús já xihín ná:

—Candehé ndo. Coó nacaváha Ndióxi ñayivi ndoho ini na sahá quiyi ndíquehe ndée ná jáchí násacu ini a caváha in quiyi já ná cuu ndíquehe ndée ñayivi. <sup>28</sup>Ña cán quéa yehe va, dà nachindahá Ndióxi nduu ñayivi ín sahá i cahnda i chuun sahá quiyi ndíquehe ndée ñayivi —nacachi Jesús.

### 3

*Tá nandaja vaha Jesús in dà náhichi ndáhá*  
(Mt. 12:9-14; Lc. 6:6-11)

<sup>1</sup>Naquihvi tucu Jesús ini veñuhu ta cán násandacaan in dataa, dà náhichi ndáhá.

<sup>2</sup>Ta nacasáhá nání na fariseo Jesús sándezhe ña ndaja vaha mé á dà cán quiyi ndíquehe ndée ná já ná cuu chican na cuachi jatá.

<sup>3</sup>Anda já cachí Jesús xihín dà náhichi ndáhá cán já:

—Cuándaco ta candichi mahnú yóho —nacachi Jesús.

<sup>4</sup>Anda já nandaca tóhun a na java cán já cachí a já xihín ná:

—Ndía cachí ley ndítahan caja í mé quiyi ndíquehe ndée ñayivi. Á chindeé yó ñayivi a caja í ña núa xihín ná. Á jácacu ná a cahní yó na —nacachi Jesús.

Joo ni in tóhun tóhun coó nacahan na.  
<sup>5</sup>Nacasáhá xójo ini Jesús sándezhe a núa ná.

Joo tálví tucu ini a sahá ná jáchí cùu ná ñayivi sáá ini. Ta cachí a xihín mé dataa, dà náhichi ndáhá cán:

—Jándacaña ndáhun.

Tá najándacaña dà ndáhá dá ivi laá nandivaha ndáhá dà. <sup>6</sup>Tá nándihí naquee na fariseo veñuhu já nacasáhá ná jándique tóhán na tóhun na xihín ná cuénta Herodes ña cahní na Jesús.

*Tá ngnditútú cuahá ñayivi yuhú tañuhú*

<sup>7</sup>Joo násahan Jesús xihín na xíca tuun xihín á yuhú tañuhú ta cuahá nandivaha ñayivi estado Galilea nandico na násahan ná. <sup>8</sup>Tá nacandaña ini ñayivi ña náhnu cája Jesús, naquixi cuahá na estado Judea xihín na ñuu Jerusalén xihín na ñundáhyi Idumea xihín na inga xoo yuta Jordán xihín java na ndúu ñuu valí jíin ñuu Tiro xihín Sidón jáchí candehé ná Jesús cúní ná. <sup>9</sup>Sahá ña yóho quéa naxicá Jesús ñamani nyú na xíca tuun xihín á ña ná cacu tálvha na in barco nyú ndacaan mé á ña ná a cándezhi ñayivi cuahá cán ña. <sup>10</sup>Jáchí cuahá nandivaha ñayivi nandaja vaha mé á. Sahá ña cán quéa tócó ndihí ná quihvi cátí na jatá ña cani ndaa ndáhá ná mé á cúní ná.

<sup>11</sup>Ta tá naxini na ñúhu ínimá quini ini cán Jesús ivi laá ndícava xítí ná nu á ta cásáhá cayuhú cohó na já cachí rí quini ndácaan ini ná cán já:

—Yóho cúní dà cúu in tóhun jini já jahyi Ndióxi.

<sup>12</sup>Joo jánani Jesús rí cán já sáhdá a chuun nu rí ña ná a caxí tóhun rí yo cúu mé á.

*Tá nacaxi Jesús uxu ivi dà caca tuun xihín á*

(Mt. 10:1-4; Lc. 6:12-16)

<sup>13</sup>Tá nándihí já naquee xójo Jesús násahan in xiqui ta tá nándihí nacana mé á java na xíca xihín á cán, mé ná cúní a caxí a ta naxinu ná cán nu Jesús. <sup>14</sup>Ta tañu ná cán nándicaxi Jesús uxu ivi dà caca tuun xihín á ta tá nándihí já nachindahá mé á dà cuhún dà cahán dà tóhun Ndióxi xihín ñayivi. <sup>15</sup>Ta nacaja mé á ña cuu ndaja vaha da ná quihvi ta cuu cahnda da chuun nu rí quini ña ná quee rí ini ñayivi. <sup>16</sup>Ña yóho cúu quiyi uxu ivi dà nándicaxi Jesús caca tuun xihín á: Simón, dà násacu tucu a quiyi cananí Pedro <sup>17</sup>xihín Jacobo xihín nání dà, dà nání Juan, jahyi Zebedeo. Ndíví dà yóho násacu a quiyi cananí Boanerges ta mé tóhun yóho cúní cachí a cúu dà tátóhun jahyi in tasa ña

cána indiví. <sup>18</sup> Nacaxi a Andrés xihín Felipe xihín Bartolomé xihín Mateo xihín Tomás xihín Jacobo, dà cíú jahyi Alfeo xihín Tadeo xihín Simón, dà naxica cuéntá ná cananista <sup>19</sup> xihín Judas Iscariote, mé dà najicó tühún Jesús tá ná ndihí.

*Jácojo na cuachi jatá Jesús ña cája chúun a xihín ndée tiñáhá sacuahá  
(Mt. 12:22-32; Lc. 11:14-23; 12:10)*

Anda já naquihvi Jesús ini in vehe xihín na xíca tuun xihín á. <sup>20</sup> Ta inga tucu náchutú cuahá ñayivi nu íin a janda a cuú cuxu a xihín na xíca tuun xihín á cán. <sup>21</sup> Ta tá nañehé na vehe Jesús tühun sahá ña yóho íví laá naquixi na ña cañehe na mé á cuhún a cúní na jáchí nacatachi Jesús cahán na.

<sup>22</sup> Jári na jánaha ley Moisés, na naquixi Jerusalén nacasáhá cáhan na já cachí na já:

—Taa yóho ndácaan Beelzebú ini da, rí cuú sacuahá nu rí quini. Ta xihín ndée mé rí cán tává dà rí quini ini ñayivi —nacachi na.

<sup>23</sup> Anda já nacana Jesús ñayivi já násacu a in quiahva nu ná ja cachí a já xihín ná:

—A cuú tavá tiñáhá sacuahá mé rí. <sup>24</sup> Jáchí tá sáhndá java táhan na ndíu in ñuu ta cání táhan ndaja táhan mé va na já quéa a ñéhe íní na coo nahá ná. <sup>25</sup> Ta tá cásahá sáhndá java táhan ná ndíu in vehe ta cání táhan na já a cuú ga canduu nahá ná mé vehe cán. <sup>26</sup> Ta quiahva já tá ná casahá rí quini ndíu ndáha tiñáhá sacuahá cání táhan rí xihín mé va rí janda quiahva sáhndá java táhan rí já quéa a cuú canduu nahá rí jáchí ndihí sahá ri.

<sup>27</sup> Sácu u ínga quiahva nu ndo. Ni in dñata a cuú ndihvi da caja cuishná dà ñaha vehe in dà ndacú cán joo tá ná cató dà dà ndacú já cuu quehe da ñaha da cán.

<sup>28</sup> Mé a ndaa ná cáhan i xihín ndo. Ndióxi cuu caja cáhnu ini a sahá tá nuú cuachi cája ñayivi xihín sahá tá nuú tühun quini cáhan na. <sup>29</sup> Joo tá ná cáhan núu na sahá íníma yii Ndióxi já quéa a cája cáhnu ini Ndióxi sahá ña nacaja na ta qandá ama cáa quívi candojo na cuachi sahá —nacachi Jesús.

<sup>30</sup> Nacachi a ña yóho xihín ná cán jáchí cachí na ña ndácaan íníma quini ini a.

*Náná Jesús xihín ñani a cúní na cuni na a  
(Mt. 12:46-50; Lc. 8:19-21)*

<sup>31</sup> Tá nandihí naxinu náná Jesús xihín ñani a nu íin a joo nacando na jata véhe. Ta náchindahá ná in na násahan nacana

ñahá. <sup>32</sup> Ta ná ndíu coo xihín Jesús cachí na já xihín á:

—Jata véhe cáa íin nánú xihín ñanú ta ndínducú ná yóho —cachí ná xihín Jesús.

<sup>33</sup> Anda já nacachi Jesús já xihín ná:

—Ná cahan i xihín ndo yo já cíú tátuhun ná i xihín ñani i.

<sup>34</sup> Anda já nasandehé a nuú ná ndíu coo tiyivi xihín a cán já cachí a já xihín ná:

—Na yóho cíú ná tátuhun náná i xihín ñani i. <sup>35</sup> Jáchí ndá ná cája ña cúní Ndióxi, ná cán cíú ná tátuhun ñani i xihín quiahvá i xihín náná i —nacachi Jesús.

#### 4

*Sácu Jesús quighva sahá in dà sáta tata  
(Mt. 13:1-9; Lc. 8:4-8)*

<sup>1</sup> Nacasáhá tucu Jesús jánaha ñayivi yuhú tañuhú ta náata cuahá ñayivi nu íin a cán. A juú quiahva cuahá cíú ná sahá ña cán quéa naquihvi Jesús ini in barco, dó cándichi yuhú tañuhú cán. Ta násacoo a cán ta tóco ndihí ñayivi nandaca ndita na nuú ñutí yuhú tañuhú cán. <sup>2</sup> Já nájána sahá ña cuahá ña sahá nuú ná cán ta násacu a quiahva nu ná já cachí a já:

<sup>3</sup> —Cuni joho ndó ña yóho: In dà sáta tata náquee da cuahán dà cata da ña. <sup>4</sup> Ta tá sáta dà ña cuahán dà nacuyu java ña íchí ta naxinu laa ta násaxí rí a. <sup>5</sup> Ta java ña nacuyu a tañu yuu nuú coó cuahá ñúhu. Ta cama chá nandutá mé tata cán jáchí coó cúná ñúhu nuú nacuyu a. <sup>6</sup> Joo tá naqueta cändii já nájáhichí a ña sahá ña coó cuahá yóho a chí nandihí sahá. <sup>7</sup> Ta java tata nacuyu a tañu tohíñu ta tá násahnu tohíñu cán já nanditáha ndihí a nacaja tohíñu chí coó násahan mé tata cán ndá ñaha jáquee na nu á. <sup>8</sup> Ta java tata nacuyu a nuú ñuhú vaha. Nandutá mé tata cán ta násahnu a já násahan cuahá ñaha ña jáquee na nu á. Java ña násahan oco uxu a nuú in in tata ta java ña násahan uní jico uxu a ta java ña in ciento a nuú in in tata.

<sup>9</sup> Anda já nacachi tucu Jesús já xihín ná:

<sup>10</sup> —Na íin joho, ná cuni joho na —nacachi a.

*Ndícani Jesús ndá sahá quéa násacu a quiahva nu ná*

*(Mt. 13:10-17; Lc. 8:9-10)*

<sup>10</sup> Tá nacando Jesús xihín mé ná uxu íví xíca tuun xihín a cán xihín java ga ná ndíco ñahá cán já nacasáhá ndáca tühún ná Jesús

ñä ndíá cúní cache a xihín quiahva násacu a nuú na cán.<sup>11</sup> Ta cáchí a já xihín ná:

—Ña coó nacandaa ini ndó jihna ñä cán cándaa ini ndó a viti jáchí nasuná Ndióxi xíní tuní ndó cándaa ini ndó ndá quiahva cacomí mé á cuénta sahá ñayivi. Joo na a ñáha cacomí Ndióxi cuénta sahá, na cán cútú na sácu u quiahva nuú.<sup>12</sup> Já quéa vatí sándezhe na joo cútú ná tátuhun na co tívi nuú ta vatí xíní joho na joo cútú ná tátuhun na joho jáchí co cándaa ini na ñä cáhan i xihín ná. Ta sahá ñä cán quéa co ndícó coo na nuú Ndióxi ta ni mé á co cája cahnu ini sahá cuachchi na.

*Ndícani Jesús sahá dà sáta tata cán  
(Mt. 13:18-23; Lc. 8:11-15)*

<sup>13</sup> Ta já cáchí tucu a já xihín na xíca tuun xihín á:

—Ta tá co cándaa ini ndó quiahva, ñä násacu u yóho ndaja caja ndó cándaa ini ndó java ga quiahva ñä cache i xihín ndó.

<sup>14</sup> Mé dà sáta tata cán cútú dà tátuhun dà xíca cáhan tátuhun Ndióxi xihín ñayivi.<sup>15</sup> Java ga ñayivi cútú ná tátuhun tata ñä nacuyu íchi. Táa joho na tátuhun Ndióxi ta tá nändihi naxini joho na ñä já vaxí tiñáhá sacuahá ta caja rí xihín ná ñä ndíndójó na ñä.<sup>16</sup> Ta java ñayivi cútú ná tátuhun tata ñä nacuyu tañu yuu jáchí taaa joho na tátuhun Ndióxi ta cajíi ini na ndíquehe na ñä.<sup>17</sup> Ta tá quiahva ndíavá yucu sahá ñä co ñúhu cúná yóho a quiahva já ndóho ñayivi tá casáhá ndicuítá ñayivi caja xíxi na xihín ná. Ta tá casáhá ndóho ini na sahá tátuhun Ndióxi ñä naxini joho na cán chí iyí láá jándacoo va na ñä cándezee ini na Ndióxi.<sup>18</sup> Ta java na cútú ná tátuhun tata ñä nacuyu tañu tohíñu jáchí taaa joho na tátuhun Ndióxi<sup>19</sup> joo ndícani ndiváha ini na sahá ñaha ñuyíví yóho. Cátóó ndiváha na ñaha cuícá chí jándahvi na mé ná xihín ñä cán ta xíca ini na coo tóco ndihi ñaha nuú ná. Ta cáva nuu táhan ñaha ñuyíví yóho xihín tátuhun Ndióxi ini ínimá ná sahá ñä cán quéa cavitá ini na ta co sáhnu na xihín tátuhun Ndióxi.<sup>20</sup> Joo ndúu java na xíní joho tátuhun Ndióxi ta cándezaa na ñä. Ta caja chúun vaha na xihín á ta já cuahnu na xihín á. Cútú ná tátuhun tata nacuyu nuú ñúhu vaha. Java na cútú ná tátuhun tata ñä násahan oco uxu a nuú in in a. Ta java na cútú ná tátuhun ñä násahan uni jico uxu a ta java na cútú ná tátuhun ñä

násahan in ciento a nuú in in tata —nacachi Jesús xihín na cán.

*Sácú Jesús quiaghva sahá in lámpara  
(Lc. 8:16-18)*

<sup>21</sup> Ta cáchí tucu Jesús xihín ná:

—Coó toho chuun lámpara tá chícaqan í ñä tixi sató á tixi xito jáchí chuun ñä quéa cánúu ñä nu jíco já ná jándiyehé ñä nu yo.

<sup>22</sup> Ni in tátuhun toho ñaha a cuú coo jehé jáchí xinu quivi já ndáca náha nu á. Ta ni in tátuhun nacahan jehé ñayivi a cuú coo jehé nahá jáchí xinu quivi já cándaa ini tóco ndihi ñayivi sahá tátuhun násahuijén jehé cán.

<sup>23</sup> Ñä íin joho, ná cuni joho na —nacachi a.

<sup>24</sup> Ta cáchí tucu a já xihín ná:

—Cándezhe vaha ndó ñä taa joho ndó. Tá quiahva caja ndó xihín ñayivi quiahva já caja Ndióxi xihín ndo joo chágá ví caja mé á xihín ndo.<sup>25</sup> Jáchí dà sa íin ñaha nuú, ñehe tálví dà coo chágá ñaha nu dá joo dà coó ñaha nuú, janda ñä chá íin nu dá ndindaa —nacachi Jesús.

*Jánahá Jesús nu ná ndá quiaghva sáhnu tata*

<sup>26</sup> Ta cáchí tucu Jesús já:

—Tá ndíquiahva ñayivi mé ná ndáha Ndióxi ñä ná cacomí a cuénta sahá ná já cútú á tátuhun in datqa nachihin tata.<sup>27</sup> Tá nändihi yáha quivi ta quíji dà ta ndácóo da já yáha quivi xihín ñuú. Ta já ndúta mé tata cán ta sáhnu a joo mé dà nachihin a cán co xímí dà ndaja sáhnu a.<sup>28</sup> Sáhnu a jáchí chuun nu mé ñúhu quéa caja ñä ná cuahnu ñä cán. Jihna ñúhu ndúta mé yucu trigo já cana yóco a ta nu mé yóco a cán ndícutú ndaa ndíqui á.<sup>29</sup> Ta tá nachichi mé ndíqui a cán já quéee na cuahnu na jáquee na ñä jáchí naxinu coo quivi jáquee na ñä —nacachi Jesús.

*Sácú Jesús inga quiaghva sahá ndíqui mostaza*

*(Mt. 13:31-32; Lc. 13:18-19)*

<sup>30</sup> Ta cáchí tucu Jesús já:

—Viti sácu u inga quiahva nu ndo já ná cándaa ini ndó ndá quiahva caja Ndióxi xihín ñayivi tá casáhá a cómí a cuénta sahá ná.<sup>31</sup> Cútú á tátuhun in ndíqui mostaza ñä chíchin na nuú ñundahyi. Cútú á ndíqui loho chágá nu tóco ndihi ndíqui válí íin ñuyíví.

<sup>32</sup> Joo tá nändihi nachihin na a násahnu a ta nänduu a in yíto, dó cahnu nu ndíhi yíto. Ta xihín ndahá náhnu dó sácu do cátí ta janda

laa ndíquehe ndéé rí nu cátí do —nacachi Jesús.

Sácu Jesús quiāhva cuití va nūú ñayivi  
(Mt. 13:34-35)

<sup>33</sup> Nájánaha Jesús tūhun Ndióxi nū ná. Ta násacu cuahá quiāhva nū ná tátuhun ña yóho jandā quiāhva xínu nū mé ná cándaa ini na. <sup>34</sup> Xihín mé quiāhva cuití va nájánaha Jesús nūú ñayivi joo tá nacandoo Jesús xihín mé ná xíca tuun xihín á já ndícani cáxi ndihi a ñaha nūú ná cán.

Tá nájácatájí Jesús tañuhú tá ndícojo dō  
(Mt. 8:23-27; Lc. 8:22-25)

<sup>35</sup> Tá nácuáa mé quívi cán já nacachi Jesús já xihín ná xíca tuun xihín á:

—Cóho inga xoo tañuhú yóho.

<sup>36</sup> Anda já nájándacoo na ñayivi já naquee na cuahán ná xihín Jesús ini mé barco nūú sa ndácaan mé á. Ta ndáca táchan java ga barco cuahan dó xihín ná. <sup>37</sup> Ta ndaja coo naxinu in tachí quíni ndivaha. Ta nácasáhá ndícojo tañuhú ndíhvi dō ini barco já nácasáhá ndícutú ticuií ini mé barco cán. <sup>38</sup> Ta chí xoo jatá mé barco cán cánduhu Jesús quíji a ta cánúu jini á jatá ña yíhi jini ná. Já nájándacaxí ini na mé á ta cáchí ná já xihín á:

—Maestro. Chí co sáhní a mé á ña cúní ndihi saha yo jáchi sácoo barco cahá ticuií cuahan do —nacachi na.

<sup>39</sup> Anda já nándacgo Jesús ta nácasáhá jánani a tachí xihín tañuhú viti já cáchí a já:

—Catájí ndo.

Já nájáyaa tachí. Já nacandoo tájí níí mé cán. <sup>40</sup> Anda já nacachi Jesús xihín ná xíca tuun xihín á:

—Ndávaha nayihví nahá ndo. Ndávaha co cándezini ndo yéhe —nacachi a.

<sup>41</sup> A juú quiāhva nayihví mé ná cán já nácasáhá cahán xihín táchan na:

—Ndá dā cùu dataa yóho ña jandā tachí xihín tañuhú cándusa nū cahán dā —nacachi ná cán.

## 5

Tá nándaja vaha Jesús in da ndácaan ínima quini ini

(Mt. 8:28-34; Lc. 8:26-39)

<sup>1</sup> Anda já naxinu ná inga xoo mé tañuhú cán nū fin nündáhyi cuéntá Gadara. <sup>2</sup> Ta tá nanuu Jesús barco cán já naquee in dataa camasanto já naxinu dā nūú Jesús. Mé dā

yóho cùu dā dā ndácaan ínima quini ini. <sup>3</sup> Ta íin va da nū ndúxu ndii ta ni in na a cuú cató ná da ni xihín cadena a cuú cató ná dā.

<sup>4</sup> Vatí cuahá tañu sa nacató ná saha dā xihín ndáha dā joo sáhndá da cadena ta jácuauchi da ña ta ni in na a cuú caja xihín dā. <sup>5</sup> Nuú ta ndíví xíca nuu da yúcu xihín nū ndúxu ndii cayuhú dā xíca nuu da ta jándicuehe dā mé dā xihín yuu. <sup>6</sup> Joo tá naxini xícá dā Jesús, níhi chá náshan dā naxinu dā nū fin a já nandicava xítí dā nū á. <sup>7</sup> Ta cayuhú cóhó dā já cáchí dā já xihín á:

—Ndá cuéntá quéa vásún quihvi nuúun xihín i. Yóhó cùúun Jesús, da cùú in tühun jini já jahyi Ndióxi, ña cahnu ndivaha. Xíca tähví i nūun ña ná a jándohún ini i —nacachi da.

<sup>8</sup> Nacachi da ña yóho xihín Jesús jáchi nácasáhá sáhndá mé á chuun nū rí quini cán já cáchí a já:

—Ínima quini, janí dā yóho.

<sup>9</sup> Anda já nándaca tühun Jesús mé rí quini cán já cáchí a já:

—Ndaja nanún.

Anda já nándacu ñehe dā cán tühun nū á já nacachi da já xihín á:

—Legión naní nde jáchi cuahá cùu nde.

<sup>10</sup> Ndáhví mé xíca tähví dā cán nū Jesús ña ná a táchan xíca a rí quíni cuhun ri. <sup>11</sup> Ta ndaja coo xíca nuu cuahá cóchí xíxáhan rí yati yúcu cán. <sup>12</sup> Sahá ña cán quéa naxica tähví mé ínima quini cán nū Jesús já cáchí ri já:

—Chindahá ndehe ná cuhun nde ndíhvi nde cóchí cása.

<sup>13</sup> Anda já náshan Jesús ñamajni ta chí naquee ínima quini náshánuu ini dā cán já nándíhvi rí ini cóchí xíca nuu cán. Ta tóco ndihi cóchí yóho xínu rí cuahán rí nánuu rí nū ndáyí já nájáqueta nuu rí mé rí ini tañuhú chí nacandaa rí ticuií já naxihí rí. Tá tühun iví mil cóchí nándihí saha.

<sup>14</sup> Ta ndaja coo mé dā ndáá cóchí cán nayihví dā chí xínu da cuahán dā caxi tühun da ña nayahá yóho nūú ñayivi nūu Gadara xihín nūú java ga ná ndíu yati cán. Naquee cuahá ñayivi mé cán candehé ná nácuu.

<sup>15</sup> Tá naxinu coo na nū íin Jesús naxini na fin coo dā náshánuu cuahá rí quini ini cán. Sa nándaca ndíxi da jáhmá ta sa nándicaxí tähví ini da. Chí nayihví ná. <sup>16</sup> Ta ná naxinu ña nacaja Jesús cán nácasáhá ná ndícani na nūú ñayivi ña nándoho dataa, dā náshánuu rí quini ini cán xihín ña nándoho cóchí viti.

<sup>17</sup> *Anda já nacasáhá na xíca tähví na nu Jesús ná ná quee a cuhun a.*

<sup>18</sup> Tá sa cuahán ndíhvi Jesús ini mé barco cán já naxinu dä nasañuhu rí quini ini cán já nacasáhá dä xíca tähví dä nu á ná ná quiāhva ñamani nu dá cuhun dä xihín á.

<sup>19</sup> Joo coó nasahan Jesús ñamani nu dá já nacachi a xihín dá:

—Cuanúhu vehún ta ndicani nuú na ve-hún ndaja náhnu ñaha nacaja Ndióxi xihún ta ndaja natahvi ini a sahun —nacachi a.

<sup>20</sup> Já naquee da cuahán dä ta nacasáhá da ndícani da nuú ñayivi ndíu java nuú cuéntá Decápolis tóco ndihü ña nacaja Jesús xihín dá. Chí cátontó na taa Joho na ña.

Tá nandaja vaha Jesús jahyí jahyí Jairo xihín in ña nacani ndaa ndáha jáhma á

(Mt. 9:18-26; Lc. 8:40-56)

<sup>21</sup> Tá nandihu nandihvi Jesús ini mé barco cán já naxinu coo a inga xoo tañuhu nuú naquixi a. Ta cán nanditútú cuahá ñayivi nu á mé yuhú tañuhu cán. <sup>22</sup> Já naxinu in dä naní Jairo, dä sáhndá chuun veñuhu. Tá naxini da Jesús nacaxítí dä sahá. <sup>23</sup> Ta ndáhví mé naxica tähví dä nu á já cachí dä já:

—Xihí jahyí i viti ñuhú. Caja ndó ñamani ná coho vehe chinúu ndó ndáha ndó jata ña ná ndivaha ñá já ná catacu ñá —nacachi da.

<sup>24</sup> *Anda já naquee Jesús cuahán xihín dä. Chí cándihü táhan mé ñayivi ndíco na jata cuahán na.* <sup>25</sup> Ta tañu ñayivi cán ndácaan in ñá quiñvi. Sa naxinu uxu ivi cuiá ndítahví nii ña. <sup>26</sup> Nandoño ndivaha ini ná nuú na cája tátá ñayivi ta sa najatíví ndihü ñá jiuhún ñá cátatá ña cúní ña. Joo a cuú ndivaha ñá ta janda cája ndee chágá ví a xihín ña. <sup>27</sup> Tá naxini joho ñá saha Jesús já cuahán ñá cayati ñá chí jata tañu tóco ndihü ñayivi cuahán jata mé a cán. Ta nacani ndaa ndáha ñá jáhma á <sup>28</sup> jáchí nacahán ña: “Tá ná cani ndaa cuití ndahá yo jáhma á já ndavaha í”, nacahán ña. <sup>29</sup> Ivi laá nähichí nii ña. Naxini cáxi ñá nandivaha ñá ta cuahán va cuéhe nandoho ña. <sup>30</sup> Jári Jesús ivi laá nacandaa ini a ña nandivaha in ñayivi nacaja ndee mé á. Já nacasáhá sándehé a chí jata tañu ñayivi. Já nacasáhá ndáca tuhún a ña já cachí a já:

—Ndá ndó nacani ndaa ndáha jáhmá i.

<sup>31</sup> Ta nanducú ñehe mé na xíca tuun xihín a cán tuhún nu á já cachí na já xihín á:

—Sándehé vaha mé ndó ndá quiāhva cándihü táhan ñayivi växi na xihín ndó ta

cáa ga mé ndó ndáca tuhún ndó ndá na nacani ndaa ndáha jáhma ndó —nacachi na.

<sup>32</sup> Joo cává nuu nuu Jesús sándehé a ndá na nacani ndaa ndáha jáhma á. <sup>33</sup> Ta mé ñá nandivaha cán tá nacandaa ini ñá ña nayaha já nacasáhá quiñi njuu ñá sahá ña yihví ña. Já naxinu ñá nacaxítí ña nu Jesús. *Anda já nacasáhá ña ndícani ñá nu á ndaja ca ña nacaja ña.* <sup>34</sup> *Anda já nacachi Jesús já xihín ña:*

—Jahyi a, nandivahú jáchí nacandúsún yehé. Cuanúhu ta a ndícani ga inún jáchí nandindaa cuhun —nacachi Jesús.

<sup>35</sup> Cáhan yií va Jesús xihín ñá cán tá naxinu java na naquixi vehe mé dä sáhndá chuun veñuhu cán já nacachi na já xihín dä:

—Sa naxihí va jahyi ndó. A jáquihvi ga ndó dä xíca jánhua ñayivi jan —nacachi na.

<sup>36</sup> Joo nacaja Jesús tátuhun co xíni joho a nuú nacahán na. Nacasáhá cachí a já xihín dä sáhndá chuun veñuhu cán:

—A cayihví tohún. Candusa cuití vún yehé —cachí a.

<sup>37</sup> Ta coó nasahan Jesús ñamani nuú na cuahá ndíu cán cuhun na xihín á. Na nasahan cuití xihín á cuú Pedro xihín Jacobo xihín Juan, dä cuú ñani Jacobo.

<sup>38</sup> Tá naxinu na vehe mé dä sáhndá chuun veñuhu cán já naxini a ndiváá ñayivi sácu ndivaha na cayuhú na ndíu na cán. <sup>39</sup> Já naquihvi a vehe ta já cachí a já:

—Ndávaha ndiváá nahá ndó ta sácu cuahá ndó. Ta coó naxihí toho ñáloho yóho joo quiñi cuití va ñá —nacachi a xihín na cán.

<sup>40</sup> Joo nacasáhá na sácu ndaa na a. *Anda já natavá Jesús tóco ndihü ñayivi jata véhe.* Na naquihvi xihín á nasaçuu tátá náná ña xihín na xíca tuun xihín á. Ta nacayati a nu cán dühü mé ñáloho cán. <sup>41</sup> Já natüin a ndáha ña ta nacasáhá cachí a já xihín ña:

—Talita, cumi —nacachi a. Mé tuhun yóho cúní cache a: Ñáloho cahán i xihún cuándezcoo.

<sup>42</sup> Ivi laá nandacoo ñáloho, ñá ndacan uxu ivi cuiá ta nacasáhá ña xíca nuu ña. Já nacatón töco ndihü ñayivi. <sup>43</sup> Joo nasa-handa Jesús chuun nuú na ndíu cán ña ná a cáxi tuhún na ña nayaha yóho nuú java ga ñayivi. Ta nasañhanda a chuun nuú ná ña nacahva na ña cuhxu mé ñáloho cán.

<sup>1</sup> Naquee Jesús cuanúhu á ñuu a. Já naquee ná xíca tuun xihín á cuahán na xihín á. <sup>2</sup> Tá naxinu quívi ndíquehe ndéé ná já nacásáhá Jesús jánahá ñayivi ini veñuhu cán. Ta cuahá ñayivi naxini joho nuú na-cahan ta chí nacatónó na ta ndáca tuhún xihín táhan na já cachí na já:

—Ndájá nacatiáhva náhá dà yóho ña já-nahá dà nu yo. Ndá naquixi ña ndíchí jíni dá. Ndá naquixi ñaha xitúhún cája da. <sup>3</sup> Á a juú dà yóho cíu dà cája chúun xihín yito, dà cíu jahyi María. Ta ñani da cíu Jacobo xihín José xihín Judas xihín Simón. Ta quiahva dà jan ndúu ñuu yóho xihín mí — cachí na ndáca tuhún táhan na.

Ta chí coó naxeen na candusa náhá ná:  
<sup>4</sup> Sáhá ña cán quéa nacachi Jesús já xihín ná:

—Vatí tóco ndíhi ñayivi cája cahnu na in profeta joo ná vehe dà xihín ná ñuu da co cándusa na dà —nacachi Jesús.

<sup>5</sup> Chí coó nacuu caja Jesús ña náhnu nuú na cán. Java va na quíhví cuití va nachinu a ndahá jíni ná já nandaja vahá a ná. <sup>6</sup> Ta chí nacatónó Jesús sáhá ña co cándusa na mé á. Sáhá ña cán quéa naquee Jesús cuahán jánahá ñayivi java ga ñuu válí ndúu yati cán.

Tá nachindahá Jesús uxu ivi ná xíca tuun xihín á caxi tuhun na nuú ñayivi sáhá mé á  
(Mt. 10:5-15; Lc. 9:1-6)

<sup>7</sup> Tá najánditaca Jesús ndíhxu ivi ná xíca tuun xihín á cán já nachindahá a ná tá ivi tá ivi cañehe táhan na cuhun ná. Ta nasa han ndéé nu ná ña cuu tavá ná íníma quini ñíhu ini ñayivi. <sup>8</sup> Ta nasa han a chuun nu ná ña ná a cañehe toho na ñahá cuhun na íchi. In tühún ña cuu cañehe na cuhun ná cíu in garrote, dó tiin ndaa na. Joo a cuu cañehe na ni yátí ni pan ni jiuhún.  
<sup>9</sup> Ndítahan cayihi na ndusa ta in tühún cotó ná ndítahan candixi na cuhun ná. <sup>10</sup> Ta nacachi a já xihín ná:

—Tá ná xínu coó ndó in vehe, canduu ndó mé vehe jan anda quiahva xínu quívi quee ndó cuhun ndó. <sup>11</sup> Ta ndá ñuu co cúní ná ndiquehe vahá na ndohó ta ni co cúní ná taa joho na nu cahán ndó já quéa cuahán queta ndó cuhun ndó ta catí ndó ña yáca saha ndó já ná náhá ña cuahán cuachi na cán jata mé va na. Mé a ndaa ná cahán i xihín ndó ña tá ná xínu quívi caja ví Ndióxi sáhá ñayivi ndúu ñuyíví já quéa jándoho chágá Ndióxi ini ñayivi ñuu jan sáhá ña coó nandiquehe na ndohó a juú ga tá quiahva nájándoho a

ini na ñuu Sodoma xihín Gomorra sáhá —nacachi Jesús xihín ná.

<sup>12</sup> Anda já naquee mé ná xíca tuun xihín á cuahán ná caxi tuhun na nuú ñayivi ña ndítahan nu ná ndicó coo ini na jándaco o na cuachi cája na. <sup>13</sup> Ta nátavá cuahá ná íníma quini nasañhu ini ñayivi ta tá naxojo ná sítí jíni ñayivi quíhvi já nandiváha na.

Tá naxihi Juan, dà nacaja ndúta ñayivi  
(Mt. 14:1-12; Lc. 9:7-9)

<sup>14</sup> Náñehé Herodes, mé dà cómí cuéntá sáhá ñayivi cán tuhun sáhá Jesús jáchí níi cíu nandicuítu nuu tuhun sáhá. Ta já cachí Herodes já sáhá Jesús:

—Á ajuú Jesús cíu á Juan, dà nájándúta ñayivi ta viti nanditacu tucu da. Sáhá ña cán quéa ín ndéé dà cája da tóco ndíhi ná cája dà yóho —cachí dà.

<sup>15</sup> Ta java na cachí na já:

—Á a juú dà yóho cíu in profeta tátuhun ná profeta nasaanduu sanahá ndiváha.

<sup>16</sup> Tá naxin joho Herodes ña yóho já nácasáhá cachí dà já:  
—Jivi ndusa dà yóho cíu Juan, dà nájándúta ñayivi, dà nasa hnda i chuu ná chitúhun ná jíco dà joo viti nanditacu tucu da —nacachi da.

<sup>17</sup> Jáchí mé Herodes yóho sá nasa hnda da chuun ña ná tiin na Juan, dà nájándúta ñayivi ta nacató ná dà já nachicaan ná da vecaa. Nacaja da ña yóho sáhá Herodías, ña nasa cuu nájíhí Felipe, ñani mé Herodes jáchí sá naquehe Herodes ña cacuu ñá nájíhí mé dà. <sup>18</sup> Ta nátiin Herodes mé Juan jáchí já nasa cahán Juan já xihín dà:  
—Coó ndítahan coún xihín nájíhí ñanún —nacachi da.

<sup>19</sup> Sáhá ña cán quéa naxojo ini Herodías xihín Juan. Ta cúní ña cahní ña dà joo a cuu caja ñá. <sup>20</sup> Jáchí yíhví Herodes Juan sáhá ña xíni dà ña cíu Juan in taa ndaa, dà co cája cuachi. Ña cán quéa coó nasa han Herodes námaní nu mé Herodías caja ña ña nuú xihín dà. Ta taa joho Herodes nu cahán Juan vatí cahví ivi joho ini da sáhá ña xíni joho da joo cajíi ini da taa joho da nu cahán dà. <sup>21</sup> Joo in quívi nanu ná Herodías cahní ña Juan jáchí nacaja Herodes in víco cuéntá quívi nacacu da. Mé já nacana da dà náhnu

ndúu nu dá ña ná quixi na cuxu na xihín dá. Ta nacana da tóco ndihi na cíu sacuahá nuú soldado xihín tóco ndihi ñayivi íñi saha estado Galilea.<sup>22</sup> Ta ndaja coo ñá cíu jahyi jíhí Herodías naquihvi ñá nuú ndúu na xixi na ta nacásahá ña xíta sahá ña nuú ndihi na cán. Ta nacatólo Herodes xihín na ndúu xíxi xihín dán dñá quiahva naxita sahá ña sahá ña cán quéa nacachi Herodes xihín ña:

—Ndá cúní mún, cacún ña nuú i jáchi quiahva i ña nuun —nacachi da.

<sup>23</sup> Ta nasaħan da tuhun da nu ñá cán ña quiahva da tóco ndihi ñaha ná caca ñá nuú dñá vatí ñahnú tähví ndaañundáhyi ña cómi dñá chuuñ saha nacachi da quiahva da nu ña.

<sup>24</sup> Já naquee ñá cán cuahán ñá caxi tuhún ña nu náná ña ña nacachi Herodes xihín ña. Ta nandaca tuhún ñá náná ña ndia caca ñá nuú dñá ta já nacachi mé náná ña já xihín ña:

—Caca yiquí jíni Juan, dñá jácandútä ñayivi —nacachi Herodías.

<sup>25</sup> Ta cama chá naquihvi tucu ñá cán nuú ndácaan Herodes já cachí ña já xihín dá:

—Viti núñu cúní ña ná quiahva mé ndó yiquí jíni Juan, dñá jácandútä ñayivi nuú i ini in cohó cahnu —nacachi ña.

<sup>26</sup> Ta ndaja coo nacásahá nacacuéha ndivaha ini Herodes sahá ña naxica ñá cán yiquí jíni Juan. Joo sahá ña sa nasaħan da tuhun da nu ña ta sa naxini joho tóco ndihi na ndúu xíxi xihín dñá cán ña nacachi da xihín ña sahá ña cán quéa ndúsa caja da ña cúní ña.<sup>27</sup> Chí ivi laá nachindahá dñá in soldado vecaa ña ná cañehe da yiquí jíni Juan quixa a.<sup>28</sup> Naxiñu soldado cán vecaa já nachitúñun dñá jico Juan já ñéhe da ña ini in cohó cahnu já nandiquiahva da ña nuú ña cán já nandiquiahva ña a nu náná ña.

<sup>29</sup> Tá nacandaqá ini na naxica xihín Juan ña nacaja na xihín dñá já nasaħan na nandiquehe na yiquí cuñu da já najánduxu na da.

Tá nasaħan Jesús ña cuxu uhun mil tqā  
(Mt. 14:13-21; Lc. 9:10-17; Jn. 6:1-14)

<sup>30</sup> Tá nandilhi já nandique tähán tucu na xíca tuun xihín Jesús xihín á já nacásahá ndícani na nuú á ña nacaja na xihín ña najáñahá ña.<sup>31</sup> Já nacachi Jesús xihín ña:

—Naha ndó ná cohó ndiquehe ndée loho í nu cúa xóo.

Nacachi a já xihín ná jáchí cuahán vaxi ñayivi xíca nuu cuahá chá na mé cán ta chí co sáhan na ñamani cuxu na.<sup>32</sup> Anda já nandihvi Jesús xihín ña xíca tuun xihín á

ini in barco já naquee na cuahán ná in nu cúa xóo.<sup>33</sup> Joo cuahá ñayivi nandicuni na Jesús tá naquee a cuahán. Já xínu cuahá ñayivi tá nuú ñuu cán cuahán sahá ná xoo nuú cuahán Jesús ini barco. Ta jihna ga mé ná naxiñu yuhú tañuhú cán a juú ga Jesús.<sup>34</sup> Tá nanuu Jesús barco cán já naxini a cuahá ndivaha ñayivi. Já natahvi ini a saha ná jáchí tá quiahva ndúu ndicachi, rí coó xito ho quiahva já ndúu na. Anda já nacásahá jáñahá cuahá ñaha nu ná.<sup>35</sup> Ta tá sa cähini cuahán naxiñu ña xíca tuun xihín á já cachí na já:

—Sa nähini wa ta a juú xoo nu ndúu ñayivi quéa yóho.<sup>36</sup> Ndindayí ndó ñayivi ná cuhún ña ñuu válí xihín nuú yati yóho já ná cueen na ña cuxu na —nacachi ná xíca tuun xihín Jesús.

<sup>37</sup> Tá nandilhi já nanducú ñehe Jesús tuhun já cachí a já:

—Mé ndó quiahva ndó ná cuxu na —nacachi Jesús xihín na cán.

Tá nacachi na já xihín á:

—Ndá cuu caja nde quiahva nde ña cuxu ná yóho jáchí jiyuhún cuahá ndivaha xíní núñu nde já cuu cueen nde pan cuxu ñayivi cuahá yóho. Ta ni a quéta toho ivi ciento denario —nacachi na.

<sup>38</sup> Já nacachi tucu Jesús já xihín na cán:

—Ndaja pan cómi ndó. Cuahán ndó can-dehé ndó.

Tá nasaħan na sándeħé na já cachí na já xihín á:

—Ín uhun pan xihín ivi tiyacá.

<sup>39</sup> Anda já nasaħnda Jesús chuun nu ná ña ná jácacqo na ndihi ñayivi tá tähndá nuú yucu cuíj cán.<sup>40</sup> Ta nasaċoo na java tähndá in ciento na ta java tähndá ivi jico uxu ña.<sup>41</sup> Anda já natiin Jesús ndifluhun pan xihín ndíví tiyacá ta sándeħé a indíví já nandiquiahva ndixahvi nu Ndióxi. Ta nasaħnda java pan já nasaħan ña nuú ña xíca tuun xihín á já ná ndicahna na ña nuú ñayivi. Tá quiahva já nasaħnda tiyacá já nanditahndá rí nu tóco ndihi ñayivi cán.

<sup>42</sup> Já naxixi tóco ndihi ñayivi cán ta naxutú tixi ndihi na.<sup>43</sup> Ta mé pan xihín tiyacá ña nacandoo naxixi na najáchutú na uxu ivi toyicá.<sup>44</sup> Ta naxixi uhun mil dataa cán.

Tá naxixa sahá Jesús nuú tañuhú  
(Mt. 14:22-27; Jn. 6:16-21)

<sup>45</sup> Tá nandilhi nacaja Jesús ña ná ndihvi ña xíca tuun xihín á ini in barco ña

cuhun cuéé ná inga xoo tañuhú já xinu na Betsaida nani ndíndayí a ñayivi já saa mé á cán ndique táhan xihín ná. <sup>46</sup> Ta tá sa nandindayí ndihí a ñayiví náquee a cuahán yúcu caca tähví a nu Ndióxi. <sup>47</sup> Tá nacuaá sa ndácaan barco mañhú tañuhú cán ta Jesús fín yií va nu ñuhú. <sup>48</sup> Ta naxini a ñá ndóho ini na xíca tuun xihín á jáchí a cuú jácaca na barco ini ticuií jáchí mé xoo nuú cuhun na vaxi tachi. Tá sa cuahán tíví já xíca sáhá Jesús cuahán nuú ticuií xoo nu ndúu na ta tá nacayati a nu ndúu na jalóho yaha saa cuhun a, nduu. <sup>49</sup> Joo tá naxini na xíca sáhá Jesús nuú ticuií nacahán na cuú á in ínima já nacayuhú cohó na. <sup>50</sup> Jáchí tóco ndihí na naxini ñahá ñayiví na. Joo nandicahán Jesús já cachí a já:

—Ndacú coo ini ndó jáchí yehé va cuú u. A yílví toho ndó —nacachi Jesús.

<sup>51</sup> Tá nandaa Jesús jata barco nu cándójó na já najáyaa tachi. Chí nacatontó mé na xíca tuun xihín á cán. <sup>52</sup> Jáchí a ñáha tacu vaha ini na sahá ñá nacaja Jesús tá nandaja cuahá mé á pan xihín tiyacá jáchí nandají tuun xín túni ná.

Tá nandaja vaha Jesús na quíhví ndúu ñundáhyí Genesaret  
(Mt. 14:34-36)

<sup>53</sup> Naxinu na inga xoo tañuhú ta nacató ndaa na barco yuhú tañuhú cán já nasaá na ñundáhyí Genesaret. <sup>54</sup> Tá quéta Jesús xihín na xíca tuun xihín á ini barco cán íví laá nandicumi ñayivi mé á. <sup>55</sup> Já xín na cuahán na ndijáá ñuu válí ndúu yati cán ndúcú na na quíhví já ñéhe na na nuú xito cásaa na nu Jesús. <sup>56</sup> Ta ndá ñuu nacuu nu quíhví Jesús cuú á ñuu náhnu á ñuu válí á yúcu já quéta ñayivi sácú na na quíhví yuhú íchi. Ta já xíca tähví na nu Jesús ñá na quiáhva ñamani caní ndaa ndáha ná a vatí loho yuhú jahmá a. Ta ndá na nacani ndaa ndáha mé á íví laá nandivaha na.

## 7

Ña cája quini ínimá ñayivi  
(Mt. 15:1-20)

<sup>1</sup> In tañu na fariseo xihín java na jánaha ley Moisés, na naquixi riuu Jerusalén nacayati na nu fín Jesús. <sup>2</sup> Ta naxojo ini na tá naxini na ñá ndúu coo java na xíca tuun xihín Jesús xíxi na tá cámari ndahá na tá quiáhva fín costumbre na Israel. <sup>3</sup> Jáchí jánaha na fariseo xihín ndihí na Israel ñá

a cuú cuxu na tá cámari ndahá vaha na tá quiáhva íin costumbre tásáhnu jíco ná.

<sup>4</sup> Ta jári jánaha na ñá tá ndíco cgo na sáhán na yahvi xín ñuhú ndahá na tá quiáhva íin costumbre na já ná cuu cuxu na. Ta íin cuahá ga nuú ñaha jánaha na ndítahan caja na tátuhun ñá ndícata na yáxi xíhi na xihín tindoho xihín cohó caa anda xito quíjí na viti, ndítahan ndicata na. <sup>5</sup> Anda já nacásahá na fariseo xihín na jánaha ley Moisés cachí na já xihín Jesús.

—Ndávaha co cája na xíca tuun xuhun tá quiáhva nacachi tásáhnu jíco yo caja í. Ndávaha xíxi na tá cámari ndahá na tá quiáhva sáhndá ley caja í —nacachi na. <sup>6</sup> Já nacachi Jesús já xihín ná:

—Mé a ndaa nacahán profeta Isaías saha ndo jáchí co cuú ndó tá quiáhva ndáa ndó.

Já nacahyí dä já:

Yuhú niñu uun na cája cáhnu na yehé.

Ta co cája cáhnu na yehé xihín ndinuhu íníma ná.

<sup>7</sup> Mé a uun va quéa cája cáhnu na yehé, jáchí ñá jánaha na nuú ñayivi cuú á ñá quíxi jíni mé cuití va na, nacahyí Isaías sanahá.

<sup>8</sup> Jáchí najándacoo ndó ñá nasaahnda Ndióxi nu ndó caja ndó ta nacásahá ndíco cáhnu ndó costumbre ñá nacaja tásáhnu jíco ndó. Ta sahá ñá yóho ndícata ndó tindoho xihín yáxi xíhi ndó ta cája ndó cuahá chágá costumbre yatá —nacachi Jesús xihín ná.

—Já nacachi tucu a já xihín ná:

—Sahá ñá cúní ndo candíco cáhnu ndó costumbre mé va ndó sahá ñá cán quéa najándacoo ndó ñá nasaahnda Ndióxi caja ndó. <sup>10</sup> Jáchí já cachí ley Moisés: “Caja cámún tátún xihín nánún”, ta jári cachí a já: “Ndá na ná chicaan cháhan jata tátá na á jata náná na, ndítahan quivi na”, cachí ley Moisés. <sup>11</sup> Joo ndohó jánaha ndó nuú ñayivi ñá cuu cahán na já xihín tátá na á náná na:

“A cuú chindeé e ndohó jáchí sa nasaucu xoo i ñaha i quiáhva i ñá nu Ndióxi”, cachí na.

<sup>12</sup> Tá ná cachí na ñá yóho já quéa co ndúsá ga chindeé na tátá na á náná na. <sup>13</sup> Quiáhva joho cája ndó sácu xoo ndó ñá nasaahnda Ndióxi nu ndó ta ndája ndó a tátuhun in ñaha ñá coó saha. Jáchí ndíco cáhnu ndó costumbre ñá najándadacoo tásáhnu jíco ndó nu ndó ta quiáhva já jánaha ndó nuú

jahyi ndó. Ta cuahá ga ñaha tátuhun ná yóho caja ndó —nacachi Jesús.

<sup>14</sup> Anda já nacana tucu Jesús ñayivi já nacachi a já xihin ná:

—Cuni joho ndihí ndó nu cahán i xihin ndo ta candaqá ini ndó ña. <sup>15</sup> Ni en ñaha xíxi ñayivi a cuú caja quini ínimá ná. Ña cuu ndaja quini ñayivi cútú ña quizix ínimá ná tátuhun ña cáhan na xihin ña caja na. <sup>16</sup> Na íin joho, ná cuni joho na —cáchí Jesús.

<sup>17</sup> Tá nandihu nandjhvi Jesús ini en vehe ta nacando cuahá ñayivi jatá véhe. Já nandaca tuhún na xíca tuuñ xihin á ña ndia cúní cachí a xihin tuhún nacahán xihin ná. <sup>18</sup> Ta nanducú ñehe a tuhún nu ná já nacachi a já:

—Á coó toho xín túni ri ndohó va, vaha. Jáchi co candaqá ini ndó ña tóco ndihí ñaha xíxi ñayivi a cuú caja quini a ná. <sup>19</sup> Jáchi ña xíxi ñayivi co xímu a ini ínimá ná joo xínu coo a tixi na já queta tucu a yiquí cuñu na —nacachi Jesús.

Xihin tuhún yóho nacachi Jesús xihin ná ña cuu cuxu na tóco ndihí ñaha ña xíxi ñayivi jáchi co ndája quini a ínimá ná. <sup>20</sup> Ta nacachi tucu Jesús já:

—Ña cuu ndaja quini ñayivi cútú ña quizix ínimá ná tátuhun tuhún cáhan na xihin ña caja na. <sup>21</sup> Jáchi chí ini ínimá ná queta ña cahví nüu ini na tátuhun ña cáhvi ini in datqa coo da xihin nájíshí ñani táhan da á tá xíca ini da coo da xihin in náñáha, ña co cuú nájíshí da á tá cáhvi ini na cahní na ndii. <sup>22</sup> Ta sa mé cán queta ña xíca ini na caja cuñhá ná ta jári xíca ini na coo cuahá ndivaha ñaha nu ná. Ta sa mé cán queta ña nüu caja na ta cáhan na ña tuhún ta caja na tá nüu cuahí ta cáhívhi ini na ta cátóo na cáhan na sahá táhan na ta caja cáhnu na mé ná ta quíhví caja na. <sup>23</sup> Tóco ndihí ña nüu yóho ña cáhvi ini ñayivi caja na, quizix a ínimá ná ta ndája quini a ná.

Tá nacandeé ini in ñá tóho Jesús  
(Mt. 15:21-28)

<sup>24</sup> Já naquee Jesús cuahán chí ñundáhyi cuénta Tiro xihin Sidón. Ta naquihvi a in vehe coo a ta co cúní a ña ná candaqá ini na ñuu ña iin a cán joo coó nacuu coo jehé a. <sup>25</sup> Chá va ta nacandaqá ini in náñáha ña íin Jesús vehe cán. Ta íin in jahyi jíhí ña, ña ndácaan ínimá quini ini. Ta ndaja coo nasaqá ña ta nacaxtí ña sahá Jesús. <sup>26</sup> Ta cuú ña ñá tóho cuénta ñundáhyi Sirofenicia. Ta naxicá tahví ña nu Jesús ña ná tavá a

ínimá quini ndácaan ini jahyi ña. <sup>27</sup> Anda já nacachi Jesús já xihin ña:

—Jihna ñúhú ndítahan nuú i chíndeeé e ná Israel anda jáví cuu chindeé e ndohó, ná tóho jáchi íin en tuhún ta cáhí a ña a váha toho candaqá í pan xixi ná valí ta jácana í ná nuú tina —nacachi Jesús.

<sup>28</sup> Anda já nacachi mé ñá tóho cán já xihin Jesús:

—Mé a ndaa cáhan ndó, xitoho. Joo anda tina, rí ndúu tixi mesa xixi rí ña jácuyu jahyi xitoho rí —nacachi ná.

<sup>29</sup> Anda já nacachi Jesús já xihin ña:

—Vaha va nacahún. Sahá ña cán quéa cachí i xihyn cuanúhu viti jáchi sa naqueta va ínimá quini nasañdacaan ini jahyún —nacachi Jesús.

<sup>30</sup> Ta tá naxinu ñá vehe já naxini ñá cándúhu jahyi ñá nuú xito ta sa coó ga ínimá quini cán ndácaan ini jahyi ña.

Tá nandaja vaha Jesús in da jóho, da a cuú cahan

<sup>31</sup> Naquee Jesús ñundáhyi cuénta Tiro ta nayaha chí ñuu Sidón xihin java ga ñuu cuénta Decápolis cán já naxinu coo a tañuhú Galilea. <sup>32</sup> Cán ñehe na in dätaa nacasaa na nu Jesús. Cútú dá da jóho ta cuú dá da níhi. Ta naxicá ná nu á ña ná chinúu a ndáha á jíni dá já ná ndivaha da. <sup>33</sup> Já natavá xoo Jesús dá tañu ñayivi cán. Já najáquihi a in inducu ndáha joho da ta naxilnu a tójíi a já nacani ndaa a tójíi a yáa dá. <sup>34</sup> Tá nandihu nasañdehé a indívú já ndisaqá ndisaqá ínimá á já nacachi a já xihin dá:

—Efata —nacachi a ta ña yóho cúní cachí: Ná ndinuña.

<sup>35</sup> Ivi láá nandinuña joho mé dä jóho cán ta nandivaha yáa dá já nacasáhá cáhan vaha da. <sup>36</sup> Ta nasañnda Jesús chuun nuú ndihí na ña ná a cáxi tuhún na ña yóho nuú ni in ñayivi. Joo tá nacachi a ña yóho já quéa ví ga ví cáhan na. <sup>37</sup> Chí cátontó ndihí ñayivi tá xíni joho na ña ta cáhan xihin táhan na já cachí na já:

—Vaha ndivaha caja Jesús tóco ndihí ñaha jáchi jánditacu a na jóho ta jándicahán mé á na níhi —nacachi na.

<sup>1</sup>Mé já nanditútú tucu cuahá ñayivi ta chí coó mé ñaha cuxu na. Anda já nacana Jesús na xíca tuun xihín á já nacachi a já xihín ná:

<sup>2</sup>—Táhndá ndiváha ini i sahá ñayivi yóho jáchi sa naxinu uní quívi ndíu na xihín i yóho ta chí coó ga ñaha cuxu na. <sup>3</sup>Ta co cúní chindahá i na nuhú na vehe na jáchi cámáni cuxu na ta tihva náá cuitá na ta cuyu na fchí jáchi sa cání ndiváha náquixi java na —nacachi Jesús.

<sup>4</sup>Anda já nacachi na xíca tuun xihín á cán já:

—Ndáa cáhan ndo. Ta ni mí, a cuú quiahva í ña cuxu na jáchi coó toho ñayivi ndíu yóho nuú cueén ña cuxu na —nacachi na.

<sup>5</sup>Anda já nandaca tuhún Jesús na já cachí a já xihín ná:

—Ndaja pan cómí ndo.

Já nacachi na cán já:

—Usa ña.

<sup>6</sup>Anda já násahnda Jesús chuun nuú ñayivi ña ná cacoo na nu ñuhú. Já natíin a ndíhusa pan cán. Ta nandiuiyahva ndix-ahvi nu Ndióxi. Já násahnda java ña ta násahan ña nuú na xíca tuun xihín á cán ña ná ndicahnda na ña nuú ñayivi cuahá cán. <sup>7</sup>Ta jári násacomí na java tiyacá válí ta nandiuiyahva mé á ndixahvi nu Ndióxi sahá ri já násahnda chuun nu ná ña ná ndicahnda na ri. <sup>8</sup>Ta naxixi tóccó ndihi na ndíu cán anda quiahva nachutú tixi na ta tá nandihi najáchutú na janda usa toyicá xihín ña nacando. <sup>9</sup>Tátuhun comí mil ñayivi naxixi. Ta tá nandihi já nájándidayí Jesús na. <sup>10</sup>Já nandihvi a ini barco xihín na xíca tuun xihín á já náquee na cuahán na nündáhyi cuénta Dalmanuta.

Cúni na fariseo ña ná caja Jesús in ña xitúhún nu ná

(Mt. 16:1-4; Lc. 12:54-56)

<sup>11</sup>Anda já naxinu na fariseo nu Jesús já nácasáhá ndítuhún na xihín á. Ta sahá ña cúní na coto ndojó cuití ñahá na sahá ña cán quéa naxica na nu á ña ná caja in ña xitúhún, ña quixi indíví já ná candaa ini na á mé a ndáa cuú á ña nachindahá Ndióxi. <sup>12</sup>Ndísaa ndísaa ini Jesús jáchi ndíhi ini a xihín ná já cachí a já:

—Ndá sahá quéa xíca na yóho ña ná caja i in ña xitúhún. Mé a ndáa ná cahán i xihín ndó ña a cája i ñaha xitúhún nuú na yóho —nacachi a.

<sup>13</sup>Anda já nandihvi tucu Jesús ini mé barco cán ta najándaco a na cán já náquee a cuahán inga xoo tañuhú.

Tá cahán Jesús sahá ña jángħaq na fariseo  
(Mt. 16:5-12)

<sup>14</sup>Ta ndaja coo nandindójó mé na xíca tuun xihín a cán cañehe na ñaha cuxu na joo nasahjin in pan cuití va xihín ná ini barco cán. <sup>15</sup>Anda já násahnda Jesús chuun nu ná já cachí a já xihín ná:

—Candehé ndo. Cuénta coo ndó xihín na fariseo ta xihín na cíu cuénta Herodes jáchi ña jánahá na cíu á tátuhun yúsä naxaq ña cáva táhan na xihín harina cávaha na pan —nacachi Jesús.

<sup>16</sup>Coó nacandaa ini na ña cachí a ña cán quéa nácasáhá ndítuhún xihín táhan na já cachí na já:

—Sahá ña coó pan ñéhé vaxí sahá ña cán quéa cahán Jesús ña yóho xóhqo —nacachi na.

<sup>17</sup>Sa nacandaa ini Jesús ña cahán na ta já nácasáhá cachí a já:

—Mé ndó cachí ndó ña coó pan ñéhé vaxí jáchi co cándaa ini ndó ta ni co cája ndó cuénta sahá ña jánahá i. Nandaji tuun xíní túni ndo. <sup>18</sup>Cíu ndó tátuhun na co tíví nuú xihín na coó joħo jáchi vatí xíní ndo ta xíní joħo ndó joo co cándaa ini ndó. Á co ndícuħun ini ndó ña nácaja i <sup>19</sup>tá nandicahnda i ndíħuhun pan nuú uhun mil tħa. Ndaja toyicá nanditaca nácaja ndó xihín ña nacando cán —nacachi Jesús.

Já nanducú ñehe na tuhún nu á:

—Uxu ivi ña.

<sup>20</sup>Ta nacachii tucu Jesús xihín ná já:

—Ta nándicahnda i usa pan nuú comí mil ñayivi, ndaja toyicá nanditaca nácaja ndó xihín ña nacando —nacachi a.

Já nanducú ñehe na tuhún nu á:

—Usa ña.

<sup>21</sup>Anda já nacachi a já xihín ná:

—Cámáni yill va cándaa ini ndó —nacachi a.

Tá nandaja vaha Jesús in da cuáa nuu Betsaida

<sup>22</sup>Tá nandihi naxinu na ñuu Betsaida já ñehe na in da cuáa nácasaa na nu Jesús. Já naxica taħbi na nu á ña ná cani ndaa ndáha á da. <sup>23</sup>Ta chí natíin a ndáha dà cuáa cán já nátaħvá a da yuhú ñuu. Nachindaa töjí a nduchú nuú dà já nachinuú a ndáha á jini dà. Já nandaca tuhún a da á cuu candehé da. <sup>24</sup>Ta já nacachi dà cán já sándehé da:

—Sándezhe é java taa joo tá quiāhva ndáa yíto quiāhva já ndáa da xíca nuu da xíní i —nācachi da.

<sup>25</sup> Anda já nāchinúu tucu Jesús ndáha á nduchú nuú da já nāsandehé ndaa da. Anda jáví nāndivāha nduchú nuú da ta nācasáhá sándezhe caxí vāha da tóco ndihí ñaha. <sup>26</sup> Ta nāchindahá Jesús da cuanúhu da vehe da já nācachi a já xihín dá:

—A ndíhvún mahñú ñuu ni a ndícanún ña yóho nuú ñayivi ndúu jan —nācachi a.

Tá caxí tūhun ndaa Pedro ña cúu Jesús mé a nāchindahá Ndióxi cacomí cuénta sahá ñayivi (Mt. 16:13-20; Lc. 9:18-21)

<sup>27</sup> Tá nāndihí já nāsahan Jesús xihín na xíca tuun xihín á ñuu válí ndácaan Cesarea cuénta Filipo. Nani xíca na cuahán na íchi nāndaca tūhún a na já cächí a já xihín ná:

—Ndá da cächí ñayivi cúu yehe —nācachi a.

<sup>28</sup> Já nācachi na cán já:

—Java na cächí na ña cúu ndó Juan, da nācaya ndúta ñayivi. Ta java na cächí na ña cúu ndó profeta Elías. Ta java na cächí na ña cúu ndó in táhan profeta nāsanduu sahá —nācachi na.

<sup>29</sup> Anda já nāndaca tūhún tucu Jesús na já cächí a já xihín ná:

—Ta ndohó ri, ndá da cächí ndo cúu u —nācachi a.

Anda já nācachi Pedro já xihín á:

—Mé ndó cúu Cristo, mé a nāchináhá Ndióxi cacomí cuénta sahá ñayivi —nācachi da.

<sup>30</sup> Anda já nāsahnada Jesús chuun nuu ná ña ná a caxí tūhun na ña yóho nuú ni in ñayivi.

Caxí tūhun Jesús ña quivi a  
(Mt. 16:21-28; Lc. 9:22-27)

<sup>31</sup> Anda já nācasáhá jánaha Jesús nuu ná ña tandaa quivi ndoho nādivāha ini mé á, da nāchindahá Ndióxi nduu ñayivi. Ta ña sacuāha veñuhu xihín na sacuāha nuú jutu xihín na jánaha ley Moisés candají na mé á janda quiāhva ná cahní ñahá ná. Joo tá ná xinu uní quivi nditacu tucu a. <sup>32</sup> Caxí nādivāha nācahan Jesús ña yóho xihín na ta chí anda já nātavá xoo Pedro Jesús já nācasáhá jánani da a sahá ña nācachi a xihín ná. <sup>33</sup> Joo nācaya Jesús ta nāndicoto nihni a nuú na xíca tuun xihín á já nācasáhá ndícuéhe a xihín Pedro já cächí a já xihín dá:

—Cuáhán quee Satanás, rí cúu tiñáhá sacuāha. Co íin xíní túnun tá quiāhva íin xíní túni Ndióxi jáchí cahvi inún tá quiāhva cahvi ini ñayivi ñuyíví yóho —nācachi a.

<sup>34</sup> Anda já nācana Jesús na xíca tuun xihín a xihín java ga ñayivi já nācachi a já xihín ná:

—Ndá na cuni candico yehe ndítahan nu ná ndihí chágá ini na sahá yehe a juú ga sahá mé ná. Ta ndítahan coo tiahva na ndoho ini na sahá yehe. Ta coó caja toho a ná quivi na sahá i. <sup>35</sup> Jáchí ndá na cátóó coo chágá ñuyíví yóho ndihí sahá ná. Joo ndá na sáhan ndee ini quivi sahá i xihín sahá tūhun Ndióxi, ñehe tāhvi ná catacu na anda ama cáa quivi. <sup>36</sup> Vatí ná quee vaha in na ñuyíví yóho ta cómi na tóco ndihí ñaha ñuyíví joo ndá chuun quéa tá nu ndihí ndihí sahá ná indayá. <sup>37</sup> Jáchí ni in ñaha a cuú chahvi in na sahá ínimá ná ná a cühun ná indayá. <sup>38</sup> Candehé ndo. Mé tiempo viti cája ñayivi cuahá cuachi ta coó xéen na caja na ña sáhdá Ndióxi nu ná. Ta ndá na cácahan nuu sahá i xihín sahá tūhun vāha cahán i quiāhva já cacahan ri nuú yehe, da nāchindahá Ndióxi nduu ñayivi sahá ná cán tá ná quixi i cacomí i cuénta sahá ñayivi. Mé tiempo cán ñaha ndaja cahnu cúu yehe jáchí quixi i xihín ndee Ndióxi ta xihín ndee tátó yii mé á viti —nācachi Jesús.

## 9

<sup>1</sup> Ta nācachi tucu Jesús já xihín ná:

—Mé a ndaa ná cahán i xihín ndo. Java na ndúu yóho a quivi toho na janda quiāhva ná xinu quivi cuni na cacomí Ndióxi cuénta sahá ñayivi xihín ndee mé á —nācachi a.

Tá nāndijama Jesús quiāhva cáa  
(Mt. 17:1-13; Lc. 9:28-36)

<sup>2</sup> Tá nāyaha iñu quivi já nāndaa Jesús in yucú jíco ta ndáca táhan Pedro xihín Jacobo xihín Juan cuahán na xihín á. Ta nu tāhyí mé na cán nāndijama quiāhva cáá. <sup>3</sup> Ta a juú quiāhva nāndiyehé jáhmá ndíxi a chí nāndiyaa cachi ña. Ni in ñayivi ñuyíví yóho a cuú ndicata yaa nāhá jáhmá tá quiāhva yaa nānduu jáhmá á. 'Anda já na xíca tuun xihín Jesús nāxini na Elías xihín Moisés ndúu na ndítúhún na xihín á. <sup>5</sup> Ta já nācachi Pedro já xihín Jesús:

—Maestro, vaha cúu ndúu nde yóho jáchí já cuu cavāha nde uní vehe tiyahvá válí. In

a coo mé ndó ta inga coo Moisés ta inga coo Elías —nacachi da.

<sup>6</sup> Nayihví ndiváha na xíca tuun xíhín Jesú斯 sahá ña cán quéa co xíni mé Pedro ndía cása cáhan va da. <sup>7</sup> Anda já nánuu in víco jatá ná já najájhvi a na ta tañu víco cán naxini joho na ña cáhan in a já cachí a já:

—Da yóho cúu jahyi maní i. Cuni joho ndó nu cáhan da.

<sup>8</sup> Ta tá nandicoto nihni na sa coó ga na naxini na ta jandá in túhún Jesú斯 naxini na.

<sup>9</sup> Tá sa cuahan nuu na jiní yúcú cán já nasañhunda Jesú斯 chuun nu ná ña ná a cáxi tūhun na nuyú ñayivi ña naxini na anda quiahva ná xínu quívi nditacu tucu mé a náchindahá Ndióxi nduu ñayivi. <sup>10</sup> Sahá ña cán quéa nachijehé tūhun na sahá joo nanditúhún xíhín tāhan na ndíá cúní cachei Jesú斯 tá nacachi a ña nditacu tucu a. <sup>11</sup> Anda já nacásahá ndáca tūhún na mé a já cachí na já xíhín á:

—Ndávha cachí na jánahá ley Moisés ña ndítahan quixi jihna ñuhú profeta Elías —nacachi na.

<sup>12</sup> Já nacachi Jesú斯 já xíhín ná:

—Mé a ndaa jihna ñuhú quixi Elías ta ndaja vaha ndihi da ñaha. Á co xíni ndó ndá quiahva cachí tūhun Ndióxi sahá da chindahá Ndióxi nduu ñayivi. Cáchi a ña ndoho ini da ta candají na da. <sup>13</sup> Joo cáxi tūhun i nu ndó ña sa naquixi va Elías ta nacaja na tá quiahva cúní mé va na xíhín dá ta tá quiahva cachí tūhun Ndióxi ndoho da quiahva já nandoho da —nacachi Jesú斯.

Tá nandaja vaha Jesú斯 in tqa loho ndácaan íníma quini ini

(Mt. 17:14-21; Lc. 9:37-43)

<sup>14</sup> Tá nandihu já nandicó coo Jesú斯 xíhín na cán nu ndúu java ga na xíca tuun xíhín a cán. Já naxini na cuahá ndiváha ñayivi nacava nuu na na cán. Jári ñuhú java na jánahá ley Moisés cání tāhan yúhu ná xíhín na xíca tuun xíhín Jesú斯. <sup>15</sup> Tá naxini ñayivi yóho Jesú斯 chí nacatontó ndihi na já nandava nihni na nasañhan na cáhan Ndióxi ná xíhín á. <sup>16</sup> Anda já nandaca tūhún Jesú斯 na já cachí a já xíhín ná:

—Ndá sahá ndítúhún ndó xíhín na jan —nacachi a.

<sup>17</sup> In da cándichi cán nanducú ñehe da tūhun nu Jesú斯 já cachí da já:

—Maestro, yóho ñéhe e jahyí i nacasaá i nu ndó jáchi ndácaan in íníma quini ini da ta nandaja níhi ñahá ri. <sup>18</sup> Ndá nacuu tím rí da, jándacava rí da nu ñuhú ta já cásahá cáná cuyu chiquiñu yúhu dá ta cáhñá ñuhú dá. Xíhín ña yóho cásahá jácuitá rí da. Ta sa naxicá i ñamani nuú na xíca tuun xíhín ndó ña tavá na mé íníma quini yóho joo coó nacuu caja na ña —nacachi da.

<sup>19</sup> Já nacachi Jesú斯 já xíhín ná:

—Ndávhi nahá nacuu ndó jáchi sa cuahá ndiváha quívi íín i xíhín ndó ta a ñahá candéé ini ndó yehé. Ta chí co ndee a in i xíhín ña cája ndó. Taxi ndó da loho jan chóho —nacachi a.

<sup>20</sup> Chí ñéhe na da loho cán nasaá na nu Jesú斯. Ta tá naxini mé rí quini ndácaan ini da loho Jesú斯 ivi laá nacaja rí ña ná quivi yíhí da loho cán já tíví núu da nandicava da nu ñuhú xíhín chiquiñu cáná yúhu dá. <sup>21</sup> Anda já nandaca tūhún Jesú斯 tátá da cán já cachí a já xíhín dá:

—Á sanañá ndóho jahyún ña yóho —nacachi a.

Já nacachi tátá da cán já:

—Janda tá loho da cája rí já xíhín dá. <sup>22</sup> Ta cuahá tanú chícaan rí quini da iri yáví núhu xíhín ini ticuij viti ña cahní ñahá rí cúní rí. Ña cán quéa xíca tähví i nu ndó ña ná candahví loho ini ndó ndehé ta chindeé ndó ndehé tá ta cuu caja ndó ña —nacachi da.

<sup>23</sup> Anda já cachí Jesú斯 já xíhín dá:

—Cuu caja i ña tá cándusún yehé. Jáchí cuu caja i tócó ndihi ñaha xíhín ñayivi tá cándezé ini na yehé —nacachi a.

<sup>24</sup> Ivi laá nacayuhú tátá mé da loho cán já cachí da já:

—Cándusa vi joo chindeé ndó yehé ná candusa chágá i —nacachi a.

<sup>25</sup> Ta tá naxini Jesú斯 ña nacásahá chútú cuahá ñayivi já nandicuehé mé a xíhín mé rí quini cán já cachí a já xíhín rí:

—Íníma quini, rí nandaja níhi ta nandaja joho da loho yóho, sáhndá i chuuñ nuú ña ná queún cuhun ta a ndicó coo gaúñ nájihvún ini da —nacachi a.

<sup>26</sup> Anda já nacayuhú cóhó rí quini cán já nasañhi yíhí tucu rí da. Chí naqueta rí cuahá rí ta najándacoo rí da loho cán tátuhun in ndíj sahá ña cán quéa nacásahá cachí ñayivi ña sa naxili va da jan. <sup>27</sup> Joo natiiñ Jesú斯 ndáhá dá já nandiñehe a da. Ta já nandaca ndichi da cán.

<sup>28</sup>Ta tá nandihvi Jesús ini in vehe xihín na xíca tuun xihín á já nandaca tuhún jehé na mé á já cachí na já xihín á:

—Ndávaha coó nacuu caja ndehe tavá nde ínimá quini nasandacaan ini dā loho jan —nacachi na.

<sup>29</sup>Já nacachi Jesús já xihín ná:

—Tá cúní ndó tavá ndo tá ínimá quini tahan ríyóho ndítahan cajuhun ndó ta caca tähví ndo nu Ndióxi —nacachi a.

Cáxi tūhun tucu Jesús ndaja coo nuú quiwi a

(Mt. 17:22-23; Lc. 9:43-45)

<sup>30</sup>Tá náquee na cuahán ná nayaha na chí estado Galilea ta co cúní Jesús ná ná candaan ini nayivi <sup>31</sup>jáchí jánahá Jesús nuú na xíca tuun xihín á cúní a. Ta cachí a xihín ná ná vaxi quiví ndiquiahva nayivi mé á, dā nachindahá Ndióxi nduu nayivi ndahá nayivi ta cahní náhá na joo tá ná yaha uní quiví nditacu tucu a. <sup>32</sup>Joo coó nacandaa ini na ná cáhan xihín ná ta yihví na ndaca tūhún na mé á sahá tūhun cáhan.

Ndícani Jesús ndá ná cúní na ím chágá sahá

(Mt. 18:1-5; Lc. 9:46-48)

<sup>33</sup>Tá ndaja coo náxinu ná nuu Capernaum ta tā sá ndúu na vehe já nácasáhá ndáca tūhún Jesús na xíca tuun xihín á já cachí a já xihín ná:

—Ndíá ndítuhún ndó sahá tá vaxi ndó íchi —nacachi a.

<sup>34</sup>Joo coó nanducú ñehe ná cán tuhun nu á jáchí íchi nuú naquixi na nandituhún cuahá ná sahá ndá dā cútí dā cáhnu chágá tañu mé ná. <sup>35</sup>Anda já násaco Jesús já nácaná ndílxu ivi dā xíca tuun xihín á já nácasáhá cachí a já xihín dá:

—Ndá ndó, ná cúní cacuu ná nu cutí ndítahan ndaja nánu ndó mé ndó cacuu ndó ná nu ndíhi ta caja ndíví ndo nu ndíhi na —nacachi a.

<sup>36</sup>Tá nandihí já nácaná Jesús in dā loho já nácasu a dā mahnú nu ndúu na já násañehé ndaa da já nácasáhá cachí a já:

<sup>37</sup>—Ndá ná ndíquehe vaha in dā loho tátuhun dā yóho sahá ná quíhvi ini na yehé, ndíquehe ri na yehé viti. Ta ndá na ndíquehe yehé, a juú in tühún yehé ndíquehe na vaha jáchi ndíquehe ri na tátá i, mé a nachindahá yehé —nacachi a.

Tá ndúu java ná ndíquehe sahá yo já quéa cuahán ná xoo í

(Mt. 10:42; Lc. 9:49-50)

<sup>38</sup>Anda já nacachi Juan já:

—Maestro, naxini nde in dataa ta cáhan dā quiví mé ndó já tavá dā ínimá quini náhu ini nayivi. Joo co xíca nuu da xihín yo sahá ná cán quéa ná nacachi da.

<sup>39</sup>Joo nacachi Jesús já:

—A cáji nuu ndó nu dā jáchí tá cája in na ná xituhún xihín quiví i já quéa a cuú caca nuu na cáhan náhu na sahá i. <sup>40</sup>Jáchí ndá ná co ndíndita caja xíxi xohó, mé ná cán cuahán na xoo mí. <sup>41</sup>Ta ndá ná ná quiyahva in náhu nu ndó vatí in yáxí tucuí sahá ná ndíco ndó yehé mé a ndaa ná cáhan i xihín ndo ná chahvi tá chahvi Ndióxi sahá námaní cája na xihín ndó —nacachi Jesús.

Tá jándacava náyivi inga na nuú cuachi

(Mt. 18:6-9; Lc. 17:1-2)

<sup>42</sup>Ta cachí tucu Jesús já:

—Ndá ná ná jándacava in ná ndáhví, ná cán deé ini yehé nuú cuachi jánda vaha chágá ná candicó in yú yojó jíco ná ta ná ndíhi sahá ná cáhna tñuhú. <sup>43</sup>Tá ndáhví ndó quéa jándacava ndohó nuú cuachi chítuhún ndó a jáchí vaha chágá ná cuhun ndó indíví xihín in tühún ndáhví ndo a juú ga cuhun ndó xihín ndíví ndáhví ndo indayá nuú co ndáhví náhu cayí. <sup>44</sup>Ta cán ni tucuí co xihí ni náhu cayí co ndáhví. <sup>45</sup>Tá sahá ndó quéa jándacava ndohó nuú cuachi chítuhún ri ndó nájan va jáchi vaha chágá ná cuhun réenco ndó indíví xihín in tühún sahá ndo a juú ga cuhun ndó xihín ndíví sahá ndo indayá nuú co ndáhví náhu cayí. <sup>46</sup>Ta cán ni tucuí co xihí ta ni náhu cayí co ndáhví.

<sup>47</sup>Tá nduchú nuú ndó quéa jándacava ndohó nuú cuachi tavá ndó ná jáchí vaha chágá ná coo cóhó nuú ndó cuhun ndó nuú cacomí Ndióxi cuéntá sahá ndo a juú ga ná coo ndíví nduchú nuú ndo cuhun ndó indayá.

<sup>48</sup>Ta cán ni co xihí tucuí ta ni náhu cayí co ndáhví.

<sup>49</sup>Tá quiyahva ndíví jiuhún cuáan cája náhu cayí quiyahva já ndíví ínimá nayivi xihín ná ndóho ini na. Ta tóco ndíhi náha jocó na ná Ndióxi chícaan ná nii yívi na já co tíví a. <sup>50</sup>Vaha va cája nii jáchí xihín nii ndíhají ná xíxi na joo tá co óhva ná já a cuú caja óhva tucu yó a já ná caja chúun tucu ná. Ndítahan nu ndóho caja ndó tátuhun cája nii ta já canduu vií xihín tahan ndó —cachí Jesús.

## 10

*Jánahqá Jesú斯 nuú na sa nətandahqá ña co ndítahan jándacoo táhan na*

(Mt. 19:1-12; Lc. 16:18)

<sup>1</sup> Naquee Jesú斯 nuú Capernaum cuahan. Já násahan estado Judea xihín ñundáhyi íin inga xoo yuta Jordán. Cán nácasáhá nanditaca tucu ñayivi nu á chí jánahqá tucu a na tá quiáhva nácaan mé á caja. <sup>2</sup> Anda já nácatati java na fariseo nu Jesú斯 sahá ña coto ndojó ñahá na cúní na. Nácati na já xihín á:

—Á núná nyú in dñataa jándacoo da ñajíhí dñ a —nácati na.

<sup>3</sup> Já nanducú ñehe Jesú斯 tñuhun nu ná já cachí a já xihín á:

—Ndaja cachí ley Moisés ña ndítahan caja ndó —nácati a.

<sup>4</sup> Anda já nácati na cán já:

—Tá ná quiáhva in dñataa in tutu nu ñajíhí dñ sahá ña cúní dñ jándacoo da ña já quéa sáhan ley Moisés ñamani jándacoo da ña —nácati na.

<sup>5</sup> Anda já nácati Jesú斯 já xihín á:

—Sáhan ley Moisés ñamani yóho nu ndo jáchi tñahyí ndiväha ínimá ndó. <sup>6</sup> Joo janda mé sahá tá nácatavaha Ndióxi ñayivi nu cuítí já nácatavaha in tñuhún tñaa xihín in tñuhún ñahá. <sup>7</sup> Sahá ña cán quéa ndítahan nuú dñataa jándacoo da tñata dñ xihín náná dñ já ndique tñahan da xihín ñajíhí dñ. <sup>8</sup> Já xinu ndíví na cán cacuu na tñuhún in víxi yíquí cuñu na sahá ña cán quéa co cúu ga na ívi yíquí cuñu sahá ña nanduu na tñuhún in tñuhún yíquí cuñu. <sup>9</sup> Sahá ña cán quéa co ndítahan nuú na cán janí tñahan na ña najácatáhan Ndióxi tñatandahqá na —nácati Jesú斯 xihín á.

<sup>10</sup> Ta tñ a nandicó coo tucu na vehe já nácasáhá tucu na xica tuun xihín a cán ndáca tñuhún na Jesú斯 sahá ña nácati. <sup>11</sup> Ta nanducú ñehe Jesú斯 tñuhun nu ná já nácati a já:

—Tá ná jándacoo in dñataa ñajíhí dñ ta tñandahqá dñ xihín inga ña ñahá já quéa caja da cuachi nu ñajíhí nyú dñ jáchi íin da xihín inga ñahá. <sup>12</sup> Ta tñ ná jándacoo in ña ñahá yíj ña ta tñandahqá ña xihín inga da caja ri ña cán va cuachi nu yíj ña jáchi íin ña xihín inga dñataa —nácati Jesú斯.

*Caja yii Jesú斯 na valí  
(Mt. 19:13-15; Lc. 18:15-17)*

<sup>13</sup> Anda já ñehe na java na valí nácasáa na nuu Jesú斯 ña ná cani ndaa ndáha á na. Joo mé na xica tuun xihín a cán nácasáhá na caja cugeh na xihín mé na ndáca na valí cán.

<sup>14</sup> Tá naxini Jesú斯 ña caja na já nandicuehe a já cachí a já xihín na xica tuun xihín á:

—Quiahva ndó ñamani ná quixi na valí nuú i ta a cájí nuu ndó nu ná jáchi cocomí Ndióxi cuénta sahá ñayivi tá ná caja na tá quiáhva caja na valí yóho. <sup>15</sup> Mé a ndaa ná cahán i xihín ndó ndá na co cúní ndiquáhva na mé ná ndáha Ndióxi tñuhún caja na valí yóho já quéa a cùu cacomí Ndióxi cuénta sahá ná —nácati a.

<sup>16</sup> Anda já nácasáhá Jesú斯 ñehe ndaa na valí ta chínúu a ndáha á jini ná já caja yii a ná.

*Cáhan in dñ cuicá xihín Jesú斯  
(Mt. 19:16-30; Lc. 18:18-30)*

<sup>17</sup> Tá cuahan tucu Jesú斯 íchi já xinu in dñataa nácasáa dñ nácasáití dñ nu a já cachí dñ já xihín á:

—Maestro, mé ndó cùu ndó tñaa vaha ña cán quéa ndáca tñuhún i ndohó ndía ndítahan caja i já ná ñehe tñahyí cuhun i indiví coo i anda ama cåa quívi —nácati da.

<sup>18</sup> Já nácati Jesú斯 já xihín dñ:

—Ndá cuénta quéa cächún xihín i ña cùu u dñ vaha. Ni in tñuhún toho ñayivi co cùu ná na vaha ñuyív yóho. In tñuhún Ndióxi cuítí va quéa vaha. <sup>19</sup> Sa xinu vün ña sáhndá Ndióxi nuun cajún já cachí a já: “Coto a cùón xihín ñajíhí a yíj ñani tñuhún. Coto a cähnún ndii. Coto a caja cuñhún. Coto a cähnún ña tñuhún sahá ñayivi. Coto a jándahvún ñayivi. Ta caja cähnún tñatún xihín nánún” —nácati Jesú斯 xihín dñ.

<sup>20</sup> Já nácati dñ cán já:

—Maestro, janda tñ nácasuu u tñaa loho nácasáhá i caja i tóco ndihí ña sáhndá Ndióxi caja i —nácati da.

<sup>21</sup> Nasandehé Jesú斯 nu dñ ta tñuhndá ini a sahá dñ já nácati a já xihín dñ:

—Inga ñaha cámáni cajún: Cuáhán jicún tóco ndihí ñahún jan ta ndacahndún jiuhún jan nuú na ndahví já ñehe tñahvün coo cuahá ñahún indiví. Ta tñ nandihí já quisín candicún yehe —nácati Jesú斯.

<sup>22</sup> Joo tñ naxini joho dñ cuicá cán ña nácati Jesú斯 yíj laá nacavítá ini da já naquee cuéha dñ cuahan dñ jáchi íin cuahá ndiváha ñaha da.

<sup>23</sup> Anda já nacasáhá sándezé Jesús nuú na xíca tuun xihín a cán já nacachi a já:

—Ndaja yáncá ndiváha cáá já ndiquiahva na cuicá mé ná ndáhá Ndióxi ña ná cacomí a cuéntá sahá ná —nacachi a.

<sup>24</sup> Chí nacatontó mé ná xíca tuun xihín a cán sahá tuhun nacahan joo nandicahán tucu Jesús já cachí a já:

—Jahyi a, ndaja yáncá cáá sahá in ná cándezé ini jiuhún ndiquiahva na mé ná ndáhá Ndióxi ña ná cacomí a cuéntá sahá ná. <sup>25</sup> Jáchí jandá cama chágá cuu yaha in camello ini in yávi sahá yitucú a juú ga ña ná ndiquiahva in da cuicá mé dá ndáhá Ndióxi ña ná cacomí a cuéntá sahá dá —nacachi Jesús.

<sup>26</sup> Anda já nacatontó ndihi mé na xíca tuun xihín a cán tá naxini joho na ña yóho. Já nacasáhá ndáca tuhún táhan na já cachí na já:

—Ndá na cíú na cuu cäcu ndaa ínimá, dá já —nacachi na.

<sup>27</sup> Nandicoto nihni Jesús nu ná já cachí a já xihín ná:

—Ni in na a cíú caja ña yóho joo Ndióxi quéa cuu caja ña jáchí ni in ñáhá co lñivi toho nu Ndióxi —nacachi a.

<sup>28</sup> Anda já nacachi Pedro já xihín Jesús:

—Joo ndehe najándacoo ndihi nde ña nasaicomí nde ta ndíco nde ndohó —nacachi da.

<sup>29</sup> Já nanducú ñehe Jesús tuhun nu ná já cachí a já:

—Mé a ndaa ná cahán i xihín ndo ña ndá ná jándacoo vehe na á ñani na á quiahva na á tátá ná á náná na á ñajíshí ná á jahyi na á ñundáhyí ná sahá yéhe xihín sahá tuhun cahán i, <sup>30</sup> ná cán cíú na ñehe cuahá chágá ví ñaha ñuyíví yóho jatá ña najándacoo na tátuhun vehe na, ñani na, quiahva na, náná ná, jahyi na, ñundáhyí ná viti vätí ná ndicuita ñayivi caja xíxi na xihín ná. Joo ñehe tálvi ná catacu na andá ama cáá quiyi xihín Ndióxi. <sup>31</sup> Ta ndúu cuahá na íin sahá ñuyíví yóho viti joo vaxi quiyi cacuu na na coó sahá nu Ndióxi. Ta ndúu cuahá na coó sahá ñuyíví yóho viti joo vaxi quiyi cacuu na ná íin sahá nu Ndióxi —nacachi a.

Cáxi tuhun tucu Jesús ña quiyi a

(Mt. 20:17-19; Lc. 18:31-34)

<sup>32</sup> Ta ndaja coo cuahán Jesús xihín ná xíca tuun xihín a chí íchí ndáa cuahán chí Jerusalén. Cánuu Jesús cuahán xihín ná. Ta nacatontó ná cán ta yíhví ná cuahán ná

xihín á. Anda já natavá xóo tucu a ndílhuxu iví ná xíca tuun xihín á já nacasáhá cahán xihín ná ña ndoho a chágá chí nuú. <sup>33</sup> Já nacachi a já:

—Cándezé ndo. Yóho ndáa í cuahán yo chí Jerusalén nuú ndiquiahva na yéhe, da nacindahá Ndióxi nduu ñayivi ndahá ná sacuahá nuú jütu xihín nuú ná jánhá ley Moisés. Na yóho cíú ná cacu ini sahá ndaja quiví i. Anda já ndiquiahva na yéhe ndahá ná tóho. <sup>34</sup> Cuacu ndaa na yéhe ta cani na yéhe ta cuihna na tójíi ná nuú i ta já cahní na yéhe. Joo tá ná yaha uní quiví nditacu tucu u —nacachi Jesús xihín ná.

Tá naxicá Jacobo xihín Juan ñamani nu Jesús

(Mt. 20:20-28)

<sup>35</sup> Anda já nacayati Jacobo xihín Juan, jahyi Zebedeo nu Jesús já nacachi da já xihín á:

—Maestro, cúní nde cäca nde in ñamani nu ndo —nacachi da.

<sup>36</sup> Já nacachi Jesús já xihín dá:

—Ndíá maní cúní ndó caja i xihín ndo —nacachi a.

<sup>37</sup> Já nacachi da cán já xihín á:

—Ña xíca nde nu ndo quéa ná quiahva ndó ñamani nuú nde cacoo in in nde xoo jíin ndo. In nde coo xoo cuahá ta in nde coo xoo ití jíin mé ndó indíví nuú coo ndó cacomí ndó cuéntá sahá ñayivi —nacachi da.

<sup>38</sup> Anda já nacachi Jesús já xihín dá:

—Co cándaa ini ndó ña xíca ndó nuú i. Á cuu ndoho ini ndó tá quiahva ndítahan nuú i ndoho ini i. Jáchí ña vaxi nuú i ndoho ini i cíú á tátuhun coho i in yáxi ndutá ova. Á fin tlahva ndó ndoho ini ndó tá quiahva ndítahan nuú i ndoho ini i anda quiahva ná quiví i —nacachi a.

<sup>39</sup> Já nacachi da cán já:

—Cuu caja nde ña.

Já nacachi Jesús já xihín dá:

—Mé a ndaa tandaar quiví coho ndó ña ova ñíhu ini yáxi, mé ña coho i. Ta tandaar quiví ndoho ndiváha ini ndó tá quiahva ndoho ini i anda quiahva ná quiví i. <sup>40</sup> Joo sahá ña cacoo in ndó xoo cuahá i ta in ndó xoo ití i a juú nuú i quiahva i ña nu ndo. Jáchí sa nandicaxi Ndióxi na ñehe tálvi cacoo cán —nacachi Jesús xihín dá.

<sup>41</sup> Tá naxini joho uxu chágá ná xíca tuun xihín Jesús cán ña yóho já nacasáhá xójo ini

na xihin Jacobo xihin Juan viti.<sup>42</sup> Joo nacana Jesús ná já nacachi a já xihin ná:

—Sa xíni ndó ndajá cája na sáhndá chuun nuú ñayivi ndúu ñuyíví yóho. Na cája na quéa jácandíhi na ñayivi ta cája na tá quiáhva cúnj mé ná.<sup>43</sup> Joo co ndítahan coo na cán tañu mé ndó jáchí ndá da cúní cacuu da cáhnu chágaa tañu ndó xíni ñúhú cacuu da in da cája ndíví nuú ndihí ndó.<sup>44</sup> Ta ndá da cúní cacuu taa nu cuítí tañu ndóhó ndítahan cacuu da da cája ndíví nu ndihí ndó.<sup>45</sup> Jáchí ni yéhe, da nachindahá Ndióxi nduu ñayivi coó naquixi i ñuyíví yóho ña ná caja ndíví ñayivi nuú i. Na naquixi i caja i quéa caja ndíví i nu ná ta ndiquiáhva i mí i quiví i já ná cuu cäcu ndaa íníma cuahá ñayivi ná a cúhun na indayá —nacachi a.

Tá *nandaja* *váha* Jesús in *dá cuá* *naní*  
*Bartimeo*  
(Mt. 20:29-34; Lc. 18:35-43)

<sup>46</sup> Anda já naxinu na ñuu

Anda ja naxini ná ihu Jerico. Ta ta sa naqueta tucu Jesús cuahán jatá ñuu cán xihín na xíca tuun xihín á xihín cuahá ga ñayivi ta mé yuhú íchi cán fin coo in dà cuá naní Bartimeo, jahyi Timeo sóti da.<sup>47</sup> Ta tá naxini joho da ná cayati Jesús, dà ñuu Nazaret vaxí da já nacasadáhá mé dà cuá cán cayuhú cóhó dà já cachí da já:

—Jesús, də náquixi chichi David caja  
ndó ñamani candáhví loho ini ndó yéhe —  
nacachi da.

<sup>48</sup> Joo nacasáhá cuahá ñayivi cája cuehe  
ná xihín dá ñá ná caji da yúhu dá. Joo ví  
ga ví cáyuhú dá já cachí dá já:

—Ndóhó, dã naquixi chichi David caja  
ndó ñamani candáhví loho ini ndó yéhe —  
nacachi da

<sup>49</sup> Anda já nandacá ndichi Jesús já nacachi a já:

—Cana ndó da ná quixi da.

Já nacana na də cuá cán já cachí na já xihin dá:

—A ndícani inún. Candichi jáchi cána  
Jesús yohó —nacachi na.

<sup>50</sup> Anda já najácana da cotó ndeé dã ta nandaca ndichi da já nasaa da nu íin Jesús.

<sup>51</sup> Anda já nəndəcə tuhún Jesús də já cachí a já xihin dá:

—Ndía cúnun ná caja i xuhun.

Já nacachi mé da cuaá cán já:

—Candehé e cúni, xitoho.

<sup>52</sup> Já nācachi Jesús já xihin dá:

—Cuu nūhū vún viti. Sa nəndivahún jáchí nācandeé inún yehé —nācachi a.

Chí ivi láá nändacá ndéhé dä cuá cá. Já nändico dä Jesús íchi cán cuahán dä.

11

*Ndíhvi Jesús ñuu Jerusalén  
(Mt. 21:1-11; Lc. 19:28-40; Jn. 12:12-19)*

<sup>1</sup>Tá naxiñu na yati ñuu Jerusalén jíin ñuu Betfagé xihín ñuu Betania ña ndíque tahan ñuu xihín yúcu yító Olivo já nasahnda Jesús chuun nuú ivy dà xícá tuun xihín á. <sup>2</sup>Já cachí a já xihín dás;

—Cuáhán ndó ūuu loho ndácaqan yati jan.  
Tá ná xinu coo ndó jan ndiñehe ndó in  
búrró ndíco ndaa, rí cámají yii ndaa na.  
Ndaixí ndó rí ta cañehe ndó rí quixi ndó,  
<sup>3</sup> Ta ndá ná ndácaqan tufhún ndohó saha rí  
já quéa cachí ndó xihín ná ūu xíní ūuhú  
xitoho ndó rí viti joo tá ná ndihi chuuñ rí  
já ndixi tucu rí, já cachí ndó xihín ná —  
nacachi Jesús xihín da.

<sup>4</sup> Ta naque dā cán cuahán dā já nandiñehé dá mé búrró cán ndíco ndaa rí iúin yéhé yuhú íchi já nandaxí dā ri.

<sup>5</sup>Ta ndaja coo java nə ndúu cán nəcasáhá  
cáchí na já:

—Ndíá caja ndó. Ndáváha ndáxí ndó bürro iana nde jan —nacachi na.

<sup>6</sup> Anda já nānducú ūnehe mé dā xíca tuun  
xihín Jesús cán tuhun nū ná ta nācachi da  
tá quiahva nācachi Jesús xihín dā. Anda já

nānēhé da nāmāñi cānēhe da ri cuhūn da.  
Tá nandihu já nínehe da búrro cán nacasaan  
da nū Jesús já nachojó da cotó ndéé da jata  
ri já nandaa Jesús jata ri. <sup>8</sup>Ta cuahá ñayivi  
nacasáhá na chínduu na cotó ndéé na íchi ta  
java na nacasáhá na sáhndá na ndáhá yító já  
chínduu na do íchi. <sup>9</sup>Ta nā cuahan chí nuan  
ta jári na växi chí jata nacasáhá na cayuhú  
na já cachí na já:

—Cája cáhuu í Ndióxi. Ndicáhnu náhá  
ná cacuu dà cómí cuéntá sahá yo jáchí cíú  
dá dà vaxi yuhú nuy Ndióxi.<sup>10</sup> Cáhuu ná  
coo quiví tá casáhá Ndióxi cacomí a cuéntá  
sahá yo. Tá quiahva násacomí David, tátá  
yo cuéntá sahá ñayivi sañahá quiahva já  
cacomí mé á cuéntá sahá yo. Cáhuu ná  
cacuu Ndióxi —cáchí ñavivi.

<sup>11</sup> Anda já nandihvi Jesús ūuu Jerusalén ta já naxinu e veňuhu cahnu cán. Ta tá nandihni nasandehé ndihi a níi xoo cán já naquiee a cuahan chí ūuu Betania xihin.

ndíhuxu *ivi* na xíca tuun xihín á jáchi sa nähini ta cuähän cuáá va.

Tá *nachicagan* Jesús cháhan *jata* titó ñuhú  
(Mt. 21:18-19)

<sup>12</sup> Tá naquee na Betania inga quiví itaan já nacásahá cuíco Jesús cuähän. <sup>13</sup> Tá naxini xíca a in titó ñuhú vaha dó ndoco ndáha. Nasahan Jesús sándezhé a á fin cuihi nu do joo co rí ná ñehé a. Ndáha uun va dó cán fin jáchi a juú tiempo coo rí cán quéá. <sup>14</sup> Anda já nacähän Jesús xihín titó ñuhú cán já cachí a já xihín do:

—Ni in ga na a cáxí ga cuihi nu yóho —cáchí a xihín do.

Ta naxini joho na xíca tuun xihín á cán tuhun yóho.

Tá *nataxí* Jesús na ndíuú jíco ñaha yéhé veñihu

(Mt. 21:12-17; Lc. 19:45-48; Jn. 2:13-22)

<sup>15</sup> Tá nandihí já naxinu na Jerusalén. Ta tá nandihvi Jesús veñihu cähnu cán já nacásahá táxi a na ndíuú jíco cán xihín na ndíuú xéen viti. Ta naxicó ñehé a mesa na ndíuú ndíjama jiuhún ñayivi ta naxicó ñehé a tayı́ sácoq na ndíuú jíco ndíjata. <sup>16</sup> Ta chí coq nasaħan ñamani nuú ñayivi cañehe na ñaha ndíjvi na veñihu. <sup>17</sup> Anda já nacásahá jánahá nu ná já cachí a já xihín ná:

—Já cáchí tuhun Ndióxi: “Vehe mí i cacuu a vehe nuú quixi na caca tahví na nuú i sahá tóco ndihí ñayivi ñuyíví”, cáchí tuhun Ndióxi. Joo ndóhó nandai cuu ndó yóho caja cuñhná ndó nuú ñayivi —nacachi Jesús xihín ná.

<sup>18</sup> Tá mé na sacuahá nuú jutu cán xihín na jánahá ley Moisés naxini joho na ña yóho já nacásahá na ndíucu na ndá quiahva cahní na a jáchi yíhví ñahá na sahá ña cátontó ndihí ñayivi xihín ña jánahá mé á nu ná. <sup>19</sup> Joo tá nacuaá já naquee Jesús nuú cuähän xihín na xíca tuun xihín á.

Tá *nahichí* titó ñuhú, dó coó cuihi nuú  
(Mt. 21:20-22)

<sup>20</sup> Ta naha chá inga quiví itaan nayahna na nu cándichi mé titó ñuhú cán já naxini na ña nahichí do janda yóho do nahichí.

<sup>21</sup> Anda já nandicuhun ini Pedro sahá mé titó ñuhú já cachí da já xihín Jesús:

—Maestro, candehé ndó titó ñuhú, dó nacähän cuehé ndó xihín. Sa nahichí dó viti —nacachi da.

<sup>22</sup> Já nacachi Jesús já xihín dá:

—Candeé ini ndó Ndióxi. <sup>23</sup> Jáchi mé a ndaa ná cähän i xihín ndó ña tá ná cache ndó xihín yúcu yóho: “Caxoo ta cuähán jáquetún mún ini tañyhú”, ta tá co cähvi *ivi* joho ini ndó ta tá candusa ndó coo tá ín cachí ndó ta chí já ndusa coo. <sup>24</sup> Sahá ña cán quéa cachí i xihín ndó ña tóco ndihí ñaha xíca tähví ndó nuú Ndióxi ta tá cándusa ndó ña sa nañehé ndó a já quéa ñehé ndusa ndó a. <sup>25</sup> Ta tá ndíuú ndó xíca tähví ndó nuú Ndióxi xíní ñuhú caja cähnu ini ndó sahá ndá na xójo ini ndó xihín já ná caja cähnu ri ini Ndióxi, tátá ndó ña fin indíví sahá cuachi ndó. <sup>26</sup> Joo tá co caja cähnu ini ndó sahá ñayivi já quéa ni Ndióxi, tátá ndó ña fin indíví a caja cähnu ini a sahá cuachi ndó —nacachi a.

Tá *nandacäa* tuhún na Jesús ña ndáchí quíxi ndéé a ña caja cuähä nuú ñaha

(Mt. 21:23-27; Lc. 20:1-8)

<sup>27</sup> Anda já nandicó coo tucu na ñuu Jerusalén. Ta tá xíca Jesús chí veñihu cähnu cán já nacayati na sacuahá nuú jutu xihín na jánahá ley Moisés xihín na sacuahá veñihu nu á. <sup>28</sup> Já nandacäa tuhún na Jesús já cachí na já xihín á:

—Yo já sahan ñamani nuun cajún ña cajún yóho —nacachi na.

<sup>29</sup> Já nacachi Jesús já xihín ná:

—Ná ndacäa tuhún ri yehé va ndohó ta tá ná nducu ñehé ndó tuhun nuú i anda já caxi tuhun i nu ndo yo já nasahan ñamani nuú i caja i ña caja i yóho. <sup>30</sup> Cachi ndó xihín i yo já nachindahá Juan ña ná quixi da caja ndútá da ñayivi. Á Ndióxi nachindahá da, á ñayivi nachindahá ñahá. Nducu ñehé quíi ndó tuhun nuú i viti —nacachi Jesús xihín ná.

<sup>31</sup> Anda já nacásahá ndítuhún xihín táhan na cán já cachí na já:

—Tá ná cachí na Ndióxi quéa nachindahá Juan ta já nducu nehe Jesús tuhun nu yo já cachi da xóho: “Ndá cuénta quéa coó naxeen ndó candusa ndó da, dá já”, cachi Jesús xóho. <sup>32</sup> Ta tá ná cachí: “Ñayivi cùú na nachindahá Juan”, já ndicuita ñayivi xihín yo —nacachi na ndítuhún xihín táhan na.

Já cachí na jáchi yíhví na ñayivi jáchi tóco ndihí ñayivi nacähän na sahá Juan ña cùú dá da nachindahá Ndióxi jáyaha da tuhun cahán mé á nuú ñayivi. <sup>33</sup> Sahá ña cán quéa nacachi na já xihín Jesús:

—Co xíni toho nde yo nachindahá Juan.

*Anda já nacachi a já xihin ná:*

—Ta ni yehé a caxí tuhun i nu ndo yo já nasañan ndéé nyú i caja i ña yóho —nacachi a.

## 12

*Sacú Jesús quiqhva sahá java mozo, da nacaja quini xihín xitoho*

(Mt. 21:33-46; Lc. 20:9-19)

<sup>1</sup> *Anda já nacasáhá Jesús sacú a quiqhva nyú ñayivi já nacachi a já xihin ná:*

—Nasahin in dataa najándeé cuahá dá tó uva nu ñihu dá ta já nasaçu da in corra yito ny do. Ta nacavaha da in nyú cuhní mé uva cán ña cavaha vino. Ta nacavaha da in ny jíco canuu da já cuu canda da tóco ndihi dó cán.

‘Tá nandihi já nasañan ndojó da ñihu dá nyú java na caja chún na ña já naquee da cuahán xícá da. <sup>2</sup> Ta tá naxinu tiempo jáquee na já nachindahá da in mozo da nyú na caja chún ñihu dá cán ña ná ndiquiahva na ña cání nu dá ndiquehe de saha ñihu dá ña nasañan ndojó da nyú na cán. <sup>3</sup> Joo mé na caja chún tóo ñihu cán natiin na mozo da cán já nacani na da. Tá nandihi já nanducú ñehe na dá nyú xitoho da joo coó ñaha ná sahan na nu dá. <sup>4</sup> Anda já nachindahá tucu mé da xihín ñaha ñihu cán inga mozo. Joo da yóho nacaja xixí tucu na xihin dá jáchi nacani na dá xihin yuu. Ta najándicuehe na jini dá já nacasáhá cánahá na xihin dá. <sup>5</sup> Ta mé da xihín ñaha ñihu cán nachindahá tucu da inga mozo da ta nasañan na da. Ta nachindahá cuahá ga da mozo da nasañan cán. Ta java da nacani na ta java da nasañan na.

<sup>6</sup> ‘Nacando in túhún jahyi mé da xihín ñaha ñihu cán ta quíhvi ndivaha ini da jahyi da. Joo tá nu ndishí já nachindahá da jahyi da jáchi cáhán da: “Cája i cuénta coo toní ñihu na xihin jahyí”, nacahán da. <sup>7</sup> Joo mé na caja chún ñihu cán nacasáhá ndítuhún xihin táhan na já cachí na já: “Candehé ndo. Yóho vaxi da cíu yahyi xitoho í. Ta tá ná xinu quiví quivi xitoho í ta da yóho cacuu da ndicojo chuuñ saha ñihu yóho. Cóho cahní yó da já nacando ñihu yóho ndáha mí”, nacachi xihin táhan na cán. <sup>8</sup> Anda já natiin na dá cán ta nasañan na da já nacachana na yiquí cünu da jata cútú cán —nacachi Jesús.

<sup>9</sup> *Anda já nandaca tuhún Jesús ñayivi ndúu cán já cachí a já:*

—Á co xini ndó ndia caja da xihin ñaha ñihu yóho viti. Ña caja da quéa quixi da ta cahní ndihi da na caja chún tóo nu ñihu dá. Já ndiquiahva da ñihu dá nyú java ga na já ná caja chún na nu á.

<sup>10</sup> <sup>10</sup> Á co xini ndó ña cachí tuhun Ndióxi. Ña cachí a quéa:

Mé yuu ña nájácaña da cavaña vehe, ña cán cíu ña nandu yuu ndúu sahá vehe ña íin chágá saha.

<sup>11</sup> <sup>11</sup> Ña yóho quéa nacaja Ndióxi ta cíu á in ñaha cähnu ndivaha nu yo, cachí tuhun Ndióxi —nacachi Jesús.

<sup>12</sup> <sup>12</sup> Anda já nacasáhá ndúcú na sacuha tiin na Jesús chicqan na a vecaa jáchi nacandaa ini na ña sahá mé ná nasaçu a quiqhva yóho. Joo sahá ña yihví na ñayivi najándacoo na a ta naquee na cuahán na.

*Ndáca tuhún na Jesús á ndítahan nu ná chahvi na jiuhún cuénta impuesto*

(Mt. 22:15-22; Lc. 20:20-26)

<sup>13</sup> Tá nandihi já nachindahá na java na fariseo xihin na cíu cuénta Herodes nu Jesús ña ná coto ndojó ñahá na xihin tuhun cáhán mé á já ná chicqan na cuahchi jatá.

<sup>14</sup> <sup>14</sup> Anda já naxinu na nu Jesús já cachí na xihin á:

—Maestro, xini nde ña ndinuhi ña ndaa cáhán mé ndó. Ta co quéhe ndó cuénta cáhán níu ñayivi saha ndó. Ta cándaa ini nde ña tá cáhán ndó saha in ñaha caja ñayivi cíu á sahá ña sángehé ndó janda íníma ná. Ta cándaa ini nde ña jánahá ndó ña ndaa saha íchi cuénta Ndióxi. Ta viti cíu ini nde ndaca tuhún nde ndohó á ndítahan nyú nde chahvi nde jiuhún cuénta impuesto nyú da cómí cuénta saha yo ñuu Roma. Á chahvi nde ña, á a chahvi toho nde nacachi na.

<sup>15</sup> <sup>15</sup> Joo sa nacandaa ini Jesús ña co cíu ná quíhva ndáa na ña cán quéa nacachi a já xihin ná:

—Cándaña caxí táhyi ini i ña cúní ndó coto ndojó cuití ndó yehé. Jánahá ndó in táhan jiuhún jan nyú i ná candehé e ña —nacachi a.

<sup>16</sup> <sup>16</sup> Já nasañan na mé jiuhún cán nu á ta tá naxini a ña já nacachi a já xihin ná:

—Yo nahná ta yo quíví quéa ndáa nu á. Já nacachi na cán já xihin á:

—Ñéhe a quivi xihín nahhná dā cómí cuéntá sahá yó ñuu Roma —nacachi na xihín á.

<sup>17</sup> Anda já nacachi Jesús já xihín ná:

—Ndiquiahva ndó ñaha da cómí cuéntá sahá ndó ñuu Roma jan nu dá. Ta ndiquiahva ndó nu Ndióxi ña cíu ñaha mé á —nacachi a.

Chí nacatontó mé ná cán sahá ña nacachi Jesús xihín ná.

Ndáca tuhún ná saduceo Jesús á mé a nditacu ndii

(Mt. 22:23-33; Lc. 20:27-40)

<sup>18</sup> Anda já nasahán java ná saduceo cahán ná xihín Jesús. Ta mé ná saduceo yóho co cándusa na ña ndítacu tucu ná sa naxihí. Sahá ña cán quéa nandaca tuhún ná Jesús já cachí na já xihín á:

<sup>19</sup> —Maestro, nu ley nacayi Moisés sa-nahá natähnda chuun ta cachí a já: “Tá tándahá in dataa xihín ñajíhi dā ta tá coó jahyi ñá cácu xihín dā ta ná xinu quiyi quivi dā cán já quéa cachí ley Moisés ña ndítahan tandaahá tucu ñajíhi dā xihín dā cíu ñani mé ndii cán já ná coo jahyi dā cán xihín yuhú nyú ñani dā”, já cachí ley Moisés. <sup>20</sup> Ta viti cuni joho ndó ná cacu nde in quiahva nu ndó. Nasahiin usa ñani ta dā nu cuítí natandahá dā xihín in ñañáha. Tá nandihi naxihí dā joo coó jahyi dā ná cacu xihín ná cán. <sup>21</sup> Ta natandahá ñani dā, da chí ivi xihín ñá cuáan cán. Ta já naxihí ri dā cán va ta ni dā yóho coó nacacu jahyi xihín ñajíhi ñani. Ta quiahva já nandoho ri ñani dā, da chí uni. <sup>22</sup> Anda quiahva naxinu ndíhusa dā natandahá xihín ña ta ni in da coó nacacu jahyi xihín ña. Tá nu ndíhi naxihí ri mé va ñá. <sup>23</sup> Ta viti ndáca tuhún nde ndohó ndá dā cacuu ndusa yí ñá cán tá ná xinu quiyi ndítacu tucu ndii jáchi ndíhusa va ñani dā cán natandahá xihín ná —nacachi na.

<sup>24</sup> Anda já nanducú ñehe Jesús tuhún nu ná já cachí a já xihín ná:

—A vaha toho cahvi ini ndó jáchi co xini ndó ndaja cáhan tuhún Ndióxi ta ni co xini ndó ndá quiahva cáhu cíu ndée Ndióxi. <sup>25</sup> Jáchi tá ná ndítacu tucu ndii a tándahá ga ná ta ni a quiahva na jahyi jíhi ná tandaahá ná. Cacuu na tátuhun tátó Ndióxi ndúu indíví ta co tándahá ná cán. <sup>26</sup> Joo sa xini yo ña ndítacu tucu ndii. Á a ñáha cahvi ndó ña nacayi Moisés sahá ña nacahan Ndióxi xihín dā tañu tohíñu, dó cándaha

ñúhu cán. Já nacachi a já xihín dā: “Yehé cíu Ndióxi cája cáhu Abraham ta yehe cíu Ndióxi cája cáhu Isaac ta yehe cíu Ndióxi cája cáhu Jacob”, nacachi a. <sup>27</sup> Ta ña yóho cíu cachí a ña tacu yíi va Abraham xihín Isaac xihín Jacob vatí sa naxihí yiquí cuñu na. Sahá ña cán quéa co xini ndó ndá sahá cáhan ndó —nacachi a.

Tá cahán Jesús ndíga cíu ña cáhu chágá sáhndá Ndióxi caja í

(Mt. 22:34-40)

<sup>28</sup> Ta ndaja coo in da jánahá ley Moisés nacayati da nu Jesús jáchi sa naxini joho da ña nacahan Jesús xihín ná ndúu cán. Sahá ña xini dā ña nanducú ñehe ndá Jesús tuhún nyú ná cán sahá ña cán quéa nandaca tuhún dā Jesús já cachí dā já xihín á:

—Ndíga cíu ña cáhu chágá sáhndá Ndióxi caja í —nacachi da.

<sup>29</sup> Já nacachi Jesús já xihín dā:

—Ña cáhu chágá cíu ña cachí tuhún Ndióxi yóho: “Taa joho ndó, ná Israel. Ín in tuhún jini Ndióxi ta mé á cíu xitoho í. <sup>30</sup> Ta ndítahan quihví ini ndó mé Ndióxi, xitoho ndó xihín tocó ndíhi íníma ndó ta xihín ndinuhu ini ndó. Ta quihví ini ndó a xihín tocó ndíhi xini túni ndó ta xihín tocó ndíhi ndée ndó.” Ña yóho cíu ña nu cuítí sáhndá Ndióxi caja ndó. <sup>31</sup> Tá cuni coo ña nu cuítí já cuni coo ri ña chí ivi va ta cachí a: “Quihví ini ndó ñani táhan ndó tá quiahva quihví ini ndó mé ndó.” Coó ga inga ña sáhndá Ndióxi caja ndó cacuu ña cáhu chágá nyú ña yóho —nacachi a.

<sup>32</sup> Anda já nacachi mé dā jánahá ley Moisés cán xihín Jesús:

—Vaha chí nacahan ndó, Maestro. Mé a ndaa quéa nacahan ndó ña ín in tálaa cuítí Ndióxi ta coó inga ga Ndióxi. <sup>33</sup> Ta ndítahan quihví ini mé á xihín tocó ndíhi íníma yo ta xihín ndinuhu iní ta xihín tocó ndíhi xini túni yo ta xihín tocó ndíhi ndée yo. Ta ndítahan quihví iní ñani táhan í tá quiahva quihví iní mí. Ndíyahví chágá ña yóho a juú ga tocó ndíhi ñaha jóco na nu Ndióxi ta ndíyahví chágá ña a juú ga ñaha chíçan nínu ná nu náa —nacachi da.

<sup>34</sup> Tá naxini Jesús ña nanducú ñehe vaha dā cán tuhún nu á já cachí a já xihín dā:

—Jalóho cuni ña cacomí Ndióxi cuénta sahún —nacachi Jesús.

Tá nandihi cán ni in ga ná coó nacahan ndee ini na ndaca tuhún ga ná mé á.

*Ndáca tuhún na Jesús ndáchí naquixi a  
(Mt. 22:41-46; Lc. 20:41-44)*

<sup>35</sup> Ndácaan Jesús veñu hu cahnu jánaha  
nuú ñayivi já cachí a já xihín ná:

—Ndávaha cachí na jánaha ley Moisés ña  
vaxi Cristo chichi David. <sup>36</sup>Ta sá mé David tá  
nachutú ndaa ini da xihín ínima yii Ndióxi  
já nacachi da já:

Já nacachi Ndióxi xihín xitoho i:  
“Caco xoo cuáha i yóho,  
anda quiáhva ná caja i ña ná cacomún  
cuénta sahá na co cúní yohó”, ná-  
cachi Ndióxi sanahá.

<sup>37</sup> Ndávaha cachí na ña vaxi Cristo chichi  
David joo mé tiempo cán nacachi David ña  
cúu á xitoho da —nacachi Jesús.

Ta cuáha ndivaha ñayivi cájii íní na tása  
joho na nu cahán Jesús.

*Chícagan Jesús cuachi jatá na jánaha ley  
Moisés*

*(Mt. 23:1-36; Lc. 11:37-54; 20:45-47)*

<sup>38</sup>Tá jánaha Jesús na já cachí a já xihín ná:

—Cuénta coo ndó xihín na jánaha ley  
Moisés jáchi cátóo na cándixi na jahma náni  
caca nuu na. Ta cátóo na cahan toní níhu  
ndivaha ñayivi xihín ná tá xíca nuu na nuú  
yahvi. <sup>39</sup>Ta tá cuahen na veñu hu cátóo na  
cacoo na nu sácoo na íin chágá saha. Ta  
tá cuahen na víco nuú vaha cátóo na coo  
na. Cuénta coo ndó xihín na yóho. <sup>40</sup>Jáchi  
cándaa na vehe najihí cuáan ta tá nandihu  
cuahá ndivaha xíca tahví na nu Ndióxi jáchi  
cúní na jájahvi na nuú ña núu caja na. Mé a  
ndaa ná cahan i xihín ndo ña mé na jánaha  
ley Moisés yóho cacuu na na ndoho chágá  
ini caja Ndióxi —cachí Jesús.

*Ña najorc in ñá cuágn ndáhví  
(Lc. 21:1-4)*

<sup>41</sup>In tañu íin coo Jesús ini veñu hu cahnu  
cán yati nu íin sato nu táan na jiuhún jóco  
na nu Ndióxi. Ta sándezé a ndá quiáhva  
táan ñayivi jiuhún ini mé sato cán. Ta  
naxini a cuahá taa cuiçá xínu coo táan  
cuahá na jiuhún ini mé sato cán. <sup>42</sup>Ta mé  
já naxinu coo in ñá cuáan ndáhví ta nataán  
ña ivi jiuhún ña núu yahvi ini mé sato cán.  
<sup>43</sup>Já nacana Jesús na xíca tuun xihín á ta já  
cachí a já xihín ná:

—Mé a ndaa ná cahan i xihín ndo ña  
cuaha chágá jiuhún nasahan ñá cuáan  
ndáhví yóho a juú ga tóco ndihi java ga ná  
cán. <sup>44</sup>Jáchi tóco ndihi na cán nasahan na  
ñá yójó nu ná joo ñá cuáan ndáhví yóho

nasahan ñá nu Ndióxi tóco ndihi ña cómí  
ñá catacu ñá —nacachi a xihín ná.

## 13

*Cáxi tuhun Jesús nu ná ña vaxi quivi ndihi  
sahá veñu hu cahnu ñuu Jerusalén  
(Mt. 24:1-2; Lc. 21:5-6)*

<sup>1</sup>Tá naquee Jesús veñu hu cahnu cán já  
nacachi in da xíca tuun xihín a cán já:

—Maestro, cándezé ndó ndaja náhnu  
yuú nacavaha na veñu hu yóho ta ndaja jíco  
ndivaha nacavaha na ña —nacachi da.

<sup>2</sup>Anda já nacachi Jesús já xihín dá:

—Mé a ndaa náhnu a joo ndá chuun cúu  
á jáchi ni jandá in yuu yóho a cándoo jatá  
inga yuu jáchi vaxi quivi tá nditáñi ndihi ña  
yóho —nacachi a.

*Ndícani Jesús ña coo tá ná cayati quivi  
ndihi sahá ñuyíví*

*(Mt. 24:3-28; Lc. 21:7-24; 17:22-24)*

<sup>3</sup>Anda já nasahan na cán yícu yíto Olivo,  
ñá xíto ndaa táhan xihín veñu hu cahnu  
cán. Ta tá íin coo Jesús cán já naxinu Pedro  
xihín Jacobo xihín Juan xihín Andrés já  
nacahan jehé na xihín á já cachí na já:

<sup>4</sup>—Cúní nde ña ná caxi tuhun ndó xihín  
nde ndá ama coo tóco ndihi ña yóho. Ta  
ndaja coo tá sá nacayati mé quivi cán —  
nacachi na.

<sup>5</sup>Já nacachi Jesús já xihín ná:

—Cuénta coo ndó ta a quiáhva ndó ña-  
maní jándahvi ni in ñayivi ndghó. <sup>6</sup>Jáchi  
cuahá ndivaha na quixi na cuénta mí i ta  
cahán na ña tuhun tá cachi na já xihín ndó:  
“Yéhe cúu Cristo, dä náchindahá Ndióxi  
cacomi cuénta sahá ñayivi.” Ta xihín ña  
yóho cuahá ndivaha ñayivi jándahvi na.

<sup>7</sup>Joo tá nacásahá xíni joho ndó ña yóho  
cáa cúu tondohó, a cayihví toho ndó jáchi  
quiáhva já ndítahan coo. Joo cámání yí  
xínu coo quivi nu ndihí. <sup>8</sup>Jáchi ñayivi ndúu  
in nación ndicuítá na caní táhan na xihín  
na ndúu inga nación ta caní táhan na in  
ñuu xihín na inga ñuu. Ta quixi nditáán  
ndijáá nu ndúu ñayivi já xínu tamá ndeé ta  
já casahá na ndivaa na. Ta tóco ndihi ña  
yóho cúu á tá cavä sahá sahá ña núu vaxi  
nuú ñayivi jáchi cámání xínu coo chágá nuú  
ndoho ini na.

<sup>9</sup>Joo candaa vaha ndó mé ndó jáchi  
ndiquiahva na ndohó ndahá na cómí chuun  
ta caní na ndohó ini veñu hu. Ta sahá  
yéhe cañehe na ndohó nuú na cómí cuénta

sahá ñayivi xihín nuú na cíuú jutixia ta já cuu cahán ndó sahá i nuú na cán. <sup>10</sup> Joo jihna ñíuhú xíní ñíuhú ndicuítä nuu tūhun vaha sahá mí i nu tóco ndihi ñayivi ánda jáví ndihi sahá ñuyíví yóho. <sup>11</sup> Ta tá ná cañehé na ndóhó cuhún ndó nuú na jutixia, a ndícani ini ndó sahá ndá tūhun cahán ndó xihín ná. Mé hora já cahán ndó ná quiáhva Ndióxi nu ndó cahán ndo. Jáchí a juú jini mé ndó quivi ná cahán ndo. Íníma yii Ndióxi cacuu ná quiáhva tóco ndihi ná cahán ndo. <sup>12</sup> Ta java taa jíco tūhún da ñani da la java da jíco tūhún da jahyi da ná cahmí ñahá ná. Ta cuahá ná ndicuítä na cani táhan na xihín tátá ná ta cahní ñahá ná. <sup>13</sup> Ta ndaja táhan ñayivi ndúu ñuyíví yóho candají na ndóhó sahá yehe. Joo ndá ná ná candíco tuun íchí mí i janda ná xinu quivi quivi na, ná jan cacuu ná cazu ndaa íníma.

<sup>14</sup> 'Na cahví tutu ná candaá ini na ná cahán. Daniel cíuú da nacahyí sanahá sahá in ná quini ná játiví ñahá. Tá ná cuni ndó ná cándichi in a nuú co ndítahan coo a já ndítahan nuú ná ndúu estado Judea cunu na cuhún na chí yúcu. <sup>15</sup> Ta ndá ná cánúu jini véhe mé quivi já co ndítahan nuu na tavá ná ñahá vehe na. <sup>16</sup> Ta ndá ná ndúu yúcu co ndítahan ndicó coo na vehe na ndiquehe na jáhmá ná. <sup>17</sup> Ndáhví najjhí, mé ná ñíuhu jahyi mé quivi já. Ta ndáhví ná ñéhe ndaa ná valí táhan ná chíchí yii. <sup>18</sup> Caca tahví ndo nü Ndióxi ná ná a cazu a tiempo víxi tá ná cunu ndó cuhún ndo já ná a ndóhó chágá ini ndó. <sup>19</sup> Jáchí quivi ndoho ndivahá ini ndó cacuu a cán. Jáchí janda tá nacavá sahá sahá ñuyíví coó nandoho ini na tá quiáhva ndoho ini na mé quivi jan. Ta tá ná yaha ná jan, a ndíco coo ga ná ndoho ini na quiáhva já. <sup>20</sup> Ta tá ná a ndája cuítí Ndióxi tiempo yóho ni in ñayivi a cíuú cazu ndaa. Joo násacu ini a ndaja cuítí a mé tiempo yóho jáchí quíhvi ini a tóco ndihi na nacaxi mé á.

<sup>21</sup> Ta tá ná cachí in na xihín ndó: "Candehé ndo, yóho íin Cristo, da nachindahá Ndióxi cacomí cuéntá sahá ñayivi", á tá ná cachí na: "Candehé ndo, cása íin da", cachí na já quéa a cándusa toho ndó ná. <sup>22</sup> Jáchí quivi cuahá ná jándahvi ndóhó ta ndaá na mé ná tátuhun Cristo. Joo a juú Cristo cíuú ná. Ta quivi cuahá ná ta cachí na cahán ná cuéntá Ndióxi ta jári caja na cuahá nuú ná náhnu xihín ná xitúhún ná ná jándahvi na ñayivi. Ta anda na sa nacaxi Ndióxi

jándahvi na tá ná cuu caja na ná. <sup>23</sup> Xíní ñíuhú candehé vaha ndó mé ndó jáchí sa nacaxi tūhun yachí ndihi i ná yóho xihín ndó —nacachi Jesús.

*Ndaja coo tá ná xinu coo quivi quivi tucu Jesús*

(Mt. 24:29-35,42,44; Lc. 21:25-36)

<sup>24</sup> Já cachí tucu Jesús já:

—Joo tá sa nayaha tóco ndihi ná nandoho ini ñayivi já canaá nuú cándii ta a ndíyéhe ga yoo. <sup>25</sup> Anda indíví quee quimi cuyu rí nü ñíuhu ta quiji nuu indíví ná nacaváha Ndióxi. <sup>26</sup> Anda já cuni na yehe quivi i tañu víco xihín tóco ndihi ndéé cahnu i, da nachindahá Ndióxi nduu ñayivi. Ta cuni na ndá quiáhva cahnu cíuú yehe. <sup>27</sup> Ta tá nandihí já chindahá i tátó mí i ná ná jánditaca na ná sa nacaxi i tañu tóco ndihi nüu janda níi cíuú sahá ñuyíví ta janda níi cíuú sahá indíví.

<sup>28</sup> Catiahva ndó ná cuni cachí mé quiáhva sácú u nü ndó sahá titó ñíuhú. Tá yúta ndáhá dó cán ta vaxi núma válí do já candaá ini ndó ná vaxi tiempo ihní. <sup>29</sup> Ta quiáhva já cacuu ná yóho tá ná cuni ndó yaha tóco ndihi ná yóho. Jáchí anda jáví candaá ini ndó ná nacayati tiempo quivi tucu yehe ñuyíví yóho. <sup>30</sup> Mé a ndaá ná cahán i xihín ndó ná yaha tá yaha tóco ndihi ná nacachi i xihín ndo ta anda jáví quivi ná ndúu tiempo viti. <sup>31</sup> Ta ndihí sahá indíví xihín ñuyíví joo a ndihí toho sahá tūhun nacahán i xihín ndó yóho. Jáchí coo tá coo va ná.

<sup>32</sup> Joo ni in tūhún toho ñayivi co xíní na ndá quivi á ndá hora yaha ná yóho. Ta ni mé tátó Ndióxi ndúu indíví co xíní ná ndá quivi coo ná yóho. Ta ni yehe, da cíuú in tūhún jini já jahyi Ndióxi co xíní ndá quivi coo ná yóho. In tūhún Ndióxi, tátá yo quéa xíní a.

<sup>33</sup> Sahá ná cán quéa cañuhu ini ndó sahá ná yóho. Coo tlahva ndó ta cazu tahlví ndo nü Ndióxi jáchí co xíní ndó ndá quivi xinu coo ná yóho. <sup>34</sup> Jáchí ná yóho cíuú á tátuhun in daza quéta cuahán xícá joo tá cámáni quee da cuhún da jándacoo tóo da vehe da nü mozo da ná ná candaá na ná. Ta sáhan da chuun caja in in mozo da. Ta nüu da ndáá yehe násahnda da chuun ná ná candaá vaha da ná. <sup>35</sup> Sahá ná cán quéa xíní ñíuhú coo tlahva ndó jáchí co xíní ndó ndá quivi xinu coo mé da cíuú xitohó vehe. Co xíní ndó á cazu a tá nacuaá tóo á cazu a java nüu táji á cazu a tá nacana chéle á cazu a tá

sa natívi. <sup>36</sup> Cuéntá coo ndó. A juú tiāhva náá xinu coo da ta ndiñehé dá ndohó ndúu ndó quiíji ndó. <sup>37</sup> Na cáhan i xihín ndó cáhan i xihín ndihi na: Xímí nñuhú coo tiāhva ndó sahá mé quiví quixi tucu u —nacachi Jesús.

## 14

*Ndítuhún jehé na tiin na Jesús*  
(Mt. 26:1-5; Lc. 22:1-2; Jn. 11:45-53)

<sup>1</sup> Tá cámání ivi quiví caja na vicó pascua xihín vicó tá xíxi na pan ña co quée yusá naxaa xihín já nacásahá ná sacuahá nñú jutu xihín ná jánahá ley Moisés ndúcú ná ndá quiáhva caja na tiin jehé na Jesús já cuu cahní na a. <sup>2</sup> Ta já cachí xihín táhan na:

—A tiin toho í da mé vicó jáchi tiāhva náá ndivaa ñayivi —nacachi na.

*Tá nachojo in ñañáhá perfume jini Jesús*  
(Mt. 26:6-13; Jn. 12:1-8)

<sup>3</sup> Ta ndaja coo fin Jesús nñuu Betania vehe Simón, da cáhan na xihín: taa nandoho cuéhe tâhyi. Ta nani ndúu coo na nñu mesa cán naxinu in ñañáhá ta ñehe ñá in yúyú alabastro nachutú jíní y xihín perfume, dó támí ndivaha sáhan ta cuú dó perfume yahví ndivaha. Ta ñatahví ná yóho mé yúyú cán já nachojó ña do jini Jesús. <sup>4</sup> Ta java ná ndúu cán nacásahá ná jáa ná xihín ña já nacásahá cachí xihín táhan na já:

—Ndávaha natíví uun perfume yóho. <sup>5</sup> Cuu jicó yó dø, nduu ta yáha ga nñú uni ciento denario quehé sahá dó ta xihín jiuuhún cán cuu chindeé yó ná ndahví, nduu —cáchí ná.

Sahá ña cán quéa naxojo ini na xihín ñañáhá cán ta nacahán nñuu na sahá ña.

<sup>6</sup> Andá já nacachi Jesús já xihín ná:

—A cáhan ndó xihín ña. A jáquihví ndó ña. Ña vaha quéa nacaja ná yóho xihín i. <sup>7</sup> Jächí ná ndahví nñí tiempo canduu na tañu ndó ta cuu caja ndó ña vaha xihín ná ndá tañu cúní mé y ndó joo yehe a cóo tuun toho i xihín ndó. <sup>8</sup> Mé nñá yóho nacaja ná janda nuú naxinu ndéé ñá caja ná xihín i. Sa najándicuchu yachí va ná yóho yiquí cuñu i xihín perfume, dó támí sáhan jan ña ná coo tiāhva vi tá ná casaa quiví nduxu. <sup>9</sup> Mé a ndaa ná cáhan i xihín ndó nñí cuú nuyíví nñú caca nuu ñayivi cáhan na tuhun vaha sahá mí i já quéa ndicani na ña nacaja ná yóho xihín i já ndicuhun ini na sahá ña —nacachi a.

*Jícó tühún Judas Jesús*  
(Mt. 26:14-16; Lc. 22:3-6)

<sup>10</sup> Ta ndaja coo in táhan da uxu ivi xica tuun xihín Jesús, da naní Judas Iscariote nasahan da cáhan da xihín na sacuahá nñú jutu. Já nasahan da tuhun da nñu na cán ña ndiquiahva da Jesús ndáhá ná. <sup>11</sup> Tá naxini joho na cán ña nacachi da xihín ná nacavatá na ta nasahan na tuhun na nñu mé Judas ña quiahva na jiuuhún nñu dá. Ta sa mé nani já nacásahá Judas ndúcú da ndaja cuu caja da ndiquiahva da Jesús nñu ná.

*Tá ngaxijíni ndayí Jesús xihín na xica tuun xihín á*  
(Mt. 26:17-29; Lc. 22:7-23; Jn. 13:21-30; 1 Co 11:23-26)

<sup>12</sup> Mé quiví nñú vicó pascua tá xíxi na pan ña co quée yusá naxaa xihín já sáhní ná ndicachi valí jóco ná nñu Ndioxí. Já nandaca tuhún ná xica tuun xihín Jesús mé á já cachí ná já xihín á:

—Ndáchí cúní ndó cuhun nde caja ndíví nde cajíni ndó vicó pascua —nacachi na.

<sup>13</sup> Andá já nachindahá Jesús ivi dä xica tuun xihín já já cachí y xihín dä:

—Cuáhán ndó nñuu jan jáchi jan ndiñehé ndó in dataa ñehe da in yoo ticiúj ta candico ndó da cuhun ndó. <sup>14</sup> Tá ná xinu da vehe nñú ndihvi da já cachí ndó xihín da cuú xitohe vehe cán já: “Da jánahá ndehe cachí xuhun: Ndáchí fin nñú coo i cajíni i vicó pascua xihín ná xica tuun xihín i.” <sup>15</sup> Andá já jánahá mé dä cán in cuarto cáhnu ña cánúu jini véhe piso nñuu. Sa fin tiāhva va ña. Cán caja ndíví ndo ña cajíni —nacachi Jesús xihín ná.

<sup>16</sup> Já naquee mé ná xica tuun xihín Jesús cán cuahán ná ta tá naxinu ná nñuu cán nasahíin tá fin cachí Jesús xihín ná. Já nacaja ndíví ná ña cajíni na vicó pascua mé cán.

<sup>17</sup> Tá nacuaá naxinu Jesús xihín ndíluxu ivi ná xica tuun xihín á. <sup>18</sup> Ta tá ndúu coo na nñu mesa xíxi na já nacachi Jesús já xihín ná:

—Mé a ndaa ná cáhan i xihín ndó ña in táhan ndó, da ndúu coo xíxi xihín i nñu mesa yóho cacuu da jicó tühún yehe —nacachi a.

<sup>19</sup> Andá já nacásahá ná cán cácuéha ini na já nacásahá tá in tá in na ndáca tuhún na mé á já cachí ná já xihín á:

—Á yehe cacuu da jicó tühún mé ndó.

Já nacachi inga tucu da já:

—Á a juú yehe cacuu da.

<sup>20</sup> Andá já nacachi Jesús já:

—In táchāndó dā cūú uxu ivi, dā in ndúu xíxi xihín i ini cohó i, dā cán cūú dā jicó túhún yehe. <sup>21</sup> Yehé cūú dā nachindahá Ndióxi nduu ñayivi ta ndítahan nuú i quivi i tá fin cachí tuhun Ndióxi. Joo ndáhví nahá nacuú dā jicó túhún yehe. Janda vaha chágaa ná a cácu da, nduu —nacachi a.

<sup>22</sup> Nani xíxi na ndúu na natiin Jesús pan já nandiiquiahva ndixahvi nu Ndióxi. Tá nandíhi nasañhda java ña ta nasañhan ña nu ná já cachí a já xihín ná:

—Júhun ndó jáchí ña yóho cūú tátuhun yiquí cuñu i —nacachi a.

<sup>23</sup> Tá nandíhi natiin a in vaso nu ñúhu tó uva já nandiiquiahva ndixahvi nu Ndióxi. Ta nasañhan mé á do nuú na cán ta tám in na naxihi na do. <sup>24</sup> Já nacachi a já xihín ná:

—Dó yóho cūú dó tátuhun nií i, dó cuíta sahá cuahá ñayivi. Tá ná cuíta nií i já candaá ini ndó ña najáxínu coo Ndióxi tuhun a nasañhan sanahá. <sup>25</sup> Mé a ndaá ná cahán i xihín ndó ña a cóho ga i tó uva janda quiähva ná xínu coo quíví coho tucu y inga dó vaha chágaa tá ná xínu quíví cacomí Ndióxi cuéntá sahá ñayivi —nacachi a.

Cáxi tuhun Jesús ña chijehé tuhun Pedro ña xíni dā mé á  
(Mt. 26:30-35; Lc. 22:31-34; Jn. 13:36-38)

<sup>26</sup> Tá nandíhi naxita na in canto já naquee na cuahán na yúcu yitó Olivo. <sup>27</sup> Anda já nacachi Jesús já xihín ná:

—Tóco ndihi ndó jándacoo ndó yehé ñuu viti jáchí já cachí tuhun Ndióxi já: “Cahní i dā ndáá ndicachi ta xihín ña yóho ndicuítua nuu ndicachi jána dā cuhun ri”, cachí tuhun Ndióxi. <sup>28</sup> Joo tá nandíhi nditacu tucu y ta já cuhun jihna ñúhu yehé estado Galilea anda já cuhun mé ndó —nacachi a.

<sup>29</sup> Anda já nacachi Pedro já xihín Jesús:

—Vatí ná jándacoo ndihi na mé ndó joo a jándacoo toho i ndohó —nacachi da.

<sup>30</sup> Anda já nacachi Jesús já xihín dá:

—Mé a ndaá ná cahan i xuhun mé ñuu viti tá cámáñi cana ivi chéle já chijehé tuhún ña xínún yehé uní tañu —nacachi a.

<sup>31</sup> Já nacasáhá ndúcú ndéé Pedro cahán da já cachí da já:

—Vatí ná quivi i xihín ndó joo a chijehé tuhun toho i sahá ña xíni i mé ndó —nacachi da.

Ta mé quiähva já nacachi ndihi na cán xihín á.

Tá xíca tähví Jesús tañu yitó olivo naní a Getsemaní  
(Mt. 26:36-46; Lc. 22:39-46)

<sup>32</sup> Anda já naxínu na cán in nuú naní Getsemaní já nacachi Jesús já xihín na xica tuun xihín á:

—Yóho cacoo ndó nani ná cuhun i cáca tähví i nu Ndióxi —nacachi a.

<sup>33</sup> Ta ndáca Pedro xihín Jacobo xihín Juan cuahán xihín á. Tá ndaja coo nacasáhá cacuséhá ini a ta a juú quiähva tähví ini a.

<sup>34</sup> Já nacachi a já xihín ná:

—Cácuéhá ndivaha ini i chí quivi i cíu ini i. Yóho candoo tóó ndó ta coto a cíu ndo —nacachi a.

<sup>35</sup> Anda já naquee Jesús cuahán chágaa chí nuu já nacaxítí a janda quiähva naxínu coo nuu á nu ñúhu cán. Já naxica tähví a nu Ndióxi ña ná caja mé á ña ná a ndohó a tá quiähva vaxi nu á ndoho a chí nuu. <sup>36</sup> Já cachí a já xíca tähví a nu Ndióxi:

—Tátá Ndióxi, tóccó ndihi ñaha cuu caja ndó. Chindeé ndó yehé ná a ndohó i ña ihví ndivaha ña vaxi nuú i ndohó i. Joo ná coo tá fin cúní mé ndó ta ná a cóo toho ña cúní yehé —nacachi a.

<sup>37</sup> Anda já nandicó coo a nu ndúu na xica tuun xihín a cán ta já nandíñehé á na quíji na ndúu na. Já nacasáhá cachí a já xihín Pedro:

—Á quíji vún, Simón. Á coó nacuu conditún ni in hora. <sup>38</sup> Xíni ñúhu coo tiähva ndó ta caçá tähví ndó nu Ndióxi já ná a coto ndojó rí quini ndohó. Mé a ndaá ínimá ñayivi cúní a ndinducú a Ndióxi joo yiquí cuñu na co fin tiähva caja ña cúní Ndióxi —nacachi a.

<sup>39</sup> Anda já naquee tucu a cuahán caca tähví a nu Ndióxi. Ta sa mé tuhun nacahan nu cuítí cán nacahan tucu a chí ivi. <sup>40</sup> Ta tá nandicó coo a nandíñehé tucu a na xica tuun xihín a cán ndúu na quíji na jáchi naquee a mañhú ná. Ta chí co xíni na ndá tuhun nducú ñehe na nu Jesús sahá ña quíji na. <sup>41</sup> Tá nandicó coo a tálhdá uní já nacachi a já xihín ná:

—Vatí cúní ndó cuju ndó ta vatí cúní ndó ndiquehe ndéé ndó joo a cíu caja ndó ña viti. Jáchí sa naxínu coo hora ndiquiahva na yehé, dā nachindahá Ndióxi nduu ñayivi ndahá ñayivi cája cuachi. <sup>42</sup> Cuáhán ndacoo ndó ná coho. Jáchí sa vaxi dā jícó túhún yehé —nacachi a.

*Tá natiin na Jesús*

(Mt. 26:47-56; Lc. 22:47-53; Jn. 18:2-11)

<sup>43</sup> Ta nani cähän yii va Jesús cändichi a já naxinu Judas, dä cúú in táhan dä uxu ivi xíca tuun xihín Jesús cán. Ta xihín mé dä cán vaxi sacuha ñayivi ñehe na machiti xihín yító viti. Mé na vaxi cán cúú na ña vaxi cuénta na sacuha nuú jutu xihín nuú na jáñahá ley Moisés xihín nuú na sacuha veñuhu. <sup>44</sup> Ta mé Judas, dä ndiquiahva mé á nuú na cán sa nacandoo dä xihín na cán ña tatí yúhu dá sajóho Jesús jáchí nacachi da já xihín ná:

—Mé dä ná tatí yuhú u sajóho, dä cán cúú dä tiin ndó ta cató tuun ndó dä cañehe ndó cuhun ndo —nacachi da.

<sup>45</sup> Ta tá naxinu da cán chí ivi laá nacayati da nu Jesús já cachí da já xihín á:

—Maestro, maestro.

Já natatí yúhu dá sajóho a. <sup>46</sup> Anda já natiin tuun na Jesús.

<sup>47</sup> Joo in táhan dä xíca tuun xihín Jesús cán natavá dä machiti dä já nachituhun dä in joho dä cúú mozo dä sacuha nuú jutu cán. <sup>48</sup> Anda já nacachi Jesús já xihín na naxinu tiin ñahá cán:

—Cája ndó xihín i tátuhun caja na xihín taa cuhná jáchí ñaqueña ndó vaxi ndó tiin ndó yehe xihín machiti ta xihín yító. <sup>49</sup> Ndiójá níi quiyí ñasahijin i tañu ndó jan ta najánahá i ndohó ini veñuhu cähnu ta ni in tañu coó natiin ndó yehe. Joo tóco ndihí ña yáho yóho xíní ñúlhú yaha ña já ná xinu coo nuú ña ñacayhi sahá i ini tuhun Ndiójí —nacachi a.

<sup>50</sup> Anda já naxinu ndihí na xíca tuun xihín Jesús cán cuahen na ta najándacoo na mé á.

*Tá naxinu in dä tacú cuahen da*

<sup>51</sup> Joo in dä tacú cátiví dä in túhun jini sábana ndicó da jatá na cán cuahen dä ta natiin na da. <sup>52</sup> Joo najaní dä mé dä ta nacandoo sábana dä já naxinu lahlá da cuahen da.

*Nasacu na Jesús nuú nätaca ndihí na sacuha*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Anda já ñasañeha na Jesús ñasahan na nuú dä cúú sacuha chágá nu ndihí jutu. Ta nandique táhan tóco ndihí na sacuha nuú jutu xihín na sacuha veñuhu xihín na jáñahá ley Moisés. <sup>54</sup> Ta nasandico xícá Pedro Jesús anda quiähva naxinu dä yéhé

vehe dä cúú sacuha chágá nu ndihí jutu cán. Já nasacoo da xihín dä ndáá veñuhu cähnu cán xítúní dä yati yávì núhu cán.

<sup>55</sup> Ta ná sacuha nuú jutu xihín tóco ndihí na cómí cuénta sahá na Israel nätaca na cán ndícu na cuachí jácana na jatá Jesús já cuu cahñ ñahá na. Joo coó cuachi jíquí ná ñehe ná chínúna na jatá mé á. <sup>56</sup> Ta cuahen ná ñacashá cähän na ña tuhun sahá Jesús joo co xínú tuhun cähän na jáchí a cúú ndique táhan vaha tuhun na. <sup>57</sup> Ta nandaca ndichi java da cähän dä tuhun jíquí sahá Jesús já cachí da já:

<sup>58</sup> —Naxini joho nde nacachi dä jan já: “Jánditani i veñuhu cähnu cán, ña ñacavaha ñayivi ta tixi uni quiyí jácandichi tucu u inga ga ña a cúú cavaha ndahá taa” —nacachi da.

<sup>59</sup> Joo ni já coó ñacuu ndique táhan tuhun na xihín ña ñacachi na cán.

<sup>60</sup> Anda já nandaca ndichi mé dä cúú sacuha chágá nu ndihí jutu tañu na cán já nandaca tuhun dä Jesús já cachí da já xihín á:

—Á chí a ndícu ñehún tuhun nuú nde sahá cuachi jácojo na jatun —nacachi da.

“Joo coó ñacahan Jesús ni in tuhun xihín ná já tájí níi já va ñasahijin a. Mé dä cúú sacuha chágá nu ndihí jutu cán ñacashá ndáca tuhun tucu da a já cachí da já xihín á:

—Á jivi indusa yóho cúún Cristo, dä cúú in túhun jini já jáhyi Ndiójí yii, mé dä nachindahá Ndiójí cacomí cuénta sahá ñayivi —nacachi da.

<sup>62</sup> Anda já nacachi Jesús já:

—Ajan, jivi yehe cúú dä. Ta vaxi quiyí tá cuni ndó yehe, dä nachindahá Ndiójí nduu ñayivi cacoo i xoo cuáha Ndiójí, mé a íin cuaha ndée. Ta já cuni ndó yehe ndicó coo i ñuyíví yóho tañu víco tá ná quixi i chí indívi —nacachi a.

<sup>63</sup> Anda já nandata dä cúú sacuha chágá nu ndihí jutu jáhma dä ña ná candaan ini ñayivi ña xójó ini da. Já cachí da já:

—Ndá chicuu chágá yó ñayivi ndicani nu yo. Xihín ña ñacahan dä yóho cändaa iní ña ndája núu da Ndiójí. <sup>64</sup> Á sa naxini joho ndó ña ndája núu da Ndiójí xihín tuhun ñacahan dä. Ndaja xíní ndó caja i xihín dä viti —nacachi da.

Anda já nandique táhan tuhun ndihí ñayivi ña ndácaan cuachi nu Jesús ña cán quéa ndítahan quivi a.

<sup>65</sup> Java na nacasáhá ná xihnu ndaa na tójíí nu á ta java na náchicají na jáhmá nu á já nacasáhá cáni na jahndá nuú á já ndáca tühún ñahá ná já cachí na já xihín á:

—Cahán xihín nde yo nácani yohó viti —nacachi na.

Ta jandá ná ndáá veñuhu cahnu cán viti nacasáhá cáni na jahndá nuú á.

*Tá nachijehé tühun Pedro ñá xíni da Jesús (Mt. 26:69-75; Lc. 22:56-62; Jn. 18:15-18, 29)*

<sup>66</sup> Ta ndaja coo Pedro íin yiji dá xítúní da cán já naxinu in ñá cája chún xihín da cíú sacuahá chágá nu ndíhi jutu. <sup>67</sup> Já naxini ñá xítúní Pedro ta nahá vaha násandehé ñá nu dá já cachí ñá já:

—Yohó cíúna táhan dá xíca tuun xihín Jesús, dá ñuu Nazaret —nacachi ñá.

<sup>68</sup> Joo nachijehé tühun da ñá xíni da Jesús já cachí da já:

—Uhun. Co xíni toho i da ta co xíni toho yehé ndá sahá cahún —cachí Pedro.

Anda já nacayati da yuyéhé ta ivi láá nacana chéle. <sup>69</sup> Tá naxini mé ñá cája chún xihín da cíú sacuahá chágá nu ndíhi jutu cán ñá násandichi tóo da yehé cán já nacasáhá ñá cáxi tühun ñá xihín tóocó ndíhi ñayivi ndíu cán já cachí ñá já:

—Candehé ndó. Dá cíáa cíú in táhan dá xíca tuun xihín Jesús —nacachi ñá.

<sup>70</sup> Nacachi tucu Pedro ñá co xíni da Jesús. Chá va nayaha ñá yohó ta já nacachi na ndíu xítúní cán xihín Pedro:

—Táhan ri dä cíáa va cíú yohó jáchí cíúna dä Galilea ta cahún tátuhun cahán na cán —nacachi na.

<sup>71</sup> Anda já nacasáhá Pedro cánahá dä ta natavá da quivi Ndióxi ñá co xíni da Jesús já nacachi da já:

—Ni co xíni mí i ndá taa cíú da jan, da cahán ndó sahá jan —nacachi da.

<sup>72</sup> Tá nacachi da já ivi láá nacana chéle ñá chí ivi. Anda já nandicuhun ini Pedro ñá nacachi Jesús xihín dä tá nacachi a já: “Tá cámání cana ivi chéle sa chíjehé tühun ñá xínún yehé uní tañu.” Tá nandicuhun ini Pedro ñá yohó já nacasáhá sácu ndivaha da.

## 15

*Tá nandiquighva na Jesús ndáhá Pilato (Mt. 27:1-2, 11-14; Lc. 23:1-5; Jn. 18:28-38)*

<sup>1</sup> Tá nativi inga quivi itan já nandique táhan na sacuahá nuú jutu xihín na sacuahá

veñuhu xihín na jáñahá ley Moisés xihín ndíhi na cómí cuéntá sahá na Israel. Já nacató na Jesús ñéhe na a cuahán na já nandiquighva na mé á nu Pilato. <sup>2</sup> Ta mé Pilato nandacá tühún dä Jesús já cachí da já xihín á:

—Á mé a ndaa cíúna in rey, dä cómí cuéntá sahá na Israel.

—Ajan. Jivi cíú u tá quiáhva cachí ndo jan —nacachi Jesús xihín dä.

<sup>3</sup> Ta najácojo na sacuahá nuú jutu cán cuahá cuachi jata Jesús. <sup>4</sup> Já nandacá tühún tucu Pilato Jesús já nacachi da já xihín á:

—Ndávaha co ndúcú ñehún tühun nuú i. Candehé ndaja cuahá nuú cuachi jácojo na jatun —nacachi da.

<sup>5</sup> Joo ni in tühun coó nacahan Jesús. Tá naxini Pilato ñá co ndúcú ñéhe Jesús tühun já nacatontó dä sahá ñá cája.

Sácu ini na sahá Jesús ndaja caja na ñá quivi a

(Mt. 27:15-31; Lc. 23:13-25; Jn. 18:38-19:16)

<sup>6</sup> Tañu mé víco pascua násahiñ costumbre Pilato ñá janí dä in dä ndácaan vecaa. Ndá dä cíni ñayivi janí dä, dä cán cíú da jání dä. <sup>7</sup> Ta ndaja coo mé já ndácaan in da naní Barrabás vecaa xihín java ga dä naxixa xihín dä. Ndácaan dä vecaa sahá ñá násahní dä ndii tá nandivaa ñayivi. <sup>8</sup> Chí naxinu ñayivi nu Pilato já nacasáhá na cahán na xihín dä ñá ná caja da tá quiáhva sá caja da. <sup>9</sup> Joo nandacá tühún Pilato na já cachí da já:

—Á co cíni ndó ñá ná janí i dä cíú rey nuú ñayivi Israel yohó —nacachi da.

<sup>10</sup> Nacachi Pilato ñá yohó jáchí xíni da ñá nandiquighva na sacuahá nuú jutu cán Jesús nu dä sahá ñá cahíhví ini na xihín á. <sup>11</sup> Joo na sacuahá nuú jutu cán nacasáhá na jándiníhi na ñayivi ñá ná cachí na xihín Pilato ñá ná janí dä Barrabás. <sup>12</sup> Tá nandihí já nandacá tühún Pilato na já nacachi da já xihín ná:

—Ndíá cíni ndó caja i xihín dä cachí ndó cíú rey nu ndóhó, na Israel —nacachi da.

<sup>13</sup> Andajá nanducú ñéhe ñayivi cán tühun nu Pilato já cachí na já xihín dä:

—Cata caa ndó dä ndica crúxu.

<sup>14</sup> Já nacachi Pilato já xihín ná:

—Ndá cuachi nacaja da, vaha.

Joo ví ga ví cayuhú cóhó na já cachí na já:

—Cata caa ndó dä ndica crúxu.

<sup>15</sup> Ta sahá ñá cíni Pilato candoo vaha da nuú ñayivi nájaní dä Barrabás. Ta

tá nandihí najácacáhan na Jesús já nandiiquahva da a ndáha na cuyhun cata caa ñahá na ndica crúxu.

<sup>16</sup> Anda já ñéhe soldado Jesús cuahan na yuyéhé vechúun cán. Já najánditaca soldado cán java ga tahan da. <sup>17</sup> Já nacchinúu na in jahmá cuáhá túun jata Jesús ta nacchinúu na in tiyivi ínu jini á. <sup>18</sup> Tá nandihí já nacasáhá na cayuhú na já cachí na já:

—Cáhuu nahá na cacuu yóhó, da cíu rey nuú na Israel —cachí na sácu ndaa ñahá na.

<sup>19</sup> Tá nandihí nacasáhá cání na yiquí jini a xihín in ndoo ta nacasáhá na xihnu ndaa na tójí na nuú á já nacasáhá na caxítí na nu á ña cája na tátuhun cája cahnu na a.

<sup>20</sup> Tá nandihí nasaçu ndaa na a já natavá na jáhmá cuáhá túun ña nasañuu jatá. Ta najándaca ndixi na a xihin jáhmá mé á já nasañeha na a cuahan na cata caa na a ndica crúxu.

Tá nacata caa na Jesús ndica crúxu  
(Mt. 27:32-44; Lc. 23:26-43; Jn. 19:17-27)

<sup>21</sup> Tá ñéhe na Jesús cuahan na cata caa na a ndica crúxu já nandique tahan na xihin in da vaxi da ndíhvi da ñuu Jerusalén. Mé da cán naní da Simón, da ñuu Cirene, da cíu tátá Alejandro xihín Rufo. Já nacaja ndusa na xihín dá ña ná ndicojo da crúxu nuú cata caa na Jesús.

<sup>22</sup> Já nasañeha na Jesús nasañan na in xiquí naní Gólgota. Tuhun yóhó cúní cachí a: nu ndúu lásá yiquí jini ndii. <sup>23</sup> Cán nasañan na vino nuú Jesús, dó nacavá tahan xihin jusa ña naní mirra. Joo coó naseen toho a coho a do. <sup>24</sup> Anda já nacata caa na a ndica crúxu. Já nacasáhá soldado cán sajíquí da saha jáhmá Jesús ta nacachi xihin tahan da ña ndá da ná quee vaha cuu quehe in in jáhmá Jesús.

<sup>25</sup> Ta cíu a tátuhun caa in naha tá nacata caa na Jesús ndica crúxu cán. <sup>26</sup> Ta jini ndica crúxu cán nacahyí na ndá sahá nacata caa na a ta já cachí a já: “Da yóhó cíu rey nuú na Israel.” <sup>27</sup> Ta sá mé já nacata caa na ivi taa cuihná xihín Jesús: in da xoo cuáha ta in da xoo íti. <sup>28</sup> Ta xihín ña yóhó naxinu coo tuhun Ndióxi tá cachí a já: “Tañu taa quini nasaçu na a.”

<sup>29</sup> Chí cava jini mé ñayivi yáha cán cánahá na xihín á já cachí na já:

—Candehé. Yóhó cachún ña jánditanun veñihu cahnu cán ta tixi uní víxí quiyi cachún jácandichi tucún ña. <sup>30</sup> Jácacu mún.

Cuáhán nuu ndica crúxu jan —nacachi na sácu ndaa ichí na.

<sup>31</sup> Ta quiähva já cája na sacuahá nuú jutu cán xihín na jánahá ley Moisés sácu ndaa ñahá na. Ta nacasáhá cahen xihín tahan na já cachí na já:

—Nacuu nacaja Jesús jácacu da java ga ñayivi joo viti a cuú jácacu da mé dá. <sup>32</sup> Tá ta mé a ndaa cíu dí Cristo, da cuú rey nuú na Israel ná nuu da ndica crúxu viti ñuhú já ná candusa nde dä —cachí na.

Ta janda dä ivi tahan ndácaa ndica crúxu jini á cán cánahá da xihín á.

Tá naxihi Jesús  
(Mt. 27:45-56; Lc. 23:44-49; Jn. 19:28-30)

<sup>33</sup> Tá naxinu coo caxivi ndaa nacanaa nií cuú ñuyíví ta janda caa uní sahini já nacasáhá nandiyeho tucu. <sup>34</sup> Ta sá mé hora já nacayuhú cóhó Jesús já cachí a já:

—Eloí, Eloí, lama sabactani —nacachi a. Tuuhun yóhó cúní cachí a: Ndióxi mí i, Ndióxi mí i, ndávaha nájándacoo ndáha ndó yéhe.

<sup>35</sup> Ta java na ndita cán naxini joho na tuhun cachí a. Já nacachi na já:

—Cuni joho ndó jáchí cáná da profeta Elías —nacachi na.

<sup>36</sup> Anda já xinu in da nasañan da nacindaxi da in ticoto ini vino iyá. Já nacató da mé ticoto cán nuú in yitó ndoo já nacitivi da do yati yúhu Jesús ña ná coho a do. Já nacachi da já xihín java da cán:

—Cóhó candehó á quixi Elías jánuu a da ndica crúxu —nacachi da.

<sup>37</sup> Anda já nacayuhú cóhó Jesús já naxihi a. <sup>38</sup> Anda já nandatá java ndaa jáhmá ndeé ña sají nuu nuú yií ndivaha veñihu cahnu ñuu Jerusalén cán. Janda jini á ta janda sahá nandata. <sup>39</sup> Ta ndaja coo in dataa, da sáhndá chuun nuú soldado cuénta Roma nasañiin da nu ndácaa Jesús cán ta tá naxini da naxihi a já nacachi da já:

—Mé a ndaa táchí cuú da yóhó in tühün jini já jahyi Ndióxi —nacachi da.  
<sup>40</sup> Ta nasañduu java naijhí ta sándehé xícá na Jesús. Tañu na yóhó nasañdaçan ñá naní María, ñá ñuu Magdala xihín María, ñá cíu náná Jacobo, da loho chá nuú José xihín in ñá naní Salomé. <sup>41</sup> Nasañdico naijhí yóhó jata Jesús ta nacchindeé ñahá na tá nasañiin a estado Galilea. Cuahá ga naijhí nasañduu cán ta java na cíu ná na nasañan xihín á ñuu Jerusalén jihna tá cámáni quiyi a.

*Tá najánduxu na Jesús*

(Mt. 27:57-61; Lc. 23:50-56; Jn. 19:38-42)

<sup>42</sup> Tá nacuaá tóo uun quíví viernexe tá cámání casaa quíví ndíquehe ndéé na Israel já nayaha tóco ndihí ña yóho. <sup>43</sup> Ta ndaja coo íin in da naní José, da ñuu Arimatea, da cùú táhan na cómi cuénta sahá na Israel. Mé José yóho ndáti da casaa quíví cacomí Ndióxi cuénta sahá ñayivi ñuyíví yóho. Ta nasahan ndéé ini da cuhun da cahán máni dá xihín Pilato sahá yiquí cuñu Jesús ña ná quiahva mé Pilato ña nu dá. <sup>44</sup> Chí nacatontó Pilato tá nacandaá ini da ña sa naxihí Jesús. Já nacana da dà sáhndá chuuñ nuú soldado dà já nandacaá tuhún ñahá dà á sa naxihí Jesús. <sup>45</sup> Tá nacaxi tuhun da cán nu Pilato ña sa naxihí Jesús já nasañan Pilato ñamani nuú José ña ná ndiquehe da yiquí cuñu Jesús. <sup>46</sup> Andá já naseen José in jahmá vaha ta najánuu da yiquí cuñu Jesús ndíca crúxu já nachitiví da ña xihín mé jahmá vaha cán. Tá nandihí já nanchicaán dà mé yiquí cuñu Jesús cán ini in yáví ndácaan ndíca cáva. Tá nandihí já nachijahvi da yuhú cáva cán xihín in yuu jáhdá cáhnu. <sup>47</sup> Ta ndaja coo María, ñá ñuu Magdala xihín María, náná José nasañehé na nuú nasañu na yiquí cuñu Jesús ini mé cáva cán.

## 16

*Tá nanditacu tucu Jesús*

(Mt. 28:1-10; Lc. 24:1-12; Jn. 20:1-10)

<sup>1</sup> Ta tá sa nayaha quíví ndíquehe ndéé na já nasañan María, ñá ñuu Magdala xihín María, ñá cùú náná Jacobo xihín Salomé viti naquee na cuahán na cueen na java nuú ñaha támi sáhan ña chindáá na yiquí cuñu Jesús. <sup>2</sup> Ta naha chá mé quíví domingo tá naqueta candii já cuahán na nuú nanchicaán na yiquí cuñu Jesús cán. <sup>3</sup> Ta nani xíca na cuahán na íchi cán já ndítuhún xihín táhan na ndá quiahva caja na tavá na yuu ndájí nuú ndácaan yiquí cuñu Jesús cán. Já cachí na já:

—Yo tavá toho yuu ndájí nuu nuú quihví ini nu ndácaan yiquí cuñu Jesús —cáchí xihín táhan na cásahan na jáchí cahnu ndivaha mé yuu cán.

<sup>4</sup> Joo tá naxinu na mé cáva cán já naxini na ña coó ga yuu ndájí yuhú cáva cán. <sup>5</sup> Ta tá nandihí na mé cáva cán já naxini na cámání in dataa ndíxí jahmá yaa ña cání. Íin coo da xoo cuáha ta cùú dá dà yúta. Tá naxini

najihí yóho dà cán chí nayihví na. <sup>6</sup> Anda já nacahan dà cán já cachí dà já:

—A yihví toho ndó. Xínj yehé ña ndínducú ndo Jesús ña Nazaret, ña nacata caa na ndica crúxu. Candehé ndo nuú nasañu na a. Coó ga íin viti jáchí nanditacu tucu a. <sup>7</sup> Ta viti cuáhan ndo caxi tuhun ndó xihín na naxica tuun xihín á ta xihín Pedro ña cánúú mé á cuahan estado Galilea. Tá cuhun ndó cán já cuni ndó a tá quiahva nacachi mé á xihín ndo —nacachi tátó Ndióxi.

<sup>8</sup> Já naquee na cán xínu na cuahán na jáchí nayihví ndivaha na anda quíji niñu na. Coó nacahan na xihín ni in ñayivi jáchí nayihví ndivaha na.

*Tá naxini María, ñá ñuu Magdala Jesús*  
(Jn. 20:11-18)

<sup>9</sup> Tá nandihí nanditacu tucu Jesús ta tá natívi mé quíví domingo já ñá nu cuítí naxini Jesús nasañu ñá María, ñá ñuu Magdala, mé ñá natavá Jesús usá rí quini nasañadaan ini ñá. <sup>10</sup> Ta tá naxini ñá mé á já naquee ñá cuahán ñá caxi tuhun ñá nuú na naxica tuun xihín Jesús ñá tácú a. Ta ndúu cuéhá ini na ta sácu na ndúu na tásaa ñá. <sup>11</sup> Ta nacaxi tuhun ñá nuú ná ña nanditacu tucu Jesús ta naxini ñá mé á joo coó naseen na candusa na ñá.

*Tá naxini ivi dà naxica tuun xihín Jesús mé á*

(Lc. 24:13-35)

<sup>12</sup> Ta tá nandihí já nandijama Jesús ndá quiahva cáá já nandacaá náha á nuú ivi táhan na cuahán yúcú, na naxica tuun xihín á.

<sup>13</sup> Joo tá nandicuni na mé á já naquee na cuahán na caxi tuhun na xihín na java cán joo coó naseen na candusa na tuhun nacahan ndíví na yóho xihín ná.

*Sáhndá Jesús chuun nuú na xíca tuun xihín á*

(Mt. 28:16-20; Lc. 24:36-49; Jn. 20:19-23)

<sup>14</sup> Tá nandihí cán nandacaá náha Jesús nuú ndíshuxu in na naxica tuun xihín á nani ndúu na xíci na. Já nacasadáhá jánaní a na jáchí nandaja táhyí na ínimá ná ta coó naseen na candusa na ña naxini na java cán Jesús tá nandihí nanditacu tucu a. <sup>15</sup> Já nacasadáhá cáchí Jesús já xihín ná:

—Cuáhán ndó níi cùú ñuyíví yóho ta caxi tuhun ndó xihín ndihí ñayivi tuhun vaha sahá i. <sup>16</sup> Ta ndá na ná candusa yehé ta candúta ná já quéa cazu ndaa ínimá ná ta a cuhun na indayá. Joo na co cándusa

yehé, ná cán cúú ná cuhun ná ndoho ini na indayá andá ama cáá quivi.<sup>17</sup> Joo ná cándezini yehé caja na ñá xitúhún. Ta xihín quíví yehé tavá ná ínímá quini ndácahan ini ñayivi. Ta ndacahán ná tuhun saá ñá coó nacatiáhva na.<sup>18</sup> Ta tá ná tiin ndáha ná coo ta tá ná coho na ñá cúú cahní ñahá, a cáhní toho a ná. Ta tá ná chinúu na ndáha ná jímí ná quíhvi já ndiváha mé ná quíhvi cán – nacachi Jesús.

*Tá nandaa Jesús cuahán indíví  
(Lc. 24:50-53)*

<sup>19</sup>Tá nandihi nacahán Jesús, xitoho í tócó ndihi tuhun yóho xihín ná andá já nandin-dita cuahán indíví ta nasaqo a xoo cuáha Ndióxi, tátá yo.<sup>20</sup> Tá nandihi já naquee ná naxica tuun xihín á cán cuahán ná caxí tuhun na tuhun vahá sahá Jesús ndijáá ñuu. Ta já nachindeé Jesús, xitoho í ná cán ta náha ñá cúú á ñá ndaáh cáhán ná jáchí nacaja mé á ñá cúú cája na cuahá nyú ñá xitúhún. Já ná coo.

## Tuhun vaha nacahyí Lucas sahá Jesucristo

*Ndícani Lucas ndavgha nacahyí da tuhun yóho*

<sup>1</sup>Sa xíni vahún, Teófilo ña sa cuahá ñayivi ndúcú na cahyí na lá cása tá íin ña mayaha tañu nde. <sup>2</sup>Ta najánahá na nuú nde tóco ndihí ña naxini na janda mé saha. Mé na yóho cíú ná ña naxica nuu nacahaná na tuhun vaha saha Jesús nuú ñayivi. <sup>3</sup>Ta cúní ri yehé va cahyí i ña jáchí cuéé cuéé nandaca tuhún i ndaja cása andá mé saha já ná cuu cahyí vií ndihí i ña nuú mún, Teófilo, da quíhyí ndivaha ini i. <sup>4</sup>Jáchí cúní ña ná candaas vaha inúndaja cása ña ndaas ña najánahá na nuún.

*Cáxi tuhun in tátó Ndióxi ña cacu Juan, da jácandítá ñayivi*

<sup>5</sup>Mé tiempo cán násacuu Herodes rey nuú na Judea. Ta násahijin in da cíú jutu naní Zácarías. Ta násacuu da cuéntá in tálndá jutu naní Abías. Ta njájíhí da nani ña Elisabet, ña naquixi chichi Aarón, da násacuu jutu sanahá. <sup>6</sup>Mé Zácarías yóho xihín njájíhí da násacuu na ñayivi naxica ndaas nuú Ndióxi. Ta xihín ndinuhi ini na nacaja na ña sáhndá Ndióxi nuú tuhún mé a caja na. Ta ni in tálndá toho ñayivi coó nacuu ñehé íní na cahán núu na saha ná. <sup>7</sup>Joo coó toho jahyi na nacacu jáchí coó nacuu canduu jahyi Elisabet cán. Ta mé tiempo já sa nacayatá ndivaha ndíví na.

<sup>8</sup>Ta ndaja coo in quívi nandatahan nuú mé tálndá jutu xíca xihín Zácarías cán caja chúun na cuéntá Ndióxi. <sup>9</sup>Tóco ndihí jutu cán násajíquí ña ndá dá ná quee vaha ta dá cán cacuu da quíhyí chinílmá ini veñihu cahnu ndácaan nuú Jerusalén cán. Ta naquee vaha Zácarías. <sup>10</sup>Ta nani chinílmá Zácarías cán ini veñihu já nanditútú ñayivi ndúu na yéhé ñuhu cán ndícahán ña Ndióxi. <sup>11</sup>Ta nani chinílmá Zácarías nuú náa cán ndácaan dá já nacanáha in tátó Ndióxi nuú dá cáríchi a xoo cuáha nuú náa nuú chinílmá dá cán. <sup>12</sup>Tá naxini Zácarías tátó Ndióxi cán, nayihví ndivaha da ta ni co xíni dá ndaas caja da. <sup>13</sup>Joo nandicahán tátó Ndióxi cán xihín dá já nacachi a já:

—A yílhví tohún, Zácarías jáchí sa naxini joho Ndióxi nuú naxica tahlvún nu á. Sáhá ña cán quéa caja mé a ña ná cacu in jahyi Elisabet, njájíhún. Ta cacún quívi dá cananí dá Juan. <sup>14</sup>A juú quiqhva cavatún ta cajíi inúndaja caja taa loho jan tá ná cacu da. Ta cuahá ga java na cajíi íní ña caja da tá ná cacu da. <sup>15</sup>Jáchí dà cahnu cacuu jahyún jan nuú Ndióxi. A cóho da ni in tálndá toho dó xihín ñayivi xíni na xihín. Ta cacuu da in dà jändicutú ndaa Ndióxi xihín íníma yii mé a janda tá cámání cacu da. <sup>16</sup>Ta mé jahyún jan caja da ña ná ndicó coó cuahá na Israel nuú Ndióxi, xitoho na. <sup>17</sup>Ta jihna níhú mé Juan cyhún dà caja tlahva da ñayivi janda ná quixi mé a chindahá Ndióxi. Tá quiqhva nandicutú ndaa íníma profeta Elías xihín íníma yii Ndióxi quiqhva já ndicutú ndaa íníma Juan xihín á já ná coo ndée dà caja da ña ná tálndá nacaja Elías. Ta caja mé Juan ña ná ndique táchan maní ñayivi xihín jahyi na. Ta caja da ña ná coo joho ñayivi sáá ini já ná caja na ña cúní Ndióxi. Quiqhva já caja da cacu tlahva da ñayivi janda quiqhva ná xinu quívi quixi dà nacahán Ndióxi tuhún a chindahá a —nacachi tátó Ndióxi cán xihín Zácarías.

<sup>18</sup>Anda já nandaca tuhún Zácarías cán tátó Ndióxi já nacachi da já xihín á:

—Ndaja caja i candaas ini i á mé a ndaas tálndá ñehé coo tá íin cahchún coo jáchí sa nacayatá ndivaha i ta quiqhva já nacayatá ri njájíhí vi —nacachi Zácarías cán.

<sup>19</sup>Anda já nanducú ñehé tátó Ndióxi cán tuhún nuú dá já cahchí a já xihín dá:

—Yehé cíú Gabriel ta chuun Ndióxi xíca nuú i caja i. Mé a cán nachindahá yehé ña ná quixi i caxi tuhún i ña yóho xuhun. <sup>20</sup>Joo viti sahá ña coó nacandúsún ña nacachi i xuhun candoo níhun ña ná a cíú cahun janda quiqhva ná xinu quívi cacu jahyún. Sa vaxi quívi coo tá íin nacachi i xuhun coo —nacachi tátó Ndióxi cán xihín dá.

<sup>21</sup>Joo ndaja coo ñayivi ndíta ndáti yéhé ñuhu cán sa nacasaahá ndíhi ini na sahá ña sa nacanahá ta coó Zácarías cán quéa jata véhe. <sup>22</sup>Joo tá naqueta Zácarías veñihu coó nacuu cahán dá ni in tálndá tuhún xihín ná. Xihín ña yóho nacandaa ini na ña naxini da in ñaha nacaja Ndióxi nuú náa yii mé a cán. Jandá ndáha uun da cíú nuú ná cán jáchí nacandoo níhí dá.

<sup>23</sup> Ta tá sa najáxinu<sup>23</sup> Zacarías quivi cája chúun da veñuhu cán já naquee da cuanúhu dá vehe da. <sup>24</sup> Tá sa nayaha ña yóho já naquee jahyi Elisabet, ñajíhí Zacarías cán. Ta tixi<sup>25</sup> xuhun yoo coó naquee ñá caca nuu ñá. Ta nacahán ña: <sup>26</sup> “Nacaja Ndióxi ña yóho xihín i viti já ná a cándéhé ndaa nahá ga ñayivi yehé”, nacahán ña.

Cáxi tuhun tátó Ndióxi xihín María ña cacu Jesús

<sup>26</sup> Tá naxinu<sup>26</sup> iñu yoo<sup>27</sup> ñúhu jahyi Elisabet cán já nachindahá Ndióxi mé Gabriel, tátó mé á in ñuu naní Nazaret ndácaqan estado Galilea. <sup>27</sup> Nasahan tátó Ndióxi yóho Nazaret naxito nihni a in ñá tacú naní María, ñá natiin tuhun in da naní José ña ná tandaha ná xihín dá. Mé José yóho naquixi da chichi David, dä násacomí cuéntá sahá ñayivi Israel sanahá. <sup>28</sup> Nandíhvi tátó Ndióxi cán nu fin ñá ta já nacachi a já xihín ña:

—Cáhan Ndióxi yehé xuhun, María jáchi<sup>29</sup> cúun in ñá nañehe táchvi nu Ndióxi. Ín Ndióxi xuhun ta nacaja cuahá chágá ñamáni xuhun a juú ga xihín java ga najíhí —nacachi tátó Ndióxi cán xihín ña.

<sup>29</sup> Joo tá naxini María tátó Ndióxi cán já nacatontó ña taa joho ñá ña cáhan mé a cán xihín ña. “Ta ndá cuénta quéra cáhan tátó Ndióxi yóho já xihín yo”, nacahán ña. <sup>30</sup> Anda já nacachi tátó Ndióxi cán já xihín ña:

—A yíhví tohún, María jáchi<sup>31</sup> cúun in ñá nañehe táchvi nu Ndióxi. <sup>31</sup> Ta viti quee jahyún ta tá sa nacacu a já cacún quivi á ná cananí a Jesús. <sup>32</sup> Mé jahyún jan cacuu a taa cáhnu. Ta catchi ñayivi sahá dá ña cacuu da in túhún jini já jahyi Ndióxi, mé á cáhnu nu ndíhi a. Ta mé Ndióxi, xitoho í caja ña ná cacomí jahyún cuéntá sahá ñayivi tá quiahva násacomí David, dä cúu tásahnu jíco dä cuéntá sahá ñayivi. <sup>33</sup> Quixi da cacomí dä cuéntá sahá ñayivi Israel ta anda ama cáá quivi cacomí da cuéntá sahá ná —nacachi tátó Ndióxi cán xihín María.

<sup>34</sup> Anda já nandacá tuhún María tátó Ndióxi cán já cáchí ña já xihín á:

—Ndaja coo cacu jahyi i ta ni in túhún toho taa co fin xihín i —nacachi ñá xihín á.

<sup>35</sup> Anda já nanducú ñehe tátó Ndióxi cán tuhun nu ñá já cáchí a já:

—Ínima<sup>36</sup> yii Ndióxi quéra quivi jändicutú yohó. Ta ndee Ndióxi, mé á cáhnu nu ndíhi a cán cava nuu a yohó tátuhun caja in víco.

Sahá ña cán quéra tá ná cacu jahyún jan cacuu da in dä yii<sup>37</sup> nacaxi Ndióxi caja chúun nu mé á. Ta catchi ñayivi sahá dá ña cùu dá in túhún jini já jahyi Ndióxi. <sup>38</sup> Ta cáxi tuhun i xuhun ña cacu jahyi Elisabet, ña cùu táchvi cán vati sa nacayatá ña. Ta viti sa naxinu iñu yoo<sup>39</sup> ñúhu jahyi ñá, mé ñá nacachi ñayivi sahá ña a cùu coo jahyi ñá. <sup>39</sup> Jáchí Ndióxi cuu caja tóco ndíhi ñaha —nacachi tátó Ndióxi cán xihín María.

<sup>38</sup> Anda já nacachi María já:

—Ndióxi cùu xitoho i ta ná caja mé á tá quiahva cùni a xihín i. Ná coo tá fin cáchí ndó coo.

Tá nandihi nacachi María cán ña yóho já naquee tátó Ndióxi cán cuahán.

Xító nihni María Elisabet, ñá cùu táchvi ñá

<sup>39</sup> Ta mé tañu quivi já já xínu María nasahan ñá in ñuu ndácaqan chí yúcu cuéntá Judea cán. <sup>40</sup> Ta tá naquihvi ñá vehe Zacarías, yíi Elisabet cán já nacahan Ndióxi ñá xihín Elisabet. <sup>41</sup> Ta tá naxini joho Elisabet nacahan Ndióxi María xihín ñá chí nacandita ña loho ndácaqan tixi Elisabet cán chí ivi láa nandicutú ndaq ñá xihín ínima yii Ndióxi. <sup>42</sup> Anda já nacayuhú cóhó Elisabet já nacachi ñá já xihín María:

—Ni in túhún toho najíhí coó nacaja máni Ndióxi xihín tá quiahva nacaja máni á yohó. Ta nacaja yii<sup>43</sup> mé á jahyún. <sup>43</sup> Ta coó sahá toho yehé ná quisún yohó, ñá cùu náná xitoho i coto nihún yehé. <sup>44</sup> Jáchí tá naxini joho uun i ña nacahan Ndiósun xihín i ivi laá nacandá jahyi i ini tixi i jáchi nacajii finí a. <sup>45</sup> Tahví nacuún jáchi nacandúsún ña nacachi Ndióxi, xitoho í xuhun. Jáchí caja tá caja mé á ña nacachi a caja —nacachi Elisabet cán xihín María.

<sup>46</sup> Anda já nacachi María já:

Cája cáhnu i Ndióxi, xitoho í xihín ínima i.

<sup>47</sup> Ta cájii<sup>47</sup> ndívaha ini i xihín ña cája Ndióxi, mé a jácacu yehé.

<sup>48</sup> Jáchí nandicuhun ini a sahá yehé, ñá ndáhví, ñá cùu in mozo mé á.

Ta catchi ñayivi ndíu viti xihín na vaxi quivi canduu ñuyiví yóho ña nacaja cuahá Ndióxi ñamáni xihín i.

<sup>49</sup> Jáchí mé Ndióxi, mé a cuu caja tóco ndíhi ñaha nacaja cuahá ña náhnu xihín i. Ta yii<sup>50</sup> ndívaha quivi mé á.

<sup>50</sup> Ta níi tiempo táchvi ini mé á sahá tóco ndíhi ñayivi, na cája cáhnu mé á.

<sup>51</sup> A juú quiahva náhnu ñaha nacaja mé á.

Nasahmu a nuu na ndíñehe jícó mé.  
<sup>52</sup> Ta nacandaa mé á chuun ndahá dä náhnu ta najánuu ndahá mé á dä.  
 Ta nandiñehe jícó mé á na najánuu ndahá mé ñuyíví yóho.  
<sup>53</sup> Ta najándicutú ndaa mé á ñaha nuu na nandimani ñaha cuxu.  
 Ta nacandaa mé á ña násacomí na cuicá já nataxí a na cán ná quee na cuhun na.  
<sup>54</sup> Nachindeé a na Israel, na cája chúun cuénta mé á.  
 Ta coó nandindójó a tähví ini a sahá ná.  
<sup>55</sup> Jáchí quiáhva já násahan mé á tuhun a caja anda ama cása quiví xihín Abraham ta xihín tásáhnu jícó yo, na naquixi chichi mé dä, já nacachi María cája cáhnu ñá Ndióxi.  
<sup>56</sup> Ta nacandoo María násahiin ñá vehe Elisabet tixi uní yoo. Anda já naquee ñá cuanúhy ñá vehe ñá.

Tá nacacu Juan, dä jácandúta ñayivi

<sup>57</sup> Tá nandindaa quiví cacu jahyi Elisabet já nacacu in taa loho. <sup>58</sup> Ta tóco ndihi ñayivi ndíu yati xihín ñá xihín na cúu táhan ñá násahan na xito nihni na ña. Ta cájii ínf na jáchí nacandaa ini na ña nacaja Ndióxi cuahá ñamani xihín ña. <sup>59</sup> Ta tá naxinu ña loho cán una quiví já násahan na nachicaan na marca yiquí cuñu a tátuhun ín costumbre na. Ta nacahán na cananí a Zacarías tá quiáhva naní tátá a. <sup>60</sup> Joo já nacachi Elisabet já:

—A cananí toho da já, Juan va cananí dä —nacachi ñá xihín na cán.

<sup>61</sup> Anda já nacachi na cán já xihín ña:

—Ndá cuénta quéa cananí jahyún já ta ni in túhun toho na vehún coó nani já.

<sup>62</sup> Anda já nacuu ndahá ná nuu Zacarías cán ña ndáca tuhún na dä ndaja coo cananí ña loho cán. <sup>63</sup> Anda já naxica Zacarías cán in tutu nuu ná ta já nacahý dä já: “Juan cananí dä.” Tá nacacu na cán ña yóho já nacatontó ndihi na. <sup>64</sup> Ta chí sa mé hora já nandicahán tucu Zacarías. Já nacásahá dä cája cáhnu da Ndióxi. <sup>65</sup> Xihín tóco ndihi ña nayaha yóho nacatontó ndihi na násanduu yati xihín Zacarías cán. Ta níi cúu ñuu válí ñúhu chí yúcu cuénta Judea cán nandicuita nuu tuhun sahá tóco ndihi ña nayaha yóho. <sup>66</sup> Ta tóco ndihi na naxini joho ña yóho nacásahá ndícani ini na sahá. Já nacásahá

ndáca tuhún táhan na já cachí xihín táhan na já:

—Ndá taa cacuu taa loho yóho tá ná cuahnu da.

Nacachi na ña yóho jahyi naxini táhyí na ñamani náhnu cája Ndióxi xihín taa loho cán.

### Cája cáhnu Zacarías Ndióxi

<sup>67</sup> Anda já nandicutú ímima Zacarías, tátá Juan cán xihín ímima yii Ndióxi. Já nacásahá dä cáhan dä tuhun sáhan Ndióxi nu dä cáhan dä. Já nacachi da já:

<sup>68</sup> Cáhnu ná cacuu Ndióxi, mé a cúu xitoho ñayivi naquixi chichi Israel.

Jáchí naquixi a jácacu a mí, na cúu cuénta mé á.

<sup>69</sup> Nachindahá Ndióxi mé a jácacu mí ná a cuhun yó indayá.

Ta ín ndée á caja tóco ndihi ña náhnu.

Ta naquixi a chichi David, dä nacaja chúun cuénta Ndióxi sanahá.

<sup>70</sup> Ta janda sanahá ndiváha násahan Ndióxi tuhun a ña caja mé á ña yóho.

Ta já nayáyaha na profeta cán tuhun nácahan Ndióxi nuu ñayivi.

<sup>71</sup> Ña nacachi mé á quéa jácacu a mí ndahá na iħvi yo xihín ndahá na co cúní mí.

<sup>72</sup> Ta nacachi a tähví ini a sahá tásáhnu jícó yo, na násanduu sanahá cán.

Ta a ndíndójó toho mé á sahá tuhun yii násahan nu ná jáchí ña yii cúu tóco ndihi tuhun sáhan Ndióxi nuu ñayivi.

<sup>73</sup> Ña yóho cúu tuhun nacachi Ndióxi jaxinu coo a nuu tá násahan mé á tuhun a nu Abraham, dä násacuu tásáhnu jícó yo cán.

<sup>74</sup> Ta nacachi mé á xihín dä ña jácacu a mí ndahá na co cúní mí já ná a cayihví yo caja chúun í cuénta mé á.

<sup>75</sup> Ta já ná cacuu ñayivi ndaa, na nandiquiahva mé caja ña cúní mé á tóco ndihi quiví ndíu ñuyíví yóho, nacachi Zacarías nu ndíshi ñayivi cán.

<sup>76</sup> Anda já nacásahá dä cáhan dä xihín ña loho jahyi da já cachí dä já xihín á:

Ta yóho, jahyi a, cachí ñayivi sahun ña cúu in profeta Ndióxi, mé a cúu cáhnu nu ndíshi a.

Ta jihna ñúhú cuhún jácahún ñayivi ña ná cacu tiáhva na ínimá ná ndiquehe na mé a chindahá Ndióxi vaxi.

<sup>77</sup> Ta xihín ña yóho cuu caxi tuhún xihín ñayivi ña cája cáhnu ini Ndióxi sahá cuacchi na.

Já ná cuu cacu ndaa ínimá ná ná a cuhun na indayá.

<sup>78</sup> Sahá ña quíhví ini Ndióxi mí ta sahá ña táchví ini mé á sahá yo sahá ña cán quéa jandá indíví nu fin mé á nachindahá a in a cuu chindee a mí ná ndíhví ichí saá cuénta mé á.

<sup>79</sup> Jáchí vaxi a jándiyehé a nuú ñayivi ndúu nuú naá ña ná caca na íchi nuú cuu coo vaha ini na xihín Ndióxi, nacachi Zacarías xihín jahyi loho da.

<sup>80</sup> Já nacasáhá sáhnu taa loho cán cuahan da. Ta ndíndacú dä xihín ñaha Ndióxi viti. Ta nasañin da yucú íchí nuú co ndúu cuahá ñayivi jandá quiáhva naxínu quiví nacasáhá jánahá dä nuú ná Israel.

## 2

Tá nacacu Jesúus ñuu Belén  
(Mt. 1:18-25)

<sup>1</sup> Ta mé tiempo cán tá násacomí Augusto cuénta sahá ñayivi ndúu ñuyíví já násahnda da chuun ña ná nditaca quiví ndaja táhan ñayivi cómí da cuénta saha. <sup>2</sup> Ta mé tañu nu cuítí tá nanditaca quiví ná já násacuu Cireneo gobernador estado Siria.

<sup>3</sup> Ta tóco ndihí ñayivi nanditahan nu ná cuhun ná tá ñuu tá ñuu nuú nacacu tásáhnu jíco ná ná quee quiví ná. <sup>4</sup> Sahá ña cán quéa naquee José ñuu Nazaret cuénta Galilea cán já nasahan dä ñuu Belén ña ndácaan estado Judea nuú nacacu David jáchí naquixi da chichi David. <sup>5</sup> Nasahen María xihín José ñuu Belén quee quiví ná. Mé María yóho cuú ñá naxíca da cacuu ñájishí dä. Ta sá já ñúhu jahyi ñá cuahen ná ñuu Belén. <sup>6</sup> Ta nani násanduu na ñuu Belén cán naxínu quiví cacu jahyi María. <sup>7</sup> Ta nacacu jahyi nuú ña. Ta nachitiví ñá a ticoto já nachinduhú ñá a nu xixáhan quíti cán. Mé nu sánduu quíti cán nacacu jahyi María jáchí coó nañéhe ná vehe canduu na jáchí sa nacatánu va vehe nuú canduu ñayivi xínu coo ñuu Belén cán.

Cáxi tuhun tátó Ndióxi xihín ná ndáá ndicachi ña nacacu Jesúus

<sup>8</sup> Násanduu java ná ndáá ndicachi jana ná ñuu yati ñuu Belén cán. <sup>9</sup> Ta in náá cuití nanahá tátó Ndióxi mé á nu ná. Ta chí nandiyihví ndaa nu ndúu ná cán nacaja Ndióxi ta nayihví ndivgha na. <sup>10</sup> Joo nandicahen tátó Ndióxi cán xihín ná já nacachi a já:

—A yihví toho ndó jáchi tuhun vaha quéa ñéhe e vaxi i cahan i xihín ndo. Ta xihín ña yóho cajíi ndivaha ini tóco ndihí ñayivi. <sup>11</sup> Jáchí mé quiví vitti nacacu in a jácacu a ndohó nuú cuachi ndó ta mé á cán cíu Cristo, xitoho ndó, ña nachindahá Ndióxi cacomí a cuénta sahá ndo. Ta nacacu a ñuu Belén nuú nacacu David sanahá. <sup>12</sup> Tá ná cuhun ndó cán já cuni ndó ña loho cán cátiví a ticoto cánduhu á nu xixáhan quíti. Tá ná cuni ndó ña yóho já candañini ndó ña cahen i ña ndaa xihín ndo —nacachi tátó Ndióxi xihín ná ndáá ndicachi cán.

<sup>13</sup> Ta nani cahen tátó Ndióxi cán naxínu coo cuahá chágá tátó Ndióxi nu fin a cán. Mé tátó Ndióxi yóho naquixi na indíví ta cája cáhnu na Ndióxi já cachí ná já:

<sup>14</sup> Cáhnu ná cacuu Ndióxi fin indíví.

Ta ná coo vaha ini tóco ndihí ñayivi ndúu nuyíví, mé ná cajíi ini xihín ñamani cája Ndióxi xihín ná, nacachi tátó Ndióxi cán.

<sup>15</sup> Ta tá sá nandicó coo tátó Ndióxi cán cuahen chí indíví já nacasáhá cachí xihín táhan ná ndáá ndicachi cán já:

—Cóho quiví yo ñuu Belén candehé yo ña nacachi Ndióxi, xitoho í xóho ña nacuu ñuu Belén cán.

<sup>16</sup> Já xínu na násahen ná ta tá naxínu coo na cán já nandinehé ná María xihín José xihín mé ña loho cánduhu nu xixáhan quíti cán. <sup>17</sup> Anda já nacasáhá nandicani ná ndáá ndicachi cán nu ná ña nacachi tátó Ndióxi xihín ná sahá ña loho cán. <sup>18</sup> Ta chí catontó tóco ndihí ñayivi tá xíni joho na ña ndicani ná ndáá ndicachi cán nu ná. <sup>19</sup> Joo nandicuhun ini María tóco ndihí ña nayaha ta ndicani ini ñá sahá. <sup>20</sup> Tá nandihí já naquee ná ndáá ndicachi cán cuahen ná. Ta a juú quiáhva cája cáhnu na Ndióxi cuahen ná sahá tóco ndihí ña naxini joho na xihín sahá tóco ndihí ña naxini na jáchí násahin tá fin nacachi tátó Ndióxi cán xihín ná.

Tá ñéhe na lee loho Jesúus cuahen na ndiquiahva na cuénta sahá mé á veñuhu cáhnu ñuu Jerusalén

<sup>21</sup> Tá nayaha una quivi nacacu lée jahyi María cán já nachicáan na marca yíquí cuñu a tá quiáhva íin costumbre na. Ta násacu na quivi á cananí a Jesús jáchí quiáhva já nacachi tátó Ndióxi cán xihín María ña ndítahan cananí a jandá tá cámání cañuhu jahyi ñá.

<sup>22</sup> Ta nu ley Moisés, ña nacahyí da sanahá cachí a ña tá ná ndihí nacacu jahyi in ñáñáha, a cíu quivi ñá veñúhu anda ña yaha sáhndá ley quivi. Ta tá sa nayaha quivi cán já naquehe María xihín José mé lée loho Jesús cán. Já ñéhe na ña cuahán na ndiquiahva na cuénta sahá nu Ndióxi veñúhu cähnu ñuu Jerusalén cán. <sup>23</sup> Nacaja na ña yóho jáchí já cachí ley nasañhanda Ndióxi sanahá: “Tóco ndihí taa valí, na cíu jahyi nuú najihí, ndítahan ndiquiahva na ña nu Ndióxi.” <sup>24</sup> Ta jári najoro na ña sáhndá ley Moisés coo tá nändihí nacacu jahyi na. Ta ña yóho cíu ivi ndiyuu á ivi ndijata.

<sup>25</sup> Ta ndaja coo mé tiempo cán nasahijin in dàtaa naní Simeón ñuu Jerusalén cán. Ta násacuu da in taa vaha ndiváha, da cája cähnu Ndióxi. Ta ndáti da xínu coo quivi chindahá Ndióxi in dà chindeé na Israel já ná a ndóho ga ini na. Ta nändicutú ndaa ínimá dà xihín ínimá yii Ndióxi. <sup>26</sup> Ta mé a cán quéa nacachi xihín dà ña a quivi toho da jandá quiáhva ná cuni táhyí dà Cristo, mé a nasahán Ndióxi tuhun a chindahá a. <sup>27</sup> Ta mé ínimá yii Ndióxi ndáca Simeón cuahán da veñúhu mé quivi naxínu María xihín José cán caja na xihín Jesús tá quiáhva sáhndá ley Moisés caja na. <sup>28</sup> Tá nändique táhan da xihín ná já natiin da Jesús já nasañehe ndaa da a. Já nacasáhá da cája cähnu da Ndióxi já cachí da já:

<sup>29</sup> Tátá Ndióxi, sa cuu quiáhva ndó ñamani quivi yaa i viti, jáchí sa najáxiu coo ndó nuú tuhun ndó, ña nasahán ndó nuú yéhe, da cíu mozo ndo.

<sup>30</sup> Jáchí naxini i xihín nuú i mé a nachindahá ndó jácazu ndehe.

<sup>31</sup> Nasacu ndó a ña ná jácazu a ndaja táhan ñayivi.

<sup>32</sup> Mé a yóho jándiyéhe a nuú na coó naquixi chichi Israel.

Ta sahá mé a yóho cähnan vaha ñayivi sahá na Israel, na cíu cuénta mé ndo, nacachi Simeón.

<sup>33</sup> Chí nacatontó José xihín María taa joho na ña cähnan Simeón sahá Jesús. <sup>34</sup> Tá

nändihí naxica tahví Simeón nu Ndióxi sahá ná anda já nacasadáhá cachí da já xihín María, náná Jesús:

—Nacaxi Ndióxi taa loho yóho ña ná caja da ná cuhun cuahá na Israel ndoho in na ta caja da ña ná caciú ínimá cuahá na cán. Naquixi da nu Ndióxi joo candají cuahá ná da <sup>35</sup> já náha táhyí ña cähvi in in na cán. Ta yóho, María táhyi ndiváha inú sahá ña yóho ta cacuu a tátuhun tuxú na machiti ínimun —nacachi Simeón xihín María.

<sup>36</sup> Ta mé cán nasañhín ri in ñá naní Ana, ñá jayaha tuhun cája Ndióxi nuú ñayivi. Ta násacuu ñá jahyi da naní Fanuel, da naquixi chichi Aser. Mé Ana yóho nacayatá ña. Tá yúta ñá natandahá ña joo usa laá cuia nasañhín ñá xihín yii ña já naxihí da.

<sup>37</sup> Ta viti sa naxínu comí jicó comí cuia íin cuáan ña. Nuú ta ndiví íin tuu ná veñúhu cája cähnu ñá Ndióxi. Xíjuhun ñá ta xíca tahví ña nu mé á. <sup>38</sup> Mé hora íin Simeón ndítuhún dà xihín María já naxínu coo Ana cán. Ta tá nändihí nandiquiahva ñá ndixahví nu Ndióxi já nacasadáhá cähnu ñá sahá ña loho Jesús cán nuú ñayivi, na ndáti quixi quivi chindahá Ndióxi da chindeé na ñuu Jerusalén. Ta cachí ñá ña jivi mé Jesús cán quéa ndáti na quixi.

#### Tá ngndicó coo na ñuu Nazaret

<sup>39</sup> Tá nändihí nacaja José xihín María ña sáhndá ley Moisés cája na cán já cuanúhu na ñuu Nazaret, ña ndácaan estado Galilea cán. <sup>40</sup> Ta mé taa loho Jesús sáhnu da ta ndíndacu da. Ta joho ndíndichí ga ví jini dà cuahán da. Ta cuahá ndiváha ñamani cája Ndióxi xihín dà.

#### Ndácaan Jesús veñúhu cähnu ñuu Jerusalén

<sup>41</sup> Tá nu cuía sáhan náná tátá Jesús víco pascua ñuu Jerusalén. <sup>42</sup> Ta tá naxínu Jesús uxu ivi cuia já ndáca táhan mé a xihín ná tá cuahán na víco ñuu Jerusalén cán jáchí já nasañhín costumbre ñayivi cája na tañu víco cán. <sup>43</sup> Ta tá sa nayaha víco cán já nändicó coo José xihín María cuahán na. Joo coó naxini na ña nacandoo Jesús ñuu Jerusalén cán. <sup>44</sup> Tañu ñayivi cuahá cán cátáhan da vaxi da, nacahán na. Ta tá sa naxínu níi in quivi xíca na cuahán na já nacasadáhá ndínducu ná da tañu ñayivi cíu táhan na xihín tañu na xíní táhan xihín ná. <sup>45</sup> Joo coó nandiñehe ná da. Andá já nändicó coo tucu na ñuu Jerusalén ndínducu ná da.

<sup>46</sup> Janda quíví uni ví já nandiñgehe ná Jesús ini veñuhu cahnu cán. Cáa íin coo da tañu na jánahá ley Moisés cán. Táa joho da nu cahñan ná ta ndáca tühun dä na sahá java ga ñaha. <sup>47</sup> Ta chí cátontó tóco ndihí ñayivi tá xíni joho na tuhun ndúcu ñehe da nuú na jánahá ley Moisés cán jáchí ñáha ñá ndíchí jini dá. <sup>48</sup> Tá naxini María xihín José ñá ndácaan Jesús tañu na jánahá ley Moisés cán já nacatontó ná. Andá já nacachi María já xihín Jesús:

—Jahyi maní i. Ndá cuénta quéa nacajún ñá yóho xihín nde. Yéhe xihín tátun a juú quiahva ndícani ini nde xíca nuu nde ndínducu nde yohó —nacachi María xihín Jesús.

<sup>49</sup> Andá já nacachi Jesús já:

—Ndá cuénta quéa ndínducu ndó yéhe. Á co xíni toho ndó ñá ndítahan ndihí ini i cája i chuun nasañda tátá i, mé á íin indíví nuú i cája i, vaha —nacachi Jesús xihín ná.

<sup>50</sup> Joo ni María ni José coó nacandaa ini na ñá nacachi Jesús cán xihín ná.

<sup>51</sup> Andá já nandicó coo Jesús cuahan xihín ná ñuu Nazaret. Ta nacaja da tóco ndihí ñá cúní ná. Ta nandicuhun ini María ñá nacaja Jesús ini veñuhu cahnu cán. <sup>52</sup> Ta sáhnu Jesús ta cátacu ini da cuahñan. Ta cájii ini Ndióxi xihín ñá cája Jesús. Ta quiahva já cájii ri ini ñayivi va xihín ñá cája da.

### 3

Cásahá Juan cahñan dä tuhun Ndióxi xihín ñayivi yucú íchí cán

(Mt. 3:1-12; Mr. 1:1-8; Jn. 1:19-28)

<sup>1</sup> Tá naxinu sahun cuiá cómí Tiberio cuénta sahá ñayivi ñuyíví já nasacuu Poncio Pilato gobernador nuú ná ndúu estado Judea. Ta dä naní Herodes nasacuu gobernador nuú ná ndúu estado Galilea. Ta ñani Herodes, dä naní Felipe cán nasacuu gobernador nuú ná ndúu Iturea xihín nuú ná ndúu Traconite. Ta dä naní Lisanias nasacuu gobernador nuú ná ndúu Abilinia.

<sup>2</sup> Ta Anás xihín Caifás nasacuu dä sacuahá nu ndihí jutu. Mé tiempo cán nacahñan Ndióxi xihín Juan, dä cútú jahyi Zacarías, mé nu fin da yucú íchí cán. <sup>3</sup> Andá já nayaha Juan ndíjáá ñuu válí ñúhu yuhú yuta Jordán cán. Ta cáxi tuhun da nuú ñayivi ñá ndítahan nu ná jándacoo na ñá nuú cája na já ná caja cahnu ini Ndióxi sahá cuahñi na ta já

ná candúta ná. <sup>4</sup> Tóco ndihí ñá yóho nayaha tá íin nacachi Isaías tá nacahyí dä sanahá: Vaxi quivi tá cahñan cóhó in da tañu yúcu íchí ta cachi da já:

“Caja tiähva ndó íchí nuú quixi xitoho í, ta cuná ndó in ichí ndacú nu mé á ñá ná ndihvi a ímima ndo.

<sup>5</sup> Tóco ndihí ñá cútú tähvi ná ndicutú ndihí a.

Tóco ndihí yúcu xihín xiquí ná ndicava ndaqá ndihí a.

Tóco ndihí ichí ndicava ná ndindacú ndihí a.

Ta íchí ñá co íin ndaqá nuú ndindaqá ndihí nu á.

<sup>6</sup> Ta tóco ndihí ñayivi ndúu ñuyíví cuni na ndá quiahva jácacu Ndióxi ñayivi”, já cáchí tutu nacahyí Isaías sanahá ndivaha.

<sup>7</sup> Ta nacásahá ñayivi ndái cuu na nu íin Juan ñá ná jácandúta dä na joo nacásahá xójo ndivaha ini da xihín ná já cáchí da já:

—Mé ndó cútú ndó tátuhun coo jáchí cútú ndó na quini. Cáhán ndq ñá a jándoho ga Ndióxi ini ndó sahá cuahñi ndó tá ná candúta ndó vatí cája tá cája ndó cuahñi.

<sup>8</sup> Xíni ñúhu caja ndó ñá vaha já ná cuni ñayivi ñá mé a ndaa tähví najándico ndó ñá nuú nasañda ndó jihna. Ta a cáhán ndq ñá jácacu Ndióxi ndohó sahá ñá cútú ndó na quihui chichi Abraham. Jáchí coó saha toho ñá jan nu Ndióxi tá co jándacoo ndó cuahñi ndó. Jáchí mé a ndaa ná cahan i xihín ndó ñá janda yuú ndúu nu ñúhu jan cuu caja Ndióxi ñá ná nduu a ñayivi quixi chichi Abraham. <sup>9</sup> Mé ndó cútú ndó tátuhun in yíto, dö sá natíin na hacha cuahñan na cahnda na. Ta tóco ndihí yíto, dö co sahan cuhi vaha nuú, tähinda dö ta quee dö nu ñúhu cayi do. Quiahva já caja rí Ndióxi xihín ndohó tá co cúní ndó ndicó coo ini ndó nu mé a —nacachi Juan xihín ñayivi cán.

<sup>10</sup> Andá já nacásahá ñayivi cán ndáca tuhun ná dä já cáchí na já xihín dä:

—Ndíá ndítahan nuú nde caja nde.

<sup>11</sup> Já cáchí Juan já xihín ná:

—Ndá na ndúu ivi cotó ná quiahva na in a nuú ná coó ñáha nuú. Ta ndá na íin ñá cuxu ná cahnda java tähán na ñá xihín ná coó a nuú —cachí Juan xihín ná cán.

<sup>12</sup> Tañu nā nāndai cuu cán naxínu ri java da játaca jiuhún cuénta impuesto nā candú-ta dá. Ta nāndaca tuhún da Juan já nācachi da já:

—Maestro, ndíá ndítahan nyú nde caja nde.

<sup>13</sup> Anda já nācachi Juan já xihín dá:

—Quehe ndó jiuhún nyú ñayivi tá quiahva sáhndá ley cuití va quehe ndó —nācachi Juan xihín da cán.

<sup>14</sup> Ta jári java da cúu soldado nāndaca tuhún da Juan já nācachi da já:

—Ta ndehe ri ndíá ndítahan caja nde.

Já nācachi Juan já xihín dá:

—A cándaa ndó nā cómí ñayivi. A jáyihví ndó nā sahá nā nā quiahva na ñaha nu ndo. Ta ni a jácojo ndó cuachi jata ná tá coó nācaya na nā. Ta xíní ñúhú coo vaha ini ndó xihín yahvi quéhe ndó sahá chuun cája ndó —nācachi Juan xihín da cán.

<sup>15</sup> Tócó ndihi ñayivi ndíhi ini na jáchi cúní nā candaq ini na nā á mé Juan cíu Cristo, da nāchindahá Ndióxi cacomí cuénta sahá ñayivi. <sup>16</sup> Joo nāndicahán Juan xihín tócó ndihi ñayivi já nācachi da já xihín ná:

—Mé a ndaa caja ndútá i ndohó xihín ticuú. Joo vaxi inga da ta dā cán cíu da jāndicutú ínimá ndó xihín ínimá yii Ndióxi ta nā cán cacuu a tátuhun ñúhú cayí. Ta dā cán ín cuahá chágá ndéé dá a juú ga yehé. Ta chí coó sahá i ndica xífí i nu dá nā ndaxí i correá ndusa dá. <sup>17</sup> Mé dā vaxi cán caxi da ñayivi vaha tañu ñayivi quini. Cíu á tátuhun in dataa tá jáxixi da trigo xihín palajá ná quee xehé á já cacu vaha da nā. Ta xehé nācana cán cuhun a cayí a xihín ñúhú itá nā a ndáhvá toho —nācachi Juan.

<sup>18</sup> Quiahva joho nācahán Juan nyú ñayivi tá nācaxi tuhun da tuhun vaha nu ná. Ta cuahá java ga ñaha nācaya da quéa nājánani da Herodes, dā cíu gobernador jáchi nāsahijin Herodes xihín Herodías, ná cíu nājáhí nāni da, Felipe. Ta nājánani Juan dā sahá java ga nā nūu nācaya da. <sup>19</sup> Joo nācaya johó Herodes mé dá ta coó nāxeen da coo joho da nu cahán Juan xihín dá. Nā nācaya da quéa nācaya chágá dā nā nūu tá nāchicáan da Juan vecaa.

Tá nācandúta Jesús

(Mt. 3:13-17; Mr. 1:9-11)

<sup>20</sup> Tá cámáni ndácaan Juan vecaa, caja ndútá dā ñayivi ta já nājácandúta ri da

Jesús. Ta nani xíca tāhví Jesús nu Ndióxi já nānquna indíví. <sup>22</sup> Ta nānuu íníma yii Ndióxi jata Jesús. Ta nāsacaa íníma yii Ndióxi yóho tá quiahva cáá in ndijata. Tá nāndihi já naxini joho na nā cahán in a indíví já nācachi a já:

—Yóho cíuú jahyi mānī i ta cajíi ndiváha ini i xuuhun —nācachi a.

Nā yóho cíuú quíví nā nāsacuu tásahnu jíco Jesús

(Mt. 1:1-17)

<sup>23</sup> Nāsandacaan Jesús tátuhun oco uxu cuia tá nācasahá jānaha tuhun Ndióxi nyú ñayivi. Ta nācahán ñayivi nā nāsacuu a jahyi José. Ta José cán nāsacuu da jahyi Elí, <sup>24</sup> ta tátá Elí nāsananí Matat. Ta tátá Matat nāsananí Leví. Ta tátá Leví nāsananí Melqui. Ta tátá Melqui nāsananí Jana. Ta tátá Jana nāsananí José. <sup>25</sup> Ta tátá José nāsananí Matatías. Ta tátá Matatías nāsananí Amós. Ta tátá Amós nāsananí Nahum. Ta tátá Nahum nāsananí Eslí. Ta tátá Eslí nāsananí Nagai. <sup>26</sup> Ta tátá Nagai nāsananí Maat. Ta tátá Maat nāsananí Matatías. Ta tátá Matatías nāsananí Semei. Ta tátá Semei nāsananí José. Ta tátá José nāsananí Judá. <sup>27</sup> Ta tátá Judá nāsananí Joana. Ta tátá Joana nāsananí Resa. Ta tátá Resa nāsananí Zorababel. Ta tátá Zorababel nāsananí Salatiel. Ta tátá Salatiel nāsananí Neri. <sup>28</sup> Ta tátá Neri nāsananí Melqui. Ta tátá Melqui nāsananí Adi. Ta tátá Adi nāsananí Cosam. Ta tátá Cosam nāsananí Elmodam. Ta tátá Elmodam nāsananí Er. <sup>29</sup> Ta tátá Er nāsananí Josué. Ta tátá Josué nāsananí Eliezer. Ta tátá Eliezer nāsananí Jorim. Ta tátá Jorim nāsananí Matat. <sup>30</sup> Ta tátá Matat nāsananí Leví. Ta tátá Leví nāsananí Simeón. Ta tátá Simeón nāsananí Judá. Ta tátá Judá nāsananí José. Ta tátá José nāsananí Jonán. Ta tátá Jonán nāsananí Eliaquim. <sup>31</sup> Ta tátá Eliaquim nāsananí Melea. Ta tátá Melea nāsananí Mainán. Ta tátá Mainán nāsananí Matata. Ta tátá Matata nāsananí Natán. <sup>32</sup> Ta tátá Natán nāsananí David. Ta tátá David nāsananí Isaí. Ta tátá Isaí nāsananí Obed. Ta tátá Obed nāsananí Booz. Ta tátá Booz nāsananí Salmón. Ta tátá Salmón nāsananí Naasón. <sup>33</sup> Ta tátá Naasón nāsananí Aminadab. Ta tátá Aminadab nāsananí Aram. Ta tátá Aram nāsananí Esrom. Ta tátá Esrom nāsananí Fares. Ta tátá Fares nāsananí Judá. <sup>34</sup> Ta tátá Judá nāsananí Jacob. Ta tátá Jacob nāsananí Isaac. Ta tátá Isaac nāsananí Abraham. Ta

tátá Abraham násananí Taré. Ta tátá Taré násananí Nacor. <sup>33</sup> Ta tátá Nacor násananí Serug. Ta tátá Serug násananí Ragau. Ta tátá Ragau násananí Peleg. Ta tátá Peleg násananí Heber. Ta tátá Heber násananí Sala. <sup>36</sup> Ta tátá Sala násananí Cainán. Ta tátá Cainán násananí Arfaxad. Ta tátá Arfaxad násananí Sem. Ta tátá Sem násananí Noé. Ta tátá Noé násananí Lamec. <sup>37</sup> Ta tátá Lamec násananí Matusalén. Ta tátá Matusalén násananí Enoc. Ta tátá Enoc násananí Jared. Ta tátá Jared násananí Mahalaleel. Ta tátá Mahalaleel násananí Cainán. <sup>38</sup> Ta tátá Cainán násananí Enós. Ta tátá Enós násananí Set. Ta tátá Set násananí Adán. Ta Ndióxi nácauha Adán.

## 4

*Xito ndojó tiñahá sacuha Jesús*

(Mt. 4:1-11; Mr. 1:12-13)

<sup>1</sup> Tá nändihi cán naquee Jesús yuta Jordán. Ta nändicutú ndaa íníma mé á xihín íníma yii Ndióxi ta mé a cán násandaca Jesús násahan yucú íchí nyú co ndiu ñayivi. <sup>2</sup> Ta cán násahiín Jesús tixí iyí jico quivi ta naxito ndojó tiñahá sacuha mé á. Ta tóco ndihi quivi cán coó naxixa a ta tá nändihi já nácasáhá cuíco a. <sup>3</sup> Anda já nácahi tiñahá sacuha cán já xihín á:

—Tá ta jivi ndusa jahyi Ndióxi cútum, cahnda chuuñ ña nánduuy yóho pan.

<sup>4</sup> Anda já nänducú ñehe Jesús tühun nu ri já nácahi a já:

—Já cachí tühun Ndióxi: “A juú pan cuití cuxu ñayivi já catacu na, vaha. Xím ñuhú caja ri na ña sáhndá tühun Ndióxi nu ná já quéra ná cuu catacu na nu Ndióxi”, —nácahi Jesús xihín rí cán.

<sup>5</sup> Tá nändihi já ndáca tiñahá sacuha cán Jesús násahan rí in jini yucú jíco xihín á já nanaha rí tóco ndihi ñuu ndiu ñuyíví nu á in tólo loho joho. <sup>6</sup> Anda já nácahi rí já xihín á:

—Candehé ndaja náhnu cútum ñuu ndiu ñuyíví ta yéhe sáhndá i chuuñ nyú ndaja tähän ña ta cuu jasá i ña nu yóho jachí cuu jasá i ña yo nu cúnimí i jasá i ña. <sup>7</sup> Ta quiqhva i ña nyun támá caxitún nyú i caja cáhnún yéhe —nácahi rí xihín á.

<sup>8</sup> Joo nänducú ñehe Jesús tühun nu ri já cachí a já:

—Satanás, cuáhán caxoo jachí já cachí tühun Ndióxi: “In tühún Ndióxi, xitohún ndítahan caja cáhnún ta in tühún mé á

ndítahan caja ndívún nyú” —nácahi Jesús xihín tiñahá sacuha cán.

<sup>9</sup> Tá nändihi já ndáca tucu tiñahá sacuha cán Jesús násahan rí ñuu Jerusalén xihín á. Ta najánda rí a nu jíco jini veñihu cáhnú ndácaan cán já nácahi rí já xihín á:

—Tá ta jivi ndusa jahyi Ndióxi cútum já cana mún chí nyú. <sup>10</sup> Jachí nyú tühun Ndióxi ndáa in tühun ña cachí a já: Cahnda Ndióxi chuuñ nu tátó mé á ña ná candaa na yohó.

<sup>11</sup> Ta ndiñehe ndáha ná yohó já quéra ná a ndícuehe sahun tá ná cachihin sahun xihín nyú, cachí tühun Ndióxi —nácahi rí xihín Jesús.

<sup>12</sup> Anda já nänducú ñehe Jesús tühun nu ri já cachí a já:

—Ín inga tucu nuú nácahyi tühun Ndióxi ta cachí a já: “A cóto ndojó tohún Ndióxi, xitohún” —nácahi Jesús xihín rí cán.

<sup>13</sup> Ña cán quéra naquee xoo tóo tiñahá sacuha nu Jesús ta naquee rí cuahan ri jáchí coó náñehé íní ri ndá quiqhva coto ndojó chágá rí a.

Tá nácasáhá caxí tühun Jesús tühun Ndióxi nyú ná estado Galilea  
(Mt. 4:12-17; Mr. 1:14-15)

<sup>14</sup> Ta ndaja coo nändicó coo Jesús estado Galilea. Ta íin cuahá ndée a jáchí nändicutú ndaa íníma mé á xihín íníma yii Ndióxi. Ta ndiáa ñayivi ndiu cán nácasáhá na cáhan na sahá mé á. <sup>15</sup> Ta nácasáhá a jáñahá tühun Ndióxi nyú ñayivi ini veñihu in in ñuu na. Ta tóco ndihi na cáhan vaha na sahá ña cája mé á.

Tá násahiín Jesús ñuu Nazaret  
(Mt. 13:53-58; Mr. 6:1-6)

<sup>16</sup> Tá nändihi já cuanúhu Jesús ñuu Nazaret nyú násahnu a. Ta mé quivi ndíquehe ndée ná cán, násahan mé á veñihu. Ta nácaja tá quiqhva sá caja mé á já nändaca ndichi a cahvi a tühun Ndióxi nyú ñayivi. <sup>17</sup> Násahan ná libro nácahyi profeta Isaías nu á ña ná cahvi a ña nyú ná ndiu veñihu cán. Ta tá násuná a libro cán já nändiñehe á nu ndáa ña cachí a já:

<sup>18</sup> Chútú ndaa íníma i xihín íníma yii Ndióxi, jáchí nácaxi mé á yéhe ña ná cuhun i caxi tühun i tühun saá ña vaha nyú nándahví.

Ta náchindahá mé á yéhe ña ná ndaja vaha i ña íin cuéhá ini.

Ta nachindahá mé á yehe ña ná caxi tūhun i  
nuú ná ndúu ndahá tiñahá sacuahá  
ndá quiqhva caja na queta na ndahá  
ri.

Ta nachindahá mé á yehe ña ná cuná i  
nduchú nuú ná cuáá já ná cuu can-  
dехé ná.

Ta nachindahá a yehe ña ná candaá i ña  
ndóho ini ñayivi.

<sup>19</sup> Ta nachindahá mé á yehe ña ná cahán  
i xihín ñayivi ña sa naxinu coo  
tiempo vaha ndivahá jáchí cúní  
Ndióxi caja cuahá ñamani xihín  
ñayivi, já cachí ña nacahvi Jesús nuú  
ná cán.

<sup>20</sup> Tá nandihí já nachicaji Jesús libro cán  
já nandiquiaghva mé á ña nuú dä cája chúnun  
veñuhu cán ta násaco a. Ná ñúhu veñuhu  
cán sándehé nuú më á. <sup>21</sup> Sähá ña cán quéa  
nacachi ja xihín ná:

—Mé quivi viti naxini ndó naxinu coo  
nuú tūhun nacahyí Isaías sanahá ndivahá —  
nacachi Jesús xihín na cán.

<sup>22</sup> Ta ndijáá ñayivi cán cahán vaha na sahá  
Jesús ta cátontó ná sahá ña ndató ndivahá  
tūhun cahán xihín ná. Já nacásahá ndáca  
tūhún tāhan na já cachí ná já:

—Á a juú dä yóho cíu jahyi José cán —  
cachí ná cahán xihín tāhan na.

<sup>23</sup> Anda já nacachi Jesús xihín ná cán já:

—Cája i cuéntá cúní ndó cachí ndó tūhun  
yóho xihín i: “Yóho, dä cíu doctor ndaja  
vaha jihna mún.” Ta xihín ña yóho cúní ndó  
cachí ndó xihín i: “Ña náhnu naxini joho  
ndé nacajún ñuu Capernaum cán, caja ná  
mé ñuu mún yóho ná cuni nde.”

<sup>24</sup> Anda já nacahán chágá Jesús xihín ná já  
nacachi tucu a já:

—Mé a ndaa ná cahán i xihín ndo ña  
ni in tūhún toho ñayivi co ndíquehe vaha  
na profeta mé ñuu da. <sup>25</sup> Mé a ndaa ná  
cahán i xihín ndo. Tá násahijín profeta  
Elías sanahá já nasanduu cuahá ri na cuáan  
tañu ñayivi Israel ta nandoho ndivahá ini  
na jáchí naquixi in joco ndeé ndivahá sahá  
ñá coó nacaju javí tixi uní cuija java. <sup>26</sup> Joo  
coó nachindahá toho Ndióxi Elías ña ná  
cuuhun da chindeé dä na ndúu nación Israel  
cán. Ña nacaja Ndióxi quéa nachindahá a  
da nuú in ñá cuáan násahijín ñuu Sarepta  
yati ñuu Sidón cán. <sup>27</sup> Ta quiqhva já násahijín  
ri tiempo tá násacu Eliseo profeta. Mé  
tiempo cán násanduu cuahá ná nandoho  
cuehe tāhyi nación Israel cán. Joo in tūhún

dä nandaja vaha dä cán, dä naní Naamán, dä  
naquixi ñuu tóho naní Siria —nacachi Jesús  
xihín ná cán.

<sup>28</sup> Tá naxini joho ná ñúhu veñuhu cán ña  
nacachi Jesús xihín ná já naxojo ndivahá ini  
na xihín á. <sup>29</sup> Já nandicuita na xihín á ta  
natavá ná Jesús yuhú ñuu. Ta cán najándaa  
na a jini yuc jíco nu cánúu ñuu cán. Já  
nacahán na chindahá níhni na a janda ninú.  
<sup>30</sup> Joo nayaha Jesús cuahán nu ná já naquée  
a cuahán va.

*In da násandacáan íníma quini ini  
(Mr. 1:21-28)*

<sup>31</sup> Anda já naquée Jesús cuahán ñuu Ca-  
pernaum, ña ndácaan estado Galilea. Ta  
cán nacásahá jánahá tūhun Ndióxi nuú  
ñayivi mé quivi ndíquehe ndéé ná. <sup>32</sup> Ta  
chí cátontó ná tá quiqhva jánahá Jesús nu  
ná jáchí cahán mé á tátuhun in dä fín sahá  
cahnada chuun.

<sup>33</sup> Mé ini veñuhu nu ndácaan Jesús jánahá  
cán násandacaan in dataa, dä ndácaan in  
íníma quini ini. Já nacayuhú íníma quini  
cán nu Jesús já cachí ri já:

<sup>34</sup> —Jándacoo táji ndéhe, Jesús, dä ñuu  
Nazaret. Ndá cuéntá quéa quíhvi nuún  
xihín nde. A vásun jándihún sahá nde. Sa  
xíní vaha i yohó ta cándaa caxí ini i ña  
cúún in da yíi nachindahá Ndióxi —nacachi  
íníma quini cán xihín Jesús.

<sup>35</sup> Anda já nacásahá Jesús jánani a íníma  
quini ndácaan ini dataa cán já nacachi a já  
xihín ri:

—Caji yúhun ta janí dä yóho —nacachi  
Jesús xihín ri.

Tá nacachi a já chí najándacava rí quini  
dataa nuú ná cán já naqueta rí ini dä cán. Ta  
coó nacaja rí ni in ña nuú xihín dä. <sup>36</sup> Tóco  
ndihí ñayivi násanduu cán nayihví ndivahá  
na. Ta já nacásahá cachí xihín tāhan na já:

—fín ndivahá sahá tūhun cahán Jesús  
yóho jáchí xihín ñá cahán da sáhndá dä  
chuun xihín ndeé dä ta tāvá da íníma quini  
ta chí quee rí cuahán ri —nacachi xihín  
tāhan ná cán.

<sup>37</sup> Ta níi cíu ñuu válí cán nandicuita nuu  
tūhún sahá Jesús.

*Ndája vaha Jesús ñá cíu xojo Simón Pedro  
(Mt. 8:14-15; Mr. 1:29-31)*

<sup>38</sup> Anda já naquée Jesús veñuhu cán já  
cahán vehe in dä naní Simón. Tá naxinu a  
cán já naquihvi a ini vehe da. Ta naxini a ña  
quihvi ñá cíu xojo Simón cán, ña chícaan

cáhni ndeé ña. Chí naxica tähví na nu Jesús ña ná ndaja vaha mé á ña.<sup>39</sup> Anda já nacayati Jesús nu ña já nasañha chuun nuú cuéhe cán ña ná quee a. Já nandindaa ña chícaan cáhni á ña chí ivi laá nandicoo ña já nacasáhá caja ndíví ña cuxu na.

*Ndája vaha Jesús cughá na quihví  
(Mt. 8:16-17; Mr. 1:32-34)*

<sup>40</sup> Tá naqueta nuu candii mé quivi cán já ñehe ñayivi na quihví ndíu nu ná naxínu nu nu Jesús. Tá nuú cuéhe nasañndo na cán ta tá nachinúu Jesús ndáha á jini in in na já nandivaha na nacaja mé á.<sup>41</sup> Ta cuahá táhan na quihví cán nacana fímina quini ini na nacaja mé á. Ta tá quéta rí quini cán já cayuhú cóhó rí nu Jesús já cachí rí já:

—Yóho cíun in túhún jini já jahyi Ndióxi —cachí rí xihín Jesús.

Joo najánani Jesús ínima quini cán ta co cúní a quiáhva ñamani ña ná cahán ri jáchi xíni vaha rí cán ña cíun mé á Cristo, dä nachindahá Ndióxi cacomí cuénta sahá ñayivi.

*Jáñahá Jesús tuhun Ndióxi nuú ñayivi ndíu estado Galilea  
(Mr. 1:35-39)*

<sup>42</sup> Tá natíyi inga quív itaqan já naquee Jesús nuu cán ta cuahan in nu cíia xóo. Joo nacasáhá ñayivi ndínducu na mé á janda quiáhva naxínu na nu fín a jáchi cúní na cají na nuu á ná a jándaco a na.<sup>43</sup> Anda já nacachi Jesús já xihín ná:

—Ndítahan nuú i cuhun i caxi tuhun i xihín ñayivi ndíu java ga nuu ña vaxi quív cacomí Ndióxi cuénta saha ná. Jáchi chuun yóho nachindahá Ndióxi yehe vaxi i —nacachi Jesús xihín ná cán.

<sup>44</sup> Chí naxica nuu Jesús jáñahá tuhun Ndióxi nuú ñayivi ini veñihu estado Galilea cán.

## 5

*Cája Jesús ña ná cuu tiin cuahá na tiyacá  
(Mt. 4:18-22; Mr. 1:16-20)*

<sup>1</sup> In tañu íin Jesús yuhú tañuhú naní Genesaret. Ta a juú quiáhva nataca ñayivi chí nacasáhá cándíhi na Jesús jáchi cúní na cuni joho na tuhun Ndióxi.<sup>2</sup> Ta naxini Jesús ivi barco ndíta dó yati yuhú tañuhú cán. Coó dä nuúhú ini dó jáchi sa naquee dä tavá tiyacá ta yati jíin va ndícata da nuúhú dä.<sup>3</sup> Anda já naquihvi Jesús ini in táhan barco cán, dö cuú ñaha Simón. Ta nacachi

Jesús xihín Simón ña ná jácaxicá loho da dö. Tá nandihí já nasaçoo Jesús ini barco já nacasáhá jáñahá nuú ñayivi janda mé ini barco cán.<sup>4</sup> Ta tá sa nandihí nacahan xihín ñayivi cán já nacachi a já xihín Simón:

—Cañehe barco yóho ná cuhun dö xoo nu cúná chágá ticuúi ta jácanún fíunún tavún tiyacá —nacachi Jesús xihín dä.

<sup>5</sup> Anda já nanducú ñehe Simón tuhun nu Jesús já cachí dä já xihín á:

—Maestro, nini yaa nuú nacaja chúun nde ña ndúcú nde tavá nde tiyacá. Ta coó ñaha natavá nde. Joo tá sa cachí mé ndó já caja i tá fín cachí ndo cuhun i jácana i fíunún i ini tañuhú —nacachi Simón xihín Jesús.

<sup>6</sup> Ta tá nacaja da ña nacachi Jesús xihín dä já a juú quiáhva cuahá tiyacá natavá dä chí janda nuúhú dä cán nacasáhá tähndä.<sup>7</sup> Anda já nacuu ndáha dä nuú java ga dä tavá tiyacá nuúhú ini inga barco ña ná quixi da chindeé táhan da xihín dä. Anda já naquixi da cán chindeé táhan da xihín Simón. Já najácutú dä ndíví barco cán xihín tiyacá chí janda ndúcú cacoo dä cán cahá tañuhú xihín ña cuahá tiyacá naquee ini dö.<sup>8</sup> Tá naxini Simón Pedro cán ña yóho já nacaxítí dä nu Jesús já cachí dä já xihín á:

—A cayati ndó nuú i, xitoho i jáchi cíu u in taa cája cuachi.

—Já nacachi Simón jáchi nayihví dä. Ta quiáhva já nayihví dä nacchindeé táhan xihín dä cán sahá ña cuahá nahá tiyacá natavá dä.<sup>10</sup> Quiáhva já nayihví ri Jacobo xihín Juan, dä cuú jahyi Zebedeo. Ndíví dä yóho chindeé táhan da xihín Simón cán. Ta já nacachi Jesús já xihín Simón:

—A cayihví tohún jáchi viti casahún caca nuún tavún ñayivi tañu cuachi tá quiáhva nacajún tá natavún tiyacá ini tañuhú —nacachi Jesús xihín dä.

<sup>11</sup> Ña cán quéa tá natavá dä cán barco dä yuhú tañuhú cán já najándaco ndihi da ñaha da ta nandico da Jesús.

*Tá nandaja vaha Jesús in dä ndóho cuéhe táhyi*

*(Mt. 8:1-4; Mr. 1:40-45)*

<sup>12</sup> Ta ndaja coo íin Jesús in nuu ta já naxínu coo in dä ndóho cuéhe táhyi nu á. Ta tá naxini da Jesús já nacaxítí dä nu á janda quiáhva nacani ndaa nuu dä nuúhú. Já nacásáhá xíca tähví dä nu á já cachí dä já xihín á:

—Cuu ndaja vāha ndó yehé, xitoho i tá cúní ndó —nacachi da xihín Jesús.

<sup>13</sup> Anda já nacani ndaa ndáhá Jesús da já nacachi a já:

—Cúní ña ná ndivahún ña cán quéa nandivahún viti —nacachi Jesús.

Tá nacachi Jesús já chí ivi láá nandindaa cuehe tayí nandoho da cán. <sup>14</sup> Anda já nasahnda Jesús chuun nu dá ña ná a ndícani da nuú ñayivi sahá ña nacaja xihín dá. Ña nacachi a xihín dá quéa:

—Cuáhán ndacún jánahun mún nuú yutu. Ta ndítahan jocún ñaha nu Ndióxi tátuhun nasahnda ley Moisés sanahá caja na sa nandivahá. Já ná candaa ini ñayivi ña sa nandindaa va cuehe nasandohún —nacachi Jesús xihín da cán.

<sup>15</sup> Joo ví ga ví nacásahá ndícuíta nuu tuhun sahá ña cája Jesús. Sahá ña cán quéa tacá cuahá ndivahá ñayivi cuni joho na nu cáhan mé á xihín ná. Ta jári tacá na jáchi cúní na ña ná ndaja vaha mé á na. <sup>16</sup> Joo tává xoo Jesús mé á xoo nuú coó ñayivi ta cán sa xica tähví a nuú Ndióxi.

*Ndájá vāha Jesús in dā naxihí tuchu sahá (Mt. 9:1-8; Mr. 2:1-12)*

<sup>17</sup> In tañu ndácaan Jesús ini in vehe jánahá nuú ñayivi. Tañu na cán nasanduu coo java na fariseo xihín java na jánahá ley Moisés. Tóco ndihi na cíuú ná na naquixi ndijáa ñuu valí ñúhu estado Judea xihín ñuu Jerusalén viti. Ta náhá Jesús ña néhe a ndéé Ndióxi jáchi ndivahá ñayivi cája mé á. <sup>18</sup> Mé hora já naxinu coo java datqaa ta ñéhe da in xito loho nu cándúhu in dā quíhví, dā naxihí tuchu sahá. Ta cúní da jaquihví da dā cán ini vehe nu ndácaan Jesús cán já chindúhu dā dā nuú Jesús, nacahán da. <sup>19</sup> Joo coó nacuu caja da quíhví da jáchi nanditútú ndivahá ñayivi ndíuu na yéhé vehe cán. Sahá ña cán quéa nandaa da jini véhe já natavá da teja cándójó cán. Já najánuu da xito loho nu cándúhu mé dā quíhví cán tañu tóco ndihi ñayivi ñúhu ini vehe cán janda quíhvá naxinu xito dā quíhví cán nu ín Jesús. <sup>20</sup> Tá naxini Jesús ña cándezee ini da ñéhe dā quíhví cán mé á já nacachi a já xihín dā quíhví cán já:

—Candehé. Sa nacaja cáhnu ini i sahá cuachún viti —nacachi Jesús xihín dá.

<sup>21</sup> Anda já nacásahá na jánahá ley Moisés xihín na fariseo cán cáhán na: “Ndá dā cíuú

dā yóho ta ndá cuéntá quéa ndája núu da Ndióxi xihín tuhun cáhan dā. Jáchi ni in túhún toho ñayivi a cíuú caja cáhnu ini sahá cuachi. In túhún jini Ndióxi quéa cuu caja cáhnu ini sahá cuachi”, nacahán na cán.

<sup>22</sup> Joo Jesús sa nacandaa va ini a ña cáhví ini na cán sahá ña cán quéa nacachi a já xihín ná:

—Ndávahá cáhán ndo já. <sup>23</sup> Á cáhán ndo ña ihví chágá cachí i xihín da yóho: “Nacaja cáhnu ini i sahá cuachún viti.” Á tá coó tá cachí i xihín dā: “Ndíco ta cuanúhu.”

<sup>24</sup> Candehé vāha ndo ná ñaha i nu ndo ña ín sahá i, da nacindahá Ndióxi induu u ñayivi, caja cáhnu ini i sahá cuachi ñayivi ñuyíví yóho —nacachi Jesús xihín na cán.

Anda já nacachi tucu a xihín da naxihí tuchu sahá cán já:

—Ta viti cáhan i xuhun, cuándaco ndiquehe xito lohún ta cuanúhu.

<sup>25</sup> Tá nacachi Jesús já chí ivi láá nandico da nu ndíhi ñayivi ndíuu cán jáchi nandivahá sahá dā. Ta nandiquehe da xito loho da nuú nasandúhu dā. Anda já cája cáhnu da Ndióxi naquee da cuanúhu dá vehe da. <sup>26</sup> Ta tóco ndihi ñayivi nasanduu cán naçatontó na ta nacaja cáhnu na Ndióxi sahá ña nacaja Jesús. Ta a juú quiqhva yíhví na já nacachi na já:

—Ña náhnu ndivahá va quéa naxiní quivi viti —nacachi na.

*Cána Jesús in da naní Leví, dā cáhan na Mateo xihín, ña ná caca da xihín á (Mt. 9:9-13; Mr. 2:13-17)*

<sup>27</sup> Tá nandihí já naquee Jesús xica cuahán. Ta cán naxini a in dā játaca jiuhún cuéntá impuesto. Mé dā yóho naní da Leví ta ín coo da nu sácoo na játaca jiuhún cuéntá impuesto cán. Anda já nacachi Jesús já xihín dā:

—Naha quíí candicun yehé —nacachi a xihín dā.

<sup>28</sup> Anda já nandaca ndichi Leví cán ta najándaco da tóco ndihi ñaha cán ta já nacásahá ndíco da Jesús xica da. <sup>29</sup> Tá nandihí já nacavaha Leví in vícq cáhnu mé vehe da cán ña caja cáhnu da Jesús. Ta cán nataca cuahá táham na játaca jiuhún cuéntá impuesto ndíuu na vehe da. Ta cuahá ga ñayivi nataca ndíuu coo nu mesa cán. <sup>30</sup> Joo na fariseo xihín na jánahá ley Moisés nacásahá na cáhán núu na sahá na xica tuun xihín Jesús já nacachi na já:

—Ndá cuéntá quéa xíxi ndó xihín na játaca jiuhún cuéntá impuesto ta xihín java ga na cája cuachi —nacachi na cán xihín na xíca tuun xihín Jesús.

<sup>31</sup> Anda já nanducú ñehe Jesús tuhun nuú na cán já nacachi a já xihín ná:

—Ñayivi ín vaha co xíní ñúhú toho na dā cája tátá ñahá joo na quíhvi, na cán cíú na xíní ñúhú dā cája tátá ñahá. <sup>32</sup> Ta yehe coó vaxi toho i cana i na sa ín vaha. Vaxi i cana i ñayivi, na cája cuachi ña ná jándacoo na cuachi cája na —nacachi Jesús xihín na cán.

Ndáca tuhún na Jesús ndá cuénta quéa co xíjuhun dā xíca tuun xihín á  
(Mt. 9:14-17; Mr. 2:18-22)

<sup>33</sup> Anda já nacásáhá ndáca tuhún tucu na Jesús já cachí na já xihín á:

—Xíní nde ña xíca tahví ndivaha va na nasaxíca tuun xihín Juan ta jári xíjuhun ndivaha va na cán. Ta quiahva já cája na fariseo. Joo na xíca tuun xihín yóhó jan níi tiempo xíxi na pan ta xíhi na vino. Ndá cuénta quéa cája na já —nacachi na cán xihín Jesús.

<sup>34</sup> Anda já nanducú ñehe Jesús tuhun nu ná já cachí a já xihín ná:

—Cúú á tátuhun tá cája na víco tándaha ta ín va mé dā tándaha cán xihín ná já quéa co ndítahan nu ná cajuhun na. Quiahva já ín ri xihín yehe va. Coó sahá cajuhun na xíca tuun xihín i jáchí ín vi xihín ná viti. <sup>35</sup> Joo vaxi quiví ndindaa i nuú na yóho. Anda já casáhá na yóho cajuhun na —nacachi Jesús xihín na cán.

<sup>36</sup> Anda já nasacu Jesús quiahva nu ná já nacachi a já xihín ná:

—Ni in tühun toho ñayivi co sahndá na in tühun jáhma saá já ndicahmá na in jáhma yatá. Jáchí tá ná caja na já játiví na jáhma saá cán. Ta ni co ndíque téhan vaha in jáhma yatá tá jándaha na ña xihín in tühun jahmá saá. <sup>37</sup> Ta ni in tühun toho ñayivi co téan na vino saá ini in níi yatá. Jáchí tá ná caja na já já quéa jácähndí va vino saá níi yatá cán. Ta xihín ña yóho tivi níi cán ta tivi ri do cíú vino cán va. <sup>38</sup> Ña ndítahan caja na quéa taán na vino saá ini níi saá já ná cuu cañuhu vaha dó cán ta mé níi co cähndí a. <sup>39</sup> Ta ni in tühun téhan na xíhi vino yatá co xíca na vino saá coho na jáchí cachí na ña vaha chágá xíhi dó yatá —nacachi Jesús xihín quiahva sácú a nuú na cán.

Tá na xíca tuun xihín Jesús túhun na yucu jini trigo quiví ndíquehe ndéé ñayivi

(Mt. 12:1-8; Mr. 2:23-28)

<sup>1</sup> In quiví ndíquehe ndéé ñayivi nani xíca Jesús cuahán xihín na xíca tuun xihín á já nayaha na tañu nuú naxutu na trigo. Já nacásáhá na cán túhun na yucu jini trigo cán já tává na trigo já chíñishni ndáhá ná a ta sáxí na cásahán na. <sup>2</sup> Tá naxini java na fariseo cán ña cája na já nacachi na já:

—Ndávaha cája ndó chuun ña co ndítahan caja ndó quiví ndíquehe ndéé yo —nacachi na fariseo cán xihín na xíca tuun xihín Jesús.

<sup>3</sup> Anda já nanducú ñehe Jesús tuhun nu ná já nacachi a:

—Á a ñáha cahvi ndó nuú túhun Ndióxi nu cáhán sahá ña nacaja David sanahá tá nacuico da xihín na xíca xihín dā. <sup>4</sup> Ña nacaja da cán quéa naquíhvi da ini veñuhu Ndióxi ta natii da pan yíj já naxixi da ña ta náshahen dā ña nuú na xíca xihín dā ña ná cuxu na. Joo jutu cuití va cuu ná ndítahan nuú cuxu ña cán, nduu. <sup>5</sup> Ta yehe va, dā nachindahá Ndióxi nduu ñayivi ín sahá i cahnda i chuan sahá quiví ndíquehe ndéé ñayivi —nacachi Jesús xihín na cán.

Tá ngndaja vaha Jesús in dā naghichí ndáhá  
(Mt. 12:9-14; Mr. 3:1-6)

<sup>6</sup> Inga tucu quiví ndíquehe ndéé ná já naquíhvi Jesús ini in veñuhu ta nacásáhá jánahá nu ná. Ta ini mé veñuhu cán náshandaan in dataa, dā naghichí ndáhá cúa. <sup>7</sup> Ta ndaja coo na jánahá ley Moisés xihín na fariseo náni na Jesús sándezhe na ña á ndaja vaha mé á dā cán quiví ndíquehe ndéé na. Ta xihín ña yóho cähán na cuu ñehe ín na jácojo na cuachi játá. <sup>8</sup> Joo sa xíni va Jesús ña cähvi ini na cán. Sahá ña cán quéa nacachi a já xihín dā naghichí ndáhá cán já:

—Cuándacoo ta candichi mahní yóho —nacachi Jesús xihín dā.

Anda já nandaca ndichi dā cán nuú Jesús.

<sup>9</sup> Anda já nacásáhá Jesús cáhán xihín java ga na nduu cán já nacachi a já xihín ná:

—Cuni joho ndó ná ndaca tuhún i ndohó. Ndía cachí ley ndítahan caja i mé quiví ndíquehe ndéé ñayivi. Á chindeé yo ñayivi a caja i ña nuú xihín ná. Á jácaci na á cahní yó na —nacachi Jesús xihín ná.

<sup>10</sup> Anda já nāndicoto nihni Jesús nuú ndihi na nacaya nuu ndiu xihin á cán. Ta nacachi a já xihin da nāhichi ndáha:

—Jándacaa ndáhuun.

Ta tá najándacaa da cán ndáha dá chí ivi laá nāndivaha ndáha dá. <sup>11</sup> Joo tóco ndihi na java ndiu cán naxojo ndivaha ini na. Já nacásahá ndítuhún xihin táhan na ña ndá quéa cuu caja na já ná cuu jándhi na sahá Jesús.

Tá nacaxi Jesús uxu ivi da cacuu apóstol  
(Mt. 10:1-4; Mr. 3:13-19)

<sup>12</sup> Mé tañu já náquee Jesús nasañan in jini yúcu caca tähví a nu Ndióxi. Ta níi cíu ñuu naxica tähví a nu Ndióxi. <sup>13</sup> Ta tá sa natiivi já nacana mé á na xíca xihin á. Ta tañu na cán nacaxi a uxu ivi da cacuu da in tähndá taa cananí apóstol, da chíndahá a caca nuu cahán tuhun Ndióxi. <sup>14</sup> Nacaxi a da naní Simón, da nasañu tucu a quiví cananí Pedro. Ta nacaxi a dà cíu nani Pedro, da naní Andrés. Ta nacaxi a Jacobo xihin Juan xihin Felipe xihin Bartolomé <sup>15</sup> xihin Mateo xihin Tomás xihin Jacobo, da cíu jahyi Alfeo. Ta nacaxi a Simón, da naxica cuénta na cananista. <sup>16</sup> Ta nacaxi ri a Judas, nani Jacobo xihin Judas Iscariote, mé da naijicó tühún Jesús tá nu ndíhi.

Jánaha Jesús nuú cuaghá ñayivi  
(Mt. 4:23-25)

<sup>17</sup> Tá nāndihi nānuu Jesús jini yúcu xihin na xíca tuun xihin á já naxiñu a yojo ndaa nasañiñ a xihin ná. Ta cán nasañduu ri cuahá ndivaha ñayivi táhan na naquixi ndijáa ñuu valí ndiu chí estado Judea xihin na ndiu ñuu Jerusalén xihin na ndiu ñuu Tiro xihin Sidón, ña ndiu yati yuhú tañuhú. Ta tóco ndihi ñayivi yóho naxiñu na cuni joho na ná cahán Jesús. Ta naxiñu na jáchí cuni na ña ná ndaja vaha mé a ná. <sup>18</sup> Ta tóco ndihi na nasañuhu fñimá quini ini nandaja vaha ri Jesús na jáchí natavá a fñimá quini nasañuhu ini na. <sup>19</sup> Ta tóco ndihi ñayivi cuni na cani ndaa ndáha ná Jesús jáchí xihin ndee mé a ndaja vaha tóco ndihi na quíhvi.

Jánaha Jesús ndá quíhva cajíi chágá iní já ná a cánduu cuéha yo  
(Mt. 5:1-12)

<sup>20</sup> Tá nāndihi já nasañdhe Jesús nuú na xíca tuun xihin á já nacásahá cachí a já xihin ná:

—Tähví nacuu ndó, na cándahví jáchí ndohó cíu na cacomí Ndióxi cuénta sahá.

<sup>21</sup> Tähví nacuu ndó, na cuico viti jáchí ndohó cacuu na casahá cuacu tá nu ndíhi.

<sup>22</sup> Tähví nacuu ndó tá cándají ñayivi ndohó ta casahá táxi na ndohó a cánahá na xihin ndo. Ta tähví nacuu ndó tá quéu níu na ndohó sahá ña cahán na ña cíu ndó na níu ndivaha. Tá ná caja na tóco ndihi ña yóho xihin ndo sahá ña candeé ini ndó yehé, da nachindahá Ndióxi nduu ñayivi, tähví nacuu ndó. <sup>23</sup> Já quéa ndítahan cajíi ndivaha ini ndó mé quiví já jáchí sa naxica tähví Ndióxi in ña vaha ndivaha ín indívi quihva nu ndo. Jáchí tá quiahva caja xíci na jan xihin ndó viti quiahva já nacaja xíci ri tásahnu jíco na jan xihin na nasañu profeta sanahá.

<sup>24</sup> Joo ndáhví nacuu ndó, na cuicá viti jáchí sa nacajíi ndivaha va ini ndó ñuyíví yóho.

<sup>25</sup> Ndáhví nacuu ndó, na sacu viti jáchí ndohó cíu na cuacu xihin ña cacuehá ini ndó.

<sup>26</sup> Ndáhví nacuu ndó tá ná casahá ñayivi cahán vaha na sahá ndo jáchí quiahva já nacahan vaha tásahnu jíco na jan sahá na profeta tühún nasañduu nájandahvi ñayivi sanahá.

Xíní ñúhú quíhvi iní na cō cúní mí  
(Mt. 5:38-48; 7:12)

<sup>27</sup> Tóco ndihi ndó, na xíni joho nu cahán i yóho, ndítahan quíhvi ini ndó na cō cúní ndohó. Ta xíni ñúhú caja vaha ndó xihin ndá na cándají ndohó. <sup>28</sup> Xíní ñúhú caca tähví ndó nu Ndióxi ña ná caja yíi á na nachicáan chahán jata ndo. Ta caca tähví ndó nu Ndióxi sahá na cánahá xihin ndo. <sup>29</sup> Ta ndá ná ná cani in xoo sajóho ndó, cata ñee ndó inga xoo sajóho ndó nu ná ña ná cani na. Ta tá ná candaan na jahmá ndee ndo quiahva ndó ñamani ña ná quehe ri na cotó ndo tá já cúní na. <sup>30</sup> A cajíhndá ndó nuu na xíca ñaha nu ndo. Ta ndá ná candaan ña cíu ñaha ndo, a ndíndaca ndó ña nu ná.

<sup>31</sup> Tá quiahva cuni ndó caja ñayivi xihin ndo quiahva já ndítahan caja ri ndohó va xihin ná.

<sup>32</sup> Jáchí tá quíhvi ini ndó ñayivi sahá ña quíhvi ri ini na cán ndohó va, ndíva vaha caja ndó jáchí quiahva já caja ñayivi quini.

<sup>33</sup> Ta tá cája vaha cuití ndo xihín na cája vaha xihín mé ndó, ndía vaha cája ndó jáchi quiāhva já cája ri ñayivi quini va. <sup>34</sup> Ta tá sáhan tóo ndó ñaha ndó nyú ñayivi sahá ña cáhán ndó caja na ñamani xihín mé ndó, ndía vaha cája ndó jáchi quiāhva já cája ri ñayivi quini va. <sup>35</sup> Joo ndóhó, xíní ñuhú quiñy ini ndó na co cúní ndohó. Ta xíní ñuhú caja vaha ndó xihín ñayivi. Ta xíní ñuhú quiāhva tóo ndó ñaha ndó ta a cándati ndó ña ná nducu ñehe na cán ña nu ndo. Tá ná caja ndó já já quéa ñehe táchví ndó ña vaha ndivaha caja Ndióxi ta nduu ndó jahey Ndióxi, mé a cúu Ndióxi cahnu ndivaha. Jáchi mé Ndióxi cándahví ini a ndá na co ndíquiāhva ndixahvi nu mé áta cándahví ri ini a ñayivi quini va. <sup>36</sup> Xíní ñuhú táchnda ini ndó sahá ñayivi tá quiāhva táchnda ini Ndióxi sahá ná.

*Có nditahan candehé ndaa yó ñayivi  
(Mt. 7:1-5)*

<sup>37</sup> A cándezhé ndaa ndó ñayivi já ná a cája Ndióxi já xihín ndó. A chícaan ndó cuachi jatá inga na já ná a quéhe Ndióxi cuénta sahá cuachi mé ndó. Caja cahnu ini ndó saha ná já ná caja cahnu ini Ndióxi sahá mé ndó. <sup>38</sup> Jasá ndo ñaha nuú ñayivi já ná ñehe ndó ñaha nu Ndióxi. Cúu á táchun caja ñayivi tá jachutú na in ndoho xihín nuñi ta quíji niñhi na ndoho já ná ndituun a ta jacyu chágua na nuñi já táchán na ña ini a janda quiāhva xítá ña yuhú ndoho cán. Tá quiāhva cája mé ndó xihín ñayivi quiāhva já caja Ndióxi xihín ndó jáchi tá cuahá sahán ndó nuú ñayivi quiāhva já cuahá quiāhva ri Ndióxi nu ndohó va —nacachi Jesús xihín na cán.

<sup>39</sup> Tá nandihí já nasacu a quiāhva nu ná já nacachi a já:

—A cuyú toho caja in taa cuá candaca da inga da cuá cuhún da jáchi ndíví já da ndicava da yávi. <sup>40</sup> Ni in táchun toho da xíca jácua ha táchva chágua nu mé da jánahá ñahá cán. Joo tá ná xínu quívi já catiāhva vaha da já cándaa ini da tóco ndihí ña xíní da najánahá ñahá cán.

<sup>41</sup> Jáchi ndá cuénta quéa sándezhé ndó ña núu caja ñani táchán ndó ta co sándezhé ndó ndá quiāhva náhnu chágua ña núu cája mé ndó. Cúu á táchun ndácaan in xéhe loho nduchú núu ñani táchán ndó nani ndácaan in yito ndúhu cahnu ini nduchú núu ndo.

<sup>42</sup> Ta tá a cuyú cuni ndó yito cahnu ndácaan

ini nduchú núu mé ndó ndaja caja ndó cache ndó xihín ñani táchán ndó: “Ñani i, ná tavá loho i xéhe ndácaan nduchú núu jan.” Jándahvi ndó mé ndó xihín ña cája ndó. Xíní ñuhú tavá ndó yito cahnu ndácaan nduchú núu mé ndó já ná nunqá nu ndó cuni vaha ndó já ná cuu tavá ndó xéhe loho ndácaan nduchú núu ñani táchán ndó —nacachi Jesús.

Tá xíní yo cuihi in yito já cándaa iní ndá yito cuyú dó

(Mt. 7:17-20; 12:34-35)

<sup>43</sup> Andá já nacásahá tucu a cáchí já:  
—Coó toho yito vaha cuyú cuihi quini nuñi. Ta ni coó yito quini cuu cuun cuihi vaha nuñi. <sup>44</sup> Jáchi xihín cuihi cuyú nuñi in in yito cándaa iní ndá yito cuyú dó. A vaya cuyú táchun sáhndá ñayivi tití ñuhú nuñi táchinú. Ta ni a vaya cuyú táchun sáhndá ná uva nuñi tonáña yúcú. <sup>45</sup> In taa vaha cahán da ndinuhu ña vaha jáchi ndinuhu ña vaha ñuhú inimá dá. Ta in taa quini cahán da ndinuhu ña núu jáchi ña núu quéa ndácaan inimá dá. Jáchi yuhú ñayivi cána tóco ndihí ña nandicutú ñuhú inimá ná —nacachi Jesús.

Sácu Jesús quiāhva sahá ivi da nacavaha vehe

(Mt. 7:24-27)

<sup>46</sup> Cáhan tucu Jesús já cáchí a já:

—Ndá cuénta quéa cahán xitoho nahá ndó yéhe ta co cája ndó ña sáhndá i nu ndó. <sup>47</sup> Ná cahán i xihín ndó ndaja fin da vaxi nuñi i cuni joho da táchun cahán i ta cája da ña cáchí i. <sup>48</sup> Cuyú dá táchun in dataa nacavaha vehe. Tá nacásahá da tavá da sahá vehe da já nasata cúná da já ná chinúu da vehe da jata tótó. Ta tá nasahnu cuahá yuta já nacani ndaa níhi ticuui cán jatá vehe da. Joo coó nandicava vehe da nacaja ticuui cán jáchi tóyíi cándichi vehe da jata tótó cán. <sup>49</sup> Joo ndá da xíní joho nu cahán i ta co cája da ña cáchí i, cuyú dá táchun inga dataa, da nacavaha vehe nu ñuhú uun. Ta coó nasata da nuñi nanduxu sahá. Ta tá nasahnu cuahá yuta já nacani ndaa níhi ticuui cán jatá vehe da. Ta xihín ña yóho nandicava vehe da ta chí nandihí sahá chí uun —nacachi Jesús.

<sup>1</sup> Tá nandihí nacahán Jesús xihín ñayivi cán já naquee a cuahán chí Capernaum. <sup>2</sup> Mé ñuu Capernaum cán nasañiin in dñataa, dñ sahndá chuun nyú soldado naquixi ñuu Roma. Mé dñ yóho nasañiin in mozo da ta quíhvi ndivaha ini da mozo dñ. Joo ndaja coo mé mozo da yóho quíhvi ndee dñ ta janda ja chá quivi da. <sup>3</sup> Tá naxini joho dñ sahndá chuun nyú soldado yóho sahá Jesús já nachindahá da java na sacuahá tåhan na naquixi chichi Israel já ná caca na ñamani nyú Jesús quivi a ndaja vaha mozo da cán. <sup>4</sup> Tá naxinu ná cán nyú Jesús nacasáhá xíca tåhví ndivaha na nu á já cachí na já xihín á:

—Ín sahá dñ sahndá chuun nyú soldado yóho ña ná chindeé ndó dñ. <sup>5</sup> Jáchí quíhvi ini da tóco ndihi ñayivi ndúu nación Israel ta sa mé da jan cíu dñ nasañda chuun ña ná cavaha na veñhu nde —nacachi na cán xihín Jesús.

<sup>6</sup> Anda já naquee Jesús cuahán xihín ná. Joo tá sa jalóho xínu coo na vehe da sahndá chuun nyú soldado cán já nachindahá da java amigo dñ nyú Jesús ná cahán na yuhú nyú da já nacachi na já:

—A jándjhi ndó mé ndó ndihvi ndó vehe e, xitoho i jáchi coó sahá toho i ña ná ndihvi ndó vehe e. <sup>7</sup> Sahá ña cán quéa coó nasañan ndee ini i cuhun i ndinducú u mé ndó. Joo janda nu ín ndó jan cahnda ndó chuun ña ná ndivaha mozo i já ndivaha da. <sup>8</sup> Jáchí ndúu java na náhnu chágá sahndá chuun nyú i. Ta ndúu ri soldado sahndá ri yehé va chuun nyú. Ta tá chíndahá i in da ña ná cuhun dñ nu cuni mí i cuhun dñ ta cuahán dñ. Ta tá sahndá i chuun nyú inga da ña ná quivi da nyú i ta vaxi da nyú i. Ta tá sahndá i chuun nu mozo i ña ná caja da ña sahndá i ta caja da ña —nacachi na.

<sup>9</sup> Tá naxini joho Jesús tóco ndihi ña nacahán amigo dñ sahndá chuun nyú soldado cán xihín á já nacatontó a xihín dñataa cán. Anda já nasañdehé a nu tóco ndihi ñayivi ndíco cuahán cán já nacachi a já xihín ná:

—Mé a ndaq ná cahán i xihín ndq ña a ñáha cuni i tañu na Israel in da cández cahnu ñahá ini Ndióxi tá quiahva cández cahnu ini dñ yóho Ndióxi —nacachi Jesús xihín ná ndíco jatá cán.

<sup>10</sup> Ta tá nandicó coo na cíu mozo da sahndá chuun nyú soldado cán vehe da já naxini na ña sa nandivaha va dñ nasaquíhvi cán.

Tá najánditacu Jesús jahyi in ñá cuáan

<sup>11</sup> Tá sa nayaha ña yóho já naquee Jesús cuahán chí in ñuu naní Naín xihín na xíca tuun xihín á. Ta a juú quiahva cuahá ñayivi ndíco cuahán. <sup>12</sup> Tá naxinu coo a yati yuhú ñuu cán já naxini a ñayivi ñéhe na in ndij cuahán na jánduxu ná. Mé ndij cán nasaçuu da in túhún já nu náná da, ñá cíu ñá cuáan. Ta a juú quiahva cuahá ñayivi ñuu cán ndáca tåhan xihín ñá cuahán na jánduxu na jahyi ñá. <sup>13</sup> Tá naxini Jesús ña já natahví ini a sahá ña. Anda já nacachi a já xihín ña:

—A cuácu gaun.

<sup>14</sup> Anda já nacayati Jesús nyú sató ndij cán já nacani ndaa ndáha á do. Anda já nasaçuita na ndójo sató ndij cán. Ta nacahán Jesús xihín dñ cíu ndij cán já nacachi a já xihín dñ:

—Yehé cáhan i xuhun, dñ tacú, cuándaco —nacachi Jesús xihín dñ.

<sup>15</sup> Anda já nasaçoo dñ nasaçuu ndij cán ta nacasáhá dñ cáhan dñ. Já nandiquayah Jesús dñ nu náná dñ. <sup>16</sup> Tá naxini tóco ndihi ñayivi cuahán cán ña nacaja Jesús já yíhví ná. Ta nacasáhá ná caja cahnu na Ndióxi já cachí ná já:

—In profeta cahnu ndivaha cíu dñ naxinu coo tañu mí yóho viti.

Ta nacachi tucu na:

—Ndióxi quéa naxinu coo nu yo ña ná chindeé a ñayivi cuénta mé á —nacachi na.

<sup>17</sup> Ta níi cíu ñayivi cuénta estado Judea xihín ná ndúu yati cán nacandaa ini na sahá ña nacaja Jesús cán.

Juan, dñ jácandúta ñayivi, nachindahá da java dñ xíca xihín dñ nu Jesús

(Mt. 11:2-19)

<sup>18</sup> Ta ndaja coo ña ñéhe Juan, dñ jácandúta ñayivi, tuhun sahá tóco ndihi ña nacaja Jesús yóho jáchi nandicaní na xíca xihín Juan ña nu dñ. Sahá ña cán quéa nacana da iví tåhan dñ xíca xihín dñ <sup>19</sup> já nachindahá dñ nu Jesús ña ná ndaca tuhún ná mé á á jivi ndusa cíu á Cristo, mé a chindahá Ndióxi cacomí cuénta sahá ñayivi, á ndítahan candida in inga ga quivi. <sup>20</sup> Tá naxinu ná xíca xihín Juan nu ín Jesús já nacachi na já xihín á:

—Dñ naní Juan, dñ xíca jácandúta ñayivi, dñ cán cíu dñ nachindahá ndehé vaxi nde ndaca tuhún nde ndohó á cíu ndó Cristo, ña chindahá Ndióxi cacomí cuénta sahá

ñayivi, á ndítahan candati nde inga ga – nacachi na cán xihín Jesús.

<sup>21</sup> Mé hora naxínu coo na cán nu ín Jesús já naxini na nandajá vaha Jesús cuahá ñayivi quíhvi, na násandoho tá nuú cuéhe. Ta natavá a ínimá quini nasañuhu ínimá java na. Ta cuahá ndivaha na cuá nandinuú nuú nacaja Jesús. <sup>22</sup> Sáhá ña cán quéa tá nanducú ñehe Jesús tühun nuú na xíca xihín Juan cán já nacachi a já xihín ná:

—Cuáhán ndó ndicani ndó nu Juan saha tóco ndihi ña naxini ndó cája i xihín tóco ndihi ña naxini joho ndó cähán i. Ta ndicani ndó nu dá ña ndínuna nuú na cuá ta ndícaca na rénco cája i. Ta ndája vaha i na ndóho cuéhe tähyi. Ta jándinuna i joho na joho já ná cuni joho na. Ta jánditacu u ndij. Ta cáxi tühun i tühun Ndióxi nuú na ndahví já ná cuu cacu ndaa ínimá ná. <sup>23</sup> Tahví nacuu na co jándacoo ña cández ini na yehe – nacachi Jesús xihín ná.

<sup>24</sup> Tá naquee na nachindahá Juan cán cuahán na já nácasáhá Jesús cähán saha Juan nuú ñayivi cán já cachí a já xihín ná:

—Ndíá naqueta ndó cuni ndó tá naqueta ndó náshán ndó sándehé ndo Juan yucú íchí cán. A juú da cán cuú taa láhá já quíji nuu da tátuhun quíji nuu in tíyo cája tachí.

<sup>25</sup> Ndíá naqueta ndó candehé ndó. A juú da cán cuú taa ndíxi jahmá lánda ndivaha. Sa xíni vaha ndó ña co ndúu toho da ndíxi jahmá lánda yucú íchí. Ndá da ndíxi jahmá lánda ta cája da ña cúní yíquí cuñu da, mé da cán cuú da ndúu vehe rey cuití va.

<sup>26</sup> Ndíá nasahan ndó naxini ndó cán. A coó náshán ndó cuni joho ndó nu cähán in da cuú profeta nu ndo. Mé a ndaa da cán cuú dá in profeta ta ín chágá saha dá a juú ga inga profeta násanduu sanahá. <sup>27</sup> Jáchí mé Juan cuú dá da cähán tühun Ndióxi saha tá cachí a já:

Chindahá i in da canuú cuhun nu mún, já ná caja tiahva da íchí nuú quisún, já nacahiy a sanahá.

<sup>28</sup> Candehé ndó ná cähán i xihín ndo. Tañu tóco ndihi ñayivi coó ga inga profeta cähnu chágá ajuú ga Juan, mé da jácandúta ñayivi. Joo ndá ná sa nandiquahva mé ndáhá Ndióxi ña ná cacomí a cuénta saha ná, vatí cuú ná na coó saha, na cán cuú na cähnu chágá a juú ga Juan –nacachi Jesús.

<sup>29</sup> Tá naxini joho tóco ndihi ñayivi ndúu cán ña yóho já nandicuni na ña caja ndaa Ndióxi tóco ndihi ñáha. Na nacahán já

cúu na najácandúta Juan ta tañu na cán nasañuhu java ri na játaca jiuuhún cuéntá impuesto. <sup>30</sup> Joo na fariseo xihín na jánahá ley Moisés, na coó najácandúta Juan cán, na cán cuú na naquehe núu na tóco ndihi ñamani cúní Ndióxi caja xihín ná. <sup>31</sup> Anda já nacachi Jesús já xihín ná:

—Ná cahán i xihín ndó ndaja ín ñayivi ndúu tiempo viti. <sup>32</sup> Cúu ná tátuhun na valí sácoo sájíquí nuú yahvi ta cayuhú na nuú java ga na valí ndúu cán já cachí na já: “Natívít nde totíví nu ndo joo coó naceen ndó cata sáhá ndo. Ta naxita cuéha ndivaha nde nu ndo ta ni coó nascacu ndo.” <sup>33</sup> Quiáhva já ín ñayivi ndúu tiempo viti jáchi naquixi Juan, da jácandúta ñayivi ta naxijuhun da ta coó naxihi da vino joo nacachi ndó saha dá ña ndácaan ínimá quini ini da. <sup>34</sup> Ta tá naxínu yehe, da nachindahá Ndióxi nduu ñayivi ta xíxi i pan ta xíhi i vino já nácasáhá cachí ndo sahá i ña cuú u in taa ndehé ndivaha ta xíhi ndivaha i. Ta cachí ndo ña cátóo ndivaha i cacuu u amigo na cája cuachi xihín na játaca jiuuhún cuéntá impuesto. <sup>35</sup> Joo na cúní cández ini ña ndaa, na cán cuú na cández ini ña caja Juan xihín yehe ña ndaa –nacachi Jesús xihín na cán.

### Ín Jesús vehe Simón, da cuú fariseo

<sup>36</sup> In táchan da fariseo nacana da Jesús ña ná cuhun a cuxu a vehe da. Anda já náshán Jesús vehe da já náshán a nu mesa. <sup>37</sup> Joo ndaja coo in ñáñáha, mé ñá nuú cán tá nañehé ña tühun ña naxínu Jesús vehe Simón cán cuxu a já naxínu ñá xihín in yúyú alabastro, ña nachutú ndaa xihín sití támí sáhan náshán ñá nu Jesús. Mé ñáñáha yóho cuú ñá in ñá caja cuahá cuachi. <sup>38</sup> Ta sacú ñá nacaxít ñá saha Jesús ta xihín ticuú nuú ñá nájáchuhu ñá sahá. Ta tá nandihí já nájáhichí ñá do xihín ijí jini ña. Anda já náshán yúhu ñá sahá. Ta nachojó ñá sití támí sáhan cán jata sahá á. <sup>39</sup> Tá naxini mé da fariseo, da nacana Jesús vehe da cán ña yóho já nacahán da já: “Tá profeta ndusa ná cacuu da yóho ta sa cández va ini da ndá ñá cuú ñá cóni ndaa ndáhá saha dá jáchí cuú ñá ña caja cuahá cuachi”, nacahán Simón cán.

<sup>40</sup> Anda já nacachi Jesús já xihín da fariseo cán:

—Candehé Simón, cuni joho ná cähán i xuhun –nacachi Jesús xihín dá.

Anda já nacachi Simón cán já xihín Jesús:

—Cáhan mé á xihín i, xitoho i —nacachi da.

<sup>41</sup> Anda já nasacu Jesús in quiāhva nū dá já nacachi a já xihín dá:

—Nasanduu iví dñataa ta násayicá dñá ji-uhún nū mé dñá sáhan tóo a cán. In da násayicá uhun ciento ta inga da násayicá iví jico uxu. <sup>42</sup> Ta ni in da cán co ndéé da chahví da ña yícá dñá sahá ña cán quéa nacaja cáhnu ini dñá sáhan tóo jihuń cán sahá ña yícá ndíví dñá cán. Ta viti cachún xihín i, Simón, ndá dñá cáhún tixi ndíví dñá yóho cacuu da da quihví ini chágá mé dñá, dñá nacaja cáhnu ini sahá cuénta ña násayicá dñá cán —nacachi Jesús xihín Simón.

<sup>43</sup> Anda já nanducú ñehe Simón cán tuhun nū Jesús já nacachi da já xihín á:

—Cája i cuénta ña quihví ini chágá dñá násayicá cuahá jihuń cán nū dá —nacachi da.

Anda já nacachi Jesús já xihín Simón:

—Mé a ndaa cahún —nacachi a.

<sup>44</sup> Anda já násandehé Jesús ná nachojo siti sahá cán já nacachi a já xihín Simón:

—Candehé vaha ñáñáha jan, Simón. Naquihví i vehún joo coó násahún ticuií ndoo sahá i. Joo ñáñáha yóho najácucho ná sahá i xihín ticuií nū ña. Ta tá nandhi já najáchí ñá sahá i xihín ijí jiní ña. <sup>45</sup> Ta yóho, coó natatí yuhún sajóho yehé tá nasaá i vehún. Joo ñá yóho, janda nani naquihví ñá vehún tatí yuhú ñá sahá i. Ta anda viti ñuhú cája ñá a. <sup>46</sup> Ta ni coó nachojojó tohún siti jiní i tá naxinu i vehún. Joo ñá yóho nachojojó ñá siti támi sáhan sahá i. <sup>47</sup> Ta cachí i xuhun, Simón, ña xihín ñá cája ñá yóho náhá ñá mé a ndaa quihví ini ñá yehé jáchí nacaja cáhnu ini i sahá cuachi ñá vatí cuahá ndivaha cíu á. Joo ndá ná cáhan ñá chá cuití va cuachi cája cáhnu ini i sahá, ná cán cíu ri ná chá cuití quihví ini na yehé —nacachi Jesús xihín Simón.

<sup>48</sup> Anda já nácasáhá cachí a já xihín ñáñáha cán:

—Sa nacaja cáhnu ini i sahá cuachún viti.

<sup>49</sup> Ta tóoc ndihí java ga ná nataca ndúu coo nū mesa vehe Simón cán nácasáhá cachí xihín táhan na já:

—Ndá taa cíu dñá yóho jáchí janda cuachi cája ñayivi cája cáhnu ini da sahá —nacachi xihín táhan na cán.

<sup>50</sup> Anda já nacachi Jesús já xihín ñáñáha cán:

—Nacacu ndaa ínimun jáchí nacandeé inún yehé. Cuanuhú ta a ndícani ga inún viti —nacachi Jesús xihín ña.

## 8

Tá java naijíhí chíndeé na Jesús

<sup>1</sup> Tá nandhi nayaha ña yóho já nácasáhá Jesús xíca nuu a cuahá ñuu náhnu xihín ñuu válí ña caxi tuhun a xihín ná ña sa nacayati quíví cacomí Ndióxi cuéntá sahá ná. Ta ndíco ndíshuxu iví ná apóstol cán mé á. <sup>2</sup> Ta násandaca táhan java ri naijíhí xihín á, ná natavá mé á ínímá quini ini xihín ná nandaja vaha mé á nuú cuheq násandohna. Tañu naijíhí yóho násandacan ná naní María, ñá cáhan na Magdalena xihín. Mé María yóho cíu ñá natavá Jesús usá ínímá quini ini. <sup>3</sup> Ta cátáhan ri in ñá naní Juana cuahán ñá xihín ná cán. Mé Juana cíu ñá ñajíhí dñá naní Chuza, dñá cómí cuéntá sahá vehe Herodes. Ta jári in ñá naní Susana naxica nuu ñá xihín Jesús. Cuahá chágá naijíhí naxica nuu na xihín á ta náchindeé ñahá ná xihín ña cómí na.

Sácu Jesús quighva sahá in dñá sáta tata  
(Mt. 13:1-17; Mr. 4:1-12)

<sup>4</sup> Naqueta ñayivi cuahá ñuu jáchí cíni ná cuni na Jesús. Ta tá sa nataca cuahá ñayivi nū íin Jesús, nácasáhá cáhan xihín ná. Ta násacu a in quiāhva nū ná já nacachi a já xihín ná:

<sup>5</sup> —In dñá sáta tata naquee da cuahán dñá cata da ña. Ta tá sáta dñá ña cuahán dñá nacuyu java ña íchí. Ta tá nayaha ñayivi já náchinfíni sahá joho na a ta já naxinu laa násaxírí ña. <sup>6</sup> Ta java tata cán nacuyu a tañu yuu. Ta tá nandutá mé tata cán, cama chá nahichi a jáchí íchí ndivaha tañu yuu cán.

<sup>7</sup> Ta java ga tata cán nacuyu a tañu tohíñu ta tá nandutá ña já nanditáhá ndihí a nacaja tohíñu, dñó násahnu xihín á cán. <sup>8</sup> Joo java tata nacuyu a nū ñuhú vaha. Ta tá násahnu a já najáquee na cuahá ñaha nū á. Janda in ciento tata nácaná jatá in in nuú tata cán —nacachi Jesús xihín ná.

Ta tá nandhi nádicani Jesús ña yóho nū ná já nacahan cóhó a nū ná já nacachi a já xihín ná:

—Ndá ndó, ná fin joho, ná cuni joho ndó —nacachi Jesús xihín ná cán.

<sup>9</sup> Anda já nácasáhá ná xíca tuun xihín á cán ndáca tuhun ná mé á ndíca cíni cachí quiāhva nacachi a xihín ñayivi cán. <sup>10</sup> Ta

nanducú ñehe Jesús tūhun nū ná já nacachi a já xihín ná:

—Ña coó nacandaqá ini ndó jihna, ña cán cándaqá ini ndó viti jáchí ñasuná Ndióxi xímí túni ndó candaa ini ndó ndá quiahva cacomí mé á cuénta sahá ñayivi. Joo sácú u quiahva nuú java ga ñayivi já quéa vatí sándezhe ná joo cíu ná tátuhun ná coó tívi nuú. Ta vatí xímí joho na, cíu ná tátuhun ná johó jáchí coó cándaqá ini na ña cahán i xihín ná —nacachi Jesús xihín ná xíca tuun xihín á cán.

*Ndícani Jesús ña cúní cache quiahva násacu a nuú ná cán*  
(Mt. 13:18-23; Mr. 4:13-20)

<sup>11</sup> Anda já nacachi Jesús já xihín ná:

—Ña yóho cúní cache quiahva násacu u nuú ñayivi yóho: Mé tata cán cíu á yuhú nuú tūhun Ndióxi, ña xíca java na cahán ná xihín ñayivi. <sup>12</sup> Mé tata ña nandicava íchí cán náhá nu yo ndá quiahva fin java ñayivi. Xímí joho na tūhun Ndióxi joo tá nandihí já vaxi tiñahá sacuahá ta caja rí xihín ná ña ndíndójó ná ña já ná a cándusa na tūhun Ndióxi ña ná a cárku ndaa ímima ná. <sup>13</sup> Ta tata ña nandicava tañu yuu cán náhá nu yo ña ndúu java ñayivi ta xímí joho na tūhun Ndióxi ta cajíi íná ná ndíquehe na ña. Joo sahá ña coó ñehe íná yóho á cuhun cúná a sahá ña cán quéa chá tiempo cuití va cándusa na tūhun Ndióxi. Jáchí tá cásahá ndóho ini na sahá tūhun Ndióxi chí jándacoo va na ña. <sup>14</sup> Ta tata ña nandicava tañu tñihíiú cán náhá nu yo ña ndúu java ñayivi ta xímí joho na tūhun Ndióxi joo coó jándacoo na íchí naxíca na jihna. Ta cásahá ndícani ini na sahá ña ñuyíví yóho ta cásahá ná cátóo ná canduu cuahá ñaha cuicá nu ná ta cásahá ndicají ini na caja na ña núu. Sahá ña cán quéa cíu á tátuhun tata ña coó cáná ñaha jáquee na nuú jáchí coó násahnu na xihín tūhun Ndióxi. <sup>15</sup> Joo tata ña nandicava nu ñuhú vahá cán náhá nu yo ña ndúu java ñayivi ta xímí joho na tūhun Ndióxi xihín ndinuhi ini na ta caja na ña sáhndá a nu ná. Ta sahá ña ndíco cáná na Ndióxi ta coó jándacoo na mé a sahá ña cán quéa cíu ná tátuhun tata násahnu cuahá ñaha ña cuu jáquee na nuú jáchí sáhnu na xihín tūhun Ndióxi —nacachi Jesús ndícani a nuú ná xíca tuun xihín á cán.

*Sácu Jesús in quiahva sahá in lámpara  
(Mr. 4:21-25)*

<sup>16</sup> Ni in tūhún toho ñayivi coó ndícahmi na in lámpara ta anda já chíahvi na jatá xihín in ñaha. Ta ni co chícaqan jehé na ña tixi xito. Ña caja na quéa chínúu jíco na ña já ná yehe a nuú ná quíhvi ini vehe cán. <sup>17</sup> Ni in tūhún toho ñaha a cuú coo jehé nahá jáchí xímí quívijá ndáca náhá nu á. Ta ni in tūhun nacahan jehé ñayivi a cuú coo jehé nahá jáchí xímí quívijá candaqá ini tocó ndihí ñayivi sahá tūhun násahijín jehé cán.

<sup>18</sup> *Sahá ña cán quéa ndítahan coo joho vahá ndó nu cahán i xihín ndó. Jáchí da fin ñaha nuú, ñehe tähví dá coo chágá ñaha nuú dá joo da coó ñaha nuú, janda ña loho fin nuú dá ndindaa —nacachi Jesús.*

*Tá naxínu coo náná Jesús xihín ñani a nū ínn a*  
(Mt. 12:46-50; Mr. 3:31-35)

<sup>19</sup> Anda já naxínu coo náná Jesús xihín ñani a mé nū fin a cán. Joo coó nacuu cayatí na nu á jáchí a juú quiahva náchutú ñayivi ndúu na xihín á cán. <sup>20</sup> Anda já násahen in da caxi tūhun da xihín Jesús já cächí da já xihín á:

—Jata véhe cáa fin nánún xihín ñanún ta cahán ná xuhun cúní ná —nacachi da cán xihín Jesús.

<sup>21</sup> Anda já nacachi Jesús xihín tocó ndihí ñayivi ndúu cán já:

—Ndá ná xímí joho tūhun Ndióxi ta caja na ña cächí a, ná cán cíu ná tátuhun náná i xihín ñani i —nacachi Jesús xihín ná.

*Tá najácatájí Jesús tachí xihín tañuhú tá ndícojo do*  
(Mt. 8:23-27; Mr. 4:35-41)

<sup>22</sup> In quívijá naquihvi Jesús ini in barco xihín ná xíca tuun xihín á. Ta já nacachi a já xihín ná:

—Cóho inga xoo tañuhú yóho.

Anda já náquee na cuahán ná. <sup>23</sup> Ta nani xójo cava na tañuhú cán cuahán ná já nanaá ini Jesús naquijí á. Ta in náá cuití naxínu in tachí quíni ndivahá nuú tañuhú cán ta nacásahá ndíndita dó ta jáchutú do ini barco cán. Ta chí iyo ndivahá cáa jáchí cuu cacoo barco cahá ticuií. <sup>24</sup> Anda já násahen na ndínehe na Jesús já nacachi na já xihín á:

—Maestro, Maestro. Cácoo barco yo cahá ticuií cuahán do —nacachi na xihín á.

Anda já nandicoo Jesús já nacásahá já-nanai a tachí xihín ticuií ndícojo cán. Tá

nandíhi já najáyaa mé á tachi xihín ticuif chí táji níi uun nacandoó nuú tañuhú cán.

<sup>25</sup> Anda já nacachi Jesús já xihín na xica tuun xihín á:

—Ndaja vaha co cández ini ndó yehé — nacachi a.

Joo na cán nayihví na ta nacatontó na. Ta chí jandá ndáca tuhún táhan na já cachí na já:

—Ndá da cúu dñataa yóho ña anda tachi xihín tañuhú cándusa nu cahán da — nacachi xihín táhan na cán.

Tá natava Jesús íníma quini nasañhu ini in dñataa ñuu Gadara

(Mt. 8:28-34; Mr. 5:1-20)

<sup>26</sup> Tá nandíhi já cuahan na ta naxinu coo na ñundáhyi cuéntá Gadara, ña cándoo inga xoo tañuhú ta ndícoto nihni táchan xihín estado Galilea. <sup>27</sup> Tá nánuu Jesús barco cán já nacayati in dñataa, da ñuu Gadara cán nu á. Mé da yóho sa nacanahá ndivaha ñúhu íníma quini ini da. Ta já cása vichí láhlá da xica nuu da. Ta ni co íín da vehe. Tañu nu jánduxu na ndíj cán va íín tuun da.

<sup>28</sup> Tá naxini da Jesús nandicava xítí da nu á ta já nacayuhú da já nacachi da já xihín á:

—Ndá cuénta quéa vasún quihvi nuún xihín i. Yóho cíún Jesús, da cúu in túhún jini já jáhyi Ndióxi, ña cahnu ndivaha. Xíca tähví i nuun ña ná a jándohún ini i.

<sup>29</sup> Nacachi da ña yóho xihín Jesús jáchi nacasáhá sáhdá mé á chuun nu íníma quini cán ña ná quee rí íníma da cán. Ta cuahá tañu nasañtiin rí da. Ta vatí nacató na ndáha dá xihín saha dá xihín cadena joo nasañda túhún dá ña nacaja rí quini cán. Ta já nacaja rí ña ná cunu da cuhun da chí yucú íchí nuú co ndúu ñayivi. <sup>30</sup> Nandaca tuhún Jesús mé rí quini cán já nacachi a já xihín ri:

—Ndaja nanún.

Anda já nanducú ñehe da cán tuhun nu á já nacachi da já xihín á:

—Legión naní i.

Nacachi da cán ña naní da Legión jáchi cuahá ndivaha rí quini nandíhvi rí ini da,

<sup>31</sup> Ta mé rí quini ñúhu ini da cán naxicá tähví rí nu Jesús ña ná a chíndahá a rí cuhun rí nu ndúu íníma ndii. <sup>32</sup> Ta yati in ndíca yúcú cán nasañduu cuahá ndivaha cóchí xíxáhan rí. Sáhá ña cán quéa naxica rí quini cán ñamani nu Jesús ña ná ndíhvi rí ini cóchí ndúu cán. Anda já nasañda Jesús

<sup>33</sup> Chí naquee rí quini dñataa

cán cuahan rí já nandíhvi rí ini cóchí cán. Ta tóco ndíhi cóchí yóho xínu rí cuahan rí nánuu rí nu ndái já najáqueta nuu rí mé rí ini tañuhú cán ta já nacanda rí ticuif já naxihi ri.

<sup>34</sup> Tá naxini mé dñataa ndáá cóchí cán ña yóho já naxinu da cuahan da caxi tuhun da ña nayaha yóho nuú ñayivi ñuu Gadara cán xihín nuú java ga na ndúu yati cán. <sup>35</sup> Anda já naqueta ñayivi sándhé na ña nacuu cán. Ta tá naxinu coo na nu íín Jesús cán já naxini na íín coo mé da nasañhu rí quini ini cán saha Jesús. Ta sa nandaca ndixi da jáhmá ta chí sa nandicáxi tähví ini da. Tá naxini na ña yóho chí nayihví na. <sup>36</sup> Ta na naxini nuú natavá Jesús rí quini ini dñataa cán, na cán cúu na nandicani ña nuú na coo naxini cán. <sup>37</sup> Tá naxini joho na ñuu Gadara cán ndaja nasañin já naxicá tähví ndíhi na nu Jesús ña ná quee a cuhun a jáchi yihví ndivaha na. Sáhá ña cán quéa nandíhvi tucu Jesús ini barco cán ña ná quee a cuhun a. <sup>38</sup> Joo tá cámáni quee a cuhun a já nacasáhá da naqueta rí quini ini cán xíca tähví da nu Jesús ña ná quiáhva mé a ñamani cuhun da xihín á. Joo nasañda Jesús chuun nu dá ña ná cando da. Já nacachi a já xihín dá:

<sup>39</sup> —Cuanúlhу vehún. Ta já ndicanún nuú na vehún ndaja náhnu ñáha nacaja Ndióxi xuhun —nacachi Jesús xihín da cán.

Anda já naquee da cán cuahan da. Já nandicani da nu tóco ndíhi na Gadara cán ndaja cása ña nacaja Jesús xihín dá.

Tá nandaja vaha Jesús jáhyi jíhí Jairo xihín in ña nacani ndaa ndáha jáhmá dá

(Mt. 9:18-26; Mr. 5:21-43)

<sup>40</sup> Tá nandicó coo Jesús inga xoo tañuhú cán, a juú quiáhva cávata ñayivi naxinu na ndiquehe na mé á jáchi mé cán nasañduu na ndáti na mé á. <sup>41</sup> Anda já nacasa in dñataa naní Jairo, da sáhdá chuun veñihu. Mé Jairo yóho naxinu da nacaxití da saha Jesús já naxicá tähví da nu á ña ná cuhun a vehe da. <sup>42</sup> Jáchi xihí ñá loho cúu jáhyi jíhí da ta in já cúu ñá nu dá ta ndácañ ñá tátuhun uxu ivi cuia. Chí naquee Jesús cuahan ta nani xíca cuahan vehe Jairo cán a juú quiáhva cuahá ñayivi ndíco na jatá cuahan na ta chí janda cándhi na mé á cuahan na.

<sup>43</sup> Ta tañu ñayivi cuahan cán ndácañ in ñánañha ta ndítahví níi ñá tixi uxu ivi cuia. Ta najándihi ndíhi ñá jiuhún ña nuú na caja tátá ñayivi joo ni in na coo nacuu caja

tátá ñahá. <sup>44</sup> Joo nacayati ñá chí jata Jesús ta natiiñ ñá yúhu jáhmá á. Chí ivi laá násacuiñ nij ñá cán.

<sup>45</sup> Anda já nácasáhá Jesús ndáca tuhún a tóco ndihí ñayivi já nacachi a já xihín ná:

—Ndá ndó nacani ndaa ndáha yehé —nacachi a xihín ná.

Joo ni in na coó nasahan tuhun nu á. Sahá ña cán quéa nacachi Pedro xihín java ga da xíca tuun xihín mé á cán já xihín á.

—Maestro, a juú quiahva cándíhi ñayivi mé ndó ta chindahá nihni joho na mé ndó vaxi na ta cáa ga mé ndó ndáca tuhún ndo ndá ná nacani ndaa ndáha ndohó —nacachi da cán xihín á.

<sup>46</sup> Anda já nacachi Jesús já:

—Ín in na nacani ndaa ndáha yehé jáchi nacandaa ini i ña nandiváha in na xihín ndée mí i —nacachi Jesús.

<sup>47</sup> Joo ndaja coo mé ña nandiváha cán tá naxini ñá ña nacandaa ini Jesús sahá ña nacaja ñá já nandiquiji nínu ña xihín ña ylhví ña ta já naxinu coo ña nacaxtí ña nu Jesús. Ta nu ndihí ñayivi ndíu cán nácasáhá ña ndícani ñá nu á ndá cuénta quéa nacani ndaa ndáha ña mé á chí ivi laá nandiváha ñá. <sup>48</sup> Anda já nacachi Jesús já xihín ña:

—Jahy a, nandivahún jáchi nacandúsún yehé. Cuanúh. Ta a ndícani ga inú —nacachi Jesús xihín ña.

<sup>49</sup> Ta nani cähán Jesús xihín ñá cán já naxinu in da naquixi chí vehe Jairo, da sáhndá chuun veñuhu cán. Já nacachi da cán já xihín dá:

—Sa naxihí va jahyi ndó. A jáquihvi ga ndó da xíca jánahá ñayivi jan.

<sup>50</sup> Joo tá naxini joho Jesús ña nacachi da cán já nacachi a já xihín Jairo:

—A cayihví tohún. Candusa cuití vún yehé chí ndiváha va jahyún —nacachi Jesús xihín dá.

<sup>51</sup> Tá naxinu coo Jesús vehe Jairo cán coó naxeen a quiahva ñamani ña ná quihvi ñayivi iní vehe cán xihín á. Ná naquihvi xihín á násacuu Pedro xihín Jacobo xihín Juan xihín tátá mé ñá loho cán xihín náná ña. <sup>52</sup> Jandá joho ndíváá ñayivi sácu ndivaha na ndíu na sahá ñá loho cán. Anda já nandicahán Jesús xihín ná já nacachi a já:

—A cuácu ndó. Coó naxihí toho ñá loho yóho. Quíjí cuití va ná —nacachi a xihín ná.

<sup>53</sup> Joo nácasáhá ña cán sácu ndaa na Jesús jáchi xíni ña ña sa naxihí ñá loho cán ta sa

cúú ñá ndii. <sup>54</sup> Anda já natiiñ Jesús ndáha ñá naxihí cán já nacahán cóhó a xihín ña já nacachi a já:

—Ñá loho, cuándacoo.

<sup>55</sup> Chí ivi laá nanditacu ñá loho cán já nandicoo ñá. Ta násahnda Jesús chuun ña ná quiähva na ña cuxu ñá. <sup>56</sup> Chí a juú quiähva nacatontó tátá náná ñá loho cán sahá ña nacaja Jesús. Joo násahnda Jesús chuun nu ná ña ná a ndícani na nuú ni in ñayivi sahá ña nayaha.

## 9

Tá nachindahá Jesús ndíhxu ivi na xíca tuun xihín á ña ná cuhun na caxí tuhun na tuhun Ndíoxí nuú ñayivi

(Mt. 10:5-15; Mr. 6:7-13)

<sup>1</sup> Najánditaca Jesús ndíhxu ivi na xíca tuun xihín á já násahan ndée nu ná ña ná cuu tavá na tá nuú íníma quini níhu ini ñayivi ta násahan ndée mé á nu ná ña ná cuu ndaja vaha na tá nuú cuehé ndóho ñayivi. <sup>2</sup> Násahnda Jesús chuun nu ná ña ná caxí tuhun na xihín ñayivi ña sa nacayati quiví cacomí Ndíoxí cuénta sahá ná. Ta násahnda chuun nu ná ña ná ndaja vaha na quíhvi. <sup>3</sup> Ta nacachi a já xihín ná:

—A cárnehe ndó ñaha cuhun ndó íchi. Ni garróté ni yáti ni pan ni jiuhún a cárnehe ndó cuhun ndo. In túhún cotó cárnehe ndó cuhun xihín ndo. <sup>4</sup> Tá ná xinu coo ndó in vehe, canduu ndó vehe jan janda quiahva ná ndindaa quiví quee ndó cuhun ndo. <sup>5</sup> Ta ndá ñuu nuú co cuni na ndiquehe vaha na ndohó, cuáhán quee ndó ñuu jan ta catí ndó ña yáca sahá ndo já ná ñaha ña cuahán cuachi na cán jata mé va na —nacachi Jesús xihín ná.

<sup>6</sup> Anda já naquee na cán cuahán na ta násahan na naxica nuu na ndijáa ñuu válí. Xíca na cáxi tuhun na nuú ñayivi tuhun vaha cähán sahá Jesús, mé a cuu jácacu ñahá. Ta ndája vaha na ña quíhvi.

Tá naxihí Juan, da nacaja ndútá ñayivi

(Mt. 14:1-12; Mr. 6:14-29)

<sup>7</sup> Ta ndaja coo Herodes, da cúú gobernador cán nacandaa ini da sahá tóco ndihí ña cája Jesús. Ta chí co xíni da ndíu cähán da jáchi java na cähí na xihín dá ña cúú Jesús mé Juan, da najácandútá ñayivi ta viti nanditacu tucu da cähí java na xihín dá. <sup>8</sup> Ta java ri na cähí na ña cúú Jesús profeta Elías, mé da naxica nuu sanahá ta

viti naxixi tucu da nu ná. Ta java na cachí na ña cùú á in táhan na profeta násanduu sanahá joo túní quéa nanditacu tucu a xíca nuu a, cachí na. <sup>9</sup> Anda já nacachi Herodes já xihín ná:

—Mí yehe cùú da násahnda chuun ña ná chitúhun ná jíco dà naní Juan cán. Ta co xíni ndá dà cùú dà naní Jesús yóho. Jáchí mé a ndaa xíni joho i ña cája cuahá ndivahá da ña náhnu —nacachi Herodes cán.

Ta chí cúní Herodes cuni da Jesús.

*Sáhan Jesús ña cuxu uhun mil tqa  
(Mt. 14:13-21; Mr. 6:30-44; Jn. 6:1-14)*

<sup>10</sup> Tá nandicó coq ná nachindahá Jesús caca nuu cahán tuhun Ndióxi xihín ñayivi cán nu fin mé á já nandicani na nu á sahá tóco ndihi ña nacaja na nuu násahan ná. Anda já ñehe Jesús ná násahan ná in nu caca xóo yati chí nuu Betsaida cán. <sup>11</sup> Joo tá nacandaq ini ñayivi ndá xoo cuahan Jesús já ndico ná cuahan ná. Ta nandiquehe vaha Jesús ná ta nandicani a nu ná ña sa nacayati quví cacomí Ndióxi cuéntá sahá ná. Ta nandaja vaha mé á na quíhví.

<sup>12</sup> Ta tá sa cahini cuahan já nacayati ndíhxu ivi ná apóstol cán nu Jesús já nacachi na já xihín á:

—Cahán ndó xihín ñayivi ná quee na cuhun na ndiquehe ndée ná ta ná nducú na ña cuxu na nuu válí xihín nuú yati chá yóho nu ndúu ñayivi jáchí coq ñaha mé va nu ndúu yóho —nacachi ná cán xihín Jesús.

<sup>13</sup> Anda já nacachi Jesús já xihín ná:

—Mé ndó quiahva ndó ná cuxu na —nacachi a xihín ná.

Anda já nacachi ná cán já xihín á:

—Uhun víxi pan xihín ivi láá tiyacá cuití va íin nuú nde. Ta ama ná cuhun ri ndehe cueen nde ñaha cuxu tóco ndihi ñayivi ndúu yóho —nacachi ná cán.

<sup>14</sup> Jáchí ñayivi cán cùú ná tátuhun uhun mil taa. Anda já nacachi tucu Jesús já xihín ná xíca tuun xihín á:

—Cacu coo ndó ná tá tálndá ivi jico uxu, ivi jico uxu ná.

<sup>15</sup> Chí nasacu coo ndíhxu ivi ná apóstol cán ná. <sup>16</sup> Anda já natiin Jesús ndíhxu pan xihín ndíví tiyacá cán já násandehé a chí indíví já nandiquiahva ndixahvi nu Ndióxi sahá ná cán. Tá nandihí já násahnda java táchí a ña já násahan ña nuu ná xíca tuun xihín á cán já nanditahnda ña cuxu ñayivi ndúu cán. <sup>17</sup> Ta tóco ndihi na nañehé

naxixi janda quiähva nachutú tixi na. Tá nandihí já nájachutú ná uxu ivi toyicá xihím ña nacando naxixi ndihi ná cán.

Tá náhmg Pedro ña cùú Jesús mé a nachindahá Ndióxi cacomí cuénta sahá ñayivi  
(Mt. 16:13-28; Mr. 8:27-9:1)

<sup>18</sup> In tañu tá nacana xóo Jesús xihín na xíca tuun xihín á ña caca táchí a nu Ndióxi já nandaca tuhún mé á ná já nacachi a já xihín ná:

—Ndá dà cachí ñayivi cùú yehe —nacachi a xihín ná.

<sup>19</sup> Anda já nanducú ñehe ná cán tuhun nu á já nacachi na já xihín á:

—Java ñayivi cachí ná ña cùú ndó Juan, dà najácandútä ñayivi. Ta java na cachí ná ña cùú ndó profeta Elías. Ta cachí java ga ví ná ña cùú ndó in táhan profeta násanduu sanahá, dà nanditacu tucu xíca nuu viti —nacachi ná xíca tuun xihín Jesús cán.

<sup>20</sup> Anda já nandaca tuhún Jesús ná já nacachi a já xihín ná:

—Ta ndóhó ri ndá dà cachí ndo cùú u —nacachi a xihín ná.

Anda já nacachi Pedro já xihín á:

—Mé ndó cùú Cristo, ña nachindahá Ndióxi cacomí cuénta sahá ñayivi —nacachi da xihín á.

<sup>21</sup> Joo nacachi Jesús xihín ná xíca tuun xihín a ña coto a ndicani na ña yóho nuu ni in tuhún ñayivi. <sup>22</sup> Anda já nacachi a já xihín ná cán:

—Yehé cùú u da nachindahá Ndióxi nduu ñayivi ta ndítahan nuu i ndoho ndivahá ini i. Ta na sacuahá veñuhu xihín na sacuahá nuu juytu xihín ná jánahá ley Moisés candalí ná yehe ta anda já cañí ná yehe. Joo tá ná xínu uní quíví já nditacu tucu u —nacachi a xihín ná.

<sup>23</sup> Tá nandihí já nacachi tucu a já xihín ndihi ná xíca tuun xihín á cán já:

—Ndá ná cúní candico yehe ndítahan nu ná ndihi chágá ini na sahá yehe a juú ga sahá mé ná. Ta ndijáá níí quíví ndítahan coo táchíva na ndoho ini na sahá yehe ta coq caja toho a ná quíví na sahá i. <sup>24</sup> Jáchí ndá ná cátóó coo chágá ñuyíví yóho ndihi sahá ná. Joo ndá ná sahan ndee ini quíví sahá i ñehe táchí ná catacu na anda ama cása quíví. <sup>25</sup> Vatí ná quee vaha in na ñuyíví yóho ta cómí ná tóco ndihi ñaha ñuyíví joo ndá chuun quéa tá nu ndíhí ndihi sahá ná indayá. <sup>26</sup> Ndá ná cácahan nuu sahá i xihím sahá tuhun vaha cahán i quiähva já cacahan

ri nuú yehé, dà nachindahá Ndióxi nduu ñayivi sahá ná cán tá ná quixi i cacomí i cuéntá sahá ñayivi. Mé tiempo cán náha ndaja cálmu cúú yehé jáchi quixi i xihín ndée Ndióxi ta xihín ndée tátó mé á viti.<sup>27</sup> Mé a ndaa ná cähán i xihín ndo ña ndúu java na ndita yóho ta ní a quíví toho na janda quiáhva ná xíñu quíví cuni na cacomí Ndióxi cuéntá sahá ñayivi —nacachi Jesús xihín na cán.

*Tá nandijama Jesús quíghva cása  
(Mt. 17:1-8; Mr. 9:2-8)*

<sup>28</sup> Ta tá nayaha tátuhun una quíví nacachi Jesús ña yóho xihín ná já nandaa jiní in yúcu ña caca tähví a nü Ndióxi. Ta ndáca táhan Pedro xihín Jacobo xihín Juan cuahán na xihín á.<sup>29</sup> Ta nani xíca tähví Jesús nu Ndióxi já nandijama quiáhva cása nuu á. Ta janda jáhmá ndíxi a cán nandiyaa cachi ña ta chí a juú quiáhva yéhe ña.<sup>30</sup> Anda já naxini na ivi taa ndúu da ndítuhún dà xihín Jesús. In dà cán cúú Moisés ta inga dà cán cúú Elías.<sup>31</sup> A juú quiáhva ndató ndíyehé ndaa nü ndúu na cähán na xihín Jesús ta ndítuhún ná sahá ña jándoho na ini a nuu Jerusalén ta já quivi a.<sup>32</sup> Ta vatí cúní cuju Pedro xihín java gá ná cátahan xihín dà cán násandita na. Ta naxini na ndá quiáhva cálmu cúú Jesús xihín da ivi táhan ndúu xihín á cán.<sup>33</sup> Ta tá nácasáhá cágíxá Moisés xihín Elías cán nü Jesús cuahán na já nacachi Pedro já xihín Jesús:

—Maestro, ndaja vaha cúa á ndúu nde yóho jáchi já cuu cavaha nde uni vehe tiyahvá válí. In a coo mé ndó ta inga coo Moisés ta inga coo Elías —nacachi da.

Joo chí cō xíñi mé va Pedro ndíá cása cähán da.<sup>34</sup> Ta nani cähán da ndita na já nánuu in víco jata ná ta najájhává a ná. Ta chí nácasáhá yíhví ná xíca tuun xihín Jesús cán tá naxini na nácava nuu víco cán ná.<sup>35</sup> Anda já naxini joho na cähán in a tañu víco cán já nacachi a já:

—Dá yóho cúa jáhyi mañí i. Cuni joho ndó nü cähán da.

<sup>36</sup>Tá nandihí naxini joho na ña cähí a cán já naxini na ña fin in túhún jiní mé va Jesús. Ta mé ná xíca tuun xihín á cán náshaiin táji yúhu ná sahá ña naxini na ta coó nandicani na sahá nuú ni in túhún ñayivi.

*Tá nandaja vaha Jesús in tqa loho ndácaqan íníma quini ini*

*(Mt. 17:14-21; Mr. 9:14-29)*

<sup>37</sup>Ta inga quíví itaqan tá nánuu Jesús xihín ná xíca tuun xihín á jiní yúcu cán já naqueta cuahá ndiváha ñayivi cuahán na ndique táhan na xihín Jesús.<sup>38</sup> Anda já nandicahán cóhó ndiváha in dataa tañu tóco ndihi ñayivi cán já nacachi da já xihín Jesús:

—Maestro, caja ndó ñamani candehé loho ndó jáhyi i jáchi in túhún jiní já cíú dà nuú i.<sup>39</sup> Ta ndácaqan in íníma quini ini da ta tím rí dà ta caja rí xihín dà ña ná ndahyí cóhó da. Ta caja rí ña ná quivi yíhí dà ta já cárna cuyu chiquiñu yúhu dà. A juú quiáhva caja xíxi rí quini cán xihín dà ta chí cō cúní rí janí rí dà.<sup>40</sup> Sa naxica tähví i nuú ná xíca tuun xihín ndo ña ná tavá ná mé rí quini cán joo coó nácuu caja na ña —nacachi dà cán xihín Jesús.

<sup>41</sup> Anda já nacachi Jesús já:

—Ndáhví nahá nácuu ndó jáchi sá cuahá ndiváha quíví fin i xihín ndo ta a ñáha candee iní ndó yehé. Cúú ndó ñayivi quini ndiváha chí cō ndéé ga iní i xihín ña caja ndó. Taxi ndó taa loho jan chóho —nacachi Jesús xihín ná.

<sup>42</sup> Ta tá cayati taa loho cán cuahán dà nu Jesús já nacaja rí quini cán ña ná ndicava da nu yúhu ta cán nacaja rí ña ná quivi yíhí tucu da. Anda já nájánani Jesús rí quini cán já nandiváha taa loho cán ta nandiquiáhva mé a dà nu tátá dà.<sup>43</sup> Ta tóco ndihi ñayivi náshandu cán nácatontó ná tá naxini na ña náhu caja Ndióxi.

Ta nani cátontó ná ndúu na sahá ña náhu caja Jesús cán já nácasáhá cähán mé a xihín ná xíca tuun xihín á. Já nacachi a já xihín ná:

<sup>44</sup>—Cuni joho vaha ndó ña yóho ta coto a ndíndójó ndó ña. Tiin na yehé, dà nachindahá Ndióxi nduu ñayivi ta já ndiquiáhva na yehé ndahá java dataa —nacachi Jesús xihín ná.

<sup>45</sup>Joo ni in táhan ná xíca tuun xihín á cán coó nacandaa iní na ndíá cúní cachi Jesús. Jáchi coó nánuñu xíñi túni ná ña ná canda iní na ña. Ta yíhví ná ndacá tühún ná mé á ña ná ndicani a ña nu ná.

*Ndícani Jesús ndá ná cúa ná fin chágá saha  
(Mt. 18:1-5; Mr. 9:33-37)*

<sup>46</sup>Tá nandihí já nácasáhá ná xíca tuun xihín Jesús cán ndítuhún xihín táhan na sahá ndá dà cúa dà cähnu chágá tañu mé ná.<sup>47</sup> Anda já naxini Jesús ña cähvi ini ná

cán já natiin a in taa loho já násacu ndichi a da jíin á. <sup>48</sup> Já nacachi a já xihín ná:

—Ndá ná ná ndiquehe vahá taa loho yóho sahá ña quíhvi ini na yehé, ndiquehe ri na yehé viti. Ta ndá ná ndiquehe yehé, ndiquehe ri na tátá i, mé a nachindahá yehé. Ndá ná coó sahá mé tañu tóco ndihu ndó, ná cán cíu ná fín chágá sahá nü Ndióxi —nacachi Jesús xihín ná cán.

*Tá ndíu java ná ndíquehe sahá yo já quéa cuahán ná xoo í*  
(Mr. 9:38-40)

<sup>49</sup> Anda já nacachi Juan já xihín Jesús:

—Maestro, naxini nde in dàtaa ta cahán da quívi mé ndó já tává da ínimá quini ñúhu ini ñayivi. Joo coó xíca nuu da xihín yo sahá ná cán quéa nasají nuu nde nü dá caja da ná —nacachi da cán.

<sup>50</sup> Anda já nacachi Jesús já xihín dá:

—A cájí nuu ndó nü dá sahá ña cája da ña. Jáchí ndá da co ndíndita caja xixi xohó, mé da cán cuahán da xoo mí —nacachi Jesús.

*Jánani Jesús Jacobo xihín Juan*

<sup>51</sup> Tá nacayati quíví ndíndita Jesús cuuhun a indíví coó hayvíh a quehe a íchi cuahán chí ñuu Jerusalén. <sup>52</sup> Nachindahá Jesús java ná xíca xihín á ña ná cuuhun cuéé ná in ñuu loho ndácaqan estado Samaria cán já ná nducú ná nyú canduu tóo na chí naquee na cuahan na. <sup>53</sup> Joo coó naxeen toho na Samaria cán ndiquehe na Jesús jáchí naxini na ña cuahán chí ñuu Jerusalén. <sup>54</sup> Tá naxini Jacobo xihín Juan cán ña yóho já nacachi da já xihín Jesús:

—Acó cúní ndó, xitoho i ña ná cahnda nde chuun ña ná cuyu ñúhu cayí indíví já ná jánaá nde sahá ñayivi yóho tá quíhva nacaja profeta Elías sanahá —nacachi na xihín á.

<sup>55</sup> Anda já nandicoto nihni Jesús nü ná já nacásahá jánani a na já nacachi a já xihín ná:

—Co xíni ndó ña a váha toho cahvi ini ndó já. <sup>56</sup> Jáchí coó naquixi toho yehé, da nachindahá Ndióxi nduu ñayivi, ña ná jánaá i sahá ñayivi. Naquixi i ñuyiví yóho jáchí cúní ña ná cazu ndaa ínimá ná —nacachi Jesús xihín ná cán.

Anda já naquee na cuahán ná inga ñuu loho.

*Na cúní candico Jesús*  
(Mt. 8:19-22)

<sup>57</sup> Ta nani xíca na cuahán ná já nacachi in dataa já xihín Jesús:

—Cúní candico i ndohó ndá nacuu nyú cuuhun ndo —nacachi da.

<sup>58</sup> Anda já nanducú ñehe Jesús tuhun nü dá já cachí a já xihín dá:

—Ndicuii cíu rí ta vati fín cává ñúhu rí. Laa cíu rí ta vati fín táká ñúhu rí. Joo yehé, da nachindahá Ndióxi nduu ñayivi chí ni nyú cuyu mí i coó va —nacachi a xihín dá.

<sup>59</sup> Tá nandihí já nacachi Jesús já xihín inga da:

—Naha quíi candico yehé.

Joo nanducú ñehe da cán tuhun nü Jesús já cachí da já xihín á:

—Quiahva jihna ndó ñamani nyú i ña ná cuuhun i jánduxu tátá i já quixi i candico i ndohó —nacachi da xihín Jesús.

<sup>60</sup> Anda já nacachi Jesús já xihín dá:

—Ná cuuhun mé ñayivi, na a ñáha cazu ndaa ínimá jánduxu na ndíj jan. Joo yóho, cuahán caxí tuhun nyú ñayivi ña sa nandin-daa quíví cacomí Ndióxi cuéntá sahá ná —nacachi Jesús xihín dá.

<sup>61</sup> Anda já nacativi inga dàtaa nü Jesús já nacachi da já xihín á:

—Jesús, candico i ndohó cúní. Joo quiahva ndó ñamani nyú i ná cuuhun loho i ndíndayi jihna ñúhu i ná vehe e já quixi i candico i ndohó —nacachi da xihín Jesús.

<sup>62</sup> Anda já nacachi Jesús já xihín dá:

—Ndá da cásahá ndíco yehé ta já ndicó coo tucu da cuahán da chí jata, cíu dá da coó chuun toho cacomí Ndióxi cuéntá sahá. Jáchí da cán cíu dá tátuhun da fín yata da cásahá da xítu da cuahán da joo tá nandihí ndicoto nihni tucu da chí jata ta chí coó sahá dá cacomí Ndióxi cuéntá sahá dá —nacachi Jesús.

## 10

*Chíndahá Jesús uni jico uxu taa cuuhun da cuahán da tuhun Ndióxi xihín ñayivi*

<sup>1</sup> Tá nandihí já nacaxí Jesús inga uni jico uxu chágá dàtaa. Ta tá ivi tá ivi da nachindahá a da cuahán da já ná cuuhun cuéé da cahán da tuhun Ndióxi xihín ñayivi ndúu tóco ndihí ñuu nyú násacu ini Jesús cuuhun a coto nihni a ñayivi. <sup>2</sup> Anda já nacachi a já xihín ná:

—Mé a ndáu ndúu cuahá ndivahá ñayivi, ná cúní cuni jgho tuhun Ndióxi joo coó cuahá ná cúní cuuhun cahán ña xihín ná. Cíu á tátuhun vahá ndivahá nacana níi nyú

utu joo ndímáni na jáquee ña. Ña cán quéa xíní ñúhú caca tähví ndó nuú da xihín ñaha utu cán ña ná chindahá chágá da na jáquee nyú utu da. Quiqhva já ndítahan caca tähví ndó nu Ndióxi ña ná chindahá chágá mé á na caca nuu cahán tuhun Ndióxi xihín ñayivi já ná ndiquehe vaha na ña.<sup>3</sup> Mé ndó cútú ndó na chindahá i cuhun caca nuu cahán tuhun Ndióxi. Mé a ndaa iyo ndivaha cása nuú cuhun ndó jáchi cacuu ndó tátuhun ndicachi válí tañu cuahá ndivahyí.<sup>4</sup> Tá naquee ndó cuahán ndo coto a cánehe ndó yátí cuhun ndo ni jiuhún ni inga ndusa ndó a cánehe ndó cuhun ndo. Ta a cáricta ndó cahán Ndióxi ndó xihín ñayivi ndique táhan xihín ndó íchi.<sup>5</sup> Ta tá ná xinu coo ndó in vehe, jíhna ñúhú cahán Ndióxi ndó xihín na ndúu vehe cán já cachí ndó já xihín ná: “Ná coo vaha ini ndó, na ndúu vehe yóho”, cachí ndó xihín ná.<sup>6</sup> Ta tá mé a ndaa íin vaha ini ñayivi ndúu vehe cán já a cándoo núu toho tuhun nacachi ndó xihín na cán. Joo tá coo íin vaha ini na cán já a quéhe ndó cuénta sahá ña nacachi ndó ña ná coo vaha ini na jan jáchi a juú na coo vaha ini cútú toho na jan.<sup>7</sup> Tá ná xinu coo ndó in vehe nu ndiquehe vaha na ndohó, canduu ndó mé vehe jan. Ta a cáca nuu ndó tá vehe tá vehe nducú ndó nuú coo ndó. Ta ndá ñaha íin nu ná sáhan na nu ndo cuxu ndó á coho ndó, tiin ndó a ndáha ná. Jáchí ndítahan nuú in dataa ndiquehe da ña catabu da sahá chuun cája da.<sup>8</sup> Ta tá ná xinu coo ndó in ñuu nu ndiquehe vaha na ndohó, cuxu ndó ndíia cútú mé a sáhan na nu ndo.<sup>9</sup> Ta ndaja vaha ndó ndá na quíhví ndúu cán. Ta cachí ndó já xihín ná: “Sa nacayati quívi cacomí Ndióxi cuénta sahá ndó”, cachí ndó xihín ná.<sup>10</sup> Joo tá ná xinu coo ndó in ñuu nuú co cúní na ndiquehe vaha na ndohó, cuahán ndó cayé ñuu cán já cachí ndó já xihín ná:<sup>11</sup> “Janda ña yácá natíin ndaa sahá nde ñuu ndó yóho quíji nihni nde ta xihín ña yóho náha nde ña cuahán cuahí ndó jata mé va ndó. Jáchí sa nacaxí tuhun va nde xihín ndo ña sa nacayati quívi cacomí Ndióxi cuénta sahá ñayivi”, cachí ndó xihín ná —nacachi Jesús xihín na cán.

<sup>12</sup> Andá já nacachi tucu a já xihín ná:

—Tá ná xinu coo quívi caja vií Ndióxi sahá ñayivi já jándoho chágá mé á ini ñayivi ñuu jan a juú ga tá quiahva nájandoho a ini na ñuu Sodoma sanahá —nacachi Jesús xihín ná.

Cáhan Jesús sahá ñuu nu ndúu ñayivi, na coca cúní jándaco cuachi  
(Mt. 11:20-24)

<sup>13</sup> Andá já nacachi tucu Jesús xihín ná já:  
—Ndáhví nahá nacuu ndó, na ñuu Corazín. Ta ndáhví nahá nacuu ndó na ñuu Betsaida. Cuahá ndivaha ña náhnu nacaja i nu ndó joo coó naxeen ndó ndicó coo ini ndó jándacoo ndó cuachi ndó. Sanahá nájandihí Ndióxi sahá ñuu Tiro xihín sahá ñuu Sidón sahá cuachi na. Tá ná sahán i caja i ña náhnu nuú na cán tá quiahva nacaja i nu mé ndó, sa nájandacoo va na cán cuachi na, nduu. Ta chí ivi laá ndacá ndixi na jahmá ndíi ta jácuyu na yaq yíqují jíni na, nduu. Jáchí xihín ña yóho jánahá na ña nandicó coo ini na sahá cuachi na.<sup>14</sup> Joo tá ná xinu quívi caja vií Ndióxi sahá ñayivi já ndoho chágá ini mé ndó, ña ñuu jan a juú ga tá quiahva nandocho ini ñayivi násanduu ñuu Tiro xihín ñuu Sidón sanahá.<sup>15</sup> Ta viti cahán i xihín ndó, na ndúu ñuu Capernaum. Janda indívi cúní ndó cuhun ndó joo sahá ña saá ini ndó cuhun ndó jándá indayá, caja Ndióxi xihín ñayivi cán.

<sup>16</sup> Andá já nacachi a xihín na xica tuun xihín a já:

—Ndá na xini joho nu cáhan ndó ta cája na ña cáchí ndó já quéa cútú á tátuhun cája na ña cáchí yehé xihín ná caja na. Ta ndá na cándají ndohó cútú á tátuhun cándají ri na yehé va. Ta ndá na cándají yehé, cándají ri na Ndióxi, mé a náchindahá a yehé quixi i nyuyíví yóho —nacachi Jesús xihín na chindahá mé á cuhun cahán tuhun Ndióxi xihín ñayivi cán.

Andá já naquee na cuahán na.

Tá nandicó coo ndíhyuní jico uxu na náchindahá Jesús caca nuu cahán tuhun Ndióxi

<sup>17</sup> A juú quiahva cajíi ñí na uní jico uxu na náchindahá Jesús cahán tuhun Ndióxi cán tá nandicó coo na. Já nacachi na já xihín Jesús:

—Tá cáhan nde quívi ndó sáhndá nde chuun nu ínimá quini ta chí xini joho rí ta cája rí ña sáhndá nde nu rí —nacachi na cán xihín Jesús.

<sup>18</sup> Andá já nacachi Jesús já xihín ná:

—Mé a ndaa quéa cáhan ndó jan. Jáchí naxini i xihín nuú mí i ndá quiahva naquee Satanás, rí cútú tiñahá sacuahá indívi ta nandicava rí nu ñúhu tátuhun in tasa.<sup>19</sup> Chí náshán i ndée nu ndohó ña ná cuu cahnda ndó chuun nuú tiñahá sacuahá. Já cuu

cuāni nihni ndó jatá coo xihín jata líhma ta a ndóho ndó ni in ñaha. Ta nasañan i ndée nu ndo ña ná cuu quee vaha ndó nuú ndihi ña ná cuu cúní tiñáhá sacuahá caja rí xihín ndo. <sup>20</sup> Vatí cajíi ini ndó sahá ña cándusa rí quini nu sáhndá ndó chuun nu ri joo ndítahan cajíi chágá ini ndó sahá ña sa naquee va quiví ndó ña cuhun ndó indív —nacachi Jesús xihín ná.

*Tá nacajíi ndivaha ini Jesús  
(Mt. 11:25-27; 13:16-17)*

<sup>21</sup> Ta chí mé hora já nacaja ínima yii Ndióxi ña ná cajíi ndivaha ini Jesús. Já nacásahá cachí a já:

—Cája cáhnu i ndohó, tátá Ndióxi, ña cútú xitoho tóco ndihi ñaha ndúu indív xihín ñuyíví. Jáchí najánahá ndó ña ndichí ndivaha nuú ñayivi, na coó cuahá sahá nuú java ga ña. Ta nacaja ndó ña ná a cútú candaña ini na ndichí xihín na tácu ini ñaha mé ndó. Já nacaja ndó jáchí já násacu ini ndó caja ndó —nacachi Jesús.

<sup>22</sup> Anda já nacachi a já xihín na ndúu cán:

—Nandiquahva tátá i tóco ndihi ñaha ndahá i ña ná cacomí cuénta sahá. Ta ni in túhún toho ñayivi co xíní vaha na yehé, da cútú in túhún jini já jahyi Ndióxi. Mé Ndióxi, tátá i cuití va xíní vaha yehé. Ta ni in túhún toho na co xíní vaha yo cútú tátá i. In túhún yehé, da cútú jahyi a xíní vaha i yo cútú mé á. Ta yehé cútú da caxi ndá ñayivi jánahá i nuú sahá Ndióxi, tátá i já ná candaña vaha ini na yo cútú mé á —nacachi Jesús.

<sup>23</sup> Anda já násandehé a nuú na xíca tuun xihín á cán. Já nacásahá cachí a já xihín mé cuití na:

—Tahví nacuu ñayivi tá ná cuu candehé na tóco ndihi ña xíní mé ndó viti. <sup>24</sup> Mé a ndaa ná cahan i xihín ndo ña cuahá táhan na profeta násanduu sanahá ta cuahá táhan na násacomí cuénta sahá ñayivi sanahá cúní na cuni na tóco ndihi ña xíní ndo cája i. Joo coó naxini na ña. Ta cúní na cuni joño na ña xíní joño ndó cahán i xihín ndo. Joo coó naxini joño na ña.

*Sácu Jesús quiahva sahá in da Samaria, da nacaja vaha*

<sup>25</sup> Ta ndaja coo in da jánahá ley Moisés nandaca ndichi da cahan da xihín Jesús jáchí cúní da coto ndojo ñahá da. Ta nacachi da já xihín á:

—Maestro, ndía ndítahan caja i já ná cuu catacu u indív anda ama cása quiví —nacachi da xihín á.

<sup>26</sup> Anda já nanducú ñehe Jesús tühun nu dá já nacachi a já xihín dá:

—Ndaja cachí ley Moisés. Ndaja cachí ley ta cahvún ña —nacachi Jesús xihín dá.

<sup>27</sup> Anda já nanducú ñehe da jánahá ley Moisés cán tühun nu Jesús já nacachi da já:

—“Quihví inún Ndióxi, xitohún xihín tóco ndihi ñimun ta xihín ndinuhu inún. Ta quihví inún a xihín tóco ndihi ndéun ta xihín tóco ndihi xímí túnun. Ta quihví inún ñani táhún tá quiahva quíhví inún mún” —nacachi da cán nanducú ñehe da tühun nu Jesús.

<sup>28</sup> Anda já nacachi Jesús já xihín dá:

—Mé a ndaa vaha va nacahun. Cuahán caja tóco ndihi ña yóho já ñehe tähvun cat-acutín indív anda ama cása quiví —nacachi Jesús xihín dá.

<sup>29</sup> Joo da jánahá ley Moisés cán cúní da candoo vaha da nuú ñayivi ndúu cán sahá ña cán quéa cachí da já xihín Jesús:

—Yo já cútú ñani táhan i.

<sup>30</sup> Anda já nandicani Jesús nu dá já cachí a já xihín dá:

—In tañu naquee in dataa ñuu Jerusalén cuahán da íchi ña náuu cuahán chí ñuu Jericó. Ta ndaja coo cán naqueta java ta cuahán nu dá. Ta natiin na dá ta nacaja cuahán ndihi na ñaha da jandá jahmá dá viti naquehe na. Tá nandihí já nacani quini ndivaha na da jandá quiahva nasahní tóo na da. Já naquee na cuahán na. <sup>31</sup> Ta ña vaha quéa ñayaha in jutu mé íchi cán. Joo tá naxini ñahá da já ñayaha saa da cuahán va da.

<sup>32</sup> Ta sá mé íchi cán nayaha ri in da naquixi chichi Leví ta tá naxini da dá nandicuehe cánduhu íchi cán já nayaha saa da cuahán da. <sup>33</sup> Jári in da Samaria xíca cuahán mé íchi cán. Joo tá naxini da dá nandicuehe cánduhu íchi cán chí natahví ini da saha dá. <sup>34</sup> Anda já nacayati da nuú cánduhu dá. Já nacaja tátá da nuú nandicuehe dá quíhví cán xihín sití xihín vino viti. Ta já nacató da nuú nandicuehe cán xihín tícoto. Tá nandihí nayándaa da dá jata búrro jana dá já ñehe ñahá da cuahán da. Já nanducú da vehe coo tóo da quíhví cán ña ná candaña na da.

<sup>35</sup> Ta inga quiví itaqan tá násacu ini da Samaria cán quehe da íchi cuhun da já natavá da ivi jiuhún caa nasañan da nuú da xihín ñaha vehe cán. Já nacachi da já xihín

dá: "Cajún ñamani candaas vahún dä quíhví yóho. Ta tá ná chicáan chágún jihuñ xihin dá, a ndícani toho inún jáchi chahvi mí vi ña nuun tá ná ndicó coo i", cachí dä Samaria cán —nacachi Jesús.

<sup>36</sup> Anda já nandacaq tühün Jesús dä jánaħha ley Moisés cán já nacachi a já xihin dá:

—Ta viti cachún xihin i tixi ndíhuni da nayahha íchí nuú násanduhú dä nandicuehe nacaja taa cujhñá yóho, ndá dä cùú dä nanaha ña mé a ndaa táhyí quíhví ini da ñani táhan da —nacachi Jesús.

<sup>37</sup> Anda já nacachi dä jánaħha ley Moisés já:

—Dä natähví ini saħá dä nandicuehe jan, dä jan cùú dä caja i cuénta nanaha dä ña mé a ndaa quíhví ini da ñani táhan da —nacachi dä cán.

Anda já nacachi Jesús já xihin dá:

—Ta viti cuahán ri yóho va, quíhví inúñ ñani táhún tá quiāhva nacaja dä Samaria yóho —nacachi a xihin dá.

Tá nasahan Jesús vehe Marta xihin María

<sup>38</sup> Naquehe Jesús íchí xíca cuahán janda quiāhva naxiñu coo a in ñuu loho. Ta cán nandiquehe vahá in ñá naní Marta mé á vehe ñá. <sup>39</sup> Ta nasahijin in quíhví Marta yóho, ñá naní María. Ta naxiñu coo María násaco ñá yati saħá Jesús jáchi cùni ñá cuni joho ñá nuú cahán mé á. <sup>40</sup> Joo ndajá coo a juu quiāhva ndíhi ini mé Marta caja ndíví ñá ñaha cuxu na ndácaq ña. Anda já nacayati ñá nuú Jesús já nacachi ñá já xihin á:

—Candehé ndo, xitoho i. Á co sándehé toho ndó ña in tühün mí i caja ndívi i ñaha ta ñá cùú quíhví i jan co chíndee loho ñá yehé. Cahán loho ndó xihin ña ná chindeé ñá yehé —nacachi Marta cán xihin Jesús.

<sup>41</sup> Anda já nanducú ñehe Jesús tühun nu ña já cachí a já xihin ña:

—Marta loho, a juu quiāhva ndícani inúñ ta ndíhi inúñ jáchi ñin ndivaha chuun nuun.

<sup>42</sup> Joo ñin in tühün ñaha ña ñin chágħa saħa ta cùú á ña ndítahan cajún. Ta María, ñá cùú quíhvun yóho nacaxi ña ña vahá chágħa. Ta ni in na a cùu caji nuu nu ñá cuni joho ñá tühun cahán i —nacachi Jesús xihin ña.

## 11

Jánaħha Jesús na xíca tuun xihin á ndaja caja na caca tähví na nu Ndióxi

(Mt. 6:9-15; 7:7-11)

<sup>1</sup> In taňu xíca tähví Jesús nu Ndióxi ndácaan. Ta tá nandih i naxixa tähví a já nacachi in táhan dä xíca tuun xihin á cán já xihin á:

—Jánaħha ndó ndehe, xitoho nde caca tähví nde nu Ndióxi, tátá yo tá quiāhva nacaja Juan, dä nacaja ndútta ñayivi. Jáchi nájaħha dä nuú na násaxixa xihin dä ndá quiāhva caja na caca tähví na nu Ndióxi —nacachi dä cán xihin Jesús.

<sup>2</sup> Anda já nacachi Jesús já xihin na cán:

—Tá ná caca tähví ndo nu Ndióxi já cachí ndó já:

Tátá Ndióxi, ña ñin indív, cahnu ná cacuu quívì ndo. Ná tandaas quívì quívì cacomí ndó cuénta saħá nde:

Ta ná coo tá ñin cùni mé ndó coo ñuyív yóho tá quiāhva ñin indív caja ndó.

<sup>3</sup> Quiāhva ndó nuú nde ña ndímaní nuú nde cuxu nde in in quívì.

<sup>4</sup> Caja cahnu ini ndó saħá cuachi nde tá quiāhva caja cahnu ini nde saħa tóċó ndihi ña nuú caja ñayivi xihin nde.

Ta a quiāhva ndó ñamani ña ná coto ndojo tiñáhá saċuha ndehe já ná a caja nde cuachi nu ndo, já cachí ndó caca tähví ndo —nacachi Jesús.

<sup>5</sup> Anda já nasacu Jesús in quiāhva nu ná já nacachi a já xihin ná:

—Cúú a tátuhun tá ná cuħun ndó vehe in amigo ndo java ñuu táji ta já cachí ndó já xihin dá: "Amigo, a quiāhva tóún unī pan nuú i jáchi nacasaq in dä xíni tħahan xihin i vehe e ta cùú dä dä nasahan xíca ta coó ñaha nuú i quiāhva i cuxu da", cachí ndó xihin amigo ndo. <sup>6</sup> Ta viti ná caja i cuénta nducú ñehe da ndácaan ini vehe cán tħuhun nu ndo já cachí da já: "A jáquihvún yehe jáchi ndájí tuun yéhé. Ta ndúu jahyi váli i quíj i xihin i nuú xito ta a cuú caja i ndacoo i quiāhva i ndá ñaha nuun", cachí dä cán xihin ndo ná caja i cuénta. <sup>7</sup> Mé a ndaa ná cahán i xihin ndo ña vatí co cùni da jan ndacoo da quiāhva da ñaha nu ndo saħá ña xíni tħahan ndó xihin dá joo ndacoo tá ndacoo da quiāhva da ñaha nu ndo saħá ña jáquihvi ndo dá. Saħá ña cán quéa ndacoo da quiāhva da tóċó ndihi ña xíni ñúħu ndo nu ndo. <sup>8</sup> Ña cán quéa cahán i ña yóho xihin ndo: Ndá ñaha ndímaní nu ndo xíni ñúħu caca ndó ña nu Ndióxi ta já quiāhva mé á ña nu ndo. Ndinducú ndo ña cùni ndo ta

ñehe ndó ña caja Ndióxi. Cúú á tátuhun catí ndáha ndó yéhé ta já nuná yéhé nū ndo.  
<sup>10</sup>Jáchi na xícā, na cán cíú na ñehe va. Ta na ndúcū ñaha, na cán cíú na ndíñehé va. Ta na cátí ndáha yéhé, na cán cíú na ndímuna yéhé nū.

<sup>11</sup>Ta ndá ndó, na ndúu jahyi ta tá xícā jahyi ndó pan cuxu a nu ndo, ama cuéhé ri ndó quiáhva ndó yuu nu a ña na caxí a. Ta ama ná quiáhva ndó coo caxí a tá xícā cuñu tiyacá caxí a. <sup>12</sup>Ta ama cuéhé ri ndó quiáhva ndó líhma caxí jahyi ndó tá xícā ndiyi nū ndo. <sup>13</sup>Vatí cíú ndó ñayivi cája cuachi joo xíni vaha ndó quiáhva ndó ña vaha nuú jahyi ndó. Ta ndaja ga ví cája Ndióxi, tátá ndo, mé a íin indíví xihín ndo. Quiáhva mé á ínima yii a nū ndá na caca ña nu a —nacachi Jesús.

*Chícaq nā cuachi Jesús ña ñehe a ndée tiñáhá sacuahá*  
 (Mt. 12:22-30; Mr. 3:20-27)

<sup>14</sup>In tañu tává Jesús ínima quini ini in dataa, dā nanduu níhi, nacaja rí quini. Ta tá sa nacana mé rí quini ini dā cán nacaja Jesús anda já nandicahán tucu da. Ta chí nacatontó cuahá ñayivi ndúu cán tá naxini na ña yóho. <sup>15</sup>Joo java na nacásahá cachí na já sahá Jesús:

—Taa yóho cíú tává dā rí quini ñihu ini ñayivi jáchi mé Beelzebú, rí cíú tiñáhá sacuahá nu rí quini cán, sáhan rí ndée rí nu dā cája da ña —nacachi na.

<sup>16</sup>Ta java ga ná cíni ña coto ndojó na Jesús sahá ña cán quéa naxica na nu a ña na caja mé a ñaha xitúhún quixi indíví já ná cuni na. <sup>17</sup>Joo xíni vaha ya Jesús ña cahvi ini na cán sahá ña cán quéa nacachi a já xihín ná:

—Tá sáhndá java táhan ñayivi ndúu in nuu ta ndúu na cuahá tálhdá já cásahá cání táhan ndaja táhan mé va na já cama chá ndihi sahá nuu nu ndúu na cán. Ta quiáhva já yáha xihín na ndúu in vehe tá cásahá sáhndá java táhan na ta cání táhan na já cama chá ndihi sahá vehe na. <sup>18</sup>Ta quiáhva já yáha xihín Satanás, rí cíú tiñáhá sacuahá va. Tá ná cani táhan ndaja táhan mé rí já quéa ndihi sahá ndée ña cómi rí. Cáhan i ña yóho xihín ndo jáchi cachí ndo ña tává i rí quini ini ñayivi xihín ndée Beelzebú, rí cíú tiñáhá sacuahá. <sup>19</sup>Joo tá mé a ndaa cíú ndusa ña cachí ndó sahá i jan, ndáchí quéhe na cíú cuénta mé ndó jan ndée tává na rí quini ini ñayivi. Ama ná cachí ndó ña

tává ndó rí quini xihín ndée tiñáhá sacuahá. Ña yóho náha ña coo cahvi ndaa ini ndó. <sup>20</sup>Joo yéhé xihín in túhún ndée Ndióxi tává i ínima quini ini ñayivi. Ta xihín ña yóho náha caxí a ña sa naxinu coo quiví cacomí Ndióxi cuénta sahá ndó —cachí Jesús.

<sup>21</sup>Ta sácu Jesús quiáhva nu ná ta xihín ña yóho jánañha ña quee vaha mé a xihín tiñáhá sacuahá. Já cachí a já:

—Íin in dataa ta tóyíi cíaa da ta ñehe da ndá chúun chíndeé da mé dá. Ta nani ndáa dā vehe da mé a ndaa coó toho ñaha ndoho ñaha da jáchi ndáa vaha da ña. <sup>22</sup>Joo ta ná quixi inga taa, dā ndacú chágá a juú ga mé dā cán ta quee vaha da xihín dā já candaa ndihi da ndá chúun ña nacandee ini da mé dá. Ta já caja tá cíni mé dā ndacú chágá cán xihín ñaha dā inga cán.

<sup>23</sup>Ndá na coó cuahán xoo i, cíú ná na coo cíni yéhé. Jáchí ndá na coo chíndeé yéhé xihín ña cája i, cíú ná na sají nuu nyú i.

*Jánañha Jesús ña cughá tañu ndicó coo tucu rí quini ini ñayivi vati sa naquee rí*  
 (Mt. 12:43-45)

<sup>24</sup>Tá quéta in rí quini ini in dataa já quée rí cuahán rí xícā nuu rí ndijáa yucú íchí ndínducu rí nuú candoo rí. Ta tá coo ndíñehé rí ña já cásahá cahvi ini rí já: “Cóho ndicó coo tucu ini dā nuú nacandacaan í cán jáchi cíú á tátuhun vehe”, cahán rí. <sup>25</sup>Ta tá xínu coo rí ini dā cán já sández rí ña íin vií va ini dā cán tá quiáhva vií ini vehe tá natilví á ta nandaca ndojó vaha tóco ndihi ñaha ini a. <sup>26</sup>Anda já quée tucu mé rí quini cán cuahán rí quehe rí usa ga rí quini chágá a juú ga mé rí já xínu ndihi rí ndihvi rí ini da cán. Ta mé dā cán ndiquini chágá dā a juú tá nacandacaan in táláa rí ini da —nacachi Jesús.

*Ndá ná cíú na tähví chágá nacuu*

<sup>27</sup>Ta nani cahán Jesús tühun yóho nuú ñayivi já nacayuhú cöhó in ñáñahá tañu ñayivi cuahá cán já nacachi ñá já:

—Tähví nacuu ñá najácacu yohó, mé ñá najácuáhnu yohó —nacachi ñá xihín Jesús.

<sup>28</sup>Anda já nacachi Jesús já:

—Tähví chágá nacuu ñayivi tá xíni joho na tühun Ndióxi ta cája na ña cachí a —nacachi Jesús.

*Xícā ñayivi quini ña ná caja Jesús ña xitúhún cíni na*

<sup>29</sup>Tá ndítaca cuahá ñayivi nu íin Jesús já nacashá mé á cáhan xihín ná já nacachi a já:

—Quini ndiváha va ñayivi ndúu tiempo viti. Xíca na ña ná caja i ñaha xitúhún nu ná. Joo coó toho ña cán coo. Ña cuni ndusa na quéa ndoho i tá quiahva nandoho Jonás, da nacashá profeta sanahá. <sup>30</sup>Jáchí mé ñayivi nacanduu sanahá ñuu Nínive cán nacandaq ini na ña nachindahá Ndióxi Jonás nu ná. Ta quiahva já candaq ri iní na ndúu viti ña nachindahá ri Ndióxi yehe va, da nanduu ñayivi. <sup>31</sup>Tá ná xinu quíví caja vií Ndióxi sahá cuachi ñayivi ndúu tiempo viti anda já ndicuita in ña nacacomí cuénta sahá ñayivi ndúu chí sur sanahá ta chicaqan ña cuachi jatá ñayivi ndúu tiempo viti. Jáchí mé ña cán vatí nasahín xícá ndiváha ña nü rey Salomón sanahá nacashá ña cuni joho ñá tühun ndichí cáhan da. Ta yehe íin chágá sahá i a juú ga Salomón joo co cándusa ndó yehe. <sup>32</sup>Ta jári ñayivi nacanduu Nínive sanahá cán ndicuita na chicaqan na cuachi jatá ndo tá ná xinu quíví caja vií Ndióxi sahá cuachi ñayivi ndúu viti. Jáchí mé ña nacanduu ñuu Nínive cán najándacoo na cuachi cája na tá nacahan Jonás xihín ná ña nacachi Ndióxi coo. Ta yehe íin chágá sahá i a juú ga Jonás joo co cándusa ndó yehe.

Nduchú núu yo cíuú á tátuhun in lámpara  
(Mt. 5:15; 6:22-23)

<sup>33</sup>Ni in túhún toho ñayivi co chícaan nínuh ná in lámpara ta já quéhe na ña sácu na in níu jehé. Ni co chícaan na ña tixi sato. Ña cája na quéa chínuu jíco na ña já ná yehe nuú na quíhvi ini vehe cán. <sup>34</sup>Nduchú núu yo cíuú á tátuhun in lámpara jándiyehé a nu yo já xíní yo nu xíca í. Ta tá tívi vaha nduchú núu yo já cuu candehé vaha í nu xíca í. Joo tá co tívi nduchú núu yo já quéa xíca í nu naá ndiváha. <sup>35</sup>Cuénta coo ndó a juú cáhan ndó ña cuú ndó na xíca nu yehe ta cáá ví ndó cája ndó cuachi tátuhun na xíca nu naá. <sup>36</sup>Tá ná quiahva ndó ñamani jándiyehé Ndióxi íníma ndó já a cája ga ndó cuachi jáchí a cánehe ga ndó íníma quini. Tá cája ndó ña cúní Ndióxi já cíuú á tátuhun in lámpara jándiyehé íníma ndó —nacachi Jesús.

Chícaan Jesús cuachi jatá na fariseo xihín jatá na jánaħha ley Moisés

(Mt. 23:1-36; Mr. 12:38-40; Lc. 20:45-47)

<sup>37</sup>Tá nandihu nacahan Jesús já nacana in da fariseo Jesús ña ná cuhun a cuxu a vehe da. Tá nandihu já nacahan Jesús vehe da já naquihvi a nacaco a nu mesa xihín java na cán. <sup>38</sup>Joo ndaja coo da fariseo cán chí nacatontó dä jáchí naxini da ña coó nandahá Jesús cacoo a cuxu a tá quiahva íin costumbre mé na fariseo cán. <sup>39</sup>Anda já nacachi Jesús já xihín dä fariseo cán:

—Ndóhó, na fariseo, ndíhi ini ndó cája ndó costumbre ña ndícata ndó jatá vaso xihín jatá coho viti joo co ndíhi ini ndó ndícata ndó ini a. Quiahva já cája mé va ndó jáchí ndíhi ini ndó ndahá ndó tátuhun costumbre ndó joo co ndíhi ini ndó ndaja ví ndó íníma ndó nuú nacutu ndaa xihín ñaha quini cáhvi ini ndó. <sup>40</sup>Ndaja tóntó jini ndó. Á co xíni toho ndó ña tá nacavaha Ndióxi ñayivi já nacavaha mé á yíquí cuñu na ta nacavaha mé á íníma ná. <sup>41</sup>Caja ndó ñamani xihín na ndahví xihín ndinuhi ini ndó já ná coo vií ndó nu Ndióxi.

<sup>42</sup>Ndahví nacuu ndó, na fariseo. Mé ndó tá cachí ndo sáhan ndó ñaha nu Ndióxi já cávaha ndó uxu tähndá ñaha ndó cán. Ta in a sáhan ndó nu Ndióxi ta quéhe ndihu ndó ña java cán. Quiahva já cája ndó xihín minu estila xihín yucu lotá ta quiahva já cája ndó xihín tá nuú ñaha cána nu nínuh ndó. Joo co cája ndó ña ndaa xihín ñayivi. Ta ni co quíhvi ini ndó Ndióxi. Joo ña cúní Ndióxi caja ndó quéa ná caja ndaa ndó ta ná quíhvi ini ndó a. Ta a ndindójó ndó quiahva ndó ñaha nu Ndióxi.

<sup>43</sup>Ndahví nacuu ndó, na fariseo. Jáchí tá sáhan ndó veñhu cátóó ndo cacoo ndó nu sáco na náhu. Ta cúní ndó ña ná cahán Ndióxi toní nínuh ndivaha ñayivi xihín ndo tá ndique táhan na xihín ndo íchi.

<sup>44</sup>Ndahví nacuu ndó, na jánaħha ley Moisés. Ta ndahví nacuu ndó, na fariseo. Jáchí co cuú ndó tá quiahva ndaa ndó. Mé ndó cuú ndó tátuhun yáví nu táán na ndii jáchí núu cája ndó. Vatí xójo cava ñayivi yáha na nuú nanduxu ndii cán joo co xíni na ña cíuú á in yáví nu nínuh ndii jáchí coó yuú ñáñi a —nacachi Jesús.

<sup>45</sup>Anda já nanducú ñehe in da jánaħha ley Moisés cán tühun nu Jesús já nacachi da já xihín á:

—Maestro, xihín tühun cáhan jan jándihi híri a ndehe va.

<sup>46</sup>Anda já nacachi Jesús já xihín dá:

—Ndáhví nacuu ri ndóhó va, na jánahá ley Moisés. Jáchí caja ndó ña ná coo ihví ndivaha ley já ná a cíu caja ñayivi ña. Joo mé ndó caja ndúsa ndó xihín ná ña ná caja na ña vátí ni mé ndó a cuú caja ndó ña.

<sup>47</sup> Ndáhví nacuu ndó jáchí cíu á tátuhun cávaha ndó ñaní nu jánduxu ndó na profeta, na násahní tásahnú jíco ndó sahahá.

<sup>48</sup> Ta xihín ña yóho náhá ndó ña cájii ini ndó xihín ña nacaja tásahnú jíco ndó sahahá tásahní na profeta. Ta viti cíu á tátuhun chíndeeé táhan ndó xihín na cán jáchí mé ná násahní na ná profeta ta mé ndó nacavaha ndó nuú nanduxu na.

<sup>49</sup> Xíní vaha Ndióxi ñayivi ta ndaa nacahan mé á tá nacachi a já: “Chindahá i java profeta xihín java apóstol nu ndo. Joo mé ndó cahní ndo java na ta java na ndicuítá ñee ndó na”, nacachi Ndióxi sahná.

<sup>50</sup> Joo viti caca Ndióxi cuénta nuú ñayivi ndúu tiempo viti sahá tóccó ndihi na profeta, na naxihí ndijáá tiempo janda nani nacava sahá sahá ñuyíví. <sup>51</sup> Caca Ndióxi cuénta nuú ñayivi ndúu tiempo viti sahá na profeta ndijí naxihí sahná. Caca mé á cuénta sahá Abel, da naxihí nacaja Caín cán. Ta caca mé á cuénta sahá ndijáá na profeta naxihí tiempo naquixi cán janda quiahva naxihí coo a nuú caca cuénta sahá ndijí Zacarías. Mé da yóho násahní na dà ini veñuhu sahná tañu nu ná xihín nuú yii ndivaha. Ña cán quéa cahán i xihín ndó ña caca Ndióxi cuénta sahá tóccó ndihi ndijí jan nuú ñayivi ndúu tiempo viti.

<sup>52</sup> Ndáhví nacuu ndó, na jánahá ley Moisés. Jáchí caja ndó ña ná a cíu candaá ini ñayivi ña cachi tóhun Ndióxi. Ta xihín ña yóho cíu ndó na sájí nuu cuití va jáchí ni co sahan ndó ñamani nu ná ña ná candúsa na ña ndaa. Ta mé ndó vátí xíní ndó cíu á ña ndaa joo co caja ndó ña cachi a —nacachi Jesús xihín na jánahá ley Moisés cán.

<sup>53</sup> Tá nacachi Jesús ña yóho já naxijo ndivaha ini na jánahá ley Moisés cán xihín na fariseo cán xihín á. Ta já nacásahá na ndáca tóhun cuahá chágá na mé á sahá ña cuni na jáquihví cuití ñahá na. <sup>54</sup> Ta násacu cuahá na tóhun ihví nu a jáchí ndúcú na ndá quiahva chícagan na cuachi jatá xihín in tóhun ña ná yaha yúhu á cahán.

ndáa na

<sup>1</sup> Ta nani cahán Jesús cán nacásahá táchá cuahá ndivaha ñayivi. Cuahá mil na nacásahá ndái cuu na cán. Janda quiahva cándíhi táhan ndaja táhan mé ná xihín á cuahán ná. Nu cuítí nacahan Jesús xihín na xíca tuun xihín á já cachi a já:

—Cuénta coo ndó xihín na fariseo jáchí cíu ná tátuhun yúsa naxaa quée xihín harina ña cávaha na pan. Co cíu ná tá quiahva ndáa na. <sup>2</sup> Ta ni in tóhun toho ñahá a cíu coo jehé náhá jáchí cana tá cana tóhun sahá. <sup>3</sup> Tóccó ndihi tóhun nacahan jehé ndó ñuu já vaxi quivi cuni joho ñayivi ña ndiví táchí. Tóccó ndihi ña nacahan jehé ndo tá ndají yéhá já vaxi quivi candaá ini tóccó ndihi ñayivi ñuu sahá —nacachi Jesús xihín na xíca tuun xihín á.

Yo já ndítahan cayihví yo

(Mt. 10:26-31)

<sup>4</sup> Anda já nacásahá cahán Jesús xihín ndihi na cán já cachi a já:

—Candehé ndo, na cíu amigo i. Cúni cahan i xihín ndo ña a cayihví toho ndó ñayivi, na cuu cahní yiquí cuu ndó. Jáchí ña jan cíu ndihi va ña caja na ta a cuú caja na ni náha xihín ínima ndo. <sup>5</sup> Ta viti ná cahán i xihín ndó yo já ndítahan ndusa nu ndó cayihví ndo: Ndítahan cayihví ndó Ndióxi jáchí mé a cán quéa cuu caja ña ña quivi ndó ta tá nandihí cuu chícagan ínima ndo ini indaya. Mé a cán quéa ndítahan ndusa cayihví ndo.

<sup>6</sup> Sa xini vaha ndó ña yahun laa válí yahvi rí ivi juuhún. Vátí nuú ndivaha sahan ñayivi rí joo co ndíndójó toho Ndióxi sahá ri jáchí ndáá mé a ri. <sup>7</sup> Quiahva já íin ri sahá mé ndó nu Ndióxi. Jáchí janda ijí jini ndó jan ndáhví tá in tá in a nu Ndióxi. A cayihví toho ndó jáchí ndiyahvi chágá ndóhó nu Ndióxi a juú ga cuahá laa válí.

Tá cahán caxí ñayivi ña cíu ná cuénta Jesús

(Mt. 10:32-33; 12:32; 10:19-20)

<sup>8</sup> Mé a ndaa ná cahán i xihín ndó ña ndá na caxí tóhun nuú ñayivi ña cuahán na cuénta mí i já quéa cachi mí i, dà nachindahá Ndióxi nduu ñayivi sahá ná ña mé a ndaa cíu ndusa na cán cuénta mí i. Já cachi i xihín tátó Ndióxi. <sup>9</sup> Joo ndá ná cachi xihín ñayivi ña co xini toho na yehe já quéa ni yehe a ndicuni toho i na ña cíu ná cuénta mí i nu tátó Ndióxi.

<sup>10</sup> "Ta ndá na ná cahān nūu sahá yehé, da nachindahá Ndióxi nduu ñayivi, caja cahñu ini i sahá ná. Joo ndá na ná cahān nūu sahá ímima yii Ndióxi, na cán cūú na a caja cahñu ini toho Ndióxi sahá.

<sup>11</sup> Tá ná tiin na ndohó ña cañehe na ndohó cuhñu ndó nahma ndó nuú na sacuha veñhu á nyú na jutixia sahá i, a ndícani toho ini ndó ña ndá tūhun quéa cahān ndó nyú na cán. <sup>12</sup> Jáchí tá ná xínu coo hora cahān ndó nuú na cán, jánahá ímima yii Ndióxi nu ndo ndá tūhun nducú ñehe ndó nuú na cán —nacachi Jesús xihín ná.

*In dà cuicá, dà nacaja quíhví*

<sup>13</sup> In tahan dà ndácaan tañu ñayivi cuahá cán nacahán dà xihín Jesús já nacachi da já xihín á:

—Maestro, cahān loho ndó xihín ñani i ña ná cahnda java da ñaha ña najándacoo tátá nde nuú nde tá naxihí na —nacachi da xihín Jesús.

<sup>14</sup> Anda já nanducú ñehe Jesús tūhun nu dá já nacachi a já xihín dá:

—A juú juéxé cūú yehé já coo i cahnda java i ñaha ndó, vaha.

<sup>15</sup> Anda já nacachi tucu a já xihín na ndúu cán:

—Cuni joho vaha ndó. Cuénta coo ndó ña ná a ndiáva ñahá ini ndó canduu cuahá ñaha cuicá nu ndo. Jáchí a juú sahá ña ndúu cuahá ñaha cuicá nu ndó chí cuu catabu ñahá chágá ndó, vaha —nacachi Jesús.

<sup>16</sup> Anda já nasacu a in quiáhva nu ná já nacachi a já xihín ná:

—Nasahiin in dà cuicá ta a juú quiáhva nasahnu vaha ñaha nu ñuhu dá. <sup>17</sup> Anda já nacashá mé dà cuicá cán ndícani ini da já nacahán dà já: “Ndáchí taán toho í cuahá ñahá ñaha nacana nu yo yóho jáchí coó ga nuú cañuhu a”, nacahán dà. <sup>18</sup> Anda já nacahán tucu da já: “Ña caja í quéa ndícani ndihí i yáca níi ñaha í já cavaha í ña náhnu chágá. Ta cán taán yo ndihí ña nacana nu yo ta cán taán yo tóco ndihí java ga ña cómi yo.” <sup>19</sup> Anda já cachí i já xihín mí i: Sa cuahá ndiváha va ñaha nasacu vahún viti. Ta queta ña cusún tixi cuahá ndiváha cuja. Ta viti jandá ndiquehe ndéé cuití vún. Cuxu cuití vún. Coho cuití vún. Ta jandá cajíi cuití ini vún, já va cachí i xihín mí i, nacahán dà. <sup>20</sup> Joo nacahan Ndióxi já nacachi a já xihín dá: “Taa quíhví, sa mé nuú viti quivi vún. Ta tóco ndihí ña nasacu

vahún jan a juú ña cusún cūú á. Ndá na cūú mé va na cuxu ña jan”, nacachi Ndióxi xihín dá. <sup>21</sup> Quíhví ndiváha caja ñayivi tá ndája tútú na ñaha ñuyíví yóho joo co ñuhu ini na sahá Ndióxi ña ná caja na ña cūní mé á. Sahá ña cán quéa cūú ná na ndahví ndiváha nu mé á —nacachi Jesús xihín ná.

*Ndáa Ndióxi ña cūú ndusa jahyi mé á  
(Mt. 6:25-34)*

<sup>22</sup> Tá nandihí já nacahán Jesús xihín na xica tuun xihín á cán já nacachi a já xihín ná:

—A ndícani toho ini ndó sahá ña cuxu ndó catacu ndó ta ni sahá jáhma candixi ndó. <sup>23</sup> Jáchí cahñu chágá mé ndó a juú ga ña xíxi ndó xihín ña ndíxi ndó. <sup>24</sup> Candehé ndó rí naní ticacá jan. Co xútu rí ta ni co jaquee rí. Ta ni coó yáca nu táan rí ñaha rí. Joo sáhan va Ndióxi ñaha cuxu rí ña ná catacu rí vatí laa va cūú rí. Ta mé ndó ndiyahvi chágá ndó a juú ga laa jan. <sup>25</sup> A ndícani toho ini ndó jáchí coó toho a ñéhe ndó ndícani ini ndó. Ni in tūhún toho ndó a cūú ndaja jíco ndo mé ndó java metro chágá sahá ña ndícani ini ndó. <sup>26</sup> Tá ta ni loho ña yóho a cūú caja ndó, ndá ndohó ndó ndícani ñahá ini ndó caja ndó java ga ñaha, dá já.

<sup>27</sup> Candehé ndó ndá quiáhva ndató sáhnu ita. Co caja chún a ta ni co cávaha jáhma á. Joo mé a ndaa ná cahán i xihín ndo ña núchí chágá ita yóho nacaja Ndióxi a juú ga jáhma vaha ndiváha násandixi rey Salomón sanahá, dà nasahiin cuahá ñaha cuicá. <sup>28</sup> Candehé ndó ndaja ndáá vaha Ndióxi yucu ita vatí sín tóo a viti ta itáan cayí a jándihí sahá. Ta ndiyahvi chágá mé ndó a juú ga yucu ita. Joo co cándusa ndó ña candaá mé á ndohó. Ña cán quéa xíní ñuhu candeé ini ndó Ndióxi ña quiáhva tá quiáhva mé á jáhma candixi ndó. <sup>29</sup> Ta a ndícani ini ndó ndaja caja ndó ñéhe ndó ña cuxu ndó xihín ña coho ndó. <sup>30</sup> Jáchí ñayivi, na co xíní ichí cuénta Ndióxi, na cán cūú na ndícani cuahá ini sahá tóco ndihí ña yóho. Joo cùú ndó cuénta Ndióxi, mé a cùú tátá ndo ta xíní vaha mé a ña ndímaní nu ndó catacu ndó. <sup>31</sup> Joo ndítahan nu ndó ndiquáhva ndó mé ndó ndáhá Ndióxi ña ná cacomí a cuénta sahá ndo já quiáhva mé á nu ndo ña ndímaní nu ndo catacu ndó.

*Indiví cùú nu ndítahan ndaja tútú ñayivi  
ña vaha  
(Mt. 6:19-21)*

<sup>32</sup> A cágihví toho ndó jáchí mé ndó cíú ndó tátuhun ndicachi válí janá i. Mé a ndaa chá va cíú ndó joo cágii ini Ndióxi ña cómí a cuéntá sahá ndo. <sup>33</sup> Jícó ndó ña cómí ndo ta jásá ndó ñaha nuú na ndímaní ñaha nuú. Jáchí quiáhva já ndaja tútú ndó ñaha vaha indíví nuú cuhún ndo. Jáchí mé cán a ndíhi sahá ña vaha cómí ndo. Ta ni na cuíhná a cíú quiví na caja cuíhná ñaha ndó cán. Ta ni tiquiji a cuú jándihí rí sahá ñaha ndó cán. <sup>34</sup> Jáchí nuú nandaja tútú ndó ña ndáyahvi nuú ndo, cán coo ri ímíma ndo.

Náhá Jesú斯 ña xíní ñúhú canduu tighva ñayivi cuhún na xihín mé á

<sup>35</sup> Xíní ñúhú canduu tighva ndó candati ndó ndá hora ndicó coo tucu u quixi i ndiquehe e ndohó. <sup>36</sup> Xíní ñúhú cacuu ndó tátuhun mozo tá ndáti tighva da ndicó coo xitoho da, dä cuahán víco tándaha. Ndáti tighva da cuná dä yéhé nuú dä tá ná xínu coo da cani ndáha dä yéhé. <sup>37</sup> Tahví nacuu mozo tá co quíji da ndíu da tá ná xínu coo xitoho da. Mé a ndaa ná cahan i xihín ndo ña janda mé dä cíú xitoho da cán ndiquehe ñahá dä ta já cacoo da dä nuú mesa dä ta já chicáan da coho cuxu mozo da. <sup>38</sup> Coó caja toho a ña ná xínu coo xitoho da java ñuú tájí á tå sá yati tivi, tahví nacuu mozo cán tá ndíta da ndíu da tá naxinu xitoho da nuú dä. <sup>39</sup> Candehé ndo jáchí xíní ñúhú candaa ini ndó ña yóho. Tá xíní in dataa ndá hora cúní na cuíhná quihvi na vehe da já quéa a cíju dä jáchí ndáa vaha da vehe da já ná a quihvi na caja cuíhná ña ñaha vehe da. <sup>40</sup> Quiáhva já xínú ñúhú canduu tighva ri ndohó va jáchí quixi tucu yehe, da nachindahá Ndióxi ndú ñayivi mé quiví co cahán ndo quixi i -nacachi Jesú斯 xihín ná.

In mozo vaha xihín in mozo a vaha  
(Mt. 24:45-51)

<sup>41</sup> Anda já nandaca tühún Pedro Jesú斯 já nacachi da já xihín á:

— Á nuú ndehe cuití násacu ndó quiáhva yóho á násacu ndó ña nuú ndaja táchan ñayivi ndíu yóho.

<sup>42</sup> Anda já nacachi Jesú斯 já xihín dä:

— Ña cahán i yóho cahán i ña xihín da tacu ini, dä caja vaha ndusa. Cíú á tátuhun in mozo tá jándacoo xitoho da chuun ndáha dä ña ná quiáhva da cuxu na java ga cíú mozo xihín dä cán. Anda já náquee mé xitoho da cuahán dä. <sup>43</sup> Tahví nacuu mé mozo cán tá xínu coo xitoho da ta ndínehe

dä dä caja da chuun ña nacando nuú dä caja da. <sup>44</sup> Mé a ndaa ná cahán i xihín ndo ña quiáhva xitoho dä cán chuun nuú dä ña ná cacomí dä cuéntá sahá tóco ndihí ñaha cómí xitoho da. <sup>45</sup> Joo da cíú mozo yóho tá ná casáhá dä cahán dä ña cayáncá ndiváha xitoho da ndicó coo da ta sahá ña cán quéa cásahá da caja xíxi da xihín java ga na cíú mozo xihín dä cán. Ta já cása ga da cásahá xíxi da ta xihín da ta já xíni da. <sup>46</sup> Ta ndaja coo xínu coo xitoho mozo cán mé quiví co cahán da. Anda jáví jándoho quini xitoho dä cán ini da jáchí coó nacaja da ña ndítahan caja da. Ta ndoho dä yóho tá quiáhva ndóho tóco ndihí ná saá ini, mé ña co caja ña sáhndá xitoho na nuú ná caja na.

<sup>47</sup> Tá ná candaan ini mozo ña cúní xitoho da caja da joo coo tighva da caja da ña ta ni co cúní dä caja da ña sáhndá xitoho da nuú dä, dä cán cíú dä ndoho ndiváha ini. <sup>48</sup> Joo tá íin in mozo ta co cándaa vaha ini da ndá quéa cúní xitoho da caja da ta ndaja coo caja da in ñaha ña co tálhán ini xitoho da xihín já quéa chá cuití va ndoho ini da. Tá ná caja Ndióxi cuahá ñamáñi xihín in ñayivi já quéa ndítahan caja chúun cuahá ná nuú mé á. Ta tá sá cández ini ñayivi inga na já quéa ndinihu ñamáñi náhnu chágá caca na cán ña ná caja na xihín ná.

Caja Jesú斯 ña sáhndá java táchan ñayivi  
(Mt. 10:34-36)

<sup>49</sup> Yéhe naquixi i ñuyíví yóho cahnda java táchan i ñayivi já ná ñahá ña cúní cuhún xoo mí i xihín na co cúní cuhún xoo i. Ta ña yóho cíú á tátuhun naquixi i chicáan ñúhú i ñuyíví yóho. Ta cúní ña ná ndihí quíj chuun naquixi caja i yóho. <sup>50</sup> Vaxi quiví ndoho ndiváha ini i ta a juú quiáhva ndihí ini i ndáti xínu coo mé quiví jan. <sup>51</sup> A cahán toho ndó ña naxinu i ñuyíví yóho caja i ña ná coo vaha ini ñayivi. Ña vaxi yéhe caja i quéa ná cahnda java táchan na. <sup>52</sup> Jáchí viti xihín chí nuú cacuu a tátuhun canduu uhun ñayivi in vehe joo a cúní táchan na sahá yéhe jáchí ivi ña cacuu cuéntá mí i ta uní ña candaají yéhe. Á tá coó ta uní ña quihvi ini yéhe ta ivi ña candaají ri yéhe. <sup>53</sup> Ta jári dä cíú tátá cani táchan da xihín jahyi da sahá yéhe. Ta jári ndicuítá dataa cani táchan da xihín tátá da sahá yéhe. Ta jári najihí cani táchan na xihín jahyi jíhí na sahá yéhe. Ta jári najihí cani táchan na xihín náná ña sahá yéhe. Ta

jári ndicuítá najihí cani táhan na xihín sanú na sahá yéhe. Ta jári ndicuítá najihí cani táhan na xihín xojo na sahá yéhe —nacachi Jesús.

*Có cúní ñayivi candaq ini na yo cúú Jesús  
(Mt. 16:1-4; Mr. 8:11-13)*

<sup>54</sup> Anda já nacachi tucu Jesús já xihín ñayivi:

—Mé ndó tá xíní ndo ndicuita víco vaxi a nuu ndó chí xoo nu quéta cándii já cachí ndó ña cuun javí ta chí cíun ndusa dó.  
55 Ta tá xíní ndo vaxi tachi chí xoo sur já cachí ndo ña ihní ndiváha coo ta chí ihní ndusa sáhíjin. 56 Co cíúu ndó tá quiáhva ndáa ndó. Cándaa vaha ini ndó ña cíúu nuyíví ta cándaa ini ndó cahán ndó ndá quéa coo ta sándezhé ndó indíví. Joo co cíúu ndó cándaa ini ndó ña jáñahá i nu ndó.

*Ndítahan caja vaha ndó xihín ná co cúní  
ndohó*

(Mt. 5:25-26)

<sup>57</sup> Ndávaha co tává vaha ndó cuéntá ndíá quéá vaha ta ndíá quéá a váha. <sup>58</sup> Tá sácu ini na saha ndó cuhún ndó vecaa ta ndáca táhan ndó xihín ná cán cuahán ndó nuú na jutixia, xíni ñúhínducú ndó ndá quiahva ndique táhan maní tucu ndó xihín ná nani xíca ndó íchi cuahán ndó. Já quéá ná a cánehe ná cán ndohó cuhún ndó nu jujequé jáchi da cúu juéxe cán ndiquiahva da ndohó ndáha policía ta policía cán chicaan da ndohó vecaa. <sup>59</sup> Mé a ndaa ná cahán i xihín ndo ña tá ndácaan ndó vecaa jan chí a cána ndó janda quiahva ná chahvi ndihí ndó ña yícá ndo nuú da cán já janí da ndohó — nacachi Jesús xihín ná.

13

*Cáhan Jesús ñaq ndítahan jándacoo ñayivi  
cuachi cája na*

<sup>1</sup>Mé tiempo já naxiñu cõo java na ndicani na nu Jesú s sahá ña nasahní Pilato java dataa estado Galilea nani jóco dã nu Ndióxi. Ña cán quéa cachí na ña naçatáhan nií dã naxiñi xihín nii quíti, ri jóco dã. <sup>2</sup> Anda já nacachi Jesú já xihin ná:

—Á cáhán ndo ña naxihí da Galilea yóho sahá ña fín chágá cuachi da a juú ga java ga na Galilea.<sup>3</sup> A juú a já jáchi quiáhva já ndihí ri sahá ndóhó va tā ná a jándacoo ndó cuachi cája ndó.<sup>4</sup> Sanahá ndiváha já naxihí sahun uni taa jáchi nandicava in torre naní Siloé jata ná. Á cáhán ndo ña nandicava

torre cán jatá na yóho jáchi nasahui chágaa cuachi na a juú gá na ñuu Jerusalén. Joo co cuú á quiahva já.<sup>5</sup> Mé a ndaa ná cahan i xihin ndo ña quiahva já ndihi ri saha ndóhó va tá ná a jándacoo ndó cuachi cája ndó — nacachi Jesús xihin ná.

Sácú Jesús quiāhva sahá in titó ñuhú, dó co  
cána cuihi nuú

<sup>6</sup> Anda já násacu Jesús in quiāhva nū ná já  
nácacchi a já xihin ná:

—In dñataa najándeé da in titó ñuhú nu ñuhú dá. Ta tá nayaha tiempo já nasahan da sándehé dñ do ña á cána titó ñuhú nu do. Joo co mé rí nandiñehé dá.<sup>7</sup> Anda já nacachi da já xihín dñ ndáá ñuhú dá cán: “Candehé, sa naxinu uní cuia já cuití quixi i ndúcú y titó ñuhú nu yító yóho. Ta coó ñaha cána nu do. Vaha chágá ná cahndún do jáchi ndá chuun quéá candichi uun dó cája fánu dó nu ñuhú i”, nacachi da xihín dñ ndáá ñuhú dá cán.<sup>8</sup> Anda já nacachi da ndáá ñuhú dá cán já xihín dá: “Quiahva ndó ñamaní, xitoho i ña ná coo tóga gá do cuia viti ná játayi i ñuhú saha do ta ná chichaan loho i tata saha do.”<sup>9</sup> Ta xihín ña yóho jonáá cana cuíhi nu do. Ta tá coó ñaha cána nu dñ já cahnda ndó do tá cúní ndo”, nacachi mozo cán xihín xitoho da —nacachi Jesús.

Mé quivi ndíquehe ndéé ñayivi ndája vaha  
Jesús in ñá xíca tojo

<sup>10</sup>Ta ndaja coo in quívì ndiquehe ndéé ná já násandacaan Jesús veñihu jánhà tuhun Ndióxi nuý ñayivi. <sup>11</sup>Ta mé ini veñihu cán násandacaan in náñáhà, ná quíhvì sahun uní cuja. In íníma quini cúú rí naquihví ini ná ta nacaja rí ñá ná nditojo ná ta chí ni loho a cuý jándicaa ná mé ñá. <sup>12</sup>Tá naximi Jesús ñá já nacana mé á ñá já nacachi a já xihin ñá;

—Ndaja vāha i yohó viti —nācachi Jesús xihin ña.

<sup>13</sup> Anda já nachojó a ndáhá á jata ña chí mé hora já nandicaqá yiquí cuñu ñá ta nacasáhá ñá cája cahnu ñá Ndióxi.  
<sup>14</sup> Joo mé da cuú sácuha veñihu cán nacasáhá ndícuhe da jáchí nandaja vaha Jesús ñánhára cán mé quiví ndíquehe ndééna. Já nacasáhá cahí da cán já xihín ñayivi ndúu ini veñihu cán iá:

—Ín *iñu* quiví núná nu yó cája chúun í ta tañu quiví já cuu quixi ndó catátá ndo tá cúni ndó. Joo a quíxi ndó catátá ndo quiví ndíquehe ndéee yó —nacachi da xihin ná.

<sup>15</sup> Anda já nacachi Jesús já xihín dā sacuahá veñuhú:

—Co cútú ndó tá quiahva ndáa ndó. Cája mé ndó chuun quivi ndíquehe ndéé yo tá ndáxí ndó tindiquí á búrra janá ndó sáhan ndó jácoho ndó ri ticuui. <sup>16</sup> Ta viti candehé ndo nánáhá yóho. Cútú ná ná naquixi chichi Abraham ta sá fin sahún uní cuia naquehe cuehe ná nacaja Satanás, mé tiñáhá sacuahá. Ta mé ndó cáhán ndó ná a váha toho nacaja i ná najaní i nánáhá yóho ndáha cuehe ná nandithan nuú i janí i ná ndáha cuehe yóho coo caja toho a cútú á quivi ndíquehe ndéé yo —nacachi Jesús.

<sup>17</sup> Tá nacachi Jesús ná yóho chí a juú quiahva nacacahan nuú na co cúní Jesús cán. Joo tóco ndihi java ga ñayivi cán cajii ndivaha ini na jáchí naxini na ná caja Jesús ná náhnu ndivaha.

Sácu Jesús quiahva sahá in ndíquí mostaza  
(Mt. 13:31-32; Mr. 4:30-32)

<sup>18</sup> Tá nandihi já nacachi tucu Jesús já:

—Ná ndicani i nu ndó ndaja íin nu ndíquiahva ñayivi mé ná ndáhá Ndióxi ná ná cacomí a cuéntá sahá ná. <sup>19</sup> Cútú á tátuhun in ndíquí mostaza ná chíhin in dñataa nuú níhu dá. Ta mé ndíquí loho yóho sáhnu a janda quiahva ndúu a tátuhun in yitó cahnu nu xínu coo laa chójó ri táca ri nu ndáhá do —nacachi Jesús.

Sácu Jesús quiahva sahá ndaja caja yusá naxiaq tá quée a xihín harina  
(Mt. 13:33)

<sup>20</sup> Anda já nacachi tucu Jesús já:

—Ná ndicani i nu ndó ndaja íin nu ndíquiahva ñayivi mé ná ndáhá Ndióxi ná ná cacomí a cuéntá sahá ná. <sup>21</sup> Cútú á tátuhun tá cavaña na pan ta quée yusá naxaa xihín harina. Cútú á tátuhun tá cava tahan in nánáhá loho yusá naxaa xihín uní tahnadá náhnu harina ná ná jánañu a tóco ndihi mé yúsá cán —nacachi Jesús.

Táhán ndivgha yéhé nuú quihvi ñayivi cuhun na indívi  
(Mt. 7:13-14, 21-23)

<sup>22</sup> Nandiquehe Jesús íchi cuahán chí nuú Jerusalén ta ndijáá nuú náhnu xihín nuú válí nu yáha jánañu mé á tuhun Ndióxi cuahán. <sup>23</sup> Ta ndaja coo nandaca tuhun in da Jesús já nacachi da já xihín á:

—Xitoho í, á chá cuití va ñayivi cacu na cazu ndaa ínimá cuhun chí indívi —nacachi da xihín Jesús.

Anda já nanducú ñehe Jesús tuhun já cachí a já xihín dá:

<sup>24</sup> —Cútú á tátuhun íin in yéhé táchán loho nuú ndihvi ñayivi indívi. Ná cán quéa xíní níhu ndó ndihvi ini ndó ndihvi ndó chí yéhé loho cán jáchí cuahá ndivaha ñayivi ndítihvi na ná quihvi na joo a cútú quihvi na. <sup>25</sup> Jáchí tá quiahva fin in xitoho vehe quiahva já fin Ndióxi. Jáchí tá ná ndicoo da cútú xitoho vehe cán chícaji tuun da viti yéhé vehe da já xíní coo ndó cándichi ndó jata véhe cání ndáhá ndó yéhé já cache ndó já: “Á ndúyu ndó, xitoho i. Á a caja ndó níamani cuná loho ndó yéhé ná quihvi nde”, cache ndó xihín dá. Ta já nducú ñehe da cán tuhun nu ndó cache da já xihín ndo: “Cuáhán ndó jáchí co xíní toho i ndohó.”

<sup>26</sup> Ta já casáhá mé ndó cache ndó já xihín dá: “Cuahá tañu sa naxixi nde ta naxixi nde xihín ndo. Ta níi cayé ñuu nde naxixa nuu ndó nájánáhá ndó ñayivi.” <sup>27</sup> Anda já nducú ñehe da cán tuhun nu ndó já cache da já xihín ndo: “Sa nacahan vi xihín ndo ná co xíní toho i ndá ná cútú ndohó. Caxoo ndihi ndó nuú i jáchí cútú ndó ñayivi cája ndinuhu ná nuú.” <sup>28</sup> Ta cán ndusa quéa cuacu cóhó ndo ta casáhá cahñá níhu ndó xihín ná cojo ini ndó. Jáchí cán cuni ndó Abraham xihín Isaac xihín Jacob xihín tóco ndihi na profeta. Cuni ndó ná ndúu na indívi cán ta cómí Ndióxi cuéntá sahá ná. Ta a juú quiahva tahnadá ini ndó jáchí tavá xóo Ndióxi ndohó ná ná a ndihvi ndó nu ndúu na cán. <sup>29</sup> Jáchí xínu ñayivi ndúu ndijáá ñuyíví nu Ndióxi ta ndaca nduu na nuú cacomí Ndióxi cuéntá sahá ñayivi. <sup>30</sup> Ta mé quivi cán já cuni ndó java ñayivi, ná coo sahá mé nuú ñayivi ta nduu na ná fin chágá sahá nu Ndióxi. Ta cán cuni ndó java na ndínehe jíco mé viti ta a cóo toho sahá ná nu Ndióxi —nacachi Jesús.

Táhndá ini Jesús ta sácu a sahá ñayivi ndúu ñuu Jerusalén  
(Mt. 23:37-39)

<sup>31</sup> Mé quivi já naxiu coo java na fariseo nu Jesús já nacachi na já xihín á:

—Cuáhán inga nuú coún jáchí sácú ini Herodes cahní da yghó —nacachi na xihín á.

<sup>32</sup> Anda já nacachi Jesús já xihín ná:

—Cuáhán ndó cahán ndó xihín dā cátóó jándahvi ñayivi jan ta cachi ndó xihín dā ña tavá i ínimá quini ñíhu imi ñayivi ta ndája vaha i na quíhví ta caja tá caja i ña yóho janda quíahva ná xínu coo quíví jándihí i chuun yóho.<sup>33</sup> Joo sá mé Jerusalén jan quivi vi jáchí jan cíuñ nu sáhní na profeta. Ta viti ndítahan caca nuu yií vi íchí xíca i cuahán i yóho —nacachi Jesús.

<sup>34</sup> Anda já nacachi tucu Jesús já:

—Ndáhví nahá nacuu ndó, na ndúu ñuu Jerusalén. Jáchí sáhní ndó na profeta. Ta ndícuítá ndó cání ndó na nachindahá Ndióxi nu ndó xihín yuu. Cuahá ndivaha tañu cúní jánditaca ndihí i ndohó joo coó naxeen ndó. Cíuñ á tá quíahva caja nduxú tá játaca rí jahyi válí rí tixi ndíxí rí.<sup>35</sup> Ta viti cuni joho ndó ña cahán i xihín ndó. Vaxi quíví janí ndáha mé vehe ndó candoo a. Ta mé a ndaa ná cahan i xihín ndó ña a cúní ga ndó yéhe janda quíahva ná xínu coo quíví cachi ndó: “Cáhnu nahá ná cacuu dā vaxi cuéntá Ndióxi, xitoho i” —nacachi Jesús.

## 14

Tá nandaja vaha Jesús in da naquíhví cuiñu

<sup>1</sup> Ta ndaja coo in quívi ndíquehe ndéé ná já nasahan Jesús naxixi a vehe in da cíuñ sacuahá nuú na fariseo. Ta java ga na fariseo cán nácasáhá náni na Jesús ndíu na.<sup>2</sup> Ta mé yati nu Jesús cán nasahijin in dàtaa, dā naquíhví cuiñu yiíquí cuñu.<sup>3</sup> Anda já nandaca tühün Jesús na jánahá ley Moisés xihín na fariseo já nacachi a já xihín ná:

—Á núná nu yó ndaja vaha í in da quíhví mé quívi ndíquehe ndéé yo, á co núná toho nu yó caja í ña —nacachi Jesús xihín ná.

<sup>4</sup> Joo tájí nasahijin yuhú na cán. Anda já nandaja vaha Jesús dā quíhví cán já nacachi a xihín dā ña ná quee da cuhún da.<sup>5</sup> Ta já nacachi a já xihín ná fariseo cán:

—Mé ndó tá ndicava búrró a tñidiquí janando iní in tähví chí iyí laá tavá ndó rí. Ta coó caja toho a á cíuñ á quívi ndíquehe ndéé yo —nacachi Jesús.

<sup>6</sup> Joo coó nacuu nducú ñehe na tühun nu Jesús.

<sup>7</sup> Anda já naxini Jesús ña jandá joho ndacaxi na nñataca cán nuú vaha cacoo na já najánahá nu ná ndíva vaha chágá ndítahan caja na. Já nacachi a já:

<sup>8</sup> —Tá ná cana in na yohó cuhún in víco tándahá, a ndúcú tohún cacuñ nu sácoo na

náhnu. Jáchí cuu xínu coo in dā íin chágá saha a juú ga yóho.<sup>9</sup> Ta dā nacana yohó víco cán cuu cachi da já xuhun: “Quiahva nu íin coúñ jan ná cacoo dā yóho”, cachi da xuhun. Anda já cacahan nuún já queún cuhún cacuñ janda nu ndihí.<sup>10</sup> Ña ndítahan cajún quéa cacuñ janda nu ndihí. Já quéa tá ná xínu dā nacana yohó nu íún já cachi da já xuhun: “Amigo, cuáhán yaha nu ndúu na náhnu coún.” Xihín ña yóho ndindita jícún nuú na ndúu coo nu mesa xíxi xuhun cán.<sup>11</sup> Jáchí ndá na cája cáhnu mé, na cán cacuu na nanuu ndáha joho. Ta na co ndífehe jícó mé, na cán cíuñ na ndicahnu —nacachi Jesús.

<sup>12</sup> Anda já nacahan Jesús xihín mé dā nacana náhá cán já nacachi a já xihín dā:

—Tá ná cavaha cuahún ña cajáhnu na á ña cajíni na, a cáná tohún na cíuñ amigún jan ni na cíuñ ñanún jan ta ni a cáná tohún na cíuñ tähún ta ni a cánún na cuicá ndúu yati xuhun jan. Jáchí tá ná caja na víco cana ri na jan va yohó ta xihín ña jan tähnda cuéntá sahá ñamani nacajún xihín na cán.

<sup>13</sup> Ña ndítahan cajún tá ná cavahún in víco quéa canún na ndahví ta canún na réenco ta canún na cuáa.<sup>14</sup> Ta já cajíi ínúñ jáchí na cán a cíuñ toho caja na chágvi na ñamani nacajún xihín ná ñuyíví yóho. Joo vaxi quívi tá ná nditacu ñayivi nasañehe ínimá vaha ñuyíví yóho já chágvi Ndióxi ñamani nacajún jan —nacachi Jesús xihín ná.

Sácu Jesús quíahva sahá in dàtaa, dā nacana cuahá chá ñayivi ña ná cuhún na víco vehe da

(Mt. 22:1-10)

<sup>15</sup> Tá naxini joho in táhan dā íin coo nu mesa xihín Jesús cán ña yóho já nacachi da já xihín á:

—Tähví nacuu na ná ñehe tähví cuhún indíví ña ná cacomí Ndióxi cuéntá sahá ná —nacachi da xihín Jesús.

<sup>16</sup> Anda já nasacu Jesús in quíahva nu dā já nacachi a já xihín dā:

—In dàtaa nacavaha da in víco cáhnu ta nacana cuahá ndivaha da ñayivi.<sup>17</sup> Ta tá sá naxini coo hora cajíni na já nasañha da chuun nu mozo dā ña ná cuhún da cana da na ña quixi na ndaca nduu na nu mesa. Já nacachi da já xihín ná: “Naha quíndo jáchí sá nacandíví ndihí ñaha”, nacachi mozo xihín na cán.<sup>18</sup> Joo tóco ndihí na cán nácasáhá na cáhan na ña a cíuñ toho cuhún

na. Ta in táhan dā cán nácasáhá cachí dā já xihín mé mozo cán já: “Jacá náxeen uun i in níhu ta xímí níuhú cuhun i candehé e nū á. Cáhnu coo imún”, nácache da xihín mozo cán.<sup>19</sup> Ta inga da nácache da xihín mé mozo cán já: “Jacá náxeen e uhun yúntá tindiquí ta viti cúní cuhun i coto ndojó i ri. Cáhnu coo inún”, nácache da xihín mozo cán.<sup>20</sup> Ta inga tucu da nácasáhá cachí dā já: “Jacá náñandahá ví sahá ña cán quéa a cíu toho cuhun i”, nácache da xihín mozo cán.<sup>21</sup> Tá nándicó coo mozo cán nūú xitoho da já nándicani ndihí da nūú xitoho da ña nácache na cán xihín dā. Anda já nácasáhá nándicuehe xitoho dā cán já nácache tucu da já xihín mozo da: “Ta viti cuáhán camún ndijáá cayé nūu játacún na ndahví xihín na réncó xihín na cuáa. Cañehún na quisún yóho ná cuxu na”, nácache xitoho dā cán xihín dā.<sup>22</sup> Tá nándihí já náshañ mozo cán já nácaja da ña nácache xitoho da xihín dā. Ta tá nándicó coo da já nácache da já xihín xitoho da: “Sa nácaja i tá íin náshanda ndó nūú i. Joo yójó tá yójó nūú cuu canduu chágaa na”, nácache da xihín xitoho da.<sup>23</sup> Anda já nácache xitoho da já xihín dā: “Cuáhán ndijáá cayé xihín ndijáá íchí ta xihín ña ndúsá játacún na ña ná quixi na já ná chutú vehe e.”<sup>24</sup> Jáchí ni in túhún toho táhan na nácaná i quixi vehe e nū cuítí cán, a quíxi ga na cajíni na ña nácatáhan vehe e”, nácache da xihín mozo dā —nácache Jesús.

*Dítáhan jándacoo índá ña ndáy়hvi nu yo tá tā mé a ndaq cúní yó candicó yó Jesús (Mt. 10:37-38)*

<sup>25</sup> Cuáhá ñayivi ndíco na játá Jesús cuáhán na. Anda já nándicó coo játá nūu Jesús já nácache a já xihín ná:

<sup>26</sup> —Ndá na cúní jácuaha xihín i xímí níuhú quihví ini chágaa na yehe a juú ga tátá na xihín náná na. Ta xímí níuhú quihví ini chágaa na yehe a juú ga nájihí na á jahyi na á ñani na á quiahva na. Ta xímí níuhú quihví ini chágaa na yehe a juú ga mé ná.<sup>27</sup> Ta ndá na co ndíco yehe sahá ña yihví na quivi na, mé a ndaa coó sahá toho na cacuu na cuéntá yehe.<sup>28</sup> Tá cúní ndó caváha ndó in vehe jícó ña cája ndó quéa tavá vaha da ndó cuéntá ña á queta jiuhún ndó á a quéta já ná jáxínu ndó ña.<sup>29</sup> Jáchí tá ná a tavá jihna ndó cuéntá ta casáhá ndó caváha ndó vehe ndó joo tá nándihí co quéta ga jiuhún ndó ña nájáxínu coo ndó ña já quéa cacahan nūu ndó jáchí

casáhá ñayivi cuacu ndaa na ndohó.<sup>30</sup> Já cache na já xihín ndo: “Taa jan nácasáhá dā caváha da vehe da joo coó nácuu jáxínu dā ña”, já cache na cuacu ndaa na ndohó —nácache Jesús.

<sup>31</sup> Anda já nácache tucu Jesús já:

—Tá ná cani táhan in rey, dā cómí uxu mil soldado xihín inga rey, dā cómí oco mil soldado já quéa xímí níuhú ndicani vaha ini da ña a cuu quee vaha da xihín dā inga rey cán tá ná quihvi táhan da xihín dā.<sup>32</sup> Ta tá náñavá vaha da cuéntá ña a cuú quee vaha da xihín rey, dā cómí oco mil soldado cán jánda xícá va íin da já chindahá dā java nataa ña ná cuhun dā caca dā ñamaní nūú inga rey cán ña ná ndico va tondohó.<sup>33</sup> Quiahva já íin ri xihín ndohó va. Ndá ndohó, na co cúní jándacoo tóco ndihí ña cómí ndo sahá yehe já quéa coó sahá toho ndó cacuu ndó cuéntá yehe —nácache Jesús.

*Cáhán Jesús ña tá jándacoo ñayivi íchí cuéntá mé a cíu ná tátuhun ñii, ña co óhva ga (Mt. 5:13; Mr. 9:50)*

<sup>34</sup> Anda já nácache tucu Jesús já:

—Ña vaha ndiváha cíu ñii yívi na joo coó chuun toho a tá co óhva ña.<sup>35</sup> Mé ñii, ña co óhva ga jan ni co vaha ña jácana í nū níuhú yo jáchí co ndáhá toho níuhú yo cája ña. Ña cája na xihín ñii jan quéa sáta va na ña. Ña íin joho, ná cuni joho na —nácache Jesús.

## 15

*Sácu Jesús quiahva sahá in ndicachi, rí nándiñuhú*

*(Mt. 18:10-14)*

<sup>1</sup> Cuáhá na játaca jiuhún cuéntá impuesto xihín cuáhá na cája cuacchi nácasáhá na cayati na nū íin Jesús jáchí cúní na cuni joho na nū cáhan mé á.<sup>2</sup> Sahá ña cán quéa nácasáhá na fariseo xihín na jánahá ley Moisés cáhan nūu na sahá. Já cachí xihín táhan na já:

—Taa jan ndíquehe vaha da ñayivi cája cuacchi ta xixi da xihín ná —cachí xihín táhan na cán.

<sup>3</sup> Anda já náshañ Jesús in quiahva nu ná já nácache a já xihín ná:

<sup>4</sup> —Mé ndó tá cómí ndo in ciento ndicachi ta tá in cuití ndiñuhú in ndicachi jana ndo ña cája ndó quéa jándacoo ndó comí jíco sahun comí ri cán yúcu ta já quée ndó cuáhán ndó ndinducú ndó ri nándiñuhú cán jánda quiahva ndiñehé ndó ri.<sup>5</sup> Ta tá

ndiñehé ndó ri já cávatá ndó já quéhe ndó ri chíñú ndó ri sahá ji<sup>quí</sup> ndó vaxi ndó. <sup>6</sup> Ta tá xínu coo ndó vehe ndó já játaca ndó ñani táhan ndó xihín na xíní táhan xihín ndó. Já casáhá cächí ndó já xihín ná: “Xíní ñuhú cajíi íní ndó xihín i jáchi cajíi íní i sahá ña nandiñehé e ndicachi janá i, rí nandiñuhú cán”, cächí ndó xihín ná. <sup>7</sup> Mé a ndaa ná cahan i xihín ndó ña quiahva já ta janda chágá ví cajíi ini na ndúu indívá táchandaco in ñayivi cuachi cája na a juú ga sahá comí jíco sahun comí ñayivi, na cája tá cája ña vaha.

*Sacú Jesús quiahva sahá in jiuhún, ña nandiñuhú*

<sup>8</sup> Ta viti ná cahan tucu u inga quiahva xihín ndó. In ñáñáha nasahíin uxu jiuhún caa ña yahvi ndivaha nu ña. Ta tá ndiñuhú in táhan ña cán já ndicahmi ñá ñuhú ta tihví ñá vehe ñá jáchi ndíhi ini ñá ndínducu ñá ña ta vií vií ndínducu ñá ña janda quiahva ná ndiñehé ñá ña. <sup>9</sup> Ta tá sa nandiñehé ñá ña já játaca ñá ñani táhan ñá xihín na xíní táhan xihín ña já casáhá cächí ña já xihín ná: “Xíní ñuhú cajíi íní ndó xihín i jáchi cajíi ini i sahá ña nandiñehé e jiuhún i, ña nandiñuhú”, cachi ñá cán —nacachi Jesús.

<sup>10</sup> Anda já nacachi tucu Jesús já:

—Mé a ndaa ná cahan i xihín ndó quiahva já cajíi íní tátó Ndióxi ndúu indívá táchandaco in ñayivi cuachi cája na —nacachi Jesús.

*Tá najándaco in dätaa tátá da ta naquee da cughan xícá da*

<sup>11</sup> Anda já nasacu Jesú in quiahva nu ná já nacachi a já:

—In dätaa nasahíin ivi jahyi taa da. <sup>12</sup> Ta dä loho chá cán nacachi da já xihín tátá da: “Taá i, á a váha ná ndicahnda va ndó ñaha cómí ndó já ná ndiquehe e ña cání nuú i ndiquehe e”, nacachi dä cán xihín tátá da. Anda já nasahnda java tátá da ñaha, in táhndá naquehe mé dä ta in táhndá naquehe ñani da. <sup>13</sup> Ta chá va quívi ñayaña já najicó ndihi da loho chá cán ñaha ña nañehé dä nu tátá da ta xihín jiuhún nacana cán naquee da cuahan xícá ndivaha da chí ñuu tóho. Ta cán nacásahá da játiví ndaja nacuu joho da jiuhún dä ña cája da ña núu.

<sup>14</sup> Ta tá sa najátví ndihi da jiuhún dä já nañinu in tamá ndee ndivaha mé nu fin da cán. Já nacásahá naxinu joco nu dä ta nacásahá cuíco da. <sup>15</sup> Anda já naquee da

nasahan dä ndúcú dä chuun caja da nuú in dätaa mé nu íin da cán. Ta nasahan dä cán chuun nu dä ña ná cuhun dä canda da cónchí janá dä cán. <sup>16</sup> Ta tá cúní coo ndiaava já cúní coo ña sáxi cónchí cán. Ta chí caxí dä ña cán janda quiahva chutú tixi da cúní da. Joo co sahan na ña nu dä. <sup>17</sup> Anda já nacásahá dä ndícani ini da já nacahán dä já: “Cuáha chá mozo táchan na cája chún nu tátá i chí yójó joho ñaha xífxáhan na ta yóho xihí va yehé joco fin i. <sup>18</sup> Ña caja i quéa ndicó coo tucu u nu fin tátá i ta já cachí i já xihín ná: Tátá maní i, nacaja i cuachi nu Ndióxi ta nacaja ri cuachi nu ndóhó va. <sup>19</sup> Ta chí coó sahá mí ví cacuu u jahyi ndó sahá ña nacaja i. Ndiquehe ndó yehé ná cacuu u tátuhun in mozo va ndó, já cachí i cuhun i nu tátá i”, nacahán da. <sup>20</sup> Anda já naquehe da íchi cuanuhú dä vehe tátá da.

“Ta janda xícá va vaxi da já nañini tátá dä mé dä já nandicuni a dä. Ta natahvi ini a sahá dä. Já xínu a nasahan ñehé a da já nañumi a dä ta nañatí yúhu á sajóho da.

<sup>21</sup> Anda já nacachi da já xihín tátá da: “Tátá maní i, nacaja i cuachi nu Ndióxi ta nacaja ri cuachi nu ndóhó va. Ta chí coó sahá mí i cacuu u jahyi ndó”, nacachi da xihín tátá da. <sup>22</sup> Ta ndaja coo tátá da nacásahá cáhan xihín java ga mozo já nacachi a já xihín ná: “Cama ndó ta tavá ndó jahmá, ña vaha ta jácandixi ndó jahyi i. Ta chican ndó in jéhe nducu ndáhá dä. Ta chican ndó nduya sahá dä. <sup>23</sup> Ta cañehe ndó chélo, ri ndató nandaha jan já ná quívi rí cuxú jáchi caja i in víco viti. <sup>24</sup> Jáchí jahyi i yóho tá naquee da cuahan dä nacahán i naxihi da. Joo viti nandicó coo da nuú i. Sahá ña cán cíuú á tátuhun nanditacu tucu da. Nasacuu da tátuhun dä nandiñuhú joo viti nandeeva da”, nacachi tátá dä cán. Anda já nacásahá na cája na víco.

<sup>25</sup> Joo ndaja coo dä cíuú ñani da, dä sacuahá chágá cán, ndácaan dä cája chún da yúcu va. Ta tá nandicó coo da já nañini joho da tíví musica ta cáxita sahá na.

<sup>26</sup> Anda já nacana da in dä cája chún cán já nandaca tühún ñahá dä ndíá cíuú. <sup>27</sup> Anda já nacachi da cája chún cán xihín dä: “Cíuú víco jáchi nandicó coo ñanún. Ta nacahnda tátún chuun ña ná quívi chélo, rí ndató nandaha cán jáchi cajíi íní ña ña nacasa vaha ñanún ta coó a nandoho da”, nacachi dä cán. <sup>28</sup> Joo ndaja coo dä sacuahá cán

najoo da ta chí coó naxeen da quihvi da nu cíu víco cán. Sahá ña cán naqueta tátá dà jata véhe já cáhan ndahví a xihín dà ña ná quihvi da.<sup>29</sup> Anda já nacasaáhá cachí dà já xihín tátá da: “Tá i, sa cándaa vaha ini ndó ña sa cuahá ndiváha cuiá cája chún i nu ndo ta caja i tóco ndihi ña sáhndá ndó nuú i caja i. Joo ni in tühún toho tañu coó nacasaan ndó ni in tijúhu loho nuú i ña ná caja i in víco loho cuxu u xihín na xín táhan xihín i.<sup>30</sup> Joo viti nacahní ndó chélo, rí ndató nandaha jan, ña cája ndó víco jáchí nacasaan ñani i jan. Ta mé dà jan naxixa nuu da najatíví ndaja nacuu da jiuhún ndó xihín najihí xíca jií”, nacachi da cán xihín tátá da.<sup>31</sup> Anda já nacachi tátá dà já xihín dà: “Candehé jáhyi a. Mé a ndaa nií tiempo fún xihín i. Ta ñaha mé vún cíu ndihi ña fin nuú i.<sup>32</sup> Joo mé a ndaa nditahan nu yo caja i víco ta cajíi íni yo viti jáchí nandicó coo ñanún, mé dà nacahán yo ña naxihí. Ta viti nacasaan dà cíu á tátuhun nanditacu tucu da. Nasacuu a tátuhun nandiñuhú dà joo nandínehe yó dà viti”, nacachi a cán xihín jáhyi a —nacachi Jesús.

## 16

*Ndínda chuun ndáha in mozo jáchí coó nacaja vaha da nuú xitoho da*

<sup>1</sup> Anda já nacacu tucu Jesús inga quiahva nuú na xíca tuun xihín á. Já nacachi a já xihín ná:

—Nasahíin in taa cuicá ta nasaíjin in da ndáá ñaha da. Joo java ñayivi nasaíhan na chicaan na cuachi jata dà nuú xitoho da ña játíví ndaja nacuu joho da ña cíu ñaha xitoho da.<sup>2</sup> Anda já nacana xitoho da mé dà já nacachi da já xihín dà: “Joho cachí ñayivi naquixi na cáhan na sahun sahá ña cán quéa táxi i cuénta nuun ña ndicanún nuú i ndaja cá chuun nacajún jáchí ndindaa chuun ndáhun ta a cácuu gaún da ndáá ñaha i”, nacachi xitoho da cán xihín dà.<sup>3</sup> Anda já nacasaáhá dà cíu mozo cán ndícani ini da já nacahán da já: “Ndíá caja i viti jáchí ndindaa va chuun ndahá i caja xitoho i. Ta co ndéé toho i caja i chuun vee. Ta tá ná caca nuu i cuati i ta cacahan va nuú i.<sup>4</sup> Sa xín vi ndíá caja i já ná ndiquehe vaha ñayivi yehe vehe na tá ná ndindaa chuun ndahá i caja xitoho i”, nacahán da.<sup>5</sup> Anda já nacana da tá in tá in na yícá nuú xitoho da. Ta tá naxinxu dà nu cuítí cán

nu dà já nandaca tühún ñahá dà já nacachi da já xihín dà: “Ndaja yícún nuú xitoho i”, nacachi da xihín dà yícá cán. <sup>6</sup> Já nanducú ñehe dà cán tühun já nacachi da já: “In ciento lata sití yícá i nuú xitohún”, nacachi dà cán xihín dà. Anda já nacachi dà cíu mozo cán já xihín dà: “Candehé nu tutu yóho ndáá ndaja yícún nuú xitoho i. Joo cacoo quíjan ta cahyí ña yícún iví jico uxu lata sití cuítí va”, nacachi mozo cán xihín dà yícá nuú xitoho dà cán. <sup>7</sup> Tá nandihí já nandaca tühún dà inga dà yícá nuú xitoho da já nacachi da já xihín dà: “Ta yóhó ri ndaja yícún nuú xitoho i”, nacachi da. Anda já nanducú ñehe dà yícá cán tühun nu dà já nacachi da já xihín dà: “In ciento maquila trigo yícá i nuú dà”, nacachi dà cán. Anda já nacachi tucu dà ndáá ñaha cán já: “Candehé yóho ndáá ndaja yícún. Joo cacoo quíjan ta cahyí ña yícún comi jico maquila trigo cuítí va”, nacachi dà ndáá ñaha cán xihín dà. <sup>8</sup> Tá nandihí já nacachi xitoho da xihín dà ña mé a ndaa cíu dà in dà ndichí jini jáchí xihín ña nacaja dà cán candoo vaha da nuú ñayivi yícá nuú xitoho da vatí coó nacaja vaha da nuú xitoho da —nacachi Jesús xihín quiahva sacú a nuú na xíca tuun xihín a cán.

Anda já nacachi tucu a já xihín ná:

—Ñayivi cátóó canduu vaha ñuyíví yóho xíní vaha chágá na ndaja caja na candoo vaha nu táhan na a juú ga na sa xíca íchi cuénta Ndióxi.

<sup>9</sup> Ñayivi ndúu ñuyíví yóho caja na ña nuú xihín ña cómí na. Joo ndóhó, xíní ñúhú caja ndó ndinuhu ña vaha xihín ña cómí ndo. Jáchí ña jan quéa cúní Ndióxi caja ndó. Jáchí tá ná xinu quívi quívi ndó já ndiquehe vaha na ndóhó indívi sahá ña nacaja vaha ndó xihín ña nasaomí ndo.

<sup>10</sup> Ta ndá dà xihín ndinuhu ini ndáá da ñaha da vatí loho cíu á quiahva já caja ri da candaan da ñaha da tá cuahá cíu á. Joo ndá dà co ndáá da ñaha da xihín ndinuhu ini da vatí loho cíu á quiahva já a cándaa vaha da ñaha da tá cuahá cíu á.<sup>11</sup> Ta tá co ndáá vaha ndó ñaha ñuyíví yóho já quéa ni Ndióxi a quiahva toho a ñaha cuénta indívi nu ndo jáchí a cátiahva ndó candaan ndó ña.<sup>12</sup> Ta tá co tiáhva ndó candaan ndó ña nacasaan tóo inga na nu ndo, náha ña a cíu ndiquiahva na ña cacuu ñaha mé ndó nu ndo jáchí a cátiahva ndó candaan ndó ña.

<sup>13</sup> 'Ni in túhún toho mozo a cíu caja chúun nuú ivi xitoho. Jáchí candají dä in xitoho da ta inga xitoho da quihví ini chágá dä. Á tá coó ta caja ndíví vaha da chuun nuú in xitoho da ta inga dä cán a cája chúun vaha da nuú. Ta quiahva já íín ri xihín ndóhó va jáchí a cíu caja cáhnu ndó Ndióxi tá chínúu ndó ínímá ndó játá jiuhún ndo – nacachi Jesús.

<sup>14</sup> Ta nuú cáhan Jesús cán ndítá na fariseo, na cátóo ndivaha jiuhún taaa joño na nuú cáhan mé á. Ta nacasáhá na sácu ndaa na Jesús. <sup>15</sup> Anda já nacachi Jesús já xihín ná:

—Cája ndó tátuhun cíu ndó ñayivi vaha nuú ñayivi joo sa xíni vaha Ndióxi íníma ndo. Ndá ña cáhví ini ñayivi ndáyahvi chágá, ña jan quéa co ndáyahvi nuú Ndióxi –nacachi Jesús xihín ná.

Ndítahan nuú ñayivi caja na ña nasañhnda Ndióxi anda quiahva ná naá saha ñuyíví xihín indíví

<sup>16</sup> Anda já nacachi tucu Jesús já:

—Janda tá cámaní xínu Juan, da nacaja ndútá ñayivi já nasañjin ley Moisés xihín ña najánahá na profeta sanahá. Joo viti ndijáá ndícuíta nuu tuhun Ndióxi cuahán ña vaxi quívi cacomí Ndióxi cuénta sahá ñayivi. Ta ndá na cúní ndiquiahva na mé ná ndáha Ndióxi ndítahan nuú ná ndíhi ini na ndíhi na íchí cuénta mé á.

<sup>17</sup> Joo janda quiahva ná naá saha ñuyíví xihín indíví ndítahan nuú ñayivi caja na tóco ndíhi ña sáhndá ley. Jáchí janda vaha chágá íín a ná ndíhi sahá ñuyíví xihín indíví a juú ga ña ná ndíhi sahá in túhún tuhun ndácaan nuú ley Moisés –nacachi Jesús.

Tá jándacoo táhan na sa ngatandahá  
(Mt. 19:1-12; Mr. 10:1-12)

<sup>18</sup> Anda já nacachi tucu Jesús já:

—Tá jándacoo in dataa nájíhlí dä ta tándahá dä xihín inga ñáñáha já quéa cája da cuachi nuú Ndióxi. Ta ndá da tándahá xihín in ñáñáha, ñá najándacoo yíí, cája ri dä cán va cuachi nuú Ndióxi –nacachi Jesús.

Ña nandoho in dä cuicá xihín ña nandoho in dä nani Lázaro

<sup>19</sup> Ndfícani Jesús nuú ñayivi já nacachi a já xihín ná:

—Nasañjin in dä cuicá ta a juú quiahva vaha jáhmá nasandixi da ta chí a juú quiahva ñúchí nacaja cutú dä vehe da jáchí ndijáá níí quívi nasaçaja da víco nuú xixáhan

cuicá ndivaha da. <sup>20</sup> Ta nasañjin in dä ndahví naní Lázaro. Quívi dä ta ndóhó da cuéhe ndíhi táchí. Ta ndahví cíaa dä íín coo da nuú ñúhu yuyéhé dä cuicá cán. <sup>21</sup> Ta mé dä ndahví yóho cúní dä jáchutú dä tixi da xihín ña ndicava nuú mesa dä cuicá cán. Ta xihín ña ndee quívi dä ndahví yóho chí janda tina xínu coo rí yáco ndaa rí nuú ndíhi nanana níí dä cán. <sup>22</sup> Ta ndaja coo in quívi naxihi dä ndahví cán. Já naxinu tátó Ndióxi já néehe na dä cuahán dä coo da indíví nuú íín Abraham. Ta jári dä cuicá cán va naxihi dä ta nasahan ná najánduxu ná dä.

<sup>23</sup> Ta nani ndóhó ini dä cuicá cán ndácaan dä indayá já nandiñeha da nuú dä. Já naxini xíca dä Abraham. Ta naxini da íín Lázaro xihín dä. <sup>24</sup> Anda já nacasáhá da cuicá cán cayuhú dä já nacachi da já: “Tátá Abraham, candahí loho ini ndó yehe. Ta ná chindahá ndó Lázaro ná quixi da yóho quiahva loho da ticuij jándaxi loho da yaá i jáchí ndóhó ndivaha ini i indayá yóho nuú cayí ñúhu ita.” <sup>25</sup> Anda já nacachi Abraham já xihín dä: “Jahyi a, xíni ñúhu ndicuhun inúñ ña vaha ndivaha nasañjin ñuyíví. Ta Lázaro yóho ndahví ndivaha nandoho da ñuyíví sahá ña cán quéa co ndóhó ga ini da yóho viti nani ndóhó inúñ jan viti. <sup>26</sup> Ta a cíu saa toho Lázaro nuú íún jan jáchí íín in táchí cúná ndivaha tañu ndehe, ná ndúu xoo chóho xihín ndóhó, ná ndúu xoo chí jan. Sahá ña cán quéa a cíu cuhun ná ndúu xoo chóho chí jan ta ni na ndúu xoo chí jan a cuú quixi xoo chóho”, nacachi Abraham xihín dä cán. <sup>27</sup> Anda já nacachi dä cuicá cán já xihín Abraham: “Tá tå já ta caja loho ndó namaní, tátá Abraham ña ná chindahá loho ndó Lázaro ña ná cuhun dä vehe tátá i <sup>28</sup> ná cahán loho da xihín ná vehe e. Jáchí ndúu uhun ñani i ta co cúní i ña ná quixi ña cán yóho ndoho ini na tá quiahva ndóhó ini i viti”, nacachi dä cuicá cán xihín Abraham. <sup>29</sup> Joo nanducú néehe Abraham tuhun nuú dä já nacachi da já xihín dä: “Sa íín va ley nacahyí Moisés xihín ña nacahyí ná profeta nyú ná cán. Vaha va ná caja na ña cáchí a”, nacachi Abraham xihín dä. <sup>30</sup> Anda já nanducú néehe dä cuicá cán tuhun nuú Abraham já nacachi da já xihín dä: “Mé a ndaa quéa cahán ndó jan, tátá Abraham. Joo vaha chágá ná chindahá ndó in táchí ná sa naxihi já ná cahán ná xihín ñani i já ná jándacoo cama na cuachi cája

na”, nacachi da xihín Abraham. <sup>31</sup> Anda já nacachi tucu Abraham já xihín dá: “Tá co cúní ñanún caja da ña nacahyí Moisés xihín ña nacahyí na profeta quiáhva já a cándusa toho ri na ndiquehe vaha na in ndii tá ná nditacu a cuhun a cahán xihín ñanún”, nacachi Abraham xihín da cuicá cán —nacachi Jesús xihín ñayivi.

## 17

*Tá jácghán táhan ñayivi caja na cuachi  
(Mt. 18:6-7, 21-22; Mr. 9:42)*

<sup>1</sup> Anda já nacachi Jesús já xihín na xíca tuun xihín á:

—Níí tiempo quixi ñaha ña cája ña ná ndicají ini ñayivi caja na cuachi. Joo ndáhví nacuu na tá ná jándicava na inga na nuú cuachi. <sup>2</sup> Janda vaha chágá ná candico in yuú yojó jíco ná ta ná ndihi sahá ná cahá tañuhú a juú ga ña jándicava na ná ndáhví yóho nuú cuachi. <sup>3</sup> Cuénta coo ndó xihín ña cája ndó.

Tá ná caja ñani táhan ndó cuachi nu ndo, jánani ndó dä. Ta tá ná tahvi ini da sahá cuachi nacaja da, caja cahnu ini ndó sahá dá. ‘Ta vatí usa táchndá ná caja da cuachi nu ndo in quiyí ta já vaxi tucu da nu ndo usa táchndá ta já cásáhá cachí tucu da xihín ndo ña a ndicó coo ga da caja da ña já ndítahan nu ndó caja cahnu ini ndó sahá dä —nacachi Jesús.

*Cúní na xíca tuun xihín Jesús candeé cahnu chágá ini na mé á*

<sup>5</sup> Tá nandhi já nacachi na xíca tuun xihín Jesús cán já xihín á:

—Vá ná caja ndó ña ná candeé chágá ini nde ndohó —nacachi na xihín á.

<sup>6</sup> Anda já nacachi Jesús já xihín ná:

—Tá ná candeé ini ndó yehé vatí cuú á tátuhun in ndiquí mostaza cuu cachi ndó xihín in yíto cahnu ña ná cuhun dó candichi dó ini tañuhú ta chí já ndusa coo.

*Ña ndítahan caja in da nuú xitoho da*

<sup>7</sup> Tá íin in mozo ndo ta chindahá ndó dä yúcu ña ná tiin da yata á candaas da quíti jana ndo ta tá ná ndicó coo dä cán já ama ná cachi ndó xihín dä ña ná yaha da cacoo da nu mesa cuxu da. <sup>8</sup> Ña caja ndó quéa cachi ndó já xihín dá: “Jácatáhan ñaha ná cajíni i ta caja ndíví ná cuxu u. Ta tá sá nandhi naxixi i já cuxu mún tá cúnun”, ña jan va quéa cahán ndó xihín mozo ndo. <sup>9</sup> Ta ama

ná ndiquiahva ñayivi ndixahvi nu mozo na tá nandhi nacaja da in chuun nasahnda na nu dá caja da. <sup>10</sup> Ta quiáhva já ndítahan coo ri xihín ndóhó va. Tá ná ndihi nacaja ndó tocó ndihi chuun nasahnda Ndíoxi nu ndo já ndítahan nu ndó cachi ndó já: “Mé nde cúu nde mozo coó sahá ta nacaja cuití va nde chuun ndítahan nuú nde caja nde”, já ndítahan cachi ndó —nacachi Jesús xihín na cán.

*Tá ngndaja vaha Jesús uxu taa ndóho cuéhe táchyi*

<sup>11</sup> Ta nani xíca Jesús cuahan chí ñuu Jerusalén já nayaha chí xoo nu íin lindero na Samaria xihín na Galilea. <sup>12</sup> Ta tá naxinu coo a in ñuu loho já naqueta uxu taa ndóho cuéhe táchyi nu á joo násacuita xíca dä nu á. <sup>13</sup> Já nacasáhá cayuhú dä nu Jesús já nacachi da já xihín á:

—Jesús, maestro, candáhví loho ini ndó ndehe —nacachi da xihín Jesús.

<sup>14</sup> Tá naxini Jesús ndíshuxu dä cán já nacachi a já xihín dä:

—Cuáhán ndó nahá ndó mé ndó nuú na cuú jutu —nacachi Jesús xihín dä.

Ta nani xíca ndihi da cuahan da nandiví yíquí cuídu da ta nandindaa cuéhe dä. <sup>15</sup> Ta ndaja coo in táhan ndíshuxu dä cán tá naxini da ña nandiví yíquí cuñu da já nacavatá ndivaha da. Ta nacasáhá dä caja cahnu da Ndíoxi cayuhú cóhó dä já nandicó coo da nu Jesús. <sup>16</sup> Já nacaxítí dä nu á janda quiáhva naxinu taan da nu níuhu jáchi ndiquiahva ndivaha da ndixahvi nu á. Ta mé datqa yóho cuú dä dä Samaria. <sup>17</sup> Anda já nacachi Jesús já xihín dä:

—Uxu cuú dä nandivaha nacaja i. Joo in da cán coó naxeen toho da ndicó coo da ndiquiahva da ndixahvi nuú i. <sup>18</sup> In túhún dä tóho yóho cuití va cuú dä nandicó coo ndiquiahva ndixahvi nu Ndíoxi —nacachi Jesús.

<sup>19</sup> Anda já nacachi Jesús já xihín datqa cán:

—Candichi ta cuáhán. Nandivahún jáchi nacandúsún yehé —nacachi Jesús.

*Ndaja coo tá ná xinu coo quíví cacomí Ndíoxi cuénta sahá ñayivi*  
(Mt. 24:23-28, 36-41)

<sup>20</sup> Ta ndaja coo na fariseo nacasáhá na ndáca tuhún na Jesús ña ndá ama casáhá Ndíoxi cacomí a cuénta sahá ñayivi. Anda já nanducú ñehe Jesús tuhún nu ná já nacachi a já xihín ná:

—A cùu cuni ndó nuú cacomí Ndióxi cuéntá sahá ñayivi.<sup>21</sup> Coó toho ñayivi cachi xihín ndo: “Yóho íin a”, á “Cáa íin a.” Mé a ndaa ná cahan i xihín ndo sa naxinu va quivi ta viti tañu mé ndó nacasáhá cómí Ndióxi cuéntá sahá ñayivi —nacachi Jesús xihín na fariseo cán.

<sup>22</sup> Anda já nacasáhá cachí a já xihín na xica tuun xihín á:

—Vaxi quivi tá cúní ndó cuni ndó yehé, dà nachindahá Ndióxi nduu ñayivi vatí ná coo i in quivi cuití va. Joo a cóo toho i xihín ndo.<sup>23</sup> Ta queta ñayivi cachi xihín ndo: “Yóho íin da.” Á tá coó ta cache na xihín ndo: “Cán íin da”, cache na xihín ndo. Joo coto a cuhun ndó candehé ndo. A cándico ndó jata ná cuhun ndo.<sup>24</sup> Jáchí tá ná xinu ndusa quivi quixi yehé já cuni ndó quixi i tá quiáhva quixi tasa. Ta ndijáa ñayivi cuni na ndá quiáhva ndiyehé e tá xoo tá xoo. Quiáhva já coo tá ná xinu quivi quixi yehé, dà nachindahá Ndióxi nduu ñayivi.<sup>25</sup> Joo jihna ñúhú ndítahan nuú i ndoho ndivaha ini i. Ta a juú quiáhva candají ñayivi ndúu tiempo viti yehé.<sup>26</sup> Tá quiáhva nasañin tiempo tá nasañin Noé sanahá quiáhva já coo ri tá ná xinu coo quivi quixi ri yehé, dà nachindahá Ndióxi nduu ñayivi.

<sup>27</sup> Jáchí mé tiempo cán xíxi na ta xíhi na ta cája na vicó tándahá janda quiahva naxinu quivi naquihvi Noé ini barco cahnu. Já naxinu javí quíni ndivaha ta najahvi ñuyíví xihín ticuú já naxihí ndihí ñayivi nasañandu tiempo cán.<sup>28</sup> Ta quiahva já nasañin ri mé tiempo tá nasañacu Lot sanahá. Jandá johó cáxixi ñayivi ta jandá johó cáxihí na ta jandá johó xéen na ñaha ta jandá johó jíco ná ñaha ndúu na jandá johó cáxutu na ta jandá johó cávaha na vehe na.<sup>29</sup> Ta tá naxinu quivi najándacoo Lot ñuu Sodoma cán já naqueta da cuahán de xihín na vehe da já nacuyu ñúhú xihín yuu cayí chí indíví ta já naxihí ndihí ñayivi nasañandu cán.<sup>30</sup> Quiáhva já caja ñayivi mé tiempo já jáchí ndihí ini na catacu na jandá quiáhva xinu coo quivi quixi tucu yehé ñuyíví yóho, mé dà nachindahá Ndióxi nduu ñayivi.

<sup>31</sup> Ta ndá ndó, ná ndúu jata véhe ndó mé quivi já a quíhvi ndó ini vehe ndó ná tavá ndó ñaha cómí ndo. Ta ndá ndó, ná ndúu yúcu a ndíxi ndó vehe ndó.<sup>32</sup> Ndítahan ndicuhun ini ndó ndaja nandoho ná cùu ñajáhí Lot jáchí nacava játá nuú ná sándehé

ná ná najándacoo ná ta já nandihi sahá mé ná cán.<sup>33</sup> Ndá ná chínú íníma jatá ñaha ñuyíví yóho, ná cán cùu ná ndihí sahá. Joo ndá ná ndíquiahva mé ndáha mí i ta íin tiahva na quivi na sahá i, ná cán cùu ná catacu anda ama cáa quivi.

<sup>34</sup> Mé a ndaa ná cahan i xihín ndo ná tá ná xinu quivi cán já ndiquehe e ná cùu cuéntá mí i. Cacuu a tátuhun tá ndúu ivi ná quiji ná in xito ta in na ndiquehe e ta inga na candoo va sahá ná coó nacandúsa na mí i.<sup>35</sup> Ta tá ndúu ivi ná ndíco na ta in ná ndindita cuhun xihín i ta inga ñá candoo va.<sup>36</sup> Ta tá ndúu ivi dàta yúcu xútu da ta in da ndindita cuhun xihín i ta inga da candoo va —nacachi Jesús.

<sup>37</sup> Tá naxini joho ná xica tuun xihín Jesús ná yóho já nandaca tühún ná mé á já ná —cachi na já xihín á:

—Ta ndachi yaha tóco ndihí ná cachí ndó xihín nde yóho, xitoho.

Anda já nacachi Jesús já xihín ná:

—Tá quiáhva cája tiyocó tá tacá rí nu cándihu in quíti, rí naxihí quiáhva já caja ñayivi taca na nuú i tá ná xinu quivi quixi i —nacachi Jesús.

## 18

Tá naxicá in ñá cuáan ñamani nuú da cùu juéxe

<sup>1</sup> Nasacu Jesús in quiáhva nu ná jáchí xihín quiáhva yóho cúní a jánahá nu ná ña ní tiempo xín ñúhú caca tähví na nu Ndióxi ta co ndítahan cuitá ini na xihín á.  
<sup>2</sup> Já nacachi a já xihín ná:

—In ñuu nasañin in juéxe ta coó nasañin toní ñúhú da xihín Ndióxi ta ni co sáhní da mé dá cùu ñayivi.<sup>3</sup> Ta mé ñuu cán nasañin in ñá cuáan. Ta ndijáa ní quivi sáhn ná cahan ndahví ná xihín mé juéxe cán ná caja víi da sahá ná sahá in na co cúní táhan xihín ná.<sup>4</sup> Ta sa cuahá quivi ta já cùu va ná sáhn ná nu dá ta co cúní da caja víi da sahá ná. Joo tá nandihi já nacahán da já: “Vatí coó toní ñúhú i xihín Ndióxi ta ni co sáhní i mí i cùu ñayivi<sup>5</sup> joo já caja tá caja víi i sahá ná cuáan yóho jáchí jándihí ndivaha ná yehé sahá ná cán ndiquehe e saha ná já ná a quíxi ga ná jándihí ná ini i”, nacahán da cùu juéxe cán —nacachi Jesús xihín ná.

<sup>6</sup> Anda já nacachi Jesús já xihín ná ndúu cán já:

—Ña yóho quéa nacachi juéxe, da co ñíhe ínimá vaha cán. <sup>7</sup>Joo cahnu ga ví ñaha caja Ndióxi tá ná ndiquehe a sahá ná cíú cuéntá mé á tá xíca tähví na nu á ñuu ta ndiví. Jáchí ndáti tiahva chíndee a ná cíú cuéntá mé á. <sup>8</sup>Mé a ndaa ná cahán i xihín ndo ña ivi lajá ndiquehe mé á sahá ná. Joo in ñaha cíúndaca tühún i ndohó. Á ndínehé e ñayivi cández ena yehe tá ná xíu quiyí quixi tucu u ñuyíví yóho —nacachi Jesús xihín ná.

Sácú Jesús quíahva sahá in da fariseo xihín sahá da játaca jiuhún cuéntá impuesto

<sup>9</sup>Anda já násacu Jesús inga quíahva nuú java ñayivi, ná ndínehé jíco mé, ná cahán ña mé cuítí ná caja ña vaha. Ta já nácasáhá cachí a já xihín ná:

<sup>10</sup>—In tañu ivi taa násahan da veñuhu ca-ca tähví da nu Ndióxi. In táhan da cán cíú fariseo ta inga da cán cíú da játaca jiuhún cuéntá impuesto. <sup>11</sup>Ta nani xíca tähví da fariseo cán nu Ndióxi cándichi da já cachí da já: “Táta Ndióxi, ndíquíahva i ndixahvi nu ndo jáchí co caja i tá quíahva caja java ga ñayivi. Jáchí java na caja cuíhná na ta quini caja na ta cátóo na coo na xihín ñajíshí ñani táhan na. Ta jári ndíquíahva i ndixahvi nu ndo jáchí co caja i tá quíahva caja da játaca jiuhún cuéntá impuesto yóho. <sup>12</sup>Jáchí yehe ivi tañu xíjuhun i in in semana ta tá cháhvi na yehe sahá chuun caja i já cávaha i uxu táhndá ta já jóco i in táhndá nu mé ndó”, cachí da fariseo cán. <sup>13</sup>Joo da játaca jiuhún cuéntá impuesto cán xíca xíca nasandichi da ta chí ni nuu dá co cíúndaca indínehe da indívi sahá ña cahán da ña coó sahá dá caja da ña. Ña caja da quéa cán da yíca ndíca da ta já cachí da já xíca tähví da nu Ndióxi; “Táta Ndióxi, candáhví ini ndó yehe jáchí cíú u in da caja cuachi”, cachí da. <sup>14</sup>Mé a ndaa ná cahán i xihín ndo ña nacaja cahnu ini Ndióxi sahá da játaca jiuhún cuéntá impuesto já cuanúhu va da joo coó nacaja cahnu ini a sahá da fariseo cán. Nacaja cahnu ini Ndióxi sahá da játaca jiuhún cuéntá impuesto jáchi ndá na ndínehé jíco mé jánuu ndáha Ndióxi na. Joo ndá na jánuu mé nu Ndióxi já jándínehe jíco mé á na —nacachi Jesús xihín ná.

Caja yii Jesús ná valí

(Mt. 19:13-15; Mr. 10:13-16)

<sup>15</sup>Ta cuahá ñayivi ñehe na ná valí naxinu coo na nu Jesús já ná cani ndáha á na.

Joo tá naxini ná xíca tuun xihín Jesús cán ña yóho, nácasáhá ná caja cuéhe ná xihín mé na ndáca ná valí cán. <sup>16</sup>Joo nácanu Jesús ná já nacachi a já xihín ná:

—Quiahva ndó ñámaní ná quixi ná valí nuú i. Ta a cají nuu ndó nu ná jáchí cacomí Ndióxi cuéntá sahá ñayivi tá ná caja na ta quíahva caja ná valí yóho. <sup>17</sup>Mé a ndaa ná cahán i xihín ndo ndá ná co cíúndíquíahva na mé ná ndáha Ndióxi tátuhun caja ná valí yóho já quéa a cíú cacomí Ndióxi cuéntá sahá ná —nacachi Jesús xihín ná.

Cahán in da cuicá xihín Jesús  
(Mt. 19:16-30; Mr. 10:17-31)

<sup>18</sup>In táhan da sáhndá chuun cán nándaca tühún da Jesús já nacachi da já xihín á:

—Maestro, mé ndó cíúndaca taa vaha ná cán quéa ndáca tühún i ndohó ndíá ndítahan caja i já ná ñehe tähvi i cuhyn i indívi coo i anda ama cáa quiyí —nacachi da xihín Jesús.

<sup>19</sup>Anda já nacachi Jesús já xihín dá:

—Ndá cuéntá quéa cahún xihín i ña cíú u da vaha. Ni in tühún toho ñayivi co cíú ná ná vaha ñuyíví yóho. In tühún Ndióxi cuítí va quéa vaha. <sup>20</sup>Sa xíni vún ña sáhndá Ndióxi nuun cajún já cachí a já: “Coto a coún xihín ñajíshí á yíi ñani táhún. Coto a cahmún ndii. Coto a caja cuíhnún. Coto a cahún ña tühún sahá ñayivi. Ta caja cahmún tátum nánún” —nacachi Jesús xihín da cuicá cán.

<sup>21</sup>Anda já nánducú ñehe da cán tühun nu Jesús já nacachi da já xihín á:

—Janda taa loho i nácasáhá i caja i tóco ndíhi ña sáhndá Ndióxi caja i —nacachi da xihín Jesús.

<sup>22</sup>Tá naxini joho Jesús ña nacachi da yóho xihín a já nacachi a já xihín dá:

—Inga ñáha cámáni cajún: Cuahán jícún tóco ndíhi ñahún jan ta ndicahnda jiuhún jan nuú ná ndahví já ñehe tähvyn coo cuahá ñahún indívi. Ta tá nándihí já quisún candicún yehe —nacachi Jesús xihín dá.

<sup>23</sup>Tá naxini joho da cuicá cán ña nacachi Jesús xihín dá já nácasuéha ndivaha ini da jáchi fin cuahá ndivaha ñáha dá. <sup>24</sup>Tá naxini Jesús ña nácasuéha ini da cuicá cán já cachí a já:

—Ndaja yáncá ndivaha cáa já ndíquíahva ná cuicá mé ná ndáha Ndióxi ña ná cacomí a cuéntá sahá ná. <sup>25</sup>Jáchí janda cama chágá cuu yáha in camello ini in yávi sahá yítucú

**a juú ga ña ná ndiquiahva in na cuicá mé ná**  
**ndáhá Ndióxi ña ná cacomí a cuénta saha**  
**ná —nacachi Jesús.**

<sup>26</sup>Tá naxini joho ñayivi ndíta cán ña ná-  
 cachi Jesús já nacachi ná cán já:

—Ndá ná cúcú ná cuu cäcu ndaa ínimá, dá  
 já:

<sup>27</sup>Anda já nacachi Jesús já xihín ná:

—Ndióxi quéa cuu caja tóco ndihi ñaha  
 vatí ñayivi a cuú caja na ña —nacachi Jesús  
 xihín ñayivi ndíu cán.

<sup>28</sup>Anda já nacachi Pedro já:

—Candehé ndó, xitoho i. Ndéhe náján-  
 dacoo nde tóco ndihi ña násacomí nde ta  
 ndíco nde ndohó —nacachi da xihín Jesús.

<sup>29</sup>Anda já nanducú ñehe Jesús tuhún nu  
 dá já nacachi a já:

—Mé a ndaa ná cahán i xihín ndo ña ndá  
 ná jándaco vehe á tátá náná ná á ñani na  
 á ñajíhí ná á jahyi na sahá ña cúní ná ña ná  
 cacomí Ndióxi cuénta saha ná, <sup>30</sup>ná cán cúcú  
 ná ñehe cuahá chágá ñaha ñuyíví yóho jata  
 tóco ndihi ña nájándaco na. Ta vaxi quiví  
 já ñehe táchví ri na catacu na indíví anda  
 ama cáa quiví —nacachi Jesús.

Cáxi tuhun tucu Jesús ña quiví a  
 (Mt. 20:17-19; Mr. 10:32-34)

<sup>31</sup>Tá nandihi já natává xóo Jesús ndíluxu  
 ivi na xíca tuun xihín á cán. Já nacachi a já  
 xihín ná:

—Viti cohó chí ñuu Jerusalén nyú xínu  
 coo tóco ndihi ña nacahyí ná profeta  
 sahá yéhe, dä nachindahá Ndióxi nduu  
 ñayivi. <sup>32</sup>Jáchí mé ñuu cán tiin na yéhe já  
 ndiquiahva na yehe ndáhá ná tóho. Cuacu  
 ndaa na yehe. Canahá ná xihín i. Cuihna  
 ndaa na tójíi na yehe. <sup>33</sup>Cani na yehe. Ta  
 tá nandihi já cahní na yehe. Joo tá ná yaha  
 uní quiví já nditacu tucu u tañu na naxíhi  
 —nacachi Jesús.

<sup>34</sup>Joo ná xíca tuun xihín á cán ni loho coó  
 nacandaa ini na ña cúní Jesús cache a xihín  
 ná. Jáchí cuú á ñaha ña coó nacuu candaá  
 ini na saha.

Tá nändaja vaha Jesús in dä cuá ñuu  
 Jericó

(Mt. 20:29-34; Mr. 10:46-52)

<sup>35</sup>Tá nacayati Jesús ñuu Jericó cán ta yati  
 jíin íchi nu xíca mé á cuahán cán íin coo in  
 dä cuá sáti da. <sup>36</sup>Ta tá naxini joho da ña  
 yáha cuahá ñayivi cuahán ná já nacasáhá da  
 ndáca tuhún dä ndá cúcú. <sup>37</sup>Anda já nacachi  
 na já xihín dä:

—Jesús, dä ñuu Nazaret, dä cán cúcú dä  
 yáha cuahán yóho —nacachi na xihín dä.

<sup>38</sup>Anda já nacásáhá dä cuá cán cayuhú  
 dä já cachí dä já:

—Jesús, dä naquixi chichi David, caja ndó  
 ñamáni candáhví loho ini ndó yéhe —cachí  
 dä.

<sup>39</sup>Joo ñayivi, ná cánúu cuahán xihín Jesús  
 cán nacásáhá ná cája cuehé ná xihín dä ña  
 ná caji da yúhu dä. Joo ví ga ví nacásáhá dä  
 cayuhú dä já cachí tucu da:

—Ndóhó, dä naquixi chichi David, caja  
 ndó ñamáni candáhví loho ini ndó yéhe —  
 cachí dä cayuhú dä.

<sup>40</sup>Anda já nacandichi Jesús já nasañda  
 chuun ña ná cañehe na dä cuá cán nu á.  
 Ta tá naxinu dä nu á já nandaca tuhún a dä.

<sup>41</sup>Já nacachi a já xihín dä:

—Ndíá cúnun ná caja i xuhun —nacachi  
 Jesús xihín dä.

Anda já nanducú ñehe dä cuá cán tuhún  
 nu á já nacachi da já:

—Ndaca ndéhe e cúní i, xitoho i —  
 nacachi da.

<sup>42</sup>Tá nandihi já nacachi Jesús já xihín dä:

—Candehé viti. Nandivahún jáchí cán-  
 dée inún yéhe —nacachi Jesús xihín dä.

<sup>43</sup>Chí ivi laá nanuná nuú dä cuá cán.  
 Ta chí a júu quiqhá cája cahnu da Ndióxi.  
 Ndíco dä Jesús cuahán dä. Ta jári tóco ndihi  
 ñayivi tá naxini na ña yóho já nacásáhá ná  
 cája cahnu na Ndióxi.

## 19

Tá cahán Jesús xihín in dä naní Zaqueo

<sup>1</sup>Tá nandihi já nandihvi Jesús ñuu Jericó  
 cán já xíca mahñú ñuu cuahán. <sup>2</sup>Ta cán  
 nasañjin in dä cuicá naní Zaqueo, dä cúcú  
 dä sacuahá nuú ná játaca jiuhún cuénta  
 impuesto. <sup>3</sup>Ta cúní dä cuni da Jesús joo a  
 cuú cuni ñahá dä jáchí cátí cuahá ndivahá  
 ñayivi nu Jesús. Ta mé dä co xínu coo da  
 cuni ñahá dä jáchí cuú dä dä ndihí. <sup>4</sup>Chí  
 xínu da nacanuú dä nuú ñayivi cuahá cán  
 já nändaa da nuú in yító yati mé jíin íchi,  
 mé nuú yaha Jesús cán ña ná cuni ñahá  
 dä. <sup>5</sup>Ta tá nayahá Jesús yati sahá yító cán  
 já nandihehe nuú á nu cúnúu dä cán. Já  
 nacachi a já xihín dä:

—Zaqueo, cuánuu quiví jáchí cúní coo tóo  
 i veñun quíví víti —nacachi Jesús xihín dä.

<sup>6</sup>Anda já ndáva niñni Zaqueo nanuu da  
 nu yító cán. Já cávatá dä nändiquehe vaha

da Jesúś cañehe da a cuahán dā xihín á vehe da.<sup>7</sup> Joo tá naxini tócó ndihí java ga ñayivi cán ñā yóho já nacásahá na cahán nūu na sahá Jesúś. Ta cächí na ñā cuahán mé a coo tóo a vehe in dataa, dā cája cuahá cuachi.<sup>8</sup> Ta tá sā ndíu ndihí na vehe Zaqueo já nandaca ndichi Zaqueo já nacachi da já xihín Jesúś:

—Candehé ndo, xitoho i. Cahnda java ndaa i ñaha cómi i ta já ndicahnda i ñā nuú na ndahví. Ta ndá na nacaja cuishná i ñaha, na cán quiáhva i comí táchndá chágá ñaha nuú jáchi najándahvi i ñā —nacachi Zaqueo cán.

<sup>9</sup> Anda já nacachi Jesúś já xihín ná:

—Quiví viti cája cahnu ini Ndióxi sahá cuachi dā yóho xihín cuachi na vehe da jáchi xihín ñā nacaja dā yóho viti náha ñā mé a ndaa cández ini da Ndióxi tá quiáhva nacaja Abraham.<sup>10</sup> Ta yehé, dā nachindahá Ndióxi nduu ñayivi naquixi i ndinducú u na xíca nuu cája cuahá cuachi jáchi cacu ndaa ínimá ná cúní —nacachi Jesúś xihín ná ta já naquée a cuahán tucu a íchí chí ñuu Jerusalén.

Tá nasahan in dataa jiuuhún dā nuú uxu mozo dā

(Mt. 25:14-30)

<sup>11</sup> Ta nani xíni joho ñayivi ñā cahán Jesúś já nasacu mé a in quiáhva nu ná jáchi cayati chágá mé a ñuu Jerusalén cuahán. Ta mé ñayivi ndíco cuahán cán nacahán ñā tá xinu coo a ñuu Jerusalén cán chí ivi laá va casáhá Ndióxi cacomí a cuénta sahá ñayivi vatí a juú a já.<sup>12</sup> Anda já nacachi Jesúś já xihín ná:

—Nasahín in dataa, dā cútú jáhyi in rey. In quiví naquée da cuahán xícá dā ñā ndicojo da chuun cacuu da rey. Tá nandihí nasacu ini da nuhu dā ñuu da.<sup>13</sup> Joo tá cámání nuhu dā já nacana da uxu mozo da. Ta nasahan dā in in jiuuhún nuú in in dā cán ta mé jiuuhún cán cútú á ñā íin ndiváha yahvi. Anda já nacachi da já xihín mozo dā: “Caja ndó ndahví xihín jiuuhún yóho janda quiáhva ná xinu quiví ndicó coo tucu u quixi i”, nacachi da xihín mozo da. Já naquée da cuanúhu dā.<sup>14</sup> Ta ndaja coo ñayivi ñundáhyi xícá cándají na dā. Sahá ñā cán quéa nachindahá na in táchndá tátó ñā ná cachí na xihín tátá dā ñā co cúní toho na ñā ná cacomí da cán cuénta sahá ná.<sup>15</sup> Joo já nandicojo dā cán chuun cacuu da rey mé

ñundáhyi xícá. Ta tá naxinu coo da cán nasañhanda da chuun ñā ná cuhun na cana na mozo dā, dā nasañhan dā jiuuhún nu cán. Jáchí cúní dā candaa ini da ndaja jiuuhún nañghe in in dā cán jatá jiuuhún dā.<sup>16</sup> Tá nandihí já naxinu coo in táhan dā nañghe jiuuhún cán nu dā já nacachi da já: “Candehé ndó, xitoho i. Nasahan ndó in jiuuhún nuú i ta viti nanduu a uxu”, nacachi da.<sup>17</sup> Anda já nanducú ñehe dā cútú rey cán tühun nu dā já nacachi da já xihín dā: “Vaha ndiváha nacajún xihín ñā yóho. Náha ñā mé a ndaa cútú in mozo vaha jáchi nacaja ndihún tá íin nacachi i xuhún cajún xihín jiuuhún i vatí loho quéa nasañhan i nuún caja chúún. Ta viti caja i ñā ná cacomún cuénta sahá uxu ñuu”, nacachi rey cán xihín dā.<sup>18</sup> Tá nandihí já naxinu coo inga táhan dā nañghe jiuuhún cán nu dā já nacachi da já: “Candehé ndó, xitoho i. Nasahan ndó in jiuuhún nuú i ta viti nanduu a uhun”, nacachi mozo cán.<sup>19</sup> Anda já nacachi dā cútú rey já xihín dā: “Vaha nacajún sahá ñā cán quéa caja i ñā ná cacomún cuénta sahá uxun ñuu”, nacachi rey cán xihín dā.<sup>20</sup> Ta tá nandihí já naxinu coo inga táhan dā cán já nacachi da já: “Candehé ndó, xitoho i. Yóho íin mé jiuuhún nasahan ndó nuú i. Nachicaan vaha i ñā nu jáhama i<sup>21</sup> sahá ñā ylhví i ndohó. Jáchí cútú ndó in tāa cuehe ndiváha. Ta cátóó ndó ndiquehe manj uun ndó ñaha. Ta cátóó ndó ñā ná caja chúún inga ñayivi já jandá xinu uun ndó ndiquehe ndó ñaha nañghe ná jatá chuun caja ndó”, nacachi mozo cán.<sup>22</sup> Anda já nanducú ñehe dā cútú rey cán tühun nu mozo dā já nacachi da já xihín dā: “Co cútú in mozo vaha nuú i. Xihín tühun cahún chícaún cuachi jatúna jáchi co cúnun caja chúún sahá i. Cachún ñā xíni vahún cútú yehé in dā cuehe ndiváha ta cátóó i quehe e jiquí jiuuhún i vatí coó nacaja chúún i sahá.<sup>23</sup> Sahá ñā cán quéa ndá cuénta quéa coó nasahan tóún jiuuhún i, dā já. Já quéa tá ná ndicó coo i já ná ndiquehe e jiquí a nuú ná cán, nduu”, nacachi rey cán xihín mozo dā.<sup>24</sup> Tá nandihí já nacachi tucu rey xihín java ga ñayivi ndíta cán já: “Candaa ndó jiuuhún ndahá dā ta quiáhva ndó ñā nuú dā cómi uxu a jan”, nacachi dā cútú rey cán.<sup>25</sup> Anda já nacachi ná ndíta cán já xihín rey: “Candehé ndó, xitoho i. Ndá tuní quiáhva ri nde jiuuhún yóho nuú dā sā cómi uxu a caja jáchi sā cuahá va jiuuhún cómi dā cása”,

nacachi na xihin rey cán. <sup>26</sup>Já nacachi rey cán já: “Mé a ndaa ná cahán i xihin ndo, ña ndá na sa íín ñaha nuu, mé na cán ñehe tähví ná coo chágá ña nu ná. Joo ndá na coó ñaha nuu sahá ña co cája chúun na já quéa jandá ña loho cómí na ndindaa”, nacachi rey cán. <sup>27</sup>Ta nacachi tucu da já: “Cuáhán ndó quehe ndó ñayivi quini, na co cúní yehé, na coó naxeen ña ná cacomí i cuénta sahá ná cán já ná quixi na. Ta cahní ndó na ná quivi na nuu tähví i”, nacachi rey cán —nacachi Jesús ndicani a nuu ñayivi.

**Ndíhvi Jesús ñuu Jerusalén**  
(Mt. 21:1-11; Mr. 11:1-11; Jn. 12:12-19)

<sup>28</sup>Tá nandihí nacachi Jesús ña yóho xihin ná já naquehe tucu a íchi xíca cuahán chí ñuu Jerusalén. <sup>29</sup>Ta tá sa naxinu coo a jini yúcu yitó olivo cán nuu ja chá xínu coo a ñuu Betfagé xihin ñuu Betania cán já násahnda chuun nuu iyí táhan da xíca tuun xihin á cán. <sup>30</sup>Já nacachi a já xihin dá:

—Cuáhán ndó ñuu loho ndácaan jan. Ta tá ná xínu coo ndó jan ndiñehe ndó in búrrro ndíco ndaa jan, rí a ñáha yií ndaa na. Ndaaxí ndó ri ta cañehe ndó ri quixi ndó. <sup>31</sup>Ta ndá na ná ndaca tühún ndohó ña ndá cuénta quéa ndáxi ndó ri já cachí ndó já xihin ná: “Mé a cíú xitoho nde xíni ñuhú a ri”, cachí ndó xihin ná —nacachi Jesús xihin dā cán.

<sup>32</sup>Já naquee ndívì dā cuahán dā. Ta tá quiáhva nacachi Jesús coo chí quiáhva já ndusa nasahíi. <sup>33</sup>Jáchí nani ndáxi dā búrrro cán ndúu da já nacahán mé na xihin janá rí cán saha ri já nacachi na cán já:

—Ndá cuénta quéa ndáxi ndó búrrro janá nde jan —nacachi na cán.

<sup>34</sup>Anda já nanducú ñehe dā xíca tuun xihin Jesús cán tühun nuu ná já nacachi da já:

—Ndáxi nde ri jáchí mé a cíú xitoho nde, xíni ñuhú a ri —nacachi da.

<sup>35</sup>Já naquehe da ri ñehe da cuahán da nu Jesús. Anda já náchojó ñayivi jáhma ná jata ri já najándaan na Jesús jata ri. <sup>36</sup>Ta nani xíca búrrro cán cuahán rí xihin Jesús já nachinduu ñayivi jáhma ná íchi nuu yaha rí cán xihin á. <sup>37</sup>Ta yati ñuu Jerusalén, mé nuu ndíca yúcu naní yitó Olivo cán já nácasáhá cayuhú tóco ndihí na cíú cuénta mé a cán. Cája cahnu na Ndióxi xihin ña cájii íní na saha tóco ndihí ña náhnu naxini na nacaja Jesús. <sup>38</sup>Já cachí na já cayuhú ná:

—Ndicáhnu náhá ná cacuu dā cómí cuénta sahá yo yóho jáchí cíú dā dā vaxi yuhú nuu Ndióxi. Viti cájii ini na ndúu indíví. Cáhnu ná cacuu Ndióxi —cáchí na cayuhú ná.

<sup>39</sup>Anda já nacachi java na fariseo ñíhu tañu ñayivi cán já xihin Jesús:

—Maestro, jánaní ndó ná ndíco jata ndó yóho ná a cayuhú cóhó ná —nacachi na xihin Jesús.

<sup>40</sup>Joo nanducú ñehe Jesús tühun nuu ná já nacachi a já xihin ná:

—Mé a ndaa ná cahán i xihin ndo ña tá ná catájí yuhú ná yóho jandá já yuu ndúu jíin íchi jan casáhá cayuhú a caja cahnu a yehé —nacachi Jesús.

<sup>41</sup>Tá nacayati chágá Jesús ñuu Jerusalén cán ta tá naxini a ñuu cán já nácasáhá tähví ini a sacú a sahá. <sup>42</sup>Já nacachi a já:

—Cúni jánhá i ndohó ndífa ndítahan caja ndó já ná coo vaha ínimá ndó nu Ndióxi. Joo co cúní toho ndó candaan ini ndó ña. Ta viti a cíú ga candaan ini ndó ña. <sup>43</sup>Jáchí vaxi quívi tá quixi na co cúní ndohó ta caji nuu na nu ndo ta cani táhan na xihin ndo. Ta ni in xoo a cíú cunu ndó jáchí níí cíú caji nuu na cán já ná a quée ndó. <sup>44</sup>Ta jándihí na sahá ndo jáchí cahni ná tóco ndihí ndó, ná ndúu cán. Ta ni in yuu a cándoo jata inga yuu jáchí ña cuyu cacuu ndihí a. Já ndoho ndó jáchí co candaan ini ndó ña naquixi i jácacu u ndohó já ná a ndihí sahá ndo —nacachi Jesús.

**Tá nataxí Jesús ná ndúu jíco ñgha yéhé veñuhu**

(Mt. 21:12-17; Mr. 11:15-19; Jn. 2:13-22)

<sup>45</sup>Tá naxinu coo Jesús ñuu Jerusalén cán já nandihí a veñuhu cahnu ndácaan ñuu cán. Já nácasáhá táxi a ná ndúu jíco cán xihin na ndúu xéen cán. <sup>46</sup>Jáchí nacaja cuéhe a xihin ná ta já nacachi a já:

—Já cáchí tühun Ndióxi: “Vehe mí i cacuu a nuu quivi na caca tähví na nuu i”, cáchí a. Joo ndohó nandai cuu ndó yóho caja cuihna ndó nuu ñayivi —nacachi Jesús.

<sup>47</sup>Ndijáá níí quívi sahan Jesús veñuhu cahnu cán jánhá tühun Ndióxi nuu ñayivi. Joo ná cíú sacuahá nuu jetu xihin na jánhá ley Moisés xihin na sacuahá ñuu ndúcú ná ndá quiáhva caja na cahni ná Jesús. <sup>48</sup>Joo co ñehe íní ná ndaja caja na cahni ná Jesús jáchí tóco ndihí ñayivi cúní ná taa joho na nu jánhá Jesús.

## 20

Tá nandaca tūhún nā Jesús nā yo sáhan  
ñamani nū á jánaha ñayivi  
(Mt. 21:23-27; Mr. 11:27-33)

<sup>1</sup> Ta ndaja coo in quivi ndácaan Jesús veñuho cahnu jánahá ñayivi ndaja cuu cacu ndaa ímima ná já naxinu ná cíu sacuahá nuú jutu xihín ná jánahá ley Moisés ta cátahan ri ná sacuahá veñuho naxinu coo na xihín ná nū ndácaan Jesús cán. <sup>2</sup> Anda já nacachi na já xihín Jesús:

—Ndá saha quéa jánahún nā yóho. Yo já sáhan ñamani nuun cajún nā cajún yóho —nacachi ná cán xihín Jesús.

<sup>3</sup> Anda já nanducú ñehe Jesús tūhun nu ná já nacachi a já xihín ná:

—Ndáca tūhún ri yehe va ndohó. Cachi ndó xihín i: <sup>4</sup> Yo já nachindahá Juan nā ná quixi da caja ndútá dā ñayivi. Á Ndióxi nachindahá dā, á ñayivi nachindahá ñahá —nacachi Jesús xihín ná cán ndáca tūhún a ná.

<sup>5</sup> Anda já nacasáhá ndítuhún xihín táhan na sacuahá cán já cachí na já:

—Ndá cachí yó xihín Jesús yóho. Jáchí tá ná cachí nā Ndióxi quéa nachindahá Juan já nducú ñehe Jesús tūhun nu yo já cachí a já xohó: “Ndá cuénta quéa coó naxeen ndó candusa ndó dā, dā já”, cachi Jesús xohó. <sup>6</sup> Ta tá ná cachí ñayivi va cíu ná nachindahá Juan já ndicuña ñayivi ta cahní ná mí xihín yuu. Jáchí tóco ndihí ñayivi cándaa vaha ini na nā Ndióxi quéa nachindahá Juan jáyaha da tūhun cáhan mé a nuú ñayivi —nacachi xihín táhan ná cán.

<sup>7</sup> Sahá nā cán quéa nacachi na xihín Jesús nā co xíni toho na yo já nachindahá Juan nā ná quixi da caja ndútá dā ñayivi. <sup>8</sup> Anda já nanducú ñehe Jesús tūhun nu ná já nacachi a já xihín ná:

—Ta ni yehe a cáxi tūhun i xihín ndó yo já nasahan ñamani nuú i caja i nā yóho —nacachi Jesús xihín ná.

Sacú Jesús quiqhva sahá java mozo, da nacaja quini xihín xitoho dā  
(Mt. 21:33-44; Mr. 12:1-11)

<sup>9</sup> Tá nandihí já nacasáhá Jesús cáhan xihín ñayivi ta já násacu a quiqhva yóho nu ná já nacachi a já:

—Nasahii in dataa ta najándeé cuahá dā tó uva. Ta tá nandihí já nasahan ndojó ná mé dō uva cán. Anda já naquee da cuahán

xícá da cuahá tiempo. <sup>10</sup> Ta tá naxinu coo tiempo jáquee na uva nū dō uva ñahá dā cán já nachindahá dā in mozo dā nā cuhun dā ndiquehe da uvá, rí ndítahan nū dā ndiquehe da. Joo mé na caja chún tóo nūhu dā cán natüin na mé mozo cán ta nacani na dā ta já cása uun da nandicó coo da nacaja na. <sup>11</sup> Tá nandihí já nachindahá mé dā xihín ñahá nūhu cán inga tucu mozo dā. Joo quiqhva já nacaja ri na xihín dā cán va. Nacanahá ná xihín dā ta nacani na dā. Ta já cása uun da nachindahá tucu na dā nuú xitoho da. Coó ñaha nasahan na nū dā. <sup>12</sup> Ta mé dā xihín ñahá nūhu cán nachindahá tucu da inga mozo dā ta quiqhva já nacaja ri na xihín dā cán va. Najándicuehe ná dā ta já natáxi ná dā.

<sup>13</sup> <sup>14</sup> Ta nū ndihí já nacahán mé dā xihín ñaha nūhu cán já: “Ña caja i viti quéa chindahá i jahyi maní i jachí caja i cuénta coo toní nūhu ná xihín dā tá ná cuni na dā”, nacahán mé dā xihín ñaha nūhu cán. Ta tá nandihí já nachindahá dā jahyi maní dā. <sup>15</sup> Joo tá naxini ná caja chún tóo nūhu dā cán nā vaxi jahyi da já nacachi xihín táhan ná cán já: “Candehé ndo. Yóho vaxi dā cíu jahyi xitoho í. Ta tá ná xíni quivi quivi xitoho í ta dā yóho cacuu da ndicojo chuun sahá nūhu yóho. Cóho cahní yó dā já ná candoo nūhu yóho ndáha mī”, nacachi xihín táhan ná cán. <sup>16</sup> Anda já natavá ná dā cíu jahyi xitoho cán jata cítu ta cán násahní ná dā —nacachi Jesús.

Anda já nandaca tūhún Jesús ñayivi ndúu cán já nacachi a já xihín ná:

—Á co xíni ndó ndí a caja dā xihín ñaha nūhu viti. <sup>17</sup> Ña caja da quéa quixi da ta cahní ndihí da ná nacaja chún tóo nū nūhu dā. Já ndiquiahva da nūhu dā nuú java ga ná já ná caja chún na nū á —nacachi Jesús.

Tá naxini joho ná ndítá cán nā yóho já nacachi ndihí na já:

—A candeé Ndióxi coo nā jan já —nacachi ná cán.

<sup>18</sup> <sup>19</sup> Joo násandehé Jesús nū ná já nacachi a já:

—Ta viti cachi ndó xihín i ndí cúní cachi tūhun Ndióxi tá cachí a já:

Mé yuu nā najácaná da cávaha vehe,  
ná cán cíu nā nanduu yuu ndúhu sahá  
vehe nā ím chágá sahá, cachí tūhun  
Ndióxi.

<sup>18</sup> Ta yehe cíuú u tátuhun in tótó cáhnu. Ta ndá ná yaha ndicava jatá tótó cán chí chachi ndihí na. Quiahva já ndihí sahá ñayivi tá co cúní ná candúsna na yehé. Ta mé tótó cáhnu cán tá ná yaha ndicava jatá in ñayivi chícají ndihí ñahá a cán. Quiahva já ndihí sahá ñayivi ini indáy tá co cúní ná candúsna na yehé —nacachi Jesús.

*Ndáca tuhún na Jesús á ndítahan nu ná chghvi na jiuhún cuénta ímpuesto*

(Mt. 21:45-46; 22:15-22; Mr. 12:12-17)

<sup>19</sup> Chí sá mé hora já cúní ná cíuú sacuahá nuú jutu xihín na jánahá ley Moisés cán tiin na Jesús jáchí nacandaa ini na ñá sahá mé va ná cán sácú Jesús mé quiahva nuú ñayivi cán. Joo coó natiin na Jesús jáchí ñayihví na ñayivi ndúu táo joho nu cáhan Jesús cán. <sup>20</sup> Ná nacaja na quéa nacchindahá ná java dataa ñá ná cananí dà Jesús. Ta ndája da mé dá ñá cíuú dà taa vaha ndivaha joo co cíuú dà tá quiahva ndáda. Ta xihín ñá yóho cúní dà cayati dà nüú Jesús ná candehé dà á yaha yúhu á cahán ndá ñahá ñá cuu cuhun dà jicó tuhún dà mé á nuú dà cíuú gobernador. <sup>21</sup> Sahá ñá cán quéa nacayati dà nüú Jesús ta nandaca tuhún dà mé á já nacachi dà já xihín á:

—Maestro, cándaa ini nde ñá cáhan ndó ta jánahá ndó ñá ndaa. Ta cándaa ini nde ñá tá cáhan ndó sahá in ñahá cajá ñayivi cíuú á sahá ñá sándehe ndó jándá ínimá ná. Ta cándaa ini nde ñá jánahá ndó ñá ndaa sahá ichí cuénta Ndióxi. <sup>22</sup> Sahá ñá cán quéa cúní nde candaq ini nde viti á ndítahan nuú nde chahvi nde jiuhún cuénta ímpuesto nuú dà cómí cuénta sahá yo ñuu Roma, á co ndítahan toho nuú nde caja nde ñá —nacachi ná cán xihín Jesús.

<sup>23</sup> Joo sá nacandaa va ini Jesús ñá cáhvi nüú va ini na sahá ñá cán quéa nanducú ñehe a tuhun nüú já nacachi a já xihín ná:

—Cándaa caxí táchí ini i ñá cúní ndó coto ndojó cuití ndó yehé. <sup>24</sup> Jánahá ndó in táchán jiuhún jan nuú i. Yo nahná ta yo quívi quéa ndáda nuú á —nacachi a xihín ná.

Já nacachi na já:

—Ñehe a quívi xihín nahná dà cómí cuénta sahá yo ñuu Roma —nacachi na xihín á.

<sup>25</sup> Anda já nacachi Jesús já xihín ná:

—Ndiuiyahva ndó ñahá dà cómí cuénta sahá ndó ñuu Roma jan nu dá. Ta

ndiquiahva ndó nu Ndióxi ñá cíuú ñahá mé á nuú á —nacachi Jesús xihín ná.

<sup>26</sup> Chí coó nacuu caja na jándahvi na Jesús nuú ñayivi ndúu cán jáchí víñ nanducú ñehe ndihí Jesús tuhun nu ná. Ta chí joho cátontó ndihí ñayivi xihín quiahva nanducú ñehe Jesús tuhun nu ná. Chí nacatáji ná cán.

*Ndáca tuhún na saduceo Jesús á mé a ndaa ndítacu tucu ndii*

(Mt. 22:23-33; Mr. 12:18-27)

<sup>27</sup> Tá nandihí já naquee java ná saduceo cuahan ná cahán ná xihín Jesús. Ta mé ná saduceo co cándusa na ñá ndítacu tucu ná sá naxihi. Tá nasaq ná nu fín Jesús já nacachi na já xihín á:

<sup>28</sup> —Maestro, nu ley nacahyi Moisés sá nahá natjhndá chuun ta cáchí a já: “Tá tándahá in dataa xihín ñajíhí dà ta tá coó jahyi ñá cácu xihín dà ta tá ná xinu quívi quivi da já quéa cáchí ley Moisés ñá ndítahan tandahá tucu ñajíhí dà xihín dà cíuú ñani mé ndij cán já ná coo jahyi dà cán xihín yuhú nuú ñani dà”, já cáchí ley Moisés. <sup>29</sup> Ta viti cuni joho ndó ná cacu nde in quiahva nu ndo. Nasahiin usa ñani. Ta dà nu cuít cán natfandahá dá. Joo nayaha tiempo naxihi dà ta coó toho jahyi da nacacu xihín ñajíhí dà. <sup>30</sup> Anda já natandahá tucu ñá cuáan cán xihín ñani chí ivi mé ndij cán. Joo naxinu quívi naxihi ri dà yóho va ta chí coó jahyi da nacacu xihín ñá cán. <sup>31</sup> Anda já natandahá dà chí uní cán xihín ñá. Joo ni dà cán ni java ga ñani da coó nacuu cacu jahyi xihín ñá. Ndíhusa dà natandahá xihín ñá ta ndíhusa dà naxihi. Joo ni in da coó nacacu jahyi xihín ñá. <sup>32</sup> Tá nu ndíhusa dà naxihi ri mé va ñá. <sup>33</sup> Ñá cúní nde candaq ini nde quéa, ndá dà cacuu ndusa yíñ ñá cán tá ná xinu quívi ndítacu tucu ndii. Jáchí ndíhusa va ñani dà cán natandahá xihín ñá —nacachi ná cán ndáca tuhun ná Jesús.

<sup>34</sup> Anda já nanducú ñehe Jesús tuhun nu ná já nacachi a já:

—Nani ndúu ñayivi ñuyíví yóho cuití va tándezha ná. <sup>35</sup> Jáchí ndá ná nanditacu tucu ta nañehé táchí ná coo na indíví já quéa co tándezha ná ta ni co sáhan toho na jahyi jíhí ná tándezha ná. <sup>36</sup> Jáchí mé cán cacuu na tátuhun tátó Ndióxi já a quívi ga na. Ta cacuu na jahyi Ndióxi jáchí sa nanditacu na tañu ndii. <sup>37</sup> Ta sá xíni yo ñá ndítacu tucu ndii jáchí já nacachi Moisés sá nahá tá

nácahyí dà sahá ña naxini da tañu tohíñu, dó cándaha ñíhuu cayí cán. Tá nácahan da sahá Ndióxi, nácahi da ña jandá viti cája cáhnu Abraham xihín Isaac xihín Jacob mé Ndióxi vatí naxihí na sanahá.<sup>38</sup> Ta ña yóho cúní cachei yá táchí yíi va Abraham xihín Isaac xihín Jacob vatí sa naxihí yiquí cuñu na. Jáchí tóco ndihí na cíu cuénta Ndióxi, táchí na nü me á—nácahi Jesús xihín ná.

<sup>39</sup> Anda já nácahi java na jánahá ley Moisés cán já xihín á:

—Vaha va nácahan ndó, Maestro.

<sup>40</sup> Ta chí coó náshahan ndee ga ini na ndaca tuhún chágá na me á.

Jánahá Jesús nuú ñayivi ña cíu Cristo taga ta cíu á Ndióxi

(Mt. 22:41-46; Mr. 12:35-37)

<sup>41</sup> Anda já nácahi Jesús já xihín ñayivi ndíu cán:

—Ndávaha cachí ñayivi ña vaxi Cristo chichi David.<sup>42</sup> Ta ndáa ini Salmos ña nácahyí David já nácahi da já:

Ndióxi quéa nácahi já xihín xitoho i:  
“Coo xoo cuáha i yóho,

<sup>43</sup> jandá quiáhva ná caja i ña ná cacomún cuénta sahá na co cúní yohó”, nácahi Ndióxi, já nácahyí David sa-nahá.

<sup>44</sup> Ndávaha cachí na ña vaxi Cristo chichi David joo mé tiempo cán nácahi David ña cíu á xitoho da—nácahi Jesús.

Cáhan Jesús sahá cuachi na jánahá ley Moisés

(Mt. 23:1-36; Mr. 12:38-40; Lc. 11:37-54)

<sup>45</sup> Tóco ndihí ñayivi ndíu cán naxini joho na tá nacásahá Jesús cachí a xihín na xíca tuu xihín á já:

<sup>46</sup> —Cuénta coo ndó xihín na jánahá ley Moisés jáchi cátóó na cándixi na jahmá náni caca nuu na. Ta cátóó na cahán toní ñíhuu ndiváha ñayivi xihín ná táchí nuu na nyú yahvi. Ta tá cuahán na veñhuu cátóó na cacoo na nü sácoo na íin chágá sahá. Ta tá cuahán na víco cátóó na coo vaha na.<sup>47</sup> Ta cándaa na vehe nájihí cuágen. Ta tá nándihí cání ndiváha cája na xíca táchí nü nü Ndióxi jáchi cúní na jájahvi na nuú ña nüu cája na. Mé a ndaa ná cahán i xihín ndó ña na jánahá ley Moisés yóho cacuu na na ndoho chágá ini caja Ndióxi nü ndfhí—nácahi Jesús.

Ña njocq in ñá cuágen ndáhví  
(Mr. 12:41-44)

<sup>1</sup> Ta ndaja coo ndácaan Jesús ini veñhuu cáhnu cán ta sández a ndá quiáhva táán na cuicá jiuhún ini saqo nü jóco ñayivi jiuhún nü Ndióxi.<sup>2</sup> Ta jári naxini a naxinu coo in ñá cuágen ndáhví ta nataán ña ivi jiuhún ña nüu yahvi ini mé saqo cán.<sup>3</sup> Anda já nácahi Jesús já xihín na xíca tuu xihín á cán:

—Mé a ndaa ná cahán i xihín ndó ña cuahá chágá jiuhún náshahan ná cuágen ndáhví yóho a juú gá tóco ndihí java gá na cán.<sup>4</sup> Jáchí tóco ndihí na java cán sáhan na ña yójó nü va na. Joo ñá cuágen ndáhví yóho náshahan ná nü Ndióxi tóco ndihí ña cómí ná catacu ñá—nácahi Jesús.

Cáxi tuhun Jesús ña vaxi quíví ndihí sahá veñhuu cáhnu ndácaan Jerusalén cán  
(Mt. 24:1-2; Mr. 13:1-2)

<sup>5</sup> Java ñayivi cán ndítuhún na sahá veñhuu cáhnu ñuu Jerusalén ndíta na. Ta ndítuhún na sahá yuu ndató ndiváha nácahá veñhuu cán. Ta cáhan na sahá ñaha nájoco ñayivi nü Ndióxi ndáa cán. Anda já nácahi Jesús já xihín ná:

<sup>6</sup> —Vaxi quíví ndihí sahá tóco ndihí ña ndíta ndó sández ndó yóho. Ta ni jandá in yuu a cándoo jatá inga yuu ña nditani cacuu tóco ndihí ña yóho—nácahi Jesús xihín ná.

Ña coo tá ná cayati quíví ndihí sahá ñuyíví  
(Mt. 24:3-28; Mr. 13:3-23)

<sup>7</sup> Anda já nándaca tuhún na Jesús já nácahi na já xihín á:

—Maestro, ndá ama coo tóco ndihí ña yóho. Ta ndaja coo tá sa nácatati mé quíví cán—nácahi na xihín Jesús.

<sup>8</sup> Anda já nácahi Jesús já:

—Cuénta coo ndó ta a quiáhva ndó ñamaní jándahvi ñayivi ndohó. Jáchí quixi cuahá ndiváha na cuénta mí i ta cahán na ña tuhún tá cachi na já xihín ndó: “Yehé cíu Cristo, dà nachindahá Ndióxi cacomí a cuénta sahá ñayivi.” Ta cachi na já: “Viti naxinu coo tiempo ndihí sahá ñuyíví”, cachi na xihín ndó. Joo coto a cándusa ndó candico ndó jatá ná cyhun ndó.<sup>9</sup> Tá ná cuni joho ndó ña cání táchí ñayivi ñuyíví yóho, a cayihví toho ndó. Jáchí ndúsa já ndítahan coo. Joo cámáni yíi va jáxinu coo quíví ndihí sahá ñuyíví—nácahi Jesús xihín ná.

<sup>10</sup> Anda já nácahan chágá Jesús xihín ná já nácahi a já:

—Ñayivi ndúu in nación ndicuita na canitáhan na xihín ná ndúu inga nación ta canitáhan ná in ñuu xihín ná inga ñuu.<sup>11</sup> Ta quixi cuahá ná taan tá sa nacayati quiví ndihi sahá ñuyíví. Ta quixi tama ndeé. Ta quixi cuehe nuú ñayivi ndúu cuahá ñuu. Ta chí catóntó ndiváha ñayivi cuni na ñaha náhnu chí indíví. Ta yihví ndiváha na tá cuni na java ñaha xitúhún ndiváha.

<sup>12</sup> Joo tá cámpan xinu coo quiví coo tóco ndihi ná yóho já ndicuita ñayivi caja xíxi na xihín ndó, ná cándusa yehé. Ta cañehe na ndohó cuhun ndó iní veñuhu na ta cán caja ví ná sahá ndó sahá ná cández iní ndó yehé. Ta taán na ndohó iní vecaa ta já cañehe na ndohó cuhun ndó cavií sahá ndó nuú ná cúcú jutixia xihín nuú ná cómí cuénta sahá ñayivi. Tóco ndihi ná yóho ndoho ndó sahá ná cández iní ndó yehé.<sup>13</sup> Ta xihín ná yóho cuu ñehe iní ndó cahan ndó sahá i nuú ná cán.<sup>14</sup> Ta a ndicani iní ndó sahá ndá tuhun cahan ndó sahá mé ndó nuú ná cán tá ná xinu ndó nu ná.<sup>15</sup> Jáchí mí i quiahva i tuhun nu ndo ta ndaja ndichí i jini ndó já ná cuu nducú ñehe vaha ndó tuhun nuú ná cán. Ta chí a cuú quee vaha yuhu ná cán xihín ndo.<sup>16</sup> Joo cuahá ñayivi jicó tuhún ná ndohó. Ta chí janda tátá ndó a ñani ndó a táhan ndó á náxí táhan xihín ndo, ná cán cacuu ná jicó tuhún ndohó cuahá tañu. Ta java táhan ndó, ná cández iní yehé quiví ndó caja na.<sup>17</sup> Ta ndijáá ñayivi ñuyíví candají ná ndohó sahá ná cández iní ndó yehé.<sup>18</sup> Joo ni in ñaha a ndohó ndó andá ni in jíjí jini ndó a ndíhi sahá.<sup>19</sup> Ta tá coó nacuitá ndó xihín tóco ndihi ná nuú caja na xihín ndó já xinu ndó canduu ndó indíví andá ama cása quiví.

<sup>20</sup> Tá ná cuni ndó ná nacava tiyivi soldado jatá ñuu Jerusalén ndúu da, xiní ñúhú candaa iní ndó ná sa naxinu quiví ndihi sahá ñuu cán.<sup>21</sup> Ná ndítahan caja ndó mé quiví cán quéa cunu ndó cuhun ndó chí yúcu tá ndúu ndó chí estado Judea. Ta ndá ndó, ná ndúu ñuu Jerusalén xiní ñúhú jándacoo ndó ñuu jan ta cunu ndó cuhun ndó. Ta ndá ndó, ná ndúu yúcu, a ndicó coo ga ndó ndihvi ndó ñuu Jerusalén yóho.<sup>22</sup> Jáchí mé quiví já cacuu a quiví ndoho ini ñayivi já ná xinu coo tóco ndihi nuú ná nacachi tuhun Ndióxi coo sanahá ndiváha.<sup>23</sup> Ndáhví nacuu najihí tá ñúhú jahyi na mé quiví já. Ta ndáhví nacuu na tá ñehe ndaa na ná valí táhan ná chichí yii. Jáchí ndoho ndiváha

ini ñayivi ndúu ñuyíví mé quiví já sahá ná xójo ndiváha ini Ndióxi xihín ná cán.<sup>24</sup> Java ñayivi quivi na caja soldado ta java na cato ná já cañehe na ná cuhun ná ndijáá chí ñuu tóho canduu na jáchí ndihi sahá ñuu Jerusalén yóho. Ta já quixi ná ñuu tóho ta casahá ná cahnda na chuun nuú ñuu Jerusalén yóho janda quiahva ná xinu coo quiví cacu ini Ndióxi ná quee ná tóho cán cuhun na.

<sup>25</sup> Andá já cuni ndó ná hnu ndiváha chí nuú candii xihín nuú yoo xihín nuú quími viti. Ta ñayivi ñuyíví yóho yihví ndiváha na ta chí a cándaa iní na ndia caja na jáchí quini ndiváha tacu nuú ndicijo tañuhú.<sup>26</sup> Ta chí janda quivi téo ñayivi xihín ná yihví ná jáchí casahá ndicani ndiváha ini na sahá tóco ndihi tondohó vaxi ñuyíví yóho. Jáchí janda mé candii xihín yoo xihín quími ndiquiji nuu a.<sup>27</sup> Andá já cuni ndó yehé, dä nachindahá Ndióxi nduu ñayivi, quixi i tañu vico xihín tóco ndihi ndeé cahnu i ta chí ndiyihví ndaa mé nuú quixi i.<sup>28</sup> Tá ná casahá yaha tóco ndihi ná cachí i xihín ndo yóho, xiní ñúhú ndindeé iní ndó ta ndiñehe ndó nuú ndó jáchí sa nacayati quiví jácacu Ndióxi ndohó cuhun ndó coo ndó indíví —nacachi Jesús xihín ná.

Sácu Jesús quiahva sahá titó ñuhú  
(Mt. 24:32-35; Mr. 13:28-31)

<sup>29</sup> Andá já násacu a in quiahva nu ná já nacachi a já:

—Xiní ñúhú candehé ndo ndá quiahva caja chúun in titó ñuhú, á ndá yito nacuu.<sup>30</sup> Tá ná cuni ndó ná jandá joho cana núma do já cándaa iní ndó ná nacayati tiempo javi.<sup>31</sup> Ta quiahva já tá ná cuni ndó ná sa cúa yáha tóco ndihi ná cachí i xihín ndo yóho já canda iní ndó ná sa nacayati quiví casahá Ndióxi cacomí a cuénta sahá ñayivi.

<sup>32</sup> Mé a ndaa ná cahan i xihín ndo ná cuni ñayivi ndúu mé tiempo já yáha tóco ndihi ná nacachi i xihín ndo já quivi na.<sup>33</sup> Mé a ndaa ná cúa indíví xihín ñundáhyi yóho ndihi sahá joo tuhun nacahan yehé xihín ndo a ndíhi toho sahá jáchí coo tá coo nacachi i xihín ndó coo.

<sup>34</sup> Cuénta coo ndó. Xiní ñúhú candati tiahva ndó quiví quivi i ndiquehe e ndohó. A cáca muu ndó yóho cása ná caja ndó ná cúní yiquí cuñu ndó. A cóho ndó caca muu ndó. Ta a ndíhi náhá iní ndó ndicani iní ndó sahá náha ñuyíví yóho.<sup>35</sup> Tá ná xinu

quíví quixi i cacuu a tátuhun tá sácú jehé in datqa in trampa nuú in quítí sahá ña cumi dä tiin da ri. Mé quítí cán co xíní rí ndáchí fín jehé trampa tiin ñahá cán. Quiáhva já co xíní ñayivi ndúu ñuyiví ndá quíví quixi tucu u ñuyiví yóho.<sup>36</sup> Xíní ñúhú canduu tiahva ndó quíví quixi i. Níti tiempo xíní ñúhú caca tähví ndó nu Ndíóxi já ná ndinéed ini ndó tá ná quixi tóco ndihí ñá yóho nu ndó ta já ná cuu xínú coo yaha ndó indíví já ná cuu coo vií ndó nuú yehé, dä nachindahá Ndíóxi nduu ñayivi —nacachi Jesús jánahá nuú ñayivi cán.

<sup>37</sup> Nini quíví nasañijin Jesús ini veñuhu cahnu jánahá tuhun Ndíóxi nuú na cán. Ta tá ñuu já sáhan quíji a yúcú yitó Olivo cán. <sup>38</sup> Ndijáá níi quíví nahá chá naxínu coo ñayivi veñuhu cahnu cán jáchí cúní na cuni joho na ña jánahá Jesús nuú ná.

## 22

*Jándique táhan na tuhun na ña cahní na Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Ta yati tandaa víco pascua tá xíxi ñayivi pan ñá co quée yusá naxíaa xihín. <sup>2</sup> Já nacasáhá na sacuahá nuú jutu xihín na jánahá ley Moisés ndúcú na ndaja caja na cahní na Jesús. A cuú caja na cahní tívi na ña jáchí ylhívi na canahá ñayivi xihín ná.

<sup>3</sup> Joo ndaja coo tiñahá sacuahá nandeta nuu rí nimá in táhan uxu ivi dä xíca tuun xihín Jesús. Mé dä cán nani dä Judas ta Judas Iscariote cáhan na xihín dä. <sup>4</sup> Ta nasañan Judas cahán dä xihín na sacuahá nuú jutu ta xihín na sacuahá nu policía ndáá veñuhu. Ta nanditúhún dä xihín ná ña cuu caja da jicó túhún da Jesús ta ndiquiáhva ñahá dä mé á nu ná. <sup>5</sup> Xihín ñá yóho nacajíi íní na cán ta nasañan na tuhun na nu Judas ña quiáhva na jiuhún nu dá. <sup>6</sup> Ta nacandúsaa Judas caja da ñá chí nacasáhá dä ndúcú dä ndaja caja da ndiquiáhva da Jesús nuú na cán tá coó ñayivi ndúu xihín á.

*Xíjíni Jesús víco pascua xihín na xíca tuun xihín á*

(Mt. 26:17-29; Mr. 14:12-25; Jn. 13:21-30; 1 Co 11:23-26)

<sup>7</sup> Natandaa mé víco tá xíxi na pan ñá co quée yusá naxíaa xihín. Mé víco yóho nasacaja na ñá tá nu cuúa ta sáhní na ndacachi válí jocó na nu Ndíóxi. <sup>8</sup> Mé quíví já

nasañhnda Jesús chuun nu Pedro xihín nu Juan já nacachi a já xihín dä:

—Cuáhán ndó caja ndíví ndó ña cajíní vicó pascua —nacachi a xihín dä.

<sup>9</sup> Anda já nacachi dä cán já xihín á:

—Yo vehe cúní ndó cuhun nde ná caja ndíví nde ña cuxú.

<sup>10</sup> Anda já nanducú ñehe Jesús tuhun nu dä já nacachi a já:

—Tá ná quihvi ndó ñuu Jerusalén jan já cuni ndó in datqa ta ndójó da in yoo ticuíf cuahán dä. Candico ndó jata dä cuhun ndó janda quiáhva cuni ndó ndá vehe quihvi da.

<sup>11</sup> Ta já cuhun ndó cahán ndó xihín mé dä xihín ñaha vehe cán já cachí ndó já xihín dä: “Da jánahá ndehe cíú dä cachí xuhun: Ndáchí ím nuú coo i cajíní i vicó pascua xihín na xíca tuun xihín i.” <sup>12</sup> Anda já jánahá mé dä cán in cuarto cahnu ña cánúu jini véhe piso ninu. Sá ím tiahva va ña. Cán caja ndíví ndó ña cajíní —nacachi Jesús.

<sup>13</sup> Anda já naquee ndíví dä cán cuahán dä. Ta tá fin nacachi Jesús xihín dä coo quiáhva já ndusa nasañin. Ta chí nacaya ndíví da tóco ndihí ña cajíní na vicó pascua.

<sup>14</sup> Tá naxínu coo hora cajíní na já nasaçoo Jesús xihín tóco ndihí ña xíca tuun xihín á nu mesa. <sup>15</sup> Anda já nacachi Jesús já xihín ná:

—Sa xíca ndiváha ini i cajíní i vicó pascua yóho xihín ndó nani ím téo i xihín ndo jáchí vaxi quíví quivi i. <sup>16</sup> Jáchí mé a ndaa ná cahán i xihín ndo janda ná xínú quivi cacomí Ndíóxi cuéntá sahá ñayivi anda jáví cajíní tucu u vicó pascua xihín ndo —nacachi Jesús xihín ná.

<sup>17</sup> Anda já natiiin a in vaso nu ñúhu téo uva ta nandiquiáhva ndixahvi nu Ndíóxi. Ta já nacachi a já xihín ña xíca tuun xihín á:

—Coho ndó dö ñúhu ini vaso yóho ta cahnda java ndó dö nu táhan ndó. <sup>18</sup> Jáchí a ndicó coo ga i coho i téo uva janda quiáhva ná xínú coo quíví cacomí Ndíóxi cuéntá sahá ñayivi —nacachi Jesús xihín ná.

<sup>19</sup> Tá nandhi natiiin a pan ta nandiquiáhva ndixahvi nu Ndíóxi sahá. Anda já nasañhnda java ñá já nasañan ña nuú ña xíca tuun xihín á cán já nacachi a já xihín ná:

—Mé pan yóho cíú á tátuhun yiquí cuñu i jáchí ndiquiáhva i mí i quivi i sahá ndihí ndó. Xíní ñúhú caja ndó ña yóho ña

ndicuhun ini ndó ña naxihí i sahá ndo – nacachi Jesús xihín ná.

<sup>20</sup> Tá sa nandihí naxijíni na ta já natiin a vaso nu ñihu tó uva ta já nacachi a já:

—Dó ñihu ini vaso yóho cíú dó tátuhun níi i jáchi cahní ná yehé ta cuítá níi i sahá ndihí ndó. Ta xihín ña yóho xínu coo nuú tuhun nasahan Ndióxi nuú ñayivi sanahá tá nacachi a jácacu a ñayivi.

<sup>21</sup> Cuni joho vaha ndó ná cahán i xihín ndo. Nu mesa yóho íin coo da jicó tuhún yehé. <sup>22</sup> Jáchí jandá sanahá násacu ini Ndióxi ña ndítahan ndoho ini yehé, da nacchindahá mé a nduu ñayivi. Joo ndáhví nacuu da jicó tuhún yehé –nacachi Jesús.

<sup>23</sup> Xihín ña nacachi Jesús yóho nacasaáhá ná xíca tuun xihín á cán ndáca tuhún táhan na sahá ndá da cíú da sácú ini cuhun jicó tuhún ñahá.

Ndítuhún *jhví xihín táhan ná xíca tuun xihín Jesús*

<sup>24</sup> Tá nandihí já nacasaáhá ndítuhún *jhví xihín táhan dá xíca tuun xihín Jesús cán sahá ndá da cíú dá íin chágá sahá*. <sup>25</sup> *Sahá ña cán quéa nacachi Jesús já xihín ndihí da cán:*

—Ndijáá ñuyíví sáhndá rey chuun nuú ñayivi tá quiáhva cúní mé dá. Tajári cúní da ña ná cachí ñayivi sahá dá ña cíú dá dá caja vaha. <sup>26</sup> Joo coó ndítahan coo ña cán tañu mé ndó. Ña ndítahan caja ndó quéa tá in ndó cúní ndó cacuu ndó da íin chágá sahá, xíní ñihu jánuu ndáha ndó mé ndó tátuhun dá lohu chágá nuú ndíhi ndó. Ta ndá da cúní cahnda chuun, xíní ñihu cacuu da tátuhun in dá caja ndíví nu mesa xitoho da. <sup>27</sup> Mé ndó sa cándaa vaha ini ndó ña íin chágá sahá dá íin coo nu mesa a juú ga dá caja ndíví ñahá. Joo yehé najánuu ndáha i mí i ta nanduu u tátuhun in dá caja ndíví nu ndó.

<sup>28</sup> *Ndóhó cíú ndó ná nasanduu tuun xihín i nu tóco ndihí ña *jhví naquixi nuú i*, <sup>29</sup> *Sahá ña cán quéa tá quiáhva nacaya tátá i ñamani xihín i ña ná cacomí i cuéntá sahá ñayivi quiáhva já caja i ñamani xihín ndó* <sup>30</sup> *ñá ná ndítútum ndó canduu ndó xihín i tá ná cacomí i cuéntá sahá ñayivi.* Ta já ná cuu caja víi ndó sahá ná naquixi ndíhxu ivi táchndá ná naquixi chichí Israel –nacachi Jesús xihín ná.*

Cáxi tuhun Jesús ña chijehé tuhun Pedro ña xíní dá mé á  
(Mt. 26:31-35; Mr. 14:27-31; Jn. 13:36-38)

<sup>31</sup> Anda já nandicahán Jesús já nacachi a já xihín Pedro:

—Simón, cuni joho vahún. Jáchí naxica Satanás, mé tiñahá sacuahá ñamani ña ná coto ndojó rí tóco ndihí ndó tá quiáhva jáxi xi na trigo. <sup>32</sup> Joo sa naxica tahví i nu Ndióxi sahá yóhó, Simón já ná a jándacoún ña cández inún yehé. Ta tá sa nandicó coo inún xihín ña cajún jan, ndítahan chindeún java ga ná cández iní yehé já ná coo ndacú nu íchi cuéntá mí i –nacachi Jesús xihín dá.

<sup>33</sup> Anda já nanducú ñehe Pedro tuhun nu Jesús já nacachi da já xihín á:

—Candehé ndo, xitoho i. Yehé sa íin tiahva i cuhun i vecaa xihín ndo. Ta jandá ná cahní na yehé xihín ndó tá cúní na jáchi sa íin tiahva vi –nacachi da xihín Jesús.

<sup>34</sup> Já nacachi Jesús já xihín dá:

—Candehé Pedro ná cahán i ña ndaa xuhun. Mé quiyí viti tá cámaji cana chéle já uní tañu chijehé tuhún sahá i ta cahún ña co xíní tohún yehé –nacachi Jesús xihín dá.

Cáxi tuhun Jesús ña sa cayati hora ndoho ini a

<sup>35</sup> Tá nandihí já nandaca tuhún Jesús ná xíca tuun xihín á cán já nacachi a já xihín ná:

—Jihna nacchindahá i ndohó cuhun ndó cahán ndó tuhun Ndióxi ta nacachi i xihín ndó ña ná a cáñehe ndó yátí ni jihuún ta ni inga ndusa a cáñehe ndó cuhun xihín ndó. Á nandimaní ñaha nu ndó tá nasaahan ndo já –nacachi Jesús xihín ná.

Já nacachi na já:

—Ni in ñaha coó nandimaní nuú nde –nacachi na.

<sup>36</sup> Anda já nacachi tucu a já xihín ná:

—Joo viti coó ga ña cán coo. Viti cächí i xihín ndó ña tá íin yátí nu ndo, xíní ñihu cañehe ndó ña cuhun ndo. Cañehe ndó jihuún ndo tá ná quee ndó cuhun ndo. Ta tá coó machiti nu ndó, xíní ñihu jicó ndó jahmá ndéé ndo já cueen ndó machiti ña ná coo tiahva ndó. <sup>37</sup> Jáchí sanahá nacahyi a nu libro yii Ndióxi ta sahá yehé nacahan tá nacachi a já: “Nacachi ñayivi cíú dá taa quini sahá ña cán quéa nachitáhan na dá xihín ñayivi quini.” Tóco ndihí ña nacahyi nuú tuhun Ndióxi sahá yehé sanahá xíní ñihu xínu coo a viti –nacachi Jesús.

<sup>38</sup> Anda já nacachi ná xíca tuun xihín á cán já:

—Candehé ndó, xitoho nde. Yóho ñéhe nde ivi machiti —nacachi na.

—Sa íin vaha —nacachi Jesús xihin ná.

*Cuahán Jesús Getsemaní cacaq tähví a nu Ndióxi*

(Mt. 26:36-46; Mr. 14:32-42)

<sup>39</sup>Tá nandihi já naquee Jesús cuahán yúcu yito Olivo nu sá sahan tuun a cacaq tähví a nu Ndióxi. Ta já ndíco ndihu ná xica tuun xihin á cán jatá cuahán na. <sup>40</sup>Ta tá sá naxinu coo na cán já nacachi a já xihin ná:

—Cacaq tähví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó —nacachi Jesús xihin ná.

<sup>41</sup>Tá nandihi já naatavá xoo Jesús mé á tañu ná cán já našanahát tähuhun in quiáhava nu xínu coo in yuu tá jání yó ña xihin ndáha yo. Quiáhava já naçaxicá mé á tañu ná cán já naçaxítí a xicaq tähví a nu Ndióxi. <sup>42</sup>Já nacachi a já:

—Tátá Ndióxi, á cuu caja ndó ñamani já ná a ndohó i ña ihví ndivaha ña vaxi nuú i ndohó i. Joo ná coo tá íin cúní mé ndó ná a cóo toho ña cúní yehe —cáchí Jesús xicaq tähví a.

<sup>43</sup>Anda já naçanáha in tátó Ndióxi indív já naxinu a sáhan tähuhun ndeé ini Jesús.

<sup>44</sup>Ta naçasáhá ndohó ndivaha ini Jesús jáchi naçacuéha ini a. Sáhá ña cán quéa nanducú ndeé chágá ví a xicaq tähví a nu Ndióxi. Ta chí ndícaá mé teen á nu ñíihu ta dó cán cùu dó tähuhun nií cùu nu ñíihu.

<sup>45</sup>Ta nandihi naçicaq tähví a nu Ndióxi já nandacaq ndichi a já naquee a cuahán nu ndúu na xica tuun xihin á cán. Ta nanditahan mé á ná ndúu na quíji na. A juú quiáhava cándíi ini na sahá ña cán nanaá ini na naquiji na. <sup>46</sup>Anda já nacachi a já xihin ná:

—Ndá cuéntá quéa quíji ndo ndúu ndó. Cuáhán ndacoo ndó ta cacaq tähví ndó nu Ndióxi já ná a ndícava ndó nuú cuachi tá ná coto ndojó tiñáhá ndohó —nacachi Jesús xihin ná.

*Tá natiin na Jesús*

(Mt. 26:47-56; Mr. 14:43-50; Jn. 18:2-11)

<sup>47</sup>Janda cahán chá va Jesús xihin ná xica tuun xihin á cán cándichi a já naxinu cuahá ndivaha ñayivi nu íin a. Ta in tähah dä uxu ivi xica tuun xihin á, dä naní Judas cán, dä cán cùu dä ndáca ñayivi vaxi da. Ta nacayati da tatí yúhu dá sajóho Jesús.

<sup>48</sup>Anda já nacachi Jesús já xihin dä:

—Judas, tatí yúhuun sajóho i tähuhun dä quíhví ini yehe. Joo xihin ña cajún jan ndíquiahvún yehe ndahá ná coo cúní yehe, dä nachindahá Ndióxi nduu ñayivi —nacachi Jesús.

<sup>49</sup>Tá naxini tócoo ndihu ná ndúu xihin Jesús cán ña cùu já naçasáhá ndácaq tähuhun ná mé á já nacachi na já:

—Á cúní ndó, xitoho nde ña ná ndicuita nde xihin machiti cani táhan nde xihin ná —nacachi na.

<sup>50</sup>Joo in tähah dä xica tuun xihin Jesús cán najándicuehe dä in dä cùu mozo dä sacuahá nuú jutu cán jáchi nacituhun dä joho xoo cuáha da. <sup>51</sup>Joo já nacachi Jesús já xihin ná:

—Sa íin vaha. A cání táhan ndó xihin ná —nacachi Jesús.

Tá nandihi já naçani ndaa ndáha mé á joho mozo cán já nandaja vaha mé á da. <sup>52</sup>Ta naçasáhá cahán Jesús xihin ná sacuahá nuú jutu cán xihin ná sacuahá nuú policía ndáá veñuhu xihin ná sacuahá veñuhu cán, mé ná naçasaqá tiin na Jesús já nacachi a já xihin ná:

—Cája ndó xihin i tähuhun cája na xihin taa cuihiná jáchi naqueta ndó vaxi ndó tiin ndó yehe xihin machiti ta xihin yito. <sup>53</sup>Joo coó a ná caja toho ndó xihin i tá naşahin i tañu ndó veñuhu cán. Joo núná nuú ndó viti caja núu ndó jáchi naşahen Ndióxi ñamani ña ná tiin ndó yehe. Jáchi naçuaá viti ta chíndeé tiñáhá sacuahá ndohó caja ndó ña núu —nacachi Jesús xihin ná cán.

*Tá nacijehé tähuhun Pedro ña xíni dä Jesús*  
(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup>Anda já naçin na Jesús. Já ñéhe na a cuahán ná vehe dä cùu sacuahá nuú jutu cán. Ta xícá xícá ndíco Pedro jata ná cuahan dä. <sup>55</sup>Ta tá naxinu coo ñayivi cán yuhú yehe dä cùu sacuahá nuú jutu cán já nandicahmi na ñíihu naçacoo na xítúni ña. Já naxinu coo ri Pedro naçacoo da tañu ná cán xítúni dä. <sup>56</sup>Joo ndaja coo in ñáñáha caja chún vehe jutu sacuahá cán naxini ñá íin coo da xítúni da yávi núhu cán. Ta naçasáhá sándezhe ñá nu dá já cáchí ñá já:

—Da xica tuun xihin Jesús cùu ri dä íin coo yóho va —nacachi ñá cán.

<sup>57</sup>Joo naçasáhá Pedro chíjehé tähuhun dä já nacachi da já:

—Candehé, ñáñáha. Co xíni toho i ndá da cúú da jan —nacachi Pedro xihín ñá cán.

<sup>58</sup> Chá va ta naxini inga dñataa Pedro ta já nacachi da já xihín dá:

—In táhan da xíca tuun xihín Jesús cáá cúú ri yóhó va —nacachi da cán xihín Pedro.

Anda já nacachi Pedro já:

—Uhun. A juú toho táhan na cán cíú yehe —nacachi da.

<sup>59</sup> Ta tá sa nayaha tátuhun in hora já nacachi inga dñataa já:

—Mé a ndaa da xíca tuun xihín Jesús cíú ri da yóhó va jáchí cíú dá da estado Galilea.

<sup>60</sup> Anda já nacachi Pedro já xihín dá:

—Co xíni toho i ndá sahá cahún —nacachi Pedro.

Tá chí mé hora já nani cáhan Pedro xihín dñataa cán já nacana chéle. <sup>61</sup> Anda já nandicoto nihni Jesús násandehé a nu Pedro. Tá nandicuhun ini Pedro sahá tühun nacachi Jesús xihín dá tá cámání tiin na a tá nacachi a já: “Mé quiví viti tá cámání cana chéle já uní tañu chijéhé tühun sahá i ta cahún ña co xíni tohún yehe”, nacachi a xihín dá. <sup>62</sup> Anda já naqueta Pedro cuahan dá já nacashá sácu a ndivaha da.

Tá sácu ndaa na Jesús  
(Mt. 26:67-68; Mr. 14:65)

<sup>63</sup> Ta java dñataa, da ndúu ndáá Jesús cán nacasháh da sácu ndaa da ña. Ta nacani ñahá da. <sup>64</sup> Nächicají da nuú á ta nacani da jahndá nuú á já nacasháh da ndáca tühun da mé a já cachí da já xihín á:

—Cachi yo já nacani jahndá nuun —cachí da xihín á.

<sup>65</sup> Ta cuahá chágá nuú ña nuú cáhan na xihín á ña cánahá na xihín á.

Ndája ndichí na Jesús  
(Mt. 26:59-66; Mr. 14:55-64; Jn. 18:19-24)

<sup>66</sup> Ta tá sa natívi já nataca na sacuahá nuú na Israel cán xihín na sacuahá nuú jetu cán xihín na jánahá ley Moisés cán viti. Já ñéhe na Jesús cuahan na cavií sahá nuú na cán. Ta tá sa nanditútú ndihi na cán ndúu na já nandacá tühun na Jesús já nacachi na já xihín á:

<sup>67</sup> —Caxi tühun xihín nde á cíúun Cristo, da nachindahá Ndióxi cacomi cuénta sahá ñayivi —nacachi na xihín á.

Anda já nacachi Jesús já xihín ná:

—Tá ajan ná cachi i xihín ndo ta chí a cándusa toho ndó yehe. <sup>68</sup> Ta caja i cuénta a cáhan ndó xihín i tá ná ndáca tühun i

ndohó. Ta caja i cuénta ni a cándusa ndó janí ndó yehe. <sup>69</sup> Joo viti sa natandaa quiví cahún yehe, da nachindahá Ndióxi nduu ñayivi ta coo i xoo cuáha Ndióxi indíví jáchí fin ndéé mé a caja tocó ndihi ñaha —nacachi Jesús xihín ná.

<sup>70</sup> Anda já nacasháh tocó ndihi na cán ndáca tühun na mé a já nacachi na já:

—Á jivi ndusa yóhó cíúun in tühun jiní já jahyi Ndióxi, dá já —nacachi na:

Anda já nacachi Jesús já xihín ná:

—Ajan. Jivi cíú u tá fiín cachí ndó jan —nacachi Jesús.

<sup>71</sup> Anda já nacasháh tocó ndihi na cán cáhan na já nacachi na já:

—Co ndítahan ndinducú chágá yó ñayivi cacuu testigo nuú ña cáhan da yóhó jáchí sa xíni joho í ña cáhan da ta chícaqan da cuachi jatá mé dá —nacachi na cán.

## 23

Tá nandiquiahva na Jesús ndáha Pilato

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Anda já nandacá ndichi ndihi na cán já ñéhe na Jesús nacahán na nu Pilato. <sup>2</sup> Ta cán nacasháh na chícaqan na cuachi jatá já nacachi na já sahá:

—Natiin nde da yóhó jáchí xíca nuu da jandiváq da ñayivi nuu nde. Cáchí da ña co ndítahan toho nuú nde chahvi nde jiuuhún cuénta impuesto nuú da cómí cuénta sahá yó nuu Roma. Ta cáchí da ña mé dá cíúu dá Cristo, da chindahá Ndióxi cacomi cuénta sahá ñayivi. Ta cáchí da cíúu dá in rey —nacachi na cán xihín Pilato.

<sup>3</sup> Anda já nandacá tühun Pilato Jesús já nacachi da já xihín á:

—Á mé a ndaa cíúun in rey, da cómí cuénta sahá na Israel —nacachi da cán xihín Jesús.

Anda já nacachi Jesús já xihín dá:

—Ajan. Jivi cíú u tá quiähva cachí ndó jan.

<sup>4</sup> Anda já nandicahán Pilato xihín na sacuahá nuú jetu cán ta xihín ñayivi ndúu cán já nacachi da já:

—Co ndíñehé mí vi ndá cuachi quéa na caja da yóhó —nacachi Pilato.

<sup>5</sup> Joo ñayivi cuahá cán nacasháh cayuhú cóhó chágá na já cachí na já:

—Mé da jan naxica nuu da jandiváq da tocó ndihi ñayivi estado Judea xihín ña jánahá da nu ná. Ta janda Galilea nacasháh

da jádivaa da ñayivi. Ta viti naxinu da ñuu nde cája da já —nacachi ñayivi cayuhú na.

*Tá ñéhe na Jesús cuahen na ny Herodes*

<sup>6</sup>Tá naxini joho Pilato ña nacachi ñayivi cán já nandaca tuhún da na á cúu Jesús da estado Galilea. <sup>7</sup>Ta tá nacachi na ña ndusa cúu Jesús da estado Galilea já nachindahá Pilato Jesús ña ná cuhun a nyú Herodes, da cúu gobernador nyú ñayivi estado Galilea. Jáchí mé tañu já nasañin tóo da ñuu Jerusalén. <sup>8</sup>Tá naxini Herodes Jesús já nacají íní da jáchí sa janda jihna cuni da Jesús cúní da. Jáchí cuahen tañu nandicani ñayivi nu dá sahá ña caja Jesús. Ta cúní da cuni da ña ná caja Jesús in ñaha xituhún. <sup>9</sup>Ta cuahá ndivaha ñaha nandaca tuhún Herodes cán Jesús joo coó nanducú ñehe a tuhun nu dá. <sup>10</sup>Ta tañu ñayivi cán ñuhu ri na sacuahen nyú jutu xihín na jánahá ley Moisés ta chí a juú quiáhva ndúcú ndéé na chícaan na cuachí jata Jesús. <sup>11</sup>Anda já nacasáhá Herodes cája xíxi da xihín Jesús ta quiáhva já caja ri na cúu soldado da cán xihín á. Ta najácdixi na Jesús xihín jahmá lánda tátuhun jahmá sándixi in rey. Nacaja na já xihín a jáchí cúní na cuacu ndaa ñahá na. Tá nandihí já nachindahá tucu Herodes Jesús ña ná cuhun a nu Pilato. <sup>12</sup>Ta chí mé quiví já nandique táhan máni Herodes xihín Pilato jáchí jihna co cúní táhan toho da, nduu.

*Sácú ini na ndaja caja na cahni na Jesús  
(Mt. 27:15-26; Mr. 15:6-15; Jn. 18:39-19:16)*

<sup>13</sup>Anda já najánditaca Pilato na cúu sacuahen nyú jutu cán xihín na jutixia xihín java ñayivi. <sup>14</sup>Já nacachi da já xihín ná:

—Mé ndó ñéhe ndó da yóho nacasaña da nyú i. Ta cachí ndó ña xíca nuu da jándivaa da ñayivi. Joo sa naxini ndó ña nandaja ndíchí i da nu ndo. Ta ni in túhún toho cuachi táhan ña cahán ndó sahá jan coó nanditanan i nu dá. <sup>15</sup>Ta ni Herodes coó cuachi na ndíñehé jata dá sahá ña cán quéa nanducú ñehe da da nyú i. Cuni joho vaha ndó: Coó sahá cúu á ña quiví da. <sup>16</sup>Ña caja i quéa jándoho i ini da. Anda já janí vi da cuhun da —nacachi Pilato cán xihín ná.

<sup>17</sup>Tañu víco pascua cán nasañin costumbre nu Pilato janí da in táhan da ñuhu vecaa ña ná candoo vaha da nuú ñayivi. <sup>18</sup>Sahá ña cán quéa nacasáhá cayuhú tóco ndihu ñayivi nu dá já cachí na já:

—Cahní ndó da jan ta janí ndó Barrabás nuú nde —cáchí na cayuhú na.

<sup>19</sup>Mé Barrabás yóho ndácaan da vecaa jáchí nájátaca cuahen da ñayivi ta nandicuña da xihín na sacuahen ñuu Jerusalén cán ta cúu dá da sahní ndii. Sahá ña cán quéa ndácaan da vecaa. <sup>20</sup>Joo cúní Pilato janí da Jesús sahá ña cán quéa nacahan tucu da xihín ñayivi. <sup>21</sup>Joo ví ga ví nacasáhá na cán cayuhú cohó na nu dá já cachí na já:

—Cata caa ndó da ndíca crúxu. Cata caa ndó da.

<sup>22</sup>Ta anda já nacahan tucu Pilato ña cúu uní xihín na já nacachi da já:

—Coó toho ña núa nahá nacaja toho da yóho. A cuú cahnda i chuun ña ná cahni na da jáchí coó cuachi da. Ña caja i quéa cahnda i chuun ña ná jándoho na ini da. Anda já janí vi da —nacachi Pilato.

<sup>23</sup>Joo ví ga ví ndúcú ndéé na cán cayuhú na ña ná cata caa na Jesús ndíca crúxu. Ta xihín ña ndúcú ndéé na cán cahán na ta ndúcú ndéé ri na sacuahen nyú jutu cán cahán na. Sahá ña cán quéa natahnu ini Pilato. <sup>24</sup>Ta nacandúsa da caja da ña cúní na cán xihín Jesús. <sup>25</sup>Ta najaní da Barrabás jáchí da cán nacahan mé na sahá ña ná janí da. Ta mé Barrabás yóho nasañacan da vecaa sahá ña najándivaña da ñayivi ta sahá ña nasañni da ndii. Anda já nandiquáhva da Jesús nu ná ña ná caja na tá cúní mé na xihín á.

*Tá nacata caa na Jesús ndíca crúxu  
(Mt. 27:32-44; Mr. 15:21-32; Jn. 19:17-27)*

<sup>26</sup>Ta tá ñéhe na Jesús cuahen na cata caa na a já naxini na in da naní Simón, da ñuu Cirene vaxi da ndíhvi da ñuu Jerusalén. Ta já nájcuhun ndáhá na da ña ná ndacojo da crúxu nyú tacaa Jesús cán. Ta nandico da Jesús cuahen da.

<sup>27</sup>Ta a juú quiáhva cuahen ñayivi ndíco jata cuahen na. Ta cuahen najihí sácu ndivaha na cayuhú na cuahen na jatajáchí tálhndá ini na sahá. <sup>28</sup>Joo nandicoto nihni Jesús nu ná já nacachi a já xihín ná:

—Najihí, na ñuu Jerusalén, a cuacu toho ndó sahá yehe. Sahá mé va ndó ta sahá jahyi ndó viti ndítahan cuacu ndó. <sup>29</sup>Jáchí vaxi quiví já casáhá ñayivi cache na já: “Tahví nacuu najihí, na coó nacacu jahyi. Ta tahlví nacuu na coó jahyí chíchi”, cache na jáchí ndóho ndivaha ini na. <sup>30</sup>Mé tiempo já casáhá ñayivi cache na já: “Vá ná cuyu

yúcu jata yo já ná quivi”, cache na. Ta cache na xihín java yúcu: “Chijéhé ndó ndehe”, já cache na sahá ña ndóho ndivaha ini na.

<sup>31</sup> Candehé ndó ndá quiáhva jándoho na ini i ta cíu u tátuhun in yitó cuí, dó tacú. Ta cája xíxi na xihín i joo xíxi chágá caja na xihín ndóho jáchi cíu ndó tátuhun in yitó chí —nacachi Jesús xihín na cán.

<sup>32</sup> Ta tá ñéhe na Jesús cuahen cata caa na a ndíca crúxu já ñéhe ri na ivi da cíu da quini cuahen na cata caa na da já ná quivi da xihín á. <sup>33</sup> Ta tá naxinu coo na in nuú namí láss yíqu jíni ndíj cán nacata caa na a ndíca crúxu. Ta nacata caa ri na ivi da quini cán va: in da xoo cuáha Jesús ta inga da xoo íti a. <sup>34</sup> Ta tá cáta caa na Jesús ndíca crúxu já nacachi a já:

—Tátá Ndióxi caja cáhnu ini ndó sahá ña cája ñayivi yóho xihín i. Jáchí co xíni na ndíá cája na —nacachi Jesús.

Ta ndaja coo java soldado cán nacásáhá da sájiquí da saha jáhmá Jesús já quéa ndá da ná quee vaha ndiquehe da jáhmá á. <sup>35</sup> Ta ñayivi ndíu cán sándezhe na nu tácaa Jesús ndíca crúxu nani na cíu jutixia nascuita na ndíu na sácu ndaa ñahá cán já cachí na já:

—Najácacu da java ga ñayivi. Ta viti ná jácacu da mé dá tá mé a ndaa cíu dá Cristo, da nacaxi Ndióxi cacomí cuéntá sahá ñayivi —cachí na sácu ndaa ñahá na.

<sup>36</sup> Ta jári java soldado sácu ndaa da Jesús ndíu da. Ta nacayati da cán nu Jesús já nachiñee da vino, dó iyá yúhu á ña ná coho a do. <sup>37</sup> Ta já cachí da já cayuhú da nu á:

—Tá ta mé a ndaa cíu rey, da cómí cuéntá sahá na Israel chindeé mún já ná a quívün —cachí da.

<sup>38</sup> Ta nacchindaa na in tabla ndíca crúxu yati jíni Jesús ta nu mé tabla cán nacayí na: “Da yóho cíu rey nuú na Israel.” Ta mé ña yóho nacayí na ña tuhun griego, ña cahen na nación Grecia xihín tuhun latín, ña cahen na nuú Roma xihín tuhun hebrero, ña cahen na Israel viti.

<sup>39</sup> Ta in táhan da quini tácaa ndíca inga crúxu yati jíni á cán nacásáhá da caháhá da xihín á. Já cachí da já:

—Tá mé a ndaa cíu Cristo, da nacchindahá Ndióxi cacomí cuéntá sahá ñayivi chindeé mún já ná a quívün. Ta chindeé ndehe já ná a quívün ndé —cachí da.

<sup>40</sup> Joo inga táhan da quini tácaa inga xoo jíin a cán nacásáhá da jánaní da da cahen xihín Jesús cán já nacachi da já xihín dá:

—Á co yíhví tohún Ndióxi. Jáchí in cíu yóho ndóho iní yóho <sup>41</sup> joo mé Jesús yóho coó toho cuachi nacaja da. Ta mé cuití ví ndítahan ndoho iní ña ná chahví sahá cuachi nacaja í —nacachi da cán jánaní da inga da tácaa cán.

<sup>42</sup> Tá nandihí já nacachi da já xihín Jesús:

—Jesús, caja ndó ñamaní ndicuhun ini ndó sahá i tá ná casáhá ndó cacomí ndó cuéntá sahá ñayivi —nacachi da xihín Jesús.

<sup>43</sup> Anda já nacachi Jesús já xihín dá:

—Mé a ndaa ná cahen i xuhun ña mé quivi viti cuhún coún xihín i indíví —nacachi a xihín dá.

Tá naxihí Jesús

(Mt. 27:45-56; Mr. 15:33-41; Jn. 19:28-30)

<sup>44</sup> Ta tátuhun caxiví já nacanaá ní cuú ñuyíví. Ta janda caa uní sahini já nacásáhá nandiyehé tucu. <sup>45</sup> Nanaá nuú cандии. Ta janda já nandatá java ndaa jáhmá ndee ná tácaa veñühu cáhnu ñuu Jerusalén ña sají nuu nuú yií ndivaha. <sup>46</sup> Anda já nacayuhú cohó Jesús já cachí a já:

—Tátá Ndióxi, ndáhá mé ndó jándacoo i ínima i.

Ta tá nacachi a ña yóho já naxihí va.

<sup>47</sup> Ta ndaja coo da sáhndá chuun nuú soldado cuéntá Roma cán tá naxinu da tóco ndihi ña nayaha yóho já nacásáhá cája cáhnu da Ndióxi já nacachi da já:

—Mé a ndaa táhyí coó toho cuachi da yóho —nacachi da.

<sup>48</sup> Ta tóco ndihi ñayivi nacanduu cán, ña naxini nuú naxihí Jesús jandá johó cání ña yíca ndíca na sahá ña tálndá ini na sahá Jesús já cuanúhu va na. <sup>49</sup> Joo tóco ndihi na xíncá na sándezhe ña. Ta tañu na cán nacanduu ri najíhí táhan na naquixi xihín á janda estado Galilea cán.

Tá náchicqan na yíqu cuyu Jesús iní cava

(Mt. 27:57-61; Mr. 15:42-47; Jn. 19:38-42)

<sup>50</sup> Ta ndaja coo nacahijin in dataa naní José, da ñuu Arimatea ña ndácaan estado Judea cán. Ta cíu dá in taa vaha, da cája ña ndaa cuití va. Ta cíu da in táhan ña cómí cuéntá sahá na Israel. <sup>51</sup> Mé José yóho coó natahan ini da xihín ña nacaja java ga na cán jáchi ndáti da casa quivi cacomí Ndióxi cuéntá sahá ñayivi. <sup>52</sup> Ta

nasahán dà cahán ndahví dà xihín Pilato ná ná ndiquiahva da yíquí cuñu Jesús ná dá. <sup>53</sup> Ta chí nasaḥan Pilato ñamani nü dá chí nasaḥan dà najánuu da yíquí cuñu Jesús ndica crúxu cán. Já nachitíví ñahá dà xihín jáhma vaha ta já nachicaan ñahá dà ini in yávi ndácaan ndica cáva. Ta ni in túhun toho ndijí a ñáha chícaan ná ini mé cáva cán. <sup>54</sup> Mé quíví cán nasaċuu a quíví cája ndíví ñayivi ñahá vehe na jáchí ja chá cacuu a quíví ndíquehe ndéé ná sahá ñá cán quéa ndíhí ini na jaxinu na chuun caja na.

<sup>55</sup> Ta najihí, na nasañdico jata Jesús janda tá naquixi a chí estado Galilea cán nasaḥan ná sándezé ná ndica cáva nuú najáqueta nuu na yíquí cuñu Jesús cán. <sup>56</sup> Ta tá nasaq ná vehe na já nacaja ndíví ná perfume xihín java ga ñaha támí sáhan ná ná jándicucho na yíquí cuñu Jesús. Ta inga quíví itaān nandiquehe ndéé ná tá quiahva nasaḥhanda Ndióxi caja na janda sanahá.

## 24

Tá nanditacu tucu Jesús

(Mt. 28:1-10; Mr. 16:1-8; Jn. 20:1-10)

<sup>1</sup> Ta tá sa nayaḥa quíví ndíquehe ndéé ná ta naha chá quíví domingo já naquee tucu najihí cán cuahán ná nuú nachicaan ná yíquí cuñu Jesús ini cáva cán. Já néhe na perfume, dó nacaja tiāhva na cán. Ta ndáca táchan java ga najihí xihín ná cuahán ná. <sup>2</sup> Ta tá naxinu coó na cán já naxini na ñá coó ga yuu ndájí ndaa yuhú cáva nuú nasañdaçaan yíquí cuñu Jesús. <sup>3</sup> Anda já naquihvi na ini cáva cán joo coó ga yíquí cuñu Jesús nanditahán na. <sup>4</sup> Ta chí nayihvi ná ta co xíni ná ndíá caja na. Ta jonáá va naxini na ndítá iví dataee yati jíin ná. Ta a juú quiahva ndatoo yéhe jáhmá ndíxi dà cán. <sup>5</sup> Ta chí a juú quiahva yílhí najihí já nacandyai na janda quiahva naxinu jíin ná nu ñuhu. Anda já nacachi dàtaa cán já xihín ná:

—Co ndítahán toho ndinducú ndo in dátacu tañu nü sándezé ndii. <sup>6</sup> Coó toho Jesús iin yóho jáchí sa nanditacu va. Xíni ñuhú ndicuhun ini ndó ñá nacachi a xihín ndo tá nasaḥin a estado Galilea. <sup>7</sup> Mé á cúú á dà nachindahlá Ndióxi nduu ñayivi ta sa nacachi a xihín ndo ñá ndiquiahva na mé á ndahá ñayivi quini. Ta nacachi a xihín ndó ñá cata caa na a ndica crúxu ta tá ná xíni uni quíví já nditacu tucu a —nacachi dàtaa cán.

<sup>8</sup> Anda já nandicuhun ini najihí cán ñá nacachi Jesús xihín ná. <sup>9</sup> Chí naquee na cuahán ná já nandicani ndihí na sahá ñá yóho nuú ná uxu in naxica tuun xihín Jesús xihín nuú java ga ná ndíu cán viti. <sup>10</sup> Mé najihí cán, ná nasaḥan cáxi tuhun ñá yóho nuú ná apóstol cán nasaċuu María, ná ñuu Magdala xihín Juana xihín María, ná cíu nánan Jacobo xihín java ga najihí. <sup>11</sup> Joo ná apóstol, ná naxica tuun xihín Jesús cán nacaḥán ná ñá cuéntó uun va quéa. Saha ñá cán quéa coó naxeen na candusa na ñá nacachi najihí cán xihín ná.

<sup>12</sup> Joo ndaja coo naqueta Pedro xíni da cuahán dà sándezé dà ini cáva nuú nachicaan ná yíquí cuñu Jesús cán. Naxini da jáhma vaha ñá nasaṭiví a cán joo coó toho yíquí cuñu a. Ta chí nacatontó dà naquee da cuanúhu dà vehe da.

Cátahan Jesús cuahán xihín iví ná cuahán chí ñuu Emaús  
(Mr. 16:12-13)

<sup>13</sup> Ta mé quíví já iví táchan ná cíu cuéntá Jesús naquee na cuahán na in ñuu naní Emaús. Mé ñuu cán néhe táchan tátuhun uxu in kilometro xihín ñuu Jerusalén. <sup>14</sup> Ta ndítuhún ná cán cásahan ná sahá tóco ndihí ñá nacuu ñuu Jerusalén cán. <sup>15</sup> Ta nani ndítuhún ná cásahan ná já nacayati Jesús nü ná já nacásahá xíca mé á xihín ná cuahán ná. <sup>16</sup> Ta vatí sándezé ná cán nü Jesús joo coó nacuu ndicuni na mé á. <sup>17</sup> Anda já nandaca týhún Jesús ná cán já nacachi a já:

—Ndíá ndítuhún ndó cásahan ndo. Ta ndavaha Cácuéha ini ndó cásahan ndo —nacachi a xihín ná.

<sup>18</sup> Já in táchan ná cán, dà naní Cleofas nanducú néhe da tuhun nü á já nacachi da já:

—Níí cíu va nandicuita nuu tuhun sahá ñá nacuu ñuu Jerusalén tañu quíví yóho. In túhún yóhó tañu ná ndíu cán cíu dà co xíni ñá nayaḥa —nacachi da.

<sup>19</sup> Anda já nacachi Jesús já xihín ná:

—Ndíá nacuu, vaha.

Já nacachi ná cán já xihín á:

—Naquixi in dà naní Jesús chí ñuu Nazaret ta nasaċuu da in profeta cahnu ndivaha jáchi cuahá ndivaha ñá náhnu nacahán dà. Ta cuahá ndivaha ñá náhnu nacaja da nü Ndióxi xihín nuú ñayivi. <sup>20</sup> Joo ná sacuahá nuú jutu xihín ná jutixia ñuu nde natiiin na mé Jesús ta já nandiquiahva na dà ñá ná cahní ná dà ta já nacata caa na dà

ndica crúxu. <sup>21</sup>Joo mé nde nacahán nde ña mé Jesús cán cacuu da dà ndáti nde chindeé dà ndehe, na Israel yóho já ná a caja xíxi ga na ñuu Roma xihín nde, nacahán nde. Joo nandihí va viti jachí sa nayaha uní quiyi naxihí dà cán. <sup>22</sup>Vatí naqueta java najhlí tañu nde yóho najyihví na ndehe jachí naha chá nasañan na nuú nanduxu Jesús cán. <sup>23</sup>Ta cachí na ña coó ga yíquí cuñu Jesús ndácaan cán. Sahá ña cán quéa naxinu na nuú nasañduu nde ta nandicani na nuú nde ña nacanáha java tátó Ndióxi nu ná ta nacachi na ña tacú va Jesús. <sup>24</sup>Ta java táhan dà xíca tuun xihín nde cán nasañan da sándezé dà ini cáva cán ta chí já ndusa cáa tá quiyahva cachí najhlí. Ta co mé Jesús naxini na —nacachi na cán xihín Jesús.

<sup>25</sup>Anda já nacachi Jesús já xihín na cán:

—Ñayivi tóntó ndivaha cúu ndó. Jachí yáncá ndivaha já xínu ini ndó candusa ndó ña ndaa ña nacahan na profeta sanahá. <sup>26</sup>Á co cándaa ini ndó ña jihna ñúlhú nanditanu nuú dà cúu Cristo ndoho ini da ta tá sa nandihí já ndínehe jíco Ndióxi dà já ndacojo da chuun cacomí dà cuénta sahá ñayivi —nacachi Jesús.

<sup>27</sup>Anda já nacásahá ndicani a nu ná ña nacahí nuú tuhun Ndióxi nu cahán sahá tóco ndihi ña ndítahan ndoho da cúu Cristo. Nacásahá ndicani a jandá libro nacahí Moisés sanahá janda quiyahva naxinu a nu tóco ndihi libro ña nacahí na profeta sanahá.

<sup>28</sup>Ta tá naxinu coo na ñuu nuú cuahan na cán já nacaja Jesús tátuhun yáha saa cuahan. <sup>29</sup>Joo mé na cán nacaja ndúsá na xihín á ña ná coo tóo a xihín ná. Já nacachi na já xihín á:

—Yóho candoo ndó coo tóo ndó jachí sa nähini cuíi va ta ja chá cuaá —nacachi na xihín á.

Anda já naquihvi Jesús ini vehe ña candoo a xihín ná. <sup>30</sup>Ta tá nasaçoo a nu mesa xihín ná já natiin a in pan já nandiquiahvi ndixahvi nu Ndióxi sahá. Ta nasañnda java ña já nasañan ña nu ná. <sup>31</sup>Ta chí ivi laá nanuná xín túni ná ta já nandicuni na mé á ña cúu á Jesús. Joo ivi laá najándiñuhú a mé á nu ná. <sup>32</sup>Anda já nacachi xihín táhan na já:

—Íchi quéa cajii ndivaha iní tá nandicani Jesús tuhun Ndióxi nu yo tá vaxí chí xihín á —nacachi xihín táhan na cán.

<sup>33</sup>Chí ivi laá naquehe tucu na íchi ña ndicó coo tucu na ñuu Jerusalén. Tá naxinu na cán nandiñehé ná ña ndítútú ndíshuxu in táhan na naxica tuun xihín Jesús cán ndúu na xihín java ga na ndúu cán. <sup>34</sup>Anda já nacachi na cán xihín ndíví na yóho:

—Mé a ndaa táhyí nanditacu tucu Jesús, xitoho í. Ta naxini Simón mé á —nacachi na.

<sup>35</sup>Anda já nacasáhá ndíví na cán ndicani na ña nasañdaca táhan na xihín Jesús nasañan ná. Ta nandicani na ña nandicuni na mé á nani nasañnda java mé á pan ña cuxu na.

Náhá Jesús mé á nuú na naxica tuun xihín á

(Mt. 28:16-20; Mr. 16:14-18; Jn. 20:19-23)

<sup>36</sup>Ta nani ndítuhún yíi ná ndúu na já naxinu coo Jesús nandaçá ndichi a mahñú na cán já nacahan Ndióxi á xihín ná já ña nacachi a já:

—Ná caja Ndióxi ña ná coo vaha ini ndó.

<sup>37</sup>Joo nayihví na cán ta nacahán na ña cúu á in ínimá ndii va. <sup>38</sup>Joo já nacachi Jesús já:

—Ndá cuéntá quéa yihví ndó. Ta ndá cuénta quéa co cándusa ndó ña cúu yehe Jesús. <sup>39</sup>Candehé ndó ndahá i ta candehé ndó sahá i. Sa mé yehe cúu vi. Cani ndaa ndáha ndó yehe ta candehé vaha ndó yehe. Jachí in ínimá ndii coó toho yíquí cuñu a tá quiyahva sándezé ndó ña íin yíquí cuñu yehe —nacachi Jesús xihín ná.

<sup>40</sup>Ta nani cahán Jesús xihín ná já nacásahá náha ndáha á xihín sahá nu ná. <sup>41</sup>Joo cámán yíi candusa na cán ña cúu mé á Jesús jáchí nacatontó na ta cajii ndivaha ini na ña cán quéa nacachi tucu Jesús já xihín ná:

—Ndá ñaha íin nu ndó ná cuxu u —nacachi Jesús xihín ná.

<sup>42</sup>Anda já nasañan ná in túhun tijacá nayata nu á xihín in ñimá ñuñu nu á. <sup>43</sup>Já natiin a ña ndáha ná já naxixi a ña nani sándezé ná a. <sup>44</sup>Tá nandihí já nacachi a já xihín ná:

—Sa nayaha tá íin nacachi i xihín ndó jihna. Sa naxinu coo tá íin nacahí Moisés xihín na profeta sanahá sahá ña ndítahan ndoho i. Ta jári David tá nacahí dà libro Salmos já nacahan ri dà cán va sahá ña ndoho i —nacachi a xihín ná.

<sup>45</sup>Anda já nacaja Jesús ña ná ndinuná xín túni ná já ná cándaa ini na ña cuni cache tuhun Ndióxi cán. <sup>46</sup>Ta nacachi a já xihín ná:

—Janda s̄anahá nacahyi ña ndítahan quivi yehe, d̄a cūú Cristo, d̄a nachindahá Ndióxi cacomí cuéntá sahá ñayivi. Joo nacahyi ri ña ndítahan nditacu tucu u quiví uni.<sup>47</sup> Ña cán quéa ndítahan nuú ñayivi caca nuu na cahān na tuhun vaha sahá i níi cūú ñuyíví já ná ndicó coo ini ñayivi ta jándacoo na cuachi cája na. Anda já caja cáhnu ini Ndióxi sahá ndihí cuachi na. Ta janda riuu Jerusalén xímí ñúhú ñayivi casáhá na cahān na tuhun vaha sahá i ta já cuhun na janda ndijáá ñuyíví.<sup>48</sup> Ta ndóhó cūú na naxini ndaja cáá ña nandoho i ña cán quéa ndítahan nu ndó cuhun ndó caxí tuhun ndó tóco ndihí ña yóho nuú ñayivi.<sup>49</sup> Cuni joho vaha ndó jáchí chindahá i ínimá yii Ndióxi já ná cañuhu a ini in in ndó. Jáchí quiahva já nacachi Ndióxi, tátá i tá nasañan tuhun a nu ndo. Joo ndítahan canduu ndihí ndó ñuu Jerusalén yóho janda quiahva ná ndicutú ndaa ínimá ndo xihin ndéé Ndióxi ña quixi indíví —nacachi Jesús xihin ná.

Tá nandaa Jesús cuahqan indiví  
(Mr. 16:19-20)

<sup>50</sup> Anda já ndáca Jesús na cán nasañan na xihin á yuhú ñuu Betania. Ta nandíñehe a ndáha á já nacaja yii á na.<sup>51</sup> Ta tá cája yii á na já natavá xóo a mé á já nandaa cuahqan indiví.<sup>52</sup> Tá nandihí nacaja cáhnu na cán Jesús já cávatá ndiváha na nandicó coo na ñuu Jerusalén.<sup>53</sup> Ta níi tiempo nasañduu tuun na veñuhu cáhnu cája cáhnu na Ndióxi. Já ná coo.

## Tuhun vaha nacahyí Juan sahá ña nacaja Jesucristo

Jesucristo cíú á tuhun Ndióxi ta nanduu a ñayivi

<sup>1</sup>Tá nacaya sahá sahá ñuyíví sa íin va mé á naní tuhun Ndióxi. Nasahiin mé á xihín Ndióxi ta in cíú mé á xihín Ndióxi. <sup>2</sup>Ta janda mé sahá sa íin va xihín Ndióxi. <sup>3</sup>Ta mé a cán cíú á Jesucristo ta nacaja Ndióxi ña nacavaha mé á tóco ndihi ñaha. Ta ni in tühün toho ñaha íin, a coo tá ná a cavaña mé á ña, nduu. <sup>4</sup>Ta mé á quéa cája ña ná catacu tóco ndihi ñaha ta mé á jándiyéhe a ínima ñayivi já ná ndicuni na yo cíú mé á. <sup>5</sup>Mé Jesucristo cíú á tátuhun in riúhu cayí ña jándiyéhe a xoo naá ta a cíú ndahva ña.

<sup>6</sup>Ta ndaja coo nachindahá Ndióxi in dataa naní Juan. <sup>7</sup>Naquixi da caxi tuhun da xihín ñayivi ña cíú Jesucristo ña jándiyéhe ínima ñayivi, na ndíu nuú naá já ná cuu candusa na mé á sahá ña nacahen dä. <sup>8</sup>Mé Juan yóho coo cíú dä mé á jándiyéhe ínima ñayivi. N aquixi cuití dä caxi tuhun da xihín ñayivi ña mé Jesucristo quéa jándiyéhe ínima ñayivi. <sup>9</sup>Mé Jesucristo naxiñu a ñuyíví yóho ta cíú ndusa mé a ña jándiyéhe ínima tóco ndihi ñayivi.

<sup>10</sup>N aquixi mé a naní tuhun Ndióxi ta nasahijin a ñuyíví yóho. Ta xihín ña nacaja Jesucristo nacavaha Ndióxi ñuyíví. Joo ñayivi ndíu ñuyíví yóho coo naxeen na candañi ini na yo cíú mé á. <sup>11</sup>N aquixi Jesucristo ñuyíví ña nacavaha mé á joo na ñuu mé á coo naxeen toho na ndiquehe vaha na mé á. <sup>12</sup>Joo ndá ná ná ndiquehe vaha mé á ta candeé ini na mé á já quéa sahan mé á ñamani nuú ná ña ná nduu na na cíú cuénta Ndióxi. <sup>13</sup>Ta na cán cíú na nanduu jáhyi mé á. Ta coo cíú á sahá ña nacacu na ñuyíví yóho ta ni coo cíú á sahá ña cúní in taa cacu in jáhyi da. Nanduu na jáhyi mé á jáchi já nacacu ini mé á coo.

<sup>14</sup>Mé Jesucristo, mé a naní tuhun Ndióxi cán nanduu a in taa ta naquixi a nasahijin a tañu nde. Ta tóco ndihi ña nacacaja mé á nacacu a ña ndaa. Ta a juú quahva quíhví ini a ñayivi. Ta naxini nde ndá quahva cahnu cíú mé á jáchi sahá ña cíú mé á in tühün jini já jáhyi Ndióxi sahá ña cán quéa nacaja Ndióxi ña ná ndicáhnu ndivaha mé

á. <sup>15</sup>Tá nandicaní mé Juan sahá Jesús nuú ñayivi já nacachi da já sahá mé á:

—Mé a yóho cíú á ña nacahen i sahá nu ndo tá nacachi i xihín ndo ña vaxi inga a jatá yehe. Ta nacachi i xihín ndo ña íin chágá sahá mé a cán a juú ga yehe jáchi janda tá cámäni yií cacu u sa íin va mé á — nacachi Juan.

<sup>16</sup>Ta sahá ña íin ndivaha ñamani nu mé á sahá ña cán quéa a juú quahva ñéhe tähví tocó ndihí nu mé á. <sup>17</sup>Nacahyí Moisés ley Ndióxi sanahá. Joo Jesucristo, mé á cíú á ña ndaa naxiñi a ñuyíví yóho sahá ña quíhví ndivaha ini a mí. <sup>18</sup>Ta ni in tühün toho ñayivi coo naxini na Ndióxi. In tühün Jesucristo, mé á cíú in tühün jini já jáhyi Ndióxi, mé a cán quéa xini ndá quahva íin Ndióxi jáchi in cíú á xihín á ta mé a quéa nanañha ña yóho nu yo.

**Ndícani Juan nuú ñayivi yo cíú Jesús  
(Mt. 3:11-12; Mr. 1:7-8; Lc. 3:15-17)**

<sup>19</sup>Ta ndaja coo java na sacuahá nuú na Israel, na ndíu ñuu Jerusalén cán nachindahá na java jutu xihín java na naxiñi chichi Leví nu íin Juan ña ná ndaca tuhún na dä a cíú dä dä nasañan Ndióxi tuhún a chindahá a ñuyíví. <sup>20</sup>Ta caxí tähví nacahen Juan xihín ná ña coo cíú dä dä cán ta já nacachi da já:

—A juú toho yehe cíú dä nacachi Ndióxi chindahá a cacomí cuénta sahá ñayivi — nacachi Juan.

<sup>21</sup>Anda já nandaca tuhún tucu na dä já nacachi na já xihín dä:

—Yo já cíú yóhó, dä já. Á a juú yóhó cíú profeta Elías —nacachi na.

—A juú toho yehe cíú profeta Elías — nacachi Juan.

Anda já nacachi tucu na já xihín dä:

—Á a juú toho yóhó cíú profeta dä nacachi Ndióxi chindahá a, dä já —nacachi na.

Joo nanducú ñehe Juan tuhún nu ná já nacachi da já xihín ná:

—Ni in tühün toho da cahí ndó jan coo cíú yehe.

<sup>22</sup>Anda já nacachi tucu na já xihín dä:

—Ndítahan ndicani lohún nuú nde yo cíú yóhó. Jáchí java na nachindahá na ndehe ña ná quixi nde ndaca tuhún nde yóhó. Ta tá coo cúnun caxi tuhún xihín nde yo cíú yóhó, ndá cuhun nde quehe nde tuhún nducú ñehe nde nuú na nachindahá ndehe cán —nacachi na.

<sup>23</sup> Anda já nacachi Juan já xihín ná:

—Yehé cíú dä xíca nuu tañu yucú íchí ta cayuhú cóhó i já cachí i já xihín ñayivi: “Cuná ndó in íchí ndacú nu mé á ña ná ndihvi a ínimá ndó” —nacachi Juan xihín ná tá quiqhva nacahyí profeta Isaías sánahá.

<sup>24</sup> Ta na nandaca tuhún Juan cán nasañan na jáchi já natahndá chuuñ nacaja na fariseo, mé na sáhndá chuuñ nuu Jerusalén cán. <sup>25</sup> Já nacachi tucu na já xihín Juan:

—Ndá cuéntá quéa cája ndúta yóho ñayivi tá ta co cíú Cristo, dä nachindahá Ndióxi cacomí cuéntá sahá ñayivi. Ta ndá cuéntá quéa jácandutún ñayivi tá ta ni co cíú Elías ta ni co cíú mé profeta, dä nacachi Ndióxi chindahá a —nacachi na cán.

<sup>26</sup> Anda já nacachi Juan já xihín ná:

—Yehé cája ndutá i ñayivi xihín ticuújoo tañu mé ndó fin in da co xíni ndó. <sup>27</sup> Ta vaxi in da jatá yehé ta fin cuahá chágá sahá dä a juú ga yehé. Ta chí ni coó sahá i ndaxí i correá ndusa dä —nacachi Juan xihín ná nasañan ndáca tuhún ñahá cán.

<sup>28</sup> Tóco ndihi ña yóho nayaha chí nuu Betábara ña ndácaan inga xoo yuta Jordán nuu nacaja ndúta Juan ñayivi.

Jesús cíú á tátuhun in ndicachi ríjóco na nu Ndióxi

<sup>29</sup> Ta inga quiví itaan já naxini Juan cayati Jesús vaxi a nu fin da. Já nacachi Juan já xihín ñayivi ndúu cán:

—Candehé ndo. Dä vaxi jan cíú dä tátuhun ndicachi jóco na nu Ndióxi. Ta da jan cíú dä jándoo cuachi ñayivi ndúu ñuyíví.

<sup>30</sup> Dä jan cíú dä cachí i sahá ña vaxi in da jatá yehé ta fin cuahá chágá sahá dä a juú ga yehé. Jáchí janda tá cámari cacu yehé sa fin va mé da jan. <sup>31</sup> Ta ni mí i coó naxini i ndá quiqhva cáa da joo nacashá i jácandutá i ñayivi xihín ticuújoo já ná candaqá ini na Israel yo cíú mé dä —nacachi Juan.

<sup>32</sup> Ta nandicaní da ña naxini da já nacachi da já:

—Sa xíní xihín nuu mí i ndá quiqhva nanuu ínimá yii Ndióxi jatá Jesús. Mé ínimá yii Ndióxi cán nanuu a indíví ta cáa tá quiqhva cáa in ndijata. <sup>33</sup> Mé a ndaa coó naxini toho yehé yo cíú mé dä yóho, nduu. Joo Ndióxi, mé a nachindahá yehé jácandutá i ñayivi xihín ticuújoo, mé a cán quéa nacachi já xihín i: “Ndá dä ná cunún ná nuu ínimá yii mí i ta sacoo a jata dä, da

cán cíú dä jándicutú ini ñayivi xihín ínimá yii mí i”, nacachi Ndióxi xihín i. <sup>34</sup> Ta viti mé a ndaa sa xíni vi yo cíú mé á ta cáxi tuhún i xihín ndó ña mé á cíú á in tuhún jiní já jahyi Ndióxi —nacachi Juan.

Tá nacásáhá java ñayivi ndíco na Jesús xíca na xihín á

<sup>35</sup> Ta inga quiví itaan nasañan tucu Juan cán xihín ivi na xíca xihín dä. <sup>36</sup> Já naxini da ña yáha Jesús cuahán já nacachi Juan já xihín na xíca xihín dä cán:

—Candehé ndo. Dä jan cíú tátuhun ndicachi, ríjóco na nu Ndióxi —nacachi Juan.

<sup>37</sup> Tá naxini joho dä ndíta xihín dä cán ña yóho já ndíco dä jatá Jesús cuahán dä.

<sup>38</sup> Tá naxini Jesús ña ndíco dä cán jatá já nandicoto nihni a nu dä já nacachi a xihín ndívi dä cán já:

—Ndíá cúní ndo —nacachi a.

Já nacachi dä cán já xihín á:

—Maestro, ndájá fin vehe ndó já —nacachi da.

<sup>39</sup> Anda já nanducú ñehe Jesús tátuhun nu dä já nacachi a já:

—Cohó náuni ndó, dä já —nacachi a.

Já ndáca táchan da nasañan dä xihín á sándezhe dä nu fin a. Ta nasañuu a tátuhun caa comí sahini já nasañduu da xihín á.

<sup>40</sup> In táchan da naxini joho ña nacachi Juan ta ndíco dä jatá Jesús cán naní dä Andrés, dä cíú ñani Simón, dä cáhan na Pedro xihín cán. <sup>41</sup> Mé Andrés yóho ndáva da nasañan dä ndínducu dä ñani da, dä naní Simón cán. Ta tá nandiñehé ñahá dä já nacachi da já xihín dä:

—Nanditahan nde dä nachindahá Ndióxi cacomí cuéntá sahá ñayivi, mé a cíú Císto —nacachi da.

<sup>42</sup> Tá nandihi já ndáca Andrés cán ñani da nasañan dä nu Jesús. Ta tá naxini Jesús dä já nacachi a já xihín dä:

—Yóho cíú Simón, jahyi Jonás. Joo yehé chinú i quivun cananún Cefas viti —nacachi Jesús.

Quivi Cefas yóho in cíú va xihín Pedro ta cúní cache a in totó.

Cána Jesús Felipe xihín Natanael ña ná caca tuun da xihín á

<sup>43</sup> Ta inga quiví itaan já naquee Jesús cuahán chí estado Galilea. Ta cán nanditan mé a dä naní Felipe já nacachi a já xihín dä:

—Naha quíí caca tuún xihín i —nacachi a xihín dá.

<sup>44</sup> Mé Felipe yóho cíú dá dä ñuu Betsaida ta mé ñuu cán cíú ri ñuu Andrés xihín Pedro. <sup>45</sup> Ta ndaja coo Felipe yóho ndáva da nasahan da nandinducú da Natanael ta tá nandiñehé ñahá dä já nacachi da já xihín dá:

—Nanditahan nde dä nacahyí Moisés sahá nu ley sánahá. Ta jári na profeta nacahyí ri na sahá dá. Ta mé dä cíú Jesús, jahyi José, dä ñuu Nazaret —nacachi Felipe xihín Natanael cán.

<sup>46</sup> Anda já nacachi Natanael já:

—Ndá quehe ri ñahá vaha quixi chí ñuu Nazaret jan —nacachi da.

Anda já nacachi Felipe já xihín dá:

—Cóho candehún —nacachi da.

Anda já naquee da cuahán dä nu íin Jesús.

<sup>47</sup> Ta tá naxini Jesús nacayati Natanael nu á já nacachi a já:

—Da yóho cíú ndusa in dä naquixi chichi Israel ta cíú dä taa cája ñä ndaq cuití va —nacachi Jesús.

<sup>48</sup> Tá naxini joho Natanael ñä yóho já nandaca tuhún dä Jesús já nacachi da já xihín á:

—Á xíni ndó yehé, vaha.

Anda já nacachi Jesús já xihín dá:

—Janda tá cámání quee Felipe cuhun da cana da yohó já naxini i íin coún sahá titó ñuhú —nacachi Jesús xihín Natanael.

<sup>49</sup> Anda já nacasáhá cachí dä já xihín Jesús:

—Maestro, jivi ndusa cíú ndó in tühún jini já jahyi Ndióxi ta cíú ndó ñä cómí cuénta sahá ñayivi Israel —nacachi da xihín Jesús.

<sup>50</sup> Anda já nanducú ñehe Jesús tühun nu dä já nacachi a já:

—Nacandúsún yehé sahá ñä nacachi i xuhún ñä naxini i íin coún sahá titó ñuhú. Joo náhnu chágá ñaha cunún xihín nduchú nún caja i —nacachi Jesús xihín dä.

<sup>51</sup> Anda já nacachi tucu Jesús já:

—Mé a ndaa ná cahan i xihín ndo ñä cuni ndó xihín nuu ndó ñä nuna indíví. Ta cuni ndó tátó Ndióxi ndaa na ta nuu na xínu na nu íin yehé, dä nachindahá Ndióxi nduu ñayivi —nacachi Jesús.

<sup>1</sup> Tá nayaña uni quivi já nasañin in víco tándha ñuu Caná ñä ndácaan estado Galilea cán. Ta nasañan María, náná Jesús mé víco cán. <sup>2</sup> Ta jári nacana na Jesús xihín na xíca tuun xihín á ta chí nasahan ndihí na mé víco cán. <sup>3</sup> Joo ndaja coo nani cíú víco cán nandihi va vino xíhi na. Ta tá naxini náná Jesús ñä yóho já nacachi ñä já xihín Jesús:

—Sa nandihi va vino xíhi na —nacachi ñä xihín á.

<sup>4</sup> Já nacachi Jesús já xihín ñä:

—Co xíni ñuhú toho cahan ndó já xihín i jáchí cámání yii va ndindaa hora caja i ñaha xituhún —nacachi Jesús xihín ñä.

<sup>5</sup> Tá nandihi já nacachi náná Jesús já xihín na jácaca vino cán:

—Ndá ñahá ná cahnda Jesús nu ndó caja ndó, caja ndó ñä —nacachi ñä xihín ná.

<sup>6</sup> Ta mé vehe nu cíú víco cán nasañin iñu yoo náhnu ñä nacaváha na xihín yuu. Mé yoo cán nasaçuu a nu táan na Israel cán ticuij, dó ndája víi na mé ná tá quiahva sáhndá ley nu ná caja na. Ta tátuhun comí jícó á in ciento litro ticuij quéta ini in in yoo náhnu cán. <sup>7</sup> Tá nandihi já nacachi Jesús já xihín na jácaca vino cán:

—Jácutú ndihí ndó yoo náhnu jan xihín ticuij.

Ta chí najácutú jíní ndaa ná yoo náhnu cán xihín ticuij. <sup>8</sup> Tá nandihi já nacachi tucu Jesús já xihín ná:

—Ta viti tavá loho ndó dö ta quiahva ndó dö ná coto ndojó dä cómí chuun sahá víco yóho —nacachi Jesús.

Já ñéhe na do nasañan na nuú dä cómí chuun sahá víco cán. <sup>9</sup> Joo sa nacaja Jesús ñä ná nduu ticuij cán vino. Ta naxito ndojó dä dö joo co xíni dä ndájá naquixi dö. In tühún na xíni cíú na naxini ñä nandaja Jesús cán ticuij ñä ná nduu dö vino. Tá naxito ndojó mé dä cómí chuun yóho dö já nacatontó dä ta nacana da mé dä tándha cán. <sup>10</sup> Já nacachi da já xihín dä:

—Ndiójá ñayivi tá cája na in víco já sáhan na vino vaha nu cuítí nuú ná táhan cán. Ta tá sa naxihí cuahá ná já sáhan na dö núa cán. Joo yóhó nasaçuu vahún vino vaha ta já víti sáhún dö nuú ná tacá víco —nacachi da.

<sup>11</sup> Ña xituhún yóho nacaja Jesús ñuu Caná cuénta estado Galilea nasaçuu a ña xituhún nu cuítí nacaja Jesús já ná cuni ñayivi ndá

quiāhva cáhnu cúú mé á. Ta xihín ña yóho nacandéé ini na xíca tuun xihín a cán mé á.

<sup>12</sup> Tá sa nayaha ña yóho já naquee a cuahen xihín na xíca tuun xihín á chí ñuu Capernaum. Ta ndáca táhan náná a xihín ñani a ndíco na cuahen na xihín á. Ta násanduu na ñuu Capernaum cán chá quiyi cuití va.

Tává Jesús na ndúu jíco veñhu cáhnu ñuu Jerusalén

(Mt. 21:12-13; Mr. 11:15-18; Lc. 19:45-46)

<sup>13</sup> Tá nacayati quiyi caja na Israel vicó pascua já naquee Jesús násahen chí ñuu Jerusalén. <sup>14</sup> Ta tá naxinu coo a veñhu cáhnu ndácaan Jerusalén cán já naxini a ña jandá joho ndúu na jíco. Java na jíco tindiquí xihín ndicachi xihín ndijata viti ta java na ndúu coo ndíjama jiuhún. <sup>15</sup> Ta chí natiin Jesús yóho ta nacaváha in churrú xihín á já nacasáhá táchí ndihi a na ndúu jíco cán. Ta jandá tindiquí xihín ndicachi janá na natavá a ri quee rí cuhun ri. Ta já naxinu coo a nu ndúu na ndíjama jiuhún cán já naxicó ñehe a mesa na já nacuyu ndihi jiuhún na nu ñúhu. <sup>16</sup> Ta násahnda a chuun nuú na jíco ndijata cán já nacachi a já:

—Tavá ndihi ndó ña jíco ndó jan. A caja ndó xihín vehe tátá i ña cúú á nu cayahví ñaha —nacachi Jesús xihín ná.

<sup>17</sup> Tá nandihu já nandicuhun ini na xíca tuun xihín Jesús cán ña cáchí tuhun Ndióxi. Já cáchí a já: “A juú quiāhva xójo ini i sahá ña co caja cáhnu ñayivi vehe Ndióxi”, cáchí tuhun Ndióxi.

<sup>18</sup> Tá naxini na Israel cán ña nacaja Jesús ña yóho já nandaca tuhun na mé á já nacachi na já xihín á:

—Xíni ñúhu cajún in ñaha xitúhún já ná cuni nde ña mé a ndaa ín sahún tasún na ndúu jíco veñhu yóho —nacachi na xihín Jesús.

<sup>19</sup> Anda já nanducu ñehe Jesús tuhun nu na já nacachi a já xihín ná:

—Tá ná jánditaní ndó veñhu yóho ta tixi uni quiyi já jácandichi tucu u ña —nacachi Jesús xihín ná.

<sup>20</sup> Anda já nacachi na Israel cán já xihín á:

—Co cándusa nde ña cáchún jáchí nacaja chúun na ivy jíco ífuu cuia já naxinu veñhu jan. Ta yóho cáchún ña tixi uni víxi quiyi jácandichi tucún ña, vaha —nacachi na cán xihín Jesús.

<sup>21</sup> Joo co cáhnan toho Jesús sahá veñhu cáhnu cán jáchí cáhnan mé á sahá yiquí cuñu a. <sup>22</sup> Ña cán quéa tá naxihi Jesús ta nanditacu tucu a tixi uni quiyi já nandicuhun ini na xíca tuun xihín á cán sahá tuhun nacahan mé á nuú na Israel yóho. Ta chí nacandúsa na tuhun Ndióxi ta nacandúsa na tóco ndihi ña nacahan Jesús xihín ná.

Sq xíni va Jesús ínimá ñayivi

<sup>23</sup> Cuahá ñayivi ñuu Jerusalén cán nacandúsa na Jesús nani nasañiin a víco pascua cán sahá ña náhnu xihín ña xitúhún nacaja nu ná. <sup>24</sup> Vatí nacachi na cándusa na mé á joo coqo nacandúsa toho Jesús na jáchí xíni vaha mé á ndá ínimá ñehe in in na cán. <sup>25</sup> Ta co xíni ñúhu toho a ña caxi tuhun na xihín á ndá quiāhva íin in in ñayivi jáchí sa xíni ndihi va mé á ínimá ná.

### 3

Ndítúhún Nicodemo xihín Jesús

<sup>1</sup> Nasahiin in da xíca cuéntá na fariseo naní Nicodemo ta cúú dá da sacuahá nuú na Israel cán. <sup>2</sup> Ta ñuu naqueta da cuahen da coto nilhi da Jesús. Ta tá naxinu coo da nu á já nacachi da já xihín á:

—Maestro, cándaa caxí ini nde ña nacchindahá Ndióxi ndohó växi ndó nuú nde ña ná jánahá ndó nuú nde. Jáchí ni in tihún toho ñayivi a cuú caja ña náhnu caja mé ndó tá tā co íin Ndióxi xihín ná —nacachi da xihín Jesús.

<sup>3</sup> Anda já nanducu ñehe Jesús tuhun nu dá já nacachi a:

—Mé a ndaa ná cahan i xihín ndo ña ni in tihún ñayivi a cuú cacomí Ndióxi cuéntá sahá tā ná a ndíco coo tucu na cacu tucu na —nacachi a.

<sup>4</sup> Anda já nandaca tuhun Nicodemo Jesús já nacachi da:

—Ndá quiāhva cuu cacu tucu na tá sa nacayatá na. Ama ná ndíjvi tucu na tixi náná na já cacu tucu na —nacachi Nicodemo xihín Jesús.

<sup>5</sup> Anda já nacachi tucu Jesús já xihín dá:

—Cáhnan i ña ndaa xihín ndo. Tá nacandúta ñayivi xihín ticuií ta tá nandicutú ndaa ínimá ná xihín ínimá yii Ndióxi já cuú á tátuhun cácu tucu na ta anda já cuu cacomí Ndióxi cuéntá sahá ná. “Jáchí ñuyíví yóho cácu jahyi ñayivi ta sa já ñayivi cuú va na. Joo na jándicutú Ndióxi xihín ínimá yii mé á, na cán cuú jahyi mé á.” <sup>7</sup> Ta co ndítahan catóntó ndó tá cáchí i xihín ndó

ñä ndítahan cacu tucu ndihi ñayivi já ná cacomí Ndióxi cuéntá sahá ná. <sup>8</sup> Jáchí cíú á tátuhun tá xícó tachi ndá xoo cúní mé á. Vatí xíní joho í xícó tachi joo co xíní yo ndá xoo quíxi a ta co xíní yo ndá xoo cuahán. Quiahva já íin ínima yií Ndióxi jáchí vatí co xímí ñayivi mé á joo xíní ná ndá quiahva caja mé á tá ñuhu a ini na —nacachi Jesús xihín Nicodemo.

<sup>9</sup>Tá nandihí já nacachi Nicodemo já xihín Jesús:

—Co cándaa toho ini i ña cachí ndó xihín i —nacachi da.

<sup>10</sup> Anda já nacachi Jesús já xihín dá:

—Cúú ndó dä jánahä nuú ñayivi Israel ta ndítahan candaä ini ndó ña yóho, nduu jáchi cíú ndó maestro cähnu nu ná. <sup>11</sup> Mé a ndaa ná cahán i xihín ndó. Cáhan nde sahá ña cándaa ini nde ta sahá ña naxini nde xihín nuú nde joo ndóho co cándusa ndó ña cahán nde xihín ndo. <sup>12</sup>Cáhan i sahá ñaha ñuyíví yóho xihín ndo ta co cándusa ndó ña. Ndaja ga ví caja ndó tá ná cahán i sahá ñaha íin indíví.

<sup>13</sup> 'Ni in tühún toho ñayivi a ñaha ndaa cuhun chí indíví. In tühún dä ndaa indíví cíú dä nanuu, dä naquixi ñuyíví yóho. Ta dä cán cíú yéhe, dä nachindahá Ndióxi nduu ñayivi. <sup>14</sup> Sanahá ndivaha nacata caa Moisés in coo, rí nacavaha xihín caa nu yíto yucú íchí. Quiahva já cata caa ri na yehe, dä nachindahá Ndióxi nduu ñayivi ndica crúxu <sup>15</sup> já quéa ná cacu ndaa ínima ñayivi já ná a cíuhun ná indayá tá ná candeé ini na yehe. Ta xihín ña yóho catastu na anda ama caa quívi.

Quihví ndivaha ini Ndióxi ñayivi ndúu ñuyíví

<sup>16</sup> Jáchí sahá ña naquihví ndivaha ini Ndióxi ñayivi ndúu ñuyíví sahá ña cán quéa nachindahá mé á in tühún jini já jahyi a ñuyíví yóho. Já quéa tá ná candeé ini na mé á cuu cacu ndaa ínima ná já ná catacu na anda ama caa quívi. <sup>17</sup> Coo nachindahá Ndióxi jahyi a ña ná quixi da jándihí da sahá ná ndúu ñuyíví yóho. Nachindahá a jahyi a jáchi cúní a jácacu a ñayivi.

<sup>18</sup> Ta ndá ná sa candeé ini yehe, ña cíú u jahyi Ndióxi, ná cán cíú ná caja cähnu ini Ndióxi sahá. Joo ná coó naxeen cándusa ñahá cán, ná cán cíú ná co caja cähnu ini Ndióxi sahá jáchí coó naxeen na cándusa na dä cíú in tühún jini já jahyi mé á.

<sup>19</sup> Ta ná coó naxeen cándusa cán sa násacu va Ndióxi sahá ná cyhun ná indayá jáchí nacaan na caja na ña náu. Sahá ña cán quéa naxiu mé á cíú jahyi Ndióxi ñuyíví yóho ta cúní a jándiyéhé a nuú ñayivi. Jáchí cátóó chágá ná canduu na nuú naá jáchí caja na ña náu. <sup>20</sup> Jáchí tóco ndihi ná caja ña náu cándají na ña vaha, ña cíú tátuhun ña yéhe. Ta co cúní ná cayati na nuú ña yéhe cán já ná a ndítivi ña náu caja na. <sup>21</sup> Joo ná caja ña ndaa, ná cán cíú ná cayati chágá nuú ña vaha, ña cíú tátuhun ña yéhe já ná ñaha ña mé a ndaa caja na ña cúní Ndióxi —nacachi Jesús.

Ndícani tucu Juan sahá Jesús

<sup>22</sup> Tá sá nayaha ña yóho já naquee Jesús nasaħan chí esteado Judea xihín na xíca tuun xihín á. Ta cán nasaħin a chá tiempo xihín ná jáchí najácandútä ná ñayivi mé cán. <sup>23</sup> Ta jári Juan va najácandútä dä ñayivi chí ñuu naní Enón yati ñuu Salim cán jáchí cán náhu cuahá ticuui. Ta cuahá ñayivi nasaħan ná cán candútä ná. <sup>24</sup> Tóco ndihi ña yóho nayaha tá cámäni tiin na Juan chicaqan na dä vecaa.

<sup>25</sup> In tañu java ná xíca xihín Juan cán nacásahá ná ndítuhún ihví ná xihín java na Israel sahá ña yóho: á ndíyahví chágá tá caja ndútä Juan ñayivi á tá caja ndútä ná xíca tuun xihín Jesús ñayivi. <sup>26</sup> Tá nandihí já ndáva na xíca xihín Juan nasaħan ná cahán ná xihín dä já nacachi na já:

—Maestro, dätaa, dä nandituhún xihín ndó inga xoo yuta Jordán cán, dä nacahán mé ndó sahá nuú nde cán, viti xíca nuu da jácandútä dä ñayivi ta jandá joho tóco ndihi ñayivi ndíco ná dä viti —nacachi na cán xihín Juan.

<sup>27</sup> Anda já nacachi Juan já xihín ná cán:

—Ni in tühún toho ñaha a cíú caja ñayivi tá co sáhan Ndióxi námäni nu ná caja na ña. <sup>28</sup> Ta sá naxini joho ndó ña nacaxi tühun yachi vi xihín ndó ña co cíú yéhe da nasaħan Ndióxi tühun a chindahá a cocomí a cuéntá sahá ñayivi. Nachindahá Ndióxi yéhe já ná cacu tħahva i íchí nuú quixi mé da cán. <sup>29</sup> Candehé ndo. Cíú á tátuhun tá cíú in víco tándaha. Ta dä cíú amigo dä tándaha cán ndáti da casaq dä. Ta cajjii ini da tá xíní joho da ná cahán vatá dä tándaha cán jáchí íin ñájihí dä xihín dä. Ta quiahva já cajjii ini i jáchí cásahá ñayivi ndíco ná jata Jesús viti. <sup>30</sup> Mé Jesús jan ndicáhnu joho ga

cuhun a. Ta yehé ndítahan nuu ndáha joho i cuhun i —nacachi Juan.

*Jesús quéa naquixi chí indíví*

<sup>31</sup> Mé Jesús naquixi chí indíví ta cáhnu chágá mé á nu ndíhi ñaha. Ta ñayivi nacacu ñuyíví yóho cáhan na sahá ñaha ñuyíví cuití va. Joo mé á naquixi chí indíví cán cúú á ña cáhnu chágá nu tóco ndíhi ñaha. <sup>32</sup> Ta cáhan mé a cán sahá ña naxini xihín nuu a ta cáhan sahá ña naxini joho a. Joo ni in na co cúni candusa na ña cáhan mé á. <sup>33</sup> Joo ndá na cándusa nu cáhan mé á, na cán cúú na cándaa cáxí ini na ña cáhan Ndióxi ña ndaa.

<sup>34</sup> Ndióxi quéa nachindahá mé á ta cáhan ndinuhu tuhun Ndióxi jáchi co ndáhví toho cúú ini Ndióxi jándicutú ndaa mé a cán xihín ímima yíi mé á. <sup>35</sup> Ta Ndióxi, tátá a ña fin indíví quívi ndiváha ini a in túhún jini já jahyi a ta nasahán ndée a nuú jahyi a ña ná cuu caja tóco ndíhi ñaha. <sup>36</sup> Ta ndá na candeé ini mé a cúú in túhún jini já jahyi Ndióxi cán, na cán cúú na catacu anda ama cása quívi. Joo na co cúni candusa ñahá cán, na cán cúú na a ñehé tähví toho na catacu na xihín Ndióxi. Ña caja Ndióxi xihín ná quéa chindahá a na cuhun na indayá anda ama cása quívi.

## 4

### Ndítuhún Jesús xihín in ñáñáha cuéntá Samaria

<sup>1</sup> Ta ndaja coo na fariseo nacandaa ini na ña cuahá chágá ñayivi ndíco jatá Jesús ta cuahá chágá ñayivi jácandúta Jesús a juú ga Juan. <sup>2</sup> Vatí a juú mé Jesús jácandúta ñayivi joo na xíca tuun xihín á cán jácandúta ñahá. <sup>3</sup> Ta tá naxini joho Jesús ña cáhan ñayivi sahá já naquee a estado Judea xihín na xíca tuun xihín á cuahán na ndicó coo na chí estado Galilea.

<sup>4</sup> Ta nuú cuhun a Galilea cán ndúsa yaha ndaa estado Samaria já xínu a nuú cuhun a cán. <sup>5</sup> Ta naxinu a in ñuu loho namí Sicar cuéntá mé Samaria cán yati nuú ñundáhyi ña najándicoo tähví Jacob nu José, jahyi da. <sup>6</sup> Ta cán nasahíin in chícohó ña nani chícohó Jacob. Ta cúú a tátuhun caxívi tá naxinu coo Jesús ñuu Sicar cán. Ta chí a váha ga nacanaá a sahá ña cán quéa nasaçoo a yati yuhú chícohó cán. <sup>7</sup> Ta nani fin coo a cán já naxinu in ñáñáha cuéntá Samaria tavá ña ticuú ini chícohó cán. Já nacachi Jesús já xihín ñá:

—Quiahva loho ticuúi ná coho i —nacachi a xihín ñá. <sup>8</sup> Jáchí sa cuahán na xíca tuun xihín á ñuu cueen na ñaha cuxu na.

—Anda já nacatontó ña jáchi co xíní táhan vaha na Israel xihín na Samaria. Ta nacachi ñá já xihín Jesús já:

—Ndá cuénta quéa xíca yóhó, da Israel, ticuúi nuú i cohún ta ñá Samaria va cúú yehé —nacachi ñá cán xihín Jesús.

<sup>10</sup> Já nacachi a já xihín ñá:

—Tá ná candaá inún yo cúú yehé, da xíca ticuúi nyun ta tá ná candaá inún ndá quiyahva fin ña cúni Ndióxi quiyahva nyun já cacuñ ña nuú i. Jáchí yehé cuu caja i ña ná catacún anda ama cása quívi ta ña yóho cuu a tátuhun ticuúi, dō a cúú ndíhi sahá —nacachi Jesús.

<sup>11</sup> Anda já nacachi ñá cán já xihín á:

—Candehé ndó. Ni yáxi co ñéhe ndó tavá ndó ticuúi ini chícohó yóho ta chícohó cúná ndiváha cúú ña yóho. Ndá cuu caja ri ndó quiyahva ndó ticuúi cachí ndó jan nuú i. <sup>12</sup> Tásáhnu jícó nde, da naní Jacob cán najándacoo chícohó yóho nuú nde. Ta nuú chícohó yóho naxihi da cán ticuúi ta sa mé chícohó yóho naxihi ri jahyi da cán ta yóho naxihi ri quíti janá dá. Ama ná cuu quiyahva mé ndó ticuúi vaha chágá a juú ga dó najándacoo Jacob nuú nde —nacachi ñá cán xihín Jesús.

<sup>13</sup> Anda já nanducú ñehe Jesús tūhun nu ñá já nacachi a já:

—Ndá ñayivi nacuu va xíhi ticuúi chícohó yóho já quéa ichí tá ichí ini na. <sup>14</sup> Joo ndá ña ná coho ticuúi táhan dó sáhan yehé, na cán cúú na a ndicó coo ga na ichí ini na anda ama cása quívi. Jáchí cúú á tátuhun sa mé ini mé va na cana ticuúi, dō a ndíhi saha catacu na anda ama cása quívi —nacachi Jesús xihín ñá.

<sup>15</sup> Anda já nacachi ñá cán já xihín Jesús:

—Quiahva mé ndó ticuúi, dō co ndíhi saha jan nuú i ña ná a ichí ga ini i ticuúi já ná a quíxi ga i yóho tavá i dō coho i —nacachi ñá xihín á.

<sup>16</sup> Anda já nacachi Jesús já xihín ñá:

—Cuáhán cana yíun ná quíxi da yóho xuhun.

<sup>17</sup> Anda já nanducú ñehe ñá cán tūhun nu á já nacachi ñá já:

—Coó toho yií i.

Anda já nacachi Jesús já xihín ñá:

—Mé a ndaa coó toho yíun. <sup>18</sup>Joo nasaḥijin uhun yíun ta dā íin xuhun viti jan co cíú toho da yíun. Ndaa ndusa cahún —nacachi Jesús.

<sup>19</sup>Já nacachi ñá já xihín á:

—Jivi ndusa in profeta cíú mé ndó. <sup>20</sup>Tásahnú jíco nde, na Samaria yóho nacaja cahnu na Ndióxi yati jini yúcu jan. Joo ndohó, na Israel cachí ndo ñándusa ndítahan nuú nde cuhun nde ñuu Jerusalén caja cahnu nde Ndióxi. Ta mé ndó ndaja cachi ndó —nacachi ñá cán xihín Jesús.

<sup>21</sup>Anda já nanducú ñehe Jesús tuhun nuú já nacachi a já xihín ñá:

—Xíní ñúhú candúsún ñá cahán i jáchí mé a ndaa vaxi quiví caja cahnu ndhi ndó Ndióxi, tátá yo ndá xoo nacuu va. A cúní ñúhú ga ndó cuhun ndo jini yúcu cása ta ni a cúní ñúhú ga ndó cuhun ndó ñuu Jerusalén caja cahnu ndó Ndióxi. <sup>22</sup>Joo ndohó, na Samaria caja cahnu cuá ndo Ndióxi jáchí co xíní ndó a. Joo ndehe, na Israel xíní vaha nde yo cúa Ndióxi caja cahnu nde. Jáchí chichi mé nde, na Israel nasaču ini Ndióxi quixi mé á jácetu ñayivi. <sup>23</sup>Ta viti naxinu quiví tá ndítahan caja cahnu ñayivi Ndióxi, tátá yo xihín ndinuhu ini na tá quiahva cúní ínima yii Ndióxi jáchí quiahva já cúní Ndióxi, tátá yo ñá caja cahnu ñayivi mé á. <sup>24</sup>A cúa cuni yó Ndióxi jáchí coó toho yiquí cuya a sahá ñá cán quéa xíní ñúhú caja cahnu ñayivi mé a xihín ínimá na ta xihín ndiñuhu ini na —nacachi Jesús xihín ñá.

<sup>25</sup>Anda já nacachi tucu ñá cán já:

—Sa cándaa caxí ini i ñá vaxi quiví quixi dā chindahá Ndióxi cacomí a cuéntá sahá ñayivi, mé dā cúa Cristo. Ta tá ná quixi dā cán já ndicani ndhi da nuú nde ndaja coo —nacachi ñá cán xihín Jesús.

<sup>26</sup>Anda já nacachi Jesús já xihín ñá:

—Da cán cúa yehe, da cahán xuhun viti —nacachi Jesús xihín ñá.

<sup>27</sup>Ta nani cahán Jesús xihín ñá naxinu coo na xica tuun xihín á já nacatontó na jáchí naxini na ndítuhún a xihín in ñáñáha. Joo ni in tuhún na coó nasahaj ndeeé ini na cuhun na ndaca tuhún ñahá ndá a cúní ñá cán, a ndá saha ndítuhún a xihín ñá.

<sup>28</sup>Tá nandihí já nájandacoo ñá cán yoo ñá ta naquee ñá cuahán ñá ñuu. Ta cán nacasáhá cahán ñá xihín na ñuu cán já cachí ñá já xihín ñá:

<sup>29</sup>—Naha quí ndó. Candehé ndó in dataa, dā nacahan ndhi da tá quiahva nacaja i. Á a juú dā yóho cúa Cristo, dā nacachi Ndióxi chindahá a cacomí cuéntá sahá ñayivi —nacachi ñá cán xihín ñá.

<sup>30</sup>Tá nandihí já naqueta ndhi na cán cuahán na xihín ñá nu íin Jesús. <sup>31</sup>Joo tá cámáni xinu coo na nu íin Jesús já najácahan na xica xihín á mé a ñá ná cuxu a vatí loho.

<sup>32</sup>Anda já nacachi Jesús já xihín na xica tuun xihín á cán:

—Sa fín va ñaha cuxu u. Ta ndohó, co xíní toho ndó ndá a queá —nacachi Jesús xihín ñá.

<sup>33</sup>Tá nandihí já nacasáhá na cán ndáca tuhún táhan na já cachí na já:

—Ndá na sa naquixi ñehe va ñaha cuxu a —cachí xihín táhan na.

<sup>34</sup>Sahá ñá cán queá nacachi Jesús já xihín ñá:

—Tá quiahva ndívaha ini ñayivi tá xíxi na quiahva já ndívaha ini i tá caja i chuun ñá nacindahá Ndióxi yehe caja i ñuyíví yóho. Ta xíní ñúhú caja i ñá janda quiahva ná jaxinu coo i ñá. <sup>35</sup>Xíní ñúhú ndiñehe ndó nuú ndó candehé ndó ñayivi jáchí cúa ná tátuhun nuú naxutu na trigo. Joo co xíní ñúhú caja ndó tá quiahva caja ñayivi tá ndati na comí yoo jáquee na trigo. Jáchí viti ñúhú fín tiyahva ñayivi ndiquehe na tuhún Ndióxi. <sup>36</sup>Ndá na xica chíndeé ñayivi ndiquehe na tuhún Ndióxi, na cán cúa ná tátuhun na xica jáquee trigo. Ta a caja chúun uun toho na jáchí quehe na yahvi sahá chuun caja na. Ta na ndiquehe tuhún Ndióxi cán cúa na cuhun catacu indiava anda ama cúa quiví. Ta sahá na cán cavatá da naxutu xihín da nájáquee. <sup>37</sup>Jáchí fín in tuhún ta nda cahán ñá. Já cachí a já: “In da xútú ta inga da jáquee jáchí cúa ndíví dā da caja chúun nuú in xitoho.” <sup>38</sup>Ta quiahva já nayaha xihín mé ndó jáchí yehe nacindahá i ndohó ñá ná cuhun ndó chíndeé ndó ñayivi ndihvi na íchi cuéntá Ndióxi vatí coó nandoho ini ndó caxi tuhún ndó tuhún Ndióxi xihín ñá. Jáchí inga na nacaxi tuhún tuhún Ndióxi xihín na cán joo ndohó ñéhe tähví ndó chíndeé ndó na ndihvi na íchi cuéntá Ndióxi —nacachi Jesús xihín na xica tuun xihín a cán nani cámáni xinu coo ñayivi ñuu cán nu á.

<sup>39</sup>Ta cuahá ñayivi ñuu Samaria cán nacandusa na Jesús sahá ñá nacahan ñáñáha cán xihín na jáchí nacachi ñá cán já xihín

ná: "Nacachi mé á xihín i ndaja cáá tóco ndihi ña nacaja i." <sup>40</sup> Sahá ña cán quéa tá naxinu coo na Samaria cán nuú fín Jesús já naxicá tähví na nuú á ña ná coo chágá xihín ná. Sahá ña cán quéa nacandoo Jesús nasañiin a iví quívi xihín na cán. <sup>41</sup> Ta cuahá java ga na Samaria cán nacandúsa na Jesús sahá tuhun nacahán mé á xihín ná. <sup>42</sup> Já nacachi mé na Samaria cán xihín ñáñáha cán já:

—Nacandúsa nde yohó tá nacahún sahá Jesús nuú nde joo viti cández ini nde mé á jáchi naxini joho nde nuú cahán mé á. Ta viti ndusa cándezna nde ña cíuú á Cristo, mé á nacindahá Ndióxi jácacu a ñayivi ñuyíví —nacachi na Samaria cán xihín ñá.

Tá nandaja vaha Jesús jahyi in da cája chúun cuénta gobierno

<sup>43</sup> Tá sa nayaha iví quívi nasañiin Jesús mé Samaria cán já naquee tucu a cuahán chí es-tado Galilea. <sup>44</sup> Jáchí sa nacachi mé Jesús já: "Ni in túhún toho profeta co cája cahnu na da ñuu da", nacachi Jesús. <sup>45</sup> Joo tá naxinu coo Jesús estado Galilea cán já nandiquehe vaha na cán mé á jáchi sa nasañan ri na cán vicó pascua ñuu Jerusalén ta cán naxini na ña náhnu nacaja mé á.

<sup>46</sup> Anda já naxinu coo tucu Jesús ñuu Caná cuénta Galilea cán nyú nandaja mé á ticuiñ nanduu dó vino. Ta mé ñuu cán nasañiin in dataa, da cája chúun cuénta gobierno. Ta a juú quiahva quíhví jahyi da cándezhu dá ñuu Capernaum. <sup>47</sup> Ta tá naxini joho da cán ña sa naquee Jesús estado Judea ta fín a estado Galilea viti já ndáva da nasañan da nuú á já naxicá tähví da nuú á ña ná cuhun a vehe da ndaja vaha jahyi da jáchi sa ndicáhví da cándezhu dá. <sup>48</sup> Tá nandihí já nacachi Jesús já xihín dá:

—Ndúsá caja i ña náhnu xihín ña xituhún nu ndo já cuu candúsa ndó yehé á tá coó ta coó cuúndó candúsa ndó yehé —nacachi Jesús.

<sup>49</sup> Anda já nanducú ñehe da cája chúun cuénta gobierno cán tuhun nuú Jesús já nacachi da já xihín dá:

—Á a cuú caja ndó ñamani cuhun quíí ndó vehe e jáchi cúní quívi jahyi i —nacachi da xihín Jesús.

<sup>50</sup> Anda já nacachi Jesús já xihín dá:

—Cuahán ndicó coo ndó vehe ndó jáchi nandiváha jahyi ndó —nacachi Jesús xihín dá.

Ta nacandúsa da cán ña nacachi Jesús xihín dá chí naquee da nandicó coo da cuanúhu dá. <sup>51</sup> Ta tá sa yati xinu coo da vehe da já ndáva nihni ña cíuú mozo da nasañan ña ñehe ná da já nacachi na já xihín dá:

—Sa co quíhví ga jahyi ndó viti.

<sup>52</sup> Anda já nandaca tuhún da cán mozo da já cachí da já:

—Ndá hora nacasáhá nandiváha jahyi i —nacachi da xihín ná.

Já nacachi na cán já:

—Cuni tátuhun caa in sahini já nandin-daa ña chícaan cahni á da.

<sup>53</sup> Xihín ña yóho nacandaa ini da cán ña mé a ndaq nandaja vaha Jesús jahyi da jáchi mé hora cán nacachi Jesús xihín dá ña tacú tá tacú jahyi da. Sahá ña cán quéa nacandúsa mé dá xihín na vehe da Jesús.

<sup>54</sup> Ta xihín ña yóho naxinu iví ña xituhún nacaja Jesús estado Galilea cán anda nani naquee a Judea já nandicó coo tucu a Galilea.

## 5

Tá nandaja vaha Jesús in da quíhví, da íin yuhú ticuiñ naní Betesda

<sup>1</sup> Tá nayaha ña yóho já naquee Jesús cuahán ñuu Jerusalén nu cája na Israel víco.

<sup>2</sup> Ta mé nu quíhví joho na ñuu Jerusalén cán fín in yéhé naní yéhé ndicachi. Ta yati cán nasañiin in vehe ta fín uhun yuyéhé nu quíhví na ini a ta ini mé vehe cán ndácaan in pila cahnu nu ñúhu ticuiñ ta naní a Betesda tuhun hebreo. <sup>3</sup> Ta níi ini mé vehe cán naçaníhni ña quíhví ndúu na. Java na cíuú ná na cuá. Java na quíhví saha. Ta java na naxihí tuchu. Níi cán naçaníhni na ndúu na ndáti na ndicandaa ticuiñ cán.

<sup>4</sup> Jáchí ndá tañu ná tátó Ndióxi ta jändicandaa mé á ticuiñ cán. Ta ndá ná queta nuu nu cuíí ini mé ticuiñ cán tá nandihí nandicandaa do já ndiváha na ta co cája toho a ndá cuehe ndóho na. <sup>5</sup> Ta tañu tóco ndihi ña quíhví nasañduu cán nasañdaan in dataa, da sa íin oco sahun uní cuia quíhví da. <sup>6</sup> Ta tá naxini Jesús cándezhu dá tañu ña quíhví cán ta tá nacandaa ini a ña sanahá ndiváha quíhví da já nandaca tuhún a da já nacachi a já xihín dá:

—Á ndiváhún cúnun.

<sup>7</sup> Anda já nanducú ñehe da cán tuhun nu á já nacachi da já:

—Coó ni in ñayivi yóho ña chindeé na yehé queta nuu i ini ticuiñ tá ndicandaa do.

Jáchí tá jacá cahán uun i jáqueta i mí i, sa naquee vaha va inga na nuú i. Ña cán quéa a cuú ndiváha i —nacachi dà cán xihín Jesús.

<sup>8</sup> Anda já nacachi Jesús já xihín dà:

—Cuáhán ndacoo nditivún yívun ta cuanuhún —nacachi Jesús xihín dà cán.

<sup>9</sup> Tá nacachi Jesús já chí iví laá nandiváha dà quíhví cán já nandiquehe da yíví dà já nacasáhá dà xíca da. Ta sahá ña cùú á quíví ndíquehe ndée ná <sup>10</sup> sahá ña cán quéa naqueta java na sacuahá nuú na Israel já nacachi na já xihín dà:

—Viti cùú á quíví ndíquehe ndée yo ta co ndítahan toho nuun cojún yívun caca nuún —nacachi na xihín dà.

<sup>11</sup> Anda já nanducú ñehe dà cán tuhun nu ná já nacachi da já:

—Mé dà nandaja vaha yehe cán cùú da nasañhda chuuñ nuú i ña ná cojo i yíví cuhún i —nacachi dà cán xihín ná.

<sup>12</sup> Já nandaca tuhún tucu na Israel cán dà já nacachi na já:

—Yo já nacachi xuhun ña ná ndicoyún yívun cuhún —nacachi ná cán.

<sup>13</sup> Joo dà cán co xíni dà yo nandaja vaha ñahá jáchí tá nandaja vaha Jesús dà já naquihvi nuu a cán tañu ñayivi cuahá cán cuahán. <sup>14</sup> Tá nandihí já nanditahan Jesús dà cán ini veñuhu cahnu já nacachi a já xihín dà:

—Candehé. Sa co quíhví gaún viti. A ndicó coo gaún cajún cuachi jáchí tiáhva náá quixi ña ndee chágá ví ndohún —nacachi Jesús xihín dà.

<sup>15</sup> Tá nandihí já ndáva da cán nasañhan da cáxi tuhun da nuú na Israel ña Jesús cùú ña nandaja vaha ñahá. <sup>16</sup> Sahá ña cán quéa nacasáhá na Israel cán cája xíxi na xihín Jesús. Ndúcú na cahní na a sahá ña cája chūun a ndája vaha mé a ña quíhví quívi ndíquehe ndée ná. <sup>17</sup> Anda já nacachi Jesús já xihín ná:

—Cája chūun ta cája chūun Ndióxi, tátá i sahá ña cán quéa cája chūun ta cája chūun ri yehe va —nacachi Jesús.

<sup>18</sup> Sahá ña cán quéa ví ga ví cùni na Israel cán cahní na Jesús jáchí cachí na co cája cahnu a Ndióxi quíví ndíquehe ndée ná tá quiáhva cachí ley. Ta cùni na cahní na mé a jáchí cachí a ña cùú á in tuhún jini já jahyi Ndióxi ta xihín ña yóho ndája mé a tátuhun mé Ndióxi.

Ña cùú cája Jesús sahá ña cùú á in tuhún jini já jahyi Ndióxi

<sup>19</sup> Já nacachi Jesús já xihín na Israel cán:

—Mé a ndaa ná cahan i xihín ndo. Yehe cùú u in tuhún jini já jahyi Ndióxi ta co cája i ni in ñaha cuénta mí i jáchí cája i ña xíni i cája Ndióxi, tátá i. Ta tóco ndihi ña cája tátá i ña cán cùú ña cája ri yehe va. <sup>20</sup> Jáchí sahá ña quíhví ini Ndióxi, tátá i yehe sahá ña cán quéa ñahá mé a nuú i ndaja táhan ñaha cája mé á. Ta janda ñahá náhnu chágá ví ñahá mé a nuú i ta chí catóntó ndihi ndó tá ná cuni ndó ña. <sup>21</sup> Jáchí tá quiáhva cája Ndióxi, tátá i jánditacu a ndii ña ná catacu na quiáhva já cuu caja ri yehe jánditacu u na cuni mí i catacu. <sup>22</sup> Ta mé Ndióxi, tátá i co cája víi toho a sahá ñayivi. Ña nacaja mé a quéa nasañhan ñamani nuú i, dà cùú in tuhún jini já jahyi mé á, ña ná caja víi i sahá ná. <sup>23</sup> Já quéa ná caja cahnu ñayivi yehe tá quiáhva cája cahnu na Ndióxi, tátá i. Jáchí ndá na co cája cahnu yehe náhá ña co cája cahnu na Ndióxi, tátá i jáchí mé a cán nacindahá yehe vaxi i.

<sup>24</sup> <sup>25</sup> Mé a ndaa ná cahan i xihín ndo ña vaxi quívi ta cùú á tiempo viti tá na co tacú cuni joho na ña cahan yehe, dà cùú in tuhún jini já jahyi Ndióxi. Ta ndá ná ndíquehe vaha tuhun cahán i xihín ná catacu na anda ama caja quívi. <sup>26</sup> Jáchí tá quiáhva cuu caja Ndióxi catacu ñayivi quiáhva já nacaja mé a ña ná caja ri yehe, dà cùú in tuhún jini já jahyi mé á, ña ná cuu catacu ñayivi. <sup>27</sup> Ta nasañhan mé a ñamani nuú i ña ná caja víi i sahá ñayivi ñuyíví jáchí yehe cùú dà naquixi indívi nduu in ñayivi. <sup>28</sup> A catóntó ndo sahá ña cahán i xihín ndo yóho jáchí mé a ndaa vaxi quívi tá cuni joho tóco ndihi ná sa naxihí nuú cahan i xihín ná <sup>29</sup> já queta na camasanto. Ta ná nacaja vaha cán nditacu na ta cuhún na catacu na anda ama caja quívi. Ta ná nacaja ña quini nditacu na ta cuhún ná indayá ndoho ini na.

Náhá Jesús ña tím sahá cája tóco ndihi ña cája

<sup>30</sup> Tóco ndihi ña cája i a juú in tuhún mí i caja ña. Tá quiáhva sáhndá Ndióxi, tátá

i chuun nuú i ña ná caja vií i sahá ñayivi quiqhva já cája vií i sahá ná. Ta cája vií ndaa i sahá ná jáchí co ndúcú u caja i ña cúní mí i. Ña ndúcú u caja i cútú ña cúní Ndióxi, tátá i caja i jáchí mé á nachindahá yehe quixi i.<sup>31</sup> Jáchí tá sahá mí i ná caca nuu i cahan i, co ndítahan ndíquehe ndó ña cahan i sahá i. Co ndítahan nuú i cahan i sahá mí i<sup>32</sup> jáchí íin inga ña cahan sahá i ta ña cahan mé a cán sahá i cútú á ña ndaa.<sup>33</sup> Ta mé ndó nachindahá ndo java na nasahan ná ndáca tuhún na Juan sahá i. Ta ña ndaa nasaacuu tóco ndihí tuhun nanducú ñehe da cán nu ndo.<sup>34</sup> Vatí co ndáti i cándusa ndó yehe sahá ña cahan in ñayivi sahá i joo cuu cazu ndaa íníma ndó tá ná candusa ndó ña cahan Juan sahá i.<sup>35</sup> Jáchí mé Juan, da nacaja ndúta ñayivi cán nasaacuu da tátuhun in íti, dó jándiyéhe nuú ndo. Joo chá tiempo cuití va nacají ini ndó xihín tuhun nacahan da.<sup>36</sup> Ín inga ña cahnu chágá a juú ga ña nacahan Juan sahá i. Ta ña cán cútú á ña náhnu xihín ña xituhún naxini ndó nacaja i. Ta ña yóho náhá nu ndo yo cútú yehe ta náhá ña cútú á ña ndaa ña nachindahá Ndióxi, tátá i yehe. Jáchí tóco ndihí ña caja i cútú á ña nacachi Ndióxi, tátá i xihín i caja i.<sup>37</sup> Ta Ndióxi, tátá i, mé á nachindahá yehe náhá tuhun sahá i. Joo ndohó, co xíni john ndó nu cahan mé á ta ni co xíni tívi ndó a.<sup>38</sup> Ta ni coó tuhun mé á ndácaan íníma ndo jáchí co cándusa ndó yehe, da nachindahá mé á quixi ñuyíví yóho.<sup>39</sup> Vatí jácuaha vaha ndó tuhun Ndióxi sahá ña ndúcú ndo ndaja cuu catacu ndó anda ama cúa quivi joo co cándaa ini ndó ña mé tuhun Ndióxi cán cútú á ña cahan sahá yehe.<sup>40</sup> Ta co cúní ndó quixi ndó nuú i já ná caja i ña ná catacu ndó anda ama cúa quivi.

<sup>41</sup> Co ndúcú toho i ña ná caja cahnu ndó yehe.<sup>42</sup> Sa xíni vaha i íníma ndo ta cándaa ini i ña co quíhví ini ndó Ndióxi.<sup>43</sup> Naxinu i ñuyíví yóho cuéntá Ndióxi, tátá i ta co cúní ndó ndíquehe vaha ndó yehe. Joo tá ná quixi in da cuénta mé dá já ndíquehe vaha ndusa ndó da.<sup>44</sup> Jáchí mé ndó cátóo ndó candoo vaha ndó nuú ñayivi cuití va ta co ndúcú ndó candoo vaha ndó nu Ndióxi. Sahá ña cán quéa ihví ndívaha cútú ini ndó cándezee ini ndó in tühún jiní Ndióxi.<sup>45</sup> Coto a juú cahán ndó ña jácojo i cuachi jata ndo nu Ndióxi, tátá i. Mé ley nacahyí Moisés, ña cán cútú á chícaan cuachi jata ndó vatí

cándezee ini ndó da.<sup>46</sup> Tá ta mé a ndaa cándusa ndó ña nacahyí Moisés sanahá já quéa cándusa ndó yehe jáchí sahá yehe nacahyí Moisés sanahá.<sup>47</sup> Joo sahá ña co cándusa ndó ña nacahyí Moisés sahá i sahá ña cán quéa co cándusa ndó ña cahan i xihín ndo —nacachi Jesús xihín ná Israel cán.

## 6

Sáhan Jesús ña cuxu yhun mil tqa  
(Mt. 14:13-21; Mr. 6:30-44; Lc. 9:10-17)

<sup>1</sup> Tá sa nayaha tóco ndihí ña yóho já naquee Jesús cuahán inga xoo tañuhú Galilea cán. Ta mé tañuhú cán cahan tucu na xihín dó naní do Tiberias.<sup>2</sup> Ta cuahá ndívaha ñayivi ndíco jata Jesús cuahan ná jáchí naxini na ña náhnu nacaja mé á tá nandaja vaha mé á na quíhví.<sup>3</sup> Tá nandihí já nandaa Jesús in xíqui ta cán nasaacoo a xihín na xíca tuun xihín a cán.<sup>4</sup> Ta mé tiempo já sa cayáti vicó pascua ña caja mé ná Israel cán.<sup>5</sup> Ta tá nandicoto nihni Jesús já naxini a ña ndíco cuahá ñayivi jata växi na já nacachi a já xihín Felipe:

—Ndájá cájum cuénta cohó cueen nahá yo ña cuxu tóco ndihí ñayivi yóho —nacachi Jesús xihín dá.

“Nacachi Jesús ña yóho xihín Felipe jáchí cúní a cuni a ndíca cache da cán xihín á. Jáchí sa xíni vaha Jesús ndaa quéa caja ña ná cuxu ndihí na cán.”<sup>7</sup> Anda já nanducú ñehe Felipe tuhun nuú Jesús já nacachi da já xihín á:

—Ni ivi ciento denario ná cañehé, a quéta toho ña cán cueén pan ná quiahva in yuhú in yuhú cuxu in in ñayivi ndúu yóho —nacachi da cán xihín Jesús.

<sup>8</sup> Anda já nacahan Andrés, da cútú in táhan na xíca tuun xihín Jesús, da cútú ñani Simón Pedro. Já nacachi da já xihín Jesús:

—Yóho ín in tqa loho ta néhe da uhun pan cebada xihín ivi tiyacá. Joo ama ná queta ri ña yóho cuxu tóco ndihí ñayivi jan —nacachi Andrés xihín Jesús.

<sup>10</sup> Anda já nacachi Jesús já:

—Cahan ndó xihín ná ña ná cacoo na.

Anda já nasaacoo ndihí na cán. Ta a juú quiahva ndató nasaahu yucu nuú nasaacoo tátuhun uhun mil tqa.<sup>11</sup> Tá nandihí já natiiin Jesús pan cán já nandiquiahva ndixahví nu Ndióxi. Ta tá nandihí já nasaahn ña nuú na xíca tuun xihín á ta nandicahnda na ña nuú na ndúu coo cán. Ta quiahva já nacaja ri a xihín tiyacá va. Ta naxixi ndihí na janda

quiāhva nāchutú tixi na. <sup>12</sup> Ta tá nāndihi já nācachi Jesús já xihín ná xíca tuun xihín á cán:

—Jánditaca ndó tóco ndihi nā nacandoo jan já ná a tívi nā —nācachi Jesús xihín ná.

<sup>13</sup> Sahá nā cán quéa najánditaca na nā ta najándicatu nā uxu ivi toyicá xihín nā nacandoo. <sup>14</sup> Tá naxini ndihi nayivi cán nā xitúhún nacaja Jesús yóho já nācasáhá cachí xihín táhan na já:

—Jivi ndusa dā yóho cíu profeta nācachi Ndióxi chindahá a nuyíví yóho —cachí xihín táhan na.

<sup>15</sup> Joo naquee Jesús cuahán in túhún mé á coo a yúcu jáchí xíni mé a nā ndúcú nayivi cañehé ndúsá nā mé a jáchí cúní nā ndaja na mé a rey nu ná.

### Tá naxixa sahá Jesús nuú tañuhú (Mt. 14:22-27; Mr. 6:45-52)

<sup>16</sup> Tá sa nacuaá já nantu na xíca tuun xihín Jesús xiquí cán cuahán chí yuhú tañuhú cán. <sup>17</sup> Ta chí sa nacanáá vaha va ta coó Jesús xínu coo nu ndúu na sahá nā cán quéa nāndaa na jatá in barco ta nācasáhá nā jāndicaca na dō jáchí cúní nā cuhun na nūu Capernaum. <sup>18</sup> Ta ndaja coo nācasáhá ndícojo ticiuí nuú tañuhú cán jáchí nācasáhá xícó in tachí ndee ndivahá.

<sup>19</sup> Ta tá sa nācaxícá nā uhun á iñu kilometro cuahán nā xihín barco cán nuú ticiuí já naxini na xíca sahá Jesús cuahán nuú ticiuí já cayati a nu barco cándójó nā cán. Anda já nācasáhá yihví nā ndúu na. <sup>20</sup> Ta tá naxini coo Jesús nu ná já nācachi a já xihín ná:

—A cayihví toho ndó jáchí yehe va cíu u —nācachi a xihín ná.

<sup>21</sup> Anda já cávatá nā najándaa na a jata barco. Ta ivi laá sa naxinu coo na nuú cuahán ná.

### Ndínducú nayivi Jesús

<sup>22</sup> Tá nātivi inga quív itaan já nācasáhá nayivi ndínducú na Jesús jáchí naxini na nā coó nāndaa toho a in túhún barco nāsahíin cán xihín nā xíca tuun xihín a jáchí mé cuítí nā cán sa nāndaa cuahán. <sup>23</sup> Ta nani ndúu na yuhú tañuhú yati nuú nāndaja cuaha Jesús pan tá nāndihi nāndiquahva mé a ndixahví nu Ndióxi cán já naxinu coo java barco, dō nāquixi chí nūu Tiberias. <sup>24</sup> Ta sahá nā coó nānditahan na Jesús sahá nā cán quéa nāndaa na barco cán já naquee na cuahán nā nūu Capernaum ndínducú nāhá ná.

Jesús cíu á tátuhun pan xíxi nayivi já tacú nā

<sup>25</sup> Tá naxinu coo nā cán inga xoo tañuhú já nānditahan na Jesús. Ta nācasáhá ndáca tūhún nā mé a já cachí nā já:

—Maestro, ndá hora naxinu coo ndó yóho —nācachi na xihín á.

<sup>26</sup> Anda já nācachi Jesús já xihín ná:

—Mé a ndaa ná cahán i xihín ndo. Xíca ndó ndínducú ndó yehé joo coo cíu á sahá nā nāndaa ini ndó yo cíu yehé. Sahá nā nāhnu nācaya i tá nāsahán i nā nāxixi ndó jāndā nāchutú tixi ndó sahá nā cán quéa ndínducú ndó yehé. <sup>27</sup> Co nādítahan ndihi nāhá ini ndó sahá nā cuxu ndó nuyíví yóho. Nā nādítahan caja ndó quéa ndínducú ndó ndá quiāhva catacu ndó anda ama cāa quivi. Jáchí yehé cíu dā nāchindahá Ndióxi nāu nāyivi ta cuu caja i nā nā catacu ndó anda ama cāa quivi. Jáchí Ndióxi, tátá i nāhá nā mé a ndaa nācaxí a yehé caja i chuun yóho —nācachi Jesús xihín nā cán.

<sup>28</sup> Anda já nācachi nā cán já xihín á:

—Ndá nādítahan nuú nde caja nde já ná jaxinu coo nde nā cúní Ndióxi —nācachi na xihín Jesús.

<sup>29</sup> Já nācachi Jesús já xihín ná:

—Nā cúní Ndióxi caja ndó quéa nā can-dúsá ndó yehé, dā nāchindahá mé a nuyíví yóho.

<sup>30</sup> Anda já nācachi tucu nā cán já xihín á:

—Ndá nāhá xitúhún chágá cuu caja ndó nuú nde viti nā nā cuni nde nā já nā cuu candúsá nde ndohó. Ndá a nāhnu quéa cuu caja ndó. <sup>31</sup> Jáchí mé tásahnu jíco nde nāxixi na pan tá naxixa na yucú íchí nu coo ndúu nāyivi cán. Já cachí tūhun Ndióxi já: “Nāxixi na pan nā nāquixi indíví nācaya Moisés” —nācachi nā cán xihín Jesús.

<sup>32</sup> Já nācachi Jesús já xihín ná:

—Mé a ndaa ná cahán i xihín ndo. A juú toho Moisés cíu dā nāsahán pan nā nāquixi indíví nu ná. Jáchí Ndióxi, tátá i cíu ndusa nā nāsahán para nāquixi indíví nu ná. Ta viti cúní Ndióxi quiāhva in nāhá vāha chágá nu ndo a juú ga nā nāsahán Moisés nuú nā cán sānahá. <sup>33</sup> Jáchí yehé cíu tátuhun pan nā nānuu indíví nācaya Ndióxi nā nā cuu catacu nāyivi anda ama cāa quivi —nācachi Jesús xihín nā cán.

<sup>34</sup> Anda já nācachi nā cán já xihín á:

—Nini quivi quiāhva ndó tāhan pan jan nuú nde, xitoho.

<sup>35</sup>Já nacachi Jesús já xihin ná:

—Yehé cíuú u tátuhun mé pan jan. Tá ná ndiquehe ñayivi yehé já ndiváha ini na ta cíuú á tátuhun a cuíco ga na. Ta ndá ná cándusa na mí i já cíuú á tátuhun a íchi ga iní na ticuií. <sup>36</sup>Joo cíuú á tá quiáhva nacachi i xihin ndo: co cándusa toho ndó yehé vatí xíní ndó yehé. <sup>37</sup>Joo tóco ndihi na vaxi nuú i cája Ndióxi, na cán cíuú ná cándusa yehé. Ta ndá ná cándusa yehé, na cán co táxi i na ña ná quee na cuhun na. <sup>38</sup>Jáchi vatí nanuu i indíví nu íin Ndióxi joo coó naquixi i caja i ña cúní mí i. Vaxi i caja i ña cúní Ndióxi, tátá i jáchi mé á nachindahá yehé. <sup>39</sup>Ta ña cúní Ndióxi quéa ña ná a quiáhva i ñamani ndihi sahá na nasahan mé á nuú i. Ña cúní mé á quéa ná jánditacu u tóco ndihi na tá ná xínu coo quiví nu ndíshí. <sup>40</sup>Ña cúní Ndióxi quéa ná catacu ñayivi, na cández iní yehé andá ama cása quiví. Ta yehé, da cíuú in túhún jini já jahyi mé á jánditacu u ná quiví nu ndíshí cuíí —nacachi Jesús.

<sup>41</sup>Andá já nacásáhá ná Israel cán cáhan níuu na sahá Jesús jáchi sa nacachi a ña cíuú á tátuhun pan na nacachi a ña nanuu a chí indíví. <sup>42</sup>Ta já nacachi xihin táchan na cán já:

—A a juú jahyi José va cíuú Jesús yóho. Ta xíni vaha va mí yo cíuú náná da xihin tátá da. Ta ndá cuénta quéa cáchí ri da ña naquixi da chí indíví, dá já —nacachi xihin táchan na cán.

<sup>43</sup>Andá já nacachi Jesús já xihin ná:

—A cáhan níuu ga ndó sahá i. <sup>44</sup>Jáchi jácahan Ndióxi, tátá i, ñayivi ña ná candusa na yehé. Ta ni in túhún toho ñayivi a cíuú candusa na yehé tá ta co jácahan Ndióxi íníma ná, mé á nachindahá yehé. Ta cán cíuú ná jánditacu u quiví nu ndíshí. <sup>45</sup>Já nacahyá na profeta sanahá: “Jánahá Ndióxi tóco ndihi ñayivi.” Ña cán quéa tóco ndihi ñayivi, na xíni joho nu cáhan Ndióxi ta cája na ña jánahá mé á nu ná, na cán cíuú ná vaxi nuú i.

<sup>46</sup>Joo a juú cahán ndo ña cuu cuni java ñayivi Ndióxi, tátá i. Jáchi yehé, da nachindahá mé á ñuyíví yóho, cíuú in túhún da xíni ñahá. <sup>47</sup>Mé a ndaa ná cahán i xihin ndo. Ndá ná cández iní yehé, na cán cíuú ná catacu andá ama cása quiví. <sup>48</sup>Jáchi yehé cíuú u tátuhun pan ña cuu caja ña ná catacu na. <sup>49</sup>Sa xíni ndó tásáhnu jíco ndo naxixi na pan yucú íchí sanahá joo naxihí tá naxihí na. <sup>50</sup>Joo yehé cíuú u tátuhun pan ña nanuu

chí indíví já quéa ndá ná cándusa yehé cíuú ná tátuhun ná xíxi pan ta já a quíví na. Jáchí tá ná cuxu na pan quiáhva i nu ná já quéa catacu na andá ama cása quiví. <sup>51</sup>Yehé cíuú u tátuhun mé pan xíxi na. Nanuu i indíví ta a cíuú ndihi sahá i. Ta jivi mé yiquí cíuú i cíuú á tátuhun pan xíxi na yóho ta vaxi quiví ndiquahva i ña nu ná já ná cuu cazu ndaa íníma ná. Ta tá ná cuxu na ña já catacu na andá ama cása quiví —nacachi Jesús.

<sup>52</sup>Andá já nacásáhá ná Israel cán ndítuhún cuehé xihin táchan na já nacachi na já:

—Cáchí da yóho ña cíuú yiquí cíuú da tátuhun pan xíxi ñayivi. Ndaja cuu caja ri da quiáhva da ña nu yo cuxú —cáchí xihin táchan na.

<sup>53</sup>Andá já nacachi Jesús já xihin ná:

—Mé a ndaa ná cahán i xihin ndo. A cíuú catacu ndó andá ama cása quiví tá ta co cándusa ndó yehé. Ta tá cándusa ndó yehé cíuú á tátuhun xíxi ndó yiquí cíuú i ta cíuú á tátuhun xíhi ndó nií i. <sup>54</sup>Ndá ná xíxi na yiquí cíuú i ta xíhi na nií i, na cán cíuú ná cazu ndaa íníma ná ta jánditacu u na quiví nu ndíshí. <sup>55</sup>Jáchi yiquí cíuú i cíuú ndusa tátuhun in ñaha vaha ndiváha cuxu na ta nií i cíuú dó tátuhun in do vaha xíhi na. <sup>56</sup>Ndá ná ná ndiquehe vaha yehé cíuú á tátuhun ndiquehe vaha na in pan cuxu na ta cíuú á tátuhun ndiquehe na ticuií xíhi na. Já quéa in nduu na xihin i ta já in nduu ri yehé va xihin mé ná. <sup>57</sup>Ta sahá ña tacú Ndióxi, tátá i, mé a nachindahá yehé sahá ña cán quéa tacú ri yehé va cája mé á. Quiáhva já yaha ri xihin ñayivi jáchi tá ná ndiquehe vaha na yehé já catacu na caja i. <sup>58</sup>Jáchi yehé cíuú u ndusa tátuhun pan ña nanuu indíví. Ta co cíuú á tátuhun ña nayaha xihin tásáhnu jíco ndo tá naxixi na pan naní maná yucú íchí cán jáchi tá nandhi naxihí tá naxihí na cán. Joo ndá ná cández iní yehé cíuú ná tátuhun ná xíxi pan ña naquixi indíví. Ta ná cán catacu na andá ama cása quiví —nacachi Jesús.

<sup>59</sup>Tóco ndihi ña yóho najánahá Jesús nu ná ini veñuhu ñuu Capernaum cán.

*Cuu catacu ñayivi andá ama cása quiví tá ná cández iní na Jesús*

<sup>60</sup>Ta cuahá táchan na xíca xihin Jesús cán tá naxini joho na ña nacahán mé á já nacásáhá cáhan níuu na sahá já cáchí na já:

—Yáncá ndiváha candúsa í týhun cáhan Jesús yóho. A cíu toho caja í xihín á —nacachi na cán.

<sup>61</sup>Tá naxini Jesús ña cáhvi núu ini na xíca xihín a cán já nacásahá cachí a jahí xihín ná:

—Ndíhíhví ndó sahá tuhun nacahan i yóho. <sup>62</sup>Ndaja ga ví ndihíhví ndó tá ná cuni ndó yehe ndaa i cuhun i indívnu ná nasañin i jahí yehe cíu u dä nachindahá Ndióxi nduu ñayivi. <sup>63</sup>Nasahan Ndióxi in íníma ná in ñayivi ña ná chindeé a ná ndinducú na mé á. Joo yiquí cuhun ñayivi co chindeé toho a ná ndinducú na mé á. Ta tóco ndihí ña nacahan i xihín ndó cíu á ña cuu xínu ini íníma ndó ña ná catacu ndó anda ama cá quívi. <sup>64</sup>Joo ndúu java ndó cámán yíí candúsa ndó ña cáhan i xihín ndo —nacachi a.

Nacachi Jesús ña yóho jahí sa xíni mé á anda sahá ndá na cíu na co cándusa ñahá. Ta sa xíni Jesús ndá dä cíu da jicó tühún ñahá. <sup>65</sup>Anda já nacachi tucu a já:

—Sahá ña cán quéa cachí i xihín ndó ña ni in túhún toho ñayivi a cíu candúsa na yehe tá co jácahan Ndióxi íníma ná —nacachi Jesús.

<sup>66</sup>Tá nacachi Jesús ña yóho já quéa cuaha táhan na nasaixa xihín a cán najándacoo na mé á ta chí coó naxeen ga na caca nuu na xihín á. <sup>67</sup>Anda já nandaca tuhun Jesús ndíshxu ivi na xíca tuun xihín a cán já nacachi a já xihín ná:

—Á cuhun ri ndohó va cíni ndo —nacachi a.

<sup>68</sup>Anda já nanducú ñehe Simón Pedro tuhun nuu Jesús já nacachi da já:

—Candehé ndo, xitoho i. Yo nága cuu cuhun nde. Tuhun cáhan ndó xihín nde caja ña ná cuhun nde catacu nde anda ama cá quívi tá ná candúsa nde ña. <sup>69</sup>Ta ndehe sa nacandúsa va nde ndohó. Ta sa xíni vaha nde ña cíu ndó Cristo, ña in túhún jíni já jahyi Ndióxi, ña tácum indív —nacachi Pedro cán xihín Jesús.

<sup>70</sup>Anda já nacachi Jesús já:

—Mé a ndaa nacaxi i ndíshxu ivi ndó ña ná caca tuun ndó xihín i. Ta vatí nacaxi i ndihí ndó joo in táchán ndó cíu dä cuénta tiñáhá sacuaha —nacachi Jesús.

<sup>71</sup>Nacachi Jesús ña yóho sahá Judas, jahyi Simón Iscariote jahí mé Judas cán cíu dä dä jicó tühún ñahá chágá chí ná vati cíu dä in táchán dä uxu ivi na xíca tuun xihín Jesús cán.

Có cíni na cíu ñani Jesús candúsa na mé á  
<sup>1</sup>Tá nayáha ña yóho já nacásahá nuu Jesús tá níuu tá níuu estado Galilea cán. Có naxeen ga cuhun a chí Judea jáchí cán nacásahá na ndúcú na mé á cahní na a. <sup>2</sup>Joo sahá ña nacayati víco tá ndúu ñayivi vehe tiyahvá válí caja na Israel <sup>3</sup>sahá ña cán quéa nacachi java ñani Jesús já xihín á:

—Ndíajá cajún coún yóho. Cuáhán chí Judea já ná cuni na xíca xuhun cán ndaja ndáa ña náhnu cajún. <sup>4</sup>Jahí cíni in dátaa náha da ña náhnu caja da já quéa co ndácoo jehé toho da caja da ña. Tá tā mé a ndaa cajún ña náhnu já quéa xíni ñúhú cajún ña já ná cuni níi cíu ñayivi ndaja náhnu ñáha cajún —nacachi ñani Jesús xihín á.

<sup>5</sup>Nacachi na cán ña yóho jahí na mé ñani a cán coó nacandúsa ñahá. <sup>6</sup>Anda já nacachi Jesús xihín na cán já:

—Cámán yíí ndindaa hora cuhun i. Ta vaha ri ndohó ndá hora nacuu va cuu cuhun ndó jan. <sup>7</sup>Jahí ñayivi caja ña níu ñuyíví yóho a cíu candají toho na ndohó joo cán-dají na yehe jahí caxí tähý cáhan i xihín ná ña caja na ña níu. <sup>8</sup>Cuáhán mé ndó víco tá cíni ndó cuhun ndó jahí yehe a cuhun toho i jahí cámán yíí xínu hora cuhun i —nacachi a.

<sup>9</sup>Ña yóho nacachi Jesús xihín ñani a. Ta nacando mé á estado Galilea cán.

Tá naxínu coo Jesús víco vehe tiyahvá cán

<sup>10</sup>Joo tá nandihi naquee ñani Jesús cán cuahan na víco já naquee ri Jesús cuahan mé víco cán. Joo coó naxeen a náha tívi a mé a náu ñayivi. <sup>11</sup>Ta mé na sacuaha náu na Israel cán nacásahá na ndúcú na Jesús: “Ndá xíca nuu da tañu víco cán”, cáhán na.

<sup>12</sup>Ta jandá joho ndítúhún yaá ñayivi sahá Jesús xíca nuu na víco cán. Java na cachí na sahá Jesús ña cíu dä taa caja vaha. Ta java na cachí na: “Co cíu toho da taa vaha jahí xíca nuu cuití da jándahvi da ñayivi”, cachí na.

<sup>13</sup>Joo ni in na co sáhan ndeeé ini cahan sahá náu na sacuaha náu na Israel cán jahí yihví ñahá na.

<sup>14</sup>Ta tá natahví java víco cán já naquihví Jesús ini veñuhu cáhnu níuu Jerusalén cán já nacásahá jána há náu ñayivi. <sup>15</sup>Ta tá xíni joho na Israel cán ná cahan Jesús chí catóntó na já nacásahá ndáca tühún táchán na já cachí na já:

—Ndájá nacatiqhva nähá dä yóho ñä já-nähá dä nu yo jáchí a juú dä nañixa jácuaha cùú dá —nacachi xihín táhan na cán.

<sup>16</sup> Anda já nacachi Jesús já xihín ná:

—Ña jánahá i nu ndö yóho co cúú á ñä naquixi jini mí i jáchí cúú á ñä quixi nu Ndióxi, tátá i, mé á nachindahá yehe. <sup>17</sup> Ta tá mé a ndaa sácu imi ndó caja ndö ñä cúú Ndióxi já quéa cuu candaqá ini ndó á cáhan i cuéntá Ndióxi, á cáhan i cuéntá mí cuití vi. <sup>18</sup> Jáchí ndá na cáhan cuéntá mé ná já quéa ndúcú na ñä ná caja cáhuu ñayivi ná. Joo ndá na ndúcú ñä ná ndicáhuu mé á nachindahá ñähá cán, ná cán cúú ndusa na cáhan ñä ndaa ta co cája na ñä co ndítahan nu ná caja na.

<sup>19</sup> Mé a ndaa najándacoo Moisés ley nu ndo joo ni in túhún ndö co cája ndö ñä cächí a. Ta viti cúú ndö cahní ndö yehe —nacachi Jesús.

<sup>20</sup> Anda já nanducú ñehe ná cán tūhun nu á já nacachi na já:

—Rí quini va ndácaqan ini yóhó jáchí ni in túhún toho na co ndúcú cahní yohó —nacachi na cán.

<sup>21</sup> Anda já nacachi Jesús já xihín ná:

—Chí cátontó ndivaha ndö sahá in túhún ñä cáhuu nacaja i quivi ndíquehe ndée yo. <sup>22</sup> Joo candehé ndö. Moisés cúú dä nasañnda chuun nu tásahnu jíco yo ñä ná chicaqan ná marca yiquí cuñu na vatí a juú Moisés nañavá sahá, vaha. Mé tásahnu jíco yo nañavá sahá ta mé ndö chícaqan tá chícaqan ndö marca yiquí cuñu taa valí vatí cuú á quivi ndíquehe ndée yo. <sup>23</sup> Ta viti cächí ndo xihín i ndaja cása ri ñä yóho. Mé ndö chícaqan ndö marca yiquí cuñu dä valí vatí cuú á quivi ndíquehe ndée yo jáchí co cúú ndö yaha nuú ñä nasañnda Moisés nu ndó. Ta viti xójo ini ndó xihín i sahá ñä nandaja vaha i in ní yiquí cuñu in datqa quivi ndíquehe ndée yo. Ndaja cása ri ñä jan cása já. <sup>24</sup> Mé ndó ndaja nacuu cáhan nuú ndö sahá ñayivi ta co ndítahan toho caja ndó já. Jáchí ndítahan nu ndó candaqá ini ndó ñä cuú ñä ndaa —nacachi Jesús xihín ná cán.

Ndícani Jesús ndáchí naquixi a

<sup>25</sup> Ta java ná nuú Jerusalén nacásahá ndá-ca tūhún táhan na já cächí na já:

—Á ajuú dä yóho cúú dä xícá na ndúcú ná cahní ná. <sup>26</sup> Nu ndíhi na cándichi da jánahá dä ta ni in na co ndáa cúú da. Á tá coó ta jandá ná jutixia cása cándusa na ñä cúú

dä Cristo, dä nachindahá Ndióxi cacomí a cuénta sahá ñayivi. <sup>27</sup> Joo mí xíni vaha i ndá ñuu naquixi dä yóho ñä cán quéa xíni yo ñä co cúú toho da Cristo jáchí tá ná quixi ndusa Cristo cán ni in na a cándaqá ini ndá ñuu quixi da —nacachi ná cán cáhan ná sahá Jesús.

<sup>28</sup> Ta nani jánahá Jesús ini veñuhu cáhuu cán já nacásahá cáhan cóhó a já nacachi a já:

—Mé a ndaa xíni vaha ndó yehe ta xíni ndó ndá ñuu naquixi i. Joo coó vaxi yehe cuénta mí i. Mé Ndióxi nachindahá yehe vaxi i, mé a cán cája ñä ndaa. Joo mé ndó co xíni toho ndö a. <sup>29</sup> Yehe xíni vaha i yo cúú mé á jáchí naquixi i nu ín mé á ta nachindahá mé á yehe vaxi i —nacachi a.

<sup>30</sup> Anda já ndúcú ná tiin na Jesús chicaqan ná a vecaa joo ni in na coó nasañdeé ndee in i tiin ñahá jáchí cámání yií ndindaa hora tiin na a. <sup>31</sup> Ta cuahá táhan ñayivi naxini joho nuú nacáhan Jesús cán nacandúsa na mé á ta já cächí na já:

—Á a juú dä yóho cúú Cristo jáchí tá ná quixi inga da ama ná caja da ñaha xitúhún chágá a juú ga dä yóho —nacachi na.

Ndúcú ná fariseo chicaqan ná Jesús vecaa

<sup>32</sup> Tá naxini joho ná fariseo ñä cáhan nuú ñayivi sahá Jesús já nandindeé in i na ta nandindeé in i ri ná sacuahá nuú jutu cán chí nachindahá ná java soldado cuénta veñuhu cáhuu cán ñä ná tiin na Jesús chicaqan ná a vecaa. <sup>33</sup> Anda já nacachi tucu Jesús já:

—Chá tiempo cuití va coo tóo i xihín ndo ñuyíví yóho jáchí tá nandihí já cuhun tucu u nu ín mé á nachindahá yehe. <sup>34</sup> Anda jáví caca nuu ndó ndinducú ndö yehe joo a ndítahan ndó yehe jáchí a cúú cuhun ndó nuú coo i —nacachi Jesús.

<sup>35</sup> Tá naxini joho ná Israel cán ñä nacachi Jesús já nacásahá ndáca tūhún táhan na já cächí na já:

—Ta ndáchí já cuhun ri dä yóho ñä cächí dä ñä a cúú ndítahan i dä. Á cuhun xícá dä ñuu ná toho nu ndúu ná Israel ñä ná jánahá dä nuú ná griego. <sup>36</sup> Ndíqá cúú cachi da xihín yó ñä nacachi da ñä ndinducú yó dä ta a ndítahan toho i dä. Jáchí nacachi da xihín yó ñä a cúú coho nuú coo da —nacachi xihín táhan na cán jáchí coó nacandaa ini na ñä nacachi Jesús xihín ná.

Jesús cíú á tátuhun yuta ticuíí

<sup>37</sup> Ta mé quíví nu ndíhí víco cán násacuú a quíví cáhnu chágua nuú na Israel. Ta mé quíví cán nandaca ndichi Jesús já nacayuhú a já nacachi a já:

—Ndá ndó íchí ini ticuíí, naha ndó nuú i já ná caja i ña ná ndivahá ini ndó. <sup>38</sup> Jáchí já nacayií a nuú tuhun Ndióxi: “Ndá na ná candeé ini yehe, ini mé íníma ná cana tátuhun yuta ticuíí, dó caja ña ná catacu na” —nacachi Jesús xihín na cán.

<sup>39</sup> Ña cúní Jesús cache a xihín na yóho quéra tá ná candeé ini na mé á já xínu quíví ndiquehe na íníma yii Ndióxi ini íníma ná. Vatí mé a ndaa a náha toho xínu íníma yii Ndióxi ini ñayivi jáchí cámání yíí va ndindita Jesús ndicáhnu ndivahá mé á indiví.

Sa jín sa jín ñaga cáhan ñayivi sahá Jesús

<sup>40</sup> Java na ndúu tañu ñayivi cuahá cán tá naxini joho na ña yóho já nacásáhá cachí na já:

—Jivi ndusa da yóho cíú profeta nacachi Ndióxi chindahá a ñuyíví yóho —cachí na.

<sup>41</sup> Ta java na cachí na sahá Jesús ña cíú á Cristo, da nacindahá Ndióxi cacomí cuénta sahá ñayivi. Ta java na cachí na ña a juú toho a jáchí cáhán na ña a cíú toho quixi Cristo estado Galilea. <sup>42</sup> Jáchí cachí tuhun Ndióxi ña tá ná quixi Cristo ñuyíví yóho cacuu da da quixi chichi David, da násacomí cuénta sahá ñayivi Israel sanahá. Ta cachí tuhun Ndióxi ña cacu da cán nuú Belén nuú nacacu mé David cán.

<sup>43</sup> Ta chí nacásáhá na sáhdá java táhan na sahá ña coó nandique táhan tuhun na sahá Jesús. <sup>44</sup> Ta java na cúní na tiin na a ña ná cañehe ñahá na cuhun a vecqa. Joo ni in na coó natiin ñahá.

Có cúní na jutixia candusa na Jesús

<sup>45</sup> Tá nandihi já nandicó coo soldado cuénta veñuhu cán nu ndúu na fariseo xihín na sacuahá nuú jutu cán joo coó Jesús néhe na ná casaa na. Já nacásáhá na ndúu cán ndaca tuhún ñahá na já cachí na já:

—Ndá cuénta quéa coó natiin ndó da —nacachi na cán xihín soldado.

<sup>46</sup> Andá já nanducu ñehe soldado cán tuhun nu ná já cachí da já xihín ná:

—Nacatontó nde naxini joho nde nu cáhan da jáchí ñúchí ndivahá cáhan da ta ni in tuhún na coó nacahan tá quiahva cáhan mé dá —nacachi soldado cán.

<sup>47</sup> Já nacachi na fariseo já xihín dá:

—Á jári ndóhó va najándahvi da jan viti.

<sup>48</sup> Jáchí janda ni in túhún toho táhan na sacuahá ndúu tañu mé nde co cándusa nde da jan. Ta ni in na fariseo co cándusa na nu cáhan Jesús jan. <sup>49</sup> Joo cháhan va växi jatá ñayivi candeé ini Jesús jan jáchí co xíni na ña cachí ley Moisés —nacachi na fariseo xihín soldado.

<sup>50</sup> Anda já nandicahen Nicodemo, da cíú in táhan na fariseo cán, mé dá násahan da nandituhún xihín Jesús in ñuu. Já nacachi da já xihín na java ga cán:

<sup>51</sup> —Cachí ley ña a cuú tiín in taa ta já chicaqan ndaja nacuú da vecqa. Ña cachí ley quéra nditahan cuni joho í nuú cahen da já ná candaq a iní ndaja cúa ña nacaja da —nacachi Nicodemo.

<sup>52</sup> Anda já nacaja cuehe na xihín Nicodemo já nacachi na já xihín dá:

—Á da Galilea cíú ri yóho va. Cuáhán cahvi vaha tuhun Ndióxi já cunún ña co cána ni in profeta estado Galilea —nacachi na xihín Nicodemo.

<sup>53</sup> Tá nandihi já nandicuita nuu ndihi na cán cuánihu ná vehe na.

## 8

Cája cáhnu ini Jesús sahá in ñáñáhá

<sup>1</sup> Ta ndaja coo naquee Jesús cuahán chí yúcú yitó olivo. <sup>2</sup> Ta tá natiivi inga quíví itaqan já nandicó coo tucu a veñuhu cáhnu cán. Ta tá nacayati ñayivi nu á já násaco a ta nacásáhá jánqah nu ná. <sup>3</sup> Ta ndaja coo na jánqah ley Moisés xihín na fariseo néhe na in ñáñáhá násaa na nu á. Mé ñáñáhá cán nanditahan na ña mé hora cánduhu ña xihín in dataa, da co cíú yíí ña. Ta já néhe na ña násacu ndichi na ña nuú na ndúu cán. <sup>4</sup> Já nacachi na já xihín Jesús:

—Candehé ndo Maestro. Nanditahan nde ñáñáhá yóho cánduhu ña xihín in dataa, da co cíú yíí ña. <sup>5</sup> Ta nu ley najándacoo Moisés nuú nde tähndä chuun ña ná cuun nde yuu najíhí cája já. Ta mé ndó ndia cache ndó —nacachi na.

<sup>6</sup> Nacachi na cán já xihín Jesús jáchí cúní na coto ndojó cuití ñahá na ta cúní na ñehe iní na jácojo na cuachi jatá Jesús. Tá nandihi já násaco Jesús já nacásáhá cáhyí a nu ñuhu cán xihín nducu ndáhá á. <sup>7</sup> Ta sahá ña ndúu ndeé na cán ndaca tuhún ñahá na nandaca ndichi Jesús já nacachi a já xihín ná:

—Ndá ndó, na coó nacaja cuachi jácana jihna ñúhú ndó yuú jatá ña —nacachi a xihín ná.

<sup>8</sup>Já násaco tuco a cáhyí a nu ñúhú cán xihín nducu ndáha á. <sup>9</sup>Ta tá naxini joho tóco ndihi na cán ña nacachi Jesús já nácasáhá na cácahan nuyu ná ta tá in tá in na nacásáhá quée na cuahan na. Ta jihna ñúhú ga na yatá nácasáhá quée cuahan já ndíco na yúta chágá cuahan na. Ta tá sa naquee ndihi na cuahan na já nacando mé Jesús xihín ña cán. <sup>10</sup>Andá já nandaca ndichi a ta nandaca tuhún a ña já nacachi a já xihín ñá:

—Ndáchí cuahan na jácoco cuachi jatun. Á coó ga na jácoco cuachi jatun viti —nacachi Jesús xihín ñá.

<sup>11</sup>Andá já nacachi ñá cán já xihín Jesús:

—Mé a ndaa coó ga na.

Andá já nacachi Jesús já:

—Ta ni yehe a chícaan i cuachi jatun. Cuánúhú vehún ta a cája gaún cuachi —nacachi a.

Jesús cíuú á tátuhun ñúhú ña jándiyéhe íníma ñayivi

<sup>12</sup>Já nácasáhá tuco Jesús cáhan xihín ñayivi já cachí a já xihín ná:

—Yehe cíuú u tátuhun ñúhú ña jándiyéhe íníma ñayivi ta ndá na cández ini yehe cíuú á tátuhun a cáca ga na nyú naá. Jáchí jándiyéhe e nu ná ta cája i ña ná catacu na anda ama cáa quiyi.

<sup>13</sup>Andá já nacachi na fariseo já:

—Sahá mé vún cáhun ta xihín ña jan náhún ña cúnun ndínehe jícum mún. Ta xihín ña jan náhá ña co cáhun ña ndaa —nacachi na.

<sup>14</sup>Andá já nacachi Jesús já xihín ná:

—Tóco ndihi ña cáhan i sahá mí i cíuú á ña ndaa ta íin sahá vatí mí i cáhan i ña. Jáchí xíni vaha i ndá naquixi i ta xíni vaha i ndá cuhun i. Joo ndóho, co xíni toho ndó ndá naquixi i ta co xíni toho ndó ndá cuhun i. <sup>15</sup>Mé ndó cátóof ndó cández ndaa ndó ñayivi ta quiáhva cája ñayivi ñuyíví. Joo yehe co cája toho i já. <sup>16</sup>Joo tá ná ndaa caja i jáchi cája i ña ndaa. Ta a juú in tühún yehe caja víi sahá ná jáchi Ndióxi, tátá i, mé a nachindahá yehe, mé á cán quéa caja víi sahá ná xihín mí i. <sup>17</sup>Nu ley mé ndó cachí a ña tá in nuú cáhan ivi ñayivi sahá ña nayaha já náhá ña cíuú á ña ndaa. <sup>18</sup>Ta viti cuni joho ndó jáchi quiáhva já yáha ri xihín yehe va.

Jáchí yehe cíuú in testigo ta cáhan i sahá mí i. Ta inga testigo cíuú Ndióxi, tátá i, mé a nachindahá yehe —nacachi Jesús xihín ná.

<sup>19</sup>Andá já nandaca tuhún na Jesús já cachí na já xihín á:

—Ndájá íin tátun jan —nacachi na.

Andá já nacachi Jesús já:

—Tá ná cuni ndó yo cíuú yehe já cuu candaqári iní ndó yo cíuú tátá i. Joo co xíni ndó yo cíuú yehe ta cachí ga ví tátá i co xíni ndó a —nacachi Jesús.

<sup>20</sup>Tóco ndihi ña yóho nacachi Jesús xihín ná nani jánahá ini veñhu cáhnu yati nuyú nácasáháin sató ndee jíjhún jocó na cán. Joo ni in ña coó nácasáhándeé ini tiin ñahá chicqan vecaa jáchi coó nácasáhá Ndióxi ñamani sahá ña cámání yií ndindaa hora tiin na mé á.

Cáhan Jesús xihín ñayivi ña q cíuú toho cuhun na nuú cuhun mé á

<sup>21</sup>Andá já nácasáhá tuco Jesús cachí a já xihín ná:

—Vaxi quiví quee yehe cuhun i. Ta caca nuu ndó ndinducu ndó yehe joo a ndíñehe ndó yehe jáchi cája tá cája ndó cuachi janda quiáhva xínu quiví quiví ndó. Ta sahá ña cán quéa a cíuú cuhun ndó nuú cuhun yehe cán —nacachi Jesús.

<sup>22</sup>Andá já nácasáhá na Israel cán ndítuhún xihín táchan na já cachí na já:

—Á cahní da yóho mé dá cúní da ña cán quéa cachí da xihín yo ña a cíuú toho caja í cohó nuú cuhun da —cachí na.

<sup>23</sup>Já nacachi tuco Jesús já:

—Mé ndó cíuú ndó ñayivi ndúu ñuyíví yóho joo yehe cíuú u da naquixi chí indívi. Mé ndó cíuú ndó cuéntá ñuyíví yóho joo yehe co cíuú toho i cuéntá ñuyíví yóho.

<sup>24</sup>Sahá ña cán quéa nacachi i xihín ndó ña caja ndó cuachi janda quiáhva xínu quiví quiví ndó. Jáchí tá co cández ndó ña cíuú yehe da cachí i cíuú u, da nachindahá Ndióxi, já quéa quiví ndó sahá cuachi ndó —nacachi Jesús.

<sup>25</sup>Andá já nandaca tuhún na cán Jesús já nacachi na já xihín á:

—Ta ndá da cíuú yóho, dá já —nacachi na.

Já nacachi Jesús já:

—Janda sahá va nácahan i xihín ndó yo cíuú yehe. <sup>26</sup>Ta ña xíni joho i cáhan mé a nachindahá yehe, ña cán cíuú ña cáhan i xihín ñayivi ñuyíví. Ta ndinuhu ña ndaa quéa cáhan mé á. Ta mé a ndaa íin cuahá

ndiváha ña níu caja ndó ta cuu tavá i sahá nu ndó tá ná caja vií i sahá ndó —nacachi Jesús.

<sup>27</sup> Joo coó nacandaa ini na ña cáhan Jesús sahá Ndióxi, tátá a tá nacachi a já xihín ná.

<sup>28</sup> Sáhá ña cán quéa nacachi tucu a já xihín ná:

—Tá nandihi ná cata caa ndó yehe, dä nacchindahá Ndióxi nduu ñayivi ndica crúuxu já quéa candaá ndusa ini ndó ña yehe cíuú u dä cáchí i cíuú u. Ta ni in túhún náha co cája i cuéntá mí i. Ta ña jánahá i nu ndó cíuú ña najánahá Ndióxi, tátá i nñú i.  
<sup>29</sup> Ta mé á nacchindahá yehe co najándacoo ndáhá toho a yehe jáchi íin tuun Ndióxi, tátá i xihín i. Ta nñí tiempo ña caja i cíuú ña cajii ini Ndióxi xihín —nacachi Jesús.

<sup>30</sup> Ta chí cuahá ñayivi nacandusa na Jesús tá naxini joho na tócoó ndihi ña yóho.

*Na ndúu ndáhá rí quini xihín na ndúu ndáhá Ndióxi*

<sup>31</sup> *Anda já nacahan Jesús xihín java na Israel, na sa nacandusa ñahá cán já nacachi a já xihín ná:*

—Tá ná caja ndó tá íin nacahan i xihín ndo já náha ndó ña mé a ndaa táhyí cíuú ndó na cuéntá mí i.  
<sup>32</sup> Ta já candaá ini ndó ña ndaa ta ña cán caja ña ná a cíuu gá ndó tátuhun in mozo, dä ndúu ndáhá rí quini —nacachi Jesús.

<sup>33</sup> *Anda já nacachi na cán já xihín á:*

—Na naquixi chichi Abraham cíuú nde. Ta janda ni in túhún tañu coó násacuu nde mozo. Joo yóho cächún xihín nde ña a cíuu gá nde mozo. Ndaja cáa ña cáa ri a já —nacachi na.

<sup>34</sup> *Já nacachi Jesús já xihín ná:*

—Mé a ndaa ná cahan i xihín ndo. Tócoó ndihi na sa caja cuachi cíuú tá cíuú na tátuhun mozo nñú cuachi jáchi cómí a cuéntá sahá ná.  
<sup>35</sup> Ta dä cíuú mozo nñú in xitoho, coó sahá dä coo nahá dä xihín xitoho da jáchi vaxi quivi ndítahan quee da cuhun da. Joo dä cíuú jahyi mé dä cíuú xitoho cán íin sahá dä coo nahá dä xihín tátá dä jáchi cíuú dä dä vehe tátá dä.  
<sup>36</sup> Ta quiahva já íin xihín yehe, dä cíuú jahyi Ndióxi. Cája i ña ná a cacomí ga cuachi cuéntá sahá ndo ta já a cíuu gá ndó tátuhun mozo nñú cuachi cája ndó.  
<sup>37</sup> Ta sa candaá vaha ini i ña cíuú ndó ñayivi naquixi chichi Abraham. Joo mé ndó cíuú ndó cahní ndó yehe jáchi co cíuú ndó ndiquehe vaha ndó tátuhun cáhan i.  
<sup>38</sup> Cáhan

i sahá tócoó ndihi ña nanahá Ndióxi, tátá i nñú i. Joo ndóhó cája ndó ña cáhan tátá ndó xihín ndó —nacachi Jesús.

<sup>39</sup> *Anda já nacachi na cán já xihín á:*

—Abraham cíuú tátá nde jáchi chichi da cán naquixi nde —nacachi na.

*Já nacachi Jesús já xihín ná:*

—Tá jivi ndusa cíuú ndó na naquixi chichi Abraham já quéa caja ndó tá quiahva nacaja da cán, nduu.  
<sup>40</sup> Joo ndúcú ndó cahní ndó yehe jáchi cáhan i ña ndaa xihín ndo tá cáchí i ña najánahá Ndióxi nñú i. Mé Abraham coó nacaja toho da já.  
<sup>41</sup> Joo cája ndó ña níu tá quiahva cája tátá ndo —nacachi Jesús.

*Já nacachi na cán já xihín á:*

—A juú jahyi ndáhví toho ñayivi cíuú ndehe. Ndióxi cíuú ndusa tátá nde —nacachi na.

<sup>42</sup> *Já nacachi Jesús já:*

—Tá Ndióxi ndusa ná cacuu tátá ndo ta quihví ini va ndó yehe, nduu. Jáchi Ndióxi nacchindahá yehe vaxi i ta íin i yóho viti. Coó vaxi toho i cuéntá mí i. Ndióxi quéa nacchindahá yehe vaxi i.  
<sup>43</sup> Joo co candaá ini ndó tócoó ndihi ña ndicani i nu ndó ta cíuú á sahá ña co cíuú ndó cuni joho ndó nu cáhan i xihín ndo.  
<sup>44</sup> Tátá ndo cíuú tiñahá sacuahá ta cája ndó ña cíuú rí cán jáchi nñúhu ndó ndáhá ri. Ta rí sáhní ndji cíuú rí cán janda mé sahá. Ta ni in túhún tañu coó natiñi rí ña ndaa já cáhan rí ña. Jáchi cáhan rí ña tátuhun cuití va ta cuéntá mé rí quíxi ndihi ña tátuhun.  
<sup>45</sup> Candehé ndo. Co cíuú ndó candaá ndó yehe jáchi cáhan i ña ndaa xihín ndó.  
<sup>46</sup> Ni in túhún toho ndó a cíuú náha nñú ñayivi ña íin cuachi i. Ta tá cáhan i ña ndaa cuití va xihín ndó ndá cuéntá quéa co candaá ndó yehe, dä já.

<sup>47</sup> *Jáchi ndá ná cíuú ndusa cuéntá Ndióxi táa joho na ña cíuú tátuhun Ndióxi. Joo náha cáá a ña co cíuú ndó cuéntá Ndióxi jáchi co cíuú ndó cuni joho ndó nu cáhan mé a xihín ndo —nacachi Jesús.*

*Janda tá cámgní cacu Abraham sa íin va Jesús*

<sup>48</sup> *Anda já nacanahá na Israel xihín Jesús já nacachi na já:*

—Mé a ndaa cíuú in dä Samaria ta ndácaan rí quini inún —nacachi na.

<sup>49</sup> *Anda já nacachi Jesús já xihín ná:*

—Coó toho rí quini ndácaan ínimá yehe. Ña cája i quéa cája cahnu i Ndióxi, tátá i. Joo quéhe níu ndiváha ndó yehe.  
<sup>50</sup> Co cíuú

toho i ña ná caja cáhnu ndó yehé vatí mé a ndaa cúní Ndióxi ña ná caja cáhnu ndó yehé. Ta mé a cán quéa caja vií sahá ndo.  
<sup>51</sup> Mé a ndaa ná cahen i xihín ndó. Ndá ná ná caja ña cahen i yóho, ná cán catacu na anda ama cáá quiví —nacachi Jesús.

<sup>52</sup> Já nanducú ñehe ná cán tuhun nu á já nacachi na já xihín á:

—Viti ndusa cándaa ini nde ña ndácaan rí quini inún jáchí cahchún ña tá ná caja nde ña cahen já quéa catacu nde anda ama cáá quiví. Joo xíni vaha nde ña naxihí tá naxihí Abraham, tásáhnu jícó nde ta jári na profeta násanduu sánahá naxihí na.  
<sup>53</sup> Á cáhnu chágá yóhó a juú ga Abraham, dà násacuu tásáhnu jícó nde, dà já. Mé Abraham naxihí dà ta jári mé na profeta naxihí ri ná cán va. Á cájún cuéntá ña cúun dà cáhnu chágá a juú ga ná cán, dà já —nacachi na xihín Jesús.

<sup>54</sup> Já nacachi Jesús já xihín ná:

—Tá ná caja cáhnu i mí i, coó saha toho ña cája i. Joo Ndióxi, tátá i jándicáhnu a yehé. Ta jári mé ndó cahen ndo ña jivi mé a cán cúu Ndióxi cája cáhnu ndó. <sup>55</sup> Joo co xíni toho ndó yo cúu mé á. Yehé xíni yo cúu mé á. Tá ná cachi i ña co xíni toho i mé á, cúu u in dà tuhun tátuhun mé ndó. Joo mé a ndaa xíni vaha i yo cúu Ndióxi ta cája i ña cahen mé á. <sup>56</sup> Ta mé Abraham, dà násacuu tásáhnu jícó ndo nacajii íní da jáchí naxihé dà tuhun ña quixi yehé ñuyíví yóho. Ta a juú quiáhva nacajii ini da tá naxini da ña yóho —nacachi Jesús.

<sup>57</sup> Anda já cánahá chágá ná Israel xihín á já nacachi na já xihín á:

—Ni iví jícó uxu cuia co ndácaan yóhó viti. Ta ndaja cúu cahchún naxinún Abraham, dà cúu tásáhnu jícó nde —nacachi na.

<sup>58</sup> Já nanducú ñehe Jesús tuhun nu ná já nacachi a já xihín ná:

—Mé a ndaa ná cahen i xihín ndo. Janda tá cámáni cacu Abraham sa ñan va yehé jáchí cúu u Ndióxi —nacachi Jesús.

<sup>59</sup> Anda já natii ná Israel cán yuu ña janí na jatá. Joo nandacoo jehé Jesús já nayaha tañu ná cán ta naquee a veñuhu cáhnu cán cuahen.

<sup>1</sup> In tañu tá xíca Jesús cuahen já naxini a in datqa, dà nacacu cuáá. <sup>2</sup> Anda já nacásahá ná xíca tuun xihín Jesús cán ndáca tuhún ná mé á sahá dà cuáá cán já cahen i já xihín á:

—Maestro, ndá cuéntá quéa nacacu cuáá dà yóho. Á nacacu cuáá dà sahá cuachi nacaja tátá dà á náná dà. Á nacacu cuáá dà sahá cuachi nacaja mé dà —nacachi na.

<sup>3</sup> Já nanducú ñehe Jesús tuhun nu ná já nacachi a já xihín ná:

—Coó nacacu cuáá toho dà yóho sahá cuachi mé dà ta ni sahá cuachi tátá dà á náná dà. Nacacu cuáá dà já ná náhá i nuyú ñayiví ndá quiáhva náhnu ñáhá cúu cája Ndióxi. <sup>4</sup> Jáchí ndítahan caja i chuun, ña nachindahá tátá i caja i nani xíca nuu i ñuyíví yóho. Ta cúu á tátuhun ndiví táchí cúu á viti joo vaxi quiví a cóo ga i caja i ña yóho ta já cacuu a tátuhun nacuaá ndiváha. Ta mé tiempo já ni in ná a cúu caja chún.

<sup>5</sup> Nani fin tóo i ñuyíví yóho cúu á tátuhun jándiyéh mí i nuyú ná ndúu ná ñuyíví yóho —nacachi Jesús.

<sup>6</sup> Tá nandihí nacachi Jesús ña yóho já naxihnu a tójí a ná ñuhu. Ta xihín tójí a cán nacavaha in mbohla loho ndahyi ta nachindahá mé á ña nduchú nuyú dà cuáá cán.  
<sup>7</sup> Tá nandihí já nacachi a já xihín dà:

—Cuáhán chicohó naní Siloé ta cán cuchún nuyún —nacachi Jesús xihín dà. Mé tuhun Siloé yóho cúní cachi a: Dà nacchin-dahá ná.

Anda já naquee mé dà cuáá cán nasaheñ dà nachichí nuyú dà ta tá nandicó coo dà cán sá sánدهéhé va da nacasaña dà. <sup>8</sup> Ta ndaja coo java ná cúu ñani táhan da xihín java ná naxini ña sóti dà cán tá naxini na ña sánدهéhé tucu da já nacachi na xihín táhan na já:

—Á a juú dà yóho cúu dà dà cuáá sácoo sóti yuhú íchi —cachí xihín táhan na.

<sup>9</sup> Ta já cachí java na já:

—Jivi dà jan cúu dà.

Ta java na cachí ná:

—Á juú toho dà jan cúu dà vatí quiáhva já cán dà —nacachi na.

Joo mé dà nasaheñ cuáá cán cahen dà xihín ná já cachí dà já:

—Jivi yehé cúu dà násacuu dà cuáá cán —cachí dà.

<sup>10</sup> Anda já nacásahá ná ndáca tuhún ná dà já cachí ná já xihín dà:

—Ndaja nacajún nanuná nuun —cáchí na.

<sup>11</sup>Já nacachi dā cán já:

—Da naní Jesús cūú dā nacavāha in mbohlā loho ndahyi. Ta nacindaa da ñā nuú i ta nacachi da xihín i ñā ná cuhun i cuchú nuú i chicohó naní Siloé. Ta já nasahán i nacchí nuú i cán ta xihín ñā yóho nanuná nuú i. Sández e viti —nacachi da.

<sup>12</sup>Já nandaca tūhún tucu nā cán dā já cáchí nā já:

—Ta ndájá cuahán dā nandaja vāha yohó viti —nacachi na.

—Co xíni toho i —nacachi da xihín ná.

*Ndája ndichí na fariseo dā cuá, dā nandi-vāha cán*

<sup>13</sup>Tá nandihí ndáca na dā nasacuu dā cuá cán nasaħan dā nuú nā fariseo <sup>14</sup>jáchi nasaċuu a quiyi ndíquehe ndée nā tá nandaja vāha Jesús dā cuá cán xihín mbohlā loho ndahyi nacindaa a nuú dā cán. <sup>15</sup>Já nandaca tūhún nā fariseo cán dā ndá quiāhva nanuná nuú dā sández dā viti. Já nanducú ñehe da tūhún nu ná já nacachi da xihín ná:

—Nacindaa da ndahyi nuú i ta nacchí nuú i ta viti tívi nuú i sández e —nacachi da xihín ná.

<sup>16</sup>Joo java nā fariseo nacachi na xihín dā nasacuu dā cuá cán já:

—Da nandaja vāha yohó coó vāxi toho da cuénta Ndíoxi jáchi co cája cahún da quiyi ndíquehe ndée yo —nacachi na.

Joo já cachí java nā fariseo já:

—Tá dā cája cuachi ná cacuu Jesús jan ta a cíu caja da ñāha xitúhún nāhá tātūhún ñā yóho, nduu —nacachi java na.

Chí coó nacuu ndique táhan vāha tuhun nā fariseo cán sahá ñā cán quéa nasaħnda táhan ndaja táhan mé va na. <sup>17</sup>Já nacasáhá ndáca tūhún tucu nā dā nasacuu dā cuá cán já cachí nā já xihín dā:

—Ta viti nanuná nuun nacaja dā jan. Yo já cíu dā cachún —nacachi na.

Já nanducú ñehe da tūhún nu ná já nacachi da já xihín ná:

—Yehé cachí i ñā cíu dā in profeta —nacachi da.

<sup>18</sup>Joo coó naxxeen nā Israel cán candúsa na ñā nasaċuu dā dā cuá ta ni co cándusa na ñā nanuná nuu dā. Sahá ñā cán quéa nasaħan nā nacana na tātā nánā dā. <sup>19</sup>Ta já

nandaca tūhún nā tātā dā xihín náná dā já nacachi da já xihín ná:

—Á jahyi ndó cíu dā yóho. Á mé a ndaa sa já cuáá já cāa dā nacacu da. Ta ndá cuénta quéa sa tívi nuu dā viti —nacachi na.

<sup>20</sup>Anda já nanducú ñehe nā cán tūhún nuu nā Israel cán já nacachi da já xihín ná:

—Cándaa caxí ini nde ñā jahyi nde cíu dā yóho. Ta xíni vāha nde ñā nacacu cuáá dā. <sup>21</sup>Joo co xíni nde ndaja nacuu nanuná nuu dā sández dā viti. Ta ni co xíni nde yo cíu dā nasuná nuu dā. Jan íin mé jahyi nde. Nandaca tūhún ndó mé dā. Sa quiāhva caħan mé dā jan xihín ndó cíu ájáchi a jyú dā loho ga cíu dā jan —nacachi tātā dā nasacuu da cuáán xihín nā Israel cán.

<sup>22</sup>Nacachi na ñā yóho jáchi yihví nā ñā ná a quiāhva ga nā Israel cán ñamani nu ná ndihyi na veñyhu. Jáchi mé nā Israel cán najāndique táhan na tūhún nā a quiāhva ga nā ñamani nuu ñayivi quiāhvi na ini veñyhu tá ta cähān nā ñā cíu Jesús dā nacindahá Ndíoxi cacomí cuénta sahá ñayivi. <sup>23</sup>Sahá ñā cán quéa nacachi tātā náná dā nasacuu da cuáán cán xihín nā Israel ñā ndítáhan ndaca tūhún nā mé dā jáchi a jyú ga dā loho cíu dā jan.

<sup>24</sup>Tá nandihí já nacana tucu nā Israel dā nasacuu dā cuáán cán já nacachi da já xihín dā:

—Xíni ñúhú caja cähnún Ndíoxi ta a cája cähnún Jesús jan jáchi xíni vāha nde ñā cíu dā in cája cuachi —nacachi na.

<sup>25</sup>Anda já nacachi dā cán já xihín nā Israel:

—Co xíni toho i á cíu dā dā cája cuachi á cíu dā dā co cája cuachi. Ñā xíni ndusa i quéa nasaċuu u dā cuá ta jivi dā jan nasuná nuú i sández e viti —nacachi da xihín ná.

<sup>26</sup>Anda já nacasaħá ndáca tūhún tucu nā dā já cachí nā já xihín dā:

—Ta ndaja nacaja da nasuná dā nduchú nūn. Ndíoxi nacaja da xihún —nacachi da xihín dā.

<sup>27</sup>Anda já nacachi dā nasacuu dā cuáán cán já xihín ná:

—Sa nacachi vi xihín ndo ndá quiāhva nacaja da nasuná dā nuú i. Joo co cíu ndó candúsa ndó yehé. Ndá cuénta quéa ndáca tūhún tucu ndó yehé. Á cuhun ri ndóhó va caca nuu ndó xihín dā cíu ndo, vāha —nacachi da xihín ná.

<sup>28</sup> Já nacásáhá na Israel cán cánahá na xihín dá ta já nacachi na já xihín dá:

—Yóhó va cúu dá xíca nuu xihín da jan.

Joo ndehe jácuaha nde ley Moisés cuití va.

<sup>29</sup> Jáchí cándaa vaha ini nde ña nacahan Ndióxi xihín Moisés. Joo mé Jesús jan co cúu dá cuénta Ndióxi ta ni co xíni nde ndájá naquixi da jan —nacachi na xihín da nasacuu da cuáa cán.

<sup>30</sup> Anda já nacachi tucu dà cán já xihín ná:

—Mé a ndaa cátontó ví xihín ña yóho jáchí jivi Jesús jan nausuná dà nuú i ta ndohó ni co cándaa ini ndó ndá dà cúu dá ta ni co xíni ndo ndájá naquixi da. <sup>31</sup> Sa xíni yo ña co xíni joho Ndióxi ña xíca tähví ñayivi cája cuachi nu á. Joo xíni joho mé á nu cahán ñayivi tá cája cahnu na mé á ta tá cája na ña cúní a. <sup>32</sup> Ta viti candehé ndó. Janda saha ñuyiví a náha cuni joho í ña ndicuniá in dätaa nduchú nuú in dà nacacu cuáa. <sup>33</sup> Ta Jesús yóho a cúu toho caja cuná a nuú i tá ta co cúu á ña naquixi cuénta Ndióxi —nacachi da.

<sup>34</sup> Anda já nanducú ñehe na cán tuhun nu dá já nacachi na já xihín dá:

—Anda tá nacacún nachutú ndaún xihín cuachi. Ta viti chí cúní ri yóhó jánahún ndehe —nacachi na Israel cán xihín dá.

Anda já nataxí na dà veñuhu cán.

Ñayivi, na sándezhe cúu ná tátuhun na co tíví nuú

<sup>35</sup> Tá nandihí já nacandaá ini Jesús ña nataxí na dà nasacuu da cuáa cán veñuhu. Ta tá nanditahan tucu Jesús dà já nacachi a já xihín dá:

—Á cández inún dà nachindahá Ndióxi nduu ñayivi —nacachi Jesús xihín dá.

<sup>36</sup> Já nacachi da já xihín á:

—Cachi ndó xihín iyo já cúu dá ña ná cuu cández ini i dà —nacachi da.

<sup>37</sup> Anda já nacachi Jesús já xihín dá:

—Sa naxini vún yehe ta jivi yehe, da cahán xuhun yóho cúu dà nachindahá Ndióxi nduu ñayivi —nacachi Jesús.

<sup>38</sup> Ta tá nacachi Jesús ña yóho já nacaxítí dà cán nu á caja cahnu da a já nacachi da já xihín á:

—Mé a ndaa cández ini i ndohó, xitoho i —nacachi da.

<sup>39</sup> Anda já nacachi tucu Jesús já xihín dá:

—Yehe naquixi i ñuyiví yóho já ná naha i nuú ñayivi ndá quiahva ndáa ña cája na. Jáchí ndá na cández ini yehe cúu ná

tátuhun na sa nandiyehe nuu. Joo ndá na cahán ña cúu ná na sa nandiyehe nuu cúu ná tátuhun na cuáa —nacachi Jesús.

<sup>40</sup> Ta java na fariseo, na ndita xihín Jesús cán tá naxini joho na ña yóho já nandaca tuhún na mé á já cachí na já:

—Á co cahún ña cúu ri ndehe va na cuáa —nacachi na.

<sup>41</sup> Anda já nacachi Jesús já xihín ná:

—Tá ná ndicuni ndó ña cúu ndó tátuhun na cuáa ta coó toho cuachi ndó, nduu. Joo tá cachí ndó ña tíví vaha ndivaha nuu ndó ta co xíni ñúhu ndó in na jánahá ndohó sahá ña cán quéa fin tá fin cuachi ndó —nacachi Jesús xihín ná.

## 10

*Jesús cúu á tátuhun in dà ndáá ndicachi*

<sup>1</sup> Anda já nacachi Jesús já:

—Mé a ndaa ná cahan i xihín ndó. Tá ná quihvi in dätaa ini in corra nu ñúhu ndicachi joo coó cúní dà quihvi da chí yéhé nu quihvi mé rí ta ña cája da quéa ndáva ndojó dà corra rí já náha xíca a ña cúu dà dà cuihna. <sup>2</sup> Joo mé dà quihvi chí yéhé cúu dà dà ndáá ndicachi. <sup>3</sup> Ta mé dà ndáá yéhé corra nu ñúhu ndicachi cán súná dà yéhé ña ná ndihvi dà ndáá ndicachi ta jácana da rí cán tá quivi in in rí. Ta mé ndicachi cán ndicuni rí tachi dà já quéta rí cuahán rí caca nuu rí xihín dá. <sup>4</sup> Ta tá sa naqueta ndihí rí já ndáca da rí. Ta cánúu dà nu rí cuahán dà já vaha cuahán rí xihín dà jáchí ndicuni vaha rí tachi dà. <sup>5</sup> Joo co ndíco rí jatá ñayivi dho jáchí co ndicuni rí tachi ná jáchí cúu ná ná tóho. Ña cája rí quéa xínu rí nu ná —nacachi Jesús xihín na fariseo.

<sup>6</sup> Ta ña yóho nasacuu in quiahva nasacu Jesús nuú na fariseo joo coó nacandaá ini na ña cúní mé á cachí a xihín ná.

<sup>7</sup> Anda já nacachi tucu Jesús já xihín ná:

—Mé a ndaa ná cahan i xihín ndó. Yehe cúu u tátuhun in yéhé nu yáha ndicachi já ndihvi rí corra rí. <sup>8</sup> Tóco ndihí na naquixi tá cámari xínu i ñuyiví yóho najándahvi na ñayivi ta cúu ná tátuhun na cuihna. Joo coó naxeen na cúu cuénta mí i, na cúu tátuhun ndicachi taa joho na nu cahán na cán. <sup>9</sup> Yehe cúu u tátuhun in yéhé ta ndá ná quixi nuú i quiahva i ñamani nu ná quihvi na já ná cazu ndaa íníma ná. Cúu á tátuhun núná nuú ndicachi quihvi rí ini corra rí ta núná nuú rí queta tucu rí jáchí fin yucu cuíi nu rí xixáhan rí.

<sup>10</sup> Jáchí dà cùú dà cuíhná cán cája cuíhná dà rí ta sáhní dà rí ta jándihi da sahá rí. Joo yéhe naquixi i ñuyíví yóho já ná cuu catacu vaha ñayivi ta já ná cuu coo vaha na anda ama cáá quiví. <sup>11</sup> Yéhe cùú u tátuhun in da ndáá vaha ndicachi. Jáchí dà cán co yíhví dà quiví da sahá ndicachi jana dá. <sup>12</sup> Joo dà quéhe yahvi sahá ña ndáá dà ndicachi, ndáá dà rí sahá yahvi quéhe dà cán cuití va. Sahá ña cán quéa tá xíní dà vaxí ndivahyí quehe rí in ndicachi, ña cája da quéa xíní da cuahán dà ta jándacoo da ndicachi ndáhví cán. Jáchí co cùú dà dà ndáá vaha rí ta ni jana dà co cùú ndicachi cán. Ta co sáhní dà mé dà tá ná xínu coo ndivahyí ña ná tiin rí ndicachi cán cata nuu ñahá rí. <sup>13</sup> Da quéhe yahvi cán jándacoo da rí jáchí co cùú rí jana mé dà ta co sáhní dà mé dà cùú ndicachi.

<sup>14</sup> Joo yéhe cùú u tátuhun in da ndáá vaha ndicachi. Tá quiahva xíní vaha dà cán ndá rí cùú ndicachi jana dà quiahva já xíní vaha i ndá na cùú cuéntá mí i. Ta jári xíní vaha mé ná yéhe. <sup>15</sup> Tá quiahva xíní vaha Ndióxi, tátá i yéhe ta xíní vaha i mémá quiahva já xíní vaha i ña cùú cuéntá mí i. Ta sahá ña yóho íin tiahva i ndiquiahva i mí i quiví i sahá ná jáchí cùú ná tátuhun ndicachi janá i. <sup>16</sup> Joo ndúu java ga ñayivi inga ñuu ta cacuu na cuéntá mí i. Xíní ñúhú ndiquehe e ña cán ña ná cuni joho na nu cähán i. Ta in nduu ndihí na ña ná candaas i tóco ndihí na.

<sup>17</sup> Quíhví ini Ndióxi, tátá i yéhe jáchí ndiquiahva i mí i quiví i sahá ña cùú cuéntá mí i ta tá ñandihí nditacu tucu u. <sup>18</sup> Ta ni in na a cùu cähná yéhe ndaja nacuu joo ndiquiahva i mí i quiví i jáchí cùni caja i ña. Núná nuú i ndiquiahva i mí i quiví i ta núná nuú i nditacu tucu u. Ña yóho cùu chuuñ nasañhda tátá i nuú i caja i —nacachi Jesús.

<sup>19</sup> Tá naxini joho na Israel cán ña yóho já nacasáhá ná sáhndá táhan tucu na. <sup>20</sup> Ta cuahá táhan na cán nacasáhá cachí na já:

—Ndá cuéntá quéa táa joho ndó nu cähán dà jan ta dà nacatächí va cùú dá. Tiñáhá va ndácaan ini da —cachí xihín táhan na.

<sup>21</sup> Joo java na cähán vaha na sahá Jesús já cachí na já:

—Ni in toho ñayivi a cùu cähán vaha sahá tátuhun cähán Jesús yóho tá ndácaan tiñáhá ini ínimá ná. Jáchí ama ná cuu caja ri tiñáhá jándiyéhe rí nuú ña cuáá —cachí java na cán.

Cándají na Israel Jesús

<sup>22</sup> Naxinu coo quiví cája na víco nu cuíá ñuu Jerusalén tá cája cähnu na quiví naxinu veñuhu cähnu ñuu Jerusalén. Ta mé tiempo víxi nasaçuu a cán. <sup>23</sup> Ta jivi ini mé veñuhu cähnu cán nasañjin Jesús ta xíca nuu a yati yuyéhé naní Salomón. <sup>24</sup> Já nacavá tiyíví na Israel cán mé á já nacasáhá ndáca tühun na mé á já nacachi na já xihín á:

—Ndaja cáá chí quiví caxi tuhun ndaun xihín nde ña á jivi ndusa cùún Cristo, dà chindahá Ndióxi cacomí cuéntá sahá ñayivi. Jáchí in ivi joho cähün xíní nde ta co cánda vaha ini nde á jivún á a jyú tohún —nacachi ña cán.

<sup>25</sup> Anda já ñanducu ñehe Jesús tühun nu ná já nacachi a já:

—Sa nacahán vi xihín ndó joo coó nacan-dúsa ndó yéhe. Tóco ndihí ña náhnu cája i, cája i ña xihín ndée sáhan tátá i nuú i ta jivi mé ña náhnu jan náhá nu ndó ña cùú u dà nachindahá Ndióxi. <sup>26</sup> Joo ndóhó co cándúsa ndó yéhe jáchí co cùú ndó tátuhun ndicachi janá i. <sup>27</sup> Joo ñayivi, na cùú tátuhun ndicachi janá i, na cán cùú na ndicuni nu cähán i ta ndicuni i ña ña cùú ná cuéntá mí i ta já ndíco na yéhe. <sup>28</sup> Ta caja i ña ná catacu na anda ama cáá quiví já ná a ndíhi sahá ná. Ta ni in tühun ñayivi a cùu caja candaas na cán ndahá i ta sa ñúhú na ndahá i. <sup>29</sup> Ndióxi, tátá i nasañhan na cán nuú i ta mé á quéa cähnu chágá nu tóco ndihí ñaha. Ta ni in na a cùu caja candaas na cán ndáhá mé á. <sup>30</sup> Yéhe xihín Ndióxi, tátá i in cùú va nde —nacachi Jesús.

<sup>31</sup> Anda já natiin tucu na Israel cán yuu cuun na Jesús ña cähní ñahá ña. <sup>32</sup> Anda já nacachi Jesús já xihín ná:

—Cuahá ndivaha ña náhnu nacaja i nu ndó, ña nasañhan tátá i ñamani nuú i caja i nu ndo yóho ta viti cachí ndó xihín. Ndá cuéntá quéa co táhan ini ndó xihín. Ndá cuéntá quéa vaxí ndó cuun ndó yuu yéhe —nacachi Jesús.

<sup>33</sup> Anda já nacachi ña cán já xihín á:

—Co ndúcú toho nde cuun nde yuu yohó sahá ña náhnu cähún. Cuun nde yuu yohó cùni nde jáchí ndája núná Ndióxi. Jáchí cùún in taa tátuhun ndehé ta ndájún mún cuún Ndióxi —nacachi ña cán.

<sup>34</sup> Anda já nacachi Jesús já xihín ná:

—Nu ley najándacoo Moisés nu ndo cachí a ña cùú ñayivi tátuhun Ndióxi sahá ña cùú ná jahyi mé á. <sup>35</sup> Ta sa candaas vaha iní ña a cùú tähnu ña cähán tuhun Ndióxi. Ta

nacachi Ndióxi xihín na nandiquehe tuhun mé á ña cíuú ná tátuhun Ndióxi.<sup>36</sup> Sahá ña cán quéa ndá cuénta quéa cachí ndo ña nandaja nuu i Ndióxi sahá ña cachí i cíuú u in túhún jini já jahyi Ndióxi. Jáchí mé Ndióxi nacaxi a yehe ta nachindahá a yehe vaxi i ñuyíví yóho.<sup>37</sup> Sahá ña cán quéa co ndítahan candusa ndó yehe tá ta co cája i ña náhnu tátuhun ña cája Ndióxi, tátá i.<sup>38</sup> Joo tá cája i ña já quéa xíní ñúhú candusa ndó ña náhnu xíní ndó cája i vatí co cíuñ ndó candusa ndó yehe. Ta xihín ña yóho cuu candusa ndó ña in cíuú Ndióxi, tátá i xihín i ta in cíuú yehe xihín mé á —nacachi Jesús.

<sup>39</sup> Anda já ndúcú tucu na tiin na a chicanan a vecaa joo nachijehé a nu ná cuahan.

<sup>40</sup> Ta já naquee tucu a cuahan chí inga xoo yuta Jordán nuú nacaja ndúta Juan ñayivi nu cuítí cán. Ta nacandoo Jesús nasahijin a cán. <sup>41</sup> Ta cuahá ñayivi nacásahá na xínú na nu á ta já cachí xihín táhan na já:

—Mé a ndaa coó toho ñaha xitúhún nacaja Juan. Joo tóco ndhi ña nacachi dà cán saha Jesús yóho cíuú á ña ndaa —nacachi xihín táhan na cán.

<sup>42</sup> Ta cuahá ná nacandusa na Jesús mé nuú nasahijin a cán.

## 11

### Tá najánditacu Jesús Lázaro

<sup>1</sup> Ta ndaja coo naquehe cuehe in dà naní Lázaro, dà ñuu Betania. Ta jivi mé ñuu yóho cíuú ri ñuu María xihín Marta, quihví ña.<sup>2</sup> Mé María, ña cíuú quiahva Lázaro yóho cíuú ñá ñá naxojo perfume jatá sahá Jesús ta najándihichi ñá do xihín ijí jini ña.

<sup>3</sup> Ta mé ñá xihín quihví ña nachindahá na chuun cuahán nuú Jesús ña cacadhví ndivaha Lázaro, dà quihví ini mé á.

<sup>4</sup> Ta tá nañehé Jesús tuhun yóho já nacachi a já:

—A juú cuehe cahní ñahá cíuú toho ña yóho. Joo xihín cuehe yóho cuu nahá ndá quiahva cahna cíuú Ndióxi. Ta xihín ña yóho nahá nuú ñayivi ndá quiahva cahnu cíuú yehe, dà cíuú in túhún jini já jahyi Ndióxi —nacachi a.

<sup>5</sup> Ta ndajá coo quihví ndivaha ini Jesús Marta xihín quihví ñá ta quiahva já quihví ri ini a Lázaro viti. <sup>6</sup> Joo tá nañehé Jesús tuhun ña quihví Lázaro já nacandoo a ivi quiví chágá mé nuú nasahijin a cán. <sup>7</sup> Ta

tá nandihí já nacachi Jesús já xihín na xica tuun xihín á:

—Xihín ndó ná cohó tucu chí Judea —nacachi a.

<sup>8</sup> Anda já nacachi na cán já xihín á:

—Maestro, viti chá va ndúcú ñayivi ndúu cán cahni na ndohó xihín yuu ta cása tucu ri ndó cuhun ndó cíuñ ndó —nacachi na.

<sup>9</sup> Joo sa xíní Jesús ña cámán xinu quiví quiví a sahá ña cán quéa nacachi a já xihín ná:

—Candehé ndó. Uxu ivi hora ndáca in quiví ta tá xica nuu na ndiví a cíuú toho cachihin saha ná jáchí tívi xicá yehe nu xica na.<sup>10</sup> Joo ndá ná xica nuu ñuu cuu cachihin saha ná jáchí co yehe nu xica na —nacachi Jesús.

<sup>11</sup> Tá nandihí já nacachi tucu a já xihín ná:

—Sa naquijí va amigo yo Lázaro viti. Joo vílaá cuhun i ndínehe e dà —nacachi Jesús.

<sup>12</sup> Anda já nacachi na cán já xihín á:

—Maestro, tá ta nanaá ini da naquijí dà já quéa íin vaha da, dà já —nacachi na cán.

<sup>13</sup> Joo ña cíuñ cachi Jesús quéa sa naxihi va Lázaro vatí ná xica tuun xihín a cán nacahán ña ña cíuñ mé á cachí a quéa naquijí Lázaro cán tá quiahva quiví tóco ndihí ñayivi.<sup>14</sup> Anda já nacahan caxí tálhyí tucu Jesús xihín ná já nacachi a já:

—Naxihi va Lázaro.<sup>15</sup> Joo cajíi va ini i ña coó i ná sahíi i tá naxihi dà jáchí ña yóho chindeé a ndohó já ná candusa chágá ndó yehe. Cohó candehé yo Lázaro —nacachi Jesús.

<sup>16</sup> Anda já nacásahá Tomás, dà cahán na cuáti xihín cán cahán dà xihín java ga na xica tuun xihín Jesús já cachí dà já:

—Cohó ri mí ví quiví xihín mé dà, dà já —cachí dà.

Já naquee na cuahán na.

Cíuú caja Jesús ña ná nditacu tucu na sa naxihi

<sup>17</sup> Tá naxinu coo Jesús yati ñuu Betania cán já nañehé a tuhun ña sa naxihi Lázaro ta sa íin comí quiví nachicaan va na dà ini in cava.<sup>18</sup> Mé ñuu Betania cán néhe táhan yati a xihín Jerusalén tátuhun uní kilometro néhe táhan.<sup>19</sup> Ta cuahá táhan na Israel cán nasahan ná ndúu tóo na xihín Marta xihín María tá quiahva jáyaha na ini na sahá ña naxihi Lázaro quiahva na.<sup>20</sup> Ta tá nañehé Marta tuhun ña cayati Jesús ñuu cán cuahán já ndáva ñá nasahan néhe ñahá ña. Joo nacandoo María vehe.<sup>21</sup> Ta

nandique táhan Marta xihín Jesús já nacachi ná já xihín á:

—Xitoho, tá ná coo ndó yóho ta ni a quíví toho Lázaro quiahva i, nduu. <sup>22</sup> Joo cándaa vaha ini i ná tá ná caca ndó ná cúní mé ndó nü Ndióxi quiahva va mé a cán i ná nü ndó —nacachi Marta.

<sup>23</sup> Anda já nacachi Jesús já xihín ná:

—Candehé Marta. A ndícani inún jáchí nditacu tucu va Lázaro, quiahvún jan —nacachi Jesús.

<sup>24</sup> Anda já nacachi ná já xihín á:

—Sa xíni vi i ná nditacu tucu quiahva i tá ná xinu coo quíví nü ndíhi tá ná nditacu tóco ndíhi na sa naxihí —nacachi Marta.

<sup>25</sup> Já nacachi Jesús já xihín ná:

—Yehé cuú dä cuu caja i ná ná nditacu tucu ndíhi ta cuu caja i ná ná catacu nayivi anda ama cáá quíví. Ta ndá ná cándezini yehé vatí ná quíví na catacu tá catacu na. <sup>26</sup> Ta tóco ndíhi na cándezini yehé catacu na anda ama cáá quíví ta a ndíhi toho saha ná ini indayá. Á cándusún ná cáhan i xuhun —nacachi Jesús.

<sup>27</sup> Anda já nacachi Marta já xihín á:

—Cándusa i ndohó ná cútudó in túhún jini já jahyi Ndióxi ta cándusa i ná mé ndó cútudó Cristo, dä nachindahá Ndióxi quíví yóho —nacachi ná xihín á.

### Sácu Jesús sahá Lázaro

<sup>28</sup> Tá nandihi já naquee Marta násahan ná cana ná María quihvi ná. Ta já nacahan yaá ná xihín María já nacachi ná já xihín ná:

—Sa naxinu coo Jesús, xitoho í ta fin a yóho. Cuáhán nu fin a jáchí cáná yóho —nacachi Marta xihín quihvi ná.

<sup>29</sup> Tá naxini joho María cán ná nacachi quihvi ná xihín ná chí ivi laá ndáva ná násahan ná nu fin Jesús. <sup>30</sup> Mé Jesús násandati a cán yuhú nuu, mé nuú nandique táhan xihín Marta cán. <sup>31</sup> Ta ndaja coo mé ná Israel, ná ndúu jáyaha ini ná cán tá naxini na naquee númi joho ná cuahen ná já nandicuítta na ndíco na jata ná cuahen ná. Jáchí nacahán ná cuahen ná cuacu ná nu ndácaan Lázaro, quiahva ná. <sup>32</sup> Ta tá naxinu coo ná nu fin Jesús já nacaxítí ná nu á já nacásáhá cachí ná já xihín á:

—Tá ná coo ndó yóho, nduu ta ni a quíví toho Lázaro quiahva i —nacachi ná.

<sup>33</sup> Ta tá naxini Jesús ná sácu cóhó María xihín ná Israel, ná ndíco násaa xihín ná cán já náhahvi ndivaha ini a jandá quiahva

nandisaá ini a. <sup>34</sup> Anda já nandaca tuhún a María cán já nacachi a já xihín ná:

—Ndajá nacachaan ndó dä já —nacachi Jesús.

—Naha quíví ndó, xitoho i. Candehé ndo nuú nacachaan nde dä —nacachi María.

<sup>35</sup> Anda já násacu Jesús. <sup>36</sup> Tá naxini ná Israel ná yóho já nacásáhá cachí xihín táhan na já:

—Candehé ndo ndaja náhá naquihvi ini Jesús yóho Lázaro —nacachi na.

<sup>37</sup> Ta java na nacásáhá cachí na já:

—Mé Jesús yóho násuná dä nduchú nuú na cuáá. Á chí a cuú cuití caja da chindeé dä Lázaro já ná a quíví dä, nduu —nacachi java na cán.

### Jánditacu tucu Jesús Lázaro

<sup>38</sup> Tá nandihi já nacásáhá táchvi ndivaha tucu ini Jesús ta já nacayati a nuú nacachaan ná yíquí cyñu Lázaro. Mé nuú ndácaan dä cán násacu a in ndíca cává ta in yuu jáhndá cáhnu násaji nuu yéhé cán. <sup>39</sup> Anda já nandicahan Jesús xihín java na ndúu cán ná nájácxoo na yuu ndájí nuu nü ndácaan Lázaro cán. Joo ndaja coo Marta, ná cuú quiahva mé ndíji cán nacásáhá ná cachí ná já xihín Jesús:

—Candehé ndo, xitoho i. Sa quini cuú sáhan ndíji quiahva i jan jáchí sa fin comí quíví naxihí da —nacachi ná.

<sup>40</sup> Anda já nacachi Jesús já xihín ná:

—Xíní nühú ndicuhun inún tá nacachi i xuhun ná tá ná cándusún Ndióxi já cunún ndá quiahva cáhnu náha cuu caja mé á —nacachi Jesús.

<sup>41</sup> Tá nandihi já nájácxoo na yuu cáhnu ná násaji nuu nuú násandacaan Lázaro. Já nandihehe Jesús nuú á chí indíví já nacachi a já:

—Tátá Ndióxi, ndíquiähva i ndixahvi nu ndo jáchí naxini joho ndó nuú nacahan i xihín ndo. <sup>42</sup> Vatí mé a ndaa cándaa vaha ini i ná ní tiempo xíni joho ndo nu cáhan i xihín ndo. Joo cáhan i ná yóho sahá ná ná cuni joho nayivi ndúu xihín i yóho já ná candusa na ná mé ndó nachindahá ndó yehé växi i nuyíví yóho —nacachi Jesús ndíquiähva ndixahvi nu Ndióxi.

<sup>43</sup> Tá nandihi já naquahu cóhó a já nacachi a já:

—Lázaro, cuáhán queta.

<sup>44</sup> Tá nandihi já naqueta Lázaro nuú násandacaan da. Nacava nuu ndáhá dä

*anda sahá dá xihín ticoto ta ndáji jáhima nuu dá naqueta da vaxi da. Anda já nacachi Jesús xihín java na ndúu cán ña ná ndaxí na da já ná quee da cyhun dá. Ta já nacaja na.*

*Jándique táhan na Israel tūhun na ñg tiin na Jesús chícaan na vecaa*

(Mt. 26:1-5; Mr. 14:1-2; Lc. 22:1-2)

<sup>45</sup> Ta cuahá táhan na Israel, na ndáca táhan nasahán xihín María cán tá naxini na ña najánditacu tucu Jesús Lázaro cán já nacandusa na mé á. <sup>46</sup> Joo java táhan na Israel cán ndáva na nasahán na cahán na xihín na fariseo ta nandicani na nuu ná ña nacaja Jesús. <sup>47</sup> *Anda já nacasáhá na fariseo xihín na sacuahá nuu jutu cán najátaca na tóco ndihi na sacuahá nuu na Israel já nacachi na já xihín ná:*

—Ndáj caja í xihín Jesús viti jáchi cuahá ndivaha ñaha xituhún caja dá yóho. <sup>48</sup> Xímí ñuhú caji nuu í nuu dá jáchi tá ná a cájí nuu í nuu dá vaxi quíví tá tóco ndihi ñayivi candeé ini na mé dá. Ta xihín ña yóho xínu ini na jutixia ñuu Roma quixi na jándican na veñuhu íta la jándihi na sahá tóco ndihi mí, na Israel —nacachi na.

<sup>49</sup> Joo in táhan da ndúu cán naní da Caifás, da nasacuu da sacuahá chágá nuu ndíhi jutu mé cuiá cán, nandicahan da já nacachi da já:

—Mé ndó cíu ndó ñayivi co xímí túni. <sup>50</sup> Jáchí co cándaq ini ndó ña vaha chágá ña ná quiyi in taa nuu ndíhi ñayivi já ná a ndíhi sahá tóco ndihi ñayivi. Ña cán quéa cahán i ña vaha chágá ná quiyi Jesús jan já ná a ndíhi sahá mí —nacachi Caifás.

<sup>51</sup> Joo coó nacahan Caifás ña yóho sahá ña naquixi a jíni mé dá. Ndióxi quéa najácahan íníma dá ña cachí da já jáchi mé tiempo já nasacuu da sacuahá chágá nuu ndíhi jutu ta najácahan Ndióxi íníma dá ña ná cache da ña ndítahan quiyi Jesús sahá na Israel. <sup>52</sup> Ta a juú sahá in tühún na Israel cuití va vaha jáchi mé Jesús nanditan han quiyi a sahá tóco ndihi na cíu cuénta Ndióxi, na ndícuíta nuu ndúu ndíjaá ñuyíví já ná cuu coo in ñuu. <sup>53</sup> Chí jandá mé quiyi já nasacu ini na Israel cán cahní na Jesús.

<sup>54</sup> *Sahá ña cán quéa coó naxica nuu tívi ga Jesús tañu na Israel cán. Ña nacaja mé á quéa naquee a estado Judea cán já nasahán chí in ñuu naní Efraín, ña íin yati xoo yucú íchí nuu coó ñayivi. Cán nasahijin a xihín na xíca tuun xihín á.*

<sup>55</sup> Tá nacayati quíví coo vicó pascua cája na Israel já naquee cuahá ñayivi ndúu ndíjáá ñuu cán cuahán na chí Jerusalén jáchi cúní na ndaja vií na mé ná, ná coo tiáhva na tá quiahva nasaahnda ley Moisés nuu caja na tá camaní chá quíví coo vicó pascua. <sup>56</sup> Tá naataca ñayivi ñuu Jerusalén cán nacasáhá ndúcú na Jesús. Joo nani ñuhu na veñuhu cahnu cán ndáca tühún táhan na sahá Jesús já cachí xihín táhan na já:

—Ndaja xímí ndo á quixi Jesús á a quíxi toho a vicó pascua yóho —nacachi xihín táhan na cán.

<sup>57</sup> Ta na fariseo xihín na sacuahá nuu jutu nasaahnda na chuun ña ndá ná cuni Jesús já ná cyhun na caxi tühun na xihín na cán ndíjá íin a jáchi cúní na tiin na a chícaan na a vecaa.

## 12

*Tá nachojó in ñáñáhá perfume sahá Jesús  
(Mt. 26:6-13; Mr. 14:3-9)*

<sup>1</sup> Ta tá camaní ínu quíví coo vicó pascua já naquee Jesús nasaahán ñuu Betania, mé ñuu nuu ín Lázaro, da najánditacu tucu mé á cán. <sup>2</sup> Ta cán nacaja ndívi na ña cajíni Jesús jáchi cúní na caja cahnu na mé á. Ta mé Marta cíu ná caja ndívi nuu ná. Ta Lázaro cíu in táhan dá íin coo nuu mesa xíxi xihín Jesús. <sup>3</sup> Ta ndaja coo María nasaahán ñá quehe ñá tátuhun java litro perfume, dó yahvi ndivaha. Jáchí cíu dó dó nacavaha xihín ndinuhu yucu támí sáhán naní nardo. Najácyu ñá do jata sahá Jesús. Ta tá nandihí já najáhichi ñá sahá xihín jíjí jíni ña. Ta níi ini vehe cán nandicuítu nuu jíco perfume cán. <sup>4</sup> *Anda já naxini in táhan dá xíca tuun xihín Jesús, da naní Judas Iscariote cán ña yóho. Mé Judas yóho cíu dá da jíco tühún Jesús tá nuu ndíhi ta já cachí da já:*

<sup>5</sup> —Ndá cuénta quéa coó nacayahvi perfume yóho já ná cana jiuhún jasá yó nuu na ndahví, nduu. Jáchí quiahva na uní ciento denario sahá dó, nduu —nacachi Judas cán. Ta in denario cíu ña quéhe ñayivi cája chúun na in quíví.

<sup>6</sup> *Joo coó nacachi Judas ña yóho sahá ña quihví ini ndusa da na ndahví, vaha. Nacachi da já jáchi cíu dá da cuihná ta ndáha mé dá ñuhu ndihi jiuhún ta cája cuihná da ña tá cúní da.* <sup>7</sup> *Anda já nacachi Jesús já xihín dá:*

—A cáhun xihín ñá jáchí nasacu vaha ñá do ñá ná chojó ñá do yiquí cuñu i. Jáchí sa xíni ñá ñá sa nacayati quíví quivi i. <sup>8</sup> Ta níí tiempo canduu ná ndahví jan tañu ndó ta ndá tañu cúní mé ndó cuu chindeé ndó ná. Joo yehé a cóo tuun toho i xihín ndó —nacachi Jesús.

Sácu ini na sacuahá nuú jutu cahní na Lázaro

<sup>9</sup>Cuahá na Israel cán nañehé ná tühun ñá fin Jesús ñuu Betania. Sähá ñá cán quéa nasahan ná cán jáchí cúní na cuni na Jesús ta cúní na cuni na Lázaro, mé dä najánditacu tucu Jesús. <sup>10</sup> Anda já nañacu ini na sacuahá nuú jutu cán cahní ri na Lázaro viti. <sup>11</sup>Jáchí saha Lázaro cán cuahá na Israel nacasáhá ná cández ini na Jesús. Ta najándacoo na ndíco ná jatá ná sacuahá nuú ná Israel.

Tá naquihvi Jesús ñuu Jerusalén  
(Mt. 21:1-11; Mr. 11:1-11; Lc. 19:28-40)

<sup>12</sup> Ta inga quíví itaan cuahá ndivaha ñayivi naxínu coo na ñuu Jerusalén nyú coo vicó pascua. Ta tá nacandaa ini na ña xínu coo Jesús ñuu Jerusalén cán <sup>13</sup> já nañahan ná nasahnda na ndáhá to ñuu já ndáva na nañahan ná nañehé ñahá ná. Ta cayuhú na já cachí na já:

—Cája cáhnu í Ndióxi. Cáhnu nähá ná cacuu da cómí cuénta sahá ná Israel jáchí cútú dä dá vaxi yuhú nuú Ndióxi —cáchí na.

<sup>14</sup>Nanditahan Jesús in bürro ta nasanúu a ri tá quiáhva nacachi tühun Ndióxi sañahá tá cáchí a já:

<sup>15</sup>A cayihví toho ndó, na ndíu ñuu Sión. Candehé ndó dä cómí cuénta sahá ndó jan, cánúu da jata bürro loho vaxi da, cáchí tühun Ndióxi.

<sup>16</sup>Ta cóo nacandaa ini na xíca tuun xihín Jesús cán ndá cuénta quéa cája ñayivi já xihín á. Joo chágá chí nyú tá sa nandindita Jesús cuahán indíví já nacandaa ini na ña quiáhva já ndáa nuú tühun Ndióxi sañahá ñá caja na xihín Jesús.

<sup>17</sup>Mé ñayivi, ná nasanduu xihín Jesús tá nacahán xihín Lázaro ñá ná queta da nuú nanduxu dä ñá nditacu da, mé ná cán nandicani na nyú java ga ñayivi ñá naxini na nacaja Jesús cán. <sup>18</sup>Sähá ñá cán quéa naqueta ñayivi nañahan ná ñehe ná Jesús jáchí nañehé ná tühun sahá ñá cáhnu nacaja mé a cán. <sup>19</sup>Tá naxini ná fariseo ñá yóho já nacasáhá cáchí xihín táhan na já:

—Candehé ndó. Ndá cuu caja í quee vaha í xihín dä jan. Jáchí tócó ndihi ñayivi cáti na cuahán ná xihín dä jan —nacachi xihín táhan ná fariseo cán.

Java na griego ndínducú na Jesús

<sup>20</sup>Tañu ñayivi cuahá naxínu coo cája cáhnu Ndióxi víco ñuu Jerusalén cán naxínu coo ri java ná naquixi chí ñundáhyí cuéntá Grecia. <sup>21</sup>Ta mé ná griego yóho nacayati na nu Felipe, dä ñuu Betsaida cuéntá Galilea cán. Ta já nacasáhá ná cáhan ndahví ná xihín dä já nacachi na já xihín dä:

—Cahán nde xihín Jesús cúní nde —nacachi na.

<sup>22</sup>Anda já naquee Felipe nasahan dä caxi tühun dä xihín Andrés ta já ndáca táhan ndíví dä nasahan dä ndícani da ña nyú Jesús. <sup>23</sup>Anda já nacachi Jesús já xihín dä:

—Sa naxínu coo va tiempo caja cáhnu Ndióxi yehé, dä nacindahá mé á nduu ñayivi. <sup>24</sup>Mé a ndaa ná cahán i xihín ndó. Tá quiáhva ndihi saha in ndíquí trigo tá ndícava ñá ini ñundáhyí quiáhva já ndítahan nuú i quivi i. Jáchí tá ná a ndíhi saha ndíquí trigo cán já in já cacuu va ña. Joo tá ná ndihi sahá ñá cán já ndíta ñá ta já ndicuahá ndivaha ñá. <sup>25</sup>Ndá ná cátóó chágá cája ñá cúní mé cuití na a juú ga ñá cúní Ndióxi, ná cán cútú na ndihi saha. Joo na cája ñá cúní Ndióxi, ná cán cútú na catacu anda ama cáya quivi. <sup>26</sup>Ta ndá ná cúní caja chúun cuénta mí i ndítahan nuú ná candicó ná yehé. Jáchí nuú coo yehé, cán coo ri na cája ñá cúní yehé. Ta ná cán cacuu na ná ndínehe jíco Ndióxi.

Cáxi tühun Jesús ñá quivi a

<sup>27</sup>Ta viti ñúhú cácuéha ndivaha ini i. Ta a cuú caca tahví i nu Ndióxi ñá a quiáhva mé á ñamaní ndoho ini i jáchí sahá chuu yóho naquixi i ñuyíví yóho. <sup>28</sup>Ñá ndítahan cachi i quéa: “Tátá Ndióxi, cáhnu ná cacuu mé ndó” —nacachi Jesús.

Tá nacachi Jesús ñá yóho, nacahán Ndióxi indíví já nacachi a já:

—Sa nandaja cáhnu i mí i ta caja tucu u ñá —nacachi a.

<sup>29</sup>Ta ñayivi ndíu cán tá naxini joho na ñá yóho já nacachi na ñá javí va cána. Ta java na nacachi na tátó Ndióxi quéa nacahan.

<sup>30</sup>Anda já nandicahán Jesús xihín ná já nacachi a já:

—A juú sahá yehé naxini joho ndó ñá yóho. Joo nacatácu a já ná cuni joho mé ndó. <sup>31</sup> Ta sa nataandaa quivi cavií sahá ñayivi ndúu ñuyíví ta sa nataandaa quivi ndihí sahá ñá caja tiñahá sacuaha, mé rí sáhndá chuuñ ñuyíví yóho. <sup>32</sup> Jáchí tá ná cata caa na yehé já caja i ñá ná casáhá ñayivi níi cíuñ ñuyíví candeé ini na yehé —nacachi Jesús.

<sup>33</sup> Xihín ñá yóho cúní mé á ndicani a nu ná ñá quivi a ndica crúxu. <sup>34</sup> Anda já nacachi ñayivi ndúu cán já xihín á:

—Tá cahvi ndé ley Moisés nacahyi sa-nahá já cánda a ini ndé ñá andá ama cáa quivi catacu da chindahá Ndióxi cacomí cuénta sahá ñayivi. Yo já cíuñ dà cahún sahá. Tá tā mé a nda a cíuñ dà nachindahá Ndióxi nduu ñayivi, dà catacu andá ama cáa quivi ndá cuénta quéa cachún quivún —nacachi na xihín Jesús.

<sup>35</sup> Já nacachi Jesús já xihín ná:

—Yehé cíuñ dà jändiyéhe ínimá ñayivi ta coo tóo loho chágá i xihín ndó. Sahá ñá cán quéa xímí ñúhú caca nuu ndó nani jändiyéhe íchi cuhun ndó ta viti núná nu ndó caja ndó ñá. Jáchí vaxí quivi quivi i caja na ta andá já cacuu a tátuhun canaá yáví ta já a cánda a ini ndó ndá xoo cuhun ndó.

<sup>36</sup> Xímí ñúhú candeé ini ndó yehé jáchí cíuñ u da jändiyéhe nu ndó nani fin i xihín ndó. Anda jáví xímí coo ndó cacuu ndó ñayivi cuénta mí i —nacachi Jesús.

Tá nandihi já naquee Jesús cuahán chí-jehé a nu ná.

#### Có cándusa na Israel Jesús

<sup>37</sup> Vatí nacaja Jesús cuahá ñá xituhún nuú ñayivi cán joo coó naxeen na candusa na mé á. <sup>38</sup> Já nasañjin jáchí nanditahan xínu coo nuú tuhun ñá nacahyi Isaías sanahá cán tá nacachi a já:

Tátá Ndióxi, coo cúní na candusa na tuhun ñá cahán i xihín ná.

Vatí xímí na ñá náhnu caja mé ndó joo coo cúní na candusa na ndohó, já nacahyi Isaías sanahá.

<sup>39</sup> Sahá ñá cán quéa coó nacuu candusa ñahá ñayivi cán. Ta inga tucu tuhun nacahyi Isaías quéa cachí já:

<sup>40</sup> Mé Ndióxi quéa najácuáa ñahá ta coó násuná a ínimá ná, já ná a cíuñ canda a ini na yo cíuñ mé á, já ná a cíuñ ndicó coo na nu mé á ñá ná ndaja vaha mé á na, nacahyi Isaías.

<sup>41</sup> Quiahva já nacahen Isaías jáchí naxini mé dá ndá quiahva cahnu cíuñ Jesús.

<sup>42</sup> Ta cuahá táhan na Israel cán nacandeé ini na Jesús. Ta janda java na sacuahá nuú na Israel cán nacandeé ini na Jesús. Joo coó naxeen na náhá tuhun na sahá jáchí ñayihví na taxí na fariseo cán na veñhu. <sup>43</sup> Jáchí cíuñ na cando vaha chágá na nuú ñayivi a juú ga nu Ndióxi.

Táhvi ini ñayivi sghá cuahí na tá xímí joho na nu cahen Jesús

<sup>44</sup> Tá nandihi já nacahen cóhó Jesús já nacachi a já:

—Ndá na candeé ini yehé já quéa a juú in túhún yehé candeé ini na, vaha. Jáchí candeé ini ri na Ndióxi, tátá a, mé a nachindahá yehé vaxí i ñuyíví yóho. <sup>45</sup> Ta ndá na xímí yehé xímí ri na mé a nachindahá yehé vaxí i ñuyíví. <sup>46</sup> Yehé naquixi i ñuyíví yóho ñá ná jándiyéhe ínima ñayivi já quéa ndá na ná candeé ini yehé, a cánduu ga na nuú naá.

<sup>47</sup> Joo na xímí joho nu cahen i ta co caja na ñá, a juú toho yehé chícaan cuahí jata ná. Joo tuhun cahen i quéa chícaan cuahí jata ná. Jáchí coó vaxí i ñuyíví yóho chícaan i cuahí jata ñayivi. Naquixi i já ná cuu cazu ndaa ínimá ná. <sup>48</sup> Ndá na cándají yehé ta co cúní na caja na ñá cachí i xihín ná, na cán cíuñ na cuhun indayá jáchí mé tuhun nacahen i cacuu a ñá chícaan cuahí jata ná támá xímí coo mé quivi nu ndihí cíuñ i. <sup>49</sup> Jáchí coo jánahá i ñá quíxi jiní mé cuití i. Tóco ndihí ñá cahen i ta tóco ndihí ñá jánahá i nuú ñayivi cíuñ a ñá nachindahá Ndióxi, tátá a yehé jánahá i nu ná. <sup>50</sup> Ta cánda a caxí ini i ñá tóco ndihí ñá jánahá Ndióxi, tátá a caja ñá ná cuhun na coo na indiví andá ama cáa quivi. Ta tóco ndihí ñá cahen i xihín ñayivi, cahen i ñá támá quiahva nasañha Ndióxi, tátá i nuú i caja i —nacachi Jesús.

## 13

#### Jándoo Jesús sghá na xíca tuun xihín á

<sup>1</sup> Tácámaní in quivi coo vicó pascua já sa xímí Jesús ñá sa naxiu coo quivi quivi a jändacoo a ñuyíví yóho já ndaa mé á ndique táhan xihín Ndióxi, tátá a. Níi tiempo naquihví ini Jesús tóco ndihí na cíuñ cuénta mé á ndúu ñuyíví yóho ta coó najándacoo mé á ñá quishví ini a na.

<sup>2</sup> Ta ndaja coo fin Jesús xihín na xíca tuun xihín a xíjíni na. Jihna sa najácahan tiñahá sacuahá Judas Iscariote, da cíuñ jahyi

Simón, ña ná jicó túhún da Jesús. <sup>3</sup>Joo sa xíni vaha Jesús ña nasahan Ndióxi, tátá a tóco ndihi ndéé á nu mé á. Ta sa xíni a ña naquixi a nu Ndióxi ta jivi nu Ndióxi ndindita tucu a cuhun a. ‘Ta nani xíjíni na nandaca ndichi Jesús já natavá a cotó níhnu a ta já natiin a in jahmá nacihnee a tóco á. <sup>5</sup>Tá nandihi já nataán a ticuúi ini in tisahan loho já nacasáhá jándoo a sahá na xíca tuun xihín a cán. Ta já najándihichi a sahá na xihín jáhmá cárnee tóco á cán.

<sup>6</sup>Ta tá nandatahan ndoo sahá Simón Pedro já nandaca túhún da Jesús já cachí da já:

—Á mé a ndaa jándoo ndó sahá i, xitoho i —nacachi da.

‘Já nacachi Jesús já xihín dá:

—Viti níhú co cándaa toho inún ndía quéa cája i yóho joo chágá chí nuu já candaan inún ndá cuénta quéa cája i já —nacachi Jesús.

<sup>8</sup>Anda já nacachi Pedro já:

—Chí a quiáhva toho mí i ñamani nu ndó jándoo ndó sahá i —nacachi da.

Anda já nacachi Jesús já xihín dá:

—Tá ná a quiáhvún ñamani jándoo i sahún já a cíu cacuún cuénta mí i —nacachi Jesús.

<sup>9</sup>Anda já nacachi tucu da já xihín Jesús:

—Tá ta já cachí ndo quiáhva va i sahá i jándoo ndó ta quiáhva ri ñamani jándahá ndó yéhe ta quiáhva ri ñamani chihin ndó jiní i viti —nacachi da.

<sup>10</sup>Anda já nanducu ñehe Jesús túhun nu dá já nacachi a já xihín dá:

—Tá sa nacchichi vaha ñayivi já ndúu vií ña ta sahá cuití va ndó xíni níhú ndicata i. Mé ndó, na xíca tuun xihín i, sa ndúu vií ndó jáchí sa najándoo i cuachi ndó sahá ña candeé ini ndó yéhe vatí a juú ndhi ndó ndúu vií —nacachi Jesús.

<sup>11</sup>Nacachi Jesús a juú ndhi na ndúu vií jáchí sa nacandaa va ini mé á ndá dä cíu da jicó túhún ñahá.

<sup>12</sup>Tá nandihi najándoo Jesús sahá ná já nacandixi tucu a cotó níhnu a. Já nasacoó tucu a nu mesa já nacachi a já xihín ná:

—Cája i cuénta co cándaa vaha ini ndó ndá cuénta quéa najándoo i sahá ndó. Sahá ña cán quéa ndicani i ña nu ndó viti. <sup>13</sup>Mé ndó cachí ndo maestro xihín i ta cachí ndo cíu u xitoho ndó ta ndaa cahán ndó jáchí jivi ndusa i. <sup>14</sup>Ta viti candehé ndó. Yéhe

cíu u maestro ndo ta cíu u xitoho ndó ta najándoo i sahá ndó. Sahá ña cán quéa quiáhva já ndítahan caja ndó xihín ndaja táhan mé ndó. <sup>15</sup>Sa násacu u in quiáhva nu ndo ta ndítahan caja ndó tá quiáhva nacaja mí i xihín ndó. <sup>16</sup>Xíni níhú candaan ini ndó ña ni in túhún toho mozo a cíu cacuu da dä cahnu chágá a juú ga xitoho da. Ta mé a ndaa ín chágá sahá in dä sáhndá chuun a juú ga mé dä cuahen caja chún cán. <sup>17</sup>Tá nacandaa ini ndó ña cahán i xihín ndó yóho ta tá ná caja ndó ña já quéa cuu cajíi ini ndó.

<sup>18</sup>A juú sahá tóco ndihi ndó cahán i jáchí sa cándaa vaha ini mí i ndá ndó nacaxí i. Joo sahá in ndó ndítahan xínu coo nuu túhun Ndióxi tá nacachi a já: “In dä sácqo tuun xíxi xihín i, dä cán cíu da nandicuita xihín i”, cachí túhun Ndióxi. <sup>19</sup>Sa caxí túhun cuéé e ña yóho xihín ndó já quéa tá sa naxínu ña yóho já candeé ini ndó yéhe, ña cíu u dä cachí i cíu u. <sup>20</sup>Mé a ndaa ná cahán i xihín ndó. Ndá ná ná ndiquehe vaha in dä ná chindahá i, cíu á tátuhun ndiquehe vaha na yéhe. Ta ndá ná ndiquehe vaha yéhe, ndiquehe vaha ri na Ndióxi, mé a nacchindahá yéhe quixi i ñuyíví yóho —nacachi Jesús.

Cáxi túhun Jesús ña cíu Judas dä jicó túhún ñahá

(Mt. 26:20-25; Mr. 14:17-21; Lc. 22:21-23)

<sup>21</sup>Tá nandihi nacachi Jesús ña yóho já nacacuéha ndiváha ini a já nacachi a já:

—Mé a ndaa ná cahán i xihín ndó. In táhan ndó cacuu dä cuhun jicó túhún yéhe —nacachi Jesús.

<sup>22</sup>Tá nandihi já nacasáhá na xíca tuun xihín Jesús cán sándezhe nu táhan na. “Yo sahá cahán Jesús”, cahán ña. <sup>23</sup>Jín Jesús cán ín coo in táhan dä xíca tuun xihín á, da quíhví ini mé á cán. <sup>24</sup>Sahá ña cán quéa nacuu ndáha Simón Pedro nu dä ña ná ndaca túhún dä mé a sahá ndá dä cíu da jicó túhún ñahá. <sup>25</sup>Anda já nacativi chágá dä cán jín Jesús já nacasáhá dä ndaca túhún ñahá dä já nacachi da já:

—Ndá dä cíu dä, xitoho i —nacachi da.

<sup>26</sup>Anda já nacachi Jesús já xihín dá:

—Viti níhú chindaxi i in túhun pan ta ndá dä ná quiáhva i túhun pan cán nuu, dä cán cíu dä —nacachi Jesús.

Tá nandihi já nacchindaxi a in túhun pan já nasahan ña nu Judas Iscariote, dä cíu jahyi Simón. <sup>27</sup>Ta tá natiin Judas pan cán

chí ivi láá nandihvi tiñáhá sacuahá ini da.  
Já nacachi Jesús já xihín dá:

—Xíní ñúhú ndihi inún cajún ña násacu  
inún cajún —nacachi Jesús.

<sup>28</sup> Joo ni in túhún java ga na ndíu coo  
xixi xihín Jesús cán coó nacandaá ini na ndá  
cuénta quéá nacachi Jesús ña yóho xihín  
Judas. <sup>29</sup> Java na nacahán ña ña nasahnda  
Jesús chuun nu Judas ña ná cuhun dä cueen  
da ñaha cuénta víco pascua. Ta java na  
nacahán ña ña nasahnda chuun nu dä ña ná  
jasá da jiyhún ñú ña ndahví jáchí ndáha  
mé dä ñúhu ndihi jiyhún. <sup>30</sup> Tá nandih  
natiin Judas pan nasahán Jesús nu dä chí ivi  
láá naquee da cuahán dä. Ta sa ñúu va quéá  
cán.

*Ndítahan quihví ini táhan na cíuú cuénta  
Jesús*

<sup>31</sup> Tá sa naqueta Judas cuahán dä já na-  
casáhá cáchí Jesús já xihín ña xíca tuun  
xihín á:

—Viti ndusa quéá na casáhá ndicáhnu  
ndivaha yehe, da nachindahá Ndióxi nduu  
ñayivi. Ta sahá ña caja i ndicáhnu ndivaha  
Ndióxi, tátá i. <sup>32</sup> Ta tá náha yehe ndá quiáhva  
cáhnu cíuú Ndióxi, tátá i quiáhva já náha  
ri Ndióxi ndá quiáhva cáhnu cíuú yehe, da  
nachindahá Ndióxi nduu ñayivi. Ta já chá  
cámaní coo tóco ndihi ña yóho. <sup>33</sup> Candéh  
ndo, jahyi maní i. Ja chá cuití tiempo coo i  
xihín ndó. <sup>34</sup> Anda já ndínducú ndó yehe joo  
a ndíñehé ndó yehe. Ndítahan ndicuhun  
ini ndó tá nacachi i xihín ña Israel ña a cíuú  
cuhun na nuú cuhun yehe. Quiáhva já cáchí  
ri xihín ndohó va: A cíuú cuhun ndó nuú  
cuhun i. <sup>35</sup> Ta viti sáhdá i inga chuun nu  
ndo ta cíuú á ña saá. Ta ña yóho cíuú á:  
Ndítahan quihví ini táhan ndó. Tá quiáhva  
quihví ini yehe ndohó quiáhva já ndítahan  
quihví ri ini táhan ndó. <sup>36</sup> Jáchí tá ná quihví  
ini táhan ndó já candáa ini tóco ndihi ñayivi  
ñá mé a ndaq táhyí cíuú ndó cuénta mí i —  
nacachi Jesús.

*Cáxi tuhun Jesús ña chijehé tuhun Pedro ña  
xíni dä mé á*

(Mt. 26:31-35; Mr. 14:27-31; Lc. 22:31-34)

<sup>36</sup> Anda já nandaca tuhun Simón Pedro  
cán Jesús já nacachi da já xihín á:

—Xitoho i, ndajá cuhun ndó já —nacachi  
da.

Anda já nacachi Jesús já xihín dá:

—A cíuú toho cuhun yóhó nuú cuhun i  
viti. Joo cacuáchí lohún já xínu coún cán  
—nacachi Jesús.

<sup>37</sup> Anda já nacachi Pedro já xihín Jesús:

—Ndá cuénta quéá cáchí ndo ña a cíuú  
candíco i ndohó cuhun i nuú cuhun ndó  
viti. Jáchí sa íin tiahva i quivi i sahá ndo —  
nacachi Pedro.

<sup>38</sup> Já nanducú ñehe Jesús tuhun nu dä já  
nacachi a já xihín dá:

—Mé a ndaq ná cahan i xuhun. Vatí  
íin tiahvún quivún sahá i joo tá cámaní  
cana chéle já uní tañu chijehé tuhun sahá  
i ta cahún ña co xíni tohún yehe —nacachi  
Jesús xihín Pedro.

## 14

*Ndáca Jesús ñayivi cuhun na nuú Ndióxi,  
tátá a*

—Já nacachi tucu Jesús já:

—Coto a ndícani ini ndó. Ndítahan can-  
deé ini ndó Ndióxi ta ndítahan candeé ini  
ndó yehe. <sup>2</sup> Mé nuú cíuú Ndióxi, tátá i, cán íin  
cuahá ndivaha nu núná nuú ndó canduu ndó.  
Tá ná a cóo nuú canduu ndó cán jandá mé  
saha va sa nacaxi tuhun i xihín ndó, nduu.  
Ta cuhun i cacu tiahva i mé nuú canduu ndó  
cán. <sup>3</sup> Tá sa ná quee e cuhun i ta tá sa ná caja  
ndíví i nuú canduu ndó cán já quixi tucu u  
ndiquehe e ndohó já ná cuhun ndó canduu  
ndó xihín i mé nuú coo i cán. <sup>4</sup> Mé ndó sa  
xíni ndó ndá íchí candíco ndó já cuu saa ndó  
nuú cuhun i —nacachi Jesús xihín ña xíca  
tuu xihín a cán.

<sup>5</sup> Anda já nandicahán Tomás xihín Jesús  
já nacachi da já xihín á:

—Mé nde co xíni toho nde ndajá cuhun  
ndo, xitoho nde. Ndaja caja ri nde candaá  
ini nde ndá íchí quehe nde cuhun nde —  
nacachi da xihín á.

—Já nanducú ñehe Jesús tuhun nu dä já  
nacachi a já xihín dá:

—Yehé cíuú tátuhun íchí ña ndítahan  
candíco ñayivi ta yehe cíuú da já ná catacu  
ñayivi anda ama cása quivi. Ta in túhún  
yehe ndítahan candeé ini ñayivi já ná cuu  
xíni coo na nuú Ndióxi, tátá i. <sup>7</sup> Tá xíni ndó  
yo cíuú yehe já xíni ri ndó yo cíuú Ndióxi,  
tátá i. Ta viti xihín chí nuú xíni ndó a jáchí  
sa naxini ndó a —nacachi Jesús.

<sup>8</sup> Anda já nacachi Felipe já xihín Jesús:

—Xitoho nde, já ná catacu ndó nuú nde yo cíuú  
tátá ndó já ná cajii ini nde —nacachi da.

<sup>9</sup> Anda já nacachi Jesús já xihín dá:

—Ndá cuéntá quéa cächún já jáchí janda jihna ndivaha va ín i xihín ndo ta sá ndítahan candaqá ini ndó yo cúú yehe. Jáchí ndá na sá xíni yo cúú yehe xíni ri na yo cúú Ndióxi, tátá i. Sáhá ña cán quéa ndá cuéntá quéa cúní ndó ña ná jánahá i tátá i nu ndo.<sup>10</sup> Xímí ñuhú candusa ndó ña in cúú va yehe xihín Ndióxi, tátá i ta in cúú va mé á xihín i. Tóco ndihi ña cáhan i xihín ndo yóho co cáhan i ña sáhá ña quixi a jini mé cuití vi. Cáhan i ña quixi nu Ndióxi jáchí ín mé á xihín i. Ta chuun cája i quixi a nu Ndióxi jáchí cája chún mé á.<sup>11</sup> Xímí ñuhú candusa ndó ña in cúú yehe xihín Ndióxi, tátá i ta in cúú Ndióxi, tátá i xihín i. Ta tá co cúní ndó candusa ndó ña já quéa xíni ñuhú candusa ndó ña sáhá ña náhnu naxini ndó nacaja i.<sup>12</sup> Mé a ndaa ná cáhan i xihín ndo. Ndá na cández ini yehe, cuu caja na ña xituhún tátuhun ña cája mí i. Ta janda ña náhnu chágua cuu caja na jáchí cuhun i nu ín Ndióxi, tátá i.<sup>13</sup> Ta tóco ndihi ña caca ndó nu Ndióxi, xímí ñuhú caca ndó ña xihín quiví mí i já ná caja i ña. Ta ndicáhnu Ndióxi, tátá i xihín ña caja i sáha ndo.<sup>14</sup> Ta caja i ndá ña ná caca ndó nuú i tá ná caca ndó ña xihín quiví mí i.

Sáhan Jesús tühun a ña chindahá a íníma yii Ndióxi cañuhu a ini ñayivi

<sup>15</sup> Tá mé a ndaa quíhví ini ndó yehe, caja tá caja ndó ña sáhndá i nu ndo caja ndó.<sup>16</sup> Ta caca i nu Ndióxi, tátá i ña ná chindahá mé á íníma yii mé a nu ndo. Ta chíndeé mé á ndohó já ná quiahva tühun ndéé ini ndó ta já cuu coo tuun a xihín ndo.<sup>17</sup> Joo ñayivi, na co cúú cuéntá mí i, a cúú ndiquehe na ña jáchí co candaqá ini na yo cúú mé á ta ni co cúní na ndiquehe vaha na ña. Joo ndohó xíni vaha ndó a jáchí sa ín a xihín ndo ta níi tiempo cañuhu a ini ndó.<sup>18</sup> A jándacoo ndáhá toho i ndohó jáchí ndicó coo tucu u já coo i xihín ndo.<sup>19</sup> Ja chá cuití ta a cúní ga ñayivi cuéntá ñuyíví yehe. Joo mé ndó cuni tá cuni ndó yehe. Ta sáhá ña nditacu tucu u sahá ña cán quéa cuu catacu mé ndó andá ama cása quiví.<sup>20</sup> Ta mé quiví cán candaqá ini ndó ña mé a ndaa in cúú yehe xihín Ndióxi, tátá i. Ta candaqá ini ndó ña quiahva já in cúú ndó xihín i ta in cúú yehe xihín mé ndó viti.<sup>21</sup> Ndá na ndiquehe vaha tühun cáhan i ta caja na ña, náhna na xihín ña yóho ña mé a ndaa quíhví ini na yehe. Ta mé Ndióxi,

tátá i quíhví ini a ndijáá na quíhví ini yehe. Ta quíhví ri ini yehe na ta náhá i mí i nu ná —nacachi Jesús.

<sup>22</sup> Anda já in dà naní Judas, dà co cúú toho dà naní Judas Iscariote, nandaca tühún da Jesús já nacachi da já xihín á:

—Xitoho nde, ndá cuéntá quéa cächí ndó ña nahá ndó mé ndó nuú nde joo a náhá toho ndó mé ndó nuú ñayivi cuénta ñuyíví —nacachi da.

<sup>23</sup> Já nanducú ñehe Jesús tühun nuú dà já nacachi a já xihín dá:

—Ndá na quíhví ini yehe, na cán cúú na cája ña cáhan i. Ta já quíhví ini Ndióxi, tátá i na ta já quixi nde coo nde xihín ná.<sup>24</sup> Joo na co quíhví ini yehe, na cán cúú na quéhe núu tühun cáhan i. Ta mé tühun cáhan i nu ndó yóho co cúú a ña quíxi jini mí i. Cúú á tühun Ndióxi, tátá i, mé a nacindahá yehe quixi i ñuyíví yóho.

<sup>25</sup> Tóco ndihi ña yóho ndicani i ña nu ndó viti nani ín i xihín ndo.<sup>26</sup> Joo a íníma yii Ndióxi, mé a chindahá Ndióxi yuhú nuú i quixi a, chindeé a ndohó. Mé a cán quéa jánahá tóco ndihi ñáha nu ndo. Ta jändacuhun a ini ndó tóco ndihi ña nacachi i xihín ndo.

<sup>27</sup> Tá sa ná quee e cuhun i já caja i ña ná coo vaha ini ndó. Joo a cácuu a tátuhun tá cája ñayivi cuénta ñuyíví. “Ná coo vaha ini ndó”, cächí xihín táchan na joo co ín vaha ini xihín táchan na. Coto a ndicani náhá ini ndó ta coto a yíhví ndo jáchí caja i ña ná coo vaha ini ndó.<sup>28</sup> Sa naxini joho ndó ña nacachi i xihín ndo ña quee e cuhun i ta ndicó coo tucu u já coo i xihín ndo. Ta tá mé a ndaa quíhví ndusa ini ndó yehe já quéa cajii ini ndó sáhá ña cächí i cuhun i nu ín Ndióxi, tátá i. Ta ín chágua saha mé á a juú ga yehe.<sup>29</sup> Sa ndicani cuéé vi ña yóho nu ndo já quéa tá ná xínu coo ña cächí i xihín ndo coo já quéa cuu candusa ndó yehe.

<sup>30</sup> Ja chá cuití va coo i ñuyíví yóho ndituhún i xihín ndo jáchí sa natandaa hora xínu rí quini, rí cómí cuénta sáhá ñayivi ñuyíví yóho vatí mé a ndaa co ndee rí caja rí ni in ñáha xihín i.<sup>31</sup> Joo yaha tá yaha ña cúní ri caja rí xihín i. Ta xihín ña yóho candaqá ini ñayivi ndúu ñuyíví ña mé a ndaa quíhví ini ndusa i Ndióxi, tátá i ta caja i ña nasahnda mé á nuú i caja i. Candichi ndó. Xihín ndo ná coho —nacachi Jesús xihín na xíca tuun xihín a cán.

## 15

Jesús cíú á tátuhun in tó uva

<sup>1</sup> Anda já nacachi tucu Jesús já xihin ná:

—Yehé cíú ndusa tátuhun in tó uva ta Ndióxi, tátá i cíú á tátuhun dá ndája tó saha mé tó uva cán. <sup>2</sup> Ta ñayivi cíú ná tátuhun ndáha tó uva cán. Ta ndá ná co xeén caja ña cúní Ndióxi jácaxoo a ná nu mé á tá quiáhva cája dá ndája vií dó cán tá chítuhun dá ndáha tó uva, ña co cána uva nuu. Joo tá cána cuahá uva nu do já quéa ndája vií da ndáha do ta ndíjatá dá do já ná cana cuahá chágá uva nu do. Quiáhva já cája ri Ndióxi xihin ñayivi, ná cája ña cúní mé á. <sup>3</sup> Joo mé ndó sa nandivíva yá ndó jáchí naxini joho ndó ña jánahá i nu ndó. <sup>4</sup> Xímí ñúhú in cacuu ndó xihin i tá quiáhva in cíú yehé xihin ndó. Jáchí in ndáha tó uva a cíú cana uva nu do tó co tím dó tóco tó uva cán. Quiáhva já íín ri xihin ndóhó va. A cíú caja ndó ña cúní Ndióxi tá coó in cíú ndó xihin i.

<sup>5</sup> Yehé cíú u tátuhun tó uva ta ndóhó cíú ndó tátuhun ndáha mé tó uva cán. Ta ndá ná in cíú xihin i tá quiáhva in cíú u xihin ná já quéa cuu caja ndíhi na ña cúní Ndióxi. Cacuu a tátuhun cána cuahá uva vaha nu ndáha tó uva cán. Jáchí mé a ndáa ni in túhún ñaha a cíú caja ndó tó ná a chíndee yehé ndóhó. <sup>6</sup> Ta ndá ná co cúní in cacuu xihin i, ná cán cíú na jácaxoo Ndióxi. Ta cíú ná tátuhun in ndáha tó uva, dó sa nahichí ta nditaca dó cuhun dó cayi do.

<sup>7</sup> Tá in ná cacuu ndó xihin i ta tá ná caja ndó ña najánaha i nu ndó já cuu caca ndó ndá ña cúní mé ndó nuu i já quiáhva i ña nu ndó. <sup>8</sup> Mé Ndióxi, tátá i ndicáhnu ndiváha tá ná caja ndó ña cúní a xihin ndinuhu ini ndó. Ta xihin ña yóho náhá ndó ña cíú ndó cuénta mí i. <sup>9</sup> Quihví ini i ndóhó tá quiáhva quihví ini Ndióxi, tátá i yehé. Xímí ñúhú coo tuun ndó xihin i jáchí quihví ini i ndóhó. <sup>10</sup> Tá ná caja ndó tóco ndíhi ña sáhndá i nu ndó caja ndó já quéa coo tuun ndó xihin i jáchí quihví ini i ndóhó. Quiáhva já cája ri yehé va. Cája i tóco ndíhi ña náshanda Ndióxi, tátá i caja i ta xihin ña yóho íín tuun i xihin á jáchí quihví ini a yehé.

<sup>11</sup> Cáxi tühun i ña yóho xihin ndó já ná ca jii íní ndó tó quiáhva cájii íní yehé. Ta xihin ña yóho ndicutú ndaa ínima ndó xihin ña cájii ini ndó. <sup>12</sup> Cuni joho ndó ña sáhndá i nu ndó yóho: Ndítahan quihví ini táhan ndó tám

quiáhva quihví ini yehé ndohó. <sup>13</sup> Tá mé a ndaa táchí yehé quihví ini ñayivi ñani táhan na já quéa íín tähva na quiáhva na sahá ná. <sup>14</sup> Mé ndó cíú ndó amigo i tá cája ndó ña sáhndá i nu ndó caja ndó. <sup>15</sup> Cachí i xihin ndó ña cíú ndó amigo i jáchí cáxi tühun ndíhi i xihin ndó cahán Ndióxi, tátá i xihin i. Ta a cáhan ga i xihin ndó ña cíú ndó mozo jáchí in mozo co xíni toho da ndaja cája ña caja xitoho da. <sup>16</sup> Mé ndó coó nacaxi ndó yehé caca nuu i xihin ndó. Joo mí i nacaxi i ndohó ña ná caca nuu ndó xihin i. Ta najánaha i ndohó ndá quiáhva caja ndó já ná cacuu ndó tátuhun in yíto, dó sáhan cuahá cujhi ña a ndíhi sahá. Tá ná caja ndó ña cúní Ndióxi já quiáhva tátá i ndá a cúní mé ndó tó ná caca ndó ña xihin quiví mí i. <sup>17</sup> Ña yóho quéa sáhndá i nu ndó caja ndó: Quihví ini táhan ndó.

Cándají ñayivi cuénta ñuyíví Jesús ta cándají ri na ná cíú cuénta mé á

<sup>18</sup> Candehehé ndó. Tá ná casáhá candají ñayivi cuénta ñuyíví ndohó xíní ñúhú ndicuhun ini ndó ña jihna ñúhú ga nacandají ri na yehé va. <sup>19</sup> Tá ná caja ndó tó quiáhva cája ñayivi ñuyíví já quéa quihví ini va ná cán ndohó. Jáchí já cája xihin táchán mé ná cán. Joo yehé nacaxi i ndohó ña ná quee ndó tañu ná cán. Sahá ña cán quéa co cúní ná cán ndohó jáchí co cíú ga ndó ná ñuyíví yóho. <sup>20</sup> Coto a ndíndójó ndó ña nacahán i xihin ndó tó nacachi i ña ni in túhún toho mozo a cíú cacuu da dá cahnu chágá nuu xitoho da. Ta ni mé ndó co cíú ndó ná náhnu chágá a juú ga yehé. Jáchí tá quiáhva nacaja xixi na xihin yehé quiáhva já caja xixi ri na xihin ndohó va. Tá ná candúsa na ña nacahán i xihin ná quiáhva já candúsa ri na ña ná cahán ri ndohó va xihin ná. <sup>21</sup> Tóco ndíhi ña yóho caja na xihin ndó sahá ña cándezee ini ndó yehé. Jáchí co xíní na Ndióxi, tátá i, mé a náchindahá yehé vaxi i ñuyíví yóho.

<sup>22</sup> Tá ná a quíxi toho i ñuyíví yóho caxi tühun i xihin ñayivi, nduu coó toho ná jácojo cuachi jata ná, nduu. Joo viti náquixi i ñuyíví yóho ta ndítahan nu ná ndiquáhva na cuénta sahá cuachi na. <sup>23</sup> Ndá ñayivi cándají yehé, cándají ri na Ndióxi, tátá i.

<sup>24</sup> Nacaja i ña náhnu nu ná joo coó nacandúsa na yehé sahá ña cán quéa ndójo na cuachi. Ta ni in túhún toho ñayivi coó

nacaja ña náhnu tá quiqhva nacaja i nu ná. Vatí naxini na ña náhnu nacaja i joo cándají na yehe ta cándají na Ndióxi, tátá i.<sup>25</sup> Joo xihin tóco ndihi ña cíu yóho xínu coo nu ley najándacoo Moisés nu ná sañahá tá cachí a já: "Chí coó sahá ná cándají na yehe", já nacachi Moisés sañahá.

<sup>26</sup> Tá ná quixi ímima yii Ndióxi, mé a chindahá i cuénta Ndióxi, tátá i, mé a cán quéa cahan vaha sahá i. Ta jáñahá ña ndaa sahá Ndióxi ta chindeé a ñayivi.<sup>27</sup> Ta jári mé ndó cahan vaha ndó sahá i jáchi janda saha tá nacasáhá caja chíun i ñuyíví yóho násanduu tuun ndó xihín i —nacachi Jesús.

## 16

<sup>1</sup>Já nacachi tucu Jesús já:

—Caxi tuhun i ña yóho xihin ndó já ná a jándacoo ndó ña cández ini ndó yehe.<sup>2</sup> Jáchi vaxi quiví tá taxi ñayivi ndohó veñuhu. Ta ndá ná ná cañíndohó cahan na ña caja chúun na cuénta Ndióxi.<sup>3</sup> Caja na ña yóho jáchi co xíni na yo cíu Ndióxi, tátá i ta ni co xíni na yehe.<sup>4</sup> Sa caxi tuhun cuéé e ña yóho xihin ndó já quéa tá ná xínu coo quiví cán já ndicuhun ini ndó ña sa nacaxi tuhun yachí vi xihin ndó ña já coo.

### Ña caja ímima yii Ndióxi

'Coó nacaxi tuhun i ña yóho xihin ndó jihna jáchi nasañihin i xihin ndó.<sup>5</sup> Ja chá cuhun i coo i xihin Ndióxi, tátá i, mé a nacindahá yehe ñuyíví yóho joo ni in ndó co ndáca tuhún ndó yehe ndájá cuhun i.<sup>6</sup> Ña caja ndó quéa cacutehá ndivaha ini ndó sahá ña ndícani i tóco ndihi ña yóho nu ndó.<sup>7</sup> Joo mé a ndaa ná cahan i xihin ndo: Vaha chágá ná quee e cuhun i. Jáchi tá ná a quée yehe cuhun i já a cíu quixi ímima yii Ndióxi coo a xihin ndo ta mé a cán chindeé a ndohó. Joo tá ná quee e cuhun i já chindahá i mé a quixi a nu ndó.<sup>8</sup> Ta ná xínu a cán jáñahá caxí táchí a nu ñayivi ña caja na cuachi. Ta jáñahá nu ná ndaa íñi chí cuénta ña ndaa. Ta jáñahá nu ná ndá quiqhva cavií sahá ñayivi caja Ndióxi.<sup>9</sup> Ta jáñahá caxí táchí a ña íñi cuachi na jáchi co cández ini na yehe.<sup>10</sup> Ta jáñahá ímima yii Ndióxi ndaja íñi chí cuénta ña ndaa jáchi quee e cuhun i nu íñi Ndióxi, tátá i ta a cúní ga ndó yehe.<sup>11</sup> Ta jáñahá caxí táchí a ña caja vií Ndióxi sahá cuachi jáchi sa nacaja vií a

sahá tiñahá sacuahá vatí viti ñuhú cómí ri cuénta sahá ñayivi ñuyíví yóho.

<sup>12</sup> 'lin cuahá ndivaha ñaha cúní cahan chágá i xihin ndó. Joo vatí já va viti jáchi a cández ga jini ndó.<sup>13</sup> Tá ná xínu ímima yii Ndióxi, mé a cíu ña ndaa, mé a cán candaca ndohó chí cuénta ña ndaa. Ta a cahan toho a cán ña quixi jini mé a jáchi cahan mé a ña xíni joho a cahan Ndióxi. Ta caxi tuhun a xihin ndó ndá a coo chágá chí nuu.<sup>14</sup> Ta mé a cán caja cahnu a yehe jáchi jáñahá nu ndó ña cúní mí i jáñahá i nu ndó.<sup>15</sup> Tóco ndihi ñaha jáñahá Ndióxi, tátá i cíu ri a ña jáñahá yehe va. Sahá ña cán quéa cachí i xihin ndó ña cúní mí i jáñahá i nu ndó.

<sup>16</sup> 'Ja chá cuití coo i xihin ndó ta a cúní ga ndó yehe jáchi quee e cuhun i nu íñi Ndióxi, tátá i. Joo tá nandihí já cuni tucu ndó yehe —cachi Jesús.

<sup>17</sup> Anda já nacasáhá java ná xíca tuun xihin á cán ndáca tuhún táhan na já cachí xihin táhan na já:

—Ndía cúní ri Jesús cache a xohó tá cachí a ña ja chá cuití va ta a cúní ga í mé a ta tá nandihí já cuni tucu mé a. Ta cachí a ña cíu á sahá ña quee e cuhun a nu íñi Ndióxi, tátá a.<sup>18</sup> Ndía cúní ri a cache a ña ja chá cuití va cuni mé a. Co cández vaha toho iní nacá cúní mé a cache a xihin tuhun yóho —nacachi xihin táhan na.

<sup>19</sup> Joo nacandaa ini Jesús ña cúní na ndáca tuhún ná mé a sahá ña cán quéa nacachi a já xihin ná:

—Nacachi i xihin ndó ña ja chá cuití ta a cúní ga ndó yehe ta tá nandihí já cuni tucu ndó yehe. Ta viti cúní ndo ndáca tuhún ndó yehe ndía cúní cache ña yóho.<sup>20</sup> Mé a ndaa ná cahan i xihin ndó. Tanda quivi cuacu ndó ta cacutehá ndivaha ini ndó ta ñayivi ñuyíví yóho cavatá ndivaha na sahá ña ndoho i. Ta vatí cacutehá ini ndó joo in cuití ndajama ña jan ta já cají ndivaha ini ndó.<sup>21</sup> Cacuu a tátuhun tá xínu coo hora cacu jahyi in ñañahá ta já casahá ndohó ini ña. Joo tá sa nacacu jahyi ña ndíndojó ndihi ña sahá ña nandohó ini ña jáchi sa nacacu jahyi ña ta cají ndivaha ini ña xihin á.<sup>22</sup> Quiqhva já ndohó ini ndó xihin ña tálhndá ini ndó viti. Joo ndicó coo tucu yehe já cuni táhan tucu ta já ndicutú ndaa ímima ndó xihin ña cají iní ndó. Ta ni in na a cuna caja cají nuu nuú ña cají iní ndó jan.

<sup>23</sup> Mé quivi cán coó ga ñaha caca ndó nuú i. Jáchí mé Ndióxi, tátá i quiáhva tóco ndihí ña xíní ñúhú ndó tá ná caca ndó ña nu á xihín quivi mí i. <sup>24</sup>Janda viti a ñáha caca ndó ñáha nu Ndióxi, tátá i xihín quivi yehe. Joo viti xíní ñúhú caca ndó ña cúní ndó nu mé á xihín quivi yehe ta já quiáhva mé á ña nu ndo. Ta xihín ña yóho cuu ndicutú ndaá iñi ndó xihín ña cájii íní ndó.

Naquee vaha Jesús nu tóco ndihí ña núu ñuyíví yóho

<sup>25</sup> Xihín quiáhva cuití nacahan i ña yóho xihín ndo. Joo tandaá quivi ta a cahán ga i xihín quiáhva nu ndo. Ña caja i quéa cáxí táchí cahán i sahá Ndióxi, tátá i nu ndo.

<sup>26</sup> Ta mé quivi cán caca ndó ña cúní ndó nu Ndióxi, tátá i xihín quivi mí i. Sa núná nu ndó caca táchí ndó nu á ta co xíní ñúhú ga caca táchí yehe nu mé á sahá ndo. <sup>27</sup>Jáchí sa quíhvi ini tátá i ndohó sahá ña quíhvi ini ndó yehe ta sahá ña nacandusa ndó ña nachindahá mé á yehe växi i. <sup>28</sup>Mé nu íin Ndióxi, tátá i naquee e växi i ñuyíví yóho. Ta yachí chá ta jándacoo i ñuyíví yóho já ndicó coo tucu u cyhun i nu íin Ndióxi, tátá i —nacachi Jesús.

<sup>29</sup> Anda já nacachi na xica tuun xihín á cán já:

—Viti ndusa quéa cahán cáxí táchí ndo xihín nde ta co sácu ga ndó quiáhva nuú nde. <sup>30</sup>Ta viti ndusa cándaa ini nde ña xíní ndó tóco ndihí ñáha. Ta ni co xíní ñúhú toho ndó ña ná ndaá tuhún nde ndohó jáchí sa xíní va ndó ña cúní nde candaá ini nde. Sahá ña cán quéa cándusa nde ña naquixi ndó nu íin Ndióxi —nacachi na.

<sup>31</sup>Já nanducú ñehe Jesús tuhun nu ná nacachi a já xihín ná:

—Á ja viti ndusa cándusa ndó yehe. <sup>32</sup>Joo sa naxinu coo va hora ndicuítu nuu ndó ndá nacuu cyhun ndo ta jándacoo in túhún ndó yehe. Vatí mé a ndaa a cándoo mé toho i jáchí íin Ndióxi, tátá i xihín i. <sup>33</sup>Cáxi tuhun i ña yóho xihín ndo já ná coo vaha ini ndó sahá ña in cíú ndó xihín i. Mé a ndaa ndoho tá ndoho ini ndó ñuyíví yóho. Joo a caylhví toho ndó jáchí yehe nacandeé e nasahnu i nu tóco ndihí ña núu ñuyíví yóho —nacachi Jesús xihín na xica tuun xihín á cán.

<sup>1</sup>Tá nandihi nacachi Jesús tóco ndihí ña yóho xihín na xica tuun xihín á cán já nandiñehe a nuú á chí indiví já nacachi a já:

—Tátá Ndióxi, sa naxinu coo quivi quivi i. Caja ndó ña ndicáhnu ndiváha mí i, da cuú in túhún jiní já jahyi mé ndó já ná cuu caja cahnu ri yehe va ndohó. <sup>2</sup>Jáchí mé ndó nasahan ndó nuú i ña ná cacomí i cuéntá sahá tóco ndihí ñayivi já ná cuu caja i ña ná catacu na anda ama cása quivi jáchí cíú ná ná nasahan ndo nuú i. <sup>3</sup>Ta tá xíní na yo cuú mé ndó ta tá xíní na yo cuú yehe, da nachindahá ndó ñuyíví yóho já cuu catacu na anda ama cása quivi. Jáchí in túhún mé ndó cíú ndusa Ndióxi.

<sup>4</sup>Sa nacaja cahnu i ndohó nani íin i ñuyíví yóho ta sa najáxinu coo ndihí i ña nasaahnda ndó nuú i caja i. <sup>5</sup>Ta viti xica táchí i nu ndo, tátá Ndióxi ña ná náha ndo nuú ñayivi ndaja cahnu cíú yehe nu mé ndó jáchí quiáhva já in cahnu nasaahnu u xihín ndó janda tá cámáni cava sahá sahá ñuyíví.

<sup>6</sup>Ta nacaxi ndó na cacuu cuéntá mí i tañu ñayivi cuéntá ñuyíví yóho. Ta sa nacaxi tuhun i xihín na yo cuú mé ndó. Nacaxi ndó na ta nandiquiáhva ndó na nuú i. Ta nacandusa na tuhun ndó. <sup>7</sup>Ta viti cándaa ini na ña tóco ndihí ña sahan ndó nuú i quíxi a cuéntá mé ndó. <sup>8</sup>Ta sa nacaxi tuhun i xihín na tóco ndihí ña nasaahndó nuú i ta nandiquehe vaha na ña. Ta sa nacandaa ini na ña mé a ndaa naquixi i cuéntá mé ndó. Ta nacandusa na ña nachindahá ndó yehe.

<sup>9</sup>Co xica táchí i nu ndó sahá ñayivi cuéntá ñuyíví yóho. Joo xica táchí i nu ndó sahá na nasaahndó nuú i jáchí cíú ná cuéntá mé ndó. <sup>10</sup>Tóco ndihí na cuú cuéntá mí i cuú ná cuéntá mé ndó viti. Ta tóco ndihí na cuú cuéntá mé ndó cuú ri na cuéntá yehe va. Ta ndicáhnu ndiváha mí i sahá ña caja na.

<sup>11</sup>A cóo ga i ñuyíví yóho jáchí saa i nu íin mé ndó. Joo na nacaxi ndó yóho canduu téo na ñuyíví yóho. Tátá Ndióxi, yíi ndiváha cíú mé ndó. Xica táchí i nu ndó ña ná candaá vaha ndó na cuú cuéntá mé ndó jáchí xihín ndee mé ndó cuu candico na íchi cuéntá mé ndó. Já quéa in ná nduu ndihí na tá quiáhva in cíú mé ndó xihín yehe.

<sup>12</sup>Jáchí nani íin i xihín na ñuyíví yóho ndáá i na xihín ndee mé ndó. Ta ni in túhún toho táhan na nasaahndó nuú i cacomí i cuéntá sahá cán coó nandihi sahá. In túhún da

nāndihi sahá cūú da jāndā sanahá nāsahijin sahá nā ndihi sahá dā já nā cuu xīnū coo nuú nā nācahyi nuú tūhun Ndióxi sanahá.

<sup>13</sup> "Ta viti quee e nuyíví yóho saa i nu ín ndó jan. Joo cähān i nā yóho xihín ndó nani íin i nuyíví yóho já nā ndicutú ndaa ini nā yóho xihín nā cājii ímí na tá quiahva cājii ímí mí i. <sup>14</sup> Sa nācaxi tūhun i tūhun mé ndó nu ná. Joo nā cūú cuénta nuyíví cāndají na nā cūú cuénta mí i jāchí co cūú nā cuénta nuyíví yóho tā quiahva co cūú toho yehe cuénta nuyíví yóho. <sup>15</sup> Co xīca tāhví i nu ndo nā nā tavá ndo nā nuyíví yóho. Nā cūní quēá nā chindeé ndó nā já nā quēé vaha tiñahá sacuahá xihín nā. <sup>16</sup> Tá quiahva co cūú toho i dā cuénta nuyíví yóho quiahva já co cūú ga nā cán nāyivi cuénta nuyíví. <sup>17</sup> Ta xīca tāhví i nu ndo nā nā ndaja vií ndó nā xihín tūhun mé ndó nā jānahá ndó nu nā jāchí tūhun mé ndó cūú nā ndaa. <sup>18</sup> Ta tá quiahva nācaya ndó nāchindahá ndó yehe tañu nā nuyíví yóho quiahva já chindahá ri yehe va nā cūú cuénta mí i tañu nāyivi cuénta nuyíví. <sup>19</sup> Ta ndíquiahva i mí i caja i nā cūní mé ndó já quēá nā cuu ndíquiahva nā yóho mé nā ndáhá mé ndó sahá nā sa xihín nā nāndaa.

<sup>20</sup> "Ta ajuú sahá nā yóho cuití va xīca tāhví i nu ndo, vaha. Xīca tāhví ri nu ndó sahá nā nā candusa yehe chágá chí nūu sahá tūhun cähān mé nā yóho xihín nā. <sup>21</sup> Tátá Ndióxi, xīca tāhví i nu ndo nā nā caja ndó nā in nā nduu tóco ndihi nā cūú cuénta mé ndó yóho. Ta caja ndó nā in nā nduu ndihi na xihín yó tá quiahva in cūú ndó xihín yehe ta in cūú yehe xihín mé ndó. Jāchí tá nā caja ndó nā in nā nduu tóco ndihi na já cuu candusa nāyivi cuénta nuyíví nā mé a ndaa nāchindahá ndó yehe vaxi i. <sup>22</sup> Nācaya i nā nāndicáhnu nā cán tá quiahva nāndaya cähnu ndó yehe. Já quēá in nā nduu ndihi na tá quiahva in cūú mé ndó xihín yehe. <sup>23</sup> Ta in cūú yehe xihín nā tá quiahva in cūú mé ndó xihín i já nā xīnū coo ndihi na cacuu na tātūhun in víxí nāyivi. Ta já nā cuni nāyivi cuénta nuyíví nā mé a ndaa nāchindahá ndó yehe vaxi i. Ta já nā cuni na nā quihvi ini ndó nā tá quiahva quihvi ini ndó yehe.

<sup>24</sup> Tátá Ndióxi, nācaya ndó nā cómí i cuénta sahá nā yóho. Ta cūní nā nā coo na xihín i nuú coo i já nā cuni na ndā quiahva cähnu cūú u jāchí nācaya ndó nā

nā ndicáhnu ndivāha i. Jāchí jāndā tā camaní cāva sahá sahá nuyíví quihvi ini ndó yehe. <sup>25</sup> Tátá Ndióxi, cája ndó nā ndaa. Ta nāyivi cuénta nuyíví yóho co xīní toho na ndohó. Joo yehe xīní vaha i ndohó ta nā cūú cuénta mí i yóho sa cāndaa vaha ini na nā nāchindahá ndó yehe. <sup>26</sup> Sa nācaya i nā nā candaq chágá ini na sahá ndo. Ta xihín nā yóho candaq ini na nā quihvi ini ndó nā tá quiahva quihvi ini ndó yehe ta já in nā nduu na xihín i —nācachi Jesús xīca tāhví a nā Ndióxi.

## 18

### Tá natiin na Jesús

(Mt. 26:47-56; Mr. 14:43-50; Lc. 22:47-53)

<sup>1</sup> Tá nāndihi nāxīca tāhví Jesús nū Ndióxi já nāqueta mé á xihín nā xīca tuun xihín a cán cuahán chí inga xoo yíví naní Cedrón. Ta yati cán cāa cuahá yító cuhi nūu naquihvi Jesús xihín na xīca tuun xihín á. <sup>2</sup> Ta Judas Iscariote, mé dā jíco tūhún nāhá cán sa xīní vaha da nu sāhīn Jesús xihín na xīca tuun xihín á jāchí cuahá tañu nānditútú ndihi nā cán. <sup>3</sup> Nā cán quēá ndáca da in tāhndá soldado ta ndáca da java policía, nā ndáá veñhu cähnu nūu Jerusalén cán. Cūú nā nāchindahá nā sacuahá nūu jutu xihín na fariseo. Ta jāndā joho nēhe na nāhá nā cani na a cuahán nā ta nēhe ri na ití yúsá jāndiyéhe nā nu nā. <sup>4</sup> Joo sa xīní vaha Jesús nādya ndítahan ndoho a sahá nā cán quēá nāqueta nu nā já nāndaca tūhún a nā já nācachi a já xihín nā:

— Yo ndínducú ndo já —nācachi a.

<sup>5</sup> Já nānducú nēhe nā cán tūhun nū á já nācachi na já xihín á:

— Ndínducú nde Jesús, dā nūu Nazaret —nācachi na.

— Yehe cūú u dā ndínducú ndo —nācachi a.

Ta tañu nā cán ndácaan ri Judas, dā nājíco tūhún nāhá cán. <sup>6</sup> Tá nācachi Jesús: "Yehe cūú u dā ndínducú ndo", já nāxīca jātā nā ta nācuyu na nu nūhu. <sup>7</sup> Já nāndaca tūhún tucu Jesús nā já nācachi a já xihín nā:

— Yo ndínducú ndo já —nācachi a.

Já nānducú nēhe nā cán tūhun nū á já nācachi na já xihín á:

— Jesús, dā nūu Nazaret ndínducú nde —nācachi na.

<sup>8</sup> Andā já nācachi tucu Jesús já xihín nā:

—Sá nacachi vi xihín ndo ña yehe cíú u dä ndínducú ndo. Sähá ña cán quéa quiáhva ndó ñamani nuú na yóho ña ná quee na cuhun na —nacachi Jesús.

<sup>9</sup>Nacachi Jesús ña yóho já ná a tíin na ná xíca tuun xihín a cán já ná xínu coo nuú tühun ña nacachi mé á tåxica tahví a nu Ndióxi tá nacachi a já: “Tátá Ndióxi, ni in tühún toho táhan na nasañan ndó nuú i coó nandihí sahá jáchi nasañaa vaha i na.” <sup>10</sup>Ta ndaja coo nasañee in machítu nü tóco Simón Pedro. Já natuhun da ña ta nacchitúhun dájoho cuáha in dä naní Malco, dä cíú mozo nuú dä cíú sacuahá chágaa nu ndíhi jutu. <sup>11</sup>Anda já nacachi Jesús já xihín Pedro:

—Chicáan vaha machítí jan. Jáchi sa nasaú ini Ndióxi, tátá i ndoho ini i tóco ndihí ña vaxi nuú i ta íin tiáhva i ndoho ini i —nacachi Jesús.

*Néhe na Jesús cuahán na nuú dä sacuahá chágaa nu ndíhi jutu*

(Mt. 26:57-58; Mr. 14:53-54; Lc. 22:54)

<sup>12</sup>Tóco ndihí soldado cán xihín dä sáhndá chuun nu dä xihín java na ndáá veñihu cán natini na Jesús ta nacatón a. <sup>13</sup>Jihna ñúhú néhe na a nasañan na nu Anás, dä cíú xojo Caifás, dä sacuahá chágaa nu ndíhi jutu mé cuia cán. <sup>14</sup>Mé Caifás yóho cíú dä nacachi xihín na Israel ña vaha chágaa ña ná quivi in taa nu ndíhi ñayivi já ná a ndíhi sahá tóco ndihí ñayivi.

*Chíjehé tühun Pedro ña xíni dä Jesús*  
(Mt. 26:69-70; Mr. 14:66-68; Lc. 22:55-57)

<sup>15</sup>Ta ndaja coo Simón Pedro xihín inga táhan dä xíca tuun xihín Jesús cán ndíco na jatá nu ñéhe na a cuahan na. Ta dä inga cán xíni táhan vaha da xihín dä sacuahá chágaa nu ndíhi jutu ña cán quéa nañehé dä ñamani ndihvi da xihín Jesús yuyéhé vehe jutu cán. <sup>16</sup>Joo nacandoo Pedro jata véhe yati yéhé cán. Joo da inga cán nandicó coo da já naxica da ñamani nu ña ndáá yéhé vehe jutu cán ña ná quiáhva ña ñamani nu Pedro quiáhvi da. Sähá ña cán naquihvi Pedro chí yuyéhé vehe cán. <sup>17</sup>Ta mé ña ndáá yéhé cán nandaca tühún ña Pedro já nacachi ña já xihín dä:

—Á a juú in táhan dä xíca tuun xihín Jesús cíú yóho —nacachi ña.

Anda já nacachi Pedro já xihín ña:

—Co cíú toho i in táhan dä xíca tuun xihín á —nacachi Pedro.

<sup>18</sup>Ta mé ñuu cán vixi xíni na cíú mozo xihín na ndáá veñihu cán. Sähá ña cán quéa nandicahmi na ñúhú ta nandaca nduu na xítúni na ta tañu na cán cándichi ri Pedro xítúni dä.

*Ndája ndíchi dä sacuahá chágaa nu ndíhi jutu Jesús*

(Mt. 26:59-66; Mr. 14:55-64; Lc. 22:66-71)

<sup>19</sup>Tá nandihí já nacásahá da sacuahá chágaa nu ndíhi jutu cán ndája ndíchi dä Jesús já nandaca tühún dä mé á sahá na naxica tuun xihín á. Ta nandaca tühún dä mé á sahá ña najánahá nuú ñayivi. <sup>20</sup>Anda já nacachi Jesús já xihín dä:

—Coó nacahan jehé toho i xihín ñayivi tá najánahá i nu ná. Níti tiempo najánahá i tühun Ndióxi nu ná ini veñihu ta quiáhva já najánahá i nu ná nu tacá na ini veñihu cáhnu ñuu Jerusalén. Ta ni in tühun toho ñaha coó najánahá jehé e nu ná. <sup>21</sup>Ta viti cachi ndó xihín i ndá cuénta quéa ndáca tühún ndó yéhe sahá ña yóho. Cuáhán ndó ndaca tühún ndó ñayivi, na najánahá i nu cán já ná ndicani na cán nu ndo ndaja cáa ña najánahá i nu ná. Jáchi xíni vaha na ña nacahan i xihín ná —nacachi Jesús.

<sup>22</sup>Tá nacachi Jesús ña yóho já nacani in da ndáá veñihu cán jahndá nuú á já nacachi da já xihín á:

—A vaha toho ndínehe yúhun nuú dä sacuahá chágaa nu ndíhi jutu —nacachi da.

<sup>23</sup>Anda já nacachi Jesús já xihín dä:

—Tá coó vaha ná caja i, cahan xihín i ndá cíú ña coó nacaja vaha i. Joo tá nacaja vaha i ndá cuénta quéa cánún yéhe —nacachi Jesús.

<sup>24</sup>Tá nandihí já nasañeha na Jesús nuú Caifás, dä sacuahá chágaa nu ndíhi jutu cán ta sa já ndíco a xihín yóho ñéhe na a cuahan na.

*Chíjehé tühun tucu Pedro ña xíni dä Jesús*  
(Mt. 26:71-75; Mr. 14:69-72; Lc. 22:58-62)

<sup>25</sup>Ta ndaja coo fín coo yií Pedro xítúni dä xihín java na ndíu cán. Ta já nacásahá na cán ndaca tühún na dä já nacachi na já xihín dä:

—Á a juú táhan dä xíca tuun xihín Jesús cíú yóho —nacachi na.

Joo nacijehé tühun Pedro ña xíni dä Jesús já nacachi da já:

—Co cíú toho i in táhan dä xíca tuun xihín á —nacachi da.

<sup>26</sup> Joo tá nandihi já nandaca tuhún in da cíú mozo nu yu dā sacuha chágá nu ndíhi jutu cán, dā cíú in táhan dā nachitúhun Pedro joho. Ta nacachi da já xihín Pedro:

—Cája i cuéntá naxini i yohó nu cáca cuha yító cujhi nu yu natiin na Jesús cán —nacachi da.

<sup>27</sup> Joo nachijehé tuhun tucu Pedro ná xíni dā Jesús ta iyi laá nacana chéle tá quiáhva nacachi Jesús xihín dā coo.

Ñéhe na Jesús cughan na nu Pilato  
(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Ta tá nativi yaa já natavá na Jesús vehe Caifás cán já ñíehe na a cuahan na vechúun nu ndácaan dā cíú gobernador cuéntá ñuu Roma. Joo mé na Israel coó naxeen na ndíhi na vechúun cán jáchi cachí ley na ná tá na ndíhi na vehe na toho já cuu yuxu na ta já a cuu cajíni na víco pascua ná coo quiví itaán. <sup>29</sup> Sahá ná cán quéa naqueta Pilato, dā cíú gobernador jata véhe cahán dā xihín na Israel já nacachi da já:

—Ndá cuachi nacaja dā yohó —nacachi Pilato.

<sup>30</sup> Já nanducú ñehe na Israel cán tuhun nu dā já nacachi na já:

—Ta tá a juú taa quini ná cacuu dā yohó ta a cañehe toho ndé dā quixi da nu ndó, nduu —nacachi na.

<sup>31</sup> Já nacachi Pilato já xihín ná:

—Mé ndó cañehe ndó dā cuhun ndó. Caja víi ndó sahá dā tá quiáhva sáhndá ley mé ndó —nacachi Pilato.

Já nacachi na Israel cán já xihín dā:

—Na cúní nde quéa ná cata caa ndó dā ndica crúxu jáchi cíú nde na Israel ta co ñéhe toho nde ñamani cahní nde ñayivi —nacachi na.

<sup>32</sup> Ta xihín ná yohó naxinu coo nu yu ná nacachi Jesús tá nacachi a ndá quiáhva quivi a. <sup>33</sup> Tá nandihi já nandihvi tuhun Pilato ini vechúun cán ta nacana da Jesús já nandaca tuhún ñahá dā já nacachi da já xihín á:

—Á mé a ndaa cíú in rey, dā cómí cuéntá sahá na Israel —nacachi da.

<sup>34</sup> Já nacachi Jesús já xihín dā:

—Á jiní mé ndó naquixi ná ndáca tuhún ndó yehe. Á ndáca tuhún ndó yehe sahá ná nacachi ñayivi sahá i —nacachi a.

<sup>35</sup> Anda já nacachi Pilato já xihín Jesús:

—Co cándaa ini i sahá ná yohó jáchi co cíú yehe dā Israel. Mé ñayivi Israel jan xihín na sacuha nu yu jutu cíú na

nandiquiahva yohó ndahá i. Ndía nacajún, vaha —nacachi Pilato.

<sup>36</sup> Já nanducú ñehe Jesús tuhun nu dā já nacachi a já xihín dā:

—Co cómí i cuéntá sahá ñayivi tátuhun cája ñayivi cuéntá ñuyíví. Jáchí tá ná comí i cuéntá sahá ná tátuhun ná ñuyíví já quéa cuu caja i xihín ná comí i cuéntá sahá ná ná cani táhan na xihín ná Israel ná ná a tím na yehe. Joo co cómí toho i cuéntá sahá ná tátuhun cája ñayivi cuéntá ñuyíví —nacachi a.

<sup>37</sup> Anda já nacachi tuhun Pilato já xihín Jesús:

—Á cíú dā comí cuéntá sahá ñayivi, dā já —nacachi da.

Já nacachi Jesús já xihín dā:

—Ña ndaa quéa cahán ndó jan. Yehe cíú u dā comí cuéntá sahá ñayivi cuéntá mí i jáchi nacacu u ñuyíví yohó ná ná caja i já. Ta naquixi i já ná caxi tuhun i ná ndaa xihín ñayivi. Ta tóco ndihí na cíú cuéntá ná ndaa xíni joho ná cahán i —nacachi a.

<sup>38</sup> Já nacachi tuhun Pilato já xihín á:

—Yo xíni ndíá cíú ná ndaa —nacachi da.

Tá nandihi já naqueta tuhun Pilato vechúun cahán dā xihín ná Israel já nacachi da já xihín ná:

—Chí co ndínehe mí vi ndá cuachi quéa nacaja dā yohó. <sup>39</sup> Tañu mé víco pascua fin in costumbre ndó ná ná janí i in dā sá ndácaan vecaa. Ta vití cachí ndó xihín i á co cúní ndó ná ná janí i dā cíú rey nu yu na Israel —nacachi Pilato.

<sup>40</sup> Ta já nacashá tóco ndihí na cán cayuhú cóhó na já cachí na já:

—A janí toho ndó Jesús jan. Vaha chágá ná janí ndó Barrabás jan —cachí na cayuhú na nu Pilato.

Ta Barrabás cán násacuu da in taa cuíhná.

## 19

Sacú na sahá Jesús quivi a

<sup>1</sup> Anda já násahnda Pilato chuun ná ná jácaxáhan na Jesús xihín churrú. <sup>2</sup> Ta dā cíú soldado cán najehén dā in tiyivi xihín íñu já nacchinú da a jiní á ta nacchinú da in jahma cuáhá túun jatá. <sup>3</sup> Tá nandihi já nacativi da nu á sácu ndaa ichí ñahá dā já nacachi da já xihín á:

—Cáhnu nahá ná cacuu yohó, dā cíú rey nu yu na Israel —nacachi da.

*Anda já cáni da nuu á.*

<sup>4</sup> Tá nandihi já naqueta tucu Pilato chí jata já nacachi da já xihín tóco ndihi na ndiúu cán:

—Candehé ndo. Tavá ñéhe e Jesús nu ndo já ná candaq ini ndó ña coó toho cuachi da ndítahan i —nacachi da.

<sup>5</sup> Tá nandihi já natavá ñéhe Pilato Jesús ta sa já cánui tiyivi ñuu jini á. Ta sa já táca jahmá cuáhá tühun jatá naqueta. Anda já nacasáhá cachí Pilato já:

—Candehé ndo. Yóho íin da —nacachi da.

<sup>6</sup> Joo na sacuaha nuú jutu xihín na ndáá veñuhu tá naxini na Jesús já nacasáhá na cayuhú cohó na já cachí na já:

—Cata caa ndó dä ndica crúxu, cata caa ndó dä —cachí na.

*Anda já nacachi Pilato já xihín ná:*

—Mé ndó cañehe ndó dä cuhun ndo cata caa ndó dä ndica crúxu tá cúní ndó. Jáchí yehe co ndítahan i ndá cuachi nacaja da —nacachi Pilato.

<sup>7</sup> Anda já nacachi na Israel cán já xihín Pilato:

—Nu ley mé nde ndítahan quiivi da jáchi cachí dä cíuú dá in tühún jini já jahyi Ndióxi —nacachi na.

<sup>8</sup> Tá naxini joho Pilato cán ña yóho já nayihví chágá ví dä. <sup>9</sup> Já naquihví tucu Pilato xihín Jesús ini vechúun cán já nandaca tuhún dä mé á já nacachi da já xihín á:

—Ndá ñuu naquisún já —nacachi da.

Joo coó nanducú ñehe Jesús tühun nu dä.

<sup>10</sup> Já nacachi tucu Pilato já:

—Ndá cuéntá quéa co cúnun nducú ñehún tühun nuú i. Á co xíni tohún ña cuu cahnda i chuun ña ná cata caa na yohó ndica crúxu. Ta cuu janí rí yohó ña ná queún cuhun tá cúní —nacachi da.

<sup>11</sup> Anda já nanducú ñehe Jesús tühun nu dä já nacachi a já xihín dä:

—Ni in tühún toho ñaha co núná nu ndó caja ndó xihín i tá co sáhan Ndióxi, tátá i ñamani nu ndo. Joo mé a ndaa íin chágá cuachi nuú dä nandiquiahva yehe ndáha ndó a juú ga ndóhó —nacachi Jesús.

<sup>12</sup> Anda já nanducú Pilato ndá quiahva caja da janí da Jesús ña ná quee a cuhun a. Joo coó naxeen na Israel ta nacasáhá na cayuhú cohó na nu dä já cachí na já:

—Tá ná janí ndó Jesús jan já quéa náha ña co cíuú ndó dä ñehe táhan vaha xihín dä cómi cuéntá sahá ñayivi ñuu Roma. Jáchí

Jesús jan cachí dä ña cíuú dá dä cómi cuéntá sahá ñayivi ta xihín ña yóho jándihíhví dä emperador, dä cómi cuéntá sahá ñayivi ñuu Roma —nacachi na.

<sup>13</sup> Tá naxini joho Pilato ña yóho já nasa-nnda da chuun ña ná tavá na Jesús. Ta nasaçoo mé dä nu sácoo dä cán naní a Gabata tühun hebreo. Mé tühun yóho cúní cachí a nuú naquihví piso yuu. <sup>14</sup> Nayaha tóco ndihi ña yóho tá cámání in quívi coo víco pascua. Ta cíuú á tátuhun caxiví ta nandaca ndichi Pilato já nacachi da já xihín na Israel cán:

—Jan íin dä cíuú rey nu ndo —nacachi da.

<sup>15</sup> Joo na cán nacasáhá tucu na cayuhú cohó na nu dä já cachí na já:

—Cahní ndó da. Ná quiivi da. Cata caa ndó dä ndica crúxu —cachí na.

Já nacachi Pilato já xihín ná:

—Ama ná cata caa ri dä cíuú rey nu ndó ndica crúxu —nacachi Pilato.

*Anda já nacachi na sacuaha nuú jutu cán já:*

—Dä cómi cuéntá sahá ñuu Roma, in tühún dä cán cuití va cíuú rey nuú nde —nacachi na cán.

<sup>16</sup> Anda já nandiquiahva Pilato Jesús nu ná ña ná cañehe na a cuhun na cata caa na a ndica crúxu.

*Cáta caa na Jesús ndica crúxu*

(Mt. 27:32-44; Mr. 15:21-32; Lc. 23:26-43)

<sup>17</sup> Nächinú na in crúxu joco Jesús já ndójao a dä cuahen chí xiquí naní a nu ndiú lásá yiquí jini ndii. Ta cachí na Gólgota xihín á tühun hebreo. <sup>18</sup> Ta cán nacata caa na a ndica crúxu ta nacata caa ri na inga ivi dä xihín á, in in dä in in xoo jín á. Ta tácaa Jesús mahñú ndíví dä cán. <sup>19</sup> Ta nasañda Pilato chuun ña ná cuhun java na chíti ndaa na in tabla ndica crúxu yati jini Jesús cán. Ta nu tabla cán nacahyí na: “Dä yóho cíuú Jesús, dä ñuu Nazaret, dä cíuú rey nuú na Israel.” <sup>20</sup> Ta cuahá na Israel nacahví na ña nacahyí cán jáchi yati yuhú ñuu Jerusalén nacata caa na Jesús. Ta ña ndáa nu tabla cán nacahyí na ña tühun hebrero ña cahán na Israel xihín tühun latín ña cahán na ñuu Roma xihín tühun griego ña cahán na nación Grecia. <sup>21</sup> Ta tá naxini na sacuaha nuú jutu cán ña yóho já nacachi na já xihín Pilato:

—A cahyí toho ndó ña cūú dā jan rey nuú na Israel. Vaha chágá ná cahyí ndó ña cächí dā cūú dā rey nuú na Israel —nacachi na.

<sup>22</sup>Já nanducú ñehe Pilato tūhun nu ná já nacachi da já xihin ná:

—Coo tá coo ña sa násacu u ta a tává toho i ña —nacachi da.

<sup>23</sup>Tá nandihí nacata caa mé soldado Jesús ndica crúxu, já natiiin da jahmá a ta nandicahnda nu táhan ndícomí dā ña. Ta cotó ndéé a cūú á ña nacaváha níi ná ña jiní á ta janda sahá ta coó nacucu na ña. Ta natiiin da ña <sup>24</sup>ta já nacachi xihin táhan da já:

—Ná a jácucháhi toho í jáhma jan já ná coo níi yií va. Ña cuu caja í quéa cajíquí yo sahá ta ndá dā ná quee vaha, dā cán ndiquehe jáhma jan —nacachi xihin táhan da cán.

Nacaja da ña yóho já ná xinu coo nuú tūhun Ndióxi nacahyi sanahá tá nacachi a já: “Nandicahnda nu táhan mé ná jahmá i ta já nasaíquí na sahá cotó ndéé e ta dā naquee vaha cán nandiquehe da ña.” Quiáhva já nacahyi tūhun Ndióxi sanahá. Ta quiáhva já nacaja soldado cán xihin jáhma á.

<sup>25</sup>Ta jín mé crúxu nuú nacata caa na Jesús cán nasañdichi náná a xihín quíhví ná cán xihín María, ña cūú ñajíshí Cleofas xihín María, ña nuú Magdala. <sup>26</sup>Tá naxini Jesús ña cándichi náná a sahá crúxu ta tá naxini a cándichi yehe, dā naní Juan, dā xíca tuun xihin á, dā quíhví ndiváha ini mé á chí já nacachi a já xihin náná a:

—Dā jan cūú tátuhun jahyi ndó viti —nacachi Jesús.

<sup>27</sup>Tá nandihí já nacachi a já xihin mé dā xíca tuun xihin a cán:

—Candaa vaha ñá jáchí cūú ñá tátuhun nánún viti —nacachi Jesús.

Tá naxini joho da ña yóho já nandiquehe vaha da María cán ndá dā ná tátuhun náná da.

#### Tá naxihí Jesús (Mt. 27:45-56; Mr. 15:33-41; Lc. 23:44-49)

<sup>28</sup>Tá sa nayaha tóco ndihí ña yóho já sa xíní vaha Jesús ña sa naxinu coo tóco ndihí ña nacachi tūhun Ndióxi coo. Ta naxinu coo nuú ña nacahyi nuú tūhun Ndióxi sahá Jesús sanahá tá nacachi a já:

—Íchi ini i ticuífí.

<sup>29</sup>Mé cán nasañdichi in tjdohó nacutú jíní xihin vino iyá. Ta najándaxi na in tictoco xihin vino cán já nacató dā ña nuú in yító

naní hisopo ta já nachitivi na ña yati yúhu Jesús ña ná coho a dō. <sup>30</sup>Anda já naxihí Jesús mé vino iyá cán já nacachi a já:

—Sa nayaha tóco ndihí ña naxihí Jesús

Já nanditoo jíco á. Naxihí a.

#### Tá natuxú na in yító tátuhun pójá yicá ndícá Jesús

<sup>31</sup>Ta ndaja coo nasañan ná Israel cán naxicá na ñamani nu Pilato ña ná cahnda da chiuun ña ná cahnu dā lásá sahá dā tácaa ndica crúxu cán já ná quivi yaichi dā. Jáchí coó naxene na Israel cán ña ná tacaá ndii ndica crúxu inga quivi itaqan. Jáchí cacuu a quivi ndiquehe ndéé ná ta cacuu a in quivi yií ndívaha nu ná. <sup>32</sup>Sahá ña cán quéa naquee soldado nasañan dā já nasañan dā lásá sahá ndíví dā tácaa ndica crúxu jín Jesús cán. <sup>33</sup>Joo tá nacayati da nu Jesús ña cahnu dā lásá sahá, naxini da ña sa naxihí va mé á sahá ña cán quéa coó nasañan dā lásá sahá.

<sup>34</sup>Joo in táhan soldado cán natuxú dā in yító tátuhun pójá yicá ndícá a já nacana nií xihin ticuífí cán. <sup>35</sup>Ta yehe cūú u da ndícani ña yóho nu ndo ta naxini i ña xihin nuú i. Ta cūú á ña ndaa. Ta cándaa caxí inni i ña cahán i ña ndaa já ná candúsa ndó ña ndícani i nu ndo. <sup>36</sup>Jáchí tóco ndihí ña yóho nayaha já ná xinu coo nuú tūhun Ndióxi tá cächí a já: “Ni in tūhún toho lásá dā, a cahnu na”, já cächí tūhun Ndióxi. <sup>37</sup>Ta inga tucu cächí tūhun Ndióxi já: “Cuni tucu na dā, dā natuxú na pójá yicá ndícá”, já nacahyi na nuú tūhun Ndióxi sanahá.

#### Tá najánduxu na Jesús

(Mt. 27:57-61; Mr. 15:42-47; Lc. 23:50-56)

<sup>38</sup>Tá sa nayaha tóco ndihí ña yóho já naxinu coo in dā naní José, dā nuú Arimateo, nu Pilato. Ta naxicá dā ñamani nu Pilato ña ná ndiquehe da yiquí cuñu Jesús cañehe da cuhun dā. Mé José yóho cūú dā cuéntá Jesús joo coó nanaña tūhun da sahá jáchí yílhí dā na Israel. Ta ndaja coo nasañan Pilato ñamani nu dā ña ná ndiquehe da yiquí cuñu Jesús. Chí nasañan dā nandiquehe da ña. <sup>39</sup>Ta jári fin in dā naní Nicodemo ta níhe da tátuhun oco uxu kilo perfume, dó nacaváha xihin ña naní mirra ta xihin ña naní aloes. Mé Nicodemo yóho cūú dā dā nasañan nandituhún xihin Jesús tá nuú. <sup>40</sup>Ña cán quéa natiiin José xihin Nicodemo yiquí cuñu Jesús ta nachitiví na

ñā xihín in jáhmá vaha ñā nachindaxi da xihín mé perfume cán. Jáchí quiahva já íin costumbre nā Israel cája na tá jánduxu nā ndii. <sup>41</sup> Ta yati nuú nacata caa na Jesús cán nasahijin nu cáa cuahá yitó cuíhi. Ta tañu yító cán nasahijin in yávì ndíca cává nuú cuu chicaqan nā ndii. Mé cává cán nasacuu a ñā saá jáchí ni in ndii a náha chicaqan na ini ñā cán. <sup>42</sup> Ta cán nacchicáan da yiquí cuñu Jesús jáchí yati nasañin a. Ta númi dá jáchí sa nacativi quívì ndiquehe ndée nā Israel.

## 20

## Tá nanditacu tucu Jesús

(Mt. 28:1-10; Mr. 16:1-8; Lc. 24:1-12)

<sup>1</sup> Ta tá sa nayaha mé quívì ndiquehe ndée ná ta naha vaha chá quívì domingo tá cámáni queta cändii já nasañan María, ná ñuu Magdala nuú nacchicáan na yiquí cuñu Jesús cán. Já naxini ná ñā nacaxoo yuu cahnu nasañadai yuhu cává cán. <sup>2</sup> Anda já naxinu ñā nasañan ñá nuú íin Simón Pedro xihín inga dā naxica tuun xihín Jesús, dā quíhvì ndivaha ini mé á cán. Ta tá naxinu coo ñá nuú dā já nacachi ñá xihín dā:

—Natavá nā yiquí cuñu xitoho i ta yo xíni ndáiya nasaçu na ñā —nacachi ñá.

<sup>3</sup> Anda já naqueta Pedro xihín inga dā naxica tuun xihín Jesús cán ndáva da cuahan da nuú nasañacan Jesús. <sup>4</sup> In nuú xínu ndívì dā cuahan dā. Joo níhi chágá xínu dā inga cán a juú ga Pedro ñā cán quéra jihna ñúhú dā naxinu coo da nuú nandacan Jesús cán. <sup>5</sup> Anda já nacandayi da sángehé dā nuú nasañacan Jesús cán. Já naxini da ñúhú tictoto nasañiví a cán cuití va. Joo coó nandíhvi da jandá mé ini cává cán. <sup>6</sup> Anda já naxinu coo Simón Pedro ta nandíhvi da cán. Ta naxini da mé tictoto nasañiví yiquí cuñu Jesús cán. <sup>7</sup> Ta naxini da tictoto ñā nasañiví jini a nacaxoo jín ñā cán ta nanditiví vaha ñā. <sup>8</sup> Anda já nandíhvi ri dā inga cán, dā naxinu jihna ñúhú. Ta tá naxini da ñā coó yiquí cuñu Jesús ndacan já nacandusa da ñā nanditacu tucu a. <sup>9</sup> Jáchí coó nacandaan ini na cúu cuénta mé á ñā cachí tühun Ndióxi nu cachí a ñā nditacu tucu Jesús. <sup>10</sup> Tá nandíhvi já ndáca táhan ndívì dā naxica tuun xihín Jesús cán nandicó coo da vehe nuú nasañuu na.

Tá naxini María, ná ñuu Magdala Jesús  
(Mr. 16:9-11)

<sup>11</sup> Ta nani nayaha tóco ndihi ñā yóho, nandicó coo María mé nuú nasañacan yiquí cuñu Jesús. Sácu ñá íin ñá yuhu cává cán. Ta nani sácu ñá nacandayi ñá ndicoto nihni ñá ini cává cán. <sup>12</sup> Já naxini ná ivi tátó Ndióxi, ñá ndíxi jahmá yaa. Ndáa ndúu coo a nuú nasañin yiquí cuñu Jesús: in a nuú nasañin jini Jesús ta inga nuú nasañin sahá. <sup>13</sup> Anda já nandacäa tühun tátó Ndióxi cán María já nacachi a já xihín ñá:

—Ndá cuéntá quéa sácún —nacachi a.

Já nacachi ñá já xihín á:

—Sácu u jáchí naquehe na yiquí cuñu Jesús, xitoho i ta co xíni ndája nasaçu na ñā —nacachi ñá.

<sup>14</sup> Tá jácá nacachi uun ñá ñā yóho já nandicoto nihni ñá já naxini ñá in a cándichi a nu ñá já va joo coó nandicuni ñá ñá cúu á Jesús. <sup>15</sup> Anda já nandacäa tühun Jesús ñá já nacachi a já xihín ñá:

—Ndá cuéntá quéa sácún. Yo já ndín-ducún —nacachi a.

Ta nacahán María ñá mé dā cáhan xihín ñá cúu dā dā ndáá mé yító cuíhi cáá cán. Sahá ñā can quéra já nacachi ñá já:

—Tá nañatavú yiquí cuñu Jesús ñā nasañacan ini cává yóho, caxi tühun xihín i ndáiya nasaçún ñá já ná cuhun i ndiquehe e ñá —nacachi María.

<sup>16</sup> Anda já nacachi Jesús já xihín ñá:

—María.

Anda já nacava nuú ñá já nandicuni ñá Jesús ta nacahán ñá tühun hebreo xihín á já nacachi ñá já:

—Raboni —mé tühun yóho cúu cachí a maestro.

<sup>17</sup> Já nacachi Jesús já xihín ñá:

—A tíin tuún yehé. Jáchí a náha toho ndindita i cuhun i indívi nu íin Ndióxi, tátá i. Joo cuáhán caxi tühun xihín na cúu cuénta mí i ñá cuhun i nu íin Ndióxi, tátá i, mé a cúu tátá mé ndó viti. Cúu á Ndióxi nu mí i ta cúu ri a Ndióxi nu mé ndó —nacachi Jesús.

<sup>18</sup> Anda já ndáva María, ná ñuu Magdala nasañan ñá nandicani ñá nuú ná naxica tuun xihín Jesús cán ñá naxini ñá mé á. Ta nandicani ñá ñá nacachi Jesús xihín ñá.

Tá naxini ná naxica tuun xihín Jesús mé á  
(Mt. 28:16-20; Mr. 16:14-18; Lc. 24:36-49)

<sup>19</sup> Ta tá nacuaá mé quívì domingo cán já nanditútú tóco ndihi ná naxica tuun xihín Jesús cán. Ñúhu tuun na ini vehe ta nacchicají tuun ná yéhé jáchí yíhví na xínu

na Israel cán tiin ñahá na. Ta in cuití naxinu coo Jesús nu ná ta nandaca ndichi a mahñú ndaq nu ndiu ná cán. Já nacahan Ndióxi a xihín ná já nacachi a já:

—Ná coo vaha ini ndó —nacachi a.

<sup>20</sup> Ta tá nacachi a ña yóho já nájánaha ndáha á xihín yicá ndícá a nu ná ña ná candaia ini na ña jivi cíu mé á. Ta nacajii íní na tá naxini na a. <sup>21</sup> Tá nandihí já nacachi tucu Jesús já xihín ná:

—Ná coo vaha ini ndó. Tá quiahva nacaja Ndióxi, tátá i náchindahá a yehé ñuyiví yóho quiahva já chíndahá ri yehé va ndohó cuhun ndó caxi tuhun ndó xihín ñayivi sahá mí i —nacachi Jesús.

<sup>22</sup> Anda já nativi a nu ná já nacachi a já xihín ná:

—Ndiquehe ndó ínimá yii Ndióxi. <sup>23</sup> Ta tá ná caja cáhnu ini ndó sahá cuachi ñayivi, na cán cíu na sa nacaja cáhnu ini Ndióxi sahá. Ta tá ná a cája cáhnu ini ndó sahá cuachi, na cán cíu na coó nacaja cáhnu ini Ndióxi sahá —nacachi Jesús.

### Tá naxini xihín nuú Tomás Jesús

<sup>24</sup> In táhan dā naxica tuun xihín Jesús, dā naní Tomás, dā cáhan na cuáti xihín cán, coó toho da nasañi xihín ná cán tá naquixi Jesús nu ndiu na. <sup>25</sup> Tá nandihí já nacaxi tuhun na java cán xihín dá já nacachi na:

—Naxini nde Jesús, xitoho i —nacachi na.

Já nanducú ñehe Tomás tuhun nu ná já nacachi da já xihín ná:

—A cándusa toho i ña cáchí ndo janda quiahva ná cuni xihín nuú i ndáha Jesús ta já jáquihvi i nducu ndahá i ini yáví nuú naquihvi clavo nacaja na cán. Ta xíní ñuhú jáquihvi i nducu ndahá i ini yáví nacaán na yicá ndícá a cán. Anda jáví candusa i ndohó —nacachi da.

<sup>26</sup> Tá nayaha una quívi já nandique táhan tucu na naxica tuun xihín Jesús cán ini in vehe. Ta mé tañu já nasañi Tomás xihín ná. Ta quiahva já nasañi tuun tucu na yehé vehe nu ñuhú na cán. Anda já in cuití naxinu coo Jesús nu ná ta nandaca ndichi a mahñú na cán ta nacahan Ndióxi a xihín ná já nacachi a já xihín ná:

—Ná coo vaha ini ndó —nacachi a.

<sup>27</sup> Tá nandihí já nacachi a já xihín Tomás:

—Naha quívi jáquihvi nducú ndahún ini ndahá i ta candehé ini ndahá i nuú naquihvi clavo. Ta jáquihvi nducú ndahún yicá ndícá

i já ná cunún nuú najándicuhe na yehé. A cáhvi ivi joho inún jáchí xíní ñuhú candúsún yehé —nacachi Jesús.

<sup>28</sup> Anda já nacatontó Tomás já nacachi da já:

—Mé ndó cíu xitoho i ta cíu ndó Ndióxi ña cája cáhnu i —nacachi da.

<sup>29</sup> Anda já nacachi Jesús já xihín dá:

—Mé a ndaq cándusún yehé viti jáchí naxinu yehé. Joo cajii ini ñayivi, na cándusa yehé vatí coó i xíní na xihín nuú ná —nacachi Jesús.

### Cáhan Juan ndá sahá nacahyí da libro yóho

<sup>30</sup> Cuahá ndivaha java ga ña xituhún nacaja Jesús nuú na naxica tuun xihín a cán vatí co ná cahyi a nu libro yóho. <sup>31</sup> Joo ña yóho nacahyi a já ná candusa ndó ña cíu Jesús da náchindahá Ndióxi cacomí cuéntá sahá ñayivi, mé a cíu in túhún jini já jahyi Ndióxi. Ta sahá ña cández ini ndó mé a cuu catacu ndó anda ama cáa quívi.

## 21

Náha Jesús mé á nuú usa táhan na naxica tuun xihín a cán

<sup>1</sup> Tá sa nayaha ña yóho já nájánaha tucu Jesús mé á nuú na naxica tuun xihín á nani nasañduu na yati yuhú tañuhú naní Tiberias cán. Ta quiahva joho nasañiin a. <sup>2</sup> In tañu ndiu tútú Simón Pedro xihín Tomás, dā cáhan na cuáti xihín cán. Ta jári ndiu Natanael, dā ñuu Caná cuéntá Galilea cán xihín ndíví dā cíu jahyi Zebedeo cán. Ta nasañduu ri inga ivi ga táhan dā naxica tuun xihín Jesús. <sup>3</sup> Anda já nacahan Simón Pedro xihín tóco ndihí na cán já nacachi da já xihín ná:

—Cuhun i tavá i tiyacá —nacachi da.

—Cuhun ri ndehe va tavá nde tiyacá xuhun —nacachi na cán xihín dá.

Já nandihí ndihí na ini barco cuahan na tavá na tiyacá. Joo coó tiyacá natavá na mé ñuu cán. <sup>4</sup> Ta tá sa cuahan ndúcú tivi já nacanáha Jesús yuhú ticuquí cán. Joo na naxica tuun xihín a cán co xíní na ña cíu á Jesús. <sup>5</sup> Anda já nacayuhú Jesús ndáca tuhún á na já nacachi a já xihín ná:

—Á coó toho tiyacá natavá ndó, ñani —nacayuhú a.

—Coó mé rí ná tavá nde —nanducú ñehe na tuhun nu á.

<sup>6</sup> Anda já nacachi tucu Jesús já xihín ná:

—Jácana tucu ndó ñúnu ndó chí xoo cuáha barco jan já tavá ndó rí —nacachi a.

Anda já najávana na ñúnu ná cán xoo cuáha barco ta tá nandihi chí co ndéé na tavá ná ñúnu cán jáchi a juú quiahva náchutú ndaq ná xihín tiyacá. <sup>7</sup> Anda já nandicahan yehe, dà quíhví ndivaha ini mé a cán já nacachi i já xihín Pedro:

—Cúu á Jesús, xitoho í —nacachi i.

Tá naxini Joho Simón Pedro ná cúu a cán Jesús já nandicandixi da cotó dà jáchi coó toho cotó dà ndíxi da, nduu. Tá nandihi já ndáva da cuahán dà jitá dà ticuíf chí yuhú tañuhú cán. <sup>8</sup> Tá nandihi já naxinu coo java ga ná naxica tuun xihín Jesús cán xihín barco ná chí yuhú tañuhú já ñuhú na ñúnu náchutú xihín tiyacá cán nasaq ná janda yuhú. Jáchi tátuhun in ciento metro ná sandichi barco ná yuhú tañuhú cán tá natavá ná tiyacá. <sup>9</sup> Tá naxinu coo ná cán nu ñuhú já naxini na cayí ñuhú. Ta naxini na cánúu in tiyacá yáta rí nu ñuhú cán. Ta naxini na ná sa ín pan cuxu na viti. <sup>10</sup> Anda já nacachi Jesús já xihín ná:

—Taxi ndó java tiyacá, rí jácá natavá ndó jan —nacachi a.

<sup>11</sup> Anda já ndáva Simón Pedro náshán dà nandaa da jata barco cán já ñuhú da ñúnu, ná nachutú ndaa xihín tiyacá náhnu cán, naxinu dà janda yuhú. Ta náscuu rí in ciento iyi jico sahún uni. Ta vatí cuahá ndivaha cúu rí coó náhndá ñúnu nuú náshuhu rí cán. <sup>12</sup> Anda já nacachi Jesús já xihín ná:

—Naha ndó cajini ndó —nacachi a.

Ta ni in túhún ná cán coó náshán ndéé ini na ndaca tuhún na yo cúu mé á. Jáchi sa nacandaa cáxí ini na ná cúu á Jesús, xitoho na. <sup>13</sup> Tá nandihi já natiin Jesús pan cán já náshánnda java ná já náshán ná nu ná. Ta quiahva já nácaja ri a xihín tiyacá va, nandicahnda ri já náshánnda rí nu ná.

<sup>14</sup> Xihín ná yohó naxinu uni tañu násháha Jesús mé á nuú ná naxica tuun xihín á janda naní nánditacu tucu a.

#### Cáhan Jesús xihín Simón Pedro

<sup>15</sup> Tá nandihi naxijini na já nandaca tuhún Jesús Simón Pedro já nacachi a já xihín dà:

—Simón, dà cúu jahyi Jonás á quíhví ini chágún yehe a juú ga ná java yohó —nacachi a.

Já nacachi dà cán já:

—Mé ndó cúu ndó xitoho i ta sa xíni vaha ndó ná quíhví ini i ndohó —nacachi da.

Já nacachi Jesús já xihín dà:

—Xíni ñuhú canda vahún na cúu cuéntá mí i tá quiahva ndáá vaha pastó ndicachi ván janá dà —nacachi a.

<sup>16</sup> Anda já nacachi tucu Jesús já xihín dà:

—Simón, dà cúu jahyi Jonás, á quíhví inúne yehe —nacachi a.

Anda já nacachi da já xihín á:

—Mé ndó cúu ndó xitoho i ta cándaa vaha ini ndó ná quíhví ini i ndohó —nacachi da.

Já nacachi Jesús já xihín dà:

—Xíni ñuhú canda vahún na cúu cuéntá mí i tá quiahva ndáá vaha pastó ndicachi janá dà —nacachi a xihín dà.

<sup>17</sup> Anda já nandaca tuhún tucu a dà táchndá uni já nacachi a já xihín dà:

—Simón, dà cúu jahyi Jonás, á mé a ndaa quíhví inúne yehe —nacachi a.

Tá naxini mé Simón Pedro cán ná naxinu uni táchndá ndaca tuhún Jesús dà sahá ná yohó já nacacuéha ini da já nacachi da já xihín Jesús:

—Jesús, mé ndó xíni vaha ndó tóco ndihi ñaha. Mé ndó xíni vaha ndó ná quíhví ini i ndohó —nacachi da.

Já nacachi Jesús já xihín dà:

—Xíni ñuhú canda vahún na cúu cuéntá mí i tá quiahva ndáá vaha pastó ndicachi janá dà. <sup>18</sup> Jáchi mé a ndaq ná cahan i xuhún. Tá náscuún taa yúta chá já nandicandisún jáhmún ná cúnun ta já cuahún ndá nu cúní mún cuhún. Joo tá ná cayatún já jácaún ndáhun ta inga na jácandixi yohó jáhmún. Ta já tiin ndaa na yohó cuhún xihín ná nuú coo cúní mún cuhún —nacachi a.

<sup>19</sup> Xihín ná yohó cúní Jesús ndicani a nu Pedro cán ndá quiahva quivi da ná ná caja cáhuu da Ndióxi. Tá nandihi já nacachi Jesús já xihín dà:

—Xíni ñuhú candicún yehe —nacachi a.

#### Ndaca tuhún Pedro sahá Juan nu Jesús

<sup>20</sup> Nani xicá na cásahan ná xihín Jesús já nandicoto nihni Pedro chí jata dà já naxini da tácaa Juan vaxi da. Mé Juan yohó cúu dà dà quíhví ndivaha ini mé Jesús. Ta sa mé Juan yohó cúu yehe, dà náshán coo jún á tá naxijini na vicó pascua. Ta cúu yehe, dà nandaca tuhún mé á sahá ndá dà cúu dà jicó tuhún ñahá. <sup>21</sup> Tá naxini Pedro ndíco dà yohó jata ná já nandaca tuhún dà Jesús já nacachi da já xihín á:

—Ta ndaja coo Juan yóho, xitoho i. Ndaja quivi da —nacachi Pedro.

<sup>22</sup> Anda já nanducú ñehe Jesús tuhun nu dá já nacachi a já xihin dá:

—Tá cúní yehé ña ná catacu da janda quiahva ná xinu coo quíví ndicó coo iñuyíví yóho, co ndítahan toho ndíhi inún sahá. Ña ndítahan cajún quéa candicún yehé — nacachi a.

<sup>23</sup> Ta sahá ña nacachi Jesús ña yóho sahá ña cán quéa nandicuita nuu tuhun tañu tóco ndíhi na naxica tuun xihín Jesús cán. Ta cachí na sahá i ña a quíví toho i. Joo a juú toho ña yóho quéa cúní Jesús cachí a xihin ná. Ña nacachi Jesús quéa tá cúní mé á catacu u janda quiahva ná ndicó coo mé á, co ndítahan toho ndíhi ini Pedro sahá ña cán.

<sup>24</sup> Ta jivi mé da cáhan na saha cán cíu yehé, da cáhyí tóco ndíhi ña yóho. Ta tóco ndíhi na xímí na ña cíu á ña ndaa.

<sup>25</sup> Cuahá ndivqha nu ñaha nacaja chága Jesús. Tá ná cacu ini i cahyí i tá in tá in ña nacaja mé á, cája i cuéntá a quéta toho nuyíví yóho coo libro cahan saha ña nacaja mé á. Já ná coo.

## Tuhun vaha nacahyí Lucas sahá ña nacaja na apóstol

*Nasahan Jesús tuhun a quixi ínimä yii Ndióxi*

<sup>1</sup>Jihna sa nacahyí i in libro ña ná cando a nu ndohó, tá Teófilo. Mé libro cán cahán ndihí a sahá ña nacaja Jesús ta cahán ndihí a sahá ña najáñahá mé á tá nacásáhá cája chúun a <sup>2</sup>ta jandá tá nandaa cuahán indíví. Tá nasahíin a ñuyíví yóho ta cámaní cuuhan a indíví já nacaxí Jesús uxu ivi dataa cacuudá apóstol ña ná caja chúun na cuéntá mé á. Ta nacaja ínima yii Ndióxi ña ná cuu jánahá Jesús nuú na cán ña ndítahan nu ná caja na. <sup>3</sup>Ta tá sa naxijí Jesús ta nanditacu tucu a já naxica nuu a ñuyíví yóho tixi ivi jíco quiví. Ta náñahá mé á nuú ndihí na cuú apóstol já ná candaa ini na ña mé a ndaa nanditacu tucu a. Ta najáñahá nu ná ña cúní Ndióxi cacomí a cuéntá sahá ñayivi.

<sup>4</sup>Tá cámaní ndaa Jesús cuuhan a indíví já nasahíin a xihín na apóstol já nasahnda mé á chuun nu ná já cáchí a já xihín ná:

—Xíní ñúhú candati ndó ñuu Jerusalén yóho andá quiáhva xínu ínima yii Ndióxi cañuhu a ini ínima ndo. Jáchí nasahán tátá i tuhun a nu ndó ña quixi ínima yii mé á ndacaan ini ínima ndo ña cán quéa najáñahá i ndohó ña nacachi mé á. <sup>5</sup>Mé a ndaa najácandúta Juan ñayivi xihín ticuújoo tixi chá quiví jándicutú Ndióxi ndohó xihín ínima yii mé á —cáchí Jesús xihín ná.

*Tá nandaa Jesús cuahán indíví*

<sup>6</sup>Ta ndaja coo tá náñataca na cán xihín Jesús já nacásáhá ndáca tuhún na mé á já cáchí na já xihín a:

—Jesús, xitoho nde, á viti quéa quiáhva ndó ñamani nuú nde, na Israel cacomí nde cuéntá sahá mé nde já ná a cácomí ga gobierno ñuu Roma cuéntá sahá nde —nacachi na xihín á.

<sup>7</sup>Anda já nanducú ñehe Jesús tuhun nu ná já nacachi a já:

—Co ndítahan toho nu ndohó candaa ini ndó ndá quiví caja Ndióxi, tátá yo ña jan. Jáchí in túhún mé á cuití va quéa xíni a ndá quiví yaha ña sáhndá mé á coo. <sup>8</sup>Joo ndítahan nu ndó candati ndó yóho anda quiáhva ná quixi ínima yii Ndióxi cañuhu

a ini ndó. Já ná nduu ndeeé ini ndó ña ná cuu jánahá ndó nuú ñayivi sahá i. Anda já ndítahan nu mé ndó cahán ndó sahá i ñuu Jerusalén yóho xihín estado Judea xihín estado Samaria. Anda já quee ndó cuuhan ndó cuahá ñuu xicá níi cuú ñuyíví jánahá ndó nuú ñayivi cán sahá mí i —nacachi Jesús xihín ná.

<sup>9</sup>Tá nandhi nacahán Jesús ña yóho xihín ná ta nani sándezé caxí na cán nu Jesús ndítá na já nandaa cuahán indíví. Já naxínu in víco nacihajhví ñahá a chí coó naxini ga na mé á. <sup>10</sup>Ta nani ndítá na cán sándezé na nuú nandaa Jesús cuahán indíví já nandicoto nihni na ta sa ndítá ivi taa ndíxi jahmá yaa jíin ná. <sup>11</sup>Já nacachi da já xihín ná:

—Taa Galilea, ndávaha sándezé ndó indíví nuú nandaa Jesús cuahan. Jáchí tá quiáhva naxini ndó nandindita cuahán indíví quiáhva já cuni tucu ndó a ndicó coo tucu a ñuyíví yóho —nacachi ndíví da cán xihín ná.

*Nacaxí na Matías caja da chuun ña nacándezoo Judas*

<sup>12</sup>Tá nandhi nandaa Jesús cuahán indíví já náquee na apóstol yúcu nani yító olivo cán já nandicó coo na ñuu Jerusalén. Ta mé yúcu cán cándoo a tátuhun in kilómetro jatá ñuu Jerusalén. <sup>13</sup>Tá naxínu coo na ñuu Jerusalén cán já nandaa na vehe cánúu jíco jáchí mé vehe cán náñanduu tóo na. Tóco ndihí na náñanduu cán náñacuu Pedro xihín Jacobo xihín Juan xihín Andrés xihín Felipe xihín Tomás xihín Bartolomé xihín Mateo xihín Jacobo, da cuú jahyi Alfeo xihín Simón, da naxica cuéntá cananista xihín Judas, da cuú ñani Jacobo. <sup>14</sup>Níi tiempo náñataca ndishuxu in na yóho xihín ñani Jesús xihín María, náná Jesús xihín java ga naijhí caca tahví na nu Ndióxi.

<sup>15</sup>Ta ndaja coo in quiví náñataca tátuhun in ciento oco na cuú cuéntá Jesús. Já nacandichi Pedro mahnú na cán ta já nacachi da já xihín ná:

<sup>16</sup>—Candehé ndo, ñani i, na cuú cuéntá Jesús. Nasahíin tá íin nacachi ínima yii Ndióxi coo. Jáchí nacaja Ndióxi ña cán rey David ini tuhun mé á sahá Judas, da náñandaca na natiin Jesús ñéhe na a cuahán na vecaa. <sup>17</sup>Mé Judas yóho náñacuu da da naxica xihín yo ta nacaja chúun da cuéntá Jesús xihín yo. <sup>18</sup>Joo nacíco túhún da Jesús ta naquehe da jiuhún sahá ña núu nacaja da. Ta xihín jiuhún cán náxeen da in ñúhú. Ta

tá nəndihí já nəjándicava ndayi da mé dá ta nandata tixi da chí nəcana cuyu ndihí xiti da.<sup>19</sup> Tá nəñehé ñayivi ñuu Jerusalén tuhun ña sa naxihí Judas cán já nəchiniú na quivi mé ñuhú nəxeen da cán cananí a Acéldama. Mé tuhun cán cúní cachi a yójo nuú naxiña nii jáchi cán naxiña nii Judas tá naxihí da.<sup>20</sup> Jáchí já cachí in Salmo ndácaan ini libro yii Ndióxi tá nəcahan saha Judas já cachí a já:

Ná candoor ndáha vehe da,  
ta ni in ñayivi ná a cánduu ga ini a.  
Ta sa mé cán ndácaan inga tucu Salmo ta  
cachí a:

Inga tucu da ná ndicojo chuun nəsandojo  
da, cachí tuhun Ndióxi.

<sup>21</sup> Anda já nəcachi tucu Pedro já xihín ná:  
—Taňu mí yóho ndíu java ná nəxica nuu  
xihín yo tá nəxica í xihín Jesús, xitoho í  
nani nəsañjin a ñuyiví yóho.<sup>22</sup> Java ná yóho  
nəsanduu na xihín yo tá nəjácadúta Juan  
Jesús xihín ticuúi ta nəsanduu na xihín yo  
janda quiáhva nəndaa Jesús cuahan indíví.  
Ña cán quéa ndítahan nu yó caxí in da taňu  
ná yóho já ná caca da xihín yo caxí tuhun  
da nuú ñayivi ña nənditacu tucu Jesús —  
nəcachi Pedro xihín na cán.

<sup>23</sup> Sahá ña cán quéa nəcana iví da taňu  
ñayivi cán. Anda já nəsacu ini na caxi na  
in da taňu ndíví da. In da nəcana ná cán  
nəsananí José ta naní tucu da Barsabás ta  
inga tucu quivi dá nəsacuu Justo. Ta dá inga  
cán nəsananí Matías.<sup>24</sup> Anda já nəxica təhví  
ndihí na cán nu Ndióxi já nəcachi na já:

—Tátá Ndióxi, sa xíní ndó ndíu cahvi ini  
tóco ndihí ñayivi. Ña cán quéa caja ndó  
ñamani jánahá ndó nuú ndé ndá cùu dā  
sa nəcaxí ndó<sup>25</sup> cacuu apóstol ña ná caja da  
mé chuun ña nəjándacoo Judas. Mé Judas  
nəcaya da cuachi cahnu nu ndó ña cán quéa  
viti ín da nu ndítahan nu dá coo da —  
nəcachi na xihín Ndióxi.

<sup>26</sup> Anda já nəsajíquí ná ndá dā cuu quee  
vaha. Naquee vaha Matías chí nəndique  
táhan da xihín ná uxu in apóstol cuénta  
Jesús cán.

## 2

Tá nənuu ínima yii Ndióxi jatá ná cùu  
cuénta Jesús

<sup>1</sup> Tá naxiñu coo quivi coo víco Pente-  
costés já nənditacu ndihí ná cùu cuénta  
Jesús ndíu tútu ná ini in vehe.<sup>2</sup> In cuití  
nəxini joho na in a níhi nəquixi a chí indíví.

Tá quiahva níhi xícó tachi ndee quiáhva já  
níhi a nəquixi a. Ta já nəxini joho ndihí  
ná ndíu coo vehe cán ña.<sup>3</sup> Anda já nəxini  
na in ñaha ña cása tá quiáhva cása ñuhú ita.  
Anda já nənditahndá ña nəsandójó a jiní in  
in ná cán.<sup>4</sup> Ta nəchutú ndaqá íníma ndihí  
na cán xihín íníma yii Ndióxi. Chí nəcasáhá  
nəndicahan ná tuhun, ña coó nəsatiahva na  
jáchí já nəcaya íníma yii Ndióxi.

<sup>5</sup> Mé tiempo já nəsanduu java ná Israel,  
na caja cahnu Ndióxi ñuu Jerusalén cán.  
Mé ná Israel yóho nəquixi na ndijáa ñuu  
jatá ñuyiví.<sup>6</sup> Tá nəxini joho ná cán ña níhi  
xójo cùu cán já nəcasáhá ndítaca na. Joo tá  
naxiñu ná nu ndíu ná cùu cuénta Jesús cán  
já nəcatontó ná jáchí nəxini joho na cahán  
ná cùu cuénta Jesús cán mé tuhun cahán ná  
vatí co cùu ná ná ñuu na.<sup>7</sup> Chí nəcatontó  
ndivahna ná cán já nəcasáhá ndítuhún xihín  
táhan na já cachí ná já:

—Tóco ndihí ná cùu cuénta Jesús yóho  
cùu ná ná nəquixi estado Galilea.<sup>8</sup> Ndá  
cuénta quéa cahán ná tuhun cahán in in  
mí.<sup>9</sup> Jáchí sa jím sa jím ñuu nəquixi mí.  
Java í nəquixi nación Partia ta java í nəquixi  
nación Media ta java í nəquixi nación Elam  
ta java í nəquixi nación Mesopotamia ta  
java í nəquixi estado Judea ta java í nəquixi  
estado Capadocia ta java í nəquixi estado  
Ponto ta java í nəquixi estado Asia<sup>10</sup> ta java  
í nəquixi estado Frigia ta java í nəquixi es-  
tado Panfilia ta java í nəquixi nación Egipto  
ta java í nəquixi ñuu cuénta Africa, ña xícá  
chágá a júu ga ñuu Cirene. Ta ndíu java  
ñayivi nəquixi ñuu Roma yóho. Ta java ná  
cán cùu ná ná nəquixi chichi Israel ta java  
na co cùu ná ná nəquixi chichi Israel joo  
caja cahnu na Ndióxi, mé a caja cahnu mí.<sup>11</sup>  
Ta sa mé yóho ndíu java ñayivi nəquixi  
nación Creta xihín nación Arabia. Ta xíní  
joho ndihí cahán ná cùu cuénta Jesús yóho  
tuhun cahán in in mí. Ta cahán ná sahá  
ñaha xituhún caja Ndióxi xihín ná —cachí  
ndihí ná sándezé cán.

<sup>12</sup> Ta chí co xíní ná ndíu sándezé cán.  
Jáchí nəcatontó ndivahna ná janda ndáca  
tuhun táhan mé ná ndíu na já cachí ná já:

—Ndíu cúní cachi ña caja ná yóho.

<sup>13</sup> Joo java ná ndíu cán nəcasáhá sácu  
ndaa ñahá ná já cachí ná já:

—Na xíhi va cùu ná yóho.

Cahán ndojó Pedro nuú ñayivi

<sup>14</sup> Anda já nacandichi Pedro xihín ndíhxu in ga na apóstol cán já nacasáhá cáhan cóhó da xihín tóco ndihi na cán já cachí da já:

—Cuni joho vaha ndó ña cáhan i xihín ndó, ñayivi Israel, na estado Judea xihín ndihi ndó na tóho ndúu ñuu Jerusalén viti.

<sup>15</sup> Mé ndó cáhán ndo ña naxini tóco ndihi ñayivi ndúu yóho. Joo coúu na naxini jáchí jacá caa in naha va queá. <sup>16</sup> Ña caja na yóho quéa nacachi da naní Joel sahá tá nacahan da xihín ñayivi ña ndítahan coo. Mé da cán cuú da nacachi ña cachí Ndióxi coo já nacachi da já:

<sup>17</sup> Tá sá nacayati quívi ndihi sahá ñuyíví yóho já cachí Ndióxi já:  
“Chindahá i íníma yii mí i cañuhu a ini tóco ndihi ñayivi.

Ta tóco ndihi jahyi yií ndo xihín jahyi jíhlí ndo caxi tuhun na xihín ndó tuhun cahán i xihín ná.

Ta na tacú cuni ndímáhnú na ñaha ñaha i nu ná.

Ta na yatá quixi sani nu ná caja i.

<sup>18</sup> Ta mé tiempo já chindahá i íníma yii mí i ña ná cañuhu a ini na caja chún cuénta mí i, á cuú ná taa á cuú ná ñaha.

Ta caja i ña ná cahán na sahá i nu ñayivi.

<sup>19</sup> Ta cuahá ndivaha ña náhnu caja i indíví xihín ñuyíví ta cuni ñayivi ña.

Cuni na nii xihín ñihu cayí xihín ñihma i na ndindita tátuhun víco núhú.

<sup>20</sup> Ta canaá nu cандii ta ndicuáhá nii nu yoo.

Ña yóho cacuu ña yaha tá sá nacayati quívi xiu yehé, mé a cuú xitoho na caja vií i sahá ñayivi ñuyíví.

Mé quívi cán cacuu a in quívi cahnu ndi-vaha.

<sup>21</sup> Joo cacu ndaa íníma tóco ndihi na ná ndi-cáhan quívi i”, nacachi Ndióxi ini libro nacahíyí Joel sahá —nacachi Pedro.

<sup>22</sup> Anda já nacachi tucu Pedro já:

—Cuni joho vaha ndó tuhun cahán i xihín ndó, na Israel. Jáchí cahán i sahá Jesús, mé a naquixi ñuu Nazaret. Jáchí natahan ini Ndióxi xihín tóco ndihi ña nacaja mé Jesús. Ta naxini xihín nu ndó ña náhnu xihín ña xituhún nacaja mé a nu ndo xihín ndée násahan Ndióxi nu a. Ta sá cández vaha ini mé ndó ña yóho. <sup>23</sup> Joo tá natiin ndó Jesús já najáxiñu coo ndó ña násacu

ini Ndióxi coo sahá ndivaha. Ta mé ndó nandiquiahva ndó Jesús ndáhá taa quini. Ta nacaja ndó ña ná cata caa na Jesús ndica crúxu. <sup>24</sup> Joo najánditacu Ndióxi Jesús já ná a cóo a nu ndóho ini na sá naxihí jáchí ni in ñaha a cuú caja ña ná coo Jesucristo nu ndúu na sá naxihí. <sup>25</sup> Sanahá ndivaha nacahíyí rey David sahá Jesús já nacachi da já:

Xíni vaha i ña níti tiempo fín ndó xitoho i, xihín i,

ta fín ndó xoo cuáha i chíndeé ndó yehe sahá ña cán quéa co yíhví toho i.

<sup>26</sup> Sahá ña cán quéa nacajíi ndivaha ini i, ta nacahan vatá ndivaha i.

Jáchí vatí ná quivi i cacuu u ndii joo coo vaha ini i.

<sup>27</sup> Jáchí caja ndó ña ná nditacu tucu u já ná a cándqo nahá íníma i nu ndúu íníma ndii.

Ta ni a quiáhva toho ndó ñamani tahií yíquí cuñu i jáchí cuú u jahyi máni ndo.

<sup>28</sup> Najánahá ndó nu i ndaja caja i ña cúníndo.

Jáchutú ndaa ndó íníma i xihín ña cajíi ini i jáchí já fín va ndó xihín i, nacahíyí David sahá ndivaha —cachí Pedro xihín ña ndúu cán.

<sup>29</sup> Anda já nacachi tucu Pedro já xihín ná:

—Candehé ndo, ñani i na ndicani i nu ndo ña cúní cachi ña yóho. Sá cández caxi iní ña sahá David, da násacuu tásáhnu jíco yo. Ta najánduxu na dà ta fín yii va nu ñajánduxu na dà. <sup>30</sup> Nacachi David ña yóho jáchí násacuu da profeta. Jáchí mé Ndióxi quéa násahan tuhun a nu dà ta nacachi a xihín dà ña quixi Jesucristo chichi mé dà ta nacachi a ña cacomí mé Jesucristo cán cuénta sahá ñayivi Israel. <sup>31</sup> Sá nacandaa ini David ña caja Ndióxi chí nu sahá ña cán quéa nacachi da xihín ñayivi ña nditacu tucu Jesús tá nandihí quivi a. Ta nacaxi tuhun David nu ná ña a jándicoo toho Ndióxi íníma Jesús nu ndúu íníma ndii ta ni a quiáhva toho mé a ñamani tahií yíquí cuñu mé Jesús cán. <sup>32</sup> Ta viti cández iní ña naxini tuhun nacahíyí David jáchí naxini tóco ndihí ña najánditacu Ndióxi Jesús. <sup>33</sup> Ta najándindita cahnu ndivaha Ndióxi Jesús ta násacu a ña xoo cuáha mé a. Ta násahan Ndióxi íníma yii mé a nu Jesús jáchí ña yóho cuú tuhun násahan Ndióxi sahá. Ta tóco ndihi ña naxini ndó xihín nu ndo ta naxini

joño ndó yóho cíu á ña naquixi cuéntá Ndióxi.<sup>34</sup> Ta sa xíni yo ña co cáhan David saha mé dá jáchi a juú David cíu dà nandaa indíví, vaha. Sa mé David cíu dà dà nacachi tuhun yóho:

Nacachi Ndióxi xihín xitoho i:

“Naha xoo cuáha jíin i cacoún,

<sup>35</sup> janda quiáhva ná cacu u na cándají yohó tixi sahyn”, nacachi Ndióxi —já nacahi David sánahá.

<sup>36</sup> Anda já nacachi tucu Pedro já:

—Ña cán quéa cúní ña ná candaq ini tóco ndihi ndó ña cáhan i xihín ndó, na Israel. Mé Jesús, mé a nacata caa ndó ndica crúxu nandaja Ndióxi ña ná nduu a xitoho ñayivi. Ta nandaja Ndióxi ña ná nduu a ña nachindahá mé á cacomí cuénta sahá ñayivi —nacachi Pedro xihín na ndúu cán.

<sup>37</sup> Tá naxini joño na cán ña nacachi Pedro xihín ná ivi laá natáhví ini na já nacásahá ndáca tuhún na Pedro xihín java ga na apóstol cán já cachí na já xihín ná:

—Ndía ndítahan caja nde, ñani, na cíu cuéntá Jesús.

<sup>38</sup> Anda já nanducú ñehe Pedro tuhun nu ná já cachí da já xihín ná:

—Xíni ñuhú ndicó coo ini ndó ta jándicoo ndó cuachi caja ndó ta candútá ndó cuéntá Jesucristo já quéa ná caja cáhnu ini Ndióxi sahá cuachi ndó ta já ñehe táchví ndó quiáhva Ndióxi íníma yíi mé á nu ndo.

<sup>39</sup> Jáchí nasahán Ndióxi tuhun a caja ña jáchutú ndaa íníma ndó xihín íníma yíi mé á ta quiáhva já caja ri a xihín jáhyi ndó ta jári xihín na tóho, na ndúu xícá. Jáchí já caja mé á xihín ñayivi nacaxí mé á —nacachi Pedro xihín ná.

<sup>40</sup> Ta cuahá ndivaha java ga tuhun nacahan Pedro xihín ná ta já najácahan dà ná já nacachi da já xihín ná:

—Candeé ini ndó Jesús já ná jácacu a ndohó já ná a cíhun ndó indayá nuú cuhun ñayivi caja cuachi —nacachi Pedro xihín ná.

<sup>41</sup> Cuahá ñayivi nandiquehe vaha na tuhun nacahan Pedro ta nacandeé ini na Jesús. Ta mé quiví já nacandútá táchun uni mil ñayivi já nandihvi na íchi cuéntá Jesús. Ta nandique táhan na cán xihín java ga na cíu cuéntá Jesús.<sup>42</sup> Ta ndinuhu ini na jácua ha na ña jánahá na apóstol nu ná. Ta cándusa táhan tóco ndihi na ta ndítutú na xíca táchví na nuú Ndióxi. Ta níi tiempo sá

taca na ndicahnda java táhan na pan cuxu na.

Ña nacaja ñayivi tá nacásahá na ndíco na íchi cuéntá Jesús

<sup>43</sup> Mé tiempo já nasahan Ndióxi ñamaní nuú na apóstol cán ña ná cuu caja na cuahá ndivaha ñaha xitúhún xihín cuahá ña náhu ndivaha ta chí cátontó tóco ndihi ñayivi tá xíni na ña yóho.<sup>44</sup> Ta tóco ndihi na cíu cuéntá Jesús cán in nanduu ndihi na ta ndicahnda java ñaha nuú táhan na. <sup>45</sup> Ta jíco ña ñaha cómí na ta já ndicahnda na jíuhún na nuú na ndímaní ñaha nuú.<sup>46</sup> Ta ndijáá níi quiví ndítutú na caja cáhnu na Ndióxi veñuhu cáhnu ndácaan nuú Jerusalén cán. Ta tá ndíque táhan na vehe já ndicahnda java táhan na pan cuxu na ta cávatá ndivaha xihín táhan na caja na já. Ta ni in na co ndíñehe jíco mé.<sup>47</sup> Nacaja cáhnu na Ndióxi ta tóco ndihi ñayivi ndúu nuú Jerusalén ín vaha ini na xihín na cán. Ta nini quiví nacaja Ndióxi ña nandicuahá na cíu cuéntá Jesús, mé na jácacu ndaa Ndióxi íníma.

### 3

#### *Ndívaha in taa réncō caja Pedro*

<sup>1</sup> In quiví táchun caa uni sahini cuahán Pedro xihín Juan veñuhu cáhnu Jerusalén cán. Mé hora já tacá ñayivi cuahán na veñuhu caa táchví na nuú Ndióxi.<sup>2</sup> Ta mé yuyéhé ñuhu cán íin coo in dà naxihí tuchu saha. Ta janda tá nacacu da caja da já. Ta ndijáá níi quiví ñehe na dà cuahán da yuyéhé ñuhu cáhnu naní yéhé ñúchí. Ta cán íin coo da sáti da nuú ñayivi ndílvi ini veñuhu cán.<sup>3</sup> Ta tá naxini dà réncō cán cuahán quiíhvi Pedro xihín Juan ini veñuhu cán já nacata ñee da ndáha dà nu ná sáti da.

<sup>4</sup> Anda já nandicoto nihni Pedro xihín Juan nuú dà réncō cán já nacachi Pedro já xihín dà:

—Candehé nuú nde.

<sup>5</sup> Anda já nandehé caxí da cán nu ná jáchí cáhán dà quiáhva na jíuhún nu dà.

<sup>6</sup> Joo já nacachi Pedro xihín dà já:

—Coó toho jíuhún i quiáhva i nuun joo ña fin nuú i ña cán quiáhva i nuun. Ín ndivaha ndéé Jesucristo, mé á nuú Nazaret sahá ña cán quéa sáhndá i chuun nuun ña ná candichún cacún —nacachi Pedro xihín dà.

<sup>7</sup> Anda já natiin Pedro ndahá cuáha dà cán ta nandiñehe da dà já nacandichi da chí

*iví* laá nandihvi ndéé sahá dá já nanditacu tuchu sahá dá. <sup>8</sup> Anda já nacandita mé da nasañin rénco sahá cán já nacandichi da ta já nacasáhá dá xíca da. Cándita da cája cáhuu da Ndióxi nandihvi da xíhín ná ini veñúhu cán. <sup>9</sup> Ta tóco ndihí ñayivi ndúu cán naxini na cándita da cája cáhuu da Ndióxi. <sup>10</sup> Ta a juú quiahva nacatontó na ta nayihví na sahá ña naxini na cán. Jáchí nandicuni na da cán cíuú da dá násacuu rénco, da nasañin coo sáti yéhé ñúhu naní yéhé ñúchí cán.

*Cáhan ndojó Pedro nuú ñayivi ndúu yéhé ñúhu cáhuu cán*

<sup>11</sup> Mé da násacuu taa rénco cán natiin tuun da Pedro xíhín Juan ta chí co cíumi da janí ñahá dá. Ta tóco ndihí ñayivi nacatontó na xínu na cuahan na candehé na da rénco cán nu ndítia da yéhé ñúhu, ña naní yéhé Salomón. <sup>12</sup> Tá naxini Pedro nacasáhá tácá cuahá ñayivi nu íin da já nacasáhá cachí dá já xíhín ná:

—Cuni joho vaha ndó, ñayivi Israel. Cátontó ndiváha ndó sándehé ndó ndehe jáchí cáhán ndo ña nandaja vaha nde da yóho xíhín ndéé mé nde. Á tá coó ta cáhán ndo ña nandaja vaha nde da sahá ña ndicahán ndiváha nde Ndióxi. <sup>13</sup> Joo co íin toho a tá quiahva cáhán ndo. Jáchí mé Ndióxi, ña nacaja cáhuu Abraham xíhín Isaac xíhín Jacob, tásáhnu jíco yo nandaja vaha mé á dá yóho. Ta mé Ndióxi cán nacaja ña ná nduu cáhuu ndiváha Jesucristo, jahyi mé á. Joo mé ndó nandiquiahva ndó a ndahá na jutixia. Ta tá cíumi Pilato janí da Jesús já nasañi nuu ndó nu dá caja da ña. <sup>14</sup> Mé Jesús cíuú á ña yii ndiváha ta ndinuhu ña ndaa cuítí va cája. Joo mé ndó nacandají ndó a ta naxicá ndó nu Pilato ña ná janí dá in dä sáhní ndji. <sup>15</sup> Tá nandihí já nasahní ndó Jesús, mé a cíuú cája ña ná catacu ñayivi andá ama cása quivi. Ta vatí naxihí a násacuu a ndii joo najánditacu tucu Ndióxi mé á. Ta cándaa cáxí ini nde ña cáhan nde ña ndaa xíhín ndo. <sup>16</sup> Ta sa mé Jesús cíuú á ña cández ini nde. Ta sahá ña cández ini nde mé á sahá ña cán quéa nandiváha da cándezi nu ndó yóho. Ta xíni ndó da nandiváha yóho ta cándaa cáxí ini ndó nandihvi ndéé sahá dá sahá ña cándezi cáhuu ini nde Jesús.

<sup>17</sup> *'Candehé ndo, ñani i. Sa xíni vaha nde viti ña tá nasañin ndó Jesús co nacandaa*

ini ndó ndíá nacaja ndó. Ta ni na cíuú jefe ndo coó nacandaa ini na ndíá nacaja na.

<sup>18</sup> Joo xíhín ña yóho najáxínu coo Ndióxi tühun nasañan nu yó sañahá tá nacachi na profeta cuéntá Ndióxi ña ndítahan ndoho ini Jesucristo, mé a nacindahá Ndióxi cacomí cuéntá sahá ñayivi. <sup>19</sup> Sahá ña cán quéa xíni ñúhu jándacoo ndó cuachi cája ndó ta ndicó coo ini ndó nu Ndióxi já ná jándoo mé á cuachi nacaja ndó. Anda já caja Ndióxi ña ná ndiváha ini ndó. <sup>20</sup> Janda jihna nacaxi Ndióxi Jesucristo ná chindahá a ña ná quixi a ñuyíví yóho já ná cacomí a cuéntá sahá ñayivi. <sup>21</sup> Ta viti íin Jesucristo indíví ndáti a tandaa quiví caja Ndióxi ña nduu vií tóco ndihí ñaha. Já ndítahan coo jáchi sanahá ndiváha nacahán Ndióxi xíhín na profeta mé a sahá ña yóho ta mé ná nacaxi tühun na ña nuú ñayivi. <sup>22</sup> Ta ña yóho cíuú tühun nacahán Moisés nu tásáhnu jíco yo já nacachi da já xíhín ná: “Tañu mé ndó jan cana in profeta caja Ndióxi, xitoho í tá quiahva nacaja mé a xíhín mí i. Ta coto a quéhe níu ndó ni in tühún tühun cahan mé profeta jan xíhín ndo.” <sup>23</sup> Jáchí tóco ndihí ñayivi, na co cíumi candúsa tühun cahán mé profeta jan ndihí sahá ná ta a ñéhe táchí ga na coo na xíhín na ñuu Ndióxi”, nacachi Moisés sanahá —nacachi Pedro xíhín ná:

<sup>24</sup> Ta nacahán chágá Pedro xíhín ná já cachí dá já xíhín ná:

—Tóco ndihí na profeta nacahán na sahá ña yáha tiempo viti. Ta profeta Samuel cíuú dá nacasáhá cáhan sahá ña yóho. Ta tóco ndihí java ga na profeta naquixi tá nu ndihí nacahán na cán sahá tiempo viti.

<sup>25</sup> Nacindahá Ndióxi na profeta sanahá ña ná caxi tühun na xíhín yo ña sáhan Ndióxi tühun a nu yó, na Israel. Nacaja vaha mé a sahá yo tá nacachi a já xíhín Abraham, dá násacuu tásáhnu jíco yo: “Xíhín ña caja na quixi chichún chí nuu já caja cuahá ndiváha i ñamani xíhín tóco ndihí ñayivi ndúu ndijáá ñuyíví”, nacachi a. <sup>26</sup> Tá nacindacu Ndióxi Jesucristo, jahyi mé á jihna ñúhu ga nu mé ndó, na Israel nacindahá a ña já ná caja yii á ndohó já ná jándicoo ndó cuachi caja ndó —nacachi Pedro.

<sup>1</sup> Ta janda cahán chá va Pedro xihín Juan nuú ñayivi cán já naxinu java dà cúu jutu xihín dà sáhndá chuun nu policia veñuhu cán. Ta tañu ná yóho naxinu ri ná saduceo.

<sup>2</sup> Xójo ndiváha ini na jáchí jánahá Pedro xihín Juan nuú ñayivi ná sa nanditacu tucu Jesucristo. Ta xihín ná yóho náhá ná vaxi quivi nditacu tucu ndii. <sup>3</sup> Sahá ná cán quéa natiin ná cán Pedro xihín Juan ta nataán ná da vecaa. Ta cán nacandoo da janda inga quivi itaq náchí sa nacuaá va. <sup>4</sup> Joo cuhá ndiváha ñayivi nacandusa tuhun nacahán Pedro ta xihín ná yóho nandicuahá chágá ná cúu cuénta Jesús. Jáchí na nacandusa cán násacuu na tátuhun uhun mil dataa.

<sup>5</sup> Ta ndaja coo ná cúu sacuahá nuú ñayivi Israel cán xihín ná sacuahá veñuhu xihín ná jánahá ley Moisés nandique táhan ndihi na inga quivi itaq. <sup>6</sup> Ta tañu ná cán ndácaan ri dà naní Anás, dà cúu sacuahá nuú jutu. Ta tañu ná cán nasañadacaan ri Caifás xihín Juan xihín Alejandro xihín tóco ndihi ná cúu na vehe na sacuahá nuú jutu cán. <sup>7</sup> Anda já natavá ná Pedro xihín Juan vecaa. Ta ñéhe na dà cuahán ná nuú nataca ná cán ta nasañi ndichi na dà mahñú ná nataca cán ta já nandaca tuhún ná dà já cachí ná já xihín dá:

—Ndaja nacaja ndó nandaja vaha ndó dà nasaquíhví sahá cán. Yo já násahan ndée nu ndó ná cúu cája ndó ná yóho —cachí ná ndáca tuhún ñahá ná.

<sup>8</sup> Ta nacaja Ndióxi ná ná ndicutú ndaa ínima Pedro xihín ínima yii Ndióxi ná cán quéa nacásahá dà ndúcú ñehe dà tuhun nu ná já cachí dà já xihín ná:

—Cuni joho vaha ndó, ná sacuahá nuú xihín ná sacuahá veñuhu Israel. <sup>9</sup> Nandaca tuhún ndó ndéhe ndaja nacaja ndé nandaja vaha nde dà nasaquíhví sahá cán. <sup>10</sup> Cuni joho ndó ná ndicani nde sahá ná yóho nu ndo ta já ná cuu canda ri ini tóco ndihi ñayivi Israel ná mé dataa, dà cándichi nu ndo yóho nandiváha dà xihín ndée Jesucristo, ná nuú Nazaret. Mé a cán nacata caa mé ndó ndica crúxu cán ta tá nandili já nayánditacu ñahá Ndióxi. <sup>11</sup> Ta mé Jesús yóho cúu á ná cahán tuhun Ndióxi sahá, ná cúu á tátuhun yuu ndúhu, ná nacandají na cábaha vehe. Ta mé ndó cúu ndó tátuhun ná cábaha vehe cán, ná nacandají Jesús. Joo viti naxinu a cúu á tátuhun yuu ná ín chágá sahá nacaja Ndióxi. <sup>12</sup> Jáchí ni in tátuhun toho ñayivi ndúu ñuyíví a cúu jácacu mí ná a

cuhún yó indayá. In túhún Jesucristo quéa náchindahá Ndióxi nu yo já ná cazu ndaa ínima yo —nacachi Pedro xihín ná.

<sup>13</sup> Tá naxini ná sacuahá cán ná co yíhví Pedro ni Juan ndíta da cahán dà xihín ná já nacatontó ná jáchí sa xíni ná ná coó tiahva da tutu. Ta naxini ná ná cúu dà dà ndahví, dà naxica xihín Jesús. <sup>14</sup> Ta ni co ñéhe ínì ná sacuahá cán cachí na xihín Pedro ná cúu dà dà tuhún jáchí sa nuu táhyí ná ja va cándichi dà nandiváha sahá cán. <sup>15</sup> Anda já natavá tóó na dà cán já nacásahá ndítuhún xihín táhan na. <sup>16</sup> Já cachí ná já:

—Ndía caja í xihín ndíví dà yóho viti jáchí sa nacandaa ini ndihi ñayivi nuú Jerusalén ná xituhún nacaja da. Ta ni mí, a cúu cachí ná cúu á ná tuhún. <sup>17</sup> Joo cóho jáyihví yó ná ná a cahán chágá ná sahá Jesús nuú ni in tátuhún toho ga ñayivi. Jáchí co cúni yo ná ná ndicuña nuú tuhun sahá Jesús —cachí ná ndítuhún xihín táhan na.

<sup>18</sup> Anda já nacana tucu na Pedro xihín Juan ta nasañhda na chuun nu ná ná a jánahá ga ná sahá Jesús ta ná ná a cahán ga ná quivi Jesús. <sup>19</sup> Anda já nanducú ñehe Pedro xihín Juan tuhun nu ná já cachí dà já xihín ná:

—Cahví vaha ini ndó, ná sacuahá. Á cahán ndó ná vaha chágá caja nde ná sáhndá ndóhó á ná sáhndá Ndióxi nuú nde caja nde. <sup>20</sup> Jáchí a cúu jándacoo nde cahán nde sahá ná naxini nde xihín sahá ná naxini joho nde —cachí dà xihín ná sacuahá cán.

<sup>21</sup> Anda já nacahán cuehé na sacuahá cán xihín dà ná ná a jánahá chágá dà sahá Jesús. Joo tóco ndihi ñayivi caja cahnu na Ndióxi sahá ná nacaja dà cán. Ná cán quéa najaní ñahá ná jáchí coó ña ñehe ínì ná ndá quiahva caja xíxi na xihín dá. <sup>22</sup> Ta mé dà nandiváha cán naxinu chágá dà nuú ivi jíco cuia tá nandiváha sahá dá.

Xíca tähví ng cúu cuénta Jesús nu Ndióxi

<sup>23</sup> Ta tá sa najaní Pedro xihín Juan já náquee dà cuahán dà nuú nasañduu java ga ná cúu cuénta Jesús cán. Ta já nandicaní na nuú ná cán ná nacahán ná sacuahá nuú jutu xihín ná sacuahá veñuhu cán xihín ná. <sup>24</sup> Tá naxini joho java ga ná cúu cuénta Jesús cán ná ndicani da nu ná já nacásahá tóco ndihi na xíca tähví ná nu Ndióxi já cachí ná já:

—Tátá Ndióxi. Mé ndó cúu Ndióxi ná nacavaha indív xihín ñuyíví xihín tañuhú xihín tóco ndihi ñaha. <sup>25</sup> Sañahá ndiváha tá

najándicutú ndaa ndó ínimá David, tásáhuu jíco nde xihín ínimá yii mé ndó já nacachi ndó já xihín dá ta já nacayí dä:

Ndá cuéntá quéa ndívaa nähá ñayivi ndúu ñuyíví ta ndinuhu ña núu cähvi ini na caja na.

<sup>26</sup> Tóco ndihí da cómí cuéntá sahá ñayivi ndúu ñuyíví xihín da sáhndá chuun nuú ñuu nandique táhan na cani táhan na xihín Ndióxi.

Ta cání táhan na xihín mé a nacaxi Ndióxi chindahá a cacomí cuéntá sahá ñayivi, nacachi ndó ñasahá.

<sup>27</sup> Ta mé a ndaa quéa yóho jáchí ini ñuu yóho najátaca táhan Herodes xihín Poncio Pilato xihín na tóho xihín na Israel viti. Najátaca táhan na caja núu na xihín Jesús, da cùu jahyi yii mé ndó, mé a nacaxi ndó.

<sup>28</sup> Joo xihín ña nacaja na yóho naxiñu coo nuú ña ñasacu ini mé ndó coo jandá jihna ndivaha jáchí cuu caja ndó tóco ndihí ña cúní ndó caja ndó. <sup>29</sup> Ta viti candehé ndo, tátá Ndióxi ndá quiahva cúní na caja xíxi na xihín nde. Ta quiahva ndó ñamani ná candee ini nde ndohó já ná a yihví nde cahan nde tuhun vaha sahá mé ndó xihín ndá nuú ñayivi ñasacu jáchí mé nde cùu nde na cája chüun nu ndo. <sup>30</sup> Ta xíca tähví nde nu ndo ña ná cuu ndaja vaha nde na quíhvi xihín ndeé mé ndó. Ta ná caja ndó ñamani ña ná caja cuahá nde ñaha xitúhún xihín cuahá ña náhnu ná cuni ñayivi ña xihín ndeé Jesucristo, jahyi yii mé ndó caja nde tóco ndihí ña yóho —cáchí na xíca tähví na nu Ndióxi.

<sup>31</sup> Tá nandihí naxica tähví na nu Ndióxi já naquiji nuu vehe nu ndúu tútú na cán. Ta já nandicutú ndaa ínimá ndihí na cán xihín ínimá yii Ndióxi ta nandindeé ini na cahán na tuhun Ndióxi nuú ñayivi.

Sáhndá java táhan na cùu cuéntá Jesús ñaha cómí na

<sup>32</sup> Cuahá ndivaha ñasacuu na cùu cuéntá Jesús cán joo chí in jiní ndihí na. Ta ní in túhún na co cájihndá ñaha nu táhan jáchí cáchí na: “Ñaha tóco ndihí quéa.” <sup>33</sup> Xihín ndeé sáhan Ndióxi nu ná cáxi tuhun na apóstol ña nanditacu tucu Jesús. Ta nacaja Ndióxi cuahá ndivaha ñamani xihín tóco ndihí na cùu cuéntá Jesús cán. <sup>34</sup> Ta ní in na coo nandimaní ñaha nuú jáchí na íin ñaha nuu tátuhun vehe á ñúhu najicó na ña ta ñéhe na mé jiuhún cán <sup>35</sup> ta sáhan na ña

nuú na apóstol já ná ndicahnda mé ná ña nuú in in na xíní ñúhu a. <sup>36</sup> Já nacaja in dàtaa naní José, da naquixi chichi Leví. Ta cùu dá da nacacu in ísla naní Chipre. Mé da yóho nachinúu na apóstol quiví dá naní da Bernabé ta mé tuhun yóho cúní cachi a da sáhan tuhun ndeé ini ñayivi. <sup>37</sup> Ta mé da naní Bernabé yóho najicó da ñúhu dá ta já ñasahan da mé jiuhún da cán nuú na apóstol.

## 5

Cája Ananías xihín Safira cuachi ny Ndióxi

<sup>1</sup> Joo mé tañu já in da naní Ananías xihín Safira, ñajíhí da najicó na in ñundáhyi ná.

<sup>2</sup> Joo coó nandiquighva ndihí da jiuhún ña nacayahi ñúhu cán nuú na apóstol. Ta nacachi da xihín ná ña cán cùu ndihí va ña ñaquehe da sahá ñúhu. Joo najándique táhan tuhun da xihín ñajíhí da ña ná candeo chá jiuhún cán nu ná. <sup>3</sup> Ta tá naxiñu coo Ananías ndiquighva da jiuhún cán nu Pedro já nacachi Pedro já xihín dá:

—Ndá cuéntá quéa ñasahyn ñamani nu tiñahá sacuahá nandihvi rí ínimun, Ananías. Ta ñasacu inún jándahvún ínimá yii Ndióxi ta já ñaquehún táhan jiuhún nachahvi na sahá ñúhu jan. <sup>4</sup> Ñaha mé vún ñasacuu ñúhu jan, nduu. Ta tá najicún ña, ñaha mé vún cùu ri jiuhún jan va. Ñacahvi inún cajún ña ná yóho ta xihín ña ñacajún yóho a juú nu mé nde cuití va ñacahún ña tuhun joo ñacahún ña tuhun nu Ndióxi —nacachi Pedro xihín dá.

<sup>5</sup> Tá naxini joho Ananías ña nacachi Pedro xihín dá ivi láá nandicava da naxihi da sahá cuachi ñacaja da nu Ndióxi. Ta tóco ndihí na ñacandaa ini sahá ña nayaha yóho nayihví ndivaha na. <sup>6</sup> Anda já naxiñu java da tacú já ñachitíví ña ndii cán já ñéhe na a cuahán na jánduxu na.

<sup>7</sup> Ta tá sa nayaha tátuhun uni hora já naquihvi ñajíhí Ananías nu ndácaan Pedro cán. Joo ni co xíní ña ña nandoho yii ña.

<sup>8</sup> Anda já nandaca tuhún Pedro ña já cachí da já xihín ña:

—Á mé a ndaa najicó ndó ñúhu ndo ta nachahvi na tá quiahva ñacachi yíun xihín i sahá —nacachi Pedro.

Anda já nanducú ñehe ña cán tuhun nu dá já cachí ña já xihín dá:

—Ajan, quiahva já najicó nde ña.

<sup>9</sup> Anda já ñacachi Pedro já xihín ña:

—Mé ndó najándique táhan ndó tuhun ndó coto ndojó ndó íníma yíi Ndióxi, Can-dehé. Jatá vehe jan vaxi na nasañan najánduxu yíun. Ta viti cañehe ri na yohó va cuhun na jánduxu na —nacachi Pedro xihín ña.

<sup>10</sup> Tá nacachi Pedro já ivi laá nandicava ñá sahá dá naxihí ña sahá cuachi nacaja ñá. Tá naxinu coo dà tacú, dà nasañan najánduxu yíi ñá cán já naxini na cánduhu ri mé va ñá naxihí ña. Anda já natavá na ña ta najánduxu na ña in xoo mé nuú najánduxu na yíi ña cán. <sup>11</sup> Ta tóco ndihi na cúu cuénta Jesús cán xihín tóco ndihi java ga na tá nacandaq ini na sahá ña nayaha yóho nayihví ndivahna.

Sáhan Ndióxi ndéé nuú na apóstol já ná caja na cuughá ñgha xitúhún

<sup>12</sup> Ta nacaja Ndióxi ña ná cuu caja na apóstol cán cuahá ñgha xitúhún xihín cuahá ña náhnu tañu ñayivi cán. Ta tóco ndihi na cúu cuénta Jesús nasañataca na yéhé ñuhu cáhnu naní yéhé Salomón. <sup>13</sup> Ta java ga ñayivi, na co ndíco íchi cuénta Jesús cán yíhví na catáhan na xihín na cúu cuénta Jesús yóho. Joo ndijáá java ga ñayivi cán fin toní ñuhú na xihín na apóstol cán. <sup>14</sup> Ta cuahá ndivahna ñayivi nacásáhá cándusa na Ndióxi, taa viti najíhí viti. <sup>15</sup> Ta sahá ña náhnu caja na apóstol yóho natavá na ña quíhvi jatá véhe ta nacinduu na ña nuú xito á nu yíví mé nuú yaha Pedro cán. Já quéa tá na yaha da vatí candahví cuití dà ná cani ndaa jatá java na cán ña ná ndivahna. <sup>16</sup> Ta cuahá ñayivi ndúu java ñuu válí ndúu yati cán ñehe na ña quíhvi xihín na ñuhú íníma quíni ini vaxi na ñuu Jerusalén ta cán nandivahna ndihi na.

#### Jándoho na ini na apóstol

<sup>17</sup> Anda já dà cúu sacuahá nuú jutu cán xihín na cúu cuénta Saduceo cán nacásáhá cähiví ndivahna ini na xihín na apóstol.

<sup>18</sup> Sahá ña cán quéa natiin na ña apóstol cán ta nataán na ña vecaa. <sup>19</sup> Joo ñuu naxinu coo in tátó Ndióxi ta nasañá a yéhé caja cán ta natavá a na ta já nacachi a já xihín ná:

<sup>20</sup> —Cuáhán ndó veñuhu cáhnu ta ndicani ndó nuú ñayivi sahá tóco ndihi ña cája Ndióxi, mé a ndifjama ñayivi ná ndihvi na íchi cuénta mé á —nacachi a xihín ná.

<sup>21</sup> Ña cán quéa tá natívi inga quiví itaŋan já nandihvi na apóstol veñuhu cáhnu cán ta nacásáhá na jánahá na nuú ñayivi cán.

Joo dà cúu sacuahá nuú jutu cán xihín tóco ndihi na sacuahá cómí cuénta sahá nación Israel cán nasañhnda na chuun nuú policia cán ña ná cuhun na tavá ná na apóstol ñuhú vecaa cán ná quixi na nuú na sacuahá cán. <sup>22</sup> Joo tá naxinu coo na cúu policia vecaa cán coó nandihéhe toho ñahá na. Ta já nandicó coo na caxi tuhun na xihín na sacuahá cán. <sup>23</sup> Já cachí na já:

—Tá naxinu nde yéhé caa já naxini nde ndájí tuu a ta ndita soldado ndáá vaha da ña. Joo tá nandihvi nde ini vecaa sándezhe nde coo na apóstol cán ná ndihéhe nde.

<sup>24</sup> Tá naxini joho na sacuahá nuú jutu xihín dà cúu sacuahá nuú policia veñuhu xihín java ga na sacuahá veñuhu cán ña yóho já nacásáhá ndáca tuhún táhan na sahá ña ndítahan quixi nuú ná chí nuú sahá ña caja na apóstol yóho.

<sup>25</sup> Mé hora já naxinu coo in dataa ta cachí da já xihín ná:

—Na apóstol nataán ndó vecaa cuni cán, ndita na jatá veñuhu jánaha na ñayivi —nacachi dà cán xihín ná.

<sup>26</sup> Anda já nasañan dà cúu sacuahá nuú policia xihín java ga policia já natiin tucu da na apóstol nasañehé da na nuú na sacuahá veñuhu cán. Joo coó nacaja xixi na xihín ná jachí ñayihví na ndicuuta ñayivi cuahá cán cani na na xihín yuu. <sup>27</sup> Ta tá naxinu coo na xihín na apóstol nu ndúu na sacuahá veñuhu cán já nasañu ndichí na na nuú ná. Anda já nacachi dà cúu sacuahá nuú jutu cán já xihín ná:

<sup>28</sup> —Mé nde nasañhnda nde chuun nu ndó ña ná a jánaha chágá ndó sahá Jesús jan. Joo mé ndó sa najándicutú ndó Jerusalén xihín ña jánaha ndó jan. Ta cuni ndó jácojo ndó cuachi jatá nde ña nasañí nde Jesús jan —cachí dà.

<sup>29</sup> Anda já nanducú ñehe Pedro xihín java ga na apóstol cán tuhun nu ná já cachí na já xihín ná:

—Ndítahan nuú nde caja jihna ñuhú ga nde ña sáhndá Ndióxi nuú nde, a juú ga ña sáhndá ñayivi nuú nde caja nde. Sahá ña cán quéa coó nacaja nde ña nacachi ndó xihín nde. <sup>30</sup> Ta mé Ndióxi nacaja cáhnu tásáhnu jíco yo sanahá nacaja ña ná nditacu Jesús, mé a nasañí ndo tá nacata caa ndó a ndica crúxu. <sup>31</sup> Joo nandihéhe jíco Ndióxi Jesús ta nasañu a ña xoo cuáha mé á ta nacaja ña ná nduu Jesús ña cacomí cuénta sahá ñayivi Israel ta jácacu a na já ná a

cúhun ná indayá. Ta tá ná ndicó coo ini na já caja cáhnu ini Ndióxi sahá cuachi cája na.<sup>32</sup> Ta naxini xihín nuú nde tóco ndihi ná yóho ta cáhan nde sahá ta quiáhva já cáhan ímima yíi Ndióxi sahá ná yóho. Ta chindahá Ndióxi ímima yíi mé á cañuhu a ini na cája ná cúní mé á —cáchí na apóstol xihín na cán.

<sup>33</sup> Tá naxini joho na sacuahá cán ná nacachi na apóstol já iyi laá naxijo ndivaha ini na xihín ná chí cúní na cahní níahá ná.<sup>34</sup> Joo ndaja coo ín tañu na cán in da sacuahá cíu fariseo naní Gamaliel, dà fín toní níuhú ñayivi xihín. Ta cíu dá dà jánahá ley Moisés nu ná. Nacandichi da tañu na sacuahá cán já nasahinda da chuun ná ná tavá xóo na na apóstol cán jata véhe.<sup>35</sup> Anda já nacachi da já xihín na sacuahá cán:

—Candehé ndo, nataa Israel. Cuénta coo ndó a juú caja ndaja nacuu ndó xihín na apóstol yóho.<sup>36</sup> Xíní níuhú ndicuhun ini ndó ná sanahá nandindita in dà naní Teudas ta nacachi da xihín ñayivi ná cíu dá in dà fín cuahá saha. Ta nasandíco tátuhun comí cierto taa jata dà joo nasahní na da ta tá naxili da já nandicuita nuu tóco ndihi ñayivi naxixa jatá dà cán ta xihín ná yóho nanaá sahá ndihi ná nacaja da.<sup>37</sup> Tá nandihí já nandindita inga tucu dà naní Judas, dà naquixi estado Galilea mé tiempo cándahví ñayivi níuu. Ta cuahá ndivaha ñayivi nandíco jatá dà cán joo nasahní ri na dà cán va ta tóco ndihi na nasandíco jata dà nandicuita nuu ndihi na.<sup>38</sup> Sahá ná cán quéa jácahan i ndohó viti ná a quíhvi ndáhá ndó na apóstol yóho. A quíhvi nuu ndó xihín ná cája na jáchi tá jiní mé va na naquixi ná cája na já quéa ndihi va sahá ná cája na yóho.<sup>39</sup> Joo tá Ndióxi nachindahá na caja na ná cája na yóho já quéa a cíu toho caja ndó jándihí ndó sahá ná cája na. Cuénta coo ndó jáchi tiahva náa xihín Ndióxi cani táchan ndó —cáchí Gamaliel xihín na sacuahá cán.

<sup>40</sup> Tóco ndihi na sacuahá naxini joho nuú nacahan dà cán, natahan ini na xihín ná nacahan dà. Anda já nacana na na apóstol ta já nacani na ná xihín churú. Ta nacachi na xihín ná ná a cáhan ga na sahá Jesús nuú ñayivi. Anda já najaní níahá ná.<sup>41</sup> Ta cájii ndivaha ini na apóstol cán naqueta na nu níuhú na sacuahá cán jáchi násahán Ndióxi namaní nu ná ndoho ini na sahá Jesús.<sup>42</sup> Ta ndijáá níi quívì ini veñuhu cáhnu

xihín ini vehe ñayivi cáhan na ta jánahá na sahá Jesucristo.

## 6

Cáxi na usa dà cacuu diácono, dà chíndeé na apóstol

<sup>1</sup> Ta mé tiempo cán ndicuhá ndivaha ná cíu cuénta Jesús. Ta ndaja coo na cáhan tühun griego cán nacásahá cáhan cuachi ná nuú ná Israel. Mé na cáhan tühun griego yóho cáchí na ná co ndítahndá in nuú níahá cája na Israel tá ndítahndá ná cuxu na cuáan in in quívì. <sup>2</sup> Anda já nandaja tútú ndílhuxu ivi na apóstol cán tóco ndihi na cíu cuénta Jesús já nacásahá cáchí na já xihín ná:

—Ña ndítahan nu mé nde, na apóstol quéa caxi tühun nde tühun Ndióxi nuú ñayivi. Sahá ná cán quéa co yáchí nde ndícahndá nde ná cuxu ñayivi.<sup>3</sup> Sahá ná cán quéa xíní níuhú ndinducú mé ndó usa taa tañu ndó já ná caja na chuun yóho. Joo xíní níuhú cacuu na ná nandicutú ndaa ímima xihín ímima yíi Ndióxi já ná cuu quiáhva ndó chuun yóho nu ná.<sup>4</sup> Ta ná caja mé nde quéa ndinuhu ini nde caca tähví nde nu Ndióxi ta jánahá nde tühun mé á nuú ñayivi —nacachi na apóstol xihín na cíu cuénta Jesús cán.

<sup>5</sup> Ta tóco ndihi na natahan ini na xihín ná nacachi na apóstol. Sahá ná cán quéa nacaxi na dà naní Esteban. Mé Esteban yóho cíu dá dà cándéé cáhnu ini Ndióxi. Ta cíu dá dà nandicutú ndaa ímima xihín ímima yíi Ndióxi. Ta nacaxi na dà naní Felipe xihín Prócoro xihín Nicánor xihín Timón xihín Parmenas xihín Nicolás, dà naquixi níuu Antioquia. Mé Nicolás yóho nacásahá cándusa da tá quiáhva cándusa na Israel, nduu joo nandiquehe da íchi cuénta Jesús.<sup>6</sup> Tá nandihí já ñéhe na cíu cuénta Jesús cán ndílhusa na naxinu coo na nu ndílhusa na apóstol cán. Anda já naxica tähví na nu Ndióxi sahá ná. Ta nacchinu na apóstol cán ndáhá ná jiní in in ndílhusa na cán ná ná caja na chuun Ndióxi.

<sup>7</sup> Ta nacásahá ndicuítu nuu tühun cáhan saha Jesús chí nandicuahá na cíu cuénta Jesús nuú Jerusalén. Ta cuahá na cíu jutu cán nacásahá cándéé ini na Jesús.

<sup>8</sup> Ta ndaja coo nacaja cuahá Ndióxi ña-  
maní xihín in dà naní Esteban cán ta nandi-  
cutú ndaa ínima dá xihín ínima yii Ndióxi  
chí nacasáhá cája da cuahá ñaha náhnu  
xihín ña xitíhún nuú ñayivi. <sup>9</sup>Joo in quiyi  
nacasáhá java na cání táhan yúhu ná xihín  
mé Esteban. Na cán cíú ná cuénta veñu hu  
naní Esclavos Libertados xihín java na ñuu  
Cirene xihín na ñuu Alejandría xihín na  
ñuu Cílicia xihín java ga ná naquixi ñuu  
válí ndíu estado Asia nacasáhá cání táhan  
yúhu ná xihín dá. <sup>10</sup>Joo a cuú quee vahá  
na xihín dá jáchí ñasahan ínima yii Ndióxi  
tuhun ndichí nuú mé Esteban cán ña ná  
nducú ñehe da nuú ná. <sup>11</sup>Anda já nachahvi  
na cán java na já ná cahan na tuhun tühún  
sahá Esteban. Ta nacachi na cán ña naxini  
joho na ña nacanahá Esteban xihín Moisés  
ta nacanahá dá xihín Ndióxi. <sup>12</sup>Ta xihín ña  
yóho najándivaa ná ñayivi xihín na sacuahá  
veñu hu xihín na jánahá ley Moisés. Ta já  
natiin na dà já ñehe na dà cuahán dà nuú  
ndihí na sacuahá ñuu cán. <sup>13</sup>Ta nanducú  
na dà cándusa cavahá tuhun tühún sahá  
Esteban ta já nacasáhá cächí dà cavahá ña  
tuhun já:

—Cánahá dà yóho xihín veñu hu cahnu  
Ndióxi yóho ta cánahá dá xihín ley Moisés.  
<sup>14</sup>Ta naxini joho nde cächí dà ña játani Jesús  
veñu hu cahnu yóho, mé dà naquixi ñuu  
Nazaret ta ndijama da costumbre najánda-  
coo Moisés nu yo —cáchí dà cahán ña tuhun  
sahá Esteban.

<sup>15</sup> Anda já nandicoto nihni na sacuahá  
xihín tóco ndihí na ndíu coo cán nu Este-  
ban já naxini na nandiyéhe nuú dà tátuhun  
in nuú tátó Ndióxi ndíu indív.

## 7

*Ndiquehe Esteban sahá mé dà nuú na  
sacuahá*

<sup>1</sup> Anda já nandaca tuhun dà cíú sacuahá  
nuú jetu cán Esteban já nacachi da já xihín  
dá:

—Á ña ndaa cíú ndihí ña cahán na yóho  
sahun.

<sup>2</sup> Anda já nanducú ñehe Esteban tuhun nu  
ná já nacachi da já:

—A juú toho ña ndaa quéa cahán na  
jan sahá i. Joo cuni joho ndó ña ná  
cahan i xihín ndo, na sacuahá xihín ñani  
i. Sanahá ndivahá tá ñasahíñ tásahú  
jícó yo, da ñasananí Abraham ñundáhyi  
Mesopotamia tá cámání quee da cuhun dà

coo da ñuu Harán já nanahá Ndióxi mé  
á nu dá. Ta mé Ndióxi xito ho í cíú á  
in Ndióxi cahnu ndivahá. <sup>3</sup>Ta já nacachi  
a já xihín Abraham: “Jándacoo táhún ta  
jándacoo ñuu ná cuahán inga ñuu nuú  
nahá inuún coún”, nacachi Ndióxi xihín dá.  
<sup>4</sup> Anda já najándacoo Abraham ñundáhyi  
Caldea nuú ñasahíñ da ta já naquee da  
cuahan dà coo da ñuu Harán. Tá nandihi  
já naxihí tátá dà ta janda já ñasandaca  
Ndióxi Abraham naquixi da nuú ndíu yó viti.  
<sup>5</sup> Joo coó ñasahan Ndióxi ñundáhyi nu dá  
tá ñasahíñ da yóho. Ni in loho ñuhú coó  
ñasahan mé á nu dá mé tiempo cán. Joo  
nacachi a xihín dà ña quiáhva ña nu dá  
chágá chí nuú. Ta nacachi a xihín dà ña  
nduu a ñaha jahyi da tá ná quiyi da vatí  
cámání cacu jahyi Abraham mé tiempo já.  
<sup>6</sup>Ta nacachi Ndióxi xihín dà ña tóco ndihí  
jahyi da xihín na quixi chichí jahyi da cacuu  
na tátuhun na tóho jáchí canduu na inga  
ñuu, ña co cíú ñuu na. Ta cán caja chúun  
na joo a quéhah yahvi na sahá chiuun caja na  
ta jándoho ndivahá na cán ini na tixi comi-  
ciente cuja. <sup>7</sup>Nacachi tucu Ndióxi xihín dà  
já: “Joo jándoho i ini ñayivi, na caja xíxi  
xihín ñayivi quixi chichún. Ta tá nandihi  
caja i ña ná queta na quixi chichún ta quixi  
na chohó já ná caja cahnu na yehe.” <sup>8</sup>Ña  
yóho quéa nacachi Ndióxi xihín Abraham  
tá ñasahan tuhun a nuú dá. Ta nacachi a  
xihín dà ña ná chicqan dà marca yiquí cuyú  
da já ná a ndindójó dà sahá tuhun ñasahan  
Ndióxi nu dá. Ta tá nacacu jahyi Abraham,  
da naní Isaac já nacachicqan Abraham marca  
yiquí cuyú da tá naxinu ña quíyi ñacacu  
da. Ta quiáhva já ñacaja ri Isaac xihín Jacob,  
jahyi da tá nacacu da. Ta sa mé quiahva  
já ñacaja ri Jacob xihín uxu ivi jahyi da tá  
nacacu da. Ta jahyi Jacob yóho cíú tátá uxu  
ivi tähndá ñayivi Israel.

<sup>9</sup> Ta mé jahyi Jacob yóho ñasacu  
tásahnu jícó yo joo ñacahíhyi ini na xihín  
in ñani na, dà naní José. Sahá ña cán quéa  
najicó na dà cuahán dà nación Egipto. Joo  
ñasahíñ Ndióxi xihín dá. <sup>10</sup>Ta nacchindeé  
a da nu tóco ndihí ña nandoho ini da ta  
ñasahan cuahá Ndióxi xihín túni dá. Ta  
ñacaja mé á ña ná tahán ini Faraón, mé  
rey nación Egipto cán xihín ña caja José.  
Sahá ña cán quéa ñasacu rey cán José ña ná  
nduu da gobernador sahá tóco ndihí nación  
Egipto cán. Ta ñacaja rey cán ña ná cacomí

dá cuéntá sahá vehe mé rey cán viti.

<sup>11</sup> Ta in tañu naxinu támá ndeeé ta nacasáhá ndóho ndiváha ini tóco ndihi ñayivi ndúu nación Egipto. Ta quiahva já nan-doho ri ini ná ndúu ñundáhyi Canaán ta chí co ñéhe ná ña cuxu tásáhnu jíco yo. <sup>12</sup> Joo tá nacandaa ini Jacob ña ím trigo nación Egipto já nachindahá dä jahyi da, ná násacuu tásáhnu jíco yo cán já násahan ná náxeen na ña cuxu na. Ta tá násahan na nu cuítí yóho coó nandicuni na ñani na José cán. <sup>13</sup> Joo tá násahan ná ña chí iví chí Egipto cán já najáñaha José mé dá nuú ñani da. Ta xihín ña yóho nacandaa ini da cúu rey nación Egipto cán ña cúu José da Israel. <sup>14</sup> Anda já násahnda José chuun ña ná cañeha na Jacob, tátá dä xihín tóco ndihi ná vehe da quixi na canduu na ñundáhyi Egipto cán. Ta tóco ndihi ná násahan cán násacuu ná uni jíco sahun ñayivi. <sup>15</sup> Já naquee Jacob cuahan dä coo da Egipto xihín tóco ndihi ná vehe da. Ta sa mé cán náxíhi dä ta cán náxíhi jahyi da, ná násacuu tásáhnu jíco yo. <sup>16</sup> Já nachicáan ná ndíjí cán ini cává mé Egipto cán joo tá nayaha tiempo já natavá na lása ná já ñéhe na ña násahan na nachicáan ná ini cává mé cama santo ña náxeen Abraham nuú jahyi in dä ñani Hamor ñuu Siquem cán.

<sup>17</sup> Ta tá nacayati quíví xínu coo ña násahan Ndióxi tuhun a nu Abraham coo já nacasáhá cácu cuahá jahyi ná naquixi chichi Israel. Já nandicuahá ná nani ndúu na Egipto cán. <sup>18</sup> Anda já nacasáhá inga tucu rey cómi dä cuéntá sahá ñayivi nación Egipto cán ta mé rey saá cán co xíni toho da José. <sup>19</sup> Ta mé rey yóho najándahvi da tásáhnu jíco yo cán ta nacasáhá cája xíxi da xihín ná. Ta nacaja ndúsá dä xihín ná ña ná jándacoo na jahyi na, ná jácá nacacu já ná quivi na. <sup>20</sup> Ta mé tiempo já nacacu Moisés ta násacuu da in ticuáhá loho ña natahan ini Ndióxi xihín. Ta najácuahnu tátá náná Moisés yóho mé dä tixi uni yoo mé vehe mé ná cán. <sup>21</sup> Joo tá naxinu quíví ndítahan nu ná jándacoo na dä já nandiquehe ñá cúu jahyi rey Egipto cán dä já najácuahnu ñá da tátuhun jahyi ñá. <sup>22</sup> Ta najácuahua Moisés tóco ndihi ña xíni ná ndíchí nación Egipto cán. Ta nandindichí ndiváha jini dä. Ta nacaja cuahá dä ña náhnau.

<sup>23</sup> Ta tá naxinu Moisés iví jico cuiá já násacu ini da coto nihni da ñani táhan da,

ná naquixi chichi Israel. <sup>24</sup> Tá nacasaña dä nu ndúu ná cán já náxini da cája xíxi in dä Egipto xihín in dä Israel. Ta cúní Moisés ndiquehe da sahá dä Israel ña cán quéa násahní Moisés mé dä Egipto cán. <sup>25</sup> Jáchí nacahán Moisés ña cuu candaña ini ná Israel cán ña chíndahá Ndióxi dä já ná janí dä ná ndáha ná Egipto cán. Joo coó nacandaa ini na ña yóho. <sup>26</sup> Ta inga quíví itaán tá naxinu coo Moisés nu ndúu ná Israel cán já náxini da cán táhan iví dä naquixi chichi Israel. Anda já nacásahá Moisés sáhdá java táhan da dä cán já cachí dä já xihín ná: “Ndaja ñani mé va ndó, a váha toho cája ndó cán táhan ndaja táhan mé va ndó.” <sup>27</sup> Anda já nachindahá nihni dä cája xíxi xihín ñani táhan cán Moisés já nacachi dä já xihín dä: “Ni in toho na coó násahan chuun nu yóhó cacuún dä cacomí cuéntá sahá nde já ná cuu caja viún sahá nde. <sup>28</sup> Á tá quiahva nacajún násahnún dä Egipto cán cuni quiahva já cúnun cajún xihín i”, nacachi dä cán xihín Moisés. <sup>29</sup> Tá náxini joho Moisés ña yóho já nayihví ndiváha da chí náxinu da cuahan dä chí ñundáhyi cuéntá Madián já násahiin da cán tátuhun in dä toho. Ta cán nástandahá dä ta nacacu iví jahyi taa da.

<sup>30</sup> <sup>30</sup> Ta tá sa nayaha iví jico cuiá násahiin Moisés Madián cán já náñaha in tátó Ndióxi mé ánu dä tañu in tohíñú cándaha ñúhu mé yucú íchí yati yucú ñani Sinaí cán. <sup>31</sup> Ta chí nacatontó Moisés xihín ña náxini da nacaja Ndióxi cán. Ta tá nacayati da sández dä ña já náxini joho da cáhan Ndióxi xihín dä já cachí a já: <sup>32</sup> “Yehé cúu u Ndióxi nacaja cáhu náxíhi jíco Abraham xihín Isaac xihín Jacob.” Anda já nacásahá quíjí Moisés xihín ña yihví dä ta coó násahan ndeeé ini da ndicoto nihni da nu cáhan Ndióxi cán. <sup>33</sup> Anda já nacachi tucu Ndióxi já xihín dä: “Tavá ndusa sahun jáchi yii ndiváha cúu nu sánun jan. <sup>34</sup> Sa náximi i ndá quiahva ndáhví ndóho ñayivi cuéntá mí i, ná ndúu Egipto ta náximi joho i nu tána na sahá ña jándoho ná Egipto jan ini na. Sahá ña cán quéa vaxi i chindeé e ná ta yóhó cacuún dä chindahá i cuhyn Egipto já ná tavún ná nu ndóho ini na cán”, nacachi Ndióxi xihín Moisés.

<sup>35</sup> Nacandají ná Israel cán Moisés ta nacachi na xihín dä: “Coó ná násacu toho yohó ña ná cacomún cuéntá sahá nde já ná cuu caja viún sahá nde.” Joo Ndióxi quéa nachindahá Moisés ña ná cacuu da

dá cacomí cuéntá sahá na Israel cán ta já ná jácacu da na. Jáchí já nacachi táto Ndióxi xihín dá tá nānāha mé á tañú tohíñú cándaha ñúhu cán. <sup>36</sup> Ta mé Moisés nāsahan tucu da mé Egipto cán ta natavá da tóco ndhi na Israel, na nāsanduu Egipto cán ta nacaja da cuahá ñāha náhnu xihín na xitúhún mé Egipto cán. Ta quiahva já nacaja da xihín tañuhú naní Tañuhú Cuáhá tá nāsuná dā do nuú nayaha na Israel cán. Ta quiahva já nacaja da cuahá ñāha náhnu yucú íchí nuú naxica na íví jico cuia cán. <sup>37</sup> Ta mé Moisés nācaxi tūhun da xihín ñayivi já nacachi da já xihín ná: “Tá quiahva nacaja Ndióxi nachindahá a yehe nū ndo quiahva já chindahá mé á inga da cacuu profeta nū ndo. Ta mé dā cán cacuu da in da quixi chichi mé ndó”, nacachi Moisés xihín ná. <sup>38</sup> Ta mé Moisés nāsahin da tañú ñayivi Israel, na nāsacuu tásáhnu jícó yo tá naxica na yucú íchí cán. Ta xihín mé dā cán nācahan táto Ndióxi jini yúcu Sinaí cán. Ta cán nāsahan Ndióxi ley nū dā já ná nāha dā ñā nu yo ñā ná caca vāha í chí cuéntá Ndióxi.

<sup>39</sup> Joo coó nāxeen toho tásáhnu jícó yo cuni joho na nuú nācahan Moisés xihín ná. Na cán quéa nācandají na dā ta nācasáhá ndúcú na ndicó coo na Egipto. <sup>40</sup> Ta nani nāsahin Moisés jini yúcu Sinaí cán já nacachi na xihín Aarón, nani Moisés já: “Cúní nde ñā ná cavahún tñiñu yúu Ndióxi caja cáhnu nde ta ná canuu a cuhun a nuú nde. Jáchí co cándaa ini nde ndíá nāndo Moisés, da natavá ndehe nuú nāsanduu nde Egipto cán.” <sup>41</sup> Andá já nācaváha na in yoco ñéhe nāhná chélo ta já nāsahní na quítí najoco na nuú mé yoco cán. Ta nacajii nādivaha ini na xihín yoco ñā nācaváha mé na cán. <sup>42</sup> Andá já nājándaco Ndióxi na já ná caja cáhnu na ndá ñā cúní na tátuhun quími xihín yoo xihín candii. Já nacachi Ndióxi ini libro nācayí na profeta sanahá: Ndóhó, na Israel, a juú nu mí i nāsahní toho ndó quítí najoco ndó tañú íví jico cuia nani naxica nuu ndó yucú íchí jan.

<sup>43</sup> Ñā nacaja ndó quéa nacaja cáhnu ndó yoco ñā nācaváha mé va ndó.

Ta nacachi ndó ñā cùu mé yoco cán inga ndióxi nani Moloc.

Ta nāsanehe ndó ñā xihín cátí á tá cuahán ndó.

Ta nācaváha ndó inga tñiñu quími nācachi ndó cùu á inga tucu ndióxi naní Renfán.

Ta nāsanehe ndó tñiñu cán cuahán ndó caja cáhnu ndó coó nācaya cáhnu ndó yehe.

Na cán quéa tavá i ndohó ñundáhyi na Israel ta chindahá i ndohó in ñuu tóho xícá chágá a juú ga Babilonia, nacachi Ndióxi xihín na cán — nacachi Esteban xihín na sacuahá ñuu cán.

<sup>44</sup> Já nacachi tucu Esteban já xihín ná: —Vatí nacaya cáhnu tásáhnu jícó yo java ga yoco joo nāsanehe tá nāsanehe na in veñúhu ní quítí cuéntá Ndióxi tá naxica nuu na yucú íchí nuú coo ndúu ñayivi cán. Jáchí janda jihna nāsahnda Ndióxi chuun nu Moisés tá quiahva coo mé veñúhu ní quítí cán ta nāsahnda chuun nu dā ñā ná caváha da ñā xihín ní quítí. Ta ini mé veñúhu cán nātaán dā yuu jáhndá nu ndáa ley nāsahan Ndióxi nu dā sanahá. <sup>45</sup> Tá sa nayaha cuahá cuia já naxihí Moisés já nāndiquehe dā nani Josué chuun ñā cañehe da cuéntá sahá tásáhnu jícó yo. Ta mé tásáhnu jícó yo nacani táhan na xihín na nāsanduu ñundáhyi yóho. Ta nacaya Ndióxi ñā ná quee vāha na Israel xihín na cán. Nātavá Ndióxi na cán já ná canduu na Israel ñundáhyi yóho ta mé tiempo já na Israel níehe na veñúhu ní quítí cuahán na. Ta já nāsahin a xihín ná janda quíví nāsacumí David cuéntá sahá na Israel. <sup>46</sup> Nacaya Ndióxi cuahá ñāmāni xihín David sahá ñā cán quéa nāsacu ini David cavaha da in nuú coo Ndióxi, mé a nacaya cáhnu Jacob sanahá. <sup>47</sup> Joo da nācaváha mé vehe Ndióxi cán nāsacuu Salomón, jahyi David. <sup>48</sup> Ta sá cándaa iní ñā a juú quiahva cáhnu cùu Ndióxi ta coo ndácahan toho a ini veñúhu cavaha dataa. Ín in profeta ta nācayí dā ñā nacachi Ndióxi já:

<sup>49</sup> Tátuhun in rey, da ín coo silleta vāha, ta chínúu da sahá dā játá in tayı́ loho, quiahva já ín coo i indiví ta chínúu i sahá i játá ñuyíví.

Yehé cómí i cuéntá sahá indiví xihín ñuyíví sahá ñā cán quéa coó toho vehe cuu cavaha ndó coo yehe,

ta co xíní ñúhu i in vehe nū ndíquehe ndéé. <sup>50</sup> Jáchí yehe cùu Ndióxi ñā nācaváha tóco

ndhi ñaha, já nacachi Ndióxi sahá —nacachi Esteban xihín ná.

<sup>51</sup> Anda já nacachi tucu Esteban já xihín  
ná:

—Joo mé ndó cíu ndó ñayivi saá ini ta  
cíu ndó tátuhun ná co xíni Ndióxi. Jáchí  
co cúní ndó cuni joho ndó ná cachí Ndióxi  
xihín ndó ta co cúní ndó candaa ini ndó  
tuhun Ndióxi. Ta ní co cúní ndó quiáhva  
ndó ñamani ndihvi íníma yii Ndióxi iní  
ma ndó. Xíxi ndivaha nasahin ini tásahnu  
jicó ndo ta quiáhva já cája ri mé ndó viti.  
<sup>52</sup> Mé tásahnu jicó ndo nacaja xíxi ndivaha  
na xihín ndihí na profeta ta nasañhi  
ná me ná yóho naquixi na cáxi tuhun saha  
mé a quixi chí nuu, mé a co cája cuachi. Ta  
tá naxinu mé a cán já najicó tühun ndó a  
ta nasañhi ndó a.  
<sup>53</sup> Ta mé ndó cíu ndó ná  
nasañhan tátó Ndióxi ley nyu joo co cúní ndó  
caja ndó ná cachí a —nacachi Esteban xihín  
na.

#### Tá nasañhi na Esteban

<sup>54</sup> Tá naxini joho ná sacuahá cán tóco  
ndihí ná nacahan Esteban já naxojo ndi-  
vaha ini na xihín dá chí cahñá nyhu na.  
<sup>55</sup> Joo nandicutú ndaa íníma Esteban xihín  
íníma yii Ndióxi ta já nandicoto nihni da  
indiví já naxini da ndá quiáhva cálhnu cíu  
Ndióxi ta naxini da cándichi Jesús xoo  
cuáha Ndióxi.  
<sup>56</sup> Anda já nacachi Esteban já  
xihín ná:

—Candhé ndó. Núná indiví xíní i ta tívi  
cándichi Jesús xoo cuáha Ndióxi —nacachi  
Esteban xihín ná.

<sup>57</sup> Joo náchicají tuun na cán joho na já  
ná a cúní joho na ná cahñá Esteban. Ta  
nacásahá cayuhú cóhó ná cáti na cuahñan  
na cani na dá.  
<sup>58</sup> Natavá ná mé Esteban yuhú  
ñuu ta cán nacásahá cíun na yuu dá. Ta mé  
na najácojo cuachi jata Esteban cán natavá  
na cotó ná ta nachinduu tóo na ná nyu in  
da tacú naní Saulo cándichi cán.  
<sup>59</sup> Ta nani  
cíun ná cán yuu Esteban já nacásahá mé  
Esteban xíca tähví dá ná Ndióxi já cachí dá  
já:

—Jesús, mé ndó cíu xitoho i. Ndiquehe  
ndó íníma i viti.

<sup>60</sup> Anda já nacaxítí Esteban já nacásahá  
cayuhú cóhó dá já nacachi da já:

—Jesús, xitoho i, a quéhe ndó cuénta  
sahá cuachi cája ná yóho.

Tá nandihí nacachi Esteban tuhun yóho  
ja naxihí dá.

Cásahá Saulo cája xíxi da xihín ná cíu  
cuénta Jesús

<sup>1</sup> Ta mé hora nasañhi ná Esteban cándichi  
Saulo sándehé dá ta natahan ini da xihín ná  
nasañhi Esteban cán.

Ta mé quiví cán nacásahá ná cája xíxi  
chágá ná xihín ná cíu cuénta Jesús ndíu  
ñuu Jerusalén cán. Chí tóco ndihí ná cíu  
cuénta Jesús nandicuita nua na ndijá chí  
estado Judea xihín estado Samaria. Joo mé  
na apóstol cuití va coó naxita nua toho na.  
Nacando na ñuu Jerusalén.  
<sup>2</sup> Ta java dàqaa  
nandiquehe na yíquí cíu Esteban cuahñan  
na jánduxu ná dá tá quiáhva sín costumbre  
na ta a juú quiáhva nasacu na sahá dá.  
<sup>3</sup> Ta  
mé Saulo nacaja xíxi chágá dá xihín ná cíu  
cuénta Jesús ta naquihí da vehe tá vehe na  
ta ñúhu da ná ta tåvá dá na jatá véhe. Coó  
caja toho á cíu ná taa á cíu ná ñáhá ta já  
ñéhe da ná cuahñan na vecqa.

Cáhan ná cíu cuénta Jesús tuhun vaha  
sahá mé á nyu ná estado Samaria

<sup>4</sup> Ta ná cíu cuénta Jesús tá nandicuita  
nua na jatá ñuu Jerusalén cán nacaxi tuhun  
na tuhun vaha sahá Jesús níi cíu ná xíca na  
cuahñan ná.  
<sup>5</sup> Ta ndajá coo in dá cíu cuénta  
Jesús naní Felipe naquee da cuahñan dá chí  
in ñuu cuénta Samaria ta cán nacásahá  
dá cahán da saha Jesucristo nyú ñayivi.

<sup>6</sup> Nacásahá ndítútú cuahñá ñayivi ná dá ta  
xihín ndinuhi ini na taa joho na ná cahán  
dá xihín ná jáchi naxini xihín nyu ná cuahñá  
ñáhá náhnu cája Felipe.  
<sup>7</sup> Nandajá vaha  
da cuahñá ñayivi, ná nasañhu íníma quini  
ini chí cayuhú cóhó mé íníma quini cán tá  
quéta ini na quihí cája. Ta nandajá vaha ri  
da cuahñá ná naxihí tuchu ta nandajá vaha ri  
da ná xíca réncó.  
<sup>8</sup> Sahá ná cán quéa nacajíi  
ndivaha ini ñayivi ñuu cán xihín ná nacaja  
da.

<sup>9</sup> Ta mé ñuu cán nasañhi in dá tají naní  
Simón. Mé Simón yóho nasañuu da in  
taa, dá nájándahvi ñayivi Samaria cán jáchi  
nasañchi da ná cíu dá in dá sín ndivaha  
sahá.  
<sup>10</sup> Ta tóco ndihí mé ñayivi ñuu cán, á  
cíu ná ndahví á ná náhnu, nasañchi joho  
na xihín ndinuhi ini na nyu nasañchan dá,  
nduu. Ta nacachi na sahá dá ná cája da ná  
náhnu tá quiáhva cája Ndióxi.  
<sup>11</sup> Ta nasa-  
candusa na nyu nasañchan dá xihín ná jáchi  
tixi cuahñá tiempo nájándahvi da ná xihín  
ná tají.  
<sup>12</sup> Ta ndajá coo nacásahá ná cándusa

na ñuu cán tuhun vaha cáhan Felipe saha Jesucristo, ña cacomí Ndióxi cuénta saha ná tá ná candeé ini na Jesucristo. Ta já nacasáhá na cándúta ná, taa xihin ñáhá viti.

<sup>13</sup> Ta janda mé Simón cán nacandúsa da ta nacandúta dá já nacasáhá xíca nuu da xihin Felipe. Ta chí cátontó dà xíní da ña náhnu xihin ña xitúhún caja Felipe cán.

<sup>14</sup> Ta tá nañhé ná apóstol ndíu ñuu Jerusalén cán tuhun ña nandiquehe na Samaria cán tuhun vaha cáhan saha Jesús já nacindahá na Pedro xihin Juan estado Samaria cán. <sup>15</sup> Ta tá naxinu co Pedro xihin Juan estado Samaria cán já naxica tähví na nu Ndióxi sahá na cúu cuénta Jesús cán ña ná chutú ndaa ínima ná xihin ínima yii Ndióxi. <sup>16</sup> Jáchì sa nacandúta ná cuénta Jesucristo sahá ña candeé ini na mé a joo a ñáhá chutú ndaa ínima ná xihin ínima yii Ndióxi. <sup>17</sup> Anda já chójó Pedro xihin Juan ndáhá da jiní in in ná cán nani xíca tähví dà nu Ndióxi já nacindahá ndaa ínima ná xihin ínima yii Ndióxi.

<sup>18</sup> Tá naxini Simón ña nacindahá ndaa ínima na cúu cuénta Jesús cán xihin ínima yii Ndióxi tá chínúu na apóstol ndáhá ná jiní ná já cúní da cueen da ndée Ndióxi cán. <sup>19</sup> Já nacachi Simón já xihin ná:

—Quiahva ndó ndée cómi ndó jan nuu i já ná cacomí ri yehe va ña já quéa ndá ná ná chinúu i ndáhá i jiní ná cuu ndicutú ndaa ínima ná xihin ínima yii Ndióxi.

<sup>20</sup> Anda já nanducú ñehe Pedro tuhun nu dà já cachi dà já xihin dà:

—Ná jándihi Ndióxi sahun xihin sahá jiuuhún cómún jáchì cahún ña cuu cueún ña jásá maní uun Ndióxi nuu ñayivi. <sup>21</sup> Coó sahá tohún cajún ña caja nde yóho jáchì co ún vaha toho ímum nü Ndióxi. <sup>22</sup> Xíní ñuhú jándacoún ña nüu cahvi inún jan ta ndítahan caca tähvún nu Ndióxi já ná candehé mé a caja cahnu ini a sahun jáchì nüu ndivaha cahvi inún. <sup>23</sup> Jáchì náhá caxí ña cahhví ndivaha inún. Cúu á tátuhun mé ña quiini nacató a yóho chí cajún ña nüu.

<sup>24</sup> Anda já nanducú ñehe Simón tuhun nu Pedro já cachi dà já:

—Caca tahvi ndó nu Ndióxi sahá i já ná a quíxi ña nüu cachi ndó jan nuu i —nacachi da xihin ná.

<sup>25</sup> Tá nandihi nandicaní Pedro xihin Juan sahá ña nacaja Ndióxi xihin ná. Ta tá nandihi nacahán na tuhun Ndióxi nuu ná cán já naquee na nasahean na cahán ná

tuhun Ndióxi, ña cuu jácazu ñayivi ndijá ñuu válí ñuhu chí estado Samaria cán. Anda jáví nandicó coo tuco na chí ñuu Jerusalén.

*Cáhan Felipe saha Jesús nuu in dà naquixi nación Etiopía*

<sup>26</sup> Tá sa nayaha ña yóho já naxinu in tátó Ndióxi nu fin Felipe estado Samaria cán ta já cachi a já xihin dà:

—Cuáhán chí sur nu quée íchi ña quéta ñuu Jerusalén cuahan chí ñuu Gaza —nacachi tátó Ndióxi xihin dà.

Ta mé íchi cán yáha nuu co ndíu ñayivi jáchì íchi ndivaha. <sup>27</sup> Anda já naquee Felipe cuahan dà. Ta íchi nu xíca da cuahan dà cán nandithan dà in dattaa, dà naquixi nación Etiopía. Mé dà Etiopía yóho cúu dà in taa cahnu nación dà jáchì cúu dà da cómi cuénta sahá jiuuhún ña cuu ñáhá ná naní Candace, ña cómi cuénta sahá ñayivi nación Etiopía. Mé dà yóho sa nasahean dà ñuu Jerusalén caja cahnu da Ndióxi. <sup>28</sup> Ta tá cuahan tuco da íchi ndicó coo dà Etiopía cán ta nani íin coo da jatá carreta já cahvi da libro nacahyí profeta Isaías. <sup>29</sup> Anda já nacahán ínima yii Ndióxi xihin Felipe já nacachi a já xihin dà:

—Cativi jíin carreta cuahan jan.

<sup>30</sup> Anda já nacayati Felipe jíin carreta cán ta já naxini joho da cahvi da Etiopía cán libro Isaías. Anda já nandaca tuhún Felipe dà já cachi dà já xihin dà:

—Á cándaa inún ña cahvún jan.

<sup>31</sup> Anda já nanducú ñehe dà Etiopía cán tuhun nu Felipe já nacachi dà já:

—Ndaja caja i cándaa ini i ña cahvi i tá coó ná ndicani nuu i ndíaa cúní cachi a —nacachi dà Etiopía cán xihin Felipe.

Anda já naxica dà ñamani nu Felipe ña ná ndaa da jatá carreta dà já ná cacoó da xihin dà ta ná ndicani da nu dà ña cúní cachi a. Chí nandaa Felipe carreta cán.

<sup>32</sup> Ta cahvi dà Etiopía cán tuhun Ndióxi nu cachi a:

Tá quiahva ñehe na in ndicachi cuahan rí quivi rí quiahva já nasahehe na dà cuahan dà quivi da.

Ta tá quiahva caja ndicachi tá co ndáhyi ri nani ndíjatá na rí quiahva já nacaja mé dà jáchì coó nasahean dà yúhu dà cahán dà.

<sup>33</sup> Nacaja xíxi ndivaha na xihin dà ta coó nacaja ndaa ná xihin dà.

Jáchí janda na naquixi chichi nuú naquixi  
mé dá coó nandiquehe na sahá dá.

Na nacaja na quéa násahní na dá já ná a  
cóo ga dá ñuyíví yóho, cachí tuhun  
Ndióxi nu cáhvi dá Etiopía cán.

<sup>34</sup> Anda já nandaca tuhún dá Etiopía cán  
Felipe já cachí dá já xihín dá:

—Ta viti caja ndó ñamani ndicani ndó  
nuú i ndía cúni cachi a yóho. Á sahá mé  
va profeta yóho cáhan dá a sahá inga va da  
cáhan dá.

<sup>35</sup> Anda já nacasáhá Felipe ndicani da nuú  
da cán ña nacahyí Isaías já nandican da  
tuhun vaha saha Jesús nu dá. <sup>36</sup> Ta tá yáha  
na cuahán na nu ñúhu ticui já nacachi da  
Etiopía cán já xihín Felipe:

—Yóho ñúhu ticui. Á cuu caja ndútá ndó  
yehé —nacachi da xihín Felipe.

<sup>37</sup> Anda já nacachi Felipe xihín dá:

—Tá cández ini ndó Jesús xihín ndinuhu  
ini ndó ta cuu va candútá ndó.

Anda já nanducú ñehe dá cán tuhun nu  
Felipe já cachí dá já:

—Cándusa i ña cuú Jesucristo in tuhún  
jini já jahyi Ndióxi —nacachi da Etiopía cán.

<sup>38</sup> Chí ivi laá nasañda dá Etiopía cán  
chuun ña ná cani ndichi na carreta cándójó  
na cuahán na cán. Anda já nanuu ndíví da  
cuahán da nu ñúhu ticui ta já najácandúta  
Felipe da Etiopía cán. <sup>39</sup> Tá nandihi naquée  
na ini ticui cán já ñéhe íníma yii Ndióxi  
Felipe cuahán dá inga xoo chí coó naxini  
táhan chágá da xihín dá Etiopía cán. Joo  
cáiini da Etiopía cán cuahán dá íchi. <sup>40</sup> Tá  
nandicoto nihni Felipe sa ín da in ñuu naní  
Azoto. Ta tá ñuu tá ñuu cuahán da cáhan  
da tuhun vaha saha Jesús nuú ñayivi anda  
quiáhva naxínu coo da ñuu Cesarea.

## 9

Ndíquehe Saulo íchi cuéntá Jesús  
(Hch. 22:6-16; 26:12-18)

<sup>1</sup> Joo ndaja coo dá naní Saulo cája xíxi tá  
cája xíxi da xihín na cuú cuéntá Jesús. Ta  
sacú ini da ndaja caja da cahni dá na. Ta  
sahá ña cúni dá jándihi da sahá ná sahá  
ñá cán quéa nasañan da cáhan dá xihín  
da cuú sacuahá nuú jutu <sup>2</sup> ña ná quiáhva  
na in carta nu cáhan ña ñéhe dá ñamani  
quihvi da veñihu ñúhu ñuu Damasco já ná  
ndinducú da na ndíco íchi cuéntá Jesús já ná  
cató da na cañehe da na quixi na cuhun na  
vecaa ñuu Jerusalén. Co cája toho a á cuú ná

taa á ñáhá. Chí naquee Saulo ñuu Jerusalén  
xihín mé carta. <sup>3</sup> Joo nani xícá da cuahán da  
íchi tá sa yati xínu coo da ñuu Damasco já  
in náá cuití nändiyihví ndaa ñúhu jata dá.  
Mé ñúhu yóho naquixi a chí indíví. <sup>4</sup> Chí  
ivi laá nandicava Saulo nu ñúhu. Anda já  
naxini joho da cáhan in a xihín dá já cachí  
a já xihín dá:

—Saulo, Saulo. Ndá cuéntá quéa cája  
xísún xihín i —cachí a xihín dá.

<sup>5</sup> Anda já nacasáhá ndáca tuhún Saulo já  
cachí dá já:

—Yo cuú ndó, na cáhan. Ndaja naní ndo  
—cachí da.

Anda já nanducú ñehe a cán tuhun nu dá  
já cachí a já xihín dá:

—Yehé cuú u Jesús, mé a cája xísún xihín.  
Ta xihín ña cájún yóho cuú á tátuhun cája  
xísún xihín mé vún jáchi cájún tátuhun cája  
in tindiquí tá sání ndaa rí nu yóco poya ta  
jándicuehe rí mé va rí.

<sup>6</sup> Anda já nacasáhá quíji Saulo xihín ña  
yihví da já nacachi da já:

—Cáhan ndó xihín i, xitoho i ndía quéa  
cúni ndó ná caja i —cachí da.

Anda já nanducú ñehe Jesús tuhun nu dá  
já cachí a já xihín dá:

—Cuándaco ta cuáhán quihvi ñuu Damas-  
co. Ta jan cáhan na xuhun ndía ndítahan  
cajún —cachí Jesús.

<sup>7</sup> Ta tóco ndihi da cásahan xihín Saulo cán  
nayihví ndiváha da jáchi naxini joho da ña  
cáhan cán vatí coó ñayivi ná xini da. <sup>8</sup> Tá  
nandihi já nandacoo Saulo nu ñúhu. Joo tá  
naxuná da nduchú nuú da chí co tívi ga nuú  
dá. Sahá ña cán quéa jandá tím ndaa na dá  
cuahán da chí Damasco. <sup>9</sup> Cán nasañin cuáá  
da tixi uní quívi ta chí coó naxixi da ta ni  
ticui coó naxixi da.

<sup>10</sup> Mé ñuu Damasco cán nasañin in da cuú  
cuéntá Jesús naní Ananías. Ta ndaja coo  
naxini ndímáhnú da Jesús ta nacahán xihín  
dá já nacachi a já:

—Ananías.

Anda já nanducú ñehe da tuhun nu á já  
cachí da já:

—Yóho fin i. Ndía cúni ndo, xitoho i.

<sup>11</sup> Anda já nacachi Jesús xihín dá:

—Candichi ta cuáhán cáyé naní a Ndacú  
Ndáa. Ta vehe da naní Judas cán ndacú  
tuhun sahá in da naní Saulo, da nacacu ñuu  
Tasco. Viti ñúhu xícá tahví da nu Ndióxi  
ndácaan dá. <sup>12</sup> Jáchí naxini ndímáhnú da ña  
quihvi mún, Ananías vehe nu ndácaan dá.

Ta naxini da ña chínúún ndáhun jini dá ta já cuu candehé tucu da —nacachi Jesús xihín Ananías.

<sup>13</sup> Tá naxini joho Ananías ña yóho já nacachi da já:

—Candehé ndo, xitoho i. Yíhví i cuhun i jáchí sa cuahá ndiváha ñayivi ndicani nuú i sahá mé Saulo jan. Ta ndícani na nuú i ndá quiáhva xíxi caja da xihín na cíu cuénta mé á, na ndúu ñuu Jerusalén. <sup>14</sup> Ta viti vaxí da jan ñuu yóho jáchí sa naxica dā ñamani nuú na sacuahá nuú jutu ña ná cuu játaca da tóco ndihi na caja cahnu mé ndó já ná cañehe da na cuhun na vecaa —nacachi Ananías.

<sup>15</sup> Anda já nacachi Jesús já xihín Ananías:

—Cuahán quí jáchí sa nacaxi i dā ña ná cahán da sahá i nuú ñayivi java ga nación ta quiáhva já cahán da sahá i nuú na cómí cuénta sahá na cán. Ta nacaxi i dā ña ná cahán da sahá i nuú na naquixi chichi Israel viti. <sup>16</sup> Ta jánaha i nuú dā ndá quiáhva ndítahan ndoho ini da sahá i —nacachi Jesús.

<sup>17</sup> Anda já naquee Ananías cuahán da vehe nu fín Saulo cán. Tá naxinu da cán já nachinúu da ndáhá dā jini Saulo já nacachi da já xihín dā:

—Ñani Saulo. Mé Jesús, xitoho i, mé á naxinún nuú naquisún íchi cán, mé á cán quéa nachindahá yehe vaxí i já ná ndinuña nduchú núún já ná cuu candehé tucún. Ta já cíni Ndióxi ña ná ndicutú ndaq ínimun xihín ínimá yii mé á —nacachi Ananías xihín Saulo.

<sup>18</sup> Chí ivi laá nacasáhá cíyu ñaha tá-tuhun runchu tiyacá nduchú núú Saulo chí nanuná nuú dā sándehé tucu da. Anda já nasahán Saulo nacandúta dā. <sup>19</sup> Tá nandihí já naxixi da ta nandihví tucu ndéé dā ta nasañjin tóo da chá quivi xihín na cíu cuénta Jesús ndúu ñuu Damasco cán.

*Cáhan Saulo sahá Jesús nuú ñayivi ñuu Damasco*

<sup>20</sup> Tá nandihí já nacasáhá Saulo jánaha dā tuhun Ndióxi ini veñhu ta jánaha dā ña cíu Jesús in tühún jini já jahyi Ndióxi. <sup>21</sup> Ta tóco ndihi na táo joho nuú cáhan da cátontó na caja da. Já cachí xihín táhan na já:

—Á a juú dā yóho cíu dā nandicuita caja xíxi xihín na cíu cuénta Jesús ñuu Jerusalén, nduu. Á a juú sa mé dā yóho vaxí da tiin da na cíu cuénta Jesús mé ñuu yóho

já ná cuhun na nuú na sacuahá nuú jutu já ná taán ñahá na vecaa —nacachi xihín táhan na.

<sup>22</sup> Joo ví ga ví ndíndeé ini Saulo cáhan dā tuhun Ndióxi. Ta náhá dā nuú ñayivi ña mé Jesús cíu Cristo, mé á nachindahá Ndióxi cacomí cuénta sahá ñayivi. Janda quiáhva já najájacá dā xíni túni na naquixi chichi Israel ndúu Damasco cán xihín tuhun cáhan da xihín ná.

*Xínu Saulo nuú java na Israel jáchí cíni na cahní ng dā*

<sup>23</sup> Tá sa nayaha cuahá quívi já najándique táhan na naquixi chichi Israel cán tuhun na ña cahní na Saulo. <sup>24</sup> Joo nacandaa ini Saulo ña ndúu na cahní na dā. Ta mé ná ndúcú cahní Saulo cán násandati na ñuu ta ndiví yéhé ñuu cán janda quiáhva ná queta da já ná cahní na dā. <sup>25</sup> Joo in ñuu na cíu cuénta Jesús ndúu ñuu Damasco cán nachicqan na dā ini in toyicá cáhuu já najánuu na dā ndica námá cáhuu ndájí yuhú ñuu cán já nacacu da ta naquee da cuahán da.

*Cuahán Saulo ñuu Jerusalén*

<sup>26</sup> Tá naxinu coo Saulo ñuu Jerusalén já nanducú dā ndique táhan da xihín na cíu cuénta Jesús ndúu cán. Joo tóco ndihi na cán yíhví na dā jáchí co cándusa na ña sa nandiquehe da íchi cuénta Jesús. <sup>27</sup> Joo nandiquehe Bernabé sahá Saulo. Nasahan dā nayáñaha dā dā nuú na apóstol cán já ná ndique táhan na xihín dā. Ta nandicaní Bernabé nu ná ndaja nasañjin tá naxini Saulo Jesús íchi nu xíca da cuahán da chí ñuu Damasco. Ta nandicaní da ña nacahan Jesús xihín Saulo. Ta nandicaní da ña coó nayíhví Saulo cáhan dā sahá Jesús ñuu Damasco. <sup>28</sup> Anda já nandiquehe na Saulo ta nacandoo da ñuu Jerusalén. Ta nacasáhá xíca nuu da xihín na apóstol. <sup>29</sup> Ta co yíhví dā cáhan dā sahá Jesús. Ta nandituhún da xihín na naquixi chichi Israel, na cáhan tuhun griego ndúu ñuu cán. Joo mé ná cán ndúcú na dā quíhva caja na cahní na dā. <sup>30</sup> Tá nacandaa ini na cíu cuénta Jesús ña ndúcú na cahní na Saulo já ñéhe na dā cuahán dā ñuu Cesarea. Anda já nachindahá na dā cuanúhu dā ñuu Tarso.

<sup>31</sup> Anda já nanduu vahá ini tóco ndihi na cíu cuénta Jesús ndúu ndijáá estado Judea xihín estado Galilea xihín estado Samaria. Ta nandindacú chágá ví ini na xihín tuhun Ndióxi. Ta xihín ndinuhi ini na caja cáhuu

na Ndióxi. Ta chíndeé ínima *yii* mé á na. Ta já nandicuha chágá na cuahan na.

### *Ndívaha in dà naní Eneas*

<sup>32</sup> Ta ndaja coo xíca nuu Pedro xito nihni da na cúu cuénta Jesús ndúu ñuu válí cán. Ta já nasahán ri da xito nihni da na cúu cuénta Jesús ndúu ñuu Lida. <sup>33</sup> Cán nanditan da in dàtaa naní Eneas, da naxihí tuchu saha. Ta tixi una cuia násandúhu dá jáchí a cuú caca da. <sup>34</sup> Anda já nacahán Pedro xihín dá já nacachi da já:

—Eneas, viti ndája vaha Jesucristo yohó. Cuáhán ndacoo. Nditivún yívun —cáchí Pedro xihín dá.

Chí *ivi* laá nandacoo Eneas. <sup>35</sup> Tóco ndihi na ndúu ñuu Lida xihín na ñuu Sarón naxini na dà nandivaha yóho ta anda já najándacoo na costumbre yatá nasacaja na já nandiquehe na íchi cuénta Jesús, xitoho í.

### *Ndítacu in ñáñáha naní Dorcas*

<sup>36</sup> Ta ndaja coo násahíin in ñáñáha, na cúu cuénta Jesús ñuu Jope. Ta mé ñáñáha yóho naní na Tabita ta tühun griego cáchí na Dorcas xihín ñá. Ta mé Dorcas yóho níí tiempo nandíhi ini ñá cája na ñamani xihín ñayivi ta náchindeé ñá na ndahví. <sup>37</sup> Ta mé tañu já naquehe cuéhe Dorcas ta naxihí ñá. Ta tá sa nandicata na yiquí cuñu ñá já ñéhe na ñá nasahán na náchindúhu na ñá piso niñu vehe cán. <sup>38</sup> Ta yati va ñéhe táhan ñuu Jope cán xihín ñuu Lida nu íin Pedro. Tá nacandaa ini na cúu cuénta Jesús na íin yati Pedro já náchindahá na *ivi* dataa nasahán da cana da Pedro ñá ná cuhun quíí dá ñuu Jope cán.

<sup>39</sup> Anda já ndáca táhan Pedro cuahan da xihín ndíví dàtaa cán. Tá naxínu coo Pedro ñuu Jope cán já najáquihvi na dà ini vehe nu ndácaan mé ndíjí Dorcas cán. Nataca tiyivi cuahá najihí cuáan ndúu na sácu ndivaha na saha ñá naxihí cán. Ta najáñahá na jáhma ñá nacavaha Dorcas nu dá tá nasatucu ñá. <sup>40</sup> Anda já nacachi Pedro xihín ndihi ñayivi ndúu cán ñá ná quee tóo na jatá véhe. Ta sa naqueta na cán já nacaxtíí da xíca tähví da nu Ndióxi. Anda já nacásáhá sánchéhé da ndíjí cán já nacásáhá cáchí da já xihín ñá:

—Cuáhán ndacoo, Tabita.

Tá nacachi da já chí *ivi* laá nánuma nduchú núu ñá nanditacu ñá. Tá naxini ñá Pedro já nacacoo ñá. <sup>41</sup> Anda já natiin Pedro ndáha ñá já nandiñehe da ñá. Anda

já nacana da na cúu cuénta Jesús xihín na cuáan cán na quihvi tucu na cán jáchí sa nanditacu ñá. <sup>42</sup> Tóco ndihi ñayivi ñuu Jope cán nacandaa ini na ñá nanditacu Dorcas chí cuahá na nacandúsa na Jesús ta nandíhvi na íchi cuénta mé á. <sup>43</sup> Ta chí nacando Pedro cuahá quiví ñuu Jope cán. Nacando tóo da vehe in dà naní Simón, da ndája víí níí quíti.

## 10

### *Cáhán Pedro tühun vaha saha Jesús nu Cornelio*

<sup>1</sup> Ta ndaja coo násahíin in dàtaa naní Cornelio ñuu Cesarea cán. Ta mé Cornelio yóho cúu dá dà cómí chuuñ nuú *íñu* ciento soldado. Ta mé tähndá soldado yóho naní a Tähndá Italiano. <sup>2</sup> Ta mé Cornelio yóho xihín tocó ndihi na vehe da cája cáhnu na Ndióxi xihín ndinuñu ini na. Ta jásá dà jiuhún da ñá chíndeé da na naquixi chíchi Israel. Ta níí tiempo xíca tähví da nu Ndióxi. <sup>3</sup> In quiyí tátuhun caa uní sahini nani xíca tähví dà nu Ndióxi já naxini cáxí tähví dà naquihvi in tátó Ndióxi ini vehe nu ndácaan dà já nacachi a já xihín dá:

—Cornelio.

<sup>4</sup> Ta chí nayihví Cornelio sánchéhé da tátó Ndióxi cán. Anda já nacachi da já:

—Ndíá cúní ndo, tátó Ndióxi.

Anda já nanducú ñehe tátó Ndióxi cán tühun nu dà já cáchí a já xihín dá:

—Xímí joho Ndióxi tá xíca tähvún nu á ta sa xíni a ñá náchindeé cuahún na ndahví. Ta tähán ini mé a xihín ñá cájún. <sup>5</sup> Ta viti cúni Ndióxi ñá ná chindahún java dàtaa ná cuhun dà ñuu Jope já ná cana da dà naní Simón, dà cáhán tucu na Pedro xihín na quixi da. <sup>6</sup> Ín tóo Pedro vehe inga dà naní Simón, dà ndája víí níí quíti. Ta yati yuhú tañuhú íin vehe da. Ta mé Pedro cán caxí tühun da xuhun ndífa ndítahan nuñun cájún —nacachi tátó Ndióxi cán.

<sup>7</sup> Tá sa naquee tátó Ndióxi cán cuahan já nacana Cornelio *ivi* mozo dà ta nacana da in táhan soldado, dà cómí dà cuénta saha. Ta mé soldado yóho cúu dá in dà cája cáhnu Ndióxi. Ta cándezé ini Cornelio da. <sup>8</sup> Ta tá nandíhi nandicaní Cornelio nu ndíshuni dà ñá nacachi tátó Ndióxi xihín dá já náchindahá ñahá dà cuahan dà ñuu Jope.

<sup>9</sup> Ta inga quiví itaen xíca na cán cuahan na íchi ta sa yati xinu coo na ñuu Jope. Ta cúu á tátuhun caxívi ta mé hora já nandaa

Pedro jiní véhe caca tāhví dā nu Ndióxi.<sup>10</sup> A juú quiahva cuíco Pedro chí naxica dā ña cuxu da. Ta nani cája ndíví na ña cuxu da já najánahá Ndióxi in ñaha nu dā.<sup>11</sup> Ta ña naxini da quéa nandinuná indíví já nanuu in jahmá cahnu tātuhun in sábaná ña ndíco ndícomí títō ta nūu a vaxi ñuyív yóho xíní dā.<sup>12</sup> Ta mé ini jáhmá cán ñihu tá nuú quítí, rí comí sahá xihín coo xihín laa viti.<sup>13</sup> Anda já naxini joho da cahán in a xihín dā já nacachi a já:

—Pedro. Candichi ta cahní quítí jan casún.

<sup>14</sup> Anda já nanducú ñehe Pedro tuhun já cachí dā já:

—A cája toho i já, xitoho i jáchí ni in túhún tañu a ñáha caxí i quítí quini tātuhun rí yóho. Jáchí cachí ley násahan ndó nuú nde ña ná a caxí toho nde ri —cachí Pedro xihín á.

<sup>15</sup> Anda já nacahán tucu a xihín dā já nacachi a já:

—Sa nandaja vií va Ndióxi rí jan. Sahá ña cán quéa co ndítahan cachún ña cūu rí rí quini —cachí a xihín dā.

<sup>16</sup> Tixi uni tāhndá naxini da ña yóho nacaja Ndióxi. Anda já nandindita tucu jáhmá cán cuahán chí indíví.<sup>17</sup> Chí nacásahá ndícani ini Pedro ndíá cūni cachí ña naxini da. Ta xihín ña yóho naxinu coo ndíhunu dataa, dā nachindahá Cornelio mé vehe nu íin Pedro cán. Jáchí vaxi da ndacá tuhún da sahá vehe Simón janda quiahva nanditahan da ña.<sup>18</sup> Ndítá ndíhunu dā cán yuyéh vehe Simón ta cayuhú dā ndáca tuhún da sahá in da naní Simón, dā cahán tucu na Pedro xihín.<sup>19</sup> Ta nani ndáca tuhún na yóho íin yií va Pedro jiní véhe cán ndícani ini da sahá ña naxini da nacaja Ndióxi cán. Anda já nacahán inímá yií Ndióxi xihín dā já cachí a já:

—Candehé, nandai cuu uni taa vehe yóho ta ndínducú dā yohó.<sup>20</sup> Cuahán nuu cuhún xihín dā ta a ndícani inún jáchí mí i nachindahá i dā vaxi —cachí a xihín Pedro.

<sup>21</sup> Anda já nanuu Pedro já naxinu dā nu ndítá dataa nachindahá Cornelio cán. Já nacachi Pedro já xihín dā:

—Yehé cuú Pedro, dā vaxi ndó ndínducú ndo ta viti cachí ndó xihín i ndá quéa cúní ndo.

<sup>22</sup> Anda já nanducú ñehe dā cán tuhun nu Pedro já cachí dā já:

—Dā naní Cornelio cūu dā nachindahá ndehe vaxi nde. Mé Cornelio cūu dā in da cómí cuéntá sahá ñiñu ciento soldado. Mé dā cūu dā in taa cája ña ndaa. Ta cája cahnu da Ndióxi. Ta quíhví ndivaha ini na Israel da. Ta nacahán in tátó Ndióxi xihín dā ña chindahá dā ndehe cana nde ndohó cuhun ndó vehe da já ná cahán ndó xihín dā ndá quéa cúní Ndióxi caja da —cachí dā xihín Pedro.

<sup>23</sup> Anda já najáyaha Pedro ndíhunu dataa cán ini vehe. Já nacandoo da cán naquijí dā nuú vehe Simón cán. Ta inga quiví itaan já naquee Pedro cuahán dā xihín ndíhunu dataa cán. Ta ndáca Pedro java na cūu cuénta Jesús ndíu ñiu Jope cán cuahán na xihín dā.

<sup>24</sup> Janda inga quiví itaan já naxinu coo na ñiu Cesarea nu íin Cornelio ndáti da na. Mé Cornelio yóho sa najátaca da tóco ndíhi na vehe da xihín java na ñéhe táhan vaha xihín dā ndíu na xihín dā ndáti na saa Pedro.

<sup>25</sup> Tá naxinu coo Pedro vehe cán já naqueta Cornelio ndiquehe ñahá dā. Ta tá nandihí já nacaxtí Cornelio nu Pedro ña caja cahnu ñahá dā.<sup>26</sup> Joo násacu ndichi Pedro dā já nacachi Pedro já xihín dā:

—Candichi jáchí ñayivi xihín mé vún cūu yehé.

<sup>27</sup> Sa já cáhan Pedro xihín dā ndáca táhan da nandihvi da ini vehe. Ta tá nandihvi da cán já naxini Pedro nanditútú cuahá ñayivi ndíu na cán. <sup>28</sup> Anda já nacásahá Pedro cahán dā xihín ná já cachí dā já:

—Sa xini vaha ndó ña cūu yehé in da naquixi chíchi Israel. Ta sa xini ndó ña sáhndá ley nuú nde ña ná a cátahán nde xihín ñayivi tóho. Ta ni vehe na ná a ndíhvi nde cachí ley. Joo viti najánahá Ndióxi nuú i ña co cūu ndehe ñayivi vií chágá a juú ga ndohó, na tóho.<sup>29</sup> Sahá ña cán quéa tá nacana ndó yehé ivi laá naquee e vaxi i. Ta ni coó nandaja ndíchí i dā ndáca yehé vaxi i yóho. Ta viti cúní candaá ini i ndá cuénta quéa nacana ndó yehé vaxi i —cachí Pedro.

<sup>30</sup> Anda já nanducú ñehe Cornelio tuhun nu Pedro já cachí dā já:

—Janda comí quivi tātuhun hora viti, xíjuhun i ta xíca tāhví i nu Ndióxi ndácaan i vehe e. Ta tá násandehé e já naxini i in dataa ndíxí jahmá yéhe cándichi da nuú i.<sup>31</sup> Já nacachi da já xihín i: “Cornelio, sa xini joho Ndióxi nu xíca tāhvún nu á. Ta

quehé a cuéntá sahá ñamani cajún xihín na ndahví.<sup>32</sup> Ña cán quéa chindahá java dataa na cuhun da ñuu Jope cana da Simón, da cáhan tucu na Pedro xihín ná quixi da cahán da xuhun. Viti fin tóo da vehe in da naní Simón, da ndájá víi míi quíti. Ta yati yuhú tañuhú ndácaan vehe da<sup>33</sup>, nacachi tátó Ndióxi cán xihín i.

Sahá ña cán quéa ivi laá nachindahá i mozo i ñasaá da nducu da ndohó. Ta vaha nacaja ndó vaxi ndó. Ta viti nanditútú ndihi nde ndáti nde nu Ndióxi. Ta cúní nde cuni joho nde tóco ndihi ña ñasahnda Ndióxi nu ndó cachi ndó xihín nde —cáchí Cornelio xihín Pedro.

Cáxi tūhun Pedro nuú ñayivi vehe Cornelio<sup>34</sup>. Anda já nacasáhá cáhan Pedro já nacachi da já:

—Viti cándaa ini i ña coó na náhnu chágaa a juú ga inga na nu Ndióxi jáchi nu mé á in cúu ndihi ví.<sup>35</sup> Na cája mé á quéa ndíquehe vaha ndá ñayivi ñacuú tá cándezé ini na mé á ta cája na ña vaha. Coó caja toho a á cúu ná na Israel á na tóho.<sup>36</sup> Nacaxi tūhun Ndióxi nuú ñayivi Israel ndá quiahva cuu coo vaha ini na tá cándezé ini na Jesucristo, mé á cúu xitoho toco ndihi.<sup>37</sup> Sa cándaa ini ndó ndaja ñasahiin tá nacasáhá Juan cáxi tūhun da nuú ñayivi ndúu estado Galilea ña ná ndicó coó ini na nuú cuachi na ta já ná candútua na. Ta nandicutu nuu tūhun ndijáá nu ndúu na Israel.<sup>38</sup> Ta sa cándaa ini ndó ndaja nacaja Ndióxi xihín Jesús, mé a naquixi ñuu Nazaret. Najándicutú ndaa Ndióxi Jesús xihín ínima yii mé á ta najándicutú a ña xihín ndéé mé á. Ta mé Jesús naxixa nuu a cája ndinuhi ña vaha xihín ñayivi. Ta nandaja vaha mé á ña ñasandoho ini nacaja tiñáhá sácuaha. Nacaja Jesús ña yóho jáchi ñasahiin Ndióxi xihín á.<sup>39</sup> Ta mé nde, na apóstol cúu na naxini ña nacaja Jesús tóco ndihi ña yóho tá ñasahiin a estado Judea ta tá ñasahiin a ñuu Jerusalén. Anda já ñasahní ña mé á tá nacata caa na a ndica crúxu.<sup>40</sup> Joo tá nayaha uní quívi já nájánditacu Ndióxi Jesús ta nacaja Ndióxi ña ná naya Jesús mé á nuú nde.<sup>41</sup> Coó ñanaha toho Jesús mé á nu tóco ndihi ñayivi. Nuú ndehe, na nacaxi Ndióxi cuití va ñanaha Jesús mé á. Jáchi janda jihna nacaxi mé á ndehe ña ná cuni nde ña ta ná cahán nde xihín ñayivi sahá mé á. Ta tá sa nanditaru tucu a tañu ndii cán já naxixi nde xihín á.<sup>42</sup> Ta mé á nachindahá ndehe caxi tūhun nde

nuú ñayivi sahá Jesús ta ná ndicani nde nu ná ña ñasacu Ndióxi mé Jesús ña ná caja a sahá ñayivi. Coó caja toho a á tacú ña a naxihi ña.<sup>43</sup> Ta jári ña profeta va janda sanahá nacahan na sahá Jesús ta nacachi na ña caja cahnu ini Ndióxi sahá cuachi ndijáá ñayivi tá ná candeé ini na mé á —cáchí Pedro xihín ndihi ña ndúu vehe Cornelio cán.

Jándicutú Ndióxi na coó naquixi chichi Israel xihín ínima yii mé á

<sup>34</sup> Ta nani cáhan Pedro cándichi da já naxiinu ínima yii Ndióxi najándicutú a ínima tóco ndihi ña taa joho ña cáhan da cán.

<sup>35</sup> Ta ná cúu cuéntá Jesús, na naquixi chichi Israel, na ndáca Pedro vaxi xihín dán cán, nacatontó ña tá naxini na nandicutú na tóho cán xihín ínima yii Ndióxi.<sup>36</sup> Ta xíni ña ná cúu á ña ndaa jáchi ñaxini joho ña cája cahnu na Ndióxi ta cáhan ña inga tūhun ña coó ñasatiähva na.<sup>37</sup> Anda já nacachi Pedro já:

—Cája i cuéntá ni in túhún toho ñayivi a cúu cají nuu nuú ña tóho yóho ña ná candútua ná jáchi sa nandicutú ínima ná xihín ínima yii Ndióxi tátuhun nandicutú mé nde xihín á —cáchí Pedro.

<sup>38</sup> Anda já ñasahnda Pedro chuun ña ná jácandútua ná cuéntá Jesucristo. Tá nandihi já naxixa tähví ña cán nu Pedro ña ná cando da chágaa quívi xihín ná.

## 11

Ndícani Pedro nuú na cúu cuéntá Jesús ndúu ñuu Jerusalén sahá ña nayaha vehe Cornelio

<sup>1</sup> Tóco ndihi ña apóstol xihín ña cúu cuéntá Jesús ndúu estado Judea ñañehe ná tūhun ña nandiquehe ri ña coó naquixi chichi Israel tūhun Ndióxi.<sup>2</sup> Ta tá nandicó coó Pedro chí ñuu Jerusalén já nacasáhá in tähndá ña cúu cuéntá Jesús ndúu ñuu cán cáhan núu na sahá dá. Mé na yóho cáhan ña ña ndítahan nuú ña tóho cahnda loho na yiquí cüñu na tátuhun ín costumbre na Israel.<sup>3</sup> Já cáchí ña já xihín dá:

—Ndá cuéntá quéa ñasahún naxito nih-nún na coó naquixi chichi Israel. Ta ndá cuéntá quéa naxisún xihín ná. A vaha toho nacajún cahán nde —nacachi ña Israel cán xihín Pedro.

<sup>4</sup> Anda já nacasáhá Pedro ndícani da tóco ndihi ña nayaha janda sahá. Já nacachi da já:

<sup>5</sup>—Nasahijin i ñuu Jope. Ta nani xíca tähví i nu Ndióxi já najánahá mé á in ñaha nuú i. Ta ña naxini i cíu in jahma cahnu tátuhan sábana nantu chí indíví ta ndícomí xoo tito a nacato. Ta chí janda yati nu ín i naxinu a. <sup>6</sup> Ta tá nasandehé vaha i ini a já naxini i ñuhu tá nuú quítí, rí comí saha xihín tá nuú quítí yúcú xihín coo xihín laa ñuhu ini a naxini i. <sup>7</sup> Anda já naxini joho i cahán in a já nacachi a já xihín i: “Pedro, cuáhán ndacoo cahni quítí jan casún.” <sup>8</sup> Anda já nanducú ñehe e tuhun já nacachi i já: “A caxí toho i rí yóho, xitoho i jáchí co xíni toho i caxí i quítí quini tátuhun rí yóho”, cächí i xihín Ndióxi. <sup>9</sup> Anda já nacahan tucu a cán chí indíví já nacachi a já: “Sa nandaja vií va Ndióxi rí jan. Sahá ña cán quéa co ndítahan cachún ña cíu rí rí quini”, nacachi Ndióxi xihín i. <sup>10</sup> Uní tähndá nayaha ña yóho nacaja Ndióxi. Anda já nandaa tucu tóco ndihi ña cán cuahán tucu a chí indíví. <sup>11</sup> Ta chí sa mé hora já naxinu coo uni taa ndínducú da yehe mé vehe nuú nasahijin tóo i cán. Ta dá can naquixi da janda ñuu Cesarea ndínducú da yehe. <sup>12</sup> Ta já nacindahá ínima yii Ndióxi yehe cuahán i xihín na sahá ña cán quéa coo nayihví i cuhun i xihín ná. Ta ndáca i lñu ñaní yóho nasahan dä xihín i. Tá naxinu coo nde ñuu cán já naquihvi nde vehe Cornelio, dä nacindahá dä cán ndinducú yehe. <sup>13</sup> Ta tá sa ñuhu ndihi nde vehe Cornelio cán já nacásahá ndícani da nuú nde ña naxini da cándichi in tátó Ndióxi ini vehe da ta nacachi a xihín dä já: “Chindahá java taa ná cuhun dä ñuu Jope cana da in dä naní Simón, dä cahán tucu na Pedro xihín. <sup>14</sup> Ta da cán caxí tuhun xuhun ta xihín ndihi na vehún ndaja caja ndó cazu ndaa ínima ndó”, nacachi tátó Ndióxi xihín Cornelio cán. <sup>15</sup> Ta tá nacásahá i cahán i xihín na vehe Cornelio cán já nandicutú ndaa ínima ná xihín ínima yii Ndióxi tá quiahva najándicuttú a ínima mí jihna. <sup>16</sup> Xihín ña yóho nandicuhun ini i ña nacachi Jesús, xitoho i xihín yo tá nacachi a já: “Mé a ndaa najácandúta Juan ndohó xihín ticuif joo vaxi quiví jándicuttú Ndióxi ndohó xihín ínima yii mé á”, nacachi Jesús. <sup>17</sup> Ta tá sa nasahan Ndióxi ínima yii mé á nuú na cán tá quiahva nacaja xihín mí sahá ña nacandusa i Jesucristo, xitoho i ama ná cani tähán i xihín Ndióxi sahá ña caja mé á xihín na cán —nacachi Pedro.

<sup>18</sup> Tá naxini joho na cán ña nacachi Pedro já nacatáji ná ta nacaja cahnu na Ndióxi já nacachi na já:

—Mé a ndaa sáhan ri Ndióxi ñamani nuú na tóho ña ná ndicó coo ini na jándacoa na cuachi caja na já ná coo na xihín mé á anda ama cáá quiví —nacachi na cíu cuénta Jesús, na naquixi chichi Israel cán.

Cuahá na ñuu Antioquía ndíquehe na íchi cuénta Jesús

<sup>19</sup> Tá nandihí náshání na Esteban já nacásahá caja xíxi na xihín na cíu cuénta Jesús. Anda já nandicuita nuu na cuahán na ta java na naxinu na janda chí estado Fenicia. Java na naxinu na cuahán na chí isla Chipre. Ta java na naxinu na chí ñuu Antioquía. Ta cán nacásahá cahán na tuhun Ndióxi nuú na naquixi chichi Israel cuitíva. Joo coó nacaxi tuhun na ña nuú na tóho cán. <sup>20</sup> Joo java na cíu cuénta Jesús, na naquixi chí isla Chipre cán xihín na naquixi ñuu Cirene naxinu coo na ñuu Antioquía ta nacásahá ná cahán na tuhun vaha saha Jesús, xitoho i xihín na coó naquixi chichi Israel ndúu cán. <sup>21</sup> Ta nasahan Ndióxi cuahá ndée mé a nu ná. Ta cuahá ndivaha ñayivi najándacoo na costumbre yatá na ta nandiquehe na íchi cuénta Jesús, xitoho í.

<sup>22</sup> Tá nacandaq ini na cíu cuénta Jesús ndúu ñuu Jerusalén tóco ndihi ña nayaha cán já nacindahá na Bernabé cuahán da janda ñuu Antioquía cán. <sup>23</sup> Tá naxinu coo Bernabé ñuu Antioquía cán já naxini da ndá quiahva nacaja Ndióxi ñamani xihín ñayivi ñuu cán chí nacají ndivaha ini da. Ta nacahán dä xihín ná ña ná candico na íchi cuénta Jesús xihín ndinuhu ini na. <sup>24</sup> Mé Bernabé yóho cíu dä in taa vaha. Ta chútú ndaa ínima dä xihín ínima yii Ndióxi ta cández cahnu ini da mé á. Ta cuahá ñayivi nandiquehe na íchi cuénta Jesús, xitoho i sahá ña nacaja da.

<sup>25</sup> Tá nandihí já naquee Bernabé cuahán da ndinducú dä Saulo chí ñuu Tarso. Ta tá nandihehe dä Saulo já ñehe da dä cuahán da chí ñuu Antioquía. <sup>26</sup> Ta nasaanduu da xihín na cíu cuénta Jesús mé ñuu cán tátuhun in cuia. Ta najánahá da tuhun Ndióxi nuú cuahá ndivaha ñayivi. Ta mé ñuu Antioquía cán cíu nuú nu cutíti nasaucu na quiví ná cananí na na cíu cuénta Jesús.

<sup>27</sup> Ta mé tiempo já naxinu coo java na profeta mé ñuu Antioquía cán. Mé profeta yóho naquixi na chí ñuu Jerusalén ta

tiahva na jáyaha na tuhun cáhān Ndióxi nuú ñayivi.<sup>28</sup> Ta in tahan dā profeta cán, dā naní Agabo nandacá ndíchí dā tañu nā cíu cuénta Jesús mé vehe nuú nataca na cán. Jā nacachi da jā:

—Cáxi tuhun íníma yii Ndióxi xihín i ña quixi in tama ndee ndivahá tā nasaomí Claudio cuénta sahá ñayivi ñuu Roma.<sup>29</sup> Anda jā nā cíu cuénta Jesús ñuu Antioquía cán najátaca na jiuuhún chindeé ñahá nā cán. Ta ndá quiahva xínu coo nu mé nā quiahva na, quiahva jā sáhan na. Anda jā nachindahá nā ña nuú nā cíu cuénta Jesús ndúu estado Judea.<sup>30</sup> Ta mé Saulo xihín Bernabé cíu dā ñéhe jiuuhún cán cuahan da ndiquiahva da ña nuú nā sacuahá comí cuénta sahá nā cíu cuénta Jesús ndúu estado Judea cán.

Ta chí jā ndusa nasahiin jachí naquixi in tama ndee ndivalha tā nasaomí Claudio cuénta sahá ñayivi ñuu Roma.<sup>29</sup> Anda jā nā cíu cuénta Jesús ñuu Antioquía cán najátaca na jiuuhún chindeé ñahá nā cán. Ta ndá quiahva xínu coo nu mé nā quiahva na, quiahva jā sáhan na. Anda jā nachindahá nā ña nuú nā cíu cuénta Jesús ndúu estado Judea.<sup>30</sup> Ta mé Saulo xihín Bernabé cíu dā ñéhe jiuuhún cán cuahan da ndiquiahva da ña nuú nā sacuahá comí cuénta sahá nā cíu cuénta Jesús ndúu estado Judea cán.

## 12

Tá nacasáhá ndáho chágá ini nā cíu cuénta Jesús

<sup>1</sup> Ta mé tiempo jā nacasáhá Herodes, dā comí cuénta sahá ñuu Jerusalén cán cája xíxi da xihín java nā cíu cuénta Jesús.<sup>2</sup> Nasahnnda da chuun ña nā cahní nā Jacobo, ñani Juan xihín yuchú cánjí. Ta jā nacaja na. <sup>3</sup> Ta tá naxini Herodes ña nacajíi ínf nā sacuahá veñhu Israel xihín ña nasahní dā Jacobo jā natiin ri da Pedro. Ta ña yóho nasacuu a mé tiempo tá cája nā Israel víco tá xíxi na pan ña co cáva tahan yusá naxaa xihín.<sup>4</sup> Tá sā nachicáan Herodes Pedro vecaa já nasahnnda da chuun nuú comí tähndá soldado ña nā candaa na da. Ta comí comí taa ndáca in in tähndá cán. Mé Herodes násacu ini da tavá dā Pedro vecaa ndiquiahva da dā nuú ñayivi Israel ña nā cahní nā dā tá sā nā yahá víco.<sup>5</sup> Nani ndácaan Pedro vecaa ndáa vaha na da. Joo nā cíu cuénta Jesús xihín ndinuhi ini na xíca tähví nā nuú Ndióxi sahá dā.

Tává Ndióxi Pedro vecaa

<sup>6</sup> Ta in ñuu sácu ini Herodes tavá dā Pedro vecaa inga quíví itaan ña ndiquiahva da dā nuú ñayivi, nduu. Joo mé ñuu jā nani cándúhu Pedro quíji da tañu ivi soldado ta ndíco jíin ga cadena ndáha dā ta co cáhan sahá java ga soldado ndíta ndáa yéhé vecaa cán.<sup>7</sup> Ta in náa cuítí naxinu coo in tátó Ndióxi ini vecaa cán chí nandiyihví ndaa ini a. Anda jā naxinu coo mé tátó Ndióxi

nú cándúhu Pedro jā naquiní a ndáha á yica ndícá dā jā nandicáxi ini da. Anda jā nacachi a jā xihín dā:

—Camún ndacoo quiún.

Anda jā nacuyu cadena ña nasandico ndáha Pedro.<sup>8</sup> Anda jā nacachi tucu tátó Ndióxi cán jā xihín dā:

—Ndaja tuun ní tísún ta cayhi ndysun.

Ta tā sā nacaja da ña jā nacachi tucu tátó Ndióxi jā xihín dā:

—Quehe tícachí níhnu chinúu jatun nā cohó candíco yéhe —cáchí a xihín dā.

<sup>9</sup> Anda jā tácaa Pedro jata tátó Ndióxi cán cuahán dā. Joo co xíni dā á jivi quéa á a juú a. “Sání ví”, cahán dā.<sup>10</sup> Ta xíca na casahán nā jā nayaha na nu ndíta in tähndá soldado. Ta anda jā nayaha na nu ndíta inga tähndá soldado. Ta tā sā naxinu coo na yéhé caa cán jā naxinu mé va jā naquee na vecaa cuahán nā. Ta tā sā naxica chá nā cayé cán jā naquee tátó Ndióxi cán cuahán ta jā nacandoo Pedro cán.<sup>11</sup> Anda jā nacandaa ini Pedro ña nayaha. Ta nacachi da jā xihín mé dā:

—Viti ndusa cándaa ini i ña mé a ndaa tähý quéa nacaja tátó Ndióxi yóho. Mé Ndióxi nachindahá a tátó á jā ná tavá a yéhe ndáha Herodes jā ná a cahní da yéhe tā quiahva cúní nā Israel —nacachi da.

<sup>12</sup> Nani cahán Pedro xíca da cuahan da vehe María, ña cíu náná Juan, dā nani tucu Marcos. Cán nanditútú cuahá nā cíu cuénta Jesús ndúu na xíca tähví nā nuú Ndióxi sahá Pedro.<sup>13</sup> Ta tā naxinu coo da vehe María cán jā nacasáhá cátí ndáha dā yéhé cán. Anda jā naxinu coo in ña loho nani Rode ña candehé ña ndá na cándichi jata véhe cán.<sup>14</sup> Tá naxini joho ña cáhan dā jā nandicuni ña tachi Pedro. Joo nandindójó ña cuná ña yéhé sahá ña cajíi ínf ña. Ta jā xínu ña nandicó coo tucu ña ini vehe caxi tuhun ña xihín na java cán ña cándichi Pedro jata véhe.<sup>15</sup> Joo tā nandicani ña ña yóho nu ná jā nacachi na jā xihín ña:

—Tachi va cíu yóhó.

—Jivi da —cáchí ña cán ndúcú ndee ña cahán ña xihín ná.

Anda jā nacachi nā cán jā:

—Ndá íníma va da quéa jan jachí vecaa va ndácaan Pedro —nacachi na.

<sup>16</sup> Joo ndaja coo Pedro cátí ndáha yii va da yéhé cán. Jā naxinu coo na nasuná nā yéhé nuú dā ta chí nayihví nā tá naxini na da.<sup>17</sup> Joo

nacuu ndáha dá nu ná ña ná a cáhan chágá na. Anda já nacasáhá dä ndícani da nu ná ndaja nacaja Ndióxi natavá a dä vecaa cán. Ta já nacachi da xihin ná:

—Ndicani ndó ña yóho nu Jacobo ta ndicani ndó ña nu tóco ndihi na cúu cuénta Jesús —nacachi Pedro.

Anda já naqueta Pedro cuahan dä.

<sup>18</sup>Tá natív inga quíví itaan já nacatontó soldado vecaa cán tá nacandaa ini da ñia coó Pedro íin vecaa ta coó naxini da ndáchí cuahan dä. <sup>19</sup>Anda já nasañhda Herodes chuun ña ná ndinducú na dä. Joo coó nandiñehe ná da. Anda já nacasáhá da ndája ndichí da soldado vecaa cán ndáchí cuahan Pedro. Joo coó nacuu cache na cán ndáchí cuahan dä. Sahá ña cán quéa nasañhda Herodes chuun ña ná cahní ndihi na soldado da nasañdaa yéhé caa cán. Tá nayaña ña yóho já najándaco Herodes este Judea cán ta naquee da cuahan dä chí Cesarea coo da.

#### Quíví naxihí Herodes

<sup>20</sup>A juú quiqhva xójo ini Herodes xihín ñayivi ndúu ñuu Tiro xihín na ndúu ñuu Sidón. Joo ndíví ñuu cán najándique táhan na tuhun na cuhun na cáhan na xihín dä. Coo vaha ini na xihín dä cúní na jáchi nundáhyi rey cán cána tóco ndihi ña xixi na. Joo jihna ñuhú nandique táhan máni na xihín in dä naní Blasto. Mé Blasto yóho nasacuu da in dä cáhuń cája chún nu rey cán. Ta nacahán na ña ná cáhan ndahví dä cán nu rey saha ná. <sup>21</sup>Ta nasaú Herodes in quíví nditútú ndihi na nu dä. Ta tá nacandaa mé quíví já nasaçandixi Herodes jáhma vaha ndivaha da, ña sáandixi rey. Ta nasaçoo da nu sáçoo rey. Ta já nacahan cóhó da xihín ñayivi. <sup>22</sup>Tá naxinu coo ña cáhan da já nacasáhá ñayivi cán cayuhú na já cachí na já:

—Ndióxi cúu da yóho ta co cúu dä ndá taa nacuu —cáchí na cája cáhuń na Herodes cán.

<sup>23</sup>Ta chí sa mé hora já naxinu in táto Ndióxi ta nacaja ña ná quehe Herodes cuehe jáchi coó nacaja cáhuń da Ndióxi ta já nasañan da ñamani nuú ñayivi ña cachí na cúu dä Ndióxi. Chí sa mé hora já naquihí ticusú yiquí cuñu da já naxihi dä.

<sup>24</sup>Ta níi cúu nandicuítua nuu tuhun vaha saha Jesús xíca cuahan. Ta chí nandicuha chágá na cúu cuénta Jesús.

<sup>25</sup>Ta ndaja coo nandiquiaghva Bernabé xihin Saulo mé jiuhún nuú na sacuahá veñuhu ndúu ñuu Jerusalén já nandicó coo da cuahan dä ñuu Antioquia. Ta ndáca na Juan, dä naní tucu Marcos cuahan dä xihin ná.

## 13

#### Cája chún Bernabé xihin Saulo cuénta Ndióxi

<sup>1</sup>Ta ndaja coo tañu na cúu cuénta Jesús ndúu ñuu Antioquia cán ndúu na cúu profeta ta ndúu ri na jánqha tuhun Ndióxi. Ta ña yóho cúu quíví ná: Bernabé xihin Saulo xihin Simón, dä cáhan na Taa Tuún xihin, xihin Lucio, dä ñuu Cirene xihin Manaén, dä nasañhna xihin Herodes. Mé Herodes yóho cúu dä dä cómí cuénta sahá ñayivi estado Galilea. <sup>2</sup>In quíví nani nanditútú ndihi na ndúu na xijuhun na ta cája cáhuń na Ndióxi já nacahan ínima yii mé á xihin ná já nacachi a já:

—Tavá jíin ndó Bernabé xihin Saulo jáchi sa nacaxí mí i chuun quiqhva i nu ná caja na —nacachi a.

<sup>3</sup>Ta tá sa nandihí naxijuhun na ta tá nandihí naxixa tähví na nu Ndióxi já nacchojó na ndáha ná jini Saulo xihin Bernabé já nandidayí na na cuahan na caja na chuun Ndióxi.

#### Cáhan Saulo xihin Bernabé tuhun vaha saha Jesús isla Chipre

<sup>4</sup>Tá nandihí já nachindahá ínima yii Ndióxi Saulo xihin Bernabé cuahan na ñuu Seleucia. Ta cán nandaa na barco cuahan na isla Chipre. <sup>5</sup>Ta ndáca na Juan, dä naní tucu Marcos cuahan dä xihin ná já ná chindeé dä na. Ta tá naxinu coo na ñuu Salamina nu sa ndichí barco cán já nacasańha na cáhan na tuhun Ndióxi nuú ñayivi tacá veñuhu na Israel cán. <sup>6</sup>Níi cúu isla cán naxixa nuu na janda quiqhva naxinu coo na ñuu Pafos. Ta cán nanditahan na in dä tají naquixi chichi Israel ta naní da Barjesús. Ta cúu dä in dä tuhún jáchi cáchí dä xihin ñayivi ña cáhan dä cuénta Ndióxi.

<sup>7</sup>Ta mé da tají yóho nasañin tuun da xihin in dä naní Sergio Paulo, dä cúu gobernador nuú ñayivi isla Chipre cán. Ta nasaçuu da dä ndichí jini. Ta mé gobernador yóho nacana da Bernabé xihin Saulo jáchi cuni dä cuni joho da tuhun Ndióxi. <sup>8</sup>Joo dä tají naní Barjesús, dä naní tucu Elimas nacasańha da

sájí nuu da nuú Bernabé xihín nuú Saulo jáchí co cúní dà ña ná candéé ini gobernador cán Jesús. <sup>9</sup>Nandicutú ndaa íníma yii Ndióxi ini Saulo, dà cähán na Pablo xihín já nacasahá sándezé ndaa da nuú dà tají cán.

<sup>10</sup>Já nacachi dà já xihín dá:

—Yóhó cútín taa quini ta cútín jahyi tiñahá, dà xíca jándahvi ñayivi. Co cúnún tóco ndihi ña vaha jáchí cúnun caji nuún nuú ñayivi ná a ndíquehe na íchi cuéntá Jesús. <sup>11</sup>Ta viti jándoho Ndióxi inún. Jácuaá a yohó ta ni a cúnún nuú candii tixi chá quivi —nacachi Pablo xihín dà tají cán.

Tá nacachi Pablo já chí ivi laá nacuaá da cán. Jandá tifin ndaa da xíca dà jáchí co tíví nuú dá. <sup>12</sup>Tá naxini dà cútín gobernador cán ña yóhó chí ivi laá nacandusa da Jesús. Jáchí chí cátontó dà xíni joho da tóco ndihi ña cähán na sahá Jesús.

Xíni coo Pablo xihín Bernabé nuu Antioquia ña ndácaan estado Pisidia

<sup>13</sup>Nandaa Pablo xihín na xíca xihín dà barco nuuu Pafos cuähán na chí nuuu Perge ña ndácaan estado Panfilia. Joo nasaahnda tähán Juan, dà naní tucu Marcos xihín ná já nandicó coo da chí nuuu Jerusalén. <sup>14</sup>Tá nandihi já naquee Pablo xihín na xíca xihín dà nuuu Perge já naxinu na nuuu Antioquia ña ndácaan estado Pisidia. Ta mé quivi ndíquehe ndée ñayivi nandihvi na veñihu já nasaoco na. <sup>15</sup>Ta tásá nandihi nacahvi na ley Moisés xihín ña nacahyí na profeta já nacana na sacuha veñihu cán Pablo xihín na xíca xihín dà já nacachi na já xihín ná:

—Nani i, tá ín tuhun vaha cúní ndó cähán ndó xihín ñayivi yóhó cuu candichí ndó cähán ndó xihín ná viti —nacachi na cán xihín dá.

<sup>16</sup>Anda já nacandichi Pablo já nacuu ndáha dà nuú ná catáji yúhu ná já nacasahá cachí dà já xihín ná:

—Cuni joho ndó ñayivi Israel xihín tóco ndihi ndó, na cája cähnu Ndióxi. <sup>17</sup>Mé Ndióxi, mé a cája cähnu ñayivi nación Israel nacaxi a tásáhnu jícó yo ta nacaja mé a ña ná ndicuahá ndivaha na nani nasaocu na na tóho nación Egipto cán. Joo tá nandihi já natavá mé a na xihín ndéé mé á. <sup>18</sup>Ta cähnu nasaohin ini Ndióxi sahá cuachi na tañu ivi jico cuia nani nacixa nuu na yucú íchi cán. <sup>19</sup>Ta najándahi Ndióxi sahá usa nación ñayivi nasaanduu ñundáhyi Canaan já najáyaha ñundáhyi jan ndáha tásáhnu

jícó yo jáchí janda sanahá nasaahan mé á tuhun a nu ná ña caja já xihín ná. <sup>20</sup>Anda já nasaahnda Ndióxi chuun nu juexe já ná cacomí na cuéntá sahá ná tixi comí ciento java cuia jandá quiahva naxinu coo tiempo tá naquizi profeta Samuel, dà jáygha tuhun cähán Ndióxi nuú ñayivi. <sup>21</sup>Anda já naxica tahví na Israel nu Ndióxi ña ná cacu mé á in rey ná cacomí dà cuéntá sahá ná. Sahá ña cán quéa nasaocu Ndióxi in da naní Saúl ná cacu da rey nu ná. Nasaocu da jahyi Cis, dà naquizi chichi Benjamín. Ta nasaocomí Saúl cuéntá sahá ná tixi ivi jico cuia. <sup>22</sup>Tá nandihi já natavá Ndióxi Saúl já nacchinúu a David ña ná cacomí dà cuéntá sahá ná. Já nacachi Ndióxi já sahá dá: “Ín vaha ini i xihín David, jahyi Isai jáchí xíni ña caja mé dà tóco ndihi ña cúní”, nacachi Ndióxi sahá David. <sup>23</sup>Ta in dà naquizi chichi mé David cán cútín Jesús, mé a nasaahan Ndióxi tuhun a chindahá jácacu ñayivi Israel janda sanahá ndivaha. <sup>24</sup>Ta janda tá cámání quixi Jesús já nacixa nuu Juan, dà jácanduta ñayivi nacahán dà xihín ñayivi ña ndítahan nu ná jändico na cuachi cája na ta ná candutá ná. <sup>25</sup>Ta tásá yati quivi da já nacachi da já xihín ñayivi: “A juú cähán ndó ña cútín yehe dà nacindahá Ndióxi cacomí cuéntá sahá ñayivi, vaha. Jáchí ja chá xínu inga dà ín chágá sahá a juú ga yehe. Ta dà cán cacomí cuéntá sahá ndó ta cútín ndusa dà cähnu chágá ta chí coó sahá mí i caxtí i ndaxí i correá ndusa dá”, nacachi Juan xihín ñayivi cán.

<sup>26</sup>Cuni joho vaha ndó, ñani i, na naquizi chichi Abraham xihín tóco ndihi ndó, na cája cähnu Ndióxi xihín ndinuhu ini. Mé Ndióxi cúní a ña ná candaq ini ndó ña nacindahá mé á Jesús ñuyíví yóhó já ná jácaca a ndohó já ná a cöhun ndó in-dayá. <sup>27</sup>Tóco ndihi na ndíu nuuu Jerusalén xihín na sacuha coó nacandaq ini na ña nacindahá Ndióxi Jesús ñuyíví yóhó. Ta ni coó nacandaq ini na tuhun nacahyí profeta sahá Jesús tá nasaahvi na ña veñihu tá quivi ndíquehe ndéé ná. Sahá ña cán quéa nasaahní na Jesús joo xihín ña nacaja na yóhó najáxinu coo na ña nacachi profeta sanahá. <sup>28</sup>Ta vatí coó nañehé ná cuachi chichaq na jata Jesús joo nacixa na ñamani nu Pilato ña ná cahnda da chuun ña ná cahni na Jesús. <sup>29</sup>Ta tásá naxinu coo tóco ndihi ña cachí tuhun Ndióxi sahá mé á coo anda já najánuu na a ndíca crúxu já

najánduxu na ña.<sup>30</sup> Joo najánditacu Ndióxi Jesú tañu ndii.<sup>31</sup> Ta tixi cuahá quivi nanaha Jesú mé á nuú na nasañehe táhan xihín á tá naquee a estado Galilea cuahán chí Jerusalén. Ta mé na cán cíu na xica cahán saha mé á nuú ñayivi viti.

<sup>32</sup> Sáhá ña cán quéa caxi tuhun nde tuhun vaha saha Jesú nu ndohó viti jáchi janda saha nacachi Ndióxi xihín tásáhnu jíco yo ña já coo.<sup>33</sup> Ta tá najánditacu Ndióxi Jesú najáxiu coo a tuhun nasañan nu yó, na naquixi chichi na cán. Jáchi já nacahyi a nu Salmo ivi ta saha Jesú nacahán tá nacachi a já: “Jahyi mí i cíu yóhó. Ta yehe caja ña ná catacún quivi viti”, cachí tuhun Ndióxi.<sup>34</sup> Joo Ndióxi sa nasañan va tuhun a ña jánditacu a Jesú já ná a táchí yiquí cuño a. Jáchi já nacahyi a ini libro yii mé á já cachí a já: “Nu yóhó quiáhva i tóco ndili ña vaha, ña nasañan i tuhun i nu David quiáhva i nu dá”, cachí tuhun Ndióxi.<sup>35</sup> Já cachí tucu inga Salmo já: “Mé ndó a quiáhva toho ndó ñamaní tahi yiquí cuño i jáchi cíu u jahyi maní mé ndo, da caja chuuñ nu ndo”, cachí tuhun Ndióxi.<sup>36</sup> Ta sa xini yo co cahán ña yóho sahá ña nacaja David jáchi tá nandhi nacaja da ña nasañnda Ndióxi nu dá já naxihí da ta najánduxu na da nuú nanduxu tásáhnu jíco da. Ta natahyi yiquí cuño da cán.<sup>37</sup> Joo yiquí cuño Jesú coó natahyi toho a jáchi najánditacu Ndióxi ña.<sup>38</sup> Na cán quéa vaxi nde caxi tuhun nde ña yóho nu ndo, ñani i já ná candaa ini ndó ña caja cahnu ini Ndióxi sahá cuachi ñayivi sahá ña nacaja Jesú tá naxihí a ndica crúxu.<sup>39</sup> Ta caja cahnu ini Ndióxi sahá cuachi ñayivi tá candeé ini na Jesús. Jáchi ni in tún ñayivi a cíu nduu ndaa nuú Ndióxi sahá ña sácú vaha na ley Moisés.<sup>40</sup> Joo cuénta coo ndó a juú ndoho ndó ña nacachi na profeta sanahá tá nacachi na já:

<sup>41</sup> Cuni joho vaha ndó, ndohó na sácu ndaa ichí ña cahán Ndióxi.

Catontó ndo jáchi cama chá ndili sahá ndo. Jáchi yehe cíu Ndióxi ta caja i ña nahnu ndiváha, joo co cándusa ndó ña caja i vatí ndicani java na ña nu ndo, nacachi Ndióxi sanahá —nacachi Pablo xihín ña.

<sup>42</sup> Ta tá naqueta Pablo xihín na xica xihín dá veñuña na Israel cán já naxica ñayivi, na coó naquixi chichi Israel ñamaní nu dá ña ná cahán da xihín na sahá tuhun Ndióxi inga quivi ndiquehe ndee ná.<sup>43</sup> Tá naquee

ndihi na veñuña cán já cuahá na Israel xihín cuahá na tóho, na cándusa ley Moisés ta cája cahnu na Ndióxi nacásáhá na ndíco na jata Pablo xihín jata Bernabé. Ta Pablo xihín Bernabé jána da ña ná candeé cahnu ini na Ndióxi já ná caja mé á ñamaní xihín ná.

<sup>44</sup> Ta tá naxinu coo inga quivi ndiquehe ndee ná já nataca tátuhun tóco ndihi ñayivi ñuu veñuña cán ña taa joho na tuhun Ndióxi cúní na.<sup>45</sup> Joo tá naxini na naquixi chichi Israel cán ña nataca cuahá ndiváha ñayivi já nacásáhá na Israel cahíyini na. Já nacásáhá na cahán nuú na saha Pablo ta nacanahá na xihín dá.<sup>46</sup> Xihín ña cán nandindeé chágaa ini Pablo xihín Bernabé já nacásáhá cachí da já:

—Jihna ñuhú ndítahan nuú nde caxi tuhun nde tuhun Ndióxi nu mé ndó, na naquixi chichi Israel. Joo sándezeh nde ña co cúní toho ndó ndiquehe ndó ña. Ta caja nde cuénta ña coó sahá ndó cuhun ndó indivi. Sahá ña cán quéa vaha chágaa ná cuhun nde cahán nde tuhun Ndióxi xihín na coó naquixi chichi Israel.<sup>47</sup> Jáchi já caja chuun nasañnda Ndióxi nuú nde tá nacachi a já xihín nde:

Nasacu yehe ndohó ña ná caxi tuhun ndó nuú ñayivi tóho ndúu ndijáa ñuyíví, já ná candaa ini na ndaja caja na ná cacu ndaa ínimá ná, nacachi Ndióxi — nacachi Pablo xihín ná.

<sup>48</sup> Tá naxini joho na tóho, na coó naquixi chichi Israel cán ña yóho chí nacajii ini na já nacásáhá na cahán na ña cíu ndusa tuhun Ndióxi ña vaha. Ta tóco ndili na nacaxi Ndióxi cacu ndaa ímima, nandihvi na íchi cuénta mé á.<sup>49</sup> Já nasañjin nuú naxita nuu tuhun Ndióxi níi cíu ñundáhyi cán.<sup>50</sup> Joo na naquixi chichi Israel cán najándivaña na java nähí, na cátóó cuhun veñuña, na co cahán nuú ñayivi saha. Ta najándivaña na java dataa, da fin saha ñuu cán ña ná ndicuita na xihín Pablo xihín Bernabé viti ta anda quiáhva ná tavá na da ñundáhyi cuénta ñuu cán.

<sup>51</sup> Andá já naquiji nihni Pablo xihín Bernabé ña yáca ndusá saha mé dá já ná nahu nuú na cán ña coó natahan ini da xihín ña caja na Israel cán. Já naquee da ñuu Antioquía cán cuahán da inga ñuu naní Iconio.<sup>52</sup> Ta ña cíu cuénta Jesús, na nacandoo ñuu Antioquía cán nandicutú ndaa ínimá ná xihín ínimá yii Ndióxi ta cajii ndiváha ini na.

## 14

*Cáhan Pablo xihín Bernabé tūhun Ndióxi nuú ñayivi ndíuú ñuu Iconio*

<sup>1</sup>Tá naxinu Pablo xihín Bernabé ñuu Iconio já nandíhvi da veñuhu nu ndítaca na Israel cán. Ta cán nacahan dā tuhun vaha sahá Jesús nu ná. Ta cuahá ndivahá na Israel xihín nā coó naquixi chichi Israel nacandéé ini na Jesús. <sup>2</sup>Joo java nā Israel, nā coó nacandusa tuhun Ndióxi nacasáhá nā cábá na jiní ñayivi, nā coó naquixi chichi Israel nā ná cahan núu na sahá nā cíu cuénta Jesús. <sup>3</sup>Sahá nā cán quéa nasanduu nahá chágá ví Pablo xihín Bernabé mé ñuu cán. Ta co ná yihví na cahan chágá ví na tuhun Ndióxi jáchí cándezéé ini na Jesús, xitoho na. Ta nasahan Ndióxi ndée á nu ná nā ná cuu caja na cuahá nūu nā náhnu ta xihín nā yóho nacandaa ini ñayivi nā mé a ndaa táchí quíhví ini ndusa Ndióxi ñayivi. <sup>4</sup>Joo ñayivi ñuu cán nacasáhá nā sáhndá táhan na jáchí java na cuahan nā jatá nā Israel ta java na cuahan jatá nā apóstol cán. <sup>5</sup>Anda já nā Israel xihín na coó naquixi chichi Israel najándique táhan na tuhun na xihín nā jutixia ñuu cán nā ndúcú na canhá quini na xihín na apóstol ta ndúcú na cahní na dā xihín yuu. <sup>6</sup>Joo tá nacandaa ini Pablo xihín Bernabé nā sácu ini nā cán caja xíxi na xihín dā já naxinu da cuahan da chí estado Licaonia. Naxinu coo da ñuu Listra xihín ñuu Derbe xihín java gá ñuu válí ñúhu ndijáá chí cán. <sup>7</sup>Ta cán nacahan ri da tuhun vaha sahá Jesús nuú ñayivi ndúu cán va.

*Cúun na yuu Pablo ñuu Listra*

<sup>8</sup>Tá naxinu coo da ñuu Listra cán já nandique táhan da xihín in dataa, dā a cuú caca. Ta íin coo dā cán jáchí cíu dā quíhví sahá janda tá nacacu da cása da já. <sup>9</sup>Ta íin coo dā quíhví sahá yóho tása joho da nu cahán Pablo. Anda já nandicoto nihni Pablo nu dā ta cándaa ini Pablo nā cuu ndivahá da jáchí cándezéé ini dā quíhví cán Ndióxi. <sup>10</sup>Sahá nā cán quéa nacayuhú Pablo nu dā já cachí dā já:

—Cuáhán candichi —nacachi Pablo.

Ta chí ivi láq nacandita da ta nacasáhá xíca da. <sup>11</sup>Tá naxini ñayivi ñuu cán nā nandaja vaha Pablo dā cán já nacasáhá nā cán cayuhú cóhó nā mé tuhun cahán nā ñuu Licaonia, nā co cándaa ini Pablo. Já cachí nā já:

—Ndióxi cíu dā yóho nā naquixi indív túní a ñéhe cuití dā nahna ñayivi —cáchí na cayuhú nā tuhun mé ná.

<sup>12</sup>Nacachi nā cán nā Bernabé cíu dā in ndióxi naní Júpiter. Ta Pablo cíu dā in ndióxi naní Mercurio cáchí nā jáchí mé dā cíu dā cahán chágá. <sup>13</sup>Ta dā cíu jutu ñuu veñuhu Júpiter, nā ndácaan yuhú ñuu cán náhe da tindiquí xihín cuahá ita jáchí ndúu ndhi nā cán cahní nā tindiquí joco nā rí nu Pablo xihín ñuu Bernabé caja cahón na dā. <sup>14</sup>Joo tá nacandaa ini Pablo xihín Bernabé nā ndúu nā cán caja cahón na dā já nandata dā jáhma dā sahá nā co táchán ini da xihín nā cája na. Ta já nacasáhá nā xínu na naquíhví na tañu ñayivi cán. Ta cayuhú Pablo já cachí dā já xihín ná:

<sup>15</sup>—Candehé ndo. A váha toho nā ndúu ndó caja ndó yóho jáchí ñayivi xihín mé va ndó cíu ndehe. Ndá cuénta quéa cúní ndó caja cahón ndó ndehe. Ta chuun vaxi nde yóho quéa caxi tuhun nde xihín ndó tuhun vaha sahá Jesús. Ta já ndítahan nu ndo jándacoo ndó nā a váha jan. Ta candico ndó Ndióxi tacú, mé á nacavaha indíví xihín ñuyíví xihín tañuhú xihín ndhi ñaha ndúu nuú in in nā cán. <sup>16</sup>Anda sanahá najándicoo ndáha Ndióxi ñayivi ndijáá nación caja na ndíá cúní mé va na caja na. <sup>17</sup>Joo níi tiempo najánahá Ndióxi yo cíu mé á nu ná jáchí níi tiempo nacaja vaha mé a xihín ná. Mé a chíndahá javi nu yo. Ta mé a cája nā ná cana vaha ñundáhyi yo. Ta cája mé a nā ná a cámáni nā cuxú já ná cajii iní yo —nacachi Pablo xihín nā cán.

<sup>18</sup>Ta vatí nacahan Pablo tuhun yóho xihín ná joo iħví ndivahá já nacava da jiní ñayivi cán nā ná a cahní nā tindiquí joco nā nu dā nā caja cahón na dā.

<sup>19</sup>Tá nandihí já naxinu coo java nā Israel, nā naquixi ñuu Antioquia xihín java nā naquixi chí ñuu Iconio. Já nacava na jiní ñayivi já nacati na nacuun na yuu Pablo. Ta tás nacahán nā naxihí dā já ñúhu na dā nacahan nā najácaná na dā yuhú ñuu. <sup>20</sup>Joo nā cíu cuénta Jesús nacata na ta nacava nuu na nu cánduhú Pablo ta já nandacoo da já naquíhví tucu da ñuu cán. Ta inga quiví itaq já naquee da xihín Bernabé cuahán dā ñuu Derbe.

<sup>21</sup>Tá naxinu coo ndív dā cán ñuu Derbe já nacasáhá dā caxi tuhun da nuú ñayivi sahá Jesús ta cuahá ná nandiquehe íchi

cuéntá Jesús ñuu cán. Anda jáví nandicó coo Pablo xihín Bernabé chí ñuu Listra xihín ñuu Iconio já naquee da cuahan da chí Antioquia.<sup>22</sup> Ta mé ñuu cán najácahan da na cíú cuéntá Jesús ña ná coo ndacú chágá na ta ná a jándacoo na ña cándeé ini na Jesús. Ta nacachi da ña já ndusa ndoho ndivaha ini na janda quiáhva ná xinu coo na cacomí Ndióxi cuéntá sahá ná.<sup>23</sup> Tá nandihi já ñasacu Pablo xihín Bernabé java da sacuha ña ná cacomí da cuéntá sahá na cíú cuéntá Jesús in ñuu cán. Ta tá nandihi naxijuhun na ta naxica fahví na nu Ndióxi sahá ná já nandiquiáhva da na ndáhá Ndióxi ña ná candaas mé á na jáchi cándeé ini na mé á.

Ndícó coo Pablo xihín Bernabé ñuu Antioquia ñaq ndácaqan estado Siria

<sup>24</sup> Tá nandihí já nayaha Pablo xihín Bernabé chí estado Pisidia janda quiahva naxinu cōo na ñundáhyi cuéntá Panfilia. <sup>25</sup> Ta nacahan na tūhun vaha sahá Jesús nuú ñayivi ñuu Perge. Anda já naquee na cuahán na chí ñuu Atalia. <sup>26</sup> Ta ñuu Atalia cán nandaa na barco já nandicó cōo na chí Antioquía nuú naquee na jihna. Jáchí mé cán cúu nuú nandiquiahva na dā ndáhda Ndióxi ña ná caja da chuun mé á. Ta viti sa najándihí da chuun natahnda nu dá cán. <sup>27</sup> Tá naxinu cōo Pablo xihín Bernabé mé ñuu Antioquía cán já najátaca da tócó ndihi na cúu cuéntá Jesús ndúu ñuu cán já nändicani da tócó ndihi ña nacaja Ndióxi xihín dá. Nändicani da ndá quiahva nasahan Ndióxi ñamani nuú na cōo naquixi chichí Israel ñaná ná ndiquehe na íchi cuéntá mé á. <sup>28</sup> Ta nacandoe nahá Pablo xihín Bernabé ñuu Antioquía cán xihín na cúu cuéntá Jesús.

15

*Ndítaca na sacuahá cuéntá Jesús*

<sup>1</sup> Ta ndajá coo mé tiempo já java dataas, dà naquixí chí estado Judea naxinu dà ñuu Antioquía cán. Ta nacásahá ná jánahá na nuú na cíú cuénta Jesús ná ndítahan nü ná caja na ná cachí ley Moisés ná ná chican na marca yíquí cuñu na já ná cuu jácacu Ndióxi ná. <sup>2</sup>Joo Pablo xihín Bernabé nacásahá cání táchan ndee yúhu dà xihín na Judea can sahá ná yóho. Ta sahá ná nandituhún cuahá ná sahá ná yóho sahá ná cán quéa násacu ini na cíú cuénta Jesús cán chindahá ná Pablo xihín Bernabé xihín java ga dà cíú cuénta

Jesús nã ná cuhun nã ñuu Jerusalén já ná  
ndituhún chágá nã sahá nã yóho xihín nã  
apóstol ta xihín nã sacuáha cómi cuéntá  
sahá na cúú cuéntá Jesús ndíu Jerusalén  
cán.

<sup>3</sup> Anda já ná cúú cuéntá Jesús ndíu An-tioquía nachindahá ná ná cán chí naquee na cuahán ná. Ta nü xíca na cuahán ná cán nayaha na chí ñundáhyí Fenicia xihín ñundáhyí Samaria. Ta cán nandicani na nuú na cúú cuéntá Jesús ndá quiahva nandiquehe na coó naquixi chichí Israel íchí cuéntá Jesús ta já najándacoo na cos-tumbre yatá nasacaja na jilhna. Chí nacajii ndivaha ini ná cúú cuéntá Jesús cán tá naxini johno na ñá yóho.

<sup>4</sup> Tá naxinu coo Pablo xihín Bernabé xihín java ga na cán ñuu Jerusalén já nandiquehe vaha na cíú cuéntá Jesús ndíuu ñuu cán na. Ta jári na apóstol xihín na sacuahá veñuho cán nandiquehe vaha na na. Anda já nandicaní Pablo nuý na cán tócó ndíhi ña náhnu nacaja Ndióxi xihín dá. <sup>5</sup>Joo java na fariseo, na sá ndiquehe íchi cuéntá Jesús nandaca ndichi na já nacásáhá cachí na já:

—Ndítahan nuú ná cíú cuéntá Jesú, ná  
coó naquixi chichi Israel chicqan ná marca  
yíquí cüñu ná. Ta ndítahan nu mí cahán í  
xihin ná ná ná cacu vaha na ley Moisés —  
nacachi na fariseo cán.

<sup>6</sup> Anda já nataca ná apóstol xihín ná sacuha veñihu ñá ná ndituhún ná ndaja coo sahá ñá yóho. <sup>7</sup> Sa nandituhún cuahá ndivaha na cán sahá ñá yóho. Anda já nandaca ndichi Pablo tañu ná cán ta já nacachi da já:

—Sa xíni vaha ndó, ñani i ña nacaxi Ndióxi yehe jihna ña ná caxi tuhún i tuhun vaha saha Jesús nuú na coó naquixi chichi Israel já ná candeé ri ini na cán va Jesús ña ná jácacu Ndióxi na. <sup>8</sup> Ta mé Ndióxi, mé a xíni ndaja cáá ínimá in in ñayivi, mé a cán quéa najánahá nu yo ña ndíquehe vaha mé á na tóho. Jáchi násahan ínimá yii mé á nu ná tá quiahva nacaja xihín mí, na naquixi chichi Israel. <sup>9</sup> Ni in tuhún toho í coó cúcú yo na vaha chágá a juú ga inga na Ndióxi. Jáchi tá quiahva nandaja vií Ndióxi mí sahá ña candeé iní Jesucristo quiahva já nandaja vií ri a na cán va sahá ña candeé ini na Jesucristo. <sup>10</sup> Ta viti cúcú á tátuhun nandindójó ndó ña nacaja Ndióxi tá nachin-dahá Jesucristo quiiv a sahá cuachí. Ta viti

cúní ndó caja ndúsá ndó xihín ná tóho yóho  
ñá ná cacu vaha na ley Moisés. Ta sa cándaa  
ini ndó ñá ni mí ta ni tásáhnu jícó yo a cuú  
caja í cacu vaha í ley cán.<sup>11</sup> Joo ñá cández  
cáhnu iní quéa ñá jácacu maní uun Ndióxi  
mí sahá ñá táchví ini Jesucristo sahá mí. Ta  
quiähva já táchví ri iní a sahá ná tóho cán  
—nacachi Pedro xihín ná.

<sup>12</sup> Ta xihín ñá yóho nacatáji yúhu tóco  
ndihi na cán. Ta táo joho na tá ná  
casáhá Pablo xihín Bernabé ndícani da nu  
ná tóco ndihi ñá náhnu xihín ñá xituhún  
ñá nasahán Ndióxi ñamani nu dá caja da  
nuú na coó naquixi chichi Israel cán.<sup>13</sup> Tá  
nandihi nacahan da cán já nacásáhá Jacobo  
cáchí da já:

—Cuni joho ndó ná cahan i xihín ndó,  
ñani í.<sup>14</sup> Sa nacaxi tuhún Simón, da naní  
tucu Pedro nu yo tá nu cuítí nacaja Ndióxi  
ñamani xihín ná tóho na nacaxi a ná ñá ná  
nduu na ñayivi cuénta mé á.<sup>15</sup> Ta in quiähva  
cahan ñá yóho xihín ñá nacahyí na profeta  
sanahá tá nacahyí na ñá nacachi Ndióxi;

<sup>16</sup> Tá sa nayaha tiempo já ndicó coo tucu  
ú. Ta tá quiähva nacaja cahnu  
ñayivi yehe tá tiempo nasaomí  
David cuénta sahá ñayivi Israel,  
quiähva já vaxí quívi caja i ñá ná caja cahnu  
tucu na yehe.

<sup>17</sup> Caja i já jachí cúní ñá ná ndinducú ná  
tóho yehe ñá ná cacuu u xitoho tóco  
ndihi na,  
mé ná cuú ná nacaxi yehe ná cacuu na  
cuénta mí í.

<sup>18</sup> Ñá yóho quéa nacachi Ndióxi sanahá ndi-  
vaha tá nacaxi tuhun a ndaja coo  
tiempo viti —nacachi Jacobo xihín  
na cán.

<sup>19</sup> Já nacachi tucu Jacobo já xihín ná:  
—Sahá ñá cán quéa cahan i ñá co ndítan-  
caja ndúsá yo xihín ná tóho cacu vaha  
na ley Moisés jachí nacásáhá ndíco ná íchi  
cuénta Ndióxi viti.<sup>20</sup> Joo ñá ndítahan caja í  
quéa cahyí yo in carta ná cuhun a nuú ná  
cuú cuénta Jesús ndúu ñuu Antioquia já ná  
caja na ñamani ñá ná a cáxí ná cuú quíti,  
rí najoco ñayivi nuú tñiñu yúu. Ta ná a cóo  
na xihín ná co cuú ñajíhí ná a yíi ná. Ta  
coto ná a cáxí na cuú quíti, rí nasahnú. Ta  
coto ná a cáxí na níi.<sup>21</sup> Jachí janda sanahá  
najánaha na ñá yóho nuú ñayivi ndijáá ñuu  
tá quívi ndiquehe ndée ná tá jánaha ná ley  
Moisés nu ná ini veñuhu —nacachi Jacobo  
xihín ná.

<sup>22</sup> Anda já ná apóstol xihín ná sacuahá  
veñuhu cán xihín tóco ndihi ná cuú cuénta  
Jesús najándique táhan na tuhun na ñá caxi  
na tañu tóco ndihi ná cuú cuénta Jesús cán  
java da ná cuhun ñuu Antioquia xihín Pablo  
xihín Bernabé. Ta da nacaxi na cuhun cuú  
Judas, da naní tucu Barsabás xihín Silas.  
Ndívi da yóho cuú da fin sahá nuú ná cuú  
cuénta Jesús cán.<sup>23</sup> Ta ñá yóho cuú tuhun  
ndáa nu carta ñéhe ná cán cuahan na:

“Tóco ndihi ndehe, ná cuú apóstol xihín  
ná sacuahá veñuhu xihín ná cuú cuénta  
Jesús ndúu ñuu yóho chíndahá nde Ndióxi  
coo ndóhó, ná cuú cuénta Jesús, ná coó  
naquixi chichi Israel, ná ndúu ñuu Antio-  
quia xihín nundáhyi cuénta Siria xihín Cili-  
cia jan.<sup>24</sup> Sa nañehé nde tuhun ñá naquee  
java na cuú cuénta Jesús ñuu yóho nasaña  
na chí jan tá coó naxica na ñamani nuú  
nde cuhun ná. Ta najáquihví ná ndohó ta  
najájana na jiní ndó xihín tuhun cahan ná  
jachí cáchí ná xihín ndó ñá ndítahan nu  
ndó chícaqan ndó marca yíquí cuñu ndó ta  
ndítahan cacu vaha ndó ley Moisés já ná  
cuu cacu ndaa íníma ndo.<sup>25</sup> Sahá ñá cán  
quéa ñíhu joho ndihi nde ñá ná caxi nde  
java ñaní já ná catáhan da xihín Pablo xihín  
Bernabé saa da coto nihni da ndohó.<sup>26</sup> Mé  
Pablo xihín Bernabé yóho ndúu tiahva da  
quivi da sahá Jesucristo, mé a cuú xitoho  
í.<sup>27</sup> Ta chíndahá nde Judas xihín Silas já ná  
cahan yúhu mé ná xihín ndó já ná ndicari  
na sahá tóco ndihi ñá yóho nu ndo.<sup>28</sup> Mé  
íníma yíi Ndióxi nacahan ndehe ñá co  
ndítahan nuú nde caja ndúsá nde xihín ndó  
cacu vaha ndó tóco ndihi ñá sáhndá ley  
Moisés. Joo ná cahan nde xihín ndó ndía  
quéa co ndítahan caja ndó:<sup>29</sup> Coto a cáxí ndó  
cuú quíti, rí najoco na nuú tñiñu yúu. Ta  
coto a cáxí ndó níi ta a cáxí ndó cuú quíti,  
rí nasañnu. Ta coto a cóo ndó xihín ñajíhí á  
yíi inga na. Tá ná cacu vaha ndó tóco ndihi  
ñá yóho já quéa cuú ndó ná caja vaha. Ñá  
yóho cuú tuhun cahan nde xihín ndó ta ná  
coo Ndióxi xihín ndo.” Ñá yóho cáchí carta  
nachindahá ná nuú ná ñuu Antioquia cán.

<sup>30</sup> Anda já naquee ná cán cuahan ná ñuu  
Antioquia. Ta tá naxíñu ná ñuu Antio-  
quia cán já najátaca na tóco ndihi ná cuú  
cuénta Jesús cán já nandiquihva na carta  
nu ná.<sup>31</sup> Ta tá nandihi nacahi ná cuú  
cuénta Jesús mé carta já nacajii ndivaha ini  
na jachí nandinéé chágá ví ini na nacaja ñá  
cáchí carta cán.<sup>32</sup> Mé Judas xihín Silas cuú

dá profeta, da jáyaha tuhun cáhan Ndióxi nuú ñayivi. Ta xihín ña yóho nasahan da cuahá tuhun ndee ini na cíu cuéntá Jesús.<sup>33</sup> Nasanduu na cán chá quivi ta chí násacu ini Judas xihín Silas ndicó coo da ñuu Jerusalén jáchí cán ndúu na nachindahá ñahá ñuu Antioquía. Já nandinday ína cíu cuéntá Jesús da ña ná coo vaha da cíu cuhun da íchi.<sup>34</sup> Joo násacu ini Silas cando da ñuu Antioquía cán.<sup>35</sup> Ta nacandoo Pablo xihín Bernabé chágá quivi ñuu Antioquía cán ta xihín cuahá java ga na najánaha chágá na tuhun vaha sahá Jesús nuú ñayivi.

*Cughan tucu Pablo cughan dá tuhun vaha sahá Jesús nuú ñayivi*

<sup>36</sup> Tá nayaha quivi já nacachi Pablo já xihín Bernabé:

—Cóho coto nihní na cíu cuéntá Jesús ndúu ndijáá ñuu nuú náxica nuu ínacahán yó tuhun Ndióxi jihna já ná candehé yo ándico yii va na Jesús —nacachi da.

<sup>37</sup> Cándusa Bernabé cuhun da joo cúní da candaca tucu da Juan, da cáhan na Marcos xihín ña cuhun da xihín ná.<sup>38</sup> Joo Pablo nacahán da ña vaha chágá ná a cánehe na da cuhun da xihín ná jáchí najándacoo da na tá naxinu na estado Panfilia sahá ña coó naxeen ga da caca nuu da caja da chuun Ndióxi xihín ná.<sup>39</sup> Nandituhún cuahá ná sahá ña yóho joo coó nandique táhan tuhun na sahá ña cán quéa nasañda táhan na. Sahá ña cán quéa nañiehe Bernabé Marcos cuahán xihín dá chí isla Chipre.<sup>40</sup> Ta nacaxi Pablo Silas candaca táhan xihín dá. Ta naxica tähví na cíu cuéntá Jesús nuú Ndióxi sahá dá ña ná chindeé a da nuú cuhun da. Anda já naquee da cuahán da.<sup>41</sup> Nayaha da chí ñundáhyi Siria xihín ñundáhyi Cilicia ta níi cíu nuú cuahán da sáhan da tuhun ndee ini na cíu cuéntá Jesús ña ná candeechága ini na mé á.

## 16

*Cátáhan Timoteo xíca da xihín Pablo xihín Silas*

<sup>1</sup> Ta nayaha Pablo xihín Silas ñuu Derbe anda já naxinu coo na ñuu Lístra. Ta cán nandiñéhe ná in da cíu cuéntá Jesús, naní Timoteo, dá cíu jahyi in ñá cíu cuéntá Jesús, ñá naquixi chichí Israel. Ta tátá da cíu griego.<sup>2</sup> Ta ná cíu cuéntá Jesús ndúu ñuu Lístra xihín ná ndúu ñuu Iconio nacahán vaha na sahá Timoteo.<sup>3</sup> Cúní Pablo ña ná catáhan Timoteo xihín dá caca nuu da xihín dá sahá ña cán quéa nacaja Pablo

ñá nachicaan na marca yiquí cínu Timoteo tá quiáhva cáchí ley Moisés já ná a cáhan níu na Israel ndúu ndijáá ñuu válí cán sahá dá. Jáchí sa xíní vaha ndihi na cán ña cíu Timoteo jahyi in taa griego sahá ña cán quéa coó nachicaan na marca Timoteo tá loho chá da.<sup>4</sup> Ta já naquee ndihi na cán cuahán na ta níi cíu ñuu ná xíca na cuahán na cíxi tuhun na nyú na cíu cuéntá Jesús ña ná caja na ña nacachi na sacuahá xihín na apóstol ndúu ñuu Jerusalén cán.<sup>5</sup> Xihín ña yóho nandindacu chágá na cíu cuéntá Jesús ta cándezé cáhnu chágá ini na mé á. Ta in in quivi yáha joho ndícuahá chágá ñayivi ndíhvi íchi cuéntá Jesús.

*Ña naxini Pablo nacaja Ndióxi tá nasañin da ñuu Troas*

<sup>6</sup> Ta nasañi ínima yii Ndióxi na cán ña ná a cíhun ná estado Asia cahan na tuhun vaha sahá Jesús nuú ñayivi cán. Sahá ña cán quéa nayaha na ñundáhyi cuéntá Frigia xihín Galacia cuahán na.<sup>7</sup> Já naxinu coo na yúhu estado Misia. Ta chí cán yaha na cuhun ná ñundáhyi cuéntá Bitinia nacahán na. Joo coó nasañan ínima yii Ndióxi ñamani nu ná caja na ña.<sup>8</sup> Anda já nayaha saa na estado Misia janda quiahva naxinu coo na in ñuu naní Troas.<sup>9</sup> Ta in ñuu nani ín da mé ñuu Troas cán nasañi ndímáhnú Pablo. Ta ña naxini da cíu in taa, da naquixi chí estado Macedonia. Ta cándichi da cáhan ndahví dá xihín Pablo já cáchí dá já: “Naha ndó chí Macedonia yóho ña ná chindeé ndó ndehé.”<sup>10</sup> Tá nandican Pablo ña yóho nuú nde chí ivi láá nacaja tähva nde ñaha nde jáchí sa nacandaa caxí ini nde ña mé Ndióxi quéa cán ndehé ña ná cuhun nde estado Macedonia cán já ná caxi tuhun nde tuhun vaha sahá Jesús nuú ñayivi ndúu cán.

*Xínú coo Pablo xihín na xíca xihín dá ñuu Filipes*

<sup>11</sup> Tá nandihí já nandaa nde barco ñuu Troas já naquee nde cuahán ndacu nde isla naní Samotracia. Ta janda quivi itaan já naxinu coo nde ñuu Neápolis.<sup>12</sup> Ta cán nánuu nde mé barco cuahán sahá nde chí ñuu Filipes. Mé ñuu Filipes cán cíu á ñuu ña ín chágá sahá nuú java ga ñuu válí ñúhu chí Macedonia cán. Ta ndíco a ñuu Roma. Ta nasanduu nde ñuu Filipes cán chá quivi.<sup>13</sup> Ta in quivi ndíquehe ndee ná já naquee nde cuahán nde yuhú ñuu yati yuhú yuta nuú sá taca ñayivi xíca tähví na nuú Ndióxi. Já

nasacoo nde cán ta nacasáhá nde cáhan nde tūhun vāha sahá Jesús nuú najihí, na tacá cán.<sup>14</sup> In mé ñáñahá cán naní ña Lidia ta cíú ñá ñuu Tiatira. Mé Lidia yóho cíú ñá ñá jícó jáhma vāha ña color ndíhí. Ta cíú ñá in ñá caja cahnu Ndióxi. Ta nani xini joho ñá ña cáhan Pablo sahá Jesús já nasuná Ndióxi xini túni ña já nacandusa ña ña cahnu Pablo cán.<sup>15</sup> Tá nandihi nacandúta ña xihín na vehe ñá ta já cachí ña já xihín nde:

—Tá ta mé a ndaq ndicuni ndó yehé ña cíú ña cuénta Jesús caja ndó ñamani sáa ndó vehe e coo ndó —nacachi ña xihín nde.

Ta nacaja ndusa ña xihín nde chí nacan-doo tóo nde vehe ñá cán.

<sup>16</sup> Ta ndaja coo in tañu tá cuahán nde nu sá xica tahví nde nu Ndióxi já nanditahan nde in ñá tacú, ñá ndácaan ímima quini ini. Ta caja ña cán ñá ná ndicuni ini ñá. Mé ñá tacú yóho cíú ñá naxeen na. Ta mé xitoho ñá cán tává cuahá dá jíuhún sahá ña ndicuni ini ñá.<sup>17</sup> Ta mé ñá tacú yóho nacasáhá ña ndíco ñá jata Pablo xihín jata nde ta cayuhú cóhó ña já cachí ña já:

—Da caja cahnu Ndióxi, ña cahnu íin indívi cíú da cásahan yóho. Ta xíca da caxí tuhun da xihín ndó ndá quiahva cuu cacu ndaa ímima ndo —cachí ña cayuhú ña.

<sup>18</sup> Já cuití já cuití caja ñá cuahá quivi janda quiahva co ndéé ga ini Pablo xihín ña caja ñá. Chí nandicoto nihni Pablo nu ñá já nacachi da já xihín ímima quini ndácaan ini ñá cán:

—Xihín quivi Jesucristo sáhndá i chuu-nuun ña ná queún ini ñá loho yóho —cachí Pablo.

Chí ivi laá naqueta ímima quini cán cuahán.

<sup>19</sup> Joo tá naxini na cíú xitoho ñá cán ña a cóo ga cana jíuhún na caja ñá cán já natíin na Pablo xihín Silas já ñehe na da nasa-han na vechúun nuú na jutixia.<sup>20</sup> Tá naxinu coo na cán já nacachi na já xihín da cíú juéxe cán:

—Da naquixi chichi Israel yóho nandai cuu da jándiníhi da ñayivi ñuu í.<sup>21</sup> Jáchí jánahá da costumbre mé va da nuú ñayivi. Ta mí a cíú candusa í ta ni a cíú caja í costumbre da yóho jáchí cíú yó ñayivi ndíco ñuu Roma —nacachi na cán xihín juéxe.

<sup>22</sup> Andá já nandicuita ñayivi xihín dá. Já nasa-hnda juéxe cán chuun ña ná tavá na jáhma Pablo xihín Silas ta ná cani na ndívi

da xihín yíto.<sup>23</sup> Tá nandihi nacani quini ndiváha na da já nataán na da vecaa. Ta nasa-hnda na chuun nuú da ndáá vecaa cán ña ná canda vāha da da.<sup>24</sup> Tá natahnda chuun yóho nuú da ndáá vecaa cán já nachica-an da Pablo xihín Silas janda sá vehe cíú vecaa cán. Ta já nachicaan da sahá dá tañu ivi yíto naní cepo já ná ndituun vāha da.

<sup>25</sup> Joo tátuhun java ñuu xíca tahví Pablo xihín Silas nu Ndióxi ta xíta da ña caja cahnu da mé á nani taa joho java ga na ñuu ini vecaa cán nu cahna da.<sup>26</sup> In jonáá cuití nacasáhá tåan ndee ndiváha chí janda yuu ndíhu sahá vecaa cán canda. Andá já nñanu tóco ndihi yéhé caa cán ta nacyu cadena nasañdico tóco ndihi na nasañhuu vecaa cán.<sup>27</sup> Andá já nandicaxí ini da ndáá vecaa cán ta tá naxini da núná yéhé caa cán já natuhun da yuchú cánjí dá ña cahní da mé dá jáchí nacahán da sa naquee ndihi na nasañhuu vecaa cán cuahán na.<sup>28</sup> Joo nacayuhú Pablo nu dá já nacachi Pablo já xihín dá:

—A cahni tohún yohó jáchí yóho ndíu ndihi va nde.

<sup>29</sup> Andá já naxica da ndáá vecaa cán in lámpara já xíru da nandilvi da nu ndíu na vecaa. Ta chí quíji mé dá xihín ña yíhví da já nacaxítí da nu Pablo xihín nu Silas.<sup>30</sup> Tá nandihi já natavá da na já nacasáhá ndáca-tuhun da na já nacachi da já:

—Ndítahan candusún Jesucristo, xitoho í já ná cazu ndaa ímim xihín ímima tóco ndihi na vehún —nacachi da.

<sup>31</sup> Andá já nandicu ñehe Pablo xihín Silas tuhun nu dá já cachí da já xihín dá:

—Ndítahan candusún Jesucristo, xitoho í já ná cazu ndaa ímim xihín ímima tóco ndihi na vehún —nacachi da.

<sup>32</sup> Andá já nacasáhá Pablo ndicani da tuhun vāha sahá Jesús nuú da cán xihín nu tóco ndihi na ndíu vehe da cán.<sup>33</sup> Ta mé hora já nacaja tátá da ndáá vecaa cán nuú nandicuehe jata Pablo xihín jata Silas nuú nacani yíto cán. Ta tá nandihi já nacandúta da ndáá vecaa cán xihín tóco ndihi na vehe da.<sup>34</sup> Tá nandihi já ndáca da Pablo xihín Silas nasa-han da xihín dá vehe da. Ta cán nacaja ndíví na ña cuzu Pablo xihín Silas. Ta chí nacajii ndiváha ini da ndáá vecaa cán xihín na vehe da jáchí sá nandiquehe na íchi cuénta Jesús.

<sup>35</sup> Ta naha inga quivi itaen já nachindahá na cíú juéxe cán policia nuú da ndáá vecaa

cán ña ná janí dà Pablo xihín Silas vecaa.

<sup>36</sup> Anda já nacachi dà ndáá vecaa cán já xihín Pablo:

—Nasahnda ná cíu juéxé chuun nuú i ña ná janí i ndohó cuhún ndo. Sáhá ña cán quéa cáxi tuhun i xihín ndó cuáhán quee ndó ta ná cuhún Ndióxi xihín ndo —nacachi da xihín dà.

<sup>37</sup> Joo nacahan Pablo xihín dà cíu policia cán já nacachi da já xihín ná:

—A váha toho nacaja na xihín nde jáchi cíu nde ná romano ta ná jutixia jan nacami qui ni na ndehe nu táchí tóco ndihí ñayivi tá cámání caja vií ná sahá nde. Ta tá nandihí já nataán jíin ga ná ndehe vecaa. Ta viti cími na janí jéhó na ndehe quee nde cuhún nde. Joo a váha toho caja na já. Sáhá ña cán quéa a quéta nde janda quiqhva ná quixi mé ná tavá ná ndehe já quee nde —nacachi Pablo xihín dà cíu policia cán.

<sup>38</sup> Anda já nasahan ná cíu policia nandicaní na nuú ná cíu juéxé ña nacachi Pablo xihín ná. Tá nacandaa ini ná cíu juéxé cán ña cíu Pablo xihín Silas dà romano chí nayihví ná. <sup>39</sup> Anda já nasahan ná naxica ná ñamani nu Pablo xihín nu Silas ña ná caja cáhu ini dà sahá ña nacaja na. Já natavá ná dà vecaa ta tá nandihí já naxica ná ñamani nu dà ña ná quee da ñuu cán cuhun dà. <sup>40</sup> Tá naquee Pablo xihín Silas vecaa já nasahan na vehe ñá naní Lídia. Ta tá nandihí nandique tahan da xihín na cíu cuénta Jesús ndíu cán já nasahan dà tuhun ndéé ini na anda já naquee da cuahen dà.

## 17

### Ndíñihi ñayivi ñuu Tesalónica

<sup>1</sup> Naní xíca Pablo xihín Silas cuahen dà íchí nayaha da chí ñuu naní Anfípolis xihín inga ñuu naní Apolonia anda quiqhva naxiñu coo na ñuu Tesalónica. Cán nasañiñi veñihu nu tácá ná Israel. <sup>2</sup> Ta sahá ña nacan Pablo sáhan dà veñihu quiví ndíquehe ndéé ná sahá ña cán quéa naquihvi da veñihu cán. Ta tixi uní semana nacahan da tuhun Ndióxi xihín ná mé quiví ndíquehe ndéé ná. <sup>3</sup> Ta nu libro yii Ndióxi tává Pablo tuhun ndícani da nu ná ña ndítahan nuú Jesucristo ndoho ini a. Ta tá sa nandihí naxihi a já nditacu a jáchi já cachí libro yii Ndióxi coo. Já nacachi Pablo já xihín ná:

—Mé Jesús, mé a cáhan i sahá nu ndo yóho, mé a yóho cíu Cristo, ña nacindahá Ndióxi cacomí cuénta sahá ñayivi —nacachi Pablo.

<sup>4</sup> Ta chí nacandusa java na Israel ña nacachi Pablo xihín ná. Anda já nacatáhan na xihín Pablo xihín Silas xíca nuu na. Ta cuahá ri ná griego, na sa cája cáhu Ndióxi ndíu cán nacandusa na ña nacachi Pablo xihín ná. Ta nacandusa ri cuahá najihí, ná íin toní ñuhú ñayivi xihín ta nandihvi na íchí cuénta Jesús. <sup>5</sup> Joo ná Israel, na co cándusa Jesús nacásahá cáhíhví ini na. Sáhá ña cán quéa najátaca na java taa quini, dà coó chuun nu xíca nuu mé cayé cán. Já nacásahá ná jándinjhi na ñayivi mé ñuu Tesalónica cán. Anda já cáti na nasahan na vehe in dà naní Jasón. Ta xihín ña ndíusa naquihvi na vehe dà cán ña ndínducu ná Pablo xihín Silas ña tavá ná dà ndíquihva na dà nuú ná sacuahá ñuu cán. <sup>6</sup> Joo coó nandihéhe ná Pablo xihín Silas cán sahá ña cán quéa janda mé Jasón, dà xihín ñaha vehe cán ñuhú na dà xihín java ga ná cíu cuénta Jesús cuahen ná nuú ná jutixia ñuu cán. Tá nandihí já cayuhú ná já cachí na já xihín ná jutixia cán:

—Dà naní Pablo xihín dà naní Silas xíca nuu da níi cíu ñuyíví jájana da jiní ñayivi. Ta quiqhva já cíni dà caja da xihín ñayivi ñuu í. <sup>7</sup> Ta dà naní Jasón yóho nandiquehe vaha da dà cán vehe da. Ta xihín ña cája ná yóho náhá ña co cája na ña sáhndá ley ñuu Roma ta ni co cája cáhu na dà cómí cuénta sahá ñuu Roma. Jáchí mé ná yóho xíca na cáhan ná ña íin inga dà cómí cuénta sahá ñayivi. Ta cachí ná cíu dà in dà naní Jesús —nacachi na.

<sup>8</sup> Tá naxini joho ñayivi xihín ná jutixia cán ña yóho chí nacásahá ná ndívaña. <sup>9</sup> Joo nacahvi Jasón xihín java ná cíu cuénta Jesús cán jiyuhún nuú ná jutixia cán já najaní ñahá ná.

### Cuahen Pablo xihín Silas ñuu Berea

<sup>10</sup> Ta tá sa nacuaá mé ñuu já nacindahá ná cíu cuénta Jesús cán Pablo xihín Silas já ná cuhún dà chí ñuu Berea. Ta tá naxiñu coo da ñuu Berea cán já nandihvi da veñihu ná Israel cán. <sup>11</sup> Ta naxuná chágá ná Israel cán ínimá ná a juú ga ná ndúu ñuu Tesalónica chí cájii íní ná nandiquehe na tuhun Ndióxi. Ta ndijáá níi quiví ndínducu ná nuú tuhun Ndióxi ña á mé a ndaa cíu

ñá jánahá Pablo nu ná. <sup>12</sup> Ta cuahá táhan na naquixi chichi Israel cán nandiquehe na íchi cuéntá Jesús. Ta cuahá najihí griego, na tácú ini nación cán xihín cuahá natqa griego nandiquehe na íchi cuéntá Jesús. <sup>13</sup> Joo tá nañhé Pablo na Israel nuu Tesalónica tuhun ñá íín Pablo nuu Berea cáhan da tuhun Ndióxi nuu ñayivi chí iví laá nasañeha na jándinjhi na ñayivi nuu Berea cán já ná ndicuita na xihín Pablo. <sup>14</sup> Joo iví laá na cúu cuéntá Jesús cán nachindahá na Pablo cuahán dà yati yuhú tañuhú nani nacandoo Silas xihín Timoteo nuu Berea cán. <sup>15</sup> Ta java na cúu cuéntá Jesús ndáca na Pablo ta nasañeha na dà jandá nuu Atenas. Ta tá nandicó coo na cán nuu Berea já ñéhe na chuun ñá ná cuhun quí Silas xihín Timoteo nuu Atenas ná ndique táhan da xihín Pablo.

### Íín Pablo nuu Atenas

<sup>16</sup> Nani ndáti Pablo xinu coo Silas xihín Timoteo nuu Atenas cán já nacasáhá ndíhi ini da jáchí níí cúu ñuu cán nachutú ndaa xihín cuahá tñijnu yúú ndicahán ñayivi nuu cán. <sup>17</sup> Sahá ñá cán quéa nacasáhá Pablo cáhan da tuhun Ndióxi xihín na Israel ini veñuhu na. Ta quiahva já nacahan ri da tuhun Ndióxi xihín java na tóho, na cája cáhnu Ndióxi cán. Ta jári ndijáá níí quiyi cáhan da tuhun Ndióxi xihín ñayivi tícá nuu yahvi ñuu cán. <sup>18</sup> Ta java taa, dà jácuaha íchi cuéntá Epicureos xihín dà jácuaha íchi cuéntá Estoicos nacasáhá ndítuhún na xihín Pablo. Joo java na cán cachí na saha Pablo ñá cuahá ndivahá cáhan dà ta co cándaa ini na ndá quéa cáhan dà. Ta java na cachí na já saha dà:

—Á tá coó ta java ga ndióxi xica nuu da cáhan dà saha —cachí na.

Nacachi na ñá yóho saha Pablo jáchí naxica nuu mé dà cáhan dà tuhun vaha saha Jesús ta cáhan dà ñá nanditacu tucu Jesús. <sup>19</sup> Sahá ñá cán quéa ndáca na Pablo cuahán ná in nuu naní Areópago jáchí cán cúu nu ndítaca ñayivi ndítuhún ñá. Ta tá naxínu coo Pablo cán já nacasáhá ndáca tuhún na dà já cachí na já xihín dà:

—Á cajún ñamáni caxi tuhún xihín nde ndá cúu ñá saá ñá xícún jánahún nuu ñayivi. <sup>20</sup> Jáchí sa nañhé nde tuhun ñá cátontó ñayivi xihín ñá jánahún nu ná ta viti cuni nde candaá ini nde ndia quéa jánahún nu ná —nacachi na xihín Pablo.

<sup>21</sup> Nacachi na já xihín Pablo jáchí tóco ndihi ñayivi Atenas xihín na tóho ndiu cán ndijáá níí quiyi ndinuhu ini na ndítuhún na ñáha saá, ñá naxini joho na jánahá inga na.

<sup>22</sup> Andá já nacandichi Pablo tañu na ndiu mé nyú naní Areópago cán já nacachi da já xihín ná:

—Candehé ndó, ñayivi nuu Atenas. Cán-daa cáxí ini i ñá cúu ndó ñayivi cátóó ndicahán cuahá nuu tñijnu yúú, ñá cúu ndióxi ndo ta ndicahán ndó ñá xihín ndinuhu ini ndó. <sup>23</sup> Jáchí ta xica nuu i ñuu ndó já naxini i cuahá nunáa nu cája cáhnu ndó ñá. Ta nu xíca nuu i cán naxini i inga nunáa. Ta nunáa cán ndáa in tuhun ta cachí a: “Ná yóho cúu nu ndicahán nde ndióxi co xíni nde”, já naxini i cachí a. Ta vatí co xíni ndó Ndióxi ndicahán ndo cán joo cája cáhnu ndó ñá. Ta mé Ndióxi cán quéa cuni cáhan i saha nu ndó viti.

<sup>24</sup> Mé Ndióxi cán quéa nacavaha ñuyíví xihín tóco ndihi ñáha íín ñuyíví yóho. Ta mé á comí a cuénta saha indíví xihín ñuyíví. Ta co ndácaan toho mé a ini veñuhu ñá nacavaha ndáha ñayivi. <sup>25</sup> Ta ni co xíni ñuhú a chindeé ñayivi mé a jáchí sa mé a quéa cája ñá ná catacu mí. Mé Ndióxi quéa sáhan tachi yó nu yo ta mé a sáhan tóco ndihi ñáha nu yo.

<sup>26</sup> Mé Ndióxi cán nacavaha in taa nu cuítí. Ta tóco ndihi ñayivi ndiu ñuyíví naquixi na chichi mé taa, dà nacavaha Ndióxi cán. Tá nandihi já nájandicuita nuu Ndióxi ñayivi naquixi chichi dà cán níí cúu ñuyíví já natahndá in in nación canduu a. Ta sa nascu ini Ndióxi ndaja tiempo canduu in in nación ñuyíví yóho ta nascu ini mé a ndáchí coo in in nación. <sup>27</sup> Já nacaja Ndióxi jáchí cuni a ñá ná ndinducú ñayivi mé a ta já ná ndiñéhe ná íchi cuéntá mé a. Joo mé a ndaa yati va íín Ndióxi nu tóco ndihi ñayivi. <sup>28</sup> Jáchí mé a cája ñá ná catacu ta ná canda yíquí cuñu i. Sanahá nacachi java taa cuénta mé ndó já: “Cúu yó na vehe Ndióxi.” <sup>29</sup> Joo tá mé a ndaa cúu yó na vehe Ndióxi co ndítahan cáhan yo ñá Ndióxi cúu tñijnu yúú ñá nájandicuchu na xihín jiuhun cuáán á xihín jiuhun cúxú. Ta ni co ndítahan cáhan yo ñá Ndióxi cúu tñijnu yúú cávaha ndahá ñayivi xihín yuu.

Jáchí jiní mé va na jan cána ñá cávaha na. <sup>30</sup> Jihna nascu ini Ndióxi ñá a jándoho toho a ini ñayivi saha cuachi nascaya na jáchí co cándaa ini na ñá cuni mé a, nduu. Joo viti

sáhndá Ndióxi chuun nü tóco ndihi ñayivi ná ná ndicó coo ini na ta ná a caja cahnu ga na tñiñu yúú.<sup>31</sup> Jáchí sa násacu Ndióxi in quiví caja vií a sahá tóco ndihi ñayivi ndíu ñuyíví yóho. Ta sa nacaxi mé á Jesús ña caja vií ndaqé mé á sahá ná. Ta najánditacu tucu Ndióxi Jesús tá nandihí naxihí a. Ta xihín ña yóho nanaha nuú ñayivi ña mé a ndaa caja vií Jesús sahá ná —nacachi Pablo xihín ndihi na cán.

<sup>32</sup>Tá naxini joho na cán ña cachí Pablo ña vaxí quiví nditacu ndii já nacásahá java na cán sácu ndaa na dä. Joo java na cachí na xihín dä:

—Vaha chágá ná cahún sahá ña jan nuú nde inga tañu —cachí na xihín dä.

<sup>33</sup>Anda já naquee Pablo nü Areópago cán cuahán dä. <sup>34</sup>Joo java ñayivi, na nacandúsá ña cachí dä nacásahá ndicó na dä xíca na. Tañu na cán násandacaan in dä naní Dionisio, dä cùu táhan na ndítaca Areópago cán. Ta tañu na nacandúsá cán ndácaan ri in ñáñahá naní Dámaris. Ta jári java chágá na cándusa nandihívi na íchí cuénta Jesús.

## 18

### Xínu coo Pablo ñuu Corinto

<sup>1</sup>Tá nandihí já naquee Pablo ñuu Atenas cán já cuahán dä chí ñuu Corinto. <sup>2</sup>Ta mé cán nandique táhan da xihín in dä Israel naní Aquila, dä násacuu estado Ponto. Ta jacá cùu saá va naxiñu coo Aquila ñuu Corinto cán xihín ñajíshí dä, ña naní Priscila. Ta ndíví na yóho sa naquee na ñuu Roma ndácaan nación Italia jáchí Claudio, dä cómí cuénta sahá ña ñuu Roma cán nasañda na chuun ña ná quee ndihi na Israel cuhún na. Ña cán quéa naxiñu Aquila xihín ñajíshí dä ñuu Corinto cán. Anda já nasañan Pablo naxito nihni da ná nuú ndíu na cán. <sup>3</sup>Ta nacandoo Pablo vehe na cán caja chúun da xihín ná jáchí sa mé chuun ña caja na cán tiahva ri dä cán va. Ta chuun nasañaja na quéa cávaha na vehe lona, ña ndéé. <sup>4</sup>Ta tá xínu coo quiví ndíquehe ndéé ná já sáhan dä veñihu na Israel cahan dä tuhun Ndióxi xihín ná. Ta já naxiñu dä ini na Israel xihín na tóho já nacásahá na cándusa na Jesús.

<sup>5</sup>Ta ndaja coo najándacoo Silas xihín Timoteo estado Macedonia ta naxiñu coo na ñuu Corinto cán. Anda jáví najándacoo Pablo chuun caja dä cán já nacásahá

dä ndúcú ndéé chágá dä cahán dä tuhun Ndióxi nuú ñayivi. Ta caxí táhyí cahán dä xihín na naquixi chichi Israel ña mé Jesús cùu á ña ndáti na chindahá Ndióxi quixi. <sup>6</sup>Joo na naquixi chichi Israel cán coó nandiquehe na tuhun cahán Pablo ta nacásahá cahna na xihín dä ta cahán nuú na sahá Jesús. Anda já naquiji nihni Pablo jáhma dä já ná candaqé ini na ña co ndójga da cuachi sahá na Israel cán ta já nacachi da já xihín ná:

—Tá ná cuhún ndó indayá ta cómí mé va ndó cuachi sahá. Joo yéhe co ndójga i cuachi sahá ndó jáchí sa nacahán i tuhun Ndióxi xihín ndó ta co cùmí ndó cándusa ndó ña. Viti xihín chí nuú cuhún i cahán i tuhun vaha sahá Jesús nuú na coó naquixi chichi Israel —nacachi Pablo xihín ná.

<sup>7</sup>Já naqueta da veñihu na cán cuahán dä. Já nasañ dä vehe in dä naní Justo, dä caja cahnu Ndióxi. Ta yati jíñ veñihu cán fín vehe da. <sup>8</sup>Ta in da naní Crispo, dä sáhndá chuun veñihu cán nacandúsá da Jesús, xitocho í xihín tóco ndihi na vehe da. Ta cuaha táhan mé na ñuu Corinto cán nandiquehe na íchí cuénta Jesús ta nacandútä ná tá naxini joho na tuhun Ndióxi nacahán Pablo xihín ná. <sup>9</sup>Ta ndaja coo in ñuu naquixi tátuhun in sani nü Pablo ta xihín ña cán nacahán Ndióxi xihín dä já nacachi a já:

—A yíhvún cahún sahá i nuú ñayivi ta coto a catáji yíhvún cahán chágún xihín ná sahá i. <sup>10</sup>Jáchí fín vi xihún ta ni in na a cùu tiúñ yóho ña ná caja xíxi na xuhun. Jáchí sa ndíu cuahá ndivaha ñayivi ñuu yóho, na cacuu cuénta mí i —nacachi Ndióxi xihín dä.

<sup>11</sup>Sahá ña cán quéa nasañin tóo Pablo in cuja java ñuu Corinto cán ta najáñaha da tuhun Ndióxi nuú ñayivi cán.

<sup>12</sup>Joo mé tiempo cán nacásahá cómí in dä naní Galión cuénta sahá ñayivi estado Acaya nu ndácaan ñuu Corinto cán. Já nandique táhan ndihi na Israel ña cùmí na caja xíxi na xihín Pablo chí nátiñ na dä já ñéhe na dä cuahán dä vechúñ. <sup>13</sup>Ta mé cán nacásahá cachí na já xihín dä cùu gobernador cán:

—Dä naní Pablo yóho xíca da jácahan dä ñayivi ña ndítahan nu ná caja cahnu na Ndióxi ta co sáhndá ley yo caja í já —cachí na cán xihín gobernador.

<sup>14</sup> Anda já ndúcú Pablo candichi da cahán dà joo mé Galión cán nácasáhá cáchí dà já xihín ná Israel cán:

—Tá cuachi ndeé ná caja dà yóho já quéa cuu cuni joho i nuu cahán ndo ná ndaja ndichi i sahá dà, nduu. <sup>15</sup> Joo co cúní toho i caja víi sahá ná jan jáchi cùu á sahá tuhun cahán ndo xihín sahá quíví ñayivi Israel xihín sahá ley mé va ndó ná cán quéa vaha chágá ná caja víi mé va ndó sahá ná yóho —nacachi dà cùu gobernador cán xihín ná.

<sup>16</sup> Tá nandihi já natavá dà ná Israel vechúun cán. <sup>17</sup> Anda já natiin tóco ndihi na griego cán dà naní Sóstenes, dà sáhndá chuun veñuhu cán. Ta natiin na dà mé nuu táchí yé dà cùu gobernador cán nacanai na dà. Joo coó náshahní toho Galión mé dà sahá ná nacaja na.

#### Ndícó coo tucu Pablo chí Antioquía

<sup>18</sup> Cuahá va quíví nacandoo tóo chágá Pablo nuu Corinto cán. Anda já nandindayí dà ná cùu cuéntá Jesús ndúu cán já naquee da cuahan dà nündáhyi cuéntá Siria. Ta ndáca de Aquila xihín Priscila cuahan ná xihín dà. Ta tá naxinu dà nuu Cencrea tá cámpani ndaa da barco cuhun chágá dà chí nuu já nájatá lahla da jiní dà já ná xinu coo nuu tuhun nacahan dà. <sup>19</sup> Ta tá naxinu coo da nuu Efeso xihín ná ndáca táchán xihín dà cán já nájandacoa da Priscila xihín Aquila. Ta naquee da cuahan dà chí veñuhu nuu Efeso cán nuu nacahan da tuhun Ndióxi nuu ná Israel, na tácá cán. <sup>20</sup> Tá nandihi já nácasáhá cahán ndahví ná Israel cán xihín Pablo ná candoo tóo da chágá quíví xihín ná. Joo coó náxeen toho da. <sup>21</sup> Ná nacaja da quéa nandindayí dà ná já nacachi da já xihín ná:

—Ndítahan cuhun i coo i Jerusalén jáchi sa nandindaa quíví vaxí vico. Joo ndicó coo tucu u coto nihni i ndohó tá cúní Ndióxi —nacachi Pablo xihín ná.

Tá nandihi já nandaa da barco naquee da nuu Efeso. <sup>22</sup> Ta tá naxinu coo da nuu Cesarea já naquee da cuahan dà chí nuu Jerusalén cahán Ndióxi dà xihín ná cùu cuéntá Jesús ndúu cán. Tá nandihi já naquee da cuahan dà chí inga nuu naní Antioquía. <sup>23</sup> Ta tá nandihi náshajin da chí quíví cán já naquee tucu da cuahan dà tá in tá in nuu válí ñúhu chí estado Galacia xihín estado Frigia ná quiahva da tuhun ndeé ini ná cùu cuéntá Jesús ndúu cán.

#### Cahán Apolos tuhun Ndióxi nuu ná nuu Efeso

<sup>24</sup> Mé tañu já naxinu coo in dà naquixi chíchi Israel naní Apolos mé nuu Efeso cán. Mé Apolos yóho cùu dà dà nacacu nuu Alejandría. Ta cùu dà in dà táchva vaha tuhun Ndióxi ta táchva vaha da jánahá dà ná nuu ñayivi. <sup>25</sup> Mé Apolos yóho sa nájácuaha vaha da íchi cuéntá Jesús, xitoho í ta xihín ndinuhu ini da cahán dà sahá mé a nuu ñayivi. Ta cáxi táchí jánahá dà sahá Jesús nuu ná. Ta nacahan dà xihín ná ná ndítahan candútä ñayivi tá quiahva nájácuadütä Juan ñayivi jihna. Joo co xini vaha da tóco ndihi ná nájánahá Jesús. <sup>26</sup> Chí já naquihvi mé Apolos veñuhu cán cahán dà tuhun Ndióxi xihín ñayivi jáchi co yihví dà cahán dà xihín ná. Ta ndaja coo naxini joho Priscila xihín Aquila nuu cahán dà. Ta tá nandihi já ñéhe na dà cuahan ná já nandicani vaha chágá ná nuu dà ndaja íin íchi cuéntá Ndióxi. <sup>27</sup> Ta tá náshacu ini Apolos cuhun dà chí estado Acaya já nachindeé na cùu cuéntá Jesús dà já ná cuu cuhun vaha da. Ta nacahyí ná in carta náshacu ná nuu dà quiahva da ná nuu ná cùu cuéntá Jesús ndúu cán já quéa ná ndiquehe vaha na dà. Ta tá naxinu coo Apolos yóho estado Acaya cán nachindeé cuahá ndivahá da ná cùu cuéntá Jesús, ná nacandee ini mé a sahá ná náshahvi ini Ndióxi sahá ná. <sup>28</sup> Ta nuu caxí táchí ndihi ñayivi náshahá dà ná juú ná ndaa cùu ná jánahá ná Israel nuu ñayivi. Ta xihín tuhun Ndióxi náshahá dà ná ná ná mé Jesús cùu Cristo, mé a nachindahá Ndióxi cacomí cuéntá sahá ñayivi.

## 19

#### Tá fín Pablo nuu Efeso

<sup>1</sup> Ta nani íin Apolos nuu Corinto cán já náshahá Pablo chí yúcu janda quiahva naxinu coo da nuu Efeso. Ta cán nandiñehe dà java ná cùu cuéntá Jesús. <sup>2</sup> Já nandaca tuhun dà ná já nacachi da já xihín ná:

—Á nandicutú ndaa ínimá ndo xihín ínimá yiji Ndióxi tá nacandusa ndó Jesús —nacachi da xihín ná:

Já náshadu ñehe ná cán tuhun nuu dà já chí quíví ná xihín dà:

—Chí a náshahá mé va candaa ini nde sahá ínimá yiji Ndióxi jan —nacachi ná cán xihín Pablo.

<sup>3</sup> Anda já nandaca tūhún Pablo na já cachí da já xihín ná:

—Ndaja vaha nacandúta ndo, dá já.

Anda já nanducú ñehe na cán tūhun nu dá já nacachi na já:

—Nacandúta nde tá quiñha nájánaha Juan —nacachi na.

<sup>4</sup> Anda já nacachi tucu Pablo já xihín ná:

—Najácdúta Juan ñayivi já ná naha na nuú ñayivi ña nandijama na ta co cája ga na cuachi násacaja na jihna. Joo nacahan Juan xihín ná ña ndítahan nu ná candúsa na inga dā växi jata dá. Ta dā nacahan Juan cán saha cūu Jesús, mé a nachindahá Ndióxi cacomí cuénta sahá ñayivi —nacachi Pablo xihín ná.

<sup>5</sup> Tá naxini joho na cán ña nacachi Pablo xihín ná chí ivi láá nacandúta ná cuénta Jesús, mé a cūu xitoho í. <sup>6</sup> Ta tá nachojó Pablo ndáha dā jiní ná já naxiñu ínima yii Ndióxi najándicutá a ini na. Anda já nacásáhá ná ndícahan na inga tūhun ña coó násatiñha na. Ta jáygha na tūhun nacahan Ndióxi nuú ná ndúu cán. <sup>7</sup> Ta tixi ndíhi na cán cūu ná tátuhun uxu ivi taa.

<sup>8</sup> Ta tixi uní yoo násahiin Pablo ñuu cán sahán dā veñhu jáñahá dā saha Jesús nuú ñayivi xihín ndinuhu ini da. Ta jáxínu dā imi ñayivi ña ná ndíhvi na íchí cuénta Jesús já cuu cacomí mé á cuénta saha ná. <sup>9</sup> Joo java ná cán sáá ini na ta coó násseen na candúsa na nu cáhan da. Ña nacaja na quéa nacásáhá cáhan núa na sahá tūhun vaha cáhan saha Jesús nuú ñayivi. Sahá ña cán quéa natáv xóo Pablo na cūu cuénta Jesús tañu ná cán já násahan ndaca da ná in vehe escuela nu íin dā naní Tiranno ta cán jáñahá Pablo tūhun Ndióxi nu ná ndijáá níi quivi. <sup>10</sup> Já násacaja Pablo tixi ivi cuija ta xihín ña cája da naxini joho ndíhi ná ndúu estado Asia tūhun vaha saha Jesús, xitoho í. Ta ná naxini joho tūhun Ndióxi cán cūu ná ná naquixi chichi Israel xihín ná tóho viti. <sup>11</sup> Ta nacaja Ndióxi ña ná cuu caja Pablo cuahá ña xituhún nuú ñayivi ndúu cán. <sup>12</sup> Jáchí janda pañito á jáhma ña cán ndaa Pablo cán ñehe na ña cuahán ná ta jácani ndaa na ña ná quishví xihín á chí ndívaha na. Ta tá ñúhu ínima quini ini na jandá rí cán quéta cuahán.

<sup>13</sup> Joo java ná Israel, ná co cūu cuénta Jesús xíca nuu na tává ná ínima quini ñúhu ini ñayivi. Ta ndaja coo násacu ini na caja

chúun na quivi Jesús, xitoho í, ña ná tavá ná ínima quini. Já nacachi na cán já xihín ínima quini ndácaan ini ñayivi:

—Xihín quivi Jesús ña xíca nuu Pablo cáhan dā saha, sáhndá nde chuun nuú ña queun cuhún —nacachi na cán.

<sup>14</sup> Já nacaja ndíhusa jahyi in dā naní Esceva, dā cūu dā sacuha nuú jutu veñhu na Israel ndúu ñuu cán. <sup>15</sup> Joo tá nacachi na ña yóho xihín rí quini ñúhu ini dātaa já nanducú ñehe rí cán tūhun nu ná já cachí rí já:

—Xíni vi yo cūu Jesús ta xíni rí ndá dā cūu Pablo va. Joo mé ndó, co xíni toho i ndohó —nacachi rí quini.

<sup>16</sup> Tá nacachi ínima quini cán já chí ivi láá nandava dātaa ndácaan ínima quini ini cán jata ndíhusa na cán ta nacaja xíxi quini da xihín ná jáchí a juú quiñha ndacú dā. Quini nacaja dā cán xihín ná anda naxinu lahla ndíhi na jata véhe ta chí a váha na nandicuehe na nacaja ínima quini cán. <sup>17</sup> Ta chí nacandaqá ini ndíhi ñayivi ndúu ñuu Efeso cán sahá ña nayaha yóho vatí cūu ná na Israel a cūu ná tóho nañehé ndíhi na tūhun. Sahá ña cán quéa ñayhví ná. Ta cuahá ná nacahan na ña cahnu cūu quivi Jesús ña cūu xitoho í.

<sup>18</sup> Ta cuahá táhan na cándusa Jesús cán nacásáhá ná náhma ná tóco ndíhi cuachi nacaja na. <sup>19</sup> Ta cuahá na násacu ná tají ñehe ndíhi na libro ña tají naxiñu ná ta nachicaan ñúhu ná ña nuú ndíhi ñayivi. Tá najitá na cuénta sahá yahvi tóco ndíhi libro nacayi cán naxiñu a tátuhun ivi jico uxu mil jiuhun cíxú. <sup>20</sup> Já nacásáhá xíta nuu tūhun vaha saha Jesús. Ta náha ña mé a ndaa íin ndée Jesús caja tóco ndíhi ñáha.

<sup>21</sup> Tá sa nayaha ndíhi ña yóho já násacu ini Pablo cuhún dā coto nihni da estado Macedonia xihín estado Acaya. Já quehe tucu da íchí cuhún dā janda Jerusalén. Ta nacachi da ña tá sa násahan da ñuu Jerusalén já yaha da cuhún dā chí ñuu Roma. <sup>22</sup> Ta mé Pablo yóho nachindahá dā ivi táhan dā xíca chíndéé táhan xihín dā ña ná cuhún dā chí estado Macedonia. Ta dā nachindahá dā cán cūu Timoteo xihín Erasto ta mé Pablo nacandoó tóo chágaa dā estado Asia.

Ndávag ñayivi ndúu ñuu Efeso

<sup>23</sup> Mé tiempo já a juú quiñha cuahá ñayivi ñuu Efeso nandivaa ná sahá ña nandíhvi cuahá ñayivi chí cuénta Jesús.

<sup>24</sup> In də naní Demetrio cūú dá də najándivaa ná cán. Mé Demetrio yóho cávaha da tñiñu yúu xihín jiuhun cùxú ta mé tñiñu yúu cán ndáa tá quiáhva cåá in veñuhu cuéntá Diana, ná cùú ndióxi cåá cåhnu ná ñuu cán. Ta a juú quiáhva vahä cåna jiuhún ná cåja chüun xihín dä cán. <sup>25</sup> Sahá ná cán quéa mé Demetrio yóho najátaca da tóco ndihí na cåja chüun xihín dä ta najátaca ri da java ga táhan na cåja mé chuun cåvaha tñiñu yúu cán. Já nacachi da já xihín ná:

—Candehé ndo, sa cåndaa vahä ini ndó ná vahä ndivaha cåna jiuhún yo xihín chuuñ cåja í yóho ta ndúu vahä í cåja ná. <sup>26</sup> Joo sa xíni ndo ta ñéhé mé ndó tuhun sahá dä naní Pablo. Xíca nuu da cåhan dä xihín ñayivi ná a juú toho ndióxi cùú ná cåvaha ndahá ñayivi. Ta sa cuahá ndivaha ñayivi nacava da jini. Ta a juú in tuhun ñuu Efeso yóho cuití va jáchí sa nacandeé dä nacava da jiní cuahá ná ndúu chí estado Asia viti. <sup>27</sup> Ta iñví ndivaha cåá ná yóho jáchí cuu cåhnu dä nuú chuuñ cåja í ta nuú cåna jiuhún yo quéa yóho. Ta jånda veñuhu ndióxi yo, ná naní Diana cuu ndihí sahá vatí níi cùú cåhan vahä na sahá veñuhu ná. Joo xihín ná cåja Pablo yóho tå xíca nuu da cuu casásahá ñayivi cåhan nuú na sahá Diana ta cuu casásahá ná candají na ná cùú ndióxi yo, mé Diana yóho. Ta mé ná cùú ná ná cåhnu ndivaha ta ñayivi níi cùú estado Asia yóho xihín ñayivi níi cùú ñuyíví cåja cåhnu na ná —nacachi Demetrio cán xihín java ga dä cåvaha tñiñu yúu cán.

<sup>28</sup> Ta tá naxini joho ndihí ná cán ná nacachi Demetrio chí iñví láá najaá quini na já nacayuhu ná já nacachi na já:

—Cåhnu ná cacuu Diana, ná cùú ndióxi ndicahán ná Efeso.

<sup>29</sup> Ta xihín ná yóho tóco ndihí ñayivi ñuu cán nacásahá ná ndívaag na. Sahá ná cán quéa natiin na iñvi dataa, dä naní Gayo xihín dä naní Aristarco. Ndíví dä yóho cùú dä dä estado Macedonia ta xíca nuu da xihín Pablo. Ta mé ñayivi cán natiin na dä já ñúhu na dä cuahen da vehe nü ndítaca ñayivi cán. <sup>30</sup> Ndúcu Pablo quihvi nuu da tañu ñayivi cán ná cuahen da xihín ná cùni dä. Joo na cùú cuéntá Jesús cán coó naxeen na ná ná cuhun dä. <sup>31</sup> Ta jári java na jutixia cuéntá estado Asia ndúu cán ta xíni táhan vahä xihín Pablo sahá ná cán quéa nacindahá ná chuun nü dä ná a quihvi nuu

da cåhan dä xihín ná cán. <sup>32</sup> Tañu nü táca ñayivi ndívaag nähá cán sa jíin sa jíin nähá cåyuhú ná ndúu na. Jáchí cuahá ná nataca cán ni co xíni ná ndá cuéntá quéa nataca ná tañu ñayivi cuahá cán. <sup>33</sup> Joo java ñayivi ndúu cán nandicaní na ndaja cåá ná cùu cán nuú in dä naní Alejandro. Ta java ná Israel ndúu cán nacindahá ná Alejandro já ná candichi da cåhan dä xihín ñayivi cán. Anda já nandinehe Alejandro ndáhá dä já ná catají tóo yúhu ná já nacásahá ndíquehe da sahá ná cùú cuéntá Jesús. <sup>34</sup> Joo tá naxini ñayivi cán ná cùú Alejandro in dä Israel chí iñví laá nacásahá tóco ndihí ná cán cåyuhú ná já cachí na já:

—Cåhnu ná cacuu Diana, ná cùú ndióxi ndicahán ná Efeso.

Ta coó nacatají na tixi iñví hora cåyuhú ná mé tuhun yóho.

<sup>35</sup> Ta tá sa nacatají loho ñayivi já nacásahá dä cùú dä cåhyí tutu ñuu cán cåhan dä xihín ñayivi já cachí dä já xihín ná:

—Candehé ndó, ná Efeso. Sa cåndaa ini ndihí ñayivi ndúu ñuyíví ná ndítahan nuú ñayivi ndúu ñuu Efeso candaas vahä na veñuhu ná cùú ndióxi naní Diana. Jáchí mé ná cùú ná ná cåhnu ndivaha ta indíví naquixi nahna ná nandicava nu yo. <sup>36</sup> Ta ni in na a cùu cachi ná cåhan i ná tuhun sahá ná cán quéa caja ndó ñamani catají ndó ta ndicani vahä ini ndó sahá ná cùni ndó caja ndó. <sup>37</sup> Jáchí ndíví dä ndáca ndó nacasaag ndó yóho co caja cuishná dä veñuhu Diana ta ni co cåhan nuú da sahá ná. <sup>38</sup> Ta tá co táhan ini Demetrio xihín ná cåja chüun xihín dä sahá ná cåja Pablo já ndítahan nu ná cuhun ná vechün nuú jutixia ta cán cuu ndiquehe in na sahá mé ná jáchí sahá ná cán ndúu juéxe cán caja vií ná sahá ñayivi. <sup>39</sup> Joo tá inga naha quéa cùni ndó caja vií ndó sahá, xíni ñúhu ndítaca ndihí já ná cuu caja vií yó sahá. <sup>40</sup> Jáchí cåja i cuénta cuu chicaan ná cuachi jata yo sahá ná jändicuita í ñayivi cani táhan na sahá tóco ndihí ná nayaha quiví viti. Jáchí mé a ndaa co xíni yo ndá tuhun nducú ñehé tá ná ndacá tuhún ná mí ndá cuénta quéa nacidaa nähá yo —nacachi da xihín ná.

<sup>41</sup> Tá nandihí nacachi dä cåhyí tutu cán tuhun yóho xihín ñayivi cán já najánduta dä ná.

## 20

*Cuahan Pablo estado Macedonia xihín es-tado Grecia*

<sup>1</sup>Tá sa nanduta ndihi ñayivi, na nandivaa nahá cán já nacana Pablo tóco ndihi na cíu cuénta Jesús jáchí cúní da cahán da xihín na sahá java ñaha ña ndítahan nu ná caja na. Ta tá nandihí nacahan da xihín ná já nanumi da na ta nandindayí da na já naquee da cuahan da chí Macedonia. <sup>2</sup>Níi cíu estado Macedonia cán naxica nuu da sahan da tuhun ndéé ini na cíu cuénta Jesús xihín tuhun cahán da. Tá nandihí já naquee da cuahan da ta naxínu da chí es-tado Grecia. <sup>3</sup>Ta nacandoo da cán tixi uni yoo. Ta tá ja chá quehe da barco cuhun da chí ñundáhyi cuénta Siria já nañehé dá tuhun ña sácu ini na Israel cán cahní na dä. Sahá ña cán quéa nasacu ini da ña vaha chágá ná cuhun sahá da já ná yaha tucu da chí Macedonia. <sup>4</sup>Ta ndáca táhan java na cíu cuénta Jesús cuahan na xihín Pablo. Ta na cán cíu na yóho: in dä naní Sópater, dä ñuu Berea xihín Aristarco xihín Segundo, dä ñuu Tesalónica xihín Gayo, dä ñuu Derbe xihín Timoteo. Ta tañu na cán cuahan ri Tíquico xihín Trófimo, da naquixi es-tado Asia. <sup>5</sup>Tóco ndihi na ndáca táhan xihín Pablo yóho nasahan cuéé na chínü candati na ndehe ñuu Troas. <sup>6</sup>Joo ndehe, dä cíu Pablo xihín Lucas tá sa nayaha víco tá xíxi na pan ña co cáva táhan yusá naxaa xihín já nandaa nde barco ñuu Filipos cuahan nde chí Troas. Ta janda quíví uhun já nandique táhan nde xihín ndihi na cán. Ta chí nacandoo tóo chágá nde usá quíví ñuu Troas cán.

*Xito nihni Pablo ñuu Troas*

<sup>7</sup>Ta quíví domingo nataca ndihi nde, na cíu cuénta Jesús ña cuxu nde pan yii. Ta sahá ña queta Pablo cuhun da inga quíví itaæn sahá ña cán quéa najánahá cuahá dä nu ná janda quihvá naxinu java ñyu. <sup>8</sup>Tóco ndihi na cíu cuénta Jesús cán nanditútú nde ndúu nde in vehe cánúu jiní ñinu. Ta chí ndíyihví ndaa nu ndúu nde jáchí cuahá lámpara cayí. <sup>9</sup>Ta ndaja coo in dä loho naní Eutico fin coo da ventana xíxi joho da nu cahán Pablo. Joo sahá ña cuahá cahán Pablo sahá ña cán quéa nanaá ini dä loho cán chí naquijí da. Já najani dä nandicava da janda nu ñúhu piso uni. Ta tá nanuu na cíu cuénta Jesús cán nandiñehe na dä

jandá ndii cíu dä. <sup>10</sup>Anda já nanuu Pablo ta nájácaa da mé dä jatá dä loho cán ta nanumi da dä ta já nacachi da já xihín na cíu cuénta Jesús cán:

—A cayihví toho ndó jáchí tacú va da yóho —nacachi Pablo chí najánditacu ñahá da.

<sup>11</sup>Anda já nandaa tucu Pablo cuahan da vehe piso ñinu cán. Já náshanda java da pan yii cán ta naxixi na ña. Anda já nacahan chágá da xihín ná janda quihvá natívi. Já naquee da cuahan da. <sup>12</sup>Ta sahá mé dä loho, dä nandicava cán cajíi íní na ndáca vaha na dä cuahan na jáchí nanditacu da.

*Quée Pablo ñuu Troas ta cuahan da chí ñuu Miletto*

<sup>13</sup>Nasacu ini Pablo cuhun sahá da anda ñuu Asón. Joo mé nde nandaa nde barco náshahan nde mé ñuu cán jáchí janda cán nacandoo nde ndique táhan nde xihín dä.

<sup>14</sup>Ta tá nandique táhan nde ñuu Asón cán xihín dä já nandaa da xihín ndihi nde ini barco. Já naquee nde cuahan nde ñuu Mitilene. <sup>15</sup>Cásahán nde ini barco ta inga quíví itaæn já nayaha nde yati isla Quio ta janda tá nayaha inga tucu quíví já naxinu coo nde ñuu Samos. Ta naquee tucu nde cuahan nde janda quihvá naxinu coo nde ñuu Trogilio. Ta cán nandiquehe ndéé nde ta janda inga quíví itaæn naxinu coo nde ñuu Miletto. <sup>16</sup>Có cúní Pablo cayáncá da es-tado Asia sahá ña cán quéa coó náshahan nde ñuu Efeso. Númi dä cuhun dä ñuu Jerusalén coo da quíví víco Pentecostés jáchí nasacu ini da coo da víco cán tá ná quihvá Ndióxi ñamani nu dä.

*Cáhán Pablo xihín na sacuahá ñuu Efeso*

<sup>17</sup>Ta nani ndúu nde ñuu Miletto cán já nacana Pablo tóco ndihi na sacuahá veñuhu ñuu Efeso cán já ná quixi na. <sup>18</sup>Ta tá sa nataca na nu ndúu nde já nacachi da já xihín ná:

—Sa xíní vaha ndó ndaja nacaja i janda quíví nu cuítí tá naxinu coo i es-tado Asia yóho. <sup>19</sup>Níi tiempo náshaijin i tañu ndó cán nacaja chún i cuénta Jesucristo, xitoho í. Ta coó nandinehe jícó i mí i sahá ña nacaja i. Ta cuahá tañu nasacu u sahá ndó. Ta nandoho ini i sahá ña cúní na Israel cahní na yéhe. <sup>20</sup>Ta coó najándacoo i cahán i tuhun Ndióxi xihín ndo jáchí xíní vaha i ña jan cuu chindeé a ndohó. Ta najánahá i ndohó nu táhyí ñayivi ta jári ini vehe

ndó. <sup>21</sup> Ta najánahá i nuú na Israel xihín nuú na tóho ñá ndítahan nu ná ndicó coó ini na ta jándacoo na cuachi cája na. Ta nacachi i xihín ná ñá ndítahan candeé ini na Jesucristo, xitoho í. <sup>22</sup> Ta viti cuhun i chí ñuu Jerusalén jáchí cúní íníma yii Ndióxi ñá ná cuhun i cán ta co xíní ndía cuu ndoho i ñuu cán. <sup>23</sup> Na xíní ndusa i quéa ñá nacaxi tuhun íníma yii Ndióxi xihín i ñá ndá ñuu nacuu nuú cuhun i ñá jivi i chicaan ñayivi yehé vecaa á jivi i caja xíxi na xihín i. <sup>24</sup> Joo ni in ñá yóho co caja toho a nuú i. Ta vatí ná cahní na yehé co yíhví toho i. Jáchí ñá cúní mí i quéa cajii íní i jáxínu coo i chuun nasañan Jesucristo nuú i caja i. Ta ñá yóho cúu á cáxi tuhun i ñúu ñayivi tuhun vaha sahá mé á ta sahá ndá quiáhva quíhví ini a ñayivi.

<sup>25</sup> Sa naxica nuu i tañu ndó ta nacahan i xihín ndó ñá vaxí quiví cacomí Ndióxi cuénta sahá ñayivi. Ta viti xíní vaha i ñá ni in ndó a cúní ga ndó yehé. <sup>26</sup> Sahá ñá cán quéa cáxi tuhun i xihín ndó quiví viti ñá co ndójó ga i cuachi sahá ndó tá ná jándicoo ndó íchí cuénta Jesús. <sup>27</sup> Jáchí sa nacaxi tuhun i nu ndó tóco ndihí ñá sácu ini Ndióxi caja ta coó nachijéh teuhun toho i sahá nu ndó. <sup>28</sup> Sahá ñá cán quéa ndítahan canda vaha ndó mé va ndó ta canda vaha ndó tóco ndihí ñá cuú cuénta Jesús ná cuahnu chágá na xihín tuhun Ndióxi. Jáchí mé íníma yii Ndióxi nasañu a ndohó ñá ná cacomí ndó cuénta sahá ñá cuú cuénta mé á jáchí naxita nii mé á sahá ndihí na tá naxihí a ndica crúxu. <sup>29</sup> Cáhan i ñá yóho xihín ndó jáchí sa cándaa vaha ini i ñá tá sa ná quee yehé cuhun i já quixi java ñayivi ta cacu ini na jándihí na sahá ñá cuú cuénta Jesús. Ta tá quiáhva cája ndivahyí jándihí rí sahá ndicachi quiáhva já cacuini na jándihí na sahá ñá cuú cuénta Jesús. <sup>30</sup> Ta janda mé tañu mé ndó jan va cana java na ta jáñahá ñá ñá tuhún nuú ñayivi. Ta nducú ñá ndiquehe na ñá sa cuú cuénta Jesús cuhun na jatá ñá cán. <sup>31</sup> Ñá cán quéa cuénta vaha coo ndó ná a jándahví na ndohó. Xímí ñúhu ndicuhun ini ndó ñá tixi uní cuia coó najándacoo i cahan i xihín ndó ndá quéa ndítahan nu ndó caja ndó. Ta ñuu ta ndiví nacahan i xihín ndó sahá ñá yóho ta chí anda nasacu u sahá ndó ñá ná caja ndó ñá cúní Ndióxi.

<sup>32</sup> Viti jándacoo i ndohó, ñani i, ndahá Ndióxi jáchí cáchí tuhun mé á ñá quíhví

ini a tóco ndihí ñayivi. Ílin ndée Ndióxi caja ndacú a ndohó já ná cuu coo ndó xihín tóco ndihí na nacaxi mé á caja ñamani xihín. <sup>33</sup> Ta xíní ñúhu ndicuhun ini ndó ñá coó nandiaiva ini i quehe e jiuhún a jáhma vaha cómí java ga ñayivi. <sup>34</sup> Ñá nacaja i quéa nacaja chúun i xihín ndahá i já ná a ndímaní ñaha catacu u ta já ná cuu catacu na xíca xihín i. <sup>35</sup> Ta ní tiempo najánahá i nu ndó ñá quiáhva já ndítahan nu ndó caja chúun ndó já ná coo ñaha catacu ndó ta já ná cuu chindeé ndó ñá ndímaní ñaha nuú. Ndítahan ndicuhun ini ndó tuhun nacachi Jesucristo tá nacachi a: “Cájii chágá ini na jásá ñaha a juú ga na ñéhé á”, nacachi Pablo xihín na sacuahá veñhu ñuu Efeso cán.

<sup>36</sup> Tá nandihí nacahan Pablo já nacaxítí da já nacashá xíca tähví dä nu Ndióxi xihín ndihí na cuú cuénta Jesús cán. <sup>37</sup> Ta tóco ndihí na cán nasañu na xihín dä ta nanumi na dä ta já nqatati yílhü ná sajóho da ñá ndíndayí na da. <sup>38</sup> Tóco ndihí na nacacuéha ini na sahá Pablo jáchí nacachi da xihín ná ñá a cúní ga na da. Tá nandihí já ndáca táhan ndihí na nasañan na xihín dä janda nuú nandaa da barco cán.

## 21

### Cuahan Pablo chí ñuu Jerusalén

<sup>1</sup> Tá nandihí nandindayí nde na cuú cuénta Jesús cán já nandaa nde barco naquee nde cuahan ndacú nde in ñuu naní Cos. Ta inga quiví itaän já naquee tucu nde cuahan nde chí inga ñuu naní Rodas. Ta já naquee nde cuahan nde chí ñuu naní Pátara. <sup>2</sup> Ta mé cán nandique táhan nde xihín in barco, dó cuhun chí estado Fenicia ta chí nandaa nde dó cuahan nde. <sup>3</sup> Ta nani casahan nde ini dó já naxini nde isla Chipre xoo íti nde. Joo nayaha saa va nde janda quiáhva naxinu coo nde ñuu Tiro ndácaan estado Siria jáchí mé cán ndítahan nu ná jánuu na ñaha ndójó dó. <sup>4</sup> Mé ñuu Tiro cán nanditahan nde na cuú cuénta Jesús ta nacando tóo nde xihín ná tixi usa quiví. Ta najácahan íníma yii Ndióxi na cán ñá ná caxi tuhun na xihín Pablo ñá ná a cuhun dä ñuu Jerusalén. <sup>5</sup> Joo tá sa nayaha usa quiví já naquee nde cuahan nde chí ñuu Jerusalén. Ta naqueta tóco ndihí na cuú cuénta Jesús cán xihín ñajíhlí na xihín jahyi válí ná já ndáca táhan na xihín nde cuahan nde anda yuhú ñuu cán. Ta yatí yuhú

tañuhú cán nacaxítí ndihi nde naxica tähví  
nde nu Ndióxi.<sup>6</sup> Ta tá nəndidayí tähán nde  
já nandaa nde barco ta ná cán naquee na  
cuanuhú ná vehe na.

<sup>7</sup> Naquee nde mé ñuu Tiro cásahan nde nyú tañuhú janda quiahva naxinu coo nde ñuu Tolemaida. Ta mé cán naçahan Ndióxi nde xihín na cúu cuéntá Jesús ndúu cán. Ta chí naçandoo nde in quívi xihín ná. <sup>8</sup> Ta inga quívi itaan já naquee nde cuahan nde janda quiahva naxinu coo nde ñuu Cesarea. Ta cán nasahan nde vehe in da sáxica nuu cáhan tuhun Ndióxi xihín ñayivi. Mé da yóho naní da Felipe ta naçacu da in táhan ndíhusa da chíndeé na apóstol veñuhu ñuu Jerusalén. Ta chí naçandoo tóo nde vehe da cán. <sup>9</sup> Ta naçahiin comí jahyi jíhí dä, na tacú. Ta tiahva ndícomi ná jáyaha na tuhun cáhan Ndióxi nyú ñayivi. <sup>10</sup> Tá sá naçaja chá quívi ndúu nde vehe da cán já naxinu coo in profeta, da naquixi estado Judea ta naní da Agabo. <sup>11</sup> Mé da yóho nasaa da coto nihni da ndehe nu ndúu nde cán. Ta nani íin da xihín nde cán já natiin da cinturón ñaha Pablo. Já nacató da ndáha dá xihín sahá dá xihín mé cinturón ta já nacachi da já:

—Cáchí ínimá *yii* Ndióxi ñä tá quiáhva nacaja i nacató i mí i quiáhva já cató na Israel dä xihín ñaha cinturón yóho. Ta já ndiquiáhva na dä ndahá na tóho —nacachi Agabo cán xihín nde.

<sup>12</sup> Tá naxini joho nde ña nacachi Agabo yóho já nacasáhá nde cáhan ndahví nde xihin Pablo ña ná a cíhun dá ñuu Jerusalén. Ta jári ná cuú cuéntá Jesús ndúu ñuu Césarea cán cáhan ndahví ná xihin dá ña ná a cíhun dá, <sup>13</sup>Joo nanducú ñehe Pablo tūhun nuú nde já nacachi da já:

—Ndá cuéntá quéá sácu cóhó ndo ta cája  
ndó ná cándíí ini i. Candehé ndo ná cahan i  
xihín ndo. Coó caja toho a ná cató ná yéhe  
jáchí fin tlahva i ndiquiahva i mí i quirív i  
saha Jesús, xitoho í mé ñuu Jerusalén cán  
—nacachí da.

<sup>14</sup> Coó nacuu caja nde cava nde jini dá ña  
ná a cúhyún dá. Chí coó nacahán chágá nde  
sahá ña yóho xihin dá ta nacachi nde:

—Ná coo tá quiahya cúní Ndióxi va.

<sup>15</sup> Tá nandihí já naçaja tiahva nde ñaha nde ta já naquee nde cuahan nde ñuu Jerusalén. <sup>16</sup> Ta ndáca táhan java na cúú cuéntá Jesús ñuu Cesarea cán cuahan na xihín nde. Ta tañu na cán ndácaqan in da naní Mnasón, da naquixi isla Chipre. Ta

anda sannahá ndíco dà íchi cuéntá Jesús. Ta  
sa mé vehe dà yóho sácu ini nde canduu tóo  
nde ñuu Jerusalén cán.

Xito nihni Pablo da naní Jacobo

<sup>17</sup> Tá naxinu coo nde ūuu Jerusalén já cávata na cíuú cuénta Jesús cán nandiquehe na ndehe. <sup>18</sup> Ta inga quíví itaan já ndáca Pablo ndehe nasahan nde coto nihni nde Jacobo. Ta tá naxinu coo nde cán já naxini nde ūu nataca tóco ndihi na sacuahá nuú na cíuú cuénta Jesús cán. <sup>19</sup> Ta nacahán Ndíoxi Pablo xihin já nácasáhá ndícani da nuu ná tá in tá in ūu náhnu nasahan Ndíoxi námaní nu dala caja da tañu na tóho, na coó naquixi chichi Israel. <sup>20</sup> Tá naxini johna cán ūu yóho já nacaja cáhnu na Ndíoxi. Ta tá nandihí já nácasáhá cachí na já xihin Pablo;

—Candehé, ñani i. Sa xíni vahún ña cuahá ndivahá táhan na naquixi chichi Israel sa ndíco na íchi cuéntá Jesú斯 viti. Ta tóco ndihí na cachí na ña ndítahan caja na ña sáhndá ley Moisés.<sup>21</sup> Joo ñañehe ná tuhun ña xíca nuún jánhún nyú na Israel, na ndíu ñuu tóho ña co xíni ñíuhú ga caja na ña sáhndá ley Moisés ta ni marca cán co xíni ñíuhú chicaan ga na yiqú cuñu jahyina. Ta jánhún na ña co ndítahan caja na costumbre najándacoo tásáhnu jíco yo nyu yo.<sup>22</sup> Ta co xíni nde ndíu caja nde viti jáchí nditútúu na ndíu Jerusalén yóho tá ná candaan ini na ña naçasaan yóho.<sup>23</sup> Saha ña cán quéa caja nde cuéntá ña vaha chágá ná cajún ña cachí nde yóho; Cañehún comí taa ndíu tañu nde vóho já ná cuhun na xuhun,

Jáchi sa naxiñu coq quíví caja ndícomí da yóho ña nasahan da tuhun da nu Ndióxi caja da.<sup>24</sup> Ná cuhún xihín dá já ná ndaja viún mún xihín dá tá quiahva sáhndá ley Moisés ta já ná chahvún nuú jatá jini dá. Ta xihín ña yóho cuni na Israel ña a juú ña ndaa cúcú tóco ndihi tuhun cáhan ihví na sahun. Ta xihín ña yóho cuni na ña caja tá cájún ña sáhndá ley Moisés.<sup>25</sup> Ta sahá na tóho, na cúcú cuénta Jesús, sa nacahy nde in carta cuáhan nu ná ña ná a jándihi na mé ná caja na ley Moisés. Joo nacachi nde xihín ná ña ná a cáxí na cuñu quítí, rí nacoco na nuú tñíñu yúu. Ta ná a cáxí na nii ta ná a cúcú na cuñu quítí, rí nasañhu. Ta ná a ccoo na xihín taa a ñáha, na co cúcú yíi ná a ñáhihi na. Ña yóho cúcú tuhun nacahy nde

nú carta cuahán nuú na gó —nacachi na sacuha cán xihín Pablo.

<sup>26</sup> Anda já naquehe Pablo ndícomí dñataa cán ndáca da cuahán xihín dá. Ta inga quiví itaqan já nandaja vií dñ mé dñ Ndióxi ta nandiví ndícomí da cán viti. Ta tá nandili já naquihvi da veñuhu ña caxi tñuhun da xihín ná ndá quiví xínu coo ña ndiví ná já ná cuu joco in in dñ cán ñaha nú Ndióxi.

Tiin na Pablo veñuhu cahnu ñuu Jerusalén cuahán da vecaa

<sup>27</sup> Tá ja chá xínu coo quiví usa já naxinu coo java dñ Israel, dñ naquixi chí estado cuéntá Asia. Ta tá naxini na cán ndácaan Pablo ini veñuhu cahnu cán já najándivaa ná ñayivi já ná ndicuuta na caja xíxi na xihín dá. <sup>28</sup> Ta nacasáhá cayuhú ná nuú ñayivi já cachí ná já xihín ná:

—Candehé ndó, ná Israel. Caja ndó ñamani chindeé ndó ndehe xihín dñ yóho jáchi níi cúu nú xíca dñ yóho cahán náda sahá ñayivi Israel ta jánahá dñ ñayivi ña co ndítahan ná candusa na ley Moisés ta ni co ndítahan ná ná caja cahnu na veñuhu cahnu ndácaan Jerusalén yóho. Ta viti caja náu chágá da jáchi janda java dñ gó, dñ náu Grecia najáquihvi da veñuhu í ta jáyuxu da veñuhu yíi yóho xihín dñ gójan —cachí ná.

<sup>29</sup> Tóco ndihi ña yóho nacachi taa Israel naquixi Asia cán xihín ñayivi jáchi nacahán dñ ña najáquihvi Pablo cán dñ naní Trófimo, dñ gó náu Efeso ini veñuhu joo a juú a já. Nacahán na já jáchi naxini na ndáca táhan Trófimo xihín Pablo xíca nuu da náu Jerusalén cán.

<sup>30</sup> Xihín ña nacachi dñ naquixi Asia yóho nandivaa tóco ndihi ñayivi náu Jerusalén já xínu na naxinu coo na natiin na Pablo. Já náhu na dñ natavá ná da jata veñuhu cán ta ivi láá nacchicají na yéhé veñuhu cán.

<sup>31</sup> Chí ndúcú ná cahni na dñ joo dñ cúu jefe soldado cán nañehe dñ tuhun ña nandivaa ndihi ñayivi náu Jerusalén cán. <sup>32</sup> Anda já najátaca dñ cúu jefe soldado xihín java ga dñ náhu já xínu da naxinu coo da náu nandivaa ñayivi cán. Tá naxini ñayivi cán vaxi dñ cúu jefe soldado cán xihín java soldado já najáyaa ñahá ná chí co cán ga ná Pablo.

<sup>33</sup> Anda já nacayati dñ cúu jefe soldado cán ná Pablo já natiin da dñ cuuhun dñ vecaa. Ta nacahndá da chuun ña ná cató ná dñ xihín ivi cadena. Tá nandili já nacasáhá ndáca

tñuhun dñ ñayivi ña ndá dñ cuú dñ yóho ta ndía nacaja da. <sup>34</sup> Joo sa jíin sa jíin tñuhun cayuhú in in ñayivi cán. Sahá ña cán quéa coó nacuu candaqini dñ cuú jefe soldado cán ndá cuahán quéa jácojo na jata Pablo jáchi yjuu quiahva ndívaa ná cán ndúu ná. Sahá ña cán quéa nacahndá mé jefe soldado cán chuun ña ná cañehe na Pablo vehe ná ndúu soldado. <sup>35</sup> Ta tá naxinu coo na cán nacahán ná ndaa na cuani vehe soldado cán xihín Pablo joo coó nacuu ndaa na jáchi chí cándihí táhan ñayivi cuni ná cani na Pablo. Sahá ña cán quéa nacajocó soldado cán Pablo já nandaa na cuani vehe soldado cán xihín dá. <sup>36</sup> Ta tóco ndihi ná cán cayuhú cóhó ná ndícaa na jata soldado já cachí ná já:

—Cahní ndó dñ. Ná quivi da —cayuhú ná.

Ndíquehe Pablo sgha mé dñ nuú ñayivi cán

<sup>37</sup> Ta tá sa ndúcú ná jáquihvi na Pablo ini vehe soldado cán já nacachi Pablo já xihín dñ cuú jefe soldado cán:

—Á quiähva ndó ñamani nuú i ná cahán i ivi joho tñuhun xihín ñayivi yóho.

Anda já nanducú ñehe dñ cuú jefe soldado cán tñuhun ná Pablo já nacachi da já:

—Á tiähvún cahún tñuhun griego, dñ já.

<sup>38</sup> Á a juú toho yóhó cuú dñ naquixi nación Egipto viti chí va, dñ najácahan ñayivi ná ndicuuta na cani táhan na xihín gobierno ta nacahndá da comi mil dñ sáhní ndii nacahán dñ chí yucú íchí nuú coó ñayivi. Á a juú toho yóhó cuú mé dñ cán —nacachi dñ cuú jefe soldado cán xihín Pablo.

<sup>39</sup> Anda já nanducú ñehe Pablo tñuhun ná dñ já nacachi da já:

—Jín va cuú yehé jáchi cuú u in dñ naquixi chíchi Israel ta nacacu u náu Tarsio, in náu cahnu ndácaan estado Cilicia. Ta viti a cuu quiähva loho ndó ñamani nuú i ná cahán i ivi tñuhun xihín ñayivi yóho —nacachi Pablo xihín dñ cuú jefe soldado cán.

<sup>40</sup> Anda já nacahndá da cán ñamani ná Pablo ña ná cahán dñ xihín ñayivi. Anda já nandaca ndichi Pablo nuú cuani vehe cán já nandiehe da ndáha dñ ná já ná catái yúhu ná. Ta tá sa nacatái yúhu ná já nacasáhá cahán dñ tuhun hebreo xihín ná.

—Cuni joho ndó nu cahán i xihín ndóhó, na sacuahá xihín ñani i jáchi cúní ndiquehe e sahá i viti —nacachi Pablo xihín ná.

<sup>2</sup>Tá naxini joho na cán ña cahán Pablo tuhun hebreo, mé tuhun cahán mé ná já nacatájí chágá yúhu ná. Anda já nacachi Pablo já xihín ná. <sup>3</sup>Yehé cúu u dà naquixi chichi Israel. Ta nacacu u ñuu Tarso ndácaan estado Cilicia. Joo nasañnu u ñuu Jerusalén yóho ta mé yóho najacuaha vi xihín in dà naní Gamaliel. Ta tá quiáhva sáhndá ley Moisés, ña násacu vaha tásahnu jícó yo quiáhva já nandíhi ini i cája i. Níi tiempo nandíhi ini i cája chúun i cuéntá Ndióxi xihín ndinuhu ini i tá quiáhva cája mé ndó anda quivi viti. <sup>4</sup>Naxica nuu i cája xíxi i xihín na ndíco íchí cuéntá Jesús janda quiáhva sáhní i na. Ta cuahá taa, ñáha viti naxica nuu i játaca i ña ña cuhun na vecaa. <sup>5</sup>Ta xíni vaha dà cíu sacuahá nuu jutu xihín ndíhi na sacuahá veñuho ña cahán i ña ndaa xihín ndo. Jáchí mé na yóho cíu na nacahyí tutu nasañhan na nuú i já ná ndiquiahva i ña nyú ñaní, na naquixi chichi Israel ndúu ñuu Damasco cán. Ta nasañhan i cán ndínducú u na cíu cuéntá Jesús ña cañehe e na quixi i ñuu Jerusalén yóho caja xíxi nde xihín ná.

*Ndícani Pablo ndaja nacuu nandiquehe da íchí cuéntá Jesús  
(Hch. 9:1-19; 26:12-18)*

<sup>6</sup>Joo nani xíca i íchí cuahán i tátuhun caxívi cása tá sa yati xínu coo i ñuu Damasco cán já in cuití nandíyehé ndaa nuu fin i ta mé a yóho naquixi a indíví. <sup>7</sup>Chí nandicava i nu ñúhu ta já naxini joho i in a cahán xihín i já nacachi a já: “Saulo, Saulo ndá cuéntá quéta ndíscutún cája xísún xihín i”, nacachi a xihín i. <sup>8</sup>Anda já nacásahá ndáca tuhún ijá cachí i já: “Ndá na cíu ndóhó ta ndaja nani ndo”, nacachi i xihín á. Anda já nanducú ñehe a tuhun nuú i já cachí a já: “Yehé cíu Jesús, dà ñuu Nazaret ta xihín yehe ndíscutún cája xísún viti”, nacachi a cán xihín i. <sup>9</sup>Ta na cuahán xihín i cán nayihví na tá naxini na ña nandíyehé nuu fin i cán. Joo coó naxini joho na ña cahán xihín i cán. <sup>10</sup>Anda já nacachi i já xihín Jesús: “Cahán ndó xihín i, xitoho i ndífa ndítahan caja i.” Anda jáví nacachi a já xihín i: “Candichi ta cuáhán ñuu Damasco nuu cahún cuhun jan. Ta ñuu jan ndicani in da nuun ndífa ndítahan cajún”, nacachi Jesús xihín i. <sup>11</sup>Ta

chí nacuaá nuú i nacaja ña nandiyhví cán. Sahá ña cán quéta jandá natiin ndaa na ndáca táhan i cán yehé cuahán nde janda quiáhva naxinu coo nde ñuu Damasco cán.

<sup>12</sup>Ta mé cán násahiin in dà naní Ananías, dà cája ña sáhndá ley Moisés xihín ndinuhu ini da. Ta tócó ndihi na Israel ndúu Damasco cán cahán na sahá dà ña cíu dà taa vaha. <sup>13</sup>Ta mé Ananías yóho nasañ dà naxito nihni da yehé. Já nacásahá cachí dà já xihín i: “Saulo, ñani i candehé tucu viti.” Tá nacachi da já chí ivi laá nanuña nuú i já naxini i da. <sup>14</sup>Anda já nacachi da cán já xihín i: “Mé Ndióxi, ña nacaja cahón tásahnu jícó yo, mé a cán quéta nacaxi a yohó já ná candaq inúndá quéta sácú ini mé a caja xuhun. Ta nacaxi a yohó já ná cunún Jesús, mé a cája ndinuhu ña ndaa. Ta nacaxi a yohó já ná cuni johún nu cahán Jesús. <sup>15</sup>Já quéta cuhún cahún sahá mé a nótocó ndihi ñayivi. Já ná ndicanún nu ná sahá ña naxinu xihín ña naxini johún. <sup>16</sup>A cándati chágún viti. Cuándacoo. Cández inúndá Jesucristo viti chí cuáhán candúta já ná ndoo cuachún, caja Ndióxi”, nacachi Ananías xihín i.

*Ndícani Pablo ña nachindahá Ndióxi da cahán dà tuhun vaha sahá Jesús nuú na tóho*

<sup>17</sup>Tá nandíhi já nandicó coo i ñuu Jerusalén ta nasañhan i veñuho cahnu cán caça tahví i nu Ndióxi. Ta nani xíca tahví i cán já naquixi tátuhun in sani nuú i vatí ndítá i. <sup>18</sup>Ta naxini i Jesús, xitoho i já nacachi a já xihín i: “Camún cuáqueún ñuu Jerusalén yóho jáchi a cándusa toho na yóho tuhun vaha cahún sahá i”, nacachi Jesús xihín i. <sup>19</sup>Anda já nanducú ñehe e tuhun nu Jesús já cachí i já xihín á: “Candehé ndo, xitoho i. Sa xíni vaha tócó ndihi ñayivi ña naxica nuu i ndijáá veñuho tiin i na cández ini ndohó ta já nacani i na ta nataán i na vecaa. <sup>20</sup>Ta sa xíni na ña tá nasañni na Esteban, mé da naxica nuu cahán tuhun vaha sahá mé ndó, in nasaçuu u xihín na nasañni ñahá cán. Jáchí táhán ini i cándichi i ndáá i jahmá ñayivi cán nani sáhní na Esteban”, nacachi i xihín Jesús. <sup>21</sup>Anda já nacachi Jesús já xihín i: “Cuáqueún cuhún jáchi chindahá xíca i yohó cuhún cahún sahá i nuú ñayivi tóho, na coó naquixi chichi Israel”, nacachi Jesús xihín i —nacachi Pablo xihín na cán.

*Cáhan chágá Pablo xihín mé dä cúú jefe nu ndíhi soldado*

<sup>22</sup> Nasanduu táji ná Israel cán nani cáhan Pablo xihín ná. Joo tá nacahán dä sahá ná tóho cán já nacasáhá cayuhú ná já cachí na já:

—Cahní ndó dä jan. Ná quivi da. Co ndítahan ga nu dá coo da ñuyíví yóho —cachí na cán cayuhú ná.

<sup>23</sup> Ta sahá ná ndúcú ndéé na cayuhú na ta jáni na jáhmá ná nu táchi ta janda ná yácá jácana nihni na nu táchi. <sup>24</sup> Sahá ná cán quéá nasahnda dä cúú jefe soldado cán chuun ná ná jáquihvi na Pablo cán ini vehe soldado. Ta tá nandíhvi da já nasaahnda da chuun ná ná jácaxáhan na dä xihín churú níj já ná nahma da ndíta nacaja da ta ndá sahá quéá ndícuítia ñayivi cán xihin dá. <sup>25</sup> Joo tá sa nacató na Pablo ta ndúcú na jácaxáhan na dä já nacachi Pablo já xihín in soldado cán:

—Ta viti cahan ndó xihín i á núná nu ndó jácaxáhan ndó in dä cúú taa romano tá cámaní yíi caja víi ndó sahá dä tá quiáhva sáhndá ley romano jáchi yéhe cúú u da romano —nacachi Pablo xihín soldado cán.

<sup>26</sup> Tá naxini joho dä ná yóho chí ivi laá nasaahna da cáxi tuhun da nu dä cúú jefe soldado cán já cachí da já xihín dá:

—Cuéntá vaha coo ndó ta coto a caja xíxi ndó xihín da jan jáchi cúú dä taa romano —nacachi in soldado cán.

<sup>27</sup> Anda já nacayatí dä cúú jefe soldado cán nu Pablo já nacasáhá ndáca tuhún ñahá dä já cachí da já:

—Á ndäa cúún taa romano —cachí da.

—Ajan, taa romano cúú u —nacachi Pablo xihín dá.

<sup>28</sup> Anda já nacasáhá cachí mé dä cúú jefe soldado cán já xihin Pablo:

—Yéhe nacahávi i cuahá ndivahá jiuuhún já nacuu nanduu u in taa romano —nacachi dä cán xihin Pablo.

Ta já cachí Pablo já xihín dá:

—Joo yéhe cúú u taa romano jáchi já nacacu u —nacachi Pablo.

<sup>29</sup> Tá naxini joho ná cuni jácaxáhan Pablo cán ná yóho chí naylhví na já nacasáhá xíca játa na cáxoo na nu dá. Ta janda mé dä cúú jefe soldado cán naylhví dä jáchi sa natiin na dä vatí cúú dä taa romano.

*Ndiquehe Pablo sahá mé dä nuú na sacuahá Israel*

<sup>30</sup> Ta inga quivi itaan natavá dä cúú jefe soldado cán cadena nasaandico ndáhá Pablo. Ta sahá ná cuni dä cán candaa ini da ndá cuachi quéa jácojo na jata Pablo sahá ná cán quéa nájátaca da ná sacuahá nuú jutu xihín ná sacuahá Israel. Anda já ñehe da Pablo já nasaacu da dä nuú na cán.

## 23

<sup>1</sup> Anda já nasaandehé Pablo nu tóco ndihí na sacuahá nuú ná Israel cán já nacasáhá cachí dä já xihín ná:

—Candehé ndó, ñani i. Janda jihna ta janda quivi viti caja i ná cuni Ndióxi ta xíni mé á ndaja ndácaan jiní i —nacachi Pablo.

<sup>2</sup> Joo dä cúú sacuahá nuú jutu naní Ananías cán nasaahnda da chuun nuú na ndíta yati xihín Pablo cán ná ná cani na jahndá yuhú dä. <sup>3</sup> Anda já nacachi Pablo xihín Ananías cán:

—Tá quiáhva nacani na jahndá yuhú i quiáhva já cani Ndióxi yohó, dä co cúú tá quiáhva ndáda da. Íun jan ndaja ndíchún yehé jáchi jácojo na cuachi jata i ná co sácu vaha i ley. Joo yóhó nandava ndojún ná sáhndá ley jáchi nasaahndún chuun ná ná cani na yehé —nacachi Pablo xihín Ananías cán.

<sup>4</sup> Anda já nacasáhá ná ndúu cán cáhan na xihín Pablo já cachí na já xihín dä:

—Cuéntá coún jáchi cánahún xihín dä cúú jutu sacuahá chágá nu ndíhi jutu cuéntá Ndióxi —nacachi na xihín Pablo.

<sup>5</sup> Anda já nacachi Pablo já:

—Cáhnu coo ini ndó, ñani i jáchi co xíni toho i ná cúú dä jan jutu sacuahá chágá nu ndíhi jutu cuéntá Ndióxi. Mé tuhun Ndióxi sáhndá chuun já cachí a já: “A cánahún xihín dä cómí chuun sahá ñuu ndó” —nacachi Pablo.

<sup>6</sup> Tá nandihi já nandicuni Pablo ná ndúu java ná saduceo ta ndúu ri java ná fariseo mé cán. Sahá ná cán quéa nacahán cóhó Pablo já nacachi da já:

—Candehé ndó, ñani i. Yéhe cúú u in dä fariseo ta in fariseo nasaacu ri tátá i. Ta viti caja víi ná yóho sahá i sahá ná cándusa i ná vaxi quivi nditacu tucu ndíj —nacachi Pablo.

<sup>7</sup> Tá nacachi Pablo já ivi laá nandicuítia na fariseo xihín ná saduceo ndítuhún xihín tahan na já nasaahnda java tahan na. <sup>8</sup> Jáchí ná saduceo cán co cándusa na ná vaxi quivi nditacu tucu ndíj. Ta ni co cándusa na ná

ndúu tátó Ndióxi. Ta ni co cándusa na ñia íin íníma ñayivi. Joo na fariseo cándusa va na tóco ndihi ña yóho. <sup>9</sup> Tóco ndihi na cán cayuhú na ndúu na. Sahá ña cán quéa nandacá ndichi java na jánaha ley Moisés, mé na cuahen xoo na fariseo cán. Já nacasáhá cachí na já xihín tóco ndihi ñayivi cán:

—Coó toho cuachi ná caja da naní Pablo yóho. Jáchí ndá íníma yii quéa nacahan xihín da yóho á tá coó ta ndá tátó Ndióxi quéa nacahan xihín da yóho. Sahá ña cán quéa tá ná cahan ihví yó xihín da yóho cúcú á tátuhun cání táchan í xihín Ndióxi —nacachi na jánaha ley Moisés xihín ná.

<sup>10</sup> A juú quihva nacasáhá ndívaa ñayivi cán sahá ña cán quéa nacasáhá yihví da cúcú jefe soldado cán ña tiahva náá tiin na Pablo ta jácuachi na da. Sahá ña cán quéa nacahnda da chuun ña ná quixi soldado tavá da Pablo tañu ñayivi cuahen cán. Ta já ná cañehe tucu na da cuhun da vehe soldado cán.

<sup>11</sup> Ta ñuu inga quiví itaen já nacanáha nuu Jesús, xitoho í nu Pablo ta nacahan xihín dá já nacachi a já:

—A ndícani inún, Pablo jáchí tá quihva nacahún sahá i nuu ñayivi ñuu Jerusalén yóho quihva já cahún sahá i nuu ñayivi ndúu ñuu Roma —nacachi Jesús xihín dá.

#### Sácu ini na Israel cahní na Pablo

<sup>12</sup> Ta inga quiví itaen já najándique táchan java na Israel tühun na ña cahní na Pablo. Ta nacachi na a cuxu na ta ni ticuúi a cóho na jandá quihva ná cahní na Pablo. Ta nacachi xihín táchan na ña cuhun cháhan jata ndá dä naxixi á naxixi ticuúi nani tacú Pablo. <sup>13</sup> Ta yáha ga nuu ivi jico taa cúcú da najándique táchan tühun caja ña yóho.

<sup>14</sup> Tá nandihí já naquee na nacahnda na cahan na xihín da sacuahá nuu jutu cán xihín na sacuahá nuu na Israel cán já nacachi na já xihín ná:

—Tóco ndihi nde najándique táchan nde tühun nde cahní nde Pablo. Ta nacachaen nde cháhan jata ndá dä ná cuxu nani tacú Pablo. <sup>15</sup> Sahá ña cán quéa caja ndó ñamani jándique táchan ndó tühun ndó xihín java ga na sacuahá jan já ná cahan ndó xihín da cúcú jefe soldado já ná cañehe tucu da Pablo quixi da nuu ndó. Ta cahan loho ndó xihín dä ña cúní ndó caja vií cuéé chága ndó sahá ña nacaja Pablo. Já va cache ndó xihín

dä cúcú jefe soldado cán ta ndehé canduu tiahva nde cahní nde dä tá ná quixi da íchi —nacachi na xihín na sacuahá cán.

<sup>16</sup> Joo in taa loho, dä cúcú jaxi Pablo nañehé dä tühun ña sácú ini na cahní na Pablo sahá ña cán quéa xínu da nacahnda da caxí tühun da nuu Pablo vehe soldado cán. <sup>17</sup> Tá nandihí nandícani taa loho cán ña yóho nuu Pablo já nacana da in táhan dä cúcú soldado cán já nacachi da já xihín dá:

—Cajún ñamani candacún da loho yóho ná cuhun dä nuu dä cúcú jefe nu soldado. Jáchí íin tühun cúní dä yóho cahan da xihín dä cán —nacachi Pablo xihín dá.

<sup>18</sup> Anda já ndáca soldado cán dä cúcú jaxi Pablo nacahnda da nuu dä cúcú jefe soldado cán já nacachi da já xihín dá:

—Dä naní Pablo ndácaen vehe soldado naxicá da ñamani nuu i ña ná candaca i da loho yóho quixi i ñehé e da jáchí íin tühun cúní da cahan da xihín ndo —nacachi da.

<sup>19</sup> Anda já natiin jefe soldado cán ndahá taa loho cán já nacahnda xóo da dä já nacasáhá ndáca tühun ñahá da já nacachi da já xihín dá:

—Ndíá cúnun cahún xihín i —nacachi da.

<sup>20</sup> Anda já nacasáhá taa loho cán caxí tühun da já nacachi da já:

—Najándique táchan na Israel tühun na ña caca na ñamani nuu mé ndó ña ná cañehe tucu ndó Pablo nuu na sacuahá nuu na Israel cán ña cavií vaha chágá sahá dä. <sup>21</sup> Joo a cándusa ndó caja ndó ña cúní na jáchí yáha chágá nuu ivi jico taa ndáti jehé na íchi ña cahní na Pablo. Ta nandique táchan tühun na ña cuxu na ni a cóho na ticuúi jandá quihva ná cahní na Pablo. Ta vití ndáti na candehé na á caja ndó ña cúní na —nacachi jaxi Pablo cán xihín dä cúcú jefe soldado.

<sup>22</sup> Ta tá nandihí já nacachi dä cúcú jefe soldado cán xihín dä ña ná a ndícani da nuu ni in ñayivi sahá ña sácú ini na Israel caja na xihín Pablo. Chí naquee dä loho cán cuahen da.

#### Chíndahá na Pablo cuahen dä nuu gobernador naní Felix

<sup>23</sup> Anda já nacana jefe soldado cán ivi dä sáhndá chuun nuu soldado ta nacahnda da chuun nuu dä ña ná caja tiahva da ivi ciento soldado táchan dä xíca sahá xihín uní jico uxu soldado táchan dä cándójó cuáyi. Ta natahnda chuun nuu dä ña ná caja tiahva da inga ivi ciento táchan dä ñehé lanza já

ná candaca na Pablo cuhun da ñuu Cesarea cán. Ta ná quee na cuhun na tátuhun caa ín sacuaá.<sup>24</sup> Ta nasañhnda da chuun ña ná caja tiahva na cuáyi canúu Pablo cuhun da. Ta nasañhnda da chuun ña ná candaah vaha na Pablo já ná cuu xíñu coo vaha da nuú dä cúú gobernador naní Felix ñuu Cesarea cán.<sup>25</sup> Ta nacindahá dä in carta cuhun xíñin ná já ná ndiquiahva na ña nuú dä cúú gobernador cán ta ña yóho cùú mé tuhun nacahyi nu carta cán:

<sup>26</sup> “Yehé cùú Claudio Lisias ta chíndahá i carta yóho nu ndo, tá Felix. Ta nu carta yóho cähán Ndiójxi yehé xíñin ndo, dä cùú da cähnu ñuu Cesarea cán.<sup>27</sup> Candehé ndo, tá Felix. Chíndahá i dä yóho nu ndo jáchí natii ná Israel da ta ndúcú na cahní na dä. Joo tá nacandaa ini i ña cùú dä dä romano já nasañhan i xíñin java soldado ta nacandaa nde dä ndáha ná cán.<sup>28</sup> Ta sahá ña cúní candaah ini i ndá cuachi jácojo na jata dä sahá ña cán quéa nasañhe e da nasañhan i nuú na sacuahá nuú na Israel cán.<sup>29</sup> Já nacandaa ini i ña jácojo na cuachi jata dä saha ley mé va na. Ta sahá ña coó cuachi nacaja da nu mí sahá ña cán quéa coó naxeen nde ña ná cahní na dä ta ni janda vecaa co cání nu dá cuhun da, cähán i.<sup>30</sup> Joo nacandaa ini i ña sácu ini ná Israel cahní na dä sahá ña cán quéa chíndahá vaha i dä nu mé ndó. Ta nacachi i xíñin na xójo iní xíñin dä ña ná saa ná nu mé ndó cacu na sahá dä ndíá ndóho na xíñin dä. Ña yóho cùú ndihí ña cähán i xíñin ndo, tá Felix. Ndiójxi ná coo xíñin ndo”, cachí carta cuhun xíñin Pablo.

<sup>31</sup> Ta nacaja mé soldado cán tá ín natähnda chuun nu dä. Ta já ñéhe ñuu ná Pablo nasañhan na janda ñuu Antípatris.<sup>32</sup> Ta inga quíy itaqñ já nandicó coo java soldado, da nasañhan sáhá cán chí vehe soldado. Joo java dä cándójó cuáyi cán cátahán yii dä xíñin Pablo cuhun da.<sup>33</sup> Ta tá naxíñu coo da ñuu Cesarea já nandiquiahva da carta cán nuú dä cùú gobernador. Ta nandiquiahva ri dä Pablo nuú dä cán.<sup>34</sup> Ta tá sa nandihi nacahvi dä cùú gobernador carta cán já nacásahá ndáca tuhún dä Pablo sahá ndá ñuu naquixi da. Ta tá nacandaa ini da ña cùú Pablo dä ñuu Cilicia<sup>35</sup> já nacachi da já xíñin dä:

—Janda quiahva ná xíñu coo na jácojo cuachi jatun anda já caja vií i sahún — nacachi Felix cán xíñin Pablo.

Tá nandihi já nasañhnda da chuun ña ná candaah vaha na Pablo nani ndácaan da vechúun Herodes cán.

## 24

*Ndíquehe Pablo sahá mé dä nuú dä cùú gobernador naní Felix cán*

<sup>1</sup> Ta tá sa nayaña uhun quivi já naxíñu coo da cùú sacuahá nuú jüty, dä naní Ananías cán. Naxíñu coo da ñuu Cesarea xíñin java ga ná sacuahá ta ndáca da in dä ndíquehe sahá na Israel naní da Tértulo. Tóco ndihí ná yóho nacatáhan na nasañhan na sácu na sahá Pablo nuú gobernador cán.<sup>2</sup> Ta tá nandihi já nasañhan quehe na Pablo já naxíñu dä nuú ndihí na cán. Anda já nacásahá Tértulo cán sácú dä sahá Pablo já nacachi da já:

—Ndíquiahya nde ndixahvi nu ndó, tá gobernador jáchí sahá ña ndichí jini ndó cùú ndáa vaha ndó ndehe. Ta coó tandohó tañu nde ta tóco ndihí nde ndíu táji nde.

<sup>3</sup> Nayivi ndíu ndijáa ñuu ín toní ñúhú na xíñin ndo ta ndíquiahva na ndixahvi nu ndo, tá Felix jáchí caja cuahá ndó ñamani xíñin nde.<sup>4</sup> Ta viti co cúní nde jáquihvi nde ndohó joo caja ndó ñamani cuni joho loho ndó ña cúní nde cähán nde xíñin ndo yóho.

<sup>5</sup> Candehé ndo, tá Felix. Nanditahan nde dä naní Pablo yóho xíca nuu da jáquihvi da ñayivi. Ta níi cùú xíca nuu da sáhndá java táchana ñayivi naquixi chíchi Israel. Ta mé Pablo yóho cùú dä jini nuú in táchadá ñayivi, ná naní nazarenos.<sup>6</sup> Ta jivi mé dä yóho nanducú dä jáyuxu dä veñuhu cähnu nde ndácaan ñuu Jerusalén cán. Sahá ña cán quéa natii nde dä ta nanducú nde caja vií nde sahá dä tá quiahva sáhndá ley mé nde caja nde.<sup>7</sup> Joo dä cùú jefe soldado, dä naní Lisias cán naquihvi da tañu nde ta xíñin ña tóyí nacandaa da Pablo ndahá nde.<sup>8</sup> Ta nacachi da xíñin nde ña ná quixi nde cähán cuachi nde nu mé ndó sahá Pablo. Ta viti, tá Felix cuu ndacá tuhún ndó Pablo jan ta já nahma mé va da nu ndo. Ta xíñin ña yóho cuu candaah ini ndó ña ndaa cähán nde sácú nde sahá dä nu ndo —nacachi Tértulo cán xíñin Felix.

<sup>9</sup> Ta jári ná Israel ndíu cán nacachi na ña jivi ndusa ña ndaa queá.<sup>10</sup> Anda já nandihe gobernador cán ndáha dä ña ná cähán Pablo. Ta já cachí Pablo já:

—Cájii ini i ndiquehe e sahá i nu mé ndó, tá Felix jáchí sa cuahá cuiá caja vií ndó sahá ñayivi Israel.<sup>11</sup> Tá ná ndaca tūhún ndó ñayivi yóho já candaqá ini ndó ña sa íin uxu iví quívi naxinú coo i ñuu Jerusalén caja cahnu i Ndióxi.<sup>12</sup> Ta ni in tūhún toho ñayivi coó najándinhi i veñuhu cahnu ndácañ Jerusalén cán. Ta ni ná tácá veñuhu válí ta ni ná táchá cayé ñuu Jerusalén cán coó najándinhi i.<sup>13</sup> Ta na jácojo cuachí jatá i yóho a cúu caja na náhá ná nu mé ndó ña ndaa cahán na sahá i.<sup>14</sup> Ña cúní ndusa i caxí tūhun i xihín ndihi ndó quéa caja cahnu i Ndióxi, mé a nacaja cahnu tásahnu jíco i tá quiahva najánahá Jesús caja i. Vatí cachí na Israel yóho ña co xíca i íchí ña ndaa. Joo cándusa i tóco ndihi ley nacahyí Moisés ta cándusa i ña nacahyí na profeta sanahá.<sup>15</sup> Ta tá quiahva cándusa na yóho quiahva já cándusa ri yehé va jáchí cándusa nde ña vaxi quíví nditacu tóco ndihi na sa naxihí. Coó caja toho á cíu ná ña vaha á na quini.<sup>16</sup> Sahá ña cán quéa xíni Ndióxi ña ndijáá níi quívi caja i ña vaha xihín ndinuhi ini i nu mé a xihín nuú ñayivi.

<sup>17</sup> Sa íin chá cuiá naxíca nuu i java ga ñuu. Anda jáví nandicó coo tucu u ñuu Jerusalén ña quiahva i jíuhún nuú na Israel ta joco i nu Ndióxi ña ndítahan nuú i joco i nu á.<sup>18</sup> Ta nani caja i mé ña yóho ndácañ i veñuhu cahnu Jerusalén cán já java da Israel, da naquixi chí esteado Asia cán naxini da yehe nu ndácañ i ve ñuu cán. Ta tá nandihí nandaja vií i mí i tá quiahva sáhndá ley caja nde, coó ñayivi cuahá násanduu cán ta ni in tūhún toho na cán coó najándinhi i.<sup>19</sup> Ta na naquixi chí Asia cán, na cán va cíu na ndítahan cacu sahá i nu ndo, tá Felix tá íin a ndóho na xihín i.<sup>20</sup> Joo na ndúu yóho coó saha toho na cacu na sahá i nu mé ndó. Á tá coó na cahán na tá nandinéhe né cuachí i tá nacaja vií na sahá i nuú na sacuahá nuú na Israel cán, dá já.<sup>21</sup> In tūhún ña nacaja i tá caja vií na yóho sahá i quéa nacayuhú u ta nacachi i: “Cája vií ndó sahá i sahá ña cándusa i ña vaxi quíví nditacu tucu ndij”, ña cán cíu ndihi va nacachi i xihín ná — nacachi Pablo cán xihín dä cíu gobernador cán.

<sup>22</sup> Sa xíni vaha Felix cán ndaja íin ña jánahá na cíu cuénta Jesús cán sahá ña cán quéa cúní dä candati tóo da caja vií dä saha

Pablo. Sahá ña cán quéa já nacachi da já xihín na Israel cán:

—Candati ndó jända quiahva ná casaa dä naní Lisias, dä cíu jefe soldado ñuu Jerusalén já cuu caja vií i sahá dä yóho — nacachi Felix.

<sup>23</sup> Tá nandihí já násahnda Felix chuun nuú dä sáhndá chuun nuú soldado cán ña chican tucu na Pablo vecaa. Ta násahnda da chuun ña ná caja vaha da xihín Pablo ta ná quiahva da ñamani nuú na xíca xihín Pablo coto nihni na dä ña ná caja ndíví na nu dá.

<sup>24</sup> Tá nayaha chá quívi já nacasaan tucu Felix cán xihín Drusila, ñajíhí dä, ña cíu ña Israel. Nacana tucu Felix Pablo ña ná quixi da ta ná ndicani da nu ná ndá quiahva caja na ndiquehe na íchi cuénta Jesús.<sup>25</sup> Ta nandicani Pablo nu ná ña ndítahan nu ná caja na ña ndaa cuití va ta ndítahan nu ná cahnu ña nuú ña xíca ini yiquí cíu na caja. Ta nandicani Pablo nu ná ña vaxi quíví caja vií Ndióxi sahá cuachí ñayivi. Anda já nayihví Felix cán já nacachi da já xihín Pablo:

—Cuahán viti. Tá núná nuú i já cana tucu u yóho quisún —nacachi Felix xihín Pablo.

<sup>26</sup> Mé Felix yóho ndáti da quiahva Pablo jíuhún nu dá já janí ñahá dä. Sahá ña cán quéa cuahá ndivaha tañu nacana da dä ndítuhún dä xihín dä.<sup>27</sup> Ta tixi iví cuiá já cuití nacaja da xihín Pablo jända quiahva nandicojo dä naní Porcio Festo chuun cacu da gobernador saá cán. Ta mé Felix cán coó naxeen da janí dä Pablo jáchí cúní dä candoo vaha da nuú na Israel cán.

## 25

*Ndíquehe Pablo saha mé dä nuú gobernador Festo*

<sup>1</sup> Tá sa nayaha uní quívi nandicojo Festo chuun cíu dä gobernador já naquee da ñuu Cesarea cán násahna dä chí ñuu Jerusalén.

<sup>2</sup> Ta tá naxinú coo dä cán násahna na sacuahá nuú jutu xihín java ga na Israel, na íin chágá saha cahán cuachí na saha Pablo nu Festo.<sup>3</sup> Ta ñamani cahnu naxíca na nu dä quéa ña ná cahnda da chuun ná quixi Pablo chí ñuu Jerusalén yóho. Jáchí mé na cán násacu ini na tiin na Pablo íchí cahni na dä.<sup>4</sup> Joo coó nacandusa Festo caja da ña cúní na sahá ña cán quéa nacachi da xihín ná ña ndáá vaha na Pablo ñuu Cesarea cán. Ta sahá ña sácu ini da cuhun yachí dä mé

cán<sup>5</sup> sahá ña cán quéa nacachi da xihín ná já:

—Ndá na cíuú na sacuahá nu ndó jan xímí níuhú cuhún na ñuu Cesarea xihín i já ná cuu cacu na sahá Pablo tá íin cuachi nacaja da —nacachi Festo xihín ná Israel cán.

<sup>6</sup> Ta nasañiun Festo tátuhun una á uxu quiví cuití a ñuu Jerusalén cán já nandicó coo tucu da chí ñuu Cesarea. Ta inga quiví itaen já nasaçoo da nu silleta nu sácoo na caja vií sahá ñayivi. Anda já nasañhanda da chuuñ ña ná cana na Pablo quixi da nu dá. <sup>7</sup> Ta tá naxínu coo Pablo nu Festo cán já tóco ndihí na Israel, na naquixi ñuu Jerusalén cán nacaya nuu na jata Pablo já nacasáhá jácojo cuahá ná cuachi ndeejata dá. Joo coo níhe ná ndaja sahá na nu Festo cán ña cahán ña ña ndaa sahá dá. <sup>8</sup> Ta nacasáhá Pablo ndiquehe da sahá mé dá já nacachi da já:

—Ni in túhún toho cuachi coó nacaja i xihín ley ná Israel ta ni xihín veñuhu cahnu coó nacaja i cuachi. Ta ni nuú da cómí cuénta sahá ñuu Roma coó nacaja i cuachi —nacachi Pablo xihín tóco ndihí ñayivi ndíu cán.

<sup>9</sup> Ta sahá ña cíni Festo candoo vaha da nuú na Israel sahá ña cán quéa nandaca tuhún dá Pablo já nacachi da já:

—Á cándusún cuhún ñuu Jerusalén já ná caja vií i sahun cán —nacachi da xihín Pablo.

<sup>10</sup> Anda já nanducú ñehe Pablo tuhun nu dá já nacachi da já:

—Uhun. Coó saha cíuú á cuhun i ñuu Jerusalén jáchí viti ñíuhú cándichí i nu mé ndó ta cíuú ndó gobernador romano. Ta mé ndó ndítahan nuú caja vií sahá i jáchí sa cándaa caxí ini ndó ña coó cuachi toho nacaja i xihín ná Israel jan. <sup>11</sup> Joo tá nacaja ndusa i cuachi, mé a ndaa coo yíhví toho i quiví i sahá cuachi i. Joo a juú toho ña ndaa cíuú tóco ndihí cuachi jíquí jácojo na Israel jan jata i sahá ña cán quéa coo ndítahan nu ndó ndiquiahva ndó yehe nuú ná yóho. Ta viti xíca i ñamani nu ndó ña ná chindahá ndó yehe ná cuhún i nuú emperador ñuu Roma ná caja vií mé dá sahá i —nacachi Pablo xihín Festo cán.

<sup>12</sup> Tá nandihí já nanditúhún Festo cán xihín ná sacuahá caja chuuñ nu dá cán ndaja ndítahan coo caja da. Anda já nacachi tucu Festo cán já xihín Pablo:

—Vaha dá já. Nu emperador íin ñuu Roma nacachún cuhún cúnun. Ta cán cuhún cavií sahun —nacachi Festo xihín Pablo.

Tá íin Pablo nu rey Agripa

<sup>13</sup> Tá nayaha chá quiví já naxínu coo in rey naní Agripa xihín ñá naní Berenice ñuu Cesarea cán coto nihni na Festo. <sup>14</sup> Ta nasañduu na chá quiví xihín Festo cán. Ta nani ndúu na cán nandicani Festo nu rey Agripa ndaja cúa ña ndóho Pablo já nacachi da já xihín dá:

—Ini vechúun yóho ndácaqan in da naní Pablo ta anda tá nasaçuu Felix gobernador já natiin na dá. <sup>15</sup> Ta tá nasañhan i ñuu Jerusalén já sácu ná sacuahá nuú jutu xihín na sacuahá nuú na Israel sahá dá ña ná quiví da caja i. <sup>16</sup> Anda já nanducú ñehe e tuhun nu ná ña coo sahan ley ñuu Roma ñamani ña cahni ña ñayivi tá coó ná sácu sahá dá ndítia nu táchí dá já ná cuu ndiquehe da sahá dá nu ná. <sup>17</sup> Sahá ña cán quéa tá nandai cuu ná Israel cán ñuu Cesarea yóho já nandihí ini i já nasañhan i nasaçoo i inga quiví itaen nu sácoo na caja vií sahá ñayivi. Já nasañhanda i chuun ña ná cañehe na Pablo quixi da nuú i. <sup>18</sup> Tá naxínu coo ná cán sácu ná sahá dá coó nasaçu na cuachi cahnu sahá dá tá quiahva cahán i. <sup>19</sup> Joo cachí ña coo cíni dá candusa da tá quiahva cándusa mé ná. Ta sácu na sahá dá jáchí xíca da jánahá dá sahá Jesús, mé a naxihí jihna. Joo jánahá Pablo ña tacú yíi va mé Jesús. <sup>20</sup> Ta sahá ña coo cándaa ini i ndaja caja i caja vií i sahá ña yóho sahá ña cán quéa nandaca tuhún i Pablo ña á cándusa da cuhún dā ñuu Jerusalén caja vií i sahá dá. <sup>21</sup> Joo nacachi da xihín i ña cíni dā cavií sahá dá nuú dā cíuú emperador naní Augusto, dā íin ñuu Roma cán. Sahá ña cán quéa nasañhanda i chuuñ ña ná candaahá vaha na dā jandá quiahva ná cuu chindahá i dā nuú emperador já ná caja vií dā cán sahá dá —nacachi Festo xihín rey Agripa cán.

<sup>22</sup> Anda já nacachi rey Agripa cán já xihín Festo:

—Cíni ri yehe va cuni joho i ndá quiahva cahán da naní Pablo jan —cachí Agripa.

Anda já nacachi Festo já xihín dá:

—Itaen já cuni johún nuú cahán dā —cachí Festo.

<sup>23</sup> Ta inga quiví itaen naxínu coo rey Agripa xihín Berenice nu íin Festo cán. Ta

ndíxi vaha ndiváha na nandihvi na xihín in yíco da cúu sacuahá nu soldado xihín nataa íin sahá ñuu cán. Ta tá nasanduu na já nasañinda Festo chuun ña ná cuhún na quehe na Pablo.<sup>24</sup> Ta tá nasaña da nu ná já nacachi Festo já:

—Mé ndó, rey Agripa xihín ndihi ndó, na nataca ndíu xihín nde yóho. Candehé ndó da naní Pablo cándichi yóho. Cuahá ndiváha táchan na Israel, na ndíu ñuu Jerusalén xihín na ndíu ñuu Cesarea yóho sácú na sahá dá nuú i. Ta a juú quiaghva ndícu ndéé na cahán na ña ndítahan quivi da caja i.<sup>25</sup> Joo yehe cahán i ña co ndítahan toho nu dá quivi da jáchí coó cuachi cahnu na caja da. Ta sahá ña naxica mé dá cavií sahá dá nuú emperador Augusto íin ñuu Roma cán sahá ña cán quéa sácú ini i chindahá i da cuhún da cán cavií sahá dá.<sup>26</sup> Joo co xíni ndíi cahyí i nuú da cúu emperador ñuu Roma sahá cuachi sácú na sahá dá. Sahá ña cán quéa nasañi ndichi i da nuú ndihi ndó xihín nu mé ndó rey Agripa já ná ndaja ndichi ndó da já ná ñehé íní i ndáa cahyí i nu carta chindahá i nu emperador ñuu Roma cán.<sup>27</sup> Jáchí coó sahá cúu á chindahá i da ñuu Roma tá a cuú cahyí i ndá cuachi jácojo na jata dá —nacachi Festo xihín na cán.

## 26

*Ndiquehe Pablo sahá mé dá nu rey Agripa*

<sup>1</sup> Anda já nacachi rey Agripa cán já xihín Pablo:

—Viti va sáhan nde ñamani nuun ndiquehún sahún.

Anda já nandíñehe Pablo ndáha da já nacásáhá cachí da já:

<sup>2</sup> —Cájii íní i ña cuu ndiquehe e sahá mí i nu ndó, rey Agripa jáchí a juú quiaghva cuahá cuachi jíquí jácojo na Israel jatá i.

<sup>3</sup> Cájii íní i cahán i nu mé ndó, rey Agripa jáchí cándaa vaha ini ndó ndaja íin costumbre na Israel. Ta cándaa ini ndó ndá ñaha quéa ndítuhún táchan nde sahá. Sahá ña cán quéa xíca tähví i nu ndó ña ná caja ndó ñamani cahnu coo ini ndó cuni joho ndó ña cahán i xihín ndó yóho.

<sup>4</sup> Tóco ndihi na Israel xíni vaha na ña nacaja i tá nasaçuu u da tacú. Ta anda viti xíni na yehe ta xíni na ña nacaja i ñuu i xihín ñuu Jerusalén.<sup>5</sup> Ta xíni vaha na ña jandá yútä i nasaçuu u taa fariseo ta chí cuu ndicani na nu mé ndó tá cúní na. Ta ndehe, na fariseo cuú nde na caja ley Moisés xihín

ndinuhu chágá ini nde a juú ga inga na.<sup>6</sup> Ta sahá ña cández cahnu ini i ña vaxi quiví jánditacu tucu Ndióxi tóco ndihi na naxihí sahá ña cán quéa na Israel yóho ñéhe na yehe nacasaña na caja vií na sahá i nu mé ndó. Ta mé Ndióxi quéa nasañan tuhun a nu tásahnu jícó nde ña ndítacu tucu ndi.<sup>7</sup> Tóco ndihi ñayivi táchan na naquixi chichi ndíshuxu ivi jahyi Israel cán ndáti na cuni na nuú jáinxu coo Ndióxi nuú tuhun a. Sahá ña cán quéa ñuu ta ndiví caja cahnu na Ndióxi. Candehé ndó, rey Agripa. Sahá ña cándusa i tá quiaghva cándusa na cán sahá ña cán quéa jácojo na Israel cuachi jatá i viti —nacachi Pablo xihín rey Agripa.

<sup>8</sup> Anda já nacahan Pablo xihín na Israel ndíu cán já:

—Á mé a ndaa cándusa ndó ña cuu caja Ndióxi ña ndítacu tucu ndi —nacachi Pablo xihín na Israel ndíu cán.

<sup>9</sup> Anda já nacachi tucu Pablo xihín rey Agripa já:

—Yehe nacahán i jihna ña ndítahan caja xíxi i xihín na cuú cuénta Jesús, mé a naquixi ñuu Nazaret.<sup>10</sup> Sahá ña cán quéa já nacaja i ñuu Jerusalén jihna. Ta nasañan i naxica ñamani nuú na sacuahá nuú jutu já ná quiaghva na ñamani nuú i caja i ña yóho. Ta taa náñehé e ñamani já nataán cuahá i na cuú cuénta Jesús vecaa. Ta tá nasañi ñahá na, cájii ini i sahá ña caja na já xihín ná.<sup>11</sup> Ta cuahá taán nacaja xíxi i xihín na ña cán cahán ihví na sahá Jesús, mé a cández ini na. Níi cuú veñhu naxica nuu i caja i já xihín ná. Ta jandá ñuu tóho nasañan i nandicuita ñee e na jáchí nasaçoxo ndiváha ini i xihín ná.

*Ndícani Pablo ndaja nandihvi da íchi cuénta Jesús*

(Hch. 9:1-19; 22:6-16)

<sup>12</sup> <sup>13</sup> In tañu nañehé e ñamani nuú na cuú sacuahá nuú jutu ñuu Jerusalén ña ná cuhún i ñuu Damasco taán i na cuú cuénta Jesús vecaa. Sahá ña cán quéa naquee e cuahán i.<sup>14</sup> Candehé ndó, rey Agripa. Nani xíca i cuahán i íchi cán cuú á tátuhun caxivi já naxini i nandiyihví ndaa in ñuhú indívi ta yéhe chágá ña a juú ga candii. Ta nacava nuu a jatá i xihín jatá da cásahán xihín i cán.<sup>15</sup> Anda já nacyu ndihi nde nu ñuhú ta já naxini joho nde in a cahán tuhun hebreo já nacachi a já xihín i: “Saulo, Saulo ndá cuénta quéa ndicuitún caja xísún xihín i.

Candehé. Cája xísún xihín mé vún. Ñá cajun xihín i cúú á tátuhun ñá cája tindiqui tá sáni ndaa rí nu pójá”, nacachi a cán xihín i.<sup>15</sup> Anda já nácasáhá ndáca tuhún i já cachí i já: “Yo cúú mé ndó cáhan xihín i.” Anda já nanducú ñehe a cán tuhún nuú i já nacachi a já: “Yéhe cúú Jesús, mé a xíca nuún cája xísún xihín.<sup>16</sup> Ta viti cuahán ndacoo, candichi. Nanaha í mí i nuun já ná caja chún cuénta mí i viti já ná ndicanún nuú ñayivi ndaja caá ña naxinún viti ta já ná ndicanún nu ná java ga ñaha jánaha i nuun chágá chí nuú.<sup>17</sup> Mí i jácacu u yohó já ná a cáhni na Israel yohó ni ná tohó a cáhni na yohó jáchí nu mé na tohó cán chindahá i yohó cuhún cahún sahá i viti.<sup>18</sup> Ta jánahún nu ná ndaja caja na jándicoo na íchí naá ndivaha nu xíca na viti. Jáchí ndítahan nu ná ndicaca na íchí mí i nu yéhe ndivaha. Ta jánahún nu ná ña ná a ndíquiahva ga na mé ná ndahá tiñahá sacuahá. Ñá ndítahan caja na quéa ndíquiahva na mé ná ndahá Ndióxi ta ná caja na ña cúní mé á. Ta ndítahan candeé ini na yéhe já ná caja cáhnu ini i sahá cuachi na. Ta já ná cuu in nduu na xihín na nacaxí i ñehe táchví ñá cúní Ndióxi quiahva nu ná”, nacachi Jesús xihín i tásahánan íchí nuú Damasco.

#### *Ndícani Pablo sahá chuun cája da*

<sup>19</sup> Candehé ndó, rey Agripa. Coó nacaja sáa ini i. Jáchí nacaja i tá íin nasaahnda Jesús nuú i caja i.<sup>20</sup> Sahá ñá cán quéa ivi laá nácasáhá cáhan i tuhun vaha saha Jesús nuú ñayivi nuú Damasco cán. Tá nandihi já naquee e nasaahán i cahán i ña xihín na ndíu ñuu Jerusalén xihín na ndíu ndijáá ñuu estado Judea. Ta jandá xihín na coó naquixi chichí Israel nacahán i saha Jesús. Ta nacachi i xihín ná ña ndítahan nu ná jándacoo na ña nuú cája na ta ná ndicó coo na nu Ndióxi. Ta ndítahan caja na ña vaha já ná ñaha ña mé a ndaa táchví nandiquehe na íchí cuénta Jesús.<sup>21</sup> Ta sahá ña yóho cuití natíi ná Israel yéhe nani ndácaqan i veñhuu cáhnu ñuu Jerusalén ta viti ndúcú na cahní na yéhe.<sup>22</sup> Joo Ndióxi nachindeé a yéhe sahá ñá cán quéa coó nájándihí na sahá i. Ta anda viti xíca nuu i cáhan i tuhun Ndióxi nuú ñayivi ta coó caja toho a á cúú ná na ndahví á cúú ná ña íin cuahá saha. Ta tóco ndihí ñá jánaha i nu ná coó cúú á ña quíxi jini mí i jáchí cúú a ñá nacachi na profeta xihín ñá nacachi Moisés coo.<sup>23</sup> Ta ñá nacachi na

cán quéa vaxi quíví quixi Jesucristo ñuyíví yóho ta a juú quiahva jándoho na ini a. Ta cahní ná ñá ta tá nandihi jánditacu tucu a. Ta mé á cacuu ñá nu cuítí nditacu nuú tóco ndihí ñá sa naxlhi. Ta mé á jánaha nuú ñayivi ndaja cuu cazu ndaa ínimá ná coó caja toho a á cúú ná ñá Israel á cúú ná ná tohó —nacachi Pablo xihín rey Agripa cán.

*Cúní Pablo ná ndihvi Agripa íchí cuénta Jesús*

<sup>24</sup> Tá nacatáji loho Pablo nu cáhan da já nacayúhí cóhó Festo nu dá já cachí da já:

—Nacatachí vún, Pablo. Nayaha ndivaha quiahva najácuahún sahá ñá cán quéa nácatachun —nacachi Festo cán xihín Pablo.

<sup>25</sup> Anda já nacachi Pablo já xihín dá:

—Coó nacatachí toho i, tá Festo jáchí ndinuhi ñá ndaa cáhan i xihín ndó.<sup>26</sup> Ta xíni vaha mé rey Agripa yóho ñá cáhan i ñá ndaa. Ta co yíhví cáhan i nu dá jáchí cándaqá ini i ñá xíni vaha mé dá ndá saha cáhan i jáchí co cúní á ñaha nayaha nuú jehé.<sup>27</sup> Ta viti cachi ndó xihín i, rey Agripa á cándusa ndó ñá nacahán na profeta sanahá. Cája i cuénta cándusa ndó ñá nacachi na —nacachi Pablo.

<sup>28</sup> Anda já nanducú ñehe rey Agripa cán tuhun já nacachi da xihín Pablo:

—Ja lóho cuití ta cavún jiní i ñá ná nduu u cuénta Jesús, nduu —nacachi rey Agripa.

<sup>29</sup> Anda já nacachi Pablo já xihín dá:

—Á yachi a cuee coó caja toho a. Ñá xíca táchví i nu Ndióxi quéa ná xinu coo mé ndó, rey Agripa xihín tóco ndihí ñá ndúu yóho cazu ndó tátuhun mí i jáchí cándee cáhnu ini i Jesús vatí mé a ndaa co cúní ñá ná cándico ndahá ndó tátuhun yéhe —nacachi Pablo xihín dá.

<sup>30</sup> Tá nandihi nacahán Pablo já nandaca ndichi rey Agripa cán xihín Berenice ta nandaca ndichi Festo xihín java ga na nasaanduu coo xihín dá cán.<sup>31</sup> Já natavá táchán na ndítuhún na saha Pablo já cachí xihín táchán na já:

—Co ndítahan toho nuú da yóho quivi da jáchí coó cuachi ndéé ná caja da ta jandá ni vecaa co ndítahan ndacaan da —cachí na.

<sup>32</sup> Anda já nacachi rey Agripa cán já xihín Festo:

—Tá ná a cáhan da yóho ñá cúní da caví sahá dá nuú da cúú emperador ñuu Roma ta cuu janí vún da, nduu —nacachi Agripa cán xihín Festo.

## Chíndahá nə Pablo ñuu Roma

<sup>1</sup> Tá násacu ini na chindahá na Pablo ná cuhun da chí nación Italia nü ndácaan ñuu Roma cavií sahá dá já nandiquiahva na də xihín java gə da ndácaan vecaa cán nuú də naní Julio, də sáhndá chuun nü soldado cuénta Roma. Mé Julio yóho cūú dá da cómí cuénta sahá in táhndá soldado naní Augusto. Ta tañu nə cuhun xihín Pablo cán cuahán ri yehe, də naní Lucas. <sup>2</sup> Ta tañu nde cán cuahán ri də naní Aristarco, də ñuu Tesalónica, ña ndácaan estado Macedonia. Nəndaa nde iní barco, dō naquixi chí Adramitio. Mé barco yóho cūú dō cuhun ndijáá ñuu válí ñúhu estado Asia cán. Cándójó nde barco cán cuahán nde.

<sup>3</sup> Ta inga quíví itaān naxinu coo nde ñuu Sidón. Ta cán nácaja vaha də naní Julio cán xihín Pablo jáchí násahan də ñamani nü Pablo ña ná coto nihni da ná xíní táhan xihín də ndúu ñuu Sidón cán já ná caja ndíví ná nu dá. <sup>4</sup> Ta inga quíví itaān já nandíhi tucu nde barco já naquee nde ñuu Sidón cán. Ta sahá ña vaxi tachí xoo nuú cuhun barco cán sahá ña cán quéa nayaha nde xoo íti isla Chipre jáchí co xícó cuahá tachí cán. <sup>5</sup> Naxojo cava nde andá inga xoo tañuhú ta já nayaha nde in xoo estado Cilicia xihín estado Panfilia. Andá já naxinu coo nde ñuu Mira ndácaan estado Licia.

<sup>6</sup> Mé ñuu Mira cán nandiñehé də sáhndá chuun nü soldado cán in barco, dō naquixi chí Alejandría ta cuhun do chí Italia. Ta najándaan da ndehe jata dó cán já naquee tucu nde cuahán nde. <sup>7</sup> Cuéé vaha va cuahán nde ta nandoho chí ini nde cuahán nde sahá ña cán quéa cuahá quíví nácaja nde janda quiahva naxinu coo nde ñuu Gnidó. Ta sahá ña xícó ndivaha tachí xoo nuú cuhun nde cán sahá ña cán quéa nandijama nde nuú cuhun nde. Ta já nayaha nde inga xoo isla Creta nuú nayaha nde ñuu Salmón. <sup>8</sup> Cuéé ndivaha cuahán nde já yáha nde yati yuhú tañuhú isla Creta cán. Andá jáví naxinu coo nde nuú coo vaha barco naní Puerto Vaha yati ñuu Lasea.

<sup>9</sup> Sa nayaha cuahá quíví ta nácauáchí nde. Ta iyo ndivaha cáá cuhun nde xihín barco jáchí nácajati tiempo vixi. Sahá ña cán quéa nácahan Pablo xihín ndihi nə cán já cachí də já xihín ná:

<sup>10</sup> —Candehé ndo. Cája i cuénta iyo ndivaha cáá coho xihín barco jáchí cuu ndihi sahá barco xihín ña ndójo dō cuahán do. Ta janda mí cuu quíví —nácahi Pablo xihín ná.

<sup>11</sup> Joo coó náxeen də sáhndá chuun nuú soldado cán cuni joho da nu cáhan Pablo. Nacandúsá chágá da nuú nácahan də néhe barco xihín də xínáha barco a juú ga nuú nácahan Pablo. <sup>12</sup> Ña nácahi na quéa a cuú candoo na yóho tiempo vixi jáchí xícó ndivaha tachí. Ta tóco ndihi na nácahi na ña vaha chágá ná cuhun nde. Tiáhva náá jana quee vaha nde xinu coo nde janda ñuu Fenice cáhán ná. Mé ñuu Fenice cán ndácaan isla Creta ta co xícó ndeé nahá tachí cán. Sahá ña cán quéa násacu ini na canduu na cán tiempo vixi.

## Tá naxicó ndivaha tachí nuú tañuhú

<sup>13</sup> Tá nandihí já nácasáhá vitá uun xícó tachí sahá ña cán quéa nacahán nə ña cuu va quee nde cuhun nde. Andá já náquee nde cuahán nde yati yuhú isla Creta cán xica nde cuahán nde. <sup>14</sup> Joo tá nandihí já naxinu tachí ndeé jata barco. Mé tachí ndeé cán vaxi a chí xoo norte xihín chí nu cána cändii. <sup>15</sup> Ta nácasáhá ñúhu mé tachí ndeé cán barco cuahán do. Ta sahá ña coó nácuu caja nde jándicaca nde barco cán xoo nuú vaxi tachí sahá ña cán quéa nácahan nde ñamani ña ná cañehé a barco cuhun do tá quiahva cúní tachí. <sup>16</sup> Tá nandihí já nayaha nde jata in isla loho naní Claudio. Ta mé cán coó náxicó nahá tachí ndeé. Andá já nácasáhá nde jándaa nde lancha loho, dō jítá barco cáhnu cán. Joo nandocho chí ini nde já nácuu najándaan nde do jata barco cáhnu cán. <sup>17</sup> Tá nandihí já nácaava nuu na rieta jata mé barco cáhnu já ná coo tóyíí do. Tá nandihí já najánuu na jáhma cáhnu sándaca barco cán ña ná cañehé mé tachí do. Nácaja na ña yóho jáchí yihví ná xinu coo barco xoo naní Sirte nü yájí tañuhú ta cán cuu cachílin dō ñutí. <sup>18</sup> Ta chí coó náscacuín tachí ndeé nahá cán inga quíví itaān sahá ña cán quéa nácasáhá ná jácana nihni na ñaha ndójo barco cán ini tañuhú já nándicama dō. <sup>19</sup> Ta tá naxinu quíví uní janda mé nde viti nácasáhá nde jácana nde ña sácaja chúun barco cán ini tañuhú já nándicama chágá do. <sup>20</sup> Ta tixi cuahá ndivaha quíví coó naxini nde nuú cändii ta ni quimi co tivi. Ta javí nácuun quini ndivaha dō ta a

juú quiahva naxicó ndiváha tachi. Sahá ña cán quéa chí nasañnda vaha ini nde: "Yóho quíví viti", nacahán nde.

<sup>21</sup>Cugáhá ndiváha quíví nayáha ta ni in nde co cúní cuxu. Sahá ña cán nandaca ndichi Pablo taríu tóco ndihí na cán já nacásáhá cachí da já:

—Tá ná coo joho ndó tá nacahán i xihín ndó ta ná candoo í ñuu Creta, nduu. Ta ni a ndóho í ña ndóho í yóho viti ta ni a tíví toho ndihí ñáha nasañdojo barco yóho, nduu. Joo coó náxeen ndó candusa ndó ña nacahán i xihín ndó. <sup>22</sup>Joo cachí i xihín ndó viti ña co ndítahan ndicani ini ndó. Jáchí ni in túhún toho ndó a quíví vatí mé barco ndihí saha do. <sup>23</sup>Jáchí yehe cútú u cuénta Ndióxi ta caja cáhnu i mé á. Ta mé ñuu jända véhe nanaña en tátó Ndióxi mé á ñuu i. <sup>24</sup>Ta já nacachi a já xihín i. "A cayíhví tohún, Pablo. Jáchí ndítahan xinun tá xinun ñuu dà cútú emperador ñuu Roma cán. Ta saha yóho jácau ri Ndióxi tóco ndihí na fúhu xuhun ini barco jan já ná a quíví na ini tañuhú", já nacachi tátó Ndióxi xihín i. <sup>25</sup>Sahá ña cán quéa a ndicani ga ini ndó jáchí cándezé cáhnu ini i Ndióxi ta cándaa cáxí ini i ña coo tá ín nacachi tátó Ndióxi xihín i. <sup>26</sup>Joo in tachi ndéé caja ña ná tíví barco yóho yati in isla —nacachi Pablo xihín na cán.

<sup>27</sup>Sa naxinu sahun quíví xica nde ini barco cán cuahán nde. Ta in ñuu naxinu coo nde in xoo tañuhú naní Adria. Joo tá xoo joho tá xoo cáá ñéhe tachi nde cuahán nde. Joo tátuhun java ñuu já naxini da ñéhe barco cán ña cayati nde yuhú tañuhú cuahán nde. <sup>28</sup>Anda já nacásáhá chíquiahva na ndá quiähva cúná tañuhú yati yuhú nu ndiu nde cán. Ta quiähva cúná do nasañuu oco sahun in metro. Tá nacásáhá cayati chágá barco yuhú cán já nacahíahva tucu na. Ta cán sa yájí chágá ta cútú á oco usa metro quiähva cúná a. <sup>29</sup>Ta saha ña yíhví na xinu coo barco cani ndaa dó tóto ñuhu yati cán sahá ña cán quéa natíin na rieta ña ndíco comí caa gánchó cáhnu nu cán. Ta najácaná na ña ini tañuhú chí xoo cáhá mé barco cán já ná tiin a barco ná a cáca ga dó cuhun do chí nuu. Ta a juú quiähva yíhví na ndati na ná tíyi. <sup>30</sup>Joo ndaja coo java da caja chún xihín barco cán nacahán da quee jehé da xihín lancha loho cán cuhun da. Sahá ña cán quéa nacásáhá da ndáxi da lancha loho cán ña jánuu da dó ñuu tañuhú

ta já cuhun da, cáhán da. Ta nacásáhá cája da tátuhun táán chágá da caa gánchó cán ini tañuhú já ná tiin a barco xoo chí nuu do. <sup>31</sup>Joo naxini Pablo ña caja da sahá ña cán quéa nacaxi tühun da nuu da sáhndá chuun nuu soldado ta xihín nuu soldado cán já cachí da já xihín ná:

—Tá ná quee da jan cuhun da já quéa ndihí saha ndó ini tañuhú —nacachi Pablo.

<sup>32</sup>Anda já nasañan soldado cán nasañnda da rieta ndíco lancha loho cán já najándicava da dó ini tañuhú.

<sup>33</sup>Ta tá sa yati tíyi yaa já najácahan Pablo tóco ndihí na cán ña ná cuxu na vatí loho. Já nacachi da já xihín ná:

—Sa nayaha sahun quíví co xixi ndó ta ni co quíjí ndo. <sup>34</sup>Sahá ña cán xíca i ñamani nu ndó ña ná cuxu ndó vatí chá va. Xíní ñuhú cuxu ndó já ná coo ndéé ndo chindéé ndó mé ndó já ná cazu ndó. Jáchí cazu ndihí. Ta ni jända in túhún ijí jini yo a ndihí saha —nacachi Pablo xihín ná.

<sup>35</sup>Tá nandihi nacachi Pablo ña yóho xihín ná já natíin da in pan ta nu táhyí ndihí na cán nandiquiahva da ndixahvi nu Ndióxi. Tá nandihi já nasañnda java da ña ta nacásáhá da xixi da. <sup>36</sup>Xihín ña yóho nandindeé ri ini na java cán ta nacásáhá na xixi na.

<sup>37</sup>Ta tóco ndihí nde, na nasañuhu ini barco cán nasañuu nde ijí ciento unijícó sahun in nayivi. <sup>38</sup>Tá nandihi naxixi nde ña cúní nde já nasañata na trigo ini tañuhú já ná ndicama chágá jata barco cán.

#### Cácoo barco cahá tañuhú

<sup>39</sup>Joo tá natívi yaa já naxini na ñundáhyi. Joo coó nacuu ndicuni da caja chún xihín barco cán ndá ñuu cútú á. Ta tá nandihi já naxini na ña ín ñutí nu yájí yuhú tañuhú cán. Anda já nacahán na jácayati na barco yati yuhú cán. <sup>40</sup>Sahá ña cán quéa nasañnda na rieta ndíco barco cán já najáni do. Ta nacando caa gánchó ini tañuhú nacaja na. Ta tá nandihi já najánditayi na yitó ñuu jahndá ta xihín yítq cán nacásáhá na jándicaca na barco cán nuu tañuhú. Ta najándindita tucu na jahmá cáhnu xoo nu barco cán já ná cuu caca dó xihín tachi. Ta xihín ña yóho nacásáhá barco cán cayati dó yuhú tañuhú. <sup>41</sup>Ta in cuití naxinu barco cán nu ndíque táhan ijí táhndá tañuhú. Ta saha ña nacayájí tañuhú nuu ñutí cán sahá ña cán quéa nacatiin nuu barco cán. Ta ni loho ga coó nacuu cuhun do. Joo xihín ña quiähva

ndeé ndacú cáni ndaa tañuhú cán xoo cáha do sahá ña cán quéa nacasáhá cháchí dó.<sup>42</sup> Anda já nanducú soldado cahní ndihi da na cuahán vecaa ūuu Roma cán. Jáchí tiahva náá jitá na cuhún na nuú tañuhú ta cunu na cuhún na té sa naqueta na yuhú tañuhú, cahán na.<sup>43</sup> Joo dà sáhndá chuun nuú soldado cán coó nasaḥan dà ñamani ña ná caja na já jáchí cúní dà jácacu da Pablo. Ña nacaja da quéa nasaḥan da chuun nuú na tiahva jitá ticuí ña ná jácana na mé ná ini tañuhú cán já ná xínu na nuú ñuhú.<sup>44</sup> Ta na java, na coó tiáhva jitá ticuí cán nacachi da xihín ná ña ná ndaa na jata yito á jata túhun barco cán já ná xínu na nuú ñuhú. Anda jáví naxinu coo vaha tóco ndihi nde nuú ñuhú.

## 28

### *Ín Pablo isla Malta*

<sup>1</sup>Tá sa naxinu coo vaha ndihi nde yuhú ñundáhyí cán já nacandaa ini nde ña naní a isla Malta.<sup>2</sup> Ta vaha ndivaha nacaja ñayivi ndúu isla cán xihín nde. Nandicahmi na ñuhú jáchí nacasáhá cúní ga javi ta a juú quiahva vixi xín nde. Chí nacahan na xihín nde ña ná cativi nde catúní nde.<sup>3</sup> Anda já najátaca Pablo java titó íchí, dó quee yávi ñuhú. Ta tá chójó da titó cán nuú ñuhú já naqueta in coq tañu titó cán xínu rí sahá ña ihní ñuhú. Ta natíin rí ndáha Pablo.<sup>4</sup> Ta tá naxini na isla Malta cán ña ndícaa coo ndáha Pablo já nacasáhá cachí xihín táhan na já:

—Ndá dà sáhní ndii cúu dà yóho jáchí vatí coó naxihi da ini tañuhú joo yóho cúní Ndióxi jándihi a saha dà —nacachi na.

<sup>5</sup>Joo mé Pablo naquiji nihni da coo ndícaa ndáha dà cán nuú ñuhú cándaha cán ta coó ña ná ndoho da.<sup>6</sup> Tóco ndihi na cán ndáti na cuni na ña ná quíhvi cuiñu ndáha dà á tá coó ta in cuití ndicava da quivi da, nacahán na. Ndáti na java cán cuni na ndáa ndoho Pablo joo tá sa nacanahá ndáti na coó ñaha ná ndoho toho Pablo cán. Anda já nandijama jíní ná ta nacasáhá na cahán na ña cùu dà in ndíoxi.

<sup>7</sup> Yati nuú naxinu nde cán nasacuu a ñundáhyí dà naní Publio, dà cómí cuéntá saha isla cán. Ta tixi uni quívì nandiquehe vaha ndivaha da ndehé ta vaha nacaja da xihín nde.<sup>8</sup> Ta ndaja coo quíhvi tátá Publio cánduhú dà ndóho da cuehe nii ta chícaan cahní ñahá. Ta já nasaḥan Pablo naxito

nihni da dà ta nacasáhá Pablo xíca tähví da nuú Ndióxi sahá dà ta nacchinú Pablo ndáha dà jini dà ta já nandivaha da.<sup>9</sup> Tá naxini java ga na quíhvi ndúu isla cán ña nacaja Pablo já naquixi na nuú dà ña ná ndaja vaha da na chí nandivaha na.<sup>10</sup> Ta nandiquiahva na ndixahvi nuú nde ta najasá na cuahá ñaha nuú nde. Tá naxini coo quívì ndaa nde barco cuhún nde já nasaḥan na ña xíní ñuhú nde cuhún nde.

### *Xínu coo Pablo ūuu Roma*

<sup>11</sup>Nasanduu nde tátuhun uni yoo isla cán janda quiahva nandaa nde in barco, dó nasañdati yaha tiempo vixi mé isla Malta cán. Mé barco cán naquixi dó chí Alejandría. Ta nuú dò cándaa ivi tñíñu yúu ndióxi cája cahnu na cán. In a naní a Cástor ta inga a naní Pólux.<sup>12</sup> Naquee nde cuahán nde já naxinu nde in ūuu naní Siracusa ta cán nasañduu nde uni quívì.<sup>13</sup> Ta naquee nde cuahán nde yati yúhú tañuhú janda quiahva naxinu coo nde ūuu Regio. Joo inga quívì itañan já nacasáhá víi uun xíco tachí chí sur sahá ña cán quéa té sa nayaha ivi quívì já naxinu nde ūuu Puteoli.<sup>14</sup> Ta cán nanditahan nde java na cùu cuéntá Jesús. Ta nacahan na xihín nde ña ná canduu nde in semana xihín ná ta já nacaja nde. Ta tá nandihí já naquee nde cuahán sahá nde chí ūuu Roma.<sup>15</sup> Ta na cùu cuéntá Jesús ñuú ūuu Roma cán sa nañehé ná tühun ña xínu coo nde cán. Sahá ña cán quéa naqueta na vaxi na ñehé ná ndehé. Java na naquixi janda ūuu nu sáhíin yahvi cahnu naní a Apio ta java na naquixi janda ūuu naní Uni Taberna. Tá naxini Pablo na cán já nacasáhá ndíquiahva da ndixahvi nuú Ndióxi ta nandindacú ini da.<sup>16</sup> Ta tá naxinu coo nde ūuu Roma já nandiquiahva dà sáhndá chuun nuú soldado cán tóco ndihi da cuahán vecaa cán nuú in dà cómí chuun saha mé vecaa ūuu Roma cán. Joo nasaḥan na ñamani nu Pablo coo jíin da vatí nasaçu na in soldado ndáa ñahá.

### *Cáhan Pablo tühun Ndióxi xihín na ūuu Roma*

<sup>17</sup>Tá sa naxinu uni quívì naxinu coo nde ūuu Roma cán já nacana Pablo tóco ndihi na sacuahá nuú na Israel ndúu ūuu Roma cán. Ta tá sa nataca ndihi na ndúu na já nacachi da já xihín ná:

—Candehé ndó, ñani i. Ni in tühún toho ñaha nuú coó nacaja yehé xihín na Israel

mé ñuu Jerusalén cán ta ni xihin costumbre nacaja tásáhnu jícó yo. Joo natiin ná Israel yehé ta nandiquiahva na yehé nuú ná cíu cuéntá gobierno ñuu Roma yóho.<sup>18</sup> Ta tá nandihi nandaja ndíchí na yehé já násacu ini na janí ná yehé jáchí coó nañehé ná cuachi i sahá ñá cuu cahní ná yehé.<sup>19</sup> Joo ndaja coo ná Israel coó naxeen na ñá ná janí ná cán yehé. Sahá ñá cán quéa naxica i ñamani ñá ná cavií sahá i nu emperador ñuu Roma yóho. Joo yehé co cúní toho i jácojo i cuachi jatá ná Israel jáchí cíu ná ná naquixi chichi nuú naquixi mí i.<sup>20</sup> Sahá ñá cán quéa nacana i ndohó viti jáchí cúní cuni i ndohó já ná nditúhún i xihin ndo. Cúní ndicani i nu ndo ñá ndíco ndáhá i xihin cadena yóho sahá mé a nachindahá Ndióxi jácacu a ndihi yó, ná Israel —nacachi Pablo xihín na Israel cán.

<sup>21</sup> Anda já nanducú ñehe ná cán tuhun nu Pablo já cachí ná já xihin dá:

—A ñáha quixi carta estado Judea nuú nde ñá cahán sahá ñá cajún. Ta ni ná cíu táhan ná Israel tá nandai cuu na ñuu yóho coó toho tuhun nú ñehe na ná casaa ná nuú nde sahá yóhó.<sup>22</sup> Joo cúní nde ñá ná ndicanún nuú nde ndíq cándusún jáchí níi cíu ñuyíví cahán nú ñayivi sahá ná cíu cuéntá Jesús —nacachi ná Israel cán xihin Pablo.

<sup>23</sup> Tá nandihi násacu na in quíví cahán Pablo xihín ná ta tá naxin coó mé quíví cán nañataca cuahá ndiváha ñayivi mé vehe nu ín Pablo cán. Ta naha ta janda sahini najánahá da nu ná ñá cúní Ndióxi cacomí a cuéntá sahá ñayivi. Ta xihín ñá nacahyí Moisés sanahá ta xihín ñá nacahyí ná profeta já nandicani da nu ná sahá Jesús ñá ná candee ini na mé á.<sup>24</sup> Java ná cán nacandusa na ñá nacachi Pablo xihin ná joo java na coó naxeen na candusa na.<sup>25</sup> Ta sahá ñá coó nacuu ndique táhan vahá tuhun ná Israel cán sahá ñá jánahá Pablo sahá ñá cán quéa nacasaahá ná quee na cuahan ná. Tá naxini Pablo ñá yóho já nacasaahá cachí da já xihin ná:

—Mé a ndaa nacahen ímá yii Ndióxi nuú tásáhnu jícó yo tá nacahyí Isaías já:

<sup>26</sup> Cuáhán cahen xihín ñayivi Israel jan já cachún já xihin ná:

Mé a ndaa táchí cuni joho ndo joo a cándaa ini ndo.

Ta vatí sándezhé ndo in ñaha joo co ndicuni ndo ña.

<sup>27</sup> Jáchí ihví ndiváha cíu ini ndó ta co cúní ndó caja ndó ñá cachí i.

Ta co cúní ndó cuni joho ndó ñá cahen i xihin ndo.

Ta co cúní ndó ndicuni ndó ñá caja ndó cuachi.

Jáchí tá ná jándacoo ndó cuachi caja ndó, já quéa cuu caja cahnu ini i sahá ndo, ta já cuu co vahá ini ndó, já nacachi ímá yii Ndióxi xihin tásáhnu jícó yo.

<sup>28</sup> Anda já nacachi tucu Pablo já xihin ná:

—Ta viti xím níuhú candaa ini ndó, ná Israel ñá sa naxini joho na coó naquixi chichi Israel tuhun vahá sahá Jesús. Ta caja i cuénta candusa mé ná cán ñá —nacachi Pablo xihin ná.

<sup>29</sup> Tá nandihi nacahan Pablo ñá yóho já nanditúhún cuehe xihin táhan ná Israel cán ta já naquee na cuahen na.

<sup>30</sup> Nacando Pablo ivi níi cuia vehe nuú nachahvi ndojo da. Ta nandiquehe vahá da tocó ndihi ná sahán xito níhni ñahá.<sup>31</sup> Ta ni co yihví da caxi tuhun da xihin ñayivi ñá cúní Ndióxi cacomí a cuéntá sahá ná. Ta najánahá da tuhun vahá sahá Jesucristo, xitoho íta in na coó nasaaji nuu nu dá caja da ñá.

## Carta nāchindahá Pablo nuú na cūú cuéntá Jesús ndúu ñuu Roma

Cáhan Ndióxi Pablo xihín na cūú cuéntá Jesús

<sup>1</sup>Yehe cūú Pablo ta Jesucristo cūú xitoho i. Nacaxi Ndióxi yehe cacuu u in apóstol cuéntá mé á ta nāchindahá a yehe cuhun i cahán i tuhun vaha saha Jesús nuú ñayivi.

<sup>2</sup>Sanahá ndivaha nacaja Ndióxi ña ná cahí na profeta mé á tuhun vaha sahá ini libro yii Ndióxi. <sup>3</sup>Mé tuhun vaha yóho cahán saha Jesucristo, xitoho í, mé a cūú in tūhún jini já jahyi Ndióxi. Ta nanduu a in ñayivi nacacu ñuyíví yóho ta naquixi a chichi rey David. <sup>4</sup>Ta nājánahá íníma yii Ndióxi ñayivi ña cūú Jesús in tūhún jini já jahyi Ndióxi, mé a cūú cája tóco ndihi ñaha. Jáchí tá sa naixi Jesús já nānditacu tucu a ta xihín ña yóho náhá ña cūú á in tūhún jini já jahyi Ndióxi. <sup>5</sup>Ta sahá ña nacaja Jesucristo ndíca crúxu sahá ña yóho nacaja Ndióxi ñamani xihín ndihí. Já nāchindahá Ndióxi mí ña ná cuhun í cuéntá mé á cahán i sahá Jesús ny tóco ndihi ñayivi ndúu ñuyíví já ná cuu candeé ini na mé á ta já ná caja na ña cúní a. <sup>6</sup>Ta mé ndó, na cūú cuéntá Jesús ndúu ñuu Roma jan, nācaxi Ndióxi ndohó cacuu ndó cuéntá mé á.

<sup>7</sup>Ná cán queá cahí í carta yóho nu ndó, na ndúu ñuu Roma jan. Jáchí cúní ndivaha Ndióxi ndohó ta nācaxi a ndohó nduu ndó ñayivi mé á. Ta ná caja Ndióxi, tátá yo xihín Jesucristo, xitoho í cuahá ñamani xihín ndo ta ná caja ña ná coo vaha ini ndó.

Cúní Pablo cuhun dä ñuu Roma coto nihni da na cūú cuéntá Jesús ndúu cán

<sup>8</sup>Ndíquiahva i ndixahvi nu Ndióxi sahá ña nacaja Jesucristo xihín in in ndó jáchí ñayivi ndúu ndijáá ñuyíví xíni joho na ña candeé ini ndó Jesús. <sup>9</sup>Yehe cája chūun i cuéntá Ndióxi ta ndinuhu ini i cáxi tuhun i tuhun vaha saha Jesús, mé a cūú in tūhún jini já jahyi Ndióxi nuú ñayivi. Ta xíni vaha Ndióxi ña tóco ndihí quívi xíca tähví i nu mé á sahá ndihí ndó. <sup>10</sup>Ta ndijáá níi quívi xíca tähví i nu Ndióxi ña ná quiahva ñamani nuú i saa i jan coto nihni i ndohó tá cúní a. <sup>11</sup>Jáchí cúní cuni i ndohó já ná caxi tuhun i xihín ndo ndá quiahva cúní íníma yii Ndióxi

caja ñamani xihín ndo já ná ndindacú chágá ndó cuéntá mé á. <sup>12</sup>Ña cúní queá ná quiahva tuhun ndeé ini táhan í jáchí in candeé ini ndihí Ndióxi.

<sup>13</sup>Cúní ña ná candaá ini ndó, ñani mí i, na cūú cuéntá Jesús ña sa cuahá tañu sácu ini i saa i coto nihni i ndohó joo íin cuahá ña sají nuu nuú i sahá ña cán queá cámáni saa i jan. Cúní chindeé e ndohó ña ná caca vaha ndó íchi cuéntá Jesús. Jáchí quiahva já nāchindéé e java ga ñayivi, na co cūú chichi Israel. <sup>14</sup>Joo ndítahan nuú i caxi tuhun i tuhun Ndióxi nu tóco ndihi ñayivi ndúu ñuu náhnu xihín na ndúu yucú ñúhú. Ta cahán i tuhun Ndióxi xihín na ndichí jini ta xihín na co ndichí jini. <sup>15</sup>Ña cán queá xíca ndivaha ini i saa i nu ndúu ndó ñuu Roma jan cahán i tuhun vaha saha Jesús xihín ndo.

Jácacu Ndióxi ñayivi sahá tuhun vaha cahán sahá Jesús

<sup>16</sup>Co cácahan nuú i sahá tuhun vaha cahán sahá Jesús jáchí cūú á ndee Ndióxi jácacu a tóco ndihi ñayivi, na candeé ini mé á. Ta jihna ñúhú nácasáhá Ndióxi jácacu a ñayivi naquixi chichi Israel ta viti jácacu a tóco ndihí ñayivi tá candeé ini na mé á vatí cūú ná na tóho a cūú ná na Israel. <sup>17</sup>Jáchí náhá tuhun Ndióxi nu yo ndá quiahva ndúu ñayivi ndaa nu mé á. Ta cūú á sahá ña candeé iní mé á ta sahá ña yóho cuití va jáchí coq a inga nuú ña caja í cacuu ñayivi ndaa nu Ndióxi. Já cachí tuhun Ndióxi já: "Ndá na cūú ñayivi ndaa nu Ndióxi catacu na sahá ña candeé ini na mé á."

Tóco ndihi ñayivi ndúu ñuyíví cómí na cuachi nu Ndióxi

<sup>18</sup>Jända indívi nu íin Ndióxi xójo ini a xihín tóco ndihi ñayivi cája cuachi ñuyíví yóho ta jándoho a ini na sahá cuachi cája na. Ta sahá ña núu cája na sají nuu na nuú java ga ñayivi, na cúní candaá ini ña ndaa saha Ndióxi. <sup>19</sup>Jándoho Ndióxi ini ñayivi sahá cuachi cája na jáchí sa nājánahá mé á ña ndaa nu ná ta sa xíni na saha mé á joo co cándusa na ña. <sup>20</sup>Jända sahá ñuyíví xíni ñayivi ña nacavaha Ndióxi ñuyíví xihín indívi xihín tóco ndihí ñaha. Ta xihín ña yóho cuu candaá ini na ña íin Ndióxi ta cuu candaá ini na ña íin ndee mé á caja ña cúní a anda ama cáá quívi. Saħá ña cán queá a cíu cachi na ña co xíni na á íin Ndióxi á coó a.

<sup>21</sup>Vatí candaá vaha ini na ña íin Ndióxi joo

có caja cáhnu na mé á tátuhun ndítahan nu ná caja na. Ta ni co ndíquahva na ndixahvi nu á. Ñá caja na quéa cáhvi núu ini na ta coó sahá toho ñá cáhvi ini na. Ta cíu ná tátuhun ñayivi tóntó jini, ná xíca nuu nuú naá yávi.<sup>22</sup> Ta vatí cachí na cíu ná ná ndichí jini joo cíu ná ná tóntó jini.<sup>23</sup> Najándacoo na ñá caja cáhnu na Ndióxi, mé a tách anda ama cása quivi ta nacavaha na tiníu yúu ñá ñiéhe nahniá taa, da xihín yachi. Ta nacavaha na nahniá laa xihín nahniá quíti xihín nahniá coo. Ta nacasáhá caja cáhnu na ñá.

<sup>24</sup> Sahá ñá cán quéa najándacoo Ndióxi na ñá ná caja na tá nuú ñá níu ñá cíni na caja na. Anda jáví nacasáhá ná caja quini na xihín yiquí cuñu táhan na.<sup>25</sup> Co xeén ná candusa na ñá ndaq cahán sahá Ndióxi joo nacandusa na ñá tuhún. Ta nacaja cáhnu na ñá nacavaha Ndióxi ta coó nacaja cáhnu na mé Ndióxi, mé a nacavaha tóco ndihi ñaha. Jáchi Ndióxi quéa xíni ñuhú caja cáhnu í anda ama cása quivi. Já ná coo.

<sup>26</sup> Sahá ñá cán quéa najándacoo Ndióxi na ñá ná caja na ñá xíca ini na caja na, ñá co ndítahan caja na. Ta naxinu na janda nuú najándacoo najíhí ñá quíji na xihín yíl na ta já nacasáhá quíji xihín táhan ndaja jíhlí mé va na. Ta ñá yóho cíu ñá coó nascu ini Ndióxi caja na.<sup>27</sup> Ta quíahva já nacaja ri dätaa. Najándacoo da ñá quíji da xihín ñajíhí da ta nacasáhá ndicaji ini da caja da ñá níu xihín táhan mé va da janda quíahva nacasáhá quíji xihín táhan mé dá. Chí nuú cacahan nuu yo quéa caja xihín táhan da. Ta tá nandihi já casáhá ndóho ini yiquí cuñu na sahá ñá níu caja na.

<sup>28</sup> Naxinu na nuú najándacoo xóo na Ndióxi ta co cíni ga na candaq ini na sahá. Sahá ñá cán quéa najándacoo xóo Ndióxi na ñá ná cahvi níu ini na ta já caja tá caja na ñá co ndítahan nu ná caja na.<sup>29</sup> Nandicutú ndaq ímima ná xihín tá nuú ñá níu, ñá cíu cuachi. Ta ndiává íní na quehe na ñaha cómi inga ñayivi ta caja xíxi na xihín ná ta cahihvi ini na ta sáhní ná ndij ta cíni táhan na ta jándahvi na ñayivi ta cahvi níu ini na sahá inga na ta xíca níu na cahán tühun ñá.<sup>30</sup> Ta cágahá quini ndivaha na xihín inga na ta cándají na Ndióxi ta yáha yúhu na xihín inga na ta caja ichi ini na ta caja cáhnu na mé va na. Ndiává íní na ndaja caja chágá na cuachi ta saá ini na caja na ñá cíni tátá náná ñá.<sup>31</sup> Co xíni túni na ta co jáxínu coo

na tuhun sáhan na nuú ñayivi. Co quíhvi ini na ñani táhan na ta co caja cáhnu ini na sahá ná ta co tähndá ini na sahá ñayivi.<sup>32</sup> Xíni vaha na ñá násahnda Ndióxi nu ná ta xíni na ñá ndítahan quivi na sahá cuachi caja na. Vatí cándaq ini na ñá yóho joo xihín ndinuhu ini na caja tá caja na ñá níu. Ta janda cajíi ini na tá caja java ñayivi mé ñá níu.

## 2

### Caja vií Ndióxi sahá tóco ndihi cuachi

<sup>1</sup> Mé a ndaq cómi ndó cuachi nu Ndióxi. Sándezhé ndaa ndó inga ñayivi sahá cuachi caja na joo chícaqan ndó cuachi jata mé va ndó jáchi caja ndó mé cuachi cíni. <sup>2</sup> Sa xíni vaha í ñá caja ndaq Ndióxi tá jándoho á ini ñayivi sahá cuachi caja na.<sup>3</sup> Mé ndó sándezhé ndaq ndó cuachi caja java ga ñayivi ta cahán ndo vaha caja Ndióxi tá chíndahá na cuhun ná indayá. Joo cahán ndo ñá caja cáhnu ini a sahá mé ndó vatí caja ndó mé cuachi caja na cíni.<sup>4</sup> Ndája níu ndó Ndióxi, mé a cíni caja cuahá ñamani xihín ndo jáchi xíni ndó ñá co jándoho yachi Ndióxi ini na caja cuachi. Cíni Ndióxi ñá ná ndicó coo ini ndó jándacoo ndó cuachi caja ndó.<sup>5</sup> Ihví ndivaha cíu ini ndó jáchi co jándacoo ndó cuachi caja ndó. Nandicuahá cuachi ndó ta jándoho chágá Ndióxi ini ndó tá ná tanda quíji caja vií a sahá cuachi nacaja ñayivi. Mé quíji já ndaca náha ñá cojo ini mé a sahá cuachi ñayivi ta náha ñá ín sahá mé á jándoho a ini na cíni.

<sup>6</sup> Mé tiempo cán quíahva Ndióxi nuú in in ñayivi ñá ndítahan nu ná ndiquehe na sahá ñá nacaja na ñuyív yóho. Java ñayivi nacaja na ñá vaha xihín ndinuhu ini na ta nacacúni na caja na ñá ná cajíi ini Ndióxi xihín já ná cachi Ndióxi ñá cíu ná ñayivi vaha. Ta nacacúni na coo na nu ín Ndióxi anda ama cása quivi. Ta mé na cán cíu na cuhun coo xihín Ndióxi anda ama cása quivi.<sup>8</sup> Joo cojo ini Ndióxi tá jándoho a ini na saá ini, ná co cíni cuhun xoo ñá ndaq jáchi cátóo na cuhun na xoo ñá níu.<sup>9</sup> Ndoho ndivaha ini tóco ndihí ñayivi caja cuachi ta cacehá ndivaha ini na. Jihna ñuhú na naquixi chíchi Israel ndoho ini já casáhá ndoho ini na coó naquixi chíchi Israel.<sup>10</sup> Joo cajíi ini Ndióxi xihín na caja ñá vaha ta ndaja cáhnu a na ta caja mé á ñá ná coo vaha ini na. Jihna ñuhú já caja mé á xihín na naquixi

chichi Israel já casáhá caja ri a já xihín na coó naquixi chichi Israel.

<sup>11</sup> Jáchí co cíú á tátuhun cúní Ndióxi in ñayivi ta cándají a inga na jáchí in cíú ndihi ví nu Ndióxi. <sup>12</sup> Vatí co cándaa ini ñayivi ña sáhndá ley Moisés joo cuhun tá cuhun na indayá sahá cuachi nacaja na. Ta vatí cándaa ini ñayivi ña sáhndá ley Moisés joo cuhun tá cuhun na indayá sahá cuachi nacaja na. <sup>13</sup> Jáchí tá cándaa ini na ña sáhndá ley Moisés ta co cája na ña jáchí co cachí Ndióxi ña cíú ná ñayivi ndaa nu mé á. Ta tá cája na ña sáhndá mé ley Moisés andá jáví cachí Ndióxi ña cíú ná ñayivi ndaa nu mé á. <sup>14</sup> Ñayivi, na coó naquixi chichi Israel co xíni na ña sáhndá ley Moisés. Cája mé ná ña sáhndá ley Moisés jáchí já xínu ini na caja na ña vatí co xíni na mé ley Moisés. <sup>15</sup> Ña cája mé ná náhá nuú ñayivi ña násacu Ndióxi ley mé á ini xíni túni ná. Ta xihín xíni túni ná cándaa ini na tá cája na ña vaha á tá cája na ña náu. Ta quiáhva já xihín mé xíni túni ná xíni vaha na á cája na cuachi á cája na ña vaha <sup>16</sup> tá ná xíni quiáhva Ndióxi chuun nuú Jesucristo caja víi a sahá ña nacaja tóco ndihi ñayivi vatí nacaja jehé na ña. Jáchí já cáhan tuhun vaha sahá Jesús ña jánahá i nu ndo.

#### *Na naquixi chichi Israel cándusa na ley Moisés*

<sup>17</sup> Ta mé ndó cachí ndo cíú ndó na naquixi chichi Israel, na cándusa ley Moisés. Ta cachí ndo cája chágá Ndióxi ñamani xihín mé ndó a juú ga xihín java ga ñayivi. <sup>18</sup> Ta cachí ndo ña sa xíni ndó ña cúní Ndióxi caja ndó ta cachí ndo ña sa xíni ndó caxi ndó ña vaha jáchí sa najácuaha ndó ley Moisés. <sup>19</sup> Ta cachí ndo tiahva vaha ndó chindeé ndó ñayivi ña ná ndihví na íchi Ndióxi ta cachí ndo ña cíú ndó tátuhun in lámpara jándiyéhe nyú ñayivi xíca nuu nuú naá. <sup>20</sup> Ta cachí ndo ña tiahva ndó jánahá ndó nuú ñayivi, na co xíni túni ta cachí ndo ña tiahva ndó jánahá ndó nuú ñayivi, na cámáni catacu vaha ini. Cómí ndo ley Moisés sahá ña cán quéa cáhan ndo xíni ndó tóco ndihi ña ndaa xihín tóco ndihi ñaha. <sup>21</sup> Mé ndó jánahá ndó ley Moisés nuú ñayivi joo jihna ñúhu ndítahan caja ndó ña. Mé ndó jánahá ndó nuú ñayivi ña a vaha toho caja cuíhná na joo cíú ndó na cuíhná. <sup>22</sup> Mé ndó jánahá ndó nuú ñayivi ña a vaha toho coo in taa xihín in ñáñahá, ña co cíú

ñájílhí dä joo íin ndó xihín ñájílhí inga na. Mé ndó co cúní ndó yoco ndindojo veñuhu ñayivi, na coó naquixi chichi Israel joo cája cuíhná ndo ña cuicá ñúhu veñuhu na cán. <sup>23</sup> Cája cáhuu ndó mé va ndó jáchí cómí ndo ley Ndióxi joo co cája cáhuu ndó mé á jáchí co cúní ndó caja ndo ña sáhndá mé ley. <sup>24</sup> Ña cán quéa ndaa cáhan tuhun Ndióxi sahá ndó tá cachí a já: “Ñayivi, na coó naquixi chichi Israel cáhan núu na sahá Ndióxi sahá ña cája mé ndó, na Israel”, cachí tuhun Ndióxi.

<sup>25</sup> Tá cája ndó ña sáhndá ley Moisés já quéa ndíyahvi marca nachicaan na yiquí cuñu ndó. Joo tá co cája ndó ña sáhndá ley Moisés já quéa co ndíyahvi toho marca nachicaan na yiquí cuñu ndó. <sup>26</sup> Ña coó naquixi chichi Israel co chícaan toho na mé marca jan yiquí cuñu na joo tá cája na ña sáhndá ley Moisés já ndiquehe Ndióxi na tá quiáhva ndíquehe ri mé á na íin marca yiquí cuñu. <sup>27</sup> Ndá na cája ña cachí ley vatí coó naquihvi marca yiquí cuñu na, íin sahá na cán chícaan na cuachi jatá na co cája ña cachí ley vatí fin a nu ná ta naquihvi marca yiquí cuñu na. <sup>28</sup> Ña cán quéa tá ná caja in na naquixi chichi Israel mé costumbre ña ná cuni cuití va ñayivi ña já quéa a juú ña ndaa ña cíú ná cuéntá Ndióxi. Ta ndá na chícaan na marca yiquí cuñu na co cája na mé costumbre cuéntá yiquí cuñu cuití va na. <sup>29</sup> Ta ndá na naquixi chichi Israel tá mé a ndaa cíú ná cuéntá Ndióxi ta cája na ña cúní mé á co cíú á sahá ña násahnda loho na yiquí cuñu na. Cíú á sahá ña nacaja ínimá yii Ndióxi ini na. Ta mé na cán jácavatá na ini Ndióxi jáchí xihín ínimá yii mé á cája na ña cúní mé á.

### 3

<sup>1</sup> Sahá ña cán quéa ná ndaca tuhún i ndohó ña yóho: Á íin cuahá chágá sahá ñayivi naquixi chichi Israel a juú ga sahá java ga ñayivi. Á ndíyahvi nu Ndióxi ña nachicaan na marca yiquí cuñu na. <sup>2</sup> Aján. Íin cuahá sahá ñayivi naquixi chichi Israel ta tá nachicaan na marca yiquí cuñu na ndíyahvi a nu Ndióxi jáchí násacu ini a jándacoo a tuhun a nuú ná naquixi chichi Israel já ná cacomí ná cuéntá sahá. <sup>3</sup> Ta vatí ná caja java ñayivi, na cández ini mé á ña co cúní mé á caja na joo ama sahá ña cán a ndíjama toho Ndióxi jini á ña ná caja ña náu

xihín ná, vaha.<sup>4</sup> Co cája toho Ndióxi já. Ñá cája Ndióxi níti tiempo cíú ndinuhi ñá ndaa vatí tóco ndihi ñayivi cáhan na ñá tuhún. Já cachí tuhun Ndióxi já:

Xihín tuhun cáhan Ndióxi cándaa iní ñá cíú á Ndióxi ñá ndaa ta a cíú quee vaha na chícaan cuachí jíquí jatá jáchi cíú mé á in Ndióxi ndaa, já cachí tuhun mé á.

<sup>5</sup> Ta viti ná cáhan i xihín ndó tá quiahva cáhan ñayivi ñuyíví. Cáhan na ñá co cája vaha Ndióxi tá jándoho a mí sahá cuachí jáchi xihín cuachí jándindita jíco chágá yó Ndióxi. Ta xihín ñá cája í náha ñá cíú Ndióxi in Ndióxi ñá ndaa ta mí cíú yó ñayivi cuachi. <sup>6</sup>Joo co cáhan vaha na jáchi tá co cája ndaa Ndióxi, nduu já quéa a cíú caja vií mé á sahá ndihi cuachi cája tóco ndihi ñayivi ndúu ñuyíví.

Já cachí ñayivi já: “Cóho ná caja yó cuachi já ná candaq chágá ini ñayivi ñá cája ndaa Ndióxi ta xihín ñá yóho caja cáhnu chágá na mé á”, cachí na. Joo co cáhan vaha na jáchi tá cáhan yó ñá xihín cuachi cája í ndicáhnu chágá Ndióxi já quéa co cándaa iní ndá sahá quéa jándoho Ndióxi ini ñayivi sahá cuachi na. <sup>8</sup>Joo java ñayivi cachí na: “Cóho ná caja í cuachi já ná caja cáhnu ini mé á sahá cuachi já ndicáhnu chágá Ndióxi”, cachí na joo co cáhan vaha na. Ta java ñayivi cáhan ihví na sahá yehe ta chícaan na cuachi jatá i ta cachí na ñá jánahá yehe ñá yóho nuyú ñayivi. Ndítahan jándoho Ndióxi ini tóco ndihi ñayivi, na jánahá ñá yóho.

Tóco ndihi ñayivi ndúu ñuyíví cómí na cuachi nü Ndióxi

<sup>9</sup> Ñá cán quéa a cíú cuachi yó ñá cíú mí na vaha chágá a juú ga inga ñayivi sahá ñá naquixí chichi Israel. Jáchi sa najánahá i nu ndo ñá mí, na naquixí chichi Israel xihín na coó naquixí chichi Israel cíú yó ñayivi cája cuachi. <sup>10</sup>Já cachí tuhun Ndióxi já:

Coó toho ni in ñayivi cája ñá ndaa.

<sup>11</sup>Ta coó toho ni in na cándaa ini ñá ndaa, ta coó ni in na ndínducú Ndióxi.

<sup>12</sup>Nacaxoo na nü Ndióxi já naquehe na ichí nuyú cuahen na.

Coó ñayivi cája ñá vaha jandá ni in tuhún na coó.

<sup>13</sup>Quimi ndivaha yúhu ná jáchi cíú á tátuhun in yávi ndii ñá cámáni ndee ñúhu.

Cíú ná ñayivi tuhún ndivaha.

Tá quiahva cája coo tá tím rí ñayivi já cája na cán tá cáhan na ñá tuhún.

<sup>14</sup>Ta mé cháhan cuití cáhan yúhu ná ta xihín ñá yóho játahví na ini ñayivi.

<sup>15</sup>Níti tiempo ndícají ini na cahní na ndaa xihín ndaa cája na.

<sup>16</sup>Ta ndá nu xíni na ndá a jándoho na ini ñayivi jándacoo ndáhví ñahá na.

<sup>17</sup>Ta co xíni na ndá a quéa canduu vaha na xihín ñayivi.

<sup>18</sup>Ta ni co cándaa ini na ñá ndítahan nu ná caylhví na Ndióxi, cachí tuhun Ndióxi.

<sup>19</sup>Sa xíni yó ñá ndítahan nuú na Israel caja na tóco ndihi ñá sáhndá ley Moisés jáchi cíú á cuénta na naquixí chichi Israel. Ta xihín ñá yóho chícaan ley Moisés cuachi jata meá na cán ta náha ñá tóco ndihi ñayivi ndúu ñuyíví cómí na cuachi nü Ndióxi ta a cíú cuachi na ñá co cómí na cuachi. <sup>20</sup>Ni in ñayivi a cíú nduu ndaa na nü Ndióxi sahá ñá cája na tóco ndihi ñaha sáhndá ley Moisés. Ñá cája mé ley quéa ñá ná candaq iní ñá cómí yo cuachi nü Ndióxi.

Jácacu Ndióxi mí jáchi cández iní mé á

<sup>21</sup>Viti jánahá Ndióxi nu yó ndá quiahva nduu ndaa yo nü mé á. Ta jári cachí mé ley xihín na profeta sahá ñá yóho. Ta co cíú á sahá ñá cája í ñá cachí mé ley <sup>22</sup>joo sahá ñá cández iní ñayivi Jesucristo já cája Ndióxi ñá ná nduu ndaa na nü mé á. Já caja mé á xihín tóco ndihi na cández iní Jesucristo jáchi tá quiahva cája Ndióxi xihín na Israel quiahva já cája ri a xihín na co cíú na Israel. <sup>23</sup>Tóco ndihi ñayivi cómí na cuachi nü Ndióxi ta naçacíca na nü á ta a cíú nduu na ñayivi vaha tá quiahva cíú mí mé á. <sup>24</sup>Joo naçaja Ndióxi in ñamáni cáhnu xihín yo já ná nduu ndaa yó nü mé á. Ta coó nachahví sahá jáchi nachahví Jesucristo sahá cuachi tá naçahví a ndica crúxu. Ta viti co cómí ga yó cuachi nü mé á.

<sup>25</sup>Nachindahá Ndióxi Jesucristo ñá ná cuíta nii a sahá cuachi já ná cuu caja cáhnu iní Ndióxi sahá yo tá ná cández iní Jesucristo. Xihín ñá yóho náha ñá cíú á in Ndióxi ndaa. Tá cámáni quivi Jesucristo sahá cuachi já coó naquehe Ndióxi cuénta sahá cuachi. Já naçaja mé á jáchi cáhnu ndivaha ini a. <sup>26</sup>Ta xihín ñá yóho náha ñá mé a ndaa táchí cíú á in Ndióxi ñá ndaa jandá quivi viti. Tóco ndihi na cández iní Jesús cíú ná na ndaa nu

Ndióxi jáchi nájándoo Jesús cuachi na. Ta xihín ña yóho náha ña cíu á Ndióxi ndaa.

<sup>27</sup> Ndá sahá cája cahnu í mí, vaha. Ama ná cuu caja cahnu í mí sahá ña nacaja í. Jáchi a cíu nduu ndaa yó nu Ndióxi sahá ña násacu vaha í ley Moisés. Cíu á sahá ña candeé iní Jesú. <sup>28</sup> Sahá ña cán quéa sa xíni yó viti ña nduu ndaa yó nu Ndióxi tá ná candeé iní Jesú cuití va. Ta co cíu á sahá ña násacu vaha í ña sáhndá ley Moisés.

<sup>29</sup> Á cája Ndióxi ña yóho sahá ná naquixi chichi Israel cuití va, vaha. Uhun. Jáchi jácacu Ndióxi ná naquixi chichi Israel xihín ña coó naquixi chichi Israel. <sup>30</sup> Jáchi íin in táláá Ndióxi ta mé Ndióxi yóho jácacu a ñayivi tá ná candeé iní na mé a vatí cíu ná ná Israel á co cíu toho ná. <sup>31</sup> Á cacu xoo í ley Moisés, da já. Uhun. Vatí candeé iní Jesús joo a cíu cacu xoo í ley Moisés jáchi náha ña cíu á ña ndaa ta ndiyahvi a nu yo.

#### 4

##### *Ña nacaja Abraham sánahá ndivaha*

<sup>1</sup> Ta ndá sahá nacachi Ndióxi sahá Abraham, tásáhnu jícó yo ña nanduu da taa ndaa nu mé á. <sup>2</sup> Co cíu á sahá ña nacaja da ña nanduu da taa ndaa nu Ndióxi já ná a cája cahnu da mé dá. Ta coó toho ñaha ña cuu caja cahnu da mé dá sahá.

<sup>3</sup> Jáchi já cachí tūhun Ndióxi: “Nacandeé ini Abraham Ndióxi sahá ña cán quéa nanduu ndaa da nu mé á”, cachí tūhun Ndióxi. <sup>4</sup> Ta viti ná caja í cuénta cája chūun in dataa. Ta tá nāndihi chálvi na nu dá ta mé jíjhún cán co cíu á ña jásá na nu dá. Chálvi na nu dá jáchi cání a nu dá quehe da ña sahá chūun nacaja da. <sup>5</sup> Jáchi a cíu ndaja ndaa ñayivi mé ná nu Ndióxi sahá ña cája na. Tá ná candeé iní ñayivi Jesú, mé a nachálvi sahá cuachí anda jáví ndaja Ndióxi na ñayivi ndaa nu mé á. <sup>6</sup> Ta quiáhva já nacahan rey David sahá ña yóho tá nacachi da ña tähví nahá nacuu da ndája ndaa Ndióxi vatí coó nacaja da ñaha ña ná cuu ndaja ndaa da mé dá nu Ndióxi. <sup>7</sup> Já nacachi David já:

Tahví nahá nacuu ñayivi tá nacaja cahnu ini  
Ndióxi sahá ña ná nu nacaja na ta tá  
najándoo a cuachi na.

<sup>8</sup> Ta tähví nahá nacuu ñayivi tá coó naquehe  
Ndióxi cuénta sahá cuachi nacaja  
na, nacachi David sánahá ndivaha.

<sup>9</sup> Á tähví nahá nacuu na nacandaen marca yiquí cuñu cuití va. Uhun. Jáchi ndúu ndaa ñayivi nu Ndióxi sahá ña candeé iní na mé á ta co cíu á sahá ña nacandaen na marca yiquí cuñu á coó a. Ta sa xíni yó ña nacachi Ndióxi ña nanduu Abraham taa ndaa nu mé á sahá ña nacandeé iní da mé á. <sup>10</sup> Á nacachi Ndióxi ña cíu Abraham taa ndaa nu mé á tá cámání chicaen da marca yiquí cuñu da á tá nāndihi nacandaen da marca yiquí cuñu da. Nacachi a já xihín dá tá cámání chicaen da marca yiquí cuñu da. <sup>11</sup> Jihna nínhú nacandeé iní Abraham Ndióxi anda jávi nacachi a ña cíu Abraham taa ndaa nu á. Tá nāndihi já nacandaen da in marca yiquí cuñu da já náha ña mé a ndaa nanduu da taa ndaa nu Ndióxi jáchi nacandeé iní da mé á. Xihín ña yóho naxinu Abraham nānduu da tātuhun tátá tóco nāndihi ñayivi, ná candeé iní Ndióxi vatí coó nacandaen na marca yiquí cuñu na. Ta vatí coó nacandaen na mé marca yóho yiquí cuñu na joo cíu ná ñayivi ndaa nu Ndióxi. <sup>12</sup> Ta quiáhva já nānduu Abraham tátá na íin mé marca yóho cuití va jáchi nānduu da tátá na sahá ña candeé cahnu ini na Ndióxi tá quiáhva nacandeé iní Abraham mé á tá cámání chicaen da marca yiquí cuñu da.

*Jáxinu coo Ndióxi tūhun sáhan nu yo tá ná candeé iní mé á*

<sup>13</sup> Sanahá ndivaha násahan Ndióxi tūhun a nu Abraham xihín nuú na naquixi chichi da. Nacachi Ndióxi ña tandaq quíví ñehe tähví ná ña nánduu ñuyíví ñaha mé ná. Coó násahan Ndióxi tūhun a nu Abraham sahá ña nacaja da ña sáhndá ley Moisés. Násahan mé á tūhun a nu dá sahá ña nacandeé iní da mé á ta já nānduu ndaa da nu Ndióxi. <sup>14</sup> Joo tá mé a ndaa na nacacu vaha ley cíu na ñehe tähví cuhun indíví já quéa coó chūun candeé iní Ndióxi, dá já. Jáchi xihín ña yóho jándacoo níu í tūhun násahan Ndióxi nu yo ña caja mé á xóho. <sup>15</sup> Ndítahan nu Ndióxi jándoho a ini ñayivi tá co cája na ña sáhndá ley Moisés. Joo tá coó toho mé ley já quéa coó toho cuachi ñayivi nu ley.

<sup>16</sup> Nasahán Ndióxi tūhun a nu Abraham sahá ña nacandeé iní da mé á. Ta sáhan mé á tūhun a nu yo tá candeé iní mé á. Coó a cája toho a á cája í ña sáhndá ley Moisés á co cája toho í ña jáchi mé a ndaa ndiquehé

ñä vaha sáhan Ndióxi nu yo tá cández iní mé á tátuhun nacandéé ini Abraham mé á. Ta cíú á tátuhun nanduu Abraham tátá tóco ndihí na cández iní Ndióxi. <sup>17</sup>Já cachí Ndióxi já xihín Abraham: "Nacaja i ñä ná nduu mún tátá ñayivi ndúu cuahá nación", já cachí tuhun Ndióxi sanahá. Mé Abraham cíú dá tátuhun tátá ndihí nu Ndióxi. Nacandéé ini da Ndióxi, mé á cuu jánditacu tucu ndii ta xihín tuhun cáhan mé á caja ñä ná coo ñä coó nasañin jihna.

<sup>18</sup>Vatí coó naxinu nuú tuhun nasañan Ndióxi nu Abraham joo nacandéé tá nacandéé ini da Ndióxi ta nasañati da jáxínu coo mé á tuhun a. Já nanduu da chichí nuú naquixi cuahá ñayivi, na ndúu cuahá nación. Já nayaña jáchí já nacachi Ndióxi xihín dá sanahá: "Ndicuahá ndivaha ñayivi quixi chichún", nacachi Ndióxi xihín dá.

<sup>19</sup>Ta nacandéé ini Abraham Ndióxi ñä cacu jahyi da vatí sa nacayati quivi xínu da in ciento cuja ta vatí sa cándaa caxí iní da ñä jalóho cuití va quivi catacu da ñuyíví yóho xihín Sara, ñájíhí da. Ta sa cándaa iní da ñä a cuú ga cacu jahyi ná joo nacandéé ini da Ndióxi. <sup>20</sup>Ta coó nacavítá iní da ta coó nandicani ivi joho iní da sahá tuhun nasañan Ndióxi nu dá. Joo nanduu ndeé chágá ví iní da já ná cández cáhu chágá ví iní da Ndióxi ta nacaja cáhu da mé á. <sup>21</sup>Já naxinu iní da ñä mé á ndaa táchí iní ndée Ndióxi ná jáxínu a tuhun sáhan nuú ñayivi. <sup>22</sup>Nacandéé ini Abraham Ndióxi sahá ñä cán quéta nacachi a ñä nanduu da taa ndaa nu mé á.

<sup>23</sup>Ta tá cachí tuhun Ndióxi ñä nanduu Abraham taa ndaa nu Ndióxi sahá ñä nacandéé ini da mé á já quéta coó nacahyi ñä yóho sahá Abraham cuití va. <sup>24</sup>Nacahyi ri a sahá mí jáchí tá ná cández iní Ndióxi, mé á najánditacu Jesús, xitoho í tañu ndii já quéta ndiquehe Ndióxi mí ta ndaja mé á mí ñä ná nduu ñayivi ndaa nu mé á. <sup>25</sup>Ta nandiquiahva na Jesús ñä ná quivi a ndica crúxu sahá cuachí. Ta tá nandihí nanditacu tucu a ñä ná nduu ñayivi ndaa nu mé á.

## 5

*Nacaja Ndióxi ñä ná nduu ndaa yó nu mé á*

<sup>1</sup>Sahá ñä cán quéta coó ga cuachi jata yo jáchí nacandéé iní Ndióxi ta nandique táhan máni yó xihín á sahá ñä nacaja Jesucristo, xitoho í. <sup>2</sup>Ta sahá ñä cández iní Jesucristo sahá ñä cán quéta cája Ndióxi cuahá

ñamani xohó. Cández iní mé á ta cájii iní ndatí cuhun í coo í xihín mé á. <sup>3</sup>Ta quiahva já cájii iní tá ná quixi tondóho nu yo jáchí sa xíniyo ñä ndindacu chágá iní cuénta Ndióxi tá ndóho í tondóho. <sup>4</sup>Tá sa nandindacu iní cuénta Ndióxi nacaja tondóho anda jáví táchán iní Ndióxi xihín yo jáchí naxito ndojo mé á mí ta nandindacu chágá iní cuénta mé á. Tá natahan iní Ndióxi xihín yo anda jáví candaña vaha iní ñä jáxínu coo mé á tuhun nasañan a nu yo. <sup>5</sup>Tá ndatí ñä nasañan Ndióxi tuhun a quiahva nu yo já a cándoo núu toho Ndióxi xihín yo jáchí najándicutú Ndióxi ímá yó xihín ñä quíhvi ini a mí. Nacaja Ndióxi ñä yóho xihín ímá yíi mé á ñä nasañan nu yo.

<sup>6</sup>Sahá ñä co ndee yo jácacu mí sahá ñä cán quéta naxihi Jesucristo sahá yo ta coó nacayáncá a quivi a ta ni coó naxihi yachi a. Naxihi a mé quivi nanditahan quivi a sahá cuachi ñayivi quini. <sup>7</sup>Ihyi ndivaha cája já queta in ñayivi quivi na sahá inga ñayivi vatí cuú ná ná vaha. Joo mé a ndaa cuu queta in ñayivi coo táchva na quivi na sahá in ná cuú ná vaha ndivaha. <sup>8</sup>Náha Ndióxi nu yo ñä mé a ndaa táchí quíhvi ini a mí jáchí vatí cuú yó ñayivi cája cuachi joo naxihi tá naxihi Jesucristo sahá yo. <sup>9</sup>Ta viti sa nanduu ñayivi ndaa nu mé á sahá níi Jesucristo, dó naxita sahá yo. Ta sa sahá mé á cacu ndaa ímá yó já ná a cójo iní Ndióxi sahá cuachi. <sup>10</sup>Nasacuú ná coó naxini táhan vaha xihín Ndióxi joo sahá ñä naxihi in túhún jini já jahyi mé á sahá ñä cán quéta nandique táhan máni yó xihín á viti. Xihín ñä yóho cuu cacu ndaa ímá yó jáchí nanditacu tucu Jesucristo ta sa nandique táhan máni yó xihín Ndióxi viti. <sup>11</sup>Ta a juú ñä yóho cuití va vaha jáchí cájii ndivaha iní xihín Ndióxi sahá ñä nacaja Jesucristo, xitoho í. Sahá ñä cán quéta naxinu yó nandique táhan máni yó xihín Ndióxi.

*Ñä nacaja Adán xihín ñä nacaja Jesucristo*

<sup>12</sup>Ta sahá cuachi nacaja in taa naní Adán sahá ñä cán quéta nandihvi cuachi ñuyíví yóho ta tá nandihvi cuachi ñuyíví já nacásáhá xihí ñayivi. Tóco ndihí cája í cuachi ta sahá ñä yóho ndítahan quivi ndihí. <sup>13</sup>Tá cámari quiahva Ndióxi ley mé á nü Moisés nasacomi tóco ndihí ñayivi cuachi. Joo co quéhe Ndióxi cuénta sahá cuachi jáchí coó toho ley nasañin tiempo já. <sup>14</sup>Janda tiempo

násahijin Adán nácasáhá xíhi ñayivi sahá cuachi na ta janda naxinu tiempo násahijin Moisés naxihí na vatí coó nacaja na mé cuachi nacaja Adán. Nasacomí Adán cuachi jáchi naquehe núu da ña nacachi Ndióxi xihín dá. Ta mé Adán yóho násacuu da tátuhun yuhú nuú dä quixi tá nu ndihí.

<sup>15</sup> Joo a cuú jándique táhan í cuachi nacaja Adán xihin tócoó ndihi ña vaha sáhan Ndióxi nu yo. Jáchí sahá cuachi nacaja in tühún taa, xíhi cuahá ndivaha ñayivi. Joo ñamani nacaja Ndióxi xoho sahá ña nacaja in tühún taa naní Jesucristo cíú á in ñamani cáhnu ndivaha ña néhe tähví cuahá ndivaha ñayivi. <sup>16</sup> A cuú jácatáhan í cuachi nacaja in dataas xihín ñamani caja Ndióxi xoho jáchí saha in tühún cuachi naxinu cháhan jatá ñayivi ta já nácasáhá xihín na. Vatí nandicuahá cuachi ñayivi joo nacaja Ndióxi ñamani xihín ná já nandaja ndaa mé á na ta nacachi a ña coó ga cuachi na nu mé á. <sup>17</sup> Sahá cuachi nacaja in tühún taa naní Adán nácasáhá xihín ñayivi. Joo sahá ña nacaja in tühún taa naní Jesucristo néhe tähví yó ndoo máni uun cuachí nu Ndióxi. Jáchí cáhnu ndivaha ñamani caja Ndióxi xoho ña cán quéa néhe ndee chágá íní yo caca í íchí cuéntá Ndióxi sahá ña nacaja Jesucristo.

<sup>18</sup> Sahá cuachi nacaja Adán nacachi Ndióxi ña cómi tócoó ndihi ñayivi cuachi nu á. Joo sahá ña ndaa nacaja Jesucristo nacachi Ndióxi ña ndá ñayivi nacuu cuu nduu ndaa na nu mé á jáchi co cómi ga na cuachi nu á. <sup>19</sup> Sáá násahijin ini Adán jáchi coó naxéen dä caja da ña cúní Ndióxi. Ta sahá ña nacaja Adán cuahá ndivaha ñayivi nanduu na ñayivi cuachi. Joo nacaja Jesucristo tócoó ndihi ña cúní Ndióxi ta xihín ña nacaja in tühún taa Jesucristo nanduu ndaa cuahá ndivaha ñayivi nu Ndióxi.

<sup>20</sup> Tá nasahan Ndióxi ley nu Moisés já nacanda ini ñayivi ña cuahá chágá cíú cuachi na. Joo tá nandicuahá cuachi ñayivi já natahví chágá ini Ndióxi sahá ná. <sup>21</sup> Nandihvi cuachi ñuyíví ta nácasomí a cuéntá sahá ñayivi. Ta sahá ña nacaja na cuachi sahá ña cán quéa nácasáhá xihín na. Joo nacaja Ndióxi cuahá ñamani xihín yo ta nácasomí a cuéntá sahá yo já ná cuu nduu ñayivi ndaa nu mé á ta já ná cuu cäcu ndaa

ínima yo anda ama cása quivi sahá ña nacaja Jesucristo, xitoho í.

## 6

Naxihí yó nuú cuachi joo tacú yo xoo Jesucristo

<sup>1</sup> Ama ná cache xihin táhan í: "Cóho caja tá caja í cuachi já ná coo cáhnu chágá in Ndióxi sahá yo." <sup>2</sup> Ama ná cache rí já jáchi cíú yo tátuhun na sa naxihí nuú cuachi ta tá sa naxihí yó nuú cuachi ama ná cacomí ga cuachi cuéntá sahá yo. <sup>3</sup> Tá nacandúta yo cuéntá Jesucristo cíú á tátuhun in yó naxihí xihín Jesucristo. <sup>4</sup> Jáchí tá nacandúta yo já cíú á tátuhun in yó nanduxu xihín Jesucristo ta naxihí yó nuú cuachi. Ta tá najánditacu Ndióxi Jesucristo já cíú á tátuhun in yó nanditacu xihín mé á. Jáchí xihín ndee cáhnu Ndióxi, tátá yo nanditacu Jesucristo ta sa xihín mé ndee cán cuu caca í ichí saá viti.

<sup>5</sup> Tá quiáhva in nanduú xihín Jesucristo tá naxihí a quiáhva já in nanduú xihín á tá nanditacu a. <sup>6</sup> Tá cámanti cández iní Jesús já nacatóo ndivaha í caja í cuachi jáchi nácasinda cuachi chuun nu yo. Joo sahá ña naxihí Jesucristo ndica crúxu sahá ña cán quéa najándacoo í cuachi caja í ta viti co sáhndá ga cuachi chuun nu yo. <sup>7</sup> Jáchí tá sa naxihí in dätaa co sáhndá ga cuachi chuun nu dä ña cán quéa cíú á tátuhun sa naxihí yó xihín Jesucristo sahá ña cán quéa co sáhndá ga cuachi chuun nu yó viti. <sup>8</sup> Ta cíú á tátuhun naxihí yo tá naxihí Jesucristo ña cán quéa xíní vaha í ña cuuhun yó coo í nu íin mé á anda ama cása quivi. <sup>9</sup> Sa xíní yo ña nanditacu tucu Jesucristo ta a ndíco coo ga quivi a jáchi ni in ñaha a cuú caja ña ná quivi tucu a. <sup>10</sup> In tálalá tañu naxihí a sahá cuachi ta viti xihín chí nuú co ndítahan ga nu á quivi a sahá cuachi. Ta viti tacú Jesucristo cuéntá Ndióxi. <sup>11</sup> Ña cán quéa ndítahan catacu ndó ñuyíví yóho tátuhun na sa naxihí nuú cuachi já ná a cáhndá ga cuachi chuun nu ndo. Ndítahan catacu ndó cuéntá Ndióxi ña in ná nduu ndó xihín Jesucristo.

<sup>12</sup> Ña cán quéa a quiáhva ndó ñamani nuú cuachi ña ná cacomí a cuéntá sahá yiquí cuuu ndó jáchi tá ná ndiquiahva ndó mé ndó ndahá cuachi já quéa caja ndó cuachi ña xica ini ndó caja ndó. <sup>13</sup> A ndiquiahva ga ndó yiquí cuuu ndó ndáhá cuachi ná a caja

ndó ña nūu. Joo vaha chágá ná ndiquiahva ndó yíquí cuñu ndó ndáhá Ndióxi. Nasacuu ndó tátuhun in ndíj nu Ndióxi jáchí nácaja ndó cuachi joo viti cíu ndó tátuhun ñayivi, ná nanditacu tucu nácaja Ndióxi. Ndítahan ndiquiahva ndó mé ndó ndáhá Ndióxi ña ná caja ndó ña vaha.<sup>14</sup> Co cómí ga cuachi cuénta sahá ndó viti jáchí táchú ndo sahá ñamani cája Ndióxi ta co táchú ndo sahá ña sácú vaha ndó ley Moisés.

*Ndítahan nu yo ndicaxí ndá íchí candíco yo*

<sup>15</sup> Ama ná caja rí cuachi sahá ña co cómí ga ley Moisés cuénta sahá yo. Uhun. A cája toho í ña jáchí xihín ñamani cája Ndióxi xihín yo cándaa iní ña cómí mé á cuénta sahá yo.<sup>16</sup> Sa xíni ndó ña ndiquiahva in mozo mé dá ndáhá xitoho da ta cája da ndá chuun nácuu ña sáhan xitoho da nu dá caja da. Ta viti cuu ndicaxi ndó ndá na cacuu xitoho ndó. Tá ná ndicaxi ndó caja ndó cuachi já quéa cacuu ndó mozo ña quini ta cuhún ndó indayá. Ta tá ná ndicaxi ndó caja ndó ña cúní Ndióxi já quéa cacuu ndó cuénta mé á ta caja mé á ña ná nduu ndaa ndó nu á viti.<sup>17</sup> Jihna nácaja ndó cuachi cuití va joo ndixahvi Ndióxi jáchí xihín ndinuhi ini ndó cája ndó ña ndaa, ña nácatiaghva ndó cuénta Ndióxi.<sup>18</sup> Nandoo cuachi ndó ta co cíu ga ndó mozo cuénta cuachi viti. Nanduu ndó mozo cuénta Ndióxi ta cája ndó ña ndaa viti.<sup>19</sup> Najánaha i sahá in mozo nu ndó já ná candaá vaha chágá ini ndó ña ndaa. Mé ndó nasacuu ndó tátuhun mozo jáchí jihna nandiquiahva ndó mé ndó ndáhá cuachi ta mí cuachi nasacuu a tátuhun xitoho ndó. Nácaja ndó tá nūu ña nūu, ña nácahvi ini ndó caja ndó. Joo viti nandiquiahva ndó mé ndó ndáhá Ndióxi ta nasacu ini ndó caja ndó ña ndaa xihín ndinuhi ini ndó jáchí já cání a nu ndó caja ndó ña ná cacuu ndó ñayivi yii nu mé á.

<sup>20</sup> Tá nasacuu ndó mozo cuachi coó nax-eén ndó caja ndó ña ndaa ña cúní Ndióxi.

<sup>21</sup> Ni in ña vaha coó nañehé ndó sahá cuachi nácaja ndó. Ta viti Cácahan nūu ndó sahá mé cuachi nácaja ndó. Ta ndá ñayivi sá cája cuachi cuhún ña coo na indayá anda ama caja quivi.<sup>22</sup> Joo co cómí ga cuachi cuénta sahá ndo viti jáchí nanduu Ndióxi xitoho ndó. Vaha quehe ndó tá ná caja ndó ña cúní mé á jáchí já xinu coo ndó cacuu ndó ñayivi yii nu Ndióxi ta já cuhún ndó coo ndó xihín

mé á anda ama caja quivi.<sup>23</sup> Jáchí tá cája í cuachi cíu á tátuhun ndiyíca yo nu Ndióxi sahá ña nácaja í ta ini indayá chahví sahá. Joo ñamani cája Ndióxi xohó sahá ña náxihí Jesucristo, xitoho í cíu á ña cohó catacú indiví xihín mé á anda ama caja quivi.

## 7

*Co cómí ga ley cuénta sahá yo*

<sup>1</sup> Candehé ndo ñani mí i, ná cíu cuénta Jesús. Sa xíni vaha ndó ley Moisés ta sa xíni ndó ña cómí ley cuénta sahá ñayivi náni táchú cuití va na.<sup>2</sup> Cíu á tátuhun tá nástandahá in ñáñahá xihín in dattaa já quéa cáchí ley cíu ña ñájihí da anda ná xinu coo quivi quivi da. Joo cáchí mé ley ña tá sa náxihí da co cíu ga ña ñájihí da.<sup>3</sup> Sahá ña cán quéa cuu tandahá tucu ñá xihín inga taa jáchí co sáhndá ga mé ley chuun nu ña. Ta co cája ña cuachi nu Ndióxi tá ná tandahá tucu ñá jáchí sa náxihí va yí ña. Joo tá ná tandahá tucu ña náni táchú yí ña já quéa cája ña cuachi nu Ndióxi.

<sup>4</sup> Ta quiahva já ndóho ri ndóho va ñani mí i, ná cíu cuénta Jesús. Cíu á tátuhun náxihí ndó nu ley Moisés ña cán quéa co cómí ga mé ley cuénta sahá ndo. Ta viti núná nu yí Jesucristo cacomí a cuénta sahá ndó ña nácacu ndó cuénta mé á nanditacu tucu. Ta viti cuu caja í ña vaha, ña cúní Ndióxi.<sup>5</sup> Tá cámají candeé iní Jesucristo nácaja í ndinuhi ña núu ña nácahvi iní caja í. Vatí sa xíni yó ña cáchí mé ley joo nácaja chágá yó cuachi ña nácahvi iní caja í. Ña cán quéa nanditahan nu yó quivi ná cuhún í ndoho iní indayá, nduu.<sup>6</sup> Joo nácaja Ndióxi ña nájan yó nu yó ña sáhndá ley Moisés ña nácahvi iní cuénta sahá yo. Ta viti núná nu yó caja í ña cúní mé á jáchí nándijama inímá yii Ndióxi mí sahá ña cán quéa co cómí ga ley, ña nácahvi yá jihna cuénta sahá yo viti.

*Caja tá cája í cuachi vatí candeé iní Jesucristo*

<sup>7</sup> Á cúní cuachi ña yóho ña a vaha toho ley Moisés. Uhun. Ña vaha cíu á jáchí xihín ña cáhán mé ley cándaa vaha iní ndá a cíu cuachi. Já cáchí mé ley já: “A ndiává toho ini ndó cacomí ndó ñaha cómí inga na”, cáchí a. Ña cán quéa cándaa iní viti ña a vaha toho tá ná caja í já.<sup>8</sup> Tá ná a cóo toho ley, nduu já quéa a cándaa iní i ña

cúu cuachi. Ta coó toho cuachi caja i tá coó ley, nduu. Joo viti cándaa ini i ña a váha toho ndiává ini i cacomí i ñaha ñani táhan i jáchi cachí ley a cája i ña. Ña cán quéa nandjhvi cuachi ini i ta nacasadáhá cahvi ini i ndaja caja i cacomí i ñaha inga na. <sup>9</sup>Tá cámaji candaqá ini i ña cachí ley Moisés já nacahán i cúu u dä váha. Joo tá natandaa quivi natacu ini i xihín ña cachí ley Moisés anda jáví nacandaa ini i ña ñihu cuachi ini i ta nacandaa ini i ña cúu u dä cája cuachi ta ndítahan nuú i cuhun i indayá sahá. <sup>10</sup>Tá ná cuu caja ñayivi tóco ndihi ña cachí ley Moisés já cuhun ná coo na nu íin Ndióxi andá ama cáa quivi. Joo coó nacuu caja i ña cachí mé ley sahá ña cán quéa ndítahan nuú i cuhun i indayá sahá. <sup>11</sup>Najándahvi cuachi yehe jáchi nacahán i cuu cuhun i indív sahá ña cája i ña cachí ley joo sahá ña coó nacuu xinu coo i caja i ña sahá ña cán quéa cuhun i indayá.

<sup>12</sup>Ta yii ndiváha cúu ley Moisés. Ta yii ndiváha cúu tühun nasaahnda Ndióxi caja i. Ta cúu á ña ndaa ta cúu á ña váha. <sup>13</sup>Ama ná jáqueta nuu ley yehe ini indayá nani cúu á ña váha. Uhun. A cúu cuití caja ley jáqueta nuu a yehe ini indayá. Cuachi quéa ndúc chindahá yehe cuhun i indayá. Nañehé íní cuachi cañehe a yehe cuhun i indayá sahá ley. Xihín ña yóho cándaa ini i ña quini ndiváha cúu cuachi ta váha ndiváha cúu mé ley.

<sup>14</sup>Sa xiní yo ña cúu ley cuénta Ndióxi jooyehe cúu u in dä cája cuachi ta cája i ña náu jáchi mé cuachi cómi a cuénta sahá i. <sup>15</sup>Co cándaa ini i ña cája i jáchi cúní caja i ña váha joo co cája i ña. Ña cája i quéa mé ñaha ña cándají i. <sup>16</sup>Tá cája i cuachi ña co cúní caja i já cándaa ini i ña váha cúu ley. <sup>17</sup>Mé a ndaa co cúní caja i cuachi joo cuachi ndácaan ini i cúu á ña jácahan yehe cája i ña. <sup>18</sup>Sa xiní ña co ndee yiquí cuñu i caja ña váha jáchi coó ña váha ndácaan ini i. Vatí cúní caja i ña váha joo co sáhan mé a caja i ña. <sup>19</sup>Cúní caja i ña váha joo co cája toho i ña. Ña cája i cuu á ña náu ña co cúní caja i. <sup>20</sup>Caja i ña co cúní caja i já cándaa ini i ña cuachi ndácaan ini i quéa chindahá nihni a yehe cája i ña náu.

<sup>21</sup>Cándehe ndo ña yóho: Vatí cúní caja i ña váha joo cája i ña náu jáchi ña cán cuití va xinu íní i caja i. <sup>22</sup>Janda íníma i xinu coo ña cátóó i caja i ña cahán ley

Ndióxi. <sup>23</sup>Joo ndácaan inga ñaha ini i ta cán táhan mé ñaha cán xihín xíní tuní i. Ta mé ñaha ndácaan ini i cúu á cuachi. Ta cándeé cuachi xihín i já sáhndá a chuun nuú i.

<sup>24</sup>Ndáhví ñahá nacuu u. Yo cuu jácacu yehe ná a cája ga i cuachi ña cañehe yehe cuhun i indayá. <sup>25</sup>Ndíquiahva i ndixahvi ná Ndióxi jáchi xihín ña nacaja Jesucristo, xitoho i cuu jácacu Ndióxi yehe já ná a cája ga i cuachi. Ña cán quéa cándaa ini i ña ndítahan cája i ña sáhndá ley Ndióxi joo cuachi ndícaan ini i sáhndá chuun nuú i.

## 8

*Ndíco i in íchí nu cája i ña cúní ínima yii Ndióxi*

<sup>1</sup>Ta sahá ña in nanduu xihín Jesucristo sahá ña cán quéa a chínúu Ndióxi cuachi játa yo viti. Jáchi co cája ga i ña xíca ini yiquí cuñu i. Ña cája i cúu ña cúní ínima yii Ndióxi. <sup>2</sup>Jáchi xihín ña nacaja Jesucristo najácacu ínima yii Ndióxi mí ta nasaahnu a cuachi já ná a cuhun yó indayá. <sup>3</sup>Coó nacuu caja i tóco ndihi ña sáhndá ley Moisés ña cán quéa coó nacuu nduu ndaa yó nu Ndióxi xihín mé ley. Ña cán quéa nacaja Ndióxi inga ñaha tá nachindahá mé á Jesucristo, jáhyi a. Nanduu Jesucristo in ñayivi ta tá quiáhva cácu ñayivi quiáhva já nacacu Jesucristo ñuyíví. Ta tá naxíhi mé á ndica crúux já nachahvi a sahá tóco ndihi cuachi sahá ña cán quéa co sáhndá ga cuachi chuun nu yo. <sup>4</sup>Ta nacaja Ndióxi ña yóho já ná cuu xinu coo i caja i ña sáhndá ley mé á tá ndáca ínima yii Ndióxi mí. Jín va caja i viti jáchi co ndúu ga yó ndahá cuachi.

<sup>5</sup>Ñayivi, ña cája ña xíca ini yiquí cuñu, ña cán cúu ña ndícani cuahá ini sahá yiquí cuñu. Joo ña cája ña cúní ínima yii Ndióxi ña cán cúu ná ndúcú jácavatá ña Ndióxi. <sup>6</sup>Tá ná ndicani cuahá ini na sahá ña cúní yiquí cuñu na já quéa cuhun na indayá. Joo tá ná ndicani ini na sahá ña cúní ínima yii Ndióxi já quéa coo váha ini na ta nähé tähví ná cuhun na indív. <sup>7</sup>Joo ñayivi ndícani ini saha yiquí cuñu, ña cán cúu ná ná ihví Ndióxi jáchi co cúní ña caja na ña cachí ley Ndióxi ta ni a cuý caja na ña. <sup>8</sup>Sahá ña cán quéa tá cómi cuachi cuénta sahá ná já quéa a cuú caja na ña cájii ini Ndióxi xihín.

<sup>9</sup>Ta tá mé a ndaa ndácaan ínima yii Ndióxi ini ndó já quéa co ndíco ga ndó íchi

cuéntá ña núu, ña nasacaja ndó jihna. Ta viti ndíco ndó íchí vaha ta cája ndó ña cúni Ndióxi. Jáchí ndá na co ndácaan ínima Jesucristo ini, na cán co cíu ná cuéntá mé á.<sup>10</sup> Tá ndácaan Jesucristo ini ínima ndo vaxí quíví quíví yiquí cuñu ndó sahá cuachi nacaja ndó. Joo mé a ndaa catacu ínima ndo nu fin Ndióxi anda ama cáa quíví jáchí nanduu ndaa ndó nu Ndióxi nacaja mé á.<sup>11</sup> Nacaja ínima yii Ndióxi ña ná nditacu tucu Jesucristo ta tá ndácaan ínima yii Ndióxi ini ínima ndó já tanda quíví caja mé a ña ná nditacu tucu yiquí cuñu ndó sahá mé ínima yii Ndióxi ndícaan ini ndó.

<sup>12</sup> Candehé ndó ñani mí i, na cíu cuéntá Jesús. Co ndítahan nu ndó caja ndó ña núu, ña xíca ini ndó caja ndó. <sup>13</sup> Jáchí tá ndinuhu ini ndó caja ndó ña núu, ña xíca ini ndó já quéra ndítahan nu ndó cuhun ndó indayá. Joo tá xihín ndée ínima yii Ndióxi jándihu ndó sahá ña núu xíca ini ndó caja ndó já quéra vaxí quíví cuhun ndó coo ndó xihín mé a andá ama cáa quíví.

<sup>14</sup> Ndá na nandiquiahva mé ndáha ínima yii Ndióxi ña ná candaca a ña, mé a ndaa táchí cíu ná jahyi Ndióxi. <sup>15</sup> Nasahán Ndióxi ínima yii mé a nu ndo joo coó nasahán ña nu ndo ña ná cataví nihni a ndohó ta já quixi ña jayihví a ndohó. Nasahán Ndióxi ínima yii mé a nu ndo jáchí xihín ña yóho ndája Ndióxi ndohó jahyi mé a ta sahá mé ínima yii yóho cahán yó xihín Ndióxi ta cáchí yo. “Tátá maní l.” <sup>16</sup> Ta cáchí ínima yii Ndióxi xihín ínima yo ña mé a ndaa cíu yó jahyi Ndióxi. <sup>17</sup> Ta sahá ña cíu yó jahyi mé a sahá ña cán quéra ñehe táchí mí ví ndiquehé ña nacachi Ndióxi quiahva nu yo. Ta sa mé ña ñehe táchí yo yóho tahnda java ña xihín Jesucristo. Tá ta mé a ndaa táchí ndoho ini xihín a já quéra tá nandihu cohó coo í xihín mé a indiví ta cán ndicáhnu í xihín á.

<sup>18</sup> Coó a caja toho a tá ná ndoho ini íñuyíví yóho jáchí vaxí quíví ndicáhnu ndivaha í xihín Jesucristo caja Ndióxi. <sup>19</sup> Tóco ndihí ña nacaváha mé a ndáti ndihí a ta ndiává íní a ña ná tanda quíví quíví cachí Ndióxi ndá ñayivi cíu cuéntá mé á. <sup>20</sup> Nacaja Ndióxi ña ná ndoho ini tóco ndihí ña nacaváha mé á. Mé ñaha nacaváha Ndióxi co cíu ná ndoho ini ajoo sácu ini Ndióxi ña ná ndoho ini tóco ndihí ña nacaváha mé á. Ta ndáti táchí ndihí ñaha <sup>21</sup> anda tanda quíví caja Ndióxi ña janí ña já ná a cacomí ga cuachi cuéntá

sahá já ná a tíví ga ña. Ta ñúchí ndivaha mé quíví já tá cajíi ini tóco ndihí ñaha nacaváha Ndióxi xihín tóco ndihí na cíu jahyi mé á. Jáchí a cacomí ga cuachi cuéntá sahá ná. <sup>22</sup> Sa xíni yo ña janda sanahá ndivaha ta andá viti tana ndivaha tóco ndihí ña nacaváha Ndióxi ta ndohó ndivaha ini a tátuhun ndohó ini in ñañáha ta ndúcú ndéé ña cacu jahyi ña. <sup>23</sup> Ta quiahva já ndohó ri ini mí ví. Ínima yii Ndióxi cíu ña sahan táchiva mé á nu yo já ná candaqá iní ndá quiahva ín ña quiahva mé á nu yo chágá chí nu. Ta tana ndivaha í andá quiahva ná yaha ña ndohó iní. Ta ndáti tanda quíví ndaja Ndióxi tóco ndihí mí ná nduu jahyi mé á já ná ndiquehé yiquí cuñu saá. <sup>24</sup> Najácacu Ndióxi mí jáchí nacandeé iní mé a vatí coó naxiní ña nacachi mé a quiahva nu yo. Ta xíni caxí yo in ñaha já candaqá iní ña co xíni ñúhú toho candalí quehé ña jáchí co xíni ñúhú candalí ñaha cómí yo. <sup>25</sup> Joo tá ná candalí in ñaha ña co xíni yo já quéra co ndihí iní nani ndatí ña.

<sup>26</sup> Tá cavitá iní já chíndeé ínima yii Ndióxi mí jáchí co táchiva í ndaja caca táchí yo nu Ndióxi ta quiahva ndítahan caca táchí yo nu á. Joo sa mé ínima yii Ndióxi yóho tana ta cahán xihín tühun ña a cíu cahán yo. Já caja mé a tá xíca táchí a nu Ndióxi saha yo. <sup>27</sup> Ta sa xíni Ndióxi ña cahvi iní ta sa xíni a ña xíca táchí ínima yii mé a saha yo. Ña cíni Ndióxi caja sahá yo ña jan quéra xíca táchí ínima yii mé a saha yo, na cíu ñayivi cuéntá mé á.

*Ni in ñaha a cíu cahnu a mí tá candeé iní Jesucristo*

<sup>28</sup> Ta sa xíni yo ña tóco ndihí ña ndohó í ndaja Ndióxi ña ná nduu a ña vaha tá quíhví iní mé á. Jáchí mí cíu yó na sa nacacu ini Ndióxi ña ná caja í ña cíni mé á.

<sup>29</sup> Ndá ñayivi nacaxí Ndióxi anda saha nacaxí a na ña ná nduu na tátuhun Jesucristo, mé a cíu jahyi Ndióxi. Jáchí cíni Ndióxi ña ná nduu Jesucristo jiní nuú ndihí na cíu cuéntá mé á. <sup>30</sup> Ta nacana Ndióxi ña nacaxí a ña ná candeé ini na mé á. Ta nacaja mé a ña ná nduu ndaa na nu á. Ta vaxí quíví caja mé a ña ná ndináhnu ndihí na cán xihín á.

<sup>31</sup> Ndiá cachí sahá ña yóho. Ni in tühún ñaha a cíu caní táchán xóho ta ni a cíu quee vaha xóho jáchí cuahan Ndióxi xoo í. <sup>32</sup> Ta coó nacajílhndá Ndióxi jahyi a jáchí nandiquiahva Ndióxi Jesucristo, jahyi a ña

ná quivi a sahá yo. Xihín ná yóho cándaa iní ná co ndáhví cíú ini a quiáhva tóco ndihi náha nu yo.<sup>33</sup> Yo já cuu chícaan cuachi jatá na nacaxi Ndióxi. Ni in ñayivi a cíú chícaan cuachi jatá ná jáchí sa mé Ndióxi nandaja mé á na ñayivi nda qnu á.<sup>34</sup> Yo já cuu jácojo cuachi jatá na cíú cuénta mé á. Ni in ñayivi jáchí naxihi Jesucristo sahá yo. Nanditacu tucu a ta ín coo a xoo cuáhia Ndióxi indívixíca tähví a nü Ndióxi sahá yo.<sup>35</sup> Yo já cuu caji nuu nü Jesucristo quíhví ini a mí. Ni in ñaha a cíú caja ná jándacoo Jesucristo ná quíhví ini a mí. Vatí ná ndoho ndivahá iní ta vatí ná quixi ná yíhví yo ta vatí ná ndicuita na caja xíxi na xoho ta vatí ná quixi joco ta vatí janda jáhmá yo ná ndimani ta vatí tondóhó vaxi nü yo á ñayivi ndúcú cahní mí joo ni in ná yóho a cíú caji nuu a nü Jesucristo ná quíhví ini a mí.<sup>36</sup> Já cachí tuhun Ndióxi já:

Sahá Ndióxi sácú ini ñayivi cahní na ndehe ndijáá níi quivi.

Tá quiáhva cája na xihín ndicachi, rí cuhun quivi quiáhva já cája na xihín ndé, cachí tuhun Ndióxi.

<sup>37</sup> Vatí ndoho í tóco ndihi ná yóho joo quee vaha tá quee vaha í caja Jesucristo jáchí quíhví ini a mí.<sup>38</sup> Sa xíñi vaha i ná ni in ñaha a cíú caja tavá mí ndáha Jesucristo, mé a quíhví ini mí. Ta coo a caja toho a á tacú yo á sa naxihi yo. Ni tátó Ndióxi ni ná sáhndá chuun nuú ñayivi ta ni ná ndoho iní viti ni ná ndoho iní chí nü<sup>39</sup> ta ni in ñaha íin indívixi ta ni in ñaha íin tixi ñíhu ta ni in ñaha nacavaha Ndióxi a cíú tavá mí ndáha Ndióxi, mé a quíhví ini mí. Ta nájánaha Jesucristo, xitoho ínu yo ná quíhví ndivahá ini Ndióxi mí.

## 9

*Ñayivi naquixi chíchi Israel cíú na nacaxi Ndióxi*

<sup>1</sup> Ná ndaa cíú ná cáhan i xihín ndo viti ta co cávaha i ná tuhún jáchí cíú u cuénta Jesucristo. Sáhndá ínimá yii Ndióxi chuun nu xín túni i sahá ná cán quéa co cáhan i ná tuhún.<sup>2</sup> Lín cuéhá ndivahá ini i ta já tähví ndivahá ini i sahá na Israel.<sup>3</sup> Mé a ndaa cíni yehé chinedé e ná naquixi chíchi nuú naquixi mí i ná ná candée ini na Jesucristo. Ta janda íin tiahva i cacuu u da chícaan na cháhan jatá tá ta xihín ná yóho cuu cacu ndaa ínimá ná. Joo a cíú caja i ná.<sup>4</sup> Mé

ná cán naquixi na chíchi Israel ta nacaxi Ndióxi ná já ná nduu na ñayivi cuénta mé á. Nájánaha Ndióxi nu ná ndá quiáhva cahnu cíú mé á. Ta násahan tuhun a nü ná ná násacu ini a caja sahá ná. Násahan Ndióxi ley Moisés nu ná ta nájánaha mé á ná ndaja ndítahan nu ná caja cahnu na mé á. Nacaxi tuhun a xihín ná sahá námaní caja mé á xihín ná chí nü.<sup>5</sup> Ta ñayivi Israel naquixi na chíchi ná násanduu sanahá. Ta nácacu Jesucristo chíchi mé ná cán ta nánduu a in ñayivi. Chí anda ama cáá quivi ná caja cahnu yó Jesucristo, mé á cíú Ndióxi, mé á cómí cuénta sahá tóco ndihi ñaha. Já ná coo.

<sup>6</sup> A juú cahán ndo ná coó nájáxínu Ndióxi tuhun a násahan nuú ná Israel. A juú ndihi ñayivi jan cíú ná cuénta Ndióxi vatí naquixi na chíchi Israel.<sup>7</sup> A juú tóco ndihi na naquixi chíchi Abraham cíú ná cuénta Ndióxi jáchí janda sahá nácacu Ndióxi xihín dá: "Ñayivi cuáha quivi chíchún cacuu na jahyi Isaac", chí a xihín Abraham.<sup>8</sup> Ná yóho cíni cachi a ná ni in tuhún ñayivi co cíú ná jahyi Ndióxi sahá ná naquixi na chíchi Abraham. Ná cíú nándua jahyi Ndióxi cíú ná naquixi chíchi Isaac jáchí cuénta Isaac nájáxínu coo Ndióxi tuhun násahan nu Abraham.<sup>9</sup> Sanahá ndivahá násahan Ndióxi tuhun a nü Abraham já cachí a já: "Xíñu cuáha já quivi tucu u ta cacu jahyi taa nájílhún, Sara."

<sup>10</sup> Candehé ndo ná ndicani i nu ndo ná nayaha chágá chínuu. Isaac, da cíú tásahnu jíco yo násacuu da tátá ndíví taa valí jahyi Rebeca.

<sup>11</sup> Tá cámáni cacu taa cuáti jahyi na já násacu ini Ndióxi caxi a in a ta cacu xóo a inga vatí a náha caja ndíví taa valí ná ná vaha ni ná nüu. Já násacu ini a caja<sup>12</sup> ta já nácacu a xihín Rebeca: "Jahyún, da cacu chí iyi cahnda chuun nuú da cacu nü cuítí."

<sup>13</sup> Ta já cachí tucu tuhun Ndióxi já sahá jahyi Rebeca: "Nacaxi i Jacobo, da nácacu chí iyi caja i námaní xihín dá joo násacu xóo i Esaú, da nácacu nu cuítí." Já nácaja Ndióxi jáchí já násacu ini a caja.

<sup>14</sup> Ama ná cachi rí ná co cája ndaa Ndióxi. A chí toho í já.<sup>15</sup> Já nácacu Ndióxi xihín Moisés sanahá: "Tähví ini i sahá ñayivi joo mí i caxi i yo tähví ini i sahá. Ta tähndá ini i sahá ñayivi, joo mí i caxi i yo tähndá ini i sahá", nácacu Ndióxi sanahá.<sup>16</sup> Ná cán quéa co cája Ndióxi ná cíni ñayivi

ta a cúa caja ndúsá ñayivi xihín á ña ná tähndá ini a sahá ná jáchi tähndá ini a sahá ñayivi, na cúní mé á tähndá ini a sahá. <sup>17</sup>Já cachí tūhun Ndióxi já xihín da cúa rey nuú nación Egípto: “Nandaja i yohó rey jáchi cúní jánahá i nuún ña cuu caja i tóco ndihi ñahá tá cúní já ná candaa ini tóco ndihi ñayivi ndúu ñuyíví ña cahnu ndivaha cúa yehe”, nacachi Ndióxi. <sup>18</sup>Ña cán quéa tá cúní Ndióxi tähndá ini a sahá ñayivi já cuu tähndá ini a sahá ná. Ta tá cúní a ndaja tähví a níima ná já cuu ndaja tähví a ña.

<sup>19</sup>Joo a cuú cachí ña co caja ndaa Ndióxi tá cachí a ña cómi yo cuachi. Vatí sácú ini Ndióxi ña caja in in ñayivi joo co chíndahá a na caja na cuachi. <sup>20</sup>Co ndítahan nuú ñayivi ndaja ndichí na Ndióxi sahá ña caja mé á. Jáchi sa xíni yo ña co ndítahan nuú in quiji cachi a xihín da cávaha ñaha: “Co cátóo i coo i tá quiáhva nacavaha ndó yehe.” <sup>21</sup>A cuú cachí quiji cán já jáchi mé da cávaha quiji cán, cávaha da ña tá quiáhva cúní mé dá. Xihín in mbohla loho ñuhú quíji cuu cávaha da in quiji cacuu a javí á in quiji cuénta yávi núhu.

<sup>22</sup>Ta quiáhva já caja Ndióxi xihín ñayivi. Ín tighva mé á jánahá nu ná ña xójo ndivaha ini a sahá cuachi na. Ta ín tighva mé á jánahá nu ná ña cuu caja mé á tóco ndihi ñahá. Joo nacaja ndee ini Ndióxi ta násandati a jándoho a ini ñayivi vatí nanditahan nu ná ndoho ini na sahá cuachi na. <sup>23</sup>Mé a ndaa tähndá ini Ndióxi sahá ñayivi ta cúní a jánahá nu ná ña cahnu ndivaha cúa mé á ta cúní a jánahá nu ná ndá quiáhva quíhví ini a ña. Anda sanahá ndivaha sácu ini a jánahá nu yo ndá quiáhva cahnu cacuu yó nu mé á. <sup>24</sup>Nacaxi a ñayivi tañu na naquixi chichi Israel ta nacaxi mé á ñayivi tañu na coó naquixi chichi Israel. Ta mí cúa yó na nacaxi a. <sup>25</sup>Já nacachi Ndióxi já sanahá ta já nacahyí Oseas ini tūhun Ndióxi:

Tanda quivi caxi yehe ñayivi, na co cúa cuénta mí i ta ndaja i ña cuénta mí i.

Ta ña coó naquihví ini i jihna quíhví ini i ña viti.

<sup>26</sup>Ta sa mé nu ndúu ñayivi, na coó násacuu cuénta Ndióxi,

cán cuhun mé á caxi a na ta caja ña ná nduu na cuénta mé á jáchi cúa á in Ndióxi tacú, já cachí tūhun mé á.

<sup>27</sup>Ta sahá na naquixi chichi Israel já nacachi Isaías: “Vatí ndícuahá ñayivi Israel tá quiáhva cuahá ñutí yuhú tañuhú joo chá va cacuu na cacu ndaa ínima. <sup>28</sup>Jáchi jonáá va jaxinu coo Ndióxi tūhun a ta anda jávi caja vii a sahá tóco ndihi ñayivi ndúu ñuyíví”, nacachi Isaías. <sup>29</sup>Ta já nacachi tucu Isaías já sanahá:

Tá quiáhva nacaja Ndióxi najándihí a sahá ñayivi ñuu Sodoma xihín ñuu Gomorra quiáhva já caja Ndióxi jándihí a sahá yo, nduu.

Joo sahá ña natahví ini Ndióxi sahá na Israel sahá ña cán quéa coó najándihí a sahá ná, já cachí tūhun Ndióxi.

*Ndítahan nuú na Israel candeé ini na Jesucristo*

<sup>30</sup>Ña cán quéa ndicani i nu ndo sahá ñayivi, na coó naquixi chichi Israel. Co ndínducu ña nduu ndaa na nu Ndióxi joo tá nacashá na candeé ini na Jesucristo já nacaja Ndióxi ña ná nduu ndaa na nu mé á. <sup>31</sup>Joo ñayivi Israel caja na ña sáhndá ley Moisés xihín ndinuhu ini na jáchi cahán na cuu nduu ndaa na nu Ndióxi sahá ña sácu vaha na ley Moisés. Joo coó nacuu nduu ndaa na nu Ndióxi xihín ña yóho. <sup>32</sup>Já nandoho na Israel jáchi nanditahan nu ná candeé ini na Jesucristo. Xihín ndinuhu ini na caja na ña cachí ley joo coó nacuu nduu ndaa na nu Ndióxi xihín ñahá caja na. Ña cán quéa cúa ná tátuhun in na nacachihin sahá xihín yuu cahnu. <sup>33</sup>Jáchi cachí tūhun Ndióxi ña cúa tátuhun yuu cahnu nu cachihin sahá ñayivi. Já cachí tūhun Ndióxi já:

Násacu yehe in yuu tóto cahnu ñuu Sión ta xihín yuu cahnu cán cuahá ná cachihin saha.

Joo ndá ná ná candeé ini mé a nachindahá i, na cán cúa ná ña a cácahan nuú, já nacachi tūhun Ndióxi.

## 10

<sup>1</sup>Cuni joho vaha ndó, ñani i, na cúa cuénta Jesús. Jáchi ndinuhu ini i xíca tähví i nu Ndióxi sahá ñayivi Israel ña ná candeé ini na Jesús já ná cuu jácacu Ndióxi na nuú cuachi na. <sup>2</sup>Mé a ndaa ná cahan i xihín ndo ña caja cahnu na Israel Ndióxi xihín ndinuhu ini na joo co cándaa caxí ini na ña cúní Ndióxi caja na. <sup>3</sup>Jáchi co xíni na ndaja caja Ndióxi ña ná nduu ndaa ñayivi nu mé

á sahá ña cán quéa ndúcú na nduu ndaa na nu mé á xihín ña caja mé va na. Ta co cúní na ndiquahva na mé ná ndáha Ndióxi ña ná caja na ña nasacu ini mé á caja na. <sup>4</sup>Co xíni na ña naquixi Jesucristo ta naxihí a sahá yo já najáxinu coo a caja ña cáchí ley ña ná nduu ndaa tóco ndihí na cández ini mé á.

<sup>5</sup> Sanahá ndivaha nacahyí Moisés sahá ñayivi, na cúní nduu ndaa nu Ndióxi xihín ley Moisés. Já cáchí a já: “Ndá na co cómí cuachi nu Ndióxi, na cán cuu nduu ndaa nu mé á ta jácagu a ná”, já nacahyí da. <sup>6</sup>Joo tá ná jácagu Ndióxi mí sahá ña cández iní mé á já quéa co xíní ñúhú cuhun yo indívü jánau í Jesucristo ña nuu a chindeé a mí jáchí sa nacaja mé á ña. <sup>7</sup>Ta co xíní ñúhú cuhun yo nu ndúu ínimá ndii ña ná ndiquehé Jesucristo tañu na sa naxihí jáchí mé Jesucristo sa nanditacu tucu a. <sup>8</sup>Co xíní ñúhú cuhun xícá nahá yo ndinducú yo Jesucristo jáchí iin yati ndivaha mé á nu yo jáchí iin a xohó. Ta mé tuhun cáhan nde yóho cútú á tuhun cahán sahá Jesucristo já ná cández ini ndó mé á. <sup>9</sup>Ta tá cachún ña cútú Jesús xitohún ta tá cándusún xihín ndinuhu ínimun ña najánditacu Ndióxi Jesús tañu na naxihí já quéa cuu cäcu ndaa ínimun. <sup>10</sup>Jáchí tá cández ini ñayivi Ndióxi xihín ndinuhu ini na já nduu ndaa na caja Ndióxi. Ta tá cahán na xihín java ga ñayivi ña cández ini na mé á já quéa cuu cäcu ndaa ínimá ná.

<sup>11</sup>Já cáchí tuhun Ndióxi já: “Ndá na ná cández ini Jesús a xínú toho quívi cahán na ña najándahvi Ndióxi na.” <sup>12</sup>In cútú tóco ndihí ñayivi nu Ndióxi. Tá quiahva jácagu Ndióxi na naquixi chíchi Israel quiahva já jácagu a na coo naquixi chíchi Israel. Jáchí sa mé Ndióxi cán cútú Ndióxi nu tóco ndihí ñayivi ta co ndáhví cútú ini a quiahva ñáha nuu na xícá tähví nu mé á. <sup>13</sup>Já cáchí tuhun Ndióxi: “Ndá na ná caca tähví nu Ndióxi ña ná chindeé a ña, na cán cäcu ndaa ínimá.” <sup>14</sup>Ta ndaja caja na caca tähví na nu Jesús tá ta cámari cández ini na mé á. Ta ndaja caja na cández ini na mé á tá a ñáha cuni joho na tuhun vaha cahán sahá Jesús. Ta ndaja caja na cuni joho na tuhun vaha sahá Jesús tá cámari cuhun in na caxí tuhun na ña nu ná. <sup>15</sup>Ta ndaja caja na cuhun na cahán na tuhun Ndióxi xihín ná tá ta co ín in na chindahá na cuhun na. Já cáchí tuhun Ndióxi já: “Ndaja níuchí chá tá xínú coo na ñéhe tuhun vaha sahá Ndióxi ña ná coo

vaha í xihín mé á.”

<sup>16</sup>Joo a juú ndihí ñayivi cándusa tuhun Ndióxi. Ña yóho cútú á tá quiahva nacachi Isaías: “Ndióxi, mé ndó cútú ndó xitohó nde. Chá cuití ñayivi cándusa tuhun nacahán nde xihín ná.” <sup>17</sup>Jáchí jihna ñúhú cahán na tuhun vaha sahá Jesucristo nuu ñayivi ta xihín ña xíní joho na cán jáxinu ini na xihín á. Andá jáví cásahá na cández ini na mé á ta caja na ña cúní a.

<sup>18</sup>Á sa naxini joho na tuhun vaha cahán sahá Jesús. Ajan. Sa naxini joho na ña. Jáchí já cáchí tuhun Ndióxi já:  
Nasahan na cahán na tuhun Ndióxi nuu ñayivi,  
ta níi cútú sahá ñuyíví naxinu tuhun cahán na, já cáchí tuhun Ndióxi.

<sup>19</sup>A nacandaa ini ñayivi Israel ña yóho. A-jan. Cándaa vaha ini ná ña. Jáchí já nacahyí Moisés sanahá:  
Ndióxi quéa nacachi a: Caja i ña ná candusa  
na tóho yehe já ná cahihví ini na Israel.  
Ta cojo ini na xihín na tóho sahá ña caja i  
ñá ná candusa mé na tóho cán yehe,  
nacachi tuhun Ndióxi.

<sup>20</sup>Xihín ña yóho nasahan ndee ini Isaías  
cahyí da ña nacachi Ndióxi tá nacachi a já:  
Mé na co ndínducú yehe, na cán cútú na  
nandiñéhé yehe.  
Ta najánhá i mí i nu ná vatí coó nandá-  
ca tuhun na sahá i, nacachi tuhun  
Ndióxi.

<sup>21</sup>Joo já nacachi Ndióxi sahá ñayivi Israel:  
“Níi tiempo cúní ndiquehe vaha i ñayivi  
Israel joo co cúní na quixi na nuu i jáchí sáá  
ini na ta co cúní na caja na ña cúní”, nacachi  
tuhun Ndióxi.

## 11

Caja Ndióxi ñamani xihín ñayivi Israel

<sup>1</sup>Ta viti ná ndaca tuhún i ndohó ña yóho:  
Á cahán ndo ña najándacoo ndáha Ndióxi  
ñayivi Israel. A juú ña ndaa cútú á jáchí sa  
mé yehe cútú y dà Israel, dà naquixi chíchi  
Abraham ta naquixi i chíchi Benjamín, dà  
nasacuu jahyi ñání jíco Abraham. <sup>2</sup>Janda  
mé sahá nacachi Ndióxi ña nacaxí mé á na  
Israel cacuu na cuénta mé á ta co cández a  
na viti. Sa xíní ndó ña nacachi tuhun Ndióxi  
sahá dà nasacuu profeta Elías. Mé dà yóho  
tá naxica tähví dà nu Ndióxi já najácojo  
da cuachí jatá na Israel. <sup>3</sup>Já nacachi da já:

“Cándehé ndo Ndióxi, xitoho i. Sa nasahní na profeta cuénta mé ndó ta nandicaní na nu náa ndó. Ta viti nú laá in tühún yehe cuití va cája ña sáhndá ndó. Ta ndúcú na cahní na yehe”, já nacachi Elías xihín Ndióxi. “Ta já nacachi Ndióxi xihín dá: “A juú in táláa yóhó cája ña cúní jáchí ndúu yii va usa mil taa cája ña cúní ta coó nacaxítí na nuú tiniñu yúu Baal”, nacachi Ndióxi xihín dá. <sup>5</sup> Quiahva já fín a viti. Ndúu chá na cája ña cúní Ndióxi jáchí nacaja Ndióxi ñamani xihín ná ta násacu ini a jácacu a na. <sup>6</sup> Nacaxi Ndióxi na jáchí ñatahví ini a sahá ná. Coó násacuu a sahá ña nacaja na jáchí tá ná cacuu a sahá ña cája na já coó cíuú ga ñamani Ndióxi ta ña yóho cíuú ña cúní Ndióxi caja.

<sup>7</sup> Na cán quéa cuahá ndivaha ñayivi Israel coó nanduu ndaaq ná nu Ndióxi sahá ña nacaja na jáchí nandaja táchí na ínimá ná. Joo na nacaxi Ndióxi, na cán cíuú na nanduu ndaaq nu mé á. <sup>8</sup> Já cachí tühun Ndióxi já: “Co cúní na candusa na Ndióxi sahá ña cán quéa nasañi Ndióxi xín túni ná chí in ndee. Ta quiyahva já ndáa na janda viti jáchí co cándaa ini na ña cáhan Ndióxi xihín ná.” <sup>9</sup> Já nacahí David sanahá:

Ná cahán na ña cuahán vaha na ichí Ndióxi  
sahá cuahá ñaha cómi na,  
ta ná ndoho ini na sahá cuachi cája na.  
<sup>10</sup> Ta ná cuáa na já ná a cúní ná,  
ta ná nditojo jata ná níi tiempo sahá ña vee  
ndójo na, nacachi David.

Jácacu Ndióxi na coó naquixi chichi Israel  
<sup>11</sup> Ta viti ná ndaca tühun i ndohó ña yóho:  
Á cahán ndo ña a cíuú cazu ndaa ínimá na Israel. A juú ña ndaa cíuú á. Jáchí vatí saáa ini na Israel ta vatí co cúní na candeé ini na Jesús joo xihín ña nacaja na yóho nanuná nuú na tóho cuni joño na tuhun vaha sahá Jesús ta já cuu cazu ndaa ínimá ná nu mé á. Ta sahá ña yóho casáhá na Israel cahihví ini na xihín na tóho. <sup>12</sup> Nacaja Ndióxi cuahá ñamani xihín tóco ndihí na tóho jáchí nacaja ña ná cuu ndihí na íchi cuénta mé a sahá ña najándaco na Israel íchi cuénta mé á. Joo cuahá chágá ñamani caja Ndióxi xihín tóco ndihí tá ná xínú quiivi ndiquehe na Israel íchi cuénta mé á.

<sup>13</sup> Joo fín in ñaha ña cúní cahán i xihín ndo, na tóho, Ndióxi quéa nachindahá yehe tañu ndohó, na coó naquixi chichi Israel ta chuun cahnu ndivaha quéa ndójo i xímí

i. <sup>14</sup> Jáchí ña cúní mí i quéa ná cahihví ini na Israel xihín ndo sahá tuhun Ndióxi ta já ná ndinducú mé ná Ndióxi já ná cazu ndaa ínimá na Israel nu Ndióxi jáchí mé ná cíuú ná chichi nuú naquixi mí i. <sup>15</sup> Nasacu xoo tóo Ndióxi na naquixi chichi Israel jáchí násacu ini a jándique tahan maní á tóco ndihí ñayivi ndúu ñuyíví xihín mé á. Ta tá ná xínú quiivi casáhá na Israel ndiquehe na tuhun Ndióxi caciuu a in ñaha ñúchí ndivaha. Caciuu a tátuhun casáhá nditacu tucu na jáchí viti cíuú na tátuhun na ñaxihí jáchí coó naxéen na ndiquehe na tuhun Ndióxi. <sup>16</sup> Abraham násacuu da cuénta Ndióxi ña cán quéa jahyi da, na nacacu chichi da cíuú ná ñayivi cuénta Ndióxi. Abraham, da cíuú cuénta mé a cíuú dá tátuhun yóho in yító olivo. Ta ñayivi nacacu chichi da cíuú na cuénta mé a ta cíuú na tátuhun ndáha mé yító olivo cán.

<sup>17</sup> Cíuú á tátuhun násahnda Ndióxi java ndáha, dó vaha ta nachitivi ndaa mé á ndáha yító olivo yúcú mé nuú násahin ndáha cán. Ta viti quiyahva dó ndee nu ndáha yító olivo yúcú cán ña ná catacu dó. Quiyahva já nacaja Ndióxi násacu xoo a na Israel ta nacaja mé a ñamani xihín mé ndó, na tóho já ná nduu ndó cuénta mé á. Ta viti cája Ndióxi cuahá ñamani xihín ndo tá quiyahva cája xihín na Israel. <sup>18</sup> Joo ndohó, na cíuú na tóho a cahán ndo ña vaha chágá mé ndó a juú ga na Israel. Co ndítahan cahán ndo já. Co cíuú ndo tátuhun yóho yító jáchí cíuú ndo tátuhun ndáha dó. Ta tá co yóho dá já quéa a cíuú catacu ndáha dó. Sahá ña cán quéa co ndítahan caja cahnu ndó mé ndó.

<sup>19</sup> A vaha cahvi ini ndó ña náhu chágá mé ndó nu Ndióxi a juú ga na Israel sahá ña násacu xoo mé a na Israel ta násuná a íchi nu ndohó candeé ini ndó mé á. <sup>20</sup> Cándehé ndó. Nasacu xoo Ndióxi na Israel sahá ña coó nacandeé ini na mé a ta nandacaxi a ndohó sahá ña candeé ini ndó mé a ña cán quéa co ndítahan caja cahnu ndó mé ndó. Ña ndítahan caja ndó quéa cayihví ndo Ndióxi. <sup>21</sup> Xíní ñúhú ndicuhun ini ndó ña cuu jácaxoo tucu Ndióxi ndohó. Coó ñatahvna ini a jándacoo xoo a na Israel, mé na nacaxi á. Sahá ña cán quéa cachí ga ví mé ndó, na tóho ndáa náha caja Ndióxi caciuu xoo tucu a ndohó. <sup>22</sup> Candehé ndo jáchí táchí ini Ndióxi sahá ñayivi tá candeé ini na mé a joo cuehe ndivaha mé a xihín na sáa

ini. Ña cán quéa tá co candeé ini ndó mé á ta ni co quíhvì ini ndó a já cacu xóo a ndohó tá quiáhva nacaja xihín na Israel.<sup>23</sup> Joo tá ná ndihvi na Israel íchì Ndióxi candeé ini na mé á já quéa ndiquehe tucu Ndióxi na jáchi cuu caja mé á tóco ndihí ñaha.<sup>24</sup> Nandiquehe Ndióxi ndohó vatí nasanduu xícá ndó nu á ta nandaja mé á ndohó cuénta mé á vatí cuú ndó na tóho. Mé ndó cuú ndó tátuhun ndáhá yító olivo, dó yúcú, dó nachitivi ndaa Ndióxi tóco dó vaha. Ta ña yóho quéa a cíu coo já, nduu. Joo nacaja Ndióxi já xihín ndo. Ta ndáa náha cuu caja tucu Ndióxi xihín na Israel ña ndiquehe tucu a na ta cacu tucu a na nu ndahá yító olivo, dó vaha nuú násandaa na jihna.

### Vaxi quívi tá candeé ini na Israel Jesùs

<sup>25</sup> Ñani mí i, na cuú cuénta Jesùs. Cúnì ña ná candaá ini ndó ña násacu ini Ndióxi caja chágá chí nuú já ná a cája cahnu ndó mé ndó. Cuahá na Israel nandaja táchí na ínima ná ta co cúnì na ndiquehe na tuhun Ndióxi. Joo tá sa nandiquehe ndihí na tóho, na násacu ini Ndióxi jácacu a anda jáví casáhá na Israel ndiquehe na tuhun Ndióxi.<sup>26</sup> Anda jáví cacu ndaa ínima ndihí na Israel. Ta já cächí tuhun Ndióxi sahá ña yóho: Ñuu Sión quixi in da jácacu ñayivi Israel, na naquixi chichí Jacob ná a cája ga na cuachí.

<sup>27</sup> Ta jándoó i cuachi nacaja na, tá quiáhva nacachi i xihín na caja i, cächí Ndióxi.

<sup>28</sup> Tiempo viti cuahá ndivaha na Israel co cúnì na tuhun vaha sahá Jesùs sahá ña cán quéa co cúnì na Ndióxi. Joo cája na ña yóho ña ná nuñá nu ndohó, na tóho já ná cuu candeé ini ndó Ndióxi. Vatí cája na Israel ña yóho joo quíhvì ini tá quíhvì ini Ndióxi na sahá tuhun nasahan nu tásáhnu jíco na.

<sup>29</sup> Tá sahan Ndióxi ña cächí a quiáhva nu yo já quéa co ndímaní mé á nuú tuhun a ta co ndicó coo a candaá ña sahan nu yo. Ta ni co ndicó coo ini a tá sa nandacaxi a mí.<sup>30</sup> Sáá násahiín ini ndohó, na tóho sáhaná joo viti nacaja mé á cuahá ñamani xihín ndó sahá ña sáá ini na Israel.<sup>31</sup> Ta vatí sáá ini na Israel viti joo xihín ña yóho núná nu ndohó, na tóho ndiquehe ndó ñamani Ndióxi. Joo vaxi quívi tá tahví ini Ndióxi sahá na Israel tá quiáhva nátahvì ini a sahá ndohó, na tóho.

<sup>32</sup> Nachicají Ndióxi xímí túni na Israel xihín na tóho ña ná nduu na na sáá ini. Nacaja

Ndióxi ña yóho já ná cuu tahví in nuú ini a sahá tóco ndihí ñayivi.

<sup>33</sup> Cáhnu ndivaha cuú tóco ndihí ñaha Ndióxi. Ndichí ndivaha jiní mé á ta candaá ini a tóco ndihí ñaha. Ni in ñayivi a cuú ndicani na ña cahvi ini Ndióxi. Ta ní in na a cuú candaá ini ña cája Ndióxi.<sup>34</sup> Já cächí tuhun Ndióxi já: "Ni in ñayivi a cuú candaá ini na ña cahvi ini Ndióxi. Ta ní in ñayivi a cuú jácahan na mé á caja ña ndítahan caja.<sup>35</sup> Coó ñayivi cája ñamani xihín Ndióxi ña ná ndaca na ña nu mé á", cächí tuhun Ndióxi.<sup>36</sup> Jächí Ndióxi quéa nacavaha tóco ndihí ñaha ta ndúu a sahá mé á ta ndúu a cuénta mé á. Anda ama cáá quiví ná caja cahnu í Ndióxi. Já ná coo.

## 12

### Tácú yo caja chúun í cuénta Ndióxi

<sup>1</sup> Natáhvì ini Ndióxi sahá ndó, ñani mí i, na cuú cuénta Jesùs. Sahá ña cán quéa xíca tahví i nu ndó ña ná ndiquiahva ndó mé ndó ndáhá Ndióxi já ná cacu a tátuhun joco ndó mé ndó nu Ndióxi. Ta caja ndó tóco ndihí ña cúnì Ndióxi caja ndó ña ná cají ini a. Jächí xihín ña yóho náha ña mé a ndaa táchí cája cahnu ndó Ndióxi ta ña yóho cuú á ña ndítahan nu ndó caja ndó.<sup>2</sup> A cája ga ndó ña nuú ña cája ñayivi ñuyíví. Quiáhva ndó ñamani nu Ndióxi ña ná ndaja víi a xímí túni ndo. Anda jáví candaá ini ndó ña cúnì mé á caja ndó. Ta xihín ña yóho cuu caja ndó ña vaha ta cuu caja vatá ndó ini mé á ta cuu caja ndó ña cúnì mé á xihín ndinuhi ini ndó.

<sup>3</sup> Nacaja Ndióxi ñamani xihín i tá nacaxi a yehe. Ña cán quéa cahán i xihín ndihí ndó ña co ndítahan cahán ndo ña cuú ndó na náhu ndivaha joo ná cahvi ini ndó ña ndaa sahá mé a ndó. Ña ndítahan caja ndó quéa coto ndojó ndo mé ndó jächí násacu ini Ndióxi ña ná candeé ini ndó mé á já ná cuu caja ndó ña cúnì a.<sup>4</sup> Candehé ndo tá quiáhva fin yiquí cuñu í. In tálhún cuú yiquí cuñu í joo cuahá nuú ñaha ndáca ta sa jím sa jím chuun cája in in ña ndáca yiquí cuñu í.<sup>5</sup> Quiáhva já fin tóco ndihí, na cuú cuénta Jesùs. Sa jím sa jím chuun cája in in í joo in va cuú yo xihín Jesucristo. Ta sa jím sa jím chuun cája in in í.

<sup>6</sup> Sa jím sa jím chuun násahan Ndióxi nuú in in í caja í ta mé á násacu ini a ndá chuun quéa quiáhva nuú in in í. Sahá ña cán quéa

tá nasaḥan Ndióxi chuun nu ndó jáyaha ndó tūhun mé á nuú ñayivi, caja ndó ña xihín ndéé mé á jáchí cández ini ndó a.<sup>7</sup> Ta tá nasaḥan Ndióxi chuun nu ndó ña ná chindeé ndó ñayivi já quéa ndítahan nu ndó chindeé vaha ndó na. Ta tá nasaḥan Ndióxi chuun nu ndó jánaha ndó ñayivi já quéa ndítahan nu ndó jánaha vaha ndó na.<sup>8</sup> Tá tā nasaču Ndióxi ini ínima ndó quiáhva ndó tūhun ndeé ini na, caja ndó ña xihín ndinuhu ini ndó. Ta ndá ñaha jásá ndó nuú ñayivi xíní ñúhú cajii ini ndó jásá ndó ña. Ta ndá ndó ndójo chuun xíní ñúhú coo cuéntá vaha ndó xihín chuun ndójo ndó. Ta ndá ndó cátóó chindeé ñayivi ná cajii ini ndó chindeé ndó na.

### Ña ndítahan caja ná cíu cuéntá Jesús

<sup>9</sup> Xihín ndinuhu ini ndó quiáhvi ini tāhan ndó. Candaíj ndó ña núu ta caja ndó ña vaha xihín ndinuhu ini ndó. <sup>10</sup> Xíní ñúhú quiáhvi ini ndó ná cíu cuéntá Jesús jáchí cíu ná tátuhun ná vehe ndó ta cajii ini ndó tā caja cahnu tāhan ndó.

<sup>11</sup> Nducú ndeé ndó ta a cárku ndó ná jusá ta xihín ndinuhu ini ndó caja chūun ndó cuéntá Ndióxi, xitohó í.

<sup>12</sup> Xíní ñúhú cajii ini ndó candatí ndó xínu coo tūhun nasaḥan Ndióxi nu ndó. Quiáhva ndeé vaha ini ndó tā ndóho ini ndó ta a jándacoo ndó ña caca tāhví ndó nu Ndióxi.

<sup>13</sup> Ndá ñaha ndímäni nuú java ga ná cíu cuéntá Jesús ná chindeé ndó na. Ta ndiquehe vaha ndó ñayivi xíto nihni ndohó.

<sup>14</sup> Caca tāhví ndó nu Ndióxi sahá ná caja xíxi xihín ndó ña ná caja Ndióxi ñämäni xihín ná. Caca tāhví ndó nu Ndióxi sahá ná ta a chícaqan ndó cháhan jaṭa ná.

<sup>15</sup> Caiii ini ndó xihín ná cajii ini ta cuacu ndó xihín ná sácu.

<sup>16</sup> In nuú quiáhvi ini tāhan ndó. A caja ichi ini ndó. Ña ndítahan caja ndó quéa jánuu ndáha ndó mé ndó xihín ñayivi ndáhví, ná coo ndíneeh jíco mé. Ta a cahnu ndó ña cíu ndó ná ndíchí ndivaha.

<sup>17</sup> Tá caja núu na xihín ndó, a ndíco coo ndó caja ndó ña núu xihín ná. Joo nducú ndó quiáhva caja ndó ña vaha já ná a cahnu núu ñayivi sahá ndo. <sup>18</sup> A ndícu ndó cani tāhan ndó xihín ñayivi ta ndíhi ini ndó coo vaha ndó xihín ndíhi na. <sup>19</sup> Ñani mí i, ná cíu cuéntá Jesús. Tá caja xíxi na xihín ndó a ndícu ñehe toho ndó ña núu nu

ná jáchí cojo ini Ndióxi xihín ná caja já ta ndítahan nu mé á jándoho a ini na. Já cachí tūhun Ndióxi: “Yehé ndítahan nuú jándoho i ini ñayivi, ná caja ña núu”, cachí Ndióxi. <sup>20</sup> Vaha chágá ná caja ndó ña cachí tūhun Ndióxi: “Tá cuíco ñayivi, ná co cúní ndohó quiáhva ndó ná cuxu na. Ta tá ichi ini ná co cúní ndohó quiáhva ndó tíciúi nu ná cohona. Tá ná caja ndó ña yóho já quéa cacahan nuú ná cán sahá ña núu caja na xihín ndó.” <sup>21</sup> A quiáhva ndó ñämäni quee vaha ña quini xihín ndó. Ña ndítahan caja ndó quéa caja ndó ña vaha já ná cuu quee vaha ndó cahnu ndó ña quini.

## 13

<sup>1</sup> Xíní ñúhú coo joho ndó nuú ña cahna ná jutixia xihín ndo. Jáchí sahan Ndióxi ñämäni nuú ná cán cahnda na chuun nuú ñayivi. Ta mé Ndióxi quéa nasaču a ná.

<sup>2</sup> Ta ndá ná co cúní cuni joho nu sáhndá ná jutixia cíu ná na sají nuu nu Ndióxi jáchí Ndióxi quéa nasaču a ná cán. Ta ndá ná co cúní caja ña sáhndá ná ndoho ini na. <sup>3</sup> Jáchí coo nasaču Ndióxi ná jutixia ña ná jayihví ná ñayivi, ná caja ña vaha. Nasacu Ndióxi ná ná jayihví ná ñayivi, ná caja ña núu. Tá co cúní ndó cayihví ndó ná jutixia xíní ñúhú caja ndó ña vaha já ná cajii ini ná jutixia xihín ndo. <sup>4</sup> Nasacu Ndióxi ná jutixia ña ná chindeé ná ndohó. Joo tá caja ndó ña núu já quéa xíní ñúhú cayihví ndó ná jáchí mé ná cán cahnda na chuun ña ná chahvi ndó sahá ña núu caja ndó. Sahá ña cán nasaču Ndióxi ná ná ná jándoho na ini ná caja ña núu. <sup>5</sup> Ña cán quéa ndítahan nu ndó caja ndó ña sáhndá ná jutixia já ná a jándoho na ini ndó jáchí sa náhá mé va xíní túni yo cahna xohó ña xíní ñúhú candusa í ña sáhndá ná jutixia nu yo. <sup>6</sup> Sahá ña cán quéa chahvi ndó jiuhún cuéntá impuesto jáchí sa xíní ndó ña ndítahan nu ndó chahvi ndó ña. Ná jutixia caja chūun na cuéntá Ndióxi tá caja na ña xihín ndinuhu ini na.

<sup>7</sup> Ndiquiahva ndó nuú ñayivi ña ndítahan nu ná ndiquehe na. Chahvi ndó impuesto nuú ná játaca ña. Caja cahnu ndó ñayivi, ná ndítahan caja cahnu ndó ta coo toní ñúhú ndó xihín ná ndítahan coo toní ñúhú ndó xihín. <sup>8</sup> A cayicá ndó ñaha nuú ní in ñayivi. Ña ndíycá ndó quéa quiáhvi ini tāhan ndó. Jáchí ndá ná quiáhvi ini ñayivi, ná cán cíu ná caja ña sáhndá ley Moisés. <sup>9</sup> Jáchí tá quiáhvi

ini ndó ñani táhan ndó já quéa a ndiává ini ndó caja ndó ña núu xihín na. Ta a cahví ini ndó coo ndó xihín ñajíhlí ñani táhan ndó. Ta a cahní ndó ndíji. Ta a cahví ini ndó caja cuíhná ndó ñaha inga na. Ta ni a ndiává ini ndó cacomí ndó ñaha cómí inga na. Tá quíhlví ini ndó ñani táhan ndó já quéa cúní cachi a ña cája ndó ña sáhndá ley Moisés tá cahchí a já: "Quíhlví ini ndó ñani táhan ndó tá quiáhva quíhlví ini ndó mé ndó." <sup>10</sup> Ndá na quíhlví ini ñani táhan, na cán cútú na cája vaha xihín ñani táhan na. Ña cán quéa tá quíhlví ini ñani táhan í já quéa jáxínu yó núu ña sáhndá ley Moisés.

<sup>11</sup> Sáhá tóco ndíhi ña cahán i xihín ndo yóho xímí ñúhú candehé ndo ndá quiáhva cúa tiempo ndúu viti. Xímí ñúhú ndicáxí vaha ini ndó caja ndó ña cúní Ndióxi jáchí viti sa nacayati chágá quíví jácacu Ndióxi mí a juú ga tá jacá nacandusa í tuhun Ndióxi. <sup>12</sup> Cútú á tátuhun ja chá cúní yaha ñuu ta casahá tivi yaa. Ña yóho cúní cachi a ña sa nacayati quíví quixí tucu Jesucristo. Ña cán quéa xímí ñúhú jándacoo í ña núu cája í tátuhun cája ñayivi xíca nuu naá. Ta xímí ñúhú caja í ña vaha já quéa quee vaha í xihín ña núu. <sup>13</sup> Ndsáhnu ná coo iní caja í tóco ndíhi ñaha tátuhun cútú yó na ndúu nu yéhe. A cárkuu ñayivi xíhi ta ni a cája í vicó lända ndiváha. Ta ni a cáca nuu jii yó xihín ñajíhlí ñani táhan í ta a ndiává ini coo í xihín ñajíhlí. Ta a ndúcú yó cani táhan í xihín ñani táhan í ta ni a cahíhlví iní xihín ná. <sup>14</sup> Ña ndítahan caja í quéa caca chágá yo ndée yo nu Jesucristo, xitoho í já ná cacuu a tátuhun candixí in jahmá caa ña sándixi da cání táhan. Ta coto a quiáhva ndó ñamani nuu yiquí cuñu ndó caja ña núu.

## 14

### *Co ndítahan candehé ndaa táhan í*

<sup>1</sup> Ndiáquehe vaha ndó na cútú cuéntá Jesús vatí co cándaa vaha ini na ña jánahá tuhun Ndióxi. Ta a cání táhan yúhú ndó xihín na sahá ña cándusa na. <sup>2</sup> In java na cútú cuéntá Jesús cahán na ña cuu cuxu na cuñu, ña najoco na nuu yoco. Joo java na cútú cuéntá Jesús, na saá xihín tuhun Ndióxi cahán na ña a cútú toho cuxu na cuñu, ña najoco na nuu yoco sahá ña cán quéa co xíxi na ña. <sup>3</sup> Na xíxi mé cuñu cán co ndítahan nuu ná candehé ndaa na na co xíxi ña ta na co xíxi cuñu cán co ndítahan nuu ná candehé

ndaa na na xíxi ña. Jáchí ndíquehe vaha Ndióxi ndíví na cán vatí sa jíin cahán na. <sup>4</sup> Ta quiáhva já co ndítahan nuu ndó candehé ndaa ndó mozo ñani táhan ndó á cája vaha da á co cája vaha da nuu xitoho da. Vaha ri caja vaha da tá vaha ri co cája vaha da jáchí mé va xitoho da cán xímí sahá ña cán. Joo cuu caja Ndióxi ña ná candoq vaha mozo cán nuu xitoho da.

<sup>5</sup> Java ñayivi cahchí na ña íin quíví náhnu chágá nuu java ga quíví. Ta java na cahchí na ña in cútú tóco ndíhi quíví. Ta ndítahan nuu in na caxi na ña cahví ini na sahá ña yóho. <sup>6</sup> Tá sácu ini na caxi na in quíví caja cahnu na Ndióxi ta vaha va cája na. Ta tá cahán na cuu caja cahnu na Ndióxi ndá quíví nacuu va ta vaha ri já va. Ta vatí xíxi na cuñu, ña sa najoco na nuu yoco á co xíxi toho na ña joo ndíquiahva na ndixáhvi nu Ndióxi sahá ta xihín ña yóho cája cahnu na mé á.

<sup>7</sup> Ni in yó co tácú sahá mí ta ni in yó co xíhi sahá mí. <sup>8</sup> Ta tá tácú yo á tá naxíhlí yo mé a ndaa cútú yó na cómí Ndióxi cuéntá sahá ta cútú mé á xitoho í. <sup>9</sup> Sáhá ña cán quéa naxíhlí Jesucristo ta nanditacu tucu a já nanduu a xitoho ñayivi, na tácú xihín na sa naxíhlí.

<sup>10</sup> Ña cán quéa a vaha toho cája ndó tá sádhehé ndaa ndó ñani táhan ndó. <sup>A</sup> Váha caja ndó candají ndó na jáchí vaxí quíví ndique táhan ndíhlí candita í nu Ndióxi ña caja vií a sahá yo. <sup>11</sup> Jáchí já cahchí tuhun Ndióxi já:

Yóho ín i cahchí i xihín ndo ña xínu quíví ndica xítí tóco ndíhi ñayivi nuu i, ta casahá na caja cahnu na yehe, ña cútú Ndióxi, cahchí Ndióxi, xitoho í.

<sup>12</sup> Jáchí ndítahan nuu in in í ndíquiahva í cuéntá sahá ña nacaja í nu Ndióxi.

*A cája ndó ñaha ña cuu jándicava ñayivi nuu cuachi*

<sup>13</sup> Sáhá ña cán quéa co ndítahan candehé ndaa táhan í. A cárkuu ini ndó caja ndó ñaha, ña cuu jándacava na cútú cuéntá Jesús nuu cuachi ta já ná jándacoo na ña cández iní na Ndióxi. <sup>14</sup> Sáhá ña cández iní i Jesús, xitoho i sahá ña cán quéa cándaa vaha iní i ña co cája i cuachi tá xíxi i ña najoco na nuu yoco. Joo tá ndúu na cahán ña a váha toho cuxu na ña já quéa co ndítahan cuxu na ña jáchí cuu candoq na cuachi sahá tá ná cuxu na ña. <sup>15</sup> Joo tá ndíhlíhlví ñanún, na cútú cuéntá Jesús sahá ñaha xísún já quéa cúní cachi a ña cández iní na. Cuéntá coún ná a

cájún ñä ndicava na cán nuú cuachi sahá ñä xísún jáchí cíu ná na naxihí Jesucristo saha.<sup>16</sup> Vatí cándaa ini ndó ñä cuu cuxu ndó ñä najoro ná nuú yoco joo a cíxu toho ndó ñä tá ná cahan níu ñayivi sahá ñä cája ndó.<sup>17</sup> Jáchí a juú sahá ñä xíxi ni sahá ñä xíhi comí Ndióxi cuénta sahá yo. Ñä cíni Ndióxi caja í quéa ná canduu ndaa yo nü mé á ta ná coo vaha iní xihín ñayivi ta ná cajii iní. Tóco ndihi ñä yóho cíu á ñä quixi nu íníma yiji Ndióxi.<sup>18</sup> Tá ná caja ndó ñä yóho já quéa caja cáhnu ndó Jesucristo ta cajii iní Ndióxi caja ndó ta candoo vaha ndó nuú ñayivi.

<sup>19</sup> Na cán quéa xíni ñuhú ndinducú yo tóco ndihi ñaha, ñä cuu candaca mí canduu táji yo xihín ñani táhan í ta já ná cuu jácuahnu táhan í xihín ñaha Ndióxi.<sup>20</sup> Nasacu ini Ndióxi jácacu a ñayivi sahá ñä cán quéa coto a cají nuu ndó nuú ñä cíni Ndióxi caja sahá ñaha xíxi ndó. Mé a ndaa tóco ndihi ñaha cíu á ñä vaha cuxú. Ñä coo vaha quéa jándacava í ñayivi nuú cuachi sahá ñä xíxi.<sup>21</sup> Vaha chágaa ná a cíxu ndó cuñu ta ni a cóho ndó vino ta ni a caja ndó inga ñaha ñä cuu jándacava ñani táhan ndó nuú cuachi.<sup>22</sup> Tá tå cándaa caxí ini ndó ñä coo caja ndó cuachi nu Ndióxi, a ndicani ndó ñä nuú java ga ñayivi. Jáchí tähví nacuu ñayivi tá xíni na coo caja na cuachi nu Ndióxi.<sup>23</sup> Joo ndá na ndúcú cuxu in ñaha ta cahvi ivi joho ini na xihín á tá xíxi na ñä já quéa xíni cuachi jata ná. Jáchí ndá ñaha nacuu ná caja í ta tá tå cándusa yó ñä cíu á cuachi já quéa xíni a cacuu a cuachi nu yo.

## 15

### Chindeé ndó na cahvi ivi joho ini

<sup>1</sup> Tá ndacú cuahán yó xihín tuhun Ndióxi já quéa coo ndítahan cacu xóo í na vitá xihín tuhun Ndióxi. A ndúcú ndó caja ndó ñä jándivaha ini mé cuití va ndó.<sup>2</sup> Tóco ndihí xíni ñuhú caja í ñaha ñä táhan ini ñani táhan í xihín. Ta xíni ñuhú caja í ñä já ná chindeé yó na ñä ná canduu vaha na ta já ná cuu cuahnu chágaa na xihín tuhun Ndióxi.<sup>3</sup> Jáchí mé Jesucristo coo nanducú a caja ñä táhan ini mé cuití a. Ñä nacaja mé á quéa nájáxinu coo a nuú tuhun Ndióxi tá nacachi a já: “Tuhun níu ñä nájávana na nu mé ndó naxinu ri a jatá yehe viti.”<sup>4</sup> Tóco ndihi ñä nacahyi nuú tuhun Ndióxi sáhaná

nacahyi a já ná jánaha nu yo ñä coo ndítahan ndicami iní. Ta, náha ñä ndítahan quiahva tuhun ndee iní nani ndátí jaxing Ndióxi tuhun náshahan nu yo.<sup>5</sup> Ndióxi quéa sáhan ndee nu yo ñä ná coo cáhnu iní ta sa mé á sáhan tuhun ndee iní. Ñä cíni Ndióxi quéa chindeé a ndohó caja ndó tá quiahva nacaja Jesucristo ta já in ná nduu xihín táhan ndó.<sup>6</sup> Ta já in ná jándique táhan ndihí caja cáhnu í Ndióxi, mé a cíu tátá Jesucristo, xitoho í.

Xíni joho na coo naquixi chichi Israel tuhun vaha sahá Jesús

<sup>7</sup> Ndiquehe vaha ndó tóco ndihi na cíu cuénta Jesús tá quiahva nandiquehe vaha Jesucristo ndohó já ná ndicahnu Ndióxi.<sup>8</sup> Ndítahan ndicuhun ini ndó ñä naquixi Jesucristo chindeé a ñayivi Israel. Ta naquixi a jánaha nu ná ñä mé a ndaa táhyí jájinu coo Ndióxi tóco ndihi nuú tuhun ñä náshahan nuú tásahnu jíco yo jáchí coo ndimani Ndióxi nuú tuhun a.<sup>9</sup> Ta naquixi a jácacu a ñayivi, na coo naquixi chichi Israel ñä ná caja cáhnu na mé á sahá námaní nacaja mé a xihín ná. Jáchí já cachí tuhun Ndióxi:

Yehe xihín na coo naquixi chichi Israel caja cáhnu nde ndohó, Ndióxi,  
ta yehe cata i nu ndo caja cáhnu i quivi ndo.<sup>10</sup> Ta ín inga tucu nu cachí a já:  
Ndohó, na coo naquixi chichi Israel xíní  
ñuhú ndique táhan ndó cajii ini ndó  
xihín na naquixi chichi Israel.

<sup>11</sup> Anda já nacachi tucu a já:  
Tóco ndihi ndó, na coo naquixi chichi Israel  
caja cáhnu ndó Ndióxi, xitoho í,  
ta ná a jándacoo toho ndihí ñayivi caja  
cáhnu na Ndióxi.

<sup>12</sup> Tá nacahyí Isaías nuú tuhun Ndióxi já nacahyí dä tuhun yóho:

Vaxi quivi cacu in da chichi Isaí,  
ñä ná cacomí da cuénta sahá ñayivi, na coo  
naquixi chichi Israel.

Ta mé ñayivi yóho candeé ini na mé dä  
quivi chichi Isaí cán.

<sup>13</sup> Ndióxi quéa caja ñä ná candeé ini ndó  
mé á ta já cuu jácacu a ndohó. Ná caja mé  
á ñä ná ndicatu ini ndó xihín ñä cajii ini  
ndó ta ná caja mé á ñä ná coo vaha ini ndó  
jáchí candeé ini ndó a. Xihín ndee íníma yiji  
Ndióxi ná quiahva mé á cuaha ndee nu ndó  
candeé chágaa ini ndó a.

<sup>14</sup> Cándezé ndó ñani i, na cíu cuénta  
Jesús. Sa xíni vaha i ñä nachutu ndo xihín  
ñä vaha ta cándaa vaha ini ndó tuhun

Ndióxi. Ta xihín ña jan cuu jánahá táhan ndó. <sup>15</sup> Joo tá nacahyí i carta yóho nu ndo já nacaja ndee ini i cahyí i saha java ñaha jáchi co cúni ña ná ndindójó ndo ña. Cahyí i ña yóho jáchi nacaja Ndióxi ñamani xihín i <sup>16</sup> cája chúun i cuéntá Jesucristo cáxi tuhun i tuhun vaha saha mé á nuú ñayivi, na coó naquixi chichi Israel. Ta cuú u tátuhun jytu jáchi xica i cahán i tuhun Ndióxi xihín ná já ná cuu cacu ndaa ínimá ná. Cúu á tátuhun joco i na nu Ndióxi já ná cajii ini mé á xihín ná ta já ná cuu ndaja ínimá yii mé á ña ná nduu na ñayivi víi nu mé á.

<sup>17</sup> Ta sahá ña cándusa i Jesucristo sahá ña cán quéa ndiváha ini i caja chúun i cuéntá Ndióxi. <sup>18</sup> Jáchí sáhan ndee ini i cahán i sahá ña nacaja Jesucristo tá nacaja chúun mé á yehe ña candaca i na coó naquixi chichi Israel ña ná caja na ña cúni Ndióxi. Ta sahá ña nacahán i xihín ná cán já naxini joho na ta nacaja na ña cachí tuhun Ndióxi. <sup>19</sup> Ta sa naxini na ña xituhún xihín ña náhuu ndiváha nacaja i nuú ná xihín ndee ínimá yii Ndióxi. Ta quiahva já nacaxi tuhun i tuhun vaha saha Jesucristo nuú ñayivi ndúu ñuu Jerusalén xihín nu tocó ndhi na ndúu ndijáa ñuu anda estado Ilírico. <sup>20</sup> Ña ndúcú u caja i quéa cahán i xihín ñayivi ña cúni Ndióxi jácacu a na. Ta sa cahán i ña yóho nuú ñayivi, na a ñáha cuni joho saha Jesucristo jáchi co cúni ndiquehe e chuuñ ña sa nájácava sáhá inga na. <sup>21</sup> Cáhi ini i ña vaha chágá ná cuhun i nuú ñayivi, na coó naxini joho tuhun vaha saha Jesú jáchi já cachí tuhun Ndióxi já:

Vatí coó naxini joho na tuhun vaha saha mé á joo vaxi quivi xinu coo na cahán xihín ná,  
ñá ná cándaa ini na ña coó nacandaa ini na jihna, cachí tuhun Ndióxi.

Sácu ini Pablo cuhun da ñuu Roma

<sup>22</sup> Ta sahá chuun caja i yóho coó nacuu saa i coto nihni i ndohó vatí sa cuahá tañu násacu ini i saa i jan. <sup>23</sup> Joo viti sa nájándihi i chuun nacaja i tañu ñayivi ndúu yóho. Ta sa cahvi ini i saa i coto nihni i ndohó anda sanahá. <sup>24</sup> Sahá ña cán quéa sácu ini i saa i coto nihni i ndohó tá ná yaha i cuhun i chí España. Ta tá ná ndhi cajii ini i cuni i ndohó anda jáví ndiquehe tucu u íchi cuhun i. Joo cúni ña ná chindee ndó yehe já ná cuu ndiquehe tucu u íchi cuhun i. <sup>25</sup> Joo viti cuhun i chí ñuu Jerusalén chindee

na cuú cuéntá Jesú ndúu cán. <sup>26</sup> Jáchí na cuú cuéntá Jesú ndúu estado Macedonia xihín na ndúu estado Acaya násacu ini na játaca na jiuhún ta chíndahá na ña nuú na cuú cuéntá Jesú, na cándahví ndúu ñuu Jerusalén. <sup>27</sup> Mé na tóho yóho násacu ini na caja na ña ta vaha cája na jáchi cahán na ña ndítahan nu ná chahvi na sahá ña nacaja na Israel, mé na cuú cuéntá Jesú ndúu ñuu Jerusalén xihín ná. Jáchí násahán na Israel nacaxi tuhun na tuhun vaha saha Jesú nu ná. Ta viti ndúcú ñehe na tóho yóho ñamani nacaja na Israel xihín ná. Ña cán quéa chíndee ñahá na toho xihín ña cómí na. <sup>28</sup> Ta tá sa nájándihi i caja i chuuñ yóho ta tá sa nándihi ndiquighva i jiuhún náta ca na tóho nuú na cuú cuéntá Jesú ndúu ñuu Jerusalén anda já nuná nuú i cuhun i España ta já yaha i jan coto nihni i ndohó. <sup>29</sup> Ta xini vaha i ña tá ná saa i jan caja Jesucristo cuahá ñamani xihín ndo sahá tuhun vaha cahán i xihín ndo.

<sup>30</sup> Xica tahví i nu ndo ñani mí i, na cuú cuéntá Jesú, ña in nuú ná caca tahví yo nu Ndióxi sahá chuun caja i. Jáchí candeé ini ndó Jesucristo ta quíhví ini ndo yehe nacaja ínimá yii Ndióxi. <sup>31</sup> Caca tahví ndo nu á ña ná chindee a yehe ná a caja ñayivi, na co cándusa Ndióxi ndúu estado Judea ni in ñáha xihín i. Ta caca tahví ndo nu Ndióxi ña ná cándusa na cuú cuéntá Jesú ndúu ñuu Jerusalén cán ndiquehe vaha na jiuhún ñehe cuahán i nu ná. <sup>32</sup> Já quéa tá ná cúni Ndióxi já cajii ini i saa i coto nihni i ndohó ta ndiquehe ndee e nani xito nihni i ndohó. <sup>33</sup> Ndióxi ná coo xihín ndo ta ná caja mé á ña ná coo vaha ini ndó. Já ná coo.

## 16

Chíndahá Pablo Ndióxi coo na ndúu ñuu Roma

<sup>1</sup> Ja chá va casaa ñá naní Febe, ñá cuú cuéntá Jesú nu ndo. Mé Febe yóho nacaja chuuñ ñá veñhu Cencrea. <sup>2</sup> Caja ndó ñamani ndiquehe vaha ndó ña sahá ña cuú ñá cuéntá Jesú, xitoho í ta já ndítahan caja na candeé ini Jesú. Chindee ndó ñá yóho xihín ndhi ñáha ña cámaji nu ña jáchi nachindee ña cuahá ndiváha ñayivi ta nachindee ri ñá yehe va.

<sup>3</sup> Chíndahá i Ndióxi coo Priscila xihín Aquila jáchi in cuú ná xihín i caja chuuñ na cuéntá Jesucristo. <sup>4</sup> Mé na yóho násahin tiähva na quivi na já ná cuu cacu yehe tá

naquixi tondóhó nuú i. Ta a juú in túhún yehe ndíquiahva ndixahvi nu ná vaha. Tóco ndihi na cíu cuénta Jesús, na coó naquixi chichi Israel ndíquiahva na ndixahvi nu ná. <sup>5</sup> Ta jári chíndahá i Ndióxi coo na cíu cuénta Jesús, na ndíque táchan vehe Priscila xihín Aquila. Ta cahan Ndióxi ndó xihín Epeneto jáchi quíhvi ndivaha ini i da. Mé dá násacuú da nu cuítí nandihvi íchi cuénta Jesús estado Acaya. <sup>6</sup> Ta cahan Ndióxi ndó xihín María, ná chíndeé cuahá ndohó. <sup>7</sup> Ta chíndahá i Ndióxi coo Andrónico xihín Junias. Ndíví da yóho cíu dá da naquixi chichi nuú naquixi mí i. Ta in nasañhuu nde vecaa xihín dá. Ta cíu dá náhnú tañu na apóstol. Ta jihna ñúhú ndíví mé da yóho nacásahá cándusa da Jesucristo a juú ga yehe.

<sup>8</sup> Ta cahan Ndióxi ndó xihín Amplias jáchi quíhvi ndivaha ini i da. Ta in cíu nde cuénta Jesús. <sup>9</sup> Ta chíndahá i Ndióxi coo Urbano. In cíu mé da xihín nde caja chúun da xihín nde cuénta Jesucristo. Ta chíndahá i Ndióxi coo Estaquis, da quíhvi ndivaha ini i. <sup>10</sup> Ta chíndahá i Ndióxi coo Apeles jáchi cuahá tañu najánaha da nuú ñayivi ná mé a ndaa táhyí cándezé cahnu ini da Jesucristo. Ta quiahva já chíndahá i Ndióxi coo na vehe Aristóbulo. <sup>11</sup> Ta cahan Ndióxi ndó xihín Herodión jáchi in naquixi nde chichi Israel. Ta cahan Ndióxi ndó xihín na vehe Narciso jáchi cándusa na Jesús, xitoho í. <sup>12</sup> Ta cahan Ndióxi ndó xihín Trifena ta xihín Trifosa, na caja chúun cuénta Jesucristo, xitoho í. Ta cahan Ndióxi ndó xihín Pérsida, jáchi quíhvi ndivaha ini i ná ta cuahá ndivaha nácaja chúun ná cuénta Jesucristo, xitoho í.

<sup>13</sup> Ta cahan Ndióxi ndó xihín Rufo jáchi cíu dá da cahnu ndivaha tañu na cíu cuénta Jesús. Ta cahan Ndióxi ndó xihín náná da jáchi cíu ná tátuhun náná mí i viti. <sup>14</sup> Ta chíndahá i Ndióxi coo Asíncrito xihín Flegonte xihín Hermas xihín Patrobas xihín Hermes. Ta chíndahá i Ndióxi coo tóco ndihi na cíu cuénta Jesús ndúu xihín na cán. <sup>15</sup> Ta cahan Ndióxi ndó xihín Filólogo xihín Julia xihín Neroa ta xihín quíahva da. Ta cahan Ndióxi ndó xihín Olimpas ta xihín tóco ndihi na cíu cuénta Jesús ndúu xihín na cán.

<sup>16</sup> Ná cíni quéa ná cahan Ndióxi xihín táchan ndó ta ná tatí yúhu táchan ndó ta yii caja ndó ná. Tóco ndihi na cíu cuénta Jesús, na táchan veñhu yóho chíndahá na Ndióxi coo ndihi ndó.

<sup>17</sup> Cándezé ndó nani mí i, na cíu cuénta Jesús. Xíca táchví i nu ndó ná coo cuénta ndó xihín na cátóó ndicahnda ñayivi, na cíu cuénta Jesús jáchi sájí nuu na nyú na caja ná cúní Ndióxi. Ná caja na jan quéa caxoo na nuú ná najánaha nde nu ndó. Coto a cátáhan ndó xihín ná. <sup>18</sup> Jáchi mé na yóho co cíu ná na caja chúun cuénta Jesucristo, xitoho í. Ná caja na quéa ndúcú na ná vaha mé cuítí va na. Ta xihín tühun ñúchí ta xihín tühun vií jándahvi na ñayivi, na co táchváha ini. <sup>19</sup> Tóco ndihi ñayivi xíni na ná caja ndó ná cúní Ndióxi ná cán quéa cajii ndivaha ini i. Ná cúní quéa ná náhá ndó ná ndíchí jini ndo xihín ná vaha caja ndó. Ta a cánuhú ini ndó caja ndó ná ná. <sup>20</sup> Yáchi chá jándahí Ndióxi sahá Satanás, rí cíu tñáhá sacuahá ta já cuu cahnu ndó rí xihín ndée Ndióxi. Cacuu a tátuhun chiníhni sahá ndó rí. Ná caja Ndióxi ná ná coo vaha ini ndó. Ta ná caja cuahá Jesucristo, xitoho í ñamani xihín ndihi ndó.

<sup>21</sup> Chíndahá Timoteo Ndióxi coo ndó ta in cíu dá caja chúun da xihín i. Ta chíndahá ri Lucio xihín Jasón xihín Sosípater Ndióxi coo ndó. Tóco ndihi da yóho naquixi da chichi Israel nuú naquixi mí i.

<sup>22</sup> Yéhe naní Tercio ta cahyí i carta yóho ta chíndahá ri yehe va Ndióxi coo ndó cuénta Jesucristo, xitoho í.

<sup>23</sup> Chíndahá Gayo Ndióxi coo ndó. Vehe mé da iin i ta sa mé yóho táchá na cíu cuénta Jesús. Ta chíndahá ri da naní Erasto Ndióxi coo ndó. Mé Erasto cómí da cuénta sahá jiuhún nuu yóho. Ta chíndahá ri Cuarto, da cíu cuénta Jesús Ndióxi coo ndó.

<sup>24</sup> Ná caja cuahá Jesucristo, xitoho í ñamani xihín ndihi ndó. Já ná coo.

#### Caja cahnu Pablo Ndióxi

<sup>25</sup> Coho caja cahnu i Ndióxi jáchi mé á cuu ndaja ndacu a ndohó xihín tühun vaha sahá Jesús ná jánaha nde nu ndó. Anda sanahá tá cámari cava sahá sahá ñuyíví násacu ini Ndióxi jácacu a ndohó ta viti náxinu quíví jánaha mé á ná nu ndó. Nahá ndivaha násahiin jehé tühun vaha sahá Jesús. <sup>26</sup> Ta viti cándezé iní ná nacahan Ndióxi sahá Jesús nuú na profeta ta ná yóho nacahyí na ná nuú tutu. Ta násahnda Ndióxi chuun nuú na cíu cuénta mé á ná cíu cuénta na caxí tühun na ná nu tóco ndihi ñayivi ndúu ñuyíví. Ta xihín mé ná yóho nácaja Ndióxi ná ná cuu cándezé iní ñayivi mé á ta já ná

caja na ña cún<sub>1</sub> a, mé a tácú anda ama cáá  
quiví.

<sup>27</sup> Ta mé cuití va cúú Ndióxi ta mé cuití  
va ndíchí jin<sub>1</sub> sahá ña cán quéa ndítahan  
caja cáhnu yó a anda ama cáá quivi sahá ña  
nacaja Jesucristo, xitoho í. Já ná coo.

## Carta nū cuítí naçahyí Pablo nū nā cūú cuéntá Jesús ndúu ñuu Corinto

Cáhan Ndióxi Pablo xihín nā cūú cuéntá  
Jesús ndúu ñuu Corinto

<sup>1</sup> Yehé cūú Pablo, da naçaxi Ndióxi cacuu apóstol cuéntá Jesucristo jáchí já cúní a caja. Yehé xihín ñani Sostenes <sup>2</sup> chíndahá nde Ndióxi coo ndó, nā cūú cuéntá Jesús ndúu ñuu Corinto jan jáchí in cūú ndó xihín Jesucristo. Mé Ndióxi naçaxi a ndohó cacuu ndó ñayivi yii, nā nandiquiahva mé nā ndáhá mé á. Ta quiahva já naçaxi ri a java ga nā ndúu ndijáá ñuu cacuu na cuéntá mé á, nā caja cähnu Jesucristo, xitoho í jáchí cūú ri a xitoho mé ná. <sup>3</sup> Nā cíní quéa ná caja Ndióxi, tátá yo xihín Jesucristo, xitoho í cuaghá ñamani xihín ndo ta ná caja mé á ñā nā coo vaha ini ndó.

Namani caja Ndióxi xohó sahá ñā cández  
iní Jesucristo

<sup>4</sup> Níti tiempo ndíquiahva i ndixahvi nu Ndióxi jáchí naçaja mé á cuaghá ñamani xihín ndo sahá ñā cández iní ndó Jesucristo. <sup>5</sup> Ta sahá ñā in nandiu ndó xihín mé á sahá ñā cán quéa naçaja Ndióxi cuaghá ñamani xihín ndo já ná cuu cahán vaha ndó sahá mé á. Ta já nasuná a xíní tuní ndo já ná candaas vaha ini ndó sahá mé á. <sup>6</sup> Ta ñā naçachi i xihín ndó sahá Jesucristo naxinu a ini ndó ta viti caja ndó ñā cúní mé á caja ndó. <sup>7</sup> Ta viti nani ndáti ndó quíví quixi tucu Jesucristo, xitoho í ñuyíví yóho ni in tühün toho ñaha a ndímaní nū ndo ñā ná caja ndó ñā cúní Ndióxi jáchí nasahan mé á tóco ndihí ñaha nu ndó. <sup>8</sup> Mé Ndióxi chindeé a ndohó já ná caca tuun ndó íchí cuénta mé á janda quíví nu ndihí. Ta já ná a cúa chícaan ñayivi cuachi jata ndo tá ná xínú coo quíví quixi tucu Jesucristo, xitoho í ñuyíví yóho. <sup>9</sup> Jáchí caja tá caja Ndióxi ñā sahan mé á tühün a caja. Ta mé á quéa naçaxi a mí ñā ná in cacuú xihín Jesucristo, xitoho í ñā cūú in tühün jini já jahyi mé á.

Tává xoo java nā cūú cuéntá Jesús mé ná

<sup>10</sup> Candehé ndo, ñani mí i, nā cūú cuéntá Jesús. Xícá tähví i nu ndo xihín quíví Jesucristo, xitoho í ñā ná ndique táhan vií tühün ndihí ndó ta a cähndá táhan ndó.

Xíní ñuhú cuni táhan vaha ndó ta in tühün ñaha cañuhu ini ndó saha. Ta quiahva já ndítahan coo jini ndihí ndó. <sup>11</sup> Candehé ndo, ñani mí i, nā cūú cuéntá Jesús. Cáhan i ñā yóho xihín ndo jáchí naçaxi tuhun na vehe Cloé xihín i ñā ndaja mé ndó cáni táhan ndó. <sup>12</sup> Jáchí nañehé e tuhun ñā java ndó cachí ndo ñā cūú ndó cuéntá yehé, da cūú Pablo. Ta java ndó cachí ndo ñā cūú ndó cuéntá Apolos. Ta java ndó cachí ndo cūú ndó cuéntá Pedro. Ta java ndó cachí ndo cūú ndó cuéntá Jesucristo. <sup>13</sup> Ta xihín ñā yóho ñā caja ndó quéa sáhndá java táhan ndó. Cández ndo. Coó naxihi i, da cūú Pablo ndica crúxu saha ndo já ná jácacu u ndohó. Ta ni coó naçandúta ndó cuéntá mí i. <sup>14</sup> Ndixahvi Ndióxi coó najacandúta i ndohó. Jáchí ndajága ví cachí ndó cūú ndó cuéntá yehé tá ná jácandúta i ndohó, nduu. Joo dā najacandúta i cūú Crispo xihín Gayo cuiti va. <sup>15</sup> Nā cán quéa ni in tühün ndó a cūú cachí ndo ñā naçandúta ndó cuéntá mí i jáchí coó najacandúta toho i ndohó. <sup>16</sup> Ta ndicuhun ini i ñā naçandúta ri nā vehe Estéfanos. Nā yóho cuiti cūú nā ñuhú ini i naçandúta i. <sup>17</sup> Jáchí coó naçhindahá toho Jesucristo yehé ñā ná caca nuu i jácandúta i ñayivi. Naçhindahá mé á yehé ñā ná caca nuu i cahán i tuhun vaha saha mé á xihín ñayivi já ná cuu cazu ndaa ínímá ná. Ta coó toho tuhun ndichí cahán i xihín ná jáchí coó cúní jánuu ndáhá i xihín tuhun cahán i yóho tóco ndihí ñā naçaja Jesucristo tá naxihi a ndica crúxu saha yo.

Ndichí jini Jesucristo ta ín ndéé mé á quíví  
nu Ndióxi

<sup>18</sup> Ñayivi, na xícá cuahan ndihí saha ná ini indayá, mé na cán cähán ná ñā cūú yó nā tachí tá cahán yó ñā naxihi Jesucristo ndica crúxu já ná cazu ndaa ínímá ná. Joo nu mí, nā nasacu ini Ndióxi jácacu a cavaşá yo cándaa iní ñā xihín ndéé Ndióxi naxinu tuhun mé á nu yo. <sup>19</sup> Já cachí tuhun Ndióxi já:

Jándihí i sahá ñā ndichí jini ñayivi ñuyíví,  
ta a quéhe e cuéntá sahá ñā cándaa iní  
ñayivi, já naçahyí a nūtū tuhun  
Ndióxi.

<sup>20</sup> Sahá ñā cán quéa coó saha toho ñaha ñuyíví yóho nu Ndióxi vatí dā ndichí jini xihín dā tacu ini cahán dā ñā cūú dā dā ndichí ndivaha sahá ñā xíní dā cahán dā sahá ñaha ñuyíví yóho. Joo naçaja Ndióxi

ñä ná cacuu a ñä coó saha. <sup>21</sup> Saha ná ndichí jiní Ndióxi, co cúní mé á ñä ná cuu candaä ini ñayivi saha mé á xihín ñä ndichí quixi jiní ñayivi ñuyíví. Ñä nacaja mé á quéa nachindahá a java ñayivi ñä ná cahán na tuhun vaha saha mé á já quéa ndá na cándusa ña ta candeé ini na Ndióxi já cuu cacu ndaa ínimá ná. Ta ñä yóho cuú á in ñä tachi ndivaha nuú ñayivi ñuyíví.

<sup>22</sup> Jáchí ñayivi Israel cachí na ña ndúsa cuni na ña xituhún ndivaha já cuu candúsa na tuhun vaha saha Jesús. Ta ná tóho, na ñuu Grecia cúní na ñä ná cahán ndichí ndivaha ñayivi xihín ná já cuu candúsa na ñä. <sup>23</sup> Joo mé nde xíca nuu nde cáxi tuhun nde nuú ñayivi saha Jesucristo, mé a naxihí ndica crúxu saha ñayivi. Joo tá xíni joho na Israel ñä yóho já ndíhlívì ná. Ta tá xíni joho na tóho ñä yóho já cahán na ñä cuú á ñä tóntó ndivaha. <sup>24</sup> Joo tóco ndihi na nacaxi Ndióxi cacuu na cuénta mé á, a cuú ná na tóho á cuú ná na Israel, candaä ini na ñä cahán nde sahá Jesucristo, ñä fin ndé mé á jácagu a ñayivi. Ta xíni vaha na ñä ndichí ndivaha jiní mé á nacaja Ndióxi. <sup>25</sup> Nuú ñayivi ñuyíví ña caja Ndióxi cuú á ñä tóntó ndivaha. Joo ñä caja Ndióxi cuú á ñä ndichí chágaga nu ndíhlí ñaha caja ñayivi ñuyíví. Ta vatí cachí ñayivi ñä co ndíyahvi ñä naxihí Jesucristo ndica crúxu joo yahvi chágaga ñä yóho a juú ga inga ñaha cuu caja ñayivi. <sup>26</sup> Candehe ndo, ñani i, na cuú cuénta Jesús. Nacaxi Ndióxi ndohó cacuu ndó cuénta mé á vatí chá cuití ndó cuú ndó na ndichí jini nuú ñayivi ñuyíví. Ta chá ndó cuú ndó na náhnu nuú ñayivi ta chá cuití ndó cuú ndó na cuicá. <sup>27</sup> Joo nacaxi Ndióxi ñayivi, na cachí ñayivi ñuyíví cuú ná na tóntó jiní já quéa ná cacahan nuú na ndichí jiní. Mé Ndióxi nacaxi a ñayivi vitá ná cacuu na cuénta mé á já ná cacahan nuú na náhnu ndúu ñuyíví yóho. <sup>28</sup> Ñayivi, na coó saha ñuyíví yóho, na quéhe nuú ñayivi saha, na cán cuú na nacaxi Ndióxi. Ta nacaxi a na co ndáyahvi toho ñuyíví yóho ñä ná nuu ndáha na náhnu cuénta ñuyíví yóho. <sup>29</sup> Ta xihín ñä yóho candaä ini ñayivi ñä a cuú ndiñeha jíco na mé ná nu Ndióxi. <sup>30</sup> Mé Ndióxi quéa nacaja ñä ná in ndúu xihín Jesucristo. Ta nacaja mé á ñä ná ndindichí jiní yo. Ta nacaja mé á ñä ná canduu ndaa yó nu Ndióxi. Nacaja mé á ñä ná ndúu ñayivi yii, na cuú cuénta mé á. Ta mé á

najácacu a mí nuú cuachí. <sup>31</sup> Ta já cachí tuhun Ndióxi já: “Ndá na cúní caja lända, xíní ñúhú caja lända na sahá ñä náhnu nacaja Ndióxi saha ná.”

## 2

Cáxi tuhun Pablo ñä naxihí Jesucristo ndica crúxu sahá cuachi ñayivi

<sup>1</sup> Candehe ndó, ñani i, na cuú cuénta Jesús. Tá nasahan i nacahan i ñä ndaa cuénta Ndióxi nu ndó, coó nacahan i ñä xihín tuhun ndichí ñuyíví yóho. <sup>2</sup> Joo nasacu ini i cahán i sahá Jesucristo cuití va tañu ndó, mé a naxihí ndica crúxu. <sup>3</sup> Tá nasañin i tañu ndó, coó nandiñeha jíco i mí i. Ñä nacaja i quéa yílhví yílhví cuú u anda quíji nínu i. <sup>4</sup> Ta tá nacasáhá i cáxi tuhun i tuhun vaha sahá Jesucristo nu ndó, coó toho tuhun ndichí nacahan i xihín ndó ñä ná cava i jiní ndó xihín á, vaha. Ñä nacaja i quéa nacahan i xihín ndó xihín ndée ínimá yii Ndióxi ta mé a najáxinu a ini ndó xihín ndée mé á. <sup>5</sup> Já quéa ná candaä ini ndó ñä Ndióxi quéa caja ñä ná candeé ini ndó mé á xihín ndée mé á. Ta co cuú á sahá ñä ndichí quíxi jiní ñayivi ñuyíví yóho.

Ínimá yii Ndióxi caja ñä ná candaä ini ñayivi saha mé á

<sup>6</sup> Joo tá ndítuhún nde xihín na sa candaä vaha ini ñaha Ndióxi já cahán nde tuhun ndichí xihín ná. Joo co cahán nde tátuhun cahán ta ndichí ndúu ñuyíví yóho. Ta ni co cuú á tátuhun ñä cahán da ndichí, da cómi cuénta sahá ñuyíví yóho. Jáchí yachí ndihi sahá na cán. <sup>7</sup> Na cahán nde cuú á ñä ndichí cuénta Ndióxi. Ta cuú á ñä nasañin jehé, ñä co xíni ñayivi saha janda tá cámání cava sahá saha ñuyíví. Jáchí janda mé tiempo já nasacu ini Ndióxi ndá quiahva caja jácacu a mí anda ama cása quívi. <sup>8</sup> Ta ni in tühún na náhnu cómi cuénta sahá ñuyíví yóho co candaä ini na ñä nasacu ini Ndióxi jácacu a mí. Jáchí tá ná candúsa na ñä já quéa a cáta caa toho na Jesucristo, xitohó í ndica crúxu, nduu. Jáchí mé Jesucristo cuú á ñä cahnu ndivaha. <sup>9</sup> Ta já cachí tuhun Ndióxi já:

Ni in tühún ñayivi a ñáha cuni na ta a ñáha  
cuni joho na,  
ta ni a ñáha cahvi ini na,  
ndá quiahva fin ñä náhnu sácú ini Ndióxi  
quiahva nuú ñayivi tá quíhví ini na  
mé á, cachí tuhun Ndióxi.

<sup>10</sup> Nacaja íníma *yii* Ndióxi ña ná candaña ini tóco ndihi ña yóho. Jáchí íníma *yii* mé á sándezé a tóco ndihi ñaha ta xíni a janda ña cáhvi ini mé Ndióxi.

<sup>11</sup> Ni in tóuhun ñayivi co xíni na ña cáhvi ini inga na. Íníma in in na cuití va xíni a ña cáhvi ini in in na. Quiahva já íín ri xihín Ndióxi va. In tóuhun íníma *yii* mé á xíni ndíqa cáhvi ini a. <sup>12</sup> Nasahan Ndióxi íníma *yii* mé á nu yo ta co cíú á tátuhun íníma ñayivi ñuyíví. Ta nacaja mé á ña ná candaña iní ndaja íin ña náhu sáhan mé á nu yo. <sup>13</sup> Ta tá cáhan nde sahá ña yóho, cáhan nde tá quiahva najánaha íníma *yii* Ndióxi nuú nde. Ta co cáhan nde ña xihín tuhun ndíchí nacatiahva nde ñuyíví yóho. Quiahva já ndícani nde ñaha Ndióxi xihín na ñúhu íníma *yii* Ndióxi ini.

<sup>14</sup> Tóco ndihi ña yóho cíú á ña tóntó ndivaha nuú ñayivi, na co ñúhu íníma *yii* Ndióxi ini. Co ndíquehe vaha na ña ta ni a cíú candaña ini na ndaja íin a jáchí na ñúhu íníma *yii* Ndióxi ini, na cán cíú ndusa na candaña ini ñaha Ndióxi. <sup>15</sup> Joo na ñúhu íníma *yii* Ndióxi ini, na cán cíú na candaña ini ndá ñaha cíú ña vaha ta ndá ñaha co cíú toho ña vaha. Ta xihín ña yóho cátóntó ñayivi ñuyíví jáchí co candaña ini na ña cíú cuénta Ndióxi. <sup>16</sup> Jáchí cächí tuhun Ndióxi: “Ni in tóuhun ñayivi a cíú candaña ini na ña cáhvi ini Ndióxi, xitoho í. Ta ni in tóuhun na a cíú cachí xihín mé á ña ndítahan nu á caja”, cächí tuhun Ndióxi. Joo mí, na cíú cuénta Jesús, cáhvi iní tá quiahva cáhvi ini Jesucristo jáchí ñúhu íníma *yii* Ndióxi ini mí, na cíú cuénta mé á.

### 3

#### *Na caja chūun cuénta Ndióxi*

<sup>1</sup> Candehé ndó, ñani i, na cíú cuénta Jesús. Coó nacuu cahán i xihín ndo tá quiahva cáhán i xihín na nachutú ndaña xihín íníma *yii* Ndióxi. Jáchí mé ndó cíú ndó tátuhun léé loho ña chíchí jáchí a ñáha cuahnu ndó xihín tuhun Ndióxi jáchí caja ndó ña xíca ini yiiquí cíñu ndó caja tá quiahva caja ñayivi ñuyíví. <sup>2</sup> Sahá ña cán quéa tá najánaha i tuhun Ndióxi nu ndo, coó nacuu jáñaha i ña ihví chágá nu ndo jáchí a cíú candaña ini ndó ña. Ña nacaja i xihín ndo quéa nasahan i tátuhun leche nu ndo jáchí cíú ndó tátuhun na valí chíchí sahá ña a cíú cuxu ndó ñaha vee. Ta janda

viti co íín tiähva ndó jácuaha ndó ña ihví chágá cuénta tuhun Ndióxi. <sup>3</sup> Jáchí cíú *yii* va ndó tátuhun ñayivi ñuyíví. Ndaja táhan mé ndó cáhíhví ini xihín táhan ndó ta cáni táhan ndó ta sáhndá java táhan ndó. Ta xihín ña yóho caja ndó ña cíú mé cuití ndo tá quiahva caja ñayivi ñuyíví. <sup>4</sup> Java ndó cächí ndo ña cíú ndó cuénta yehe, da cíú Pablo. Ta java ndó cächí ndo ña cíú ndó cuénta Apolos. Ta xihín ña yóho sáhndá java táhan ndó ta náha ndó ña caja ndó ta quiahva caja ñayivi ñuyíví.

<sup>5</sup> Ndá da cíú Apolos xihín yehe ña ná cani táhan ndó sahá nde. Co ndítahan caja ndó já jáchí mé nde cíú nde da xíca nuu caja chúun cuénta Jesucristo, xitoho í cuití va. Ta sahá chuun caja nde yóho nacuu nacandusa ndó mé á. Ta ña yóho cíú chuun nanaha Jesucristo, xitoho í nuú yehe xihín nu Apolos caja nde. <sup>6</sup> Ña nacaja nde cíú á tátuhun ña caja na tá xútua na. Ta yehe cíú u tátuhun ña caja na tata jáchí nacaxí tuhun i tuhun Ndióxi nu ndo. Ta Apolos cíú dá tátuhun dä naxojo ticuúi nuú a cán jáchí najánaha chágá da tuhun Ndióxi nu ndo. Joo Ndióxi quéa nacaja ña ná cuahnu a jáchí caja mé á ña ná cuu cuahnu ndó xihín tuhun mé á. <sup>7</sup> Sahá ña cán quéa vatí yehe cíú u da naxutu ta Apolos cíú dá da naxojo ticuúi joo ni in tóuhun nde coó sahá. Cáhnu cíú Ndióxi jáchí mé á quéa nacaja ña ná cuahnu mé tata naxutu nde cán. <sup>8</sup> Xímí ñúhu candaña ini ndó ña in cíú va na chíchí tata xihín na xójó ticuúi nu á. Ta tá in tá in chuun nacaja in in na cán quehe na yahvi sahá. <sup>9</sup> Yehe xihín Apolos in cíú nde caja chúun nde cuénta Ndióxi. Ta mé ndó cíú ndó tátuhun in yójo nuú nasacu Ndióxi ndehe caja chúun nde cuénta mé á.

Ta jári cíú ndó tátuhun in vehe ña cávaha Ndióxi. <sup>10</sup> Ta yehe cíú u tátuhun da cávaha mé vehe yóho. Ta mé Ndióxi quéa nasahan ñamarii nuú i ña ná taán i yuu ndúhu sahá ta ná jácavá sahá i ña. Ta inga na xímí ñúhu caja chúun xihín á. Joo ndítahan candehé vaha na ndaja caja na chuun yóho. <sup>11</sup> Jáchí in tóuhun Jesucristo cíú á tátuhun yuu ndúhu sahá vehe yóho. Ta ni in na a cíú tavá xóo na ña ta já cacu na inga ñaha. <sup>12</sup> Mé na cávaha vehe nuú yuu ndúhu yóho cuu jáxinu na ña xihín jiuhun cuáán ta cuu caja na ña xihín jiuhun cíúxu

ta cuu caja ri na ñaq xihín yuu ñúchí. Ta jári cuu caja na ñaq xihín yító ta cuu caja ri na ñaq xihín xehe ndíyoho ta janda xihín toñámá cuu caja na ñaq. <sup>13</sup> Joo vaxi quívi quixi tucu Jesucristo coto ndojó mé á chuun nácaja in in ñayivi cuéntá mé á. Cacuu a tátuhun coto ndojó a ñaq xihín ñúhú cayí já quéa ná sahá nu á, a ndihí sahá, a co ndihí sahá. Ta xihín ñaq yóho sahá nu á, a vaha nácaja chún ñayivi cuéntá mé á, a a vaha toho nácaja na. <sup>14</sup> Ta tá coó nandihí sahá ñaq nácaja na cán já quéa chahvi Ndióxi na sahá chuun nácaja na. <sup>15</sup> Joo tá ná cayí ñaq nácaváha na cán já ndihí sahá tóco ndihí chuun nácaja na vatí mé ná cazu ndaa ínimá ná. Ta ñaq yóho cacuu a tátuhun tá jácacu in dataa mé dá tá quéta da ini in vehe tá cayí a xihín ñúhú ita.

<sup>16</sup> Á co xíni ndó ñaq cíu ndó tátuhun veñuhu Ndióxi tá ndácaan ínimá yii mé á ini ínimá in in ndó. <sup>17</sup> Ta ndá ñaq ná jándihí na sahá veñuhu Ndióxi yóho já quéa jándihí Ndióxi sahá na cán. Jáchí yii ndiváha veñuhu Ndióxi. Ta mé ndó cíu ndó tátuhun veñuhu Ndióxi cáhan i sahá jan.

<sup>18</sup> Candehé ndo. Ndá ndó cáhán ñaq cíu ndó na ndíchí jiní sahá ñaq xíni ndó ñahá ñuyíví yóho, xíni ñúhú candaa ini ndó ñaq cíu á tátuhun jándahí ndó mé ndó. Xíni ñúhú ndaja ndó mé ndó tátuhun na co xíni já quéa ná nuná nu Ndióxi jándahí nu ndo ndáa cíu ndusa na ndíchí jini. <sup>19</sup> Jáchí ñaq ndíchí quíxi jiní ñayivi ñuyíví cíu á ña tóntó ndiváha nu Ndióxi. Já cachí tuhun Ndióxi já: "Na caja mé á quéa ná cachihin sahá ná xihín ñaq ndíchí quíxi jiní mé va na." <sup>20</sup> Quiahva já cachí ri tuhun Ndióxi: "Cándaan caxí ini Ndióxi ñaq coó sahá ñaq cahvi jiní na ndíchí ndúu ñuyíví yóho", já cachí tuhun Ndióxi. <sup>21</sup> Sahá ñaq cán quéa ni in túhún ñayivi co ndítahan ndínehe jíco ná mé ná sahá ñaq tihva in ñayivi ñuyíví yóho caja na. Xíni ñúhú ndicuhun ini ndó ñaq náshahan Ndióxi tóco ndihí ñahá nu ndo. <sup>22</sup> Nandiquahva mé á ndehe, dä cíu Pablo xihín Apolos xihín Pedro nu mé ndó já ná cuu jándahí nde tuhun Ndióxi nu ndo. Nasahán mé á ñuyíví yóho nu ndo já ná cuu catacu ndó. Ta náshacu ini mé á quívi quiví ndó ta já tandaan quiví cuhun ndó coo ndó xihín mé á. Tóco ndihí ñaq yóho náshahan Ndióxi nu ndo. <sup>23</sup> Ta mé ndó cíu ndó cuéntá Jesucristo ta Jesucristo cíu á cuéntá Ndióxi.

## 4

Ndícáni Pablo ndaja tím chuun caja na apóstol

<sup>1</sup> Co ndítahan toho ndaja cahnu ndó ndehe. Xíni ñúhú quehe ndó cuéntá ñaq náshahndá chuun nuú nde caja chún nde cuéntá Jesucristo jándahí nde ñaq coó náshaxní ñayivi jihna, ñaq náshacu ini Ndióxi caja. <sup>2</sup> Ta ndá dä ndíquehe in chuun, xíni ñúhú sahá dä ñaq mé a ndaa cuu candee in na dä, ñaq mé a ndaa caja tá caja da chuun náshahndá nuú dä caja da. <sup>3</sup> Ta caja i cuéntá nácaja vaha i chuun náshahndá Ndióxi nuú i caja i. Sahá ñaq cán quéa co sáhní toho i mí i tá chícaan ndó cuachi jatá i. Ta co ndícáni ini i tá java ga ñayivi chícaan na cuachi jatá i. Jáchí caja i cuéntá coó toho cuachi nácaja i. <sup>4</sup> Tá ná cachí i xihín ndo ñaq coó toho cuachi nácaja i, co cíni cachí i ñaq mé a ndaa co ndójó ga i cuachi. Jáchí xíni vaha Jesucristo, xitoho i á nácaja vaha i á coó nácaja vaha i. <sup>5</sup> Sahá ñaq cán quéa co xíni ñúhú ndihí ini ndó candehé ndaa ndó ñayivi. Xíni ñúhú candati ndó jándahí quiahva ná quíxi Jesucristo caja ví mé á sahá ñayivi já ná ndítivi ñaq ñúhú ínimá in in ñayivi. Ta xihín ñaq yóho cuni tóco ndihí ñayivi ñaq cahvi ini na. Andá jáví ndaja cahnu Ndióxi na nácaja vaha.

<sup>6</sup> Candehé ndo ñani i, na cíu cuéntá Jesús. Sahá ñaq cíni nde ñaq ná candaa ini ndó ndícaan i nu ndo sahá Apolos xihín sahá mí i. Jáchí tím in tuhun ta cachí a ñaq co ndítahan nu ndó caja cahnu ndó in ñayivi náshahndá ndó inga náshahndá. Ta xihín ñaq yóho cuu candaa ini ndó ñaq co ndítahan ndínehe jíco ndo mé ndó sahá ñaq cíu ndó cuéntá in da jáchí xihín ñaq yóho jánuu ndáha ndó inga náshahndá. <sup>7</sup> Jáchí ni in ndó co cíu ndó na náshahndá chágá a juú ga inga na. Xíni ñúhú candaa ini ndó ñaq tóco ndihí ñaq cómí ndo cíu á ñaq náshahndá Ndióxi nu ndo. Sahá ñaq cán quéa co ndítahan caja cahnu ndó mé ndó sahá ñaq náshahndá.

<sup>8</sup> Cáhán ndo ñaq ni in ñahá co ndímaní nu ndo joo co cíu á ñaq ndaa. Cáhán ndo ñaq cíu ndó na cuicá joo co cíu á ñaq ndaa. Ta cahán ndo cíu ndó na cómí cuéntá sahá ñayivi joo co cíu á ñaq ndaa. Caja ndó tátuhun co xíni ñúhú toho ndó ndehe. Vá ná cacomí ndusa ndó cuéntá sahá ñayivi já ná cacomí ri ndehe va cuéntá sahá ná xihín ndo. <sup>9</sup> Cíu

á tátuhun násacu Ndióxi ndehe, na cíu apóstol jandá nu ndihí. Cúu nde tátuhun na ndicuítá yíco cuhun quivi. Ta jandá joho sándezhe ñayivi ñuyíví ndehe ta sácu ndaa na ndehe. Ta jandá mé tátó Ndióxi sándezhe na ndehe cuhán nde. <sup>10</sup> Sahá ña quíhví ini nde Jesucristo cíu nde tátuhun ñayivi tóntó ndivaha nuú ñayivi ñuyíví. Joo mé ndó nandaja ndó mé ndó tátuhun na xíni ndivaha sahá mé á. Mé nde cíu nde tátuhun ñayivi vitá nuú ñayivi ñuyíví joo cíja ndó tátuhun na ndacu ini. Ndája cahnu ñayivi ñuyíví mé ndó nani quéhe níu na ndehe. <sup>11</sup> Ta jandá viti ndohó tá ndohó ini nde. Java tañu coó ña cuxu nde ta coó ticuúi coho nde ta ni jáhma candixi nde coó. Ta jandá joho cíja xíxi ñayivi xíhín nde. Ta ni vehe nde coó. <sup>12</sup> Ta a juú quiahva ndúcú ndéé nde cíja chúun nde catacu nde. Ta tá chícaqan ñayivi cuachi jatá nde já xíca tahví nde nuú Ndióxi ña ná cíja mé á ñamani xíhín ná. Ta cíja ndeé ini nde tá cíja xíxi na xíhín nde. <sup>13</sup> Ta vitá cahán nde tá ndúcú ñehe nde tuhun nuú ñayivi vati cahán níu na sahá nde. Mé nde cíu nde tátuhun xéhe nuú ñayivi ñuyíví. Ta cíja na xíhín nde tá quiahva cíja na xíhín ñaha coó sahá, ña nacandoo cuhun cuita. Ta quiahva já cíja na xíhín nde jandá viti.

<sup>14</sup> Xíni ñúhú candaá ini ndó ña co cahyí i ña yóho nu ndo sahá ña cíni jácacahan i nuú ndo. Cahyí i ña nu ndo jáchi cíu ndó tátuhun jahyi i. Ta jánahá i ña nu ndo tá quiahva cíja in dataa xíhín jahyi da jáchi quíhví ini i ndohó. <sup>15</sup> Jáchi vati ná coo uxu mil ñayivi jánahá na ndohó sahá Jesucristo joo in túhún yehe cíu tátuhun tátá ndo. Jáchi yehe cíu u dä nacahan tuhun vaha sahá Jesucristo nu ndó nu cuítá ta já nacandee ini ndó mé á. <sup>16</sup> Sahá ña cán quéa xíca tahví i nu ndó ña ná cíja ndó tá quiahva cíja i.

<sup>17</sup> Sahá ña cán quéa chindahá i Timoteo nu ndo jáchi cíu dä tátuhun jahyi maní i ta cíja chúun da cuéntá Jesucristo, xitoho i xíhín ndinuhi ini da. Ta jándicuhun ini da ndohó ndá quiahva cíja i tañu na cíu cuéntá Jesú ta ndá quiahva jánahá i nu ná ndijáá veñuhu nu xíca i cuhán i. <sup>18</sup> Java ndó nacásahá ndo cíja lända ndó jáchi cahán ndo ña a sáa ga i coto nihni i ndohó. <sup>19</sup> Joo yachi saa i coto nihni i ndohó tá cíni Ndióxi. Anda já candéhé e, á mé a

ndaá ín ndéé Ndióxi ini na xíca cíja lända jan á yúhu uun na cahán na. <sup>20</sup> Tá mé a ndaa cómí Ndióxi cuéntá sahá in ñayivi já quéa ín ndéé mé á ini na cíja na ña cíni mé á. Ta coó sahá toho a á tialhva ndivaha na cahán na. <sup>21</sup> Ta viti cachi ndó xíhín i ndia quéa catóó chágá ndo. Á catóó chágá ndo ña ná saa i jánaní i ndohó sahá ña cíja ndó ña níu. Á catóó chágá ndó ña ná saa i ta víi víi cahán i xíhín ndo jáchi jándacoo ndó ña níu cíja ndó. Ndía cíni ndó.

## 5

*Cahán Pablo sahá in dä ín xíhín náná queén dä*

<sup>1</sup> Sa nañehé e tátuhun ña ín in dä cíu cuéntá Jesú tañu ndó jan ta ín dä xíhín náná queén dä. Ta ña yóho cíu á in cuachi cahnu ndivaha. Ta ní ñayivi ñuyíví co cíja ña yóho. <sup>2</sup> Ta vatí ín cuachi cahnu yóho tañu ndó joo cíja ga ri ndohó cíja cahnu ndó mé ndó. Xíni ñúhú cacuéha ini ndó sahá ña yóho. Ta xíni ñúhú tavá ndó dä cíja cuachi yóho tañu ndó jan. <sup>3</sup> Vatí co ín i xíhín ndo jan joo ndicami ndivaha ini i sahá ña cíu jan. Ta cíu á tátuhun ín i xíhín ndó jan ña cán quéa sa násacu ini i ña xíni ñúhú cíja ndó xíhín dä cíja cuachi jan. <sup>4</sup> Játaca táhan ndihí ndó na cíu cuéntá Jesucristo, xitoho í. Ta mé a cán quiahva ndeé á nu ndo cíja ndó ña cíni mé á. Ta cacuu a tátuhun coo i xíhín ndó jan. <sup>5</sup> Anda já xíni ñúhú ndiquiahva ndó dä jan ndáha tiñahá sacuahá já ná jándoho rí ini yiqú cuñu da viti ta já ná cuu cacu ndaa íníma dä tá ná xínu coo quiví quixi tucu Jesucristo.

<sup>6</sup> Co ndítahan cíja lända ndo sahá ña cíja ndó. Xíni ñúhú ndicuhun ini ndó in tátuhun ña cahí já: “Chá cuití yúsa naxaa jatiyí ndihí a java yúsa ña ín vaha.” <sup>7</sup> Xíni ñúhú tavá ndo dä jan tañu ndó jáchi cíu dä tátuhun yusá naxaa, ña jatiyí ña ín vaha. Ta xíhín ña yóho quee ña níu veñuhu nu táca ndó jan jáchi sahá dä jan cuu caquin inga na ta cíja na cuachi. Xíni ñúhú canduu víi ndo tátuhun mé pan xíxi na vicó pascua jáchi coo yusá naxaa ñúhú xíhín á. Ta Jesucristo násacuu a tátuhun in ndicachi, rí najocó na nu Ndióxi vicó pascua sahá cuachi ñayivi jáchi naxihí i ndica crúxu sahá cuachi já ná cuu cacu ndaa íníma yo. <sup>8</sup> Sahá ña cán quéa ndítahan cajíi ini sahá ña nacaja Jesucristo. Xíni ñúhú jándacoo í ña

núu sa nacaja í jihna, ña cíuú tátuhun pan naxaa. Ta xíní ñúhú caja í ña ndaa xihin ndinuhu iní. Ta ña yóho cíuú á tátuhun pan ña coó nacava táhan yusá naxaa xihin.

<sup>9</sup>Nu carta nacindahá i nu ndó jihna ga, nacachi i xihin ndó ña ná a cátahan ndó xihin ñayivi, na ndúu xihin na co cíuú yíi ná á ñajíhlí na. <sup>10</sup>Tá nacachi i ña yóho xihin ndo co cúní cachei a ña xíní ñúhú tavá xóo ndó mé ndó chí in ndee nuú ñayivi ñuyíví yóho jáchi a cué quee ndó ñuyíví yóho cuhun ndo. Ta mé a ndaa ndúu cuahá na ñuyíví yóho cája na cuahá cuachi xihin yiquí cuñu na ta cátóo ndivaha na jihuán ta cája cuhñá na ta cája cahnu na yoco. <sup>11</sup>Ña cúní cachei i xihin ndó quéa co ndítahan catáhan ndó xihin na cachí cíuú cuéntá Jesú nani cája na ña núu xihin yiquí cuñu na, á tá cíuú ná na cátóo ndivaha jihuán, á tá cíuú ná na cája cahnu yoco, á tá cíuú ná na tuhún, á tá cíuú ná na xíhi, á tá cíuú ná na cuhñá. Ta ni a cacoó ndó cuxu ndó xihin ná tá cája na ña yóho. <sup>12</sup>Co cáhan i sahá ñayivi ñuyíví jáchi co ndítahan nuú i caja vií i sahá ná. Joo ndítahan nu ndó candehé ndó ndaja cája na cíuú cuéntá Jesú ndúu tañu ndó jan. <sup>13</sup>Jáchi mé Ndióxi quéa caja vií a sahá cuachi ñayivi ñuyíví. Ña cán quéa ndítahan nu ndó tavá ndó da cája cuachi tañu ndó jan.

## 6

Tá sácú sahá táhan na cíuú cuéntá Jesú nuú na jutixia

<sup>1</sup>Tá co táchán ini ndó xihin ña cája nani ndó, na cíuú cuéntá Jesú co ndítahan nu ndó cuhun ndó cacu ndó sahá ná nuú na jutixia, na co cíuú cuéntá Jesú. Ña ndítahan caja ndó quéa cahán ndó xihin mé na cíuú cuéntá Jesú ña ná caja vií na sahá ña co táchán ini ndó xihin jan. <sup>2</sup>Á co xíní ndó tandaas quiví caja vií na cíuú cuéntá Jesú sahá tóco ndihí ñayivi ñuyíví. Ta tá mé ndó cacuu ndó na caja vií sahá tóco ndihí ñayivi ñuyíví, ndá cuéntá quéa co cúní ndó caja vií ndó sahá ña válí cíuú tañu mé ndó jan. <sup>3</sup>Ña xíní ñúhú caja ndó quéa nducú ndó caja vií ndó sahá ña cíuú tañu ndó jan. Jáchi xíní ñúhú ndicuhun ini ndó ña jandá tátó Ndióxi caja vií yo saha. "Sahá ña cán quéa tá cání táhan ndó sahá ñaha válí ñuyíví yóho co xíní ñúhú toho cuhun ndó cavií sahá ndó nuú na co cíuú cuéntá Jesú. <sup>4</sup>Candehé ndó.

Cáhan i ña yóho xihin ndó já ná cacahan nuu ndo. Á co ín in da tacu ini tañu ndó jan ña ná caja vií da sahá ndó, vaha. Xíní ñúhú ndindita in da tacu ini já ná cuu caja vií da sahá ña cíuú tañu ndó jan. <sup>5</sup>Joo ña cája ndó quéa cání táhan ndaja táhan mé ndó ta já ndáca táhan ndó cuahan ndó cavií sahá ndó nuú na co cíuú cuéntá Jesú. Co ndítahan toho caja ndó jan.

<sup>6</sup>Sa cuachi cahnu ndivaha quéa cája ndó tá cání táhan ndaja táhan mé ndó jan. Vaha ná caja ndee ini ndó tá co cája vaha in na xihin ndo. Vaha ná caja ndee ini ndó tá ná caja cuhñá na ñaha ndó. Jáchi co ndítahan cacu sahá táhan ndó nuú na co cíuú cuéntá Jesú. <sup>7</sup>Joo ña cája ndó quéa ña núu xihin ñani táhan ndó ta jandá cája cuhñá ndo ñaha ñani ndó, na cíuú cuéntá Jesú.

<sup>8</sup>Xíní ñúhú candaas ini ndó ña coó sahá toho ñayivi cája ña núu jan cuhun na nuú cacomí Ndióxi cuéntá sahá ná. A jándahvi ndó mé ndó jáchi na ndúu xihin na co cíuú yíi ná á ñajíhlí na a cuhun toho na nuú cacomí Ndióxi cuéntá sahá ná. Ta ni na cája cahnu yoco ni na ndúu xihin yíi á ñajíhlí inga na ta ni da cíuú taa líhlí a cuhun toho na nu Ndióxi. <sup>9</sup>Ta ni na cuhñá ta ni na cátóo ndivaha jihuán ta ni na xíhi ta ni na ndahda yúhu ta ni na jándahvi ñahá ta ni in táhan na yóho a cuhun toho na nuú cacomí Ndióxi cuéntá sahá ná. <sup>10</sup>Ta táhan na yóho nasacuu ri java ndohó va, nduu. Joo viti sa nandaja vií Ndióxi ndohó ta nacaxi a ndohó cacuu ndó cuéntá mé á. Nanduu ndó ñayivi ndaa nu Ndióxi sahá ña nacaja Jesucristo, xitoho í ta sahá ña cája íníma yii Ndióxi.

Xíní ñúhú candaas í yiquí cuñu í jáchi cíuú á ña yíi

<sup>11</sup>Ndúu java ñayivi ta cachí na ña núná nu ná caja na ña cúní mé va na. Vatí mé a ndaa núná nu ná caja na ña cúní mé ná joo xíní ñúhú candehé na a vaha, a a vaha ña caja na. Jáchi mé a ndaa núná nu yo caja í ña cúní mí joo co ndítahan quiahva í ñamani ña ná cahnu ña núná yiquí cuñu í.

<sup>12</sup>Ta cachí na ña ín tixi yó sahá ña cán quéa xíní ñúhú cuxú. Ta cachí na ña xíní ñúhú cuxú jáchi ín tixi. Joo vaxi quiví jándihí Ndióxi sahá ndíví ña yóho. Ta coó nasahan Ndióxi yiquí cuñu í nu yo ña ná caja í cuachi xihin á tátuhun ña ná coo í xihin na co cíuú ñajíhlí yo á yíi yo. Nasahan Ndióxi yiquí

cuñu í nu yo já ná caja í ñä cúní mé á. Ta nácaja mé á ñä ná cacomí a cuéntá sahá.

<sup>14</sup> Ta tá quiāhva nácaja Ndióxi najánditacu a Jesucristo, xitoho í quiāhva já caja ri a jánditacu a yiquí cuñu í xihín ndéé mé á.

<sup>15</sup> Xíní ñúhú candaa ini ndó ñä in cúu ndó xihín Jesucristo. Ta tá cuahán ndó caja ndó cuachi xihín najihí xíca jii, cúu á tátuhun ñéhe ndó Jesucristo cuahán caja ñä núu. Co ndítahan caja ndó já. <sup>16</sup> Sa xíní vaha ndó ñä tá quíhvi nuu in dاتaa xihín najihí xíca jii já quéa ndúu na tátuhun in víxí ñayivi. Jáchí cachí tuhun Ndióxi já: “Tá ná ndique táhan in dاتaa xihín in ñáñáha já quéa ndúu na tátuhun in víxí ñayivi.” <sup>17</sup> Ndá na ndiquiāhva mé ndáhá Jesucristo, xitoho í já quéa in ndúu na xihín mé á jáchí ñúhu íníma yii Ndióxi ini na.

<sup>18</sup> Cama caxoo ndó nu tóco ndihi ñä núu xíca ini yiquí cuñu ndó caja. Co ndítahan coo ndó xihín na co cúu ñajihí ndó á yíi ndó jáchí ni in tühün toho cuachi co cája quini najah xihín yiquí cuñu ñayivi tátuhun cuachi yóho. Jáchí ndá na fín xihín na co cúu yíi ná á ñajihí na já quéa caja na cuachí nuu yiquí cuñu mé va na. <sup>19</sup> Xíní ñúhú ndicuhun ini ndó ñä mé yiquí cuñu ndó jan cúu á tátuhun in veñuhu nu ndácaan íníma yii Ndióxi, mé a násahan Ndióxi nu ndó. Ta viti yiquí cuñu ndó a juú ñaha mé ndó cúu á jáchí cúu á ñaha Ndióxi. <sup>20</sup> Jáchí yahvi ndivaha nachahvi Ndióxi sahá ndó tá naxihí Jesucristo ndica crúxu. Sahá ñä cán quéa ndítahan caja cahnu ndó Ndióxi xihín yiquí cuñu ndó ta jári xihín íníma ndó jáchí ndíví a cúu á cuéntá Ndióxi.

## 7

### Tá tándahá ñayivi

<sup>1</sup> Ta viti cúní nducu ñehé e tuhun nu ndo sahá ñä nandaca tuhún ndó yehe nu carta nachindahá ndó nuu i. Cachí i xihín ndó sahá da cámáni tandaha ñä vaha caja da tá ná coo tacú dä. <sup>2</sup> Joo sahá cuachi caja ñayivi tá ndúu na xihín na co cúu ñajihí na á yíi ná sahá ñä cán quéa vaha chágá ná tandahá ná já ná coo ñajihí in in taa ta jári najihí va ná coo yíi in in na. <sup>3</sup> Ta in dاتaa ndítahan ndiquiāhva da mé dä nu ñajihí dä ta jári ñáñáha ndítahan ndiquiāhva ñä mé ñä nu yíi ñä jáchí quiāhva já sáhndá a coo a. <sup>4</sup> Jáchí in ñáñáha, ñä natandaha co cómí ga ñä cuéntá sahá mé ñä jáchí yíi ñä

cúu dä cómí cuéntá sahá yiquí cuñu ñä. Ta ni in dاتaa, dä natandaha co cómí ga dä cuéntá sahá yiquí cuñu da. Ñajihí dä cúu ñä cómí cuéntá sahá yiquí cuñu da. <sup>5</sup> Sahá ñä cán quéa ndítahan ndiquiāhva ny táhan ndó ta a cándají táhan ndó. Ta tá co cúu ndó cuju xitáhan ndó xíní ñúhú cacuu a sahá ñä sa najándique táhan tuhun ndó ñä a cuju xitáhan ndo sahá ñä cúu ndó caca tahví ndó nu Ndióxi chá tiempo. Joo tá nandhi xíní ñúhú ndique táhan tuco ndó jáchí tiahva ná jácahan Satanás, mé tiñáhá saquaha ndohó ñä ná caja ndó cuachi sahá ñä a cuu cahnu ndó nuu ñä xíca ini yiquí cuñu ndó caja.

<sup>6</sup> Tóco ndihi ñä cahán i xihín ndo yóho co cúní cachei a ñä xíní ñúhú tándahá ndo vatí cuu tandahá ndo tá cúní ndo. <sup>7</sup> Vatí mé a ndaa cájii íní i tá ná canduu tacú ndihi ndó tátuhun yehe. Joo sa jíin sa jíin nacaja Ndióxi xihín in in í. Java na ñéhe tähvi ná tandaha ná ta java na ñéhe tähvi ná canduu tacú na.

<sup>8</sup> Ndá ná ndúu tacú xihín ndá ná ndúu cuáan, ñä vaha chágá quéa ná a tándahá ná ta ná canduu na tátuhun yehe. <sup>9</sup> Joo tá co ndee ini na cahnu na yiquí cuñu na, vaha chágá ná tandahá ná jáchí vaha chágá ná tandahá ñayivi a juú ga ñä ná ndiava íní na coo na xihín na co cúu yíi ná á ñajihí na.

<sup>10</sup> Ta nu ndohó, ná sa fín yíi á ñajihí, sáhndá i chuun nu ndó ñä ná a jándacoo táhan ndó. Ta ñä sáhndá i nu ndo yóho co cúu á ñä naquixi jini mí i. Cúu á ñä sáhndá Ndióxi caja ndó. Co ndítahan nuu in ñáñáha jándacoo ná yíi ñä. <sup>11</sup> Ta tá ná jándacoo ñä dä, co ndítahan nu ñä tandahá ñä xihín inga da. Á tá coó ta ñä ndítahan caja ñä quéa ndique táhan maní tuco ñä xihín yíi ñä. Ta jári in dاتaa co ndítahan nu dä jándacoo da ñajihí da.

<sup>12</sup> fín java ga ñaha cúní cahen i xihín ndo. Mí i cahán i ñä vaha caja ndó ñä vatí mé a ndaa co cúu á ñä násahnda Ndióxi nuu i jánahá i nu ndo. Ta ñä yóho quéa ñä cahen xihín ndo. Tá fín in dä cúu cuéntá Jesús ta fín ñajihí dä, ñä co cúu cuéntá Jesús. Ta tá cájii ini ñä coo ñä xihín dä já quéa co ndítahan nu dä jándacoo da ñä. <sup>13</sup> Ta tá fín in ñä cúu cuéntá Jesús ta fín yíi ñä, dä co cúu cuéntá Jesús. Ta tá cájii ini da coo da xihín ñä já quéa co ndítahan jándacoo ñä dä. <sup>14</sup> Jáchí caja yii Ndióxi in dاتaa sahá ñä

íin da xihín nájihí da, ña cùú cuéntá Jesús. Ta jári cája yii Ndióxi in náñáha sahá ña íin ná xihín yíi ña, da cùú cuéntá Jesús. Jári cája yii Ndióxi jahyi na yóho ná a cácuu na tátuhun na co xíní Ndióxi. Ta xihín ña yóho cuu candaa ini na ndaja íin íchí cuéntá Jesús.<sup>15</sup> Joo tá cúní yíi ndó á nájihí ndo, na co cùú cuéntá Jesús jan, quee na cuhun na já quéa quiahva ndó ñamani nu ná caja na ña. Jáchí co ndítahan nu ndó caja ndúsa ndó xihín na co xíní Ndióxi cán ña ná coo na xihín ndo. Jáchí cúní Ndióxi ña ná canduu vii ndo.<sup>16</sup> Ta ni co xíní ndó á ndiquehe yíi ndó á nájihí ndo íchí cuéntá Jesús, a a ndiquehe na ña.

<sup>17</sup> Ta cáxi tuhun i nu tóco ndihi na cùú cuéntá Jesús ndúu ndijáa veñuhu ña ndítahan coo na tá quiahva nasañiin na tá nandihvi na íchí cuéntá Jesús jáchí quiahva já cúní Ndióxi.<sup>18</sup> Ta tá naquihvi ndó íchí cuéntá Jesús ta sa ndácaan marca yiquí cuñu ndó coo caja toho a. Joo tá coo marca jan yiquí cuñu ndó co ndítahan chícaan ndó ña yiquí cuñu ndó. Jáchí coo caja toho a á íin marca yiquí cuñu ndó á coo a. Ña cúní Ndióxi quéa ná caja ndó ña sáhndá mé a nu ndo caja ndó xihín ndinuhu ini ndó.

<sup>20</sup> Ta ndítahan coo ndó tá quiahva nasañiin ndó tá nandiquehe ndó íchí cuéntá Jesús.

<sup>21</sup> Ta tá nasaçuu ndó ña naxeen xitoho ndó caja chiuun ndó tá nandiquehe ndó íchí cuéntá Jesús já quéa co ndítahan ndicani ini ndó sahá. Joo tá ná quiahva xitoho ndó íchí nu ndó ña ná quee ndó cuhun ndó já quéa caja ndó ña. <sup>22</sup> Jáchí da cùú cuéntá Jesús cùú dá da najihí Ndióxi nyú cuachi da vatí cándoo da cája chiuun da cuéntá xitoho da, da naxeen ñahá. Ta da naxica núná mé tá nandiquehe da íchí cuéntá Jesús cùú dá mozo cuéntá Jesucristo. <sup>23</sup> Jáchí yahvi ndivaha náchahvi Ndióxi sahá ndó tá naxihi Jesucristo ndica crúux ña ná cacomí a cuéntá sahá ndo. Sahá ña cán quéa a ndíquiähva toho ndó mé ndó ndáha ñayivi ña ná cahnu na ndohó. <sup>24</sup> Candehe ndo ñani mí i, na cùú cuéntá Jesús. Ndítahan coo ndó tá quiahva nasañiin ndó tá nacana Ndióxi ndohó cacuu ndó cuéntá mé á jáchí íin mé a xihín ndo.

<sup>25</sup> Ta viti cúní cahen i sahá na tacú, na cámanti tandaha. Coó nacachi toho Ndióxi xihín i sahá ña yóho ña cán quéa cahen i ña cahvi ini mí i sahá. Ta cuu candusa ndó ña cahen i xihín ndo jáchí nacaja Ndióxi

ñamani xihín i ña cùú u in da tacu ini.<sup>26</sup> Ta cáhán i ña ndítahan coo tacu in dataa jáchí ihvi ndivaha cáá tiempo ndúu viti.<sup>27</sup> Joo tá íin nájihí ndo, a jándacoo ndó ña. Ta tá coo nájihí ndo, a ndúsa ndó ña. <sup>28</sup> Joo a juú cuachi quéa cája ndó tá ná tandaha ndo. Ta ni a juú cuachi quéa cája in ña tacu tá ná tandaha ña. Joo mé a ndaa ná cahan i xihín ndo, yáncá a tá ná tandaha ñayivi jáchí cuahá ndivaha ndoho ini na. Ta co cúní ña ná ndoho ini ndó já sahá ña cán quéa cahen i ña yóho xihín ndo.

<sup>29</sup> Candehe ndo ñani i, na cùú cuéntá Jesús. Ña cúní cachi i cùú ña yóho: Sa nacayati tiempo quixi Jesucristo. Sahá ña cán quéa na íin nájihí xíní ñúhú ndíhi ini na caja chiuun na cuéntá mé á tá quiahva cája chiuun na tacu cuéntá mé á.<sup>30</sup> Ta ndá ña ndúu cuéhá ndivaha ndítahan caja na tátuhun na cajii ini. Ta na cajii ini ndítahan caja na tátuhun na ndúu cuéhá ndivaha ini. Ta na xéen ñaha ñuyíví yóho ndítahan caja na tátuhun naxeen na ña co cùú ñaha na.<sup>31</sup> Ta na cómí ñaha ñuyíví yóho, xíní ñúhú ndindójó ña sahá ñaha cán. Jáchí vaxi quivi ndihi sahá ñuyíví yóho xihín tóco ndihi ñaha fin nu á.

<sup>32</sup> Na cúní yehe quéa ña ná a ndícani ñahá ini ndó sahá ñaha ñuyíví yóho. Jáchí tá cámanti tandaha in dataa já quéa núná nu dá caja chiuun da cuéntá Ndióxi xihín ndinuhu ini da. Ta ndúsa da ndá quiahva caja da ña cajii ini Ndióxi xihín.<sup>33</sup> Joo da sa natandaha ndítahan caja chiuun da ñuyíví yóho já ná cana ña cuxu na vehe da. Ta cája da ña cajii ini nájihí da xihín.<sup>34</sup> In da natandaha co xíní da ndíha ndíhi chágua ini da sahá, á Ndióxi á nájihí da. Ta jári nájihí tá cùú ná na tacu ndíhi ini na caja na ña cúní Ndióxi jáchí ndíquiähva na mé ná ndáha Ndióxi ña ná cacomí a cuéntá sahá yiquí cuñu na ta sahá ínimá ná. Joo nájihí ndúu yíi ndíhi ini na sahá chuu vehe na jáchí cúní na ña ná tahan ini yíi ná xihín ná.

<sup>35</sup> Cáhan i ña yóho xihín ndo jáchí cúní chindeé e ndohó ta co cahen i ña sahá ña co cúní ña ná tandaha ndo. Ña cúní quéa ná núná nu ndó caja chiuun ndó cuéntá Ndióxi xihín ndinuhu ini ndó ta ná a cají nuu ni in ñaha nu ndó caja ndó ña cúní Ndióxi.

<sup>36</sup> Ta ndá da íin jahyi jihí ta cáhán da ña ndítahan tandaha ña jáchí sa cuahá cuia ña já cuu quiähva da ña ña ná tandaha ña tá

cúní da. A juú toho cuachi cúu ña yóho.<sup>37</sup> Ta tá cahán ndo ña co ndítahan toho tandahá jahyi ndó ta cahán ndo ña cajii ini ñá ña coo mé ñá já quéa vaha va caja ndó tá co caja ndusa ndó xihín ñá ná tandahá ña.<sup>38</sup> Vaha caja in dñataa tá sáhan da ñamani nuú jahyi jíshí da ña ná tandahá ña. Joo vaha chágá caja da tá co caja ndusa dñ xihín ña ña ná tandahá ña.

<sup>39</sup> Ta a cuyú tandahá in ñáñáha xihín inga dñataa nani tacú yí ña. Joo tá naxíhi yí ña já quéa cando núná nu ña tandahá tucu ña. Joo ndítahan tandahá ña xihín da cuyú cuénta Jesús. <sup>40</sup> Vatí cahán i ña cajii chágá ini ñá tá ná a tándahá tucu ña. Ña yóho quéa cahvi ini i sahá ña yóho. Ta ínimá yii Ndióxi quéa jácahan yehe cahí i ña yóho xihín ndo.

## 8

*Cáhan Pablo sahá ña najoco ñayivi nuú yoco*

<sup>1</sup> Ta viti cúní ndicani i nu ndo sahá ña ndítahan caja ndó xihín ña najoco na nuú yoco. Vatí cuyú á ña ndaa tá cahí java na ña xíni vaha na sahá ña yóho joo tá cahán yo cuyú yó na xíni vaha já quéa cásahá yo ndínehe jíco yo mí. Joo tá quíhvi iní ñani táhan í já ndindacú chágá yó xihín ñaha Ndióxi. <sup>2</sup> Tá ndúu java na tañu ndó ta cahán na ña sa xíni na ndaja táhan ñaha, na yóho náhá ña cámaji cándaa ini na ña ndítahan candaan ini na. <sup>3</sup> Jáchí mé a ndaa xíni vaha Ndióxi ndá na cuyú na quíhvi iní mé á.

<sup>4</sup> Ta viti cáhan i xihín ndo sahá ña najoco na nuú yoco. Cándaa caxí iní ña coó a cuyú toho yoco ndúu ñuyiví. Ta cándaa caxí iní ña in táláá Ndióxi cuyú ndusa Ndióxi. <sup>5</sup> Vatí cahí ñayivi ña ndúu cuahá ndioxi ta ndúu cuahá xitoho indíví xihín ñuyiví <sup>6</sup> joo mí cándaa vaha iní ña ín in tühún Ndióxi, mé a cuyú tátá yo. Ta mé á quéa nacavaha tóco ndihí ñaha. Ta nacavaha mé a mí ña ná caja cahnu í mé á. Ta ín in tühún xitoho í ña cuyú Jesucristo. Ta mé á quéa caja ña ná coo tóco ndihí ñaha ta caja ña ná catacum víti.

<sup>7</sup> Joo a juú tóco ndihí na cuyú cuénta Jesús xíni ña yóho. Jáchí java táhan na sa caja cahnu yoco sanahá cán tá xíni na ña najoco ñayivi nuú yoco cahán na ña cuyú á ña najoco na nuú yoco ndioxi. Ta xihín ña yóho cahán na ña cuyú ná na sa nayuxu sahá ña naxixi na ña najoco ñayivi nuú yoco. Ta co

xíni na á ndítahan cuxu na ña á co ndítahan cuxu na ña. <sup>8</sup> Cándezhé ndo. Co ndíquehe toho Ndióxi mí sahá ña xíxi. Jáchí co cuyú yó na ín chágá sahá tá xíxi in ñaha. Ta ni co cuyú yó na coó sahá tá co xíxi ñaha. <sup>9</sup> Joo xíni ñúhú candehé ndo ña ná a jándicava ndó inga na nuú cuachi sahá ña caja ndó jan. Jáchí vatí xíni vaha ndó ña cuu cuxu ndó ña cán joo ndúu java na vitá cuahán íchi cuénta Jesús. <sup>10</sup> Cuyú á tátuhun sácoo ndó cuxu ndó nu cayahvi ña najoco na nuú yoco jáchí sa xíni ndo sahá ña yóho. Ta nani ín ndó xíxi ndó jan yáha in dñ cuyú cuénta Jesús, da vitá xihín ñaha Ndióxi. Ta sahá ña xíni da ndohó já quíhvi da jan xíxi da xihín ndo vatí cahán da cuyú á cuachi. <sup>11</sup> Xihín ña caja ndó jan cuu jándicava ndó da vitá xihín ñaha Ndióxi cán nuú cuachi vatí xíni vaha ndó ña co caja ndó cuachi tá ná cuxu ndó ña najoco na nuú yoco. Xíni ñúhú ndicuhun ini ndó ña naxihí Jesucristo sahá da jan. <sup>12</sup> Tá jándicava ndó ñani ndó, da vitá xihín ñaha Ndióxi cán nuú cuachi já quéa caja ndó cuachi nuú Jesucristo viti. <sup>13</sup> Sahá ña cán quéa tá ná jándicava i ñani i nuú cuachi sahá ña xíxi i cuñu, ña najoco na nuú yoco caja i cuénta a cuxu ga i ña já ná a jándicava i inga da nuú cuachi.

## 9

*Ña núná nuú in na apóstol caja*

<sup>1</sup> Mé a ndaa yehe cuyú u in apóstol cuénta Jesucristo sahá ña cán quéa núná nuú i caja i ña caja in apóstol. Jáchí mí i sa naxini i xihín nuú i Jesucristo, xitoho í. Ta mé ndó nandiquehe ndó íchi cuénta mé á sahá chuun nacaja i ta ña yóho náhá ña mé a ndaa caja chúun i cuénta mé á. <sup>2</sup> Caja i cuénta ndúu java na ta co ndíquehe na yehe tátuhun in apóstol cuénta Jesucristo. Joo ndohó ndítahan ndiquehe ndó yehe jáchí naduun ndó cuénta mé á sahá chuun nacaja i. Ta xihín ña yóho náhá ña mé a ndaa cuyú u in apóstol cuénta mé á.

<sup>3</sup> Ta ña yóho cuyú tyuhun ndúcú ñehe e nuú na cáhan núu sahá i jan: <sup>4</sup> Ín sahá i ña ná coto ndó yehe. <sup>5</sup> Ta tá ná coo ñajíshí i, ña cuyú cuénta Jesús ín sahá i candaca i ña caca nuu i tá quíhva caja Pedro xihín java ga na apóstol xihín ñani Jesucristo, xitoho í. <sup>6</sup> Á cahán ndo ña in tühún yehe xihín Bernabé cuyú nde da coó sahá ña ná coto na cuyú cuénta Jesús ndehe, vaha. <sup>7</sup> Jáchí ni

in túhún toho soldado co quéhe da jiuhún mé dá ta já xito da mé dá. Jári ndá dā xútu yító uva, cuu caxí dā uva cána nū dó cán jáchí já cáni a coo a. Ta jári ndá dā ndáá ndicachi cuu coho da leche ndicachi ndáá dā cán jáchí já cáni a coo a. <sup>8</sup> Ta a juú cahán ndō ñā cahán i ñā quíxi jini mé cuití vi jáchí cachí ley mé Moisés ñā yóho viti. <sup>9</sup> Já cachí a já: “A chícaun núnú yuhú tindiqui nani caja chúun rí sáni rí trigo. Joo xíní núhú quiaghvún ñamani nu rí caxí rí a”, cachí tühun Ndióxi. Joo co ndíhi ini Ndióxi sahá tindiqui cuití va. <sup>10</sup> Sahá mí ví nacahyí Moisés ñā yóho ta sahá mí ví cahán ñā yóho tá cachí a já. Cúu á tátuhun caja dā xútu tátí xihín da jáquee tátí jáchí ndáti ndíví dā ndiquehe da táchan nuní cán sahá ñā nacaja chúun da xihín á. <sup>11</sup> Tá nacahán nde tühun Ndióxi xihín ndó já cuu á tátuhun nachihin nde tata cuéntá Ndióxi ini ínimá ndo. Sahá ñā cán quéa ndítahan nu ndo chíndee loho ndó ndehe xihín ñā cómí ndo jáchí nájáhá nde tühun Ndióxi nu ndo. <sup>12</sup> Ta mé a ndaa ín chágá sahá mé nde ñā coto ndó ndehe a juú ga inga na.

Ta vatí ndítahan nu ndó coto ndó ndehe joo coó nacaja ndúsá nde xihín ndo ñā ná caja ndó ñā. Ta cuahá tañu caja ndee ini nde jáchí co cúní nde cají nuu nde ñā ná ndicuita nuu tühun vaha sahá Jesucristo. <sup>13</sup> Mé ndó sa cándaa vaha ini ndó ñā núná nuú na caja chúun ini veñihu cuxu na ñā jóco ñayivi nu Ndióxi. Ta ná caja chúun nu ná Ndióxi veñihu núná nu ná cuxu na cuñu quíti, rí najoco ñayivi nu Ndióxi. <sup>14</sup> Ta quiahva já caja chúun nde cuéntá Jesucristo, xitoho í cahán nde tühun vaha sahá mé á. Ta nasahnda mé á chuun ñā ná coto na cuú cuéntá mé á ndehe sahá chuun caja nde. <sup>15</sup> Joo ni in túhún tañu coó nacaja ndúsá i xihín ndo ñā ná coto ndó yehé vatí cáni nu ndó caja ndó ñā. Ta ni co cahyí i carta yóho nu ndo já ná quiahva ndó ñáha nuú i, vaha. Jáchí mé a ndaa ín vaha ini i cahán i tühun Ndióxi xihín ndo ta coó caja toho a ñā ná quivi i joco.

<sup>16</sup> Yehé co ndínehe jícó i mí i sahá ñā xíca nuu i cahán i tühun vaha sahá Jesucristo nuú ñayivi jáchí cuú á chuu ndítahan nuú i caja i. Ta ndáhví náhá nacuu u tá ná caja saá ini i caxí tühun i ñā. <sup>17</sup> Tá ná caja i chuu yóho sahá ñā cúní mí i cuití va já quéa cuu quehe e yahvi sahá. Joo co caja toho i já

jáchí nacaxi Ndióxi yehé cahán i tühun mé á sahá ñā cán quéa ndúsá caja i ñā. <sup>18</sup> Ta sa mé yahvi quéhe e sahá chuun caja i quéa cají i ini i tá cahán i tühun vaha sahá Jesús nuú ñayivi ta co chahvi na sahá. Ta cají i ini i jáchí co caja ndúsá i xihín ndo ñā ná coto ndó yehé tá quiahva caja ndó xihín java ga na cahán tühun Ndióxi xihín ndo.

<sup>19</sup> Vatí mí i co cuú u mozo ñayivi joo caja chúun i mí i tátuhun mozo sahá tóco ndíhi ñayivi. Jáchí caxí tühun i tühun vaha sahá Jesucristo nu ná já cuu ndicuahá chágá na cuú cuéntá Jesús. <sup>20</sup> Tá xíca nuu i tañu ná Israel ndája i mí i tátuhun in da Israel jáchí ñā cúní quéa ná ndiquehe na íchi cuéntá Jesús. Ñá cúní cachi i quéa tá fin i tañu ná caja ley Moisés in caja i xihín ná vatí co ndíco i íchi cuéntá ley Moisés viti. Joo caja i ñā sahá ñā cúní i ñā ná ndiquehe na íchi cuéntá Jesús. <sup>21</sup> Ta tá xíca nuu i tañu ná co caja ñā sáhndá ley Moisés já caja i tá quiahva caja mé ná jáchí cúní ñā ná ndiquehe na íchi cuéntá Jesús. Joo co caja i cuahí tá quiahva caja ná cán jáchí sáhndá ley Ndióxi chuu nuú i viti ta caja i ñá cúní Jesucristo cuití va. <sup>22</sup> Ta tá xíca nuu i tañu na vitá xihín ñaha Ndióxi já quéa jánuu ndáha i mí i jáchí cúní ñā ná ndindacú ná xihín tühun mé á. Ñá cúní cachi i xihín ndo quéa ndája i mí i tátuhun ndá ná nacuu va jáchí cúní quee vaha i xihín ná já ná ndíhvi na íchi cuéntá Jesús ñá ná cazu ndaa ínimá ná. <sup>23</sup> Caja i tóco ndíhi ñá yóho já quéa ná ndicuita nuu tühun vaha cahán sahá Jesucristo. Jáchí xihín ñá yóho caja cuahá Ndióxi ñamani xihín i.

<sup>24</sup> Candehé ndo. Sa xíní vaha ndó ñā tá jáquehe táchan java taa tühun da ñā ná cunu da, mé a ndaa tóco ndíhi da ndúcú ndéé dā xínu da. Joo in túhún dā quee vaha. Ta já quehe da ñā ndítahan nu dā quehe da. Quiahva já ndítahan caja ri ndóhó va. Xíní núhú nducú ndo cuhun vaha ndó íchi cuéntá Jesús janda quiahva ná xíní coo ndó janda nu ndíhi cuíi já ná quiahva Ndióxi nu ndó ñā ndítahan ndiquehe ndó. <sup>25</sup> Tóco ndíhi ñayivi tá caja tiahva na mé ná ñā ná cuhun ná cunu na, co cúní ná caja na ndá ñā nacuu jáchí ndáá ná mé ná. Tóco ndíhi ñā yóho caja na sahá ñā cúní ná quee vaha na ñā ná ñehe ná in tiyivi ita sánúu jini ná vatí cama chá íchi ita cán. Joo mí ndúcú ndéé yo cuahán yó íchi cuéntá Jesús jáchí ñā ndátá

mí quiāhva Ndióxi nu yo co ndíhi sahá anda ama cáá quivi.<sup>26</sup> Joo co cíúu u in da xínu cuáá. Ta ni co cíúu u tátuhun in da jácana yíquí nuú tachí. Jáchí ndúcú ndéé e quee vahá i já ná ndiquehe e ña quiāhva Ndióxi nuú i.<sup>27</sup> Ña caja i quéa cája ndusa i xihín yíquí cuñu i ña ná caja i ña cúní Ndióxi. Jáchí a juú tiahva náá jándacoo Ndióxi yehe vatí mí i cíúu u da najánaha tuhun Ndióxi nuú ñayivi.

## 10

*Cáhan Pablo ña co ndítahan caja cáhu na yoco*

<sup>1</sup>Candehé ndo ñani i, ña cíúu cuéntá Jesús. Co cúní ña ná ndindójó ndo ndá quiāhva nacaja Ndióxi sanahá xihín tásahnu jíco yo tá násandaca mé á ña yucú íchí cán. Nacaja mé á ña ná xínu in víco núhú xoo nuú cuahán na ña ná candaça a ña. Ta náchindeé a ña ña ná cuu cojo cava na tañuhú naní tañuhú cuáhá.<sup>2</sup> Ta tóco ndíhi na cán in nanduu ndíhi na xihín Moisés tá nayaha na tañuhú nani ndáca víco núhú na. Nasacuu a tátuhun nacandúta ná ña ná cacomí Moisés cuéntá saha ná.<sup>3</sup> Ta tóco ndíhi na cán naxixi na ña náchindahá Ndióxi, ña naquixi a nu ná chí indíví.<sup>4</sup> Ta quiāhva já tóco ndíhi na cán naxihí na ticuí, dó nasañan mé á nu ná coho na. Mé ticuí cán cíúu dó dó nacana tixi in tóto. Ta mé tóto cán cíúu á tátuhun yuhú nuu Jesucristo, mé a nasañin xihín ná nani naxixa nuu na yucú íchí cán.<sup>5</sup> Joo cuahá ndivaha táhan na cán nacaja na ña náu ña co cajíi iní Ndióxi xihín. Sähá ña cán quéa naxihí na mé yucú íchí nu xíca na cuahán na cán.

<sup>6</sup>Tóco ndíhi ña nayaha yóho jáñahá nu mí ña co ndítahan ndíavá iní ña co táchán iní Ndióxi xihín tá quiāhva nacaja na cán. <sup>7</sup>Sähá ña cán quéa coto a juú caja cáhu ndó yoco tá quiāhva nacaja java na cán jáchí já cachí tuhun Ndióxi já: “Tóco ndíhi ñayivi cán nasaanduu na xíxi na ta xíhi na ta já nandicuña na xítá sahá na ña caja cáhu na yoco”, já nacaja na cachí tuhun Ndióxi.<sup>8</sup> Joo mí xíni núhú candaña mí já ná a caja i cuachi ña quiāhvi nuu i xihín inga najihí á xihín inga dætaa tá quiāhva nacaja java na cán. Ta sahá cuachi nacaja na cán naxihí oco uní mil na in tühún quiāhvi.<sup>9</sup> Ta co ndítahan nu yo coto ndojó yo Jesucristo, xitoho í ña ná candehé yo á mé a ndaa jándoho a iní sahá cuachi caja í. Jáchí quiāhva já nacaja java

na cán va ta sahá ña cán naxihí na nacaja cuahá coo.<sup>10</sup> Coto a cáhan cuéhé ndó sahá Ndióxi tá quiāhva nacaja java tásahnu jíco yo cán. Jáchí sahá ña nacaja na naxihí na nacaja tátó Ndióxi, mé a xíca sáhní ñahá.

<sup>11</sup>Tóco ndíhi ña nayaha xihín tásahnu jíco yo cíúu á ña náhá nu yo ña co ndítahan quehe núu i Ndióxi. Ta nacahyí a nyú tuhun Ndióxi já ná cuni mí, yó ndúu tiempo yóho ña co ndítahan caja i tá quiāhva nacaja na cán jáchí sa nacayati quivi ndíhi sahá ñuyiví.<sup>12</sup> Ña cán quéa tá cáhan ndo cuahán vahá ndó fchí cuéntá Ndióxi já quéa xíní ñuhú cardaa vahá ndó mé ndó já ná a ndícava ndó nuú cuachi.<sup>13</sup> Candehé ndo. Xíní ñuhú ndicuhun ini ndó ña a juú mé ndó cuítí quixi tondóhó nuu jáchi quixi tondóhó jan nu tóco ndíhi java ga ñayivi. Ta ndítahan candeé ini ndó Ndióxi jáchí a quiāhva toho mé á ñamani ña ná quixi tondóhó náhnu nu ndó ña co candeé ndó xihín. Ña caja Ndióxi quéa chindeé a ndohó tá ná quixi tondóhó nu ndo já ná cuu caja ndee ini ndó tá ná ndoho ndó ña.

<sup>14</sup>Candehé ndo ñani i, na cíúu cuéntá Jesús. Xíní ñuhú jándacoo vaha ndó ña caja cáhu ndó yoco.<sup>15</sup> Tá quiāhva cáhan i xihín ñayivi tácu ini quiāhva já cáhan i xihín ndo. Ta mé ndó candaña vahá ini ndó á ndaa á a ndáa quéa cáhan i xihín ndo.<sup>16</sup> Ná ndiquiahva í ndixahvi nu Ndióxi tá ndicuhun iní sahá ña nacaja Jesucristo tá naxihí a sahá yo. Jáchí tá xíhi vino ña yii já cúní cachei a ña in nanduu xihín mé á sahá ña naxiña nii mé á ndica crúxu sahá yo. Ta jári tá xíxi pan ña yii ña sáhdá java nu táhan í cúní cachei a ña in nanduu xihín mé á jáchí nandiquiahva yíquí cuñu a sahá yo.<sup>17</sup> Ta vati cuahá ndivaha cíúu yó joo in tühún pan sáhdá java í xíxi jáchí xihín ña yóho náha ña in cíúu ndíhi xihín Jesucristo.

<sup>18</sup>Xíní ñuhú candehé ndo ndá quiāhva caja na Israel jáchí tá sáxi na cúní quítí, rí najoco inga na nu náa cán já cíúu á tátuhun mé ná náshní na mé quítí cán ta najoco na ri. Quiāhva já yáha xihín mé ndó tá sáxi ndó cuñu ña najoco na nuú yoco. Cíúu á tátuhun najoco mé ndó ña.<sup>19</sup> Joo xíní ñuhú ndicuhun ini ndó tá cachí i ña yóho xihín ndo co cúní cachei i ña ím sahá yoco. Ta ni co cúní cachei i ña ím chágá sahá cuñu najoco na nuú yoco a juú ga inga cuñu.<sup>20</sup> Ña cúní cachei i xihín ndo quéa tá ná joco ñayivi, na

co xíní Ndióxi jan in quítí nuú yoco cútú á tátuhun jóco na jan ri nuú tiñáhá va. Ta co cája toho na ña nuú Ndióxi. Ta cáxi tuhun i ña yóho xihín ndó já ná a cáxi ndó cuñu jan jáchí tá ná caxí ndó ña cacuu a tátuhun najoco ri ndóhó va ña nuú tiñáhá.<sup>21</sup> Jáchí a cuú cuhun ndo coho ndó ña najoco na nuú rí quiñi ta já quixi ndó coho ndó ña yii cuéntá Jesucristo, xitoho í. Ta ni a cuú cuxu ndó ña najoco na nuú rí quiñi ta já cuxu ndó ña yii, ña xíxi na tá ndicuhun ini na ña naxíhi Jesucristo, xitoho í.<sup>22</sup> A cája ndó ña yóho jáchí cútú á tátuhun cúní ndó jácojo ndó ini Ndióxi. Xíní ñúhú ndicuhun ini ndó ña co cútú ndó na ndacú chágá a juú ga Ndióxi.

Sahá ña quíhvi iní ñani táhan í co ndítahan caja í ndá ña quacuú cúní mí caja í

<sup>23</sup> Ndúu java na ta cachí na já: "Núná nuú yo caja í ndá ña cúní mí caja í." Vatí ña yóho cútú á ña ndaq joo a juú ndihí ña cája í cája vaha xohó. Mé a ndaq núná nuú yo caja í ndá ña cúní mí joo co chíndeé a mí cuahnu í xihín ñaha Ndióxi.<sup>24</sup> Co ndítahan nuú yo nducú yó ña vaha mí cuití yo. Ndítahan ndihí iní caja í ña vaha sahá ñani táhan í.

<sup>25</sup> Cuu caxí ndó ndijáá cuñu cayahvi nuú yahvi ta a ndáca tuhún ndó ndajá naquixi a já ná a cahví ivi joho ini ndó xihín á.<sup>26</sup> Jáchí ñaha Ndióxi, xitoho í cútú ñuyíví yóho xihín tóco ndihí ña fin nuú á.

<sup>27</sup> Candehé ndo. Tá ná cana in na co cútú cuéntá Jesús ndohó ña nuú cuhun ndó cuxu ndó xihín ná, cuáhán ndó tá cúní ndó ta cuxu ndó tóco ndihí ña sácu na nuú ndó cuxu ndó. Ta a ndáca tuhún ndó na á naquixi a nuú yoco. Cuxu ndó ña jáchí tá ná ndáca tuhún ndó na já cuu casáhá ndicani ini ndó xihín á.<sup>28</sup> Joo tá sa nacaxí tuhun yachí na xihín ndó ña cútú á cuñu najoco na nuú yoco já quéa a cuxu toho ndó ña. Jáchí tá ná cuxu ndó ña já quéa caja ndó ña ná a vaha cuu ini mé na cán.<sup>29</sup> Cáhan í ña yóho jáchí cúní ña ná caja vaha ndó sahá inga na. Co cahán i ña sahá mé ndó.

Mé a ndaq ndúu java ndó ta cahán ndó ña co ndítahan ndihí ini ndó sahá ña cahví ini inga na jáchí cahán ndó ña núná nuú ndó caja ndó ña cúní ndó.<sup>30</sup> Ta java ndó cahán ndó ña tá sa nandiquiahva ndó ndixahvi nuú Ndióxi sahá ña xíxi ndó já quéa a cuú cahán nuú ñayivi sahá ña cája ndó.<sup>31</sup> Joo cachí i xihín ndó ña xíní ñúhú candehé

vaha í ña cája í ná a jándicava í inga na nuú cuachi. Jáchí janda xihín ña xíxi ta xihín ña xihí, xíní ñúhú caja cahnu í Ndióxi.<sup>32</sup> Co ndítahan cacuú na jándicava inga ñayivi nuú cuachi jáchí tá cája í já cútú yó tátuhun yuu cánduhu jácachihin sahá ñayivi. A cája ndó já xihín na Israel ta ni xihín na tóho ta ni xihín na cútú cuéntá Jesús.<sup>33</sup> Ta tóco ndihí ña cája i, cája i ña ná cají ini ndihí ñayivi xihín. Ta co ndúcú u ña ná cají ini ñayivi já ná cuu cazu ndaa íníma ná.

## 11

<sup>1</sup> Xíní ñúhú caja ndó tá quiahva cája yehe jáchí quiahva já cája i ña nacaja Jesucristo, xitoho í.

<sup>2</sup> Ña ndítahan nuú naijíhí caja na tá cája cahnu na Ndióxi

<sup>3</sup> Cájíi iní i xihín ndo, ñani i, na cútú cuéntá Jesús. Jáchí níi tiempo ñúhu ini ndó sahá i ta cája ta cája ndó ña naijáhá i nuú ndó.

<sup>4</sup> Joo cúní ña ná candaq ini ndó ña cútú Jesucristo jini nuú in in tqa. Ta quiahva já in in tqa cútú dá jini nuú ñaijíhí dá. Ta quiahva já Ndióxi cútú á jini nuú Jesucristo.

<sup>5</sup> Sahá ña cán quéa tá co cández in dätzäa yijini dá nani xíca tähví dä nuú Ndióxi á nani cahán dä tuhun Ndióxi nuú táká ñayivi já quéa náha ña co cája cahnu da Jesucristo, mé a cútú jini nuú mé dä.

<sup>6</sup> Ta in ñáñáhá tá co chíjahvi ña jini ña nani xíca tähví ña nuú Ndióxi á nani cahán ña tuhun Ndióxi nuú ñayivi veñhu já quéa náha ña quéhe núu ña yii ña, dä cútú jini nuú mé ña. Cúu á tátuhun naijatá ña jini ña.

<sup>7</sup> Jáchí tá co chíjahvi in ñáñáhá jini ña janda vaha chágá ví ná jatá tähví ña jini ña. Joo tá cahán ña ña quini canáhá jini ña tá ná jatá tähví ña jini ña já quéa xíní ñúhú chíjahvi ña jini ña.

<sup>8</sup> Co ndítahan toho nuú in dätzäa chíjahvi da jini dä veñhu jáchí mé dä cútú dä dä nacavaha Ndióxi xihín yuhú nuú mé á. Ta mé dä cútú dä dä náha ndá quiahva cahnu cútú Ndióxi. Ta náha in ñáñáhá ña yii ña cútú dä jini nuú ña.

<sup>9</sup> Jihna ñúhú nacavaha Ndióxi dätzäa ta já nacavaha mé á in ñáñáhá chideé ña dä.

<sup>10</sup> Ta sahá ña jihna ñúhú ga nacavaha Ndióxi

dataa sahá ña cán quéa ndítahan nuú in ñáñáha chijahvi ñá jini ña ná náha ñá nuú tátó Ndióxi ña mé a ndaa caja cáhnu ñá yíi ña. <sup>11</sup> Joo mí, na cíú cuénta Jesús ndítahan candaas iní ña xíní ñúlhú táhan taa xihin ñáha. <sup>12</sup> Vatí nacavaha Ndióxi ñáñáha nuú cuítí xihin láis yiquí ndícá dataa joo viti tóco ndihí dатаa cácu da ñuyíví yóho caja najihí. Joo tóco ndihí ñayivi tácu na jáchí já cúní Ndióxi.

<sup>13</sup> Mé ndó xíní ñúlhú candehé ndo á vaha á a vaha toho ña ná a chijahvi in ñáñáha jini ña nani xíca tähví ña nuú Ndióxi veñuhu.

<sup>14</sup> Jáchí sa cándaa vaha iní ña a vaha toho caja dataa tá íin náni ijí jini dá. <sup>15</sup> Joo ndisáhnu náha ñáñáha tá íin náni ijí jini ña jáchí Ndióxi nasaħan ijí jini ña nuú ña já ná chijahvi a jini ña. <sup>16</sup> Joo tá ndúu java na ta co tähán ini na xihin ña cáhan i yóho já quéa co cúní toho i nditúhun ihvi i xihin ná sahá ña yóho. Jáchí xíní ñúlhú candaas ini na ña ndijáa java ga na cíú cuénta Jesús caja na tá quiāhva cachí i yóho tá tacá na veñuhu.

Jánani Pablo na cíú cuénta Jesús jáchí co caja ndisáhnu na tá tacá na cajíni na ña yíi cuénta Jesús

<sup>17</sup> Ta íin inga ñáha cúní cahán i xihin ndó sahá ta co tähán ini i xihin á. Jáchí nañehé e tuhun ña co caja vaha ndó tá tacá ndo veñuhu. <sup>18</sup> Cándezhé ndo. Sa nañehé e tuhun ña sáhndá java tähán ndó tá tacá ndo caja cáhnu ndó Ndióxi. Ta caja i cuénta cándusa i ña cáchí na sahá ndo. <sup>19</sup> Vatí mé a ndaa náha xíca a ña ndítahan cahnda tähán ndó já ná cuu cuni ñayivi ndá ndó cíú cuénta Jesús ta ndá ndó co cíú cuénta Jesús. <sup>20</sup> Ta sahá ña sáhndá tähán ndó nuú táca ndó jan, náha ña quéhe núu ndó ña yíi xíjíni ndó ta xihin ña yóho co cíú ga ña cuénta Jesús, xitoho í. <sup>21</sup> Jáchí tá ndíndaa hora cajíni ndó tá in tá in ndó sa jihna ñúlhú ndo ndáva ndó cuahan ndó quehe ndó ña cajíni mé cuití ndo. Ta java ndó ni co ñéhé ndó ña cuxu ndó. Joo java ndó xíhi ndó janda jaxíni ndó mé ndó. <sup>22</sup> Vaha chágá ná cuxu ndó ta ná coho ndó vehe ndó a juú ga ña ná quixi ndó quehe núu ndó veñuhu Ndióxi. Ta a vaha caja ndó jáchí co ñéhé na ndahví ña cuxu na caja ndó ta xihin ña yóho cácahan nuú ná. A cándati toho ndó ña cajíi iní i xihin ña caja ndó yóho jáchí a juú ña vaha quéa caja ndó.

Ña ndítahan caja na cíú cuénta Jesús tá xíjíni na ña yíi cuénta Jesús

(Mt. 26:26-29; Mr. 14:22-25; Lc 22:14-20)

<sup>23</sup> Na jáñahá i nu ndó yóho cíú ña najánahá Jesucristo, xitoho í nuú i. Jáchí mé ñiuú tá cámání ndiquiahva na mé a ndáhá na ihvi a já natiin a in pan. <sup>24</sup> Tá nandihi nandiquiahva ndixahvi nu Ndióxi já ñasaħħanda java ña ta já nacachi a já xihin ná: “Mé pan yóho cíú á tátuhun yiquí cuñu i ña ndiquiahva i sahá mé ndó. Xíní ñúlhú caja ndó ña yóho ña ná ndicuhun ini ndó ña naxiħi i sahá ndo”, nacachi Jesús. <sup>25</sup> Ta tá nandihi naxiħini na cán já natiin a in vaso nuú ñúhu to uva. Ta já nacachi a já: “Dó ñúhu ini vaso yóho cíú dó tátuhun nií i, dó cuja sahá ndó. Ta xihin dó yóho xínu coo nuú tuhun nasaħan Ndióxi nuú ñayivi sanahá tá nacachi a jáċcu a ñayivi. Ndijáa taħu tá ná coho ndó mé to uva, dó yíi ndítahan ndicuhun ini ndó ña naxiħi i sahá ndo”, nacachi Jesús. <sup>26</sup> Sahá ña cán quéa ndijáa taħu tá tacá ndó xíxi ndó pan ta xħi ndó to uva yóho cúní cachí a ña ndicuhun ini ndó ña naxiħi Jesucristo, xitoho í sahá ndo. Ta xíní ñúlhú caja ndó ña jandà quiāhva ná quixi tucu mé a ñuyíví yóho.

<sup>27</sup> Candehé ndo. Tá ná cuxu ndó pan ta tá ná coho ndó to uva, ña yíi cuénta Jesús, xitoho í ta co fin vií inimá ndo já quéa caja ndó cuachi nuú mé a ta quéhe núu ndó ña naxiħi a ndicá crúxu sahá ndo. <sup>28</sup> Sahá ña cán quéa tá cámání casáħħa cajíni ndó ña yíi cuénta Jesús xíní ñúlhú coto ndojó jihna ndó mé ndó á vií fnimá ndo nuú Ndióxi á coó vií a. <sup>29</sup> Jáchí tá ná cuxu ndaja nacuu ndó ña yíi cuénta Jesús já quéa náha ña quéhe núu ndó mé á. Jáchí ña xíxi ndó jan cíú á tátuhun yiquí cuñu mé a ta dó xíhi ndó jan cíú dó tátuhun nií á. Ta tá ná quehe núu ndó ña já quixi ña ndoho ini ndó caja Ndióxi. <sup>30</sup> Sahá ña caja ndó jan cuahá tähán ndó quishvi ta cuahá ndó cavitá ndó ta anda java na sa naxiħi ná sahá ña naquehe núu na ña yíi cuénta Jesús. <sup>31</sup> Joo tá ná coto ndojó yo mí ña á íin vií inimá yo nuú Ndióxi já quéa a ndítahan toho nuú mé a cíú xitoho í caja vií a sahá cuachi. <sup>32</sup> Joo tá jándoho mé a iní mí cíú á sahá ña co cúní a ña ná ndoho iní xihin ñayivi ñuyíví tá ná xínu coo quiví caja vií mé a cíú xitoho í sahá cuachi nacaja na cán.

<sup>33</sup> Candehé ndo, ñani i, na cíú cuénta Jesús. Ña ndítahan caja ndó cíú ña yóho.

Tá ná nditaca ndó cajíni ndó ña yii cuéntá Jesús xíní ñúhú candati táhan ndó janda quiāhva ná tacá tóccó ndihí ndó. <sup>34</sup> Ta tá cuíco ndó já quéa xíní ñúhú cuxu ndó vehe ndó já ná a jándoho Ndióxi ini ndó sahá ña caja ndó ña núu tá táca ndó cajíni ndó ña yii jan. Ta caja vií i sahá java ga ñaha tá ná saa i coto nihni i ndohó jan.

## 12

Ña ñéhe táchví ñayivi nu ínimá yii Ndióxi

<sup>1</sup> Candehe ndó, ñani i, na cíu cuéntá Jesús. Cáhyí i ña yóho nu ndo jáchí cúní ña ná candaq ini ndó ndaja sín ña sahan ínima yii Ndióxi nu yo.

<sup>2</sup> Mé ndó sa candaq vaha ini ndó ña tá cámán ndiquehe ndó íchí cuéntá Jesús já násacuu ndó tátuhun ñayivi cuáá jáchí násanduu ndó ndáha tá núu yoco, ña coó tachi cáhan. <sup>3</sup> Ta viti cúní caxí tuhún i xihín ndó ña ni in ñayivi a cuyú chícaan ná cháhan jata Jesús tá ta ínimá yii Ndióxi quéa sahan tuhun nu ná cahán ña. Ta tá cachí ná xihín ndinuhu ini in ña Jesús cíu xitoho na já quéa náha ña ínima yii Ndióxi quéa sahan tuhun nu ná cahán ña.

<sup>4</sup> Cuahá nuú ñaha ñéhe táchví ñayivi caja na cuéntá Ndióxi ta in tátuhun ínimá yii Ndióxi sahan ña nu ná. <sup>5</sup> Cuahá nuú chuun cuu caja ñayivi cuéntá Ndióxi ta tóccó ndihí caja chüun í cuéntá mé a cíu xitoho i. “Ta sa jíin sa jíin caja in in í chuun násahan Ndióxi nu yó caja i. Joo in tátuhun mé a quéa sahan ña yóho nuú in in í caja i.” Ta sahan Ndióxi in ñaha nuú in in í já náha ña ñúhu ínimá yii Ndióxi ini ta xihín ña yóho cuu chindeé yo tóccó ndihí ná cuú cuéntá Jesús. <sup>6</sup> Ínimá yii Ndióxi yóho quéa caja ña ná cuu candaq ini java ñayivi ndaja sín ña vaha xihín ña a váha ta já ndicani na ña nuú ñayivi. Ta sa mé ínima yii Ndióxi quéa caja ña ná cuu cahán ñayivi ña ndichí ndivaha. <sup>7</sup> Ta caja mé ínimá yii Ndióxi yóho xihín java na ña ná candeé cahnu ini na mé á. Ta sahan ínimá yii Ndióxi nuú java na ña ná cuu ndaja vaha na na quíhvi. <sup>8</sup> Java na ñéhe táchví ná caja na ña xituhún. Ta java na ñéhe táchví ná jáyaha na tuhun nácahan Ndióxi xihín na nuú ñayivi. Ta java na ñéhe táchví ná ndicuni na ndá na cíu na caja chüun cuéntá ínimá yii Ndióxi ta ndá na co caja chüun toho cuéntá mé á. Ta java na ñéhe táchví ná cahán na tuhun ña coó násatiāhva na. Ta java na ñéhe táchví ná

nducú ñehe na ña cúní cachi tuhun cahán na cán nyú ñayivi. <sup>11</sup> Ta sa mé ínimá yíi Ndióxi caja tóccó ndihí ña yóho ta in tátuhun mé a sahan nuú in in ñayivi ña sácú ini a caja chüun vaha na xihín.

*In cíu tóccó ndihí na cíu cuéntá Jesús sahá ña candeé ini na mé á*

<sup>12</sup> Candehe ndó. Cuahá ndivaha nu ndáca yíquí cünu í joo in víxí cíu á. Quiāhva já ín xihín na cíu cuéntá Jesús. <sup>13</sup> Ta quiāhva já yáha xihín tóccó ndihí mí, coó caja toho a á cíu yó na Israel á co cíu yó na Israel. Ta coó caja toho a á cíu yó na cómí in xitoho cuéntá saha, á cíu yó na xica núná mé. Jáchí caja ínimá yii Ndióxi ña cíu yó tátuhun in víxí ñayivi sahá ña in náduú xihín Jesucristo tá nácaandúta yó cuéntá mé á. Ta in tátuhun ínimá yii mé a násacu a ini ínimá in in í.

<sup>14</sup> Xíní ñúhú ndicuhun iní ña a juú in víxí nu ndáca yíquí cünu í jáchí cuahá ndivaha nu ndáca yíquí cünu ñayivi. <sup>15</sup> Candehe ndó. Cíu á tátuhun tá ná cahán in xoo saha yo já cachí a já: “Yehé co cíu toho i ndáha ñayivi sahá ña cán quéa coó chuun toho i nuú yíquí cünu na”, cachí a. Joo co caja toho ña cahán saha yo yóho jáchí cíu á cuéntá yíquí cünu í. <sup>16</sup> Ta cíu á tátuhun tá ná cahí in joho i já cachí a já: “Yehé co cíu toho i nduchú nuú ñayivi sahá ña cán quéa coó chuun toho i nuú yíquí cünu na”, cachí a. Joo co caja toho ña cahán joho i yóho jáchí cíu á cuéntá yíquí cünu í. <sup>17</sup> Jáchí caja mé ndó cuéntá ndaja caja í cuni joho í tá níi cíu yíquí cünu í ná cacuu a nduchú nuú yo. Ta ndaja caja í tahmí ñaha tá níi cíu yíquí cünu í ná cacuu a joho i. <sup>18</sup> Joo in in ña ndáca yíquí cünu í yóho násacu Ndióxi ña mé nu ndítahan coo a jáchí já násacu ini a caja. <sup>19</sup> Xíní ñúhú caja ndó cuéntá tá in víxí joho ná candaca níi cíu yíquí cünu í já quéa co fin ndihí toho yíquí cünu í. <sup>20</sup> Ta vatí cuahá ndivaha nu ndáca yíquí cünu in in í joo in víxí cíu yíquí cünu í. Ta quiāhva já ín a xihín ná cíu cuéntá Jesús.

<sup>21</sup> Candehe ndó jáchí sácú u in quiāhva nu ndo: Nduchú nuú yo a cíu cachi a xihín ndáha yo ña co xíní ñúhú a ña. Ta ni yíquí jíní yo a cíu cachi a xihín saha yo ña co xíní ñúhú a ña. <sup>22</sup> Ña yáha xihín yíquí cünu í cíu ña yóho. Java tañu cahán yo ña vitá in ñaha ndáca yíquí cünu í joo ña jan xíní

ñúhú chágá yó ña. <sup>23</sup> Ta mé xoo yiquí cuñu í ña cahán yo coó cuahá sahá, ña co cúní yo ña ná candehé ñayivi, ña cán cúní ña chíjhaví vaha í <sup>24</sup> vatí co xíní ñúhú caja í já xihín ñaha ña cuu candehé ñayivi. Xihín ña yóho cuu candaá ini ndá quiáhva nacaváha Ndióxi in in xoo yiquí cuñu í ta cuu candaá iní ndaja candaá vaha chágá yó ña cahán yo coó cuahá sahá. <sup>25</sup> Ta xihín ña yóho co sáhndá java táchan yiquí cuñu í jáchí in in xoo yiquí cuñu í ndíhi ini a sahá java ga xoo yiquí cuñu í. <sup>26</sup> Ña cán quéa tá ndícuehe in xoo yiquí cuñu í ndíjáá java ga ña cán ndíjhíhví a sahá ña ndóho in xoo yiquí cuñu í. Joo tá vií cája na xihín in xoo yiquí cuñu í já quéa cají ini java ga xoo yiquí cuñu í.

<sup>27</sup> Ta tóco ndíhi ndó, na cúní cuéntá Jesús cúní ndó tátuhun yiquí cuñu Jesucristo jáchí in nanduu ndíhi ndó xihín á ta in in ndó cúní ndó tátuhun in xoo yiquí cuñu a. <sup>28</sup> Ta tá quiáhva íin chuun caja in in xoo yiquí cuñu í quiáhva já íin chuun caja in in na cúní cuéntá Jesús. Jihna ñúhú nacaxí Ndióxi na apóstol ta já nacaxí a na jáygha tuhun Ndióxi nüú ñayivi ta já nacaxí a na jánaha tuhun Ndióxi nüú ñayivi ta já nacaxí a na caja ña xitúhún. Ta já nacaxí a na ndája vaha na quíhví xihín na chíndeé ñayivi xihín na sáhndá chuun nüú java ga ñayivi xihín na cahán tuhun ña coó nasaatiáhva ni.

<sup>29</sup> Joo a juú ndíhi na cán cúní apóstol. Ta ni a juú ndíhi na cúní ná na jáygha tuhun cahán Ndióxi nüú ñayivi. Ta ni a juú ndíhi na jánaha ñayivi. Ta ni a juú ndíhi na caja ña xitúhún. <sup>30</sup> Ta ni a juú ndíhi na ndája vaha na na quíhví. Ta ni a juú ndíhi na cahán tuhun ña coó nasaatiáhva na. Ta ni a juú ndíhi na tiahva nducú ñehe ña cúní cachí tuhun cahán na cán. <sup>31</sup> Joo mé ndó xíní ñúhú ndínducú ndo ña ná quiáhva Ndióxi in ña vaha chágá nu ndo. Ta viti cúní jánaha í ña cúní ña vaha chágá nu ndo.

### 13

#### Ña ndítahan caja í tå quíhví iní ñayivi

<sup>1</sup> Tá ná cuu cahán i tá nüú tuhun cahán ñayivi ndíu ñuyíví yóho ta tá ná cuu cahán i tuhun cahán tátó Ndióxi joo tá co quíhví iní i ñayivi já quéa coó sahá toho ña cahán i. Jächí xihín ña jan cúní u in tátuhun in caa xoo tá jácásá na ña. Quiáhva já íin i tá co quíhví iní i ñayivi.

<sup>2</sup> Ta ni coó sahá ña ná cacuu u in dä jáyaha

tuhun cahán Ndióxi nüú ñayivi tá co quíhví iní i ñani táchan i. Jächí tá co quíhví iní i ñayivi coó caja toho ña ná cuu candaá iní i tóco ndíhi ñaha ta ni coó caja toho a tá xíní tóco ndíhi ña xíní da ndíchí ta ni coó sahá toho tá cández cahnu ndívahá iní i Ndióxi janda quiáhva cuu cahán i xihín in yúcu ña ná ndicanda ña. Coó sahá toho tóco ndíhi ña yóho tá co quíhví iní i ñani táchan i. <sup>3</sup> Ta vatí ná ndicahnda i tóco ndíhi ña cómí i ta já quiáhva i ña nüú ná ndahví coó sahá toho ña caja i tá co quíhví iní i ñayivi. Ta ni coó caja toho ña ná ndiquiahva i yiquí cuñu i ña ná cayí a sahá ña cahán i tuhun Ndióxi tá co quíhví iní i ñayivi.

<sup>4</sup> Jächí tá mé a ndaa táchí quíhví iní ñayivi co ndíhi iní xihín ná. Ta tá quíhví iní na táchí iní sahá ná ta co cahíhví toho iní xihín ná. Ta ni co caja ländä yo nu ná ta ni co caja cahnu í mí nu ná. <sup>5</sup> Tá quíhví iní ñayivi in toní ñúhú yo xihín ná ta co cahíhváda yó ñaha nu ná jáchí co ndúcú yo ña vaha mé cuití yo. Ta ni co xójo iní xihín ná. Ta ni co quéhé cuéntá sahá ña nüú caja na xihín yo tá quíhví iní na. <sup>6</sup> Ta tá quíhví iní ñayivi co cajíi toho iní tá caja nüú na joo cajíi iní tá caja na ña ndaa. <sup>7</sup> Tá quíhví iní ñayivi iní tiahva í ndoho iní sahá ná ta cahvi iní ña vaha cuití va sahá ná. Ta cándusa í ña caja na ña ndaa. Ta sahan ndee iní xihín tóco ndíhi ñaha.

<sup>8</sup> Tá mé a ndaa quíhví iní ñani táchan í já quéa anda ama cása quíví a ndíhi sahá ña quíhví iní na. Joo vaxí quíví a jáyaha ga ñayivi tuhun cahán Ndióxi xihín na nüú ñayivi jáchí vaxí quíví ndíhi sahá. Ta a cahán ga na tuhun ña coó nasaatiáhva na. Ta vaxí quíví ndíhi sahá ña ndíchí jíní ñayivi. Joo a ndíhi toho sahá ña quíhví iní táchan i. <sup>9</sup> Jächí chá cuití xíní yó sahá Ndióxi ta chá cuití tiahva í jáyaha í tuhun cahán Ndióxi nüú ñayivi. <sup>10</sup> Joo tá ná xínú coó quíví ndaja Ndióxi ña ná nduu ñayivi vií já quéa a cúní ñúhú ga yó ña tóco ndíhi java ga ña ndíhi sahá cán jáchí sa nanduu ñayivi vií nu mé á.

<sup>11</sup> Candehé ndo. Tá nasaacuu u in taa loho nacaahán i tá quiáhva cahán na valí ta quiáhva já nacahví iní i ta quiáhva já nacaja i. Joo tá nasaahnu i najándacoo i ña caja na valí. <sup>12</sup> Viti co candaá vaha iní ndá quiáhva cahán Ndióxi. Cúu á tátuhun tá sández yó nüú in yutátá ña co jínú vaha ga. Joo vaxí quíví cúní mé á tá quiáhva cása. Viti cuahá

ñaha co cándaa iní sahá mé á. Joo vaxi quiví cándaa iní sahá mé á tá quiáhva xímí mé á mí viti.<sup>13</sup> fin uni nuú ñaha ña a ndíhi sahá. Ta ña yóho cíuú á: ña cándeé iní Ndióxi, ta inga cíuú ña ndatí casaq, ta inga cíuú ña quihví iní Ndióxi xihín ñani táhan í. Ta cíuú Ndióxi ña ná caja i ndihuní ña yóho joo ña cahnu chágá cíuú ña quihví iní Ndióxi xihín ñani táhan í.

## 14

### Tá cáhan ñayivi tūhun ña coó nacatiqhva na

<sup>1</sup> Xímí ñúhú ndíhi ini ndó quihví ini ndó ñani táhan ndó. Ta xihín ndinuhu ini ndó ndinducú ndo ña sáhan ínima yii Ndióxi nu yo. Ña xímí ñúhú ndíhi chágá ini ndó ndinducú ndo cíuú ña ná cuu jáyaha ndó tūhun cáhan Ndióxi xihín ndó nuú ñayivi.<sup>2</sup> Jáchí ndá na cacuu cáhan tūhun ña coó nacatiqhva na já quéa cáhan na xihín Ndióxi joo co cáhan na xihín ñayivi jáchí co cándaa ini ñayivi ña cáhan na. Ña cáhan na cíuú ña naquixi cuéntá ínima yii Ndióxi ta cíuú á ña co xímí ndíhi ga ñayivi.<sup>3</sup> Joo ñayivi tiahva jáyaha tūhun cáhan Ndióxi xihín ná nuú ñayivi caja na ña ná cuu cahnu chágá na cíuú cuéntá Jesús xihín tūhun cáhan Ndióxi. Ta sáhan na tūhun ndeé ini ñayivi ta quiáhva já jáxínu chágá na ini na cán.<sup>4</sup> Ta na ñéhe tähví cáhan tūhun ña coó nacatiqhva na sáhan mé cuití va na xihín tūhun sáhan Ndióxi nu ná cahnu na. Joo na tiahva jáyaha tūhun cáhan Ndióxi nuú ñayivi chíndeé ná na cíuú cuéntá Jesús ña ná cahnu chágá na xihín ñaha cuéntá Ndióxi.

<sup>5</sup> Mí i cajíi iní i tá ná cuu cáhan ndíhi ndó tūhun ña coó nacatiqhva ndó. Joo cajíi chágá ini i tá ná jáyaha ndó tūhun cáhan Ndióxi xihín ndó nuú ñayivi jáchí xímí ñúhú chágá ña yóho a juú ga ña ná cáhan ndó tūhun ña coó nacatiqhva ndó. Vaha caja ndó ña ná cáhan ndó tūhun ña coó nacatiqhva ndó tá in in na tiahva nducú ñéhe ña cíuú cachí tūhun cáhan ndó nuú ñayivi já quéa ná cuu cahnu na cíuú cuéntá Jesús xihín mé tūhun cán. <sup>6</sup> Xímí ñúhú candehé vaha ndó ña cáhan i xihín ndó, ñani mí i na cíuú cuéntá Jesús. Coó sahá toho ña caja i tá ná sáa i coto nihni i ndohó ta já casáhá i cáhan i inga tūhun ña co cándaa ini ndó. Tá ná caja i já ndaja caja ndó cándaa ini ndó tūhun Ndióxi. Ña ndítahan caja i quéa cáhan i xihín ndó ña najánaha Ndióxi nuú i. Ta ndítahan cáhan

i ña ndichí cuéntá Ndióxi. Ta ndítahan cáhan i tūhun násahen Ndióxi nuú i jáyaha i ña nu ndó. Ta ndítahan jánaha i ña ndaa cuéntá Ndióxi nu ndó.

<sup>7</sup> Sácu u in quiáhva nu ndó sahá in tóyoo xihín dó jácaha. Ndaja caja ñayivi cándaa ini na ndá yaa tíví yo tá co tiáhva i tíví vaha í, a tá co tiáhva i jácaha vaha í.<sup>8</sup> Ta ndaja caja na soldado cacu tiáhva na mé ná ña ná cuhun na cani táhan na tá ta co tiáhva vaha da tíví trompeta tíví da do.<sup>9</sup> Quiáhva já yáha ri xihín mé ndó jáchí tá co cáhan ndó tūhun ña cuu cándaa ini ñayivi ndaja caja ri na cán cándaa ini na ña cáchí ndó. Cíuú á tátuhun cáhan ndó nu táchí cuití va.<sup>10</sup> Cája i cuéntá fin cuahá ndivahá nuú tūhun cáhan ñayivi ndijáá ñuyíví. Joo ndijáá tūhun yóho caxí cáhan nuú ñayivi cáhan na mé tūhun yóho.

<sup>11</sup> Joo ta co cándaa ini i ña cáhan inga ñayivi xihín i já cíuú u tátuhun in da tóho nu mé ná.

Ta na cán cacuu na tátuhun in na tóho nu mí i sahá ña co cándaa ini i tūhun cáhan na.<sup>12</sup> Sahá ña cán quéa támé a ndaa cíuú ndó ndiquehe ndó ña sáhan ínima yii Ndióxi nu ndo já quéa xímí ñúhú ndinducú ndó ña ná cuu chíndeé ndó ná cíuú cuéntá Jesús ná cahnu chágá na xihín tūhun Ndióxi.

<sup>13</sup> Ña cán quéa ndá ndó ñéhe tähví cáhan ndó tūhun ña coó nacatiqhva ndó já quéa xímí ñúhú caca ndó nu Ndióxi ña ná cuu ndicani ndó ña cíuú cachí a nuú ñayivi.

<sup>14</sup> Jáchí tá ná casáhá cáhan i tūhun ña coó nacatiqhva i nani xíca tähví i nu Ndióxi já quéa mé a ndaa caja cáhu i Ndióxi xihín ínima i joo co caja i ña xihín xímí túni i jáchí co cándaa ini i ña cáhan i.<sup>15</sup> Ndióxi caja i. Ña xímí ñúhú caja i quéa caca tähví i nu Ndióxi xihín ínima i ta xihín xímí túni i. Ta quiáhva já xímí ñúhú cata i xihín ínima i ta xihín xímí túni i viti.<sup>16</sup> Candehé ndó. Ná caja i cuéntá tá ndíu ndó veñihu ta cásáhá ndo cáhan ndó tūhun ña coó nacatiqhva ndó nani caja cahnu ndó Ndióxi xihín ínima ndo ta ndaja coo quihví in ñayivi ini veñihu, na co cándaa cuahá ini sahá ñaha cuéntá Ndióxi. Ta xímí joho na ña cáhan ndo joo a cíuú caja na ndiquiahva na ndixahvi nu Ndióxi in nuú xihín ndo jáchí co cándaa ini na tūhun cáhan ndo.

<sup>17</sup> Vatí ndato ndivahá cáhan ndo ndíquiahva ndó ndixahvi nu Ndióxi joo co chíndeé a na cán ná cahnu na xihín tūhun Ndióxi jáchí co cándaa ini na tūhun cáhan ndo.<sup>18</sup> Ndióxi jáchí cáhan cuahá chágá i tūhun

ñä coó nasaatiyahva i a juú ga ndóhó. <sup>19</sup> Joo nani jánahá i ndohó ini veñhu cajíi chágá íní i cahán chá cuití va i tuhun já ná cuu candaá caxí ini ndó ñä cahán i. Jáchí ndá chuun quéa ná cahán cuahá nahá i tuhun ñä co candaá ini ndó.

<sup>20</sup> Candehé ndó ñani i, na cúu cuéntá Jesús. A cáhvi ini ndó tá quiahva cahví ini na valí. Xíní níuhú cahvi ini ndó tá quiahva cahvi ini ñayivi sa tácú ini. Vatí mé a ndaa xímí níuhú caja ndó tá quiahva caja na valí, na co caja cuachi. <sup>21</sup> Xíní níuhú ndicuhun ini ndó ndaja cächí ley nacahyi Moisés sanahá tá nacachi Ndióxi já: “Vatí ná chindahá i na cahán java tuhun tóho nuú ñayivi Israel joo a cuni joho na nuú cahán na tóho cán jáchí sáá ini na Israel”, nacachi Ndióxi. <sup>22</sup> Tá cahán ndó tuhun ñä coó nasaatiyahva ndó nani caja cahnu ndó Ndióxi co chíndee cuahá ñä yóho na cúu cuéntá Jesús cuahnu na xihín tuhun Ndióxi vatí mé a ndaa na co xímí tuhun Ndióxi cátontó na xihín ñä yóho. Joo tá jáyaha ndó tuhun cahán Ndióxi xihín ndó nuú na cúu cuéntá Jesús já cuu cuahnu chágá na xihín tuhun Ndióxi vatí co chíndee cuahá ñä yóho na cámáni ndihvi íchí cuéntá Jesús. <sup>23</sup> Caja mé ndó cuéntá tá ná taca cuahá na cúu cuéntá Jesús ta casáhá cahán ndó tuhun ñä coó nasaatiyahva ndó nani caja cahnu ndó Ndióxi ta ndaja coo quíhvi na co xímí tuhun Ndióxi nu ndúu ndó jan. Ta tá ná cuni na ñä sa jíin tuhun cahán ndihí ndó já quéa cahán na ñä cúu ndó na tachí. <sup>24</sup> Joo tá ná jáyaha tóco ndihí ndó tuhun cahán Ndióxi nuú ñayivi ta ndaja coo quíhvi in na co xímí tuhun Ndióxi. Ta tá ná cuni joho na ñä cahán ndó já quéa tahná ini na sahá cuachi na ta já casáhá ndícani ini na sahá ñä nuú caja na. <sup>25</sup> Ta já nahmá na cuachi na nuú ñayivi ta já ndicava xítí na caja cahnu na Ndióxi. Ta xihín ñä yóho candaá ini na ñä mé a ndaa táchí iin Ndióxi tañu ndó.

Tóco ndihí ñä caja ndó cuéntá Ndióxi xímí níuhú caja ndó ñä xihín toní níuhú

<sup>26</sup> Candehé ndó, ñani i, na cúu cuéntá Jesús. Tá ná nditaca ndihí ndó caja cahnu ndó Ndióxi ndítahan nuú java ndó cata ndó salmo ta java ndó jánahá ndó nuú ñayivi. Ta ndítahan nuú java ndó jáyaha ndó tuhun cahán Ndióxi xihín ndó nuú ñayivi ta java ndó cahán ndó tuhun ñä coó nacatiyahva ndó. Ta ndítahan nuú java ndó nducú ñehe

ndó ñä cúní cachi tuhun cahán na cán. Tóco ndihí ñä caja ndó xímí níuhú chindeé a ndohó ná cuahnu chágá ndó xihín tuhun Ndióxi. <sup>27</sup> Ta ndítahan nuú iví á uní ñayivi cuití va cahán na tuhun ñä coó nacatiyahva na. Joo tá in tá in na caja na ñä. Ta ndítahan canduu na tiahva nducú ñehe na ñä cúní cachi tuhun cahán na jan. <sup>28</sup> Ta nu táca ndó tá coó ni in na tiahva nducú ñehe ñä cúní cachi tuhun cahán na jan já quéa vaha chágá ná a cahán na tuhun ñä coó nacatiyahva na. Ñä vaha chágá quéa ná cahán yaá na ñä ná cuni joho mé ná xihín Ndióxi cuití va. <sup>29</sup> Ta quiahva já tá jáyaha na tuhun cahán Ndióxi xihín na nuú ñayivi ná cahán iví á uní na cuití va. Ta xíní níuhú cahán na nani ndúu tútú java ga na veñhu sándehé na á mé a ndaa cahán na cuéntá Ndióxi. <sup>30</sup> Cája i cuéntá nani jáyaha in na tuhun cahán Ndióxi xihín na nuú ñayivi ta jácahan Ndióxi ini inga na ñä ná jáyaha na tuhun cahán Ndióxi xihín na nuú ñayivi já quéa xímí níuhú cacoo na nu cuití cán. <sup>31</sup> Xihín ñä yóho tá in ndó cuu jáyaha ndó tuhun cahán Ndióxi xihín ndó nuú ñayivi. Já cuu catiayahva na xímí joho ñä yóho ñä ná ndindeé chágá ini na xihín tuhun Ndióxi. <sup>32</sup> Na jáyaha tuhun Ndióxi nuú ñayivi xímí níuhú cañehe na quiahva xihín ñä caja na nani ndáti na jáyaha na tuhun cán. <sup>33</sup> Jáchí cuni Ndióxi ñä ná coo vaha iní caja i tóco ndihí ñaha ta ná a jána í nuú caja i ñä.

Ta cajíi ini mé a tá caja vaha ndó tá quiahva caja java ga na cúu cuéntá Jesús ndúu ndijáa ga ñuu. <sup>34</sup> Nani táca ndó veñhu co ndítahan nuú najihí cahán na jáchí co cání a nu ná cahán na. Ta co ndítahan nu ná cacomi na cuéntá sahá na veñhu jáchí quiahva já sahndá ley Moisés. <sup>35</sup> Ta tá cuni na candaá ini na sahá ñä jánahá na veñhu xímí níuhú ndaca tuhún na yíi ná sahá tá cásaa na vehe na. Jáchí co náha vaha tá cahán in ñáñahá nani táca na veñhu.

<sup>36</sup> Xímí níuhú ndicuhun ini ndó ñä a juú ndohó cúu na nandiquehe tuhun Ndióxi nu cuití. Ta a juú ndohó cuití xímí tuhun Ndióxi, vaha. <sup>37</sup> Ta ndá na cahán ñä nachutú ndaa ínimá ná xihín ínimá yíi Ndióxi ñä ná jáyaha na tuhun cahán Ndióxi xihín na nuú ñayivi, mé na cán ndítahan nu ná ndicuni na ñä cahán i ñä sahndá Ndióxi nuú i cahán i. <sup>38</sup> Joo tá co cuni na cán cuni joho na ñä

cáhan i cuéntá Ndióxi já quéa a cúni joho ndó ña cáhan na cán.

<sup>39</sup> Candehe ndo, ñani i, na cùu cuéntá Jesús. Xíñi ñúhú ndíhi ini ndó nducú ndó ña ná jayaha ndó tuhun cáhan Ndióxi xihín ndó nuú ñayivi. Ta a cájí nuu ndó nuú na cùu cuéntá Jesús tá nhéhe táchví ná nuú Ndióxi cáhan na tuhun ña coó nasatiahva na. <sup>40</sup> Joo tóco ndíhi ña cája ndó xíní ñúhú caja ndó ña xihín toní ñúhú já ná a jána ndó nu cája ndó ña.

## 15

*Ndícani Pablo sahá quíví tá nanditacu Jesús*

<sup>1</sup> Candehe ndó, ñani i, na cùu cuéntá Jesús. Viti cúni ña ná ndicuhun ini ndó tuhun vaha sahá Jesús ña najánahá i nu ndo. Mé tuhun vaha yóho sa nandiquehe vaha ndó ña ta candeé vaha ini ndó a janda viti. <sup>2</sup> Ta jivi sahá mé tuhun vaha najánahá i nu ndo yóho cuu cazu ndaa íníma ndo tá ná caja ndó ña najánahá i nu ndo xihín ndinuhi ini ndó. Joo tá ná a cája ndó ña já quéa mé a uun va quéa nacandúsa ndó ña.

<sup>3</sup> Candehe ndó. Ña jihna ñúhú nacaja i quéa najánahá i ndohó ña nacatiahva mí i cuéntá Jesucristo, mé á naxihí ndíca crúxu sahá cuachi tá quiahva cachí tuhun Ndióxi. <sup>4</sup> Ta najánahá i ndohó ña najánduxu na mé á joo tá naxiñu quíví uni já nanditacu tucu a tá quiahva cachí tuhun Ndióxi coo. <sup>5</sup> Ta já nanahá mé á nu Pedro xihín nuú java ga tahan da uxu iyi naxica tuun xihín a cán. <sup>6</sup> Ta tá nandihí já nanahá mé á nu yáha ga nuú uhun ciento na cùu cuéntá mé á. Ta in naxini tocó ndíhi na mé á. Ta cuahá tahan na naxini ñahá cán tacú yíi va na vatí java na sa naxihí na. <sup>7</sup> Ta tá nandihí já nanahá mé á nu Jacobo ta anda já nanahá mé á nu tocó ndíhi na naxica tuun xihín á.

<sup>8</sup> Ta tá nu ndíhi já nanahá ri Jesús mé á nuú i vatí cùu u da nacacu tá sa nayahá mé tiempo tá naxica nuu Jesús ñuyíví yóho. <sup>9</sup> Yehé cùu u in apóstol joo iín chágá sahá tocó ndíhi java ga na apóstol a juú ga yehé. Ta ni coó sahá i cahán na apóstol xihín i jáchi naxica nuu i nacaja xixí i xihín na cùu cuéntá Ndióxi jihna. <sup>10</sup> Joo mé a ndaa cùu u in apóstol jáchi nacamáni Ndióxi yehé. Ta a juú ña uun cùu ñamani nacaja Ndióxi xihín i jáchi cuahá ga chuu caja yehé cuéntá mé á a juú ga java ga na apóstol cán. Vatí mé a ndaa co cája chuu i xihín ndée mí i. Sahá

ñá táchví ini Ndióxi sahá i sahá ña cán quéa chíndeé a yehé cája i chuun mé á yóho. <sup>11</sup> Joo co cája toho a á yehé á na java apóstol cán cája chuu chágá. Ña vaha quéa tóco ndíhi nde jánahá nde sahá Jesucristo ta mé ndó sa nacandúsa ndó ña najánahá nde nu ndo.

*Vaxi quíví nditacu tóco ndíhi ndii*

<sup>12</sup> Tá nacahán nde tuhun Ndióxi xihín ndo najánahá nde ndohó ña nanditacu tucu Jesucristo ta nacandúsa ndó ña. Joo viti java ndó cachí ndo ña co ndítacu toho na sa naxihí. <sup>13</sup> Joo tá cachí ndo ña co ndítacu toho na sa naxihí cùu á tátuhun co cándúsa ndó ña nanditacu tucu Jesucristo. <sup>14</sup> Ta tá co cándúsa ndó ña nanditacu tucu Jesucristo já quéa coó sahá toho tuhun Ndióxi ña xíca nde jánahá nde nuú ñayivi. Ta xihín ña yóho mé a uun va candeé ini ndó mé á.

<sup>15</sup> Ta tá mé a ndaa coó nanditacu Jesucristo já quéa cùu nde na cáhan ña tuhún sahá Ndióxi jáchi cachí nde xihín ndo ña mé Ndióxi najánditacu a Jesucristo. Joo tá co ndítacu toho ndii ta ndehe cachí nde ña nanditacu Jesucristo já quéa cùu nde na tuhún. <sup>16</sup> Jáchi tá co ndítacu ndii já quéa cùmí cachei a ña coó nanditacu toho Jesucristo. <sup>17</sup> Ta tá coó nanditacu Jesucristo já quéa coó sahá toho ña candeé ini ndó mé á ta cómí yíi va cuachi cuéntá sahá ndó. <sup>18</sup> Ta xihín ña yóho cùni cachei a ña a cazu ndaa toho íníma ña cùu cuéntá Jesús tá ná quivi na. <sup>19</sup> Tá ndiyahvi ña cùu yó cuéntá Jesús nani tacú yo ñuyíví yóho cuití va já quéa ndáhví nahá nacuú.

<sup>20</sup> Joo mé a ndaa nanditacu ndusa Jesucristo. Ta mé á cùu á ña nu cuítí nanditacu. Ta vaxi quíví nditacu tóco ndíhi yó, na cùu cuéntá mé á. <sup>21</sup> Candehe ndó. Naquihví cuachi ñuyíví sahá ña nacaja Adán, da nacacuu taq nu cuítí ta sahá cuachi yóho nacasahá xihí ñayivi. Ta jivi sahá ña nacaja Jesucristo tá naxihí a ndíca crúxu cuu ndítacu tocó ndíhi na sa naxihí. <sup>22</sup> Xihí ñayivi sahá ña naquixi na chichi Adán ta caja na ña nuú tá quiahva nacaja Adán sanahá. Ta viti sahá ña cùu yó cuéntá Jesucristo catacú anda ama cúa quíví sahá ña nacaja mé á. <sup>23</sup> Ta tá ná ndindaa nuú in in na nditacu na já nditacu na caja Ndióxi. Mé Jesucristo quéa nanditacu nu cuítí. Ta tá ná ndicó coo tucu mé á ñuyíví yóho já caja mé á ña ná nditacu tocó ndíhi na cùu cuéntá mé á. <sup>24</sup> Anda já ndíhi sahá tóco ndíhi ñaha ñuyíví yóho jáchi jandihí Jesucristo

sahá tócó ndihi na cómí cuéntá sahá ñayivi ñuyíví yóho. Ta ndiquiahva tócó ndihi na cùú cuéntá mé á ndáha Ndióxi, tátá a já ná cacomí a cuéntá sahá ná.<sup>25</sup> Jáchí Jesucristo quéa ndítahan nu cacomí cuéntá sahá na cùú cuéntá mé á jánda quiahva ná xinu coo quíví jándihu Ndióxi sahá tócó ndihi na co cúní ñahá.<sup>26</sup> Ta jánda nu ndíhi jándihu mé á sahá ña ná quivi ñayivi. Ta xihín ña yóho a quíví ga ñayivi.<sup>27</sup> Jáchí mé Ndióxi nandiquiahva tócó ndihi ñaha ná cacomí Jesucristo já ná cuéntá sahá. Joo tá cachí tuhun Ndióxi ña cómí Jesucristo cuéntá sahá tócó ndihi ñaha, co cúní cache a ña cómí a cuéntá sahá Ndióxi viti jáchí mé Ndióxi quéa nandiquiahva tócó ndihi ñaha ndáha mé á ña ná cacomí a cuéntá sahá.<sup>28</sup> Ta tá sa cómí Jesucristo cuéntá sahá tócó ndihi ñaha anda já ndiquiahva Jesucristo mé á ndáha Ndióxi ña ná cacomí a cuéntá sahá. Jáchí cùú á in túhún jiní já jahyi Ndióxi ta mé Ndióxi quéa nandiquiahva tócó ndihi ñaha nuú Jesucristo. Ta Ndióxi cacuu a ña cähnu chágua nu tócó ndihi ñaha.

<sup>29</sup> Ndúu java ñayivi ta cánduta ná sahá na sa naxihí já ná cacu ndaa ínimá ná. Joo cachí na co cándusa toho na ña nditacu ndii. Ta ndá sahá quéa cája na já tá co cándusa na nditacu ndii. Joo xímí vaha í ña nditacu ndii.

<sup>30</sup> Ndá chuun quéa chícaqan yo mí ndijáá níi quíví nuú tondohó nuú cuu cahni na mí tá co cándusa í ña nditacu tucu ndii.<sup>31</sup> Candehe ndo, ñani i, na cùú cuéntá Jesús. Ndiójáá níi quíví vaxí tondohó nuú i. Ta jalóho cúní quivi i. Mé ndó cándaa vaha ini ndó ña cajii ini i sahá in nanduu ndó xihín Jesucristo, xito ho í. Sahá ña cán quéa ndítahan nu ndo candusa ndó ña cähán i xihín ndo.<sup>32</sup> Cuahá tañu naquihvi tähán i xihín ñayivi quini nuú Efeso. Mé ná cán cùú ná tátuhun quití yúcú. Joo coó saha toho ña ndóho ini i yóho tá mé a ndaa co nditacu toho ndii. Jáchí tá co nditacu toho ndii já quéa cuu cohó caja í tā quiahva cachí java ñayivi tá cachí na já: "Cohó cuxu vaha í ta coho vaha í jáchí yó quíví itaqan á iajá cùú yó."

<sup>33</sup> A quiahva ndó ñamaní jándahvi inga na ndohó. Xímí ñúhú ndicuhun ini ndó in tuhun ña cachí já: "Tá cátáhan í xihín ñayivi, na co cája vaha já quéa játiví na mí."

<sup>34</sup> Xímí ñúhú ndicaxí vaha ini ndó ta a cája ndó cuachi jáchí ndúu java ndó ta co xímí

toho ndó Ndióxi. Cáhan i ña yóho xihín ndo já ná cacahan nuu ndo sahá ña núu cája ndó.

*Ndaja coo tá ná nditacu ndii*

<sup>35</sup> Cája i cuéntá ña ndúu java ndó ta ndícani ini ndó já cähán ndo já: "Ndaja caja Ndióxi jánditacu a na sa naxihí. Ndá yiquí cuñu ndiquehe na caja Ndióxi." Já ndáca tuhún java ndó ndícani ini ndó. <sup>36</sup> Joo ña ndícani ini ndó sahá jan cùú á ña tóntó ndivaha. Xímí ñúhú cándezhe ndo ndá quiahva yáha xihín in tata tá chíchin na ña. Mé tata yóho xímí ñúhú quivi a já ná nduta utu loho nu á.<sup>37</sup> Tá xútú ñayivi, co xútú toho na in yucu. Ña xútú na cùú mé tata ta co cája toho a á cùú á trigo á inga nuú tata.<sup>38</sup> Ta mé Ndióxi quéa cája ña ná ñehe tåhví in in a cán ndá quiahva coo a ta ndá javí cañehe in in a.<sup>39</sup> Ta a juú in javí ñehe tóco ndihi ñaha. Sa jín sa jín javí in in a. Tátuhun yiquí cuñu in dataa, sa jín in yiquí cuñu da xihín yiquí cuñu quíti. Ta yiquí cuñu laa sa jín in a xihín yiquí cuñu tiyacá. Sa jín nacaja Ndióxi xihín in in ña nacavaha mé á.<sup>40</sup> Ta quiahva já nacavaha Ndióxi ña ndúu indívi ta jín va ndáa a. Ta jín yiquí cuñu ñayivi ñuyíví yóho. Ta sa jín quiahva ndató ña in indívi ta sa jín quiahva ndató ña in ñuyíví.

<sup>41</sup> Jín nacaja Ndióxi ña ná yehe candii ta jín nacaja mé á ña ná yehe yoo. Ta jín nacaja mé á ña ná yehe quimi ta in java quimi sa jín sa jín yehe rí nuú inga rí.<sup>42</sup> Quiahva já yáha ri xihín ñayivi tá ná xinu coo quíví jánditacu Ndióxi na. Jáchí yiquí cuñu yó ña jánduxu na tixi ñúhú cùú á ña ndihi sahá. Joo tá ná nditacu tucú já a ndíhi ga sahá yo anda ama cáaa quivi.<sup>43</sup> Mé yiquí cuñu í jánduxu na tixi ñúhú yóho cùú á tátuhun in ña núu ndivaha jáchí ndihi sahá. Joo tá ná xinu coo quíví ndicqo tucu a caja Ndióxi já cacuu a ña ndató ndivaha jáchí a ndíhi sahá. Ña jánduxu na tixi ñúhú cùú á ña vitá ndivaha joo ña nditacu tucu cacuu a ña ndacu vaha.<sup>44</sup> Jáchí tá ná jánduxu na mí tixi ñúhú, ña jánduxu na cùú yiquí cuñu cuénta ñuyíví yóho. Joo tá ná nditacu tucú já ñehe yó inga yiquí cuñu, ña cùú cuénta indívi. Jáchí tá in yiquí cuñu cuénta ñuyíví, ña ndíhi sahá ta já in ri yiquí cuñu cuénta indívi, ña a cùú ndihi sahá.

<sup>45</sup> Cáchi tuhun Ndióxi ña tá nacavaha Ndióxi Adán, dä nasacuu taa nu cuítí já

nacaja mé á ña ná catacu da. Joo cáhnu chágá Jesucristo a juú ga Adán jáchí mé á caja ña ná catacu ñayivi anda ama cása quiví.<sup>46</sup> Na jihna ñúhú sáhan Ndióxi nu yo cúu yiquí cuñu í, ña ndíhi yachi saha. Ta tá nuu ndíhi já sáhan mé á inga yiquí cuñu nu yo cuénta indíví ta ña cán cúu á ña co ndíhi saha.<sup>47</sup> Mé Adán, da nacavaha Ndióxi nu cuítí násacuu da dä nacavaha mé á xihín ñundáhyi ta cúu dä ñuyíví yóho. Ta Jesucristo, xitoho í, cúu á inga táhan dataaa joo cúu á ña naquixi chí indíví.<sup>48</sup> Tá in tá in ñayivi ñéhe na yiquí cuñu tátuhun yiquí cuñu Adán jáchí cúu á ña nacavaha Ndióxi xihín ñundáhyi. Joo ñayivi, na ndíquiahva mé ndáha Jesucristo vaxi quiví ndiquehe na inga yiquí cuñu cuénta indíví, ña co ndíhi saha.<sup>49</sup> Ta viti ín yiquí cuñu í tátuhun yiquí cuñu Adán joo vaxi quiví ndiquehe inga yiquí cuñu í cuénta indíví ta cacuu a tátuhun yiquí cuñu Jesucristo.

<sup>50</sup> Candehé ndo, ñani i, na cúu cuéntá Jesú. Cúní caxi tühun i xihín ndo ña a cúu toho cuhun yiquí cuñu í yóho indíví ña ná cacomí Ndióxi cuéntá sahá jáchí mé yiquí cuñu í yóho co cúu á ña cuu catacu anda ama cása quiví. Joo ña inga, ña quiähva mé á nu yo cán, a ndíhi toho sahá.<sup>51</sup> Ta viti cúní caxi tühun i nu ndo sahá in ñaha násahijin jehé nuú ñayivi ta ña yóho quéa: A juú ndíhi toho í quiví jáchí tá ná xinu coo quiví quizí tucu Jesucristo ñuyíví yóho anda jáví ndijama ndihí tá quiähva ndáa í ta mé Ndióxi quiähva inga yiquí cuñu nu yo.<sup>52</sup> Ta in náá cuítí yaha ña yóho jáchí cacuu a tátuhun in ndícuani nuu yo ta já ndahiyi trompeta, mé dó ndahiyi nu ndíhi cuíi cán já nditacu tóco ndihí na sa naxihí ta a ndicó coo ga na quiví na. Ta mí, tá tacú yo, ña caja Ndióxi xihín yo quéa ndijama yiquí cuñu í.<sup>53</sup> Jáchí mé yiquí cuñu í ña ndíhi saha yóho a cuú toho nduu a tátuhun yiquí cuñu ña quiähva Ndióxi nu yo. Sahá ña cán quéa xiní ñúhú ndijama mé á yiquí cuñu í yóho já ná cuu coho coo í xihín mé á anda ama cása quiví.<sup>54</sup> Ta tá sa nandijama yiquí cuñu í ta nanduu a ña co ndíhi saha anda ama cása quiví já quéa xinu coo nuú tühun ña nacachi na profeta sanahá: "Vaxi quiví ndihí sahá ña xihín ñayivi jáchí nacandeé Jesucristo násahnú a nuú ña xihín na.<sup>55</sup> Ta xihín ña yóho caja cáhnu í mé á jáchí a quiví ga ñayivi sahá ña naquee vaha Jesucristo",

cáchí tühun Ndióxi.<sup>56</sup> Tá caja ñayivi cuachi já quiví tá quiví na sahá ña caja na. Ta cúu á tátuhun tá tún líhma na jáchí ndóho ini na sahá cuachi na. Anda sanahá ndivaha sáhndá ley Moisés ña quiví ñayivi sahá cuachi na jáchí ñéhe íni cuachi caja ña ná quiví ñayivi.<sup>57</sup> Joo ndixahvi Ndióxi jáchí chindéé a mí ña ná cuu quee vaha í sahá ña nacaja Jesucristo, xitoho í sahá yo.

<sup>58</sup> Sahá ña cán quéa ndítahan nu ndó, ñani maní i, na cúu cuéntá Jesú, coo ndacú ini ndó xihín tühun Ndióxi. Ta co xiní ñúhú jándacoo ndó ña cández ini ndó mé á. Ta ndítahan nu ndó ndíhi ini ndó caja chúun ndó cuéntá mé á jáchí sa cández vaha ini ndó ña a juú ña uun cúu toho chuun cája ndó jáchí ín Jesucristo, xitoho í xihín ndo.

## 16

Tá ndítaca jiuhún ña jasá na nuú na cúu cuéntá Jesú

<sup>1</sup> Ta viti cúní ndicani i nu ndo ndá quiähva ndítahan caja ndó tá jánditaca ndó jiuhún ña jasá ndo nuú na cúu cuéntá Jesú ndúu ñuu Jerusalén. Xíní ñúhú caja ndó tá quiähva najánaha i nuú na cúu cuéntá Jesú ndúu estado Galacia.<sup>2</sup> Ña ndítahan caja ndó quéa: tá in in domingo xiní ñúhú tavá xóo ndó táhan jiuhún ña sácú ini ndó jasá ndo jatá ña nandiquehe ndó sahá chuun nacaja ndó. A cández toho ndó janda quiähva ná saa i jan jáchí xiní ñúhú jánditaca cuéé ndó ña.<sup>3</sup> Ta caxi mé ndó ndá na cúní ndó cañehe jiuhún jan ñuu Jerusalén. Ta tá ná xinu coo i jan chindahá i na ña ná cuhun ñehe na jiuhún ñuu cán. Ta chindahá i in carta xihín ná ña ná quiähva na ña xihín jiuhún jan nuú na cúu cuéntá Jesú ndúu mé cán.<sup>4</sup> Ta tá cúní Ndióxi já cuhun ri yehe va xihín na jan anda ñuu Jerusalén.

Sacú ini Pablo cuhun da coto nihni da na cúu cuéntá Jesú ndúu java ga ñuu

<sup>5</sup> Saa i coto nihni i ndohó cúní. Joo jihna ñúhú yaha i coto nihni i na cúu cuéntá Jesú ndúu estado Macedonia. Ta anda jáví saa i ñuu Corinto jan.<sup>6</sup> Ta tá cúní Ndióxi candoo nahá chá i xihín ndo. Á tá coó ta coo i ní tiempo víxi xihín ndó jan. Ta tá sa ná quee e cuhun i inga ñuu já cuu chindéé ndó yehe.<sup>7</sup>

<sup>7</sup> Co cúní toho i coto nihni númí i ndohó. Ña cúní quéa candoo tóo i coo nahá chá i xihín ndo jan tá cúní Ndióxi.<sup>8</sup> Joo candoo tóo i coo i ñuu Efeso yóho jandá quiähva

ná yaha vicó Pentecostés. <sup>9</sup>Jáchi mé a ndaa núná nuú i cája chūun i cuéntá Ndióxi yóho jáchi cuahá ndivaha na ndíquehe vaha na tuhun Ndióxi vatí ndúu cuahá ná co cúní yehe sahá chuun cája i yóho.

<sup>10</sup>Tá ná xinu coo Timoteo nu ndúu ndó nuu Corinto jan, ndítahan ndíquehe vaha ndó da já ná cají í dā coo da xihín ndó. Jáchi cája chūun da cuéntá Jesucristo, xitoho í tá quiahva cája chūun yehe. <sup>11</sup>A cándají ndó da. Ná ndítahan caja ndó quéá chindeé ndó da já ná coo vaha ini da quixi da nuú i. Jáchi yehe xihín java ga ná cútú cuéntá Jesús ndáti nde xinu coo da nu ndúu nde yóho.

<sup>12</sup>Ta viti cúní ndicani loho i nu ndó sahá ñaní, dā naní Apolos. Mí i naxica tähví ndivaha i nu dá ná saa da xihín java ga ná cútú cuéntá Jesús coto nihni da ndohó. Joo co cúní da caja da ná viti. Cája i cuéntá tá ná nuná nu dá já saa dā coto nihni da ndohó.

*Ndíndayí Pablo na cútú cuéntá Jesús ndúu nuu Corinto*

<sup>13</sup>Cuéntá vaha coo ndó. Xímí ñúhú ndacú coo ini ndó jáchi cández ini ndó Jesús. A yíhví toho ndó. Canduu ndacú ndó íchi cuéntá Jesús. <sup>14</sup>Xímí ñúhú caja ndó tóco ndihi ñaha sahá ná quíhví ini ndó ñani táhan ndó.

<sup>15</sup>Candehé ndo ñani i, ná cútú cuéntá Jesús. Sa xini vaha ndó sahá ná vehe Estéfanas, mé na nu cuítí nandihvi íchi cuéntá Jesús estado Acaya. Sa nandiquiahva na mé ná chindeé ná cútú cuéntá Jesús. <sup>16</sup>Ñá cúní caca i nu ndo cútú ná ná cuni joho ndó ñá sáhndá ná cán nu ndó caja ndó. Ta xíní ñúhú caja ndó tá quiahva cúní ndihi ná cán jáchi chíndeé ná ñayivi ta cája chūun vaha na cuéntá Jesús. <sup>17</sup>Cájí i jáchi naxinu coo Estéfanas xihín Fortunato xihín Acaico nu íin i ta náchindeé ná yehe. Ta vatí a cútú quixi mé ndó nuú i <sup>18</sup>joo ná yóho sahan na tuhun ndéé ini i xihín ñaha cuéntá Ndióxi tá quiahva nácaja na xihín mé ndó. Mé a ndaq ndítahan nu yo caja cahnu i ná cája tátuhun ná yóho.

<sup>19</sup>Na cútú cuéntá Jesús ndúu estado Asia chindahá ná Ndióxi coo ndó. Ta jári Aquila xihín Priscila chindahá ná Ndióxi coo ndó. Ta jári ná cútú cuéntá Jesús tácá cája cahnu Ndióxi vehe ná cán chindahá ná Ndióxi coo ndó. <sup>20</sup>Tóco ndihi ná cútú cuéntá Jesús ndúu chóho chindahá ná Ndióxi coo ndó. Ta xíní

ñúhú cahán Ndióxi xihín táhan ndó ta tatí yúhu táhan ndó ta yii caja ndó ñá.

<sup>21</sup>Yehé cútú Pablo ta xihín ndáhá mí i cáhyí i ñá yóho nu ndó ta chíndahá i Ndióxi coo ndó.

<sup>22</sup>Ta ndá ná co quíhví ini Jesucristo já ná cuhun cháhan jata ná. Cama chá ná quixi Jesucristo, xitoho í.

<sup>23</sup>Ná cúní quéá ná caja cuahá Jesucristo, xitoho í ñamani xihín ndó. <sup>24</sup>Quíhví ini i tóco ndihi ndó jáchi tóco ndihi cútú yó cuéntá Jesucristo, xitoho í. Já ná coo.

## Carta chí ivi nacahyí Pablo nuú na cíuú cuéntá Jesús ndúu ñuu Corinto

*Cáhan Ndióxi Pablo xihín na cíuú cuéntá  
Jesús ndúu ñuu Corinto*

<sup>1</sup> Yehé cíuú Pablo, dä nacaxi Ndióxi cacuu apóstol cuéntá Jesucristo jáchi já cúní a caja. Yehé xihín ñaní, Timoteo cáhyí nde carta yóho nu ndóhó, na cíuú cuéntá Ndióxi ndúu ñuu Corinto ta nu tóco ndihi na cíuú cuéntá Ndióxi ndúu estado Acaya. <sup>2</sup> Na cúní quéa ná caja Ndióxi, tátá yo xihín Jesucristo, xitoho í cuahá ñamani xihín ndo ta ná caja mé á ña ná coo vaha ini ndó.

*Ndóho ini Pablo*

<sup>3</sup> Cóho caja cáhnu í Ndióxi, mé a cíuú tátá xitoho í, Jesucristo. Jáchi Ndióxi cíuú á tátá yo, mé á sá tähví ini sahá yo ta cíuú á Ndióxi ña chíndeé mí tá ndóhó iní. <sup>4</sup> Mé a cán sáhan tuhun ndeé iní nu tóco ndihi ña ndóhó iní já quéa ná cuu caja ri mé ví quiáhva í tuhun ndeé iní ñayivi tá ndóhó iní na. Tá quiáhva caja mé á xóho quiáhva já ndítahan caja í xihín ñayivi. <sup>5</sup> Jáchi tá quiáhva ndóhó ndivaha iní sahá Jesucristo ta sa mé quiáhva já sáhan cuahá ndivaha mé á tuhun ndeé iní tá ndóhó iní. <sup>6</sup> Tá ndóhó ini mé nde já cuu quixi tuhun ndeé iní mé ndó ta já cuu cazu ndaa ínima ndo. Tá sáhan Ndióxi tuhun ndeé iní nde já quéa sáhan ri mé á tuhun ndeé iní mé ndó viti. Ta xihín ña yóho cuu coo ndacu vaha ini ndó tá ná quixi ña ndoho iní ndó tá quiáhva ndóhó iní mé nde. <sup>7</sup> Cándeé iní nde ña a jándacoo ndó tuhun Ndióxi jáchi cándaa cází iní nde ña tá quiáhva ndóhó iní quiáhva já sáhan Ndióxi tuhun ndeé iní.

<sup>8</sup> Candehé ndó, nani i, na cíuú cuéntá Jesús. Cúní nde caxi tuhun nde nu ndo tá quiáhva nandoho iní nde estado Asia. Nasacuu a tondóhó chícázhu nuú nde ta chí a candeé ga iní nde nacahán nde, nduu. Ta chí nasahnda iní nde: "Yóho quivi", nacahán nde. <sup>9</sup> Nacahán nde ña jánda ndáti cuití nde quivi nde joo nacahindée ña yóho ndehe jáchi náha nuú nde ña co ndítahan candeé iní nde mé nde. Jáchi ña ndítahan candeé iní nde cíuú Ndióxi, mé a jánditacu tucu ndii. <sup>10</sup> Najácacu Ndióxi ndehe tañu tondóhó ná a quíví toho nde. Ta mé á

quéa jácacu a ndehe nuú ndihi tondóhó vaxi chágá chí nuu. Jáchi cández iní nde mé á ña chíndeé tá chíndeé a ndehe nuú ndihi tondóhó. <sup>11</sup> Ta mé ndó chíndeé ndó ndehe tá xíca tahví ndó nu Ndióxi sahá nde. Jáchi tá ná caca tahví cuahá ñayivi nu Ndióxi sahá nde, sa mé quiáhva já ndiquiáhva cuahá ñayivi ndixahvi nu Ndióxi sahá ñamani cája Ndióxi xihín nde.

*Ndícani Pablo ndá sahá quéa cóo násahan  
da ñuu Corinto*

<sup>12</sup> Ín java ñaha cája ña ná coo vaha ini nde ta cíuú á ña yóho: cándaas cází iní nde ña co cája nde ña ná tuhun ta tóco ndihi ña cája nde ñuyíví yóho cája nde ña xihín ndinuhu ini nde. Ta xihín ndinuhu chágá ini nde cája nde ña cán tañu mé ndó. Ta ni in ña cája nde co cája nde ña sahá ña ndichí quixi jini mé nde jáchi mé Ndióxi quéa tähví ini sahá nde ta chíndeé a ndehe cája vaha nde. <sup>13</sup> Tá nacahyí nde carta nu ndo jihna coó nacahyí nde tuhun ña a cíuú candaas iní ndó jáchi ndacu ndacu cahán nde xihín ndo nu carta cáhyí nde. Jáchi cúní nde ña ná candaas vaha iní ndó <sup>14</sup> ña co candaas cuahá iní ndó viti. Ta cúní nde ña ná cajii iní ndó sahá mé nde tá quiáhva cajii iní nde sahá ndo tá ná tandaas quíví quixi tucu Jesucristo ñuyíví yóho.

<sup>15</sup> Sahá ña cández iní i ndohó sahá ña cán quéa nasacu iní i coto nihni jihna ñuhú i ndohó ña ná cajii ndivaha iní ndó tá ná cuni ndó yehé ivi tañu. <sup>16</sup> Jáchi nasacu iní i coto nihni i ndohó tá ná yaha i cuhun i chí estado Macedonia ta já coto nihni tucu u ndohó tá ná ndicó coo i cán. *Anda* já cuu chindeé ndó yehé quehé e íchi cuhun i chí estado Judea. <sup>17</sup> Coto a cahán ndo ña nacahvi ivi joho iní i tá nasacu iní i caja i ña yóho. Ta ni a cahán ndo ña sácú ivi joho iní i xihín ña cája i tá quiáhva caja ñayivi ñuyíví jáchi ndá chuun quéa cahí i jivi a tá a juú a. <sup>18</sup> Sández cází Ndióxi ña co jándahví nde ndohó jáchi co cahí nde xihín ndo "ajan" tá cúní cachi nde "uhun." <sup>19</sup> Jáchi co cája Jesucristo já. Co cahí a "ajan" tá cúní a cachi a "uhun." Ndinuhu ña ndaa quéa cáhan Jesucristo jáchi mé a cíuú á in tuhún jini já jahyi Ndióxi, mé a cáhan Timoteo xihín Silvano xihín yehé sahá nu ndo. <sup>20</sup> Jáchi xihín Jesucristo jaxinu coo Ndióxi tóco ndihi tuhun nasahan mé á nu yo. Sahá ña cán quéa tá cája cáhnu í Ndióxi

cuu cachei yó “Já ná coo.” Ta tá cachí yo “Já ná coo” cíu á sahá ña nacaja Jesucristo.

<sup>21</sup> Ta mé Ndióxi nandaja ndacú a ndehe ta nandaja ndacú a ndohó. Ta nacaxi a mí cacuú ñayivi cuénta mé á. <sup>22</sup> Jáchí mé á cíu á xitoho mí ta cómí a cuénta saha yo. Ta násacu a ínimá yíl mé á ini ínimá yo já ná canda a vaha iní ndá quiáhva ín ñamani caja Ndióxi xihín yo chí nuu.

<sup>23</sup> Sándezhé cáxí Ndióxi ña mé a ndaa táchí cahán i xihín ndó. A náha saa i ñuu Corinto jan tá quiáhva násacu ini i caja i jáchí co cúní jácacuéha i ini ndó. <sup>24</sup> Co cíu á sahá ña cúní nde caja ndúsá nde sahá ña ndítahan candusa ndó. Jáchí sa xíní nde ña sa ndúu ndacú ndó cándezé ini ndó Jesucristo. Ña cúní nde quéa chindeé táchan nde xihín ndo já ná cajíi ini ndó.

## 2

<sup>1</sup> Sahá ña cán quéa násacu ini i ña ná a cíuhun tucu u coto nihni i ndohó já ná a cacuteéha ini ndó. <sup>2</sup> Jáchí tá ná jácacuéha yehe ini ndó a cíu caja ndó jácajíi ndó ini i jáchí mé ndó cíu na jácajíi ini i. Joo ndaja caja ndó jácajíi ndó ini i tá sa nájácacuéha i ini ndó. A cíu caja ndó ña. <sup>3</sup> Sahá ña cán quéa nacahyí i in carta ña náchindahá i nu ndo cán jáchí co cúní xinu i jan ta jácacuéha ndó ini i sahá ña caja ndó. Jáchí ndítahan jácajíi ndó ini i nani fin i xihín ndó. Jáchí xíní vaha i ña tá cajíi ini i já cajíi ini ri ndohó va. <sup>4</sup> Joo nani nacahyí i mé carta cán já nácasáhá táchí ini i ta ndícani ini i janda quiahva nácasáhá sácu u. Coó nacahyí i ña sahá ña cúní ña ná catati ini ndó xihín á joo cúní ña ná canda a ini ndó ndá quiáhva quíhví ndiváha ini i ndohó.

*Ndítahan caja cahnu ini ná ndúu ñuu Corinto sahá in dä nacaja cuachi*

<sup>5</sup> Ta mé da nacaja cuéha ini i cán coó nacaja cuéha da ini in tühun yehe tá nacaja da cuachi. Joo cíu á tátuhun nacaja cuéha ri da ini ndihí ndó. Cahán i ña yóho xihín ndo ña ná a jánani ndiváha ndó da. <sup>6</sup> Jáchí cuahá ndó sa nájánani ndó da cán. Vatí já va caja xíxi ndó xihín dá. Ndáhví da. <sup>7</sup> Ña ndítahan caja ndó quéa caja cahnu ini ndó sahá dá viti ta quiáhva ndó tuhun ndeé ini da jáchí a juú tiahva náá cacuéha ini da xihín ña caja ndó xihín dá. <sup>8</sup> Sahá ña cán quéa xíca táchí tucu u nu ndo ña ná jánaha ndó nu dá ña mé a ndaa quíhví ini ndó da.

<sup>9</sup> Sa nacahyí vi in carta nu ndo nu ndícani i sahá ña yóho. Nacahyí i ña sahá ña násacu ini i coto ndojó i ndohó á mé a ndaa táchí caja ndó tá fin nacachi i xihín ndo. <sup>10</sup> Ña cán quéa ndá ná ná caja cahnu ini ndó sahá já caja cahnu ri ini yehé va sahá ná. Ta tá fin in ñaha ndítahan caja cahnu ini i sahá já quéa caja i ña saha mé ndó. Ta sándezhé cáxí Jesucristo ña caja i. <sup>11</sup> Jáchí tá ná a caja i ña já quéa cándezé tiñáhá sacuahá xihín yo jáchí sa xíní vaha í ña cúní rí jándahvi rí ñayivi.

*Ndícani ini Pablo nani fin da ñuu Troas*

<sup>12</sup> Tá náxinu coo i ñuu Troas ña caxí tuhun i tuhun vaha sahá Jesucristo já náñuná nuú i caja chíuhun vaha i cuénta mé á cíu xitoho í. <sup>13</sup> Joo coó náshaijin vaha ini i jáchí coó nañehé e ñaní Tito. Sahá ña cán quéa náñindayí i ñaní, ná ndúu ñuu Troas já naquee e cuahán i chí estado Macedonia ndinducú u da.

*Sáhan Jesucristo ndeé á nu yó quee vaha í*

<sup>14</sup> Ndíquiahva i ndixahvi nu Ndióxi jáchí sahá ña nacaja Jesucristo quée vaha í níí tiempo. Tá quiahva ndícuíta nuu in jíco támi sáhan quiahva já ndícuíta nuu tuhun Ndióxi caja nde já quéa ná cuu canda a ini ñayivi tuhun vaha sahá Jesucristo. <sup>15</sup> Jáchí mí cíu yó tátuhun jusa vaha ña támi sáhan ña jocó Jesucristo nu Ndióxi. Ta ndícuíta nuu a tañu na jácacu Ndióxi sahá ña cándezé ini na mé á. Ta jári ndícuíta nuu a tañu na cíuhun indayá sahá ña coó náandusa na mé á. <sup>16</sup> Mí cíu yó tátuhun jusa támi sáhan nuú na sa canda a ini tuhun Ndióxi jáchí xíní na ñehe yó tuhun ña cuu jácacu ínimá ná. Ta nuú na co xíní tuhun Ndióxi cíu yó tátuhun in ña quini ndiváha sáhan jáchí cuhun na indayá. Ndá ná cíu caja jácínu ini ñayivi, da já. <sup>17</sup> Jáchí xíní Ndióxi ña mé nde co xíca nuu nde cahán nde tuhun Ndióxi sahá jiyuhún ta co jáma nde ña tá quiáhva caja cuahá ñayivi. Ña caja nde quéa cahán nde xihín ñayivi xihín ndinuhu ini nde ña sáhan Ndióxi nuú nde cahan nde. Jáchí mé nde cíu nde ña náchindahá Ndióxi ta caja chíuhun nde sahá Jesucristo.

## 3

*Cáxi tuhun Pablo sahá tuhun saá ña sáhan Ndióxi nuú ñayivi*

<sup>1</sup> Co cahán nde ña yóho xihín ndo sahá ña cúní nde caja cahnu nde mé nde. Jáchí co

xíní ñúhú nde caca nde in tutu ña cáchí cíuú nde ñayivi ndísáhnu ini nu ndo tá quiáhva cája java na. <sup>2</sup> Mé va ndó cuu quiáhva ndó tuhun vaha sahá nde jáchí tá ná cuni ñayivi tá quiáhva nandijama Ndióxi ínima ndo xihín tuhun nacahán nde xihín ndo já candaa ini na ña nacaja vaha nde tá nacaja chún nde tañú mé ndó. <sup>3</sup> Jáchí náha cáxi táhyí a ña cíuú ndó tátuhun in carta nacahyí Jesucristo ta mé nde jáhna nde ña nyú ñayivi. Co cíuú á in carta nacahyí nyú tutu. Cíuú á ña nacahyí ínima yii Ndióxi, mé a tacú indív. Ta cíuú á in carta ña coó nacahyí nyú yuu jáchí cíuú a tátuhun nacahyí a ini ínima ñayivi.

<sup>4</sup> Ta cáhan nde ña yóho jáchí cándezé cáhnu ini nde Ndióxi sahá ña nacaja Jesucristo. <sup>5</sup> Co cíuú á sahá ña quíxi jini mé nde caja nde ña. Jáchí Ndióxi quéa sáhan ndéé á nyú nde caja nde chuun yóho. <sup>6</sup> Ta mé á quéa chíndéé ndehe caja chún nde cuéntá mé á xihín cuéntá tuhun saá nasahan nu yo. Co caja chún nde sahá ley nacahyí nyú tutu joo caja chún nde sahá ínima yii Ndióxi. Mé ley caja ña ná quivi ñayivi joo caja ínima yii Ndióxi ña ná catacu ñayivi anda ama cása quívi.

<sup>7</sup> Tá nacahyí ley Moisés nyú yuu, já nandiyehé ndivaha nyú Moisés janda quiáhva coó naquii ga candehé na Israel nyú dá. Joo nyú nandiyehé sahá cán naçasáhá ndáhva ña janda quiáhva nandahya ña. Candehé ndó. Vatí nandiyehé ndivaha nyú naquii mé ley, ña cuu chindahá ñayivi cuhun na indayá <sup>8</sup> joo ndaja ga ví ndiyehé chágá nyú quixi tuhun vaha cáhan sahá Jesús nyú ñayivi jáchí sáhan ínima yii Ndióxi tuhun yóho nu yo. <sup>9</sup> Candehé ndó. Vatí ndató nasahijin tá naquii mé ley ña cuu chindahá ñayivi indayá joo ndaja ga ví ndató coo tá cáxi tuhun í xihín ñayivi ña coó ga cuachi na nu Ndióxi. <sup>10</sup> Jáchí coó sahá ga ña ndató mé ley naquii jihna cán tá ná jácatáhan í ña xihín ña ndató chágá naçahan Ndióxi nu yo viti. <sup>11</sup> Ta tá ndató nasahijin nyú naquii ña nandihí sahá cán ndaja ga ví ndató chágá coo ña sáhan Ndióxi nu yo yóho jáchí a ndíhi toho sahá.

<sup>12</sup> Ta sahá ña ndáti tiáhva nde coo ña yóho sahá ña cán quéa co ylhí nde cáhan nde ña xihín ñayivi. <sup>13</sup> Co caja nde tá quiáhva nacaja Moisés tá nachijahvi da nyú dá xihín

in jahma ña ná a cúní na Israel ña sa cuahan ndáhva ña nandiyehé nyú dá cán. <sup>14</sup> Joo mé na Israel cán coó nacandaa ini na ndá cuéntá quéa nachijahvi Moisés nyú dá. Ta janda viti ndájí yii xíní túni ná jáchí vatí cáhvi na tuhun Ndióxi ña nacahyí sahá joo co cándaa ini na ña jáchí najahvi xíní túni na ta a cíuú nuná. Jesucristo cuití va cuu jándunqá xíní túni ná tá cándezé ini na mé á. <sup>15</sup> Mé na Israel ndájí yii xíní túni ná janda viti jáchí tá cáhvi na ña nacahyí Moisés co cándaa ini na ña. Cíuú ná tátuhun in na jahvi jahma nyú. <sup>16</sup> Joo tá ná ndicó coo ini ñayivi nu Ndióxi já ndinuna xíní túni ná. Cíuú á tátuhun ndicava jahma naçandaji nyú ná. <sup>17</sup> Jáchí ínima yii Ndióxi cíuú á xitoho í. Ta ny fin mé á, cán núná xíní túni ñayivi. <sup>18</sup> Ta viti cíuú yó tátuhun in yutatá nyú cuu cuni ñayivi tá quiáhva cáhnu cíuú Ndióxi. Jáchí co ndájí ga xíní túni yo viti sahá ña naçasáhá ndijama Ndióxi mí viti ná nduú tá quiáhva cása Jesucristo. Ta tá quiáhva cáhnu cíuú mé á quiáhva já loho loho nduu cáhnu yó tá quiáhva cása mé á. Já caja xitoho í, mé a cíuú ínima yii Ndióxi.

#### 4

<sup>1</sup> Sahá ña cán quéa fin ndacú ini nde cáhan nde tuhun Ndióxi xihín ñayivi jáchí sahá ña natahví ini Ndióxi sahá nde sahá ña cán quéa naçahan mé á chuun yóho nyú nde. <sup>2</sup> Mé nde naçacu xóo nde tóco ndíhi ña núná caja jehé ñayivi. Ta co sácú ini nde jandahvi nde ñayivi tá cáhan nde tuhun Ndióxi xihín ná. Ña caja nde quéa cáhan nde ndimuhu ña ndaa ta xihín ña yóho sándehé cáxi Ndióxi tá quiáhva náha nde nyú ñayivi ña caja nde ña vaha. <sup>3</sup> Tá co cándaa ini ñayivi tuhun vaha sahá Jesús ña cáhan nde xihín ná cíuú á sahá ña xíca na íchí cuahán indayá. <sup>4</sup> Jáchí sahá ña co cándusa na ña cáhan nde xihín ná sahá ña cán quéa nandají xíní túni ná nacaja tiñahá, mé rí cíuú xitoho nyúyí yóho ña ná a cúní ná ndá quiáhva ndató ndiyehé tuhun vaha cáhan sahá Jesucristo, mé a cáhnu ndivaha, mé a cíuú á yuhú nyú Ndióxi. <sup>5</sup> Mé nde co xíca nuu nde cáhan nde sahá mé va nde. Ña caja nde quéa xíca nuu nde cáhan nde sahá Jesucristo, mé a cíuú xitoho í. Ta cáhan nde xihín ndo ña caja chún nde nu ndo sahá ña cúní nde Jesús. <sup>6</sup> Jáchí naçahnda Ndióxi chuun ña ná queta ña yéhe tañú ña naá cán. Ta mé a cán quéa nacaja ña

ná ndiyéhé ínima yo xihín tūhun Ndióxi já quéa ná cuu candéhé yo ndá quiāhva yéhe nuu Jesucristo, ña náhá ndá quiāhva cahnu cùú Ndióxi.

*Ndá quiāhva cuu canduú tá cández ini Jesucristo*

<sup>7</sup>Joo tóco ndihí ña ndáyahvi ña násahan Ndióxi nu yo yóho cùú á ña ndácaan yiquí cuñu í vatí yiquí cuñu í cùú á tátuhun in quiji ndahyi. Násahan Ndióxi ña ndáyahvi nu yo já quéa ná cuu cuni ñayivi ña ín ndée Ndióxi caja tóco ndihí ñaha ta co cùú á ndée mí. <sup>8</sup>Ta vatí vaxi cuahá tondóhó nu yo joo jáyaha tá jáyaha Ndióxi mí. Ta vatí ndicani ndivaha iní joo co jándhi nahá yo mí. <sup>9</sup>Ta vatí ndicuita ñee na mí joo co jándacoo ndáha toho Ndióxi mí. Ta vatí jándicava na mí joo co jándhi na sahá yo chí uun. <sup>10</sup>Ta ndá nacuú nu xíca nuu í a lhí toho cahní na mí tá quiāhva nácaja na xihín Jesús. Ta xihín ña ndóho yiquí cuñu í náhá ña tacú yii va Jesucristo ta ín a xoho. <sup>11</sup>Jáchi ndijáá níi quiví ndúcú na cahní na mí sahá Jesucristo. Joo xihín ña yóho núná nu yo jánhá í nuú ñayivi ña ndácaan ndée mé á iní yiquí cuñu í nani ndúu ñuyíví yóho. <sup>12</sup>Ta sahá ña xíca nuu nde cahán nde tūhun Ndióxi xihín ndo sahá ña cán quéa ndúcú na cahní na ndehe. Joo sahá ña ndóho iní nde yóho cuu cacu ndaa ínima ndóhó anda ama cása quiví.

<sup>13</sup>Jáchi já cáchí tūhun Ndióxi: "Sahá ña nácahéé ini i Ndióxi sahá ña cán quéa nácahéen i cuénta mé á." Ta quiāhva já caja ri ndehe va sahá ña cández ini nde Ndióxi. Ña cán quéa co yihví nde cahán nde sahá mé á nuú ñayivi. <sup>14</sup>Jáchi cández caxí ini nde ña tá quiāhva najánditacu Ndióxi Jesucristo, xitoho í quiāhva já jánditacu a mí coo i xihín mé á. Ta já ndóhó xihín ndehe xínu coo i nu ín mé á. <sup>15</sup>Násaci iní Ndióxi ndoho iní nde tóco ndihí ña yóho sahá mé ndó. Ña cán quéa tá ná caja Ndióxi cuahá ñamáni xihín cuahá chágá ñayivi já nduu cuahá ña ndiquiāhva ndixahvi nu á ná ná ndicáhnu mé á.

<sup>16</sup>Sahá ña cán quéa co cátati iní xihín ña ndóhó í vatí sa cayatá yiquí cuñu í. Joo ndiyúta iní in in quiví yáha. <sup>17</sup>Cama chá yáha tóco ndihí ña válí ndóhó iní ñuyíví yóho joo tá nandihí nandoho iní já vaxi cuahá ndivaha ña náhnu chágá cuénta mé á nu yo ta anda ama cása quiví a ndihí sahá.

<sup>18</sup>Ta co ndítahan nu yo quehé cuénta sahá

ñá sándezhé yó viti. Ña ndítahan caja í quéa cahvi iní sahá ña a cuú cuni xihín nuu yo. Jáchi vaxi quiví ndihí sahá tóco ndihí ña sándezhé yó viti joo ña a cuú cuni coo a anda ama cása quiví.

## 5

<sup>1</sup>Jáchi sa cández iní ña cuú yiquí cuñu í tátuhun vehe nu ndácaan ínima yo. Mé vehe nu ndácaan ínima yo yóho cùú á ña vaxi quiví ndihí sahá. Ta anda jáví násacu iní Ndióxi quiāhva nu yo inga yiquí cuñu nuu coo ínima yó indíví. Ta mé nuu coo ínima yó cán a ndihí sahá anda ama cása quiví jáchi nácahva Ndióxi ña. <sup>2</sup>Nani ndácaan ínima yó yiquí cuñu í yóho já ndóho iní ta tana í jáchi xíca quiví iní ndiquehé inga tucu yiquí cuñu saá cuénta indíví. <sup>3</sup>Jáchi jácandixi Ndióxi mí xihín yiquí cuñu saá cuénta indíví já ná a cámua tátuhun na coó jáhma. <sup>4</sup>Jáchi nani ndácaan ínima yo iní yiquí cuñu í yóho tana í ta tähnda iní vatí co cùú á sahá ña cuni yo jándacoo i yiquí cuñu í. Cámua á sahá ña ndiává cahnu iní coo ínima yo iní in yiquí cuñu saá. Anda jáví jándacoo í yiquí cuñu í ña ndihí sahá ta ndiquehé yiquí cuñu saá ña cuu cañehé anda ama cása quiví. <sup>5</sup>Jáchi mé Ndióxi quéa násacu tähva mí ndiquehé in yiquí cuñu saá jáchi mé á quéa násahan ínima yii á nu yo já ná cández vaha iní ndá quiāhva ín ña sácú iní Ndióxi quiāhva nu yo chí nuu.

<sup>6</sup>Sahá ña cán quéa ín ndehe iní jáchi cández iní ña nani ndácaan ínima yó yiquí cuñu í yóho ndúu xíca yo nu Jesucristo, xitoho í. <sup>7</sup>Ta vatí co xíni yo mé á joo xíca í chí cuénta mé á sahá ña cández iní mé á. <sup>8</sup>Ta co yihví ga yó quiví viti jáchi cuni chágá í jándacoo i yiquí cuñu í yóho já ná cuu cohó coo i xihín Jesucristo, xitoho í indíví. "Sahá ña cán quéa níi tiempo ndúcú yó caja í ña tähán iní mé á xihín. Vatí tacú yo á naxihí yo cuni tá cuni yó caja í ña tähán iní mé á xihín. <sup>10</sup>Jáchi vaxi quiví tá ná ndique tähán ndihí candita i nuú Jesucristo ndiquiāhva tá in tá in i cuénta nu mé á sahá ña nácaja i xihín yiquí cuñu í ñuyíví yóho, á cámua á ña vaha á cuú á ña nuu.

*Nandique tähán maní yó xihín Ndióxi sahá ña nácaja Jesucristo*

<sup>11</sup>Caja cahnu í Jesucristo xihín ndinuhi iní ta cández iní ña vaxi quiví cohó candita i nu mé á. Sahá ña cán quéa ndihí iní nde

jácahan nde ñayivi ña ná ndicó coo ini na. Ta xíni vaha Ndióxi ña cája nde ta cúní nde ña ná candaqá ini ri mé va ndó ña. <sup>12</sup> Ña cáhan nde yóho co cútú á sahá ña cúní tucu nde ndiñehe jíco nde mé nde. Ña cúní nde quéa ná coo vaha ini ndó xihín ña cája nde já ná cuu nducú ñehe ndó tūhun nuú na xíca ndíñehe jíco mé, na xíca cáhan lánda ta coó ña vaha quíxi íníma ná. <sup>13</sup> Vatí cútú nde na tachí nuú ñayivi joo cútú á sahá ña cája nde chuun Ndióxi. Ta tá co cútú nde na tachí já quéa cútú á sahá ña vaha mé ndó. <sup>14</sup> Ta sahá ña quíhví ini Jesucristo ndehe sahá ña cán quéa ndúsa cája nde ña cúní mé á. Jáchí candaqá cáxi ini nde ña naxihí Jesucristo sahá tóco ndihi ñayivi ta in nanduú xihín Jesucristo tá naxihí a. <sup>15</sup> Naxihí Jesucristo sahá tóco ndihi ña ná a cátacú ga í sahá mé cuití yo. Joo cúní a ña ná catacú sahá mé a naxihí sahá yo ta tá nandihi nanditacu tucu a. <sup>16</sup> Sahá ña cán quéa co sándehé ndaa ga nde ñayivi tá quiahva cája ñayivi ñuyíví. Vatí nacahan núu nde sahá Jesucristo sanahá joo co cája ga nde já viti. <sup>17</sup> Jáchí tá in nanduú xihín Jesucristo já nanduú tátuhun ñayivi saá. Ña cán quéa nandihi sahá ña yataá ta nanduú ñayivi saá nacaja Ndióxi.

<sup>18</sup> Ta tóco ndihi ña yóho cútú á ña cája Ndióxi jáchí najándique táhan máni á mí xihín mé á sahá ña nacaja Jesucristo. Ta najándacoo a chuun yóho nuú nde ña ná jándique táhan máni nde tóco ndihi ñayivi xihín mé á. <sup>19</sup> Ta nasañan ñamani nuú ñayivi ndique táhan máni ná xihín á sahá ña nacaja Jesucristo. Ta coó naquehe Ndióxi cuéntá sahá cuachi nacaja na. Ta ña yóho cútú chuun natahndá nuú nde nacaja Ndióxi ña ná caxi tūhun nde nuú ñayivi ña cúní mé á ndique táhan máni á xihín ná. <sup>20</sup> Mé nde cútú nde na nachindahá Jesucristo ta xíca nde cáhan nde sahá mé á. Ta viti cútú á tátuhun xíca tähví Ndióxi nu ndo tá cáhan mé nde. Ta viti xíca tähví nde nu ndó sahá Jesucristo ña ná ndique táhan máni ndó xihín mé á. <sup>21</sup> Mé Jesucristo coó nacaja ni en cuachi joo sahá mí nacaja Ndióxi ña ná ndoho Jesucristo tátuhun in dà nacaja cuachi. Ta sahá ña nacaja mé á co quéhe ga Ndióxi cuéntá sahá cuachi nacaja í ta nanduú ñayivi ndaa nu mé á tátuhun cúní mé á.

## 6

<sup>1</sup> Ta sahá ña in cútú ndó xihín nde cája chúun yó cuéntá Ndióxi sahá ña cán quéa xíca tähví nde nu ndo ña ná a quéhe núu ndó ñamani cája Ndióxi xihín ndo. <sup>2</sup> Jáchí já cachí tūhun Ndióxi já:

Tá nataanda tiempo caja i ñamani xuhun já naxini joho i nuú nacahun.

Ta tá naxinu quívi jácacu u yohó já nachindeé e yohó, cachí tūhun Ndióxi.

Candehé vaha ndó. Viti níhú cúní Ndióxi caja cuahá ñamani xihín ndo. Ta viti níhú cúní a jácacu a ndohó.

<sup>3</sup> Ta ni in tūhún ña núu co cája nde já ná a cáhan núu ñayivi sahá chūn cája nde. <sup>4</sup> Ña cája nde quéa jánahá nde nuú ñayivi ní tiempo ña cútú nde na cája chūn cuéntá Ndióxi. Jáchí sáhan ndeé ini nde tá ndóho ini nde. Ta tá ndímaní ñahá nuú nde ta tá vaxí tondohó nuú nde co ndihi ini nde. <sup>5</sup> Jáchí nacaní na ndehe ta nataán ná ndehe vecaa ta ndívaa na xoo nde. Ta a juú quiahva nájácaja chūn na ndehe ta java tañu co quíji nde ta java tañu vaxí joco nuú nde. <sup>6</sup> Joo jánahá nde nuú ñayivi ña cútú nde ñayivi cuéntá Ndióxi jáchí ndúu víi nde ta candaqá ini nde ña ndaa ta fin cahnu ini nde xihín ñayivi ta cútú nde na vaha ini. Ta sahá ña ndácaqan íníma yii Ndióxi ini nde ta sahá ña quíhví ini ndusa nde ndohó <sup>7</sup> ta sahá ña cáhan nde ña ndaa xihín ndée nasañan mé á nuú nde sahá ña cán jánahá nde nuú ñayivi ña cája chūn nde cuéntá mé á. Ta sahá ña cútú nde ñayivi ndaa nu Ndióxi sahá ña cán quéa quíhví nuu nde cání táhan nde xihín rí quíni tá cúní rí caja xixí rí xihín nde. <sup>8</sup> Java tañu cája cahnu ñayivi ndehe ta java tañu cahán ihví ña xihín nde. Java tañu cahán vaha na sahá nde ta java tañu cahán núu na sahá nde. Ta java tañu tá quiahva caja na xihín na tūhún quiahva já cája na xihín nde vatí cáhan nde ña ndaa. <sup>9</sup> Ta java tañu cája na tátuhun co xíni ña ndehe vatí xíni vaha na ndehe. Ta mé a ndaa cútú nde tátuhun na sa xihí vatí tacu yii va nde. Cája xixí na xihín nde joo co sáhní ña ndehe. <sup>10</sup> Ta java tañu ndúu cuéha ini nde joo ní tiempo cajíi ini nde. Ta java tañu cándahví ndivaha nde joo já cuahá ndivaha na cútú ná tátuhun na cuicá viti jáchí nacaxi tūhun nde tūhun Ndióxi nu ná. Ta ndaa nde tátuhun na coó ñaha nuu joo fin ndihi ñaha cuéntá Ndióxi nuú nde.

<sup>11</sup> Ñani mí i, na ndúu ñuu Corinto jan. Tá cáhan nde xihin ndo co chíjehé tuhun nde nu ndo jáchí quíhvi ini nde ndohó xihín ndinuhu ini nde. <sup>12</sup> Vatí co quíhvi ini ndó ndehe tá quiáhva quíhvi ini nde ndohó joo co jándacoo nde ña quíhvi ini nde ndohó. <sup>13</sup> Sahá ña cán quéa xícá tähví i nu ndo tá quiáhva caja í dataa tá xícá tähví dä nuú jahyi da. Na cúní quéa ña na quíhvi vaha ini ndó yehé tá quiáhva quíhvi ndiváha ini i ndohó.

*Co ndítahan quíhvi nuu na cíuú cuéntá Jesús xihín ñayivi cuéntá ñuyíví*

<sup>14</sup> Cuéntá coo ndó ná a ndique tähán ndó xihín na co cíuú cuéntá Jesús jáchí coó in cíuú na xihín ndo. Jáchí ndaja cuu ndique tähán ña vaha xihín ña náu. Ta ndaja cuu ndique tähán ña yehé xihín ña náa. Ni in ña yóho a cíuú coo já. <sup>15</sup> Ta ama cuéhé Jesucristo coo a xihín Satanás, mé rí quini. Ta quiáhva já ama ná cuu ndique tähán in na ndíco íchí cuéntá Jesús xihín in na co cíuú cuéntá mé á. <sup>16</sup> Ta ama ná cuu cachí ndó ña in cuu nuú caja cahnu na Ndióxi xihín nuú caja cahnu na yoco. Jáchí mí cíuú yó tátuhun veñuhu Ndióxi, mé á tacú indíví. Ta já nacachi a já: Ndacaan i ínimá na cíuú cuéntá mé i ta caca nuu i xihín ná.

Yehé cacuu u Ndióxi ña caja cahnu na, ta mé ná cacuu na ñayivi, na cacomí i cuéntá saha, cachí Ndióxi.

<sup>17</sup> Sahá ña cán quéa já nacachi Ndióxi, xitoho i já xihín ná:

Tavá ndo mé ndó tañu ñayivi quini jan.

Caxoo ndó nu ná ta a caja ndó ña níu ña caja na já ná cuu ndiquehe vaha i ndohó.

<sup>18</sup> Ta já yehé cacuu u tátá ndo, ta mé ndó cacuu jahyi taa i xihín jahyi jíhfí i, cachí Ndióxi, mé a cíuú caja tóco ndihí ñaha.

## 7

<sup>1</sup> Candehé ndó ñani máni, na cíuú cuéntá Jesús. Ña yóho cíuú tuhun nasañan Ndióxi nu yo. Sahá ña cán quéa co ndítahan nu yo caja i in ña níu ña cuu jácaquini yiquí cuñu í á ínimá yo. Ña ndítahan caja í quéa cayihví yo Ndióxi ta cacu iní ndaja ví yo mí já ndiquiahva í mí ndáha mé á.

*Cájjii ini Pablo jáchí nandicó coo ini na ndúu ñuu Corinto*

<sup>2</sup> Xíca tähví nde nu ndo ña ná a cájí nuu ga ndó nu ínimá ndo ta na quíhvi ini nde ndehe. Jáchí ni in ndó coó nacaja xíxi nde xihin ta ni in ndó coó najáttiví nde ta ni in ndó coó najándahvi nde. <sup>3</sup> Co cáhan i ña yóho xihin ndo sahá ña cúní candehé ndaa i ndohó, vaha. Jáchí janda jihna va nacachi i xihin ndo ña ñuhu ndó ínimá i. Ta vaha ri catacu u ta vaha ri quivi i joo quíhvi ini tā quíhvi ini i ndohó. <sup>4</sup> Mé a ndaa cández cahnu ndiváha ini i ndohó ta cájjii ini i xihin ña caja ndo. Ta tá ndícuhyun ini i saha ndo já ndíndacú ini i ta ndícutú ndaq ini i xihin ña cájjii ini i vatí ndóho ini i.

<sup>5</sup> Janda naní naxínu nde estado Macedonia chí a cíuú canduu vaha nde jáchí ndáchí nacuu ndáca náha tondohó nuú nde. Jáchí ndijáa quixi ñaha jáquíhvi ndehe janda quiáhva yílhí nde ndúu nde yóho. <sup>6</sup> Joo sahan Ndióxi tuhun ndee ini ñayivi ndúu cuéha ini. Ña cán quéa nasañan tuhun ndee ini nde jáchí naxinu Tito nu ndúu nde yóho. <sup>7</sup> Ta a juú sahá ña naxinu da yóho cuití va, vaha. Nandihvi tuhun ndee ini nde jáchí nacajii ndiváha ini mé dá nacaja ndohó. Ta nandicaní da nuú nde ña xícá ndiváha ini ndó cuni ndó ndehe ta anda quiáhva fáhnada ini ndó sahá nde. Ta nacachi da xihin i ndá quiáhva ndicani ini ndó sahá i ta xihin ña yóho nacajii chágá ví ini i.

<sup>8</sup> Vatí nacacuéha ini ndó xihin carta nacahí i nu ndo joo viti co tähndá toho iní i ña nachindahá i ña nu ndo. Vatí natahnda ini i tá naxini i ña nacacuéha ini ndó tixi chá tiempo <sup>9</sup> joo cájjii ini i viti. Co cíuú a sahá ña nacaja cuéha carta cán ndohó. Cájjii ini i jáchí tóco ndihí ña nacaja cuéha ini ndó cán nanducú ñehe a ndohó nu Ndióxi. Mé ndó nacaja ndee ini ndó tá quiáhva cúní Ndióxi. Sahá ña cán quéa cández ini nde ña coó nacaja níu nde xihin ndo. <sup>10</sup> Jáchí tá cacuteha iní ta tá caja ndee iní tá quiáhva cúní Ndióxi caja i já quéa chíndee a mí ndicó coo iní. Ta xihin ña yóho jácacu a mí ta coó ñaha ndítahan tähndá iní saha. Joo tá cacuteha iní ñayivi ñuyíví co ndicó coo iní na sahá ña cán quéa ndihí saha ná indayá. <sup>11</sup> Cández ndó ndaja nacaja ndee ini ndó tá nacacuéha ini ndó tá quiáhva cúní Ndióxi. Joo tá coó ña yóho ná yaha ta a jándacoo toho ndó cuachi nasaçaja ndó, nduu. Joo viti a juú quiáhva naxojo ini ndó saha mé cuachi ta nayihví ndo sahá. Ta tá nandihí já naxica iní ndó cuni ndó yehé ña

ná chindeé e ndohó. Ta anda já nasa<sup>h</sup>ijin tiahva ndó jándoho ndó ini da nacaja cuachi cán. Ta xihín ná yóho náhá ná co táhan ini ndó xihín cuachi nacaja da cán. <sup>12</sup> Ná cán quéa tá nacahyí i carta cán nu ndo coó nacaja i ná sahá da nacaja cuachi cán. Ta ni coó nacaja i ná sahá nayivi nandoho ini sahá cuachi nacaja da. Nacahyí i ná jáchi xihín ná yóho cuu jánahá ndó nu Ndióxi ndá quiahva quíhví ini ndó ndehe. <sup>13</sup> Ta ná yóho quéa sáhan tuhun ndeé ini nde.

Joo nandindeé chágá ví ini nde ta nacajíi íní nde tá naxini nde ná cájii ini Tito. Jáchí mé ndó nacchindeé ndó da ná ná ndivaha ini da. <sup>14</sup> Jáchí mí i sa nacachi i xihín Tito ná cájii ini i xihín ná caja ndó ta coó nacandoo nuú i nu Tito xihín ná nacachi i xihín dá sahá ndó. Joho nacandoo vaha joho i nu dá jáchi tá quiahva cáhan nde ná ndaa xihín ndó quiahva já nacahen ndaa nde xihín mé dá. Ta ná cachí nde quéa cájii ini nde xihín ná caja ndó. <sup>15</sup> Ta cásahá quíhví ini chágá da ndohó tá ndicuhun ini da ná nacaja ndó ná cúní mé dá. Ta nasa<sup>h</sup>ijin toní níhú ndó xihín dá ta nandiquehe ndó da xihín ndinuhi ini ndó. <sup>16</sup> Ta cájii ndivaha ini i jáchi cuu candee ini i ndohó sahá ná caja vaha ndó.

## 8

*Játaca na jihuń quiaghva na nuú na ndahví*

<sup>1</sup> Ta viti cúní nde ndicani nde nu ndohó, nani i ndá quiahva caja Ndióxi namaní xihín nu cúa cuénta Jesús ndúu estado Macedonia. <sup>2</sup> Vatí a juú quiahva cuahá tondohó quíxi nu ná joo cájii tá cájii ndivaha ini na. Ta vatí cuú ná nayivi cándahví ndivaha joo sín vaha ndivaha ini na jócó ná jihuń tátuhun na cuicá. <sup>3</sup> Cáhan ndaa i nu ndó ná cájii ini na jásá ná ná sín nu ná ta janda java na coó cuahá nu ná sáhndá java na ná. <sup>4</sup> Ta xihín ndinuhi ini na naxica tähví na nuú nde ná ná quiahva nde namaní nu ná nehe tähví ná chindeé ná ná cuú cuénta Jesús ndúu Jerusalén. <sup>5</sup> Chí nayaha quiaghva najasá ná náha na chí coó nacahán nde caja na já. Jáchí jihna níhú nandiuihva na mé ná ndáha Ndióxi, xitoho i ná ná caja na ná cúní mé á. Anda já nandiuihva na mé ná ndáha mé nde ná chindeé ná ndehe. <sup>6</sup> Sahá ná cán quéa naxica tähví nde nu Tito ná ná saa tucu da nu ndó jan já ná jaxínu coó da nuú chuun nacásahá caja da jihna

ná játaca da ná jócó maní uun ndó. <sup>7</sup> Jáchí mé ndó yójó joho ndó nu ndíhi ná caja ndó. Yójó ndó xihín ná cández ini ndó Ndióxi. Ta yójó ndó xihín tuhun cáhan ndó cuénta Ndióxi. Ta yójó ndó xihín ná xíní ndó. Ta yójó ndó xihín ná ndíhi ini ndó caja ndó ná vaha xihín nayivi. Ta quiahva já yójó ndó xihín ná quíhví ini ndó ndehe. Ta quiahva já ndítahan cayojo ndo nuú ná jásá ndo nuú ná ndahví.

<sup>8</sup> Ná cáhan i xihín ndó yóho co cúu á in chuun sálhdá i nu ndó. Ná cúní quéa ná candaá ini ndó ndá quiahva chíndeé ná cán nayivi xihín ndinuhi ini na. Ta tá caja ndó tá quiahva caja na cán já quéa jánahá ndó ná mé a ndaa quíhví ini ndó nayivi. <sup>9</sup> Jáchí sa cándaá vaha ini ndó ná natahví ini Jesucristo, xitoho i sahá yo. Ta vatí nasa<sup>h</sup>omí a tóco ndíhi náha joo najándacoo a ná ta nandaja ndáhví a mé á ná ná cuu nduu ndó tátuhun na cuicá ndivaha. Ta nacaja mé á ná yóho jáchi quíhví ndivaha ini a ndohó.

<sup>10</sup> Caja i cuénta ná vaha chágá ná jaxínu coó ndó ná nacásahá caja ndó ava. Jáchí jihna níhú mé ndó nacásahá ndó játaca ndó jihuń jan ta nacaja ndó ná xihín ndinuhi ini ndó. <sup>11</sup> Candehé ndó. Xíní níhú jaxínu coó ndó ná nacásahá caja ndó jan. Ta ná caja ndó ná xihín ndinuhi ini ndó tá quiahva nacaja ndó janda tá mé sahá. Ta xíní níhú quiahva ndó ná cuu jásá ndo <sup>12</sup> jáchi ndá ná cúní jásá náha já ndíquehe vaha Ndióxi ndá ná cuu jásá ná. Sahá ná cán quéa xíní níhú quiaghva ndó ná cuu quiahva ndó jáchi co xíca Ndióxi nu yo quiaghva i ná co cómí yo.

<sup>13</sup> A cáhan ndó ná co ndítahan nuú ná cán caja chún na nani caja chún mé ndó ná ná chindeé ndó na. <sup>14</sup> Ná cúní Ndióxi quéa ná nándimani ni en náha nu táhan ndó. Jáchí ná ndimani nuú ná cán, sín cuahá nu ndohó viti ná ná cuu chindeé ndó ná. Joo inga tañu ná ndimani nu ndohó, coo a nuú ná cán ta já cuu chindeé ná cán ndohó. Ta quiaghva já canduu in nuú xihín táhan ndó. <sup>15</sup> Já cachí tuhun Ndióxi já: “Ni coó nacayojo a nuú na naijátaca cuahá. Ta ni coó nandimani á nuú ná naijátaca chá ná.”

*Tito xihín na xíca xihín dá*

<sup>16</sup> Ndíquiahva i ndixahvi nu Ndióxi jáchi nacaja mé á ná ná ndíhi ini Tito sahá ndo tá quiaghva ndíhi ini mí i sahá ndo. <sup>17</sup> Jáchí

nacandúsa da caja da ña nasañhnda i nu dā. Ta sa ndícani ini ri mé dā sahá ndo ta sahá ña cán quéa cúnī dā coto nihni da ndohó cuénta mé dā viti.

<sup>18</sup> Ta chindahá i in dataa, dā cúu cuéntá Jesús saa dā xihín Tito jan. Ta tóco ndihí ñayivi ndíu java ga veñuhu cáhan vaha na sahá da cán ta sahá ña cája chúnun vaha da cáxi tuhun da tuhun vaha sahá Jesús nuú ñayivi. <sup>19</sup> Ta mé na cúu cuéntá Jesús, na tacá ndijáá veñuhu yóho nandacaxi na dā ña ná caca da xihín nde cañehe nde jiuuhún cuhun nde ñuu Jerusalén. Ta tá cája nde ñamani xihín ñayivi cán já quéa jánahá nde ña mé a ndaa táchíy cúnī nde chindeé nde na. Ta xihín ña yóho cája cahnu nde Ndióxi. <sup>20</sup> Jáchí co cúnī nde ña ná cahán núu ñayivi sahá ña cája nde xihín jiuuhún cuaha cán, ña najátaca ndó. <sup>21</sup> Sahá ña cán quéa ndihí ini nde cája nde ña vaha. Ta a juú nu Ndióxi cuití va ndihí ini nde cája nde ña vaha jáchí cúnī nde caja nde ña vaha nuú ñayivi viti.

<sup>22</sup> Ta xihín mé ñaní, dā chindahá i nu ndó jan chindahá i inga tucu dā cúu cuéntá Jesús. Mé dā yóho cuahá ndivaha tañu ñanahá da ña fin ini da caja da ña vaha xihín ñayivi. Ta viti xíca chágá ini da caja da ña jáchí candeé ini da ña a jándacoo núu ndó dā. <sup>23</sup> Ta ndá na ná ndacá tuhún ndohó sahá Tito ndítahan cahán ndó xihín ná ña cúu dā dā xíca xihín mí i. Ta cahán ndó ña in nuú cája chúnun da xihín i chindeé nde ndohó. Ta tá ná ndacá tuhún ná ndohó sahá java ga na cúu cuéntá Jesús cuahan xihín dā ndítahan cahán ndó ña cúu ná na nachindahá na cúu cuéntá Jesús táchí veñuhu chóho. Ta cahán ndó xihín ná ña cúu ná na cája cahnu Jesucristo. <sup>24</sup> Ta xímí ñúhú jánahá ndó nuú na cán ña mé a ndaa táchí quíhví ini ndó ña já ná candaq ini na tacá veñuhu cán ña fin sahá nde cájii ini nde xihín ndó.

## 9

Sa nataca jiuuhún cuhun nuú na cúu cuéntá Jesús

<sup>1</sup> Co xímí ñúhú cahí chágá i nu ndo sahá jiuuhún ña játacá ndó chindeé ndó na cúu cuéntá Jesús ñuu Jerusalén. <sup>2</sup> Jáchí sa xímí vi ña fin vaha ini ndó caja ndó ña. Ta ndivaha ini i tá cáxi tuhun i nuú ña ndíu estado Macedonia ña mé ndó, ña ndíu estado Acaya jan nasañhnda ini ndó chindeé ndó ñayivi jandá ava. Ta cuahá na ndíu

estado Macedonia nandindeé ini na chin-deé na ñayivi sahá ña vaha ini mé ndó. <sup>3</sup> Joo chindahá i na cúu cuéntá Jesús yóho nu ndó já quéa ná a cándoo núu i jáchí nacahán vaha i sahá ndo nuú na yóho. Ta ña cúu quéa ña ná coo tiahva ndó ndiquiahva ndó jiuuhún ña najátaca ndó jan tá quiahva nacachi i xihín ná. <sup>4</sup> Jáchí tiahva náá java na ndíu estado Macedonia saa na xihín i ta cuni na ña co ndíu tiahva ndó xihín mé jiuuhún. Tá ná yaha ña yóho ta já cacahan ndivaha nuú nde caja ndó xihín ña jan sahá ña nasandeé cahnu ini i ndohó ta sa mé quiahva já cacahan ri nuú ndohó va. <sup>5</sup> Ta sahá mé ña jan quéa nacahán i ña xímí ñúhú caca i ñamani nuú na cúu cuéntá Jesús yóho ña ná cuhun na coto nihni jihna ñúhú na ndohó. Ta já ná chindeé na ndohó nu játaca ndó jiuuhún ña nasañhndó tuhun ndó quiahva ndó jan. Já quéa ná coo tiahva jiuuhún cán tá ná saa i ña ná náha ña sáhan ndó jiuuhún jan sahá ña fin maní ini ndó ta co sáhan ndó ña xihín ña ndúsa.

<sup>6</sup> Xímí ñúhú ndicuhun ini ndó ña yóho: Dá xútu loho, chá va jáquee da. Dá xútu cuahá, cuahá jáquee da. <sup>7</sup> Tá in tá in ndó xímí ñúhú quiahva ndó tá quiahva nasañhnda ini ndó quiahva ndó. A quiahva cajlhnda joho ini ndó ñaha ta ni a quiahva ndó ña xihín ña ndúsa. Jáchí quíhví ini Ndióxi na cajíi ini jasá ñaha. <sup>8</sup> Ta cuu quiahva Ndióxi cuahá ndivaha nuú ña vaha nu ndó já quéa ná a ndimani ni in ñaha nu ndó. Jáchí joho cayojojohno yáho na ndó já ná cuu chindeé ndó na ndimani ñaha nuú nani ná caccu a nuú ña vaha. Jáchí já cächí tuhun Ndióxi já:

Cuahá ndivaha ñaha jásá Ndióxi nuú na ndahví,

ta já coo ña vaha cája mé a xihín ñayivi anda ama cása quivi, cächí tuhun Ndióxi.

<sup>10</sup> Jáchí Ndióxi quéa sáhan tata nuú in dataa já ná cutu da ña. Ta mé a cán sáhan ña cuxu da viti. Ta quiahva já caja Ndióxi xihín ndó. Quiahva mé a ña xímí ñúhú ndó já ná cuu chindeé chágá ví ndó ñayivi. Ta já quéa ñehé táhvi ndó canduu vaha ndó sahá ñamani caja ndó. <sup>11</sup> Ta já xímí ndó cacomí ndo cuahá ndivaha nuú ña cuicá ta xihín ña yóho cuu chindeé cuahá ndó ñayivi xihín á. Ta mé jiuuhún játaca ndó jan tá ndiquiahva nde ña nuú na ñuu Jerusalén já quéa ndiquiahva na cán ndixahvi nu Ndióxi sahá. <sup>12</sup> Jáchí mé jiuuhún játaca ndó cán tá ná ndiquiahva nde ña nuú na cúu cuéntá

Jesús cán já quéá chindeé a ná xihín ñá ndímaní nu ná. Ta xihín ñá yóho ndiquiahva ndivaha ná cán ndixahvi nu Ndióxi.<sup>13</sup> Ta já caja cáhnu na Ndióxi jáchi xihín ñá cája ndó yóho náha ñá co quéhe núu ndó tuhun vaha cáhan sahá Jesucristo. Jári caja cáhnu na Ndióxi sahá ñá vaha íin ini ndó xihín ná. Jáchi chíndeé ndó ná xihín ñá jásá ndó nu ná ta chíndeé ri ndó java ga ñayivi.<sup>14</sup> Ta ndiquiahva na ndixahvi nu Ndióxi saha ndó jáchi xihín ñá cája ndó náha cáxí a ñá cája cuahá Ndióxi ñamani xihín ñayivi.<sup>15</sup> Ndixahvi Ndióxi jáchi najasá mé á in ñá cáhnu ndivaha nu yo ta ni co ñéhe yó tuhun ndá quiahva ndicaní ñá.

## 10

### Cáhan Pablo sahá mé dá

<sup>1</sup> Yéhe cíú Pablo ta cúní caça i ñamani nu ndó. Joo cúní cahán vií i ñá nu ndo tá quiahva cáhan vií Jesucristo xohó. Ndúu java na tañu ndó ta cáchí na ñá tá íin i tañu ndóhó já cíú u in taa uun ini. Joo cáchí na tá íin xícá i já cíú u da co yívhí cáhan ndacú xihín ndó.<sup>2</sup> Ta viti xícá tähví i nu ndó ñá ná a cája ndó ni en ñáha ñá cuu jánani i ndohó saha. Tá ná saa i coto nilnii i ndohó jan co cúní jánani i java ndó, na jácojo cuachi jatá nde, na cáchi ñá cája nde tóco ndihí ñáha tá quiahva cája ñayivi ñuyíví. Jáchi mé a ndaa sácú ini i saa i quihvi táhan i xihín na jan.<sup>3</sup> Vatí cíú yó ñayivi ndúu ñuyíví joo co cája nde tá quiahva cája ñayivi ñuyíví. 'Jáchi ñá chíndeé ndehe co cíú á ñá chíndeé ñayivi ñuyíví. Joo ñá chíndeé ndehe cíú ndée Ndióxi ñá sahan mé á nuú nde já ná cuu jándihi nde sahá ñá cája tiñáhá sacuahá.<sup>5</sup> Ta quiahva já jándihi nde sahá ñá cája ihvi xihín Ndióxi ta xihín ndée mé á jándihi nde sahá ñá cáhan ñayivi, na cája cáhnu mé jáchi co xíni ná Ndióxi. Ta tóco ndihí ñá cáhví ini nde ndiquiahva nde ñá ndáha mé á já ná caja nde tóco ndihí ñá cúní Jesucristo.<sup>6</sup> Ñá cán quéá tá ná náha ñá íin tiahva ndó caja ndó tóco ndihí ñá nasahnda nde nu ndó já quéá cacu ini nde jánani nde ndá ná nacuu, na co cúní caja ñá sáhdá Jesucristo.

<sup>7</sup> Mé ndó co xíni ndó ndá quiahva cáá ínimá ñayivi jáchi sándezhe ndó ñá cája chí jata cuití va. Joo tá mé a ndaa tähví cáhán java ndó ñá cómí Jesucristo cuéntá saha ndo xíni ñúhú quehe ndó cuéntá ñá cíú ri ndehe va ná cómí Jesucristo cuéntá saha.

<sup>8</sup> Co cácahan nuú i caja cáhnu loho i mí i sahá chuun nasahan Ndióxi nuú i. Jáchi nacaja mé á ñá ná cahnda i chuun nu ndo jáchi mé Jesucristo, xitoho í nasahan chuun nuú i ñá ná jácuahnu i ndohó tá quiahva cúní mé á. Ta co cúní a ñá ná jándihi i saha ndo.<sup>9</sup> Co cúní ñá ná cahán ndo ñá jayihví i ndohó xihín carta chínchindáhá i nu ndo.<sup>10</sup> Ndúu java na ta cáchí na ndacú ndivaha yuhú u cahán i nu carta cahyí i. Joo tá íin i xihín ndo co náha i ñá cíú u da jayihví ndohó jáchi tá cásahá cáhan i xihín ndo co náha i ñá cíú u da ndítahan coo toní núhú ñayivi xihín.<sup>11</sup> Joo na xíca cáhan ñá yóho xíni ñúhú candaá ini na ñá tá quiahva ndacú yuhú i tá cáhan i xihín carta tá íin xícá i quiahva já caja i tá ná xínu coo i tañu ndó jan.

<sup>12</sup> Mé a ndaa co sáhan i ínimá i jácatáhan i mí i xihín ná cája cáhnu mé jan. Joo ndaa cása mé cája na jan tá jácatáhan ndaja táhan mé va na ta xihín ñá yóho náha ñá tóntó ndivaha cája na.<sup>13</sup> Co cája cáhnu i mí i jáchi co ndítahan nuú i caja i ñá. Cáhan cuití va i sahá chuun nasahan Ndióxi nuú i caja i cuéntá mé á ta mé á quéá nachindahá yehé saa i anda nu ndúu ndó jan.<sup>14</sup> Co cája cáhnu i mí i tá cáhan i sahá chuun nasahan Ndióxi nuú i caja i. Jáchi mé nde cíú nde ná nu cuítí nasahan nacahán nde tuhun vaha saha Jesucristo nu ndó.<sup>15</sup> Sahá ñá cán quéá candaá vaha ini ndó ñá co cáhan nde sahá chuun najácvá sahá inga na. Ta ni co yáha nde cája cáhnu nde mé nde sahá chuun cája nde yóho. Ñá cúní nde quéá ná candeé chágá ini ndó Jesucristo nani caja chúun chágá nde tañu ndó tá cúní Ndióxi.<sup>16</sup> Ta cúní nde cahán nde tuhun vaha saha Jesús nuú ñayivi, ná ndúu xícá chágá nuú ñuu Corinto jan. Joo co cúní nde quihvi nuu nde nuú sa nacaja chíun inga na já ná a cája lända nde sahá chuun nacaja inga na.

<sup>17</sup> Ta já cáchí tuhun Ndióxi já: "Ndá na cúní caja lända, xíni ñúhú caja lända na sahá ñá náhnu nacaja Ndióxi xihín ná."

<sup>18</sup> Jáchi co táhan ini Ndióxi xihín ná ndínehe jíco mé joo ndínehe jíco Ndióxi ñayivi tá táhan ini a xihín ñá cája na.

## 11

### Cáhan Pablo sahá ná co cíú apóstol

<sup>1</sup> Xícá tähví i nu ndó ñá ná a quéhe ndó cuéntá sahá ñá cája i tá ná caja i tátuhun

in taa tachí. Caja ndó ñamani xihín i.  
<sup>2</sup> Ndióxi quéa nacaja ña ná quihví ndivaha ini i ndohó sahá ña cán quéa co cúní ña ná jándacoo ndó íchi cuénta mē á. Cája i tátuhun cája da cuíñu jáchi násacu ini i ndiquíahva vií i ndohó ndáha Jesucristo tátuhun cája in dataa ndíquahva da jahyi jíhlí dä, ñá cútú ña tacú ndinuhu nuú dä cacuu yí ña. <sup>3</sup> Á co ndícuhan ini ndó ndaja nacaja tiñahá sacuahá tá najándahvi rí ñá naní Eva sanahá. Ta viti yíhví i ña ná jándahvi java ñayivi ndohó tá quihvahajándahvi rí mé ñá. Jáchí viti cándezini ndó Jesús ta cája cahnu ndó mé á xihín ndinuhu ini ndó. Joo yíhví i jándacoo ndó ña jan. <sup>4</sup> Jáchí mé ndó sáhan ndó ñamani ña ná saq ndá ñayivi nacuu va vatí jánahna ña tuhún sahá Jesucristo. Co jánahna na ndohó tá quihvahajáñahna mé nde nu ndo jáchí jíin va cahán na sahá ínimia yíi Ndióxi ta jíin va cachí na jácacu Ndióxi ñayivi. Joo nandiquehe vaha ndó na. <sup>5</sup> Ta cahán ndo ña cútú ná na apóstol, na náhnu ndivaha joo xíni vaha i ña co cútú ná na vaha chágá a juú ga yéhe. <sup>6</sup> Vatí co tiahva i cahán vií i joo ín vaha xíni túní i jánahna i tuhún Ndióxi nu ndo. Ta xíni vaha ndó ña yóho jáchí cuahá tañu najáñahna vaha i tuhún Ndióxi nu ndo.

<sup>7</sup> Java tañu cahán i ña coó nacaja vaha i jáchí coó naquehe e yahvi nu ndo tá nacahan i tuhún Ndióxi xihín ndo. Ta java tañu cahán i ña coó nacaja vaha i tá najánuu i mí i já ná cuu ndindita jíco ndohó. <sup>8</sup> Mé a ndaa cútú á tátuhun nacandaa joho i jíuhún nuú java na cútú cuénta Jesús ta naquehe e yahvi i nuú ña cán ña ná quixi i caja chúun i tañu mé ndo. <sup>9</sup> Ta tá naxini ñúhú i in ñaha tá nasahijin tañu ndó jan coó najáquihvi toho i ndohó sahá ña naxini ñúhú i. Jáchí mé na cútú cuénta Jesús, na naquixi Macedonia nasahen na nuú i ña naxini ñúhú i catacu u. Mí i coó naxeen toho i jáquihvi i ndohó. Ta a caja toho i ña viti. <sup>10</sup> Cáhan i ña ndaa xihín ndo jáchí iín Jesucristo xihín i. Ta ni in ñaha a cají nuu toho nuú i cahán i ña yóho nuú na ndúu estado Acaya. <sup>11</sup> Coto a cahán ndo ña co quihvi ini i ndohó sahá ña cahán i quihvahá já xihín ndo. Jáchí xíni vaha Ndióxi ña quihví ndivaha ini i ndohó.

<sup>12</sup> Joo a jándacoo toho i caja i ña caja i yóho já ná a quihvahá i ñamani nuú na cán ndínehe jíco na mé ná. Jáchí cachí na caja chúun na cuénta Ndióxi tá quihvahá caja

ndehe. Joo co cútú á ña ndaa. <sup>13</sup> Mé a ndaa co cútú toho na jan apóstol cuénta Jesucristo vatí ndája na mé ná tátuhun apóstol. Ta jándahvi na ñayivi tá cachí na ña cútú ná na apóstol. <sup>14</sup> Joo co ndítahan catónto yo sahá ña yóho jáchijandá Satanás, mé tiñahá sacuahá ndája rí mé rí tátuhun in tátó Ndióxi, ña yéhe ndivaha. <sup>15</sup> Ta jári na ndico jata rí cán co yáncá toho na ndája na mé ná tátuhun ñayivi cája ña vaha. Joo vaxi quivi ndiquehe na yahvi sahá ñaha nacaja na.

Ndohó ini Pablo sghá ña cútú dä apóstol

<sup>16</sup> Ta ná cahán tucu u ña yóho xihín ndo: coto a cahán ndo ña cútú u dä nacatachí. Joo tá cahán ndo ña cútú u dä nacatachí i quihvah loho ndó ñamani nuú i ña ná cahán i xihín ndó tátuhun in dä tachi já ná cuu ndínehe jíco loho i mí i. <sup>17</sup> Tá cahán lända i yóho co cútú á tátuhun nasahe Ndióxi nuú i. Cáhan i ña tátuhun in dä nacatachí cuití va. <sup>18</sup> Ta sahá ña ndúu cuahá na cátóó ndínehe jíco mé sahá ña caja na ñuyíví yóho sahá ña cán quéa ná caja ri yéhe va quihvahá já. <sup>19</sup> Mé ndó cahán ndo cútú ndó ñayivi ndíchí ndivaha jíni joo cají iñi ndó táajo ho ndó nu cahán ñayivi tachi cán xihín ndo. <sup>20</sup> Ta ni co sahíndó mé ndó tá caja ndúsa na cán xihín ndo caja ndívíndó nu ná vatí quéhe na ñaha cómí ndo. Ta jándahvi na ndohó ta quéhe núu na ndohó janda cání na jahndá nuú ndo. <sup>21</sup> Á cahán ndo ña ndítahan cacahan nuú i sahá ña coó nasahe nddeé toho ini nde caja nde tá quihvahá caja na jan xihín ndo.

Joo tá co sahíndó na jan mé ná caja lända na, caja ri yéhe va já vatí cahán i ña yóho tátuhun in dä tachi. <sup>22</sup> Ta tá cahán lända na jan ña cútú ná na hebreo, mé a ndaa dä hebreo cútú ri yéhe va. Ta tá cahán lända na jan ña cútú ná na Israel, mé a ndaa dä Israel cútú ri yéhe va. Ta tá cahán lända na jan ña naquixi na chichi Abraham, mé a ndaa dä naquixi chichi Abraham cútú ri yéhe va.

<sup>23</sup> Ta tá cahán lända na jan ña cútú ná na caja chúun cuénta Jesucristo, mé a ndaa yéhe cútú dä caja chúun chágá cuénta mē á. Vatí cahán i tátuhun in dä tachi joo mé a ndaa cuahá chágá caja chúun yéhe a juú ga na jan. Cuahá chágá tañu nacícajan na yéhe vecaa a juú ga na jan. Ta cuahá chágá tañu nacaja xíxi na xihín yéhe a juú ga na jan. Ta cuahá ndivaha tañu sa yáti quivi i a juú ga na jan. <sup>24</sup> Ta uñun tañu najácxahán na

Israel yehé xihín churú. Ta in tá in táchndá cán najáxinu na churú jatá i oco sahun comi tañu. <sup>25</sup> Ta uní tañu najácaxáhan na yehe xihín vara ta in tañu nacati na nacuun na yuu yehe. Ta sa uní tañu násaco barco, mé dó cuahán i cán cahá tañuhú. Ta násanúu i nuú tañuhú in nuú ta in ndivá. <sup>26</sup> Ta ndóho ndiváha ini i nuú xíca nuu i jáchi cuahá tañu ndúcú taní i xihín yuta. Ta jandá taa cuihná a ihví queta nuú i. Ta naxica iyo i tañu na ñuu i xihín tañu na tóho. Ta tā fin i ñuu náhnu á íin i yúcu á íin i tañuhú já vaxi tá vaxi tondohó nuú i. Ta jandá tañu na cachí cúu cuénta Jesús vatí co cúu na náquixi tondohó nuú i. <sup>27</sup> Ta cánaá i cája chúun i jandá ndílhíhví ndiváha i. Ta cuahá tañu co quirí vaha i. Ta cuahá tañu náquixi joco nuú i ta náquixi ña íchí ini i ticuúi ta jandá ínimá uun i íin i jáchi co nhé e ña cuxu u. Ta cuahá tañu ndóho ini i sahá ña vixi xíni i jáchi coó jáhmá candixi i.

<sup>28</sup> Ta vatí ndóho i ña yóho xihín java ga ñaha joo ndícani ta ndícani ini i sahá tóco ndihi na cútua cuénta Jesús, na tácá ndijáá veñuhu. <sup>29</sup> Jáchí tá cuítá ini ñayivi já cútua á tátuhun cuítá ri ini yehe va xihín ná. Ta tá ndícaiva in na nuú cuachi cája inga na já quéra xójó ndiváha ini i xihín na najándicava ñahá cán. <sup>30</sup> Ta tā fin in ñaha ña cuu cahán lända i sahá já ná cahán lända i sahá ña náhá ña coó cuahá ndée mí i. <sup>31</sup> Ta Ndióxi, tátá Jesucristo, xitoho í, mé a ndítahan caja cáhu i andá ama cása quirí xíni vaha ña cahán i ña ndaá xihín ndo. <sup>32</sup> Jáchí in tañu násahin i nuú Damasco ta ndaja coo da cútua gobernador, da nácaja chúun nu rey Aretas násahndá da chuuñ ña ná chicají na yéhé nuú cán já ná cuu tiin na yehe. <sup>33</sup> Joo java na cútua cuénta Jesús najánuu na yehe ini in toyicá chí ventana mé corra yuu ndájí nuú cán já nacuun nácajácuu na yehe.

## 12

Ña naxini Pablo nácaja Ndióxi

<sup>1</sup> Ni in ñaha co nhé e tá ndínehe jícó i mí i. Joo já ndítahan nuú i ndicani i nu ndo sahá ña naxini i cuénta indív. ña najándá Ndióxi nuú i ta sahá ña nácahi mé a xihín i coo. <sup>2</sup> Sa fin uxu comí cuia náyaha ña yóho. Najándaa Ndióxi yehe, da cández ini i Jesucristo násahen i indív uní nu fin mé á. Co xíni yehe á nandaas yiquí cuñu i xihín i á nacandoo a ñuyív yóho.

In túhún Ndióxi xíni. <sup>3</sup> Joo xíni vaha i ña yehe cútua dà násahen cán vatí co xíni i á nandaas yiquí cuñu i á nacandoo a ñuyív yóho. Ndióxi cuití va xíni. <sup>4</sup> Joo xíni vaha i ña násahen i nu ndató ndiváha indív. Ta mé cán naxini joho i tühun, ña co ndínehe e ndaja ndicani i ña nuú ñayivi ta ni co sáhan Ndióxi ñamanji nuú i ndicani i ña nuú ná. <sup>5</sup> Cuu ndínehe jícó i mí i sahá ña naxini i yóho joo a cája toho i ña. Vaha chágá ná caja lända i sahá ña coó toho ndée mí i. <sup>6</sup> Ta tā ná cacu ini i ndínehe jícó i mí i já quéra a cácuu toho i dà tachí jáchi ña ndaá táchí cacuu tuhun cahan i. Joo co cája toho i ña jáchi cúní ña nácajá ñayivi ña ndaa cuití va sahá i ta sahá ña nácaja i xihín sahá ña nácahan i.

<sup>7</sup> Ta sahá ña co cúní Ndióxi ña ná caja cáhu i mí i sahá ña naxini i sahá ña cán quéra náquixi in ña ndóho i. Cútua á tátuhun in ñuu sa cárnee nuú yiquí cuñu i xíni i, ña quixi nuú tñáhá sacuahá cája xíxi rí xihín i já ná a cája cáhu i mí i. <sup>8</sup> Ta sa uní tañu naxica tähví i nu Ndióxi, xitoho i ña ná tavá a ña ndóho i yóho. <sup>9</sup> Joo nanducú nhé me a tuhun nuú i já nacachi a já: "Sa quiahva cútua mé a quíhví ini i yohó jan va jáchi ña cútua cája i xihín ñayivi náhá cáxi chágá tå co ndée ná", nácahi Ndióxi. <sup>10</sup> Ña cán quéra cájii ini i cútua u in da cámání ndée já quéra náhá ña xihín ndée Jesucristo cája i tóco ndihi ñaha. <sup>11</sup> Sáhá ña quíhví ini i Jesucristo, cájii tá cájii ini i tá cávitá ini i, á tá cánahá na xihín i, á tá cámání ñaha nuú i, á tá ndúcú na yehe ña caja xíxi na xihín i. Jáchí tá cávitá ini i já ndíndacú chágá i xihín ndée Ndióxi.

Ndícani ini Pablo sahá na cútua cuénta Jesús ndúu nuú Corinto

<sup>11</sup> Tá quiahva cája da tachí já cája i joo ndóho cútua nácaja ndusa xihín i caja i ña. Jáchí mé ndó cútua nácajándahán vaha sahá i, nduu. Joo já coó toho chágá sahá na cáhán ndó cútua apóstol jan a juú ga yehe vatí mé a ndaá nu Ndióxi coó sahá toho i. <sup>12</sup> Jáchí xihín ña náhnu nácaja i nu ndo jan ta xihín ña xitúhún naxini ndó nácaja i jan najándáha i nu ndo ña mé a ndaá táchí cútua u in apóstol. Coó nandihí ini i tá nácaja i ña xitúhún jan nu ndo. <sup>13</sup> Ta tá quiahva nácaja i xihín java ga na cútua cuénta Jesús quiahva já nácaja rí xihín ndóho va. In túhún ña coó nácaja i xihín ndó quéra coó najáquihvi

toho i ndohó sahá ña xíní ñúhú i catacu u tá quiahva nacaja i xihin java ga na cíu cuéntá Jesús. Á cahán ndo ña vaha chágá ná caja ndúsá i xihin ndó quiahva ndó nuú i ña xíní ñúhú i.

<sup>14</sup> Ta viti sa íin tiahva i saa i coto nihni i ndohó ña chí uni. Ta ni viti a jáquihvi toho i ndohó jáchi co xíca toho ini i quehe e ña cómi ndo. Ña cúní quéa ná quihví ini ndó yehe tá quiahva quihví ini i ndohó. Jáchi mé ndó cíu ndó tátuhun jahyi i sahá ña najánaha i tuhun Ndióxi nu ndo. Ta ndá nacuu na valí co xíto na tátá na joo mé tátá na cíu na xíto mé na valí. <sup>15</sup> Ta cajii ini i jándihi i tóco ndihi ñáha cómi i já ná chíndee e ndohó. Ta jandá ndiquahva i mí i já ná cazu ndaa íníma ndo. Cája i cuéntá tá quihví chágá ini i ndohó já co cíu chágá ini ndó xihin i.

<sup>16</sup> Mé a ndaa coó najáquihvi toho i ndohó. Joo ndúu java na tañu ndó ta cächí ña nacaja ndúsá i xihin ndo já najándahvi tá najándahvi i ndohó. <sup>17</sup> Á cahán ndo ña najándahvi i ndohó tá náchindahá i java ñayivi nu ndo jan. A juú a já. <sup>18</sup> Jáchi naxica tähví i nu Tito ña ná saa da coto nihni da ndohó jan. Ta náchindahá i inga da cíu cuéntá Jesús xihin dá. Á najándahvi da ndohó, vaha. Sa xíní vaha i ña coó najándahvi da ndohó. Ta tá quiahva cája Tito quiahva já cája ri yehe va jáchi in íníma ñéhe nde xihin dá.

<sup>19</sup> Á cahán ndo ña sa nácasáhá cahán chijín tucu nde xihin ndo viti. Co cíu á já. Jáchi sándehe caxí Ndióxi ña cahán nde ña yóho xihin ndo tá quiahva cúní Jesucristo. Ta cája nde tóco ndihi ña yóho jáchi quihví ini nde ndohó ta cúní nde ña ná cuahnu chágá ndó xihin tuhun Ndióxi. <sup>20</sup> Yíhví i jáchi tá ná saa i coto nihni i ndohó co cúní i ndiñehé e ndohó cája ndó ña níu, ña co cátó i. Ta sa mé quiahva já yíhví i ña cuni ndó yehe caja i ña co cátó ndo. Yíhví i jáchi tiahva náá cani táhan ndó, á cahíhvi ini xihin táhan ndó, á cojo ini xihin táhan ndó, á ndacahnda táhan ndó, á cahán ndó ña tuhún sahá ñani táhan ndó, á candéhé ndaa táhan ndó, á ndiñehé jíco ndo mé ndó, á sa jíin sa jíin cája in in ndó. <sup>21</sup> Ta yíhví i ña tá ná saa i coto nihni i ndohó jan caja Ndióxi ña ná cacahan nuú i saha tóco ndihi ña cája ndó jan. Ta yíhví i cuacu u sahá cuahá na cája cuachi, na sa jandá jihna nácasáhá cája

cuachi ña a ñáha jándacoo na cája na xihin yiquí cuñu na. Ta cuacu u jáchi a ñáha jándacoo na ña ndúu na xihin na co cíu ñajílhí na á yíi ná. Ta ni a ñáha jándacoo na tóco ndihi ña níu, ña xíca ini yiquí cuñu na caja.

## 13

*Jáxinu coo Pablo tuhun cahgn da xihin na ñuu Corinto*

<sup>1</sup> Ta xihin ña yóho xinu uní tähndá saa i coto nihni i ndohó. Ta xíní ñúhú ndicuhun ini ndó ña sáhndá tuhun Ndióxi chuu nu yo ta cächí a ña támá cahán ivi a uní testigo sahá cuachi nacaja in ñayivi anda jávi candaq ini ndó ñá mé a ndaa íin cuachi na. <sup>2</sup> Tá quiahva nacahan i xihin ndo tá naxito nihni i ndohó ña chí ivi quiahva já cahán i xihin ndo viti vatí íin xíca i. Ta tá quiahva nacahan i xihin na nacaja cuachi jihna jan quiahva já cahán i xihin ndihi ndó viti. Ta tá ná casaq tucu u coto nihni i ndohó jan já quéa a tähndá ga ini i saha ndo sahá cuachi cája ndo. <sup>3</sup> Ta xihin ña yóho candaq ini ndó ñá mé a ndaa tähví cahán i ña sáhndá Jesucristo cahán i. Cúní ña ná candaq ini ndó ña co cahán chijín toho Jesucristo xihin ndo. Ña cája mé a xihin ndo quéa náha nu ndo ña íin ndéé mé a cája ña cúní a. <sup>4</sup> Mé Jesucristo quéa nacata caa na ndíca críxu tátuhun in da co ndéé. Joo viti tacú mé a saha ndéé Ndióxi. Ta tá quiahva vitá náshaijin yiquí cuñu a quiyahva já vitá ndúu yó viti. Joo sahá ña in nanduú xihin mé a já cuu catacú xihin ndéé a. Ta xihin ña yóho cája chuu nde tañu mé ndó.

<sup>5</sup> Xíní ñúhú candéhé vaha ndó mé ndó á mé a ndaa tähví cández cahnu ini ndó Ndióxi. Xíní ñúhú coto ndojó ndó mé ndó. Ta tá mé a ndaa tähví cíu ndó cuéntá Jesús xíní ñúhú ndicuhun ini ndó ña ndácajan Jesucristo ini íníma ndo á tá coó yúhu uun va ndó cíu ndó cuéntá Jesús. <sup>6</sup> Ta ndáti i xinu quív'i candaq ini ndó ña coó najándahvi nde ndohó. <sup>7</sup> Xíca tähví nde nu Ndióxi ña ná a cája ndó ni in ña níu. Ta co cíu a sahá ña cúní nde cahán vaha ñayivi sahá nde, vaha. Ña cúní nde quéa ná a jándacoo ndó caja ndó ña vaha vatí ná cahán ñayivi ña coó nacaja vaha nde xihin ña najánaha nde nu ndo. <sup>8</sup> Co xíní ñúhú nde jánani nde ndohó nani cája ndó ña ndaa joo tá cája ndó ña níu já quéa xíní ñúhú jánani nde ndohó. <sup>9</sup> Ta

cájii ini nde tá ndáa nde tá quiāhva ndáa ná vitá ini tá cíú á sahá ña ndacú ini mé ndó cuéntá Ndióxi. Ta a jándacoo toho nde caca tāhví nde nu Ndióxi saha ndo ña ná xínu coo ndó cacuu ndó ñayivi coó cuachi nu mé á. <sup>10</sup>Jihna níuhú cáhyí i carta yóho nu ndo já saa i coto nihni tucu u ndohó. Jáchí tá ná saa i jan co cúni cahán ihví nahá i xihín ndo vatí nasahán Ndióxi chuun yóho nuú i. Ta coó nasahán mé á ña nuú i ña ná jándihí i saha ndo. Nasahán mé á chuun yóho nuú i já ná cuu ndaja ndacú u ndohó cuéntá mé á.

<sup>11</sup>Candehé ndo, ñani i, ná cíú cuéntá Jesús. Xihín tuhun yóho jáxínu coo i tuhun cahán i xihín ndo. Ná coo Ndióxi xihín ndó. Ta ná ndindacú chágá ndó já ná nduu ndó ñayivi ndaa. Ta quiāhva tuhun ndéé ini táhan ndó. Coo vaha ndó xihín ñani táhan ndó já quéa coo Ndióxi xihín ndo. Mé a cán quíhví ini a ndohó ta cúni a ña ná coo vaha ini ndó. <sup>12</sup>Cahán Ndióxi xihín táhan ndó ta tatí yúhu táhan ndó ta yíi caja ndó ña.

<sup>13</sup>Tócó ndihi ná cíú cuéntá Jesús chíndahá ná Ndióxi coo ndó.

<sup>14</sup>Ná tāhví ini Jesucristo, xitoho í saha ndo jáchí quíhví ini Ndióxi ndohó. Ta ná coo tuun íníma yíi mé á xihín ndo. Ña yóho quéa cúni ña ná caja Ndióxi xihín ndo. Já ná coo.

## Carta nāchindahá Pablo nūnú nā cūú cuéntá Jesús ndúu ñundáhyi Galacia

Chíndahá Pablo Ndióxi coo nā cūú cuéntá  
Jesús ndúu ñundáhyi Galacia

<sup>1</sup> Yehé cūú Pablo, dā cahyí carta yóho nu  
ndo. Nacaxi Ndióxi yehé cacuu u in apóstol  
ta a juú toho ñayivi nacaxi yehé. Ta ni  
coó nāchindahá ñayivi yehé jáchi Jesucristo  
xihín Ndióxi, tátá yo, mé a najánditacu  
Jesucristo, mé a cán quéa nacaxi a yehé  
cacuu u in apóstol. <sup>2</sup> Yehé xihín tócó ndíhi  
java ga nā cūú cuéntá Jesús ndúu xihín i  
yóho, chíndahá ndé carta yóho nu ndóhó,  
nā ndúu ñundáhyi cuéntá Galacia jan. <sup>3</sup> Nā  
cúní ndé quéa ná caja Ndióxi, tátá yo xihín  
Jesucristo, xitoho í cuahá ñamani xihín ndó  
ta ná caja mé a ña ná coo vaha ini ndó. <sup>4</sup> Xíní  
ñúhú ndicuhun ini ndó ña nāndiquíghva  
Jesucristo mé a quivi a saha cuachi cája í  
ta xihín ña yóho nájácu a mí nuú ña náu  
caja ñayivi ñuyíví. Ta nayaha ña yóho jáchi  
já cúní Ndióxi, tátá yo. <sup>5</sup> Cáhuu ndivaha ná  
cacuu Ndióxi anda ama cása quivi. Já ná coo.

Coó ga inga tuhun cahán sahá Jesucristo ña  
cuu jácacu a mí

<sup>6</sup> Mé a ndaaq nacatántó ndivaha i jáchi  
cama chás nácasáhá ndó cáxoo ndó nu  
Ndióxi, mé a nacana ndohó cacuu ndó  
cuéntá mé a sahá ña quíhví ini Jesucristo  
ndohó. Ta viti nácasáhá ndó xíní joho ndó  
inga tuhun ña cáchí ñayivi cuu jácacu a  
ndohó. <sup>7</sup> Mé a ndaaq coó toho inga tuhun ña  
cuu jácacu a ñayivi. In túhún va cūú tuhun  
Ndióxi ta cáhan sahá Jesucristo. Joo ndíu  
java ñayivi ta cúní na jájana na jiní ndó ta  
cúní na ndijama na tuhun vaha cáhan sahá  
Jesucristo, mé a jácacu mí. <sup>8</sup> Joo tá vaxi  
in na ta jánahá na inga tuhun ña cáchí na  
cuu jácacu a ndohó ta co cūú á tuhun vaha  
ñá nájánahá ndé nu ndó já quéa ná cuhun  
cháhan jata ná ta coó caja toho a ndá ñayivi  
cúú ná janda mí i á janda in tátó Ndióxi ná  
quixi indívi. <sup>9</sup> Sa nacachi i ña yóho xihín  
ndó jihna ta viti ndicó coo tucu u cahán i ña  
xihín ndó: tá jánahá in ñayivi inga tuhun  
ñá cáchí na cuu jácacu a ndohó ta co cūú  
á tuhun nájánahá ndé nu ndó já quéa ná  
cuhun cháhan jata ná.

<sup>10</sup> Co ndúcú u candoo vaha i nuú ñayivi.  
Nā cúní quéa candoo vaha i nu Ndióxi jáchi  
tá cúní candoo vaha i nuú ñayivi já cúní  
cachi a ña co cūú ga i dā cája chúun cuéntá  
Jesucristo xihín ndinuhi ini i.

Ndícani Pablo ndaja ngandu da apóstol

<sup>11</sup> Candehé ndó ñani mí i, nā cūú cuéntá  
Jesús. Mé tuhun nacahan i xihín ndó  
coó naquixi a jiní ñayivi ñuyíví. <sup>12</sup> Ta coó  
nāndiquehe e ña nuú ñayivi. Ta ni in túhún  
toho ñayivi coó nájánahá nā ña nuú i jáchi  
Jesucristo quéa nájánahá ña nuú i. <sup>13</sup> Cája  
i cuéntá sa naxini joho ndó sahá ña nacaja  
i jihna tá náshandico i costumbre ná Israel.  
Jáchi náxojó ndivaha ini i xihín ná cūú  
cuéntá Jesús mé tiempo cán. Ta nacaja xíxi  
ndivaha i xihín ná ta náshacu ini i jándihu i  
saha ná. <sup>14</sup> Ta mí i náshacu u dā nacyoyó  
chága cája costumbre ná Israel nuú ndíhi  
ná ñuu i, ná náshahu xihín i. Jáchi náshativi  
i xihín ndinuhi ini i costumbre tásáhnu  
jíco nde. <sup>15</sup> Joo Ndióxi nacaxi a yehé janda  
tá cámání cacu u ñuyíví yóho ta sahá ña  
cúní a caja ñamani xihín i sahá ña cán  
quéa náshana mé a yehé. Ta tá naxinu coó  
quiví náshacu ini mé a <sup>16</sup> já nájánahá Ndióxi  
Jesucristo, jahyi a nuú i já ná cuu caxi  
tuhun i tuhun vaha sahá mé a nuú ná coó  
naquixi chichí Israel. Ta mé tiempo cán coó  
náshahan i cahán i xihín ni in ñayivi sahá ña  
nájánahá Ndióxi nuú i. <sup>17</sup> Ta ni coó náshahan  
i ñuu Jerusalén cahán i xihín ná cūú apóstol  
nu cuítí a juú ga yehé. Ña nacaja i quéa  
iví laá náquee náshahan i ñundáhyi cuéntá  
Arabia. Ta tá nāndihu nāndicó coo i chí ñuu  
Damasco.

<sup>18</sup> Ta tá sa nayaha uní cuiá já náshahan i  
ñuu Jerusalén ndicuni táhan i xihín Pedro  
ta náshajin i sahun quívi xihín dá. <sup>19</sup> Ta cán  
naxini ri dā cūú Jacobo, ñani Jesucristo joo  
coó naxini toho i na java ga cūú apóstol cán.  
<sup>20</sup> Sándezehé cáxi Ndióxi ña co jándahvi toho i  
ndohó. Ña ndaa quéa cáhy i nu ndó yóho.

<sup>21</sup> Tá nāndihu já náquee e cuahán i chí  
ñundáhyi cuéntá Siria xihín Cilicia. <sup>22</sup> Joo  
mé tiempo cán ná cūú cuéntá Jesús ndúu  
estado Judea a ñáha cuni na yehé, ndúu.  
<sup>23</sup> Joo naxini joho na ña cáhan java ñayivi  
sahá i: “Da nacaja xíxi xihín yo jihna, dā cán  
cúú da xíca nuu cáhan tuhun Ndióxi xihín  
ñayivi viti. Da nacúni jándihu sahá tuhun  
Ndióxi jihna, dā cán cūú dā jánahá ñayivi  
cándezehé ini na mé a”, cáchí ná. <sup>24</sup> Ta viti cája

cáhuu na Ndióxi sahá ña nandijama mé á yehe.

## 2

*Na apóstol ndíquehe vaha na Pablo.*

<sup>1</sup>Tá sá nayaha uxu comí cuája já nasahán tucu y ñuu Jerusalén. Nasahán Bernabé xihín i ta nasañeha ri i Tito nasahán da xihín nde. <sup>2</sup>Ta nasahán i jáchí náñaha Ndióxi ñuu i ña ndítahan cuhun i. Ta tá náñataca jífin ndíhi na náñhuu, ná comí cuéntá sahá na cùú cuéntá Jesús ñuu Jerusalén cán, já nácasáhá i ndícani i ñu ná ndaja cåa tuhun vaha sahá Jesús ña jánahá i ñuu na coó naquixi chichi Israel. Nacaja i ña yóho jáchí coó nacún i ña cachí na náñhuu cán ña coó sahá toho ña jánahá i. <sup>3</sup>Ta náñaquehe vaha na ndehe te na coó nacaja ndúsaa na xihín Tito, dä nasahín xihín i ña ná chichañ da marca yíquí cuñu da vatí co cùú dä dä naquixi chichi Israel. <sup>4</sup>Joo java na, ná co xíca ndaa íchí cuéntá Jesús, náñihvi jehé na tañu nde ña ná candéhé na ndá quiáhva núná ñuu nde cája cåhnu nde Ndióxi sahá ña candeé ini nde Jesús. Jáchí nánducú na cája ndúsaa na xihín nde ña ná ndicó coó nde caja nde tóco ndíhi ña sáhndá ley Moisés. <sup>5</sup>Joo coó nacandúsa toho nde tuhun cåhan na xihín nde jáchí cún i nde cándaa ini ndó ña ndaa cåhan sahá Jesucristo, ña cuu jácazu ndaa ímima ndó tá ná candeé ini ndó mé á.

<sup>6</sup>Joo mé na náñhuu, ná comí cuéntá sahá na cùú cuéntá Jesús cán coó nacachi na xihín i ña ná ndijama i ña jánahá i ñuu ñayivi. Cächí i ña cùú ná na náñhuu vatí co cája toho a ñuu i ndá quiáhva náñhuu chuun ndójó na jáchí in cùú tóco ndihí ñu Ndióxi. <sup>7</sup>Táhán ini na náñhuu cán xihín ña cája i jáchí nándicuni na ña mé Ndióxi quéá nasahán chuun yóho ñuu i ña caca nuu i cahan i tuhun vaha sahá Jesús ñuu na coó naquixi chichi Israel. Ta sá mé Ndióxi quéá nasahán chuun ny Pedro ña ná cuhun da cahan da tuhun vaha sahá Jesús ñuu na naquixi chichi Israel. <sup>8</sup>Ta sá mé Ndióxi, mé a nachindahá Pedro cahan da tuhun mé á ñuu na naquixi chichi Israel, mé a yóho cùú ri ña nachindahá yehe cahan i tuhun mé á ñuu na coó naquixi chichi Israel.

<sup>9</sup>Jacobo xihín Pedro xihín Juan cùú ná na náñhuu comí cuéntá sahá na cùú cuéntá Jesús ñuu Jerusalén cán. Ta nándicuni na cán ña nacaja Ndióxi cuahá ñámaní xihín i

tá nasahán mé á chuun yóho ñuu i. Sahá ña cán quéá natiin na ndahá yehe xihín ndáha Bernabé ta xihín ña yóho náñha ña in cùú nde cája chúun nde xihín tuhun Ndióxi. Ña cája na cán quéá cája chúun na xihín na naquixi chichi Israel nani ndehe cája chúun nde xihín na coó naquixi chichi Israel. <sup>10</sup>Ta in tühün ñámaní naxixa na ñuu nde caja nde quéá ña ná a ndíndójó nde chindeé nde na ndahví. Ta ña yóho cùú ndusa ña ndíhi ini i cája i.

*Pablo jánani da Pedro ñuu Antioquia*

<sup>11</sup>Joo tá nandique táhan i xihín Pedro ñuu Antioquia já ñu táchí dä nájánani i dä jáchí coó nacaja vaha da. <sup>12</sup>Ña nacaja da quéá naxixa da xihín na coó naquixi chichi Israel tá cámäni xínu coo java na Israel, na nachindahá Jacobo. Joo tá naxínu coo na Israel cán já nácasáhá tává jíin Pedro mé dä ñuu na coó naquixi chichi Israel ta ni co xíxi ga dä xihín ná. Jáchí ñayihví dä ndíá cachí na Israel, na jánahá ña co ndítahan cuxu na xihín na co cùú na Israel. <sup>13</sup>Ta xihín ña yóho nachijehé Pedro ña cáhvi ini da sahá na cán. Ta java na cùú cuéntá Jesús, na naquixi chichi Israel cán nácasáhá cája na tá quiáhva cája Pedro. Ta janda Bernabé nacaja da tá quiáhva cája na cán. <sup>14</sup>Anda já naxini i ña co xíca na íchí cuéntá ña ndaa xihín ndinuhi ini na tá quiáhva sáhndá tuhun Ndióxi cája na sahá ña cán quéá nájánani i Pedro nu táchí tóco ndihí ñayivi ndíu cán. Já nacachi i já xihín dá: "Yóho cùún dä Israel joo nácasáhá cajún tá quiáhva cája na coó naquixi chichi Israel jáchí co cajún ña sáhndá ley Moisés viti. Sahá ña cán quéá co ndítahan ñyún caja ndúsaa tohun xihín na coó naquixi chichi Israel ña ná caja na ña sáhndá ley Moisés", nacachi i xihín dá.

*Jácazu Ndióxi ñayivi sahá ña candeé ini na mé á*

<sup>15</sup>Janda quíví nacacú cùú yó na Israel ta co cùú yó tátuhun na tóho, na cächí yo cája cuachi sahá ña co cája na ña sáhndá ley Moisés. <sup>16</sup>Joo sá cándaa vaha iní ña co ndíu ndaa ñayivi nu Ndióxi sahá ña cája na ña sáhndá ley Moisés. Jáchí nduu ndaa na nu Ndióxi sahá ña candeé ini na Jesucristo cuití va. Ta sá sahá mé ña cán nándee iní Jesucristo já nanduu ndaa yó nu Ndióxi ta co cùú á sahá ña cája i ña sáhndá ley Moisés

jáchí ni in na a cuú nduu ndaa na nu Ndióxi sahá ña cája na ña sáhndá ley Moisés.

<sup>17</sup> Cándehé ndo. Sahá ña cúní yo canduu ndaa yo nu Ndióxi sahá ña cández iní Jesucristo cuití va sahá ña cán quéa co cája ga í ña sáhndá ley Moisés. Joo cáchí java ñayivi ña ndójo í cuachí sahá ña co cája í ña cáchí mé ley. Vatí co cája í ña cáchí ley Moisés, co cúní cachí ña yóho ña jácahan Jesucristo mí caja í cuachi. Ña yóho co cútú á ña ndaa jáchí co jácahan Jesucristo mí caja í cuachi.

<sup>18</sup> Joo mé a ndaa caja í cuachi tá ná casáhá tucu cández iní ley Moisés ña ná jácacu a mí jáchí sa najándacoo í ña tá ná cández iní Jesucristo. <sup>19</sup> Ta viti cútú á tátuhun naxihí yehe cuénta ley jáchí co cómí ga ley cuénta sahá i jáchí sahá ña cández iní i Jesucristo sahá ña cán jácacu Ndióxi yehe ña ná catacu u cuénta mé á. <sup>20</sup> Cútú á tátuhun naxihí i ndíca crúxu xihín Jesucristo tá naxihí a. Sahá ña cán quéa co cája i tá quiahva cúní mé vi jáchí Jesucristo quéa ndícaan ini i ta mé a cán quéa ndáca yehe. Ta viti tóco ndihí ña cája i ñuyiví yóho cája i ña jáchí cández iní i Jesucristo, jahyi Ndióxi, mé á naxihí ndíca crúxu sahá i sahá ña quihví ini a yehe. <sup>21</sup> Ta co cúní quehe níu i ñamani cája Ndióxi xihín i jáchí tá ná cuu nduu ndaa yo nu Ndióxi sahá ña cája í ña sáhndá ley Moisés já quéa mé a uun va quéa naxihí Jesucristo, nduu.

### 3

Vaha chágá cández iní Jesús a juú ga cán-dee iní ña sáhndá ley Moisés

<sup>1</sup> Á jána va jiní ndó, ná ndúu ñundáhyí Galacia. Yo já najándahvi ndohó ña ná ján-dacoo ndó ña ndaa. Jáchí tá nácahan nde tuhun Ndióxi xihín ndo já nandicaní cáxi nde nu ndó ndá quiahva naxihí Jesucristo sahá cuachí. <sup>2</sup>Cuni joho ndó ná ndaca tuhún i ndohó: Á nandíhví íníma yii Ndióxi iní íníma ndo sahá ña nácaja ndó ña sáhndá ley Moisés. Co cútú toho a já. Nasacuu a sahá ña nácahndusa ndó tuhun vaha sahá Jesucristo ña nácahan nde xihín ndo. <sup>3</sup>Mé a ndaa táchí cútú ndó na najana jiní. Jáchí tá nácasáhá ndó xíca ndó íchí cuénta Jesús já nácahndaca íníma yii Ndióxi ndohó. Ta viti cúní ndó ndicó coo ndó caja ndó ña sáhndá ley Moisés jáchí cahán ndo ña cuu xinu coo ndó cacuu ndó ñayivi ndaa nu Ndióxi sahá ña cája ndó. Joo a cútú toho a.

<sup>4</sup> Xíní ñúhú ndicuhun ini ndo ndá quiahva nandoho náhá ini ndó sahá tuhun Ndióxi. Á mé a uun va násacuu ña nandoho ndó jan. Cája i cuénta uhun. <sup>5</sup>Jáchí sahan Ndióxi íníma yii mé á nu ndó ta cuahá ndiváha ña náhnu cája mé á tañu ndó ta co cútú á sahá ña cája ndó ña sáhndá ley Moisés. Cútú á sahá ña cández iní ndó mé á.

<sup>6</sup>Cáchí tuhun Ndióxi ña nanduu Abraham taa ndaa nu mé á sahá ña nácahndee iní da Ndióxi. <sup>7</sup>Sahá ña cán quéa ndítahan candaan ini ndó ña ndá ná cández iní Ndióxi, mé na cán cútú ndusa na tátuhun na naquixi chichi Abraham. <sup>8</sup>Jáchí sa jandá jihna nácahi tuhun Ndióxi ña vaxi quivi casahá Ndióxi jácacu a ñayivi, na coo naquixi chichi Israel tá ná cández iní na mé á. Ña cán quéa nácahan Ndióxi tuhun vaha yóho xihín Abraham já nácahi a já: “Saha mún tandaan tiempo caja cuahá i ñamani xihín ñayivi canduu ndijáa ñuyiví”, cáchí a. <sup>9</sup>Sahá ña cán quéa tá quiahva nácaja Ndióxi cuahá ñamani xihín Abraham quiahva já cája ri a xihín tóco ndihí ñayivi tá cández iní na mé á tá quiahva nácaja Abraham.

<sup>10</sup> Joo ndá ñayivi ndúcú nduu ndaa nu Ndióxi sahá ña cája na ña cáchí ley Moisés já quéa cuahán cháhan jata ná. Jáchí cáchí tuhun Ndióxi já: “Cháhan va cuahán jata tóco ndihí na co xínu coo cája tóco ndihí cuíi ña cáchí ley ña nácahyí Moisés.” <sup>11</sup> Ta cáxí táchí cahán ña yóho xihín yo ña a cútú nduu ndaa ñayivi nu Ndióxi sahá ña sácu vaha na ley Moisés. Já cáchí tuhun Ndióxi já: “Ndá ná cútú ñayivi ndaa nu Ndióxi catacu na sahá ña cández iní na mé á”, cáchí a. <sup>12</sup>Joo jiní va cáchí ley Moisés jáchí cáchí a ña tá cúní na nduu ndaa nu Ndióxi saha ley Moisés xíní ñúhú cája na tóco ndihí cuíi ña cáchí mé ley. Ta co cahán mé ley sahá ña cández iní na Ndióxi.

<sup>13</sup>Joo najácaju Jesucristo mí já ná a xínu coo cháhan jata yo caja ley. Jáchí naquixi cháhan jata mé á sahá mí tá naxihí a ndíca crúxu. Jáchí cáchí tuhun Ndióxi: “Cháhan cuahán jata ndihí na xihí ndíca crúxu.” <sup>14</sup>Ta sahá ña nácaja Jesucristo tá naxihí a ndíca crúxu sahá ña cán quéa tóco ndihí vatí cútú yó na Israel á na co cútú na Israel, ñehé táchí yo ñamani Ndióxi tá cández iní mé á. Jáchí já nácahan Ndióxi tuhun a nu Abraham jihna. Ta viti quiahva mé á íníma yii á nu yo tá cández iní mé á jáchí já nácahan Ndióxi

tuhun a nu yo.

*Ña cáchí ley Moisés xihín ña cáchí tuhun nasañan Ndióxi nuú Abraham*

<sup>15</sup> Ñani mí i, na cíu cuénta Jesús, candehé ndo ná cahan i xihín ndo ndá quiqhva cája ñayivi tá sáhan na tuhun na nuú inga ñayivi. Tá cavaña na in tutu ta tá nandíhi nacahyi na quivi ná nu á já quéa ni in tühún toho ñayivi a cuú ndijama na ña sa nacahyi cán ta a cuú chícäan chágä ná tuhun nuú mé tutu. <sup>16</sup> Candehe ndo. Nasahan Ndióxi tuhun a nuú Abraham ta nuú in da quixi chichi da. Joo coó nacahyan Ndióxi sahá cuahá ñayivi quixi chichi da. Nacahyan Ndióxi sahá in táláa jahyi da ta mé a cán cíu á Jesucristo. <sup>17</sup> Ña cúní cachi i quéa: Nasahan Ndióxi tuhun a nuú Abraham ta nasañuu a tátuhun nacahyi Ndióxi quivi á nuú in tutu. Sahá ña cán quéa a cuú jandíhi ley Moisés sahá tuhun nasañan Ndióxi nuú Abraham. Jáchi jihna ñúhú nasañan Ndióxi tuhun a nuú Abraham ta tá sa nayaha comiendo oco uxu cuia já nasañan Ndióxi ley nuú Moisés. Ta mé ley yóho a cuú toho ndijama tuhun nasañan Ndióxi nuú Abraham. Ta mé ley a cuú ndaja núa a tuhun nasañan Ndióxi nu dá jihna. <sup>18</sup> Joo ña sáhan Ndióxi nuú ñayivi coó quíxi a sahá ña sacú vaha na ley Moisés. Jáchi tá ná quixa a quiqhva já co cíu ga sahá ña nasañan Ndióxi tuhun a ña caja mé á ña. Ña nayaha quéa nacacúni Ndióxi caja ñamáni uun xihín Abraham ta coó nasañuu a sahá ña nasañuu vaha da ley Moisés.

<sup>19</sup> Ta viti, á ndáca tuhún ndó ndá saha nasañan Ndióxi ley nuú Moisés. Nasahan Ndióxi ña jáchi cúní a ña ná candañ ini ñayivi ndá quiqhva saá ini na caja na ña cúní Ndióxi. Ta nasañuu ini a candooy ley janda quiqhva ná xinu coo mé a quixi chichi Abraham cán. Jáchi mé a cán quéa nasañan Ndióxi tuhun a quixi. Ta tátó Ndióxi quéa nacahyan ley yóho xihín Moisés ta najáyaha da ña nuú ñayivi. <sup>20</sup> Joo tá nasañan Ndióxi tuhun a nuú Abraham coó naxini ñúhú toho a ñayivi jayáha na ña. Ta coó nacaya chúun a tátó mé a jáchi in tühún Ndióxi nacaya mé á ña.

*Ña cúní ley caja í*

<sup>21</sup> Jihna ñúhú nasañan Ndióxi tuhun a nuú Abraham andajáví nasañan ley nuú Moisés. Á cúní cachi ña yóho ña coó ndique táchan ley Moisés xihín tuhun nasañan Ndióxi nuú

Abraham. Co cíu a já. Jáchi tá ná cuu jácacu ley Moisés ñayivi já quéa cuu nduañaa na nu Ndióxi sahá ña sacú vaha na ña sáhndá mé ley. Joo co cíu a já. <sup>22</sup> Jáchi cáchí tuhun Ndióxi ña mé cuachí cándíhi a tóco ndihí ñayivi. Joo tá ná candee iní Jesucristo já cuu ndiquehé ña nasañan Ndióxi tuhun a quiqhva nuú tóco ndihí ñayivi sahá ña candeé iní na mé á.

<sup>23</sup> Tá cámáni quixi Jesucristo já nasañomí ley cuénta saha yo ta nasañada mí janda quiahva naxinu quivi nanaña Ndióxi nu yo ña ndítahan candeé iní Jesucristo.

<sup>24</sup> Nasañada ley mí tá quiahva cája in dataa xihín jahyi válí da anda quiahva naquixi Jesucristo, mé á nacaya ña ná canduu nduañaa yo nu Ndióxi sahá ña candeé iní mé á. <sup>25</sup> Ta viti co cómí ga ley cuénta saha yo jáchi cómí Jesucristo cuénta saha yo tá cándusa í mé á.

<sup>26</sup> Ta in nanduu ndó xihín Jesucristo sahá ña candeé iní ndó mé á ta já nanduu ndó jahyi Ndióxi. <sup>27</sup> Ta tá nacandúta ndó já in nanduu ndó xihín Jesucristo ta nanduu ndó tá quiahva fin mé á. <sup>28</sup> Ta co cája toho a tá cíu ndó na naquixi chichi Israel, á co cíu toho ndó ña. Ta co cája toho a á cíu ndó na naquixi caja chúun nu ná, á co cíu toho ndó ña. Ta co cája toho a á cíu ndó taa á ñáhá. Jáchi tá nacandúsa ndó Jesucristo já in nanduu tóco ndihí ndó jahyi in nanduu ndó xihín mé á. <sup>29</sup> Ta sahá ña cómí Jesucristo cuénta saha ndó sahá ña cán quéa cíu ndó tátuhun na naquixi chichi Abraham. Ta sahá ña cán quéa ñehe táchí ndó ña nacachi Ndióxi quiahva nuú da cán tá nasañan tuhun a nuú Abraham sanahá.

#### 4

<sup>1</sup> Ña cúní cáchí i cíu ña yóho: Cúu á tátuhun tá sáhan in dataa tóco ndihí ña cómí da nuú jahyi da. Joo nani cíu dá taa loho já a cuú cacomí da cuénta sahá ña nandiquehe da ndáhá tátá da. Cíu dá tátuhun mozo vatí tanda quivi cacomí da cuénta sahá tóco ndihí ñaha tátá da. <sup>2</sup> Jáchi ndúu java ñayivi, na cómí tóo cuénta saha mé dá ta sahá tóco ndihí ña najándacoo tátá dā nu dá janda quiqhva ná xinu coo quivi nasañuu ini tátá da. <sup>3</sup> Quiqhva já yáha ri xihín mé ví. Jáchi jihna nasañuu tátuhun ñavalí. Nasañomí ley na Israel cuénta saha yo tátuhun cája xitoho xihín mozo dā. <sup>4</sup> Joo tá naxinu coo quivi nasañuu ini Ndióxi já nachindahá mé á Jesucristo, jahyi a. Ta in ñáñáhá ñuyíví

yóho násacuu ñá najácacu ñahá. Ta nácaja mé á ña sáhndá ley Moisés.<sup>5</sup> Ta naxihí a ndica crúxu já ná cuu chahvi a sahá cuachí ñá ná janí yó nu ley ñá násacomí cuéntá sahá yo. Ta xihín ñá yóho nácuu nanduú jahyi Ndióxi.

<sup>6</sup> Ta sahá ñá nanduú jahyi mé á sahá ñá cán quéa náchindahá Ndióxi ínima jahyi a ñá ná ndicqan mé á ini íníma yo já quéa ná cuu cahán yó xihín Ndióxi já cachí yó já: "Tátá maní i."<sup>7</sup> Ta viti co cúu ga yó tátuhun mozo jáchi co cómi ga ley cuéntá sahá yo ta nanduú jahyi Ndióxi viti. Ta viti cuu ñehe téhví yó quehé ñá násacu ini mé á quiahva nyú ná cuú cuéntá mé á sahá ñá nácaja Jesucristo.

*Ndícani ini Pablo sahá ná cuú cuéntá Jesús nündáhyi Galacia*

<sup>8</sup> Jihna ga tá coó nácandaá ini ndó sahá Ndióxi já nácaja cáhnu ndó java ga ndióxi ñá co cúu toho ndióxi joo násacomí a cuéntá sahá ndo. <sup>9</sup> Ta viti sa xíni ndó Ndióxi joo vaha chágá ná cachí i ñá sa xíni Ndióxi ndohó. Ta ndivaha cúní ndó ndicó coo tucu ndó caja ndó tá quiahva nácaja ndó jihna. Jáchí co ndíyahvi toho ñá nácaja ndó cán ta ni a cuú chindéé a ndohó. <sup>10</sup> Joo cája tucu ndó víco ta xihín ñá yóho cája cáhnu ndó java quiyí xihín yoo xihín cuia. <sup>11</sup> Ndícani ndivaha ini i sahá ñá cája ndó jan. Jáchí viti co cándaá ini i ámē a unu va násacuu chuun nácaja i tañu ndó jan.

<sup>12</sup> Candehé ndó, ñani mí i, ná cuú cuéntá Jesús. Xíca tähví i nu ndó ñá ná caja ndó tá quiahva cája i viti. Jáchí najándacoó i cája i ñá sáhndá ley tá nandihvi i íchi cuéntá Jesús. Vaha ndivaha nácaja ndó xihín i tá násahijin i xihín ndó jan. <sup>13</sup> Ta cája i cuéntá ndícyuhun ini ndó ñá quíhví ndivaha i tá nu cuítí násahán i caxi tuhun i tuhun vaha sahá Jesús tañu ndó jan. <sup>14</sup> Ta sahá cuehé nandoho i nácuu candají ndó yehé, nduu. Joo coó nácaja ndó ñá. Ñá nácaja ndó quéa nandiquehe vaha ndó yehé ta nácaja ndó xihín i tá quiahva ná caja ndó xihín in tátó Ndióxi á xihín Jesucristo.

<sup>15</sup> Ta nácajíi ndivaha ini ndó mé tiempo cán. Jáchí xíni vaha i ñá násahijin tiahva ndó tavá ndó nduchú nuú ndo quiahva ndó ñá nuú i, nduu tá ná cuu caja ñá ná ndivaha i. <sup>16</sup> Joo viti nanduu u tátuhun in da ihví ndó sahá ñá cahán i ñá ndaa sahá Jesucristo xihín ndó.

<sup>17</sup> Ndúu java ñayivi tañu ndó jan ta co jánahá ná ñá ndaa nu ndo. Cája cuahá ná ñamani xihín ndó joo a juú ñá vaha quéa cúní ná xihín ndo. Ñá cúní ná quéa ná jácaxoo táhan í ta ná ndihí ini ndó sahá ñá jánahá mé ná. <sup>18</sup> Co cúní cachí i ñá a váha toho ndihí iní sahá ñayivi. Vaha va ná caja í ñá ní tiempo ta xihín ndinuhi iní. Joo ñayivi jan ndihí ini na sahá ndó tá ín yehe tañu ndó cuítí va. <sup>19</sup> Candehé ndó, jahyi a. Nácasáhá ndíshihví tucu ini i sahá ndo. Tá quiahva ndíshihví in ñáñahá tá sáhndá a tixi ñá cárucu jahyi ñá quiahva já ndíshihví ini i sahá ndo. Ta ndoho tá ndoho chágá ini i sahá ndo janda quiahva ná caja ndó ñá cúní Jesucristo. <sup>20</sup> Viti ñúhú cúu ini i coo i jan já ná cuu cahán vaha chágá i xihín ndo jáchí janda nu ín i yóho ndícani ndivaha ini i sahá ndo.

*Ñá nácaja Agar xihín ñá nácaja Sara sa-nahá*

<sup>21</sup> Candehé ndo. Mé ndó, ná cúní ndiquiahva tucu ndáhá ley Moisés, xíni ñúhú candehé vaha ndó ñá cachí mé ley cán. <sup>22</sup> Cachí a ñá nácaju ivi jahyi taa Abraham. In jahyi da nácaju xihín Agar, ñá cuú mozo ñájihí da ta inga jahyi da nácaju xihín Sara, ná cuú ñájihí vaha da. <sup>23</sup> Tá nácaju jahyi taa Abraham xihín Agar cán, nácaju a tá quiahva cárucu tóco ndihí ñayivi. Joo jahyi taa da, da nácaju xihín ñájihí vaha da, ñá naní Sara cán nácaju a jáchí násahán Ndióxi tuhun a nu dá ñá ná cacu a. <sup>24</sup> Candehé ndo ñá náhá ñá yóho nu yo. Ndíví najíhí yóho cuú ná tátuhun ivi tuhun násahán Ndióxi nu yo. In táhan tuhun yóho cuú á ley násahán Ndióxi nuú Moisés jini yúcu naní Sinaí cán. Ta Agar cuú yuhú nuú ley yóho. Ta jahyi ñá cán tá nácaju a nanduu a mozo. Ta ná ndíco ley cuú ná tátuhun jahyi Agar jáchí cómi ley cuéntá sahá ná. <sup>25</sup> Ta Agar cuú ñá yuhú nuú ley ñá násahán Ndióxi nuú Moisés yúcu naní Sinaí, ñá ndácaan chí ñundáhyi Arabia cán. Ta jári mé ñá cuú ñá yuhú nuú Jerusalén, ñá cuú jini nu tóco ndihí ná cája ñá sáhndá ley Moisés. Ta mé ñá xihín ná ndiu cán cuú ná tátuhun mozo jáchi cómi ley cuéntá sahá ná. <sup>26</sup> Joo ín inga ñuu Jerusalén, ñá ín indíví cán. Ta ñayivi ndúu cán co cuú toho na mozo jáchi cuú ná tátuhun jahyi Sara, ñájihí vaha Abraham. Ta mí cuú yó tátuhun

na ndúu ñuu cán jáchi cández iní Jesucristo.  
<sup>27</sup>Já cachí týhun Ndióxi já:  
 Xímí ñúhú cajii ini ndó najihí, na a cuyú cacu jahyi.  
 Cayuhú ndó xihín ña cájii iní ndó,  
 vatí a ñáha cahnda tixi ndó cacu jahyi ndó.  
 Jáchí najihí, na najándacoo tóo yíi canduu chágá jahyi na a juú ga najihí ndúu yíi, cachí týhun Ndióxi.

<sup>28</sup>Cándezé ndo, ñani i, na cuyú cuéntá Jesús. Cúu yó tátuhun Isaac, jahyi Sara cán sahá ña cández iní Jesús jáchi cíu yó jahyi násahan Ndióxi týhun a quiahva nuú Abraham. <sup>29</sup>Joo tá quiahva nácaja dà cíu jahyi Agar sanahá tá násasáhá dà caja xíxi dà xihín da cíu jahyi Sara quiahva já ín a viti jáchi na sácu vaha ley Moisés caja xíxi na xihín na cández iní Jesucristo. <sup>30</sup>Joo cuni joho ndó ña cachí týhun Ndióxi tá nácahan Ndióxi xihín Abraham: “Tavá ñá cíu mozo jan ná quee ña cuhun ña xihín jahyi ñá. Jáchí da cíu jahyi mozo jan a cíu ñehe tálvi dà ndiquehe da ña quiahva i nuú da cíu jahyi ñájihí vahún jan”, nácahi Ndióxi sanahá. <sup>31</sup>Cándezé ndó, ñani i, na cíu cuéntá Jesús. Co cíu yó tátuhun jahyi ñá cíu mozo jan jáchi co cómi gá ley cuéntá saha yo. Viti cíu yó tátuhun jahyi Sara, ñá cíu ñájihí vaha Abraham cán jáchi co ndúu ga yó ndáha ley Moisés sahá ña cández iní Jesucristo.

## 5

Sa najani yo ndáha ley Moisés nácaja Jesucristo

<sup>1</sup>Co ndúu ga yó ndáha ley Moisés sahá ña nácaja Jesucristo. Ta viti cández iní ndó mé á sahá ña cán queá xímí ñúhú canduu ndacu ndo ta co ndítahan nu ndó ndicó coo ndó caja ndó ña sáhndá mé ley cán.

<sup>2</sup>Cuni joho ndó ña cahán i xihín ndo. Tá ná cández iní ndó ña cuu nduu ndaa ndó nu Ndióxi sahá ña chícáan na marca yiquí cuñu ndó já queá cíni cachí a ña quehe núu ndó ña nácaja Jesucristo tá naxihí a ndica crúxu saha ndo. <sup>3</sup>Cándezé ndó ná cahán tucu u xihín ndo. Tá cíni ndó canduu ndaa ndó nu Ndióxi sahá ña chícáan ndó marca yiquí cuñu ndó já queá ndítahan nu ndó caja ndó tóco ndihi cuií ña sáhndá ley Moisés. <sup>4</sup>Mé ndó cíu ndó na cíni canduu ndaa nu Ndióxi sahá ña sácu vaha ndó ley Moisés. Ta viti nácaaxoo ndó nu Jesucristo

ta nácaaxoo ndó nuú ñamáni cíni Ndióxi caja xihín ndo. <sup>5</sup>Joo mé nde xíni vaha nde ndúu ndaa nde nu Ndióxi sahá ña cández iní nde Jesucristo. Ta ndáti tähva nde jáchi chíndeé íníma yíi Ndióxi ndehé. <sup>6</sup>Jáchí tá in ñandúu xihín Jesucristo já queá coó caja toho a a naquihvi marca yiquí cuñu í a coó a. Ña ndfyahvi ndusa queá ña cández iní Jesucristo jáchi xihín ña yóho cuu quihvi iní ñani táhan í.

<sup>7</sup>Sa vaha ndivahva va cuahán ndó xihín ña cández iní ndó Jesús. Yo já ñandijama jini ndo ña ná a cándusa ga ndó ña ndaa. <sup>8</sup>A juú toho Ndióxi ñandijama jini ndo jáchi mé a cán queá nácaña ndohó ña ná cacuu ndó cuénta mé á. <sup>9</sup>Xímí ñúhú ndicuhun iní ndó in týhun ta já cachí a “Vatí loho yusá naxqá ná cava táhan í xihín yusá cuahá cán játiví ñahá a.” Quiahva já caja na cíni ndijama jini ndó jan. <sup>10</sup>Joo cández iní i Jesucristo, xitoho í sahá ña cán queá xímí vaha i ña a cándusa ndó na jan ta ndicó coo ndó cahvi ini ndó tá quiahva cahvi iní yehé. Ta jándoho Ndióxi iní na xíca jájaca xímí túni ndó jan ta coó caja toho a ndá na cíu ná.

<sup>11</sup>Joo yehé jánahá i nuú na cíu cuéntá Jesús ña co ndítahan ga chícáan na marca yiquí cuñu na ta sahá ña cán queá ndicuita na Israel xihín i. Tá ná jánahá i nuú ñayivi ña ndítahan chícáan na marca yiquí cuñu na já queá a ndicuita ga na cán xihín i. Joo mé a ndaa cándají na cán yehé jáchi jánahá i nuú ñayivi ña cuu cazu ndaa íníma ná sahá ña cández iní na Jesucristo cuití va, mé a naxihí ndica crúxu saha yo. <sup>12</sup>Sahá ña cíni na cán caja ndusa na xihín ndó chícáan ndó marca yiquí cuñu ndó sahá ña cán queá caja i cuéntá vaha chágá ná chítuhun ndihi mé ná yiquí cuñu na ta ná jándacoo táji na ndohó.

<sup>13</sup>Cándezé ndó, ñani i. Co ndúu ga ndó ndáha ley Moisés nácaja Jesucristo. Joo co cíni cachí ña yóho ña najani ndo já ná cuu caja ndó ndá ña ná nuú ña xíca ini yiquí cuñu ndó caja. Jáchí nácaña Ndióxi ndohó ña ná quihvi iní táhan ndó ta ná chindéé táhan ndó. <sup>14</sup>Joo tóco ndihi ña cíu ley Moisés in cachí ndihi a tá cachí ajá: “Quihví inún ñani táchun tá quiahva quihvi inún mún.” <sup>15</sup>Joo cuénta coo ndó jáchi tá cásahá ndó caja xímí xihín táhan ndó ta caja quini xihín táhan

ndó já quéa xinu quíví jándihi sahá táhan ndó.

*Nq cúní íníma yii Ndióxi caja íxihín nq cúní yiquí cuñu í caja í*

<sup>16</sup>Candehé ndo, ñani i. Ndítahan caja ndó nq cúní íníma yii Ndióxi ta co ndítahan caja ndó nq xícá ini yiquí cuñu ndó caja. <sup>17</sup>Jáchí tocó ndhi nq núu nq cúní yiquí cuñu yó caja í cání táhan xihín nq vaha nq cúní íníma yii Ndióxi caja í. Ta a cuú cuni táhan íníma yii Ndióxi xihín nq núu jáchí co ndique táhan vaha nq núu xihín nq vaha sahá nq cán quéa a cuú caja í ndá nq nacuu cúní yó caja í. <sup>18</sup>Ta tá ná ndiquiahva ndó mé ndó nq ná candaca íníma yii Ndióxi ndghó já quéa a cacomí ga ley Moisés cuénta sahá ndo.

<sup>19</sup>Ta co yáncá toho ndíscuní ndá na cútú na caja nq núu nq cúní mé ná caja na. Jáchí nq caja na cútú nq yóho: ndúu na xihín na co cútú nájihí nq a yíi ná ta caja na tá nqú nq núu xihín yiquí cuñu na. Ta ndíscají ini na cuju na xihín náhá á taa. <sup>20</sup>Cája cahnu na yoco xihín tiniñu yúu ta caja na nq tají. Ta cándají táhan na. Ta cání táhan na ta ndácaan nq cuíñu jini ná. Ta cama chá jáa xihín táhan na. Ta cahví ini na sahá mé cuití va na. Ta cátóo ná jácani táhan na ñayivi já ná canduu jín ná. Ta xihín nq yóho sáhndá táhan na ñayivi. <sup>21</sup>Cútú ná ñayivi ilví ini ta cútú ná nq sáhní ndíi ta cútú ná nq xihí. Ta a juú quiahva ndehé nq ta cuahá ndivaha java gá táhan nq yóho caja na. Joo mé ndó cuni joho ndó ná cahán tucu u nq sa nacachi i jihna xihín ndo: Ndá na caja já a néhe tálvi toho na cacomí Ndióxi cuénta sahá ná.

<sup>22</sup>Joo tá ndícaan íníma yii Ndióxi iní já quéa caja mé á nq ná quihví ini táhan í ta caja nq ná cajíi iní ta caja nq ná coo vaha iní ta caja nq ná a cójo cama iní ta caja nq ná chindeé yó ñayivi ta caja nq ná cacuú ñayivi vaha iní ta caja íníma yii Ndióxi yóho nq ná cacuú ñayivi, nq co cahví ivi joho iní. <sup>23</sup>Ta caja nq ná cacuú ñayivi, nq co ndínehe jíco mé, nq cútú sáhnu mé. Ta ni en túhún toho ley a cuú chícaan cuachi jatá ñayivi tá sácú vaha na tóco ndihí nq cahchi tóhu yóho. <sup>24</sup>Tóco ndihí nq cómí Jesucristo cuénta sahá, sa nájandacoo na nq núu násacahvi iní na caja na xihín yiquí cuñu na. Ta cútú ná tátuhun nq sa násahi nqú cuachi násacaja na. <sup>25</sup>Co caja gá yó

cuachi nácaja í jihna sahá nq ndácaan íníma yii Ndióxi iní. Ta xíní núhú quiahva í ñamani nq mé á nq ná candaca a mí nqú ndihí nq caja í.

<sup>26</sup>Ta co ndítahan ndínehe jíco yo mí ta ni co ndítahan jácani táhan í ñayivi ta ni co ndítahan cahihví iní xihín táhan í.

## 6

*Ndítahan nqú nq cútú cuénta Jesús chindeé táhan na*

<sup>1</sup>Candehé ndó, ñani i. Tá naxini ndó nádicava in nq cútú cuénta Jesús nqú cuachi já quéa ndítahan nq ndohó, nq nachutú ndaq íníma xihín íníma yii Ndióxi, chindeé ndó nq já ná ndicaca vaha na íchi cuénta Jesús. Joo víi víi cahán ndó xihín ná jáchí ndítahan cahvi iní ndó nq vaxi quíví tá cuu ndicava ri ndohó va nqú cuachi. <sup>2</sup>Xíní núhú chindeé táhan ndó tá ndohó iní ndó. Ta xihín nq yóho jáxing coo ndó nq sáhndá Jesucristo nq ndó caja ndó.

<sup>3</sup>Tá ndúu java na tañu ndó ta cahán na cútú ná nq náhnu ndivaha vatí co cútú á nq ndaa já quéa jándahvi na mé va na. <sup>4</sup>Tá in tá in ndó ndítahan candehé ndó ndá quiahva caja ndó já ná cuu cajíi iní ndó tá caja vaha ndó. Ta co ndítahan ndínehe jíco ndo mé ndó sahá nq cahán ndó nq vaha chágá caja mé ndó a juú ga inga ga nq. <sup>5</sup>Jáchí tá in tá in ndó ndítahan nq ndó candehé ndó nq caja ndó, á cútú á nq vaha á cútú á nq núu.

<sup>6</sup>Tóco ndihí ndó, nq jácuaha tuhun Ndióxi ndítahan nq ndó chindeé ndó nq jánhah ndohó xihín nq cómí ndo.

<sup>7</sup>Jándahvi ndó mé ndó tá cahán ndó nq cuu jándahvi ndó Ndióxi jáchí a cuú jándahvi ñayivi Ndióxi. Sa xíní ndó tá xútu ndó in tata nq núhú já quéa vaxi quíví tá jáquee ndó mé náhna naxutu ndó. <sup>8</sup>Tá caja ñayivi nq núu nq cúní mé cuití nq já quéa vaxi quíví cuhún na indayá sahá nq núu nácaja na. Joo tá caja na nq vaha nq cajíi iní íníma yii Ndióxi xihín já quéa néhe tálvi nq cuhún nq coo na xihín Ndióxi anda ama caja quíví, caja íníma yii Ndióxi. <sup>9</sup>Sahá nq cán quéa a cánáá yó caja í nq vaha jáchí tá ná a jándacoo í caja í nq cúní Ndióxi já quéa vaxi quíví quiahva Ndióxi nq yo nq ndítahari ndiquehé sahá nq táhan iní mé a xihín nq nácaja í. <sup>10</sup>Sahá nq cán quéa tá núná nq yó caja vaha í xihín tóco ndihí

ñayivi cóho caja í ña. Ta cachí ga ví tá cúú ná na cández ini Jesús.

*Ndíndayí Pablo na cúú cuéntá Jesús*

<sup>11</sup> Cández ndó ndaja náhnu letra cáhyí i nu ndo xihín ndáhá mí i viti. <sup>12</sup> Cúní ña ná cández ini ndó sahá java ga ñayivi, ná cúní caja ndúsá xihín ndo ña ná chícaan ndó marca yíquí cuñu ndó. Cája na ña yóho jáchi cúní na candoo vaha na nuyú ná Israel. Ta yíhví ná ndicuita ñayivi xihín ná sahá ña cándusa na Jesucristo, mé a naxihí ndica crúxu sahá cuachí. <sup>13</sup> Joo mé ná chícaan marca yíquí cuñu cán co sácu vaha na tóco ndihi ña sáhndá ley Moisés. Joo cúní na ña ná chícaan ndó marca yíquí cuñu ndó já ná cuu cahan lánدا ná nuyú ná Israel sahá ña nacaja ndúsá ná xihín ndo. <sup>14</sup> Joo yéhe, ni in túhún toho ñaha co cúní cahan lánda i saha. Ña cúní caja i quéa cahán i sahá Jesucristo, mé a naxihí ndica crúxu. Ta sahá ña cández ini i Jesucristo sahá ña cán quéa cúú á tátuhun naxihí i nuyú ña nuyú ñuyíví yóho. Co cúní ga i cája i ña cája ñayivi ñuyíví ta co cúní ná cán catáhan na xihín i. <sup>15</sup> Ta co ndíyahvi nu Ndióxi á naquihvi marca yíquí cuñu í á coó a. Ña ndíyahvi ndusa quéa ña nanduú ñayivi saá sahá ña cández ini Jesucristo. <sup>16</sup> Cúní ña ná coo vaha ini ndó, ná cája ña cahán i yóho. Ta ná caja Ndióxi cuahá ñamani xihín ndó ta xihín tóco ndihi na cúú cuéntá mé a.

<sup>17</sup> Ta viti xihín chínuu co cúní ga i ña ná jáquihvi ga ñayivi yéhe. Jáchi tóco ndihi yanda ndáá a nu yíquí cuñu i náhá ña mé a ndaa cúú u da cája chúun cuéntá Jesucristo.

<sup>18</sup> Ñani i na cúú cuéntá Jesús, ña cúní quéa ná caja Jesucristo, xitoho í cuahá ñamani xihín ndihi ndó. Já ná coo.

## Carta nacahyí Pablo nuú na cúú cuéntá Jesús ndúu ñuu Efeso

Chíndahá Pablo Ndióxi coo nq cíú cuéntá  
Jesús ndúu ñuu Efeso

<sup>1</sup> Yehé cíú Pablo, dà nacaxi Ndióxi cacuu  
apóstol cuéntá Jesucristo. Cähý i carta  
yóho nuú na cíú cuéntá Ndióxi ndúu ñuu  
Efeso, nq cández ini Jesucristo. <sup>2</sup> Nq cúní  
quéá ná caja Ndióxi, tátá yo xihín Jesu-  
cristo, xitoho í cuahá ñamani xihín ndó ta  
ná caja mé a ña ná coo vaha ini ndó.

Néhe tähví yó cuahá ñamani caja Ndióxi  
sghá ña cández ímí Jesucristo

<sup>3</sup> Cóho caja cahnu í Ndióxi, mé a cíú tátá  
Jesucristo, xitoho í. Cóho caja cahnu í mé  
á jáchí cuahá ndivaha ñamani nacaja xohó.  
Ta tá nuú ña vaha quíxi indíví nasahan  
ndihi mé a nu yo jáchí in cíú yo xihín  
Jesucristo. <sup>4</sup> Janda tá cámání cava sahá sahá  
ñuyíví já nacaxi Ndióxi mí ña ná cacuú  
cuéntá mé a sahá ña nacaja Jesucristo. Ta  
nasaú ini a ndaja mí ña ná cacuú ñayivi  
yii, nq coó ga cuachi nu mé a. <sup>5</sup> Quíhví  
ndivaha ini a mí sahá ña cán quéá sa nasaú  
ini mé a ña ná quiyi Jesucristo sahá yo  
já ná ndúu jahyi mé a. Já nacaja jáchí já  
cúní a coo. <sup>6</sup> Sahá ña cán quéá ndítahan  
nu yo caja cahnu í Ndióxi ní tiempo jáchí  
cuahá ndivaha ñamani caja mé a xihín yo tá  
nacaja mé a ña in nandúu xihín Jesucristo,  
jahyi maní a. <sup>7</sup> Nacaja Ndióxi ñamani cahnu  
xihín yo tá naxita nij Jesucristo ndica crúxu  
saha yo. Anda jáví cuu jácacu a mí ta cuu  
caja cahnu ini a sahá cuachi. <sup>8</sup> Mé a ndaa  
nacaja cuahá ndivaha Ndióxi ñamani xihín  
yo. Nacaja mé a ña ná ndindíchí jini yo  
já ná candaq iní tuhun mé a. <sup>9</sup> Ta nasaú  
ñamani nu yo ña ná candaq iní ña nasaú  
ini mé a caja jáchí janda sanahá nasaú  
jehé a nu yo joo viti sa candaq iní ndá saha  
nachindahá mé a Jesucristo. <sup>10</sup> Ta vaxi quiyi  
coo ña nasaú ini mé a coo. Ta mé quiyi cán  
caja Ndióxi ña ná cacomí Jesucristo cuéntá  
saha tóco ndihi ñaha ndúu ñuyíví xihín ña  
ndúu indíví jáchí tóco ndihi ñaha xínu a  
canduu a ndáha Jesucristo.

<sup>11</sup> Ta coo tá quíhva nasaú ini Ndióxi coo  
jáchí caja mé a tóco ndihi ña sácú ini a

caja. Janda sanahá ndivaha nasaú ini a  
caxi a mí cacuú ñayivi ñehé tähví ndiqueh  
ña vaha, ña quíxi nu íin mé a sahá ña in  
nandúu xihín Jesucristo. <sup>12</sup> Sahá ña cán quéá  
ndítahan nuú nde caja cahnu nde Ndióxi  
ñá ná naha ndaja cahnu cíú mé a jáchí  
jihna ñuhú nde nacásahá cández ini nde  
Jesucristo. <sup>13</sup> Ta quiahva já nacaja ri ndohó  
va jáchí tá naxini joho ndó ña ndaa sahá  
Jesucristo já nacández ini ndó mé a. Mé  
tuhun yóho nájánahá nu ndó ndá quiahva  
najácacu mé a ndohó. Ta tá nacandusa  
ndó a já in nandúu ndó xihín á ta cíú  
á tátuhun nájána marca Ndióxi ndohó ña  
naha ña mé a ndaa cíú ndó cuéntá mé a.  
Ta mé marca yóho cíú ínima yii mé a ña  
nasaú tuhun a nu ndó quiahva nu ndó.  
<sup>14</sup> Ta ndácaan ínima yii mé a ini ínima yo  
sahá ña cán quéá candaq vaha iní ña vaxi  
quiyi ndiqueh ña vaha, ña quiahva Ndióxi  
nu yo jáchí sa nasaú mé a tuhun a caja ña.  
Ta sa já ndácaan ínima yii mé a ini ínima yo  
janda quiahva ná xínu quiyi jácacu a mí nuú  
cuachi. Sahá ña cán quéá cóho caja cahnu í  
mé a ña ná naha ndaja cahnu cíú mé a.

Xíca tähví Pablo nu Ndióxi ña ná quíhva  
mé a ña ndichí jini ná cíú cuéntá Jesús

<sup>15</sup> Ta sahá ña sa candaq vaha ini i ña  
cández ini ndó Jesucristo, xitoho í ta sahá  
ñá sa candaq ini i ña quíhví ini ndó tóco  
ndihi na cíú cuéntá Ndióxi <sup>16</sup> sahá ña cán  
quéá cojándacoo i ña ndiquiahva i ndixahvi  
nu Ndióxi sahá ndó. Ta co ndindójó i caca  
tähví i nu Ndióxi sahá ndó. <sup>17</sup> Ta xíca tähví  
i nu Ndióxi, mé a cíú tátá Jesucristo, xitoho  
í, mé a cíú Ndióxi cahnu ndivaha já xíca  
tähví i nu á ña ná quíhva ínima yii mé a  
nu ndó. Anda já caja mé a ña ná ndindíchí  
jini ndó já ná naha ndaja caja Jesucristo. Ta  
xihín ña yóho candaq vaha chágá ini ndó  
saha mé a. <sup>18</sup> Ta xíca tähví i nu Ndióxi ña  
ná jándiyehé a xíni túni ndó já ná candaq  
ini ndó sahá ña vaha caja mé a chágá chí  
nu xihín ndó. Ta núchí ndivaha coo tá ná  
xínu quiyi ndiqueh Ndióxi ndohó cuuhun  
ndó coo ndó xihín mé a anda ama caja quiyi  
sahá ña cíú ndó cuéntá mé a. <sup>19</sup> Ta xíca tähví  
i nu á ña ná candaq ini ndó ña co vája xínu  
coo nu ndshi ndéé Ndióxi jáchí íin ndivaha  
ndéé mé a. Ta íin mé ndéé yóho tañu mí,  
ná cíú cuéntá mé a. Ta sa mé ndéé yóho  
quéá nacaja chúun Ndióxi <sup>20</sup> tá nájánditacu  
a Jesucristo. Anda jáví nasaú coo a ña xoo

cuáha mé á indiví. <sup>21</sup> Ta nacaja Ndióxi ña ná nduu Jesucristo jini nu tóco ndihí na íin ndéé cahnda chuun ñuyíví yóho xihín na íin ndéé cahnda chuun indiví. Sáhndá Jesucristo chuun nu tóco ndihí na cán vati cíú ná ná ndúu tiempo viti á cíú ná ná vaxí chágá chí nuu. <sup>22</sup> Tóco ndihí ñaha ndúu indiví xihín ñuyíví nandiquiahva Ndióxi ña ndáha Jesucristo ña ná cacomí mé á cuéntá sahá. Ta sá mé á cíú á jini nu tóco ndihí na cández ini mé á. <sup>23</sup> Ta tóco ndihí na cíú cuéntá Jesucristo cíú ná tátuhun yiquí cuñu mé á sahá ña nandicutú ndaa íníma ná xihín mé á. Ta mé á cán jáchutú a tóco ndihí na ná ndúu ñuyíví xihín indiví.

## 2

*Najácacu Ndióxi mí jáchí quíhví ini a mí*

<sup>1</sup> Ta jihna nasacuu ndó tátuhun na sa naxihí jáchí nasacaja ndó cuahá cuachi. Joo viti cíú ndó tátuhun na nanditacu tucu jáchí Ndióxi najácacu ndghó. <sup>2</sup> Ta nasacaja ndó tá quiahva cája ñayivi ñuyíví yóho. Ta nasacaja ndó ña cíni tiñáhá sacuahá, rí cíú jini nu tóco ndihí rí quini. Ta mé rí cán cómí rí cuéntá sahá ñayivi, na co cája ña cíni Ndióxi. <sup>3</sup> Ta quiahva já ná sanduú jihna jáchí nasacaja í ña xíca ini mí ví ta nasacaja í tóco ndihí ña ná, ña násacahvi iní caja í. Ta sahá tóco ndihí ña ná nacaja í yóho nanditahan nu yo jándoho ndivaha Ndióxi iní tá quiahva cája mé á xihín java ga na co cíni candusa mé á. <sup>4</sup> Joo natahví ndivaha iní Ndióxi sahá yo ta naquíhví iní ndivaha mé á mí. <sup>5</sup> Ta vati nasacuú tátuhun ndii ta coó nacuu ndique táhan maní yó xihín Ndióxi sahá cuachi nasacaja í joo natahví iní Ndióxi sahá yó sahá ña cán quéa najácacu a mí sahá ña nacaja Jesucristo. <sup>6</sup> Vati nasacuú tátuhun ndii sahá cuachi nasacaja í joo tá nanditacu Jesucristo já nacuu a tátuhun nanditacu yó xihín mé á nacaja Ndióxi. Ta nacaja mé á ña ná cacoo í xihín Jesucristo tá ná xínu coo í indiví. <sup>7</sup> Nacaja Ndióxi ña yóho jáchí nacuu ini a jánahá nu yo viti xihín chágá chí nuu ña quíhví ndivaha ini a mí ta táchí ndivaha ini a sahá yo sahá ña nacaja Jesucristo. <sup>8</sup> Ta sahá ña natahví iní Ndióxi sahá ndo nañehé táchí ndó cazu ndaa íníma ndo jáchí cández ini ndó mé á. Ta co cíú á sahá ña cája mé ndó jáchí cíú á ñamaní nacaja Ndióxi xihín ndo. <sup>9</sup> Ta coó najácacu a ndohó sahá ña vaha cája

ndó jáchí co cíni a ña ná caja cáhnu ndó mé ndó. <sup>10</sup> Jáchí nacavaha Ndióxi mí tá quiahva cíni a ña in ná nduu xihín Jesucristo já ná caja í ndinuhu ña vaha, ña násacu ini a caja í andá jihna.

*Ín vaha iní sahá ña nacaja Jesucristo xóho*

<sup>11</sup> Candehe ndó, na tóho, na cíú cuéntá Jesú. Ná ndicuhun ini ndó ndaja násacuu ndó jihna. Nacachi na Israel sahá ndó ña coó yahvi toho ndó jáchí coó náchicaan na marca yiquí cuñu ndó. <sup>12</sup> Ndítahan ndicuhun ini ndó ña mé tiempo cán co xíni toho ndó Jesucristo. Ta ni coó násacuu ndó na Israel, na nacaxí Ndióxi. Ta ni coó násacuu ndó ñayivi násahan Ndióxi tuhun a nuu. Nasanduu uun ndó ñuyíví yóho jáchí coó násacuñi ndó Ndióxi ta ni coó nacahán ndo cuhun ndó indiví. <sup>13</sup> Vati coó násacuu ndó na cíú cuéntá Ndióxi joo viti nacayati ndó nu á ta já in nanduu ndó xihín Jesucristo sahá ña naxihí a ndica crúxu saha ndó. <sup>14</sup> Ta nacaja Jesucristo ña ná coo vaha ini na Israel xihín na tóho. Ta nacaja ña in nanduu na cuéntá mé á. Jáchí najándihi á sahá ña nasañi nuu nuu ña cán ña ná ndique táhan maní xihín táhan na. <sup>15</sup> Ta tá naxihí Jesucristo najáxiñu coo a nu ley ña násahnda chuun nu yo sahá ña nanditahan caja í. Ta nandaja mé á ña in nanduu na Israel xihín na coó naquixi chichi Israel. Ta tá nandihí já nandaja mé á ña nanduu na cuéntá mé á já nanduu vaha ini xihín táhan na. <sup>16</sup> Tá naxihí Jesucristo ndica crúxu já nacaja mé á ña ná ndique táhan maní xihín táhan na ta já nandihí sahá ña cání táhan na. *Anda já najándique táhan maní á na xihín Ndióxi ta já in nanduu na.*

<sup>17</sup> Ta naquixi Jesucristo caxi tuhun a tuhun vaha nu yo ña ná coo vaha iní xihín Ndióxi. Ta coó caja toho a á cíú ná na tóho, na násacuu xíca nu á tátuhun mé ndó, a cíú ná na Israel, na násanduu yati nu á tátuhun mé nde jáchí násahan mé á tuhun vaha nu tóco ndihí. <sup>18</sup> Ta sahá ña nacaja Jesucristo cuu cayatí nu Ndióxi viti. Coó caja toho a á cíú yó na naquixi chichi Israel á co cíú yó na naquixi chichi Israel jáchí íníma yíi mé á quéa chíndee a mí cayatí nu Ndióxi. <sup>19</sup> Sahá ña cán quéa co cíú ga ndó na tóho, na naquixi xíca jáchí in nanduu ndó xihín na cíú cuéntá Ndióxi viti ta cíú ndó na vehe mé á. <sup>20</sup> Ta viti tóco ndihí, na cíú cuéntá mé á cíú yó tátuhun in vehe. Ta

na apóstol xihín na profeta cíú ná tátuhun yuu ndúhu sahá vehe jan jáchí najánaha na tuhun Ndióxi nu ndó nu cultí. Ta Jesucristo cíú á tátuhun yuu ndúhu cuahán titó vehe jan ña sáhan ndéé vehe jan.<sup>21</sup> Ta nacaja Jesucristo ña nandique táhan vaha tóco ndihí na cíú cuénta mé á. Ta nandaja mé a mí ña loho loho na ndúu tátuhun in veñyu yii nu sá ndacaan Ndióxi, xitoho í.<sup>22</sup> Sahá ña in nanduu ndó xihín Jesucristo sahá ña cán quéa nandique táhan máni xihín táhan ndó. Ta nacaja Ndióxi ña ná nduu ndó tátuhun in vehe nu fin Ndióxi jáchí ndacaan íníma yii mé á chí ini ndó.

### 3

*Nachindahá Ndióxi Pablo cahán da tuhun mé á nuú na coó naquixi chichi Israel*

<sup>1</sup> Yehé cíú Pablo ta sahá ña xíca nuu i cáhan i tuhun vaha sahá Jesucristo nuú na coó naquixi chichi Israel sahá ña cán quéa ndácaan i vecaa viti.<sup>2</sup> Ta sa cándaa ini ndó sahá ña natahví ini Ndióxi saha ndó sahá ña cán quéa nasahan mé a chuun yóho nuú i ña ná cahán i tuhun Ndióxi xihín ndo.<sup>3</sup> Jihna nachijehé Ndióxi ña nasaacu ini a caja joo viti najánaha mé á nuú i ña nasaacu ini a caja. Ta sa nacahán chá i sahá ña jan tá nacahy i carta nu ndo.<sup>4</sup> Tá ná cahvi tucu ndó ña já cuni ndó ña mé a ndaq táhyí sa cándaa ini i ña nasahejehé sahá Jesucristo.<sup>5</sup> Coó nacandaa ini ñayivi ña yóho jáchí nasahejehé ña. Joo viti nacaja íníma yii Ndióxi ña ná candaan ini na apóstol xihín na profeta, na cíú cuénta mé á sahá ña yóho.<sup>6</sup> Ta ña nasahejehé jihna cíú ña yóho: xihín ña nacaja Jesucristo ña in nanduu na cíú chichi Israel xihín ña co cíú chichi Israel já ná ñehe ná ña vaha ña nasaacu ini Ndióxi quiáhva nuú na cíú jáhyi mé á. Jáchí in nanduu na Israel xihín na tóho ta in cíú ná ndáti na ñehe ná ña nacachi Ndióxi quiáhva nu ná sahá ña nacaja Jesucristo.

<sup>7</sup>Joo nacaja Ndióxi ñamani xihín i ta xihín ndéé mé á xíca nuu i cáhan i tuhun vaha sahá mé á nuú ñayivi.<sup>8</sup> Nacaja Ndióxi ñamani xihín i jáchí nasahejehé mé a chuun yóho nuú i ña ná cahán i tuhun vaha sahá Jesucristo nuú na coó naquixi chichi Israel. Vati cíú u tátuhun in da coó sahá tañu na cíú cuénta Jesús joo nacaja mé á ñamani xihín i ña ná ndicani i nuú na tóho ndá quiáhva náhnu náhá cája Jesucristo xihín

ná.<sup>9</sup> Ta nasahejehé Ndióxi chuun nuú i ña jáchí nasahejehé nuú ndihí ñayivi. Ta anda sahá nasahejehé a nacaja Ndióxi, mé a nacavaha tóco ndihí ña.<sup>10</sup> Nacaja Ndióxi ña yóho jáchí sahá ña in nanduu na Israel xihín na tóho anda jáví náhá nu tóco ndihí na sahndá chuun nuú na ndúu indívi ndá quiáhva ndichí ndivaha jini mé á.<sup>11</sup> Sahá nasahejehé nasaacu ini Ndióxi ña yaha chágá chí nuú. Ta viti xihín ña nacaja Jesucristo, xitoho í naxinu coo nuú ña nasaacu ini mé á coo anda ama cúa quiví.<sup>12</sup> Ta sahá ña in nanduu xihín Jesucristo sahá ña cán quéa co yihví ga í cayatí nu Ndióxi. Ta xíni vaha í ña ndiquehe mé á mí jáchí cández iní mé á.<sup>13</sup> Sahá ña cán quéa xíca tähví i nu ndo ña ná a cávitá ini ndó sahá ña ndóho ini i. Jáchí sahá ña nacahán i tuhun Ndióxi nu ndo sahá ña cán quéa ndóho ini i viti já ná cuu canduu vaha mé ndó. Ta xíni ñúhú cajíi ini ndó sahá ña cája i sahá ndo.

*Quíhvi ini Jesucristo ñayivi*

<sup>14</sup> Sahá ña cán quéa ndácaan xítí i nu Ndióxi, mé a cíú tátá Jesucristo, xitoho í tá cáhvi ini i ndá quiáhva náhnu cája mé á.<sup>15</sup> Jáchí mé a cíú tátá tóco ndihí na ndúu indívi xihín tóco ndihí na ndúu ñuyíví yóho sahá ña cíú ná ná vehe mé á.<sup>16</sup> Ta cúní mé á caja cuahá ndivaha ñamani xihín yo sahá ña cán quéa xíca tähví i nu á ña ná chindahá íníma yii á nu ndo já ná quiáhva tuhun ndeé ini ndó ta já ná coo ndacú ini ndó.<sup>17</sup> Ta xíca tähví i nu Ndióxi ña ná ndacaan Jesucristo íníma ndo sahá ña cández ini ndó mé á ta ná coo ndeé ini ndó sahá ña quiáhvi ini a ndohó. Ta tá quiáhva tím yóho yító ñundáhyi quiáhva já ndítahan coo ndó xihín Jesucristo.<sup>18</sup> Ta anda jáví mé ndó xihín tóco ndihí na cíú cuénta Jesús cuu candaan ini ndó ndá quiáhva quiáhvi ini a ndohó.<sup>19</sup> Ta xíca tähví i nu Ndióxi ña ná candaan ini ndó ndá quiáhva quiáhvi ini Jesucristo ndohó já quéa ná ndicutú ndaa íníma ndó xihín Ndióxi. Joo mé a ndaa a cíú xíni coo ndó candaan ini ndó ndá quiáhva quiáhvi ini a ndohó.

<sup>20</sup> Ta viti cáhnu náhá ná cacuu Ndióxi, mé a fin ndivaha ndeé cája cuahá nuú ñaha jáchí cája cuahá chágá mé á ñamani xihín yó a juú gá nuú ña cáhvi ini caca yó nu á jáchí chindahé Ndióxi mí xihín ndeé mé á.

<sup>21</sup> Cóhó ndihí, na cíú cuénta Jesús ña ná caja cáhnu í Ndióxi sahá ña nacaja Jesucristo.

Viti xihín ndijáá níí quíví ta anda ama cáá quíví ná caja cáhnu í mé á. Já ná coo.

## 4

Cája ínima yiji Ndióxi ñaq in ngnduu tóco ndihi ná cuú cuénta Jesús

<sup>1</sup>Yehé ndácaqan i vecaa sahá ña cája chúun i cuénta Jesucristo, xitoho í. Sahá ña cán quéa xícá tähví i nu ndó ña ná caja ndó ña cúní Ndióxi caja na cuú cuénta mé á. Jáchí nacaxi a ndohó sahá ña cán quéa ndítahan caja ndó tå quiahva cúní mé á. <sup>2</sup>Coto a cája cáhnu ndó mé ndó. Vií caja ndó xihín ñayivi. A cójo cama ini ndó xihín ná. Ta tá yáha nu cája xihín tähán ndó caja cáhnu ini sahá tähán ndó jáchí quíhví ini tähán ndó. <sup>3</sup>Xíní ñúhú ndinducú ndó in ná nduu ndó jáchí chíndeé ínima yiji Ndióxi ndohó caja ndó ña. Ta coto a ndácalhnda tähán ndó já ná coo vaha ini xihín tähán ndó. <sup>4</sup>Tóco ndihi mí, ná cuú cuénta Jesús naxinu coo í cuú yó tátuhun in tühún ñayivi. Jáchí ín in tühún ínima yiji Ndióxi ínfat in tühún cuú ri ña ndatí quiahva Ndióxi nu yo sahá ña nacaxi a mí ndiquehé ña. <sup>5</sup>In tühún jini Jesucristo, xitoho í quéa ín. Ta in tühún jini mé á ndítahan candeé iní jáchí in nacandúta yo cuénta mé á. <sup>6</sup>Ta ín in tühún Ndióxi, mé a cuú á tátá tóco ndihi. Ta mé a cán cómí a cuénta sahá tóco ndihi. Ta sáhan mé á ndee yó caja í ña cúní a. Ta ndácaqan ínima mé á ini tóco ndihi ñayivi cuénta mé á.

<sup>7</sup>Joo tá in tá in mí nañehe tähví yo násacu ini Jesucristo quiahva nu yo. <sup>8</sup>Sahá ña cán quéa cächí tühun Ndióxi já:

Naquee vaha mé á xihín na ihví a ta násandaca mé á ná tá nandicó coo a nandaa indív. <sup>9</sup>Anda já násahan tähví nuú in in ñayivi, nacachi tühun Ndióxi.

<sup>10</sup>Tá cächí a ña nandaa Jesucristo indív já cúní cachí a ña nu cuítí nanuu a indív anda ñuyíví yóho. <sup>11</sup>Ta Mé Jesucristo, mé á naquee indív cán ta nanuu a ñuyíví yóho nandaa tucu a cuahán janda nu jíco cuíí indív ta já najándicu a ñuyíví xihín indív xihín ña nacaja mé á. <sup>12</sup>Ta tá násahan tähví nuú in in ñayivi já nañehe tähví java na cacuu na apóstol ta java na cacuu na profeta ta java na caca nuu na cahán na tühun Ndióxi ña cuu jácacu ñayivi. Ta java na nañehe tähví ná cacuu na ná cómí cuénta sahá ná cuú cuénta mé á ta java na cacuu

na ná jánaha tühun Ndióxi nuú ñayivi. <sup>13</sup>Já nacaja Ndióxi xihín na cán já ná canduu tiähva na caja chúun na cuénta mé á ta já ná cuu caja na jácuahnu na ná cuú cuénta Jesús. <sup>14</sup>Já quéa ná xinu coo ndihí in canduu xihín ná cuú cuénta Jesús sahá ña candeé iní mé á. Já ná cuu xinu coo í candaq vaha chágá iní sahá Jesucristo, mé a cuú in tühún jini já jahyi Ndióxi. Ta xihín ña yóho cuu ndindacú yo cuénta mé á janda quiahva cuahnu vaha í jáxinu coo í ndicutú ndaq yó xihín mé á. <sup>15</sup>Ná a cácuu ga í tátuhun ná valí, ná co tácu ini, ná ndíjama jini tá tóo. Ta tá nandihi ndíco na jatá ña jánaha inga na janda quiahva jándahvi na ná. Ta mé ná jándahvi ñahá yóho xíní vaha na ndá quiahva cája na cañehe na ná cuhun ná in íchi ña co cuú ichí vaha. <sup>16</sup>Ña ndítahan caja í quéa cahán ndaq xihín tähán xihín ndinuhu iní sahá ña quíhví iní tähán í ta já cuahnu í xihín Jesucristo, mé a cuú jini nu tóco ndihi ná cuú cuénta mé á janda quiahva ná nduú tå quiahva cáá mé á. <sup>17</sup>Sahá ña cuú mé á jini nu yo sahá ña cán quéa cuu ndique tähán vaha í xihín java ga na cuú cuénta Jesús. Ta ñúchí ndivaha ndique tähán ná cuú cuénta mé á tá cája in in na ña cúní mé á. Ta xihín ña yóho cuu canduu vaha í ta cuu ndindacú chágá yó cuénta mé á ta já cuu quíhví ini tähán í.

## Ña sqá cája í viti

<sup>18</sup>Ña yóho quéa cáxi tühun i xihín ndo. Xícá tähví i nu ndó cuénta Jesucristo, xitoho í ña ná a cája ga ndó cuachi tá quiahva cája ñayivi ñuyíví jáchí coó yahvi toho tá nuú ña ná cuahnu ini na caja na. <sup>19</sup>Mé na cán nandaji xíní túni ná. Ta co cuú ná ná jácacu Ndióxi jáchí náchicají na xíní túni ná nu mé á ta nandaja tähýi na ínima ná. <sup>20</sup>Co cácahan nuú ná jáchí nayahua va quiahva cája na ña ná cuahnu xihín ndinuhu iní na. Ta co sají nuu na nuú yíquí cuñu na tá cúní a caja tá nuú ña ná. <sup>21</sup>Joo tá nandiquehe ndó íchi cuénta Jesús já najáñaha nde ndohó ña ná caxoo ndó nuú cuachi tátuhun ña yóho. <sup>22</sup>Jáchí naxini joho ndó sahá mé á ta nandiquehe ndó tühun ndaq, ña najáñaha nde nu ndo, ña cahán sahá mé á. <sup>23</sup>Sahá ña cán quéa ndítahan nü ndó jácaxoo ndó nu tóco ndihi ña ná cuu násacaja ndó jihna. Jáchí cuachi quéa nacaja ndusa xihín ndó ña ná caja ndó ña ná cuu ta játiví a ndohó sahá

ñā nandiava íní ndó caja ndó ñā nūu, ñā jándahvi ndohó. <sup>23</sup> Xíní ñúhú cacuu ndó na nanduu saá íníma xihin xíní túni sahá ñā cíú ndó cuéntá Jesús. <sup>24</sup> Ta xihin ñā yóho cuu xínu coo ndó cacuu ndó tátuhun ñayivi saá, na cáá tá quiáhva cáá mé á. Ta náhá ñā mé a ndaa táchí cíú ndó ñayivi ndaa, na nandiví nu mé á.

<sup>25</sup> Sahá ñā cán quéa a cáhan ga ndó ñā tuhún. Ñā ndítahan nu ndó caja ndó quéa cáhan ndó ñā ndaa xihin ñani táhan ndó jáchí in nanduu ndihí cuéntá Jesucristo.

<sup>26</sup> Ta tá jáa ndó xihin ñayivi coto a cája ndó cuachi jáchí xíní ñúhú yaha yachi ña xójo ini ndó xihin ná. Ta tá sa nahini sa condítahan ndácaan ga ña xójo ini ndó xihin ná. <sup>27</sup> Ta a quiáhva ndó ñamani nuú tiñahá sacuaha ñā ná caja rí ñā cíui rí xihin ndo.

<sup>28</sup> Ndá na nasaçaja cuíhná jihna coto ná a cája cuíhná ga na viti. Ndítahan caja chúun vaha na ñā ná cuu chindeé na na cámpaní ñaha nuu.

<sup>29</sup> A cáhan ga ndó tuhun nūu. Ñā ndítahan nu ndó quéa chindeé ndó ñayivi xihin tuhun cáhan ndó. Ta já cuu cuahnu na xihin á ñā ná ñehe ná ñamani nu Ndióxi. <sup>30</sup> A cája ndó ñā ná cacuéha íníma yii Ndióxi xihin ndó jáchí mé íníma yii Ndióxi cán quéa náha ñā mé a ndaa cíú ndó cuéntá mé á. Cúu á tátuhun nánaní marca Ndióxi ndohó ñā náha ñā a jándacoo toho a ndohó janda quiáhva ná xínu coo quívi tá chí in ndeeé va jácacu Ndióxi ndohó.

<sup>31</sup> Xíní ñúhú tavá xóo ndó tóco ndihí ñā nūu, ñā co sáhan ñamani nu ndó canduu vaha xihin táhan ndó. Ta co ndítahan jaá ndó xihin ñayivi ta ni co ndítahan cojo ini ndó. Ta co ndítahan cayuhú nu táhan ndó ta ni a cánahá ndó xihin ná. Ñā ndítahan caja ndó quéa tavá xóo ndó mé ndó nu tóco ndihí ñā nūu. <sup>32</sup> Ñā ndítahan caja ndó quéa ná caja vaha xihin táhan ndó ta candahví ini táhan ndó. Ta caja cáhnu ini sahá táhan ndó tá quiáhva nacaja cáhnu ini Ndióxi sahá ndó sahá ñā nacaja Jesucristo sahá ndo.

## 5

### Ñā ndítahan caja na cíú jahyi Ndióxi

<sup>1</sup> Mé ndó cíú ndó jáhyi máni Ndióxi sahá ñā cán quéa ndítahan ndihí ini ndó caja ndó tá quiáhva cája mé á. <sup>2</sup> Xíní ñúhú quiáhvi ini ndó ñani táhan ndó tá quiáhva

nacaja Jesucristo. Naquihví ini a mí ta nandiquiahva mé á quivi a ndica crúxu sahá yo tátuhun in quíti, rí nasañí na joco na nu Ndióxi. Ta mé a ndaa nasaçuu a ñā nacajíi ini Ndióxi xihin.

<sup>3</sup> Co cíui cuni joho i ñā cája ndó cuachi tátuhun tá íin in ñayivi xihin ñajíhi á yíi ñani táhan na á tá cája na ñā nūu xihin yíquí cuñu na á tá chínúu na íníma ná jatá jihuán na. Co ndítahan nu ndó caja ndó ñā yóho jáchí cíú ndó na cíú cuéntá Ndióxi viti. <sup>4</sup> Coto a cáhan ndó ñā nūu ñā coó sahá. Ta ni a ndítuhun jíquí xihin táhan ndó xihin tuhun nūu. Jáchí co cája vaha toho ñā yóho xóho. Ñā ndítahan caja ndó quéa ndiquiahva ndó ndixahvi nu Ndióxi. <sup>5</sup> Jáchí sa cándaa ini ndó ñā ndá na ndúu xihin na co cíú ñajíhi na á yíi ná, á tá cája na ñā nūu xihin yíquí cuñu na á tá cíú ná na chínúu íníma jatá jihuán, mé na cán a néhe táchí toho na cacomí Jesucristo xihin Ndióxi cuéntá sahá ná. Jáchí na chínúu íníma jatá jihuán cíú ná tátuhun na cája cáhnu yoco. <sup>6</sup> A cándusa ndó caja ndó cuachi cája na jan jáchí cíui na jandahvi na ndohó xihin ñā tuhún. Jáchí cíú ná ñayivi saá ini, na jacojo ini Ndióxi. Ta tanda quívi jándoho a ini na cán. <sup>7</sup> Sahá ñā cán quéa co ndítahan ndique táhan ndó caja ndó ñā nūu xihin na jan.

<sup>8</sup> Mé ndó nasañduu ndó nuú naá ndivaha jihna joo sahá ñā in nanduu ndó xihin Jesucristo ndúu ndó nu yéhe viti. Sahá ñā cán quéa ndítahan caja vaha ndó já ná náha ñā mé a ndaa cíú ndó ñayivi mé á, na xíca nu yéhe. <sup>9</sup> Jáchí tóco ndihí na ndúu nu yéhe cája na ndinuhu ñā vaha ta xíca ndacú na íchi cuéntá ñā ndaa. <sup>10</sup> Xíní ñúhú jácuaha ndó caja ndó ñā cájíi ini Ndióxi xihin. <sup>11</sup> A cátáhan ndó xihin ñayivi ndúu nuú naá yávi ta a cája ndó ñā nūu xihin ná, ñā co ndáyahvi. Ñā ndítahan caja ndó quéa jánani ndó na ta náha tuhun ndó sahá ñā nūu cája na. <sup>12</sup> Jáchí chínúu cacahan nuú yo ndítuhun yo sahá ñā cája jehé na jan. <sup>13</sup> Joo tá ná xínu quívi canáhá ndihí ñā cája na jan já cándaa ini tóco ndihí ñayivi ñā nacaja jehé na. Jáchí tóco ndihí ñā ñúhú jehé quee ndihí a nu yéhe. <sup>14</sup> Sahá ñā cán quéa já cachí tuhun Ndióxi já:

Xíní ñúhú ndicáxí inún jáchí cíú tátuhun da quívi tañu na naxihí.

Ta tá ná ndicáxí inún já jándiyehé Jesucristo ínimun já ná a cajún cuachi, cachí tūhun Ndióxi.

<sup>15</sup> Xíní ñúhú candehé vāha ndó ndá quiahva ndítahan caja ndó. A caja ndó tá quiahva caja ñayivi co xímí túñi. Ndítahan cacuu ndó ñayivi ndichí jiní. <sup>16</sup> Xíní ñúhú ndihí ini ndó caja ndó ña cúní Ndióxi jáchí quini ndivaha cása tiempo viti. <sup>17</sup> Coto a caja ndó ña tóntó. Xíní ñúhú ndicari vāha ini ndó sahá ña cúní Ndióxi, xitoho í caja ndó.

<sup>18</sup> A jaxini ndó mé ndó jáchí co caja vāha ña jan xihín ndo. Ña ndítahan caja ndó quéa quiahva ndó ñamani nu Ndióxi ña ná jándicutú a ínima ndó xihín ínima yíi mé á. <sup>19</sup> Ta tá ná ndituhún ndo xíní ñúhú ndinuhu ini ndó caja cahnu ndó Ndióxi, xitoho ndó xihín tūhun cahnu ndó. Xíní ñúhú cata ndó salmo xihín himno xihín canto, ña sáhan ínima yíi Ndióxi nu ndo. Joo xíní ñúhú cacuu a ña quíxi ínima ndó caja cahnu ndó Ndióxi. <sup>20</sup> Níi tiempo ndítahan ndiquiahva ndó ndixahvi nu Ndióxi, tátá yo sahá tóco ndihí ñaha. Ta cahán ndó quívi Jesucristo, xitoho í tá ná caja ndó ña.

### Ña ndítahan caja na sa nətandahq

<sup>21</sup> Ndítahan nu ndó candusa táhan ndó já ná cuu ndicáhnu Ndióxi sahá ña caja ndó.

<sup>22</sup> Ndóhó, naijíhí ndúu yíi ndítahan candusa ndó yíi ndo tá quiahva cándusa ndó Jesucristo, xitoho í. <sup>23</sup> Jáchí yíi ndó cíu dä cómí cuénta sahá ndo tá quiahva cómí Jesucristo cuénta sahá na ndico íchí mé á. Ta tóco ndihí na cíu cuénta mé a cíu ná na ndáca tátuhun yíquí cuñu mé á. Ta mé a quéa jácacu a na nuú cuachi. <sup>24</sup> Tá quiahva caja na cíu cuénta Jesú cándusa na ña sáhndá mé a nu ná quiahva já ndítahan caja naijíhí ndúu yíi. Xíní ñúhú caja ndihí na ña cúní yíi na caja na.

<sup>25</sup> Ta ndóhó, dä ndúu náijsíhí, xíní ñúhú quihví ini ndó na tá quiahva naquihví ini Jesucristo na cíu cuénta mé a tá naxihí a sahá ná. <sup>26</sup> Nacaja Jesucristo ña yóho jáchí cúní mé a ña ná nduu na cíu cuénta mé a ñayivi vií sahá ña nandoo na xihín ticuifí ta sahá ña sácu vāha na ña cachí tūhun Ndióxi. <sup>27</sup> Sahá ña cán quéa cuu cayati na nu Ndióxi sahá ña cíu ná ñayivi vií cuénta mé a, na naquee vāha xihín ña níu, na co jácaquini mé xihín cuachi. Ta viti cíu ná ñayivi yíi nu mé a jáchí co caja ga na cuachi.

<sup>28</sup> Ndítahan nuú in dataa quihví ini da náijsíhí

dä tá quiahva quihví ini da yíquí cuñu da jáchí in nanduu na. Tá quihví ini da náijsíhí da já quéa quihví ini da mé dä. <sup>29</sup> Jáchí ni in tūhún toho ñayivi co cándají na yíquí cuñu na. Ña caja na quéa sáhan na ña cuxu a ta ndáá vāha na ña ta quiahva já ndáá Jesucristo na cíu cuénta mé á. <sup>30</sup> Jáchí tóco ndihí mí, na cíu cuénta Jesú cíu yó java na ndáca yíquí cuñu mé á. <sup>31</sup> Sahá ña cán quéa cachí tūhun Ndióxi já: “Tá ná tandaha in dataa já ndítahan quee xóo da nu tátá náná da já ná ndique táchan da coo da xihín náijsíhí da. Ta já ná nduu ndíví na tátuhun in tūhún jiní ñayivi”, cachí tūhun Ndióxi. <sup>32</sup> Mé a ndaa yáncá ndivaha cándaa iní tóco ndihí ña yóho. Joo náha nu yo ndá quiahva cíu yó tátuhun yíquí cuñu Jesucristo tá in nanduu xihín á. <sup>33</sup> Xíní ñúhú ndicuhun ini ndó ña ndítahan quihví ini in in ndó náijsíhí ndo tá quiahva quihví ini ndó mé ndó. Ta jári ndóhó, naijíhí xímí ñúhú caja cahnu ndó yíi ndo.

## 6

<sup>1</sup> Ndóhó, na valí xihín na tacú, xíní ñúhú coo joho ndó nu sáhndá tátá náná ndo chuun nu ndo. Jáchí ña yóho quéa cúní Ndióxi caja ndó. <sup>2</sup> Xíní ñúhú caja cahnu ndó tátá ndo ta caja cahnu ndó náná ndo jáchí jihna ñúhú nasahnda Ndióxi ña yóho nu yó caja í. Ta jatá ña yóho nasahñan mé a tūhun a nu yo tá cachí a já: <sup>3</sup> “Tá ná cajún ña yóho já cuahnu yatún ta quixi cuahá na vāha nuun.”

<sup>4</sup> Ta ndóhó, na ndúu jahyi, a jácojo ndó ini jahyi ndó. Ña ndítahan caja ndó quéa jánahá vāha ndó nu ná ña ndítahan caja na. Ta jánahá ndó nu ná ndá quiahva caca na íchí cuénta Ndióxi, xitoho í.

<sup>5</sup> Ta ndóhó, na naxeen na caja chúun nu ná xíní ñúhú coo joho ndó nu cahnu xitoho ndó, na cómí cuénta sahá ndo ñuyíví yóho. Ta ndítahan caja cahnu ndó na ta cayihví ndó na. Joo xíní ñúhú caja ndó ña xihín ndinuhu ini ndó jáchí cíu á tátuhun caja chúun ndó nuú Jesucristo.

<sup>6</sup> Ndítahan nu ndó caja chúun vāha ndó nu ná ta a juú tá ndita cuití na sándezhe na nu caja chúun ndó sahá ña cúní ndó candoo vāha ndó nuú na cán, vāha. Ndítahan caja chúun ndó xihín ndinuhu ini ndó nuú xitoho ndó jáchí cíu á tátuhun caja chúun

ndó nuú Jesucristo. Sahá ña cán quéa ndítahan caja ndó ña cúní Ndióxi xihín ndinuhu ini ndó. <sup>7</sup>Xní ñúhú cajii ini ndó ta ndinuhu ini ndó tá cája chúun ndó. Ta ndítahan caja ndó cuénta ña cája chúun ndó nu Ndióxi ta co cája chúun ndó nuú ñayivi cuití va. <sup>8</sup>Jáchí sa cándaa ini ndó ña vaxi quívi xinu yó nuú Jesucristo, xitoho í ndiquehé yahví sahá ña vaha nacaja í ñuyíví yóho. Ta coó caja toho a á cíu yó xitoho á cíu yó na cája chúun nuú xitoho.

<sup>9</sup>Ta jári ndóhó va, na cíu xitoho mozo naxeen ndó jan ndítahan nu ndó caja vaha ndó xihín ná ta co ndítahan jayihví ndó na xihín tūhun cahán ndó xihín ná. Ndítahan ndicuhun ini ndó ña ín Jesucristo indívi ta cíu á xitoho mé ndó ta sa mé á cán cíu xitoho na cája chúun xihín ndó. Ta co sáhní toho a cán mé á sahá ndá ñayivi ín chágá saha a juú ga inga na jáchí in cíu ndihí nu mé á.

*Ndaja caja í quee vaha í xihín ña quini*

<sup>10</sup>Ta viti xíní ñúhú caja ndacú ndó mé ndó xihín ndéé cahnu Jesucristo, xitoho í jáchí in nanduu ndó xihín mé á viti. <sup>11</sup>Xní ñúhú caja chúun ndó xihín tóco ndihí ndéé sáhan Ndióxi nu ndó já cíu quee vaha ndó xihín tiñáhá sacuahá tá cúní rí jándahví rí ndóhó. <sup>12</sup>Jáchí a juú xihín ñayivi, na ín yiquí cuñu cání táhan í, vaha. Ña cání táhan í xihín cíu tátó tiñáhá sacuahá, rí xíca nuu nu táchi indívi ta rí cán cíu rí rí cómí cuénta sahá ñayivi ndíu nuú naá yávi ñuyíví yóho. <sup>13</sup>Sahá ña cán quéa xíní ñúhú caja chúun ndó xihín tóco ndihí ndéé sáhan Ndióxi nu ndó já quéa ná cíu quee vaha ndó xihín rí quini ta ná xínu rí caní táhan rí xihín ndó. Ta xihín ña yóho cíu candita ndacú ndó tá sa nandhi naçani táhan ndó xihín ri. <sup>14</sup>Ta candita ndacú ndó xihín ña ndaa ña sáhan Ndióxi nu ndó jáchí cíu á tátuhun in cinturón pañi tixi sáhan ndéé ndácaan tóco ndó. Ndicuhun ini ndó ña cíu ndó ñayivi ndaa nu Ndióxi. Sahá ña cán quéa cíu á tátuhun ndíxi ndó cotó caa.

<sup>15</sup>Xní ñúhú canduu tiahva ndó cahán ndó tūhun vaha sahá Jesús xihín ñayivi jáchí tūhun yóho quéa cája ña ná coo vaha ini na xihín Ndióxi. Sahá ña cán quéa cíu á tátuhun yíhi ndó tūhun Ndióxi. <sup>16</sup>Xní ñúhú candeé ini ndó Ndióxi já quéa ná cíu quee vaha ndó caji nuu ndó nuú ña ná cúní tiñáhá sacuahá chindahá rí nu ndó. Sahá ña

cán quéa cíu á tátuhun ñéhe ndó in caa jándá ña chícájí a ndohó. Ta xihín mé ña yóho cuu candaji nuu nu ndó nuú ña ñéhe ñuhú ita jácana mé rí cán nu ndo. <sup>17</sup>Ndicuhun ini ndó ña najácacu Ndióxi ndohó nuú cuachi sahá ña cán quéa cíu á tátuhun ñuhú ndó yíjiní caa. Tá ná cahán caxí ndó tūhun sáhan ínima yíi Ndióxi nu ndó já quéa cíu á tátuhun ñéhe ndó machiti, ña cíu tūhun Ndióxi. <sup>18</sup>A jándacoo ndó caa tähví ndó nu Ndióxi. Ní tiempo xíní ñuhú caa tähví ndó nu mé á. Joo ndítahan caa ndó ña jánahá ínima yíi mé á nu ndo caa ndo. Xní ñuhú canduu tiahva ndó ta a cává ini ndó ta xíní ñuhú caa tähví ndó sahá tóco ndihí na cíu cuénta Ndióxi. <sup>19</sup>Ta caa tähví ndó nu Ndióxi sahá mí i viti já ná chindéé Ndióxi yehe cahan í xihín ñayivi tūhun mé á ta caa tähví ndó nu á ña ná quiahva mé á ndéé a nuú ijá ná cíu cahán i tūhun mé á ña coó nasaxíni na jihna, nduu. Jáchí ña yóho quéa cuu jácacu a na nuú cuachi. <sup>20</sup>Ndióxi quéa nachindahá a yehe cuuhun i cahán i tūhun yóho ta sahá ña xíca i cahán i tūhun yóho ndácaan i vecaa viti. Caça tähví ndó sahá i já ná a cayihví i cahán i sahá Jesús nuú ñayivi ndíu yóho tá quiahva ndítahan nuú i caja i.

*Ndíndayí Pablo ñayivi, na cíu cuénta Jesús*

<sup>21</sup>Ñani máni yo, dä naní Tíquico mé a ndaa cíu dá da chindéé táhan xihín i chuun Jesucristo, xitoho í. Ta mé dá cán cañehe da tūhun sahá i tá ná saa dä nu ndo já ná cándaa ini ndó ndátahví yáha i. <sup>22</sup>Sahá ña cán chindahá i dä nu ndo já ná caxí tūhun da nu ndó ndá quiahva yáha ndé ndíu ndé yóho ta xihín ña yóho ná cíu quiahva ndítahan tūhun ndéé ini ndó.

<sup>23</sup>Ña cúní quéa ná caja Ndióxi, tátá yo xihín Jesucristo, xitoho í ña ná coo vaha ini tóco ndihí ndó, na cíu cuénta Jesús. Ta ná caja mé a ña ná quihví ini táhan ndó sahá ña candeé ini ndó mé á. <sup>24</sup>Ta ná jándicutú ndaa mé a ñamani jata tóco ndihí na quihví ini Jesucristo, xitoho í xihín ndinuhu ini na. Já ná coo.

## Carta nachindahá Pablo nuú na cíú cuéntá Jesús ndúu ñuu Filípos

*Carta nacahyí Pablo nuú na cíú cuéntá Jesús ndúu ñuu Filípos nani násqndacan da vecaa*

<sup>1</sup> Yéhe cíú Pablo ta cája chúun i xihín Timoteo cuéntá Jesucristo. Ta cáhyí nde carta yóho nu tóco ndihni na cíú cuéntá Jesús, na ndúu ñuu Filípos jáchí in nanduu na xihín Jesucristo. Ta cáhyí ri nde carta yóho nuú na sacuahá nuú na cíú cuéntá Jesús xihín nuú na chíndeé mé na sacuahá veñuhu. <sup>2</sup> Xíca tahví i nu Ndióxi, tátá yo xihín nuú Jesucristo, xitoho í ña ná caja cuahá mé á ñamáñi xihín ndo ta ná caja mé á ña ná coo vaha ini ndó.

*Xíca tahví Pablo nu Ndióxi sahá na cíú cuéntá Jesús*

<sup>3</sup> Ndíquahva ndivaha i ndixahvi nu Ndióxi tá ndícuahun ini i sahá ndó. <sup>4</sup> Nií tiempo tá xíca tahví i nu Ndióxi saha ndihí ndo cájii ini i. <sup>5</sup> Jáchí janda tá nandiquehe ndó íchi cuéntá Jesús ta janda viti nachindeé ndó yéhe cáhan i tuhun Ndióxi xihín ñayivi. <sup>6</sup> Nacasáhá Ndióxi cája ña ná nduu ndó ñayivi ndaa nu mé á ta xíni vaha i ña jaxinu coo a ña janda quiaghva ná xinu coo quíví quixi tucu Jesucristo ñuyíví yóho. <sup>7</sup> Cája i cuénta vaha ndivaha va ndíquahva i ndixahvi nu Ndióxi saha ndo jáchí mé a ndaa quíhví ndivaha ini i ndohó. Tá quiaghva cája Ndióxi ñamáñi xihín i quiaghva já cája ri a ñamáñi xihín mé ndó. Ta coó caja toho a tá ndácaan i vecaa. Ta coó caja toho a tá ná ndiquehe vaha i sahá tuhun Ndióxi nuú na jutixia á tá caxi tuhun i xihín ñayivi ña mé a ndaa cíú á tuhun Ndióxi, ña cíú jácacu ñayivi. <sup>8</sup> Ta cándaa caxí ini Ndióxi ña quíhví ndivaha ini i ndohó tá quiaghva quíhví ini Jesucristo ndohó. <sup>9</sup> Xíca tahví i nu Ndióxi ña ná xinu ini ndó quíhví chágá ini ndó ñayivi. Ta ná ndindichí chágá jini ndó ta ná coo chágá xím túni ndó. <sup>10</sup> Já ná cuu caxi ndó ña vaha chágá nií tiempo ta xihín ña yóho cacuu ndó ñayivi ndaa, ná co ndójó cuahí tám ná xinu quíví quixi tucu Jesucristo. <sup>11</sup> Ndítahan caja ndó ña vaha xihín ndinuhu ini ndó

jáchí xihín ña yóho jánahá ndó nuú ñayivi ña mé a ndaa cíú ndó cuéntá Jesús ta xihín ña yóho ndicáhnu ndivaha Ndióxi.

*Ná caja i ña cúní Jesucristo xihín ndinuhu ini i*

<sup>12</sup> Candehé ndó, ñani mí i, na cíú cuéntá Jesús. Cúní ña ná candaan ini ndó ña ndóho i vecaa yóho. Mé a ndaa sahá ña ndácaan i vecaa yóho naxini joho cuahá chágá ñayivi tuhun vaha sahá Jesucristo. <sup>13</sup> Tóco ndihi soldado, ná ndúu vehe rey yóho xihín java ga ñayivi sa cándaa ndihi ini na ña ndácaan i vecaa sahá ña ndíco i íchi cuéntá Jesucristo. <sup>14</sup> Ta sahá ña nacandaan ini cuahá na cíú cuéntá Jesús ña ndácaan i vecaa yóho, nandindeé ini na caca nuu na cahan na tuhun Ndióxi xihín ñayivi ta co yíhví na caja na ña jáchí cández cahnu chágá ini na Ndióxi viti.

<sup>15</sup> Mé a ndaa ndúu java na xíca nuu cáhan tuhun Ndióxi nuú ñayivi sahá ña cahíhví cuití ini na. Ta java na cája na ña jáchí cúní na cayojo na nuú i. Joo mé a ndaa java na cáhan na tuhun Ndióxi sahá ña cúní na caja na ña vaha. <sup>16</sup> Joo java na cáhan na tuhun Ndióxi sahá ña vaha mé cuití va na ta co cája na ña xihín ndinuhu ini na. Ña cúní na caja na queá jáquihví chágá na yéhe nani ndácaan i vecaa yóho. <sup>17</sup> Joo mé a ndaa java na cáhan na sahá Jesucristo jáchí quíhví ndusa ini na yéhe ta sa cándaa ini na ña násacu Ndióxi yéhe yóho ña ná ndiquehe e sahá tuhun vaha cáhan sahá Jesucristo. <sup>18</sup> Joo co sáhní toho i mí i ndá sahá cája na ña jáchí cájii ini i tá cáhan na sahá Jesucristo nuú ñayivi. Ta cájii chágá ini i <sup>19</sup> jáchí cándaa ini i ña quee vaha i nu tóco ndihí ña ndóho i yóho sahá ña chíndeé ínimá Jesucristo yéhe ta sahá ña xíca tahví ndó nu Ndióxi sahá i. <sup>20</sup> Cández ini i ña a cándoo níu i. Ta ndáti tighva i chíndeé Ndióxi yéhe já ná cuu cahan i sahá Jesucristo nuú ñayivi. Xihín ña cáhan i yóho jánahá i ndá quiaghva cáhuu cíú Jesucristo. Ta co cája toho a á tacú u a naxihí i jáchí caja cáhuu tá caja cáhuu i Jesucristo. <sup>21</sup> Ta nani tacú u fin i ñuyíví yóho cája cáhuu i Jesucristo xihín ndinuhu ini i. Ta tá ná quivi i já vaha chágá ví jáchí cuhun i coo i xihín mé á. <sup>22</sup> Ta co cándaa ini i ndía vaha chágá jáchí tá ná catacu u já cuu ñehe chágá ímí i cahan i sahá Jesucristo xihín ñayivi. <sup>23</sup> Ivi joho cáhví ini i ña á vaha chágá ná catacu u á vaha

chágá ná quiivi i. Jáchí tá ná quiivi i ivi laá xínu coo i coo i xihín Jesucristo. Ta vaha chágá ná cuhun i coo i cán a juú ga ña ná coo i ñuyíví yóho. <sup>24</sup> Joo sahá mé ndó xíní ñúhú coo tóo chágá i ñuyíví yóho. <sup>25</sup> Ta viti cándaa vaha ini i ña coo chágá i ñuyíví yóho ña ná chindeé e ndohó catiāhva chágá ndó tuhun Ndióxi já ná cajii chágá ini ndó sahá ña cández ini ndó mé á. <sup>26</sup> Sahá ña cán quéa cuu cajii ini ndó sahá ña coo tucu u xihín ndó ta cuu caja cáhnu ndó Jesucristo sahá ña yóho.

<sup>27</sup> Cúni ña ná ndihí ini ndó caja ndó tá quiāhva cächí tuhun vaha cáhan sahá Jesucristo. Já quéa tá ná sáa i á tá ná a sáa toho i coto nihni i ndohó cúní ñehé e tuhun ña in cíu ndihí ndó ta ndúu ndacú ndó cuéntá Ndióxi. Ta cúní ñehé e tuhun ña in cíu ndó ndúcú ndéé ndó cáhan ndó tuhun vaha sahá Jesucristo nyú ñayivi ña ná candéé ini na mé á. <sup>28</sup> Ta coto a quiāhva ndó ñamani nyú na ihví ndó jan ña ná jayihví na ndohó. Jáchí xihín ña yóho cándaa ini na cán ña xíca na cuahán na nyú ndihí sahá ná. Joo mé ndó cándaa ini ndó ña xíca ndó íchi nyú cacu ndaa ímima ndó caja Ndióxi. <sup>29</sup> Jáchí sahá ña nacaja Jesucristo ñehé táhví ndó candéé ini ndó mé á. Ta quiāhva já ñehé táhví ri ndó ndohó ini ndó sahá ña cández ini ndó mé á. <sup>30</sup> In nyú ndohó iní sahá Jesucristo. Sa naxini ndó ndá quiāhva ndohó ini i jihna. Ta sa ñehé ndó tuhun ndá quiāhva ndohó ini i viti.

## 2

### Nanduu Jesucristo ñayivi vatí cíu á Ndióxi

<sup>1</sup> Xíni vaha i ña sáhan Jesucristo tuhun ndeé ini ndó ta quihví ini a ndohó. Xíni vaha i ña in nanduu ndó jáchí ndácaan ímima yíi Ndióxi ini ímima ndó. Xíni vaha i ña quihví ini táhan ndó ta tähndá ini sahá táhan ndó. <sup>2</sup> Sahá ña cán quéa ndítahan caja ndó ña ná cajii ndiváha ini i sahá ña in cíu ndihí ndó ta sahá ña quihví chágá ini táhan ndó. Ta sahá ña in nanduu ndó nacaja ímima yíi Ndióxi já in nanduu xíní túni ndó nyú ña cúní ndó caja ndó. <sup>3</sup> Coto a ndúcú cuachi xihín táhan ndó. Ta coto a ndíñiehe jíco ndó mé ndó. Ndítahan coo ndisáhnu ini ndó. Ta ndítahan cáhan ndó ña cáhnu chágá inga ñayivi a juú ga mé ndó. <sup>4</sup> Ta co ndítahan ndihí ini ndó sahá ña vaha mé ndó cuití va. Xíni ñúhú ndihí ri ini ndó sahá ña vaha inga na.

<sup>5</sup> Xíní ñúhú cáhnu ini ndó tá quiāhva násacahvi ini Jesucristo. <sup>6</sup> Jáchí tá quiāhva íin Ndióxi quiāhva já íin Jesucristo. Ta vatí cíu á Ndióxi joo coó nandaja cáhnu a mé á vatí cuu caja ña, nduu. <sup>7</sup> Ña nacaja Jesucristo quéa násacu xóo a tóco ndihí ña cáhnu cíu mé á cán ta naquixi a násacu a ñuyíví yóho tá quiāhva cácu ñayivi. Ta násacuu a in dataa, dä caja chíun cuénta xitoho da. <sup>8</sup> Tá nandihí nanduu a ñayivi já najánuu a mé á jandá quiāhva násahan mé á quiivi a ndíca crúxu nyú naxili a tátuhun dä caja cuachi quini. <sup>9</sup> Sahá ña cán quéa najándindita jíco ndiváha Ndióxi Jesucristo ta násahan in quiivi á nu á ta quiiví Jesucristo yóho quéa cáhnu chágá nu tóco ndihí quiivi. <sup>10</sup> Sahá ña cán quéa tóco ndihí na ndúu indívi xihín na ndúu ñuyíví curi joho na quiivi Jesucristo ta já ndaca xítí na nu á. Ta jandá na ndúu tixi ñúhú ndaca xítí na nyú Jesucristo ña caja cáhnu na mé á. <sup>11</sup> Anda jáví cáhan in in ña cán ña cíu Jesucristo xitoho na ta xihín ña yóho ndicáhnu ndiváha Ndióxi, tátá yo.

*Ná cíu cuéntá Jesús cíu ná tátuhun ñúhú, ña jándiyehé ñuyíví yóho*

<sup>12</sup> Candéhéh ndó nani mí i, ná cíu cuéntá Jesús. Tá quiāhva nacandusa ndó caja ndó ña násahnda i ñu ndó tá násahiin i tañu ndó jan quiāhva já ndítahan candusa chágá ndó yehe viti nani íin xíca i nu ndó. Xíni ñúhú ndihí ini ndó caja ndó ña cúní Ndióxi jáchí najácau a ndohó. Ta xíní ñúhú cayihví ndó Ndióxi nani cája cáhnu ndó a xihín ndinuhi ini ndó. <sup>13</sup> Jáchí Ndióxi quéa cája ña xíca ini ndó cája ndó ña vaha ta chíndeé a ndohó cája ndó ña táhan ini mé á xihín.

<sup>14</sup> Ta a cáhan cuachi ndó sahá tóco ndihí ña cája ndó. Ta ni a ndítuhun ihví xihín táhan ndó. <sup>15</sup> Já ná naha ña cíu ndó ñayivi vií, ná coó cuachi. Ndítahan caja ndó tá quiāhva cája ná cíu jahyi Ndióxi, ná co cáquini xihín cuachi ña cája ñayivi quini cuénta ñuyíví yóho. Cíu á tátuhun ndíyihví ndaa ndó xihín ña vaha cája ndó tá quiāhva ndíyihví ndaa quimi indívi. <sup>16</sup> Jáchí cáhan ndó tuhun vaha sahá Jesucristo nyú ñayivi já ná cuu catacu na anda ama cáa quiivi. Tá ná caja ndó ña yóho já quéa cajii ini i xihín ndó tá ná xínu quiivi quixi tucu Jesucristo. Jáchí xihín ña yóho candaas ini i ña a juú ña uun násacuu chuun nacaja i.

<sup>17</sup> Ta vatí ná ndiquiahva i mí i quiivi i sahá

ndo joo cajii tá cajii ini i. Jáchí tá ná quiví i cuú á tátuhun cáthán i xihín ña joco ndó nu Ndióxi sahá ña cándezini ndó mé á. Ta sahá ña yóho cajii ini i ta in nuú cajii ini ndihí.<sup>18</sup> Sahá ña cán quéa ndítahan cajii ini mé va ndó já ná cajii ini ndihí.

Sácu ini Pablo chindahá dä Timoteo xihín Epafradio nuú nañuu Filípos

<sup>19</sup> Ta cúní Jesucristo, xitoho í chindahá yachí i Timoteo nu ndó ña ná cañehe da tuhun sahá ndó nuú i. Anda jáví cajii ini i tá ná candaá ini i sahá ndó. <sup>20</sup> Mé a ndaa quíhví ini da ndohó ta coó ga inga da níhu ini sahá ndó tá quiahva níhu ini yehe sahá ndó. <sup>21</sup> Jáchí java ga na cuú cuéntá Jesús ndícani ini na sahá ñaha mé va na ta co ndícani ini na sahá ñaha cuéntá Jesucristo. <sup>22</sup> Joo sa xíní ndó ña cuú Timoteo taa vaha ndivaha ta sa cándaa ini ndó ndá quiahva chíndeé da yehe nuú xíca i cáhan i tuhun Ndióxi xihín ñayivi. Cuú dá tátuhun jahyi i jáchí chíndeé cuahá da yehe. <sup>23</sup> Sahá ña cán quéa sácu ini i chindahá i da nu ndó tá sa nacandaá ini i ndaja cása sahá i. <sup>24</sup> Ta cándezini i ña quiahva Ndióxi ñamani nuú i sahá yachí mé ví coto niñhi i ndohó jan.

<sup>25</sup> Cája i cuéntá xíní níhu chindahá i ñaní Epafradio ña ná ndicó coo tuco da nu ndo jáchí mé ndó nachindahá ndó da nuú i ña ná chindéé da yehe. Ta mé a ndaa cuahá ndivaha nachindeé da yehe janda quiahva nandoho ini da xihín i. <sup>26</sup> Joo viti xíca ndivaha ini da cuni ndihí da ndohó. Ndícani ini da sahá ndó jáchí ña chindahá ndó tuhun ña sa naquihví da. <sup>27</sup> Ta mé a ndaa nandoho da cuehe ta jalóho quiví da, nduu. Joo nacaja Ndióxi ñamani xihín da ta já nandivaha da. Ta xihín ña yóho nacaja ri mé á ñamani xihín yehe ña ná a cácuéha chágá ví ini i jáchí sa ín cuahá ña ndohó i viti. <sup>28</sup> Sahá ña cán quéa chindahá númí i da ña ná saa quíí dá nu ndó já ná cajii ini ndó cuni tuco ndó da ta xihín ña yóho ndivaha ri ini yehe va. <sup>29</sup> Ndítahan cajii ini ndó ndiquehe ndó da jáchí cuú dá ñani ndó da cuú cuéntá Jesús. Ta ndítahan coo toní níhu ndó xihín tóco ndihí na cája tá quiahva cája mé dá. <sup>30</sup> Jáchí mé a ndaa jalóho quiví da sahá chuun nacaja da cuéntá Jesucristo. Cuahá ndivaha tondóho naquixi nu dá sahá ña nachindeé da yehe jáchí nacaja mé dá ña a cuú caja mé ndó yóho sahá i.

Ña ín chágá sahá nu Ndióxi

<sup>1</sup> Candehe ndó ñani mí i, na cuú cuéntá Jesús. Xíní níhu cajii ini ndó xihín ña cája Ndióxi. Co cája toho a nu mí i cáhyí iví tuco u ña sa nacahyí i nu ndó jihna jáchí chíndeé a ndohó. <sup>2</sup> Cuéntá coo ndó xihín ñayivi quini, na xíca cája ña nuú jan. Jáchí jána ha ña ndítahan cahnda ndó yiquí cuñu ndó ña ná chícaqan ndó marca yiquí cuñu ndó já ná cacuu ndó cuéntá Ndióxi. <sup>3</sup> Joo mí co cándezisa i ña cuú yó cuéntá Ndióxi sahá ña sáhndá yo yiquí cuñu í vatí mé a ndaa cuú yó tátuhun na naquihvi marca yiquí cuñu sahá ña cája cáhnu í Ndióxi jáchí ndácaqan íníma yíl mé á ini íníma yo. Ta viti cájii ini yo sahá ña cuú yó cuéntá Jesucristo. Co cándezini ña cája i <sup>4</sup> vatí mí i cuu cachi i ña cándezini i ñaha nacaja i, nduu. Jáchí nasacaia i ña cachí ley xihín ndinuhu chágá ini i a juú ga inga na. <sup>5</sup> Jáchí tá nañinu una quiví nacacu u já náchicqan na marca jan yiquí cuñu i. Ta mí i cuú u da Israel, da naquixi chichí Benjamín. Ta tátá náná i naquixi na chichí Israel ta cáhan nde tuhun hebreo. Ta nañandico i táhan da cuú fariseo, da sácu vaha ley Moisés. Ta nacaja i tóco ndihí ña nañahnda ley Moisés. <sup>6</sup> Nasandico cáhnu ndivaha i íchi cuéntá na fariseo cán sahá ña cán quéa nacásáhá nandicuita i cája xíxi i xihín na cuú cuéntá Jesús. Xihín ndinuhu ini i nacaja i tóco ndihí ña cachí ley sahá ña cán quéa ni in na coó nacuu chícaqan na cuahí jatá i sahá ley Moisés. <sup>7</sup> Tóco ndihí ña yóho nañacuu a ña náhnu ndivaha nuú i. Joo viti coó sahá ga ña cán nuú i jáchí nacásáhá cándezini i Jesucristo. <sup>8</sup> Ta mé a ndaa yahvi chágá ña cándezini i Jesucristo a juú ga tóco ndihí ña nacaja i jihna. Sahá ña cúní candaá chágá ini i sahá Jesucristo, xitoho i sahá ña cán quéa nañádacoo i tóco ndihí ña nacaja i cán. Ta tóco ndihí ña cán cuú á tátuhun xéhe ta coó sahá toho a nuú i viti jáchí cúní candico chágá i Jesús. <sup>9</sup> Ta cúní cacuu u in da in ná nduu xihín Jesucristo. Joo co ndáti i nduu ndaa i nu mé á sahá ña sácu vaha i ley Moisés jáchí xíní vaha i ña cája Ndióxi ña ná nduu ndaa i nu mé á sahá ña cándezini i Jesucristo cuití va. <sup>10</sup> Ña cúní quéa candaá chágá ini i sahá Jesucristo. Ta cúní ña ná chutú ndaa íníma i xihín ndéé Ndióxi, mé ndéé ña nacaja ña nañditacu tuco Jesucristo. Ta cúní ndoho

ini i tá quiāhva nandoho ini mé á tá naxihi a ndica crúxu. <sup>11</sup>Já quéa ndáti i xínu coo quiví nditacu u tá ná nditacu na sa naxihi.

*Ndítahan nducú ndéé yo janda quiāhva ná xínu coo i ndiquehé ña quiāhva Ndióxi nu yo*

<sup>12</sup>Có cúní cache i ña sa naquee vaha vi. Ni co cúní cache i ña sa naxihi coo i cútú u in taa ndaa tátuhun cúní Ndióxi. Na cája i quéa ndíhi ini i jaxihi coo i cacuu u in da cája tá quiāhva cúní Jesucristo jáchi sahá ña cán najácacu a yehe. <sup>13</sup>Candehé ndo ñani i, na cútú cuéntá Jesús. Co cúní cache i ña sa nanduu u tá quiāhva cúní mé á. Ña cája ndusa i quéa ndindójó i sahá ña násacaia i jihna ta ndíhi ini i jaxihi coo i cája i ña sácú ini Ndióxi caja i. <sup>14</sup>Já caja i janda quiāhva ná xínu coo i ndiquehe e ña sácú ini Ndióxi quiāhva nuú i sahá ña nacaja Jesucristo. Jáchí cána Ndióxi yehe cuhun i coo i indív xíhiñ mé á.

<sup>15</sup>Tóco ndihi mé ndó, na sa nandindacú xíhiñ ña cández ini ndó Ndióxi, xíní ñúhú cahvi ini ndó tá quiāhva cahvi ini yehe. Ta tá co cahvi ini ndó tá quiāhva cahvi ini yehe já quéa jándiyéhe Ndióxi xíní túni ndó ña ná cajii ini ndó xíhiñ á. <sup>16</sup>Joo ndítahan nu yo caja i ña ndaa, ña coó nájandacoó i cája i andá viti.

<sup>17</sup>Candehé ndo ñani i, na cútú cuéntá Jesús. Ndítahan candehé ndo ndá quiāhva caja yehe ña ná caja ndó ña. Ta ndítahan candehé ndo ndá quiāhva caja java ga na sa nájáhá nde jáchi nácatiāhva na cája na tá quiāhva caja mé nde. <sup>18</sup>Sa cuahá ndiváha tañu nácati i ña yóho xíhiñ ndó ta viti táchí ticiúi nuú i cahán tucu u ña xíhiñ ndo. Ndúu cuahá ñayivi ta cahí na cútú ná cuéntá Jesús joo caja na tátuhun na co cández ña naxihi Jesucristo ndica crúxu.

<sup>19</sup>Joo vaxi quiví ndihi sahá ná andá ama cása quiví sahá ña níu caja na jáchi a juú quiāhva ndíhi ini ná sahá ña xíxi na. Ta ndínehe jíco ná mé ná sahá ña níu caja na ta chí coó a cácahan nuú ná. Náha nuyíví yóho cuití va cahvi ini na sahá. <sup>20</sup>Joo mí cútú yó ñayivi cuéntá Ndióxi, na canduu indív xíhiñ mé á. Ta ndáti táchí i ña quixi Jesucristo, xitoho í chí indív, mé á jácacu mí. <sup>21</sup>Ta ndijama mé á yiquí cuñu í, ña nácatiá já ná nduu a tátuhun yiquí cuñu mé á jáchi cahnu ndiváha cútú á. Ta ndijama mé á mí xíhiñ ndéé a jáchi mé á sáhndá chuun nu tóco ndihi ñáha xíhiñ ndéé á.

*Xíní ñúhú cajii ini ndó xíhiñ ña cája Ndióxi xíhiñ ndo*

<sup>1</sup>Candehé ndo ñani mí i, na cútú cuéntá Jesús. Xíca ndiváha ini i cuni i ndohó jáchi quíhví ini i ndohó. Ta cája ndiváha ini i xíhiñ ndo jáchi co cácahan nuú i sahá ndo. Cuni ña ná candico ndacú ndo chí cuéntá Jesucristo, xitoho í.

<sup>2</sup>Xíca táchí i nu Evodia xíhiñ nu Síntique ña ná ndique táchan vaha na jáchi in quíhví cútú ná cuéntá Jesús. <sup>3</sup>Ta xíca táchí i nu mún, da cája chúun tuun xíhiñ i ña ná cajún ñamani cahún xíhiñ ndívi quiāhva i jan ña ná ndique táchan máni ná. Jáchí ndívi na jan náchindeé cuahá na yehe tá náxica nuu i nácahan i tuhun Ndióxi, mé tuhun cútú jácacu ñayivi. Ta quiāhva já náchindeé ri ñaní, da naní Clemente yehe. Ta java ga da cútú cuéntá Jesús náchindeé táchan na xíhiñ i. Sa ndáva quiví ná nu libro nu ndáa quiví tóco ndihi na catacu andá ama cása quiví.

<sup>4</sup>Níi tiempo ndítahan cajii ini ndó xíhiñ ña cája Ndióxi xíhiñ ndo. A sa xíní joho ndó. Níi tiempo ndítahan cajii ini ndó. <sup>5</sup>Ta xíhiñ ña yóho cández ini tóco ndihi ñayivi ña cútú ndó ñayivi vaha ini. Sa nácati quiví quiví tucu Jesucristo, xitoho í.

<sup>6</sup>A ndícani náhá ini ndó sahá ni in ñáha. Ña ndítahan caja ndó quéa caca táchí ndo nu Ndióxi níi tiempo ta ndicani ndó nu mé á ndaja cása ña ndohó ndó. Caca táchí ndó nu á ta a ndindójó ndo ndiquiahva ndó ndixahvi nu mé á. <sup>7</sup>Andá já caja Ndióxi ña ná coo vaha ini ndó ta cahnu chágá ña yóho a juú ga tóco ndihi ña cuu cández ini ñayivi. Ta tá ná caja Ndióxi ña ná coo vaha ini ndó já quéa chindeé a ndohó já ná ndindacú ñimá ndo xíhiñ xíní túni ndo sahá ña in nanduu ndo xíhiñ Jesucristo.

*Xíní ñúhú cahvi ini ndó caja ndó ndinuñu ña vaha*

<sup>8</sup>Jandá ña yóho cuití va cúní cahán i xíhiñ ndo, ñani i, na cútú cuéntá Jesús. Xíní ñúhú cahvi ini ndó sahá ña ndaa ta sahá ña cuu coo toní ñúhú ndó xíhiñ. Ta xíní ñúhú cahvi ini ndó sahá ndaja caja ndó ña ndaa. Ta xíní ñúhú cahvi ini ndó sahá ñáha vií. Ta xíní ñúhú cahvi ini ndó sahá ñáha cuu cajii íñi ñayivi xíhiñ, ña cuu cahán vaha na sahá. Ta xíní ñúhú cahvi ini ndó sahá ña vaha cuu caja ndó ña ná cuu caja cahnu ñayivi Ndióxi sahá.

<sup>9</sup>Caja ndó tócó ndihi ña najánaha i nu ndó caja ndó. Ndítahan caja ndó ña naxini joho ndó nacahen i xihín ña naxini ndó nacaja i. Ta ná coo Ndióxi xihín ndó ta mé á quéa caja ña ná coo vaha ini ndó.

*Ná cíú cuéntá Jesús ndúu ñuu Filípos chín-deé na Pablo*

<sup>10</sup>Cájii ndivaha ini i ta ndíquiahva i ndixahvi nu Jesucristo, xitoho í jáchi nandicuhun tucu ini ndó sahá i. Co cúni cachi i ña sa nandindójó ndó sahá i, vaha.

Ña cúni i cachi i quéa co núná nu ndó chindeé ndó yehe. <sup>11</sup>Co cáhan i ña yóho xihín ndó sahá ña ndímaní ñaha nuú i jáchi sa nacatiyahva i cájii íní i xihín ña íin nuú i.

<sup>12</sup>Sa xíni coo ndáhví ndivaha i ta sa xíni i coo cuahá ndivaha ñaha nuú i. Nacatiyahva i coo ndéé ini i nu tócó ndihi ña quirí nuú i. Sahá ña cán quéa íin vaha ini i vatí íin cuahá ña cuxu u á coó a. Ta vatí yójó ñaha nuú i á ndímaní ña nuú i íin vaha ini i. <sup>13</sup>Sáhan ndéé ini i nu tócó ndihi ña quirí nuú i jáchi Jesucristo quéa chín-deé a yehe caja i ña.

<sup>14</sup>Joo vaha nacaja ndó jáchi nacihindeé ndó yehe tá nandoho ini i sahá ña nandimaní nuú i.

<sup>15</sup>Sa xíni ndó ña in túhún mé ndó, na cíú cuéntá Jesús ndúu ñuu Filípos jan cíú ndó na nacihindeé yehe tá naquee e cuahán i chí Macedonia cáhan i tyhun Ndióxi, ña cuu jácacu ñayivi. Ta nacaja ndó ña yóho jáchi nacamáni ndó yehe sahá ña nacihindeé e ndohó xihín tuhun Ndióxi. <sup>16</sup>Jáchi tá nasañi i ñuu Tesalónica cán já nacihindahá ta nacihindahá ndó ñaha nandimaní nuú i. Ta a juú in tañu cuití va nacaja ndó ña.

<sup>17</sup>Co cáhan i ña yóho xihín ndó sahá ña cúní ñehe cuití ví ñaha. Ña cúní quéa ná chahvi Ndióxi sahá ñamaní nacaja ndó. <sup>18</sup>Ta viti coó ga ñaha ndímani nuú i. Janda yójó joho a nuú i viti xihín tócó ndihi ña nacihindahá ndó xihín Epaafroditó ñehe da naquixi da nuú i yóho. Tócó ndihi ña nacihindahá ndó nuú i yóho cíú á ña cájii ndivaha ini Ndióxi xihín. Cíú á tátuhun jóco ndó in ña támi sáhan nu mé á. <sup>19</sup>Ta Ndióxi, mé a caja cáhnu i chindeé a ndohó ná a ndímaní ga ni in ñaha nu ndo. Jáchi cuahá ndivaha ña cuicá cómí Ndióxi ta quiyahva mé á ña nu ndó sahá ña cíú ndó cuéntá Jesucristo.

<sup>20</sup>Cáhnu ná cacuu Ndióxi, tátá yo anda ama cása quívi. Já ná coo.

<sup>21</sup>Sahá ña in cíú yó cuéntá Jesucristo chín-deé i Ndióxi coo tócó ndihi ña cíú cuéntá mé á cán. Ta ñaní, ña cíú cuéntá Jesús ndúu xihín i yóho chindahá na Ndióxi coo ndó. <sup>22</sup>Ta jári java ga na cíú cuéntá Ndióxi ndúu chí yóho chindahá na Ndióxi coo ndó. Ta na chindahá chágá ví Ndióxi coo ndó cíú na caja chúun vehe da cómí cuéntá sahá ñuu Roma.

<sup>23</sup>Ná caja Jesucristo, xitoho í cuahá ña maní xihín tócó ndihi ndó. Já ná coo.

## Carta nāchindahá Pablo nū na cūú cuéntá Jesús nū Colosas

Chíndahá Pablo Ndióxi coo na cūú cuéntá  
Jesús nū Colosas

<sup>1</sup> Yēhe cūú Pablo, dā nāndicaxi Ndióxi  
cacuu ʉ apóstol cuéntá Jesucristo. Ta yóho  
íin Timoteo, nāná, da cūú cuéntá Jesús.  
<sup>2</sup> Chíndahá nde carta yóho nū ndo, na cūú  
cuéntá Ndióxi ndúu nū Colosas jan. Jáchí  
cūú ndo nā cūú cuéntá Jesucristo, na cán-  
deé cahnu ini mé á. Nā cúní nde quēá nā  
caja cuāha Ndióxi, tátá yo nāmaní xihín ndo  
ta nā caja nā nā coo vāha ínimá ndo.

Xícā tāhví Pablo sahá na cūú cuéntá Jesús  
cán

<sup>3</sup> Níti tiempo ndíquiahva nde ndixahvi nū  
Ndióxi, mé a cūú tátá Jesucristo, xitoho í  
tá xícā tāhví nde nū mé á sahá ndo. <sup>4</sup> Jáchí  
sa nāñehé nde tuhun nā cándeé ini ndó  
Jesucristo ta nāñehé nde tuhun nā quīhví  
ini ndó tóco ndihi nā cūú cuéntá mé á.  
<sup>5</sup> Ta caja ndó nā yóho jáchí sa nācandaa ini  
ndó nā ndaa sahá Jesucristo ta ndáti ndó  
ndiquehe ndó nā quīhvá Ndióxi nū ndó  
indiví. Ta jāndā nāná nāxini joho ndó tuhun  
vāha cahán sahá Jesucristo já nācasáhá cúní  
ndó cuhun ndó indiví. <sup>6</sup> Mé tuhun vāha nāx-  
ini joho ndó sahá Jesucristo yóho nācasáhá  
ndícuīta nuu a nūy nāyivi ta cuahá nā sa  
cándusa nā ndijáá níi cūú sahá nuyíví. Ta  
tóco ndihi nā cán caja na tá quīhvá nācaya  
mé ndó tá nāxini joho ndó nā quīhví ini  
Ndióxi ndohó ta já nācandaa ini ndó nā  
mé a ndaa tāhví quīhví ini Ndióxi ndohó.  
<sup>7</sup> Nā yóho quēá nājánahá dā nāná Epafras nū  
ndo. Mé a ndaa quīhví ini nde dā jáchí in  
cūú dā caja chūun da xihín nde ta mé a ndaa  
nācaya chūun da nū mé ndó xihín ndinuhu  
ini da tá nājánahá dā ndohó tuhun Ndióxi.  
<sup>8</sup> Ta tá nāquixi dā yóho já nācaxi tuhun da  
xihín nde nā caja ínimá yīi Ndióxi nā quīhví  
ini ndó nā cūú cuéntá Jesús.

<sup>9</sup> Ta jāndā nāná nācandaa ini nde sahá  
nā caja ndó já nācasáhá xícā tāhví nde nū  
Ndióxi sahá ndó ndijáá níi quīvī. Ta xícā  
tāhví nde nū a nā nā sahá nū ndo nā cúní  
mé a caja ndó. Ta xícā tāhví nde nū a nā nā  
quīhvá mé a ndaja tāhan nā ndichí nū ndo  
ta nā caja mé a nā nā candaā ini ndó tóco

ndihi nāha cuéntá mé á. <sup>10</sup> Já quēá nā cuu  
caja ndó tá quīhvá ndítahan caja ndó jáchí  
cūú ndó nāyivi cómí Ndióxi cuéntá sahá.  
Níti tiempo xíní nūhú caja ndó nā cajíi ini mé  
á xihín. Ta quīhvá já xíní nūhú nāha ndó  
nā caja tá caja ndó nā vāha xihín nāyivi ta  
quīhvá já xíní nūhú candaā chágá ini ndó  
sahá Ndióxi. <sup>11</sup> Ta quīhvá já xícā tāhví nde  
nū Ndióxi nā nā ndaja ndacú a ndohó xihín  
ndée cahnu ndivaha mé á já quēá cuu caja  
ndeé ini ndó ta já a ndihí ini ndó tā nā quīx  
cuahá tondohó nū ndo. Ta cajíi ini ndó  
<sup>12</sup> ndiquiahva ndo ndixahvi nū Ndióxi jáchí  
nāsacu tāhvá mé á ndohó nā nā ndiquehe  
ndó nā nāsacu ini mé a quīhvá nū tóco  
ndihi nā cūú cuéntá mé á tā nā xíní coo na  
nū yēhe ndivaha nūu cacomí mé a cuéntá  
sahá nā. <sup>13</sup> Nāsānduu yó nūu nāá ndivaha  
ta cán nātavá Ndióxi mí ndáha nā quini  
ta nāndiquiahva mé a mí ndáha Jesucristo,  
jahyi māní a nā nā cacomí a cuéntá sahá yo.  
<sup>14</sup> Ta mé Jesucristo nājácacu a mí tā nāxihí  
a ndica crúxu ta nācaya cahnu ini a sahá  
cuachí.

Jesucristo cūú á jīnī nū tóco ndihi nāha

<sup>15</sup> Ta Jesucristo cūú yuhú nūu Ndióxi, nā  
a cūú cuni tíví ta jāndā tā cámānī casáhá  
cavaha Ndióxi nuyíví yóho sa íin jahyi a,  
Jesucristo. <sup>16</sup> Ta sa mé Jesucristo nācavaha  
tóco ndihi nāha ndúu nuyíví yóho xihín nā  
ndúu indiví. Ta mé a nācavaha tóco ndihi  
nā xíní xihín nūu yo xihín nā a cūú cuni. Ta  
nācavaha mé a tāto Ndióxi, nā cómí chuu  
cuéntá Ndióxi ta nācavaha java ga tāto a, nā  
íin cuahá ndée cahndā chuun. Tóco ndihi  
nā yóho nācavaha Jesucristo nā nācavaha  
nāha mé á. <sup>17</sup> Ta sa íin ya mé a tā cámānī  
cava sáhá sahá tóco ndihi nāha ta caja mé  
a nā nā cuu canduu tóco ndihi nāha indiví  
xihín nuyíví. <sup>18</sup> Ta cūú á jīnī nū tóco ndihi  
nā cūú cuéntá mé á, nā cūú tātuhun yiquí  
cuu a. Ta mé a cán caja nā nā ndihí nāyivi  
íchí mé a catacu na xihín ndée a jáchí anda  
sahá nāshājīn mé a tā jihna nūhú nānditacu  
tucu a tañu nā sa nāxihí. Ta xihín nā yóho  
nāxīn coo a nānduu a jīnī nū tóco ndihi  
nāha. <sup>19</sup> Tā quīhvá cāa Ndióxi quīhvá  
cāa ri Jesucristo jáchí já cúní Ndióxi coo.  
<sup>20</sup> Ta cúní ri Ndióxi ndique tāhan māní tucu  
a xihín tóco ndihi nā nācavaha. Nā cán  
quēá nāxihí Jesucristo ndica crúxu já nā  
cuu ndique tāhan māní tóco ndihi nā nā  
nuyíví xihín indiví xihín Ndióxi.

<sup>21</sup> Mé ndó násanduu xícá ndó nu Ndióxi ta naxini iħví ndó a jáchi ndinuhu ña ná násacahvi ini ndó caja ndó, nduu. Joo viti najándique táhan mánij Ndióxi ndohó xihín mé á <sup>22</sup> sahá ña nácaja Jesucristo, jahyi a tá naxihí yiquí cuñu a ndica crúxu. Já nácaja mé á ña ná cuu xinu ndó canduu ví ndó nu á. Ta nandiquiahva mé á ndohó ndáha Ndióxi já ná cacu ndó ñayivi ví, na coó ga cuachi nu á. <sup>23</sup> Joo xíní ñúhú candee cahnu ini ndó Jesús ta a jándacoo xóo ndó ña ndáti ndó quiahva Ndióxi nu ndo. Jáchi tá naxini joho ndó tuhun vaha sahá Jesucristo já nacandaá ini ndó ña cuu jácacu a ndohó. Ta sa mé tuhun yóho ndícuīta nuu ndijáá níi cúu sahá ñuyíví ta yehé cúu dà chíndeé táhan jándicuita nuu a nuu ñayivi.

*Cája chúun Pablo cuéntá na cúu cuéntá Jesús*

<sup>24</sup> Ta viti cájii ini i jáchi ndóho ini i sahá ndo ta ña cája i quéa jáxinu coo i ña násacu ini Jesucristo ndoho i sahá na cúu cuéntá mé á, na cúu tátuhun yiquí cuñu a. <sup>25</sup> Nandaja Ndióxi yehé ña ná nduu u in da caja chún nuú na cúu cuéntá Jesús. Jáchi násahan mé á chuun yóho nuú i ña ná chindeé e ndohó sahá ña jánahá cáxí i tuhun Ndióxi nu ndo. <sup>26</sup> Ta janda tá nácava sahá sahá ñuyíví násahijin jehé a nuu ñayivi joo viti nájánahá Ndióxi nuú na cúu cuéntá mé á ña násahijin jehé jihna. <sup>27</sup> Ta viti sácú ini Ndióxi náha nuú na cúu cuéntá mé á ndá quiahva náhnu ñamani cuni caja mé á xihín na tóho. Ta ña násahijin jehé cúu ña yóho: ndácaan Jesucristo ini íníma ndó ta xihín ña yóho vaxi quiví ndicáhnu ndó xihín mé á.

<sup>28</sup> Cáxi tuhun nde nuú ndihi ñayivi sahá Jesucristo. Ta jácahan nde na ña ná a caja na cuachi. Ta xihín ndinuhu ini nde jánahá nde nu ná ña ndítahan caja na já ná nduu na ñayivi ndaa nu Ndióxi sahá ña nácaja Jesucristo. <sup>29</sup> Ta ña yóho cúu chuun ndúcú ndéé e caja i xihín ndéé cahnu sáhan Jesucristo nuú i.

## 2

<sup>1</sup> Cúní ña ná candaá ini ndó ña ndúcú ndéé e xíca tħaví i nu Ndióxi sahá ndó xihín sahá na cúu cuéntá Jesús ndúu níu Laodicea. Ta quiahva já ndúcú ndéé e xíca tħaví i nu Ndióxi sahá na cúu cuéntá Jesús, na a ñáha cuni táhan xihín i. <sup>2</sup> Ndúcú ndéé e xíca tħaví i nu Ndióxi sahá ná já ná ndihvi

ndéé Ndióxi ini íníma na ta in ná nduu na sahá ña quíhví ini táhan na. Ta xíca tħaví i nu Ndióxi ña ná candaá vaha ini ná ña ndaa sahá Jesucristo, ña mé a ndaa ndíyahvi ndivaha. Jáchi ña násahijin jehé jihna nájánahá Ndióxi nu ná viti ta ña yóho cúu Jesucristo. <sup>3</sup> Ta mé Jesucristo candaá ini a tóċó ndih iħha. Candaá ini a ndia quéa ña ná cuu ta ndia quéa ña vaha ta cúní mé á ña ná candaá ri ini mé ví ña jan. <sup>4</sup> Cáxi tuhun i ña yóho xihín ndó ná a jándahvi inga na ndohó jáchi ndúu java na ta ndató ndivaha cahna ná joo cuu ná na jándahvi ñayivi. <sup>5</sup> Ta vatí co ín mí i xihín ndo nu ndúu ndó jan joo ñúhu ini i sahá ndo níi tiempo. Ta cájii ini i tá xíní i ña ndúu víi xihín táhan ndó. Ta cájii ini i sánđehé e ña co jándacoo ndó ña candeé ini ndó Jesucristo.

<sup>6</sup> Tá nandiqueh ndó íchi cuéntá Jesús já násanduu mé á xitoho ndó. Ta viti ndítahan nu ndó caca nuu ndó xihín á ndijáá níi quivi. <sup>7</sup> Xíní ñúhú cativi tuu ndó Jesucristo já ná quiahva mé á ndéé a nu ndo. Xihín tuhun Ndióxi ña nájánahá nde nu ndó jan ndítahan candeé chága ini ndó Jesucristo. Ta ná a jándacoo ndó ña ndíquiahva ndó ndixahvi nu mé á.

### *Íchi saq xíca i viti*

<sup>8</sup> Cuéntá coo ndó ná a jándahvi na ndohó xihín ña tuhún cúní na jánahá na nu ndo. Jáchi náha ña quíxi a nu Ndióxi joo cuu á ña quíxi jini mé va na cuití va. Ta cahna na sahá ña jánahá ñayivi ñuyíví ta co cuu á ña jánahá Jesucristo nu yo.

<sup>9</sup> Tá quiahva cáá Ndióxi quiahva já cáá Jesucristo vatí násanduu a in ñayivi. <sup>10</sup> Ta nandicutu ndaa mé ndó xihín mé á jáchi in násanduu ndó xihín Jesucristo, mé a sáhndá chuun nu tóċó ndih i ná comí cuéntá sahá indív xihín ñuyíví yóho. <sup>11</sup> Ta sahá ña in násanduu ndó xihín Jesucristo sahá ña cán quéa násanduu ndó ñayivi cuéntá mé á ta cuu á tátuhun nachicáan Ndióxi marca ndohó ta co cuu á tátuhun marca chícaan ñayivi yiquí cuñu na. Ña cája Jesucristo quéa jácaxoo a mí nuu cuachi já quéa ná a caja ga yó ña. <sup>12</sup> Jáchi tá nacandúta ndo cuéntá Jesucristo já násacuu a tátuhun naxihí ndó ta nánduxu ndó xihín Jesucristo jáchi nájándacoo ndó cuachi nácaja ndó. Ta tá nanditacu mé á násacuu a tátuhun nánditacu ri mé va ndó xihín á sahá ña cán quéa cuu ndó ñayivi saá viti jáchi nacandee ini ndó ña fin ndéé Ndióxi caja ña ná nditacu

Jesucristo. <sup>13</sup> Jihna nasaçuu ndó tátuhun ndii sahá cuahá cuachi nacaja ndó ta sahá ña coó naxeen ndó caja ndó ña sáhndá Ndióxi. Ta nasaçaja ndó tá quiähva cúní mé va ndó jáchi nasaçomí cuachi cuéntá sahá ndó. Joo viti nacaja Ndióxi ña ná ñehe táhví ndó catacu ndó xihín Jesucristo ta nacaja cahnu ini a sahá tóco ndihi cuachi ndó. <sup>14</sup> Nasaçomí yo cuachi nu Ndióxi jáchi naquehe níu ña nasaahnda mé á caja í. Ta ndácaan cuachi jata yó nacaja ley joo najándo Ndióxi cuachí tá naxihí Jesucristo ndica crúxu sahá yo. <sup>15</sup> Ta tá naxihí a ndica crúxu já naquee vaha mé á xihín tiñahá sacuahá ta naquee vaha mé á xihín rí quini, rí sáhndá chuun nüu ñayivi ñuyiví. Ta sahá ña najácacahan Jesús nüu rí nüu ñayivi sahá ña cán quéa a cuý chinúu ga rí cuachi jata yó viti. Xihín ña nacaja Jesucristo yóho najánhá Ndióxi nu yo ña a cuý ga caja tiñahá sacuahá ni in ñáha xoho.

### Ndítahan ndinducú yo ñaha ín indíví

<sup>16</sup> A quéhe ndó cuéntá sahá ñayivi tá ná candehé ndaa na ndohó sahá ña xíxi ndó á sahá ña xíhi ndó. Ta ni a quéhe ndó cuéntá tá sángehé ndaa na ndohó sahá ña co cája ndó víco cája mé ná ta ni sahá ña co cája ndó víco quiví cája cahnu na yoó saá. Ta ni a quéhe ndó cuéntá tá sángehé ndaa na ndohó sahá ña co cája cahnu ndó quivi ndíquehe ndée na. <sup>17</sup> Sanahá tá cámání cacu Jesucristo já nasaahnda Ndióxi chuun nüu ñayivi ña ná caja na ley Moisés joo coó chuun a viti jáchi sa najáxinu coo Jesucristo tóco ndihi ña nasaahnda ley Moisés. <sup>18</sup> A cándusa ndó ñayivi tá cáchí na xihín ndó ña cuhun ndó indayá sahá ña co cája ndó ña cáchí mé ná. Cája cahnu na tátó Ndióxi ta sahá ña jan ndája tohó ndivaha na mé ná. Ta cáchí na nacahan tívi Ndióxi xihín ná sahá ña cán quéa ndínehe jíco ndivaha na mé ná. Xíní túni ná yóho cútú á xíní túni ñayivi ñuyiví cútí va. <sup>19</sup> Jáchí co xíca tuun ná jan xihín Jesucristo, mé a cútú jini nu mí. Mé á sáhan ndée a nu yo cuahnu í ta jándique táhan mé a mí xihín á tá quiähva nasaçu ini Ndióxi.

<sup>20</sup> Tá naxihí Jesucristo ndica crúxu já cútú á tátuhun naxihí ndó nüu cuachi, jáchi co cómí ga ñáha ñuyiví yóho cuéntá sahá ndó viti. Sahá ña cán quéa co ndítahan nu ndó caja ndó tá quiähva cája ñayivi ñuyiví yóho. Co ndítahan caja ndó ña cáchí na xihín ndó

tátuhun ña yóho: <sup>21</sup> “A tíin toho ndó ña jan. A cáxi toho ndó ña cáá. A cáni ndaa ndáhá ndó ña yóho”, cáchí na xihín ndó. <sup>22</sup> Tóco ndihi ña yóho ndihi sahá. Tóco ndihi ña cája na yóho cútú á ña sáhndá ñayivi ñuyiví cútí va ta co cútú á ña naquixi nu Ndióxi. <sup>23</sup> Jáchí tóco ndihi ña jánhá na jan cútú á ña quíxi jini mé va na vatí ndáa na tátuhun na ndíchí jini. Ta jánhá na ña ndítahan caja cahnu ñayivi Ndióxi xihín costumbre nacavahá mé va na. Ta náhá na tátuhun ñayivi tohó joo ndínehe jíco na mé ná. Ta jánhá na ña xíní ñúhú jándoho í yiquí cuñu í joo coó sahá toho ña yóho jáchi co chíndeé a mí jándihi sahá ña xíca ini yiquí cuñu í caja.

### 3

<sup>1</sup> Tá nanditacu Jesucristo tañu na sa naxihí cútú á tátuhun nanditacu ndó xihín mé á. Sahá ña cán quéa xíní ñúhú ndinducú ndó ñaha cútú cuéntá Ndióxi, mé ñaha quíxi indíví nu íin coo Jesucristo xoo cuáha Ndióxi. <sup>2</sup> Xíní ñúhú cahvi ini ndó sahá ñaha cútú cuéntá Ndióxi ta co xíní ñúhú ndicani ini ndó sahá ñaha ñuyiví yóho. <sup>3</sup> Jáchí mé ndó cútú ndó tátuhun na sa naxihí tá naxihí Jesucristo. Sahá ña cán quéa co xíní ñúhú ndiava ini ndó cacomí ndó ñaha ñuyiví yóho jáchi cuhun ndó coo ndó xihín Jesucristo indíví nu íin Ndióxi. <sup>4</sup> Ta sahá ña nacaja Jesucristo sahá ña cán quéa tacú yo viti ta tá ná canáhá nüu Jesucristo ñuyiví yóho já ndacanáhá nüu ndó xihín á. Tá quiähva ndíyehé ndivaha mé á quiähva já ndíyehé ri ndohó va ta ndicáhnu ndó xihín mé á.

### Jihna naxíca í ichí cuachi joo viti xíca í ichí sgá

<sup>5</sup> Ndítahan jácaxoo ndó nüu cuachi, ña cája ñayivi ñuyiví. Coto a coó ndó xihín ñayivi, na co cútú ñajíhlí ndo á yíu ndo. Ta ni a cája ndó ña nüu xihín yiquí cuñu ndó ta ni a cája ndó ña nüu, ña xíca ini yiquí cuñu ndó caja. Ta ni a chínúu ndó fíima ndó jatá jiuhún ndó jáchi cútú ndó tátuhun na cája cahnu yoco tá cája ndó já. <sup>6</sup> Jáchí vaxi quiví jándoho Ndióxi ini ña cája ña yóho sahá ña co xéen na caja na ña cútú Ndióxi. <sup>7</sup> Ta janda mé ndó tá naxíca nuu ndó ichí cuachi já nacaja ndó ña jan. <sup>8</sup> Joo viti xíní ñúhú jándacoo ndó tóco ndihi ña jan: a cójo ga ini ndó xihín ñayivi ta ni a cája ga ndó ña xíca ini yiquí cuñu ndó caja ta a cája ga ndó ña

núu ta ni a cánahá ga ndó xihín ñani táhan ndó ta a cáhan ga ndó tūhun quini. <sup>9</sup> Ta a cáhan tūhún xihín táhan ndó jáchi co cíuú ga ndó na nasaçuu ndó jihna ta tóco ndihi ña núu nasaçaja ndó jihna jan co cómí ga cuénta saha ndó viti. <sup>10</sup> Jáchi viti sa nanduu ndó ñayivi saá, na loho loho ndivií chágaa íníma na caja Ndióxi janda quiáhva na xínu coo ndó nduu ndó tóquiáhva caja Jesucristo ta já candaá vaha chágaa ini ndó a. <sup>11</sup> Jáchi viti coó sahá ga á tá cíuú yó na Israel á tá co cíuú yó na Israel, á tá cíuú yó na naquíhvi marca yíquí cuñu í, á tá coó naquíhvi marca yíquí cuñu í, á tá cíuú yó na tóho á tá co cíuú toho í na. Ta ni coó sahá toho a á tá cíuú yó na yucú ñúhú ta ni coó sahá toho a á tá cíuú yó na cómí xitoho cuénta saha, á tá cíuú yó na xíca núná mé. Joo ña íin saha quéa tá ná ndiquíahva ndó mé ndó ndáhá Jesucristo ña ná cacomí a cuénta saha ndó jáchi tóco ndihi na cán cíuú ná na ndácaan Jesucristo íníma.

<sup>12</sup> Quíhvi ini Ndióxi ndohó ta naçaxi a ndohó ña ná cacuu ndó ñayivi cuénta mé á. Ta tá quiahva nañahndá ini Ndióxi sahá ndo quiahva já xíni ñúhú tahndá ini ndó sahá ñayivi. Xíni ñúhú caja vaha ndó xihín ná. Coto a caja cahnu ndó mé ndó. Xíni ñúhú coo vií ini ndó xihín ñayivi ta a ndíhi ini ndó xihín ná. <sup>13</sup> Xíni ñúhú coo cahnu ini xihín tahan ndó. Ta caja cahnu ini sahá tahan ndó tá yáha nu caja xihín tahan ndó. Tá quiahva naçaja Jesucristo, xitoho í tá naçaja cahnu ini a sahá ndó quiahva já ndítahan caja cahnu ini sahá tahan ndó. <sup>14</sup> Xíni ñúhú ndicutú ndaa ndó xihín ña quíhvi ini tahan ndó já quéa ná cuu candum in nýu xihín tahan ndó ta já a cíuú cahnda java tahan ndó. <sup>15</sup> Ta ná caja Ndióxi ña ná coo vaha ini xihín tahan ndó já ná caja ndaa ndó xihín ná. Jáchi naçacu ini mé á ña ná caja ndó já ta naçaxi a ndohó nduu ndó tátuhun yíquí cuñu a. Ta ndítahan ndiquíahva ndó ndixahvi nu Ndióxi níi tiempo.

<sup>16</sup> Ta ná ndicutú ndaa íníma ndó xihín tūhun vaha cáhan sahá Jesucristo. Ta xihín tūhun yóho xíni ñúhú jáñaha tahan ndó ta xíni ñúhú quiahva tūhun ndeé ini tahan ndó ña ná candaá vaha ini ndó ña. Ta xihín ndinuhu ini ndó xíni ñúhú ndiquíahva ndó ndixahvi nu Ndióxi. Cata ndó salmo xihín himno xihín canto ña sáhan íníma yii Ndióxi nu ndó. <sup>17</sup> Ta tóco ndihi ña caja ndó xíni ñúhú caja ndó ña cuénta Jesucristo,

xitoho í. Ta xíni ñúhú ndiquíahva ndó ndixahvi nu Ndióxi, tátá yo sahá ña naçaja Jesucristo, xitoho í.

*Ndá quiáhva ndítahan canduu na cíuú cuénta Jesús*

<sup>18</sup> Ndóhó, naijhí ndúu yíí, xíni ñúhú coo joho ndó nu cáhan yíí ndó xihín ndo jáchi já ndítahan caja naijhí, na cíuú cuénta Jesús.

<sup>19</sup> Ta jári ndohó, dataa, xíni ñúhú quihví ini ndó ñajíhlí ndo ta co ndítahan caja ndó ndaja naçuu xihín ná. <sup>20</sup> Ta jári ndohó va, na valí xíni ñúhú taa joho ndó tóco ndihi ña sáhndá tátá náná ndo nu ndo jáchi ña yóho quéa cajii ini Ndióxi xihín. <sup>21</sup> Ta jári ndohó va, na ndúu jahyi, a jácojo quini ndó ini jahyi ndó já quéa ná a cavitá ini na caja na ña vaha. <sup>22</sup> Ta ndohó, na naçeen xitoho caja chúun uun va ndó, xíni ñúhú caja ndó tóco ndihi ña sáhndá xitoho ndó, na ndúu ñuyíví yóho nu ndo. Ta a juú tá ndíta cuití na sándezhe na nu caja chúun ndó sahá ña cúní ndó candoo vaha ndó ñuyú na cíuú xitoho ndó cán. Ña xíni ñúhú caja ndó quéa caja chúun ndó xihín ndinuhu ini ndó nu ná jáchi cíuú ndó na caja cahnu Ndióxi. <sup>23</sup> Ndítahan cajii ini ndó caja ndó tóco ndihi ñaha. Ta ndicuhun ini ndó ña nu Ndióxi caja ndó ña ta co cíuú á ñuyú ñayivi cuití va. <sup>24</sup> Jáchi sa candaá ini ndó ña chahvi Jesucristo nu ndó sahá tóco ndihi ña caja ndó. Ta ñehe tähví ndó cuhun ndó indíví jáchi caja cahnu ndó Jesucristo, mé á cíuú ndusa xitoho ndó. <sup>25</sup> Joo ndá na caja ña núu tandaa quíví ndoho ini na sahá ña núu naçaja na jáchi caja Ndióxi ña ná chahvi in in na sahá ña naçaja na.

#### 4

<sup>1</sup> Ta jári ndohó va, na cíuú xitoho co ndítahan jándoho nañá ndó na naçeen ndó caja chúun nu ndó jan. Ndítahan caja vaha ndó xihín ná jáchi vaxí quíví ndiquíahva ri ndohó va cuénta nuú Ndióxi, xitoho ndó, ña íin indíví.

<sup>2</sup> A jándaco ndó caca tähví ndó nu Ndióxi xihín ndinuhu ini ndó. Ta ndítahan coo tiähva vaha ndó ndiquíahva ndó ndixahvi nu mé á. <sup>3</sup> Caca tähví ndó nu Ndióxi sahá nde ña ná cuná mé á íchi nuú nde cáhan nde tūhun vaha sahá Jesucristo, mé tūhun nasahüün jehé anda viti. Ta saha mé ña yóho ndácaan i vecaa viti. <sup>4</sup> Caca tähví ndó nu Ndióxi ña ná cuu cahán caxí i tūhun

Ndióxi nuú ñayivi tá quiáhva ndítahan nuú i caja i.

<sup>5</sup> Co ndítahan caja ndó ña yóho á ña cáá nuú na co cúú cuéntá Jesús. Ta xíní níhu ndíhi ini ndó cahán ndó tuhun Ndióxi xihin ná. <sup>6</sup> Tóco ndíhi ña cáhan ndó xíní níhu cacuu a ña vaha, ña cuu cajíi ini Ndióxi xihin. Ta xíní níhu candaá ini ndó ndaja caja ndó nducú ñehe vaha ndó tuhun nuú ñayivi.

*Ndíndayí Pablo na ndúu ñuu Colosas*

<sup>7</sup> Chíndahá i da naní Tíquico nuú ndó jan já ndicani da sahá i nuú ndó. Mé da cúú ñani máni yo ta xihín ndinuhu ini da in cúú dá cája chún da xihín i. <sup>8</sup> Chíndahá i da saa da nu ndo já ná caxi tuhun da xihín ndo ndá quiáhva ndóho nde yóho. Ta chíndahá i da já ná quiáhva da tuhun ndeé ini ndó. <sup>9</sup> Ta chíndahá ri ñani máni yo Onésimo, da ndíco cahnu íchí cuéntá Jesús cuahán xihín dá ta mé Onésimo yóho cúú da ñuu ndó jan. Ta mé dá xihín Tíquico caxi tuhun da nu ndó ndaja cándoo nde jandá viti.

<sup>10</sup> Aristarco, da ndácaan vecaa xihín i chíndahá da Ndióxi coo ndó. Ta jári Marcos, da cúú ñani cuachí Bernabé chíndahá da Ndióxi coo ndó. Ta sa nacaxi tuhun i xihín ndó ndá quiáhva ndítahan caja ndó xihín Marcos tá ná saa da coto nihni da ndohó. Xíní níhu ndiquehe vaha ndó da.

<sup>11</sup> Ta jári da naní Jesús, da naní tucu Justo chíndahá da Ndióxi coo ndó. Jandá ndíshuní na yóho cuítí va cúú na cuéntá Jesús, na naquixi chichi Israel cája chún na xihín i tá xica nuu nde cáhan nde nuú ñayivi ña cómí Ndióxi cuéntá sahá ná. Ta mé a ndaa náchindeé cuahá ndíshuní na cán yehe. <sup>12</sup> Ta jári Epafras, da ñuu ndó jan chíndahá da Ndióxi coo ndó. Mé da cán cúú dá da cája chún cuéntá Jesucristo. Ta níi tiempo xica tahví da nu Ndióxi sahá ndó xihín ndinuhu ini da já ná candita ndacú ndó ta ná ndiquáhva níi ndo mé ndó caja ndó ña cúní Ndióxi. <sup>13</sup> Ta xíní i xihín nuú i ndá quiáhva ndíhi ini Epafras xica tahví da nu Ndióxi sahá ndó ta sahá na cúú cuéntá Jesús ndúu ñuu Laodicea xihín na ndúu ñuu Hierápolis viti. <sup>14</sup> Lucas, da cúú doctor maní yo chíndahá da Ndióxi coo ndó. Ta jári Demas chíndahá da Ndióxi coo ndó.

<sup>15</sup> Cahan Ndióxi ndó xihín na cúú cuéntá Jesús, na ndúu ñuu Laodicea ta cahán Ndióxi ndó xihín ñá naní Ninfas ta xihín tóco ndíhi na cúú cuéntá Jesús tacá vehe

ñá. <sup>16</sup> Ta tá nandihi nácahvi ndó carta yóho caja ndó ñamání chindahá ndó ña ná cuhun a nuú na cúú cuéntá Jesús, na ndúu ñuu Laodicea ña ná cahvi ri na cán va ña. Ta jári ndítahan nu ndó cahvi ndó carta ña náchindahá i nuú na cán. <sup>17</sup> Ta caja ndó ñamání caxi tuhun ndó nu Arquipo ña xíní níhu ndíhi ini da caja chún vaha da chuun násahan Ndióxi nu dá caja da.

<sup>18</sup> Ta yehe, da cúú Pablo cahyí i java tuhun yóho nu ndó xihín ndahá i ña ná chindahá i Ndióxi coo ndó. Xíní níhu ndicuhun ini ndó ña ndácaan i vecaa. Ta ña cúní quéa ná caja cuahá Ndióxi ñamání xihín ndó. Já ná coo.

## Carta nu cuítí nacahyí Pablo nuú na cíuú cuéntá Jesús ñuu Tosalónica

Pablo xihín da xíca xihín dá chíndahá da Ndióxi coo na cíuú cuéntá Jesús ñuu Tosalónica

<sup>1</sup> Yehé cíuú Pablo, da cahyí carta yóho xihín Silvano xihín Timoteo ta chíndahá í ña nuú ndihí ndó, na cíuú cuéntá Jesús ndúu ñuu Tosalónica. Ta in nanduu ndó xihín Ndióxi, tátá yo ta in nanduu ndó xihín Jesucristo, xitoho í. Ná caja Ndióxi, tátá yo xihín Jesucristo, xitoho í cuahá ñamani xihín ndihí ndó ta ná caja mé á ña na coo vaha ini ndó.

Cándeé cahnu ini na Tosalónica Jesús

<sup>2</sup> Já cuití ndíquiahva nde ndixahvi nu Ndióxi sahá ndihí ndó. Ta coo ndíndójó nde xíca tähví nde nu mé á sahá ndo. <sup>3</sup> Ndíquiahva nde ndixahvi nu Ndióxi, tátá yo saha ndo jáchi cándeé cahnu ini ndó mé á. Ta sahá na quíhví ini ndó mé á sahá ña cán quéa caja chúun vaha ndó cuéntá mé á. Sahá ña cándeé ini ndó Jesucristo ña quixi tucu a ñuyíví yóho sahá ña cán quéa caja ndee ini ndó tá ndóho ini ndó. <sup>4</sup> Cuni joho vaha ndó, ñani mí i, na cíuú cuéntá Jesús. Sa xíni nde ña quíhví ini Ndióxi ndohó ta nacaxi a ndohó cacuu ndó cuéntá mé á. <sup>5</sup> Tá nacaxi tuhun nde tuhun vaha sahá Jesús nu ndo a juú tuhun uun nacahán nde xihín ndo. Nacahán nde mé tuhun xihín ndée ña nasahan íníma yii Ndióxi ñuu nde. Ña cán quéa sa xíni ndo ña ndaa cuití va nacahán nde xihín ndo. Ta sa xíni vaha ndo ña nacaja ndaa nde tá nasaanduu nde xihín ndo jáchi cíuni nde chindeé nde ndohó.

<sup>6</sup> Anda jáví nacasáhá ndó caja ndo ña nacaja mé nde xihín ña nacaja Jesucristo. Jáchí nandiquehe vaha ndo ña najánahá nde nu ndo. Ta vatí nandoho ndivaha ini ndó joo nacavatá ndo nacaja íníma yii Ndióxi. <sup>7</sup> Ta tá nandihí nanduu ndó na jánahá nu tóco ndihí na cíuú cuéntá Jesús, na ndúu estado Macedonia xihín estado Acaya ña ndítahan caja na. <sup>8</sup> Ta a juú Macedonia xihín Acaya cuití va vaha jáchi ndijáá ñuu nandicuita nuu tuhun vaha sahá Jesús nacaja ndó. Ña cán quéa sa xíni tóco ndihí ñayivi ña cándeé cahnu ini ndó Ndióxi. Ña cán quéa ndá ñuu cásaa nde caxi tuhun na

cán nuú nde sahá ndo chí co xíni ñúhú ga nde cahán nde sahá ndo nu ná. <sup>9</sup> Ta viti tóco ndihí na cán caxi tuhun na nuú nde ndaja nandiquehe vaha ndó tuhun nacahán nde xihín ndo tá nasaanduu nde xihín ndó ñuu Tosalónica cán. Ta caxi tuhun na ndaja nandijama ndó tá nandicoo ndó ña caja cahnu ndó yoco jáchi viti caja cahnu ndó Ndióxi cuití va. Ta caxi tuhun na ndaja nandicó coo ini ndó ta nacasaahá ndo caja chúun ndó cuéntá Ndióxi, mé a caja ña ndaa cuití va, ña tacú a íin a indívi viti. <sup>10</sup> Ta caxi tuhun na nuú nde ndá quiáhva ndati ndó ndicó coo Jesucristo quixi a indívi, mé a cíuú jahyi Ndióxi. Ta Ndióxi najánditacu a Jesús, mé a jácacu mí ná a ndóho iní tá ná xínu quiví caja víi Ndióxi sahá cuachi ñayivi.

## 2

Chuun nacaja Pablo tá nasañin da ñuu Tosalónica

<sup>1</sup> Ta sa xíni ndihí ndó, ñani mí i, na cíuú cuéntá Jesús ña coo nacasaahá uun va nde ñuu Tosalónica jan jáchi nandiquehe vaha ndó tuhun Ndióxi. <sup>2</sup> Joo tá cámáni saa nde ñuu ndó jan sa xíni ndo ndaja nacaja xíxi na ñuu Filipos xihín nde ta nacanahá na xihín nde. Joo tá nacasaahá nde ñuu ndó nasañan ndeé ini nde nacaja Ndióxi já nacaxi tuhun nde tuhun vaha sahá Jesús nu ndo vatí ndúu cuahá na co cúní ndehe.

<sup>3</sup> Ta coo nacahán nde ña tuhún xihín ndo jáchi tuhun ndaa cuití va cíuú ña najánahá nde nu ndo. Ta coo nacahvi núu ini nde ta coo najándahvi nde ndohó. Joo nacaxi Ndióxi ndehe ta nasaahnaa nde a chuun nuú nde ña caxi tuhun nde tuhun vaha sahá Jesús nuú ñayivi. Ta vatí co tähán ini ñayivi xihín ña cahán nde joo coo nandijama toho nde ña. Jáchí Ndióxi quéa sándezhe íníma yo ta tähán ini a xihín ña cahán nde.

<sup>4</sup> Sa xíni vaha ndó nacahán ndaa nde xihín ndo ta coo nacahán chíjín nde xihín ndo. Ta coo najándahvi nde ndohó sahá jiuhún. Joo xíni ndaa tähýi Ndióxi ña ndaa cuití va nacahán nde xihín ndo. <sup>5</sup> Ta sa xíni vaha ndó ña ni tañu mé ndó ta ni tañu java ga ñayivi coo nandinducú nde ña ná caja cahnu ñayivi ndehe vatí íin sahá nde cahnda nde chuun nu ndo jáchi cíuni nde na apóstol nacindahá Ndióxi nu ndo. <sup>6</sup> Joo nacaja víi nde xihín ndo tá quiáhva ndáá vaha in ñañahá jahyi ña. <sup>7</sup> Ta cíuni ndivaha nde ndohó ña cán quéa nacaxi tuhun nde

tuhun vaha sahá Jesús nu ndo. Ta íin tiāhva nde quiví nde sahá ndo jáchí quíhví ini nde ndohó. <sup>9</sup> Nani nde, na cíú cuéntá Jesús, á co ndícuhyun ini ndó ndá quiāhva nacaja nde tá násanduu nde xihín ndo cán. Nuú tá ndiví nacaja chíun nde já ná cuu chahví nde sahá ná xíxi nde. Jáchí co cúní nde jáquihví nde ndohó nani cáxi tuhun nde tuhun vaha sahá Jesús nu ndo.

<sup>10</sup> Ta sa xíni ndaā táchíy ndihi ndó, na cíú cuéntá Jesús ná nacaja vaha nde xihín ndo ta cuu cahán ndo sahá nde. Ta xíni táchíy Ndióxi ná nacaja ndaā nde xihín ndo ta nacaja víi nde xihín ndo ná cán quéa a cíú chicaan ñayivi cuachi jatá nde. <sup>11</sup> Sa xíni vaha ndó ndaja najácahan nde in in ndó ta ndaja násahan nde tuhun ndeé ini ndó ná ná candíco cáhnu ndo íchi cuéntá Jesús. Tátuhun cája in dàtaa xihín jahyi da já nacaja nde xihín ndo. <sup>12</sup> Ta násahnda nde chuun nu ndo caja ndó ná cúní Ndióxi jáchí cíú ndó cuéntá mé á. Mé Ndióxi, mé a sáhindá chuun indív, mé a cán quéa nacaxi a ndohó cahnra ndó chuun xihín á. Mé a cíú á in Ndióxi cáhnu ndiváha ta ndaja cáhnu mé á ndohó xihín á.

<sup>13</sup> Ná cán quéa níi tiempo ndíquiahva nde ndixahvi nu Ndióxi jáchí nandiuehe vaha ndó tuhun Ndióxi ná nacaxi tuhun nde nu ndo. Tá naxini joho ndó ná já nacandaa ini ndó ná cíú á tuhun Ndióxi ta co cíú á tuhun ñayivi ñuyíví. Ta mé a ndaā cíú á tuhun Ndióxi jáchí tá naxini joho ndó ná já quéa najándico ndó cuachi cája ndó sahá ná candeé ini ndó Jesús. <sup>14</sup> Anda jáví mé ñayivi nuu ndó nacásahá na jándoho na ini ndohó, nani mí i ta nacaja xíxi na xihín ndó. Ta quiahva já nandoho na cíú cuéntá Jesús estado Judea. Jáchí na Israel, na ndúu estado Judea nacaja xíxi na xihín ná. <sup>15</sup> Jihna násahní java na Israel na profeta cuéntá Ndióxi. Ta quiahva já násahní java ri na Israel Jesucristo, xitoho í. Ta viti java na Israel cája xíxi na xihín nde ta nataxí na ndehe veñyu. Co cájii ini Ndióxi xihín ná jáchí cándají na tóco ndihi ñayivi. <sup>16</sup> Ta coó násahan na ñamani nuú nde caxi tuhun nde tuhun vaha sahá Jesús nuú ñayivi, na coó naquixi chichí Israel ná nájácacu Ndióxi na. Ta sahá ná yóho nandicuahá cuachi na nu Ndióxi ta sahá ná cán quéa xójo ini a xihín ná ta viti naxinu coo hora jándoho a ini na.

Cúní Pablo coto nihni tucu da ñayivi nuu

### Tesalónica

<sup>17</sup> Nani mí i, na cíú cuéntá Jesús, tá nandihi naquee nde ñuu ndó jan já nandicuhyun ini nde sahá ndo. Nuú ini nde sahá ndo vatí co xíní nde ndohó xihín nuú nde. Ta ndiává ini nde ndicó coo nde ñuu ndó coto nihni nde ndohó. <sup>18</sup> Nasacu ini nde saa nde nu ndo. Ta yehé, dà cíú Pablo cuahá tañu nacacúni saa i ñuu ndó joo tiñahá sacuahá nasaaji nuu rí nuú i sahá ná cán quéa coó nacuu saa i jan. <sup>19</sup> Ndá sahá quéa candeé ini nde ndohó ta ndá sahá quéa cájii ini nde ta ndá sahá quéa coo vaha ini nde tá tandaa quiví quixi tucu Jesucristo ñuyíví yóho. Sahá ná ndicó ndo íchi cuéntá Jesucristo, xitoho í sahá ná cán quéa cájii ini nde. <sup>20</sup> Mé a ndaā íin vaha ini nde ta cájii ini nde cája ndó.

### 3

<sup>1</sup> Ta sahá ná cúní ndiváha i candáa ini i ndaja ndúu ndó cán sahá ná cán quéa násacu ini i candoo in táláá mí i ñuu Atenas.

<sup>2</sup> Ta náchindahá i ñaní Timoteo, mé dà cája chíun xihín nde cuéntá Ndióxi cáxi tuhun da tuhun vaha sahá Jesucristo nuú ñayivi. Náchindahá i da saa dà coto nihni da ndohó já quéa jácahan dà ndohó ná ná coo ndacú chágá ínímá ndo nu Ndióxi ta ná chindeé dà ndohó candeé cáhnu chágá ini ndó Ndióxi.

<sup>3</sup> Jáchí cúní nde ná ná coo ndacú ini ndó ná a jándico ndó íchi cuéntá Jesús vatí cája xíxi ñayivi xihín ndo. Jáchí sa xíni vaha ndó ná ndítahan nu yo ndohó tá ndóho iní sahá Jesucristo. <sup>4</sup> Á co ndícuhyun ini ndó tá násanduu nde xihín ndo nacaxi tuhun nde nu ndo ná vaxi quiví ndoho iní saha mé á. Ta viti sa xíni ndó ná nayaha ná nacahan nde xihín ndo. <sup>5</sup> Sahá ná coó nañehé e tuhun sahá ndo sahá ná cán quéa náchindahá i Timoteo nu ndo ná cañehe da tuhun sahá ndo quiví a nuú i já ná candaá ini i á mé a ndaā táchíy ndicó cáhnu ndó íchi cuéntá Jesús. Jáchí nayihví i ná jándahvi tiñahá sacuahá ndohó. Ta tá ná quee vaha tiñahá sacuahá xihín ndo, nduu já quéa mé a uun quéa nacahan nde tuhun Ndióxi xihín ndo.

<sup>6</sup> Joo viti chá va naquixi Timoteo yóho tá nandihi naxito nihni da ndohó jan. Ta nañehé dà tuhun vaha saha ndo ná candeé ini ndó Jesucristo ta quíhví ini táhan ndó. Ta cachi dà ná ñúhu ndiváha ini ndó sahá nde. Ta xíca ndiváha ini ndó cuni ndó ndehe tá quiāhva xíca ndiváha ini nde cuni

<sup>7</sup> Ta ná quee vaha tiñahá sacuahá xihín ndo, nduu já quéa mé a uun quéa nacahan nde tuhun Ndióxi xihín ndo.

<sup>8</sup> Ta ná quee vaha tiñahá sacuahá xihín ndo, nduu já quéa mé a uun quéa nacahan nde tuhun Ndióxi xihín ndo.

nde ndohó. <sup>7</sup> Cándezé ndó, ñani i. Vatí ndóho ndivaha ini nde yóho joo násahan ndeeé ini nde jáchi nañehé nde tūhun ña cándezé cahnu ini ndó Jesús ta ndíco cahnu ndó íchí cuénta mé á. <sup>8</sup> Ta nandivaha ini nde jáchi cándaa ini nde ña ndacú fin ini ndó xihín Jesucristo, xitoho í. <sup>9</sup> Ta co ñehe ga nde ndá quiahva ndiquiahva nde ndixahvi nu Ndióxi sahá mé ndó jáchi cájii ndivaha ini nde nacaja ndó. <sup>10</sup> Chí ñuuú ta ndiví xíca tähví nde nu Ndióxi ña ná quiahva ñamani nuú nde saa nde coto nihni nde ndohó jáchi cúní nde xinu coo nde jánahá chágá nde tūhun Ndióxi nu ndo já ná cándezé cahnu chágá ini ndó mé á.

<sup>11</sup> Ña cán quéa xíca tähví nde nu Ndióxi, tátá yo xihín Jesucristo, xitoho í ña ná chindeé a ndehe saa nde nu ndo coto nihni nde ndohó. <sup>12</sup> Ta ná caja Ndióxi ña ná quíhví chágá ini tahan ndó. Ta ná chutí ndaa ini ndó xihín ña quíhví ini ndó tóco ndihi ñayivi tá quiahva quíhví ini nde ndohó. <sup>13</sup> Ta ná caja Ndióxi ña ná coo ndacú íníma ndo nu mé á. Ta ná jándoo a íníma ndo já ná coo víi a nu mé á tá ná quixi tucu Jesucristo ñuyíví xihín ndihi na cíu cuénta mé á.

#### 4

*Ña ndítahan nu yo caja í já ná tahan ini Ndióxi xihín yo*

<sup>1</sup> Cuni joho vaha ndó ñani mí i, na cíu cuénta Jesús. Jihna najánahá nde ndohó ndaja ndítahan caja ndó já ná tahan ini Ndióxi xihín ndó. Ta xíni nde já caja ndó anda vitti. Xihín ndée sáhan Jesucristo nuú nde xíca tähví nde nu ndo ta sáhndá nde chuun nu ndó ña ná a jándico ndo caja ndó ña najánahá nde nu ndo.

<sup>2</sup> Sa xíni vaha ndó ña sáhndá nde chuun nu ndó jáchi násahinda Jesucristo, xitoho í chuun nuú nde cahán nde ña yóho xihín ndo. <sup>3</sup> Ña cúní Ndióxi quéa ná coo víi íníma ndó nu mé á ta ná a caja ndó cuachi ña coo ndó xihín najíhí á taa, na co cíu nájíhí ndo á yíi ndo. <sup>4</sup> Ña cúní Ndióxi quéa ná tandahá ndó xihín in táláá ñáñahá. Ta ná coo víi ndó xihín ña ná caja cahnu ndó ña. <sup>5</sup> Ta ná a ndiáva ini ndó caja núu ndó xihín ña tá quiahva caja ñayivi, na co xíni Ndióxi. <sup>6</sup> Co ndítahan caja ndó cuachi xihín nájíhí ñani tahan ndó jáchi xihín ña yóho jándahvi ndó yíi ña. Ta jándoho ndivaha Ndióxi ini tóco ndihi na caja já. Ta sa xíni vaha ndó ña yóho

jáchi nacaxi tūhun nde ña nu ndó jihna. <sup>7</sup> Jáchi coó nacana Ndióxi mí ña ná caja í cuachi. Nacana mé á mí jáchi cúní a ña ná cacuú ñayivi yíi, na fin vií íníma. <sup>8</sup> Ta ndá na co cúní cuni joho ña jánahá nde já quéa cándaa ini ndó ña a juú ndehe cuítí va cándají na. Jáchi quéhe núu na Ndióxi sahá ña co caja na ña cúní mé á. Ta Ndióxi quéa násahan íníma yíi mé á nu yo cañuhu a iní.

<sup>9</sup> Sa nájánahá va Ndióxi ndohó ndá quiahva ndítahan quíhví ini tahan ndó, na cíu cuénta Jesús. Sahá ña cán quéa nu carta yóho co ndítahan cahyí tucu u ña nu ndo.

<sup>10</sup> Ta sa xíni vi ña mé a ndaa quíhví ini ndó tóco ndihi na cíu cuénta Jesús ndúu estado Macedonia. Joo xíca tähví i nu ndó, ñani mí i ña ná quíhví chágá ini ndó na. <sup>11</sup> Xíní ñúhú nducú ndo coo vaha ini ndó xihín ndihi ñayivi. Ta nducú ndo coo ndisáhnu ini ndó. Ta ndítahan nu in in ndó caja ndó chuun mé ndó jáchi já najánahá nde nu ndó jihna. <sup>12</sup> Ta tá ná caja chúun vaha ndó já quéa cahán vaha ñayivi, na co cíu cuénta Jesús sahá ndo. Ta tá ná caja chúun vaha ndó já quéa a ndímáñi ni in ñáha nu ndo catacu ndó.

*Vaxi quíví quixi tucu Jesucristo ñuyíví yóho*

<sup>13</sup> Ta viti cúní nde ndicani nde nu ndó, ñani i, na cíu cuénta Jesús ña ná cándaa vaha ini ndó ña ndaa sahá ñayivi, na sa naxilhi. A cácuéha ini ndó sahá ná ta quiahva caja ñayivi, na co cándezé ini Ndióxi. <sup>14</sup> Tá quiahva cándusa nde ña naxihí Jesucristo ta nanditacu tucu a quiahva já cándusa nde ña jánditacu tucu Ndióxi na sa naxihí, na násandeé ini mé á tá násatagu na. Caja Ndióxi ña ná quixi na cán xihín Jesús tá ná quixi tucu a ñuyíví yóho.

<sup>15</sup> Ña cán quéa cahán nde ña yóho xihín ndo ta cíu á ña najánahá Jesucristo, xitoho í nuú nde. Tá ná quixi tucu mé á ñuyíví yóho ndiquehe a mí já quéa a cíhun toho jihna ñúhú na tacú ñuyíví yóho jáchi jihna ñúhú ndindita na sa naxihí. <sup>16</sup> Jihna ñúhú nuu Jesucristo quixi tucu a ñuyíví yóho. Ta mé já cayuhú a cahnda a chuun nuú ndihi ñayivi. Já cayuhú tátó sacuahá Ndióxi ta ndáhyi trompeta Ndióxi. Já nditacu nu cuítí na sa naxihí, na cándusa Jesucristo. <sup>17</sup> Anda jáví tóco ndihi mí, na tacú ndique tahan í xihín na nanditacu nu cuítí ta cañehe Ndióxi mí tañu víco. Já ndique tahan í xihín Jesucristo, xitoho í nu táchí ta já coo í xihín

mé á anda ama cása quivi. <sup>18</sup> Sáhá ña cán quéá ndítahan nu ndó quiāhva tūhun ndee íni táhan ndó xihín tūhun yóho.

## 5

<sup>1</sup> Candehé ndo, ñani i, na cùú cuéntá Jesús. Cо xíní ñuhú cahyí i nu ndo sahá ndá ama quixi tucu Jesucristo ñuyíví yóho. <sup>2</sup> Jáchí cándaa vaha ini ndó ña mé quiyi co cahán yo quixi Jesucristo ñuyíví yóho já quixi mé á. Tá quiāhva jonáá cuití va xínu in da cuihná tá ñuu quiāhva já jonáá xínu Jesucristo ñuyíví yóho. <sup>3</sup> Tá ná cahán ñayivi sa ndúu vaha ndivaha na ta ni in ñaha a cùú yihví na anda jáví jonáá xínu ña ndoho ndivaha ini na. Tá quiāhva jonáá xínu ña sáhdá tixi in ñáñahá ta cùní cacu jahyi ña quiāhva já xínu quivi ndihí sahá ná. Ta ni in na a cùú cacu toho. <sup>4</sup> Joo mé ndó, ñani mí i, na cùú cuéntá Jesús co ndúu ga ndó nuú naá sahá ña cándaa ini ndó ña quixi tucu Jesucristo ñuyíví yóho. Ta vatí catónto ndo tá ná xínu in da cuihná nu ndo joo co ndítahan catónto ndo tá ná quixi tucu Jesucristo. <sup>5</sup> Jáchí tóco ndihí ndó, na cández ini Jesucristo ndúu ndó nu yéhe sahá ña xíca ndó íchí cuéntá Jesús. Co xíca toho ndó íchí nuú naá nu xíca ñayivi ñuyíví, na co cández ini Jesucristo. <sup>6</sup> Sáhá ña cán quéá ndítahan coo tiahva í candalí quixi Jesucristo ta a cùjú yo tá quiāhva cája java ga ñayivi. Ña ndítahan caja í quéá cañuhu tähý iní xihín tóco ndihí xíni túni yo candalí xínu Jesucristo. <sup>7</sup> Jáchí na quíji, quíji na tá ñuu ta na xíhi, xíhi na tá ñuu. <sup>8</sup> Joo mí sa xíca í nu yéhe ta ndítahan cañuhu tähý iní. Ndítahan nu yó chindeé yo mí. Tá cández iní Jesucristo ta tá quíhví ini táhan í já cùú á tátuhun ndíxi yó cotó caa. Tá ndatí quixi tucu Jesucristo jácacu a mí já cùú á tátuhun ñuhú ndó yijíni caa. <sup>9</sup> Jáchí coó nacaxí Ndióxi mí ndicuehé a xihín yo jáchi naxihí Jesucristo, xitoho í sahá cuachí sahá ña cúní a jácacu a mí ná a cùhun yó indayá. <sup>10</sup> Naxihí Jesucristo sahá yo ta tá tacu yó á sa naxihí yo mé quíví quixi tucu a ñuyíví yóho já quéá cañehe a mí cohó coo í xihín mé á anda ama cása quivi. <sup>11</sup> Ña cán quéá quiāhva tūhun ndee ini táhan ndó ta chindeé táhan ndó tá quiāhva sa cája ndó.

Ndícami Pablo nuú na cùú cuéntá Jesús ña ndítahan caja na

<sup>12</sup> Ta viti xíca tähví nde nu mé ndó, na cùú cuéntá Jesús ña ná cája cahnu ndó

ñayivi, na cája chúun tañu ndó jáchí ndáca na ndohó íchí cuéntá Jesucristo, xitoho í jánahá na tūhun Ndióxi nu ndó. <sup>13</sup> Ndítahan coo toní ñuhú ndó xihín ná ta quihví ini ndó na xihín ndinuhu ini ndó jáchí cája chúun na cuéntá Ndióxi tañu ndó. Coo vaha ini ndó xihín ñani táhan ndó.

<sup>14</sup> Xíca tähví nde nu ndó ña ná jánani ndó ndá na co cùní caja chúun. Quiāhva ndó tūhun ndee ini ndá na cáruehá ini. Chindeé ndó ñayivi, na vitá ini xihín tūhun Ndióxi. Ta coo cahnu ini ndó xihín ndihí ñayivi.

<sup>15</sup> Candehé ndo. A ndúcú ñehe ndó ña náu cája inga na xihín ndó. Ta ndinducú ndo caja vaha xihín táhan ndó níí tiempo ta quiāhva já caja ndó ña vaha xihín tóco ndihí ñayivi.

<sup>16</sup> Ná coo vatá ini ndó níí tiempo. <sup>17</sup> Ta caca tähví ndó nu Ndióxi níí tiempo. <sup>18</sup> Ndá nacuu ña ndohó ndó ndítahan nu ndo ndiquiāhva ndó ndixahvi nu Ndióxi sahá jáchí ña yóho cúní Ndióxi caja mé ndó, na cùú cuéntá Jesús.

<sup>19</sup> A cáji nuu ndó nuú ña cúní íníma yii Ndióxi caja xihín ndó. <sup>20</sup> A quéhe núu ndó ñayivi, na jáyaha tūhun, ña nasañan Ndióxi nu ná cahán na xihín ndó. <sup>21</sup> Coto ndojó ndo tóco ndihí ña cahán na xihín ndó. Caxí ndó ña vaha <sup>22</sup> ta caxoo ndó nu tóco ndihí ña náu.

<sup>23</sup> Ta Ndióxi, mé á cája ña coo vaha ini ndó, ná caja yii ndihí a ndohó. Ná caja yii á íníma ndo xihín yiquí cuñu ndó já ná coo vií ndo tá ná xínu quíví quixi tucu Jesucristo, xitoho í. <sup>24</sup> Jáchí sa nacaxí Ndióxi mí ta a jándico a mí anda quiāhva jáxínu coo a tóco ndihí ña nacachi a.

Jáxínu coo Pablo ña cahán da ta ndíndayí da na

<sup>25</sup> Ñani mí i, na cùú cuéntá Jesús, caca tähví ndo nu Ndióxi sahá nde.

<sup>26</sup> Cahan Ndióxi ndó xihín ndihí na cùú cuéntá Jesús ta tatí yúhu táhan ndó ta yii caja ndó ña.

<sup>27</sup> Candehé ndo, ñani i, na cùú cuéntá Jesús. Sáhndá i chuuun nu ndó cuéntá Jesucristo, xitoho í ña ná cahvi ndó carta yóho nuú ndihí na cùú cuéntá Jesús ndúu xihín ndó jan.

<sup>28</sup> Ná caja Jesucristo, xitoho í cuahá ña-maní xihín ndó. Já ná coo.

## Carta chí ivi nacahyí Pablo nuú na cùú cuéntá Jesús ñuu Tosalónica

Pablo xihín da xíca xihín dá chíndahá da Ndióxi coo na cùú cuéntá Jesús ñuu Tesalónica

<sup>1</sup> Yehé cùú Pablo, dà cahyí carta yóho xihín Silvano xihín Timoteo ta chíndahá i ña nuú ndihí ndó, na cùú cuéntá Jesús ndúu ñuu Tesalónica. Ta in nanduu ndó xihín Ndióxi, tátá yo ta in nanduu ndó xihín Jesucristo, xitoho í. <sup>2</sup> Ná caja Ndióxi, tátá yo xihín Jesucristo, xitoho í cuahá ñamani xihín ndihí ndó ta ná caja mé á ña ná coo vaha ini ndó.

Caja vií Ndióxi sahá na cája cuachi tá ná quixi tucu Jesucristo ñuyíví yóho

<sup>3</sup> Ndijáá níí quiyí ndítahan nuú nde ndiquiahva nde ndixahvi nu Ndióxi saha ndóhó, na cùú cuéntá Jesús. Ta iin saha cája nde já jáchí nini quiyí candeé chágá ini ndó Jesús ta quíhví chágá ini táhan ndó na cùú cuéntá Jesús. <sup>4</sup> Sahá ña cán quéa cajíi ini nde cáhan nde sahá ndó nuú java ga na cùú cuéntá Jesús ndá nacuu nu tacá na jáchí candeé ini ndó Jesús ta sáhan ndee ini ndó tá ndóho ini ndó sahá ña cája xíxi ñayivi xihín ndó. <sup>5</sup> Jánaha Ndióxi nu yo ña ndaa cája mé á tá cája vií a saha yo. Ta sahá ña yóho sácu tlahva mé á ndóhó cuuhun ndó indiví cacomí a cuéntá sahá ndó jáchí ndóho ini ndó cuéntá mé á viti.

<sup>6</sup> Ta ndaa cája Ndióxi tá jándoho a ini ñayivi, na cája xíxi xihín ndó viti. <sup>7</sup> Ta sahá ña ndóho ini ndó ná caja mé á ña ná ndiquehe ndee ndó ri ndehe va mé quiyí quixi tucu Jesucristo ñuyíví yóho. Ta quixi a xihín tátó ndee mé á ta cuni yó a ña quixi a indiví tañu ñúhu ita. <sup>8</sup> Quixi a jándoho a ini na co candeé ini Ndióxi ta ni co cándusa na tuhun vaha sahá Jesús, xitoho í, mé a cuu jácacu mí. <sup>9</sup> Ta ndá na co candeé ini Jesucristo já quéa ndoho ndivahá ini na anda ama cáá quiyí ini indayá ta a cóo ga na nu Ndióxi. Ta tavá jín Ndióxi na já ná a cúní ga na nuú á anda ama cáá quiyí. Ta a cúní ga na ña náhnu cája Ndióxi xihín ndee mé á. <sup>10</sup> Tá ná quixi tucu Jesucristo ñuyíví yóho já caja cáhnu ndivahá tóco ndihí na

cúú cuéntá Jesús mé á nuú quixi a. Ta já catontó ndivahá tóco ndihí na sahá ña náhnu ndivahá caja Jesucristo. Ta quiahva já caja cáhnu ri ndóhó va Jesucristo mé quiyí cán jáchí candeé ini ndó tuhun vaha sahá Jesús ña nacahán nde xihín ndó.

<sup>11</sup> Na cán quéa ndijáá níí quiyí xíca tähví nde nu Ndióxi sahá ndó ña ná cacuu ndó ñayivi ndaa tá quiahva cúní mé á jáchí sahá ña yóho nandicaxi a ndohó. Ta xíca tähví nde nu Ndióxi sahá ndó ña ná quiahva mé á ndee á nu ndó já ná cuu jáxínu coo ndó ña vaha ña cúní ndó caja ndó nani cája chúun ndó cuéntá mé á sahá ña candeé ini ndó mé á. <sup>12</sup> Ta sahá ña vaha cája ndó, caja cáhnu ñayivi Jesucristo. Anda jáví ndiñehe jíco Jesucristo ndohó jáchí cùú ndó cuéntá mé á ta cája ndó ña cúní mé á. Mé a ndaa cúní Ndióxi xihín Jesucristo, xitoho í caja cuahá ñamani xihín yo.

## 2

Cáhan Pablo sahá da ihví Jesucristo, mé da quixi chí nuú

<sup>1</sup> Cuni joho vaha ndó, ñani mí i, na cùú cuéntá Jesús jáchí cáxi tuhun i xihín ndo sahá mé quiyí quixi tucu Jesucristo ñuyíví játaca mé a mí ndique táhan i xihín á. Xíca tähví i nu ndó ña ná a cándusa ndó java ñayivi tá cachí na ña sa naxinu quiyí ndicó coo Jesucristo ñuyíví. A ndicani ga ini ndó sahá ña cachí na jáchí a juú ña ndaa cùú á. Tá ná cachí na cán ña nacahán Ndióxi xihín ná á tá ná cachí na ña nacachi mé nde ña nandindaa mé quiyí cán á tá ná cachí na cán ña nacahyí nde in carta nu ná já quéa a cándusa toho ndó na jáchí a juú ña ndaa cùú á. <sup>3</sup> A cándusa ndó ña cachí na cán jáchí cúní na jándahi na ndohó. Ta viti cáhan nde ña ndaa xihín ndo sahá mé quiyí quixi tucu Jesucristo. Jáchí jihna ñúhu casahá cuahá ndivahá ñayivi nduu na na ihví Ndióxi ta jándico na íchí cuéntá mé á. Anda jáví casaa in da quini, da cája cuahá ndivahá nuú cuachi. Joo vaxí quiyí tá jándhi Ndióxi sahá dá ini indayá. <sup>4</sup> Ta mé da quini yóho, da cùú da ihví Ndióxi cándají dà mé á ta cándají dà tóco ndihí ña cùú cuéntá mé á. Anda jáví casaa da veñuhu cáhnu ndácaan ñuu Jerusalén cacoo da cán tátuhun Ndióxi. Ta cachí da xihín ñayivi ña cùú dà Ndióxi.

<sup>5</sup> Á co ndicuhun ini ndó tá nasa hijin i xihín ndo já cuiti nacahán i ña yóho xihín ndó.

<sup>6</sup> Ta viti sá cándaa ini ndó ndíá sájí nuu nuú da ihví cán ña ná a xíñu coo da mé quiví ña co ndítahan nuu dá xíñu da. <sup>7</sup> Vatí cámáni jánahá da ihví mé dá nuú ñayivi joo cája chúun jehé da viti ñúhú jándihí da sahá ñaha Ndióxi cúní da. Ta viti íin in a sájí nuu nuú da ihví ta co sahan ñamani jánahá da ihví mé dá nuú ñayivi. Joo vaxi quiví caxoo ña sájí nuu nuú da ihví cán. <sup>8</sup> Ta anda jáví jánahá da mé dá nuú ñayivi. Ta cahní Jesucristo mé da ihví cán xíñin tachí yúhu a tá ná quixi a ñuyíví yóho. Ta jándihí a saha dá xíñin ña ndiyihví ndaa nuú quixi a. <sup>9</sup> Tá cámáni quixi tucu Jesucristo ñuyíví já casaa mé da ihví xíñin cuahá ndivaha ndée ña nasahan tiñáhá saquahá nuu dá. Ta jándahví da ñayivi jáchí caja da cuahá ñaha náhnu, ña co cíu ña ndaa. <sup>10</sup> Ta caja da tóco ndihí nuú cuachi jáchí cúní da jándahví da ñayivi, mé na xíca íchí cuahán indayá. Cuhun na indayá jáchí coó naxeen na candusa na ña ndaa saha Jesucristo ta coó naxeen na quíhvi ini na ña ndaa, ña cuu jácacu náhá. <sup>11</sup> Ña cán quéa quiahva Ndióxi ñamani jándahví da ihví cán na já ná candusa na ña tuhún. <sup>12</sup> Já quéa jándoho Ndióxi ini tóco ndihí na cán jáchí coó nacandusa na ña ndaa ta ndinuhi cuachi nacatóó na caja na.

### Nacaxi Ndióxi ndohó ña ná jácacu a ndohó

<sup>13</sup> Ta ndijáá níí quiví ndítahan nuú nde ndiquiahva nde ndixahvi nuu Ndióxi saha ndó, na cíu ñani nde cuéntá Jesúsa sahá ña quíhvi ini a ndohó. Jáchí janda tá cámáni cavax sahá saha ñuyíví nacaxi Ndióxi ndohó ña ná jácacu a ndohó. Jáchí nandaja víi íníma yíi mé a íníma ndó sahá ña cándezini ndó ña ndaa saha Jesúsa. <sup>14</sup> Cúní Ndióxi ña ná cándezini ndó mé a ña cán quéa nacindahá a ndehe caxi tuhun nde tuhun vaha saha Jesucristo nuu ndo. Nacaxi Ndióxi ndohó ña ná in nduu ndó xíñin Jesucristo, xitoho í. Cáhnu ndivaha cíu mé a ta ndaja cahnu a mí xíñin á.

<sup>15</sup> Ñani mí i, na cíu cuéntá Jesúsa coo ndacú ini ndó xíñin ña cándezini ndó Jesucristo. A ndíndójó ndo tiin tuun ndó ña ndaa ña najánahá nde nuu ndó tá násanduu nde xíñin ndó. Ta tiin tuun ndó ña nacahyí nde nuu ndó viti. <sup>16</sup> Jesucristo, xitoho í xíñin Ndióxi, tátá yo, mé a quíhvi ini mí ná quiahva tuhun nde iní ta anda ama cáa quiví a ndíhi sahá. Ta viti ndáti tiahva caja Ndióxi cuahá ñamani xíñin yo. <sup>17</sup> Ta xíca

tahví nde nuu Ndióxi ña ná jachutú a íníma ndó xíñin ndée mé á. Ta ná chindeé a ndohó cahan ndó tuhun vaha ta caja ndó ña vaha cuití va.

### 3

#### Cúní Pablo ña ná caca tahví na nuu Ndióxi sahá dá

<sup>1</sup> Candéhé ndó, ñani i, na cíu cuéntá Jesúsa. Nuu ndíhí cahán i tuhun yóho xíñin ndo. Caca tahví ndo nuu Ndióxi sahá nde. Ta caca tahví ndo nuu yachí tuhun vaha sahá Jesúsa ndijáá nuu ta ná ndiquehe vaha ñayivi mé tuhun vaha ta quiahva nandiquehe ndó ña. <sup>2</sup> Ta caca tahví ndo nuu Ndióxi sahá nde ña ná jácacu a ndehe ndahá ñayivi quini. Vatí ndúu cuahá na co cándezini Jesucristo <sup>3</sup> joo jáxínu coo Ndióxi tuhun mé á. Já quéa quiahva mé á tuhun nde iní ndó ta cándezini ndó ndohó já ná a caja tiñáhá saquahá ña náu xíñin ndo. <sup>4</sup> Cándezini nde Jesucristo ta cándezini nde ndohó ña caja tá caja ndó ña najánahá nde nuu ndo. <sup>5</sup> Ná chindeé Ndióxi ndohó cándezini ndó ndá quiahva quíhvi ini a ndohó. Ta ná chindeé a ndohó caja nde iní ndó tá ndohó iní ndó tá quiahva nacaja nde iní Jesucristo tá nandoho iní a.

#### Xíñi ñúhú caja chúun í catacú

<sup>6</sup> Cuni joho vaha ndó, ñani mí i, na cíu cuéntá Jesúsa. Nasahnda Jesucristo chuuun nuu yo sahá ña cán quéa sáhindá nde chuuun nuu ndó ña ná caxoo ndó nuú na cíu cuéntá Jesúsa tá cajúsá na caja chúun na tá quiahva najánahá nde nuu ndó. <sup>7</sup> Ta sá xíñi ndó ña ndítahan nuu ndó caja ndó tá quiahva nacaja mé nde tá násanduu nde xíñin ndó jáchí coó nacajusá nde caja chúun nde. <sup>8</sup> Nacahyí nde sahá ña naxixi nde cán. Nacaja chúun vaha nde nuu ta ndiví já nañehé nde juuhún catacu nde já ná a ndohó ni in ndó sahá ña naxito ndó ndehe. <sup>9</sup> Vatí íin sahá nde cachí nde xíñin ndó ña ná coto uun ndó ndehe joo coó nacaja nde já. Ña nacaja nde quéa nacaja chúun vaha nde já najánahá nde nuu ndó ndá quiahva ndítahan nuu ndó caja ndó.

<sup>10</sup> Á co ndícuhyun iní ndó chuuun násahnda nde nuu ndó tá násanduu nde xíñin ndó. Já nacachi nde já: Ndá na co cúní caja chúun, ná a cíxu toho na, nacachi nde. <sup>11</sup> Jáchí nañehé nde tuhun ña ndúu java na júsá tañu ndó ta co cúní na caja chúun na ta xíca nuu na játaca na tuhun sahá ñayivi. <sup>12</sup> Ta sáhindá nde chuuun nuú na jan ta jácahan

ndé na xihín ndé nasahan Jesucristo, xito ho í nuú nde ña ná caja chúun ndísáhnu na já ná ñehé ná ña cuxu na.

<sup>13</sup> Candhé ndo, ñani i, ná cíuú cuéntá Jesús. A cánaá ndó caja ndó ña vaha. <sup>14</sup> Tá ná canduu java ná tañú ndó ta co cúní ná caja na ña cachí nde xihín carta yóho já quéa xíní ñúhú candhé vaha ndó ndá ná cíuú ná ta a cáca nuu ga ndó xihín ná já ná cacahan nuu ná sahá ña caja na. <sup>15</sup> Joo a caja ndó cuéntá ña cíuú ná ná ihví Jesucristo. Xíní ñúhú jácahan ndó ná ña ná caja vaha na jachí cíuú ná ñani ndó, ná cíuú cuéntá Jesús.

#### Ndíndayí Pablo ñayivi Tesalónica

<sup>16</sup> Ta Jesucristo, xito ho í, mé a íin vaha ini ná quiahva mé á nu ndó ña ná coo vaha ini ndó ndaja táhan quivi. Ta ná coo vaha ini ndó xihín ndá ñaha nacuu vaxi nu ndo. Ná coo Jesucristo, xito ho í xihín ndihí ndó.

<sup>17</sup> Yehe cíuú Pablo ta chíndahá i Ndióxi coo ndó ta cáhyí i quivi i xihín ndáha i já ná candaq vaha ini ndó ña mé a ndaa yehe cíuú da nacahyí i ña yóho nu ndo. <sup>18</sup> Ná caja Jesucristo, xito ho í cuqhá ñamani xihín ndo. Já ná coo.

## Carta nu cuítí nacahyí Pablo nuú Timoteo

*Chíndahá Pablo Ndióxi coo Timoteo*

<sup>1</sup>Yehé cútú Pablo, dà cútú in apóstol cuéntá Jesucristo sahá ña nasañhnda Ndióxi xihín Jesucristo chuun yóho nuú i. Ta Ndióxi cútú á ña jácacu mí ta Jesucristo cútú á ña ndatí quixi. <sup>2</sup>Cahyí i carta yóho nuú mún, Timoteo jáchí cútún tátuhun jahyi maní i sahá ña candeé inún Jesucristo. Ta cúní ña ná caja Ndióxi, tátá yo xihín Jesucristo, xitoho í cuahá ñamani xuhún. Ta ná tahví ini a sahún ta ná caja ña ná coo vaha inún.

*Ndícáni Pablo sahá nu co jánahqá ña ndaa*

<sup>3</sup>Tá jalóho cámání quee e ñuu Efeso quixi i estado Macedonia yóho já naxica tähví i nuun ña ná candqún ñuu Efeso jan. Ta viti xíca tähví tucu u nuun ña ná coún cán. Jáchí ndíu java ñayivi cán ta jánahqá ña tühún nuú ñayivi. Ta ndítahan nuú mún cahndún chuun nu ná ña ná a jánahqá ga na ña tühún. <sup>4</sup>Ta ná a tåho no cuento náñi, ña cähán sahá chichí naquixi tásahnu jíco yo. Jáchí ndítuhún uun va na sahá ña yóho ta co chíndeé a ña candeé ini na Ndióxi, mé a nasañu ini jácacu a mí.

<sup>5</sup>Ndítahan cähún ña yóho xihín ná jáchí cúní Ndióxi ña ná quihví ini tähán i xihín ndihí íníma yo ta cúní a ña ná caja i ña vaha cuití va ta cúní a ña ná candeé iní mé a xihín ndinuhu iní. <sup>6</sup>Joo java ñayivi najándicoo na ña ndaa ta najátví ña caja na jáchí ña quihví cuití va ndítuhún xihín tähán na. <sup>7</sup>Vatí cúní na cán jánahqá na ley Moisés joo co cándaa ini na ña jánahqá na ta ni co cándaa ini na ña cähán mé ley.

<sup>8</sup>Joo sa xíní yo ña mé ley Moisés cútú á ña vaha tá ná caja chūun vaha í ña tá quiahva cúní Ndióxi. <sup>9</sup>Xíní níuhú ndícuhan iní ña ni in ley co chícañ cuachi jatá ñayivi vaha. Joo chícañ cuachi jatá ñayivi quini, ña saá ini jáchí co caja na ña cúní Ndióxi. Ta chícañ cuachi jatá ñayivi nuú, na caja cuahá nuú cuachi. Ta chícañ cuachi jatá ñayivi co caja cähnu Ndióxi, ña cánahá xihín mé á. Ta chícañ cuachi jatá ñayivi sáhní tátá náná na xihín jata tóco ndihí na sáhní ndii. <sup>10</sup>Ta chícañ cuachi jatá ñayivi ndíu xihín taa á ñáha, na co cútú yií ná á

ñajílhí na. Ta chícañ cuachi jatá taa líhi, dà quihvi nuu xihín inga taa. Ta chícañ cuachi jatá na cája cuíhná ñayivi sahá ña cúní na jicó ñahá na. Ta chícañ cuachi jatá ñayivi cähán ña tühún, mé na janda quivi Ndióxi tähán na tähán na ña tühún. Ta chícañ cuachi jata tóco ndihí ñayivi tá co cája na ña ndaa, ña jánahqá Ndióxi nu yó caja i. <sup>11</sup>Ta nasañhnda Ndióxi chuun nuú i ña ná jánahqá i ña ndaa yóho nu ndo jáchí cúní a jácacu a tóco ndihí ñayivi. Cähnu ndiváha cútú mé á ta ndítahan caja cähnu í mé á.

*Ndíquiahvá Pablo ndixahvi nu Ndióxi jáchí tähnda ini a sahá dá*

<sup>12</sup>Ndíquiahvá i ndixahvi nu Jesucristo, xitoho í jáchí nacaxi a yehé caja chúun i cuéntá mé á ta nasañhán mé á tühun ndéé ini i ña ná caja i ña xihín ndinuhu ini i. <sup>13</sup>Vatí jihna nacahán ihví i sahá Ndióxi ta nacaja xíxi i xihín á ta nacanahá i xihín á joo nacaxi a yehé. Ta natahnda ini a sahá i tähán cámání candeé ini i Jesucristo jáchí coó nacandaa ini i ña nacaja i. <sup>14</sup>Nacaja Ndióxi cuahá ñamani xihín i tähán nacaja ña ná candeé ini i mé á. Ta nacaja mé á ña nachutú ndaa ini i xihín ña quihví ini i ná cútú cuéntá mé á sahá ña in nanduu u xihín mé á.

<sup>15</sup>Ña yóho cútú a ña ndaa ta ndítahan nuú ndihí ñayivi candusa na ña cächí i yóho: naquixi Jesucristo ñuyíví yóho, jácacu a ñayivi, na caja cuachi. Ta yehé cútú u dà yójó nu ndihí na caja cuachi. <sup>16</sup>Ta sahá ña yóho natahvi ini Ndióxi sahá i já ná cuu naqha Jesucristo ndaja cähnu coo ini mé á. Ta vatí nacaja cuha chágá i cuachi a juú ga java ga ñayivi joo já nasañu u yuhú nuú tóco ndihí na vaxi chágá chí nuú ña ná candeé ini na mé á ta já coo na xihín mé á andá ama cása quivi. <sup>17</sup>Ña cán quéa cóho caja cähnu i Ndióxi andá ama cása quivi jáchí mé á cómí a cuéntá sahá yo andá ama cása quivi. Ta mé Ndióxi a cútú quivi a ta ndichí ndiváha jini a ta íin a indív vatí a cútú cúní a. Cähnu ndiváha cútú mé á. Já ná coo.

<sup>18</sup>Candehún Timoteo, dà cútú tátuhun jahyi mí i. Jándacoo i chuun yóho nu mún jáchí quiahva já nacachi profeta sahún jihna. Ta xíní níuhú quiahva ndee inún cajún ña jáchí cútú á tátuhun cání tähún xihín ña nuú. <sup>19</sup>A jándacoo ña candeé inún Jesucristo ta xihín ndinuhu inún cajún ña ndaa. Jáchí java ñayivi coó nacaja na ña xíní na cúní Ndióxi caja na ta chí nandihi

sahá ña candeé ini na Jesucristo. <sup>20</sup> Ivi táhan dä cán cúú Himeneo xihín Alejandro. Nandiquiahva i da cán ndáhá tiñáhá sacuahá va já ná candaä ini da ña a cuú quehe núu da Ndióxi xihín tuhun cähän da.

## 2

*Ndaja caja í caca tähví yo nu Ndióxi*

<sup>1</sup> Ña xíní ñúhú chágá caja ndó quéa caca tähví ndó nu Ndióxi sahá ndihí ñayivi ña ná tähví ini a saha ná. Nndiquiahva ndó ndixahvi nu Ndióxi sahá ñamani cája mé á xihín ndó. <sup>2</sup> Ta sa mé quiähva já ndítahan caca tähví ndó nu Ndióxi saha tóco ndihí na cómí cuénta saha yo. Jáchí tá caja í ña yóho já cuu coo vaha iní xihín ndihí ñayivi ta já coo toní ñúhú xihín táhan í. Ta já nuná nu yo caja cámú í Ndióxi. <sup>3</sup> Tá xicä tähví yo nu Ndióxi sahá ndihí ñayivi já quéa cája í ña vaha ta cajíi ini Ndióxi, mé á jácacu mí. <sup>4</sup> Jáchí cúní a jácacu a tóco ndihí ñayivi ña ná candaä ini na ña ndaa saha mé á. <sup>5</sup> Jáchí íin in táláá Ndióxi. Ta íin in táláá Jesucristo, mé á cúú á taa ta cája mé á ña ná ndique táhan maní ñayivi xihín Ndióxi. <sup>6</sup> Ta nandiquiahva Jesucristo mé á quivi a sahá cuachi tóco ndihí ñayivi. Xihín ña yóho náhá Ndióxi nu yo ña nandindaa tiempo tá cúní a jácacu a tóco ndihí ñayivi. <sup>7</sup> Sähá ña cán quéa nacaxi Ndióxi yehe cacuu u apóstol ña ná caxi tuhun i tuhun vaha sahá Jesús nuu ná tóho, na co cúú na Israel. Jáchí cúní Ndióxi ña ná candaä ini na ña ndaa já ná cuu candeé ini na Jesús. Cähän i ndinuhu ña ndaa xihín ndo ta co cähän i ña tuhun xihín ndo.

<sup>8</sup> Ña cúní quéa ná caca tähví nataa nu Ndióxi tóco ndihí nu tácá ndo. Ta ndítahan nu ná coo ví ímíma ná já ná cuu ndiñehe na ndáhá ná nu Ndióxi. Ta ndítahan nu ná jándicoo na ña xójo ini na ta ná a cáni táhan yúhu ná. <sup>9</sup> Jári co ndítahan nuú najihí candixi na jahmá lända. Ta ná a cája lända ná xihín ijí jini ná. Ta ná a ndíhi ini na caja cutú ná mé ná xihín ñaha juuhun cuáán á xihín jíqui yahvi tátuhun perla. Ta ná a cándixi na jahmá yahvi ña cája lända ná xihín. <sup>10</sup> Vaha chágá ná caja na ndinuhu ña vaha tá quiähva ndítahan nuú najihí, na cúú cuénta Jesús caja na. <sup>11</sup> Ndítahan nuú najihí canduu táji ná cumi johno na tuhun Ndióxi ta coto ná a ndíñehe jíco ná mé ná.

<sup>12</sup> Ta co sáhan i ñamani nuú najihí ña ná

jánahá na nu tácá ñayivi. Ta ni co sáhan i ñamani nu ná ña ná cacomí na cuénta sahá dataa. Joo ndítahan nu ná coo táji ná.

<sup>13</sup> Jáchí jihna ñúhú nacavaha Ndióxi Adan ta anda jáví nacavaha mé á Eva. <sup>14</sup> Ta a juú Adan cúú da najándahvi tiñáhá sacuahá, vaha. Joo najándahvi tiñáhá sacuahá Eva ta já nandicava ña nuú cuachi. <sup>15</sup> Sähá ña cán quéa nacaja Ndióxi xihín najihí ña ná ndoho ini na tá caci jahyi na. Joo jácacu Ndióxi na tá ná a jándacoo na ña candeé ini na mé á. Ta já ndítahan nu ná quihvi ini na ñayivi. Ta ná a cája lända ná ta ná ndiquiahva víi na mé ná ndáhá Ndióxi.

## 3

*Ndaja ndítahan caja na sacuahá nuú na cúú cuénta Jesús*

<sup>1</sup> Ta ña ndaa cúú tuhun yóho: ndá da cúni cacuu da sacuahá nuú na cúú cuénta Jesús, ña vaha quéa cúní da. <sup>2</sup> Jáchí ndítahan nuú da sacuahá caja da ndinuhu ña ndaa já ná a ñéhe íní ñayivi cähän núu na saha dá. Ta in túhún ñajihí da ndítahan coo. Ta ndítahan cacuu da dä tacü ini ta ndítahan nu dá cañehe vaha da quiähva ta ndítahan cacuu da dä íin toní ñúhú ñayivi xihín. Ta ndítahan nu dá cajíi ini da ndiquehe vaha da ñayivi vehe da. Ta xíní ñúhú cacuu da dä tiahva vaha jánahá da ñayivi. <sup>3</sup> Co ndítahan cacuu da dä xihí ta co ndítahan cacuu da dä ndícu cuachi xihín ñayivi. Joo ndítahan coo víi da xihín ñayivi ta ná a cáni táhan da xihín ná. Ta co ndítahan cacuu da dä ndiáva ini quehe cuahá da jiyhún. <sup>4</sup> Ta ndítahan nuú da sacuahá cacomí vaha da cuénta saha ná vehe da. Ta ndítahan nuú jahyi da coo johno na nu cähän tátá na xihín ná ta ná coo toní ñúhú na xihín dá. <sup>5</sup> Jáchí tá ta a cúú cañehe vaha da cuénta sahá na vehe da já quéa a cúú caja da cacomí da cuénta sahá na cúú cuénta Jesús. <sup>6</sup> Ta mé dä sacuahá co ndítahan cacuu da dä jácá nandihvi íchí cuénta Jesús. Jáchí tiahva ná casahá dä ndiñehe jíco dä mé dä ta sahá ña yóho jándoho Ndióxi ini da tá quiähva nacaja mé á xihín tiñáhá sacuahá. <sup>7</sup> Mé dä sacuahá nuú na cúú cuénta Jesús yóho ndítahan cacuu da dä íin toní ñúhú ñayivi, na co cúú cuénta Jesús xihín. Jáchí tiahva náa ndicava da ndáhá tiñáhá sacuahá ta xihín ña yóho cähän núu ñayivi ñuyíví saha dá.

*Ndaja ndítahan caja na tá ná chindeé na na sacuahá veñuhu*

<sup>8</sup> Ta ndá dä cúní cacuu dä chindeé na sacuahá veñuhu ndítahan nu dä cacuu da dä íin toní ñúhú ñayivi xihín. Ta xíní ñúhú cacuu da dä cáhan ndinuhu ñä ndaa. Co ndítahan cacuu da dä xishí ta co ndítahan nu dä cacuu da dä ndiává ini coo cuahá jíuhún nuu. <sup>9</sup> Ta xíní ñúhú tiin tuun da ñä ndaa ñä nanahá Ndióxi nu yo ta ñä yóho cúu á ñä ndítahan candeé iní mé á. Ta ná a cähvi ivi joho ini da. <sup>10</sup> Jihna ñúhú xíní ñúhú coto ndojó ndo mé dä cúní chindeé na sacuahá veñuhu. Ta tá co caja da cuahí nu Ndióxi já quéa cuu chindeé dä ñä sacuahá veñuhu. <sup>11</sup> Ta jári najihí viti ndítahan cacuu na na íin toní ñúhú ñayivi xihín. Co ndítahan cacuu na na ndahndá yúhu. Ná cacuu na na ndísahnu ini ta ná caja chíun na xihín ndinuhu ini na. <sup>12</sup> Ta mé dä chindeé na sacuahá veñuhu ndítahan nu dä cacuu da dä coó inga ñáhá xihín ta in tühún ñajishí da ndítahan coo. Ta ndítahan nu dä cacomí vaha da cuéntá sahá jahyi da xihín sahá ndihi na vehe da. <sup>13</sup> Jáchí tá ná chindeé vaha da yóho na sacuahá veñuhu já casahá cahvi vaha ini ñayivi sahá dá ta xihín ñä yóho ñehé iní dä cähpan chágá dä sahá ñä candeé ini da Jesucristo.

*Cáhan Pablo sahá ndá q cíuú mé Jesucristo*

<sup>14</sup> Vatí ndúcú u saa yachi i jan joo cähví i carta yóho nuun. <sup>15</sup> Jáchí tá ná cacuáchí lohi i saa i jan já quéa sa cándaa inún xihín carta yóho ndaja ndítahan caja mí, na cíuú na vehe Ndióxi. Mé a ndaa cíuú yó cuéntá Ndióxi, mé a tácú ta ndítahan nu yo quiahva ndee iní ndiquehé sahá ñä ndaa cähpan saha Jesucristo. <sup>16</sup> Jáchí mé a ndaa cähnu ndiváha cíuú ñä náhá Ndióxi nu yo: Naquixi Jesucristo ñuyíví yóho ta násacuua ñayivi.

Ta nácahan ínima yii Ndióxi sahá mé a ñä coó nácaja ni in cuahí.

Ta náxini tátó Ndióxi Jesús.

Ta ndijáá ñuyíví nácaxi tühun na tühun vaha sahá mé a ta cuahá ndiváha ñayivi nácahdeé ini na mé a ta tá nandihu nändaa cuahán indiví.

#### 4

*Cáhan Pablo sahá na co jánahá ñä ndaa*

<sup>1</sup> Cáhan caxí ínimá yii Ndióxi ñä vaxí quivi jándaco java ñayivi ñä candeé ini

na Jesús. Ta casahá na candico na na jándahvi ñahá, na jánahá ñä naquixi nuu tiñahá sacuahá. <sup>2</sup> Ta mé na jánahá ñä tühún yóho co cíuú ná tá quiahva ndáa na. Jáchí cíuú ná ñayivi tühún, na nändaji xíní túni xihín ñä níu. <sup>3</sup> Ta jánahá na yóho ñä a cíuú tandahá ñayivi ta jánahá na ñä a cíuú cuxu ñayivi java ñáha, ñä naçavaha Ndióxi cuxú. Joo cúní Ndióxi ñä ná cuxú ñä jan tá ná ndiquiahva í ndixahvi nu mé a sahá jáchí candeé iní mé a ta xíní vaha í ñä ndaa. <sup>4</sup> Jáchí tóco ndihi ñä naçavaha Ndióxi cíuú á ñä vaha ta ni in ñáha co ndítahan candaíjí yo. Joo ná ndiquehe vaha í ñä ta ná ndiquiahva í ndixahvi nu Ndióxi sahá. <sup>5</sup> Jáchí tá ná caca tähví yo nu Ndióxi já caja yii mé a ñä xihín tühun mé á.

*Ñä ndítahan caja dä caja chíun vaha cuéntá Jesucristo*

<sup>6</sup> Tá ná jánahún ñä yóho nuu na cíuú cuéntá Jesús já quéa caja chíun vahún cuéntá mé á. Ta quiahva ndee inún tá jácuaha chágún ñä ndaa sahá Jesucristo já ná candico cáhnu chágún íchí cuéntá mé á. <sup>7</sup> Coto a taa johún cuento ñä cáhan ñayivi ñuyíví jáchí coó sahá toho ñä jan. Ñä ndítahan cajún quéa jácuaha chágún ndá quiahva caja cáhnún Ndióxi. <sup>8</sup> Tá ná caja chíun cuahá í xihín yiquí cíuú í já quéa chindeé a mí ñuyíví yóho cuití va. Joo tá ná caja cáhnu í Ndióxi já quéa chindeé chágá yó mí jáchí xihín ñä yóho cuu coo vaha iní ñuyíví yóho ta sa xihín mé ñä yóho cuu coo vaha í xihín Ndióxi tá ná cuhun yó coo í xihín mé á. <sup>9</sup> Ta ñä yóho cíuú á ñä ndaa ta xíní ñúhú candusa í ñä. <sup>10</sup> Ta sa sahá mé ñä ndaa yóho caja chíun vaha í jáchí candeé iní Ndióxi, mé a tácú. Mé a cán cúní a jácacu a tóco ndihi ñayivi ta mé a ndaa jácacu a tóco ndihi na candeé ini mé á.

<sup>11</sup> Ta xíní ñúhú jánahún nuu ñayivi tóco ndihi ñä cähví i xihín yóho ta xíní ñúhú cahdún chuuñ nu ná ñä ná caja na ñä.

<sup>12</sup> Coto a quiahvún ñamani nuu ñayivi quehe níu na yóho sahá ñä cíuú dä yúta. Joo xihín ñä cajún xíní ñúhú jánahún nuu na cíuú cuéntá Jesús ndá quiahva ndítahan caja na ta ndá quiahva ndítahan cähpan na. Ta xíní ñúhú jánahún nu ná ndá quiahva ndítahan quihví ini na ñayivi ta ndá quiahva ndítahan candeé ini na Ndióxi. Ta víi uun cajún tóco ndihi ñáha já ná a cähvi núu ini ñayivi sahun. <sup>13</sup> Nani ndátún saa i jan

xíní ñúhú cahvún tūhun Ndióxi nuú na cíú cuéntá Jesús nu táca na. Ta quiáhvún tūhun ndee ini na ta jánhún na.<sup>14</sup> Coto a ndíndójún sahá ña nasahan Ndióxi nuún tá naxica tähví na cíú profeta nu mé á sahun tá nachojó na sacuahá ndáha na jinún.

<sup>15</sup> Xihín indinuhu inún caja chūn cuéntá Ndióxi já ná cuu cuni tóco ndihi ñayivi ndá quiáhva xíca vahún xihín ñaha Ndióxi.

<sup>16</sup> Cuéntá vahá coún xihín mún ta cuéntá vahá coún xihín ña jánhún nuú ñayivi. Ta xíní ñúhú coo ndacú inún xihín ndihi ña cajún. Jáchí tá ná cajún ña yóho já quéa cäcu ndaa ínimun ta jári cäcu ndaa ínimun na xímí joho nu cahún.

## 5

Jánaha Pablo nu Timoteo ndaja ndítahan caja da xihín ña cíú cuéntá Jesús

<sup>1</sup> Co ndítahan jánanún dä sáhnu. Ña ndítahan cajún quéa jácahun dä tá quiáhva cahún xihín tátun. Ta xíní ñúhú cajún xihín dä yúta chágá tá quiáhva cajún xihín ñanún.<sup>2</sup> Ta xihín na sáhnu xíní ñúhú cajún tá quiáhva cajún xihín nánún. Ta xihín na tacú xíní ñúhú cajún tá quiáhva cajún xihín quiáhvún. Víi uun cajún xihín ná ta a cähvi nuú inún sahá ná.

<sup>3</sup> Xíní ñúhú chindeé ndó na cuáan tá co ndíni cíú na tá tå coó na vehe na.<sup>4</sup> Joo tá íin in ña cuáan ta ndúu jahyi ña á ndúu jahyi ñání ña já quéa ndítahan nuú na cán chindeé na ña. Jáchí tähán ini Ndióxi xihín ñayivi tá chindeé na tátá náná na ta xihín ña yóho chahvi na ñamani nacaja tátá na xihín ná ta ñajácuahnu ñahá na.<sup>5</sup> Jáchí mé ña cuáan ña mé a ndaa coó na vehe ña chindeé na ña mé ña cán cíú ña cández chágá ini ña Ndióxi. Ta ñuu ta ndiví xíca tähví ña nu mé á ña ná chindeé a ña.<sup>6</sup> Joo ña cuáan, ña caja ña nuú ña cúní mé cuití ña, ña cán cíú ña tátuhun ndii vatí tacú ña.<sup>7</sup> Ña cúní quéa ná cahndún chuun yóho nuú na cán já ná a ñéhé íní yo jánamí na.<sup>8</sup> Jáchí ndá na co chindeé na tähán na ta ni co chindeé na ná vehe na já quéa náhá caxí a ña co cández ini na Jesucristo ta janda núu chágá caja na a juú ga na co cíú cuéntá Jesús.

<sup>9</sup> Tá ndúu na cuáan ta tá cúní na chindeé na ná sacuahá veñuhu já quéa cahyún quívi ná nuú tutu. Xíní ñúhú cacuu na na naxiñu uni jíco cuia á chágá ta xíní ñúhú cacuu na na nasañiñ xihín in tühún yíi.<sup>10</sup> Mé na yóho xíní ñúhú cacuu na ná cähán vahá ñayivi

sahá ña vahá caja na. Tátuhun tá nasañdaa vahá na jahyi na á tá nandiquehe vahá na ñayivi xínú coo vehe na. Ta xíní ñúhú cacuu na ná caja ndívi nuú na cíú cuéntá Jesús. Ta ndítahan coo tiáhva na chindeé na ñayivi tá ndóho ini na. Tá caja na ña yóho xihín java ga ñaha vahá já cuu quehe ndó na ná chindeé na ná sacuahá veñuhu.

<sup>11</sup> Joo a cahyí tohún nuú tutu jan quívi na cuáan, na yúta chá jáchí tiáhva náá casahá ndiává ini na tandahá tucu na ta anda jáví jándicoo na chuun caja na cuéntá Jesucristo.<sup>12</sup> Ta xihín ña yóho caja na cuachi nu Ndióxi jáchí coó najáxínu coo na tūhun nasañan na nu Ndióxi.<sup>13</sup> Ta jári cásahá xíca nuu na tá vehe tá vehe ta ndúu na na jusá. Ta a juú ña cán cuití va vahá jáchí cásahá na ndahnda yúhu ná ta quíhvi nuu na nuú co ndítahan coo na ta cásahá cähán na ña co ndítahan cahan na.<sup>14</sup> Sahá ña cán quéa cächí i xuhun ña vahá chágá ná tandahá najihí cuáan, na yúta ta ná cacu jahyi na ta ná candaas vahá na vehe na. Ta xihín ña yóho a quiáhva toho na ñamani nuú na ihví yo cähán nuú na sahá ná.<sup>15</sup> Jáchí ndúu java najihí cuáan ta sa nacaxoo na nu íchi cuéntá Jesús ta nacasahá na ndíco na tiñáhá sacuahá.

<sup>16</sup> Joo ndóhó, na cíú cuéntá Jesús tá íin ña cuáan nu ndó ndítahan chindeé mé ndó ña já quéa ná nuñá nuú java ga na cíú cuéntá Jesús chindeé na ná cuáan, na coó na vehe.

<sup>17</sup> Na sacuahá, na caja chūn vahá na veñuhu ta cómí na cuéntá sahá na cíú cuéntá Jesús, na cán cíú na ndítahan ndiquehe cuahá chágá yahvi sahá chuun caja na. Ta chágá ví tá xíca nuu na jánhaha na tūhun Ndióxi nuú ñayivi.<sup>18</sup> Jáchí já cächí tūhun Ndióxi já: “A chícañ núnú yuhú tindiquí nani caja chūn rí sání rí trigo. Joo xíní ñúhú quiáhvún ñamani nu rí caxí rí ña.” Ta íin inga tucu nu cächí a: “Dá caja chūn ndítahan quehe da yahvi sahá chuun caja da.”

<sup>19</sup> A cándusa tohún na chícañ cuachi jatá in dä sacuahá veñuhu tá tå co ndúu ivi á uní testigo na sáhan tūhun sahá ña nacaja da cán.<sup>20</sup> Joo ndá na co cúní jándacoo cuachi caja na já quéa xíní ñúhú jánanún na nu tähýi ndihi na cíú cuéntá Jesús já quéa ná cayihví na java cán caja na cuachi.

<sup>21</sup> Nu Ndióxi ta xihín nu Jesucristo xitohó í ta xihín nu tátó Ndióxi sáhndá i chuun

nu mún Timoteo ñaq ná cajún ñaq nacahyí i yóho. Tá jánanún in dä cíú cuéntá Jesús sahá cuachi cája da xíní ñúhú jánanún dä vatí cíú dä dä xíní táchan vaha xuhun.<sup>22</sup> Coto a chójó yachún ndáhún jímí in dä cíúni cacuu dä sácuha nuú na cíú cuéntá Jesús. Jáchí nu cuítí xíní ñúhú ndicani vaha inúna sahá ñaq jánanún. Jáchí tá ná caja da cán cuachi já quéa cahán java ñayivi ñaq íin vaha inún xihín cuachi cája da. Coto a cajún ñaq núu.

<sup>23</sup> Ta sahá ñaq já cuítí quíhví tísún sahá ñaq cán co ndítahan cohún ticuquí uun va. Joo ndítahan coho lohún vino.

<sup>24</sup> Ndúu java ñayivi ta náha caxí táchí cuachi cája na nuú ñayivi vatí cámáni náhama na ñaq. Joo ndúu java ga ñayivi ta ñúhú jehé cuachi na joo vaxi quiví tá ndacanáha cuachi na.<sup>25</sup> Ta sá mé quiqhva já ndácanáha caxí táchí ñaq vaha cája java ñayivi. Ta vatí ná caja jehé na ñaq vaha joo vaxi quiví ndacanáha nuú ñaq vaha nacaja na.

## 6

<sup>1</sup> Ta ndúu na cíú cuéntá Jesús ta cómí xitoho na cuéntá sahá ná já quéa xíní ñúhú caja cahnu na xitoho na xihín ndinuhu iní na já ná a cáhan núu ñayivi sahá quiví Ndióxi ta ni ná a quéhe núu na ñaq jánahá nde.<sup>2</sup> Ta tá ndúu java na ta xitoho na cíú dä cuéntá Jesús já quéa xíní ñúhú caja cahnu na xitoho na sahá ñaq cíú dä cán dä candeé iní Jesús. Ñaq ndítahan caja na cán quéa caja ndíví vaha chágá na nu sáhndá xitoho na caja na jáchí xíní ñúhú ndicuhun iní na ñaq tå caja ndíví vaha na nuú dä cán já quéa caja ndíví vaha na nuú ñani mání ná, dä cíú cuéntá Jesús. Ñaq yóho quéa xíní ñúhú jánahún nuú ñayivi ta xíní ñúhú cahndún chuun nü ná ná ná caja na ñaq.

*Ñayivi, na jánahá ñaq co cíú ñaq ndaa*

<sup>3</sup> Ta ndá ñayivi tá jánahá na ñaq co cíú ñaq ndaa, ñaq co ndíque táchan vaha xihín tuhun nacahán Jesucristo, xitoho ínu yóta ni co ndíque táchan vaha xihín tuhun Ndióxi<sup>4</sup> já quéa na cán cíú ná ñaq ndínehe jíco ndivaha mé ta co xíní na ni in ñaha. Ndiáva iní na cani táchan yúhu ná ta cásahá cahihví iní na xihín ñayivi ta ndícuehe xihín táchan na. Cánahá na xihín ñayivi ta co candeé iní táchan na.<sup>5</sup> Ta co jándaco na ñaq cání táchan na sahá ñaq najaca xíní túni na ta nandindójó na ñaq ndaa. Ta cíúni na ndicuícá na xihín ñaq jánahá na nuú ñayivi sahá Jesús.

Candehún. Xíní ñúhú caxoún nuú na cán.<sup>6</sup> Vatí mé a ndaa tá ndíco yó íchí cuéntá Jesús cíú yó na cuicá ndivaha nani íin vaha iní xihín ñaq cómí yo. Jáchí coó ñaha ñéhé tá naquixí ñuyíví yóho ta ni coó ñaha cuu cañéhé coho tá ná quiví.<sup>7</sup> Sahá ñaq cán quéa tá íin ñaq cuxú ta tá íin ñaq candixí já quéa ndítahan coo vaha iní.<sup>8</sup> Joo na cíúni ndicuícá co candeé na cahnu na nuú ñaq cíúni yiquí cuñu na ta já ndícava na nuú cuachi. Ta xihín ñaq yóho cásahá ndicají iní na caja na cuahá nuú ñaq núu. Ta cája ñaq yóho ñaq ná ndihi sahá ná.<sup>9</sup> Ta sahá ñaq cátóó ndivaha ñayivi jíuhún sahá ñaq cán quéa quixi cuahá ñaq núu jímí ná. Ndúu java na najándacoo na ñaq candeé iní na Jesús sahá ñaq cátóó na jíuhún. Ta sahá ñaq yóho nacásahá ndóho iní na jända nuú co ndéé ga iní na.

*Ndítahan nuú na cíú cuéntá Jesús candico cahnu na mé á*

<sup>11</sup> Candehún, Timoteo, dä cíú cuéntá Ndióxi. Xíní ñúhú caxoún nuú tóco ndihi ñaq núu já ná candico cahnu íchí cuéntá ñaq ndaa. Cajún ñaq vaha, ñaq cíú Ndióxi ta candeé inúñ Jesús. Xíní ñúhú quíhví inúñ ñani táchun. Quiqhva ndeé inúñ tá ndóho inúñ ta ví cajún tóco ndihi ñaha.<sup>12</sup> Xíní ñúhú candico cahnu íchí ñaq candeé inúñ Jesús. Coto a jándacoún íchí ñaq cañéhe yohó cuhún coún indiví xihín Ndióxi. Jáchí sahá mé ñaq jan nacana Ndióxi yohó tá naçaxi tühún nuú cuahá ñayivi ñaq candeé inúñ Jesucristo.<sup>13</sup> Nu Ndióxi, mé á cája ñaq tácú tóco ndihi ñaha ndúu ñuyíví, xihín nu Jesucristo, mé á coó nayihví cahán ñaq ndaa tá nasandichi a nu Poncio Pilato, nu ndíví a cán sáhndá i chuun nu mún, Timoteo<sup>14</sup> ñaq ná cajún xihín ndinuhu inúñ tóco ndihi ñaq sáhndá Ndióxi nuun. Ta coto a ndijama tohún ñaq jáchí quiqhva já ñéhé iní ñayivi jánaní na yohó. Ta xíní ñúhú cajún ñaq yóho jända quiqhva ná tandaas quiví quixi tucu Jesucristo, xitoho í.<sup>15</sup> Ta tá ná xinu coo quiví nasacu iní Ndióxi já caja mé a ñaq ná coo tóco ndihi ñaq yóho. Jáchí in tühún Ndióxi cíú á ñaq yii ta cíú á xitoho nu tóco ndihi ñaha. Ta mé á cíú á jímí nu in in dä cómí cuéntá sahá ñayivi ndúu ñuyíví. Ta mé á cíú á xitoho nuú ndihi dä cíú xitoho nuú ñayivi ndúu ñuyíví.<sup>16</sup> Mé á cíú á in tühún jímí Ndióxi, ñaq a cíú quiví. Ta ni in ñayivi a cíú cativi yati nu íin mé á jáchí yéhé ndivaha nu íin mé á. Ta ni in ñayivi ndúu ñuyíví

cóó naxini na mé á jáchi a cuú cuni ñayivi Ndióxi. Ndítahan caja cáhnu í mé á anda ama cáá quívi jáchi a ndíhi toho sahá ña sáhndá mé á chuun. Já ná coo.

<sup>17</sup> Ndítahan nu mún, Timoteo cahndún chuun nuú ña cómí cuahá ñaha cuícá ñuyíví yóho ña ná a cáuu na ñayivi catóó ndiñehe jíco mé. Ta xíní ñúhú cahndún chuun nuú ná ña ná a candeé ini na ñaha cuícá cómí ña jáchi cuu ndihi sahá tócoó ndihi ñaha cómí ña. Ña ndítahan caja na quéa candeé ini na Ndióxi, mé á quíhva tócoó ndihi ñaha nu yo já ná cajii íní yo. <sup>18</sup> Cahndún chuun nu ná ña ná caja vaha na ta ná cayojó joho ña vaha cája na. Ta xíní ñúhú coo tiahva na cahnda java na ña cómí ña xihín java ga ñayivi. <sup>19</sup> Jáchí xihín ña yóho ñehé táhví ná coo cuahá ñaha cuícá ña indíví tá ná tandaa quívi cuhun ña coo na xihín Ndióxi anda ama cáá quívi.

<sup>20</sup> Candehún Timoteo. Xíní ñúhú quehe cuéntá vahún ña jánhá i nñun. Coto a cúní johún tuyhun ña cáhan ñayivi ñuyíví jáchi coó sahá toho a ta ni co xíní ña cáhan ña sahá. <sup>21</sup> Jáchí java ña cán cáchí ña xíní ndivaha na joo najándacoo na ña candeé ini na Ndióxi.

Ná caja Ndióxi cuahá ñamani xihín ndihi ndó. Já ná coo.

## Carta ivi nacahyí Pablo nuú Timoteo

Chíndahá Pablo Ndióxi coo Timoteo

<sup>1</sup> Yehé cíú Pablo ta cíú u dà apóstol, dà caja chíun cuéntá Jesucristo. Nacaxi Ndióxi yehé ta nachindahá mé á yehe caxi tuhun i tuhun vaha sahá Jesucristo nuú ñayivi. Jári nasañan Ndióxi tuhun a nuú ñayivi ña cán quéa tá candeé ini na mé á já quéa cuhun na coo na xihín mé á andá ama cáá quiví. <sup>2</sup>Cáhyí i carta yóho nu mún, Timoteo jáchí cíú tátuhun jahyi mí i ta quíhvi ndivaha ini i yohó. Ná caja cuahá Ndióxi, tátá yo xihín Jesucristo, xitoho í ñamani xuhun ta ná tahnúda ini a sahun ta ná caja mé á ña ná coo vaha inún.

Jácahan Pablo Timoteo ña ná ndicani da nuú ñayivi sahá Jesucristo

<sup>3</sup> Ndíquiahva i ndixahvi nu Ndióxi saha mún, Timoteo jáchí ndícuuhun ini i yohó tá xícá tahví i nu Ndióxi nuú ta ndiví. Caja chíun vaha i cuéntá mé á tátuhun nacaya chíun tásahnu jíco i sañahá. Ta xíni ña íin vaha ínima i nu Ndióxi. <sup>4</sup> Ndícuuhun ini i ndaja nasañu ndivahún ta natahndá inún sahá i tá naquee e cán vaxi i yóho. Jári yehe va cíni ndivaha i cuni tucu u yohó já ná chutú ndaa ini i xihín ña cájii ndivaha ini i. <sup>5</sup> Ndíquiahva i ndixahvi nu Ndióxi tá ndícuuhun ini i ña mé a ndaa candeé inún Jesucristo. Nu cuítí nacandeé cánu ini ná chéhun, Loida xihín nánún, Eunice Jesucristo ta quiahva já xíni vaha i ña candeé cáhnu inút meá.

<sup>6</sup> Ña cán quéa jácahan i yohó ña ná ndicuhun inún caja chíun chágún xihín ña nañehe táchvun nu Ndióxi tá nachinú i ndahá i jinun. <sup>7</sup>Jáchí co cíni Ndióxi ña ná cayihví yo. Já quéa nasañan ínima yii á nu yo já ná nduu ndee iní ta ná quíhvi ini táhan í ta ná cahnu yo mí cañehe vaha i quiahva xihín á. <sup>8</sup>A cácahan toho nuun cahun tuhun vaha sahá Jesucristo, xitoho í. Ta a cácahan nuun sahá mí i vatí ndácaan i vecaa sahá Jesucristo. Joo ña ndítahan cajún quéa quiahva ndee inún tá ná ndoho inún sahá Jesucristo jáchí sáhan Ndióxi ndee mé á nuun. <sup>9</sup>Najácau Ndióxi mí ta nacaxi a mí ña ná cacuú ñayivi yii cuéntá mé á. Ta a juú sahá ña nacaya vaha i joo nacaxi a mí

jáchí nasañu ini a caja ñamani xohó andá tá cámání cava sahá sahá ñuyíví. Sahá ña cán quéa nachindahá a Jesucristo quiví a sahá cuachí. <sup>10</sup>Ta andá viti naxinu coo ña nasañu ini a jáchí naquixi Jesucristo ñuyíví yóho ta naxihí a ndica crúxu. Ta sahá ña nacaya mé á co ndítahan yihví yo quiví jáchí cuhun í coo i xihín mé á andá ama cáá quiví tá ná candeé iní tuhun vaha cahán sahá Jesucristo.

<sup>11</sup>Nacaxi Ndióxi yehé ná cacuú u in apostol cuéntá mé á ña ná jánahá i tuhun vaha sahá Jesúus nuú ñayivi, na coó naquixi chíchi Israel. <sup>12</sup>Ta vatí ndóho ini i sahá ña yóho joo co cácahan toho nuú i jáchí xíni vaha i yo cíú Jesucristo, mé a candeé ini i. Nandiuiyahva i mí i ndáha mé á ta xíni vaha i ña candaá mé á yehé andá quiahva ná tandaá quiví quixi tucu a ñuyíví yóho.

<sup>13</sup>Ta jácahan i yohó ña ná candico cáhnún chí ndaa, ña najánahá i nuun. A jándicoún ña candeé inún Jesucristo ta a jándicoún ña quíhvi inún ñayivi jáchí in nanduú xihín Jesucristo sahá ña candeé iní mé á. <sup>14</sup>Sahá ña ndácaan ínima yii Ndióxi ini in yó ta sahá ña chíndeé a mí sahá ña cán quéa xíni ríuhú cacu vahún ña nasañan Ndióxi nuun.

<sup>15</sup>Sa xíni vahún ña najándicoó tóco ndihi na cíú cuéntá Jesúus nduu estado Asia yehe. Tañu mé ná cán ndácaan Figelo xihín Hermógenes. <sup>16</sup>Cíni ña ná tahví ini Ndióxi sahá Onesíforo xihín na vehe da jáchí cuahá tañu nachindeé da yehe ta já nandivaha ini i. Ta coó nacacahan nuú da sahá ña ndácaan i vecaa. <sup>17</sup>Ña nacaya da quéa nandin-ducú da yehe tá nasaqá da ríuu Roma yóho ta coó nandiquehe ndee dá andá quiahva nandiñehé da yehe. <sup>18</sup>Ná tahví ini Ndióxi sahá da cán tá ná ndindaa quiví quixi tucu Jesucristo ñuyíví yóho. Ta sa xíni vahún ña nachindeé da yehe tá nasañi i nuu Efeso.

## 2

Ná quiahva ndee iní tá ndóho iní sahá Jesucristo

<sup>1</sup> Ta mún, Timoteo cíú tátuhun jahyi mí i ña cán quéa jácahan i yohó ña ná coo ndacú inún xihín ndee ña nasañan Jesucristo nuun. <sup>2</sup>Sa xíni johún tuhun vaha nacaxi tuhun i nuú cuahá ñayivi. Ta viti ndítahan nu mún jánahún ña cán nuú java ñayivi, na cíú ñayivi ndísahnu ini já ná cíú jánahá ná ña nuú java ga ñayivi.

<sup>3</sup> Quiāhva ndeé inún tá ndóho inún sahá Jesucristo jáchí cúun tátuhun in soldado vaha cuéntá mé á. <sup>4</sup> Jáchí in soldado cája cuití dà ña sáhndá jefe dà nu dá ta co cája da inga ga ñaha jáchí cúní da ña ná tahan ini jefe dà sahá ña cája da. Tá quiāhva cája mé soldado yóho quiāhva já ndítahan nu yo caja í. <sup>5</sup> Jári sa xíní vaha ndó ndaja cája da sájíquí pelota. Tá co sájíquí vií dà já quéa a cuú quee vaha da. Quiāhva já cútí á xihín mí jáchí tá co cája í ña cúní Ndióxi já quéa a cuú quee vaha í. <sup>6</sup> Tá ndíhi ini in dà xútu já quéa ndítahan nu dá jáquee da nu cuítí ñaha naxutu da. Ta quiāhva já ndítahan ndíhi ini caja chúun í cuénta Jesucristo já quéa cuu ndiquehé ña quiāhva Ndióxi nu yo. <sup>7</sup> Ndicani vaha inún sahá tóco ndihi ña nacahán i xuhun ta já chindéé Ndióxi yohó candaá vaha inún tóco ndihi ña cachi i xuhun.

<sup>8</sup> Xníñuhú ndicuhun inún Jesucristo, mé á naquixi chichi David. Najánditacu Ndióxi mé á tá naxíhi a. Ta viti caxí tuhun i tuhun vaha sahá mé á nuú ñayivi. <sup>9</sup> Ta ndóho ndivaha ini i sahá tuhun cahán i nuú ñayivi. Nacató na yehe xihín cadena ta nacihacan na yehe vecaa tå quiāhva cája na xihín in dà quini. Joo a cuú caja na ña yóho xihín tuhun Ndióxi jáchí cuahá chágá ñayivi cahán na sahá Jesús viti. <sup>10</sup> Ña cán quéa ín tighva i ndoho ini i sahá ñayivi, na nacaxi Ndióxi cacuu na cuénta mé á. Jáchí cúní Jesucristo jácacu a ndihi na candeé ini mé á já ná coo na xihín mé á andá ama cáá quívi. Ta ñúchí ndivaha cán. <sup>11</sup> Ña cachí mé á yóho cútí á ña ndaa:

Tá ná quívi sahá Jesucristo já quéa cuu canduú xihín mé á andá ama cáá quívi.

<sup>12</sup> Tá ná caja ndeé iní ña ndóho iní sahá Jesucristo já quéa vaxi quívi cahnda í chuun xihín mé á.

Tá ná cachí ña co cíuú yo cuénta Jesucristo já quéa cachi mé á ña co xíní toho a mí.

<sup>13</sup> Vatí ná ndindójó yo sahá Jesucristo joo a ndindójó toho mé á sahá yo, jáchí mé a ndaa jáxínu coo mé á tuhun sahan nu yó caja.

Táhán ini Ndióxi xihín dà cája chúun vaha cuénta mé á

<sup>14</sup> Ña yóho ndítahan jándicuhun inún ñayivi. Cahndún chuun nu ná ña ná a

cáni táhan yúhu ná sahá ndá tuhun cútí ña vaha chágá jáchí coó sahá cútí á. Joo ña cája na cán quéa játiví na xíní túni mé ñayivi xíní joho ña cán. <sup>15</sup> Ndinuhu inún caja chúun vahún cuénta Ndióxi já ná tahan ini mé á xuhun. Tá ná cajún ña yóho já quéa a cácahan nuun jáchí ndinuhu ña ndaa najánahúm nuú ñayivi. <sup>16</sup> A quíhvi nuún nditúhún xihín ñayivi tá nditúhún quíhvi na jáchí quéa nuu chágá na tarñu cuachi tá nditúhún quíhvi na. <sup>17</sup> Ta java tañu ña cahán xihín táhan na jan jándihíhvi a ñani tahan na jáchí tá quiāhva jándihí cuehe tähýi sahá yiquí cuñu ñayivi quiāhva já jándihí tuhun cahán na sahá ñayivi. Já nandoho Himeneo xihín Fileto. <sup>18</sup> Nacaxoo ndíví dà nu íchi ña ndaa ta viti jánahá da ña tuhun jáchí cachi dà ña sa nayaha va quívi tá nditacu tucu na sa naxíhi. Jájana da jiní java ñayivi ña ná a candeé ga ini na Jesús. <sup>19</sup> Joo Ndióxi cahán ña ndaa ta a cuú ndijama mé á ña nacahán. Ta já cachi tuhun Ndióxi sahá ñayivi cuénta mé á: "Xníñuhú ndá na cútí na cuénta mé á." Já cachi tuhun Ndióxi já: "Tá ná cachi ñayivi ña candeé ini na Jesucristo, xitoho na já quéa ndítahan nu ná jándicoo na cuachi caja na", cachi tuhun Ndióxi.

<sup>20</sup> Ta viti ná cacu u in quiāhva nuun: ini in vehe cahnu fin ñaha jihuñun cuáan xihín ñaha jihuñun cútú. Jári ñúhu ri ñaha nacavaha xihín yíto ta ñúhu ri ñaha nacavaha xihín ndahyi. Ta java ña cán fin javí a ta java ña cán fin chuun a ndijáa níi quívi. <sup>21</sup> Tá najándicoo í cuachi caja i já quéa cacuú ñayivi vií nu Ndióxi. Ta cacuú tátuhun in coho vaha jáchí cuu caja chúun í cuénta Ndióxi ta já cuu coo tighva í caja í tóco ndihi ña vaha.

<sup>22</sup> Cama chá caxoún nuú cuachi ña ndiáva ini dà tacú caja da. Ta candico cahnuñ íchi cuénta ña ndaa ta candeé inún Ndióxi ta quíhvi inún ñayivi ta coo vaha inún xihín ná. Tá ná cajún ña yóho in cacuún xihín tóco ndihi na cútí cuénta Jesús, na ín vií ínimá nu Ndióxi jáchí xíca na nu Ndióxi ña ná chindéé a na. <sup>23</sup> A quíhvi nuún nditúhún quíhvi xihín ñayivi jáchí tá ná cajún ña yóho já quéa vaxi quívi tá casahá cani tahan na xuhun. <sup>24</sup> Ta ndá dà ndíco íchi cuénta Jesús co ndítahan nu dà nducú dà cuachi xihín ñayivi. Ña ndítahan caja da quéa caja vaha da xihín tóco ndihi ñayivi ta ná cacuú da in dà tighva jánahá vaha ñayivi ta ná coo

cáhnu ini da xihín ná. <sup>25</sup> Ta co ndítahan nu dá ndiñehé jícó dä mé dá nani jánahá da nuú ñayivi, na saá ini xihín tūhun Ndióxi jáchí tiáhva náá caja Ndióxi ña ná ndicó coo ini na ta já candaá ini na ña ndaa sahá Jesucristo. <sup>26</sup> Jáchí tá ná ndicó coo ini na já quéa janí ná ndáhá tiñahá sacuahá jáchí nasacomí mé rí cuénta sahá ná ña ná caja na ña cúní mé rí.

## 3

Ña tandaa caja ñayivi tá jalóho cúní ndihu sghá ñuyíví

<sup>1</sup> Ta ndítahan candaá vaha inúm, Timoteo ña tá ná cayati quivi quixi tucu Jesucristo ñuyíví yóho já quéa ndoho ndiváha ini na cútú cuénta Jesús. <sup>2</sup> Jáchí vaxi quivi tá caja ñayivi cuahá ndiváha cuachí. Cuahá ñayivi cajíhndá ná ta quíhví ndiváha ini na jíuhún ná. Ta já caja cáhnu na mé ná ta ichí ndiváha coo ini na ta candaí na Ndióxi ta a cúní joho na nuú cahán tátá náná na xihín ná. Ta ni ndixahvi a ndíquiahva na nuú Ndióxi ta ni a caja cáhnu na mé á. <sup>3</sup> Ta a quíhví ini táhan na ta ni a caja cáhnu ini sahá táhan na. Ta cahán jíquí na sahá java ga ñayivi ta catúhún ná. Ta a cuú cáhnu na nuú ña xícá ini na caja na. Xíxi coo ini na xihín ñayivi ta candaí na tóco ndihi ña vaha. <sup>4</sup> Jícó túhún táhan na. Ta cacuu na ñayivi cama jini. Ta caja ichí ndiváha ini na. Catóó chágá na cajíi ini na xihín ñahá ñuyíví yóho a juú ga xihín ñahá Ndióxi. <sup>5</sup> Ta caja na tá quiahva caja na cútú cuénta Ndióxi joo chijehé tūhun na sahá Ndióxi, mé á sáhan ndéé nuú ná caja na ña cúní mé á.

Caxoún nuú ndihi na caja cuachi yóho. <sup>6</sup> Jáchí tañu na jan ndúu java ñayivi, na quíhví vehe tá vehe jándahvi na najíhfí quíhví xihín ña jánahá na. Ta mé najíhfí yóho ndójo cuahá ndiváha na cuachi jáchí nayaha quiahva caja na tá nuú ña núu xícá ini na caja na. <sup>7</sup> Ta mé najíhfí yóho jácuaha ta jácuaha na joo co xínú coo nuú ná candaá ini na ña ndaa. <sup>8</sup> Sanahá ndiváha násanduu ivi dä tají. In da naní da Janes ta inga da naní da Jambres. Tá quiahva násaji nuu dä cán nuú Moisés quiahva já sají nuu java ñayivi nuú ña ndaa viti. Ña núu ndácaan xíní túni na ta coó náxeen na candeé ini na Jesucristo. <sup>9</sup> Joo vaxi quivi tá a cútú ga jándahvi na ñayivi jáchí mé quivi cán

candaá cáxí ini ñayivi ndaja tóntó nácaja na cán. Já nandoho Janes xihín Jambres sanahá jáchí nácandaá cáxí ini ñayivi ña nácaja níu da xihín Moisés.

Sáhndá tucu Pablo chuun nuú Timoteo

<sup>10</sup> Joo sa xíní vahún tá quiahva nácaja i tá najánahá i nuun. Ta sa xínun ña caja i catacu u xihín ña násacu ini i caja i chágá chí nuu. Ta sa xínun ndaja candeé ini i Jesús. Ta sa mé quiahva já xíní vahún ña co xójo ini i xihín ñayivi. Ta sa xíní vahún ña quíhví ini i tóco ndihi ñayivi. Ta xínun ndaja násahan ndéé ini i <sup>11</sup> tá nácaja xíxi na xihín i ta ndaja najándooh na ini i tá násahíjn i nuu Antioquía xihín nuu Iconio xihín nuu Listra. Joo nachindeé Ndióxi yehe ta nátagá mé á yehe nu tóco ndihi ña nandoho i. <sup>12</sup> Ta mé a ndaa ndoho tá ndoho ini ñayivi tá cúní na candico cáhnu na íchi cuénta Jesús. <sup>13</sup> Ta ñayivi quini, mé ná jándahvi ñayivi caja chágá ví ná cuachi ta co xíní na ndájá xínú coo nuú ndihi cuachi caja na. Xíca na jándahvi na ñayivi ta janda mé ná cán najándoahvi ñayivi.

<sup>14</sup> Joo jácahan i yohó, Timoteo ña ná a jándicoún ña ndaa, ña nácatiahvún tá najácuahún xihín nde jáchí xíní vahún ña cútú á ña ndaa. Ta sa xíní vahún ndá ñayivi cútú nde. <sup>15</sup> Ta candaá vaha inúm tūhun Ndióxi jáchí anda ta lohún najácuahún ña. Ta mé tūhun Ndióxi cuu jánahá yóho cajún ña cúní mé á ta cuu jácacu a yohó jáchí candeé inúm Jesucristo. <sup>16</sup> Nacahyí ñayivi tóco ndihi tūhun Ndióxi yóho jáchí najácahan Ndióxi iníma ná ña ná caja na ña. Ta mé tūhun Ndióxi yóho chíndeé a mí jáchí jánahá mí caja í ña cúní Ndióxi ta jánaní ri a mé ví tá co caja vaha í. Ta jándicaca vaha mí tá co xícá vaha íchi cuénta Ndióxi. Ta sa mé quiahva já jánahá mí ña ná cacuu ñayivi ndaa, na co caja cuachi. <sup>17</sup> Já quéa ná cuu nduu ndacú chágá ini na candeé ini Ndióxi xihín tūhun mé á ta xihín ña yóho cuu coo tiáhva na caja na tá nuú ña vaha.

## 4

<sup>1</sup> Vaxi quivi quixi tucu Jesucristo ñuyíví yóho cacomí a cuénta sahá yo ta mé já caja ví a sahá na tácum xihín sahá ña sa naxihi. Sahá ña cán quéa nu Ndióxi xihín nuú Jesucristo, xitoho i sáhndá i chuuñu mún, Timoteo <sup>2</sup> ña ná coo tiahvún cahún tūhun Ndióxi nuú ñayivi níi tiempo tá núná

nuún á tá coó. Ta ndítahan nuun cavún jiní na cája cuachi ta jácqahún na ña ná caja na ña cíni Ndióxi. Ta ndítahan quiahvún tuhun ndee ini na. Ta víi víi jáqahún tuhun Ndióxi nu ná ní tiempo.<sup>3</sup> Jáchí vaxi quiví tá a cándusa ga ñayivi curni joño na tuhun ña ndaa. Joo ndíhi ini na nducu cuahá na maestro, da jánahá ña xícá ini mé ná taa joño na. <sup>4</sup> Ta a cándusa na taa joño na ña ndaa jáchi cájii chágá ini na taa joño na ña tuhún cuéntá ñayivi ñuyíví. <sup>5</sup> Sahá ña cán quéa sáhdá i chuun nu mún, Timoteo ña ná cañeho vahún quiahva xihín ña cajún. Ta quiahva ndee inúin tá ná ndoho inún. Caxi tuhún tuhun vahá sahá Jesús nuú ñayivi xihín ndinuhu inún. Ta xímí ñúhú jáxinu coún tóco ndíhi chuun nasañan Ndióxi nuun cajún.

<sup>6</sup> Sa íin tlahva i joco i mí i nu Ndióxi. Sa xímí vi ña sa nacayati quiví quiví vi. <sup>7</sup> Nacaja chún vahá i cuéntá Ndióxi tátuhun cája chún vahá in soldado nu jefe da. Najáxinu coo ndíhi i chuun nasañan Ndióxi nuú i tátuhun cája in da xínu tá sa naquee vahá da. Ta nandico cáhnu i íchí ña cández ini i Jesús. <sup>8</sup> Ta viti ndáti i casaa quiví caja víi Jesucristo, xitoho í saha tóco ndíhi ñayivi. Mé tiempo cán ndiquehe e ña quiahva mé á nuú i sahá ña nacaja i ña ndaa. Ta quiahva já caja Jesucristo, mé á cuú ña ndaa xihín java ga ñayivi, mé na cájii ini ndáti na casaa quiví quiví tucu a ñuyíví.

### Cáhan Pablo cuéntá mé dä viti

<sup>9</sup> Ndíhi inún quixi camún coto nihnún yehe. <sup>10</sup> Najándico Demas yehe jáchi nacató chágá da ñaha ñuyíví yóho ta cuahán dä ñuu Tesalónica viti. Ta naquee Crescente cuahán da estado Galacia ta já naquee Tito cuahán dä chí estado Dalmacia. <sup>11</sup> In túhún Lucas ín da xihín i. Ndinducún Marcos ná quixi da xuhún tá ná quisún yóho jáchi cuu chindeé vahá da yehe xihín chuun cája i yóho. <sup>12</sup> Sa nacindahá i Tiquico ñuu Efeso. <sup>13</sup> Tá ná quisún yóho cajún ñamani cañehún cotó ndee e ña najándico i ñuu Troas vehe Carpo. Ta jári libro va cañehún ña quisún yóho. Ta a ndíndojún cañehún níi quítí ña nacahyí i nuun.

<sup>14</sup> Á co ndícyhun inún Alejandro, da cája chún cání caa. Cuahá ndivaha ña níu nacaja da xihín i joo vaxi quiví tá chahvi da sahá, caja Jesucristo, xitoho í. <sup>15</sup> Cuéntá

coún xihín dá jáchi cándají ndivaha da tuhun Ndióxi, ña jánahá yó nuú ñayivi.

<sup>16</sup> Tá nandiquehe e sahá i nu cuítí nuú na jutixia ni in ñayivi coó nachindeé yehe. Tóco ndíhi na najándico na yehe. Ná caja cáhnu ini Ndióxi sahá ña nacaja na cán. <sup>17</sup> Joo Ndióxi quéa nachindeé a yehe ta nasañan ndee á nuú i ña ná cuu caxi tuhun i tuhun vahá sahá Jesús ná cuni joño tóco ndíhi na coó naquixi chichi Israel. Tá nachindeé Ndióxi yehe já cuú á tátuhun nacacu yehe yuhú león. <sup>18</sup> Ta cández ini i ña jácacu a yehe nuú ndíhi ña níu. Ta canda vahá Ndióxi yehe anda quiví cuhun i indiví coo i xihín mé á nu cahnda Ndióxi chuun anda ama cáá quiví. Cóho caja cáhnu í mé á anda ama cáá quiví. Já ná coo.

### Ndíndayí Pablo na cuú cuéntá Jesús

<sup>19</sup> Chindahá i Ndióxi coo Prisca xihín Aquila xihín na vehe Onesiforo. <sup>20</sup> Nacandoo Erasto ñuu Corinto. Ta nacandoo Trófimo ñuu Miletó jáchi quíhvi dä. <sup>21</sup> Ndíhi inúin quisún yóho tá cámari xínu coo tiempo vixi. Eubulo xihín Pudente xihín Lino xihín Claudia chíndahá ná Ndióxi coún. Ta jári ndíhi na cuú cuéntá Jesús ñuu yóho chín-dahá ná Ndióxi coún.

<sup>22</sup> Ná coo Jesucristo, xitoho í xuhún. Ná caja Ndióxi cuahá ñamani xihín ndíhi ndó.

## Carta nachindahá Pablo nu Tito

*Cáhan Ndióxi Pablo xihín Tito*

<sup>1</sup> Yehe cíú u Pablo, dà cája chúun cuéntá Ndióxi ta cíú u in apóstol cuéntá Jesucristo. Nachindahá Ndióxi yehe caxi tuhun i tuhun vaha sahá mé a nuyú ñayivi ña ná candee iní na mé á. Ta já ná candaqá iní na ña ndaa sahá mé á jáchí nandicaxi a na. <sup>2</sup> Ta ndáti tighva na cuhun na coo na xihín mé á anda ama cása quiví jáchí já nasahán Ndióxi tuhun a nu yo tå camaní cavá sahá sahá ñuyíví. Ta co cáhan Ndióxi ña tuhun. <sup>3</sup> Ta viti naxinu coo quiví nasacu ini Ndióxi jánahá nuú ñayivi ndá quiahva cuu candee iní na mé á. Ta viti ndójo i chuun ña nasañhanda Ndióxi nuú i ña ná caxi tuhun i tuhun vaha sahá Jesucristo nuú ñayivi, mé a jácacu mí. <sup>4</sup> Chindahá i tutu yóho nu mún, Tito, dà cíú tátuhun jahyi mí i jáchí in nuú candeé iní Jesucristo. Ta xícá tähví i nu Ndióxi, tátá yo xihín nuú Jesucristo, xitoho í, mé a jácacu mí ña ná caja cuahá ñamani xuhun ta ná caja ña ná coo vaha inún.

*Chuun nacaja Tito isla Creta*

<sup>5</sup> Najándicoo i yohó isla Creta jan ña ná jáxinu coún chuun ña najándicoo ñáhhnu i jan. Ndítahan ndicasún na sacuahá nuú na cíú cuéntá Jesús in in ñuu tá quiahva nandicani i nuun cajún. <sup>6</sup> Ta mé dà sacuahá yóho ndítahan cacuu da ñayivi vaha, da a cíú ñehe íní ñayivi jánani na sahá ña cája da. Ta ndítahan nu dà cacuu da dà coó inga ñáha xihín ta in túhún ñájíshí dà ndítahan coo. Ta ndítahan nuú jahyi da candee iní na Ndióxi. Ta co ndítahan nuú jahyi da caja na ña núu joo ndítahan nu ná candusa na caja na ña cáchí náná tátá na já ná a cíú chícaan ñayivi cuachi jata ná. <sup>7</sup> Jáchí ndá dà cíú da sacuahá caja chúun da cuéntá Ndióxi sahá ña cán quéa ndítahan cacuu da in ñayivi ndaa. Ta co ndítahan nu dà caja ichi iní da ta ni co ndítahan nu dà caja cama iní da xihín ñayivi. Ta ni ná a cácuu da dà xihí ta ni ná a cátóó dà cani táhan da xihín ñayivi ta ni ná a cátóó dà ñehe cuahá dà jiuuhún. <sup>8</sup> Ña ndítahan nu dà caja da quéa cajii iní da ndiquehe vaha da ñayivi vehe da ta ná caja da ña vaha cuití va ta ná cacuu da dà

ndísáhnu ini, dà cañehe vaha quiáhva. Ta ndítahan nu dà caja da ña ndaa cuití va ta ná candico cáhuu da íchi cuéntá Ndióxi ta ná candaca vií dà yiquí cuñu da ná a cája da cuachi. <sup>9</sup> Ta ndítahan nu dà cativi tuun da ña ndaa sahá Jesucristo, ña nacatiáhva da já quéa cuu chindeé dà ñayivi xihín ña ndaa jánahá da nu ná. Ta xihín mé tuhun vaha yóho cuu jáxinu dà ini java ga ñayivi, ná cáhan núu sahá tuhun Ndióxi.

<sup>10</sup> Jáchí cuahá ñayivi co cúní ná caja na ña cáchí tuhun Ndióxi. Ta tañu na yóho ndíu cuahá na Israel. Coó sahá toho tuhun cáhan ná ta xihín ña yóho jándahvi na ñayivi.

<sup>11</sup> Yuhú na yóho ndítahan chicají jáchí xícá na jájacá na jini ñayivi ta janda tóco ndihi na ndíu vehe nacava na jini ná xihín ña co cíú ña ndaa já ná ñehe cuahá na jiuuhún jatá ñayivi jándahvi ñahá ná.

<sup>12</sup> Ta tañu na yóho nasañhín in profeta ta já nacachi da já sahá ñayivi ñuu da, na ndíu isla Creta cán: "Na ndíu Creta cáhan na ña tuhún níí tiempo. Yucú na ta ndehé na ta júsá ndivaha na caja chúun na", nacachi da.

<sup>13</sup> Ta ña ndaa cíú ña nacahan da cán sahá ná. Ña cán quéa ndítahan nuun jánani vahún na ña ná candee cáhuu ini na Jesús <sup>14</sup> ta ná a táo joho na cuénto ña ndícani ñayivi Israel nu ná jáchí ña quirí jini mé va na quéa. Ta ná a táo joho na nu cáhan ñayivi, na nacaxoo nuú ña ndaa.

<sup>15</sup> Ta tá ndácaan vií xíní túni ñayivi já quéa tóco ndihi ñaha cíú á ñaha vií nu ná. Joo tá co cándusa ñayivi Ndióxi ta ndácaan ña núu xíní túni na já quéa tóco ndihi ñaha cíú á ña núu nu ná jáchí co fín vií ínimá ná xihín xíní túni na. <sup>16</sup> Vatí cáchí na yóho ña candeé iní na Ndióxi joo xihín ña núu caja na náha ña mé a ndaa co candeé iní na mé á. Sáa ndivaha ini na ta a xeén toho na caja na ña ndaa sahá ña cán quéa ni in ñaha vaha a cíú caja na.

## 2

*Ndítahan jánahá yó tuhun vaha sahá Jesúsu nuú ñayivi*

<sup>1</sup> Ta ndítahan nu mún, Tito jánahún ñayivi ndaja caja na ña ndaa, ña cáchí tuhun Ndióxi caja na. <sup>2</sup> Jánahún na sacuahá ña ndítahan cacuu na ñayivi ndisáhnu ini, ná fín toní núuhú ñayivi xihín, ná ñehe vaha quiáhva xihín ñaha. Ta ndítahan candee vaha ini na Ndióxi ta ndítahan quihví ini na ñayivi ta ndítahan coo ndacú iní na já ná

cuu candeé ini na tá ná ndoho ini na.<sup>3</sup> Ta quiáhva já ndítahan coo toní ñúhú najihí sacuha xihín ñayivi. Ta co ndítahan cacuu na najihí tühún ta ni ná a cáuu na ná xihí. Jáchí ndítahan nu ná cacuu na ná fín toní ñúhú ñayivi xihín sahá ñá vaha caja na.<sup>4</sup> Ta ndítahan jánahá na najihí yúta ñá ná quihví ini na yíí ná xihín jahyi na.<sup>5</sup> Ta ndítahan cahnu ná mé ná ta ndítahan cacuu na ñayivi víi ta ná candaa vaha na vehe na ta ná caja na ñá vaha cuití va. Ta ndítahan candúsna na caja na ñá sáhndá yíí ná nu ná. Tá caja na tóco ndihi ñá yóho já quéa a ñéhe íní ñayivi cahan níu na sahá tuhun Ndióxi.

<sup>6</sup> Ta quiáhva já ndítahan jácuhún dà tacú ná coo ndisáhnu ini da.<sup>7</sup> Xihín ñá cajún jánahún nu ná ndaja caja na ñá vaha. Ta xímí ñúhú jánahá ndisáhnu ñá yóho nu ná ta ná cajún ñá xihín ndinuhu inún.<sup>8</sup> Ta ná cahún ñá vaha cuití va já quéa a cíu chicaan ñayivi cuachi jatun. Ta xihín ñá yóho cacahan nuu na co cúní yóho jáchí a cíu cahán ihví ná sahá ndihi ndó, ná cíu cuénta Jesús.

<sup>9</sup> Ta jácuhún ndá na caja chún xihín xitoho na ñá ná caja na tóco ndihi ñá sáhndá xitoho na nu ná jáchí xímí ñúhú coo toní ñúhú ná xihín ná ta ná a ndúcú ñehe ichí na tuhun nuu xitoho na.<sup>10</sup> Ta ná a caja cuishná nu ná joo ná cacuu na ndinuhu ñayivi ndaa. Ta xihín ñá yóho náhá ndá quiáhva ndató ndivahá cíu tuhun Ndióxi, ñá cahán sahá mé a jácacu a mí.

<sup>11</sup> Najáñahá Ndióxi mí ñá cúní a caja cuahá ñamani xihín ñayivi ta fín tiahva mé a jácacu a tóco ndihi ñayivi.<sup>12</sup> Ta jánahá mé a nu yo ñá ndítahan jándicoo í tóco ndihi ñá níu, ñá xíca iní caja í ñuyíví yóho. Jáchí ndítahan nu yo cahnu í mí ta ná caja í ñá ndaa cuití va ta ná candíco cahnu í ichí cuénta Ndióxi.<sup>13</sup> Ta cajíi iní nani ndáti tiahva í xímí coo quivi ndicó coo tucu Jesucristo xihín ndée á. Ta cíu á Ndióxi cahnu ta jácacu a mí.<sup>14</sup> Nandiquiahva Jesucristo mé a quivi a sahá ndihí jáchí cúní a jácacu a mí ná a caja ga yo ñá níu. Ta cúní a jándoo a tóco ndihi cuachi já ná nduu ñayivi cuénta mé a ñá ná ndihi iní caja í ñá vaha.

<sup>15</sup> Ndítahan jánahún tóco ndihi ñá yóho nuu ñayivi ta jácuhún ná ñá ná caja na ñá nacahyí i yóho. Ta ndítahan nu mún jánanún ñayivi caja cuachi jáchí fín sahun

cahndún chuun nu ná. Coto a quiáhvún ñamani nuu ñayivi quehe níu na yóho.

### 3

*Ñá ndítahan caja ná cíu cuénta Jesús*

<sup>1</sup> Xímí ñúhú jándicuhun inún ná cíu cuénta Jesús ñá ná coo joho na nu sáhndá ná jutixia nu ná. Ta ná coo tiahva na caja na ndá ñá nacuu nani cíu á ñá vaha.<sup>2</sup> Ta xímí ñúhú cahún xihín ná ñá ná a cahán níu na sahá inga ñayivi ta ná a caní táhan na xihín inga na joo víi caja na xihín ná. Ta ná a ndínehe jíco ná mé ná nuu ndihi ñayivi.

<sup>3</sup> Jáchí ndítahan ndícyuhun iní ñá tá cíamani ndihví íchí cuénta Jesús já nacaja í cuahá nuu cuachi. Quihví násacaja í ta coo nacaja í ñá cúní Ndióxi. Nacandúsá í ñá tuhún, ñá nacachi ná jándahvi mí. Ta násacaja í tá nuu ñá ná nacaja í yóho caja í ñá ta mé cuachi násahnda chuun nu yo. Tóco ndihi quivi násacaja í ñá ná ta násacuú ñayivi ihví iní. Nasandají ñayivi mí ta ndaja mí násandají táhan í viti.<sup>4</sup> Anda jáví Ndióxi, mé a jácacu mí nájáñahá nu yo ñá tähví iní a sahá yo ta quihví iní a mí.<sup>5</sup> Sahá ñá cán quéa nájáçacu a mí. Ta coo nacaja ñá sahá ñá vaha nacaja í. Joo nájáçacu a mí jáchí tähndá iní a sahá yo. Najáñoo a cuachi ta xihín ñá yóho nacaja ínima yíí Ndióxi ñá nandúu ñayivi saá, na xíca ichí saá viti.<sup>6</sup> Naxihí Jesucristo sahá yo ñá ná jácacu a mí ta xihín ñá yóho náchutú ndaa ínima yo xihín ínima yíí mé á.<sup>7</sup> Nacaja Ndióxi ñamani uun xihín yo ñá ná canduu ndaa yó nu mé a sahá ñá cán quéa ndáti tiahva í cíuhun yo coo í xihín mé a andá ama cíu quivi.

<sup>8</sup> Ta tóco ndihi ñá cahyí i yóho cíu á ñá ndaa. Sahá ñá cán quéa cúní ñá ná ndinuhu inún jánahún ñá yóho nuu ñayivi, ná cíu cuénta Jesús ñá ná ndihí iní a caja na ñá vaha. Jáchí ñá nacahyí i yóho cíu á ñá vaha ta cuu chindeé a tóco ndihi ñayivi.<sup>9</sup> Joo coto a quihví nuu ndítuhún xihín ñayivi cahán tuhun quihví, ñá ndícani sahá chichi tásáhnu jíco yo. Ta a ndihví ndó caní táhan yúhu ndó xihín ná sahá ley Moisés jáchí coó sahá toho ñá yóho ta mé a uun va quéa caní táhan ndó xihín ná.

<sup>10</sup> Tá fín in ná cíu cuénta Jesús ta tá cíu na caní táhan na xihínjava ga ná cíu cuénta Jesús, xímí ñúhú jánanún ná ñá ná a caja ga ná ñá yóho. In á iyí tañu cuití va cahún

xihín na ta tá co cúní na cuni joho na ña cahún xihín ná já quéa tavún na ña ná cuhún na.<sup>11</sup> Jáchí sa xímí vahún ña nandeta nuu ña núu xímí túní ná ta sa xímí vahá na ña cája na cuachí.

*Sáhndá Pablo chuun nü Tito*

<sup>12</sup> Tá ná chindahá i Artemas á Tíquico nuun já quéa ndíhi inúnu cuhún ñuu Nicópolis jáchí cán cája i cuéntá coo i tiempo vixi. <sup>13</sup> Xímí ñiúhú ndinducún ndaja cuu chindeún Apolos xihín Zenas, mé da tiáhval Ley. Quiáhvún ñaha nü ná já a ndímaní ñaha tá ná quee na cuhún ná viaje na.<sup>14</sup> Ta ndítahan nü ndíhi ná cíú cuéntá Jesús jácuaha na ndaja caja na ña vahá xihín java ga ñayivi. Ta ndítahan nü ná chindeé ná ndá ñayivi nacuu na ndímaní ñaha nü. Tá ná caja na ña yóho já quéa a cóo uun va na ñuyíví yóho.

*Ndíndayí Pablo Tito*

<sup>15</sup> Tócó ndíhi na ndúu xihín i chíndahá ná Ndióxi coún ta chíndahá nde Ndióxi coo ndíhi ná cíú cuéntá Jesús cán jáchí xímí vahá i ña quíhví ini na ndehé sahá ña cández iní Jesús. Ná caja Ndióxi cuahá ñamani xihín ndíhi ndó. Já ná coo.

## Carta nacahyí Pablo nuú Filemón

*Chíndahá Pablo Ndióxi coo Filemón*

<sup>1</sup> Yéhe cíú u Pablo ta ndácaan i vecaa yóho sahá ña cíú u cuéntá Jesucristo. Yéhe xihín Timoteo, ñani í, da cíú cuéntá Jesús cahyí nde carta yóho nu mún, Filemón. Quíhví ini nde yohó ta in cíú xihín nde sahá ña caja chúun cuéntá Jesucristo. <sup>2</sup> Ta jári cahyí nde carta yóho nuú na cíú cuéntá Jesús tácá vehún jan xihín nu Apia, ña cíú quiaghva í sahá ña candeé ini ña Jesús. Ta quiaghva já cahyí nde carta yóho nu Arquipo jáchi in cíú dà ndóho ini da caja chúun da cuéntá Jesucristo. <sup>3</sup> Ndióxi, tátá yo xihín Jesucristo, xitoho í ná caja cuahá ñamani xihín ndo ta ná caja ña ná coo vaha ini ndó.

*Candeé cahnu ini Filemón Jesucristo*

<sup>4</sup> Tá xícá tähví i nu Ndióxi sahun co ndindójó i ndiquiahva i ndixahvi nu mé á sahá mún. <sup>5</sup> Jáchí nañehé e tuhun ña candeé inún Jesucristo, xitoho í ta quíhví inún mé á xihín ndihi na cíú cuéntá mé á. <sup>6</sup> Ta xícá tähví i nu Ndióxi ña ná ndicánun nuú java ñayivi ndá quiaghva candeé inún mé á. Ta xihín ña yóho cuu candaq vaha ini na ndaja náhnu ñamani caja Ndióxi xihín tóco ndihi mí, ná candeé ini Jesucristo. <sup>7</sup> Cájii ini i ñani mí i ta sáhan tuhun ndeé ini i jáchi quíhví inún na cíú cuéntá Jesús. Ta jári sáhan tuhun ndeé ini cuahá na cíú cuéntá Jesús jáchi quíhví inún na.

*Xícá Pablo ñamani nu Filemón saha Onésimo, dà naxeen Filemón caja chúun nu dá*

<sup>8</sup> Yéhe cíú u in apóstol Jesucristo ña cán quéa ín sahá i cahnda i chuun nuun cajún ña ndítahan nuun cajún. <sup>9</sup> Joo co caja i ña. Ña caja i quéa xícá i ñamani nuun jáchí quíhví ini i yohó. Xíní ñúhú ndicuhun inún ña cíú u Pablo, dà sáhnu, dà ndácaan vecaa sahá Jesucristo. <sup>10</sup> Ta viti xícá i ñamani nuun sahá Onésimo, da nanduu tátuhun jahyi mí i cuéntá Jesús nani ndácaan i vecaa yóho.

<sup>11</sup> Jihna ga násacuu Onésimo da coó chuun nuun joo viti ín chuun da nu ndíví yo. <sup>12</sup> Ta viti chíndahá i dà nuun. Ndiquehe vahún da sahá mí i jáchi quíhví ndivaha ini i da.

<sup>13</sup> Cúní ña ná candoo da yóho xihín i já ná

cuu chindeé dà yéhe nu mún. Jáchí ndácaan i vecaa yóho sahá ña cahán i tuhun vaha sahá Jesucristo nuú ñayivi. <sup>14</sup> Joo násacu ini i chíndahá i dà nuun jáchí tiahva náá a vaha cíú inún xihín i tá ná candoo da yóho xihín i. Jáchí tá ná cajún ñamani xihín i cúní ña ná cajúu inún cajún ña ta co cúní caja ndúsá i xuhun. <sup>15</sup> Cája i cuéntá nacaxoo tóo Onésimo nuun joo viti ndicó coo da ná coo da níi tiempo xuhun. <sup>16</sup> A cája gaúu cuéntá ña cíú dà dà naxeún. Joo vaha chágua viti jáchi cíú dà ñani máni yóho cuéntá Jesucristo. Quíhví ndivaha ini i da joo xíní ñúhú quíhví ini chágum dà jáchi caja chúun da nuun ta cíú dà ñanún cuéntá Jesús viti.

<sup>17</sup> Ta tá mé a ndaa quíhví inún yéhe já quéa ndiquehe vahún dà tá quiaghva ndiquehe vahún yéhe tá ná xíng coo i nu íún jan. <sup>18</sup> Ta tá nacaja da in cuachi nuun á tá yícá da nuun já quéa ndacún ña nuú i ta já chahvi i sahá. <sup>19</sup> Yéhe cíú u Pablo ta cahyí i ña yóho xihín ndáha i já ná candaq inún ña sahán i tuhun i nuun ña chahvi i ña. Xíní ñúhú ndicuhun inún ña yícún nuú i jáchi ñandihvún íchí cuéntá Jesús sahá tuhun nacahán i xuhun. <sup>20</sup> Inga tucu xícá i ñamani nuun ña ná ndiquehe vahún Onésimo jáchi cíú ñani mí i, dà cíú cuéntá Jesús. Tá ná cajún ña yóho sahá ña candeé inún mé á já quéa quiaghvún tuhun ndeé ini i.

<sup>21</sup> Candaq vaha ini i ña cajún ña xícá i nuun cajún sahá ña cán quéa cahyí i carta yóho nuun ta candaq ini i ña yaha chágua cajún nuú ña xícá i nuun. <sup>22</sup> Inga tucu xícá i ñamani nuun ña ná caja tähvún in vehe loho nuú coo i. Jáchí sahá ña xícá tähví ndihi ndó nu Ndióxi ña ná saa i coto nihni i ndohó sahá ña cán quéa caja i cuéntá caja mé á ñamani xihín i saa i jan.

*Ndíndayí Pablo Filemón*

<sup>23</sup> In da naní Epafras, da ndácaan vecaa xihín i sahá Jesucristo chíndahá dà Ndióxi coún. <sup>24</sup> Chíndahá Marcos xihín Aristarco xihín Demas xihín Lucas Ndióxi coún. Mé ná yóho caja chúun na xihín i cuéntá Jesucristo.

<sup>25</sup> Ná caja Jesucristo, xitoho í cuahá ñamani xihín ndihi ndó, ná ndúu jan. Já ná coo.

## Hebreos, mé carta cuahán nuú na Israel

*Nachindahá Ndióxi Jesucristo ña ná quixi a jáyaha tūhun Ndióxi nu yo*

<sup>1</sup> Cuahá ndivaha tañu nacahán Ndióxi sanahá xihín táshánu jíco yo. Ta cuahá ndivaha nuú nacahán xihín ná tá najáyaha na profeta tūhun cahán mé á nuú ñayivi.  
<sup>2</sup> Joo tiempo nu ndíhi yóho nachindahá mé á Jesucristo, in tūhún jini já jahyi a ña ná jáyaha tūhun Ndióxi nu yo viti. Ta nacaja Ndióxi ña nacaváha Jesucristo ndijáa ñaha ñuyíví xihín ñaha indíví. Ta najándaco Ndióxi tóco ndíhi ñaha yóho ndáha mé á.  
<sup>3</sup> Ta mé á quéa náha ndá quiáhva cahnu cíu Ndióxi jáchi yéhe a tá quiáhva yéhe Ndióxi. Ta tá quiáhva cíaa Ndióxi quiáhva já cíaa ri Jesucristo, jahyi a. Ta xihín tūhun cahán yúhu mé á cómí a cuénta sahá tóco ndíhi ñaha jáchi fin ndiváha ndéé tūhun mé á. Ta nandaja víi mé a mí nyú ndíhi cuachí ta já násaco a indíví xoo cuáha Ndióxi, tátá a.

*Cahnu chágá Jesucristo a juú ga tátó Ndióxi*

<sup>4</sup> Ta Jesucristo, mé jahyi Ndióxi naxinu a nanduu a ña cahnu chágá a juú ga tátó Ndióxi. Ta nacaja Ndióxi ña ná ñehe tálvi á ña cahnu chágá quívi naní a juú ga quívi tátó mé á. <sup>5</sup> Jáchi a ñáha cachí Ndióxi xihín ni in tūhún toho tátó mé á tá quiáhva nacachi a xihín jahyi a já:

Jahyi yéhe cíu yóho,  
ta viti cahí i ña nanduu u tátún, cahí a.  
Ta ni coó nacachi Ndióxi xihín ni in tūhún toho tátó á tá quiáhva nacachi a xihín jahyi a já:  
Yéhe cacuu u tátún,  
ta yóho cacuún in tūhún jini já jahyi yéhe,  
cachí a.

<sup>6</sup> Joo tá jalóho cíni chindahá Ndióxi Jesucristo, jahyi a ñuyíví yóho já nacachi a já: Ndítahan nu tóco ndíhi tátó mí i caja cahnu na jahyi i, nacachi a.

<sup>7</sup> Já nacachi Ndióxi já sahá tátó mé á:  
Tá quiáhva cama chíxó táchí quiáhva já cama chí cuahán tátó mí i.  
Ta yéhe ná tá quiáhva yéhe ñuhú cayi ita, já nacachi Ndióxi.

<sup>8</sup> Joo tá nacahán Ndióxi sahá jahyi a já nacachi a já:

Yóho cíu Ndióxi ta cacomún cuénta sahá ñayivi andá ama cíaa quívi,  
ta cáhndún chuun xihín ña ndaa.

<sup>9</sup> Ta a juú quiáhva cátóún ña vaha ta nacan-dajún ña núu.

Sahá ña cán quéa nacaxi i yohó jáchi yéhe cíu u Ndióxi ta cíu u tátún.

Ta najáchutú ndaa i yohó xihín ña cajíi inún já ná cajíi chágá inún a juú ga ná xíca xuhun, nacachi a.

<sup>10</sup> Ta jári já nacachi a já xihín jahyi a:

Nacaváhún tóco ndíhi ñaha tá nacava sahá sahá ñuyíví ta cíu xitoño nuú ña cán.

Ta xihín ndáhun nacaváhún indíví.

<sup>11</sup> Ta vaxi quívi tá ndíhi sahá tóco ndíhi ña yóho joo mún coo tá coún andá ama cíaa quívi.

Ta tóco ndíhi ña jan cayatá ña tá quiáhva cayatá jáhmá ndíxi na.

<sup>12</sup> Tá quiáhva sahá ñayivi jáhmá quiáhva já chicahún ñuyíví xihín indíví.

Ta tá quiáhva ndíjama ñayivi jáhmá ndíxi na quiáhva já ndíjama ña jan cajún.

Joo mún a ndíjama tohún jáchi coo tá coún andá ama cíaa quívi,  
ta a ndíjama tohún ta a ndíhi toho sahun, nacachi Ndióxi xihín Jesucristo.

<sup>13</sup> A ñáha cachí Ndióxi xihín ni in tūhún toho tátó mé á tá quiáhva nacachi a xihín jahyi a já:

Naha quíi cacoún xoo cuáha i yóho,  
janda quiáhva ná cahnu i nu tóco ndíhi ña co cíni yóho ta janda ná chinduu u ná sahun jan, nacachi Ndióxi xihín Jesucristo.

<sup>14</sup> Jáchi tóco ndíhi tátó Ndióxi cíu ná ña tátco ta in ínimá ná joo coó toho yiquí cínu na. Cája chúun na cuénta Ndióxi ta mé á chindahá a ná ñuyíví ña ná chindeé ná ñayivi, ná nacaxi Ndióxi caci ndaa ínimá.

## 2

*Naquixi Jesucristo jácacu a mí*

<sup>1</sup> Sahá ña cán quéa ndítahan nu yó taa joho i ña ndaa, ña naxini joho i já ná a caxoo í chí cuénta Ndióxi. <sup>2</sup> Nacahán tátó Ndióxi tūhun násahan mé á nu ná ta cíu á ña ndaa joo coó naxeen ñayivi cacu vaha na ña. Sahá ña cán quéa najándo Ndióxi ini na tá quiáhva ndítahan ndoho ini na sahá cuachi nacaja na. <sup>3</sup> Joo mí, ndaja caja í caci ndaa ínimá yo tá ta co ták joho i tūhun cahán sahá Jesús, mé a jácacu mí.

Ta ña yóho cíuú á ña cáhnu ndiváha jáchi jihna ñúhú ga mé Jesucristo, xitoho í nacaxi tūhun a ña yóho nuú ñayivi. Ta ná nataa joho nu cáhan mé á, na cán sáhan na tūhun na nu yo ña cíuú á ña ndaa. <sup>4</sup> Ta náha Ndióxi ña cíuú á ña ndaa jáchi caja mé á cuahá ndiváha ña náhnu xihín ña xítuhún ndiváha. Ta nachindahá Ndióxi íníma yii mé á nuú na cíuú cuénta Jesús ña ná caja na ña xítuhún tá quiahva násacu ini mé á caja na.

### *Nanduu Jesucristo in ñayivi*

<sup>5</sup> Coó násahen toho Ndióxi ñamani nu tátó mé á ña ná cacomí na cuénta sahá ñuyíví saá, ña vaxi chágá chí nuú. <sup>6</sup> Jáchi já cachí tūhun Ndióxi já:

Tátá Ndióxi, coó sahá toho ñayivi ta coó ña náhá cíuú ná.

Joo mé ndó ñúhú ini ndó sahá ná ta ndíhi ini ndó sahá ná.

<sup>7</sup> Tá nácaháha ndó ñayivi nandaja ndó na nanduu na ña náhnu ndiváha.

Ta tátó mé ndó cuití va cíuú ná nasayójó loho nu ná tixi chá tiempo.

Ta tóco ndihí ña nácaháha ndó nandiquiahva ndó ña ndáhá ñayivi, <sup>8</sup> já ná cacomí na cuénta sahá, cachí tūhun Ndióxi.

Ta mé a ndaa ni in ñaha coó nácahoo xóo jáchi násacu ini Ndióxi cacomí ñayivi cuénta sahá tóco ndihí ñaha joo cámáni yii va xinu coo mé quiví cán. <sup>9</sup> Vatí cámáni yaha ña yóho joo xíni yo ña nandoho Jesús. Tixi chá tiempo nácaja Ndióxi ña ná nuu ndáhá chágá mé á nu tátó Ndióxi jáchi sahá ña quíhyi ini Ndióxi mí sahá ña cán quéa násacu ini a ña ná quiví Jesucristo sahá ndihí ñayivi. Ta viti nandindita mé á nanduu a ña cáhnu ndiváha sahá ña nandoho a tá náxihí a ndíca crúxu sahá cuachí jáchi caja ndaa mé á tóco ndihí ñaha ta táchvi ini a sahá yo. Ta xihín ña yóho nácaja cáhnu ini a sahá cuachí. <sup>10</sup> Ta sahá ña nandoho ini mé á ta sahá ña naxito ndojó rí quini mé á sahá ña cán quéa xíni a ndá quiahva ndóho iní. Ña cán quéa cuu chindeé a ndaja táhan na ndóho iní, na xito ndojó tiñahá sacuahá.

### 3

#### *Cáhnu chágá Jesús a juú ga Moisés*

<sup>1</sup> Candehé ndo, ñani i, na cíuú cuénta Jesús. Mé ndó cíuú ndó na nácaxi Ndióxi cacomí a cuénta sahá. Candehé ndó Jesucristo, mé á cíuú á tátuhun apóstol, ña nachindahá Ndióxi cacuu jutu sacuahá saha yo nu Ndióxi sahá ña candeé iní mé á. <sup>2</sup> Ta xihín ndinuhi ini a nácaja chíuun a cuénta Ndióxi, mé a nácaxi ñahá. Jáchi tá quiahva nácaja Moisés tóco ndihí ña cúní Ndióxi tañu na cíuú cuénta mé á quiahva já nácaja Jesús tóco ndihí ña cúní Ndióxi, tátá a. <sup>3</sup> Joo ndítahan ndicáhnu chágá Jesús a juú ga Moisés jáchi cáhnu chágá Jesús a juú ga Moisés. Cíuú á tátuhun tá cávaha in dàtaa in vehe ta ndítahan ndicáhnu chágá mé dá a juú ga vehe da. <sup>4</sup> Ndúsá coo in dà cávaha

Ndicani i nuú ñani i sahá mé ndó. Ta nu ndítútú na cata i caja cáhnu i ndohó, cachí Jesús.

<sup>13</sup> Ta cachí tucu a já:

Yehé candeé ini i Ndióxi, tátá i.

Ta cachí tucu a já xihín Ndióxi:

Yóho íin i xihín ndihí jahyi ndó, na násahen mé ndó nuú i cacomí i cuénta sahá, cachí Jesús.

<sup>14</sup> Sahá ña íin yíquí cuñu ñayivi, na cíuú jahyi Ndióxi sahá ña cán quéa nanduu Jesús in ñayivi ta násahín yíquí cuñu a tátuhun mí. Ta tá náxihí yíquí cuñu a já nacandeé a násahen a nuú tiñahá sacuahá, rí caja ña xihí ñayivi. <sup>15</sup> Ta xihín ña yóho najácacu a tóco ndihí na násayíhví quiví jáchi níi tiempo násanduu na ndáhá tiñahá sacuahá sahá ña yílhí na. <sup>16</sup> Jáchi mé a ndaa coó naquixi Jesucristo ña ná chindeé a na cíuú tátó Ndióxi. Ña naquixi mé á caja quéa chindeé a ñayivi, na candeé ini Ndióxi tá quiahva nácaháha ini Abraham Ndióxi.

<sup>17</sup> Ña cán quéa naxini ñúhú Jesús nduu a in ñayivi cácu ñuyíví yóho tátuhun mí. Ta xihín ña nandoho a naxinu a nanduu a in jutu sacuahá nu Ndióxi indíví. Ta náxihí a ndíca crúxu sahá cuachí jáchi caja ndaa mé á tóco ndihí ñaha ta táchvi ini a sahá yo. Ta xihín ña yóho nácaja cáhnu ini a sahá cuachí. <sup>18</sup> Ta sahá ña nandoho ini mé á ta sahá ña naxito ndojó rí quini mé á sahá ña cán quéa xíni a ndá quiahva ndóho iní. Ña cán quéa cuu chindeé a ndaja táhan na ndóho iní, na xito ndojó tiñahá sacuahá.

vehe já cuu cavaha ña joo tóco ndihi ñaha íin ajáchi nacavaha Ndióxi ña. <sup>5</sup> Ña cán quéa nacaja chúun Moisés cuénta Ndióxi xihín ndinuhu ini da tañu ñayivi mé á. Ta chuun nacaja da quéa caxí tuhun jíni da xihín ná ña cúnj Ndióxi cahán xihín ná chágá chí nuu. <sup>6</sup> Joo jíin va chuun nacaja Jesús, mé á cúu in túhún jíni já jahyi Ndióxi jáchi cómí a cuénta sahá na cúu cuénta mé á xihín ndinuhu ini a. Cuénta mé á cúu mí tá ndacú coo ínima yó ta tá ná candee iní mé á. Ta xíní ñuhú cajíi iní candatí anda quixi mé á.

<sup>7</sup> Cúni Ndióxi ña ná ndíhvi na cúu cuénta mé á nuú ndiquehe ndée ná

<sup>7</sup> Candehé ndó ndá quiáhva cáchí ínima yii Ndióxi iní tuhun mé á tá cáchí a já:  
Tá ná cuni joho ndó ña cahán Ndióxi xihín ndó quiví víti,

<sup>8</sup> a caja sáá ini ndó xihín á tá quiáhva nacaja na Israel tá naxica nuu na yucú íchí cán.

Jáchi nandiñehé yúhu ná nuú Ndióxi ta ihvi ndivaha násacuu ini na xihín Ndióxi.

<sup>9</sup> Ta já cáchí Ndióxi já:

“Mé yucú íchí jan naxito ndojó tásáhnu jíco ndó yehe,

vatí naxini na ña náhnu ndivaha nacaja i tixi ivi jíco cuja.

<sup>10</sup> Sahá ña cán quéa naxojo ini i xihín tóco ndihi ña cán,  
ta nacachi i sahá ná ña cúu ná na cahvi ivi, joho ini,

ta sáá ini na caca na íchí cuénta mí i.

<sup>11</sup> Sahá ña cán quéa naxojo ini i xihín ná, ta násahan i tuhun i ña a quiáhva toho i ñamani nuú ná  
ndíhvi na nuú ndiquehe ndée na xihín i”,  
nacachi Ndióxi xihín na Israel.

<sup>12</sup> Ña cán quéa cuénta vaha coo ndó, ñani i já ná a cárnehe ndó ínima quini ña jácaxoo ndó nuú Ndióxi, ña tacú, sahá ña co cúnj ndó candúsa ndó mé á. <sup>13</sup> Ña ndítahan caja ndó quéa quiáhva tuhun ndee ini táhan ndó nini quiví. Tá a quiáhva ndó ñamani yaha quiví víti tá núná nuú ndó caja ndó ña cúnj Ndióxi. Jáchi co cúnj a ña ná jándahvi ña núná ñuyíví yóho ndohó ta já ná ndisáa ini ndó nuú Ndióxi. <sup>14</sup> Jáchi tá ná candee ndusa iní mé á janda quiáhva ná xinu quiví nuú ndíhvi cuíi tá quiáhva nacaja i janda sahá já quéa cúnj cache a ña in nanduú xihín Jesucristo.

<sup>15</sup> Jáchi quiáhva já cáchí tuhun Ndióxi:

Tá xíní joho ndó ña cahán Ndióxi xihín ndo quiví víti,  
a caja sáá ini ndó xihín á tá quiáhva nacaja na Israel tá nandiñehé yúhu ná nuú Ndióxi yucú íchí cán, cáchí a.

<sup>16</sup> Jáchí sá xíní ndó ndá ná nandiñehé yúhu nuú Ndióxi tá naxini joho na ña násahnda mé á nuú ná. Na cán cúu ná tóco ndihi na násandaca Moisés tá naqueta na nación Egipto. <sup>17</sup> Ta xihín mé ná cán naxojo ini Ndióxi tixi ivi jíco cuja jáchi nacaja na cuachi nuú mé á ta sahá ña cán quéa nacuyu na naxihí ná yucú íchí cán. <sup>18</sup> Ta sahá ña coó náxeen na caja na ña cúnj Ndióxi sahá ña cán quéa násahan Ndióxi tuhun a ña a quiáhva toho a ñamani nuú ná canduu na nuú ndiquehe ndée na xihín á. <sup>19</sup> Ta mé a ndaa cándaa iní ña coó nácuu ndíhvi na nuú násacu ini Ndióxi coo na sahá ña co náxeen na candúsa na mé á.

#### 4

<sup>1</sup> Sahá ña cán quéa viti sáhan yii va Ndióxi ñamani nuú yó yaha í nuú násacu ini mé á ndiquehe ndée yó xihín á. Joo xíní ñuhú cuénta vaha coo ndó jáchi tiahva náá a xinu coo java ndó ndíhvi ndó cán. <sup>2</sup> Jáchi tá quiáhva naxini joho na Israel tuhun Ndióxi quiáhva já naxini joho í tuhun mé á, ña cáchí a cúnj jácacu Ndióxi ñayivi. Joo coó náxandúsa na cán ña sahá ña cán quéa coó chuun a nuú ná. <sup>3</sup> Joo mí cúu yó ná candee iní Ndióxi ta sahá ña yóho tandaa quiví xinu coo í ndíhvi nuú ndiquehe ndée yó xihín á. Ta já cáchí Ndióxi já sahá ña yóho:

Naxojo ini i xihín na co cándúsa yehe, sahá ña cán quéa násahan i tuhun i ña ná a ndíhvi toho na nuú násacu ini i ndiquehe ndée ná xihín i, cáchí a.

Nacachi Ndióxi ña yóho vatí sa nacaja tiahva mé á nuú ndíhvi na ndiquehe ndée ná anda tá nacava sahá sahá ñuyíví. <sup>4</sup> Ndáa ini tuhun Ndióxi ña nacaja mé á quiví usa. Já cáchí a já:

Quiví usa nandiñehé ndée Ndióxi nuú chuun nacaja tá nacavaha tóco ndihi ñaha, cáchí tuhun Ndióxi.

<sup>5</sup> Ta já cáchí tucu a já sahá na co cándúsa Ndióxi:

A ndíhvi toho na canduu na nuú ndiquehe ndée ná xihín i, nacachi a.

<sup>6</sup> Ta coó nandiñehé toho na nacahen Ndióxi xihín nuú cuítí cán jáchi coó náxeen na candúsa na mé á. Joo núná yii va nuú java

ñayivi ndihvi na ndiquehe ndée ná xihín  
mé á. <sup>7</sup>Jáchí násacu Ndióxi inga quivi ta cíu  
á quivi víti ta já cuu ndihvi ñayivi ndiquehe  
ndée ná xihín mé á. Sanahá ndiváha ná-  
cahan Ndióxi xihín rey David sahá ná yóho  
ta nacahiyá dä ña ta já cachí a já:

Tá xíni joho ndó ña cáhan Ndióxi xihín ndó  
quivi víti a caja saá ini ndó xihín á,  
cachí tūhun Ndióxi.

<sup>8</sup>Ta sá xíni yo ña coó najándihvi Josué ñayivi  
nu ndiquehe ndée ná xihín Ndióxi jáchí  
nacahán Ndióxi sahá inga quivi vaxi chágá  
chínú. <sup>9</sup>Sahá ña cán quéa sa xíni yo ña  
cámaji xínu coo quivi ndiquehe ndée ná  
cúu cuénta mé á tá quiáhva nandiquehe  
ndée mé á quivi usa. <sup>10</sup>Jáchí ndá ná ná  
ndihvi ndiquehe ndée nu íin mé á cán já  
quéa ndiquehe ndée ná nuú chuun nacaja  
na tá quiáhva nandiquehe ndée Ndióxi nuú  
chuun nacaja mé á. <sup>11</sup>Sahá ña cán quéa  
ndítahan ndihvi iní ndihví nuú ndiquehe  
ndée yo cán. Ta ná a caja í tá quiáhva nacaja  
ná Israel cán tá coó naxeen na candusa na  
nuú nacahán mé á xihín ná.

<sup>12</sup>Íin cuaha ndée tūhun Ndióxi ta cíu á  
tátuhun ña tácú. Ta íin chágá ndée tūhun  
Ndióxi a jyú ga in yúchú ña ívy yúhu. Ta tá  
quiáhva quíhvi yúchú ña ívy yúhu tá sáhndá  
yíquí cuñu quiáhva já quíhvi tūhun Ndióxi  
janda maá ini íníma ñayivi xihín xín túni  
ná ta já xínu a ini na. Ta náhá ndá quiáhva  
cáhvi ini na. <sup>13</sup>Jáchí xíni Ndióxi tóco ndihí  
ñaha ta a cuú chijehé yo ña cáhvi iní jáchí  
sández mé á tóco ndihí ñaha nacavaha mé  
á. Ta vaxi quivi nahma yó nu mé á tóco  
ndihí ña nacaja í.

### Jesús cíu á jutu sacuahá nuú ndihí indíví

<sup>14</sup>Mé Jesús cíu á jutu sacuahá nuú ndihí  
sahá ña cán quéa co ndítahan jándacoo í  
ñá cández iní Jesús, mé a cíu in túnjin jini  
já jahyi Ndióxi. Ta nandihvi a indíví nu  
íin Ndióxi. <sup>15</sup>Ta cándezhvi iní Jesús mí jáchí  
cíu á jutu sacuahá nu yo ta cándaa ini a  
ñá cíu yó ñayivi vitá ndiváha ini. Jáchí  
tá naxica nuu a ñuyíví yóho naxito ndojó  
tiñahá sacuahá mé á xihín tá nuú ñaha tá  
quiáhva caja rí xihín mí joo ni in túnjin  
cuachi coó nacaja mé á. <sup>16</sup>Ña cán quéa a  
cáyihví toho í cayatí nu íin coo Ndióxi, mé  
a quíhvi iní a mí jáchí táchví iní a sahá yo ta  
chíndee a mí tá ná caca í ñamani nu á.

### 5

<sup>1</sup>Tóco ndihí dä cíu jutu sacuahá chágá nu  
ndihí jutu cíu dä dä caxi na tañu ñayivi  
Israel, já ná cahan cuachí dä sahá ñayivi  
nu Ndióxi. Ta jári joco dä ñaha nu Ndióxi  
ta sahí dä quiti nu ná sahá cuachí na.  
<sup>2</sup>Ta sahá ña cíu dä dä vitá iní, dä ñuyíví  
yóho sahá ña cán quéa cuu candáhví iní da  
ñayivi, na co xíni ña sáhndá Ndióxi. Ta cuu  
candáhví iní da ná caja cuachi. <sup>3</sup>Ta sahá ña  
vitá iní da sahá ña cán quéa ndítahan cahní  
da quiti joco dä rí nu Ndióxi sahá cuachi mé  
dá xihín sahá cuachi ñayivi viti.

<sup>4</sup>Ta ní in dä cán a cíu chinú da mé dä  
cacuu da jutu sacuahá chágá nu ndihí jutu.  
Jáchí xíni ñúhú cacuu da dä nacana Ndióxi  
caja chún cuénta mé á tá quiáhva nacaja  
Ndióxi sanahá tá nacana mé á Aarón ña ná  
caja chún da cuénta mé á. <sup>5</sup>Quiáhva já  
nayaha xihín Jesucristo jáchí coó nachinú  
a mé á ña ná nduu a jutu sacuahá. Ndióxi  
quéa nachinú ñahá tá nandaja cahnu a  
Jesús. Ta já nacachi Ndióxi já xihín á:

Jahyi yehé cíu yóhó,  
ta viti cachí i ña nanduu u tátún, cachí a.  
<sup>6</sup>Ta inga nu cáhan tūhun Ndióxi já cachí a  
já:

Andá ama cúa quivi cacuún jutu,  
ta cajún tá quiáhva nacaja in jutu, da  
násananí Melquisedec sanahá,  
cachí a.

<sup>7</sup>Nani náshaijin Jesucristo ñuyíví yóho a jyú  
quiáhva naxica tähví a nu Ndióxi. Ta java  
tañu násacu a ta java tañu nacayuhú a nu  
Ndióxi, mé a cíu chíndee ñahá ña ná a quivi  
toho a. Ta sahá ña násacaja Jesús tóco ndihí  
ñá sáhndá Ndióxi, tátá a sahá ña cán quéa  
naxini joho Ndióxi nu cáhan mé á. <sup>8</sup>Ta vatí  
cíu Jesucristo in túnjin jini já jahyi Ndióxi  
joo xihín ña nandoho ini a ñuyíví yóho  
nacatiahva coo joho a nu cáhan Ndióxi, tátá  
a xihín á. <sup>9</sup>Ta xihín ña yóho naxicu coo  
mé á nacaja tóco ndihí ña ná qatähndá nu a  
caja. Janda jává nacuu jácacu a mí ña ná coo  
í xihín mé á andá ama cúa quivi tá ná caja  
í ña sáhndá mé á. <sup>10</sup>Ta nandicojo a chún  
nacaja Ndióxi ña ná nduu a jutu sacuahá  
tátuhun mé jutu, da násananí Melquisedec.

Cuénta coo ndó ná a jándacoo ndó ña cán-  
deé iní ndó Jesús

<sup>11</sup>Íin cuahá ndivaha ñaha cíu ndicani  
i nu ndo sahá ña yóho joo yáncá ndivaha  
ndicani i ña nu ndo jáchí co cíu ndo taa

jojo ndó nu cáhan i.<sup>12</sup> Anda jihna nandihví ndó íchí cuéntá Jesús ta viti sa ndítahan nu ndó jánahá ndó tūhun Ndióxi nuú ñayivi. Joo co cája ndó já jáchí na cavita ndó ta tucu tucu jácuaha ndó ña co ílhvi toho. Ta viti cíuú á tátuhun co ndeeé ini ndó cuxu ndó ña xíxi ñayivi náhnu joo ña cája ndó quéa xíhi yíj va ndó leche tátuhun na valí va.<sup>13</sup> Ta tá quiahva xíhi na valí leche quiahva já cája ri na co tiáhva ndícumi ndíqá cíuú ña vaha ta ndíqá cíuú ña náu. <sup>14</sup> Joo ñayivi, na cándaa vaha ini tūhun Ndióxi cíuú ná tátuhun ñayivi náhnu, na tacu ini, na xíxi cíuú va jáchí sá tiáhva na ndícumi na ndíqá cíuú ña vaha ta ndíqá cíuú ña náu.

## 6

<sup>1</sup>Sahá ña cán quéa ña ndítahan caja í quéa ndindacu chágá yo xíhín ñaha Ndióxi janda quiahva ná xíxi coo í cacuú ñayivi tacu ini xíhín ñaha Ndióxi. Co ndítahan jácuaha tucu ña najácuaha í tá jacá nandihví íchí cuéntá Jesús jáchí ndítahan catiáhva í ña jan. Ndítahan cándaa iní ña cacu ndaa íníma yo sahá ña cández iní Jesucristo cuití va ta co cíuú á sahá ña cája í ña vaha.<sup>2</sup> Ta sa cándaa iní ña ndítahan candútua na cíuú cuéntá Jesús. Ta sa cándaa iní ndaja cája í chinúu ndáhá yó jiní ñayivi tá xíca tálvi yó nu Ndióxi sahá ná. Ta sa cándaa iní ña vaxi quíví nditacu tucu tocó ndíhi ndíqá ná caja ví Ndióxi sahá ná.<sup>3</sup> Sahá ña cán quéa cáchí í xíhín ndó: Coho ndindacu chágá yó xíhín ñaha Ndióxi, tá ná quiahva Ndióxi ñamani nu yo.

<sup>4</sup>Ta a cíuú ga ndicó coo ñayivi nu Ndióxi tá sa najándacoo na ña nasandeé ini na mé á. Jáchí sa najándiyéhe Ndióxi íníma ná ña ná cándaa ini na sahá mé á ta sa xíni ña ndá quiahva fin ñaha Ndióxi. Ta janda íníma yíj Ndióxi sa nandacan íníma ná.

<sup>5</sup>Ta sa nacandaa ini na tūhun vaha cáhan sahá Jesucristo ta sa nacandaa ini na ndá quiahva náhnu caja Ndióxi chágá chí nuu.

<sup>6</sup>Joo tá ná jándacoo na jan ña cández iní na Ndióxi já quéa a cíuú ga ndicó coo na nu mé á jáchí xíhín ña cája na cíuú á tátuhun cata caa tucu na Jesucristo, jáhyi Ndióxi ndicá crúxu ta já sácu ndaa na mé á nuú ñayivi.

<sup>7</sup>Jáchí sa xíni ndó ndaja fin ñundáhyi nu cíuun vaha javí ta ndíndahyia. Ta tá ná cana cuahá ñaha nuú naxutu ñayivi cán já quéa cúní cachí a ña cája Ndióxi ñamani xíhín

ñundáhyi cán.<sup>8</sup> Joo tá ná nana tohíñu xíhím tóchihmá nu ñuhu cán já quéa coo sahá toho a ta ña yóho cúní cachí a ña co cája toho Ndióxi ñamani xíhín á ta vaxi quíví cayí a caja Ndióxi.

Vaxi quíví coo í xíhín Ndióxi tá co jándacoo íchí cuéntá mé á

<sup>9</sup>Candezé ndó, ñani maní i, na cíuú cuéntá Jesús. Vatí cáhan nde ña yóho xíhín ndo joo cández iní nde ndohó ña cája tá cája ndó ña vaha ña ndítahan caja na cández iní Jesús.<sup>10</sup> Ta xíni nde ña cája Ndióxi ña ndaa cuití va ta a ndíndójó toho mé á sahá ña vaha na caja ndó tá nachindeé ndó na cíuú cuéntá Jesús jáchí xíhín ña yóho náhá ña quíhvi iní ndusa ndó mé á. Ta mé a ndaa janda viti chíndeé ndó na cán.<sup>11</sup> Ta a juú quiahva cíuú nde ña ná ndíhi ini in ndó chíndeé ndo na cíuú cuéntá Jesús anda quíví nu ndíhi. Ta xíhín ña yóho vaxi quíví tá quiahva Ndióxi nu ndo tóccó ndíhi ña ndáti ndó quiahva mé á nu ndo.<sup>12</sup> Co cúní nde ña ná cajúsá ndo caca ndó íchí cuéntá Jesús. Ña cúní nde quéa ná ndíhi ini ndó caja ndó tá quiahva caja na cández iní Ndióxi, na coo najándacoo ña cández iní na mé á ta xíhín ña yóho ñehe tálvi ná ña nasahán Ndióxi tūhun a quiahva nu ná.

<sup>13</sup>Tá nasahán Ndióxi tūhun a nu Abraham sanahá já natavá a quíví mé á tátuhun testigo jáchí coo inga ga ña cáhu chágá a juú ga mé á.<sup>14</sup> Ta tá nasahán mé á tūhun a nu dá já nacachi a já xíhín dá: “Mé a ndaa caja cuahá í ñamani xíhín ta caja í ña ná ndicuahá ndivaha na quixi chichún.” Já nacachi Ndióxi xíhín Abraham tá nasahán tūhun a nu dá.<sup>15</sup> Ta coo nandihí ini Abraham nani nasandati da jáxínu coo Ndióxi tūhun a ta chí ñehe dá ña nasahán Ndióxi tūhun a quiahva nu dá.<sup>16</sup> Tá sáhan ñayivi tūhun na nuú inga ñayivi já tálvi ná quíví in na cáhu chágá a juú ga mé ná ña ná cacuu na testigo. Jáchí cája ndusa in testigo xíhín ná jáxínu coo na ña nasahán na tūhun na caja na.<sup>17</sup> Sahá ña cán quéa natavá Ndióxi quíví mé á jáchí cúní a jánahá caxí a nuú ñayivi ña a ndíjama toho a tūhun nasahán nu ná ta ndusa jáxínu coo a tūhun a nuú ná ñehe tálvi ndiquehe a.<sup>18</sup> Ta cándaa iní ña nasahán Ndióxi tūhun a nu yó ta natavá a quíví á cacuu a testigo ta xíhín ndíví ña yóho sa xíni ví ña a cíuú ndijama Ndióxi ta ni a cíuú cáhan mé á ña tūhún. Ta xíhín

ñá yóho sáhan mé á tūhun ndeé iní jáchi cández iní mé á ta sa nandiquiahva í mí ndáha mé á ñá ná jácacu a mí.<sup>19</sup> Sáhá ñá cán quéa cátivi tuun í xihín Ndióxi ta cández iní ñá quiähva mé á nu yo ñá sáhan tūhun a quiähva nu yo. Ta sahá ñá cández cahnu iní mé á sahá ñá cán quéa co yihví toho í cayatí nu mé á jáchi sa nandihvi Jesús nuú yii ndiváha indív. <sup>20</sup> Ta cúní Jesús chindéé a mí ñá ná xihín coo í nu fin a cán sahá ñá cán quéa nandihvi jihna ñuhú ga cán a juú ga mí. Ta cuu caja Jesús ñá yóho jáchi nanduu a jutu sácuahá nu Ndióxi ta anda ama cääa quiyi caja mé á chuun yóho tá quiähva nacaja da naní Melquisedec sánahá ndiváha.

## 7

*Chuun nacaja Melquisedec sánahá*

<sup>1</sup> Mé Melquisedec yóho násacuu da rey nuú ñayivi ñuu Salem ta násacuu da jutu nu Ndióxi, mé á cútú ñá cahnu chágaa a juú ga inga ga. In tañu tá nandicó coo Abraham násahan da nacani táhan da xihín java rey ta najándihí da sahá na cán já naqueta Melquisedec íchí nuú vaxi Abraham ta já nacaja yii dá Abraham. <sup>2</sup> Ta mé Abraham nandaja da uxu tähndá tóco ndihi ñá ncandaa da ndáha java rey tá naquee vaha da xihín na cán. Ta já násahan da in tähndá nuú Melquisedec. Ta quiyi Melquisedec yóho cúní cachi a rey, da caja ñá ndaa. Ta sahá ñá cómi dä cuénta sahá ñuu Salem, ñá cúní cachi a nuú fin vaha ini ñayivi sahá ñá cán quéa cútú dá rey, da caja ñá nuú coo vaha ini ñayivi. <sup>3</sup> Ta ni in ñayivi co xíni na sahá tátá náná mé Melquisedec yóho ta co ndáa nuú tutu quiyi tásáhnu jíco dä. Ta co xíni na ndá tañu nacacu da ta ni co xíni na ndá tañu naxihí dä. Joo ñá xíni na quéa cútú dá jutu anda ama cääa quiyi tá quiähva cútú Jesucristo jutu anda ama cääa quiyi, mé a cútú in tühún jini já jahyi Ndióxi.

<sup>4</sup> Ta viti cuu candhéndó ndaja cahnu násacuu Melquisedec jáchi jändä mé Abraham, da násacuu tásáhnu jíco yo násahan da nuú Melquisedec in tähndá nuú uxu tähndá ñáha ñá ncandaa da ndáha rey, da naquee vaha da xihín cán. <sup>5</sup> Ta sa xíni ndo ñá cachí ley Moisés ñá fin sahá nuú jutu, na naquixi chichi Leví ndiquehe na in tähndá nuú uxu tähndá ñá cómi na Israel. Jáchí mé jutu cán caja chüun na nu Ndióxi

cuénta táhan na na Israel vatí in cútú tóco ndihi na sahá ñá naquixi ndihi na chichi Abraham. <sup>6</sup> Vatí coó naquixi Melquisedec yóho chichi Leví joo naquehe tá naquehe da in tähndá nuú uxu tähndá ñáha nu Abraham, da násahan Ndióxi tūhun a nuú ñá caja cuahá ñamani xihín. Tá nacaja yii Melquisedec Abraham 'náha ñá mé a ndaa cahnu chágaa da caja yii ñayivi a juú ga na nacayii cán. Ta ni in na a cútú cachi na ñá co cútú ñá yóho ñá ndaa. <sup>8</sup> Ta sa xíni yo ñá cahnu chágaa Melquisedec a juú ga jutu, na naquixi chichi Leví, na quéhe in tähndá nuú uxu ñáha jáchi cútú ná ñayivi, na ndíhi sahá. Joo cahnan tūhun Ndióxi sahá Melquisedec tátuhun tacú yii va da. <sup>9</sup> Ta náha ñá cahnu chágaa Melquisedec a juú ga Leví, da cútú tásáhnu jíco tóco ndihi jutu, na quéhe in tähndá nuú uxu a cán. Jáchí cútú á tátuhun nachahvi Leví in tähndá nuú uxu a tá nachahvi Abraham ñá nu Melquisedec. <sup>10</sup> Jáchí tá naquehe Melquisedec in tähndá nuú uxu ñáha nu Abraham, cútú á tátuhun nasañehe Abraham tóco ndihi na vaxi chichi da ini yiquí cuñu da jáchi cámání yii cacu na mé tiempo já.

<sup>11</sup> Ta tóco ndihi jutu, na naquixi chichi Aarón, naquixi na chichi Leví viti. Ta vatí nacaja na chuun Ndióxi ñá jáyaha na ley Moisés nuú ñayivi joo a cútú nduu ndaa ñayivi nu Ndióxi xihín mé ley. Sáhá ñá cán quéa nachindahá Ndióxi Jesucristo ñuyíví yóho já ná cacuu a inga jutu, ñá ná caja tá quiähva nacaja Melquisedec sánahá. Ta coó nacaja mé á tá quiähva nacaja Aarón, da násacuu tásáhnu jíco jutu cán. <sup>12</sup> Ta tá nachindahá Ndióxi in jutu saá xíni ñuhú a ndijama ri a ley va. <sup>13</sup> Ta mé jutu saá cútú Jesucristo, xitoho í, mé a cahán tūhun Ndióxi sahá. Ta coó naquixi Jesucristo chichi Leví ta ni coó naquixi chichi Aarón. Jfin va chichi naquixi a ta ni in da taa naquixi chichi cán a ñáha cacuu da jutu. <sup>14</sup> Joo cándaa vaha ini ñayivi ñá naquixi Jesucristo chichi Judá ta co cútú á chichi nu sá cana jutu ta ni coó nacahán Moisés sahá na quíxi chichi Judá tá nacahán da sahá na cacuu jutu.

<sup>15</sup> Ta cándaa vaha chágaa infi ñá yóho jáchi sa xíni yo ñá mé jutu saá ñá cútú Jesucristo nandiquehe a chuun tátuhun nacaja Melquisedec sánahá. <sup>16</sup> Ta coó nanduu a jutu sahá ñá nacacu a chichi Leví nu sá cacu jutu. Joo nanduu a jutu sahá ñá cútú

cája tócó ndihí ñáha ta sahá ñá tacú a anda ama cáá quivi.<sup>17</sup> Jáchí tá cahán Ndióxi sahá Jesucristo já cachí a já:

Yóhó cún jutu anda ama cáá quivi,  
tátuhun mé jutu, da násahaní Melquisedec  
jáchí cajún chuun tá quiahva nácaja  
mé dá, cachí tóhun Ndióxi.

<sup>18</sup> Sahá ñá cán quéa nácaundo xóo ley Moisés jáchí coó chuun a ta a cuú chindeé a ñayivi.<sup>19</sup> Ta ni coó nácuu caja mé ley Moisés ñá ná nduu ndaa ñayivi nu Ndióxi. Joo viti cajíi iní jáchí xihín ñá nácaja Jesucristo já cuu nduu ndaa yó nu Ndióxi ta já cuu cayatí nu mé á.

<sup>20</sup> Ta tá nácaja Ndióxi ñá nanduu Jesucristo jutu já násahan tóhun a ta násacu a mé á cútú á testigo sahá.<sup>21</sup> Joo tá nanduu na náquixi chichí Leví cán jutu coó násahan Ndióxi tóhun a sahá ná tá quiahva nácaja xihín Jesucristo tá nanduu a jutu. Ta já nácachi Ndióxi iní tóhun mé á:

Yehe cútú Ndióxi ta násahan i tóhun i nu yóhó ta a ndíjama toho i tóhun cahán i;

“Náchinu i yóhó cacuún jutu anda ama cáá quivi.

Ta cajún chuun tá quiahva nácaja Melquisedec sanahá”, cachí Ndióxi.

<sup>22</sup> Sahá ñá nandicojo Jesucristo chuun násahan Ndióxi nu á sahá ñá cán quéa cández iní ñá jáxíi coó Ndióxi tóhun násahan nu yo. Ta vaha chágá ñá yóhó a juú ga ley Moisés.<sup>23</sup> Ta ndaja coo násanduu cuahá jutu, na náquixi chichí Leví cán jáchí naxihí ndihí na ta nácaundo chuun na nuú inga na.<sup>24</sup> Joo tácú Jesucristo anda ama cáá quivi ñá cán quéa a jándaco toho a chuun a nuú inga ga.<sup>25</sup> Ñá cán quéa anda ama cáá quivi iní tiahva Jesucristo jácacu a mí tá ná cayatí nu Ndióxi sahá ñá nácaja Jesucristo tá naxihí a ndíca crúxu. Ta iní mé á nu Ndióxi xíca tähví a nu mé á sahá ná cández iní mé á.

<sup>26</sup> Mé a ndaa xíni ñúhú yo Jesucristo ñá ná cacu a jutu sacuahá nu Ndióxi sahá yo. Jáchí mé a cútú á ñá yii ndiváha ta ni in cuahá coó nácaja mé a ta ni in cuahá a cútú chícaan yó jatá. Ta co xíca nuu ga mé a tóhun na caja cuahá jáchí iní a indívi nu ndícahnú ndiváha mé á.<sup>27</sup> Co xíni ñúhú caja Jesucristo tá quiahva nácaja java ga jutu sacuahá, na náquixi chichí Leví. Jáchí nini quivi násahní na cán quítí joco na rí

nú Ndióxi sahá cuahí ñayivi. Ta nú cuítí nácaja na ñá sahá cuahí mé va na ta anda jáví nácaja na ñá sahá cuahí ñayivi. Joo jíin va nácaja Jesucristo jáchí in tóhun tañu cuití va najocó a mé á tá naxihí a ndíca crúxu sahá cuahí tócó ndihí ñayivi.<sup>28</sup> Tá nácaja na ñá cachí ley Moisés já násacu na in dataa, da caja cuahí ñá ná cacu a jutu sacuahá. Joo tá nandihu já náchinu Ndióxi Jesucristo, jahyi a ñá ná cacu a jutu sacuahá, ñá caja ñá ndaa anda ama cáá quivi. Ta násahan Ndióxi tóhun a nu yo ñá jáxíi coo a tócó ndihí ñá cachí a.

## 8

*Jesús cútú á jutu sacuahá sahá yo indívi*  
<sup>1</sup> Nácahi nde ñá yóhó ñá ná candaa iní ndó ñá cútú Jesucristo jutu sacuahá sahá yo nu Ndióxi ta iní coo a xoo cuahá Ndióxi indívi nu ndícahnú ndiváha mé á.<sup>2</sup> Cútú á jutu sacuahá caja ndívi a veñuhu indívi ñá nácavahá Ndióxi ta co cútú á ñá nácavahá ñayivi.<sup>3</sup> Ndítahan nu tócó ndihí na cútú jutu sacuahá cahní na quítí nu Ndióxi ta joco na ñáha nu á. Ñá cán quéa ndítahan ri nu Jesucristo joco a ñáha nu Ndióxi.<sup>4</sup> Tá ná caca nuu Jesucristo ñuyíví yóhó, nduu já quéa a cácuu toho a jutu, nduu. Jáchí sa ndíu cuahá ndiváha jutu ñuyíví yóhó ta joco na ñáha nu Ndióxi tá quiahva sáhndá ley Moisés.<sup>5</sup> Joo ñá caja mé ndihí jutu ñuyíví yóhó cútú á tátuhun yuhú nuu ñá caja Jesucristo indívi. Ta cándaa iní ñá cútú á tátuhun yuhú nuu ñá iní indívi jáchí sanahá ndivahá tá násahnda Ndióxi chuun nu Moisés ñá ná cavahá da veñuhu xihín ní quítí já nácahi Ndióxi já xihín dä: “Cuéntá coún ndaja cavahún veñuhu xihín ní quítí jan. Jáchí xíni ñúhú coo a tá quiahva caja ñá nanahá i nuún jiní yúcú cán”, nácahi Ndióxi xihín Moisés.<sup>6</sup> Joo Jesucristo, mé a cútú jutu sacuahá sahá yo indívi nandicojo a in chuun ñá vaha chágá a juú ga chuun caja jutu ñuyíví. Vaha chágá ñá nácaja Jesucristo a juú ga ley Moisés jáchí jándique táhan máni a mí xihín Ndióxi ta xihín ñá yóhó xíni coo tóhun násahan Ndióxi nu yó jihna.

<sup>7</sup> Tá ná cuu caja ley Moisés ñá jácacu a mí ná a cútuhun toho í indayá, nduu já quéa co xíni ñúhú quivi Jesucristo jándique táhan máni a mí xihín Ndióxi, nduu.<sup>8</sup> Joo xíni

v̄aha Ndióxi ña mé ley Moisés a cuú jácacu a ñayivi sahá ña cán quéa já nacachi a já:

Vaxi quiví tá quiahva i tuhun saá nuú ñayivi

Israel ta nuú na naquixi chichi Judá.

<sup>9</sup>Jín va cuú tuhun saá quiahva i nu ná, jáchi co cuú toho a tuhun nasañan i nu tásahnu jícó na sañahá ndivgha, tá natiin ndahá i na ta natavá i na nuú nasañandu na nación Egipto.

Ta sahá ña coó najáxinu coo na tóco ndihí ña nasañnda i nu ná caja na sahá ña cán quéa nayándacoo i na.

<sup>10</sup>Ta vaxi quiví tá quiahva i tuhun saá nuú ñayivi Israel.

Ta caja i ña ná candaa v̄aha ini na ley mí i ta cañuhu a ini ínimá ná ña ná caja na ña cúní mí i.

Ta yehe cacuu Ndióxi caja cahnu na, ta mé ná cán cacuu ñayivi cacomí i cuénta saha.

<sup>11</sup>Ta a cúní ñúlhú ga na jánahá ñani táhan mé ña ná candaa ini na sahá Ndióxi, jáchi tóco ndihí ñayivi andá na valí andá na sáhnu candaa ini na yo cuú yehe.

<sup>12</sup>Ta caja cahnu ini i sahá ndaja táhan ña nuú nacaja na, ta a ndicuhun ga ini i sahá cuachi na, cächí Ndióxi.

<sup>13</sup>Tá nacahan Ndióxi sahá tuhun saá ña quiahva mé á nuú ñayivi já quéa náha ña coó chuun ga mé tuhun nasañan nu ná jihna ta cama chá ndihí sahá.

## 9

*Veñuhu ñuyíví xihín veñuhu indíví*

<sup>1</sup>Tá nasañan Ndióxi tuhun a nuú na Israel sañahá ndivaha já nasañnda chuun sahá ndaja caja cahnu na mé á ini veñuhu ña cavaña na ñuyíví yóho. <sup>2</sup>Ta ndácaan ivi cuarto ini mé veñuhu cán. Ta ña ndácaan ini cuarto nu cuítí cuú in candelero xihín in mesa nu cándójó pan yií. Ta mé cuarto nu cuítí yóho naní a in nuú yií. <sup>3</sup>Ta fin in jahmá ndee ña ndájí nuú táhan tañu ndíví cuarto yóho. Ta cuarto ndácaan maá naní a nuú yií ndivaha. <sup>4</sup>Ta mé cán fin in nu ná ña nacavaha xihín jiuhun cuáán nu chínismá jutu jusa v̄aha. Ta jári cán fin sato arca ñaha Ndióxi ta tóco ndihí jata mé sato arca nandicuhun xihín jiuhun cuáán. Ta chí ini sato cán ndácaan in tindógo jiuhun cuáán nu ñúhu maná ña naxixi na Israel tá naxica nuu na yucú íchí cán. Ta jári ndácaan mé

yító ñaha Aarón, dó nasaan núma sañahá. Ta chí ini arca cán ndácaan ri ivi yuu jáhndá nu ndáa ley nasañan Ndióxi nuú Moisés.

<sup>5</sup>Ta jini mé sato arca cán ndíndójó ña cuú yuhú nuú tátó Ndióxi naní a querubines. Cándójó a cán ña ná ndicuhun ini ñayivi ña fin Ndióxi cán caja cahnu ini a sahá cuachi na. Ta mé tátó Ndióxi cán ndícaan ndixi a cándójó a jata arca. Joo a cuú ndicani chágá yo sahá ña yóho viti.

<sup>6</sup>Já nasañjin tiähva tóco ndihí ñaha veñuhu. Ta ndijáa ní quiví nandihvi jutu cuarto nu cuítí cán caja ndíví ña ñaha caja cahnu na Ndióxi. <sup>7</sup>Joo in tañu tá nu cuía in tihún da cuú jutu sacuña ñaquihvi da cuarto maá cán. Ta ñéhe da nii quíti ña joco da nu Ndióxi sahá cuachi mé dá xihín sahá cuachi ñayivi. <sup>8</sup>Ta xihín ña yóho jánahá ínimá yií Ndióxi nu yo ña a cuú ndihvi ndá ñayivi nacuu cuarto maá nuú yií ndivaha jachí sa fin va cuarto nu cuítí. <sup>9</sup>Ta tóco ndihí ña yóho cuú á tátuhun yuhú nuú nuú ña fin tiempo viti. Ta sa xiní yo ña a cuú ndaja vií ñayivi ínimá ná xihín ña joco na nu Ndióxi tá sáhní na quíti ña quiahva na nii rí nu mé á. <sup>10</sup>Jáchi tóco ndihí ña nacaja na cán nasañcuu a cuénta ña sáxi ná xihín ña xihí na ta nasañcuu a cuénta ndaja nandaja vií ná mé ná xihín ticuií. Joo já nanditahan caja na janda quiahva tanda quivi ndijama Ndióxi tóco ndihí ñaha jáchi a cuú ndaja vií ná ínimá ná xihín ña yóho.

<sup>11</sup>Ta ndaja coo naquixi Jesucristo ñuyíví yóho ta nanduu a jutu, da sacuña chágá nu yo. Naquixa e ña ná quiahva mé á ña v̄aha Ndióxi nu yo. Joo viti fin a indíví caja chúun a tátuhun jutu veñuhu ña v̄aha chágá cán. Cuú á veñuhu ña coó nacavaha ñayivi ta co cuú á ñaha ñuyíví. <sup>12</sup>In tañu cuítí va nandihvi a nuú yií ndivaha ta coó nasañhe a ní tijúhu ni nii chélo ña joco a nu Ndióxi. <sup>13</sup>Nii mé á cuú dó naxita ndica crúxu sahá yo ña ná caca ndaa ínimá yo andá ama cása quivi. <sup>14</sup>Jihna nacaja ñayivi ña nacachi ley Moisés ta nu yiquí cuñu na naxihnu ndaa jutu ní tindiquí á ní tijúhu ta naxihnu ndaa ri da ná xihín yaa chélo, rí nasañmi na nu ná. Ta xihín ña yóho nandiví yiquí cuñu na nu Ndióxi. <sup>15</sup>Joo ndiyahvi chágá nii Jesucristo a juú ga nii quíti. Jáchi tá naxihí Jesucristo já nandiví ínimá yo já ná a caja ga yo ña co ndiyahvi cán ta ná caja í tóco ndihí ña cúní Ndióxi.

Nacaja íníma yii Ndióxi, mé a tácú a anda ama cáá quiví ña ná ndiquiahva Jesucristo mé á ndáha Ndióxi já naxihí a ndíca crúxu sahá cuachi vatí coó toho cuachi mé á.

<sup>15</sup>Ta sahá tūhun saá nasaħan Ndióxi nu yo sahá ña cán quéa cahán Jesucristo xoo mí nu Ndióxi. Ta sahá ña nacaja Jesucristo tá naxihí a ndíca crúxu caja cahnu ini Ndióxi sahá cuachi nacaja í tá nasañdico yó ley Moisés. Ta nandacaxi Ndióxi ñayivi, na cúní candusa mé á já ná ndiquehe na ña vaha Ndióxi ña a ndíhi toho sahá Jáchí já cáá tūhun nasaħan Ndióxi nu ná. <sup>16</sup>Cúu á tátuhun tá cávaha in dataa tutu cuénta ña ñehe tálhví ná candoo ñaha nu ná. Joo xíní ñúhú candaq ini na ña mé a ndaa naxihí da jándacoo ñaha cán anda jáví ndíyahvi mé tutu cán. <sup>17</sup>Jáchí nani tácú da co ndíyahvi toho tutu nacavaha da sahá ñaha ndicoo tálhví da. Janda quiāhva ná quiví da já ndíyahvi a. <sup>18</sup>Ña cán quéa tá nu cuítí nasaħan Ndióxi tūhun a nyú ñayivi nacaja mé á ña ná quiví quíti ta xihín nii rí cán nandoo cuachi ñayivi. <sup>19</sup>Jáchí tá nandihí nacahan Moisés ley nasaħan Ndióxi nuú ñayivi Israel já natin da in yíto, dó namí hisopo ta nacató da loho cachí cuahá nu do. Ta nachindaxi da dó cán xihín nii chélo xihín níj tijúhu, dó nacava táchan xihín ticiúi. Ta naxihnu ndaa da do nu libro nu ndáa ley Moisés. Ta naxihnu ndaa da dó nuú ñayivi Israel. <sup>20</sup>Anda já nacachi da já xihín na Israel: "Xihín nii quíti yóho jáxinu coo Ndióxi tūhun a ña nasaħħandu nu ndó caja ndó", nacachi Moisés. <sup>21</sup>Ta quiāhva já naxihnu ndaa Moisés nii quíti nyú veñihu níj quíti xihin nuú tóċo ndíhi ñaha ñúħu cán ña caja chūn na caja cahnu na Ndióxi. <sup>22</sup>Jáchí cachí ley Moisés ña xihín nii cuití va ndivíi ndaja táchan ñaha, vatí a juú ndihi a. Ta janda quiāhva ná cuítia nii já cuu caja cahnu ini Ndióxi sahá cuachi ñayivi.

#### *Nandoo cuachi xihín nii Jesucristo*

<sup>23</sup>Sahá ña cán quéa nanditahan nu Moisés ndaja víi dà ñaha veñihu ñuyíví yóho xihín nii quíti. Ta mé ñaha cán cútia á yuhú nuu ña fin indívi. Joo ñaha fin indívi ndivíi a xihín nii, dó vaha chágħa a juú ga nii quíti. <sup>24</sup>Ta veñihu ñuyíví cútia á yuhú nuu cuití va ña fin indívi. Coq nandihvi Jesucristo nyú yii ndivāha veñihu, ña nacavaha ñayivi. Joo nandihvi mé á indívi ta cán fin a viti ta cahán mé á xoo mí nu Ndióxi. <sup>25</sup>Jáchí dà cuú jutu sacuħha nandihvi da tá nu cuítia

nuú yii ndivāha veñihu joco dà nii quíti nu Ndióxi. Joo ña nacaja Jesucristo quéa nandiquiahva a mé á quiví a sahá yo ta in taħu cuití va naxixa nii a ndíca crúxu.

<sup>26</sup>Jáchí tá ná nditahan nuú Jesucristo quiví a cuahá taħu já quéa jandà mé sahá tá nacava sahá sahá ñuyíví casáħha quiví a, nduu. Joo a juú a já Jáchí tá jalóħu cúní ndihi sahá tiempo viti já nacasa Jesucristo ñuyíví yóho ta in taħu cuití va naxihí a sahá cuachi ñayivi. <sup>27</sup>Quiāhva já yáħa xihín ñayivi Jáchí in tħallax taħu quiví na ta andà jáví nditahan candichi na nu Ndióxi caja víi mé a sahá ña nacaja na tá nasaħduu na ñuyíví yóho. <sup>28</sup>Ta quiāhva já in taħu cuití va naxihí Jesucristo ndíca crúxu jándoo a cuachi cuahá ñayivi. Ta tanda quívi quixi tucu mé á ñuyíví yóho joo a quívi ga ña Jáchí quixi a ndiquehe a ná ndáti tħahva cuhun coo xihín mé á indívi.

## 10

<sup>1</sup>Ta mé ley nacahyí Moisés yóho nasaċuu a tátuhun in candahví mé ña ndaa ña coo chágħa chínny. Nasacuu a yuhú nuu uun ña vaha ña vaxi nu yo. Jáchí mé ley yóho coó nacuu caja ndaja víi a íníma ñayivi vatí ná cayati na nu Ndióxi tá nu cuia sá sáħni ná quíti joco na nu Ndióxi. <sup>2</sup>Jáchí tá ná cuu ndivíi íníma ná sahá ña caja na ña cachí ley Moisés já quéa in taħu cuití va jóco na nii quíti nu Ndióxi, nduu. Ta xihín ña yóho ndoo cuachi na ta a ndícani ga ini na sahá cuachi na, nduu. <sup>3</sup>Joo tá nu cuia tá sá sáħni na quíti jóco na nii rí nu Ndióxi já quéa ndicuhun ini na ña cómī na cuachi nu Ndióxi. <sup>4</sup>Jáchí a cuú jándoo na cuachi na xihín nii tħidiqui á xihín níj tijúhu.

<sup>5</sup>Ña cán quéa tá jalóħu cúní casaa Jesucristo ñuyíví yóho já nacachi a já xihín Ndióxi, tátá a:

Có cúní ndó ña ná cahni ñayivi quíti joco na rí nu ndo ta ni co cúní ndo ña ná joco na java ga ñaha nu ndo.

Sahá ña cán quéa nasaħħan ndó in yiquí cuñu nuu i já ná ndiquiahva i ña nu ndo.

<sup>6</sup>Có cajji ini ndó tá ná cahmi na quíti nu ná joco na rí nu ndo. Ta ni co tħahni ini ndó tá ná joco na java ga ñaha nu ndo ña ná jándoo na cuachi na.

<sup>7</sup>Sahá ña cán quéa já nacachi i já xihín ndo:

<sup>“Tátá Ndióxi, yóho fin i ta fin tiahva vi caja i ndá ña nacuu cúni ndo.</sup>

<sup>Jáchi quiahva já ndáa ini tihun mé ndó sahá i”, nacachi Jesucristo.</sup>

<sup>8 Nu cuítí nacachi Jesucristo ña co cúni Ndióxi ña ná cahni ñayivi quítí quiahva na nii rí nu á. Ta ni co tähán ini a ták ná cahmi na quítí nu náa ña nándiví ínima ná. Ta nacachi a ña yóho vatí sáhndá ley Moisés caja ñayivi já. <sup>9</sup>Joo tá nandihi nacachi Jesucristo já xihín Ndióxi: “Yóho fin i ta fin tiahva vi caja i ndá ña nacuu cúni ndo”, nacachi a. Ña cán quéa nasacu xoo Ndióxi ña nacaja na jihna ta viti ndíquehe vaha mé á ñayivi sahá ña naxihí Jesucristo ndíca crúxu. <sup>10</sup>Nacaja Jesucristo ña nasacu ini Ndióxi caja sahá ña cán quéa nacandoo víi uun tóco ndihí mí jáchi in táláa tañu nandiquiahva Jesucristo yíquí cuñu a tá naxihí a sahá cuachí.</sup>

<sup>11</sup>Jihna ga ña nacaja ndihí jutu cúu á ña nini quívi sándita da nu náa joco da quítí nu Ndióxi. Ta vatí cuahá tañu sá caja da já joo a cuú járdoo da cuachi ñayivi xihín ña yóho. <sup>12</sup>Joo in tañu cuítí va naxihí Jesucristo sahá cuachi tóco ndihí ñayivi já ná cuu cazu ndaa ínima ná andá ama cása quívi. Anda jáví násacpo a xoo cuáha Ndióxi, tátá a indíví. <sup>13</sup>Ta cán fin coo a viti cándati a janda quiahva ná cacu Ndióxi ña cándají mé á tixi sahá. <sup>14</sup>Jáchi in táláa tañu naxihí Jesucristo ndíca crúxu ta xihín ña yóho nandaja víi a ínima ñayivi, ña nacaxí mé á. <sup>15</sup>Ta sa xíni yo ña cuú ña yóho ña ndaa jáchi já cächí ínima yii Ndióxi já:

<sup>16</sup>Vaxi quiyí tá quiahva i tihun saá nuú ñayivi Israel ta quiahva joco coo a. Caja i ña ná cándaa vaha ini na ley mí i caja i ña cañuhu a ini ínima ná.

<sup>17</sup>Ta já cächí tucu a já:

Caja cahnu ini i sahá ndaja táchan ña níu nacaja na ta a ndícuñun ga ini i sahá cuachi na, cächí tihun Ndióxi.

<sup>18</sup>Ta sahá ña nacaja cahnu ini Ndióxi sahá cuachi ñayivi sahá ña cán quéa co xíni ñúhú ga cahni ña quítí ña joco ña rí nu mé á sahá cuachi na.

### Xíni ñúhú cayatí nu Ndióxi

<sup>19</sup>Candehé ndo, ñani i, na cuú cuénta Jesús. A cayihví toho i viti ndíhví nu fin Ndióxi, mé nuú yii ndívaha jáchi naxihí Jesucristo sahá cuachí. <sup>20</sup>Ta tá nandiquiahva mé á yíquí cuñu a já naxihí a ta xihín ña yóho násuná a íchi saá já ná cuu cayatí nu

fin mé á. <sup>21</sup>Ta mé Jesús cíuú á jutu sacuahá sahá yo nu Ndióxi jáchi cómí a cuénta sahá ndihí, ña cíuú cuénta mé á. <sup>22</sup>Ña cán quéa xíni ñúhú cayatí nu fin Ndióxi xihín ndinuhu iní jáchi cández iní mé á. Cíuú á tátuhun nandoo yíquí cuñu í tá naxihí Jesucristo ndíca crúxu. Ta viti co ndítahan ndicani iní sahá cuachi nacaja í jáchi nájandoo mé á cuachí. <sup>23</sup>A jándacoo í ña cández iní Ndióxi ta ná candati tiahva í janda ná yaha ña cächí mé á jáchi xíni vaha í ña jáxínu coo Ndióxi tihun násahan nu yo. <sup>24</sup>Ta ndítahan nu yo ndinducu yo ndaja caja í chindeé táchan í já ná quívi chágá iní ñani táchan í. Ta ndítahan caja chágá yó ña vaha. <sup>25</sup>Co ndítahan toho caja í tá quiahva caja java na cuú cuénta Jesús, na co cúni ndítaca xihín ndihí java ga na cuú cuénta Jesús. Ña ndítahan caja í quéa jácahan chágá táchan í ña ná taca í xihín java ga na cuú cuénta Jesús jáchi sa xíni yo ña vaxi quívi quixi tucu Jesucristo ñuyíví yóho.

<sup>26</sup>Tá sa cández vaha iní ña co ndítahan caja í cuachi ta chínee tucu mí cuahan í caja í cuachi vatí sa cández iní ña ndaa, a cuú ga ndoo cuachi nu Ndióxi. <sup>27</sup>Ta cayihví yo cández janda quiahva ndoho ndívaha iní caja Ndióxi. Jáchi jácana mé á ñayivi nu ñúhú cayí ita, mé nu ndihí sahá na ihví mé á. <sup>28</sup>Jáchi ndá ña Israel, na co cúni caja ña sahndá ley Moisés já quéa ndítahan quívi na tá ná cacu ivi á uní testigo sahá na nu juéxe. Ta ni in na a cándahví ini ñahá. <sup>29</sup>Joo ndaja ga ví ndítahan ndoho ini na quéhe níu Jesús, mé in túhún jini já jahyi Ndióxi. Jáchi cuú á tátuhun sáni nihni na a ta co sáhní toho na mé ná ña naxihí a jándoo a cuachi na tá quiahva násahan Ndióxi tihun a caja. Cánahá ña xihín ínima yii Ndióxi, mé a caja cuahá ñamani xoho. <sup>30</sup>Cández vaha iní yo cuú mé a nacachi ña yóho: “Yéhe jándoho i ini ñayivi, ña caja cuachi. Ta caja i ña ná chahví na sahá cuachi na”, cächí a. Ta já cächí tucu Ndióxi, xitoho i já: “Yéhe caja víi i sahá na cuú cuénta mí i”, cächí a. <sup>31</sup>Mé a ndaa ndádhí náhá nacuu tá ná tiin Ndióxi mí ña ná chahví sahá cuachi jáchi mé a cuú á Ndióxi, ña tacú indívi.

<sup>32</sup>Ndítahan ndícuñun ini ndó ña nayahta jácá nacandee iní ndó Jesús. Vatí nandoho ndívaha ini ndó nacaja java ñayivi joo násahan ndee iní ndó. <sup>33</sup>Java tañu násacu ndaa íchi ña ndohó nuú ñayivi ta

java tañu nacaja xíxi na xihín ndo ta java tañu nacatáhan ndó xihín java ga na tá nandoho ri ini na sahá Jesús. <sup>34</sup> Ta táchnda ini ndó sahá na cíú cuéntá Jesús níihu vecaa. Ta coó nacahán cuachí ndo ta janda cájii ini ndó vatí nacaja cuíhná na ñaha ndó jáchí cándaa vaha ini ndó ña cómí ndó ña vaha chágá indíví ta a ndíshi toho sahá ña cán. <sup>35</sup> Na cán quéa a jándacoo ndó ña cández ini ndó Jesús jáchí tandaas quiví quiahva cuahá Ndióxi ña vaha nu ndo tá cández ini ndó mé á. <sup>36</sup> Ndítahan nu ndó quiahva ndee ini ndó caja ndó ña cúní Ndióxi já quéa ndiquehe ndó ña vaha nasahán mé á tuhun a quiahva nu ndo. <sup>37</sup> Jáchí já cachí tuhun Ndióxi já: Jalóho cúní ta já quixi mé a ndítahan nuu quixi ta a cayáncá toho a.

<sup>38</sup> Joo ndá na cíú ñayivi ndaa nu mí i catacu na sahá ña cández ini na yehe.

Ta tá co cúní ga na cández ini na yehe ta já ndicó coo na caja na cuachi já quéa a cájii íní i xihín ná, já cachí Ndióxi.

<sup>39</sup> Joo a caja toho í tá quiahva cája java ñayivi jáchí co cúní na candeé ga ini na Jesús ta tandaas quiví cuhun na indayá. Joo mí cíú yó na cández iní Jesús ta tandaas quiví coo í nu íin mé á.

## 11

### Ndítahan nu yó candeé iní Ndióxi

<sup>1</sup> Tá ná candeé iní Ndióxi já quéa cúní catchi a ña sa xímí vaha í ña yaha tå yaha na ndáti yó yaha. Ta vatí co xímí yó ña ndáti joo cández iní ña já coo. <sup>2</sup> Jáchí sahá ña nacandeé iní tásahnu jícó yo Ndióxi sanahá ndivaha sahá ña cán quéa cájii ini Ndióxi xihín ná.

<sup>3</sup> Ta sahá ña cández iní Ndióxi sahá ña cán quéa cándaa vaha iní ña nacahán Ndióxi ta já nacavaha mé á ñuyíví xihín indíví. Jihna coó nasahíin ni in ñaha joo viti náha nuu ña nacavaha mé á.

<sup>4</sup> Ta sahá ña nacandeé iní da naní Abel Ndióxi sahá ña cán quéa natahan ini Ndióxi xihín ña nacaja da tå najocó da ñaha nu á. Ta coó natahan ini a xihín ña najocó da naní Caín, da cíú ñani Abel jáchí coó nacandeé iní Caín mé á. Sahá ña cán quéa nandiquehe Ndióxi ña najocó Abel nu a ta xihín ña yóho nanduu da dä ndaa nu á. Ta vatí naxihí Abel joo xihín ña nacaja da sanahá jánahá da nu yó ndaja ndítahan nu yó candeé iní Ndióxi.

<sup>5</sup> Ta sahá ña nacandeé iní da naní Enoc Ndióxi sahá ña cán quéa coó naxihí toho da. Joo nasañehe Ndióxi da indíví ta coó nacuu ndiñehé ñayivi mé dä jáchí nandaa da cuahan da indíví nacaja Ndióxi. Ta cachí tuhun Ndióxi já nacaja mé á jáchí táchán ini a xihín ña nacaja Enoc nani nasahíin da ñuyíví yóho. <sup>6</sup> Tá co cández iní Ndióxi já quéa co táchán ini Ndióxi xoho. Jáchí ndá na cúní cayati nu Ndióxi xíní níuhú cándusa na ña quiahva mé á ña vaha nuu ñayivi tá ndinducu na mé á.

<sup>7</sup> Ta sahá ña nacandeé iní da naní Noé Ndióxi sahá ña cán quéa nataa joho da tá nacaxi tuhun Ndióxi xihín dä ña ndoho ini ñayivi chágá chí nuu vatí coó nasanahá nu á. Nacandusa Noé Ndióxi ta chí nacasadá dä cávaha da in barco cähnu nuu cuu cazu ndaa mé dä xihín na vehe da. Ta sahá ña nacandeé iní da Ndióxi sahá ña cán quéa nanduu da taa ndaa nu mé á. Ta xihín ña nacaja da najácojo da cuachi jatá ñayivi ñuyíví jáchí náha caxí a ña coó nacandusa na caja na ña cachí Ndióxi.

<sup>8</sup> Ta sahá ña nacandeé iní da naní Abraham Ndióxi sahá ña cán quéa nacandusa da ña nacahán Ndióxi xihín dä. Ta chí naquee da nuu da ta cuahán dä in nündahyi, ña nasahán Ndióxi tuhun a quiahva nu dä. Najándacoo da nuu da vatí coó nasaxini dä ndaja naní mé ñuu nuu cuhun da. <sup>9</sup> Ta sahá ña cández iní Abraham Ndióxi sahá ña cán quéa naxinu coo da nündahyi ña nasahán Ndióxi tuhun a quiahva nu dä. Joo nandiñehé dä java ñayivi ndúu cán chí nasahíin da tá quiahva ndúu na tóho. Vehe tienda nasahíin da xihín na vehe da. Ta quiahva já nasahíin Isaac xihín Jacob jáchí nasahán Ndióxi tuhun a nu mé dä xihín nuu na vehe da. <sup>10</sup> Nacaja Abraham ña yóho jáchí ndáti da coo da in ñuu ña íin indíví, ña nacavaha Ndióxi nuu coo a andá ama cáá quivi.

<sup>11</sup> Ta jári nacandeé iní Sara, mé ñajíhlí Abraham Ndióxi sahá ña cán quéa nacaja Ndióxi ña nacuu quee jahyí ña vatí sa nacayatá ña. Ta tá nandihi já nacacu jahyí ña ta nascuu a sahá ña nacandeé iní ña jáxínu coo Ndióxi tuhun nasahán nu ña. <sup>12</sup> Sahá ña cán quéa vatí nacayatá ndivaha Abraham ta nacayati quiví quiví da joo nacacu jahyí da xihín ña ta nanduu da tásahnu jícó na Israel. Ta cuahá ndivaha na cíú chichi da

janda a cuú candahvi na. Cúú á tátuhun quimi ñá fin indiví á tátuhun ñutí yuhú tañuhú jáchi a cuú candahvi a.

<sup>13</sup> Tóco ndihí na naquixi chichi Abraham yóho vatí naxihi na joo nacandéé tá nacandéé ini na Ndióxi. Ta vatí coó naxini na ñá nasañan mé á tūhun a quiahva nu ná joo nasaçuu a tátuhun naxini na ñá. Jáchí nacandéé ini na ñá nacachi Ndióxi xihín ná ta nacají finí na. Ñá cán quéa nacachi na ñá ndúu tóo cuítí na ñuyíví yóho ta cúú ná tátuhun na tóho jáchi coó ñuu na ñuyíví yóho. <sup>14</sup> Cándaa iní ñá ndá na cachí já cúní cachei a ñá ndinducú na inga ñuu nyú canduu na. <sup>15</sup> Ta coó natahnda ini na sahá ñuu naquee na cán jáchi cuu ndicó coo na, nduu joo coó nacacumí na caja na ñá. <sup>16</sup> Joo ñá ndúcú na cúú in ñuu ñá vaha chágá, ñá fin indíví. Ta nacaja tiähva Ndióxi mé ñuu indíví nyú cuu coo na já quéa a cácahan nyú mé á cachei a ñá cúú ná cuénta mé á.

<sup>17</sup> Ta sahá ñá nacandéé ini Abraham Ndióxi sahá ñá cán quéa nasañin tiähva da cahní dä Isaac, jahyi da joco ñahá da nu Ndióxi tá naxito ndojó Ndióxi dä. Já nacaja Abraham vatí nasañin in túhún jiní jahyi da ta sa nasañan Ndióxi tyhun a nu Abraham <sup>18</sup> tá nacachi a já xihín dä: “Cacu jahyún, dä cananí Isaac ta xihín dä cán ndicuahá ndivaha chichún chágá chí nyú”, nacachi Ndióxi. <sup>19</sup> Sa nacandaa vaha ini Abraham ñá cuu caja Ndióxi ñá ná nditacu tucu Isaac tá sa naxihi dä. Ta vatí coó nasañin toho Abraham Isaac joo cúú á tátuhun naxihi dä ta nanditacu tucu da jáchi nasañin tiähva da cahní dä da sahá ñá nacandéé ini da Ndióxi.

<sup>20</sup> Ta sahá ñá nacandéé ini Isaac Ndióxi sahá ñá cán quéa nasañan dä tūhun da nu ndíví jahyi da, dä naní Jacob xihín da naní Esaú ñá caja cuahá Ndióxi ñamani xihín ndíví dä chágá chí nyú. <sup>21</sup> Ta sahá ñá nacandéé ini Jacob Ndióxi sahá ñá cán quéa tá jalóho cúní quiwi da já quéa nacachi da ñá caja cuahá Ndióxi ñamani xihín ivi jahyi ñání dä, dä cútí jahyi da naní José. Andá jáví nacaja cáhnu da Ndióxi nani tún ndaa da garrote da. <sup>22</sup> Ta sahá ñá nacandéé ini José Ndióxi sahá ñá cán quéa tá jalóho cúní quiwi da nacahan dä xihín na Israel sahá mé quiwi tá ná quee na nación Egipto cuhun na. Ta nasañan da chuun nu ná ñá ná cañehe na lasa yiquí cuñu mé dä cuhun ñá xihín ná.

<sup>23</sup> Ta sahá ñá nacandéé ini náná tátá Moisés Ndióxi sahá ñá cán quéa tá nandihi nacacu da já nachicaan jehé na dä tañu yuñi yoo. Náha ñá cúú dä in léé ñúchí ndivaha ta chí coó nayihví toho na tūhun nacahan rey cán tá nasañan da chuun ñá quiwi ndihí taválí jáca nacacu nuú na Israel. <sup>24</sup> Ta sahá ñá nacandéé ini Moisés Ndióxi sahá ñá cán quéa tá nasañan da najándacoo da vehe rey Egipto vatí najácuahnu ñá cúú jahyi jíhí rey cán dä tátuhun jahyi ñá. <sup>25</sup> Ta ñá nacaja da quéa nasañan dä nandoho ini da xihín na cúú cuénta Ndióxi. Jáchí co cúní dä cajíi ini da caja da cuahí vatí chá tiempo. <sup>26</sup> Ta nacahán dä ñá vaha chágá ná ndoho ini da sahá Jesucristo, mé a chindahá Ndióxi cacomí cuénta sahá ñayivi a juú ga ñá ná cacomí dä cuahá ñaha cuícá nación Egipto cán. Jáchí nacahvi ini da sahá ñamani caja Ndióxi xihín dä chágá chí nyú. <sup>27</sup> Ta sahá ñá nacandéé ini Moisés Ndióxi sahá ñá cán quéa najándacoo da nación Egipto ta coó nayihví dä ñá ná ndicuehe rey Egipto cán xihín dä. Ta nasañan ndeeé ini da jáchi naxica da tátuhun in da xíca xihín Ndióxi vatí coó naxini da mé á.

<sup>28</sup> Ta sahá ñá nacandéé ini Moisés Ndióxi sahá ñá cán quéa nasañan da chuun ñá ná caja na Israel vícò pascua. Nasahnda da chuun ñá ná cahní ná ndicachi ta já cuihna ndaa na nii rí yuyéhé vehe na Israel ñá ná a quiwi jahyi ta ná, da nacacu nu cuítí tá ná yaha tátó Ndióxi, mé a caja ñá ná quiwi ñayivi. <sup>29</sup> Ta sahá ñá nacandéé ini na Israel Ndióxi sahá ñá cán quéa nayaña na mahñú ndaa tañuhú naní tañuhú cuáhá. Nasacuu a tátuhun xíca na nu ñundáhyi chí uun. Joo tá nacasañá ná Egipto yáha na mé tañuhú cán já quéa coó nacuu caja na ñá. Nacandaa na ini ticuú ta já naxihi ndihí na.

<sup>30</sup> Ta sahá ñá nacandéé ini na Israel Ndióxi sahá ñá cán quéa nacava nuu na ñuu Jericó tañu usa quiwi ta já nacuyu ndihí námá ñuu cán. <sup>31</sup> Ta sahá ñá nacandéé ini ñá xíca jíi naní Rahab cán Ndióxi sahá ñá cán quéa coó naxihi ñá xihín ndihí ñayivi ñuu Jericó, ná coó nacandusa Ndióxi. Najácacu Ndióxi Rahab cán jáchi sa nandiquehe vaha ñá java taa Israel tåa nacasaña dä nu cuítí sándezhe dä ñuu cán.

<sup>32</sup> Ndá chágá cahan i xihín ndo. Sa nacahan cuahá i xihín ndo joo cámäni cahan i sahá dä naní Gedeón xihín dä naní Barac xihín dä naní Sansón xihín dä naní Jefté

xihín dà naní David xihín dà naní Samuel xihín java gá ná nasacuu profeta.<sup>33</sup> Sahá ña nacandeé ini na cán Ndióxi sahá ña cán quéa naquee vaha na tá nacani táhan na xihín java nación ta násacomí vaha na cuénta sahá ñayivi ta nandiquehe na ña vaha násahan Ndióxi tuhun a quiavha nu ná. Java na náchicají na yúhu león.<sup>34</sup> Ta java na nandahva na ñúhú cayí ña ná a cayí toho na. Ta java na nácacu na ndahá ñayivi, na nácacuñi cahní ñahá xihín machiti. Ta java na vatí vitá ini na joo nandihvi ndée ná. Ta java na naquee vaha na tá nacani táhan na xihín na ihví na.<sup>35</sup> Ta java naijílí nacandeé ini na Ndióxi ta sahá ña cán quéa naxini na ña nanditacu tucu na vehe na nacaja Ndióxi.

Joo java na nandoho ndivaha ini na janda quiavha naxihí ña. Ta coó nacandusa na cacu xoo na Ndióxi jáchi nacandaa vaha ini na ña cuhun na coo na in ñuu vaha chágá nu íin mé á.<sup>36</sup> Java na nandoho ini na tá násacu ndaa jchí ñahá na ta nacani ñahá ña. Ta java na násandíco na xihín cadena ta náchicaján na ná vecaá.<sup>37</sup> Ta java na naxihí ña jáchi nacuun ñayivi yuu ná ta java na naxihí na tá násahnda túhun ñahá ña. Ta java na naxito ndojó ñayivi na ña ná caja na cuachi. Ta java na naxihí xihín machiti. Ta java na násandíxi na xihín nií ndicachi xihín nií tijíhu cuití va jáchi coó toho jiuhún ña. Nacaja xixí ñayivi xihín ná ta najándo no na ini na.<sup>38</sup> Naxixa ndáhví na nu íchí ndivaha ta naxica nuu na yucú ñúhú ta násanduu na tixi cáva xihín yávú nu ñúhú. Mé a ndaa cùú ná ñayivi vaha ndivaha ta co ndítahan nu ná ndoho ini na ñuyíví yóho.<sup>39</sup> Ta cajíi ini Ndióxi xihín tócó ndihí na cán jáchi nacandeé ini na mé á. Joo cámpaní ndiquehe na ña násahan mé á tuhun a quiavha nu ná.<sup>40</sup> Jáchi cúní Ndióxi ña ná candati na cán anda tanda quívi ndiquehe tócó ndihí ña vaha chágá quiavha Ndióxi nu yo.

## 12

Ná candeé iní Jesús cuití va

<sup>1</sup> Mé ñayivi cuaha cán naquee vaha na jáchi nacandeé ini na Ndióxi. Ta jánaha ña nu yo ndaja caja í ña ná quiavha ndee iní tá ná ndoho iní. Ña cán quéa ná jándacoo í tóco ndihí cuachi caja í, ña tíin tuun mí. Ta ná jácaxoo í tóco ndihí ña sájí nuu nu yo caja í ña cúní Ndióxi. Ta ná candíco yo

íchi Ndióxi xihín ndinuhu iní tá quiavha ndítahan caja í.<sup>2</sup> Ta ná candehé caxí yo nuu Jesús jáchi mé á cán caja ña ná casahá candeé iní Ndióxi ta caja ña ná candeé iní mé á anda tanda quívi quívi. Nandoho iní Jesús tá naxihí a ndica críxú ta coó nácacahan nuu á vatí cácahan nuu ñayivi quívi na quiavha já. Jáchi nacandaa iní a ña tá ná ndihí ndoho iní a já tanda quívi cajíi ndivaha iní a. Ta viti íin coo a xoo cuáha Ndióxi indívi.

<sup>3</sup> Xíní ñúhú ndicuhun ini ndó ndaja nacaja Jesús jáchi a juú quiavha nandoho iní a ndahá ñayivi caja cuachi. Sahá ña cán quéa a jándacoo ndó ña candeé iní ndó Jesús ta a cárquítá ínima ndó tá ndóho iní ndó. <sup>4</sup> Jáchi cámpaní yíi va cahní ña caja cuachi ndohó sahá ña co xeén ndó caja ndó cuachi.

<sup>5</sup> A nándindójó ndó tuhun nácacan Ndióxi xihín ndó sahá ña cíú ndó jahyi mé á. Já cachi tuhun Ndióxi já:

Jahyi maní i, a quéhe nuu ndó Ndióxi tá jándoho a iní ndó ña ná ndacaca vaha ndó.

Ta a cáva ivi joho iní ndó tá jánani mé á ndohó.

<sup>6</sup> Jáchi já caja Ndióxi xihín na quívi iní a. Jándoho a iní na já ná jándacoo na ña núu ta já nduu na jahyi mé á, cachi tuhun Ndióxi.

<sup>7</sup> Quiavha ndee iní ndó tá caja Ndióxi ña ná ndoho iní ndó. Jáchi tá quiavha caja in da taa xihín jahyi da quiavha já caja mé á xihín ndó. Jáchi tóco ndihí dñataa jácaxáhan da jahyi da já ná ndacaca vaha da.<sup>8</sup> Ta tá co jándoho Ndióxi iní ndó já quéa co cùú ndó jahyi mé á. Cúú ndó tátuhun jahyi ndáhví na. Joo tá ná jándoho Ndióxi iní ndó já candaq iní ndó ña mé a ndaa cùú ndó jahyi mé á.<sup>9</sup> Tá násacuú na valí nacaja cahnu yó tátá yo vatí najácxáhan na mí. Joo íin chágá sahá caja cahnu í Ndióxi, tátá yo, mé a íin indívi vatí jándoho a iní mí jáchi xihín ña yóho cuu coo í xihín mé á anda ama caja quívi.<sup>10</sup> Tá valí yo najándacaca vaha tátá yo mí tá nájánani na mí jáchi já vaha xíní na vatí mé ñuyíví yóho cùú á nu ndíu tóo cuití ví. Joo tá jánani Ndióxi, tátá yo, mí cùú á ña vaha chágá jáchi xihín ña yóho ndaja yíi á mí tá quiavha íin yíi mé á.<sup>11</sup> Mé a ndaa co táchán iní tá jánani na mí jáchi cahívhi yo xihín á. Joo tá nandhi já coo vaha iní jáchi nacatíavha í ndaja caca vaha í sahá ña

nāndohó iní ta xihín nā yóho cacuú nñayivi  
nndaq nū mé á.

*Ndítahan nū yó tāa joho í nū cähān Ndióxi*

<sup>12</sup>Na cán quéa ndicuita ndó ta jándacoo  
ndó mé ndó. <sup>13</sup>Ta nondinducú ndó ichí ndacú  
já ná cuu chindeé ndó nñayivi, nā cáva ivi  
joho ini nā a ndíco coo na nñu cuachi.

<sup>14</sup>Xíní nñuhú ndinducú ndó ndaja caja ndó  
coo vaha ini ndó xihín tóco ndhi nñayivi.  
Jándacoo ndó cuachi cája ndó ta ndinuhi  
ini ndó caja ndó nā cúní Ndióxi já ná cuu  
coo ndó nū íín mé á. <sup>15</sup>Cuéntá coo ndó ná a  
jándacoo ni in ndó íchi cuéntá Ndióxi jáchi  
cúní a caja cuahá nñamani xihin ndo. Cuéntá  
coo ndó ná a cácuu ndó tátuhun in yucu ova  
nā játiví nā xixi na jáchi nā caja cuachi cája  
quini na ta játiví nā java ga na cíú cuéntá  
Ndióxi. <sup>16</sup>Coto a quíhvi nuu ndó coo ndó  
xihín in na cq cíú yíí ndó a nñájihí ndo. Coto  
a quéhe nūu ndó nñha Ndióxi tá quiahva  
nacaja Esaú. Jáchí in quívi cuíco ndivaha  
da ta nñajicó da tóco ndhi nñha ndítahan  
ndiquehe da nñ tátá da sahá nñ ná cuuxi  
da in cohó cuití va. <sup>17</sup>Joo cándaa iní nñ ná  
nandindaa nuu dá ndiquehe da nñha ndáha  
tátá da coó nacuu ndiquehe da ni in nñha.  
Jáchí nñajicó da nñ nūu nñani da sahá nñ ná  
cuxu da in cohó. Ta vatí nñasacu ndivaha da  
joo coó nacuu caja da ndijama da tuhun da  
nñ nñasahan da nñu nñani da.

<sup>18</sup>Ta mé ndó cqó nacayati ndó nū Ndióxi  
tá quiahva nacaja nā Israel sanahá. Mé  
nā cán nñataca na sahá in yúcu naní Sinaí  
xihín dā naní Moisés. Ta nacayi nñuhu  
cán ta nñaná ndivaha ta nñxicó ndivaha  
táchí nñxini na. <sup>19</sup>Ta nñxini joho na nñtivi  
trompeta ta nacahan Ndióxi xihín ná. A  
juú quiahva nayihví nñ ná nñxini joho na nñ  
cáhan Ndióxi chí nñxicá tñhví nñ nñ nñ  
a cähán ga xihín nñ. <sup>20</sup>Jáchí cqó nacandee  
ini na tñá joho na nñ sáhdá Ndióxi nñ ná  
tá nñacachi a já: “Tá nñ cani ndaa in nñayivi á  
in quíti yúcu Sinaí yóho já quéa xíní nñuhú  
cuu ndó yuú nñ ná á tuxú ndó na xihín poyá  
anda nñ quivi na”, cáchí Ndióxi. <sup>21</sup>Ta a juú  
quiahva nayihví nñ sahá nñ nñxini nñ cán.  
Ta anda Moisés viti nayihví ndivaha da ta  
já nñacachi da já: “Quíji nñnu i xihín nñ yihví  
i”, cáchí da.

<sup>22</sup>Joo nñ nacaya mé ndó quéa sa nacayati  
ndó in nñu naní Sión, mé nū íín Ndióxi, mé  
a tñcú indívi. Mé nñuu cán cíú á tátuhun  
inga Jerusalén, nñ íín indívi ta ndúu cuahá

mil tñtó Ndióxi cán. <sup>23</sup>Sa nñataca ndó cán  
caja cähnu ndó Ndióxi xihín tóco ndhi  
nñayivi, nñ mé a ndaa cíú jahyi Ndióxi, mé  
nñ ndáa quívi nñ libro Ndióxi indívi. Ta sa  
nacasaq ndó nñ Ndióxi, mé a caja vií saha  
tóco ndhi nñayivi. Ta nñataca ndó xihín tóco  
ndhi nñayivi, nñ sa naxihí sanahá, mé nñ sa  
nñduu ndaa nñ Ndióxi nñacaja mé á. <sup>24</sup>Ta  
sa nñacayati ndó nñu Jesús, mé a cähán xoo  
mí nñ Ndióxi. Jáchí sahá nñ nñacaja Jesús tá  
naxita nñi á ndíca crúxu sahá nñ cán quéa  
nñasahan Ndióxi tuhun a nñ yó nñ ná ndoo  
cuachi. Joo jín va nñacaja Ndióxi tá naxita  
nñi Abel sanahá ndivaha jáchi nñjándohó a  
ini nñani da, dñ nñaní Caín sahá nñ nñasahní  
nñhá da.

<sup>25</sup>Cuéntá coo ndó já ná a quéhe nñu ndó  
nñ cähán Ndióxi xihín yó. Jáchí nñayivi  
cán, nñ cqó nñxeen caja nñ nñcachí Ndióxi  
nñchahvi na sahá nñ nñu nñacaja na mé  
nñuyíví yóho. Ta já caja ri Ndióxi xihín mí  
tá nñ quehe nñu í tuhun mé a jáchi jñanda  
indívi íín mé a cähán xoho. <sup>26</sup>Mé tiempó cán  
nñjátaan Ndióxi nñuyíví yóho tá nñacahan mé  
á. Joo já cächí a já viti: “Vaxi quívi ta jñataan  
tuu í nñuyíví ta mé tiempó cán jáquiji nñu í  
indívi viti”, cáchí a. <sup>27</sup>Tá nñacachi Ndióxi nñ  
inga tuu jñataan mé a nñuyíví yóho já cándaa  
ini nñ ndhi sahá nñaha nñacavaha mé á. Ta  
tóco ndhi nñha, nñ a cíú quíji nñu, nñ cán  
coo a anda ama cña quívi. <sup>28</sup>Nñhe tñhví yo  
coo í nñu cacomí Ndióxi cuéntá sahá yó ta  
mé cán a cíú quíji nñu a. Sañá nñ nñ cán quéa  
nñ ndiquiahva í ndixahvi nñ Ndióxi ta nñ  
caja cähnu í mé a xihín ndinuhi iní jáchi  
cäßi ini mé a xihín nñ yóho. <sup>29</sup>Jáchí mé a  
ndaa Ndióxi cíú á tátuhun nñuhú nñ cayí nñ  
jñandihi sahá nñha. Nñ cán quéa caja mé á  
nñ nñ ndhi sahá tóco ndhi cuachi.

## 13

*Ná caja í nñ tñhví iní Ndióxi xihín*

<sup>1</sup>A jñandihi cuo ndó nñ quíhvi iní ndó nñ cíú  
cuéntá Jesús jáchi cíú nñ tátuhun nñani ndó  
a quiahva ndó. <sup>2</sup>A ndíndójó ndo ndiquehe  
vaha ndó nñ tóho tá nñ casaq nñ vehe ndó  
jáchí xihín nñ yóho java na nñandiquehe  
vaha na tñtó Ndióxi vatí cqó nñacandaa iní  
na nñ.

<sup>3</sup>A ndíndójó ndo sahá nñayivi nñuhú vecaa  
ta xíní nñuhú tñhvñda iní ndó xihín nñ jáchi  
xíní nñuhú cacuu a tátuhun ndácaan mé ndó  
vecaa xihín nñ. Ta a ndíndójó ndo sahá

ñayivi, na caja xíxi na xihin ta xíní ñúhú tähndá ini ndó xihin ná jáchi cuu ndoho ini ri ndóhó va tá quiáhva ndóhó ini na cán.

<sup>4</sup> Vaha va caja ndó tá tändahá ndó ta xíní ñúhú caja cáhnu ndó yí ndo á ñajíhí ndó. Ta a ndúcú toho ndó coo ndó xihin inga na jáchi jándoho Ndióxi ini ndá na quíhvi nuu coo xihin na co cuú yí na a ñajíhí na.

<sup>5</sup> A ndiáva ini ndó cacomí ndó cuahá juhún. Ndítahan cají ini ndó xihin ña cómí ndo jáchi já cachí Ndióxi já: “A jándacoo toho i ndohó ta ni a ndíndójó i sahá ndó”, cachí a. <sup>6</sup> Sahá ña cán quéa cuu candeé ini Ndióxi ta cuu cachí já:

Mé a cuú Ndióxi, xitoho i ta chíndeé a yehé. Ta a cayíhví toho i ndá ñaha ndúcú ñayivi caja na xihin i.

<sup>7</sup> A ndíndójó ndo sahá na násacomí cuéntá sahá ndo ta ni sahá na nácaxi tuhun tuhun Ndióxi nu ndo. Candeé ndó ndaja nácaja na ñuyíví yóho jáchi nácaandeé ini na Ndióxi anda quiáhva naxihí na. Ta ndítahan nu mé ndó candeé ini ndó a t quiahva nácaja na cán.

<sup>8</sup> Co ndíjama toho Jesucristo. Tá quiáhva násacu a sanahá ndivaha quiáhva já cuú ri a anda viti ta quiáhva já coo a anda ama cása quivi. <sup>9</sup> A quiáhva toho ndó ñamani nuú ñayivi ña ná jándahvi na ndohó xihin ña jánahá na nu ndo. Jáchi cuú á sahá ñamani caja Ndióxi xoho ña ndíndacú íníma yo. Ta co cuú á sahá ña jánahá java ñayivi tá cachí na ña a cuú cuuxú java ñaha ña ná nduu ndaq íníma yo. Mé a ndaa ña yóho co chíndeé a mí.

<sup>10</sup> Tá naxihí Jesucristo ndica crúxu já najoco a mé a nu Ndióxi sahá yo. Joo jíin va nácaja jutu cuéntá na Israel sanahá tá najoco na quíti nu Ndióxi. <sup>11</sup> Jáchi da cuú jutu sácuahá násanéhe da nii rí naxihí cán ini veñhu nuú yii ndivaha ta já najoco da dó nu Ndióxi sahá cuachi ñayivi. Joo natavá da yiquí cuuu rí jatá ñuu nu sáhmi na ri. <sup>12</sup> Ta quiáhva já naxihí Jesús jatá ñuu Jerusalén. Ta naxiña nii a ña ná jándoo a cuachi ñayivi. <sup>13</sup> Ña cán quéa cóho nuú Jesús. Cúu á tátuhun cuhun í jatá ñuu ta a cácahan nuú yó ndoho inf xihin mé á.

<sup>14</sup> Jáchi ñuyíví yóho coó toho ni en nuú cuu coo í anda ama cása quivi. Joo ndínducú yo inga ñuu nuú cuu coo í chágá chí nuu.

<sup>15</sup> Cóho caja cáhnu í Ndióxi níí tiempo ta chíndeé Jesús mí caja í ña. Ta ña yóho cuú á

tátuhun ña joco yo nu mé á sahá ña nácaja tá naxihí a ndica crúxu. Cóho caja cáhnu í mé á xihin yúhu yo jáchi cuú yó cuéntá mé á. <sup>16</sup> A ndíndójó ndo caja vaha ndó ta ná chindeé ndo ñani táhan ndó xihin ña cómí ndo. Jáchi ña yóho cuú á tátuhun ñaha joco ndo nu Ndióxi ta cají ini mé á xihin á.

<sup>17</sup> Candusa ndó na cómí cuéntá sahá ndo ta caja ndó ña cuni na. Jáchi nácajan Ndióxi chuu yóho nu ná. Ta tandaan quivi ndítahan ndicani na nu Ndióxi sahá ña nácaja na. Caja ndó ña cuni na já ná cají ini na ta ná a coo cuéhá ini na jáchi a cuú quee vaha ndó já.

<sup>18</sup> Caca tähví ndo nu Ndióxi sahá nde jáchi nandivií íníma nde ta cuni nde caja vaha nde níí tiempo. <sup>19</sup> Caja ndó ñamani caca tähví ndo sahá i ña ná quiáhva Ndióxi ñamani nuú i saa yachi i nu ndó coto nihni i ndohó.

### Xihin tuhun yóho ndihí carta yóho

<sup>20</sup> Ña cuni quéa ná quiáhva Ndióxi ña ná coo vaha iní. Mé a cán nájánditacu tucu a Jesucristo, mé a cuú xitoho í. Ta sahá ña nácaja Jesucristo tá naxiña nii a ndica crúxu sahá ña cán quéa nácaja Ndióxi tuhun a nu yo ta a ndihí toho sahá. Ta mé Jesús cómí a cuéntá sahá yo tá quiáhva in pastó cómí dä cuéntá sahá ndicachi jana dá. <sup>21</sup> Ta ná caja Ndióxi ña ná ndindacú íníma ndó já ná cuu caja ndó tóco ndihí ña cuni a. Ta sahá ña nácaja Jesucristo ná caja Ndióxi xihin yo ndá ña nácaju ña táhan ini mé á xihin. Ná caja cáhnu í Jesucristo anda ama cása quivi. Já ná coo.

<sup>22</sup> Xíca tähví i nu ndo ña ná coo cáhnu ini ndó xihin tuhun cáhan i xihin ndo, ñani i, na cuú cuéntá Jesús. Jáchi carta loho cuití va nácahyí i nu ndo já ná ndindacú íníma ndo. <sup>23</sup> Ta cáxi tuhun i xihin ndo sahá Timoteo, mé da nácajaa vecaa joo sa nájani dá viti. Tá ná casaa yachi da yóho já saa da xihin i coto nihni nde ndohó.

<sup>24</sup> Cáhan Ndióxi ndó xihin tóco ndihí na jánahá tuhun Ndióxi nuú ñayivi ta cahán Ndióxi ndó xihin tóco ndihí na cuú cuéntá Jesús. Tóco ndihí na cuú cuéntá Jesús, na ndúu nación Italia yóho chínchahá na Ndióxi coo ndó.

<sup>25</sup> Ná caja cuahá Ndióxi ñamani xihin tóco ndihí ndó. Já ná coo.

## Carta nacahyí Santiago nuú na cùú cuéntá Jesús

*Cáhan Ndióxi Santiago xihín na cùú cuéntá Jesús*

<sup>1</sup>Yehé cùú Santiago, da cája chúun cuéntá Ndióxi ta cája chúun i cuéntá Jesucristo, xitoho í. Chíndahá i Ndióxi coo na Israel, na cùú cuéntá Jesús, mé na nandicuítá nuu ndúu nií cùú ñuyíví.

*Ndaja caja í candaq iní ña cùní Ndióxi caja í*

<sup>2</sup>Cuni joho vaha ndó, ñani mí i, na cùú cuéntá Jesús. Ndítahan cájii ini ndó tá vaxi tá nuú ña ndóho ini ndó. <sup>3</sup>Jáchi sa xíni ndó ña tá ndóho ini ndó sahá ña cández ini ndó Jesucristo já quéa catiaghva chágaa ndó quiaghva ndee ini ndó sahá ña ndóho ini ndó. <sup>4</sup>Quiaghva ndee ini ndó tá ndóho ini ndó andá quiaghva ná xinu coo ña cùní Ndióxi já quéa cacuu ndó ñayivi ndaa nu mé á. Ta cuahnu vaha ndó xihín tühun a ta ni in ñaha a cámáni ga nu ndó.

<sup>5</sup>Tá co cández ini ndó ña cùní Ndióxi caja ndó já quéa xíni níuhú cacea tähví ndó nu mé á ta quiaghva mé á cuahá ña candaq ini ndó. <sup>6</sup>Jáchi co ndáhví cùu ini a quiaghva ña nuú ndihí ñayivi. <sup>7</sup>Joo tá xíca tähví ndó nu Ndióxi xíni níuhú candéé ini ndó mé á ta a cähvi ivi joho ini ndó jáchi mé na cähvi ivi joho ini, na cán cùú na tátuhun tañuhú tá ndácojo do cája tähchi. Ta co fin táji do jáchi xíca dó tá xoo yóho tá xoo cása cája tähchi. <sup>8</sup>Jáchi tá ná cahvi ivi joho ini na já quéa a cähán na ña quiaghva Ndióxi ñaha nu ná. <sup>9</sup>Mé na cähvi ivi joho ini co xíca ndaa na ta tu cu tu cu ndíjama na íchi nu xíca na.

<sup>10</sup>Ta ña cùú cuéntá Jesús tá cùú ná na ndáhví ndítahan cájii ini na jáchi na náhnu cùú ná nu Ndióxi. <sup>11</sup>Ta ña cuicá, na cùú cuéntá Jesús ndítahan cájii ini na jáchi co yáhvi toho jiyuhún na nu Ndióxi. Jáchi tá quiaghva ín itá yucu yachi íchi a ta ndicava ña quiaghva já yachi quivi na cuicá. <sup>12</sup>Jáchi tá naxinu coo candii ta nacahihní já quéa cama ndivaha íchi mé yucu ta ndicava ita nu á. Já ndihí va ña ñúchí ndáa jáchi nandihí sahá. Quiaghva já ndoho na cuicá jáchi jónáa va ndihí sahá ná ta jándicoo na ña cája na.

*Tá ndóho ndó tondóhó*

<sup>12</sup>Ndaja tähví nacuu na sáhan ndee ini tá ndóho ini na jáchi tá nandihí nasa han ndee ini na já quéa ñehe tähví ná coo na xihín Ndióxi anda ama cáa quivi. Jáchi nasa han Ndióxi tühun a nu yo ña tá cúní yo mé á já quéa coo í xihín á anda ama cáa quivi. <sup>13</sup>Tá ná ndicají ini ndó caja ndó ña nuú já quéa a cähán ndó ña xito ndojó Ndióxi ndohó. Jáchi a cùu caja Ndióxi ña nuú ta co cúní a ña ná caja ñayivi ña nuú. <sup>14</sup>Joo tá cája ndó ña nuú cùú á sahá ña xíca ini ndó caja ndó ña ta xihín ña yóho ndicava ndó nuú cuachi.

<sup>15</sup>Jáchi sahá ña nuú xíca ini ñayivi caja na sahá ña cán cásahá na cája na cuachi. Ta tá sa nandicuahá cuachi na já quéa cuhun na chahvi na sahá ña cája na ini indayá anda ama cáa quivi.

<sup>16</sup>Cúni ndivaha i ndohó, ñani mí i na cùú cuéntá Jesús. A jándahvi ndó mé ndó.

<sup>17</sup>Jáchi tóco ndihí ña vaha quíxi a ndiví nu fin Ndióxi ta mé á sahan ña vaha nu yo. Já ín va Ndióxi jáchi cája tá cája ña vaha cuití va. Ta co ndíjama toho Ndióxi. Ta mé Ndióxi, tátá yo nacavaha ña ndíyéhe fin indiví. Ta ndá tañu ndíjama táchan ña fin indiví joo Ndióxi co ndíjama toho a. <sup>18</sup>Jáchi cúní Ndióxi jácacu a mí sahá ña cándusa í tühun mé á ña cùú ña ndaa. Jáchi cúní Ndióxi ña ná cacuú na nu cuítí tañu tóco ndihí ñaha nacavaha mé á.

*Ndaja caja í ndiquehe vaha í tühun vaha cáhan sahá Jesús*

<sup>19</sup>A ndíndójó ndo ña cáhan i xihín ndo jáchi cúní ndivaha i ndohó, na cùú cuéntá Jesús. Ndítahan nu ndó cuni joho vaha ndó tá cáhan inga na xihín ndo. Ta a cámama ini ndó nducú ñehe ndó tühun ña cáhan inga na xihín ndo. Ta a cójo ini ndó xihín ná. <sup>20</sup>Jáchi tá xójo ini ndó xihín inga na já quéa cája ndó ña co cúní Ndióxi. <sup>21</sup>Ña cán quéa cacu xóo ndó ndihí ña nuú ta jándicoo ndó ndihí cuachi cája ndó jáchi ndúu cuahá na cája tá nuú cuachi tañu ndó. Joo xíní níuhú jánuu ndáhá ndó mé ndó nu Ndióxi ta ndiquehe vaha ndó tühun mé á ña nacahen na xihín ndo jáchi tá ná cándusa ndó ña já quéa jácacu Ndióxi ndohó.

<sup>22</sup>Xíní níuhú cándusa ndó caja ndó tühun Ndióxi jáchi co yáhvi toho a tá xíní joho uun va ndó ña. Ta xihín ña yóho jándahvi ndó mé ndó. <sup>23</sup>Ndá ña co cándusa caja ña cächí tühun Ndióxi cùú ná tátuhun in da sándehé nuú nuú yutátá. <sup>24</sup>Tá nandihí násandehé

dá nuu dá já quee da cuahan dá ta cama chá ndindójó dá ndaja cása nuu dá. <sup>25</sup> Joo mé ñayivi tá jácuaha na tuhun Ndióxi ta co ndíndójó na caja na ña cachí a já quéa caja yii Ndióxi tóco ndihí ña caja na jáchí ña ndaa cíu tuhun Ndióxi. Tá caja í ña sáhndá tuhun Ndióxi nu yo caja í já quéa co sáhndá ga cuachi chuun nu yo ta já ndinuhi iní caja í ña cúní Ndióxi.

<sup>26</sup>Cúu á tátuhun tá íin in dataa tañu ndó ta cahán da caja da ña cúní Ndióxi joo co ndáá dá yúhu dá tá cahán da sahá ñani táhan da já quéa jándahvi da mé va da ta co saha toho ña caja da nu Ndióxi jáchí co caja da ña cachí tuhun Ndióxi. <sup>27</sup>Jáchí tá mé a ndaa nandihvi in da íchí cuénta Jesús já cíu dá taa ndaa nu Ndióxi, tátá yo. Ta chíndee dá na cuáan ta chíndee dá na sánchó tá ndóho iní na. Ta cández iní da Ndióxi ta táchá da mé dá nuu cuachi jáchí co caja da ña nuu tá quiahva caja ñayivi ñuyiví.

## 2

### A caja ichí iní ndó xihín na ndahví

<sup>1</sup>Cuni joho vaha ndó, ñani mí i, na cíu cuénta Jesús. Mé ndó cández iní ndó Jesucristo, xitohó i, mé a cíu ña cahnu ndivaha. Ndítahan quíhvi iní ndó na ndahví tá quiahva quíhvi iní ndó na cuicá. <sup>2</sup> Ña ndítahan caja ndó cíu ña yóho: Tá ná taca ndó caja cahnu ndó Ndióxi ta vaxi in da cuicá ndihvi da nu táchá ndo ta ndíxi da jáhma vaha ndivaha ta ndácajan jéhe jiuhun cuáan nducu ndáha dá. Ta mé tañu já vaxi in da ndahví, da ndíxi jáhma nuu ña yata. <sup>3</sup>Ta ndíquehe vaha ndó mé dá cuicá ta cachí ndó xihín dá: "Silleta vaha coo ndó", cachí ndó xihín dá cuicá. Joo xihín dá ndahví cachí ndó já: "Candichi ndó jan á coo ndó nu ñihu yóho", cachí ndó xihín dá ndahví. <sup>4</sup>Tá caja ndó ña yóho já quéa caja ichí iní ndó xihín dá ndahví ta caja cahnu ndó da cuicá sahá jiuhún dá. Ta cahvi nuu iní ndó jáchí cahán ndó ña íin chágá sahá da cuicá a juu ga dá ndahví.

<sup>5</sup>Cúní ndivaha i ndohó, ñani i, na cíu cuénta Jesús. Ña cán quéa cúní ña ná candaan vaha iní ndó ña nacaxi Ndióxi na ndahví ndúu ñuyiví yóho ná cacuu na ná nahnu nu Ndióxi tá cández iní na mé a. Jáchi nasañan Ndióxi tuhun a nuu ndihí na cán ña ná cacúni na mé a já quéa ñéhe táhví ná cuhun na indív coo na xihín mé a anda ama cása quíhvi. <sup>6</sup>Joo mé ndó caja ichí iní ndó

xihín na ndahví. Á co ndícuhyun ini ndó ña mé na cuicá cíu ná na caja xíhín ndó ta ñihu na ndohó cuahan na nuu na jutixia chícaan na cuachi jata ndo. <sup>7</sup>Jáchí mé na cuicá cahán nuu na saha Jesucristo ta mé ndó cíu ndó cuénta mé á.

<sup>8</sup>Sáhndá tuhun Ndióxi chuun nu yo já cachí a já: "Tá quiahva quíhvi iní ndó mé ndó quiahva já ndítahan quíhvi iní ndó ñani táhan ndó", cachí tuhun Ndióxi. Tá ná caja ndó ña cachí a yóho já quéa caja vaha ndó jáchí ña yóho cíu á ley cahnu nu Ndióxi. <sup>9</sup>Joo caja ndó cuachi nu Ndióxi tá ndíquehe vaha chágá ndó na cuicá a juu ga na ndahví. Ta xihín ña yóho chícaan ley Moisés cuachi jata ndo. <sup>10</sup>Jáchí vatí nasacu vaha in ñayivi ndihí ley Moisés joo sahá in ñaha coó nacaja na sahá ña cán quéa ndóho na cuachi saha tóco ndihí ley. <sup>11</sup>Jáchí sa mé Ndióxi cachí a já: "A quíhvi nuu ndó xihín ñajíhlí ñani táhan ndó", ta já cachí tucu a já: "A cahni ndó ndii", cachí a. Ña cán quéa caja ndó cuachi nu Ndióxi tá sáhní ndó ñayivi vatí co quíhvi nuu ndó coo ndó xihín ñajíhlí ñani táhan ndó. <sup>12</sup>Ndítahan caja vaha cuití va ndó ta cahan ndaa cuití va ndó jáchí vaxi quíhvi caja víi Ndióxi sahá yó xihín ley mé á ña jácacu mí. <sup>13</sup>Tá co tálhndá iní ndó sahá ñayivi já quéa a tálhndá iní Ndióxi sahá ndó tá ná casaa quíhvi caja víi a sahá cuachi nacaja ndó. Joo tá náhndá iní ndó sahá ñayivi já quéa quee vaha ndó tá ná caja víi Ndióxi sahá ña nacaja ndó ñuyiví yóho.

Tá cández iní Ndióxi já caja í ña cúní mé á

<sup>14</sup>Cuni joho vaha ndó, ñani mí i, na cíu cuénta Jesús. Tá cachí ndó cández iní ndó Jesucristo joo co caja ndó ña vaha já quéa co yáhvi toho nu Ndióxi ña cández iní ndó mé á. Ta sahá ña yóho a cíu toho jácacu Ndióxi ndohó. <sup>15</sup>Cúu á tátuhun tá íin in na cíu cuénta Jesús ta cámáni jáhma candixi na ta cámáni ña cuxu na quíhvi víti. <sup>16</sup>Ta cachí ndó xihín na cán já: "Ná coo vahún ta ná candixi vahún ta ná cuxu vahún", cachí ndó xihín ná. Joo co sahan ndó jáhma candixi na ta ni ña cuxu na co sahan ndó nu ná ña cán quéa coó chuun cíu ña cahán ndó xihín ná. <sup>17</sup>Ña cán quéa tá cachí ndó cández iní ndó Jesucristo joo co cúní ndó caja ndó ña vaha, ña cúní Ndióxi caja ndó já quéa mé a uun cándusa ndó Jesucristo.

<sup>18</sup>Tá íin in da cíu cuénta Jesús ta co cúní da caja da ña cúní Ndióxi já quéa co jánahá

da nuú ñayivi ña mé a ndaa cández ini da Jesucristo. Tá íin inga da ta cája tá cája da ña cúní Ndióxi já quéa jánahá da nuú ñayivi ña mé a ndaa cández ini da Jesucristo.<sup>19</sup> Tá cándezua ndó ña íin in táláa cuití Ndióxi já quéa vaha cája ndó. Jári rí quini cándezusa rí ña íin in táláa cuití Ndióxi. Joo co cándezusa rí caja rí ña cúní Ndióxi ta yílhí ndivaha rí mé á janda quíji ninu rí.<sup>20</sup> Á nacantóntó jini ndo. Candehé vaha ndó. Tá cáchi ndo cández ini ndó Ndióxi joo co náhá ndó xihín ña cája ndó ña mé a ndaa cández ini ndó mé á já quéa coó sahá mé va ña cája ndó.<sup>21</sup> Á co ndícuhun ini ndó Abraham, tásáhnu jíco yo. Nandiquehe vaha Ndióxi Abraham sahá ña nacaja da ta cáchi Ndióxi ña cútú dá taa ndaa nuú mé á jáchí nacandúsa mé Abraham cahní da Isaac, jahyi da, ña joco ñahá da nuú mé á.<sup>22</sup> Candehé ndo. Tá nacandúsa Abraham joco da jahyi da nuú Ndióxi já nájánahá da nuú ndihí ñayivi ña cández ini da Ndióxi. Ta sahá ña nacaja da já naxíñu coo da cández cáhuu ini da Ndióxi.<sup>23</sup> Jatá ña nacaja Abraham naxíñu coo tühun Ndióxi tá cáchi a já: "Nacandee ini Abraham Ndióxi ña cán quéa nanduu da taa ndaa nuú mé á", cáchi tühun Ndióxi. Nacachi na sahá Abraham ña cútú dá da nandique táhan maní xihín Ndióxi.

<sup>24</sup> Ña cán quéa cández vaha iní ña nduu ndaa yo nuú Ndióxi sahá ña cández iní Ndióxi andá quiahva cándezusa í caja í ña cúní mé á.<sup>25</sup> Já nayaha xihín Rahab, mé ña naxica jii sanahá ndivaha. Nanduu ndaa ña nuú Ndióxi sahá ña nacaja ña xihín ñayivi Israel jáchí nandiquehe vaha ña java dataa nachindahá Josué ñuu Jericó. Ta nacandee ña da ña ná ndijama da íchi nuú cuhun da.<sup>26</sup> Ña cán quéa tá cáchi yo cándezusa í Ndióxi joo co cája í ña cúní mé á já quéa cútú yo tátuhun ñayivi sa naxíhi, ña sa cuahán iníma.

### 3

<sup>1</sup> Cuni joho vaha ndó, ñani mí i, ña cútú cuéntá Jesús. A ndúcú cuahá ndó cacuu ndó na jánahá tühun Ndióxi nuú ñayivi jáchí cández vaha iní ndó ña tá co jánahá ndó ña ndaa já quéa jándoho chágá Ndióxi ini ndó a juú ga java ga ñayivi.<sup>2</sup> Tóco ndihí cája cuahá yo cuachi. Joo ndá na cuu cahnda chuun nu yúhu ná ña ná a cahán quini a já quéa cuu cahnda na chuun nuú yíquí cuñu

na viti ña ná a cája na cuachi ta já xihín coo na cacuu na ñayivi ndaa nuú Ndióxi.<sup>3</sup> Á co ndícuhun ini ndó ndaja chícaan ná in freno yúhu cuáyí ña ná candaca na rí. Vatí loho ndivaha cútú mé freno joo cuu cañehe na rí nu cúní mé ná cuhun ná.<sup>4</sup> Candehé ndó in barco. Vatí cáhuu ndivaha cútú dó ta växi tachí indee ndivaha joo mé da ñéhe dó cuu candaca da do xihín in timon loho ta cuu cañehe da do cuhun dó nu cúní mé dá.<sup>5</sup> Tá quiahva sáhndá ná chuun nuú cuáyí xihín barco quiahva já cája í xihín yúhu yo. Vatí loho ndivaha cútú mé yúhu yo joo xihín mé yúhu yó cuu caja cáhuu í mé ví. Candehé ndo ndaja náhnu yúcu jáquihvi ñúhu in titó loho tá ndicava dó nu á ta chícaí yúcu andá quiahva ndihí sahá.<sup>6</sup> Tátuhun in ñuhú cayí cútú yúhu yo. Cútú á in ña núu ndivaha ndacan tañu yíquí cuñu í ta játiví ndihí a mí. Ta cútú á tátuhun ña sa mé indayá sáhan chágá ví a ñúhu nu á ña ná caja quini a ta jándhi a sahá yo.<sup>7</sup> Vatí ñayivi cández na sáhnu ná nu tóco ndihí quíti xihín laa xihín coo xihín quíti ñúhu tañuhú ta cútú sáhndá ná chuun nu rí.<sup>8</sup> Joo ni in ñayivi a cuú cáhuu nu yúhu na jáchí co sájí yo yúhu yo tá cahán quiní sahá ñayivi. Cútú á tá quiahva cája coo tá tífí ri ñayivi chícaan rí veneno rí ña já sáhní rí ná.<sup>9</sup> Xihín mé yúhu yo cuahá tañu cája cáhuu í Ndióxi ta sa xihín mé yúhu yo yóho cánahá yo xihín ñayivi, na nacavaha Ndióxi yuhú nuú mé á.<sup>10</sup> Ndá tañu cahán vaha í xihín yúhu yo ta java tañu quini cahán yo xihín mé yúhu yo. Candehé ndó, ñani mí i, ña cútú cuéntá Jesús. Co ndítahan toho caja í ña yóho.<sup>11</sup> Jáchí cútú á tátuhun in chícoho nu cána ticuií. A cuú cana ticuií viji xihín ticuií ova iní in chícoho.<sup>12</sup> Ta sa xíni vaha ndó, ñani mí i ña in titó ñuhú co sáhan dó aceituna jáchí cútú dó titó ñuhú va. Já in yucu uva co sáhan toho a titó ñuhú jáchí cútú á yucu mé uva va. Ña cán quéa sa xíni vaha ndó ña co ñuhú ticuií viji xihín ticuií ova iní in chícoho.

*Ndaja íin ná ndíchí jini cuéntá Ndióxi*

<sup>13</sup> Tá íin in taa ndichí, da tacu ini tañu ndó já quéa ndítahan caja vaha da ta xihín ña yóho jánahá da nuú ñayivi ña cútú dá taa ndichí. Tá co cája lända da sahá ña cája da já quéa jánahá da nuú ñayivi ña mé a ndaa cútú dá taa ndichí.<sup>14</sup> Tá ná ndicutú ndaa ini ndó xihín ña ihví ini ndó já quéa a cahán ndó cútú ndó ná ndichí. Ta tá ná

caja ndó ñaha sahá ña cúní ndó ndiñehe jícó ndo mé ndó já quéa a cáhán ndo ña cútú ndó na ndichí. Jáchí mé da ndichí co cája cáhnu da mé dá ta co cáhán túhún da jáchí mé a ndaqú dá taea ndichí.<sup>15</sup> Joo tá cája cáhnu da mé dá já quéa cándaa ini ndó ña co ndichí jinjí da nu Ndióxi jáchí tuhun cáhán da coó naquixa i indíví nu íin Ndióxi. Cáhán da tuhun ñayivi ñuyíví yóho va ta jinjí mé va da vaxí a. Ta tuhun cáhán da cútú á tuhun nút, ña quixi nuyú tiñahá sacuahá.<sup>16</sup> Jáchí nu ndíu na ihví ini mé cán ndíu na co cúní táhan ta sa mé cán cání táhan na ta cája na tóco ndihí nuú cuachi. <sup>17</sup> Joo na ndichí jinjí cáhán na tuhun quíxi indíví nu íin Ndióxi. Ndinuhu ña vaha cája na ta co xójo ini na xihín ñayivi. Cája cáhnu ini na sahá ñayivi. Co xixi ini na xihín ñayivi jáchí táhndá ini na sahá ná. Cája na ña vaha cuití va. Cáhán na ña ndaqú cuití va ta co jándahvi na ñayivi.<sup>18</sup> Vatí cúní ñayivi cání táhan na xihín na ndichí joo ndúcú na coo vaha ini na xihín ndihí ñayivi ta já cútú na ñayivi ndaa nu Ndióxi.

#### 4

*A cándicó toho ndó íchí cuénta ng ñuyíví*

<sup>1</sup> Ndávaha ri cání táhan ndó ta já quíhví ndó tondóhá tañu ñayivi. Cáni táhan ndó sahá ña ndicají ini ndó caja ndó cuahá nuú cuachi ña xíca ínima ndó. Ta cútú á tátuhun cání táhan ña vaha xihín ña nút ini ínima ndó <sup>2</sup> jáchí xíca ini ndó coo cuahá ñaha nu ndo joo a cuú ñehé ndó a. Ña cán quéa sáhní ndó ñayivi já ñehé ndó ña cúní ndo. Cáhíhví ini ndó tá xíní ndó ñaha inga na ta a cuú ñehé ndó a, ña cán quéa cání táhan ndó xihín ná. Joo co ñehé ndó ña cúní ndo jáchí co xíca tähví ndo nu Ndióxi sahá ñaha cámáñi nu ndo. <sup>3</sup> Tá xíca ndo ñaha nu Ndióxi ta co sáhan mé a ñaha nu ndo já quéa cándaa vaha ini ndó ña co íin vaha ínima ndó nu Ndióxi jáchí nasacu ini ndó caja ndó ña cúní mé cuití ndo. <sup>4</sup> Tá quiahva cája ñáñahá tá jándahvi ña yíí ña xihín inga dñataqá quiahva já cája ndó cuachi ña co táhan ini Ndióxi xihín. Á co cándaa ini ndó ña tá ná caja í tá quiahva cája ñayivi ñuyíví yóho já quéa nduu na co cúní táhan xihín Ndióxi. Ta a cuú ndique táhan máni yó xihín mé a tá ná caja í ña nút ñuyíví yóho.<sup>5</sup> Jáchí sa xíní vaha ndó ña fin sahá cáhán tuhun Ndióxi tá cachí a já: “Nächicaan

Ndióxi ínima yíi mé a ini in in í jáchí cúní ndivaha mé a mí ta chí tähví ndivaha ini a sahá yo.”<sup>6</sup> Joo cája Ndióxi cuahá ga ñamáñi xihín yo ta chíndeé a mí. Já cachí tuhun Ndióxi já: “Co táhan ini Ndióxi xihín ñayivi, na ndiñehe jícó mé. Joo chíndeé Ndióxi ñayivi vaha, mé na co ndiñehe jícó mé”, cachí tuhun Ndióxi.<sup>7</sup> Ndiquihava ndó mé ndó ndáhu Ndióxi ta chicají ndó ínima ndo nuú tiñahá sacuahá ná a cája ndó ña cúní ri. Anda jáví cunu rí cuhun ri.<sup>8</sup> Cayati ndó nu Ndióxi ta já cayati Ndióxi nu ndo. Jándicoo ndó cuachi cája ndó ta ndaja vii ndó ínima ndo ña ná candicó ndó in túhún íchí cuénta Jesús cuití va.<sup>9</sup> Cajuchú ini ndó ta ndahyi cóhó ndo sahá cuachi cája ndó. Ndjama ndó ña cájii ini ndó ta ná nduu a ña cacuéha ini ndó sahá cuachi ndó.<sup>10</sup> A ndiñehe jícó ndó mé ndó nu Ndióxi já quéa ndiñehe jícó Ndióxi ndohó.

*A cáhán nút ndó sahá inga na*

<sup>11</sup> Candehé ndo, ñani mí i, na cútú cuénta Jesús. A cáhán nút sahá táhan ndó ta a cándehé ndaa táhan ndó. Jáchí ndá da cáhán nút sahá inga na já cáhán nút da sahá ley Ndióxi ta sájí nuu da nu ley. Co ndítahan nu yo caji nuu í nu ley Ndióxi jáchí tá cája í já já quéa quéhe nút í ley Ndióxi ta sándezhe ndaa í ña. Ña ndítahan nu yo caja í quéa candusa í ña ta caja í ña.<sup>12</sup> Jáchí in túhún Ndióxi násahán ley nu yo. Ta mé Ndióxi cútú á juéxe cáhnu nuú ndihí ñayivi ta mé a cuu caja vii a sahá cuachí. Ndióxi cuití va cuu jácacu mí ta sa mé Ndióxi cuu chindahá mí indaya. Ña cán quéa co ndítahan nu yo candehé ndaa táhan í.

*Tá cáhán í sahá ña caja í itaan*

<sup>13</sup> Ndúu java na tañu ndó ta cachí na: “Viti á itaan cuhun tá cuhun nde in nütu cáhnu ta cán canduu nde in cuiá caja chíun nde ta ñehé cuahá nde jiuhún”, já cachí java na. Tá cáhán ndó já ndítahan cuni joho vaha ndó ña cáhán i xihín ndo.<sup>14</sup> Co xíní toho ndó ndó ndia ndoho ndó itaan. Co xíní toho ndó ndá quíví quíví ndó. Cútú ndó tátuhun in víco ña fin tólo hahua ta tá nandihu sa coó a.<sup>15</sup> Vaha chágá ná cachí ndó já: “Catacu nde quíví itaan tá cúní Ndióxi. Ta caja nde ña jan á ña yóho tá cúní Ndióxi”, já cachí ndó.<sup>16</sup> Joo cája cáhnu ndó mé ndó tá cachí ndó ña cándaa ini ndó ndia ndoho ndó quíví itaan.

Ta nuu ndivaha cája ndó tá cája cahnu ndó mé ndó.<sup>17</sup> Cuachi ndácaan nuu na tlahva caja na vaha ta co cája na ña.

## 5

*Cáhan Santiago nuu na cuicá*

<sup>1</sup> Cuni joho vaha ndó na cuicá. Ndítahan nu ndó ndahyi cóhó ndó ta tahná ini ndó jáchi vaxi quiví ndoho ini ndó. <sup>2</sup> Nacasáhá tayhi tóco ndihí ñaha najátaca ndó ta násaxi ndihí tiquijí jáhmá ndó. <sup>3</sup> Nacuju ndihí jiuhun cuáán xihín jiuhun cuxú ña najátaca ndó catacu vaha ndó quiví chágá chí nuu. Joo co yávvi ga viti jáchi vaxi quiví tá nahá ña nácajihnda ndivaha ndó xihín jiuhun ndó. Tá quiahva jándihí ñuhú cayí sahá tutu quiahva já ndihí sahá ndó tá chínúu ndó íníma ndó jatá jiuhún ndó. <sup>4</sup> Candehé ndó. Mé ndó coó nachahvi ndó mozo ndó ta nájácaja chúun ndó na nuu utu ndó. Ta viti sácu cóhó na ndáca na cuéntá nu ndó. Ta tá xíca tähví na nu ndó já quéa anda nu Ndióxi, mé á cahnu ndivaha, xínu coo ña cáhan na xihín ndó. <sup>5</sup> Mé ñuyíví yóho ndíu vaha ndó xihín ña cuicá ndó ta cája ndó ña xíca ini cuití va ndó. Xíxáhan vaha ndó ta viti nandaha ndó tátuhun tindiquí, rí najándaha chuun na cahni na. <sup>6</sup> Ta chícaan ndó cuachi jatá ñayivi ndaqa ta ndá tañu sahni ndó ñayivi vaha, mé na a cùu chíndeé mé.

*A cándati númi ndó quiví quixi tucu Jesucristo*

<sup>7</sup> Candehé ndó, ñani mí i, na cùu cuéntá Jesús. A ndíhi ini ndó ta cuéé coo ini ndó cándati ndó quiví quixi tucu Jesucristo, mé a cùu xitoho í. Tá quiahva ndáti in dataa jáquee da nuu utu da quiahva já ndítahan cándati Jesucristo ña quixi tucu a. Jáchi sa xini ndó ndaja cája in dataa tá ndáti da cuun vaha javi nuu tata ña nachihin da. Joo co ndáti númi dá ña ná jáquee da nu á. <sup>8</sup> Quiahva já ndítahan cuéé coo ini ndó cándati ndó quiví quixi tucu Jesucristo. Cacu ndacú ndó íníma ndó jáchi jalóho cùni ndindanda quiví quixi tucu Jesucristo. <sup>9</sup> Candehé ndó, ñani mí i. A cáhan cuachi nu tahan ndó ná a jándoho Ndióxi ini ndó. Ta viti jalóho cùni quixi Ndióxi, ña cùu juéxe cahnu caja víi a sahá cuachi ñayivi. <sup>10</sup> A co ndícuuhun ini ndó, ñani mí i. Sanahá ndivaha mé na profeta Ndióxi nácahan na tuhun Ndióxi nuu ñayivi. Tá

quiahva nácahan ndee ini na tá nandoho ini na quiahva já ndítahan nu mí quiahva ndee iní tá ná casaa quiví ndoho iní. <sup>11</sup> Ta jáchi tähví mé profeta ña cáji ini na viti jáchi nácahan ndee ini na tá nandoho ini na. Á coó náxini joho ndó sahá in da naní Job. Vatí nandoho ndivaha ini da joo nácahan ndee ini da tá nandoho ini da já quéa nácaja cuahá Ndióxi ñamani xihín dá. Xihín ña yóho cánda ña tähndá iní ña tähndá iní Ndióxi sahá ñayivi jáchi quíhví iní a na.

<sup>12</sup> Cuni joho vaha ndó, ñani mí i jáchi cahnu chágá tuhun yóho nuu ndihí tuhun. Co ndítahan tává ndó quiví indíví ni quiví ñuyíví ni quiví inga ñaha. Jáchi ndítahan cahan ndó ña ndaqa cuití va. Ta tá ndúcú ñehe ndó tuhun já cachí ndó já: "ajan", á tá coó já cachí ndó: "uhun." Já cuití va cache ndó ná a jándoho Ndióxi iní ndó.

<sup>13</sup> Tá fin in na ndóho ini tañu ndó, ndítahan nu ná caca tähví na nu Ndióxi sahá ña ndóho ini na. Tá fin in na cáji iní tañu ndó, ndítahan nu ná cata na nu Ndióxi já ná caja cahnu na mé á. <sup>14</sup> Tá fin in na quíhví tañu ndó já quéa ndítahan nu ná caca na ñamani nuu na sacuha veñuhu ña ná quixi na caca tähví na nu Ndióxi sahá ná. Ta ná cuyu na sití jiní na quíhví ña ná ndivaha na. <sup>15</sup> Ndítahan nu ndó candee iní ndó Ndióxi tá ná caca tähví ndó nu á sahá ña quíhví já quéa ndivaha na quíhví caja Ndióxi. Ta tá nácaja na cuachi já quéa caja cahnu ini Ndióxi sahá cuachi na. <sup>16</sup> Ña cán quéa ndítahan nu ndó nahma nu tahan ndó cuachi ndó. Ta ndítahan nu ndó caca tähví ndó nu Ndióxi sahá ndaja tahan ndó já quéa ndaja vaha Ndióxi ndohó tá quíhví ndó. Jáchi chíndeé Ndióxi ñayivi vaha tá xihín ndinuhu íníma ná xíca tähví na nu mé á. <sup>17</sup> Á co ndícuuhun ini ndó dà naní Elías, dà náscuu profeta sanahá. Náscuu da ñayivi tátuhun mí. Ta xihín ndinuhu iní da náxica tähví dà nu Ndióxi ña ná a cùu javi. Ña cán quéa tañu uní cuia java coó nácuun toho javi. <sup>18</sup> Ta tá nandhi cán náxica tähví tucu da nu Ndióxi ña ná casahá cuun tucu javi. Ña cán quéa nácasahá cùun tucu javi chí nánanana ndihí yucu cuui ñundahyi cán.

<sup>19</sup> Candehé vaha ndó, ñani mí i, na cùu cuéntá Jesús. Tá fin in na tañu ndó ta nájándicoo na íchi cuéntá ña ndaqa ta tá in ndó nájándicoo coo ndó na cán ña ná caca tucu na íchi cuéntá Jesús <sup>20</sup> já quéa nájácacu

ndó mé ná cán ñá ná a cúhun toho na  
indayá. Ta já caja cáhnu ini Ndióxí sahá  
cuahá cuachi nacaja na.

## Cártá nacahyí Pedro nu cuítí

*Cáhan Ndióxi Pedro xihín na cíú cuéntá Jesús*

<sup>1</sup> Yehe cíú Pedro ta cíú u in apóstol cuéntá Jesucristo. Ta chíndahá i Ndióxi coo ndó, na nacaxi mé á jáchí cíú ndó na tóho ñuu jan sahá ña nataxí ñayivi ndohó ñuu ndó. Ta viti nandicuítu nuu ndó ndúu ndó estado Ponto xihín estado Galacia xihín estado Capadocia xihín estado Asia xihín estado Bitinia. <sup>2</sup> Cíú ndó na nacaxi Ndióxi, tátá yo jáchí jandá sahá nasaucu ini mé á caja já xihín ndo. Ta xihín ínima yii mé á nandaja ndohó ña ná nduu ndó cuéntá mé á já ná caja ndó ña sáhndá a nu ndó caja ndó. Ta nacaxi a ndohó já ná ndivíí ndo xihín nii Jesucristo. Ná caja cuahá ndiváha Ndióxi ñamani xihín ndo ta ná caja mé á ña ná coo vaha ndiváha ini ndó.

### Jácacu Ndióxi ñayivi

<sup>3</sup> Ná caja cáhnu yó Ndióxi, mé á cíú tátá Jesucristo, xitoho i jáchí táchndá ndiváha ini mé á sahá yo ta nacaja ña tacú yó cuéntá mé á viti. Já nacaja jáchí nanditacu tucu Jesucristo ta mé a ndaa cándaa vaha iní ña jaxinu coo Ndióxi tuhun a násahan nu yo. <sup>4</sup> Ta nasaucu ini a quiahva cuahá ndiváha ña vaha iní indíví cán nu ndo. Mé ña vaha iní cán a cuý ndihi sahá ta ni co íchi a ta a cayatá toho ña. Ta nasaucu vaha Ndióxi mé ña vaha iní indíví cán andá tandaan quiví saa ndó cán. <sup>5</sup> Cándeé ini ndó Ndióxi sahá ña cán quéa xihín ndée mé á chindeé a ndohó nuu ña ihví vaxi nu ndo andá xinu coo quivi nu ndíhi. Jandá jáví cuni ndó ndá quiahva jácacu a ndohó.

<sup>6</sup> Ná cán quéa ndítahan nu ndó cajii ndiváha ini ndó viti vatí vaxi quivi ndoho ini ndó sahá tondohó quixi nu ndo. <sup>7</sup> Tá ná candeé cáhnu ini ndó Ndióxi cíú a tátuhun juhun cuáán. Ta tá quiahva caja in dataa tá jáyaha da juhun cuáán nu ñuhú cayí ña xito ndojo dä ña quiahva já caja ri Ndióxi coto ndojo a ndohó ña ná nahá ña mé a ndaa candeé cáhnu ini ndó mé á. Ta ndiyahvi chágá ña candeé ini ndó mé á a juú ga juhun cuáán, ña ndihi sahá. Ña cán quéa tá ná quixi tucu Jesucristo já cahán vaha mé á sahá ña nacaja ndó ta já ndaja cáhnu a ndohó jáchí nacandee ini ndó mé á.

<sup>8</sup> Quíhví ini ndó Jesucristo ta candeé ini ndó a vatí a ñáha cuni ndó a. Ná cán quéa nacáan ndó cajii ini ndó ta ña yóho cíú á ña cáhnu ndiváha nu mé á. Ta ni co ñéhe ndó tuhun ndá quiahva ndicani ndó ña yóho nuu ñayivi. <sup>9</sup> Cajii ini ndó jáchí cándaa ini ndó ña jácacu Ndióxi ndohó sahá ña candeé ini ndó mé á.

<sup>10</sup> Andá sanahá ndiváha najáyaha na profeta tuhun nacahan Ndióxi xihín ná nuu ñayivi. Ta cachí na ña vaxi quivi caja cuahá Ndióxi ñamani xihín ñayivi ña jácacu a na nuu cuachi na. Ta vatí najácuaha na tuhun mé á joo coó nacandaa ini na ndaja caja Ndióxi jácacu a ñayivi. <sup>11</sup> Ta ñuhu ínima yii Jesucristo ini ínima na profeta ta nacaja mé á ña ná cahyí na nuu tutu ña nacahan mé á xihín ná. Ta nacahyí na ña vaxi quivi ndoho ndiváha ini Jesucristo joo tá nandihí já ndicáhnu ndiváha mé á. Ta nanducú na cán cándaa ini na yo cacuu Jesucristo ta ndá tiempo cacu a. <sup>12</sup> Nacaja Ndióxi ña ná canda ini na profeta ña a yáha yachí toho ña nacahyí na nuu tutu jáchí cacuu a ña coo tiempo vaxi chí nuu. Jáchí sahá mé ndó nacahyí na ña nuu tutu ta java ñayivi sa nacaxi tuhun na mé tuhun vaha saha Jesucristo nu ndo. Ta nacindahá Ndióxi mé ínima yii mé á ña ná quixi a indíví ta nacindeé a na ña ná cahán na tuhun vaha saha Jesucristo nu ndó. Ta jandá mé tátó Ndióxi cíú na canda ini na ña yóho.

### Ndítahan nu yo caja í tá quiahva caja Ndióxi

<sup>13</sup> Ná cán quéa caja tiahva ndó xín túni ndo ña ná caja ndó ña cúní Ndióxi. Cahnu ndó xín túni ndo ta coo tiahva ndó candati ndó ná jaxinu coo Ndióxi tuhun a ña caja cuahá mé á ñamani xihín ndo tá ná xinu quivi quixi tucu Jesucristo. <sup>14</sup> A cíuu ndó ñayivi saá ini jáchí cíú ndó jahyi Ndióxi. Co ndítahan gá caja ndó ña ná nacixa ini ndó caja ndó tá cámání canda ini ndó tuhun Ndióxi. <sup>15</sup> Ña ndítahan caja ndó quéa caja ndó ña cúní Ndióxi xihín ndinuhu ini ndó já ná cacuu ndó ñayivi yii. Jáchí Ndióxi, mé á nacaxi ndohó cíú á ña yii. <sup>16</sup> Jáchí já cachí tuhun Ndióxi: “Ndítahan cacuu ndó ñayivi yii jáchí yehe cíú u Ndióxi yii.”

<sup>17</sup> Ta tá ná cache ndó “tátá Ndióxi” já ndítahan caja cáhnu ndó a nani ndúu ndó ñuyíví yóho. Jáchí mé á caja vií a sahá ña caja in in ñayivi ta co sáhní toho a mé

á ndá ñayivi cúu ná. In nuú caja mé á xihín ndihi na.<sup>18</sup> Jáchí mé Ndióxi nájácacu a ndohó nuú ndihi ña nácaja ndó sahá. Ta ña yóho cíuú ña nácatiahva ndó nácaja tásahnu jíco ndó. Ta sa cándaa vaha ini ndó ña coó nachahvi Jesucristo sahá cuachi ndó jan xihín jiuhun cuáan á xihín jiuhun cíxú, ña ndihi sahá.<sup>19</sup> Ña nácaja mé á quéa nachahvi a sahá cuachi ndó xihín nii mé á, dó yahvi ndivaha. Naxita do cán tá naxihí a ndica crúxu vatí coó nácaja mé á cuachi. Najoco a mé á nu Ndióxi sahá cuachi tá quiahva nácaja ñayivi tá najoco na in ndicachi víi nu Ndióxi sahá cuachi na.<sup>20</sup> Tá cámanti cava sahá sahá ñuyíví já náscu ini Ndióxi quiví Jesucristo sahá cuachi ñayivi. Tá naxinu tiempo já naquixi a ñuyíví ña ná chindeé a ndohó.<sup>21</sup> Xihín ña nácaja Jesucristo cándezee ini ndó Ndióxi viti, mé á nájánditacu a Jesús ta nácaja cahnu ndivaha Ndióxi Jesús. Sahá ña nácaja Ndióxi cándezee ini ndó mé á ta ndáti ndó xínu quiví quiahva mé á ña vaha, ña in dividí nu ndó.

<sup>22</sup> Ta viti nácasáhá ndo caja ndó ña ndaa já nándaa víi ndó inímá ndo ña ná quihví ini ndó ña cíuú cuéntá Jesús. Sahá ña cán quéa xíni ñúhú quihví ini ndó ña xihín ndinihu ini ndó.<sup>23</sup> Cíuú á tátuhun náscacu tucu ndó joo a juú ñayivi nácaja ña náscacu tucu ndó. Jáchí cíuú á sahá ña cándezee ini ndó tühun Ndióxi, ña co ndíhi sahá andá ama cáa quiví. Sahá ña cán quéa cíuú á tátuhun náscacu tucu ndó nácaja tühun Ndióxi.<sup>24</sup> Jáchí já cáchí tühun Ndióxi:

Tóco ndihi ñayivi cíuú ná tátuhun yucu cuíi  
ñá cása yúcu ña ndíhi yachí sahá.

Ta tóco ndihi ña náhnu caja na cíuú á tátuhun in ita cánúu nuú yucu cán.

Jáchí mé yucu cán ichí a ta ndicava ita nu  
á ta quiahva já ndíhi ri sahá ña cája  
ñá cán.

<sup>25</sup> Joo tühun Ndióxi, xitoho í a ndíhi sahá  
andá ama cáa quiví.

Ta mé tühun yóho cíuú á ña sa nácaxi tühun  
í xihín ndó. Ta cíuú á tühun vaha cahna sahá  
Jesucristo.

## 2

<sup>1</sup> Xíni ñúhú jándacoo ndó tóco ndihi ña  
núu caja ndó ta a jándahvi ga ndó ñayivi.  
Ndítahan cacuu ndó tá quiahva ndáa ndó  
ta a cahihvi ga ini ndó ta a cácuu ga ndó  
ñayivi ndahndá yúhu.<sup>2</sup> Tá quiahva caja na

välí ndúcú na chichí na quiahva já ndítahan  
ndinducu ndó candaqá ini ndó tühun Ndióxi  
já ná cuu cuahnu ndó xihín á ña ná jácacu  
Ndióxi ndohó.<sup>3</sup> Tá ná caja ndó já jánaha  
ndó ña mé a ndaa táhyí náscandaa ini ndó  
ñá vaha ndivaha ini Ndióxi, xitoho í.

*Jesús cíuú á tátuhun in yuú cahnu ndácaqan  
titó vehe*

<sup>4</sup> Cayati ndó nyú Jesucristo, xitoho í jáchí  
tácú va mé á ta cíuú á tátuhun yuú ndúhu  
ñá náscandají da cava ha vehe. Joo nu Ndióxi  
cíuú Jesucristo tátuhun in yuú vaha ndivaha  
ñá náscaxi a.<sup>5</sup> Ta caja Ndióxi xihín ndohó ña  
ná cacuu ndó tátuhun yuú tácú ta cava ha  
Ndióxi veñhu mé á xihín ndihi ndó. Ta sa  
cíuú ndó jutu yíi nu á. Ta sahá ña nácaja  
Jesucristo xihín ndó cuu joco ndó mé ndó  
caja ndó ña cúní mé cuití va jáchí ña jan  
quéa cajíi ini Ndióxi xihín.<sup>6</sup> Sahá ña cán  
quéa cächí tühun Ndióxi tá cahna sahá  
Jesús já cächí a já:

Yéhe náscu u in a náu Sión ta cíuú á  
tátuhun in yuú ndúhu ta mé yuú  
yóho cíuú á ña náscaxi mí i ta cíuú á  
ñá yahvi ndivaha.

Ta ndá ná ná cándezee ini mé á a cándezee náu  
toho na caja i, cächí tühun Ndióxi.

<sup>7</sup> Mé yuú cahna Ndióxi sahá yóho cíuú á  
Jesucristo ta ndiyahvi ndivaha nu mé ndó  
jáchí cándezee ini ndó a. Joo na co cándezee  
ini Jesús na cán cíuú na jaxinu nuú tühun  
Ndióxi tá náscachi a já:

Mé yuú ndúhu, ña náscandají da cava ha  
vehe,

nánduu a yuú ña fin chágá sahá.

<sup>8</sup> Ta fin inga tucu nu cächí a sahá Jesús:  
Cíuú á tátuhun in yuú cahnu nyú cahihin  
sahá ná ta jándicava a ná, cächí  
tühun Ndióxi.

Ta mé ná cán cahihin sahá ná jáchí co  
cúní na cuna joho na tühun vaha cahna sahá  
Jesucristo. Ta janda sahá náscu ini Ndióxi  
ndo no na.

*Ñayivi, ng cíuú cuéntá mé á*

<sup>9</sup> Joo mé ndó cíuú ndó ná náscaxi Ndióxi  
ñá ná nduu ndó na vehe mé á. Ta nánduu  
ndó jutu cuéntá mé á ta mé á cíuú á rey.  
Ta cíuú ndó in táhndá cahnu ñayivi yíi  
ndácaqan ndó in náu ña nándiquehe Ndióxi  
cacomi a cuéntá sahá. Ta náscaxi Ndióxi  
ndohó ña ná cahna ndó xihín ñayivi ndaja  
ndáa ña náhnu caja Ndióxi. Mé a náscana  
ndohó tá nánduu ndó nyú naá cán já ná

quixi ndó nuú ndatató ndivaha yéhe nu íin a.<sup>10</sup> Coó nasacuu toho ndó ñayivi cuéntá Ndióxi jihna joo viti cíú ndó cuéntá mé á. Coó natáhví ini Ndióxi sahá ndó jihna joo viti táchví ini a sahá ndó.

### Xíní ñúhú caja í ña cúní Ndióxi

<sup>11</sup> Candehé ndó, ñani i. Xíca tahví i nu ndó, na cíú tátuhun na ndúu ñuu tóho jáchí indíví cíú ñuu ndó. Sahá ña quíhví ini i ndohó sahá ña cán quéa xíca i ñamani nu ndó ña ná a caja ndó ña xíca ini yiquí cuñu ndó caja. Jáchí cíú á tátuhun cani táhan yiquí cuñu ndó xíhín íníma ndo.<sup>12</sup> Mé ndó ndúu ndó tañu ñayivi ñuyíví, na co xíca íchi cuéntá Ndióxi. Xíní ñúhú caja vaha ndó já ná cuni na jan ndá quiáhva caja ndó. Vatí viti cáhan níu na sahá ndo ta cächí na ña cíú ndó na quini joo tā ná cuni na ña vaha caja ndó já quéa caja cahnu na Ndióxi tā ná xínu quívi caja vií mé á sahá tóco ndihi ñayivi.

<sup>13</sup> Sahá ña caja cahnu ndó Jesucristo, xi-toho í xíní ñúhú coo joho ndó nu sáhndá na jutixia ndúu ñuyíví yóho nu ndo. Coo joho ndó nu cáhan presidente, da ndójó chuun cáhan chágá.<sup>14</sup> Ta coo joho ndó nu sáhndá da cíú gobernador jáchí mé presidente cíú da sáhndá chuun nuú gobernador ña ná caja vií da sahá na co caja vaha. Ta ndítahan nu dá cahán vaha da sahá ná caja vaha.<sup>15</sup> Cúní Ndióxi ña ná caja vaha ndó. Já quéa na tóntó jini, na co xíca íchi cuéntá Ndióxi cuni na ña vaha caja ndó já ná a ñéhe íní na cahán níu na sahá ndo.

<sup>16</sup> Vatí najaní ndó ndáhá ley Moisés ña nasaicomí cuéntá sahá ndó jihna joo co cúní cachi a ña núná nu ndó caja ndó ndá cuachí cúní ndo. Jáchí xíní ñúhú ndicuhun ini ndó ña cíú ndó na caja chúun cuéntá Ndióxi viti.<sup>17</sup> Xíní ñúhú coo toni ñúhú ndo xíhín tóco ndihi ñayivi. Ta ndítahan quíhví ini ndó na cíú cuéntá Jesús. Ta ndítahan nu ndó caja cahnu ndó Ndióxi. Ta ndítahan coo toni ñúhú ndó xíhín da cómí chuun ñuyíví yóho.

*Coó nacahan níu Jesú xíhín na nacaja xíxi xíhín á ta quiáhva já ndítahan caja ri mé ví*

<sup>18</sup> Ndóhó, na cómí xitoho cuéntá sahá xíní ñúhú caja ndó xíhín ndinuhu ini ndó ña sáhndá xitoho ndó nu ndo. Ta a ndínehe yúhu ndó nu ná. Coó a caja toho a á cíú ná ñayivi xíxi ini xíhín ndó á cíú ná ña quíhví ini ndohó, na co jándoho náhá ini

ndó.<sup>19</sup> Sa xíní ndó ña cúní Ndióxi caja ndó. Sahá ña cán quéa caja ndeé ini ndó tá caja xíxi na xíhín ndó sahá in ñaha coó nacaja ndó. Jáchí sahá ña yóho cajíi ini Ndióxi xíhín ndó.<sup>20</sup> Vatí caja ndeé ini ndó tá ndóho ini ndó sahá cuachi nacaja ndó, co ñéhe táchví toho ndó ñamani nu Ndióxi. Joo tá caja ndeé ini ndó tá ndóho ini ndó sahá ña vaha caja ndó já quéa cajíi ini Ndióxi xíhín ndo.<sup>21</sup> Jáchí sahá ña yóho nacana mé á ndohó. Ta najánahá Jesucristo ña yóho nu ndó tá nandoho ini mé á sahá ndo vatí coó nacaja mé á cuachi. Ta ña yóho cíú in quiáhva násacu a caja ndó.<sup>22</sup> Ni in tühún toho tañu coó nacaja mé á cuachi ta ni in tühún tañu coó najándahvi a ñayivi.<sup>23</sup> Tá nacásahá na cánahá quini na xíhín á coó nanducú ñehe mé á tühun quini nu na. Ta tá najándoho na ini a coó násacu ini a caja níu a xíhín na cán. Ña nacaja mé á quéa násacu ndihi a ña ndáhá Ndióxi, mé a caja ví ndaa sahá tóco ndihi ñaha.<sup>24</sup> Mé Jesucristo nandicojo a cuachi jatá yiquí cuñu a cuahan tá naxíhi a ndica crúxu. Ta cíú á tátuhun naxíhi yó nuú cuachi ña nu cuu catacú cuéntá mé á tā ná caja í ña vaha cuití va. Najándicuehe na Jesucristo ña ná cuu ndivaha mé ndó.<sup>25</sup> Jáchí mé ndó naxíca nuu ndó ñuyíví yóho tá quiáhva xíca nuu in ndicachi, rí nandiñuhú nuú xitoho. Joo viti nandicó coo ndó nu Jesucristo ta mé a cán ndáa a ndohó tá quiáhva ndáa in dñataa ndicachi janá dá. Ta co jándacoo ndáhá mé á ndohó.

### 3

#### *Ña ndítahan caja na sa nacahan*

<sup>1</sup> Candehé ndó, najihí, na ndúu yíi. Xíní ñúhú caja ndó ña sáhndá yíi ndó nu ndo. Já quéa tá co cándusa da tühun Ndióxi cuu xínu ini da candusa da ña sahá ña caja ndó ta a juú ga sahá ña cahán ndó xíhín dá.

<sup>2</sup> Jáchí tá ná cuni yíi ndó ña caja vaha ndó ta cahán toni ñúhú ndó xíhín dá já quéa cuu jaxínu ndó ini da xíhín ña caja ndó.

<sup>3</sup> A ndíhi náhá ini ndó caja cutí ndó mé ndó xíhín ñaha ña cuu canaha lända ndó xíhín, tátuhun ña chuhun lända ndó yútu jini ndo á tátuhun ña cañuhu lända jíqui jíco ndo.

Ta a ndíhi ini ndó cañuhu lända jéhe ndáhá ndo. Ta a ndíhi ini ndó candixi ndó jahmá lända. A ndíhi ini ndó sahá tóco ndihi ña yóho.<sup>4</sup> Ña ndítahan ndihi ini ndó

sahá cútú ña ndíyahvi nu Ndióxi. Ta ña yóho cútú in ínímá ña nandicutú xihín ña vaha já ná coo víi ini ndó. Tóccó ndihi ña yóho cútú ña coo ndihi sahá. <sup>5</sup>Jáchí quiahva já ñúchí ndivaha násacaja najihí yii, na násacuu cuéntá Ndióxi sanahá. Nacandeé ini na Ndióxi ta nácaja na chuun násahnda yii ná nu ná. <sup>6</sup>Quiahva já ñúchí ndivaha nácaja ñá násanamí Sara tá nácadúsá ñá yii ñá, da násanamí Abraham. Ta mé ñá cán nácachi ñá sahá Abraham ña cútú dá xitoho ñá. Ta viti mé ndó cútú ndó tátuhun jahyi mé Sara cán tá cája ndó ña vaha ta tá coo yihví ndó ni in ñaha.

<sup>7</sup>Ta jári ndóhó va dataa, da íin ñajihí, a cája ndivaha ndó xihín ñajihí ndó. Coo toni ñúhú ndó xihín ña jáchi cútú ña chijín chágá nu mé ndó. Ta ñamani, ña násacu ini Ndióxi quiahva nu ndóhó, dataa, násacu ini mé á quiahva ri a nuú ña cán va. Sahá ña cán quéa ndítahan caja vaha ndó xihín ñajihí ndó já ná cúní johó Ndióxi ña xícá tátuhun ndó nu á.

Ndóho ini java na sahá ñg vaha cája na

<sup>8</sup>Candehé ndó. In ndítahan cacuu ndihi ndó. Coo ndítahan cahndá táchán ndó. Ndítahan quihví ini táchán ndó tátuhun in cútú tátá ndihi ndó. Ta ndítahan candáhví ini ndó ñayivi. Ta coto a ndíñehé jíco ndó mé ndó. <sup>9</sup>Tá ná caja núu ñayivi xihín ndó a ndíco coo ndó caja ndó já xihín ná. Ta ni tá ná canahá na xihín ndó a ndíco coo ndó canahá ndó xihín ná. Vaha chágá ná caca tátuhun ndó nu Ndióxi ña ná caja vaha mé á xihín na cán. Ta nácaja Ndióxi ndóhó ñá ná caja mé á ñamani xihín ndó. <sup>10</sup>Jáchí já cachí tátuhun Ndióxi já:

Ndá na cúní canduu nahá ñuyíví yóho ta coo cúní na quixi tondóhó nu ná nani íin na yóho,

já quéa ndítahan nu ná canda na yúhu ná já ná a cáhan quini na.

Ta quiahva já ndítahan canda na yúhu ná já ná a cáhan na ña tátuhun.

<sup>11</sup>Ndítahan caxoo na nu tóccó ndihi ña núu ta caja na ña vaha cuití va.

Ta ndítahan ndínducú na ña coo vaha ini na xihín ñayivi ta a jándacoo na caja na ña.

<sup>12</sup>Jáchí ndáa Ndióxi na cája ndaa, ta táchán johó a nu cáhan na tá xícá tátuhun na nu mé á.

Joo xójó ini a xihín ñayivi cája cuachi, já cachí tátuhun Ndióxi.

<sup>13</sup>Ni in ñayivi a cútú ndusa caja xíxi xihín ndó tá ná ndihi ini ndó caja ndó ña vaha.

<sup>14</sup>Joo tá cája xíxi na xihín ndó vatí caja ndó ña vaha, tátuhun nahá násacuu ndó. A cayihví toho ndó ñayivi ta a ndícani toho ini ndó.

<sup>15</sup>Ña ndítahan caja ndó quéa caja cáhnu ndó Jesucristo, xitoho í xihín ndinuuhu ínímá ndó. Ta xímí ñúhú coo tiáhva ndó nducú ñehe víi ndó tátuhun nuú ñayivi, na cúní candaqá ini sahá ña cández ini ndó Jesús. Ta ná coo toni ñúhú ndó xihín ná ta a ndíñehé jíco ndó mé ndó nani ndícani ndó tátuhun Ndióxi nuú na cán. <sup>16</sup>Ndítahan caja ndó ña vaha já ná a cácahan nuú ndó. Ta tá cáhan núu na sahá ndó sahá ña cútú ndó cuéntá Jesús já quéa cacahan nuú mé ná cán sahá tátuhun núu cáhan na sahá ndó. <sup>17</sup>Tá tá mé Ndióxi quéa cúní ná ná ndoho ini ndó já quéa vaha chágá ná ndoho ini ndó sahá ña vaha cája ndó a juú ga sahá ña núu.

<sup>18</sup>Ta in tátuhun tañu cuití va naxihí Jesucristo sahá cuachi. Ni in tátuhun toho cuachi coó nácaja mé á joo nandoho ini a sahá ñayivi quini já ná cuu ndíjvi ndihí íchi cuéntá Ndióxi. Ta sahá ña násacomí a in yiquí cuñu ñayivi naxihí a joo mé á cútú á ña naquixi indív sahá ña cán quéa nanditacu tucu a ta tacú yii va ínímá mé á.

<sup>19</sup>Ta násahen ínímá mé á nu ndájí ínímá ndijí ta cán nácahan mé á tátuhun Ndióxi xihín na.

<sup>20</sup>Mé ínímá ndijí cán násacuu na ña coó naxeeen cuni johó tátuhun Ndióxi sanahá ndivaha. Tá násatatu Noé já násandatí Ndióxi ña ná cava ini na cán nani cávaha Noé mé barco cáhnu, dó jácau ñahá. Joo chá cuití násacuu na nacacu. Una víxí láá na nacacu nuú ticiúi cán.

<sup>21</sup>Ta viti tá cándutá yo xihín ticiúi já caca ínímá yó tá quiahva nacacu na cán ini barco sanahá.

Tá cándutá yo xihín ticiúi coo ndóo cuachi sahá ña nandoo yiquí cuñu í xihín ticiúi cán. Nacacu nuú cuachi jáchí cández ini

Jesucristo ta cúní yó ña ná ndaja víi mé á ínímá yó. Ta náha ña nacacu nuú indayá tá nanditacu tucu Jesucristo <sup>22</sup>ta sa nandao mé á indív ta íin a xoo cuáha Ndióxi. Ta sáhndá mé á chuun nu tátó Ndióxi xihín nuú na cómí cuéntá sahá ná ndúu indív.

<sup>1</sup> Tá quiāhva nāndoho yiquí cuñu Jesúsi quiāhva já ndítahan canduu tīahva ri ndóho va ndoho ini ndó. Jáchí ndá ná ndóho ini yiquí cuñu, ná cán cūú ná co cája cuachí ndaja nacuu. <sup>2</sup> Ta viti co cája ga yiquí cuñu ndó ná nūu cuéntá ñuyiví yóho. Ta níi tiempo ndúcú ndó caja ndó ná cuni Ndióxi. <sup>3</sup> Jáchí sa nayaha ndivaha quiāhva nacaja ndó ná nūu jihna tá quiāhva cája ñayivi, ná co xíni Ndióxi. Mé tiempo tá cámpani candaia ini ndó sahá íchí cuénta Jesús já nasacaja ndó tá nūu ná nūu tátuhun ná xíca ini ndó caja ndó xihín yiquí cuñu ndó. Ta nasacuu ndó ñayivi xíhi. Ta nacatoo ndó cája ndó vicó lända ndivaha. Ta chí najáyaha quini ndivaha ndó ná nasaxili ndó. Ta nacaja cáhuu ndó yoco ná nacachi Ndióxi co ndítahan caja cáhuu ndó. <sup>4</sup> Ta nacásahá cáhan núu ñayivi nacatáhan xihín ndó tá nacacaja ndó ná nūu jihna. Jáchí viti co xíca nuu ga ndó cája ndó tá nūu ná nūu xihín ná. Ta viti sa nacásahá ndíhi ini na ndáti na ndicó coo ndó xihín ná. <sup>5</sup> Joo vaxí quiví cuhun ná cán cavíi sahá ná nūu Ndióxi, mé a fin tīahva caja vií sahá ná tácú xihín sahá ná sa naxíhi. <sup>6</sup> Jáchí sa naxini joho va ñayivi, ná sa naxíhi cán tūhun vaha sahá Jesús tá nacatagu na. Naxini joho na tūhun vaha sahá Jesús ná ná cuu catacu ínimá ná tá quiāhva tácú Ndióxi vatí nacavíi sahá ná ñuyiví yóho tá quiāhva cavíi sahá tóco ndíhi ñayivi.

<sup>7</sup> Jalóho cúní xinu coo quivi ndíhi sahá tóco ndíhi ñaha. Sahá ná cán quéa ndítahan nū ndo coo caxí tāhví ini ndó ta xihín ndinuhu ini ndó ndítahan caca tāhví ndó nu Ndióxi. <sup>8</sup> Ná cúní quéa ná quihvi ini tāhan ndó jáchí tá quihvi ini tāhan ndó já cája cáhuu ini sahá tāhan ndó tá ná yaha xihín tāhan ndó. <sup>9</sup> Ta a cójo ini ndó tá xinu coo ná ná cúní tāhan ndó xito nihni na ndohó vehe ndó jáchí ndítahan ndiquehe vaha ndó na. <sup>10</sup> Nasahan Ndióxi nūu in in ndó ná ná ñehé tāhví ndó in in ñamani mé á. Ta ndítahan caja chūun ndó a ná ná chindee ndó na cùú cuénta Jesús. Ta ndítahan caja ndó ná tá quiāhva sáhan Ndióxi ndéé ndó caja ndó ná. <sup>11</sup> Ta ndá tūhun ná cáhan ndó xihín ná ná tāhan ndó, ná cacuu a tūhun yii tátuhun ná cáhan Ndióxi. Ta ndá ndó cája ñamani xihín inga na, ná caja ndó ná xihín ndéé sáhan Ndióxi nū ndo. Jáchí tóco ndíhi ná cája ndó ndítahan cacuu a ná cuu caja

cáhuu í Ndióxi xihín. Ta cája Jesucristo ná ná cuu caja cáhuu í Ndióxi. Cáhuu ndivaha cùú a ta sáhndá a chuun nūu tóco ndíhi ñaha andá ama cáá quivi. Já ná coo.

#### Ndóho iní jáchí cández iní Jesús

<sup>12</sup> Candehé ndo, ná ná i. Coto a cátontó nahá ndó tá quíxi tondóhó náhnu nū ndo. A cája ndó tátuhun ná co xíni quixi tondóhó nū. <sup>13</sup> Ná ndítahan caja ndó quéa cajíi ini ndó jáchí xihín ná yóho cández ini ndó ndá quiāhva nāndoho ini Jesús. Ta xihín ná yóho cajíi ndivaha ini ndó tā ná cuni ndó ndá quiāhva cáhuu cùú mé á tā ná quixi tucu a. <sup>14</sup> Tá cámpana ñayivi xihín ndo sahá ná cández ini ndó Jesucristo, tahví nacuu ndó. Jáchí sa nandicutú ndaa ínimá in in ndó xihín ínimá yii Ndióxi ta mé á cùú á ná cáhuu ndivaha. Mé ñayivi cán cáhan núu na sahá joo mé ndó cája cáhuu ndó a. <sup>15</sup> Tá nacásahá cája xíxi na xihín ndó co ndítahan cacuu a sahá ná cùú ndó tā sáhní ndii. Ta ni co ndítahan cacuu a sahá ná cája cuñhá ndo. Ta ni co ndítahan cacuu a sahá ná a vaha toho nacaja ndó. Ta ni co ndítahan cacuu a sahá ná naquihvi nuu ndó nū co ndítahan nū ndo. <sup>16</sup> Joo tā ndóho ini ndó sahá ná cùú ndó cuénta Jesucristo co ndítahan cáahan nūu ndo. Ná ndítahan caja ndó quéa caja cáhuu ndó Ndióxi jáchí nañehé tāhví ndó cacuu ndó cuénta Jesús.

<sup>17</sup> Viti sa naxinu coo tiempo casáhá Ndióxi caja vií a sahá ná cùú cuénta mé á. Ta jihna mé yó, ná cùú cuénta mé á caja vií a sahá. Ta a juú quiāhva jándoho a ini java ga ñayivi, ná co cúní coo joho nū ná sáhndá mé á nū ná caja na. <sup>18</sup> Jáchí cächí tūhun Ndióxi ná janda mí, ná cùú ñayivi ndaa nu Ndióxi ta ihví cáá sahá yo jácacu Ndióxi mí. Ndaja ga ví caja Ndióxi xihín ñayivi sáá ini, ná co cúní jándacoo cuachí. <sup>19</sup> Sahá ná cán quéa tā ndóho ini ndó tā quiāhva cúní Ndióxi, ndítahan nū ndó caja vaha ndó. Ta jári ndítahan nū ndó ndiquiahva ndó mé ndó ndáha Ndióxi, mé á nacaváha ndóhó. Ta cája mé Ndióxi ná sáhan tūhun a caja.

na sacuahá ndaja cáhnu cacuu na nú Ndióxi tá cuhun na coo na xihín mé á quiāhva já caja ri Ndióxi xihín yehé va tá ná xinu coo quivi nú ndishí.<sup>2</sup> Xíca tahví i nú ndó ña ná cacomí vahá ndó cuéntá sahá na cúu cuéntá Jesús. Caja ndó ña xihín ndinuhu ini ndó jáchí mé Ndióxi najándicoo a na ndáhá ndó. Sahá ña cán quéá xíní ñúhú coo cuéntá vahá ndó xihín ná tá quiāhva cúní Ndióxi. Ta coto a caja ndó ña xihín ña ndúsá. Ta ní a cája ndó ña sahá jihún. Ña ndítahan caja ndó quéá cajíi ini ndó xihín chuun yóho.<sup>3</sup> Ta có ndítahan cahvi ini ndo ña cúu ndó xitoho na cúu cuéntá Jesús jan jáchí na jan cúu ná ná najándacoo Ndióxi nú ndó candaa ndó. Xíní ñúhú caja vahá ndó já ná cuni ri na jan va caja na ña. Jáchí na jan cúu ná tátuhun ndicachi ta ndohó cúu ndó tátuhun dá ndáá ñahá.<sup>4</sup> Ná cán quéá tá ná quixi Jesucristo, mé á cúu dá sacuahá núú ndihi dá ndáá na cúu cuéntá mé á anda já ndiquiahva mé á ña ndítahan ndiquehe ndó sahá chuun nacaja ndó yóho. Ta ná quiāhva mé á nú ndó a cáuu toho a in ñaha ña ndihi saha.

<sup>5</sup> Ta viti cáhan rí xihín ndohó, dá tacú. Xíní ñúhú coo johno ndó nú sáhndá na sacuahá nú ndó. Tóco ndihi ndó ndítahan candúsa táhan ndó ta có ndítahan nú ndó ndiñehe jíco ndó mé ndó jáchí já cáchí tuhun Ndióxi:

Xójo ini Ndióxi xihín na cátóó ndiñehe jíco mé,

joo cája ñamani xihín na jánuu ndáhá mé.

<sup>6</sup> Ña cán quéá ndítahan jánuu ndáhá ndó mé ndó nú Ndióxi jáchí sa cándaa ini ndo ña cáhnu ndivaha cúu mé á. Vaxi quivi jándiñehe jíco mé á ndohó sahá ña najánuu ndáhá ndó mé ndó.<sup>7</sup> Tá ndicani ndivaha ini ndó ndítahan caca tahví ndó nú Ndióxi ña ná chindeé a ndohó jáchí ñúhú ini a sahá ndó.

<sup>8</sup> Cuéntá coo ndó ta coto a náá ini ndó jáchí tiñáhá sacuahá cúu rí rí jhvi yo ta xíca nuu rí tañu mí yóho. Ta tá quiāhva cája in león ndáhyí rí ndúcú rí yo caxí rí quiāhva já cája tiñáhá sacuahá yóho jándicava rí ñayivi núú cuachi.<sup>9</sup> Xíní ñúhú coo ndacú ini ndó ta candeé ndusa ini ndó Ndióxi já cuu quee vahá ndó xihín rí. Ta ndítahan ndicuhun ini ndó ña tá quiāhva ndohó ini ndó quiāhva já ndohó ri java ga na cúu cuéntá Jesús ndúu ndijáá ñuyíví.<sup>10</sup> Ta tá sa nayaha chá tiempo ndohó ini ndó anda

jáví caja Ndióxi ña ná ndoo cuachi ndó ta jándihvi mé á ndéé a ini ínima ndó. Níí tiempo cacuu ndó ñayivi ndacú ini xihín tuhun Ndióxi ta xihín ña yóho candeé ndusa ini ndó Ndióxi. Mé á cán cája cuahá ñamani xihín yo. Ta nacana mé á mí ña ná cohó coo í indiví ña ná ndaja cáhnu Ndióxi mí anda ama cáa quivi sahá ña in nanduú xihín Jesucristo.<sup>11</sup> Cáhuu ná cacuu mé á ta ín ndéé a cája tóco ndihi ña cúní a anda ama cáa quivi. Já ná coo.

Ndíndayí Pedro na cáhyí da carta núu cán

<sup>12</sup> Chíndéé Silvano yehé cáhyí í carta yóho ta chíndahá i ña nú ndó. Ta cája í cuéntá mé Silvano yóho cája chúun da cuéntá Ndióxi xihín ndinuhu ini da. Nacahyí í mé carta loho nú ndo jáchí cúní ndicani i ña ndaa nú ndo ña cája tá cája Ndióxi ñamani xihín ndo. Xíní ñúhú coo ndacú ini ndó ta a ndíndójó ndó tóco ndihi ña nacachi i xihín ndó yóho.

<sup>13</sup> Ná cúu cuéntá Jesús ndúu Babilonia chíndahá na Ndióxi coo ndó. Ta tá quiāhva nandacaxi Ndióxi ndohó quiāhva já nandacaxi ri á ná cán va. Ta jári Marcos, dá cúu tátuhun jahyi i chíndahá dá Ndióxi coo ndó.<sup>14</sup> Cáhan Ndióxi xihín táhan ndó ta tatí yúhu sajóho táhan ndó jáchí quiāhva já ndítahan caja ndó sahá ña quíhví ini táhan ndó.

Ta ña cúní quéá ná coo vaha ini ndihi ndó, na cúu cuéntá Jesucristo. Já ná coo.

## Carta nacahyí Pedro chí ivi

*Cáhyí tucu Pedro inga carta nyú na cíu  
cuénta Jesús*

<sup>1</sup> Yehé cíu Simón Pedro ta caja chúun i cuénta Jesucristo ta cíu u in apóstol nachindahá mé á ña ná cahan i sahá tuhun a. Cáhyí i carta yóho nu ndóhó, na nañéhe táchví candéé ini Ndióxi tá quiahva candeé ini ndéhé mé á. Jáchí caja ndaa Jesucristo tóco ndihí ñaha ta mé á cíu Ndióxi caja cahnu í. Ta mé á quéa jácacu mí. <sup>2</sup> Ña cúní quéa ná caja cuahá Ndióxi ñamani xihín ndo ta ná caja mé á ña ná coo vaha ini ndó sahá ña xíní ndó yo cíu Ndióxi ta sahá ña xíní ndó yo cíu Jesús, xitoho í.

*Jáxinu Ndióxi iní ña ná caja i ña cúní mé á*  
<sup>3</sup> Xihín ndéé Ndióxi nacaja ña ná a ndímaní ñaha nu yo catacú ñuyíví yóho. Ta náha mé á nu yo ndá quiahva caja cahnu í mé a xihín ña caja í. Jáchí nacaja mé á ña ná candaá iní sahá Jesucristo. Ta xihín ndéé mé á ta xihín tóco ndihí ña náhnu caja mé á nacaxí a mí candéé iní mé á. <sup>4</sup> Ta sahá ña yóho násahan tuhun a nu yo. Ta náhnu ndivaha cíu tuhun násahan mé á nu yo ta ndíyahvi ndivaha ña. Jáchí xihín tuhun násahan mé á nu yó já cuu xínu coo í coo í tá quiahva fin mé á. Ta xihín ña yóho cuu caxoo í nyú ña níu xíca iní yiquí cuñu í caja ñuyíví yóho. <sup>5</sup> Sahá ña cán quéa tá cúní ndó ñehe táchví ndó ñamani nu Ndióxi xíní ñúhú candéé ini ndó Jesús. Ta vatí sa candeé ini ndó Jesús joo xíní ñúhú caja vaha ndó. Ta vatí sa caja vaha ndó joo xíní ñúhú candaá vaha ini ndó tuhun Ndióxi. <sup>6</sup> Ta vatí sa candaá ini ndó tuhun Ndióxi joo xíní ñúhú cahnu ndó nyú ña níu ña xíca iní yiquí cuñu ndó caja. Ta vatí sa sáhnu ndó nyú ña xíca iní yiquí cuñu ndó caja joo ndítahan coo cahnu ini ndó. Ta vatí sa fin cahnu ini ndó joo ndítahan ndinducú ndo caja ndó ña cúní Ndióxi. <sup>7</sup> Ta vatí sa caja ndó ña cúní Ndióxi joo ndítahan quihví ini ndó ñani táhan ndó, na cíu cuénta Jesús. Ta xihín ña yóho cuu quihví ini ndó tóco ndihí ñayivi.

<sup>8</sup> Tá caja ndó tóco ndihí ña yóho ta tá ndihí ini ndó cuahnu ndó xihín á, a cácu toho ndó ñayivi co chúun nu Ndióxi. Ta tá ná xínu coo ndó candaá ini ndó sahá

Jesucristo, xitoho í já quéa a cácuu a ña uu.

<sup>9</sup> Joo ndá na co cája tóco ndihí ña nacachi i xihín ndo cíu ná tátuhun in na cuáa, in na a cíu candéhé vaha. Jáchí nandindójó na ña najándoo Ndióxi cuachi nacaja na sanahá.

<sup>10</sup> Sahá ña cán quéa ndítahan nu mé ndó, ñani i, na cíu cuénta Jesús ndihí ini ndó ñahá ndo nyú ñayivi ña mé a ndaa táchví cíu ndó na nacana Ndióxi cacomí a cuénta sahá. Jáchí tá ná caja ndó tóco ndihí ña vaha nacachi i xihín ndo yóho a ndicava toho ndó nyú cuachi. <sup>11</sup> Ta xihín ña yóho núná nu ndó cuhun ndo indiví nu fin Jesucristo, xitoho í, mé á jácacu mí ta cacomí a cuénta sahá yó anda ama cáa quivi.

<sup>12</sup> Sahá ña cán quéa cahán i sahá ña yóho nu ndo vatí sa xíní va ndó ña ta vatí sa candeé ini ndó ña ndaa, ña najánhaha i nu ndo yóho. <sup>13</sup> Caja i ña yóho jáchí cahán i ña ndítahan caja i ña nani tacú u ñuyíví yóho. Jáchí xíní ñúhú ndicani i nu ndo ndía quéa vaha ta ndía quéa a vaha. <sup>14</sup> Jáchí sa nacaja Jesucristo, xitoho í ña ná candaá ini i ña sa nacayati quivi quiwi i ta jándacoo i ñuyíví yóho. <sup>15</sup> Joo ndúcú ndéé e ndinducú u ndó quiahva caja i já ná a ndíndójó ndó sahá tóco ndihí ña yóho tá sa naxihí i.

*Ndícani Pedro ña naxini da ndá quighva cahnu cíu Jesús*

<sup>16</sup> Tá najánhaha nde ndohó ña fin cuahá ndéé Jesucristo, xitoho í ta tá nacachi nde xihín ndo quixi tucu mé á, coó nasacuu a tuhun nacana jini mé nde ña jándavhi nde ndohó vaha. Jáchí naxini xihín nyú mé nde ndó quiahva cahnu cíu Jesucristo, xitoho í.

<sup>17</sup> Naxini nde xihín nyú nde tá nandaja cahnu Ndióxi, tátá yo Jesucristo já nandicáhnu ndivaha mé á. Ta ñúchí ndivaha násahijin tá naxini joho nde nacachi Ndióxi já: “Mé a yóho cíu jahyi maní i ta cajii ndivaha ini i xihín tóco ndihí ña caja”, nacachi Ndióxi sahá Jesús. <sup>18</sup> Ta mé nde naxini joho nde nacahán Ndióxi chí indiví jáchí násanduu nde xihín Jesús jini mé yúcu yii cán.

<sup>19</sup> Ta fin inga tucu ñaha cahán ndá quiahva cahnu cíu Jesús ta ña cán cíu ña nacahyí na profeta sanahá. Ta sa xíní vaha yó cíu á ña ndaa. Vaha caja ndó tám joho ndó ña nacahyí na profeta cán jáchí cíu á tátuhun in lámpara ña jándiyéhe nyú naá janda quiahva ná quixi Jesucristo. Ta mé á cíu á tátuhun quími cahnu, rí quéta

tá natívi jáchí jándiyéhé a ínima ñayivi.  
<sup>20</sup> Joo coto a ndíndójó ndo ña ni in túhun toho na a cuú nducú ñehe ña cáchí tuhun Ndióxi nyú inga na sahá ña cána jiní mé va na. <sup>21</sup> Jáchí ni in profeta coó nacahyí na ña násacu ini mé ná cahyí. Ña nacaja na quéa nandiquiahva na mé ná ndáha ínima yii Ndióxi ta mé Ndióxi násahan tóco ndihu ña nacahen na.

## 2

*Nq xíca jánahq ñq tuhún  
(Judas 4-13)*

<sup>1</sup> Joo mé tiempo já násanduu ri profeta túhún tañu na Israel cán. Quiahva já canduu ri na jánahá ña tuhún tañu ndóho. Ta na cán casáhá na jácahan jehé na ñayivi sahá ña cáhvi jiní mé va na. Joo jáquihví ndivaha na ñayivi xihín á. Ta xihín ña yóho a ndícuni na ña najácacu Jesús na ta casáhá na cácahan nuu na sahá ña nacaja mé a sahá ná. Ta ña yóho quéa caja ña ná ndihu yachí chágá sahá na cán. <sup>2</sup> Cuahá ndivaha ñayivi casáhá candico na jatá na cán ta casáhá na cája na ña núu xihín na. Ta sahá ña núu cája na cán casáhá ñayivi cahan núu na sahá tuhun vaha cáhan sahá Jesús vatí cuú á íchí ndaa. <sup>3</sup> Ta sahá ña catóó ndivaha na jiuuhún sahá ña cán quéa nducú na tavá na jiuuhún xihín ndo xihín mé ña tuhún jánahá na cán. Ta xíní Ndióxi ña cája na ña cán quéa ndihu tá ndihu sahá ná. Jáchí sa janda sanahá násacu ini mé a taán a ñayivi jan ini indayá.

<sup>4</sup> Coó nacaja cáhnu toho ini Ndióxi saha tátó mé a tá nacaja na cuachi nu mé á. Ña nacaja mé a quéa nachindahá a na indayá. Ta najándicoo a ná nuú naá ndivaha ta nacató a ná xihín cadena ndúu na ndáti na xíní coó quívi caja vií Ndióxi saha ná. <sup>5</sup> Ta ni coó nacaja cáhnu ini Ndióxi sahá ñayivi násanduu sanahá ndivaha. Ña nacaja mé a quéa najácuun ndee ndivaha javí já naxihí ndihu ñayivi quini cán. Ta in túhun da naní Noé xihín ndíhusa na vehe da najácacu a. Najácacu Ndióxi Noé jáchí nacandúsa da mé a ta najácahan dä ñayivi ña ná caja vaha na. <sup>6</sup> Ta quiahva já najándihi ri Ndióxi sahá ñayivi násanduu ñuu Sodoma xihín ñuu Gomorra. Nachicaan ñuhu a na janda quiahva nanduu na yaa uun. Nacaja Ndióxi ña yóho já ná cuni ñayivi vaxi chágá chí

nuu ña quiahva já caja Ndióxi jándihi a sahá ñayivi quini. <sup>7</sup> Joo najácacu Ndióxi in dä naní Lot jáchí násacuu da in taa vaha ta mé Lot yóho natahví ndivaha ini da sahá tóco ndihu cuachi násacaja ñayivi quini násanduu tiempo cán. <sup>8</sup> Ndiójá níi quívi nacacuéha ini Lot cán sahá cuachi ñayivi cán jáchí quini násacahan na ta quini násacaja na. <sup>9</sup> Ta tá quiahva nacaja Ndióxi xihín Lot quiahva já cuu caja mé a jácacu a ñayivi, na ndíquiahva mé ndáha mé á. Ta chindeé a ná tá cásahá ndóho ini na. Joo sácú xoo mé a ñayivi quini já ná canduu xóo na candati na xínu quívi caja vií a sahá cuachi na.

<sup>10</sup> Mé Ndióxi jándoho a ini tóco ndihu na catóó caja ña xícä ini yíquí cuñu na jáchi cándají na caja na ña sáhndá Ndióxi nu ná. Cúu ná na njihí ini ta ni co sáhni na mé ná ta ni co yílhví na canahá na xihín na ndójo chuun náhnu <sup>11</sup> jáchí ni mé tátó Ndióxi, na ndúu nu íin mé a vatí íin chágá ndee ná a juú ga ñayivi, na canahá xihín mé na ndójo chuun cán. Joo co sáhan ndee ini mé tátó Ndióxi chícaqan na cháhan jatá na náhnu sáhndá chuun cán.

<sup>12</sup> Joo ñayivi quini jan cúu ná tátuhun quíti, rí co xíní túni. Nácacu rí ñuyíví yóho ta tíin táchan rí ta sáhni táchan rí. Ta quiahva já cája na cán jáchí cája na ndá ña xíní ini na caja na ta cáhan núu na sahá ñaha, ña co cándaa ini na sahá. Ta tá quiahva xihí quíti já quívi na cán. <sup>13</sup> Tá quiahva jándoho na ini ñayivi quiahva já ndoho ini mé ná. Cáhán na ña ndató ndivaha ndúu na jáchi tá yéhe candii xíca nuu na cája na ña núu. Ta tá ndúu na xihín ndó in víco cátóó na ndítati na, chínuú cácahan nuu ndo quéa cája na. Cájii ndivaha ini na xihín ña cája na joo jándahvi uun na mé ná.

<sup>14</sup> Ta tá xíní uun na najihí ivi láá cásahá cáhvi núu ini na xihín ná. Chí co cánaá loho na cája na cuachi. Ta jándahvi na na coó ndacú cuahán íchí cuéntá Ndióxi ta xíní vaha na ndaja caja na quehe na ña cúní na. Na jan cúu ná ñayivi nataví cháhan jatá, na cuhun indayá. <sup>15</sup> Mé na jan nandiñúhú na jáchí najándacoo na íchí cuéntá ña ndaa. Cája na tá quiahva nacaja dä naní Balaam, jahyi Beor sanahá, dä nacacúni ñehe cuahá jiuuhún jatá ña núu nacaja da. <sup>16</sup> Joo nanan da sahá cuachi da nacaja in búrró jíhlí jáchi tá quiahva cáhan ñayivi quiahva já nacahen

rí cán xihín dá ta násaji nuu rí nuu dá ña ná a cája ga dà ña ná.

<sup>17</sup> Tóco ndihi taa, na jánahá ña tuhún yóho cíú ná tátuhun chicohó nuú co ñuhu tucuif jáchí coó chuun na. Ta cíú ná tátuhun vico jácuicó táchí xoo nuu cíni a ta viti ña nañehé ná quéa cuhun ná coo na nuú naá yávi andá ama cáa quivi. <sup>18</sup> Jáchí tuhun cáhan ná cíú á ña jándindita jíco ná mé ná xihín joo tóco ndihi ña cáhan ná cíú á ña coó sahá. Ta xihín ña ná, ña xíca ini yiquí cuñu na caja, xihín ña jan jándahvi na ná jacá nacaxoo nuú cuachi. <sup>19</sup> Mé na jánahá ña tuhún yóho jácahan ná ñayivi ña núná nuu ná caja na ña cíni mé va na. Joo mé na cán cíú ná tátuhun mozo nuú cuachi jáchí cómí tá cómí cuachi cuénta sahá ná. Núhu ñayivi ndahá ña tím ñahá jáchí sáhdndá a chuun nuu ná. <sup>20</sup> Ta ndá ñayivi nacaxoo nuú ña ná ñuyíví yóho sahá ña nacandaa ini na yo cíú Jesucristo, xitoho í, mé á jácacu mí joo tá nandihi cásahá tucu na cája na ña ná ta ndíquiahva na mé ná ndáha ña ná cán já quéa ndíquini chágaví na a juú gá tá cámáñi ndiquehe na íchi cuénta Jesús. <sup>21</sup> Janda vaha chágá ná a ndíhví na íchi cuénta Jesucristo, nduu. Jáchí a vaha toho tá sa xíni na ña cíú á ña yii ña násahen Ndióxi nuu ná ta tá nandihi já jándacoo na ña. <sup>22</sup> Joo xihín ña cája na yóho xíni nuú tuhun ña cachi: “Ndíco coo tucu tina sáxi ri ña sa nandusa ri. Ta cochí, ri jáca nandihi najácucho na ndíco coo tucu ri chiníni ri mé ri nuú ndahyi.”

### 3

Vaxi tucu Jesucristo, xitoho í

<sup>1</sup> Candehé ndo, ñani maní. Xihín ña yóho xíni carta ivi chíndahá í nuú ndo. Ta nuú ndíví carta ndícani í nuú ndo ndá quéa ndítahan caja ndó já ná ndicaní ini ndó ndinuhi ña vaha. <sup>2</sup> Ndítahan ndicuhun ini ndó ña nacachi na profeta yii Ndióxi sanahá ta ndítahan ndicuhun ini ndó ña nacachi Jesucristo, xitoho í, mé á jácacu mí jáchí cíú á ña najánahá na apóstol nuú ndo.

<sup>3</sup> Nu cuítí cíni ña ná candaa ini ndó ña tá sa nacayati quivi quixi tucu Jesucristo já queta ñayivi ta casahá na cuacu ndaa na tóco ndihi ña yii cuénta Ndióxi. Ta caja na tóco ndihi ña ná, ña xíca ini yiquí cuñu na caja. <sup>4</sup> Ta casahá na ndaca tuhún íchi na já cachi na já: “Násahen Jesucristo tuhun

a quixi tucu a ta ndá cuénta quéa a ñahá quixi a. Jáchí janda tá násatácu tásahnu jíco yó, tá cáá ñuyíví yóho andá sahá já cáá yii va.” <sup>5</sup> Ta cachei na ña yóho jáchí coó cíni na candusa na ña sa janda sanahá ndivahá va nacahán Ndióxi ta já nacavahá indíví xihín ñuyíví. Ta mé Ndióxi quéa násahnda chuun ña ná ndinuha tucuif cán já ná canahá nuú ñundáhyi ta fin tucuif tóco ndihi xoo ñundáhyi viti. <sup>6</sup> Ta xihín tucuif najánaá a sahá ñayivi ñuyíví sanahá tá nájácuun mé á javí quini. <sup>7</sup> Joo indíví xihín ñuyíví ña fin viti yóho, ndúu a ndáti a xíni quivi chicaan ñuhu Ndióxi ña já ná ndihi sahá. Cája Ndióxi ña yóho já ná ndoho ini ñayivi quini cán ta jándahi a sahá ná quivi caja vií Ndióxi sahá ñayivi quini cán.

<sup>8</sup> Ta viti candehé ndo, ñani maní i. In quivi cíú á tátuhun in mil cuia nuú Ndióxi ta in mil cuia cíú á tátuhun in quivi nuú Ndióxi. A ndíndójó ndó ña yóho. <sup>9</sup> A cahán ndo ña cacusahí Jesús jáxínu coo a nuú tuhun a tá nacachi a ña quixi tucu a tá quiahva cahán java na. Joo a ñahá quixi Jesucristo jáchí táchí ndivahá ini mé á sahá ñayivi. Ta co cíni mé á ña ná cuhun ni in tuhún na indayahndihi sahá ná. Ña cíni mé á quéa ná ndicó coo ini na ña ná jándacoo na cuachi cája.

<sup>10</sup> Mé quivi coó cahán na quixi Jesucristo já quixi mé á. Tá quiahva cája taa cuihiná tá xíni coo da ñuu ta ni in na co xíni na ña xíni da cája cuihiná da ñaha na quiahva já coo nuú quixi ri Jesucristo va. Ta mé quivi cán in cuítí cuni joho ñayivi níhi ndivahá indíví ta já casahá ña nditaní a. Ta já cayi ñuyíví yóho xihín tóco ndihi ñaha fin nuú á. Ta já cayi ñaha ndúu nuú táchí indíví ta ndihi sahá tóco ndihi ñaha.

<sup>11</sup> Mé a ndaa vaxi quivi coo tóco ndihi ña yóho sahá ña cán quéa ndítahan nuú ndó caca vaha ndó íchi cuénta Ndióxi ta caja ndó ña cíni mé á xihín ndinuhi ini ndó. <sup>12</sup> Candati ndó xíni quivi quixi tucu Jesucristo ñuyíví yóho. Ta nducu ndéé ndo caja chúun ndó cuénta mé á já ná xíni yachi quivi cán. Tá ná xíni quivi cán já jándahi Ndióxi sahá indíví xihín ñuhu ita. Ta tóco ndihi ñuyíví jándutu mé á ña xihín ñuhu cayi. <sup>13</sup> Joo mí, yó cíú cuénta Jesús ndatái inga indíví saá xihín in ñuyíví saá jáchí násahen Ndióxi tuhun a nuú yo ña quiahva ña nuú yo. Ta cán tóco ndihi ñaha cacuu a

ñä vaha ta ndinuhu ñä ndaa coo cán.

<sup>14</sup> Nani i, quíhvì ndivaha ini i ndohó sahá ñä cán quéä cähän i ñä yóho xihin ndo. Nani cámání xínu quívi caja Ndióxi tóco ndihi ñä cán, ndítahan ndihi ini ndó caja ndó ñä vaha já quéä ná cuni Ndióxi ñä íin vaha ini ndó xihin mé á ta já ná cuni a ñä coó cuachi ndó. <sup>15</sup> Ta a ndíndójó ndo ñä ndatí yii Jesucristo quixi tucu a ñuyíví yóho jáchi táhvi ndivaha ini mé á saha yo ta cúní a jácacu a mí. Ta tá quiahva cahyí yehé nu ndo yóho quiahva já nacahyí ri ñani mání yo, da cíú Pablo carta nachindahá da nu ndo jáchí nacaja Ndióxi ñä ná candaä ini da cán ñä cúní mé á. <sup>16</sup> Nu tóco ndihi carta nacahyí Pablo nu ndo cähän da xihin ndo saha tóco ndihi ñä yóho. Java ñä yóho cíú á ñä yáncá ndivaha cándaa ini saha. Ta na co cándaa ini xihín na co cándeé vaha ini Ndióxi nacasahá ndíjama na ñä nacahyí da. Quiahva já cája na ndíjama na java ga ñä cáchí tuhun Ndióxi joo ndihi saha tóco ndihi na cán.

<sup>17</sup> Candehé ndo, ñani maní i. Saha ñä sa xíni vaha ndó saha tóco ndihi ñä nandicaní i nu ndo yóho, xíni ñúhú candaä vaha ndó mé ndó já ná a jándahvi ñayivi quini ndohó já ná a ndácava ndó nuú cuachi vatí cuahän vaha ndó íchi cuéntá Ndióxi viti. <sup>18</sup> Xíni ñúhú candaä vaha chágä ini ndó yo cíú Jesucristo, xitoho í jáchí mé á quéä jácacu mí. Ta xíni ñúhú candaä vaha chágä ini ndó ñä cája Ndióxi cuahá ñamani xohö. Cähnu ná cacuu Jesucristo andä ama cää quívi. Já ná coo.

## Carta nū cuítí nacahyí Juan nū nā cūú cuéntá Jesús

*Cáxi tūhun Juan nū yayivi sahá Jesucristo*

<sup>1</sup> Cáhyí nde carta yóho nū ndó sahá Jesucristo, mé á nasañin janda tá cámání cava sahá sahá ñuyíví. Mé nde naxini joho nde nā nacahán mé á ta chí naxini xihín nūndé mé á. Nasañehé nde a ta nacani ndaa ndahá nde a. Cahan nde sahá Jesucristo mé á cūú tūhun Ndióxi, nā caja nā catacu ñayivi andá ama cás quivi. <sup>2</sup> Najañaha mé á nū ñayivi ta mé nde naxini nde a sahá nā cán quéa cáxi tūhun nde nū ñayivi sahá mé á. Ta ndicani nde nū mé ndó viti sahá Jesucristo, mé á sa jandá ama cás quivi ín a xihín Ndióxi, tátá a ta co ndíhi toho sahá. Viti naquixi a najañaha mé á nū yo. <sup>3</sup> Ta cáxi tūhun nde nū ndó nā naxini nde xihín nā naxini joho nde já ná cuu in canduu ndó xihín mé nde. Jáchí in nanduu yó xihín Ndióxi, tátá yo ta xihín Jesucristo, mé a cūú in tūhún jini já jahyi Ndióxi. <sup>4</sup> Ta cáhyí nde nā yóho nū ndó já ná ndicutú ndaá ínimá yo xihín nā cajii íní yo.

*Jándiyehé ndaa Ndióxi nū ín a*

<sup>5</sup> Nā najañaha Jesucristo nūndé nūndó cūú á nā janañaha nde nūndó viti: Jándiyehé ndaa Ndióxi nū ín a ta ni loho nā naá co ín nū ín mé á. <sup>6</sup> Tá nā cachí yó nā in nanduu xihín Jesucristo nani caja í cuachi já quéa cūú á tātuhun ndúu yii yó nūnaá jáchí cátuhún yo ta co caja í nā ndaá. <sup>7</sup> Joo tá ndúu yó nū yéhe tá quiahva ín Ndióxi nū nā yéhe já quéa in nduu ndihí. Ta Jesucristo, mé a cūú in tūhún jini já jahyi Ndióxi jándoo ndihí a cuachi jáchí naxitá nii á sahá yo tá naxihí a ndica críxu.

<sup>8</sup> Ta tá ná cachí yó nā coó toho cuachi caja í já quéa jándahíví mé ví ta co ndácaan nā ndaá íní. <sup>9</sup> Joo tá ná nahma yó cuachi nū Ndióxi já quéa cuu candeé íní nā caja ndaá Ndióxi xihín yo jáchí caja cahnu ini a sahá cuachi ta ndaja ví a mí nū tóco ndihí nā nūu. <sup>10</sup> Joo tá ná cachí nā ni in tūhún toho cuachi coó nacaja í já quéa ndája tūhún yo Ndióxi ta xihín nā yóho nāha nā mé a ndaa tātuhun yahyi coó nandiquehe vaha í tuhun vaha cahán sahá mé á.

*Jesucristo quéa cahán cuachi a sahá yó nū Ndióxi*

<sup>1</sup> Candehé ndó. Mé ndó cūú ndó tātuhun jahyi válí i ta cáhyí i nā yóho nū ndo nā a caja ndó cuachi. Ta vatí ná caja ndó cuachi joo ín Jesucristo cahán cuachi a sahá yó nū Ndióxi, tátá a. Ta caja mé á nā ndaa cuití va. <sup>2</sup> Jáchí nachahvi Jesucristo sahá cuachi tá naxihí a ndica críxu. Já quéa xihín nā yóho cuu caja cahnu ini Ndióxi sahá cuachi. Ta a juú sahá cuachi mé cuití yo, vaha jáchí naxihí rí a sahá cuachi ndaja tāhan nā ndúu ñuyíví.

<sup>3</sup> Jáchí tá caja í nā sáhndá Ndióxi já quéa náhá nā mé a ndaa tātuhun xini yo mé á. <sup>4</sup> Joo tá cahí in na nā xini nā Ndióxi nani co caja na nā sáhndá mé a já quéa cūú ná na tuhún ta co ndácaan nā ndaa ini na. <sup>5</sup> Joo nā caja nā sáhndá Ndióxi, náhá nā mé a ndaa tātuhun xihíví ini na mé á ta xihín nā yóho cándaa ini yó nā in nanduu na xihín Ndióxi, xini nūhú caja na tá quiahva nacaja Jesucristo tá nasañin a ñuyíví yóho.

*Sáhndá Ndióxi chuun nā nā quihví ini tāhan í*

<sup>7</sup> Candehé ndó nāni i, nā cūú cuéntá Jesús. Co cáhyí i nū ndó in chuun saá nā nasañha Ndióxi caja ndó. Cūú á mé chuun natahndá nū ndó caja ndó janda mé sahá tā nandihivi ndó ichí cuéntá Jesús. Ta cūú á nā sa naxini joho ndó andá mé cán. <sup>8</sup> Joo mé a ndaa nā cáhyí i yóho cūú á chuun saá jáchí sáhndá Ndióxi nā nā quihví ini tāhan i. Ta tá caja í nā sáhndá Ndióxi já quéa quée ndihí nā naá cuahan ta mé a ndaa jándiyehé Jesucristo ínimá yo jáchí quihví ini tāhan í tá quiahva nacaja mé á.

<sup>9</sup> Ta ndá nā ná cachí nā sa nandiyehé ínimá nā nacaja Jesucristo nani cándají na nāni na, nā cūú cuéntá Jesús já quéa cūní cachí a nā ndúu yii nā nūnaá ndivaha. <sup>10</sup> Ta ndá nā quihví ndusa ini nāni na já quéa cūní cachí a nā mé a ndaa jándiyehé Jesucristo ínimá nā ta ni in nāha a cūú caja nā nā ndacava na nūu cuachi. <sup>11</sup> Joo ndá nā cándají nāni na já quéa ndúu na nūu naá ta xíca na nūu naá yáve. Ta ni co ximí nā ndachí xíca na jáchí cūú ná tātuhun nā cuaá jáchí ndúu na nūu naá.

<sup>12</sup> Mé ndó cūú ndó tātuhun jahyi i ta cáhyí i carta yóho nū ndo jáchí sahá nā

nácaja Jesucristo nácaja cáhnu ini Ndióxi sahá cuachí.<sup>13</sup> Ta cáhyí i carta yóho nu ndó, nátaa, ná cíú tátá jáchí nacandaa ini ndó sahá Jesucristo, mé a sa íin janda tá nácava sahá sahá ñuyíví. Ta cáhyí rí carta yóho nu ndó, taa yúta jáchí nacandeé ndó násahnu ndó nuú tiñáhá sacuáha.

Candehé ndo. Mé ndó cíú ndó tátuhun jahyi i ta cáhyí i carta yóho nu ndó jáchí nacandaa ini ndó yo cíú Ndióxi, tátá yo.

<sup>14</sup> Ta cáhyí rí carta yóho nu ndó, ná cíú tátá jáchí nacandaa ini ndó sahá Jesucristo, mé a sa íin janda tá nácava sahá sahá ñuyíví. Ta cáhyí rí carta yóho nu ndó, taa yúta jáchí sáhan ndee iní ndó ta ndácaan tuhun Ndióxi ini íníma ndó ta nacandeé ndó násahnu ndó nuú tiñáhá sacuáha.

<sup>15</sup> Ta coto a cátóó ndó ña cíú cuéntá ñuyíví yóho ta ni a ndiává ini ndó cacomí ndó ña ndúu ñuyíví yóho. Jáchí ndá na cíú ñaha ñuyíví yóho já quéa cíni cachí a ña co cíni na Ndióxi, tátá yo. <sup>16</sup> Jáchí ni in ña náu ndúu ñuyíví yóho coó vaxi a cuéntá Ndióxi, tátá yo. Ta ña yóho cíú a ña a váha toho cáhvi ini ñayivi caja na ta jári ndiává ini na cacomí na ña xíní na xihín nuú ná ta jári ndíñehe jíco ndiváha na mé ná sahá ña cómí na. Ndiójá ña yóho cíú á ña náu quívi mé ñuyíví yóho. <sup>17</sup> Vaxi quívi ndihi sahá tóco ndihi ña ndiává ini ñayivi ta janda mé ñuyíví yóho ndihi sahá joo ndá na caja ña sahndá Ndióxi, na cán cíú na catacu nuú íin mé a andá ama cása quívi.

#### Na co cíni táchan xihín Jesucristo

<sup>18</sup> Candehé ndo jáchí cíú ndó tátuhun jahyi i. Jalóho cíni ndihi sahá ñuyíví ta sa xíní joho ndó sahá in da vaxi caja ihví xihín Jesucristo. Ta mé tiempo yóho sa naqueta cuahá na co cíni táchan xihín mé á. Sahá ña yóho sa cándaa ini yó ña sa nacayati quívi ndihi sahá ñuyíví yóho. <sup>19</sup> Mé na co cíni táchan xihín Jesucristo yóho násaníhu na tañú mí. Joo a juú toho na cuéntá mí násacuu na. Jáchí tá ná cacuu na cuéntá mí já canduu na tañú mí, nduu. Joo naqueta na cuahá na já ná sahá ña mé a ndaa co cíú ná cuéntá mí.

<sup>20</sup> Joo nu mé ndó násahan Jesucristo íníma yíi mé a sahá ña cán quéa tóco ndihi ndó cíú ndó ñayivi xíní ña ndaa. <sup>21</sup> Tá cáhyí i carta yóho nu ndó, co cíú á sahá ña co xíní ndó ña ndaa. Joo cíú á sahá ña sa xíní ndó

ñá ndaa ta sa xíní ndó ña ni in túhún ña túhún a cíú quixi tañú ña ndaa.

<sup>22</sup> Na túhún cíú ná ña co cíni ndicuni ña cíú Jesucristo mé á nachindahá Ndióxi jácaku a ñayivi. Mé na túhún yóho cíú ná ña co cíni táchan xihín Jesucristo jáchí co cíni na ndicuni na Ndióxi, tátá yo ta ni co cíni na ndicuni na Jesucristo, mé a cíú in túhún jíni já jahyi Ndióxi. <sup>23</sup> Jáchí ndá na chíjehé tuhun ña xíní na Jesucristo, jahyi Ndióxi já cíni cachí a ña coó in nanduu na xihín Ndióxi, tátá yo. Joo na cuahán xoo Jesucristo, jahyi Ndióxi in nanduu na xihín Ndióxi, tátá yo.

<sup>24</sup> Sahá ña cán quéa xíní ñúhú cacu vaha ndó tuhun Ndióxi ini íníma ndó, jáchí cíú á ña náxini joho ndó janda mé sahá tá nandiquehe ndó íchí cuéntá Jesús. Ta tá mé a ndaa ndícaan ña náxini joho ndó iní íníma ndó já quéa anda ama cása quívi in nduu ndó xihín Ndióxi, tátá yo ta in nduu ndó xihín Jesucristo, mé a cíú in túhún jíni já jahyi Ndióxi. <sup>25</sup> Ta násahan Jesucristo tuhun a nu yo ña catacú xihín mé a andá ama cása quívi.

<sup>26</sup> Cáhyí i ña yóho nu ndó já ná cándaa ini ndó sahá na cíni jándahvi ndohó. <sup>27</sup> Joo ndácaan íníma yíi Ndióxi ini ndó, mé a násahan Jesucristo nu ndó. Sahá ña cán quéa co xíní ñúhú toho ndó inga na jándahva na ndohó jáchí mé íníma yíi Ndióxi, ña ndácaan ini ndó jan jándahva tóco ndihi ñaha nu ndó. Ta ña jándahva mé a nu ndó cíú á ña ndaa ta co cíú á ña túhún. Sahá ña cán quéa xíní ñúhú catáhan tuun ndó xihín Jesucristo tá quíhvya sácaja ndó jáchí quíhvya já najándahva íníma yíi Ndióxi nu ndó.

<sup>28</sup> Candehé ndo jáchí cíú ndó tátuhun jahyi i. Xíní ñúhú catáhan tuun í xihín Jesucristo já ná cuu candeé iní mé a tá ná canáhva mé a quívi a ta já ná a cácahan nuú yo tá ná cuní mé á. <sup>29</sup> Mé ndó sa cándaa ini ndó ña caja Jesucristo ndinuhu ña ndaa cuití va. Ta tá caja mé ndó ña ndaa já quéa jándahva ndó ña mé a ndaa cíú ndó jáhysi Ndióxi.

xíní na Ndióxi sahá ña cán quéá co ndícuni na ña cíú yó jahyi mé á. <sup>2</sup> Candehé ndo, ñani máni, na cíú cuéntá Jesús. Sa cíú yó jahyi Ndióxi vatí viti ñúhú co cándaa iní ndá quiáhva nduu. Joo cándaa vaha iní ña tá ná quixi Jesucristo já nduu tá quiáhva cása mé á jáchí cúní mé á tárquiáhva cása tá iní. <sup>3</sup> Ta tóco ndihi na ndáti nduu na tárquiáhva cása mé á já quíeá ndaja víi na mé ná jáchí cúní na coo víi na tá quiáhva sín víi Jesucristo.

<sup>4</sup> Tóco ndihi na cája cuachi sáhnu na ny ley Ndióxi jáchí tóco ndihi ña níu cíú á cuachi ny ley Ndióxi. <sup>5</sup> Mé ndó sa cándaa iní ndó ña naquixi Jesucristo ñuyíví yóho ta naxihí a já ná cuu ndoo cuachi ñayivi. Ta coó ni in tühún toho cuachi mé á. <sup>6</sup> Sahá ña cán quíeá tóco ndihi na cátivi tuu xihín mé á co xíca nuu ga na cája na cuachi. Joo na xíca cája cuachi jánahá na ña co xíni toho na mé á ta jánahá na ña co cíú na cuéntá mé á. <sup>7</sup> Candehé ndó jáchí cíú ndó tátuhun jahyi i. Cuéntá coo ndó ná a jándahvi ni in na ndohó. Jáchí ñayivi ndaa cája ndaa na tá quiáhva cája Jesucristo. <sup>8</sup> Joo na xíca nuu cája cuachi cíú na cuéntá tiñahá sacuahá jáchí janda mé saha nacaja rí cuachi. Sahá ña cán quíeá naxínu Jesucristo ñuyíví yóho, mé á cíú in tühún jini já jahyi Ndióxi ta naquixi a jándihi a sahá ña níu cája tiñahá sacuahá.

<sup>9</sup> Ni in tühún toho na cíú jahyi Ndióxi co xíca na cája na cuachi jáchí viti nanduu na tá quiáhva sín mé á. Ta co cúní ga na caca nuu na caja na cuachi jáchí cíú na jahyi Ndióxi. <sup>10</sup> A íhví toho ndicuní ndá na cíú jahyi Ndióxi ta ndá na cíú jahyi tiñahá sacuahá. Jáchí na co cája ña ndaa ta na co quíhví ini ñani táchan na cán cíú na jánahá ña co cíú na cuéntá Ndióxi.

#### Ndítahan ny yo quíhví ini táchan i

<sup>11</sup> Janda mé saha tá nandiquehe ndó íchi cuéntá Jesús já naxini joño ndó ña cächí tuhun Ndióxi ña ndítahan quíhví ini táchan i. <sup>12</sup> Co ndítahan cája i tá quiáhva nacaja Caín sanahá jáchí násacuu da cuéntá tiñahá sacuahá. Ta násahni dà ñani da jáchí mé Caín násacaja da ña níu cuití va ta nanducu da ña vaha cuití va násacaja ñani da.

<sup>13</sup> Candehé ndó, ñani mí i, na cíú cuéntá Jesús. A cátontó ndó tá cándají ñayivi ñuyíví ndohó. <sup>14</sup> Tá quíhví ini na cíú cuéntá Jesús já quíeá sa xíni yo sa najácacu mé á mí

ná a cíuhun toho i indayá joo cíuhun i coo í ny íin mé á indiví. Joo ndá na co quíhví ini ñani táchan na, cíú ná tátuhun in ndii. <sup>15</sup> Ta tóco ndihi na cándají ñani táchan cíú ná tátuhun in na sáhni ndii jáchí sáhni na ñani táchan na iní iníma na. Ta mé ndó sa cándaa iní ndó ña ni in na sáhni ndii co núná ny ná cíuhun na indiví catacu na anda ama cása quíhví. <sup>16</sup> Mé Jesucristo najánahá nu yo ndá quiáhva caja ndusa in na quíhví ini ñani táchan jáchí naxihí a saha yo. Quiáhva já ndítahan ri ny mí ví coo tiáhva i quíhví sahá ñani táchan i, na cíú cuéntá Jesús. <sup>17</sup> Joo tá in in na ta íin cuahá ndivahá ñaha nu ná ta co cúní na chindéé na na cíú cuéntá Jesús, na ndímaní ñaha nyu já quíeá a cuú cachi na ña quíhví ini na Ndióxi. <sup>18</sup> Mé ndó cíú ndó tátuhun jahyi i sahá ña cán quíeá cähán i xihín ndó ña xíni ñúhú jánahá yó xihín ña cája i ña quíhví ini ñani táchan i ta a juú xihín yuhú nyu uun í cuití va.

*Co ndítahan cayíhví yo Ndióxi tá cája i ña sáhndá a*

<sup>19</sup> Tá cája i ña ndaa, ña cúní Ndióxi já quíeá cándaa iní ña cíú yó cuéntá mé á ta íin vaha iní xihín mé á. <sup>20</sup> Ta vatí cähvi iní ña coó nacaja vaha i joo xíni vaha chágá Ndióxi á mé a ndaa nacaja níu i á coó a jáchí xíni mé á tóco ndihi ñaha. <sup>21</sup> Candehé ndó ñani máni, na cíú cuéntá Jesús. Tá xíni vaha i ña ndácaan ña vaha iníma yo já quíeá co yíhví toho i cähán i xihín á. <sup>22</sup> Ta mé Ndióxi quíeá quiáhva tóco ndihi ña xíca yó ny a jáchí mé a ndaa cája i ña sáhndá a ny yo ta cähí iní mé á xihín ña cája i. <sup>23</sup> Ta ña sáhndá Ndióxi ny yo cíú á ña ná candee iní Jesucristo, mé a cíú in tühún jini já jahyi mé á. Ta sáhndá a ny yo ña ná quíhví ini táchan i tá quiáhva nátañhanda chuun ny yó caja i. <sup>24</sup> Ta na cája ña sáhndá Ndióxi in nanduu na xihín mé á ta in nanduu mé á xihín ña. Ta sahá ña násacu Ndióxi iníma yíi mé á in in í sahá ña cán quíeá náha ña in nanduu yó xihín mé á.

#### 4

*Ínima yíi Ndióxi co ndíque táchan xihín ínima quíni ña ndácaan iní na co cúní táchan xihín Jesucristo*

<sup>1</sup> Candehé ndó, ñani mí i, na cíú cuéntá Jesús. A cándusa ndó tóco ndihi na cächí ña cíú ná cuéntá Ndióxi jáchí cuaha ná cíú ná na tühún. Ña xíni ñúhú caja ndó quíeá coto ndojó ndó na já ná cándaa iní ndó á mé a ndaa ndácaan iníma yíi Ndióxi iní na á coó

<sup>a.</sup> Jáchí cuahá ndiváha na tuhún nandicuita nuu na ñuyíví yóho jándahvi na ñayivi vatí cachí na cähán na cuéntá Ndióxi. <sup>2</sup> Xihín ña yóho cuu candaqini ndó ndá na cíú na ñúhu ínimá yii Ndióxi ini jáchí tóco ndihí na cándusa ña nanduu Jesucristo in ñayivi ñuyíví yóho na cán cíú na ñúhu ínimá yii Ndióxi ini. <sup>3</sup> Joo na co cándusa ña nanduu Jesucristo in ñayivi ñuyíví yóho, na cán cíú na na co ñúhu ínimá yii Ndióxi ini jáchí ña ndácaan ini na cán cíú ínimá quini, ña co cúní táhan xihín Jesucristo. Sa naxini joho ndó ña quixi tá quixi mé ínimá quini, ña co cúní táhan xihín Jesucristo ta sa íin a ñuyíví yóho viti.

<sup>4</sup> Candehé ndó jáchí cíú ndó tátuhun jahyi i ta cíú ndó cuéntá Ndióxi. Naçandeé ndó nasañnu ndó nuu na jánahá ña tuhún jan jáchí tóyí chágá ínimá yii Ndióxi ndácaan ínimá ndó a juú ga ínimá quini ndácaan ínimá ñayivi ñuyíví. <sup>5</sup> Mé na jan cíú na cuéntá ña núu ñuyíví yóho ta ñaha ñuyíví yóho cuití cähán na sahá. Ta ñayivi ñuyíví taa joho na ña cähán na. <sup>6</sup> Joo mí cíú yó cuéntá Ndióxi. Sahá ña cán quéa na cíú cuéntá Ndióxi xíni joho na ña cähán yo. Joo na co cíú cuéntá Ndióxi co xíni joho na ña cähán yo. Ta xihín ña yóho cuu ndicuní ndá na cíú na ndácaan ínimá yii Ndióxi ini ta ndá na cíú na ndácaan ínimá quini ini. Jáchí ña ndaa cíú ínimá yii Ndióxi ta ínimá quini cíú á ña tuhún.

#### Quíhví ini ndusa Ndióxi ñayivi

<sup>7</sup> Candehé ndo, ñani mání, na cíú cuéntá Jesús. Xíni ñúhu quíhví ini táhan í jáchí ña yóho quixi a cuéntá Ndióxi. Tóco ndihí na quíhví ini ñani táhan cíú na jahyi Ndióxi ta xíni na yo cíú Ndióxi. <sup>8</sup> Na co quíhví ini ñani táhan jánahá na ña co xíni na Ndióxi jáchí Ndióxi quéa sáhan nu yo ña ná quíhví ini táhan í. <sup>9</sup> Ta nachindahá Ndióxi Jesucristo, mé in tuhún jini já jahyi a ñuyíví yóho ña ná quivi a sahá yo já ná catacú anda amácaa quivi. Xihín ña yóho najánahá Ndióxi ndá quiahva quíhví ini a mí. <sup>10</sup> Candehé ndo ndá quiahva quíhví ini Ndióxi mí. A juú jihna ñúhu mí naquíhví ini Ndióxi jáchí jihna ñúhu ga Ndióxi naquíhví ini a mí. Ta nachindahá a Jesucristo, mé in tuhún jini já jahyi a ña ná chahvi mé Jesús sahá ndihí cuachí tá naxíhi a ndica críxu.

<sup>11</sup> Candehé ndo, ñani mání, na cíú cuéntá Jesús. Tá ta quiahva joho nacaja Ndióxi

sahá ña quíhví ini a mí já quéa ndítahan ri nu mí ví quíhví ini táhan í. <sup>12</sup> Ni in ñayivi coó naxini xihín nuu na Ndióxi. Joo ñúhu mé á iní tá quíhví ini táhan í. Ta xihín ña yóho jáxinu coo í ña quíhví ndusa iní ñani táhan í. <sup>13</sup> Ta sahá ña nasaçu Ndióxi ínimá yii mé á ini in in yó sahá ña cán quéa náha ña in nanduu xihín mé á ta in nanduu mé a xihín yo. <sup>14</sup> Ta mé nde naxini nde a xihín nuu nde ta cáxi tuhun nde xihín ndaja táhan ñayivi ña nachindahá Ndióxi, tátá yo Jesucristo, mé a cíú in tuhún jini já jahyi a ña ná jácacu a ndaja táhan na ndúu ñuyíví. <sup>15</sup> Ndá na cándusa ña cíú Jesucristo in tuhún jini já jahyi Ndióxi, na jan cíú na in nanduu xihín Ndióxi ta in nanduu Ndióxi xihín ná.

<sup>16</sup> Ta viti sa nacandaa iní ta cándusa í ña mé a ndaa quíhví ini Ndióxi mí. Ta ndá na quíhví ini Ndióxi já in nanduu na xihín Ndióxi ta in nanduu Ndióxi xihín ná. <sup>17</sup> Ta xihín ña yóho jáxinu coo í ña quíhví iní ñani táhan í xihín ndinuhu iní. Sahá ña cán quéa tá na xihín coo quivi caja víí Ndióxi sahá ñayivi já quéa a cácahan nuu yo tá candichí nu Ndióxi. Jáchí tá quiahva nasaçaja Jesucristo tá nasañhí a ñuyíví yóho quiahva já caja í viti. <sup>18</sup> Mé a ndaa quíhví ini Ndióxi mí ña cán quéa co yíhví toho í mé á. Jáchí tá ná cähán yo jándoho Ndióxi iní já quéa cayíhví yo mé á. Joo tá ná candaqí vaha iní ña mé a ndaa quíhví ndusa ini Ndióxi mí já quéa a cayíhví toho í mé á. Ña cán quéa tá yíhví yo mé á já quéa co xíni yo ña quíhví ndusa ini a mí.

<sup>19</sup> Quíhví iní Ndióxi jáchí jihna ñúhu ga mé á naquíhví ini a mí. <sup>20</sup> Joo tá íin in na ta cähí na quíhví ini na Ndióxi joo candaqí na ñani táhan na já quéa jánahá na ña cíú na na tuhún. Jáchí tá co quíhví ini na ñani táhan na, da sándehe na xihín nuu na ndaja caja na cachi na quíhví ini na Ndióxi, ña a cíú cuni tíví na. <sup>21</sup> Nasañhda Jesucristo chuun yóho nu yo: Ndá na quíhví ini Ndióxi já ndítahan nu ná quíhví ri iní na ñani táhan na viti.

#### 5

*Ndaja caja í quee vaha í xihín ña núu ndúu ñuyíví yóho*

<sup>1</sup> Tóco ndihí na cándusa ña cíú Jesús mé á nachindahá Ndióxi cacomí a cuéntá sahá ñayivi, na jan cíú ndusa jahyi Ndióxi. Ta ndá na quíhví ini Ndióxi, tátá yo, xíni ñúhu

quihví ri ini na tóco ndihí na cúú jahyi mé á.  
<sup>2</sup>Tá quihví iní Ndióxi ta tá cája í ña sáhndá mé á nu yó caja í, xihín ña yóho cándaa cáxi iní ña quihví iní na cúú jahyi Ndióxi. <sup>3</sup>Ta na cája ña sáhndá Ndióxi, na cán cúú na jánhá ña mé a ndaa táhyí quihví ini na mé á ta chuun sáhndá mé á nu yo co cúú á in ñaha ña a cúú candeé yó xihín. <sup>4</sup>Ta tóco ndihí na cúú ndusa jahyi Ndióxi candeé na sáhnu na nuú ña nuu ñuyíví yóho. Sáhá ña cán quéa tá candeé iní Jesucristo já quéa quee vaha í xihín ña nuu ndúu ñuyíví yóho. <sup>5</sup>Ndá na cándusa ña cúú Jesucristo in túhún jini já jahyi Ndióxi, na cán cúú na candeé sáhnu nuú ña nuu ndúu ñuyíví yóho.

*Sáhan ínima yii Ndióxi tuhun sahá Jesús ña cùú á in túhún jini já jahyi Ndióxi*

<sup>6</sup>Tá naquixí Jesucristo ñuyíví yóho já nacandúta mé á xihín ticuí. Ta jári naxita nii á tá naxihi a ndica crúxu sahá yo. Nacaja Jesucristo ndíví ña yóho: nacandúta xihín ticuí ta naxihi nii á tá naxihi a ndica crúxu. Ta mé ínima yii Ndióxi sáhan tuhun sahá ña yóho ta ña cáhan mé á cúú á ña ndaa. <sup>7</sup>Ndúu uni testigo indiví ta sáhan tuhun sahá Jesús ña cúú á in túhún jini já jahyi Ndióxi: In testigo cúú Ndióxi, tátá yo ta inga testigo cúú tuhun Ndióxi ta inga testigo cúú ínima yii Ndióxi. Ta in cíú ndíshuní a sáhan tuhun sahá Jesús. <sup>8</sup>Ta ndúu uní testigo ñuyíví yóho. Ta in testigo cúú á ínima yii Ndióxi ta inga testigo cúú á tá nacandúta Jesús ta testigo cahuní cúú á tá naxihi nii Jesús ndica crúxu. Ta ndíshuní testigo yóho sáhan tuhun a sahá Jesús ña cúú á in túhún jini já jahyi Ndióxi. <sup>9</sup>Ín tiáhva í cándusa í ña cáhan ñayivi xihín yo tá sáhan na tuhun sahá in ñaha. Ña cán quéa ama ná a cándusa í ña cáhan Ndióxi xihín yo jáchi ña cája mé á quéa sáhan tuhun sahá Jesucristo, jahyi a ta ña yóho cúú á ña ndíyahvi chágá a juú ga ña cáhan ñayivi. <sup>10</sup>Ta tá cándusa í ña cúú Jesucristo in túhún jini já jahyi Ndióxi já cúú á tátuhun ndiquehe vaha í ña cáhí mé á ini ínimá yo. Joo na co cándusa ña yóho ndája na ña ná nduu Ndióxi ña tuhún jáchi co cándusa na ña cáhan mé á sahá Jesucristo, jahyi a. <sup>11</sup>Ta tuhun sáhan Ndióxi cíú ña yóho: Nasáhan mé á ñamani catacú anda ama cúa quivi. Ta Jesucristo, jahyi mé á quéa cája ña ná catacú indiví anda ama cúa quivi. <sup>12</sup>Ta ndá na nandiquiahva mé

ndáha Jesucristo, mé á cúú in túhún jini já jahyi Ndióxi, na jan cúú na catacú na anda ama cúa quivi nu ín mé á. Joo ndá na coó naxeen ndíquiahva mé ndáha mé á a cíú catacú na anda ama cúa quivi xihín mé á.

*Cáhyí chágá Juan sahá ña ndítahan caja í*

<sup>13</sup>Cáhyí i ña yóho nu ndóhó, na candeé iní Jesucristo, jahyi Ndióxi já ná candaá iní ndó ña catacú ndó indiví anda ama cúa quivi.

<sup>14</sup>Ta co ylhí toho í xicá í nu mé á in ñaha, ña cúní a quiahva nu yo jáchi candaá cáxi iní ña xíni joho a nu cáhan yo. <sup>15</sup>Ta tá candaá iní ña xíni joho Ndióxi nu cáhan yo já quéa candeé iní ña quiahva tá quiahva mé á ña nu yó.

<sup>16</sup>Tá ná cuni ndó ñani ndó, na cúú cuéntá Jesús ta caja na cuachi ña cuu caja cahnu ini Ndióxi sahá já quéa ndítahan caca tähví ndó nu Ndióxi sahá na cán. Ta xihín ña yóho caja cahnu ini Ndióxi sahá na jan já ná catacú na anda ama cúa quivi. Joo ín cuachi ña cañeha ñahá cuhun indayá ta co ndítahan caca tähví yo nu Ndióxi sahá ña jan. <sup>17</sup>Tóco ndihí ña nuu cája í ñuyíví yóho cúú a cuachi nu Ndióxi joo cuahá ndivahá cuachi caja cahnu ini Ndióxi sahá.

<sup>18</sup>Ta candaá iní ña tóco ndihí na cúú jahyi Ndióxi co xíca ga na nuú cuachi jáchi ndáá Jesucristo mé ná, mé á cúú in túhún jini já jahyi Ndióxi já ná a cája tiñahá sacuahá ni in ña nuu xihín ná.

<sup>19</sup>Cándaá vaha iní ña cómí Ndióxi cuéntá sahá yo joo tóco ndihí ñayivi cuénta ñuyíví níhu na ndahá tiñahá sacuahá ta cómí rí cuénta sahá ná.

<sup>20</sup>Ta candaá cáxi iní ña naquixí Jesucristo, mé á cúú jahyi Ndióxi ta najándiyehé a xíni túni yo já quéa ná candaá iní ña cíú mé á ña ndaa. Ta viti in nanduú xihín mé á jáchi in nanduú xihín Jesucristo, mé á cúú ndusa Ndióxi ta cíú á ña cája ña ná catacú anda ama cúa quivi. <sup>21</sup>Candehé ndo. Mé ndó cíú ndó tátuhun jahyi i ña cán quéa cáhan i ña yóho xihín ndó. Coto a cája cahnu ndó ni in yoco ta ni a cája cahnu ndó ni in ñaha tá co cíú á Ndióxi. Já ná coo.

## Carta chí ivi nacahyí Juan nuú na cúú cuéntá Jesús

*Cáhan Ndióxi Juan xihín na cúú cuéntá Jesús*

<sup>1</sup>Yehé cúú u in dā sacuahá ta cáhyí i carta yóho nu ndóhó, quiahvá i na cúú cuéntá Jesús jáchí nacaxí Ndióxi ndohó. Tá jári cáhyí i carta yóho nuú jahyi ndó jáchí mé a ndaa quíhví ndivaha ini i ndihí ndó. Ta a juú yehé cuití va jáchí tóco ndihí na nacandaa ini ña ndaa quíhví ini na ndohó. <sup>2</sup>Quíhví ini i ndohó jáchí ndácaan ña ndaa ini ínima ndihí ta anda ama cása quívi coo a xihín yó.

<sup>3</sup>Ña cúní quéa ña ná caja Ndióxi, tátá yo xihín Jesucristo, jahyi mé á cuahá ñamani xihín yo. Ta ná tähndä ini mé á saha yó ta ná caja mé á ña ná coo vaha iní. Ta cuu caja mé á ña yóho jáchí cúú á ña ndaa ta quíhví ini a mí.

<sup>4</sup>Cájii ndivaha ini i jáchí nanditahan i java jahyi ndó ta caja na ña ndaa tá quiahva nasaahnda Ndióxi, tátá yo caja í. <sup>5</sup>Candehé ndó quiahvá i, na cúú cuéntá Jesús. Xícä tähví i nu ndó ña ná quíhví ini tähán í. Ta ña cáhyí i yóho co cúú á chuun saá jáchí cíú á ña sa naxini joho í janda mé saha tá nandiquehé íchí cuéntá Jesús. <sup>6</sup>Tá tá mé a ndaa quíhví iní Ndióxi náha ña mé a ndaa caja í ña sáhndá Ndióxi caja í. Ta ña nasaahnda Ndióxi caja í janda mé saha cíú á ña ná quíhví ini tähán í.

*Na xíca nuu jándahvi na cúú cuéntá Jesús*

<sup>7</sup>Níi cíú ñuyíví nändicuítä cuahá na xíca nuu jándahvi na ná cúú cuéntá Jesús. Ta ná cán co cúní na ndicuni na ña nanduu Jesucristo in ñayivi ñuyíví yóho. Ta ná cán cíú ná ná tuhún ta cíú ná ña co cúní tähán xihín Jesucristo. <sup>8</sup>Cuéntá coo ndó ná a jándahvi na ndohó já ná a tíví chuun nacaja ndó sahá Jesucristo. Xiní ñúlhú jáxínu coo ndó chuun caja ndó cuéntá mé a já ná cuu quiahva mé á tóco ndihí ña ndítahan nu ndó ndiquehe ndó sahá mé chuun nacaja ndó.

<sup>9</sup>Ta ndá ná quéta xoo nuú ña najánahá Jesucristo ta co xíca ndacú na íchí cuéntá mé á, na cán náha ña coó in nanduu na xihín Ndióxi. Joo ndá ná xíca na caja na ña najánahá Jesucristo, na cán cíú na in nanduu xihín Ndióxi, tátá yo ta in nanduu

na xihín Jesucristo, jáhyi mé á. <sup>10</sup>Ta ndá na vaxi nu ndó ta co jánahá na ña najánahá Jesucristo nu ndó já quéa a ndíquehe ndó na cán vehe ndó ta ni a cáhan Ndióxi ndó xihín ná. <sup>11</sup>Jáchí tá ná jáyahá ndó na cán vehe ndó já quéa in nanduu ri mé ndó xihín na ta cátáhan ndó xihín ña ná cuána na.

*Ndíndayí Juan na cúú cuéntá Jesús*

<sup>12</sup>Ím cuahá ndivaha ñahá cúní cahán i xihín ndó joo co cúní cáhyí i ña nu ndó. Jáchí ña cúní quéa saa i coto nihni i ndohó já ná cuu ndituhún yo ña ná cavatá ndivaha ini ndihí.

<sup>13</sup>Ta ná cíú jahyi quíhví ndó chíndahá na Ndióxi coo ndó jáchí mé ña cíú ña ná nacaxí Ndióxi viti. Já ná coo.

## Carta chí uni nacahyí Juan nuú na cíuú cuéntá Jesús

*Cáhgan Ndióxi Juan xihín in da naní Gayo*

<sup>1</sup> Yéhe cíuú u in da sacuahá ta cáhyí i carta yóho nu mún ñani máni, da naní Gayo. Ta mé a ndaa quíhví ndusa iní i yohó.

<sup>2</sup> Candehé, ñani máni, da cíuú cuéntá Jesús. Xíca tähví i nu Ndióxi ña ná quiáhva mé á tá nuú ña vaha nuun. Ta ná caja mé á ña ná a quíhvun ta já coo vaha inún tá quiáhva inú vaha inún xihín Ndióxi. <sup>3</sup> A juú quiáhva ná cajíi iní i tá naquixi java na cíuú cuéntá Jesús yóho ta nandicaní na nuú i ña co caxoún nuú ña ndaa jáchi caja tá cajún ña. <sup>4</sup> A juú quiáhva cajíi iní i ta ñehé e tuhun ña xíca ndó íchí cuéntá ña ndaa jáchi mé ndó cíuú ndó tátuhun jahyi i.

<sup>5</sup> Candehé, ñani máni. Vaha ndivaha cajún jáchi xihín ndinuhu inún chíndeún na cíuú cuéntá Jesús tá saa na jan vatí cíuú ná na quíxi ñuu tóho. <sup>6</sup> Ta nu tóco ndihi na tacá veñihu yóho ndicani mé na tóho ndá quiáhva quíhví ndivaha inún na. Ña cán quéa xíca i ñamani nu yóho, Gayo ña ná chindeún na tá na saa tucu na cán ta ná quiáhvun ña ndímaní nu ná cañehe na íchí cuhun na jáchi ña yóho cíuú á ña cajíi iní Ndióxi xihín. <sup>7</sup> Ndítahan chindeún na jáchi naqueta na xíca nuu na caja na chuun cuéntá Jesucristo ta co cúní na caca na ñaha catacu na nuú na co cíuú cuéntá Jesús. <sup>8</sup> Sahá ña cán quéa ndítahan nu mí, na cíuú cuéntá Jesús chindeé yó na cán xihín ña ndímaní nu ná. Ta xihín ña yóho in nduu yó xihín ná tá cahán na ña ndaa xihín ñayivi.

*Cuachí caja in da naní Diótrefes*

<sup>9</sup> Sa nachindahá i in carta nu tóco ndihi na cíuú cuéntá Jesús ndúu jan joo Diótrefes coó naxeen da cándusa da ña cáchi nde. Jáchi caja cáhnu da mé dá ta cúní dä cacuu da jini nu tóco ndihi na cíuú cuéntá Jesús ndúu jan. <sup>10</sup> Sahá ña cán quéa tá ná saa i jan caxi tuhun i nuun sahá ña caja da jáchi xíca nuu da cahán ndivaha da ña tuhún sahá nde. Ta a juú ña yóho cuití caja da, vaha jáchi ni co cúní dä ndiquehe da ná cíuú cuéntá Jesús xínu coo jan. Ta sájí nuu da nuú na cúní ndiquehe vaha ñahá ta jandá táxí da na veñihu.

<sup>11</sup> Candehé, ñani máni. A cajún ña nuú tá quiáhva caja Diótrefes jan. Xíni ñuhú cajún ndinuhu ña vaha jáchi dä caja ña vaha cíuú dä cuéntá Ndióxi joo dä caja quini co xíni dä Ndióxi.

*Ña vaha caja Demetrio*

<sup>12</sup> Joo tóco ndihi na cíuú cuéntá Jesús cahán vaha na sahá dä naní Demetrio jáchi ña ndaa cuití va caja da. Ta quiáhva já cahán vaha ri ndehe va sahá dä ta cándaa inún ña cahán nde ña ndaa.

*Ndíndayí Juan Gayo*

<sup>13</sup> Mé a ndaa ín cuahá ndivaha ñaha cíni cahán i xuhun joo co cúní cáhyí i ña nuú tutu yóho <sup>14</sup> jáchi cúní cuni yachí i yohó já ná ndituhún yúhu mí i xuhun.

<sup>15</sup> Ña xíca i nu Ndióxi quéa ná caja mé á ña ná coo vaha inún. Na cíuú cuéntá Jesús ndúu yóho chindahá na Ndióxi coún. Ta cajún ñamani cahán Ndióxi lohún xihín in in na cíuú cuéntá Jesús ndúu jan.

## Carta nacahyí Judas nuú na cúcú cuéntá Jesús

*Cáhyí Judas carta nuú na nacaxi Ndióxi  
cacuu na cuéntá mé á*

<sup>1</sup> Yehé cúcú Judas, dā cája chūun cuéntá Jesucristo ta cúcú yá nani Jacobo. Cáhyí i carta yóho nu ndohó jáchi cúcú ndó na nacana Ndióxi, tátá yo. Cúcú ndó na quíhví ini mé á ta cúcú ndó na ndáá Jesucristo jáchi in nanduu ndó xihín mé á. <sup>2</sup> Na xíca tahví i nu Ndióxi quéa ña ná tahndá ndivaha ini mé á sahá ndo. Ta ná caja mé á ña ná coo vaha ndivaha ini ndó. Ta ná chutú ndaá ini ndó xihín ña quíhví ini a ndghó.

*Cáhyí Judas sahá na jánahá ña tuyhún  
(2 Pedro 2:17)*

<sup>3</sup> Candéhé ndo, ñani mí i, na cúcú cuéntá Jesús. A juú quiahva naxinu ini i cáhyí i nu ndó sahá ndá quiahva najácacu Ndióxi ndihí. Joo viti ndíhi ini i cáhyí i carta yóho nu ndo ná caca tahví i nu ndo ña ná a jándacoo ndó ña cándéé ini ndó Jesucristo jáchi ña yóho cúcú á ña in tañu cuití va násahan Ndióxi nu yo, na cúcú cuéntá mé á. <sup>4</sup> Jáchí java ñayivi nandaja na mé ná tátuhun na cúcú cuéntá Jesús ta naquihvi nuu na tañu ndó jan. Mé ñayivi yóho cúcú ná na sa cähán tuyhun Ndióxi sahá janda jihna ndivaha ta cähí a ndítahan nu ná cuhun na indayá. Cúcú ná ñayivi quini jáchi jánahá na ña tá sa nacaja cähnu ini Ndióxi sahá cuachi na já cuu caja na tá nuú cuachi ña cúní mé ná. Ta xihín ña yóho náhá ña co xéen na candusa na Ndióxi, mé á cómí cuéntá sahá tóco ndihí ñáha. Ta jári náhá ña co cúcú ná cuéntá Jesucristo, xitoho í.

<sup>5</sup> Sa xíni ndo ña nandoho na Israel tá natavá Ndióxi na nündahyi Egípto sanahá. Ta viti jándicuhun ini i ndohó ña vatí natavá Ndióxi tóco ndihí na Israel cán Egípto joo tá nandihí najándihí a sahá ña coó naxeen candusa ñáhá. <sup>6</sup> Ta quiahva já nacaja ri mé á xihín na násacuu tátó mé á jáchi coó naxeen na caja na ña cúní Ndióxi ta najándacoo na nuú násanduu na. Sahá ña cán quéa nachicají Ndióxi na nu naá ndivaha nu ñúhu na andá ama cása quiví. Ta ndáti na cán xínu quiví caja ví mé á sahá ná. <sup>7</sup> Ta tá quiahva nacaja Ndióxi xihín

mé tátó cán quiahva já nacaja ri a xihín ñayivi ñuu Sodoma xihín na ñuu Gomorra ta xihín na nanduu ñuu ñéhe táchan xihín ndíví ñuu yóho. Najándihí Ndióxi sahá ná jáchi nandiquiaghva na yíquí cuñu na ña ná caja na tá nuú cuachi. Ta ndaja táchan mé taa nacaja cuachi xihín táchan da. Sahá ña cán quéa najácuyu Ndióxi ñúhu cayí jata ná. Ta quiahva já ndoho na andá ama cása quiví. Ta xihín ña yóho jánahá Ndióxi nu yo ña quiahva já cuu ndoho ri mé ví tá co caja í ña cúní mé á.

<sup>8</sup> Tá quiahva nacaja ñayivi sanahá quiahva já cája ri na jándahvi ndohó viti. Jáchí cúcú ná ñayivi quini, na cája cuachi ta tá xíní na cája na in cuachi já cuahán na cája ná ña. Mé ña cán cája na ña núu xihín yíquí cuñu na ta quéhe núu na Ndióxi jáchi co quéhe na cuéntá nu cáhan mé á xihín ná ta co yíhví na cánahá na xihín tátó Ndióxi indíví, mé á fin ndéé cája cuahá ñáha. <sup>9</sup> Ta janda mé á cúcú sacuaha nu tóco ndihí tátó Ndióxi ñani a Miguel ni coó nacanahá a xihín tiñahá sacuaha. Ta ni co naxeen a cahan núu a xihín rí tá nacani táchan mé á xihín sahá yíquí cuñu Moisés. Ña nacachi a xihín rí quéa: "Ndióxi ná jánani a yóhó", nacachi a xihín rí. <sup>10</sup> Joo ñayivi quini, na xíca jándahvi na cúcú cuéntá Jesús yóho, co yíhví na cánahá na xihín ña co cándaa ini na sahá. Joo cája na ña xíca ini yíquí cuñu jáchi cúcú ná tátuhun quítí, rí co xíní túní ta ña núu cája na yóho jándihí a sahá ná.

<sup>11</sup> Ndáhví ndivaha nacuu na jan jáchi cája na tá quiahva nacaja Caín, da nasañí ñani sanahá ndivaha. Ta játá jiuhún cuití va cája na ñáha tá quiahva nacaja Balaam sanahá. Ta cája ri na tá quiahva nacaja Coré sanahá tá nandiñehé yúhu dá nu Ndióxi. Ta sahá ña yóho ndihí sahá ná. <sup>12</sup> Jáchí na jándahvi ndohó jan jácacahan na nuu ndo tá táchá ndo xíxi ndó xihín java na cúcú cuéntá Jesús. Jáchí yáha ndivaha ña xíxi na jan ta coó toní ñúhu na xihín ña cája na. Ta sahá mé cuití va na ndihí ini na. Cúcú ná tátuhun víco núhu, ña xíca nuu cája táchí ña co ndójo javí. Ta cúcú ná tátuhun yíto cuihi, do co cún ñáha nuu tá ndítahan cuum cuihi nu do. Cúcú ná tátuhun yíto, do natuhun na janda yóho dó jáchi coó nacuu cuihi nu do. Ta cúcú ná tátuhun na nandihí sahá chí in ndeé. <sup>13</sup> Ña cája na jan cúcú á tátuhun yáco cándoo nuu chíquíñu tañuhú tá ndícojo do

jáchi ñä cácahan nuu yo cùú ñä cája na jan. Cúú ná tátuhun quimi, rí najana ta co ndíñehé rí nuú ñasahijin rí. Ta sahá ñä cája na cañuhu na nuú naá ndiváha andá ama cáa quivi caja Ndióxi.

<sup>14</sup> Ta janda sanahá da naní Enoc, da ñasacuu da usa nyú chichi Adán najáyahá da tuhun nácahan Ndióxi sahá ñä ná cája na jándahvi ndghó cán. Ta já nácachi da já: “Candehé ndó. Sa växi Jesucristo, xitoho í xihín cuahá mil tátó *yii* mé á <sup>15</sup> ñä ná caja vií a sahá tóco ndihí na ndíu ñuyíví. Ta jándoho a ini tóco ndihí ñayivi sahá ndihí ñä ná nácaja na. Ta quiahva já jándoho a ini na sahá tóco ndihí tuhun ihví nácahan na sahá mé á”, nácachi Enoc sahá ná. <sup>16</sup> Mé ñayivi quini yóho ni in ñaha co táchán ini na xihín ta cáhan nána na sahá tóco ndihí ñaha. Ta níti tiempo cája na ñä xíca yiquí cuñu na cuití va. Ta ndíñehé jícó ndiváha na mé ná tá cáhan na nuú ñayivi. Ta cáhan vaha na sahá ñayivi ñä ná nuná nuu ná jándahvi ñahá na.

*Jácahan Judas na cùú cuéntá Jesús ñä ná  
candeé cähnu ini na Ndióxi*

<sup>17</sup> Candehé ndó, ñani máni, na cùú cuéntá Jesús. Xíní ñúhú ndicuhún ini ndó ñä nácahi na apóstol cuéntá Jesucristo, xitoho í xihín ndó sanahá. <sup>18</sup> Mé na cán nácahi na xihín ndó já: “Tá ná cayati quivi ndihí sahá ñuyíví yóho já quéra cacu nuu ñayivi cuacu ndaa na Ndióxi. Ta caja na tá nuú ñä nánu ñä xíca ini mé ná caja na”, nácachi na cán. <sup>19</sup> Mé ñayivi quini yóho cùú ná na xíca sáhndá java táchán na cùú cuéntá Jesús. Ta cája na ñä nánu ñä cáhví ini na caja na ta co ndácaan íníma *yii* Ndióxi ini na.

<sup>20</sup> Joo mé ndó, ñani máni, na cùú cuéntá Jesús xíní ñúhú coo ndacú ini ndó xihín ñä candeé ini ndó Jesús jáchi ñä jan cùú á ñä *yii* ndiváha. Ta xíní ñúhú cacaq tähví ndó nu Ndióxi xihín ndée ñä sáhan íníma *yii* mé á nu ndo. <sup>21</sup> A Cáxoo ndó nu Ndióxi jáchi quíhví ini a ndohó. Ta candati tähvá ndó xínu coo quivi caja Jesucristo, xitoho í ñä ná catacú andá ama cáa quivi jáchi mé a ndaa tähví ini a sahá yo.

<sup>22</sup> Ta ndítahan candáhví ini ndó ndá na cáhví *yii* joho ini sahá Jesús. <sup>23</sup> Já quéra jácacu Ndióxi na ñä ná a cùhun toho na indayá. Xíní ñúhú candáhví ini ndó na. Joo cuéntá coo ndó xihín ná já ná a cásahá ndo

caja ndó cuachi tá quiahva cája mé ná jáchi ñä cán cuu jácaquini na ndohó.

*Cája cähnu Judas Ndióxi*

<sup>24</sup> Mé Ndióxi quéra íin tóco ndihí ndée chíndeé a mí ñä ná a ndácava í nuú cuachi já ná cuu coo vií yo tá ná xínu coo í nuú íin mé á. Ta caja mé á ñä ná chutú ndaa yo xihín ñä cajíi iní tá ná xínu coo í nuú íin mé á ta a juú quiahva ndató cáa cán. <sup>25</sup> In túhún jini mé á cùú Ndióxi, mé á jácacu mí sahá ñä nácaja Jesucristo, xitoho í. Cóho caja cähnu í Ndióxi jáchi yéhe ndiváha mé á ta cähnu ndiváha cùú á ta íin cuahá ndée á ta mé á quéra cómí cuéntá sahá tóco ndihí ñaha. Cähnu cùú mé á vitti ta andá sahá ta andá ama cáa quivi cähnu cùú mé á. Já ná coo.

## Ña najánahá Jesucristo nü Juan

Tá nanahá Jesucristo mé á nü Juan

<sup>1</sup> Ña yóho cíú ña nanahá Ndióxi nüú Jesucristo ña ná cuu jánahá mé á ña nüú na cíú cuéntá mé á. Ta nachindahá Jesucristo in tátó mé á nüú yehé, dä cíú Juan, dä cája chúun cuéntá mé á já ná caxi tuhun tátó mé á xihín i ndá a quéa yaha chágá chí nüu. Ta cíú á ña sa cayati vaxi. <sup>2</sup> Ta ndícani ndaqa ndihi i sahá ña naxini i xihín nüú i ta nacahyí i tóco ndihi ña yóho. Ta nasañan Jesucristo tuhun a nüú i ña cíú á ña ndaa.

<sup>3</sup> Cajii ini ñayivi tá cahví na ña nacahyí i yóho ta cajii ini na xímí joho na ña yóho nani cahví inga na ña jáchí cíú á ña náquixi cuéntá Ndióxi. Cajii ini ñayivi tá cája na ña cahí a jáchí sa nacayati quíví coo tóco ndihi ña yóho.

Cahyí Juan ña yóho nü ndíhusa ñuu nu ndítaca na cíú cuéntá Jesús

<sup>4</sup> Yehé cíú Juan ta cahyí i carta yóho nüú ndíhusa ñuu nü ndíu na cíú cuéntá Jesús estado Asia. Ña cúní quéa ná caja cuahá Ndióxi ñamaní xihín ndó ta ná caja mé á ña ná coo vaha ini ndó. Mé Ndióxi ín a viti ta nasañan a janda tá cámání cava sahá sahá ñuyíví ta quixi a ñuyíví yóho. Ta cúní ña ná caja cuahá ínima yii Ndióxi ñamaní xihín ndó. Mé a cán cása tátuhun usa ínima yii ta ndíu na nü Ndióxi, mé nü ín coo a cómí a cuéntá sahá indívi cán. <sup>5</sup> Ta cúní ña ná caja cuahá Jesucristo ñamaní xihín ndó, mé á cahán ña ndaa sahá ña naxini a. Ta mé á nasañuu ña nü cuítí nqanditacu tañu na sa naxihí. Ta cómí a cuéntá saha tóco ndihi rey, na cómí cuéntá sahá ñayivi ñuyíví yóho. Ta quíhví ini Jesucristo mí ta najándoo a cuachí tá naxita nii á ndica crúxu. <sup>6</sup> Ta tóco ndihi mí, na cández ini mé á najándique táhan mé á mí já ná cacomí a cuéntá saha yo. Ta nqandaja mé á mí nanduú tátuhun jetu ña ná caja cahón yó Ndióxi, mé a cíú tátá Jesucristo. Cáhuu ná cacuu mé á andá ama cása quíví jáchí ín ndéé mé á caja tóco ndihi ñaha andá ama cása quíví. Já ná coo.

<sup>7</sup> Sa nacayati quíví quixi Jesucristo tañu vico. Ta tóco ndihi ñayivi cuni ñahá ta janda na nasañní ñahá cán cuni na a. Ta

tóco ndihi ñayivi ndíu ndijáá ñuu níí cíú sahá ñuyíví canduu cuéhá ndivaha ini na sahá mé á. Já ná coo.

<sup>8</sup> Ta já cahí Jesucristo, xitoho í sahá mé á: “Yehé cíú mé a nü cuítí ta yehé cíú mé a nü ndíhí jáchí janda tá cámání cava sahá sahá tóco ndihi ñaha sa ín va yehé ta coo tá coo i vatí ná ndihi sahá”, cahí a. Mé a cíú Ndióxi, ña ín ndée cája tóco ndihi ñaha. Ta mé á ín a viti ta nasañan a janda tá cámání cava sahá sahá ñuyíví ta quixi a ñuyíví yóho.

Náha Jesucristo nü Juan ndá quiqhva cahnu cíú mé á

<sup>9</sup> Yehé cíú Juan ta cíú u ñani ndó, na cíú cuéntá Jesús. Ta sahá ña cández ini i Jesús sahá ña cán quéa nañéhe táchí i xihín mé ndó cacomí Ndióxi cuéntá sahá ndihí. Ta coó caja toho ña ná ndoho iní ñuyíví yóho jáchí sahan Ndióxi tuhun ndée iní já ná cuu caja ndee iní tá ndóho iní. Nataava xóo na yehé ta nasañan ñehe na yehé isla naní Patmos sahá ña naxica nüu i naçahan i tuhun Ndióxi, ña cíú ña ndaa, ña najánahá Jesucristo nüú i. <sup>10</sup> Ta ndaja coo nandinda quíví coo ña nasañu ini Jesucristo, xitoho í ta mé tañu já nacchutú ndaa ínima i xihín ínima yii Ndióxi ta já naxini joho i cahán cóhó in a chí jatá i ta nasañuu a tátuhun tá tíví na trompeta. <sup>11</sup> Ta mé tuhun naxini joho i cán nacachi a já xihín i:

—Yehé cíú mé a nü cuítí ta yehé cíú mé a nü ndíhí jáchí janda tá cámání cava sahá sahá tóco ndihi ñaha sa ín va yehé ta coo tá coo i vatí ná ndihi sahá. Tóco ndihi ña ná cunún yóho xímí níuhú cahyún ña nüú in libro. Ta já chindahún ña nüú ndíhusa ñuu estado Asia nü ndíu na cíú cuéntá mí i. Chindahún ña nüú na ndíu ñuu Efeso xihín nüú na ndíu ñuu Esmirna xihín nüú na ndíu ñuu Pergamo xihín nüú na ndíu ñuu Tiatira xihín nüú na ndíu ñuu Sardis xihín nüú na ndíu ñuu Filadelfia xihín nüú na ndíu ñuu Laodicea viti —nacachi a xihín i.

<sup>12</sup> Tá naxini joho i ña yóho já nandicoto nihni jatá i sández e yo cahán xihín i. Ta já naxini i usa ña jiuhun cuáán nü sández ña túun. <sup>13</sup> Ta tañu ña cán naxini i in a cúní coo tá cúní coo ñayivi ta ndíxi a in jahma cání ña janda sahá xímí coo a xihín quíahva cání á. Ta naxini i ndácaqan in cinturón ña jiuhun cuáán tóco á ta cání a janda yati yicá ndícá a. <sup>14</sup> Ta ijí jini á cíú á ña yaa cachi

tátuhun yaa yucú yáhvá. Ta nduchú nútú a cíú á tátuhun núhu ita. <sup>15</sup> Ta tá quiáhva yéhe caa ña jándutu na ini horno quiáhva já yéhe sahá. Ta njihí ndiváha cahán mé á ta cíú á tátuhun tá xójo cíyu ticuí yuta tañu cáva. <sup>16</sup> Ta naxini i níhu usa quími ini ndahá cuáha mé á. Ta ini yúhu a naxini i quéta in yuchú cání ña jeen ndíví xoo yúhu. Ta naxini i yéhe ndiváha nuu á tá quiáhva yéhe candii caxíi ndaa.

<sup>17</sup> Tá naxini i mé á já nandicava i sahá tátuhun in ndii. Joo mé á náchimúu a ndahá cuáha jatá i já nacachi a já xihín i:

—A cayihví tohún. Yéhe cíú mé á nu cuítí ta cíú u mé a nu ndihí. <sup>18</sup> Tácú tá tacú va yéhe. Mé a ndaa násacuu u ndii joo viti tacú u ta catacu u anda ama cíaa quivi. Ta yéhe naquee vaha i tá nanditacu tucu u tañu ndii ta viti cómí i cuéntá sahá nu ndúu íníma na sa naxihi. <sup>19</sup> Xíni níhu cahyún ña naxinún. Ta xíni níhu cahyún sahá ña cíu viti ta já cahyún sahá ña coo chágá chí nuu. <sup>20</sup> Ña yóho quéa cíni cache ndíhusa quími naxinún níhu ini ndahá cuáha i xihín ndíhusa ña jiuhun cuáán nuu sándójó ña túun. Ndíhusa quími cán cíú rí yuhú nuu in in na cómí cuéntá sahá usa veñuhu nuu tícá na cíu cuéntá Jesús. Ta ndíhusa nuu sándójó ña túun cán cíú á yuhú nuu usa veñuhu. Ta ña yóho coó naxini ñayivi jáchí násacuu a ña jehé.

## 2

Ña nacachi Jesús xihín na cíu cuéntá mé á ndíu ñuu Efeso

<sup>1</sup> Cahyún in carta nuu da cómí cuéntá sahá na cíu cuéntá mí i ndíu ñuu Efeso. Ta ña cahyún cíu ña yóho: “Ña yóho cíu tuhun cahán Jesús, mé a níhu usa quími ini ndahá cuáha, mé a xíca nuu tañu usa ña jiuhun cuáán nuu sándójó ña túun. Ta ña yóho quéa cahán Jesús xihín ndó, na ñuu Efeso: <sup>2</sup> Sa cándaa ndihí ini i ndá quiáhva caja ndó. Cándaa vaha ini i ña ndíciú ndéé ndó caja chúun ndó cuéntá mí i. Ta co jándacoo ndó chuun caja ndó cuéntá mí i. Ta sa cándaa vaha ini i ña co ndéé ini ndó xihín ña caja ñayivi quini. Ta sa cándaa ini i ña sa naxito ndojó ndó na cahí cíu apóstol cuéntá Ndióxi joo co cíu toho na apóstol jáchí cíu ná na tuhun cuití va. <sup>3</sup> Ta sa cándaa caxí ini i ña co jándacoo ndó caja chúun ndó cuéntá mí i. Ta cuahá ndiváha

tañu ndóho ini ndó sahá i. Ta co cárna ndó xihín ña yóho. <sup>4</sup> Joo íin en ñaha cahán cuachí i nu ndó sahá: Ta ña cíni cahán i sahá cán quéa co cíni ga ndó yéhe tá quiáhva nacacúni ndó yéhe jándá mé sahá. <sup>5</sup> Ña cán quéa ndítahan ndicuhun ini ndó ndá quiáhva nacacúni ndó yéhe jihna. Ta ndítahan nu ndó ndicó coo ini ndó ta caja ndó tá quiáhva nacaja ndó janda mé sahá. Á tá coó ta xínu yachí i nu ndo ta tavá i ña cándójó, ña túun nu ndo. Caja i ña yóho xihín ndo tá ná a ndicó coo ini ndó. <sup>6</sup> Joo mé a ndaa cajíi ini i xihín ndo jáchí cándají ndó ña nútú caja na xíca cuéntá nicolaítas jan. Jáchí co táchán ri ini yéhe xihín ña nútú caja na jan. <sup>7</sup> Cuni joho vaha ndó, na vaha joho ña cahán íníma yii Ndióxi xihín na cíu cuéntá mí i, na tácá veñuhu: Ndá na ná quee vaha tañu tóco ndihí ña nútú ñuyíví yóho, na cán cíu na quiáhva i ñamani nuu caxí cuihi cíun nu yító, dó caja ña ná catacu ñayivi anda ama cíaa quivi. Mé yító cán cándichi dó nuu íin Ndióxi.”

*Carta cuahán nuu na cíu cuéntá Jesús  
ndíu ñuu Esmirna*

<sup>8</sup> Cahyún inga carta cuhun nuu da cómí cuéntá sahá na cíu cuéntá mí i ndíu ñuu Esmirna. Ta ña cahyún nuu ná cíu ña yóho: “Ña yóho quéa cahí Jesús, mé a cíu á nu cuítí ta cíu á nu ndihí, mé a sa naxihi ta já nanditacu tucu a. Ta já cahí a já xihín ndó, na ñuu Esmirna: <sup>9</sup> Sa xíni vaha i ndá quiáhva ndóho ini ndó. Ta xíni ndá quiáhva cándahví ndo. Joo mé a ndaa cíu ndó na cuicá nu Ndióxi. Ta sa xíni ndá quiáhva cahán nútú na sahá ndo jáchí cahí na cíu ná na Israel joo a juú na. Cíu ná in táchndá na caja cahnu Satanás, mé tiñahá sacuahá va. <sup>10</sup> A cayihví toho ndó sahá ña vaxi nu ndó ndoho ini ndó. Jáchí ñayivi quini, na cán cuéntá tiñahá sacuahá taán na java ndohó vecaa já coto ndojó na ndohó. Ta tixi uxu quivi ndoho ini ndó. Ta xíni níhu cández té cández ini ndó yéhe vatí na cahní na ndohó ta já ná caja i ña ñehe táchví ndó catacu ndó anda ama cíaa quivi. <sup>11</sup> Cuni joho vaha ndó, na vaha joho ña cahán íníma yii Ndióxi xihín na cíu cuéntá mí i, na tácá veñuhu: Ndá na ná quee vaha nu tóco ndihí ña nútú ñuyíví yóho, na cán cíu na a cíhun toho na ndoho ini na indayá. Jáchí tá ndóho ini ñayivi indayá cíu á tátuhun xíhi na chí ivi.”

*Carta cuaghan nūú na cūú cuéntá Jesú  
ndúu ñuu Pérgamo*

<sup>12</sup> Cahyún inga carta cuhun nūú da cómí cuéntá sahá na cūú cuéntá mí i ndúu ñuu Pérgamo. Ta já cachún já nū carta jan: “Jesús, mé a ñehe yúchú cání ña jeen ndíví xoo yúhu cán quéa cáchí já: <sup>13</sup> Sa xíni vaha i ña fín ndó ñuu Pérgamo nū caja Satanás, mé tiñahá sacuaha ña cúní mé rí xihín ñayivi. Joo xihín ndinuhu ini ndó caja ndó ña táchán ini i xihín. Ta coó najándacoo ndó ña cándezini ndó yehe vatí naxini ndó ndá quiahva nacaja na xihín Antíspas, mé dā nacándezi cahnu ini yehe cán. Jáchí nasañní na da mé ñuu jan nū cómí Satanás, mé tiñahá sacuaha cuéntá sahá ñayivi. <sup>14</sup> Joo fín in ñaha cahán cuachi i nū ndó saha. Jáchí sáhan ndó ñamani nūú java ñayivi cán ña ná candíco cahnu na ña najáñahá Balaam. Mé Balaam jan cūú dá da najáñahá Balac ndaja caja da jácahan dā na Israel caja na cuachi tátuhun ná cuxu na ña najoco ñayivi nūú yoco ta ná cuju xihín táchán ñayivi vatí co cūú ná yíi ná á ñajíshí na. <sup>15</sup> Ta co fín vaha ini i xihín ndó, na ñuu Pérgamo jáchí sáhan ndó ñamani nūú java ñayivi ña ná candíco na jatá na nicolaitas. Ta cándezi ndivaha i ña jánaha na jan. <sup>16</sup> Xíni ñúhú ndicó coo ini ndó ta caca vaha ndó íchi cuéntá mí i. Á tá coó ta saa yachi nū ndúu ndó jan. Ta xihín tuhun cahán i cani táchán i xihín na caja cuachi jan. Ta mé tuhun cahán i cacuu a tátuhun yúchú cání ña cana yuhú u. <sup>17</sup> Cuni joho vaha ndó, na vaha joho ña cahán ínima yii Ndióxi xihín na cūú cuéntá mí i, na tácá veñihu: Ndá na ná quee vaha nūú ña nūú já quiahva i ñamani nu ná cuxu na pan yii, ña cūú tátuhun maná, ña naquixi indívi. Ta ña yóho cūú á ña nasañjin jehé nūú ñayivi. Ta já quiahva ri in yúu yaa nūú in in ñayivi nu ndáa quiví saá na. In tühün na ná ndiquehe yuú yaa cán cūú na xíni yo quiví quéa ndáa nū á.”

*Carta cuaghan nūú na cūú cuéntá Jesú  
ndúu ñuu Tiatira*

<sup>18</sup> Cahyún inga tucu carta ná cuhun a nūú da cómí cuéntá sahá na cūú cuéntá mí i ndúu ñuu Tiatira. Ta já cachún já xihín ná: “Ña yóho quéa cáchí Jesú, mé a cūú in tühün jini já jahyi Ndióxi. Ta mé a quéa yéhe nduchú nūú a tátuhun ñuhú ita ta yéhe sahá tá quiahva yéhe caa, ña jándu

ná ini horno. Ta mé a cáchí a já xihín ndohó, na ñuu Tiatira: <sup>19</sup> Sa xíni vaha i tóco ndihi ña caja ndó. Xíni vaha i ña cúní ndó yehe. Ta xíni vaha i ña cándezi cahnu ini ndó yehe. Ta sa xíni vaha i ña co jándacoo ndó caja ndó ña cajii íni i xihín. Ta sa cándezi vaha ini i ña ndíhi chágá ini ndó caja chúun ndó cuéntá mí i a juú ga tá nacásahá ndó cándezi ini ndó yehe. <sup>20</sup> Joo fín in ñaha ña cúní cahán cuachi i xihín ndó saha. Jáchí co cúní ndó jánaní ndó ña naní Jezabel, ña fín tañu ndó jan. Vatí cáchí ña ña cahán ña cuéntá Ndióxi joo xihín ña quixi jini mé ña jándahvi ña na cūú cuéntá mí i. Jáchí jácahan ña na ná cuju xihín táchán na, na co cūú yíi ná á ñajíshí na. Ta jánaha ña na ña ná cuxu na ña najoco ñayivi nūú yoco. <sup>21</sup> Sa nasañdati ndivaha i ña ná ndicó coo ini ña sahá cuachi caja ña joo co cúní ña jándacoo ña ña quíji ña xihín na co cūú yíi ña. <sup>22</sup> Sáhá ña cán quéa caja i ña ná quihví ndee ña candúhu ña xito ña. Ta caja i ña ná ndoho ndivaha ini ndili dā quíji xihín ña tárna a jándacoo da cuachi caja da xihín ña jáchí ña jan cūú ña najáñahá ña nu dā caja da. <sup>23</sup> Ta caja i ña ná quivi ndihi jahyi ña. Ta xihín tóco ndili ña yóho cuni na cūú cuéntá mí i, na ndúu ndijáa ñuu ña mé a ndaa xíni vaha i ña cahvi ini ñayivi ta xíni ndaja fín ínimá ná. Ta quiahva i nūú in in ndó ña ndítahan quehe ndó sahá ña nacaja ndó. <sup>24</sup> Ta viti cúní cahán i xihín java ga ndó, na cūú cuéntá mí i ndúu ñuu Tiatira jan. Jáchí co ndicó ndo jatá ña jánaha ña cán ta co ndicó ndo jatá ña cáchí ñayivi cūú ña ndichí ndivaha cuéntá Satanás, mé tiñahá sacuaha. Ña cúní cachi i xihín mé ndó quéa coó ga inga chuun sáhndá i nu ndo. <sup>25</sup> Joo xíni ñúhú candita ndacú ndo janda quiahva ná saa i nu ndúu ndó jan. <sup>26</sup> Ta ndá na ná quee vaha nūú ña nūú ñuyíví yóho ta caja na ña cúní yehe xihín ndinuhu ini na janda quiví nu ndíhi já quéa caja i ña ná ñehe tálvi ná cahndá na chuun nūú ndijáa ñayivi ndúu ñuyíví. <sup>27</sup> Tá quiahva nacaja Ndióxi, tátá i xihín i tá nasañan mé a ndee á nūú i quiahva já caja i xihín na cándezi ini yehe. Ñehe tálvi ná cacomí na cuéntá sahá ñayivi ñuyíví ta cuu caja na tá quiahva cúní mé ná. Ta cuu jándihi na sahá mé ñayivi ñuyíví tá quiahva caja ñayivi tá tálvi na quiji ndahyi. <sup>28</sup> Ta quiahva ri yehe ñamani nūú na cūú cuéntá mí i ña ná cacomí na quími cahnu,

rí quéta tá natíyi.<sup>29</sup> Cuni joho vaha ndó, ná vaha joho ña cahán ínima yii Ndióxi xihín ná cíu cuéntá mí i, ná tácá veñyu.

## 3

*Carta cuahan nuú na cíu cuéntá Jesús ndúu ñuu Sardis*

<sup>1</sup>Cahyún inga tucu carta cuhun nuú da cómí cuéntá sahá na cíu cuéntá mí i ndúu ñuu Sardis ta já cachún já xihín dá: “Ña yóho quéra cachí Jesús, mé a ñúhu ínima yii Ndióxi ini, ña cíu ndíshusa yuhú nüu ínima yii mé á. Ta mé á cómí a ndíshusa qui mi ta ña yóho quéra cachí a xihín ndó, ná ñuu Sardis jan: Xíni vaha i tóco ndíhi ña caja ndó. Ta sa xíni vaha i ña cahán ñayivi ña caja ndó tátuhun ñayivi tacú vatí mé a ndaa cíu ndó tátuhun ndíji. <sup>2</sup>Xíni ñúhu ndícací vaha ini ndó ta a jándacoo ndó ña vaha caja ndó jan jáchi jalóho cíni ndíhi sahá. Sándezhe vaha i ña co caja ndó ña ndaa nü Ndióxi, tátá i. <sup>3</sup>Xíni ñúhu ndícuahun ini ndó ña nacatiyahva ndó cuéntá mí i ta a jándacoo ndó caja ndó ña. Ta xíni ñúhu ndicó coo ndó nü Ndióxi ta ndicáxí vaha ini ndó. Á ta coo ta jonaá cuití xínu coo i nü ndo já caja vii i sahá ndo. Mé quívi co cahán ndó xínu coo i nü ndo ta quiyahva jonaá xínu da cuihná. <sup>4</sup>Joo mé a ndaa ndúu java ndó mé Sardis jan, ná coo nacaja qui mi mé xihín cuachi. Sahá ña cán quéra cuu candixi na jahmá yaa ta já cuu caca tuun na xihín i jáchi ñin sahá caja na já. <sup>5</sup>Jáchi ndá ná ná quee vaha nuú ña nüu ñuyíví yóho já quéra candixi na jahmá yaa. Ta a jándoo i quívi ná nu libro, mé nu ndáa quívi tóco ndíhi na catacu andá ama cíaa quívi. Ta nu Ndióxi, tátá i xihín nu tátó mé a cahán caxí i ña jivi ndusa cíu ná cuéntá mí i. <sup>6</sup>Cuni joho vaha ndó, ná vaha joho ña cahán ínima yii Ndióxi xihín ná cíu cuéntá mí i, ná tácá veñyu.”

*Carta cuahan nuú na cíu cuéntá Jesús ndúu ñuu Filadelfia*

<sup>7</sup>Cahyún inga tucu carta cuhun nuú da cómí cuéntá sahá na cíu cuéntá mí i ndúu ñuu Filadelfia ta já cachún já xihín dá: “Ña yóho quéra cachí Jesús, mé a cíu ña yii ndivaha ta cíu á ña ndaa. Ta nu mé á ín yávi, ña nasa comí rey David. Ta tá súná mé á in yéhé ni in na a cuu chicají ña. Ta tá chícají mé á in yéhé ni in na a cuu cuná ña. Ta ña yóho quéra cachí a xihín ndó, ná ndúu ñuu Filadelfia jan: <sup>8</sup>Xíni vaha i

tóco ndíhi ña caja ndó. Nasuná i yéhé nu ndó ta ni in tátuhun na a cuu chicají ña. Ta cándezhe vaha ini i ña caja tá caja ndó ña nasa hnda i nü ndó caja ndó vatí coo cuahá ndée ndó. Ta co chíjehé tátuhun ndó ña xíni ndó yéhé. <sup>9</sup>Cándezhe ndó ña caja i xihín na tátuhun, ná caja cahnu Satanás, mé tiñáhá sacuahá sahá ña cachí na cíu ná ná Israel joo a juu toho na. Caja i ña ná caxítí na nü ndó já ná ndicuni na ña mé a ndaa quívi ini i ndohó. <sup>10</sup>Coó najándacoo ndó caja ndó ña nasa hnda i nü ndó caja ndó ta nasa han ndee ini ndó sahá ña cán quéra chindeé vi ndohó ná a ndóho toho ndó ña nüu vaxi jata ñayivi ñuyíví yóho. Jáchi tá ná cayati mé hora já casahá coto ndojó i tóco ndíhi ñayivi ndúu ñuyíví. <sup>11</sup>Yachi saa i nü ndó. Ta coto a jándacoo ndó ña cándezhe ini ndó yéhé já quéra ná a ndíquahva i nüu inga na ña sácu vaha i quiyahva i nü mé ndó. <sup>12</sup>Ta ndá ná ná quee vaha nü tóco ndíhi ña nüu ñuyíví yóho, ndaja i na cán ná cacuu na tátuhun jihin, dó cíu ndee veñyu Ndióxi, tátá i. Ta cán canduu na andá ama cíaa quívi. Ta jata mé ná cahyí i quívi ñuu nü fin Ndióxi. Mé ñuu yóho cíu á inga Jerusalén, ña saá, ña vaxi chí indiví nü fin Ndióxi. Ta jivi jata mé ná cahyí i inga quívi saá i. <sup>13</sup>Cuni joho vaha ndó, ná vaha joho ña cahán ínima yii Ndióxi xihín ná cíu cuéntá mí i, ná tácá veñyu.”

*Carta cuahan nuú na cíu cuéntá Jesús ndúu ñuu Laodicea*

<sup>14</sup>Cahyún inga tucu carta cuhun nuú da cómí cuéntá sahá na cíu cuéntá mí i ndúu ñuu Laodicea ta já cachún já xihín dá: “Ña yóho quéra cachí Jesús, mé a cíu ña ndaa. Mé a cahán ña ndaa sahá ña naxini a xihín nüu á ña nacavaha tóco ndíhi ñaha, ña sácu ini Ndióxi coo. Ta ña yóho quéra cachí a xihín ndó, ná ñuu Laodicea: <sup>15</sup>Xíni vaha i tóco ndíhi ña caja ndó. Ta xíni vaha i ña mé ndó co cíu ndó tátuhun in ñaha ihní ndinu hu. Ta ni co cíu ndó tátuhun in ñaha vixi ndinu hu jáchi co caja cahnu ndó yéhé xihín ndinu hu ini ndó. Vaha ná ndinu hu ña vixi ná cacuu ndó á tá ndinu hu ña ihní ná cacuu ndó. <sup>16</sup>Joo mé ndó fin java uun ndó jáchi in ivi ndácaan ínimá ndo ta sahá ña cán quéra tavá xóo i ndohó nuú i. <sup>17</sup>Jáchi mé ndó cachí ndo ña cíu ndó ná cuicá ndivaha. Ta cachí ndo ña vaha ndivaha quéhe ndó

jáchi ñéhe cuahá ndó jiuhún. Ta cáchí ndo ña ni in ñaha co ndímaní nu ndo. Joo mé ndó cíú ndó tátuhun na cuáa ndáhví ndivaha jáchi a ñáha cuni ndó ña co ñéhe táchví ndó nu Ndióxi. Cíú ndó na ndahví ndivaha ta cíú ndó tátuhun na cuáa xíca lahla.<sup>18</sup> Sahá ña cán quéa cíú jácáchí i ndohó ña ná quixi ndó nuú i cueen ndó jiuhún cuáan nuú i ña sa naxito ndojó na nu ñihu ita ta já quéa ná cacuu ndusa ndó na cuicá. Ta quiahva já ndítahan nu ndo cueen ndó jahmá yaa cáchí nuú i candixi ndó já ná chijahví ndó mé ndó jáchi cacahan nuú ndó sahá ña xíca lahla uun va ndó. Ta sa mé nuú yehe ndítahan cueen ndó taqá chicaqan ndó nduchú nuú ndó já quéa ná cuu candehé vaha ndó.<sup>19</sup> Jáchi jánaní i tóco ndihí ñayivi, na quishví ini i ta jándoho i ini na ña ná caja vaha na. Sahá ña cán quéa xíhní ndinuhu ini ndó ndítahan ndicó coo ini ndó caja ndó ña cíú Ndióxi.<sup>20</sup> Candehé ndo. Yehe cíú u tátuhun in da cándichi cání ndáhá yéhé vehe ndó ta cána i ndohó. Ta ndá na xíni joho nu cáhan i ta súná na yéhé vehe na nuú i já quihví i vehe na ta cajíni i xíhní ná ta mé ná cajíni na xíhní i.<sup>21</sup> Ta ndá na ná quee vaha nuú tóco ndihí ña nuú ñuyíví yóho, caja i ña ná cuu cacoo na xíhní i indiví nuú cacomí i cuénta sahá ná indiví. Jáchí quiahva já naquée vaha i nuú ña núa ta viti fín coo i xíhní Ndióxi, tátá i nu fín coo mé á sálhindá chuun indiví.<sup>22</sup> Cuni joho vaha ndó, na vaha joho ña cáhan ínimá yii Ndióxi xíhní na cíú cuénta mí i, na tacá veñyhu” —nacachi a.

## 4

### Tá cája cáhnu na Ndióxi indiví

<sup>1</sup> Tá sa nayaña tóco ndihí ña yóho já naxini i núná in yéhé indiví. Ta mé a naxini joho i nu cuítí ña cáhan tátuhun trompeta ta nacahan tucu a jatá i já nacachi a já:

—Cuáhán ndaa xoo chóho já ná nahá i nuun ndá quéa coo chágá chí nuú —já nacachi a já xíhní i.

<sup>2</sup> Chí mé hora já nandeta nuu ínimá yii Ndióxi ini i. Já naxini i mé indiví cán in nu sácoco rey ta fín coo in a cán. <sup>3</sup> Ta mé a fín coo cán nasayéhe nuú a tátuhun yéhé in yuu naní jaspe xíhní yuu naní cornalina. Ta naxini i nacavá nuu in coyánquí nu fín coo a. Ta mé coyánquí cán yéhé ri tá quiahva yéhé yuu cuíi naní esmeralda. <sup>4</sup> Ta nu fín

coo mé a cán naxini i nacava tiyivi inga oco comí tayí vaha nu sácoco na cómí chuun. Ta naxini i oco comí na sacuahá, in in na fín coo nuú in in tayí vaha cán. Ta ndihoco comí mé na sacuahá cán ndíxi na jahmá yaa cáchí. Ta cándójó in tiyivi jiuhún cuáan jini in in na cán. <sup>5</sup> Ta naxini i ña quéta tasa nu fín coo mé a cán. Ta sa mé cán cahndí tátuhun tá cána javí ta yati mé cán cayí usa ití xíhní ñuhú ita. Ta ña yóho cíú á ndihusa yuhú nuu ínimá yii Ndióxi. <sup>6</sup> Ta yati mé cán naxini i in ñaha ta náha tátuhun in tañuhú, ña yéhe tátuhun in yutatá.

Ta yati jíin nu fín coo a cán nacava tiyivi comí ña tacú. Ta chí a juú quiahva cuahá nduchú nuú a chí nuú á ta chí jatá.<sup>7</sup> Ta in táchan mé ña tacú cán, ña nu cuítí cán cáa tá quiahva cáa in león. Ta ña inga cán ña chí iví cáa tá quiahva cáa tindiiquí. Ta nuú ña cahndí cán cúní coo a tá quiahva cúní coo nuú ñayivi. Ta ña comí cán cáa tá quiahva cáa in tiyahá tá ndáchí ri.<sup>8</sup> Ta in in mé ña tacú yóho nasahin jinu ndixi a. Ta nuú á ta jatá nachutú ndaa ña xíhní nducú nuú. Ta ni nuú ta ni ndiví co jándacoo ndícomí ña cán cáhan já cáchí a já:

Yii ndivaha cíú mé ndó, Ndióxi, xitoho nde. Ta cuu caja ndó tóco ndihí ñaha. Mé ndó sa já fín va ndó tá nacava sahá sahá ñuyíví.

Ta sa já fín ndó viti ta já coo tá coo ndó andá ama cáa quivi —nacachi ndícomí ña tacú cán.

<sup>9</sup> Ta tá cáhan mé ña tacú cán já cája cahnu a Ndióxi ta ndíquiahva ndixahví nu mé a fín coo nu sácoco rey, mé a tacú andá ama cáa quivi. Ta tá cáhan mé ña tacú cán já ndícaxítí ndihoco comí na sacuahá cán cája cahnu na Ndióxi, mé a tacú andá ama cáa quivi. Ta já tím na tiyivi cándójó jini na jáxingu ña nu fín coo Ndióxi cán ta já cáchí na já:

<sup>11</sup> Ndióxi maní nde, cíú ndó xitoho nde ta ndítahan nuú nde caja cahnu nde ndohó jáchi mé ndó ndítahan ndicahnu ndivaha.

Íin ndee ndo caja ndó tóco ndihí ñaha ta ndítahan caja cahnu nde ndohó. Jáchí nacaváha ndó tóco ndihí ñaha, ta ndúu ndihí ñaha jáchi cúní mé ndó ña ná canduu a.

Ta ndúu a jáchi cúní mé ndó cavaha ndó ña, já nacachi ndihoco comí na sacuahá cán cája cahnu na Ndióxi.

## 5

Tá naxini Juan in libro xihín in ndicachi

<sup>1</sup>Tá nandihí já naxini i in libro indiví ini ndáha cuáha mé a ín coo nu sáco rey. Ta mé libro cán cíu á tutu natíví tuun a ta nacahyi ndíví xoo nu á. Ta ndají tuun a xihín usa sello. <sup>2</sup>Tajá naxini i in tátó Ndióxi, ña fin ndivaha ndée a. Ta naxini joho i cähán cóhó a ta ndáca tuhún a já cachí a já:

—Ndá na cíu na ín sahá cahnda ndíhusa sello yóho já ná cuná na mé libro ña natíví tuun cán —nacachi mé tátó Ndióxi cán.

<sup>3</sup>Joo coó nañhe ná ni in na ín sahá cahnda ndíhusa sello cán. Ni indiví ni ñuyíví ni nu ndíu na naxihí coó nandiñehe ná ni in na cuu cahnda ndíhusa sello cán ña ná candehé na ña ndáa nu mé libro cán. <sup>4</sup>Ta já nacasañá sácu ndivaha i jáchí coó nandiñehe ná ni in tátuhun na ín sahá cahnda ndíhusa sello cán ña candehé na ini mé libro cán cahvi na ña ndáa nu á. <sup>5</sup>Joo in táchan na sacuahá cán nacachi a já xihín i:

—A cuácu gaún jáchí Jesú, mé a cíu tátuhun león, ña naquixi chichi Judá ta naquixi a chichi rey David, mé a cán naqueva ha ta nasahnu a nu tóco ndihí ña níu ñuyíví. Sahá ña cán quéa cuu cahnda ndíhusa sello ta já cuná mé a libro cán —nacachi a xihín i.

<sup>6</sup>Ta naxini i cándichi Jesú, mé a cíu tátuhun ndicachi loho tañu na sacuahá ta tañu ndícomí ña tóco cán. Ta mé a cíu tátuhun ndicachi loho cán cándichi a nu sáco rey ta náha xicá ña najándicuehe na mé a tá nasahní ñáhá na. Ta naxini i ín usa ndíqui a xihín usa nduchú níu a. Ta ña yóho cíu á ndíhusa yuhú nuu ímaya yii Ndióxi, ña nacindahá mé a níi cíu sahá ñuyíví. <sup>7</sup>Ta mé a cíu tátuhun ndicachi loho cán naxinu a ta natiin a mé libro cán ndáha cuáha mé a ín coo nu sáco rey.

<sup>8</sup>Ta tá natiin a mé libro ña natíví tuun cán já nandica xítí ndícomí ña tóco cán xihín ndíhoco comí na sacuahá cán nu mé a cíu tátuhun ndicachi loho cán. Ta tóco ndihí na cán cáñee arpa ndáha ná jácaba na. Ta cáñee coho chíñilmá, ña juuhun cuáán ndáha ná ta nachutú ndaq ña xihín jusa támí sahan. Ta ña cán cíu yuhú nuu tuhun ña xicá tahví na cíu cuénta Ndióxi nu á. <sup>9</sup>Ta xihín ña saá xíta na caja cahnu na mé a já cachí na já:

Nu mé ndó cán ndiquehe ndó mé libro jan ta cahnda ndó sello ña ná cuná ndó ña.

Jáchí mé ndó naxihí ndó nacaja ñayivi.

Ta tá naxita nii ndó já naxeen ndó ñayivi na cacuu na cuénta Ndióxi.

Ta mé ndó nachahvi ndó sahá na naquixi ndijáá chichi xihín na cähán tá nuu tuhun xihín na ndíu ndijáá nuu xihín ndijáá nación.

<sup>10</sup>Ta mé ndó nandaja ndó ñayivi yóho cacuu na tátuhun jetu já ná caja cahnu na Ndióxi.

Ta mé na cán cacomí na cuénta sahá ñayíví ndíu ñuyíví, cachí na caja cahnu na mé a cíu tátuhun ndicachi loho cán.

<sup>11</sup>Tá nandihí já násandehé tucu u. Andá já naximi joho i cähán cuahá ndivaha millón tátó Ndióxi caja cahnu na mé a ín coo nu sáco rey. Nacava tiyivi na ndíu na jatá ndícomí mé ña tóco cán xihín jatá ndíhoco comí na sacuahá cán. <sup>12</sup>Ta já cähán cóhó tóco ndihí mé tátó Ndióxi cán já cachí na já:

Mé Jesú, mé a cíu tátuhun ndicachi loho, rí naxihí nacaja ñayivi, ín sahá caja tóco ndihí ñáha xihín ndée á.

Ta ín sahá ndiquehe a tóco ndihí ña cuicá ta ín sahá ndiquehe ndihí a ña ndichí ta ín sahá ndiquehe a tóco ndihí ndée.

Ta ín sahá ña ná ndiñehe jícó ñayivi mé á.

Ta ín sahá caja cahnu na mé a ta ín sahá ña ná cata na nu mé a, cachí tóco ndihí na cán caja cahnu na mé á.

<sup>13</sup>Ta quiáhva já naxini joho rí cähán tóco ndihí ñáha ña nacavaha Ndióxi ndíu indív xihín ña ndíu ñuyíví xihín ña ndíu tixi ñundáhyi ta xihín ña ñíhu ini tañuhú. Tóco ndihí ña nacavaha Ndióxi yóho caja cahnu a mé a ta já cachí a já:

Ná ndicahnu ndivaha Ndióxi, mé a ín coo nu sáco rey.

Ta ná ndicánu ndivaha Jesú, mé a cíu tátuhun ndicachi loho.

Ná caja cahnu í mé a ta ná ndiñehe jícó ñayivi mé a jáchí mé a quéa ín ndée caja tóco ndihí ñáha.

Ná caja cahnu yó mé a andá ama caja quivi, já cachí tóco ndihí na cán.

<sup>14</sup>Já nanducú ñehe ndícomí mé ña tóco cán tuhun já cachí a já:

—Já ná coo.

Ta tá nacachi a ña yóho já nacaxítí ndíhoco comí na sacuahá cán cája cáhu na Ndióxi, mé á tacú anda ama cása quiví.

## 6

*Tá nasañhnda Jesucristo ndíhusa sello*

<sup>1</sup> Tá nandihi já naxini i nasañhnda Jesús, mé a cúu tátuhun ndicachi loho cán sello nu cuítí cán, ña cúu táhan ndíhusa sello cán. Ta tá nandihi já naxini joho i cahán in táhan ndícomí mé ña tacú cán xihín i ta tachí yúhu a cúu á tátuhun tá cána javi. Ta já nacachi a já xihín i:

—Naha quíi, candehún yóho —nacachi a xihín i.

<sup>2</sup> Anda já nasañdehé e ta já naxini i in cuáyi cúxú ta naxini i cánúu in dñataa jata ri. Ta ndáha dñá cán naxini i cárnee in arco. Ta naxini i ña nañehe dá in tiyiyí cánúu jimi dá. Ta cajíi iní dñá naqueta da jáchi cúu dñá dñá naquée vaha ta ñehe táchví dñá quee vaha tucu da.

<sup>3</sup> Ta anda já naxini i nasañhnda Jesús, mé a cúu tátuhun ndicachi loho cán inga sello, ña cahíví cán. Já naxini joho i ña nacahán inga tucu táhan ndícomí mé a tacú cán xihín i. Já cachí a já xihín i:

—Naha quíi, candehún yóho —nacachi a xihín i.

“Ta já naxini i naqueta inga cuáyi ta cúu rí rí cuáhá. Ta mé dñá cánúu jata ri cán nañehe táchví dñá jácani táhan da ñayivi ndúu ñuyíví. Ta nañehe táchví dñá caja da ña ná cahní ndaja táhan mé ñayivi ndúu ñuyíví. Ta naxini i nañehe dá in yuchú cání ña cáhu cánee a ndáha dñá.

<sup>5</sup> Ta tá nasañhnda Jesús, mé a cúu tátuhun ndicachi loho inga sello, ña cahún i já naxini joho i nacahán mé ña tacú, ña cahún i cán xihín i já nacachi a já:

—Naha quíi candehún yóho —nacachi a xihín i.

Ta tá nasañdehé e já naxini i in cuáyi ndáhyí tuun ta já naxini i ña cárnee in ña sacuítia ñaha ndáha dñá cánúu jata ri cán.

<sup>6</sup> Ta tañu ndícomí mé ña tacú cán naxini joho i cahán in a ta já cachí a já:

—Ndív yaa xíní ñúhú caja chúun í já cuu cueén in túhún láá kilo trigo. Ta in quiví níi xíní ñúhú caja chúun í já cuu cueén uní kilo cebada. Joo a quiahva ndó ñamani ña ná tiví sítí xihín vino —nacachi a.

<sup>7</sup> Ta tá nasañhnda Jesús, mé a cúu tátuhun ndicachi loho inga sello, ña cámomi cán já naxini joho i nacahán mé ña tacú, ña cámomi cán xihín i já nacachi a já:

—Naha quíi candehún yóho —nacachi a xihín i.

<sup>8</sup> Ta tá nasañdehé e já naxini i in cuáyi cuáán joho. Ta dñá cánúu jata ri cája ña ná quiví ñayivi. Ta jata mé dñá cán naxini i ndíco dñá sáhndá chuun sahá nu ndúu ndíj. Ta nañehe táchví ndív dñá cavaha da tondóhó ñuyíví já ná caja da ña ná cahní táhan cuahá ndivaha ñayivi ndúu ñuyíví. Ta jári nasañhni dñá na xihín tamá ndee ta xihín cuehe ta xihín ndíjáá quítí yúcu ndúu ñuyíví janda quiahva naxihí in táchndá nuú comí táchndá ñayivi ndúu níi cúu sahá ñuyíví.

<sup>9</sup> Ta tá nasañhnda Jesús, mé a cúu tátuhun ndicachi loho cán inga sello, ña cahívun já naxini i in nu náa ta tixi mé cán ndúu ñimá ñayivi, na naxihí sahá ña nacaxí tátuhun na tátuhun Ndióxi nuú ñayivi xihín ndinuhu ini na. <sup>10</sup> Ta cayuhú cóhó na já cachí na já:

—Tátá Ndióxi, mé ndó cúu ndó ña yii ndivaha ta cája ndó ña ndaa cuítí va. Ta cuu caja ndó tóco ndihi ñaha. Ndaja cáaa chá quiví caja víi ndó sahá ñayivi ndúu ñuyíví. Ta já caja ndó ña ná chahvi na sahá ña nacaja na nasañhni na ndehe —cachí na ndúu tixi náa cán.

<sup>11</sup> Andá já nañehe ná jahmá yaa candixi na ta natañhnda chuun nu ná ña ná candati tóco chágá na janda quiahva ná xínu coo nuú java ga ná cúu cuéntá Jesús quiví na caja ñayivi ñuyíví sahá ña cája chúun na cuéntá Jesucristo. Ta janda quiahva ná quiví ndihi ná yóho já cavií sahá ñayivi nacaja quini xihín ná.

<sup>12</sup> Tá nandihi já naxini i nasañhnda Jesús, mé a cúu tátuhun ndicachi loho inga sello, ña cahún i cán. Já naxini i nañaan ndivaha ta naxini i nanduu tuún cандii tátuhun in jahma tuún sá ndíxi na ndúu ndí. Ta níi cúu yoo naxiru cuáhá níi ri. <sup>13</sup> Ta ndijáá quiví naquée rí indív ta nacuyu rí nu ñúhú. Cúu á tátuhun tá quíi nihni tachí ndee ndivaha tító ñúhú ta já cuyu cuihi, rí cuíi nu ñúhú.

<sup>14</sup> Nandihi sahá indív ta nandaco vaha ña tátuhun tá ndítiyí in yívi ña co xíní ñúhú ga ná. Ta tóco ndihi yúcu xihín tóco ndihi isla mahñú tañuhú nandijama ndihi ña ta co ndúu ga ña nuú nasañduu a. <sup>15</sup> Ta tóco ndihi ná comí cuéntá sahá ñuyíví nandaco

jehé na tañu cáva. Ta náchiñee na tañu tóto chí yúcu cuahán na. Ta cán náchijéh ri na sáhndá chuun nu soldado xihín tóco ndihi na cuicá xihín tóco ndihi na íin ndée cája ña náhnu ñuyíví yóho. Ta jári tóco ndihi na cómí in xitoho cuénta sahá xihín tóco ndihi na xíca núná mé nandacoo jehé na tañu cáva xihín tañu tóto cán.<sup>16</sup> Ta cáchí na cahán na xihín yúcu ta cahán na xihín cáva ña ná cuyu a jata ná ta ná chijehé a na ña ná a cúní mé a íin coo nu sácoo rey cán na. Ta yíhví na Jesús, mé a cúu tátuhun ndicachi loho cán jáchí sa naxojo ini a ta vaxi a jándihi a sahá ná.<sup>17</sup> Jáchí sa naxinu coo quíví jándoho mé á ini na ta ni in na co ndée ini.

## 7

*Ndícxai Ndióxi in táhndá na Israel*

<sup>1</sup> Tá sa nayaha tóco ndihi ña yóho já naxini i ndíta comí tátó Ndióxi ndícomí xoo nu quíxi tachí nu ndícomí xoo níi cùu sahá ñuyíví. Ta tím a tachí já ná a cuicó ga tachí jatá ñuyíví ta ná a cuicó ga tachí nuú tañuhú ta ni nuú ni in yíto.<sup>2</sup> Ta já naxini i naquixi inga tátó Ndióxi xoo nu quéta candii. Ta mé tátó Ndióxi yóho naxini i ñéhe a sello Ndióxi, mé a tácú indiví. Ta já naxini joho i nacayuhú mé tátó Ndióxi yóho nuú ndícomí java ga tátó Ndióxi, mé na nañehe táhvi caja ña núu xihín ñuyíví ta xihín tañuhú viti ta já nacachi a já xihín ná:

<sup>3</sup> —Candati ndó. A caja núu ndó xihín ñuyíví ta ni xihín tañuhú ta ni xihín ni in yíto. Jáchí jihna ñuhú xíní ñuhú cacú in sello taan na cùu cuénta Ndióxi, mé a caja cahnu mí —nacachi a.

<sup>4</sup> Ta naxini joho i cahán in a ndaja cùu ñayivi nánaní sello yóho taan na. Cúu ná in ciento íví jico comí mil ñayivi Israel ta cùu ná na naquixi ndíluxu íví chichí na Israel.<sup>5</sup> In táhndá cùu uxu íví mil na naquixi chichí Judá ta nánaní sello taan na cán. Ta inga uxu íví mil na naquixi chichí Rubén naquehe sello taan na. Ta quiahva já naquihvi ri sello taan uxu íví mil na naquixi chichí Gad<sup>6</sup> xihín uxu íví mil na naquixi chichí Asér xihín uxu íví mil na naquixi chichí Neftalí xihín uxu íví mil na naquixi chichí Manasés<sup>7</sup> xihín uxu íví mil na naquixi chichí Simeón xihín uxu íví mil na naquixi chichí Leví xihín uxu íví mil na naquixi chichí Isacar<sup>8</sup> xihín uxu íví mil na naquixi chichí Zabulón xihín uxu íví mil

na naquixi chichí José xihín uxu íví mil na naquixi chichí Bejamín nánaní sello taan na.

Tá naxini Juan cuahá ndivaha ñayivi ndíxi jahmá yaa

<sup>9</sup> Tá nándihi já nasandehé e já naxini i cuahá ndivaha ñayivi. Ta ni in na a cùu cahvi ñahá sahá ña cuahá cùu ná. Ta cùu ná na naquixi ndijáá chichí ñayivi ndúu ñuyíví. Ta cùu ná na cahán tá nuú tühun. Ta cùu ná na ndúu ndijáá ñuu xihín ndijáá nación ñuyíví. Ta naxini i ndíta na nu Ndióxi, mé a íin coo nu sácoo rey. Ta ndíta na nu Jesús, mé a cúu tátuhun ndicachi loho cán. Ta tóco ndihi na ndíxi na jahmá yaa cachí ta cánee ñuu ndáha ná.<sup>10</sup> Ta tóco ndihi na cayuhú cöhó na já cachí na já: Ndióxi, mé a íin coo nu sácoo rey xihín Jesús,

mé a cúu tátuhun ndicachi loho cán najácacu a mí, cachí na.

<sup>11</sup> Ta naxini i ndíta tóco ndihi tátó Ndióxi caja cahnu na mé a íin coo nu sácoo rey. Ta nacaya tiyivi na ndúu na jatá na sacuahá cán xihín jatá ndícomí mé ña tácú cán. Ta já nacaxítí tóco ndihi na janda quiyahva nácani ndaa taan na nu ñuhu ta já nacashána caja cahnu na Ndióxi.<sup>12</sup> Já cachí na já: Já ná coo. Caja cahnu nde ndohó ta ndíñehe jíocó nde quívi mé ndó.

Jáchí ndíchí ndivaha jiní ndo ta ndiquahva nde ndixahvi nu ndo.

Ta ndítahan coo toní ñuhú nde xihín ndo jáchí mé ndó cùu ndó ña íin ndée caja tóco ndihi ñaha.

Ta já ná coo tóco ndihi ña yóho nu mé ndó anda ama caja quívi. Já ná coo, nácacu na cán caja cahnu na Ndióxi.

<sup>13</sup> Andá já naxinu in táhan na sacuahá cán nuú i já nándacá tühun na yehe já nacachi na já xihín i:

—Á co xínun ndá na cùu na ndíxi jahmá yaa yóho ta ndá naquixi na —nacachi na xihín i.

<sup>14</sup> Já nánducú ñehe e tühun nu ná já nacachi i já xihín ná:

—Yehe co xíní toho i joo mé ndó sa xíni vaha ndó ndá na cùu ñayivi yóho —nacachi i xihín ná.

Ta já nacachi na já xihín i:

—Na ndíxi jahmá yaa yóho cùu ná na nayaha nuú cuahá ndivaha tondohó mé quívi tá nándoho ndivaha ini na. Ta viti

sa nandoo cuachi na xihín nii Jesús, mé a cúu tátuhun ndicachi loho.<sup>15</sup> Sahá ña cán quéa ndíta na nu Ndióxi, mé á fin coo nu sácoo rey. Ta ñuu ta ndiví caja ndíví na nu mé a ini veñuhu a. Ta mé Ndióxi, mé a fin coo nu sácoo rey cán ndáa vaha meá na jáchi fin tuun a xihín ná.<sup>16</sup> Ta coó ga joco quixi nu ná ta ni a íchi ga ini na ticuíf ta ni a cayí ga na caja candii ta ni a ndíhi ga ini na sahá ña iñhi. <sup>17</sup> Jáchi Jesús, mé a cúu tátuhun ndicachi loho cán ndácañ mahñú nu sácoo rey cán ta candaá mé a na tá quiahva ndáa in pastó ndicachi janá dá. Ta candaá mé a na cuhun na nu cána ticuíf, dó caja ña ná catacu na anda ama cáa quiví. Ta yacó Ndióxi ticuíf nuu tóco ndíhi na sácu—nacachi na sacuahá cán xihín i.

## 8

Tá nasahnda Jesús, mé a cúu tátuhun ndicachi loho cán inga sello, ña cahusq

<sup>1</sup> Tá nasahnda Jesús, mé a cúu tátuhun ndicachi loho cán inga sello, ña cahusq já nacatájí níi tóco ndíhi ñaha indíví tátuhun tixi java hora. <sup>2</sup> Tá nandihi já naxini i ndíta usa tátó Ndióxi nu á. Ta in in mé tátó Ndióxi cán nañehé ná in in trompeta. <sup>3</sup> Já naxinu inga tátó Ndióxi candichi a nu náa ña íin yati nu fin coo Ndióxi nu sácoo rey cán. Ta cáñee in coho chíñíhmá ndáha a, ña jiyuhun cuáán. Ta nañehé á cuahá ndivaha jusa, ña joco a ña nu náa, ña nacavaha xihín jiyuhun cuáán. Ta quiahva já joco ri a nu náa cán ña xica tähví na cúu cuénta Jesús nu Ndióxi. <sup>4</sup> Ta mé ñihma nacana nuu coho chíñíhmá cáñee ndáha tátó Ndióxi cán nandindita cuahan nu Ndióxi tá quiahva ndíndita ña xica tähví na cúu cuénta mé a nu á. <sup>5</sup> Anda já natiin tátó Ndióxi can coho chíñíhmá ta já najachutú a ña xihín tití ñuhu, ña naquea a nu náa cán. Ta já nacuihna ña jatá ñuyíví. Anda já nacasáhá cahndí tátuhun tá cána javí. Ta jandá joho xójo cúu ta cána tasa ta naquixi in nditáan ndeé ndivaha jatá ñuyíví.

Tá natíví ndíhusa tátó Ndióxi trompeta

<sup>6</sup> Tá nandihi já nasacanduu tiahva ndíhusa tátó Ndióxi tiví na trompeta ña cáñee ndáha na.

<sup>7</sup> Ta in táhan ndíhusa tátó Ndióxi cán nacasáhá natíví a mé trompeta cán. Ta já nacuyu ñuhu cayí xihín níi ña nacava táhan xihín nii jatá ñuyíví. Ta chí nacayí in

táhndá nuú uni táhndá ñuyíví yóho ta jári naquihvi ñuhu in táhndá nuú uni táhndá yító ndíta yúcú ta jári yúcú cuí naçayí ndíhi a.

<sup>8</sup> Tá nandihi já natíví tátó Ndióxi ña cahiyí cán inga trompeta. Ta naxini i najaní tátuhun in yúcú cándaha xihín ñuhu cuahan ndicava nuú tañuhú. Ta in táhndá nuú uni táhndá tañuhú cán nanduu dó nii. <sup>9</sup> Ta in táhndá nuú uni táhndá tóco ndíhi ñaha ñuhu ini tañuhú naxihi a. Ta quiahva já nandihi sahá in táhndá nuú uni táhndá barco násandojó nuú tañuhú cán.

<sup>10</sup> Ta tátó Ndióxi ña cahuyí cán natíví a inga trompeta ta já naxini i naquee in quími cahnu cándaha xihín ñuhu ita vaxíri ndicava rí ñuyíví. Naquee rí indíví ta nandicava rí nu ñuhu nuú in táhndá nuú uni táhndá yuta xihín chicohó nu cána ticuíf. <sup>11</sup> Ta mé quími cán nani rí ña ová. Ta nacaja rí ña nacahová in táhndá nuú uni táhndá ticuíf. Ta naxihi cuahá ndivaha ñayivi tá naxihi na dó ová cán.

<sup>12</sup> Tá nandihi já natíví tátó Ndióxi ña cacomí cán inga trompeta já nanaá in táhndá nuú uni táhndá nuú candii cán. Ta quiahva já nacaja ri a xihín yoo ta xihín quími. Sahá ña cán quéa coó nacuu tuun vaha candii xihín yoo xihín quími cán. Ña cán quéa nacamaní tátuhun in táhndá nuú uni táhndá tuun candii cán jatá ñuyíví. Ta quiahva já nacamaní tuun yoo xihín quími nuú.

<sup>13</sup> Tá nandihi já násandehé e ta já naxini joho i catí ndixi in tátó Ndióxi ndáchí a mahñú indíví. Ta cayuhú cóhó a já cáchí a já:

—Ay, ay, ay ndáhví nahá nacuu ñayivi ndíu ñuyíví jáchi ndají ndoho ini na tá náativí uni ga tátó Ndióxi trompeta —cáchí a.

## 9

<sup>1</sup> Tá nandihi já naxini i natíví tátó Ndióxi ña cahuhyn cán inga trompeta. Ta naxini i naquee in quími indíví ta nandicava rí jatá ñuyíví. Ta nañehé tähví rí cacomí rí yáví ña cuu cuná rí yáví cúná ndivaha, ña co xínu nu ndíhi nuu. <sup>2</sup> Ta mé quími nacuná rí yuyéhé mé yáví cúná já nandindita ñihma tátuhun ña ndíndita yuhu horno cayí. Ta mé ñihma nacana cán nañánaá nuú candii xihín nuú tachí viti. <sup>3</sup> Ta tañu ñihma cán naqueta cuahá ndivaha tica, rí nandicuita nuu níi cúu ñuyíví. Ta nañehé tähví rí

cacuu rí rí cuéhe tá quiāhva cuéhe líhma.  
<sup>4</sup> Ta nātahnda chuun nū rí ñā nā a jándhi toho rí sahá yucu ni sahá ñāha cuú ni sahá yító cuí ñuyíví yóho. Jáchí nātahnda chuun nū rí ñā ná tiin rí ñayivi cuití va, nā co cándaa marca Ndióxi taan. <sup>5</sup> Joo coó nañehé rí ñamaní cahní rí na. Ñā nacaja rí xihín ná quéa ná tiin rí na ñā ná cahma na tixi ûhun yoo. Ta tá quiāhva cahma na tā tīn líhma nā quiāhva já cahma na tiin rí na.  
<sup>6</sup> Mé quiví já nducú ñayivi quiví vaha na joo a cūu quiví na. Vatí cúní quiví na joo a cūu quiví na.

<sup>7</sup> Mé tīca tīn ñahá cán ndáa rí tá quiāhva ndáa cuáyí, rí ndíu tīhva cūhun cani táhan. Ta tá quiāhva cúní coo tīyivi, ñā jihuñ cuáán sándójó jini rey quiāhva já cúní coo ñā cándójó jini rí cán. Ta tá quiāhva cúní coo nuú ñayivi quiāhva já cúní coo nuú rí. <sup>8</sup> Ta tá quiāhva ín ijí jini najihí quiāhva já fín ijí jini rí. Ta tá quiāhva ndáa nuhu león quiāhva já ndáa nuhu rí. <sup>9</sup> Ta jáhvi yicá ndícá mé tīca cán xihín jahmácaa, ñā sándixi soldado cáni tāhan na. Ta tá cahma cáti ndixi rí cūu á tātuhun tā cáti sahá cuaha cuáyí tā ñuhu rí carreta xínu rí cuahán rí cani tāhan rí. <sup>10</sup> Ta ín fínu ndóho rí ñā tīn tātuhun ndohó líhma. Ta xihín ñā cán nañehé tāhví rí tīn rí ñayivi ñā ná cahma na tixi ûhun yoo. <sup>11</sup> Ta mé dā cómí cuénta sahá mé tīca cán naní da Abadón tūhun hebreo ta naní dā Apolión tūhun griego. Ta quiví dā cúní cachí a dā jándhi sahá tóco ndihí ñāha. Ta dā cán cūu dā cómí cuénta sahá yávi, ñā co xínu nu ndihí nuu cán.

<sup>12</sup> Sa nayaha in tondóhó cahnu joo cámāni iví chágá ñā quixi.

<sup>13</sup> Tá nāndihi já nātiví tāto Ndióxi ñā cahíñu cán inga trompeta ta já nāxini joho i cahán in a naqueta tañu ndícomí ndíqui quéta in in xoo tīto nū náa, ñā jihuñ cuáán, ñā cándichi nu fín Ndióxi cán. <sup>14</sup> Ta já nacachi mé a cán já xihín mé tāto Ndióxi cahíñu, ñā ñéhe trompeta cán:

—Janí ndícomí tāto ñā ndíco yuhú yuta cahnu namí Eufrates jan —nacachi a.

<sup>15</sup> Tá nāndihi já nāxini i najaní ndícomí tāto nāsandico cán ñā ná cahní nā in tāhndá nuú uní tāhndá ñayivi ndúu ñuyíví. Jáchí sa naquée jini va na chuun ñā caja na ñā yóho. Ta sa xíni nā ndá hora ta ndá quiví ta ndá yoo ta ndá cuia caja na ñā. <sup>16</sup> Ta nāxini joho i cahán in a ndaja cūu nā soldado cándójó

cuáyí cuahán cán. Ta cūu ná iví ciento millón soldado.

<sup>17</sup> Ta cúní ndicani i nū ndo ndaja ndáa cuáyí janā ná, rí nāxini i cán. Nāxini i ñā yóho tātuhun in sāni joo co quíji toho i. Ta nāxini i mé dā cándójó cuáyí cán nachijahvi da yicá ndícá dā xihín in caa, ñā cūu á color cuáhá nii xihín color ndihí ticiyí xihín color cuáán ita. Ta ndáa jini cuáyí tā quiāhva ndáa jini león ta yúhu rí quéta ñuhu ita xihín ñuhma xihín azufre. <sup>18</sup> Ta in tāhndá nuú uní tāhndá ñayivi nāxihí nā nacaja uní nuú tondóhó naquixi jata ñuyíví yóho. Nāxihí na xihín ñuhu cāyi ta xihín ñuhma ta xihín azufre, ñā naqueta yuhú cuáyí. <sup>19</sup> Jáchí yúhu mé cuáyí cán xihín ndóho rí cūu nū ndácaqnd ndéé rí. Ta quiāhva ndáa coo quiāhva já ndáa ndóho rí. Ta xihín mé yiquí jini coo cán caja quini rí xihín ñayivi.

<sup>20</sup> Tóco ndihi java gā ñayivi, nā coó nāndihi sahá xihín tondóhó naquixi jata ñuyíví, nā cán nacaja yíi va na ñā nūu nāsacaja na. Ta nacaja cahnu yíi va na ñā quini. Ta coó nājándacoo na caja cahnu na yoco, ñā nācaváha na xihín jihuñ cuáán ta xihín jihuñ cūxú ta xihín cāa cuáán ta xihín yūu ta jandá ñā nācaváha na xihín yito viti. Ta mé yoco yóho a cūu candéhé a ta ni co tācu joho a ta ni a cūu caca nuu a. Joo nacaja cahnu tā nacaja cahnu na ñā. <sup>21</sup> Ta ni coó nājándacoo na ñā sáhní na ndii. Ta ni coó nājándacoo na ñā tají caja na. Ta ni coó nājándacoo na ñā ndíu na xihín nā co cūu yíi ná a ñājihí nā. Ta ni coó nājándacoo na ñā caja cuíhná nā.

## 10

Tá nāxini Juan ñā cānee in libro loho ini ndáha inga tāto Ndióxi

<sup>1</sup> Anda já nāxini i inga tāto Ndióxi, ñā fín cuahá ndiváha ndéé. Nānuu a indív nāquee a vaxi a tañu in vīco ta cānúu in coo yánquí jini á. Ta yéhe nuú á tā quiāhva yéhe candii. Ta sahá cūu á tātuhun iví jihín cāndaha xihín ñuhu. <sup>2</sup> Ta ini ndáha mé a nāxini i cānee in libro loho ñā nātiví tātuhun yíi joo nāndicja ñā. Ta nāchiniúu mé a sahá cuáhá nuú tañuhu ta nāchiniúu a sahá iti a nu ñuhu. <sup>3</sup> Ta nācayuhú cōhó a tātuhun tā ndáhyi león. Ta tá nācayuhú a já nāxini joho i ñā nacahan cōhó usa tasa tā nacana ñā. <sup>4</sup> Tá nāndihi nācahan ndishusá tasa cán

já nanducú u cahyí i ña nacachi a joo naxini johno i cahán in a naquixi chí indiví ta já cáchí a já xihín i:

—A cahyún ña nacachi ndíhusa tasa naca jan. Xníñuhú coo jehé a —nacachi mé a cán xihín i.

<sup>3</sup>Anda já naxini i mé tátó Ndióxi ña cánúu in sahá nuú tañuhú ta inga sahá nuú núhu cán, nandiñehe a ndahá cuáha indiví. <sup>4</sup>Ta já nacahan mé á quivi Ndióxi ta já nasahan tuhun a jáchí Ndióxi tacú a anda ama cáa quivi, mé á nacavaha indiví xihín ñuyíví xihín tañuhú xihín tóco ndihi ñaha íin nuú á. Ta já nacachi mé tátó Ndióxi já:

—A cayáncá ga <sup>7</sup>jáchí tá ná casahá tiví tátó Ndióxi ña cahusá cán trompeta já xínu coo nu tóco ndihi ña nasaucu iní Ndióxi coo jehé janda sanahá. Jáchí sa nacaxi tuhun mé á xihín profeta cuéntá mé á ña ná cahan na sahá ña yóho nuú ñayivi —cáchí tátó Ndióxi.

<sup>8</sup>Anda jáví naxini joho i nacahan tucu mé tátó Ndióxi indiví já nacachi a já xihín i:

—Cuáhán quehe libro loho núná nuú cán. Ndiquehe a ndahá tátó Ndióxi, mé a cánúu in sahá nuú tañuhú ta inga sahá nuú núhu jan —nacachi a.

<sup>9</sup>Tá nasaqá i nü tátó Ndióxi cán já naxica i nu á ña ná quiahva libro loho cán nuú i. Ta já nanducú ñehe tátó Ndióxi cán tuhun nuú i já nacachi a já xihín i:

—Yóho íin libro loho joo xíní ñuhú casún ña. Vatí mé a ndaqá tá ná casún ña cacuu a tátuhun tá casún ñuñu jáchí caviji ndivaha yúhun caja ña. Joo tá nandihi nduu a ña ova iní tisún —nacachi a xihín i.

<sup>10</sup>Tá nandihi já natiin i mé libro loho ndahá tátó Ndióxi cán ta já nasaxí i ña. Ta nacaviji yuhú u xihín á tátuhun ñuñu. Joo tá sa nacocó i ña já nacahova ña ini tixi i. <sup>11</sup>Anda já natahnda chuun nuú i já nacachi a já xihín i:

—Ndítahan nuún caxi tuhun tucún xihín ñayivi ña cahán Ndióxi sahá cuahá ndivaha ñuu xihín cuahá ndivaha nación nu cahán na ndijáá tuhun. Ta xíní ñuhú caxi tuhun ña nuú ndijáá na cómí cuéntá sahá ñuyíví —nacachi a xihín i.

## 11

### Ivi na cíu testigo

<sup>1</sup>Tá nandihi já nasahan na in yito vara, dó chiquiahvá nuú i. Ta tá cúní coo ndoo já

cúní coo mé vara cán. Ta já nacachi na já xihín i:

—Candichi ta chiquiahvún veñuhu cáhnu Ndióxi. Ta ndítahan chiquiahvún nu náa Ndióxi viti. Ta ndítahan cahvún ndaja cíu na caja cáhnu Ndióxi mé jan.

<sup>2</sup>Joo coto a chiquiahvún ñundáhyi, ña cáva nuu ndícomí tito yéhé veñuhu cán. Jáchí sa nandíquiahvá Ndióxi ña yóho nuú ñayivi tóho ña ná caja tá quiahva cúní mé ná xihín Jerusalén, ña cíu ñuu yíi ñaha Ndióxi tixi ivi jico ivi yoo. <sup>3</sup>Ta já chindahá yéhé ivi testigo, na candixi jahmá ndahyí, ña ndíxi ñayivi tá cándí ini na. Ta cuhun na cahán na sahá yéhe tixi in mil ivi ciento uní jico quivi —nacachi na.

<sup>4</sup>Ta naxini i ivi yitó olivo xihín ivi nu sándójó ití, dó cíu yuhú nuu testigo ndíta nu Ndióxi, mé a sáhndá chuun nuú ñuyíví.

<sup>5</sup>Ta ni in na a cíu caja ni in ñaha xihín ndívi testigo Ndióxi yóho jáchí cuu caja na ña ná cana ñuhu ita ini yúhu ná ta cuu chicáan ñuhu nájá ná jándihí na sahá na ihví na. Ta quiahva já quivi ndá ná nánducú caja xíxi xihín ná. <sup>6</sup>Ndívi mé testigo Ndióxi yóho íin ndée na chicají na indiví já ná a cíun javí nani cahán na cuéntá Ndióxi nuú ñayivi. Ta íin ndée ná ndaja na ticuijí ña nándu do níi. Ta íin ndée ná chicáan na ndá cuehe cúní mé ná chicáan na jatá ñuyíví yóho. Ta núná nu ná caja na ña ndaja tañu cúní mé ná. <sup>7</sup>Joo tá sa nandihi nacahan ndívi testigo yóho xihín ñayivi janda jáví quivi in quití quini, rí queta tañu yávi, ña co xíní nu ndíhi nuu cán. Ta já cani táhan rí xihín ndívi na cán ta quee vaha rí xihín ná ta cahní rí na. <sup>8</sup>Ta já canduu yiquí cuñu ndívi na cán mahñú java ndaqá cayé ñuu Jerusalén nuú nasaahní na Jesucristo, mé a cíu xitoho i. Ta mé ñuu Jerusalén yóho cíu á yuhú nuú ñuu Sodoma xihín nación Egipto sahá cuahchi cuahá caja ñayivi ndúu cán. <sup>9</sup>Ta ñayivi ndúu ndijáá ñuu xihín ndijáá nación xihín na cahán tá nuú tuhun xihín na naquixi ndijáá chichi cuni na yiquí cuñu mé testigo Ndióxi yóho tixi uní quiví java. Ta a quiähva toho na ñamani jánduxu na ndívi testigo Ndióxi yóho. <sup>10</sup>Ta ñayivi ndúu ñuyíví cajii ndivaha iní na sahá ña naxihí ndívi testigo Ndióxi yóho. Ta cávatá na janda quiähva jasá ñaha nu táhan joho na sahá ña naxihí ndívi testigo Ndióxi, na najándo ho ndivaha iní ñayivi ñuyíví xihín ña nacahan na. <sup>11</sup>Joo

tá sa nayaha uni quíví java chí jánditacu Ndióxi ndíví testigo cán já ná ndacqo tucu na. Ta tá ná cuni ñayivi ña yóho casáhá quiji ninu na xihín ña yíhví na. <sup>12</sup> Anda já cuni joho ndíví testigo cán in a cáhan cóhó indíví. Ta já cache a já xihín ná:

—Cuándaa ndó chóho —cache a já xihín ná.

Já ndaa na indíví tañu in vico nuú ndihi ná ihví ná. <sup>13</sup> Ta mé hora já taaa ndeé ndiváha. Ta jándihi a in táhndá nuú uxu táhndá mé nuú cahnu cán ta já quivi usá mil ñayivi. Ta na coó naxihí cán chutú ndaa na xihín ña yíhví na ta já casáhá na caja cahnu na Ndióxi, mé a fin indíví.

<sup>14</sup> Sa nayaha va tondóhó cahví. Joo sa cátivi tondóhó cahnu vaxi a.

#### Tá natíví tátó Ndióxi trompeta cahusa

<sup>15</sup> Ta tátó Ndióxi ña cahusa cán natíví a inga trompeta. Ta tá natíví a do já naxini joho i cáhan cóhó cuahá ná indíví. Já cachí ná já:

Ta viti nandindaa hora sáhndá Ndióxi, xitoho í xihín Jesucristo chuun.

Ta mé á quéa nacindahá Ndióxi cacomí a cuénta sahá ñayivi.

Ta fin ndée a cahndaa chuun nuú ñuyíví yóho anda ama cása quivi, nacachi cuahá ná mé indíví.

<sup>16</sup> Ta ndíhoco comí ná sacuahá, ná nacava tiyivi nasanduu coo nu táyi vaha yati nu fin coo Ndióxi cán, nacaxítí ná janda quiahva nacani ndaa taan na nu ñuhu ta nacaja cahnu na Ndióxi. <sup>17</sup> Já nacachi na já xihín á:

Ndíquiahva nde ndixahvi nu ndóhó, Ndióxi, xitoho nde, mé a fin ndée caja tocó ndihi ñaha.

Janda tá cámání cava sahá sahá ñuyíví nasahíjn va mé ndó.

Ta sa já fin ndó viti ta quivi tucu ndó.

Ndáhá mé ndó fin ndihi ndée viti sahá ña cán quéa nacásahá ndó sáhndá ndo chuun nuú ñayivi.

<sup>18</sup> Ta ñayivi ndúu níi cíu ñuyíví nacásahá ná xójo ndiváha ini na.

Joo viti naxinu coo quivi caja xíxi ndó xihín na cán.

Ta viti naxinu coo hora caja vií ndó sahá ná sa naxihí.

Ta sa naxinu coo hora chahvi ndó nuú na profeta, na cáhan cuénta mé ndó.

Já naxinu coo hora chahvi ndó nuú ná cíu cuénta mé ndó, na caja cahnu mé ndó,

ta coó caja toho a á cíu ná náhnu á cíu ná ná válí.

Ta naxinu coo hora jándihi ndó sahá ñayivi quini, na caja ña níu xihín ñuyíví yóho, cachí ná cán caja cahnu na Ndióxi.

<sup>19</sup> Tá nandihí já naxini i nanuná yéhé veñihu Ndióxi, ña fin indíví. Ta cán tívi ndácaqan sató arca ñaha Ndióxi. Ta já nacásahá cána tasa. Ta naxini joho i jandá joho vaa cíu tacu cáhan ná. Ta nacásahá cána javi ta taaa ndeé ndiváha ta cíu ndiváha níi.

## 12

Naxini Juan ña ndúcú in coo quini caja xíxi rí xihín in ñáñáha

<sup>1</sup> Tá nandihí já naxini i nayaha in ña xitúhún ndiváha indíví. Naqueta in ñáñáha, ña cátivi jáhma ña cíu candii. Ta cándichi ña jatá yoo. Ta cánúu in tiyivi jini ñá, ña nacacutú xihín uxu ivi quimi. <sup>2</sup> Ta sa víxi ñá cacu jahyi ñá. Ta ndáhví ndáhvi ñá jáchi ndóhó ndiváha ini ñá janda quiahva ná cacu jahyi ñá. <sup>3</sup> Tá nandihí já nayaha inga ñaha cahnu indíví. Naxini i in coo quini, rí cuahá. Ta fin usá jini rí xihín uxu ndíqui ri. Ta cánúu in tiyivi jatá in in yíquí jiní ri cán. <sup>4</sup> Ta mé coo quini cán ñáñhu rí in táhndá nuú uní táhndá quimi ndúu indíví xihín ndóho ri. Ta já najaní rí mé quimi cán jatá ñuyíví. Ta mé coo quini cán nandaca ndichi rí yati nu fin ñáñáha cícu jahyi cán jáchi címu rí caxí rí jahyi ñá tá ná cacu a. <sup>5</sup> Tá nandihí já nacacu in taa jahyi ñá, da cahndaa ndee chuun saha tóco ndihi ñayivi ñuyíví. Joo nasañehe Ndióxi a ninu nu fin coo mé á. <sup>6</sup> Ta naxinu ñáñáha cán cuahán ná chí xoo yucú íchí jáchi mé cán sa nacacu tiahva Ndióxi nuú cuu coo ñá coto ñahá tixi in mil ivi ciento uni jico quivi.

<sup>7</sup> Tá nandihí já nacásahá cíu tondóhó indíví. Ta naxini i Miguel xihín tátó Ndióxi nacani tahan na xihín coo quini cán ta xihín tátó mé ri. <sup>8</sup> Joo coó nacuu quee vaha coo quini cán xihín tátó Ndióxi ña cán quéa coó nacuu canduu chágá rí cán indíví. <sup>9</sup> Ña cán quéa nacaná Ndióxi mé rí cán janda ñuyíví yóho. Mé rí nacahíjn rí janda sanahá ndiváha. Ta naní rí Satanás, mé tñáhá sacuahá, rí jándahvi tóco ndihi ñayivi ndúu

ñuyíví. Mé rí xihín tócó ndihi táto rí ndíco jata rí najácaná Ndióxi rí janda ñuyíví yóho.

<sup>10</sup> Tá nandihí já naxini joho i cahán cóhó in a indiví já cachí a já:

—Sa naxiny coo quiví cacu ndaa ínima ñayivi jáchí cómí Ndióxi cuéntá sahá ná xihín ndée mé á. Ta sa naxiny coo quiví cahnda Jesucristo chuuñ, mé a nachindahá Ndióxi cacomí cuéntá sahá ñayivi. Sahá ná cán quéa sa nataxí Ndióxi tiñahá sacuha nū fin mé á jáchí ñuu ta ndíví nasañihín rí nu mé á chicáan rí cuachi jatá na cíu cuéntá Jesús. <sup>11</sup> Mé ná cíu cuéntá Jesús naquee vaha na xihín rí sahá ná nacaja Jesús, mé a cíu tátuhun ndicachi loho tá naxita nii á ndíca crúxu sahá ná. Ta naquee vaha na xihín rí jáchí coó najándacoo na cahán ná ná ndaa sahá Jesús. Ta co yíhví toho na quivi na sahá mé á. <sup>12</sup> Tócó ndihi ndó, na ndíví xíní ñúhú cají ini ndó. Joo ndáhví naghá naçuu ná ndíví ñuyíví xihín ná ndíví ini tañuhú. Jáchí xójo ndivaha ini tiñahá sacuha ta nañuu rí caja xíxi rí xihín ndó jáchí cándaa vaha ini rí ná sa ja chá cuití cuni ndihi sahá rí —nacachi a indiví.

<sup>13</sup> Tá nacandaa ini mé coo quini cán ná najácaná Ndióxi rí ñuyíví já nacásahá rí ndicuña née rí ñáñáha, ná naçacu jahyi cán.

<sup>14</sup> Joo nañehé ná ivi ndixi náhnu ndivaha, ná cíu tátuhun ndixi tiyaha. Sahá ná cán quéa nandachí xícá ná nu mé coo quini cán cuahan ná yucu íchí nuú nasañihín ná. Ta cán coto na ná tixi uní cuiá java. <sup>15</sup> Tá nandihí já nacaja mé coo quini cán ná na queta cuahá ndivaha ticuij yúhu rí. Ta já nacavaha rí in yuta jáchí cuni rí játañu rí mé ñáñáha cán. <sup>16</sup> Joo nachindee ñundáhyi ñáñáha cán jáchí nandata ta naxihi ndihi a ticuij nacana yúhu mé rí cán. <sup>17</sup> Ta xihín ná yóho ví ga ví naxojo ini coo quini cán xihín ñáñáha. Sahá ná cán quéa naquee rí cuahán rí cani táhan rí xihín java ga táhan ná naquixi chichi mé ná. Mé ná yóho cíu ná na caja ná sáhndá tuhun Ndióxi ta co jándacoo na caja na ná ndaa ná nájáñaha Jesucristo nu ná.

### 13

Tá naxini Juan ivi quití quini

<sup>1</sup> Tá cándichi i nuú ñutí yúhu tañuhú já naxini i naqueta in quití quini tañu tañuhú cán. Ta nasañihín usá yiquí jíní rí xihín uxu ndíqui rí. Ta cánúu in tiyivi jatá in in ndíqui rí. Ta ndáa tuhun ná cánahá xihín Ndióxi

nú in in yiquí jíní rí. <sup>2</sup> Mé quití quini naxini i yóho, cása rí tá quiahva cása ndicaha. Ta sahá rí ndáa ná tá quiahva ndáa sahá oso. Ta yúhu rí cíu á tátuhun yúhu león. Ta mé coo quini cán nasañan rí ndée rí nu mé quití quini, rí naqueta in tañuhú yóho ná ná cíu cacomí rí cuéntá sahá ná cómí mé coo quini cán cuéntá sahá. Ta cíu caja rí ná cíu caja mé coo quini. <sup>3</sup> Ta in táhan ndíhusa yiquí jíní mé quití quini cán nandicuehá cahví ná. Joo tá nandihí já nandivaha ná. Sahá ná cán quéa ndaja táhan ñayivi ndíví ñuyíví naçatontó ndivaha na. Ta já naçasahá ná ndico na jata mé quití quini cán. <sup>4</sup> Ta naçaja cahnu ñayivi coo quini cán jáchí nasañan rí ndée rí nuú quití quini cán. Ta quiahva já naçaja cahnu na mé quití quini cán já cachí ná já:

—Coó ga inga rí cahnu chágua nu quití quini yóho. Ta ni in rí a cíu quihvi cani táhan xihín rí —cachí ná caja cahnu na mé quití quini cán.

<sup>5</sup> Ta mé quití quini cán nañehé rí ñamani ná ná cahán rí tuhun quini ndivaha, ná jándihihví rí Ndióxi. Ta nañehé rí ñamani cahnda rí chuuñ tixi ivi jico ivi yoo. <sup>6</sup> Sahá ná cán quéa naçasahá cahán quini rí sahá Ndióxi ta jándihihví rí mé á xihín ná nuú cahán rí. Ta cahán núu rí sahá mé nu fin Ndióxi cán xihín sahá tócó ndihi ná ndíví indiví. <sup>7</sup> Ta nañehé rí ñamani cani táhan rí xihín ná cíu cuéntá Ndióxi janda quiahva quee vaha rí xihín ná. Ta nañehé rí ñamani cahnda rí chuuñ sahá ndaja táhan ñayivi naquixi ndijáá chichi xihín ná cahán tá nuú tuhun xihín ná ndíví ndijáá ñuu xihín ndijáá nación. <sup>8</sup> Tócó ndihi ñayivi ñuyíví caja cahnu na quití quini cán jáchí janda tá cámpaní cava sahá sahá ñuyíví coó naçahyi toho quivi ná nu libro nu ndáa quivi tócó ndihi na catacu anda ama cása quivi. Mé libro yóho fin a nu Jesús, mé a cíu tátuhun ndicachi loho, rí naxihí ndíca crúxu.

<sup>9</sup> Cuni joho vaha ndó, ná vaha joho. <sup>10</sup> Ndá ná ná chicáan in na vecaa, cuhun rí mé va na vecaa. Ta ndá ná ná cahni inga na xihín yuchú cán, xihín yuchú cán quivi ri mé va na. Sahá ná cán quéa xíní ñúhú quiahva ndee in i ná cíu cuéntá Ndióxi ta xíní ñúhú candeé cahnu in i ná á.

<sup>11</sup> Tá nandihí já naxini i inga tucu quití quini, rí naqueta nuú ñundáhyi. Ta nasañihín ivi ndíqui rí ta ndáa ná tá quiahva ndáa ndíqui ndicachi. Joo cahán rí tátuhun

cáhan in coo quini. <sup>12</sup> Ta nacaja chún rí tóco ndihi ndéé mé quití quini nu cuítí cán nu íin mé rí. Nacaja rí ña ná caja cahnu tóco ndihi ñayivi ndíu ñuyíví mé rí naqueta nu cuítí cán. Jáchí nandicuehe cahví jiní rí nu cuítí cán joo nandivaha rí. <sup>13</sup> Mé inga quití quini cahví cán nacaja cuahá ndivaha rí ñaha xituhún. Nacaja rí ña ná quixi ñúhu cayí chí indíví ta naxinu a nacuyu a ñuyíví nu tóco ndihi ñayivi. <sup>14</sup> Ta najándahvi rí ñayivi ndíu ñuyíví xihín tóco ndihi ña xituhún, ña nañehe rí ñamani caja rí yóho nu mé rí nu cuítí cán. Ta nasañda mé inga rí cán chuuñu ñayivi ñuyíví ña ná cavaha na in tinijú yúu quití quini nu cuítí cán. Mé rí nandicuehe quini ndivaha rí xihín yuchú cán joo nandivaha rí. <sup>15</sup> Ta mé rí cahví cán nañehe rí ñamani ña jánditacu rí tinijú yúu mé rí nu cuítí cán já ná cuu cahán ri. Ta já ná cuu cahnda rí chuuñu ña ná cahní rí ñayivi, ná co cúní caja cahnu mé rí quini cán. <sup>16</sup> Ta mé rí cahví cán nacaja rí ña ná quíhvi marca ndahá cuáha ñayivi á taan na. Ta coó caja toho a á cútí ná na valí á ná náhnu, a cútí ná na cuicá á na ndahví. Ta ni coó caja toho a á cútí ná na xíca núná, a cútí ná na cómí xitocho cuénta saha. Nu tóco ndihi ñayivi naquíhvi marca nacaja mé rí cán. <sup>17</sup> Ta ni in ñayivi a cuú cueen na ñaha ta ni a cuú jicó na ñaha tá coó nanani mé marca cán ná. Ta tá co cándaa quiví mé quití quini, rí nu cuítí cán taan na á tá coó numero mé rí cándaa taan na já quéa a cuú cueen na ñaha jáchí numero yóho náhá ndaja naní mé rí nu cuítí cán.

<sup>18</sup> Xihín ña yóho cuu candaña ini ndó ndá na cuú ná ndichí jini. Ndó ndó, na cándaa ini xíní núhú jitá ndó cuénta xihín numero ña cuú quiví mé rí nu cuítí cán jáchí cuú á tátuhun quiví ñayivi. Ta numero yóho cuú á iñu ciento uní jico iñu.

## 14

Tá xíta in ciento iví jico comí mil ñayivi cajá cahnu na Ndióxi

<sup>1</sup> Tá nandihi já naxini i Jesús, mé a cuú tátuhun ndicachi loho cándichi a jata yúcu naní Sión. Ta xihín mé a ndíta in ciento iví jico comí mil ñayivi, ná ndáa quiví Jesús taan, mé a cuú tátuhun ndicachi loho cán. Ta quiahva já ndáa quiví Ndióxi, tátá a taan na. <sup>2</sup> Ta naxini joho i in a cáhan chí indíví. Ta tá cáhan mé a cán cuú á tátuhun tá níhi

cúyu ticuíi tañu tóto. Ta níhi a tátuhun tasa tá cána. Ta tácum a tá quiahva tácum nu jácaha cuahá ndivaha na arpa. <sup>3</sup> Ta naxini joho i ña saá xíta mé in ciento iví jico comí mil ñayivi nu fín coo Ndióxi cán xihín nuú comí mé ña tacum cán xihín nuú na sacuahá cán. Mé ná xíta cán cuítí va cuú ná cuu catiahva cata na ña jáchí cuú ná na nacaxi Ndióxi jácacu a tañu ñayivi ndíu ñuyíví. <sup>4</sup> Ta ná yóho cuú ná na víi, na coó nacaya quini mé jáchí coó nasanduu na xihín najihí. Cuú ná na nasandico níti tiempo jata Jesús, mé a cuú tátuhun ndicachi loho. Cuú ná na nacaxi Ndióxi jácacu a nu cuítí ña ná joco a na nu mé a xihín nu Jesús, mé a cuú tátuhun ndicachi loho. <sup>5</sup> Ta ni in táláa ña tuhún coó nacahan ná. Ta ni in na coó nacuu ñehe íní chichañ cuachi jata ná.

Tá cáhan uní tátó Ndióxi tuhun vaha saha Jesucristo nuú ñayivi ndíu ñuyíví

<sup>6</sup> Tá nandihi já naxini i inga tátó Ndióxi ndáchí a mahñú ndaa indíví. Ta ñehe a tuhun vaha sahá Jesucristo ña íin anda ama caá quiví caxi tuhun a ña nuú ñayivi ndíu ñuyíví, mé ná naquixi ndijáa chichi xihín na cáhan tá nuú tuhun xihín na ndíjáa níu xihín ndijáa nación. <sup>7</sup> Ta já cayuhú mé tátó Ndióxi cán já cachi a já:

—Xíní núhú cayihví ndó Ndióxi ta xíní núhú caja cahnu ndó mé a jáchí sa naxinu coo quiví caja vií mé a sahá ñayivi. Xíní núhú caja cahnu ndó mé a jáchí mé a quéa nacavaha indíví xihín ñuyíví ta mé a quéa nacavaha tañuhú xihín ndijáa nu cánica tuvíi —cachi tátó Ndióxi cán.

<sup>8</sup> Tá nandihi já naxini i inga tátó Ndióxi ta já nacachi a já:

—Ay, ay, sa nandihi va sahá níu cahnu naní Babilonia xihín sahá ñayivi nasanduu jan. Ta na jan nasacuu na ná najáñaha ichí quini nuú ñayivi ndíu ñuyíví já ná caja na tá nuú ña núa. Joo viti sa nandicava va mé Babilonia —cachi tátó Ndióxi, ña cahví cán.

<sup>9</sup> Tá nandihi já naxini i naqueta inga tátó Ndióxi, ña cahnu. Ta nacásahá cayuhú cohó a já cachi a já:

—Ndá ná ná caja cahnu quití quini xihín tinijú yúu rí ta sáhan na ñamani ña ná naní marca mé rí cán taan na á ndáha ná <sup>10</sup> já quéa ndoho ndivaha ini na caja Ndióxi jáchí xójo ndivaha ini mé a xihín ñayivi quini. Jácana Ndióxi ná nu cánada ñúhu cayí xihín azufre ta candehé tóco ndihi

táto Ndióxi ta candehé Jesús, mé a cúú tátuhun ndicachi loho cán ña ndóho na.<sup>11</sup> Ta cána ríjhma ini nuñu níhu mé ña ndóho ini cán andá ama cása quiivi. Ta ni ñuu ni ndiví co ndiquehe ndéé ná nuñu ndóho ini na jáchí nacaja cáhnu na quití quini cán xihín tñiñu yúú ri ta nasañan na ñamani ña nanani marca quiivi ri cán yiquí cuñu na.<sup>12</sup> Xímí ñuhú quiahva ndeé ini na cúú cuéntá Ndióxi, mé ña caja tóco ndihi ña sáhndá Ndióxi ta co jándacoo na ña caja cáhnu na Jesús —cáchí táto Ndióxi cáhuni.

<sup>13</sup> Tá nandihi já naxini joho i naquixi in a cáhán chí indíví já nacachi a já xihín i:

—Cahyún ña ná cahán i xuhyn yóho: “Viti ta chí nuñu cajíi ini na naxihí, na cándeé ini Jesús, xitoho na” —cáchí a.

Ta já cáchí ínimá yii Ndióxi já:

—Mé a ndaa cajíi ini na cán jáchí ndiquehe ndéé ná sahá ña nacaja chúun vaha na cuénta mí i. Ta ña vaha nacaja na cán coo a níí tiempo xihín ná —cáchí ínimá yii Ndióxi.

Tá jándoho Ndióxi ini ñayivi

<sup>14</sup> Tá nandihi já nasañehé e ta já naxini i in vico yaa. Ta cánuu in da cása tá quiahva cása in ñayivi jatá mé vico. Ta cánuu in tñiyivi jiuhun cuáán yiquí jímí da ta cánee in machiti tojo jeen ndáhá dá.<sup>15</sup> Tá nandihi já naqueta inga táto Ndióxi ini veñihu Ndióxi cán ta já cayuhú cóhó a já cáchí a já xihín mé da fin coo jatá vico cán:

—Xímí ñuhú casahún jáqueún ña fin ñuyíví xihín machiti tojo ñehún jan jáchí sa naxinu coo va hora jáqueún ña fin jatá ñuyíví jáchí sa nacachí vi viti —nacachi a.

<sup>16</sup> Anda já naxini i nacásahá mé da nasañu jatá vico cán jáquihvi da machiti tojo da jatá ñuyíví ta já nájáquee da ñaha jatá ñundáhyi.

<sup>17</sup> Tá nandihi já naxini i naqueta inga tucu táto Ndióxi ini veñihu fin indíví cán ta quiahva já cánee inga machiti tojo jeen ndáhá a.<sup>18</sup> Ta nu fin nu náa mé veñihu cán naqueta inga táto Ndióxi, mé a cómí cuéntá saha ñuhú ita ña cayí. Ta já nacahán cóhó a xihín mé táto Ndióxi nu cuítí cán, ña cánee machiti tojo jeen ndáhá cán já nacachi a já:

—Xímí ñuhú jáquihvún machiti tojo jeen cánee ndáhun jan ta casahá cahndún uva cúun nu dó uva ndúu ñuyíví jáchí sa nacachí uva nu do —nacachi a.

<sup>19</sup> Anda já jáyaha táto Ndióxi cán machiti tojo nuñu ñundáhyi ta já nasañhnda ndihi a uva nuñu tó uva cán ta nataán a uva cán ini in pila cáhnu ña cuhni ri. Ta ña yóho náhá ndá quiahva quini ndohó ini ñayivi caja Ndióxi jáchí xójo ndiváha ini a xihín ná sahá cuachi cája na.<sup>20</sup> Ta tá nasañhni uva cán ini mé pila cáhnu yuhú ñuu cán já nacana nii, dó cútú tátuhun yuta cúná janda quiahva cani ndaa dó yati yuhú in cuáyi. Ta tá quiahva cani xíca dó cuahán do cútú á tátuhun uní ciento kilómetro.

## 15

Tá xínu coo táto Ndióxi xihín usq chágá tondóhó quixi jatá ñuyíví

<sup>1</sup> Tá nandihi já naxini i inga tucu ña cáhnu chí indíví ta chí nacatontó i. Ta ña naxini i cúú usa táto Ndióxi ta in in ña yóho ñéhe a chágá tondóhó quixi jatá ñuyíví ña ná jándahi a ña xójo ini Ndióxi.

<sup>2</sup> Ta naxini i in ñaha ta náhá tátuhun in tañuhú ta tá quiahva fin nuñu yutatá quiahva já fin nuñu do joo cútú dó dó cavá táhan xihín ñuhú cayí. Ta yati jímí mé tañuhú náhá tátuhun yutatá cán ndita ñayivi, na nacandéé nasañnu nu tóco ndihi ña níu sahá ña coó nacaja cáhnu na quití quini xihín tñiñu yúú ri. Ta ni coó naquehe na túni ña cúú numero mé ri quini cán. Ta mé ña ndita cán cánee arpa ndáhá na, dó nasañan Ndióxi nu ná. <sup>3</sup> Ta xíta na ña naxita Moisés, mé da nacaja chúun cuéntá Ndióxi. Ta xíta na ña naxita Jesús, mé a cúú tátuhun ndicachi loho cán ta já cáchí na já:

Catóntó nde tá xímí nde tóco ndihi ña nacavaha mé ndó, Ndióxi, xitoho nde, jáchí fin ndeé ndó caja ndó tóco ndihi ñaha. Íchi cuéntá mé ndó cútú á ichí ndacú ta cúú á ichí cuéntá ña ndaa.

Ta mé ndó cútú ndó ña cómí cuéntá sahá ndaja táhan nación ndúu ñuyíví yóho.

<sup>4</sup> Tóco ndihi ñayivi yíhví ña ndohó, mé a cúú xitoho nde ta cáhán ña ndaja cáhnu cútú mé ndó.

Jáchí in tühún mé ndó cútú ndó Ndióxi yii. Ta tóco ndihi ñayivi ndúu ndijáá nación xínu na caja cáhnu na mé ndó, jáchí náhá ndá quiahva cája ndó ña ndaa, cáchí na xíta na.

<sup>5</sup> Ta tá sa nayaña ña yóho já nasañehé ta naxini i nánuna veñihu indíví, ña nacavaha na xihín níi quiti. Ta nasañuhu ley Moisés

cán. <sup>6</sup> Ta ini mé veñuhu indíví naqueta ndíhusa tátó Ndióxi, mé a ñéhe usá nuú tondóhó quixi jatá ñuyíví. Ta ndíxi tátó Ndióxi cán jahmá vií, ña lino, ña ndató ndiváha yéhe. Ta ndácaan in cinturón ña jiuhun cuáan tóco a ta cán a jandá yati yicá ndícá a. <sup>7</sup> Ta in táhan ndícomí mé ña tacú cán nasáhan in in cóhó, ña jiuhun cuáan nuú in in táhan ndíhusa tátó Ndióxi cán. Ta ini in in cóhó cán ñúhu ndaja táhan tondóhó ña vaxi jatá ñayivi ndíu ñuyíví caja Ndióxi, mé a tacú andá ama cáá quiivi. <sup>8</sup> Ta náchutú ndaa veñuhu cán xihín ñíhma, ña náhá ndá quiahva cahnu cíu Ndióxi xihín ndá quiahva cahnu cíu ndéé mé á. Ta ni in na coó náñehé ñamani quiivi ini veñuhu cán jandá quiahva naxinu ndíhusa tondóhó, ña ñéhe ndíhusa tátó Ndióxi cán.

## 16

### *Usa coho ña ñúhu usa tondóhó*

<sup>1</sup>Tá nándihi já naxini joho i nacahan cóhó in a tañu veñuhu indíví cán. Ta já cachí a xihín ndíhusa tátó Ndióxi cán já:

—Cuáhán ndó cuyu ndó ndíhusa coho jan jata ñuyíví. In in a cán cíu á in tondóhó chindahá Ndióxi jata ñuyíví ta ndoho ndiváha ini ñayivi xihín á —cachí a.

<sup>2</sup> Andá já in tátó Ndióxi, mé a nu cuítí nasáhan nacuyu a ña ñúhu ini coho ñéhe a cán jata ñuyíví. Ta já naxinu cuehe táhyi, ña ihyi ndiváha yiquí cuñu ñayivi, ña naquehe marca quití quini cán, mé na nacaja cahnu tñijñu yúu ri.

<sup>3</sup>Tá nándihi já inga tátó Ndióxi ña cahiyi cán nacuyu a ña ñúhu ini coho ñéhe a jata tañuhú. Ta tóco ndihi dó nanduu dó nii tátuhun nii ndii. Ta tóco ndihi ña tacú ini tañuhú cán naxili ndihi a.

<sup>4</sup> Ta tá nándihi já nacuyu tátó Ndióxi ña cahuni cán ña ñúhu ini coho ñéhe a jata ndijáá yuta xihín ndijáá nu cánica ticiui ta nanduu dó nii. <sup>5</sup>Tá nándihi já naxini joho i cahán in tátó Ndióxi, mé a cómí cuénta sahá ticiui cán já cachí a já:

—Tátó Ndióxi, mé ndó caja ndó ña ndaa jachí nacaja vií ndó sahá ñayivi jan. Yii ndiváha cíu ndó ta ín ndó viti ta jandá saha nasahijin ndó. <sup>6</sup>Najándohó ndó ini ñayivi jan jachí násata na nii na cíu cuénta mé ndó xihín nii na profeta tá nasahni ñahá na. Joo viti nacaja ndó xihín na ña na coho na nii já

ná ndoho ini na. Ta quiahva já cán a coo a —nacachi tátó Ndióxi cán.

<sup>7</sup>Tá nándihi já naxini joho i in a cahán nu ná Ndióxi cán já cachí a já:

—Tátó Ndióxi, mé ndó cíu ndó xitohó nde ta ín ndéé ndó caja ndó tóco ndihi ñaha. Ta nacaja ndó ña ndaa tá nacaja vií ndó sahá ñayivi —cachí a.

<sup>8</sup>Tá nándihi já naxini i inga tátó Ndióxi ña cacomí cán ta nacuyu a ña ñúhu ini coho ñéhe a jata candii. Ta xihín ña yóho náñehé candii cán ndéé á chican cíu ñúhu a ñayivi xihín ñúhu cayi. <sup>9</sup> Ta já nacayi quini ndiváha tóco ndihi ñayivi. Joo coó náxeen na ndicó coó ini na ta ni coó nacaja cahnu na Ndióxi. Ña nacaja na quéa nácasáhá na cánahá ndiváha na xihín Ndióxi, mé a ín ndéé nu tóco ndihi tondóhó quixi jata ñuyíví yóho.

<sup>10</sup>Tá nándihi já naxini i inga tátó Ndióxi, ña cahuhun cán ta nacuyu a ña ñúhu ini coho ñéhe a jata tayi nu ín coo quití quini cán. Ta já naxini i nacanaá yáví mé nu ndúu na sáhndá rí chuun nu cán. Ta já nacasaáhá mé na cán sáxi yihí na yáa nájachi nacasaáhá ndóhó ndiváha ini na. <sup>11</sup>Joo coó najándacoo na ña nuú caja na. Ta sahá ña nacahiyi ndiváha yiquí cuñu na cán xihín cuehe ndóhó na já nacanahá ndiváha na xihín Ndióxi, mé a ín indíví.

<sup>12</sup>Tá nándihi já naxini i inga tátó Ndióxi, ña cahiyi cán ta nacuyu a ña ñúhu ini coho ñéhe a jata in yuta cahnu namí Eufrates. Ta já náhichi ndihi ticiui nasañuhu ini yuta cahnu cán ta já namanu nuú yaha na cíu rey, na náquixi chí xoo nu cána candii.

<sup>13</sup>Tá nándihi já naxini i naqueta uní íníma quini. In rí naqueta yúhu coó quini ta inga rí naqueta yúhu quití quini ta inga rí naqueta yúhu da cíu profeta túlhún cán. Ta mé íníma quini cán ndáa tá quiahva ndáa láhvá cíhndó. <sup>14</sup> Ta rí cán cíu íníma rí quini, rí nacaja ña xituhún nuú ñayivi. Ta cíu rí rí quéta cuahan játaca ndaja táhan rey sáhndá chuun nuú ñayivi ndíu ñuyíví já ná cani táhan na xihín Ndióxi. Jáchí sa nacayati quiví náhá ndá quiahva cahnu cíu Ndióxi jachí mé á quéa ín ndéé caja tóco ndihi ñaha. <sup>15</sup> Andá já nacachi Ndióxi já: “Cuénta coo ndó jachí tá quiahva jonáá xínu da cujhá quiahva já jonáá xínu i nu ndo. Ín saha cajíi ini ndá na sa ndáti tiahva saa i jachí cíu ná tátuhun na nácasáhá

tiahva jáhma. Já quéa ná a cácahan nuu ná tá ndáa lahl na nuu ñayivi”, cachí a.<sup>16</sup> Ta rí quini cán najátaca rí tóco ndihi rey sáhndá chuun nuu ñayivi in nuu naní Armagedón tuhun hebreo.

<sup>17</sup>Tá nandihí já inga tátó Ndióxi ná cahusa cán nacuyu a ná ñihu ini coho ñehe a nu táchí. Ta já naxini joho i cahán in a ini veñuhu indívnu ín coo Ndióxi ná saco rey cán. Ta cahán cohó a já cachí a já:

—Sa nayaha tóco ndihi ná ndítahan coo —nacachi a.

<sup>18</sup>Tá nandihí já naxini i nacásahá cána tasa. Ta naxini joho i jandá vaa joho cíu tacu cahán ná. Ta naxini joho i jandá joho cína javí. Ta nacásahá quíji nínu ñundáhyi jáchí nacásahá táan ndee ndivaha. Ta mé nditáan yóho nasacuu a ná ndee chágaa nu tóco ndihi ná tán jáchí jandá quíji nasacu Ndióxi ñayivi ñuyíví coó naquixi inga nditáan ndee tátuhun ná yóho.<sup>19</sup> Ta mé nínu cahnu ndivaha cán nandata uní ná. Ta ndijáa ga nínu náhnu ndíu ñuyíví nacuyu ndihi a. Ta nandicyhun ini Ndióxi sahá nínu cahnu naní Babilonia cán ta najándo ho mé a ini ná ndíu cán jáchí xójo ndivaha ini a xihín ná. Ta ná ndóho na cíu á tátuhun xíhi na vino cuénta tondohó.<sup>20</sup> Ta tóco ndihi isla ñihu ini tañghú xihín ndijáa java ga yúcu ndíu jata ñundáhyi nandihí sahá.<sup>21</sup> Ta naxini i nacuun níi náhnu ná vee ndivaha tátuhun ivi jico kilo in in a. Ta jandá indívna quee nacuyu a jata ñayivi ndíu ñuyíví. Ta nacásahá ná caháha ná xihín Ndióxi sahá ná najácyu a níi yóho jata ná. Jáchí mé a ndaa ná yóho násacuu a in tondohó cahnu ndivaha naquixi nu ná nacaja Ndióxi.

## 17

### Tá jandihí Ndióxi sahá ná xíca jii

<sup>1</sup>In táhan ndíhusa tátó Ndióxi ná cahne in táhan usa coho ndáha cán naxinu a nuu i já nacachi a já xihín i:

—Naha quíi yóho jáchí cíni jánahá i nuun ndá quiqhva ndoho ini ná xíca jii, ná cahnu, ná ín coo nuu caháha ticui. <sup>2</sup>Tóco ndihi ná cíu rey ndíu ñuyíví yóho naquiji ná xihín ná cán. Najáxini ná tóco ndihi ñayivi ñuyíví xihín ná nínu nacaja ná tá naquiji ná xihín ná coo cíu yíi ná —nacachi tátó Ndióxi cán xihín i.

<sup>3</sup>Anda já nacaja ínimá yíi Ndióxi xihín i ná ndáca tátó Ndióxi yehe násahan i yucú

íchí xihín á. Ta cán naxini i in náñahá cahnu jata in quití quini, rí cuáhá. Ta níi cíu rí nacacutú xihín tuhun quini ná caháha xihín Ndióxi. Ta naxini i ín usa yíquí jíni rí xihín uxu ndíqui ri. ‘Ta mé ná cahnu jata rí cán ndíxi ná jáhma ndíhí ticayí, ná nacava táhan xihín ná cuáhá. Ta nacacutú ná xihín jihun cuáán xihín yuu yáhví ndivaha xihín perla. Ta naxini i cahne in coho jihun cuáán ndáha ná. Ta nachutú ndaa coho cán xihín ná nínu ta xihín ná tiquini nacaja ná xihín dataa.<sup>5</sup> Ta ndáa in tuhun taan ná, ná co cándaa ini ñayivi. Ta já cíni cachi mé tuhun cán: “Nínu Babilonia cíu nínu cahnu ta cíu á tátuhun náñá tóco ndihi najíhí xíca jii. Ta cíu á tátuhun náñá ndaja táhan ga ná nínu ndíu ñuyíví yóho.”<sup>6</sup> Tá nandihí já náha ná naxini ndivaha mé náñahá jáchí naxihi ná níi ná cíu cuénta Ndióxi, ná naxihi sahá ná coó najándaco na cahán ná sahá Jesús. Ta tá naxini i ná yóho já nacatontó ndivaha i.<sup>7</sup> Ta já nacachi tátó Ndióxi cán já xihín i:

—Ndá cuénta quéa cátontó náhún. Xíni ñuhú cuni joho vahún ná cahán i xuhun jáchí ndicani i nuun ndíu cíni cachi ná ín jehé sahá náñahá yóho. Ta jári ndicani i nuun ndíu cíni cachi quití quini, mé rí cánúu ná, rí ín usa yíquí jíni xihín uxu ndíqui cán.<sup>8</sup> Mé quití quini naxinú yóho násatatu rí sanahá joo viti co tácú ga ri. Joo vaxi quívi ndindita rí ta queta rí tañu yávì, ná co xínu nu ndíhi nínu cán. Ta tá nandihí já cuhun rí ndihi sahá ri chí uun. Ta cátontó ndivaha tóco ndihi ñayivi ndíu ñuyíví, ná coó nacahí quívi jandá tá cámpaní cava sahá sahá ñuyíví nu libro nu ndáa quívi tóco ndihi na catacu andá ama cína quívi. Cátontó ndivaha na tá ná cuni na mé quití quini yóho, rí násahíñ sanahá ta co tácú ga ri viti joo nditacu tucu rí nu ná.

<sup>9</sup>Ta ndá ndó, ná ndíchí jíni, cuu cándaa ini ndó ná yóho: Ndíhusa yíquí jíni quití quini cán cíu á yuhú nuu usa yúcu nu ín coo mé náñahá xíca jii cán.<sup>10</sup> Ta jári cíu á yuhú nuu usa rey. Ta uhun táhan rey yóho sa nandihí va sahá. Ta inga táhan rey yóho sáhndá da chuun nuu ñayivi viti ñuhú. Ta inga ga rey ná cahusa cán cámpaní xínu coo. Joo tá ná xínu coo da yóho já a cío nahá toho da cahnda da chuun nuu ñayivi.<sup>11</sup> Ta quití quini, rí násatatu sanahá ta viti sa coó ga ri, rí cán cíu rí yuhú nuu rey, da cahuna cán. Vatí cíu dá táhan java ndíhusa rey cán

joo tá nändihi cahnda da chuun cuhun dñihi sahá dá chí uun.

<sup>12</sup> Ta ndíhxu ndíquí naxinún yóho cùú á yuhú nuú uxu rey, mé na cámäni casáhá cahnda chuun nuú ñayivi ndíu ñuyiví. Joo in tálalá hora ñehé tálvi na cahnda na chuun xihín mé quítí quini cán nuú ñayivi tátuhun rey. <sup>13</sup> Ta ndíhxu rey yóho jándique táchan na tuhun na ña ná quiähva na ndée ná nuú mé quítí quini já ná cahnda rí chuun. <sup>14</sup> Ta cani táchan ndíhusa na cán xihín Jesús, mé a cùú tátuhun ndicachi loho cán. Joo quee vaha Jesús xihín ná jachí cùú á xitoho na náhnu ndíu ñuyiví yóho ta cùú á rey nuú ndaja táchan rey. Ta xoo Jesús cán canduu na nacana Ndióxi, mé na nacaxi a cacomí a cuénta sahá. Cùú ná ná coó najándaco ña cández ini na mé a —nacachi tátó Ndióxi xihín i.

<sup>15</sup> Tá nändihi já nacachi tucu tátó Ndióxi cán já xihín i:

—Ticuií, dó naxinún nuú fin coo ñá xica jii jan cùú dö yuhú nuú ndijáá ñuu xihín ndijáá nación xihín ndijáá ñayivi, na cahndá tá nuú tuhun. <sup>16</sup> Ta ndíhxu ndíquí naxinún nuú quítí quini jan cùú á yuhú nuú mé uxu rey, na candají ñá xica jii jan. Ta jándacoo na ña ta já caca lahlá ña. Ta caxí ndáá na yiquí cuñu ña. Ta chicaq níhu ná ña xihín níhu cayí. <sup>17</sup> Jachí jaxinu Ndióxi ini na cán ña ná caja na ña cùní mé á. Ta jándique táchan na cán tuhun na ña ná ndiquiahva na chuun ndójó na nuú mé quítí quini cán ña ná cacuu rí tátuhun rey janda quiähva ná xínu coo nuú ña nacachi Ndióxi coo. <sup>18</sup> Ta náñáha naxinún cán cùú ñá yuhú nuú ñuu cahnu cán ña sáhndá chuun nuú ndaja táchan na cùú rey —cáchí tátó Ndióxi cán.

## 18

### Tá jándihi Ndióxi sahá ñuu Babilonia

<sup>1</sup> Tá sa naya ha tóco ndihi ña yóho já naxini i inga tátó Ndióxi, ña ndójó chuun cahnu ta nánuu a chí indíví. Ta chí nändiyihví ndaa jatá ñuyiví xihín quiähva yéhe mé tátó Ndióxi cán. <sup>2</sup> Ta já nacásahá cayuhú cóho a já cáchí a já:

—Ay, ay, sa nändihi va sahá ñuu cahnu Babilonia cán ta nánduu a tátuhun cavá tiñáhá. Cúú á tátuhun nuú nändicutú ndaa ímima quini ñíhu rí. Ta nánduu a tátuhun in choho nuú ñíhu tá nuú laa quini, rí cándezí ñayivi. <sup>3</sup> Nändihi sahá ñuu Babilonia

yóho, mé a cùú tátuhun in ñáñáha xica jii. Jachí najáxini ñá ndaja táchan ñayivi ndíu ñuyiví ta najácahan ñá na ña ná caja na tá nuú ña ná xíca ini na caja na. Ta mé na ñuu Babilonia jan násahan na ñamäni ña ná xínu coo ndaja táchan dñihi náhnu sáhndá chuun nuú nación ña ná xínu dñihi ñuu Babilonia jan cuju da xihín ñá xica jii jan. Ta na caja ndähví ndicuicá na xihín tá nuú ña ná caja ñá jachí sáta joho ñá ña cuicá ña —cáchí tátó Ndióxi cán.

<sup>4</sup> Tá nändihi já naxini joho i inga cáhan chí indíví ta já cáchí a já:

—Ndóhó, na cùú cuénta mí i, cuáqueta ndó jatá ñuu jan já ná a caja ndó cuachi caja na ñuu jan. Ta já ná a xínu coo tondóhó vaxi nuú na ñuu jan jata ndó. <sup>5</sup> Jachí sa nacacuahá ndivaha cuachi na ta janda indíví xínu coo cuachi na. Ta co ndíndójó Ndióxi sahá cuachi caja na. <sup>6</sup> Ta já quiähva nacaja na jan xihín inga ñayivi quiähva já ndítahan caja ndó xihín ná viti. Ta janda ivi tálndá chágá ví ndicó coo ndó caja ndó xihín ná. Ta tá quiähva najácoho na jan inga ñayivi quiähva já ivi tálndá chágá ví ndítahan quiähva ndó nuú ná coho na. <sup>7</sup> Nändihehe jicó ndivaha na mé ná sahá ña cán quéa ndítahan jándoho ndivaha ndó ini na viti. A juú quiähva nánduu cuicá na sahá ña cán quéa ndítahan caja xixi ndó xihín ná viti. Cáhán na ña cahnda na chuun nuú in nación. Ta cáhán na ña a ndóhó toho ini na. Ta cáhán na ña co cùú ná tátuhun in ñá cuáan. <sup>8</sup> Sahá ña cán quéa tixi in tálalá quivi quivi tá nuú ña ná nuú nuú ná. Já casáhá quivi na ta cacehá ndivaha ini na ta xínu joco nuú ná. Ta já chicaq Ndióxi na nuú níhu cayí jachí jándihi Ndióxi, xitoho í sahá ná, mé a fin ndée caja tóco ndihi ñaha —cáchí a.

<sup>9</sup> Ta já casáhá cuacu ndijáá rey, na sáhndá chuun nuú ñayivi ndíu ñuyiví. Ta tálndá ini na tá ná cuni na ñíhma cánna ñuu Babilonia cán. Jachí mé na náhnu yóho naquihví nuu na xihín ñá xica jii cán ta najátví na jíuhún na xihín ña. <sup>10</sup> Ta xíca xíca násacandichi na jachí yihví na sahá ndá quiähva quini ndóhó ini ñá cùú yuhú nuú ñuu Babilonia cán. Ta já casáhá cáchí mé rey cán já:

—Ay, ay, ndähví náhá nacuu ndó, ñuu Babilonia jáchí vatí cùú ndó ñuu cahnu ndivaha joo in too joho naxinu hora ndóhó ini ndó —cáchí na cán.

<sup>11</sup> Ta ndijáá ná cája ndahví ndúu ñuyíví cuacu ri ná cán va ta tähndä ndiváha ini na sahá ñuu Babilonia jan jáchí a cóo ga na cueen ñaha ndójo na xínu coo na. <sup>12</sup> Ta ña sándojo na cán quixi na jicó na cúu jiuhun cuáán xihín jiuhun cuxú xihín yuu yahvi ndiváha xihín perla vaha xihín jahmá vaha ndiváha ña cávaha xihín yahva naní lino xihín jahmá seda xihín jáhma ndlhí ticayí xihín jáhma cuáhá nii xihín ndijáá nuú yító támi sáhan xihín ñaha cávaha xihín nuhu yóco elefante xihín ndijáá yító yahvi ndiváha xihín ndijáá ñaha cávaha xihín caa cuáán xihín ña cávaha xihín caa uun ta jári ñaha cávaha xihín yuu naní mármol. <sup>13</sup> Ta quiahva já sáñehe na canela xínu coo na xihín ndijáá ñaha támi sáhan. Ta ñéhe na jusa xihín mirra xihín perfume viti. Ta quiahva já ñéhe ri na vino xihín aceite xihín harina vaha xihín trigo. Ta quiahva já sáñehe ri na quití xójo xihín ndicachi xihín cuáyí xihín carreta. Ta janda ñayivi xéen na caja chúun nuú ná sáñehe na. Ña yóho sándojo na quíxi na joo ni in na a cuéen ga ñaha na. <sup>14</sup> Ndijáá ná cája ndahví cán cahán na xihín ñuu Babilonia cán já cachí na já:

—Coó ga cuihi vaha, rí cátóo náhá ndó caxí ndó. Ta viti sa nändihi sahá tóco ndihi ña lända xihín ña cuicá násanduu nuú ndó jan —cachí ná.

<sup>15</sup> Ta na nácaja ndahví xihín tóco ndihi ñaha yóho nändicúcá ndiváha na xihín ndahví nácaja na xihín na ñuu Babilonia cán. Ta xícá xícá candita na candehé na ñuu Babilonia cán jáchí ylhví ña ndoho na tá quiahva ndóho ini na cán. Ta cuacu ndiváha na ta tähndä ndiváha ini na. <sup>16</sup> Ta já cachí na já:

—Ay, ay, ndahví náhá nácuu ñuu cahnu Babilonia jan. Ndató ndiváha násanahá ñuu yóho tátuhun in náñáha ndíxi jahmá lino vaha ndiváha xihín jahmá ndlhí ticayí xihín jahmá cuáhá nii. Ta nácacutú ñá xihín jiuhun cuáán ta xihín yuu yahvi ndiváha ta xihín perla. <sup>17</sup> Joo in too joho nändihi sahá tóco ndihi ña cuicá násacomí mé ñuu Babilonia jan —nácachi na.

Ta ndijáá ná sáhndá chuun nuú ná ñéhe barco, xihín ndijáá ná cándójó xícá xihín ndijáá ná cája chúun ini mé barco cán xihín ndaja tähán na cája ndahví xihín ña quixi chí tañuhú cán násandita xícá ná sández

ná. <sup>18</sup> Ta tá náxini na ndíndita ñihma ña cayí ñuu cán já nácajuyú na já nácachi na já:

—Ni in túhún toho inga ga ñuu co quée táhan xihín ñuu Babilonia ña cahnu yóho —nácachi na.

<sup>19</sup> Ta xihín ña tähndä ini na náchojó na ña yácá jini ná. Ta nácasáhá sácu ndiváha na já cayuhú na já cachí na já:

—Ay, ay, ndahví nahá nácuu ñayivi násanduu ñuu cahnu jan jáchí xihín ña cuicá násacomí na najácacuícá na ndijáá da xíca nuú tañuhú xihín barco. Joo in too joho nändihi sahá ña jan —cachí ná cán sácu na.

<sup>20</sup> Ta ndítahan cajii ini ná ndúu indíví sahá ña nändoho ñuu cahnu yóho. Ta quiahva já ndítahan cajii ri imi ndijáá ná cúu cuéntá Ndióxi xihín na cúu apóstol xihín na cúu profeta. Jáchí xihín ña nácaja Ndióxi xihín ñuu Babilonia yóho nändiquehe a cuéntá sahá ña ñuu nácaja mé ná cán xihín ndó, na cúu cuéntá Ndióxi.

<sup>21</sup> Tá nändihi já náxini i in tátq Ndióxi, ña fín cuahá ndéé. Ndínehe a in yuu cahnu ña cúu á tátuhun in yuu yojó. Ta najácaná a ña ini tañuhú ta já nácachi a já:

—Tá quiahva najácaná i yuu yojó yóho ini tañuhú ta násaco a cahá tañuhú cuahán quiahva já yaha ri xihín ñuu Babilonia. Vatí cúu a in ñuu cahnu ndiváha joo andá ama cása quívi a ndíco coo ga ñayivi cuni na ña.

<sup>22</sup> Ta ni mísica a tácu ga mé ñuu jan ta ni a cáha ga arpa ni tóyoó ni trompeta. Ta ni in ga ñayivi a cája chúun ga ñuu jan jáchí ni in túhún toho ndahví a cája na. Ta ni a tácu ga yuu yojó ña ndíco najihí. <sup>23</sup> Ta janda ni in ití loho a túun ga ñuu jan. Ta ni a cahán ga ñayivi vicó tándahá jáchí coó ga ña jan coo. Jáchí na najíco ñaha cán násacuu na náhnu ndúu ñuyíví ta nájándahví na ndaja tähán ñayivi ndúu ñuyíví xihín ña tají nácaja na —cachí tátq Ndióxi.

<sup>24</sup> Ta ndoho ini na jáchí mé ñayivi ñuu Babilonia jan násahní ná profeta xihín ná cúu cuéntá Jesús ta andá cuahá ñayivi ndijáá ñuu ñuyíví násahní ñahá ná.

## 19

<sup>1</sup> Tá sa náyaha tóco ndihi ña yóho já náxini joho i cahán cóhó cuahá ndiváha ñayivi indíví ta já cachí ná já:  
Cahnu cúu Ndióxi jáchí in túhún mé á quée jácacu mí.

Ta íin ndéé mé á caja tóco ndihí ñaha ta cání nu yó caja cáhnu ndiváha í mé á.

<sup>2</sup>Jáchí ndaa caja ndihí mé á ñaha tá caja vií a sahá ñayivi.

Ta ndaa nacaja mé á tá nasacu ini a jándihí a sahá ñuu Babilonia jan jáchí nasacuu a tátuhun ñá xíca jii.

Jáchí xíhín tóco ndihí ñá níu nasacaja ñá ñá quíji ñá xíhín na co cíu yí ñá najátví ndihí ñá ñayivi ndúu ñuyíví.

Sahá ñá cán quéa najándihí Ndióxi sahá ñá ta já natahndá cuéntá sahá ñá nacaña ñá tásahní ñá na cíu cuéntá Ndióxi, cachi na cahán indíví cán.

<sup>3</sup>Tá nandihi já nacásahá tucu na cán cahán na já cachí na já:

—Cáhnu cíu Ndióxi jáchi nacaja mé á ñá cayí ñuu cán ta andá ama cáa quíji ndíndita ñíhmá ñá —já cachí na indíví cán.

<sup>4</sup>Ta ndihoco comí na sacuahá ndúu cán xíhín ndícomí mé ñá tacú cán nacaxítí na janda quiáhva nacani ndaa taan na nu ñuhu ta já nacaja cáhnu na Ndióxi, mé a íin coo nu sácoo rey cán. Ta tá caja cáhnu na Ndióxi já cachí na já:

—Já ná coo. Cáhnu cíu Ndióxi —cachí na.

<sup>5</sup>Ta janda nu íin coo Ndióxi cán naximi joho i cahán in a ta já nacachi a já:

—Tóco ndihí ndó, na caja chúun cuéntá mé a xíní ñuhú caja cáhnu ndó Ndióxi, mé a caja cáhnu í. Coó caja toho a á cíu ndó na náhnu á na valí jáchi caja ndó ñá sáhndá mé á —cachí a.

Tá coo víco indíví sahá ñá ndiquehe Jesucristo na cíu cuéntá mé á

<sup>6</sup>Tá nandihi já naxini joho tucu u ñá tacú tátuhun tá cahán cuahá ndiváha ñayivi. Ta tacú ñá tátuhun tá cahá cíu ticuij tañu cava ta tacú ñá tátuhun tá cahá tasa. Ta já cachí na já:

Cáhnu cíu Ndióxi, xitohí í, mé a caja cáhnu í jáchi sa nacásahá mé á comí a cuéntá sahá ñayivi viti.

Ta íin ndéé mé á caja tóco ndihí ñaha.

<sup>7</sup>Xíní ñuhú cavatá yo ta xíní ñuhú cajii ndiváha iní caja cáhnu ndiváha í mé á.

Jáchí sa naxinu coo quíji ndiquehe Jesucristo, mé a cíu tátuhun ndicachi loho, na cíu cuéntá mé á.

Cacuu a tátuhun tándahá Jesucristo xíhín na cíu cuéntá mé á, na sa ndúu tiahva na tandahá na xíhín mé á.

<sup>8</sup>Ta ñehé táchí na candixi na jahmá vaha ndiváha, ñá naní lino ta cíu á ñá ví ndiváha ta ndató ndiyihví a, cachí na.

Jáchí mé jahmá víi ñá naní lino cán náhá ñá naxixa vaha na cán íchí cuéntá Ndióxi.

<sup>9</sup>Tá nandihi já nacachi mé tátó Ndióxi já xíhín i:

—Cáhuyún ñá yóho. Cajii ini ñayivi, na nacana Ndióxi cuhun indíví tá ná xinu coo quíji ndiquehe Jesucristo, mé a cíu tátuhun ndicachi loho cán, na cíu cuéntá mé á —nacachi tátó Ndióxi cán xíhín i.

Ta nacachi tucu a já:

—Mé a ndaa ndinuhi tuhun Ndióxi cíu ñá yóho —nacachi a xíhín i.

<sup>10</sup>Andajá nacaxítí i nu tátó Ndióxi cán ñá na caja cáhnu i ñá. Joo já nacachi a já xíhín i:

—A caxítí tohún nuú yéhe jáchi ndítahan caja cáhnu Ndióxi. Jáchí yéhe cíu u da caja chúun nu Ndióxi tá quiáhva caja chúun yóhó xíhín java ga na cíu cuéntá Jesús, na cíu ñanúu, na co jándacoo cahán ñá ndaa, ñá najánhá Jesús nuú ñayivi. Caja cáhnu Ndióxi —cachí a.

Jáchí na cíu profeta cándezé ini na ñá jánahá Jesús ñá ndaa sahá ñá cán quéa cahán na ñá nuú ñayivi.

Tá naxini Juan in a cánúu cuáyi yaa

<sup>11</sup>Tá nandihi já naxini i nanuna indíví ta naqueta in cuáyi yaa. Ta mé a cánúu rí cán naní a: mé a co cava ivi joho ini. Ta naní tucu a: ñá ndaa. Jáchí ndaa caja víi a sahá ñayivi ta ndaa caja mé á tá quíhi táchan cání táchan xíhín ná. <sup>12</sup>Tá tá quiáhva yéhe nu cándaa ñuhú cayí quiáhva já yéhe nduchú nuú a. Ta cándojó cuahá ndiváha tiyivi jini á. Ta ndaa in quíji taan mé á joo in túhún mé a xíní ndá quíji quéa ndáa taan. <sup>13</sup>Ta naxini jahmá mé á xíhín nii. Ta naní a: tuhun Ndióxi. <sup>14</sup>Ta naxini i ndíco in táchndá cáhnu soldado cuéntá indíví jata cuahán na xíhín á. Ta ndíxi na jahmá vaha ñá naní lino. Ta cíu á jahmá yaa cachí, ñá ndató víi ñá. Ta in in na cán cánúu cuáyi yaa cásahán na xíhín á. <sup>15</sup>Ta yúlu mé á ñá cíu tuhun Ndióxi cán quéa in yúchú cání ñá jeen ndiváha. Ta xíhín mé yúchú jeen cán jándicuehe quini ndiváha mé á ndijáá ñayivi ndúu ñuyíví. Ta cahnda ndee mé á chuun sahá ná. Ta caja víi a sahá ná tá quiáhva caja da sání nihni jata uva ini pila

ñá ná cuhní rí. Ta mé Ndióxi cùú á jándoho ndivaha ini ñayivi jáchí xójo ndivaha ini mé á xihín ná ta mé á cùú á Ndióxi ñá íin ndéé caja tóco ndihí ñaha. <sup>16</sup> Ta jata jáhmá ndíxi mé a cán xihín nu jihín a ndáa java tuhun já cachí ña já: "Yéhe cùú rey nyú ndaja táhan rey ta cùú y xitoho nyú ná náhnu ndúu nyuyíví", cachí a.

<sup>17</sup> Tá nandihí já naxini i in táto Ndióxi cándichi a jata candii. Ta já nacayuhú cóhó a nyú ndijáá laa, rí ndáchí nu táchí. Ta já nacachi a já xihín rí:

—Naha ndihí ndó taca ndó cajíni ndó ña quiahva Ndióxi nu ndo. <sup>18</sup> Ta ña caxí ndo cacuu a yiquí cuñu ná náhnu, ná sáhndá chuun nyú ñayivi. Ta caxí ndo yiquí cuñu ná cùú sacuahá nu soldado xihín yiquí cuñu ná ndacú. Ta caxí ndó yiquí cuñu cuáyi xihín yiquí cuñu da cándójó jata rí. Ta caxí ndó yiquí cuñu na xica núná mé xihín ná cómí xitoho cuénta saha. Ta quiahvajá caxí ndó yiquí cuñu na valí xihín ná náhnu viti —cachí a.

<sup>19</sup> Tá nandihí já naxini i rí cùú quití quini cán nataca rí xihín ná náhnu, ná sáhndá chuun nyú ñayivi ndúu nyuyíví ta xihín soldado na. Nataca na cani táhan na xihín mé a cánúu jata cuáyi yaa cán xihín soldado mé á. <sup>20</sup> Ta natiiin mé á quití quini cán xihín da cùú profeta tühún, mé da nacaja ña xituhún nu mé rí cùú quití quini cán. Jáchí xihín ña xituhún nasacaja mé profeta tühún cán najándahvi da ñayivi ta najácahan da ná ña ná nani marca mé rí quini cán yiquí cuñu na. Ta já nacaja cáhnu na tinijú yúú rí. Ta naxini i najácaña tacú Ndióxi mé quití quini cán xihín profeta tühún cán ini indayá, ña cùú tátuhun in miní nu cándaha ñuhú cayí xihín azufre. <sup>21</sup> Ta ná java ga cán naxíhi ná xihín yúchú cání ña naqueta yuhú mé a cánúu jata cuáyi yaa cán. Ta ndijáá laa nataca ndihí rí caxí rí yiquí cuñu na janda quiahva nandivaha ini ri.

## 20

*Cáhan Juan sahá in mil cuia tá ná candico ndaa tiñáhá sacuahá*

<sup>1</sup> Tá nandihí já naxini i naruu in táto Ndióxi chí indiví ta ñehe a yávi ña súná yuhú yávi cúná, ña co xínu nu ndíshi nyú cán. Ta cánee in cadena ndeeé ndáha á. <sup>2</sup> Ta natiiin mé á coo quini, rí cùú tiñáhá sacuahá naní Satanás, rí nasañjin janda saha. Ta

nacató a rí xihín cadena cán tixi in mil cuia. <sup>3</sup> Ta najácaña a rí ini yávi cúná nyú nachicají a rí. Ta násacu a in sello yuhú yéhé nu ndácaan ríjá ná a quéta rí jándahvi rí ñayivi nyuyíví janda quiahva ná yaha mé in mil cuia. Ta fá sa nayaña in mil cuia já janí tucu rí caca nuu rí tixi chá tiempo cuítiva.

<sup>4</sup> Tá nandihí já naxini i ndita cuahá tayı́ vahá nu ndúu coo ná candojo chuun ña caja víi ná sahá ñayivi. Ta quiahva já naxini rí cán ndúu ínimá ná nachituhun ná yiquí jímí ná jáchí nacahan ná tuhun Ndióxi, ña ndaa nájánahá Jesúis nyú ñayivi. Ta cùú ná na coó nacaja cáhnu quití quini cán xihín tinijú yúú rí. Ta ni coó nasañan ná ñamaní nani marca rí taan na ni ndáha ná. Ta naxini i nanditacu tucu mé ná cán ta anda jáví mé ná xihín Jesúis nasañomí ná cuénta sahá ñayivi tixi in mil cuia. <sup>5</sup> Ta ná yóho cacuu na nu cuítiva nditacu tucu. Joo java ga ná naxíhi cán camaní nditacu na jáchí ndítahan nu ná candati na janda quiahva ná yaha in mil cuia. <sup>6</sup> Cajíi ini ñayivi, ná nditacu tañu ná janditacu Ndióxi nu cuítí cán jáchí cùú ná ná nandicaxí mé á. Jáchí a cuhun toho na indayá nu ndoho ini ñayivi quini. Ña cán cacuu a tátuhun quivi na chí ivi. Ña yaha xihín ná quéa nduu na jutu caja ndívi ná nu Ndióxi xihín nyú Jesucristo. Ta xihín mé a cacomí ná cuénta sahá ñayivi tixi in mil cuia.

<sup>7</sup> Ta tá sa ná yaha in mil cuia cán já janí Satanás, mé tiñáhá sacuahá nu ndácaan rí ndajá rí cán. <sup>8</sup> Ta já queta rí jándahvi rí ndijáá ñayivi ndúu nyuyíví. Ta jándahvi rí ñayivi ndúu ñuu naní Gog xihín ñuu naní Magog ña ná taca na cani táhan na. Ta ná soldado taca cán cacuu na tátuhun ñutí ndúu yuhú tañuhú xihín ña cuahá cùú ná.

<sup>9</sup> Ta ndicuita nuu ñayivi ndijáá ñuu ñuyíví ta cava yivi na jata tóco ndihí ná cùú cuénta Ndióxi. Ta quiahva já cava yivi ná jata ñuu Jerusalén, mé ñuu ña quihvi ini Ndióxi. Joo jacyu Ndióxi ñuhú cayí indiví ta jándihí a saha ná. <sup>10</sup> Ta mé tiñáhá sacuahá, mé rí najándahvi ñahá cán jácana Ndióxi rí ini in miní nu cándaha ñuhú cayí xihín azufre. Ta sa mé cán cùú nu jácana mé á quití quini xihín da cùú profeta tühún. Ta cán cañuhu na ndoho ini na ñuu ta ndiví andá ama cáá quivi.

Tá caja víi Ndióxi sahá ñayivi

<sup>11</sup>Tá nandihi já naxini i in táyi cahnu, dó yaa cachí nu sácoo Ndióxi. Ta nuu mé á nandiñuhú tóco ndihi ñuyíví xihín indiví ta chí a vaja ga cuu cuní ña. <sup>12</sup>Ta naxini i ndijáá na sa naxihí, na válí xihín na náhnu ndíta na nu íin coo Ndióxi. Tá nandihi já naxini i nanuná nuú java libro. Ta nanuná inga libro nu ndáa quiví tóco ndihi na catacu andá ama cáá quiví. Ta já nacaví sahá ña nacaja in in na sa naxihí cán jachí ini mé libro cán ndáa tóco ndihi ña nacaja in in ñayivi. <sup>13</sup>Ta nandindita tóco ndihi na naxihí ini tañuhú xihín na nanduxu já ná caja víf Ndióxi sahá ndihi na tá quiáhva cáá nacaja in in na cán. <sup>14</sup>Janda jáví a quiví ga ñayivi ta a cíhun ga ínima na nuú nataca ínima na naxihí. Joo najávana Ndióxi ñayivi quiini ini mé miní nu cándaha ñúhu cayí. Mé miní cán cíu á indayá nuú ndoho ini ñayivi ta cíu á tátuhun quiví na chí ivi. <sup>15</sup>Ta mé cán cíu nuú najávana Ndióxi tóco ndihi na co ndáa quiví nu mé libro nu ndáa quiví ñayivi catacu andá ama cáá quiví.

## 21

Tá naxini Juan indiví saá xihín ñuyíví saá

<sup>1</sup>Tá nandihi já naxini i indiví saá xihín ñuyíví saá. Jachí sa nandihi va sahá indiví xihín ñuyíví ña nu cuítí cán. Ta jári tañuhú sa coó ga dó ñúhu viti. <sup>2</sup>Ta yehé, dà cíu Juan naxini i nanuu ñuu Jerusalén saá, ña yii ta naquixi a chí indiví nu íin Ndióxi. Ta tá quiáhva ndató cátutu in ñáñahá tándaha ndiquehe ñá yíl ña quiáhva já ndató nacacutu ñuu Jerusalén cán. <sup>3</sup>Tá nandihi já naxini joho i nacayuhú cóho a chí indiví ta já cachí a já:

—Ndióxi íin a tañu ñayivi viti jáchí cíu ná cuéntá mé á. Ta coo a xihín ná jáchí cíu á Ndióxi, mé á cája cahnu na. <sup>4</sup>Ta mé á yacó ndihi a ticiúí nuú ná ña násacu na. Ta a quiví ga na. Ta ni a cuácu ga na. Ta ni a tálhda ga iní na. Ta ni a ndílhiví ga na. Jachí sa najándihí Ndióxi sahá tóco ndihi ña cán, ña násahijin jihna —cáchí a.

<sup>5</sup>Ta mé a íin coo nu sácoo rey nacáhan ta já nacachi a já:

—Candehé. Yehé ndája saá i tóco ndihi ñaha.

Ta já nacachi tucu a já:

—Cahyún tóco ndihi ña cahán i xuhun yóho jáchí cíu á ña ndáa ta cuu candeeí ini ndó ña —cáchí a.

“Tá nandihi já nacachi tucu a já xihín i:

—Sa najáxinu coo i tóco ndihi ñaha. Yehé cíu u nu cuítí ta yehé cíu u nu ndíhi jáchí janda tá cámání cava sahá sahá tóco ndihi ñaha sa íin va yehé ta coo tá coo i vatí ná ndihi sahá. Ta ndá ná cúní candaa chágá ini sahá yehé já caja i ña ná cuu candaa ini na sahá i. Ta cíu á tátuhun íchí ini na ticiúí, dò caja ña ná catacu na anda ama cáá quiví. Ta coó toho yahví quehe e nu ná sahá do. <sup>7</sup>Ta ndá ná na cana vaha nu tóco ndihi ña núu ñehé tálví ná ndiquehe na tóco ndihi ña yóho nuú i. Ta yehé cacuu u Ndióxi, mé á caja cahnu na ta mé ná cacuu na jahyi i. <sup>8</sup>Joo ná láhá xihín na co cúní candusa tühun Ndióxi xihín na cándají na cíu cuéntá Ndióxi, mé ná cán cíhun na indayá nu cándaha ñúhu cayí xihín azufre. Ta cán cíhun ri ná sáhní ndíji xihín ndijáá ná ndúu xihín na co cíu yíl á ñájishí ña. Ta cán cíhun ndijáá ná caja tá nuú ña tají xihín na caja cahnu yocó xihín na cahán ña tühun. Ña yóho cacuu a tátuhun quiví na chí ivi jáchí ndoho ndiváha ini na ini indayá nu cándaha ñúhu cayí xihín azufre —cáchí a.

Cáhan Juan sahá ñuu Jerusalén saá

<sup>9</sup>Ta ndaja coo in táchan ndíhusa tátó Ndióxi ña ñéhe usá cohó nu ñúhu usá ña nui quiví jatá ñuyíví naxinu a nuú i ta já nacachi a já xihín i:

—Naha quiví yóho candehún. Jachí jánahá i nuun ná cíu cuéntá mé a cíu tátuhun ndicachi loho. Ná yóho cíu ná tátuhun in ñá tándaha ta Jesucristo cíu á tátuhun yíl ña —cáchí a.

<sup>10</sup>Anda já nacaja ínima yíl Ndióxi xihín i ña ndáca tátó Ndióxi yehé já nasaheñ i in yúcu jíco ña cahnu. Ta cán naxini i ñuu Jerusalén ña yíl, ña nanuu chí indiví nu íin Ndióxi cán. <sup>11</sup>Ta mé ñuu cán ndató ndiváha yéhe ña jáchí caja mé á ña ná ndiyehe ña. Ta jínu ña tá quiáhva jínu yuu yahví ndiváha tátuhun yuu jaspe. Ta cíu a tátuhun yutáta jáchí cuu candehé yó chihini a janda inga xoo a. <sup>12</sup>Ta jata mé ñuu cán nacava nuu in náma yuu cahnu ta jíco ndiváha. Ta nasaheñ uxu ivi yéhé a nu ndita in in tátó Ndióxi in in yéhé a. Ta ndica yéhé cán ndáa quiví ndíluxu ivi tálhda na naquixi chichí Israel. <sup>13</sup>Ta uni yéhé sándezhe nu xoo cána candii. Ta uni yéhé sándezhe nu xoo chí norte. Ta uni yéhé

sándezhé nu chí sur. Ta uni yéhé sándezhé nu xoo quéta nuu cándii. <sup>14</sup> Náma yuu ñuu Jerusalén cán násahiñ uxu iví yuu ndúhu saha. Ta jatá yuu cán ndáa quiví ndílhxu iví na apóstol, na naxica tuun xihín Jesús, mé a cíu tátuuhun ndicachi loho cán.

<sup>15</sup> Mé tátó Ndióxi ña cáhan xihín i cán cánee in tóyoó jiuuhun cuáán ndáha ña ná chiquiahvá mé a ñuu cáhnu xihín yéhé a xihín náma yuu ña ndájí jatá. <sup>16</sup> Ta nachiquiahvá a ña xihín tóyoó cán ta in quiahva ndáa ndícomí xoo mé ñuu cán ta chí in quiahva cání a ta in quiahva ndíca ña. Ta quiahva néhe a cíu á iví mil iví ciento kilómetro. Quiahva já cání ña ta quiahva já jícó ña ta quiahva já ndíca ña. <sup>17</sup> Tá nandihi já nachiquiahvá tátó Ndióxi cán náma yuu ndájí jatá ñuu cáhnu cán. Ta quiahva néhe a cíu uni jico comí metro. Ta metro cája chúun tátó Ndióxi cán cíu dó tátuuhun dó chiquiahvá ñayivi ndíu ñuyíví ñaha.

<sup>18</sup> Ta mé náma yuu ndájí jatá ñuu cáhnu cán nacavaha ña xihín yuu jaspe. Ta mé ñuu cáhnu cán nacavaha ña xihín jiuuhun cuáán, ña cíu tátuuhun yutátá ña ví ndívaha ñuu. <sup>19</sup> Ta mé yuu ndúhu ña nacana saha mé náma yuu cán nacacutú a xihín tá nuu yuu yahvi ndívaha. Yuu ndíhu nu cuítí cán nacacutú a xihín yuu naní jaspe. Ta ña cähivi cán nacacutú a xihín yuu naní zafiro. Ta ña cáhnu cán nacacutú a xihín yuu naní ágata. Ta ña cámomi cán nacacutú a xihín yuu naní esmeralda. <sup>20</sup> Ta ña cáhnu cán nacacutú a xihín yuu naní ónica. Ta ña cähijú cán nacacutú a xihín yuu naní cornalina. Ta ña cáhusa cán nacacutú a xihín yuu naní crisólito. Ta ña cáhuna cán nacacutú a xihín yuu naní berilo. Ta ña cähijú cán nacacutú a xihín yuu naní topacio. Ta ña cáhxu cán nacacutú a xihín yuu naní crisoprasa. Ta ña cáhxu in cán nacacutú a xihín yuu naní jacinto. Ta ña cáhxu iví cán nacacutú a xihín yuu naní amatista. <sup>21</sup> Ta ndílhuxu iví yéhé ini ñuu cáhnu cán cíu á uxu iví perla. Ta tá in tá in yéhé cán nacavaha xihín in táláa perla níi. Ta mé cayé cáhnu ñuu cán cíu á ña nacavaha xihín ndinuhu jiuuhun cuáán, ña cíu tátuuhun yutátá jáchi janda inga xoo a tívi.

<sup>22</sup> Ta ni in tühún veñihu coó naxini i ini mé ñuu cáhnu cán. Jáchi mé Ndióxi, xitoho í, mé a ín ndée cája tóco ndihí ñaha

cíu á tátuuhun veñihu na. Ta jári Jesús, mé a cíu tátuuhun ndicachi loho cán cíu á tátuuhun veñihu na. <sup>23</sup> Ta mé ñuu cáhnu cán co xíni ñúhu toho a cándii ni yoq ña ná jándiyehé ñahá jáchi xihín quiqhva yéhé Ndióxi cán jándiyehé a mé ñuu cán. Ta Jesús, mé a cíu tátuuhun ndicachi loho cán cíu á tátuuhun lámpara jándiyehé a ñuu cán. <sup>24</sup> Ndijáá ñayivi, na naquixi ndijáá nación ñuyíví caca nuu na ini ñuu cáhnu cán xihín quiqhva yéhé a. Ta ndijáá na sáhndá chuun ñyú ñayivi ñuyíví xínu ña ñuu cán ta ndiquiahva na tóco ndihí ña cuícá cómí na nu mé ñuu cán. <sup>25</sup> Ta a cándaji toho yéhé a tá ndiví ta coó toho ña ñuu coo cán. <sup>26</sup> Ndijáá ña cuícá xihín ña náhnu cuénta ñayivi ñuyíví yóho cañehe na ña nu mé ñuu cán. <sup>27</sup> Joo ni in tühún ña quini a quíhvi toho ini ñuu cán. Ta ni in ña cája ñaha cándají Ndióxi a quíhvi cán. Ta ni ña cátóo jándahvi ñayivi a quíhvi cán. Ña ndihvi cán cuití va cíu ná ña ndáa quiví nu libro nu ndáa quiví tóco ndihí na catacu anda ama cáa quiví. Mé libro yóho fin a nuu Jesús, mé a cíu tátuuhun ndicachi loho.

## 22

<sup>1</sup> Tá nandihi já nájánahá tátó Ndióxi cán in yuta víi nuu i nu ñúhu ticuít, dó cája ña ná catacu ñayivi anda ama cáa quiví. Ta tá quiahva yéhé yutátá quiahva já yéhe nuu do. Ta cáná dó chí xoo nu fin coo Ndióxi xihín Jesús, mé a cíu tátuuhun ndicachi loho cán. <sup>2</sup> Ta yáha dó mé mahñú ndáa íchi cáhnu mé ñuu cán. Ta in in xoo yuta cán sáhnu yíto, dó cája ña ná catacu ñayivi anda ama cáa quiví. Ta tá yoq tá yoq cíun cuihi nu dó cán. Ta uxu iví tañu cíun cuihi nu do nu cuía. Ta ndáha do cája ña ná ndívaha ñayivi ñuyíví. <sup>3</sup> Ta cán ni in ga ñaha a cíhun chahan jata. Ta Ndióxi xihín Jesucristo, mé a cíu tátuuhun ndicachi loho cán coo a nu sáco rey mé ñuu cáhnu cán. Ta ña cíu cuénta Ndióxi caja cáhnu na mé a cán. <sup>4</sup> Ta cuni táhyí ña nuu mé a ta candaan quiví mé a taan na. <sup>5</sup> Ta cán coó toho ñuu coo. Ña cán quéa ña canduu cán a cíu ñúhu ga ña ná yehe candii jáchi mé Ndióxi, xitoho na jándiyehé a nu ná. Ta cahnda na chuun tátuuhun rey anda ama cáa quiví.

Sa cayati quiví quixi Jesucristo

<sup>6</sup>Tá nandihi já nacachi tátó Ndióxi cán já xihín i:

—Tuhun yóho cíú á ña ndaq ta cuu can-deé inún ña. Jáchí mé Ndióxi, xitoho í, mé a cája ña ná cahan profeta, mé a cán quéa nachindahá a tátó mé a já ná caxi tuhun a nuú na cíú cuénta mé a ña yachí quixi tóco nandihi ña yóho —nacachi a.

<sup>7</sup>Ta já cachí Jesús já:

—Sa saa yachí va yehe. Cajii ini na cándusa tuhun cáhan sahá ña yaha chí nuú, ña ndáa nu libro yóho —cachí a.

<sup>8</sup>Yehe, dà cíú Juan naxini joho i ta naxini nandihi i ña yóho. Ta tá nandihi naxini joho i ña ta tá nandihi naxini i ña já nacaxítí i nuú tátó Ndióxi ña caja cahnu i ña jáchí mé a najánaha ña yóho nuú i. <sup>9</sup>Joo nacahan tátó Ndióxi cán xihín i já nacachi a já:

—A caxítí tohún nuú yehe jáchí ndítahan caja cahnu Ndióxi. Jáchí yehe cíú u dà cája chúun nuú Ndióxi tá quiahva cája chúun mún xihín ñanún, na cíú profeta cuénta Ndióxi xihín na cándusa ña cahnu libro Ndióxi yóho —nacachi tátó Ndióxi cán xihín i.

<sup>10</sup>Tá nandihi já nacachi tucu a já xihín i:

—A chíjehé tuhun sahá tuhun Ndióxi, ña ndáa nu libro yóho jáchí sa nacayati tiempo xinu nuú á coo a. <sup>11</sup>Joo ndá dà cája quini ná caja quini chágá dà tá cúní da. Ta ndá dà coó víi ná caca tiquíni mé dà tá cúní da. Joo ndá dà vaha ná ndíhi ini da caja dà ña vaha. Ta ndá dà nandiquiahva vaha mé ndáha Ndióxi ná ndíhi ini da caca ndacú dà fchi cuénta mé á —cachí tátó Ndióxi xihín i.

<sup>12</sup>Ta já nacachi Jesús já xihín i:

—Candehé. Sa saa yachí vi. Ta vaxi i ñehe e yahvi quehe in in ñayivi. Ta ndiquiahva i nuú in in na ña ndítahan quehe na sahá ña nacaja na. <sup>13</sup>Yehe cíú u nu cuítí ta yehe cíú u nu ndíhi jáchí jandá tá camaní cava sahá sahá tóco ndíhi ñaha sa íin va yehe ta coo tá coo i vatí ná ndíhi sahá —cachí a.

<sup>14</sup>Cajii ini ñayivi, na nandaja vií ínimá jáchí cíú á tátuhun ndícata na jahmá ná já ná cuu ñehe tálvi na caxi na cuíhi nuú yitó cuíhi, dó cája ña ná catacu ñayivi andá ama

cáa quivi. Jáchí xihín ña yóho cuu quihi na chí yéhé ñuu cahnu cán. <sup>15</sup>Joo chí jata mé ñuu cán candoo tóco ndíhi na nacan cája ña níu xihín tóco ndíhi na cája ña tají xihín ndijáa ná ndúu xihín na co cíú yíi ná á ñajlhí na. Ta jata ñuu cán candoo ri na sáhní ndíji xihín na cája cahnu yoco xihín na cahán ña tuhún xihín na jandahvi ñani táhan.

<sup>16</sup>—Yehe cíú Jesús ta nachindahá i tátó mí i já ná caxi tuhun a ña yóho xihín ndijáa ná cíú cuénta mí i, na ndítaca ndijáa veñuhu. Yehe nacaja i ña nacacu rey David ta naquixi i chíchi mé David. Cíú u tátuhun quími cahnu, rí quéta tá natívi —cachí Jesús.

<sup>17</sup>Mé ínimá yíi Ndióxi xihín na cíú cuénta Jesús cana na Jesús ña ná quixi a ta já cache na já:

—Naha quíi ndo.

Ta ndá ná xíni joho ña yóho xíni ñuhú cache ri na cán va:

—Naha quíi ndo.

Ta ndá ná fchi ini ticuúi, na cúní coho dó ná quixi na nu mé á já quiahva ticuúi nu ná, dó caja ña ná catacu na anda ama cáá quivi. Ta coó toho yahvi quehe mé á nu ná saha do.

<sup>18</sup>Ta ña yóho quéa cúní cache i xihín tóco ndíhi ndó, na xíni joho ña ndáa nu libro yóho: Ta ndá ná ná chinúu chágá tuhun jata ña sa cahnu libro yóho já quéa chinúu ri Ndióxi tondohó, ña ndáa nu libro yóho jata ná. <sup>19</sup>Ta ndá ná ná tavá tuhun cahnu Ndióxi, ña ndáa nu libro yóho já quéa tavá Ndióxi quívi ná ña ndáa nu libro mé nu ndáa quívi tóco ndíhi ñayivi catacu anda ama cáá quivi. Ta mé ná cán a cuy quihi na ñuu yíi ndivahva cán ta ni a quiahva Ndióxi nu ná ñaha cahán mé libro yóho sahá.

<sup>20</sup>Ta sáhan Jesús tuhun sahá tóco ndíhi ña yóho já cachí a já:

—Mé a ndaq sa saa yachí vi —cachí a.

Já ná coo. Naha quíi ndó Jesús, xitoho nde.

<sup>21</sup>Ña cúní quéa ná caja cuahá Jesucristo, xitoho í ñamani xihín ndíhi ndó. Já ná coo.